


Quiarinio pueyaso rupaa pa jiyaniijia

Jesucristojiniji pueyano rupaajinia



New Testament in Arabela (PE:arl:Arabela)

Quiarinio pueyaso rupaa pa jiyaniijia Jesucristojiniji pueyano rupaajinia  
New Testament in Arabela (PE:arl:Arabela)

copyright © 2008 Wycliffe Bible Translators, Inc.

Language: Arabela

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Arabela

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

PDF generated using Haiola and XeLaTeX on 4 Mar 2019 from source files dated 29 Nov 2017

90034700-94c6-5f48-ae9c-2383843fed68

## Contents

MATEO . . . . .	1
MARCO . . . . .	68
LUCAS . . . . .	110
JUAN . . . . .	179
MIISHANO . . . . .	230
ROMA . . . . .	297
1 CORINTO . . . . .	327
2 CORINTO . . . . .	360
GÁLATA . . . . .	380
ÉFESO . . . . .	392
FILIPO . . . . .	403
COLOSA . . . . .	411
1 TESALÓNICA . . . . .	417
1 TESALÓNICA . . . . .	423
1 TIMOTEO . . . . .	426
2 TIMOTEO . . . . .	435
TITO . . . . .	441
FILEMÓN . . . . .	445
HEBREO . . . . .	447
SANTIAGO . . . . .	471
1 PEDRO . . . . .	478
2 PEDRO . . . . .	487
1 JUAN . . . . .	492
2 JUAN . . . . .	499
3 JUAN . . . . .	500
JUDAS . . . . .	502
NIQUISHANO . . . . .	505

## MATEO NAAJIOTASANO JESUCRISTOJINIJI

### *Jesucristo supuetanaajiniji pohuatasano* (Lc 3.23-38)

<sup>1</sup> Jesucristoori supuetana Abraham jiuhuacuajinio supueno quiquiaari, supuetana David niquiuhuacuajinionio. Nioori Jesucristo supuetanaa sesaca. Naa quiquiaaritij:

<sup>2</sup> Abrahamri Isaac que quiquiaari. Isaacri Jacobo que quiquiaari. Jacoboori Judá que quiquiaari, tapueyocuaca quejuhuaj. <sup>3</sup> Judaari Fares que quiquiaari, Zara quejuhuaj. Cuno pojori nucuaari quiquiaari Tamar, Judá niquiocua. Faresri Esrom que quiquiaari. Esromri Aram que quiquiaari. <sup>4</sup> Aramri Aminadab que quiquiaari. Aminadabri Naasón que quiquiaari. Naasónri Salmón que quiquiaari. <sup>5</sup> Salmónri Booz que quiquiaari. Booz nucuaari quiquiaari Rahab. Boozri Obed que quiquiaari. Obed nucuaari quiquiaari Rut. Obedri Isaí que quiquiaari. <sup>6</sup> Isaiiri David que quiquiaari. Davidri Israel pueya jiyaniijia quiquiaari. Davidri Salomón que quiquiaari. Salomón nucuaari coteenu quiquiaari Urías niquiocua.

<sup>7</sup> Salomónri Roboam que quiquiaari. Roboamri Abías que quiquiaari. Abíasri Asa que quiquiaari. <sup>8</sup> Asaari Josafat que quiquiaari. Josafatri Joram que quiquiaari. Joramri Uzías que quiquiaari. <sup>9</sup> Uzíasri Jotam que quiquiaari. Jotamri Acáz que quiquiaari. Acázri Ezequías que quiquiaari. <sup>10</sup> Ezequíasri Manasés que quiquiaari. Manasésri Amón que quiquiaari. Amónri Josías que quiquiaari. <sup>11</sup> Josíasri Jeconías que quiquiaari, tapueyocuaca quejuhuaj. Jiyacaritij, Israel pueyapueeri quioosaaquiaari Babilonia jiyajiniara. <sup>12</sup> Babilonia jiyajinia, Jeconíasri tii mueratequiaari Salatiel. Salatielri Zorobabel que quiquiaari. <sup>13</sup> Zorobabelri Abiud que quiquiaari. Abiudri Eliaquim que quiquiaari. Eliaquimri Azor que quiquiaari. <sup>14</sup> Azorri Sadoc que quiquiaari. Sadocri Aquim que quiquiaari. Aquimri Eliud que quiquiaari. <sup>15</sup> Eliudri Eleazar que quiquiaari. Eleazarri Matán que quiquiaari. Matánri Jacobo que quiquiaari. <sup>16</sup> Jacoboori José que quiquiaari. Joseeri María niyaca quiquiaari. Cuno Mariári Jesu nucua quiquiaari. Jesu sesa tarajanuuri quiquiaari Cristo. Nioori pueyano rupaajinia sequeya “Pueyaso jiyarosano Jiyaniijiarano”.

<sup>17</sup> Naacuajitij, Abrahamjiniji, catorce supuetanaari quiquiaari Davidta. David nuhuaji, socua catorce supuetanaari quiquiaari. Jiyacaritij, Israel pueyapueeri quioosaaquiaari Babilonia jiyajiniara. Babilonia jiyajiniara nojori quioosaanu nuhuaji, socua catorce supuetanaari quiquiaari Cristo jaara rasaaquiaari.

### *Jesucristo rasacari pohuatasano* (Lc 2.1-7)

<sup>18</sup> Naa quiquiaariti Jesucristo rasacari: na nucuarano Mariári tari Joseeta camiriquiano quiquiaari. José numuetuqueyaquishacarijia María, Mariári tariucua manajaraca quiriquiaa. Pueyaso Sohuanucuaajaari na manajetequiaari. <sup>19</sup> Neyacarano José jaara ni-ishiquiaari necorano tariucua manajaraca quiya, nojuajaari jiyanohua niishiriojoriquiaa na cartenura jiyasohuaja. Nojuajaari jiyaniquiaari tamonu jiyoteeri na manajoree. Joseeri maninia pueyano quiquiaari. Majaari María na cararonu paniniu quiquiaari pueya niquiara. <sup>20</sup> Naa José niishiriojosacari na cartenura juucuatej, Pueyaso seruuri nocua muetaquiaari na maquenujinia. José sequereeri:

—Supuetana jiyaniijia David niquiuhuacuajinio supueno Joseena, María quia camiri naajaa. Maja quia puerenu. Pueyaso Sohuanucuaajaari na manajorucuaa. <sup>21</sup> Mariári neyanu ranutaniya. Quiocua na sesojore “Jesu”. Sesa na pueya miijiosano tuujunutaniya nojori jiuujajiniijiri. Naaratej, na sesaari quiniutianiya “Jesu”.

<sup>22</sup> Jesu rasaanuuri naa quiquiaaritij, tariucuaaanu pueyara Pueyaso sequesano caminiujunua pohuatasano tohuateenura. Pueyasoori naa na pohuataniquiaari jiyanohua tarijiatej:

<sup>23</sup> “Nia tojiri. Niyacoori manajenutaniya. Neyanu ranutaniyari. Na sesojonutaniyari ‘Emanuel’ ”.

Nioori pueyano rupaajinia sequeya “Pueyaso pata quiyani”.

<sup>24</sup> José niucuasacari, nojuajaari naa miiquiaaritiij taa Pueyaso seru sequequiaari nojuacuajani. María riquiaariiri na tiajinia necocuara. <sup>25</sup> Nojoriiri maja na quiniu quiquiaari juhua seetanujuanaa camitioono, María jaara raquiaari neyanujuaatijia. Jaara na raquiaari, na sesojoreeri “Jesu”.

## 2

### *Niishijiaca tiuquiiijosacari conaajaacua*

<sup>1</sup> Jesuuri rasaaquiaari Belén tiacajinia, Judea jiyajinia. Cuno quishacari, Herodesri jiyaniijia quiquiaari Judea jiyajinia. Jesu rasaaquani nuhuaji, niishijiacaari tiuquiiioquiaari Jerusalén tiacajinia. Nojoriiri Jesu niquniuria tiuquiiioquiaari jiya pajamaji. <sup>2</sup> Nojori tiuquiiijosacari, nojoriiri pueya nequesoreetaquiaari:

—¿Tee Judiocuaca jiyaniijiarano rasaarucuaani? Canaari niishiyani nojuajaari tari rasaarucuaa. Canaari na rijia niqiquianu jiya pajamajini, canaa jiyajinia canaa quishacarijia. Canaari nocua niyareeni canaa shuquiritianura nojuaja, jiyaniijiarano na quiniuucua.

<sup>3</sup> Jiyaniijia Herodes tojishacari naa niishijiaca sequesantej, jiyanojua tacaquiaariiri. Puetunu Jerusalén tiacajinia quiniaajanaari tacaquiaarijuhuj. <sup>4</sup> Nocua, Herodesri Judiocuacaacara seconaa sequequiaari nocua nojori nijionura, Moisés Rootasanojiniji niishitiojanaano. Nojori tiuquiiijosacari nocua, Herodesri naa nequesoreetaquiaari nojori:

—¿Tee Cristo rasanutaniyani, Judiocuaca jiyaniijiarantej?

<sup>5</sup> Nojoriiri na riucuaquiaari:

—Belén tiacajinia rasanutaniyani, niya Judea jiyajiniani. Naa naajiotasano quiyacuajaari Pueyaso sequesano caminiujiunia sequesano. Cuno tariucuaaanu naajiotasano cuajaari naa sequeyatej:

<sup>6</sup> “Belén tiacajinia quiniaanaa, nia tiacaari maja najuhuaa shiitianiyojua tiaca Judea jiyajinia. Cuno nia tiacajiniani, Jiyaniijiajanaa cutaraari supenuutaniya. Nojuajaari socua cutara Jiyaniijiajanaa quiniutianiya tamasa jiyaniijiacajiniji Judea jiyajinijinio. Cunoori maninia jitianutaniya cua pueya, Israel pueya”.

<sup>7</sup> Naa pueya sequesano na tojiniu nuhuajitiij, Herodesri cuno jiya pajamaji nijiono niishijiaca nequesoreetaquiaari jiyasohuaja:

—¿Taacari rijia niquishaacanu seetanujuanaani?

<sup>8</sup> Nojori riucuanu nuhuaji, Herodesri na sapojonuta nojori sequequiaari:

—Nia quiaare Belén tiacajinia. Niocua jacaria nequesoreetasee cuno mueyajiniji. Nia jaara na riuriatate, niocua cua numootecuhua. Janiyacua nocua quiaarejaaniuhua cua shuquiritianura nojuaja.

<sup>9</sup> Niishijiaca tojiniu nuhuaji naa jiyaniijia Herodes sequesantej, nojoriiri quiojiya-reecuahuaj. Jiya pajamaji na niqutiushano rijia niqutiuriiri nojori puetaano. Rijiaari pootia tiuushii tia caco, tee mueya quiriquiaacuajani. <sup>10</sup> Nojori niquishacari rijia, niishijiacaari jiyanojua timitiuciaari. <sup>11</sup> Tiaco tiuquitiaseeri. Conaaja niqutiushii na nucua Maríataari. Conaajaacara mojuquetacoquiaariiri. Na shuquiritiatureeri. Na nuhuaji, niishijiacaari na patotasano casaa riataquequiaari, nareya na niqutiosocoriquiano conaaja. Nojoriiri na niqutioquiaari oro, shanohua jaanutaja catijasocoriquianojuhuj, tamaatiuucua shanohua jaanutajano. Na sesaari tahue rupaajinia “mirra”. <sup>12</sup> Na nuhuaji, Pueyasoori cuno niishijiaca sequequiaari na maquenujiniya, maja Herodescua nojori tacatenuhuara Herodes nojori pohuatanuhuara conaajajiniji. Naacuajitiij, niishijiacaari tamonu nucacuahuatacaciaquiaariuhua na jiyajiniohuara.

### *Egipto jiyajiniara Jesu mashitiasaanujiniji pohuatasano*

<sup>13</sup> Niishijiaca jaara quiaquiaariuhua, Pueyaso seruuri Josecua muetaquiaari na maquenujiniya. José sequereeri:

—¡Quia sanere! ¡Conaaja quia mashitiare na nucuata Egipto jiyajiniara! Quiniqui nia quishii, janiya cuaara sequerohua quiajanijaaatijia. Herodesri Belén tiacajinia na pueya pajetenutaniya conaaja, na motesocoriquiano.

<sup>14</sup> Joseeri sanequiaari. Cuno niucuaaja, conaaja mashitiaree na nucuatajaari Egipto jiyajiniara. <sup>15</sup> Nojori tiuquishacari Egipto jiyajinia, tii quishiiquiaariiri, Herodes cuaara cusooraajaatijia. Nojoriiri naa Egipto jiyajinia quiquiaaritij, tariucuacaanu Pueyaso sequesano tohuateenura maninia, Herodes cusonu nuhuaji. Pueyasoori naa pohuatequiaari na sequenu panishano caminiujiuniacuaja:

“Cua niyanu piiriinjia, Egipto jiyajiniji na tacatenuhuara”.

*Herodes puecootesacari muerasu*

<sup>16</sup> Jiyaniijia Herodes jaara niishiquiaari cuno niishijiacaari na ruuretaquiaari saaja, Herodesri jiyanohua juaaquiaari. Na pueya jiyaroquiaari puetunu naatujoori canuuniyojuajanaa nojori puecoonura Belén tiacajinia, na shocuaqueya tiacajinia quiniaa muerasunio. Naa miiquiaariiri Jesu na monura juucua. Herodesri na pueya sequequiaari cuaara puecoosaaria puetunu shusha roosanojuanaa, mariyata canapuate caapiqui marijia shocoteo quiquiaarijiani. Herodesri naa sequequiaari niishijiaca pohuatanuucua nojuaja, Jesu rijiaari tarijia niquishaaquiaari. Juhuanajuajaari maja caapiqui marijia shocojonu quiquiaari rijia niquishaanujiniji. <sup>17</sup> Naacuajitij, tariucuacaanu Pueyaso sequesano caminiujiunia Jeremías sequesanoori tohuateequiaari. Jeremías sequesanoori naa naajiotasaaquiaaritij:

<sup>18</sup> “Sapuenuari tojishiya Ramá tiacajinia. Jiyanohua taraatia. Raquelri necohuacua sariyacojija. Majaari na paniniu na cumanjiasaanura. Necohuari tari puecoosaarucuaa”.

<sup>19</sup> Na nuhuaji, Herodes jaara cusoquiaari, Pueyaso seruuri Joseecua muetaquiaariuhua na maquenujia, Egipto jiyajinia nojori quishacarijia. <sup>20</sup> Na sequereeri:

—Quia sanere. Mueya quia tacaretaarohua Israel jiyajiniuhua na nucuataja. Mueya monu panijiaaari tari cusonuurucuaa.

<sup>21</sup> Joseeri sanequiaari. Mueya tacaretaquiaariuhua Israel jiyajiniuhua na nucuatajaari. <sup>22</sup> Israel jiyajinia na tiuquishacari, Joseeri numootesaaquiaari Herodes niyanu Arquelaori jiyaniijia quiriqiaa jiyacari, na que niti Judea jiyajinia. Nocuaji, Joseeri puerequiaari quiniqui na quiniuria. Jiyacarijihuaj, Pueyasoori na niishitioquiaari na maquenujia, tamocora na quianura. Naaratej, Joseeri mueya nucua pacuquiaari Galilea jiyajiniara. <sup>23</sup> Galilea jiyajinia nojori tiuquiiijosacari, Nazaret tiacajinia quishiiri. Naacuajitij, tariucuacaanu Pueyaso sequesano caminiujiunia sequesanoori tohuateequiaari nojori jaara naa naajiotaquiaaritij:

“Jiyaniquishaanutaniyari Nazaret tiacajinijinio pueyano”.

3

*Tiuquinijiona Juan pohuatasacari cariiquia jiyajinia*  
(Mr 1.1-8; Lc 3.1-9, 15-17; Jn 1.19-28)

<sup>1</sup> Na nuhuaji, tamonu pueyanoori cariiquia jiyajinia quiquiaari Judea jiyajinia, Jordán moo shuriucua. Nojuajaari sesojosaaquiaari Tiuquinijiona Juan. Nojuajaari Pueyaso sequenu panishano poojotaquiaari pueya niqiuara. <sup>2</sup> Naa pohuataquiaaritij:

—¡Nioojia nia tacatore sesa nia miiniujiniji! Pueyasoori tari nia jiyanooniuhua paniya, na muerasu nia quiniuria seetanujuanaa.

<sup>3</sup> Jiyanohua tarijia, Pueyasoori na pueyano Isaías pohuataniquiaari miriqui na sequenu panishano pueyara. Isaíasri naa na pohuataquiaaritij:

“Pueyano rupaari tojishaaree cariiquia jiyajinia. Naa nacajoriquiaari: ‘Nia jeecanamitiri Jiyaniijia nuu, maja mojuquetunu na quiniuria’ ”.

Tiuquinijiona Juanjanaacuajaari nio tariucuacaanu pohuatasano tohuateequiaari, pueya na niishitijosacari nojori jeenucuanura nojori jiuujia Jesuucuaaji.

<sup>4</sup> Cuno Juan toqueeri camello cajacajiniji shitiasano quiquiaari. Na cajiniocua camaru-cutequiaari shoque sacuanijiasanoori. Na miaquesanoori quiquiaari cariiquia jiyajinia na riuriatasano sequeru, samiyatunio. <sup>5</sup> Pueyari Juancua quiojoquiaari na tojitianura. Queraatia pueyari nocua quiojoquiaari Jerusalén tiacajinijinio, Judea jiyajinijiniojuhuaj, puetunu Jordán moo shocuaqueyajinijiojuanaano. <sup>6</sup> Pueya jaara pohuataquiaari Juan niquiara sesa nojori miijosano, Juanri nojori tiuquinijioquiaari Jordán moojinia, Pueyaso tojjiara nojori quiniu panishacari.

<sup>7</sup> Na tiuquinijosacari pueya, Juanri queraatia Fariseocuaca niquiquiaari nocua ni-jiyano, Saduceocuacano. (Nojoriiri Moisés Rootasanojiniji niishitiojonaa quiquiaari.) Tiuquinijiona Juanri nojori sequequiaari:

—¡Niaaquiiri sesa pueya, juhua sacocua! ¿Cante nia numooteree nia mashiniuria Pueyaso saniitionuucuaaji najaniyani? Nio pa quishacarini, quera Pueyaso saniitosacari jiyanohua na ruuretajaca pueya. <sup>8</sup> Naa jaara seetanujuanaa nioojia tacatore sesa nia miiniujiniji, ¡saaja maninia nia miiri, maja sesa! <sup>9</sup> Majaari nia jiyaniinu niaari Pueyaso muerasu, Abraham niquiohuacuajinio supueno nia quiniuucua. Cua tojiri, Pueyaso jaara paniri, nojuajaari na naata Abraham niquiohuara shipininiu nio saijinijiuhuaj. <sup>10</sup> Nio miriqui sequesano nia tojirijiuhuaj pueyanaa. Naana jaara maninia jajau muetuyaquiri, na camaruuri na nuya na catijasocoriquiano. Naajuhuj, Pueyasoori quera saniitionu-taniya najaniya, na tojiyashijiaca nia quiniuucua.

Tiuquinijiona Juanri pueya sequequiaari socua:

<sup>11</sup> —Janiyari moojinia nia tiuquinijiyani, nioojia nia tacatosacari sesa nia miishanojiniji. Cua nuhuaji, tamonuuri niriqiano cutara. Nojuajaari jiyanohua socua jiyaniijajanaa janiyajiniji. Janiya maara jiyanohua shuquiriaatia quirini, nojuaja jaara cua sequere na seru cua quiniuria quenaaja na sapatu cua jocuanura nera. ¡Nojuajaari jiyaniijajanaa cutara! Nojuajaari Pueyaso Sohuanu tiuquinijionutaniya nioojiajinia, cumaacaraca nia quiniuria, seetanu Pueyaso muerasujuanaa nia quiniuria. Naa jee-quentaniyajaariuhua juhua manitia, sesa nia miishanojiniji. <sup>12</sup> Naa tojitiare miriqui cua sequesano. Trigo jaara rapijiosaare maninia, na camaruuri na queyaroojua, jiyocuaanuui na totinijasocoriquiano. Naa miiquiaari paratu cuaara paara na cocua, na sucuanio, na jajau na racatanura tiajiniaaco. Naajuhuj, cua nuhuaji niniaari tariucua pueca, na tojiti meta na rijionura na quiquiojiniaara, saniniujia na tojiyashijiaca na quejoonura manijinia na saniitionura, tee mani maquesaaquiyacuajani.

*Jesu tiuquinishacari moojinia*

*(Mr 1.9-11; Lc 3.21-22)*

<sup>13</sup> Na nuhuaji, Jesuuri tiuquiquiaari Galilea jiyajiniji Tiuquinijiona Juancua, Jordán moojinia. Tiuquinijiona Juan sequeeseeri:

—Cua tiuquinirijia.

<sup>14</sup> Juanri saaja na sequeree:

—Maja Jiyaniijianaa. ¡Quiaa cutaraari maninia pueyano! ¿Casaara cucua quia nimiaa cua tiuquininiuria quiajaniya moojiniani? ¡Cua tiuquiniri juhuari cutara!

<sup>15</sup> Jesuuri saa sequereejaa:

—Quiarjia quia miiri cua panishano. Cua tiuquiniri naajaa. Maniniaari pa miiniuria puetunu Pueyaso panishanojuanaa.

Naacuajitij, Juanri na tiuquiquiaari. <sup>16</sup> Jesu jaara tiuquinishaaquiaari, nojuajaari ritia tacaquiaari moojiniji. ¡Jiyacaritij, jiya cajiniocuaari riatequee! Jesuuri Pueyaso Sohuanu niquiquiaari nocua roseyano juhua mococoonu niquishano. Nocua tiuushiiri.

<sup>17</sup> Jiyacaritij, jiyocuaanuui Pueyaso rupaari tojishaaree naa sequeyano:

—Nioori cua Niyanuniyojua. ¡Na shuquiritiaa jiyanojuanijia!

*Samaruhua jiyaniijia saniniujiushacari Jesu*

*(Mr 1.12-13; Lc 4.1-13)*

<sup>1</sup> Na nuhuaji, Pueyaso Sohuanuuri Jesu jiyataquiaari cariiquia jiyajiniara, Sesaaca saniniujiushocoriquiano cuniqui.

<sup>2</sup> Majaari quenaaja Jesu miaquenu quiquiaari. Cuarenta juuca, cuarenta niucua na shoconujuquiaari na miaqueyaquishacari. Na nuhuaji miaajequiaariiri. <sup>3</sup> Sesaacaari jiyacari nocua niqiaari na saniniujiuniuria. Jesu sequeeseeri:

—Quiaa jaara seetanujuanaa Pueyaso Niyanu quiri, nio sai quia jataniri panra. Quiocua na sarohua.

<sup>4</sup> Jesuuri saaja na riucuaaree:

—Maja. Pueyaso Rupaajiniacuajaari naa naajiotasano quiyatej:

“Pueyanoori maja na naatanu saa miaquesanoocuaaja. Seetanujuanaa saminio quia cutaraari na tojishacari puetunu Pueyaso Rupaajanaa”.

<sup>5</sup> Na nuhuaji, Sesaacaari Jesu jiyataquiaari Jerusalén tiacajinia. Na nujuatequiaari jiyocuacaanuuri, Pueyaso Secojoua tia cacojiria. <sup>6</sup> Na sequereeri:

—Quiaa jaara seetanujuanaa Pueyaso Niyanu quiri, niiquiji quia jaataare jiyocua. Pueyaso Rupaajiniacuajaari naa naajiotasano quia:

“Pueyasoori na seya sequenutaniya na cojuanura quiajaniya. Nojoriiri quia quianutaniya, maja quenaaja saajiaacua quia jiriataaquiniucuaaji”.

<sup>7</sup> Jesuuri na riucuaaree:

—¡Maja! Pueyaso Rupaajinia, naa naajiotasanoori quiyajuhaaj:

“Maja quia saniniujiuniu quia Jiyaniijia Pueyaso”.

<sup>8</sup> Na nuhuaji, Sesaacaari Jesu tacaniquiaari socua jyanohua jiyaconaja tuhuananucua. Cuniquiji na niqitirii puetunu jiya jiyaniijiacajanaari. Jyanohua cumaacaraca quijiaca. Jyanohua queraatia casamiriaca quijiacajuhaaj. Jyanohua maninia niqishano.

<sup>9</sup> Jesu sequereeri:

—Janiyacua quia jiyatere jiyaniijijanaara nojori nitini, quiaa jaara cua cariquimijaji mojoquetare quia shuqiritianura janiya, quia jiyaniijia cua quiniuria.

<sup>10</sup> Jesuuri na sequeree:

—¡Niiquiji quia quiaare Satanásnaa! Naa naajiotasano quiyacuaajaari Pueyaso Rupaajinia:

“Saaja quia Jiyaniijia Pueyaso quia shuqiritiare cutara. Saaja nojuaja quia tojiri”.

<sup>11</sup> Na nuhuaji, Sesaacaari na tarinitiaquiaari. Jiyacaritij, Pueyaso seyari Jesuucua niqiaari na mianuutenura.

*Jesu coteesacari poonijionu Galilea jiyajinia*

*(Mr 1.14-15; Lc 4.14-15)*

<sup>12</sup> Jesu niishishacari Tiuquinijiona Juan nujuatesaarucuaa nujuatejojuajinia, nojuajaari Galilea jiyajinia quiaquiaariuhua. <sup>13</sup> Jesuuri Nazaret tiacajiniji pacuquiaari Capernaum tiacajinia na quiniuria, caminia shuriucua. Cuno jiya quiquiaari Zabulón niqiuohuacuajinio supueno pueya jiya, Neftalí niqiuohuacuajinio supueno pueya jyanio. Zabulón, Neftalínio, nojoriiri supuetana Jacobo niqiuohua quiquiaari. <sup>14</sup> Jesu quishacari cuno jiyajinia, naa tohuateequiaariiri taa tariucuaaanu Pueyaso sequesano caminiujunia Isaías pohuataquiaari cuno jiyajinijicuaajani. Nojuajaari naa pohuataquiaari Pueyaso niishitiosano nojuaja taa na nuhuaji na sequesano tohuateenutaniyani:

<sup>15</sup> “Zabulón pueya jiya, Neftalí pueya jyanio, cunoori caminia shuriuquiumia neteja nuicama quia, mariyata Jordán moo tamajiria. Cunoori mariyata Galilea jiya, tee taucuaa quiyacuaajani. <sup>16</sup> Cuno jiyajinia quiniaari ninishiqui quijiaca quiquiaari. Quiarijia saniniuuja, nojoriiri jiuujia Cuhuatana niqiriucuaa. Nojoriiri cusonu pueretjuaca quiquiaari tarijia. Quiarijia cutara nojoriiri cuhuatasaaree nojori pueryaquiniucuaaji”.

<sup>17</sup> Jiyacaritij, Jesuuri Pueyaso rupaa pohuatanu coteequiaari. Naa sequequiaariiri:

—Nioojia nia tacatore sesa nia miiniujiniji. Pueyasoori nia paniya na pueya nia quiniuria.

*Jesu saquiriojosacari sapitiaaja ritianaa*

*(Mr 1.16-20; Lc 5.1-11)*



<sup>18</sup> Jesuuri Galilea caminia shuriuquioco rucuanajoriquiaa. Jiyacaritij, Pedro niquiriiri, tarajanu Andrésnio. Pedro sesa quiquiaarijiuhuj Simón. Nojoriiri sapitiaaja ritianaa quiquiaari shiyaruta. Nojoriiri jiyacari shiyaru jaquerooritariquiaa. <sup>19</sup> Jesuuri nojori sequeree:

—¡Miji! Cua tarajare. Cua pueyara nia quiri. Janiyacua nia jiyatere pueya quioojuara saniniunijia, juhua sapitiaaja quioonaa.

<sup>20</sup> Nojoriiri na shiyaru tiujiaquiaari ritia. Jesuta quiojiyareeri.

<sup>21</sup> Jesuuri shiitianiyojua socua rucuanequiaari na tacoji. Socua caapiqui pueya riuritataseeri. Nojoriiri quiquiaari Santiago, tarajanu Juannio. Cuno pojori queeri quiquiaari Zebedeo. Nojoriiri na queta quiriquiaa botejinia. Na shiyaru cushipirijionuuriquiaari. Jesuuri Santiago sequeree Juannio, na pueyara nojori quiniurijuhuj. <sup>22</sup> Nojoriiri ritia bote tiujiaquiaari na queta, Jesuta na quiojonura.

*Jesu niishitijosacari queraatia pueya  
(Lc 6.17-19)*

<sup>23</sup> Jesuuri puetunu Galilea jiyajiniajanaa rucuanajoquiaari na saquiriojosano pueyata. Pueyaso secojojua tiacajiniaqueya niishitiojoriquiaari. Pueyaso rupaa pohuatariquiaari taa Pueyaso jiitianu paniya maninia na pueyani. Puetunu tamaatia cusonuunu jiitia-cojuajanaa naatanijioquiaariiri. Puetunu nootunejaca pueyajanaa shaataquiaariijaari-uhuj. <sup>24</sup> Naa maninia na miishanoori poojotasaquiaari puetunu Siria jiyajiniajanaa. Naaratej, pueyari Jesuucua patootaquiaari puetunu cusosuhujajanaa, puetunu tamaatia cusonu jiitijacajanaano, cumatacuruhua cusosuhujuhuj, nootunejacio. Nocua jiyatasaquiaarijiuhuj samaruhuaraca quijiaca, canashiyaquiji cusojonuujuacano. Jesuuri nojori naatanijioquiaari puetunujuanaa. <sup>25</sup> Jiyanojua queraatia pueyari Jesu nuhujiquiaari Galilea jiyajiniji, Decápolis tiacajinijinio. Na nuhujiquiaarijiuhua Jerusalén tiacajinijinio, Judea jiyajinijiniojuhuj, mariyata Jordán moo taquijiria jiyajinijinio.

5

*Jesu pohuatasacari Pueyaso rupaa tuhananujiniji  
(Lc 6.20-23)*

<sup>1</sup> Jesu niquishacari jiyanojua queraatia pueya nocua niyano, nojuajaari tuhananucua tacaquiaari tiji na cajiniuria. Na saquiriojosano pueyari nocua catecanoquiaari.

<sup>2</sup> Jesuuri nojori niishitiojonu coteequiaari. Naa na pueya sequereeri:

<sup>3</sup> —Shuquiriaatia quijiaca cutaraari noo pojori, canapuate niishiyani noojia sesa quiya. Nojoriiri Pueyaso pueyara quiriqiano, pueyaracaanu na jiitianura nojori.

<sup>4</sup> 'Shuquiriaatia quijiaca cutaraari noo pojori canapuate taraatia quiyani sesa na miiniuucua. Pueyasoori nojori cumanijianutaniya.

<sup>5</sup> 'Shuquiriaatia quijiaca cutaraari noo pojori, canapuate maja tama nerajaaja niishiriojuacani. Nojoriiri nio jiya camaruhua quiniutianiya, taa Pueyaso sequequiaaricujani.

<sup>6</sup> 'Shuquiriaatia quijiaca cutaraari noo pojori, canapuate maninia quiniuucua jiaatiaa jiyanojua, taa pa jiaatiaacuaa miaquenuucua. Pueyasoori maninia quijiacara nojori jiyatenutaniya.

<sup>7</sup> 'Shuquiriaatia quijiaca cutaraari noo pojori, canapuate naquiya miishanoocua taraajejani. Pueyasoori nojoriicua taraajenutaniyajaacuhuj.

<sup>8</sup> 'Shuquiriaatia quijiaca cutaraari noo pojori canapuate maninia jiuujiaracani. Nojoriiri Pueyaso niqiniutianiya cutara.

<sup>9</sup> 'Shuquiriaatia quijiaca cutaraari noo pojori, canapuate pueya jiyanootiotejani. Nojoricujajari Pueyaso muerasu quiniutianiya.

<sup>10</sup> 'Shuquiriaatia quijiaca cutaraari noo pojori, canapuate naquiya miishanoni, Pueyaso panishano nojori miiniuucua. Pueyasoori nojori jiitianutaniya pueyaracaanu shuquiriaatia, na muerasu nojori quishacari.

<sup>11</sup> 'Shuquiriaatia quijiaca nijaniya, tamasaca jaara nia macaatiri cua tojtiajaca nia quishacari, naajuhuj, nojori jaara miya naquiya nijaniya. Naajuhuj, niaari shuquiriaatia quijiaca, nojori jaara saquiriojotare niaacuara na sauponuta, maninia nia tojiniuucua janiya. <sup>12</sup> Niaa jaara naa miishaaretej, jiyanhua nia timiquiore. ¡Shuquiriaatia nia quirijuhuj! Pueyasoori cunora jiyanhua maninia nia miiniutianiya jiyocuacaanu nia quishacari nata. Tariucuacaanu Pueyaso sequesano caminiujiuniaacuajaari naa naquiya miishaaquiaarijuhuj, nia supueyaquishaacarijiyojua.

*Pueyaso muerasuuri juhua shoni quiya mijiria, juhua ninishiqui cuhuatanaajuhuj*  
(Mr 9.50; Lc 14.34-35)

<sup>13</sup> 'Mijiria, niaari juhua shoni quiya, mijiria quiniaa mariqui socua seseyareeri. Shoni jaara na tiquiriiquia jatama, ¿maatucua taa tiquiriiquiara quiriouani? Maja na naata. Shoni jaara naa quiritij, najuhuaana quiyari, shaaca. Jiyano shoni cuara jataaaria nuujinia, pueya rapijosocoriquiano.

<sup>14</sup> 'Naajuhuj, niaari juhua ninishiqui cuhuatana mijiria quiniaara. Tiaca jaara tuhananuucua quiri, majaari na naata na jamaaniu. <sup>15</sup> Naajuhuj, pueya jaara samaritiu noshitiri, jiyocuacaanu morotashiyari, tiaco na cuhuatanura maninia, pueya niquniuria maninia nocuaji. Majaari samaritiu niataaanu conatu cariquiaco. <sup>16</sup> Naajuhuj, nijaniya cuara maninia miiria pueya niqiara. Maninia nia miishacari, niaari pueya cuhuataa juhua samaritiu. Naa maninia miijia nia quishacaritij, pueyari Jiyocuacaanu Quijia nia Que Pueyaso maniniuhuaqueetanutiya.

*Jesu niishitiojosanoori tariucuacaanu Moisés Rootasanojinji*

<sup>17</sup> 'Majaari nia jyaniniu janiyari niqiaarini Moisés Rootasano cua tarinitiniuria nijaniya, Pueyaso sequesano caminiujiuniaa rootasano. Maja. Niquiaari cutaranijia puetunu cuno rootasanojuanaa cua tojiniuria, cua tohuateenurajuhuj. <sup>18</sup> Pueyanaa, seetanujuanaa nia sequeyanijia. Nio jiya quishacarijia, jiya cajiniocuanio, majaari quenaaja niqiriyatu naashanonyojua Pueyaso Rupaajiniji shaajetesaanu quiniutianiya. Majaari na shaajetesaanu quiniutianiya puetunu Pueyaso naajiotesaanojuanaa cuara tohuateerejaatijia. <sup>19</sup> Naaratej, tamonu pueyano jaara jyaniri tamonu rootasano tariucuacaanu Pueyaso Rupaajiniji najuhuaana sequesano, nojuajaari cocuaatia miya. Nojuaja jaara cuno tariucuacaanu rootasano tojiyaquiri, cuno pueyanoori socua rerequetesano quiniutianiya narta Pueyaso muerasujinijinio. Naajuhuj, nojuaja jaara pueya niishitiojore nojori tojiyaquiniuria cuno rootasano, cuno pueyanoori socua rerequetesano quiniutianiya puetunu narta Pueyaso muerasujinijianaa. Saniniuujia, cante tariucuacaanu Pueyaso rootasano tojiqiaanjia, na niishitiojoquiaa tamasaajariuhuj, cuno pueyanoori socua tojishano pueyano quiniutianiya Pueyaso shuriucua jiyocuacaanu. <sup>20</sup> Nia numooteyanjia, niaa jaara quiyaquiri socua maninia quijiaca Fariseocajiniji, Moisés Rootasano niishitiojonaajinijinio, majaari Pueyaso muerasu nia quiniu quiniutianiya.

*Jesu niishitiojosano maja pa juaaniuria*  
(Lc 12.57-59)

<sup>21</sup> 'Niaacuajaari tojiqiaari taa pa supuetanaa sequesaaquiaaricujani: "Maja monu. Cante pueyano monani, nojuajaari nequesoreesaanutaniya". <sup>22</sup> Janiyari saniniuujia nia niishitiojyani, cante narta pueyanota juaajiani, cunoori nequesoreesaanutaniya. Naajuhuj, cante narta pueyano saarijiojuani, cunoori nequesoreesaanutaniya jyanijianucua niqiara. Naajuhuj, cante narta pueyano sesacareeni, cunoori quera jatashiya mani quiqiojinia, pueyaracaanu saniitiosocoriquiano.

<sup>23</sup> 'Naacuajitij, nia niqutionu panishacari Pueyasora nia casaa, niaa jaara jiyacari niishiqui, quiaari quiarta pueyano juaatiriucuaa quiocuara, ritia quia tiujiare cuniqui quia niqitiosocoriquiano Pueyasora, catijiaja shuriucuanu. <sup>24</sup> Quiarta pueyanota quia jyanootioocoocua coteenu. Na nuhuj cutara quia naata niqutionu quia casaa Pueyasora.

<sup>25</sup> 'Tamonu jaara quia jiyataa nequesoreenaacua, sesa quia miiniuucua nojuaja, maninia quia pohuatare ritia nojuaja, taa quia miiniutianiyani na jiyanooniuria quia-janiya. Ritia nia jeecatoore nucuaco nia quiasacarijia, quiaa mariqui nequesoreena niquitiosaareeri. Nequesoreena naasucuaari quia niquitionutaniya nujuatejojua camarnu saniniuujia. Nojuajaari quia nujuatenutaniya nujuatejojuaajinia. <sup>26</sup> Seetanujuanaa nia sequeyanijia, majaari quia tohuatanu quiniutianiya, quiaa cuaara niquitiorejaatijia puetunu na sequesano cumaneecajanaa quia cumaneecajiniji.

*Jesu niishitijosano, maja pa camishoo maajiicua pa jiaatiaaquiniuria*

<sup>27</sup> 'Niaacuaajaari tari tojiquiaari nio tariucuaaanu rootasano: "Maja tamonu niquiocua numuetucunu". <sup>28</sup> Janiya cutaraari nia sequeyani, pueyano jaara na camishoo maaji niquiri nocua na jiaatianuta, cunoori juhua na numuetucuree tari noojiajinia.

<sup>29</sup> Na nuhuaji, Jesuuri nio miriqui sequesano sequequiaari pueyara, jiyanoohua na niishitiojonura nojori:

—Naaratej, quia miaquetajara quia namijia jaara sesa miitiri quiajaniya, quia namijia quia jiatere. Tamocora quia jatere. Quiajanियara socua maninia cutaraari namijijiu quia quiniuria, maja quia jatasaanura maní quiquiojinia puetunu quia cuaqueyatajanaa. <sup>30</sup> Naajuhuj, quia miaquetajara quia numatu jaara quia miitiri sesa, quia jiyatarenaj. Tucuacaanu quia jatere. Socua maninia cutaraari quifara quia jiyatanura quia numatu, maja puetunu quia cuaqueyatajanaa quia jatasaanura manijinia, pueyaracaanu quia miiniuria naquiya tii.

Naa na pohuatasacaritij, Jesuuri pa niishitiojiya maja pa tojiniuria poojia panishano, sesa na miitiniuria pa cuaqueya.

*Jesu niishitijosano maja pueya cartenura necocua*

*(Mt 19.9; Mr 10.11-12; Lc 16.18)*

<sup>31</sup> Jesuuri naa niishitiojoquiaarijuhuaj:

—Pa supuetanaari naa rootasaaquiaarijuhuaj: "Pueyano jaara necocua cartere, maaji cuaara niquitiosaaria naajionee, pueya niishiniuria neyacaqui na carteree".

<sup>32</sup> Janiyari saniniuujia nia sequeyanijia, pueyano jaara necocua cartere, sesa miya Pueyaso niquiaraari. Naacuajitij, na cartesano maajiiri tamonuta quiniutianiya na nuhuaji. Cunoori sesa Pueyaso niquiara. Pueyano jaara niishiri necocuaari tamonu caya numuetucujutequiaa, saa cunoraja cutara na naata na cartenu. Pueyanoori sesa miyajuhuaj, jaara cartesano maaji camiri.

*Jesu niishitijosano maja pa sapojonura*

<sup>33</sup> 'Niaari tarijia tojtiaquiaari taa pa supuetanaa rootasaaquiaarini. Naa rootasaaquiaariiri: "Majaari nia jatanu nia sequesano, niaa jaara sequere: 'Seetanujuanaari cua sequesano. Pueyasocuaajaari niishiya majaari cua sapojonu'".

<sup>34</sup> Janiya cutaraari nia sequeyani, nia sequesano jaara seetanujuanaa sequesano quiri, saaja nia sequere "jaa". Jaara seetanujuanaa quiaquiri nia sequesano, saaja nia sequere "maja". Majaari nia sequesano nia maatenu najuhuana naatej: "¿Janiyate sapojouani? Cua rupaari juhua jiya cajiniocua. Maja na jatanu quiniutianiya". Majaari naa sequenutej pueyanaa. ¿Majateeri nia niishiniu, jiya cajiniocuaari Pueyaso quiquio? <sup>35</sup> Naajuhuj, ¿casaara nia sequequiaa najuhuanani: "Cua sequesanoori juhua pa jiya? Majaari na shaajenu quiniutianiya". Maja naa sequenutej. Pa jiya, cunoori Pueyaso niaja na niohuaca. Naajuhuj, ¿casaara nia sequequiaani: "Cua sequesanoori juhua Jerusalén tiaca? Pueyaracaanu quiniutianiyari". Maja naa sequenutej. Jerusalén tiacaari pa Jiyaniijia Pueyaso tiaca. <sup>36</sup> Naajuhuj, ¿casaara nia sequequiaa naa najuhuanani: "Quia naataari cua sequesanoocua tiuuniu, cua naca quishacarijia"? Majaari naa sequenutej pueyanaa. Niaa jaara naa sequeretej, nia niishiri, majaari nia naata quenaaja niquimi nia muesujinijinio nia jiyatenu taariuria, muerumuecaranio. <sup>37</sup> Naaratej, pueyaracaanu saaja seetanujuanaa nia sequere "jaa", "maja". Cante na sequesano maatejani, cunoori Sesaaca niishitijosano niajaniya.

*Jesu niishitiojosano maja pa naminiuria  
(Lc 6.29-30)*

<sup>38</sup> 'Niaacuajaari tari rootasaaquiaari: "Pueyano jaara tamonu pueyano namijia cocuartare, na namijia cuaara cocuartasaariajuhuaj, pueya nequesoreena niquiara. Naajuhuj, pueyano jaara tamonu pueyano quiaja shaatare na pishacari, na quiaja cuaara shaatasaariajuhuaj". <sup>39</sup> Janiyari saniniuujia nia sequeyani, pueyano jaara quia miiniu paniri sesa, quia cuaqueya quia tarinitiare nera. Majaari na nujuatanu. Naacuajitij, pueyano jaara quia maseca piri, majaari juaaniu. Quia jiyanoori. Nojuaja jaara socua quia pirihoa, quia jiyanoori. Majaari na naminiu. <sup>40</sup> Pueyano jaara quia toque jaariutianu paniri, nera quia tarinitiare. Cuaara na paara. Mariyata quia cushishano shiniquiaacuaji quia niquitiore nareja. Majaari jamueja quia quiniu. <sup>41</sup> Tamonu camarnu jaara quia sequere na naacutanura na casami quia jatanura nuu cajiniocua, majaari na tarijonu. Saniniuujia, shuquiriaatia quia naacutare na casami jatanura socua tucuacaanu na sequesanojiniji. <sup>42</sup> Tamonu pueyano jaara quia casami masenu paniya nera, quia niquitiore nareja. Naajuhuj, tamonu pueyano jaara quia casaa panu paniya nareja rupaquijia, quia niquitiore. Majaari na ruuretenu. Capora quia quiri.

*Jesu niishitiojosano pa paraca pa paniniuria  
(Lc 6.27-28, 32-36)*

<sup>43</sup> 'Niaacuajaari nio tariucuacaanu sequesano tojtiaquiaarjiuhuj: "Quia shuriucua quinia quia paniri. Saniniuujia, majaari quia paraca quia niquiniu". <sup>44</sup> Janiya cutaraari nia sequeyani, nia paraa nia paniri. Nia sesacaja pueya nia maniniuuaqueetare pueya niquiara. Pueyano jaara niaacuara saquiriojotare na sapojonuta, nocuara nia secojore Pueyaso. Sesa nia miiniaacuara nia secojorejuhuaj. <sup>45</sup> Naa maninia nia miishacaritij, niaari seetanujuanaa jiyocuacaanu Quijia nia Que Pueyaso muerasu quiniutianiya. Naa niishiri, Pueyasoori pananu muetaniquiaa sesa pueyara na janura, maninia pueyara na janurajuhuj. Pueyasoori maru nitiquiaa maninia miijiaca pueyara, sesa miijiacarajuhuj, maninia nojori nataacuaca moritianura. <sup>46</sup> Naa jaara saaja nia panijiaca pueya panijia quiri quia, ¿Pueyasoteeri cunora nia shuquiritianutaniya, socua na casaajiniji na niquitionura nijaniya? Maja. Sesa miijiaca pueyani, noo pojori canapuate cumaneeca masejoquiaa na sapojonutani, nojoriiri maninia miiquiaa na panishano pueyajuhuj. <sup>47</sup> Naa jaara saaja nia panishano pueya saruhuataquiaa, ¿niaateeri cunora maninia miijiaca quia Pueyaso niquiara? Maja. Pueyaso niishiyashijiaca pueyari naa maninia miiquiaa na panishano pueyajuhuj. <sup>48</sup> Naaratej, maninia miijiaca nia quiri juhua jiyocuacaanu Quijia nia Que Pueyaso. Nojuajaari seetanujuanaa maninia miijia. Rimiajata miyashijia cutara.

6

*Jesu niishitiojosano saaja maninia pa miiniuria Pueyaso niquiara*

<sup>1</sup> Tama nia cuaqueyajaaja nia cojuare maja maninia nia miiniuria saaja pueya niquiara, pueya maniniuuaqueetanura nijaniya. Pueya jaara nia maniniuuaqueetare maninia nia miiniuucua, nia Que Pueyasoori maja na niquitionu quiniutianiya nijaniya socua, maninia nia miiniuucua. <sup>2</sup> Naaratej, nia jaara casamiijiuniucua pueya niquitionu paniri nareja nia casamijiniji, majaari juhua sesa jiuujiaraca pueya nia miiniu. Cuno pojoriiri pueya numootequiaa na niquitionu panishacari na casaa, puetunu pueyajanaa shootianura nojori. Cuno pojoriiri naa miiquiaaqui Pueyaso secojojua tiacajinia, tiacaacacojuhuj, pueya maniniuuaqueetanura nojori. Seetanujuanaa nia sequeyanijia, cuno pojoriiri tari maseree narta pueya maniniuuaqueetanu. Majaari nojori masenu quiniutianiya socua Pueyasojiniji naa maninia nojori miiniuucua. <sup>3</sup> Saniniuujia, nia jaara nia casaajiniji casamiijiuniucua niquitionu paniri nareja, quia mueneca cuaara niishiyaquiiira quia niquitiosano quia miaquetajata. <sup>4</sup> Naa miriqui sequeree nijaniyanijia cua niishitiojonura nijaniya, jiyasohuaja nia miiniuria puetunu maninia nia miiniu panishanojuanaa. Naacuajitij, saaja nia Que Pueyasoori jiyasohuaja maninia nia

miishano niishiniutianiya. Naaratej, nojuacuajaari nia niqutionutaniya na casamijiniji, na shuqiritiasacari nijaniya.

*Jesu niishitijosano naa pa secojonura Pueyaso*

*(Lc 11.2-4)*

<sup>5</sup> 'Nia secojosacari Pueyaso, majaari juhua sesa jiuujiaraca pueya nia miiniu. Cuno pojoriiri Pueyaso secojonu maniniucuaquiaa na nujanuta pueya niqiyara, saaja pueya shootianura nojori. Nojoriiri naa secojonuuquiaa Pueyaso secojojua tiacajiniatej, tiaca nuucujinijuhuj, tee queraatia pueya quiyacuajani. Seetanujuanaa nia sequeyanijia, cuno pojoriiri tari maniniuhuaqueetasaareecuaja. Jiyano pueyatej, majaari nojori masenu quiniutianiya socua Pueyasojiniji. <sup>6</sup> Nijaniya saniniuujia, nia secojosacari Pueyaso, nia sohuacamara nia tiuquiri. Nia tiotiu nia tiore. Na nuhuaji, cuniqui nia Que Pueyaso nia secojore jiyasohuaja tamajaaja. Nia Que Pueyaso niqishacari naa jiyasohuaja nia miishanotej, nojuaja cutaraari nia niqutionutaniya na casamijiniji, na shuqiritiasacari nijaniya.

<sup>7</sup> 'Nia secojosacari Pueyaso, majaari nia sequesano pacutejojua nia quiniu puera, juhua Pueyaso niishiyashijia. Cuno pojoriiri jiyaniya Pueyasoori nojori tojiniutianiya pueyaracaanu na pacutejosacari tariucua na sequesano. <sup>8</sup> Majaari juhua nojori nia miiniu. Pa secojiyaquishaacarijijojua, pa Que Pueyasocujaari tari niishiya casaa pa panyani. <sup>9</sup> Naaratej, naate nia secojore:

"Canaa Quena, quiaa cutaraari jiyocuacaanu Quijia. Pueya cuara niishiiria quiaari saaja maninia quijia. <sup>10</sup> Quia quiri canaa Jiyaniijia, canaa quia jitianura. Quia panishano cuara miishaaria mijiria, taa jiyocuacaanu na miishaquiaacuani. <sup>11</sup> Canaa quia niqitiore canaa miaquesocoriquiano quiarijiani. <sup>12</sup> Canaa quia jiyanoori sesa canaa miishanojiniji, taa canaa jiyanooquiaa tamasacacuani, sesa nojori miishacari canaa. <sup>13</sup> Majaari canaa quia shanacunu canaa saniniuujishaanura sesa canaa miiniuria. Saaja canaa quia cojuare cutara Sesaacuajia. Saaja quiajaniya cutaraari seetanujuanaa Jiyaniijijanaa. Quiaa cutaraari puetunu cumaacaracajanaa. Quiaari shanohua shacantuuca quijia cutara. Quiaari naa quijia pueyaracaanutej. Tariucujaj".

<sup>14</sup> 'Naatej, niaa jaara jiyanoori tamasa, sesa na miishacari nijaniya, nia Que Pueyasoori nia jiyanooniutianijuhuj. <sup>15</sup> Saniniuujia, niaa jaara tamasa jiyanoyaquiri, nia Que Pueyasoori maja na jiyanooni quiniutianiya nijaniyajuhuj sesa nia miishanojiniji.

*Jesu niishitijosano taate pa naata miaqueyaquiniuni Pueyaso pa secojonura*

<sup>16</sup> 'Niaa jaara miaqueyaquia Pueyaso nia secojonura, majaari macuhajeconu pueya niqiyara, taa sesa jiuujiaraca pueya miiquiaacuani. Nojoriiri naa miiquiaatej, pueya niishishocoriquiano nojori miaajeya. Naa pueya shootiasacari nojoritij, seetanujuanaa nia sequeya cutaranijia, narta pueyari tari nojori maniniuhuaqueetareecuaja. Majaari Pueyasojiniji nojori masenu quiniutianiya socua. <sup>17</sup> Nijaniya saniniuujia, nia miaqueyaquishacari Pueyaso nia secojonura, nia jiquioco nia jeequere. Nia canuure nia muesu, taa nia miiquiaa pueyaracaanucujani. <sup>18</sup> Naa nia miiri Pueyaso nia secojosacari, maja pueya niishiniuria cunoqui miaajeya. Saaja pa Que Pueyaso cutara cuara niishiiria nia miishano. Naacuajitij, nojuajaari nia niqutionutaniya na casamijiniji na shuqiritianuucua nijaniya.

*Pa casami pa racatare jiyocuacaanu Pueyaso shuriucua*

*(Lc 12.33-34)*

<sup>19</sup> 'Pueyanaa, maja mijiria nia racatanu nia casami najuhuanaj. Saaja capora nia quiri cutara. Mijiria pa racatasacari pa casami, surequeyari na miaquenutaniya. Tiyarashiniutianiyajaariuhuj. Nohuasenujuacaari nocua tiuquiniutianiya na nohuasenura. <sup>20</sup> Nia racatare cutara nia casami Pueyaso shuriucua jiyocuacaanu. Tii cutaraari shaaqui surequeya, shaaqui tiyara. Naajuhuj, nohuasejojuaari maja na naata nocua tiuquini tii, jiyocuacaanuji nia casami na nohuasenura. <sup>21</sup> Niaa jaara nia casami racatare mijiria, niaari nocua niishiriojonutaniya pueyaracaanu. Nia casami jaara racatasano quiri

Pueyaso shuriucua saniniuujia, niaari Pueyasocua niishiriojonutaniya. Majaari nia tacaaniu quiniutianiya mijiria casaacua tari.

*Pa cuaqueyajinia cuhuatanajiniji pohuatasano  
(Lc 11.34-36)*

<sup>22</sup> 'Pa namijiaari juhua poojia cuhuatana. Naacujitij, paa jaara sesa casaacua jiaatiaashijia quirini, poojiaari juhua cuhuashiqui quiya maninia. <sup>23</sup> Niaa jaara sesa casaacua jiaatiajaca quiri saniniuujia, nioojiaari juhua ninishiqui quiya. Nioojia jaara sesa casaacua jiaatiaja quiri, nioojiaari socua ninishiqui quiya cariyujuaru pueyanojiniji.

*Pueyaso panijia pa quiri, maja cumaneeca panijia  
(Lc 16.13)*

<sup>24</sup> 'Maja nia naata poonijionu maninia caapiqui camarnura. Niaa jaara caapiqui camarnuraca quiri, niaari tamonu paniniutianiya, niaari saniniuujia tamonu niqiniu paniyaquiniutianiyacujua. Naacujitij, niaari shuquiriaatia poonijionutaniya nia panishano camarnura. Niaari tamonu sojotanutaniyacujua. Naajuhuj pueyanaa, majaari nia naata Pueyasora poonijionu maninia, cumaneecaacua nia jiaatiasacarijuhuaj.

*Pueyaso na muerasu cojuaja  
(Lc 12.22-31)*

<sup>25</sup> 'Naaratej, nia sequeyanijia, maja puera nia niishiriojonu casaa nia miaquenu-taniyani, casaa nia ratunutaniyani, casaa nia cushiniutianiyani. Pueyaso jaara pa shipiniquiaari pueyano pa quiniuria, ¿majateeri na niqitionu quiniutianiya pa mi-aquenu panishano, pa cushiniu panishanonio, maninia pa rishiniuria? Taaquiririnij. <sup>26</sup> Jiyocuacaanu jaacuatujuaca nia niquiricuaa. Nojoriiri maja na natanu. Majaari na senoonu. Majaari nojori mishinijionu tiaco na miajajaura. Naajaa, pa Que Pueyasoori nojori niqutioquiaa na panishano. Nia niishiri. Niaa cutaraari socua Pueyaso panishano cuno jiyocuacaanu jaacuatujuacajiniji. <sup>27</sup> ¿Nia naatate socua jiyaconajara maashiniu, jiyanohua nia tacaaniutia? Maja.

<sup>28</sup> 'Naajuhuj, ¿casaara nia tacaquiaarini nia niishiriojosacari casaa nia cushiniutianiyani? Naana shuucuaca nia niquiriquiacuaa. Nojoriiri maja na niishiniu poonijionu. Majaari na niishiniu na maniniushitiajara shitianujuhuj. <sup>29</sup> Seetanujuanaa nia sequeyanijia, pa supuetanaa jiyaniijia Salomónri jiyanohua shanohua toqueya cushijia quiquiaari. Naajaa, na toqueeri maja socua shanohua niquishano quiquiaari cuno naana shuucuacajiniji. <sup>30</sup> Naana shuuri saaja rupaquijia shanohua niquishano. Jaara sorere, namitiashiyari catijasocoriquiano. Pueyasoori naana shuu shipiniquiaari saaja rupaquijia shanohua niquishocoriquiano, na nuhuaji catijasocoriquianonio. Nojuaja jaara naa shanohua naana shuucuaca shipiniquiaari, ¿majateeri socua maninia na miiniu quiniutianiya niaara? ¿Casaara nia tiyaquiya nia Que Pueyasocuaarini? <sup>31</sup> Naaratej pueyanaa, maja nia tacaaniu. Majaari nia sequenu: ¿casaa pa miaquenutaniyani?, ¿casaa pa ratunutaniyani?, ¿casaa pa cushiniutianiyani? <sup>32</sup> Pueyaso niishiyashijiaacari naa sequejatej, puera nojori tacaashacari puetunu na panishano casaacujanaa. Niaa cutaraari jiyocuacaanu quijia Queraca. Nojuacuajaari tari niishiya puetunu nia panishanojuanaa. <sup>33</sup> Naaratej, coteenu nia niishiriojore Pueyaso tojjijara nia quiniuria cutara. Pueyasocua nia niqitiore puetunu nia panishanojuanaa. <sup>34</sup> Naajuhuj, majaari tariquiria nia tacaaniu. Saaja nia niishiriojore cutara, taa nia miiniutianiya maninia quiarijiani. Tariqui cutara niocua niishiriojore taa nia miiniutianiya maniniani. Tariucuaja quiarijia nia niishiriojosano nio juucara. Majaari socua tariquiria nia tacaaniu. Saaja nia Que Pueyasocua nia tiuuri, juhuajaniya nia quiniuria.

*Majaari quiarta pueyanoocua soqueto nia quiniu  
(Lc 6.37-38, 41-42)*

<sup>1</sup> Maja niarta pueyano nia soquenu najuhuanaj, Pueyaso mariqui nia jiyanoyaquiri-jiaariuhuj. <sup>2</sup> Taa nia sesacaquiaa tamasacacuaani, niaari naa sesacasaanutaniyajuhuj. Naatej, taa nia miiquiaa tamasacacuaani, Pueyasoori mariyata naa miiniutianiya nia-janiyajuhuj. <sup>3</sup> Nio miriqui cua sequesano nia tojiri. ¿Casaara nia niquiya rucucua nia tarajanu namijiajiniani, niaa jaara puereetuca maca jiitiaa tama nia namijiajiniajaaja cutara? <sup>4</sup> Maca nia jiitiasacari tama nia namijiajiniajaaja, ¿casaara nia sequeya niarta pueyanoni: “Cuno rucucua pa taquiri quia namijiajiniji”? <sup>5</sup> Sesa jiuujiaracanaa, coteenu nia pare cuno maca nia namijiajiniji cutara. Na nuhuaji niocua maninia niquiri cutara, nia tarajanu rucucua nia taquiniuria na namijiajiniji. Nio miriqui cua sequesanoori nio sequeya: nioojia seque nia jecare coteenu, na nuhuaji cutara niocua maninia nacasure niarta pueyano.

<sup>6</sup> Majaari Pueyaso ruuretajaca nia niishitiojonu Pueyaso rupaa najuhuanaj. Cuno tojiyashijiacaari nia tojiyaquiniutianiya, naatej taa tamonu pueyano sare tojiyaquiquiaa niajanuyacuani. Majaari Pueyaso soojeaca nia pohuatanu Pueyaso miishano shanohua niajanuyara. Nojoriiri saaja rerequetenutaniya Pueyasojiniji nia pohuatasano, naatej taa cushiya rapijioquiaa marajinia juhuajaniya na niishishoo maninia casaacuani.

*Pueyaso pa secojorej*

*(Lc 11.9-13; 6.31)*

<sup>7</sup> Pueyaso nia secojore. Nojuajaari nia niqutionutaniya nia masesano. Niaa jaara pajere, niaari nia pajesano riuritanutaniya. Tohuateyaji nia piquiri, niaacuajiiri riataaanutaniya. <sup>8</sup> Cante Pueyaso maseya na panishanoni, seetanujuanaa na masenu-taniyari. Naajuhuj, cante pajejani, na panishano riuritanutaniyari. Cante tohuateyaji piquijiani, nocuajiiri riataaanutaniyajuhuj.

<sup>9</sup> Mueya jaara na que nenecojore neecaruura, ¿na queteeri na niqutionutaniya saajia? ¡Maja! <sup>10</sup> Mueya jaara na que nenecojore sapitiaajara, ¿na queteeri na niqutionutaniya soconu? ¡Maja! <sup>11</sup> Niajanuyari sesa miiniu niishijiaca. Naajaa, niaacuajaari maninia casaa niqutionu niishijia, nia mueya jaara nia nenecojore. Nia Que Pueyaso cutaraari jiyanohua socua maninia niqutionu niishijia, na muerasu secojosacari nojuaja.

<sup>12</sup> Pueyaracaanu maninia nia miiri tamasaca, taa nia paniquiaa pueya miiniuria niajanuyacuajani. Niaa jaara maninia miiriquia nio cua sequesano, niaari tari tojitiaa maninia puetunu tariucuacaanu Moisés Rootasanojuanaa, tariucuacaanu Pueyaso sequesano caminiujiunaa rootasanonio.

*Pueyasocua nuuri secanuniyojua*

*(Lc 13.24)*

<sup>13</sup> Pueyasocua neteja nuu nia pajere, shiitaniyojua nuuri tuneja. Saniniuujia, puereetuca nuuri neteya mani quiquiojiniaara. Puereetuca na tuneja. Puereetucaari neteya, carianujuhuj. Naaratej, queraatia pueyari juhuajaniya cuno nucuaco quiojiya saniitiosocoriquiano. <sup>14</sup> Saniniuujia, shiitaniyojua nuuri maninia cutara. Cuno nucuaco quiojonaari pueyaracaanu quiniutianiya Pueyasota cutara. Jiyanohua shiitaniyojuaari cuno nuu tuneja. Secaja pueyari na riurataa, cami na quiojonura.

*Naanaari niishishano na jajaujiniji*

*(Lc 6.43-44)*

<sup>15</sup> Tama nia cuaqueyajaaja nia cojuare sapojonujuacaacuaji, noo pojoriicuaji canapue te najuhuaana sequejacuajani: “Pueyaso Rupaa pohuatananijia”. Nojoriiri sapuenu juhua maninia pueya niquishano, nojori sapojonura niajanuyara. Nojoriiri sapuenu juhua borregoniyojua niquishano, seetanujuanaa juhua puereeta sare nojori quishacari, sayoru. <sup>16</sup> Niocua nojori niishiri, sesa nojori miiniuucua. Nojoriiri maja na naata miiniu maninia, naatej taa cohuatucuaani, majaari na naata muetunu marijiaca. ¿Shuuniateeri na naata muetunu cohuajaru? Maja. Naajuhuj, cuno sesa jiuujiaraca pueyari maja na naata maninia miiniu. <sup>17</sup> Maninia naanaari, maninia jajau muetujua cutara. Saniniuujia, sesa naanaari, sesa jajau muetujuaaja. <sup>18</sup> Maninia naanaari maja na naata sesa jajau muetunu. Naajuhuj, sesa naanaari maja na naata maninia jajau muetunu. <sup>19</sup> Naana

jaara sesa jajau muetujua quiri, nushiyari, manijinia catijiasocoriquiano. <sup>20</sup> Naacuajitij, niocua cuno sapojonuujua pueya niishiri nojori miishanojiniji sesa.

*Saaja noojiaqueya pueyari Pueyaso muerasura quiniutianiya*  
(Lc 13.25-27)

<sup>21</sup> 'Cuno pojori canapuete cua sequejacani: "Cua Jiyaniijianaa, cua Jiyaniijianaa", noojiaqueya nojorijiniinooori maja nojori tiuquitianu quiniutianiya cua Que Pueyaso quiqiojinia. Saaja seetanujuanaa cua Que tojitiajaca cutaraari nocua tiuquitianutaniya. <sup>22</sup> Cua nequesoreesacari pueya nio jiya puequesacari, queraatia pueyari cua sequenutaniya: "Cua Jiyaniijianaa, cua Jiyaniijianaa, canaacuajaari quia rupaa pohuataquiaari pueya niquiarani. Canaa sequesacari quia sesa, canaari samaruhua tohuanijioquiaari quia cumaacatani. Naajuhuj, canaari cusosuhua naatanijioquiaarini quia sesa canaa jiyaniquishacari". <sup>23</sup> Janiyari saniniuujia naa sequejaca riucuanutaniyani: "Maja cua niishiniu niajanija. ¡Nia quiojorohua! Niaari saaja sesa miijiaca quiquiaari".

*Jesu tojitiajaca miishanoori pueyaracaanu rishiniutianiya cutara*  
(Mr 1.22; Lc 6.47-49)

<sup>24</sup> 'Naacuajitij, cante cua sequesano tojjiani, cuno pueyanoori shuquiriaatia quiniutianiya juhua niishijia pueyano. Niishijia pueyanoori tiaquiaari cumueeca jiyajinia. <sup>25</sup> Na nuhuaji, maruuri jyanohua niquiaari. Moori pajaashiquiaari. Paratuuri jyanohua piyarojoquiaari cuno tiaacuara. Naajaa, majaari na pojoretanu quiquiaari, cumueeca jiyajinia na nujuatasacari. <sup>26</sup> Cante cua sequesano tojiyashijia saniniunijia, cunoori moseeca. Cua sequesano ruuretajaari taraatia quiniutianiya juhua moseeca pueyano. Moseeca pueyanoori jaaquajinia tiaquiaari. <sup>27</sup> Maruuri jyanohua niquiaari. Moori pajaashiquiaari. Paratuuri jyanohua piyarojoquiaari cuno tiaacuara. Cuno pueyano tiaari pojotaquiaari. Na camaruuri jyanohua taraatia quiquiaari na tia pojotasacari.

<sup>28</sup> Jesu jaara niishitiojonu puecaquiaari, pueyari jyanohua jiuujiateriquiaa na niishitiojosano nojori tojishacari. <sup>29</sup> Pueyari naa jiuujiatequiaari seetanu cumaacatajanaa Jesu niishitiojosacari juhua jiyaniijianaa, maja juhua Moisés Rootasanojiniji niishitiojonaa. Cuno pojoriiri nareja tariucuacaanu rootasano caminiuuiuquiaari pueyaracaanu.

## 8

*Jesu naatanishacari sesa cusonu jiitiaja*  
(Mr 1.40-45; Lc 5.12-16)

<sup>1</sup> Jesu jaara tuhuananujiniji rosequiaariuhua na cojiniaata, jyanohua queraatia pueyari na nuhuajiriquiaa. <sup>2</sup> Tamonu pueyano cusosuuri jiyacari Jesuucua catecanoquiaari. Jyanohua sesa cusonu jiitiaquiaariiri. Tahue rupaajinia, cuno cusonu sesaari quiquiaari "lepra". Pueyano shuuri juhua miaquesano quijia na cuaqueyajinia cuno cusonu na jiitiasacari. Cusosuuri Jesu cariquimiaji mojuquetaquiaari Jesu na sequenura na panishano. Naa na sequereeri:

—Jiyaniijianaa, quia jaara paniri, niishiyacuajanijia quia naata cua cusonu cushiritiniu.

<sup>3</sup> Jesuuri nocua taraajequiaari. Nocua niaree na juaashiquiaari. Na sequereeri:

—Jaa, paniyanijia. Cuaara cushiriiria quia cusonu.

¡Jiyacaritij, ritia cushiriquiiri! Jeequerohuari. <sup>4</sup> Na nuhuaji, Jesuuri naa na rootaquiaari:

—Cua tojiri. Maja tamasaca niquiara quia pohuatanu cua miishano quiajanija. Saaja Pueyaso secojonaa jiyaniijia quia cuaqueya quia niquitiri, na cartenura quiajanija, pueya tajinia quia rucuanenonuhua juhuajanija. Na nuhuaji, ritia quia niquitiore quia seru Pueyasocuara catijiasocoriquiano. Naa quia miiritij taa Moisés niishitiojquiaari tarijiacuajani, juhua jeequesano quia quiniuria Pueyasora. Naacuajitij, pueyari niishiniutianiya quiaari tari jeequerohua quia cusonujiniji.

*Jesu naatanishacari Romano capitán seru*  
(Lc 7.1-10)



<sup>5</sup> Jesu jaara tiuquiquiaariuhua na pueyata Capernaum tiacajiniöhua, Romano soldado-hua jiyaniijiaari Jesuucua niqiaaari na secojonura Jesu. <sup>6</sup> Naa na sequequiaariiri:

—Jiyaniijianaa, cua seruuri cusosu mataa maquetujinia. Majaari na naata pooniniu quenaaja. Jiyano-hua naquiya miya na noonutaari.

<sup>7</sup> Jesuuri na sequequiaari:

—Janiyacuaajaari nocua quianutaniyani na cusunu cua shaatanura.

<sup>8</sup> Soldado-hua jiyaniijiaari na riucaaree:

—¡Maja jiyaniijianaa! Janiyari maja pueyano maniniuni, cua tiajinia quia tiuquiniuria. Nareja quia sequere, cua seru cusunu cuaara shaateera tamajaaja. Niishiyacuajanijia, quiaari na shaatanutaniya saa quia rupaataja. <sup>9</sup> Janiyari jiyaniijiaracajaniuhuj. Na tojiquiaanijia. Naajuhuj, cua soldadohuari cua tojitiaquiaajuhuj cua sequesacari nojori. Naacuajitij, janiya jaara tamonu sequereni: “Quia quiaare”, cunoori ritia quiaquiaa. Naajuhuj, janiya jaara tamonu sequereni cuaara niiria, cunoori ritia niya cucua. Janiya jaara cua pataaco seru sequereni cuaara miiria cua panishano, na miiquiaari. Cua sequesano jaara naa tojishaaquiaacuaa, quia sequesano cutaraari tojishaanutaniya.

<sup>10</sup> Jesu jaara tojiquiaari naa cuno tahue sequesantej, jiuujiatequiaariiri. Na cojiniaa sequereeri:

—¡Seetanujuanaa nia sequeyanijia, majaari quenaaja parta Israel pueyajinijinio cua niqiniu quiquiaa Pueyasocua tiuujia cutara, juhua nio tahue! <sup>11</sup> Seetanujuanaa nia sequeyanijia, queraatia taucuaaari Pueyasocua tiuujiaa quiniutianiya juhua nio tahue. Nojoriiri tucuaaanuji nijionutaniya pananu muetasamaji, pananu tiuquishocojijuhuj. Nojoriiri pa supuetanaata cajitiuniutianiya na miaquenuunura Pueyaso shuriucua. Tii quiniutianiya shuquiriaatiaari pa supuetanaata: Abrahamta, Isaactajuhuj, Jacobotanio. <sup>12</sup> Parta Israel pueya, canapuate Abraham jiniuanucujinio supuenoni, nojoriiri sanini-uujia tamocora quejoosaanutaniya ninishiqui, nojori tojitiaquiniucua Pueyaso. Nojoriiri tii sariyocuatunutaniya naquiya na miishacari. Na quica miaquenuunutaniyari na noonuta. Nojoriiri juucua saquiriojosaaquiaari Pueyaso muerasu nojori quiniuria. Nojoriiri jiyaniya nojoriiri Pueyaso muerasu cutara Abraham jiniuanucujinio nojori quishacari.

<sup>13</sup> Na nuhuaji, Jesuuri cuno soldado-hua camarnu sequequiaari:

—Quia tiajinia quia quiaarohuaqui. Cuaara quiriiaqui taa quia sequereecuajani.

Jiyacaritij, na seruuri ritia naataquiaariuhua.

*Jesu naatanishacari Pedro reyarucua*

*(Mr 1.29-31; Lc 4.38-39)*

<sup>14</sup> Jesuuri quiaaree Pedro tiajinia. Tii Pedro reyarucua niquishiiri cusosu mataano na maquetujinia. Naseeca matariquiaari. <sup>15</sup> Jesuuri na juaashiquia quiasee. Na naseeca cusunuuri ritia na tajiquiaari. Ritia sanequiaariiri Jesu na mianuutenura.

*Jesu naatanijosacari queraatia pueya*

*(Mr 1.32-34; Lc 4.40-41)*

<sup>16</sup> Shusha ninishacari cuno juucaja, cuno tiacajinijinio pueyari queraatia samaruhuaraca pueya jaatucunuuquiaari Jesuucua. Jesuuri cuno samaruhua tohuatanijioquiaari saa na rupaataja. Puetunu cusosuhujanaa naatanijioreejaariuhuj.

<sup>17</sup> Naa tohuateequiaariti supuetana Isaías naajiotasano, Pueyaso niishitishacari nojuaja Jesujiniji. Naa naajiotasano quiyari:

“Nojuajaari taraatia pa miiniu jaariutiaree pajaniyajiniji. Pa niti cusoyareeri puetunu pa cusunujuanaa na jatanura”.

*Tamasaca pueya quiniu panishacari Jesu pueyara juucua*

*(Lc 9.57-62)*

<sup>18</sup> Jesu jaara jiyano-hua queraatia pueya niquiquiaari na shocua maano, na pueya sequereeri:

—Caminia taquijiria pa niuutiaare.

<sup>19</sup> Jiyacaritij, Moisés Rootasanojiniji niishitiojona pueyanoori Jesu sequere:

—Niishitiojonanaa, janiyari quiata quianu panianu. Janiyacua quia tarajareni puetunu tiqiyocujanaa quia rucuanajosacari.

<sup>20</sup> Jesuuri na rucuaaree:

—Quioojuapue cutaraari na raa jiitiaa. Shuhuari na jesuhua jiitiaajuhua. Saniniuujia, pueyano cua quishacari mijiria, majaari cua maquejara cua jiitianu quenaaja, taa cuno casami jiitiaacuaa na maquetujarani.

<sup>21</sup> Tamonu Jesu pueyajinijinoori Jesu sequeree:

—Cua jiyaniijianaa, cua tarinitiare, cua que niquirijaara. Janiya jaara na shaajareni, janiyacua quia tarajare cutarani.

<sup>22</sup> Jesuuri na rucuaaree:

—Naajaa, cuata quia quiaare cutara. Quia tarinitiare nojuaja. Macunucua cuaara jamoora tama narta macujuaaja. Naatej, cante Pueyaso tojtiaashijiacani, nojoriiri tariucua juhua macunucua quiya Pueyasora.

*Jesu suraajasacari paratu, mohuacanio*

*(Mr 4.35-41; Lc 8.22-25)*

<sup>23</sup> Na nuhuaji, Jesuuri botejinia tacaquiaari. Na saquiriojosano pueyari nata quiojoquiaari. <sup>24</sup> Paratuuri senota piyarojonu coteequiaari nojori niuutiasacari. Jiyanoohua piyarojoriquiaari. Caminiaari jiyanoohua queyocuariquiaa paratu piyarojosacari. Mohuacaari bote jiniacuma mishiriquiaa. Jesuuri jiyacari maqueriquiaa. <sup>25</sup> Na pueyari cunora na niucujasee. Jesu sequetureeri:

—¡Jiyaniijianaa, canaa quia naacutare! ¡Paa tari tiuquitiaareeni!

<sup>26</sup> Nojori rucuaareeri:

—¿Casaara nia pueretiuyani? ¿Majateeri nia niishiniu Pueyasocua tiuuniu?

Jesuuri saneree. Paratu sequereeri, mohuacanio:

—¡Niaaj, nia suraajere!

Paratu, mohuacaari ritia suraajequiaari. <sup>27</sup> Jesu pueyari jiuujiatequee. Tama nojorijia sequequiaari:

—¡Juhuej! ¿Taamueca pueyanotucuaanojoni? ¡Paratuuri na tojiya, mohuacajuhua!

*Jesu tohuatanishacari samaruhua, caapiqui pueyajiniji Gadara jiyajinia*

*(Mr 5.1-20; Lc 8.26-39)*

<sup>28</sup> Jesuuri na saquiriojosano pueyata tiuquijioquiaari caminia taquijiria Gadara jiyajinia. Jiyacaritij, caapiqui pueyanoori Jesuucua tohuareetaquiaari raacajiniji, macunucua nucuha paaquiosajiji. Nojoriiri samaruhuaraca quiquiaari. ¡Jiyanoohua pueya pueresano! Cuno nucuaco, majaari pueya rucuanenu quijia, cuno pojori na puerenuucua. <sup>29</sup> Samaruhuaraca caapiqui pueyanoori Jesuucua nacaturee:

—¿Casaacua miji quia niyani, Pueyaso Niyanunaa? ¿Quiaate juhuacarijia niyaree canaa quia saniitionura Jesunaa?

<sup>30</sup> Jiyacaritij, cushiyari cateca naataja miaquenuuriquiaa. Jiyanoohua queraatia cushiyari quiquiaari. <sup>31</sup> Samaruuari cuno caapiqui pueya pocuatequiaari. Naa Jesu secojoreeri:

—¡Quiaa jaara canaa tohuatanijiore nio caapiqui pueyanojiniji, canaa quia jiyarore cuno cushiyacua canaa tiuquitianura!

<sup>32</sup> Jesuuri cuno samaruhua sequeree:

—¡Nia quiaare!

Samaruuari cuno caapiqui pueyajiniji tohuareetaquiaari. Cushiyacua tiuquitiaseeri. ¡Cushiyari cocuatequee! Saaja caminiajinia totesee tajojinijiiri. Cushiyari tii shushiniushii.

<sup>33</sup> Cushiya cojuanaari netecuatuquiaariuhua na shiriiquiniutia na tiacajiniara. Nojori tiuquijiosacariuhua, pueya niquira pohuatatuquiaari cushiyajinijiiri, samaruhuaraca pueyajinijinio. <sup>34</sup> Naaratej puetunu pueyajanaari cuno tiacajiniji nijioquiaari Jesuucua. Nojori niquishacari Jesu, na sequetureeri nojori jiyajiniji na quianura tamaqui.

## 9

*Jesu naatanishacari cumatacuruhuana cusosu  
(Mr 2.1-12; Lc 5.17-26)*

<sup>1</sup> Na nuhuaji, Jesuuri botejinia rosetaquiaari na saquiriojosano pueyata. Caminia taquijiria niutiaquiaariuhuari tama na tiacajiniarajaaja. <sup>2</sup> Tii nojori tiuquijiosacari, Jesuucua patasaaquiaariiri cumatacuruhuana cusosu pueyano. Patasaaquiaariiri na matujinia. Jesu niquishacari taa na patanaa tiuquiaari jiyanohua nocuani, cusosu sequereeri:

—¡Quia shuquiriri sanajanaa! Quiaacuajaari tari jiyanooshaaree sesa quia miishanojiniji.

<sup>3</sup> Noojiaqueya Moisés Rootasanojiniji niishitiojonaari Jesu sequesano tojitiariquiaa. Nojoriiri tama noojiajiniaajaaja niishiriojonuuquiaari: “¡Nio pueyanoori tama na cuaqueyajaaja jiyateya juhua Pueyaso na quiniuria naa na sequesacari! ¡Cunoori jiyanohua sacuaraatia!”. <sup>4</sup> Jesuuri cuno pueya niishiriojosano niishiquiaari. Nojori sequereeri:

—¿Casaara sesa nia niishiriojiyani? <sup>5</sup> Seetanujuanaa, pueyano maja na naata jiyanooni pueya miishano sesa. Naajuhuj, majaari na naata tamajaaja pueya na naataniniu. <sup>6</sup> Naajaa, janiyari nia niishitiniutianiyani janiyari mijiria jiyarosaaquiaarini cua jiyanooniuria pueya, sesa nojori miishanojiniji.

Jiyacaritij, Jesuuri cusosu sequequiaari cuno pueya niquiara:

—¡Quia sanere! Quia matu quia pataarohua quia tiajinia.

<sup>7</sup> Cusosuuri sanequiaari. Na tiajinia quiaarohuari. <sup>8</sup> Na niquitiushacari Jesu miishano, puetunu pueyajaanaari shiriquitieuquiaari. Nojoriiri Pueyaso maniniuhuaqueetaquiaari pueya na niquitionuucua na cumaaca, naa Jesu miiniuriatej.

*Jesu sequesacari Mateo na pueyano na quiniuria  
(Mr 2.13-17; Lc 5.27-32)*

<sup>9</sup> Jesu quiasacari cuno tiacajiniji, tamonu pueyano niquiquiaari cajiyanoori cumaneeca masejojuajinia Romano jiyaniijiara. Na sesa quiquiaari Mateo. Nojuacuajaari janiya; nio naajionani. Jesuuri cua sequequiaari:

—Cua nuhuajiyare cua pueyano quia quiniuria.

Janiyari ritia sanequiaarini. Janiyari nata quiaareeni.

<sup>10</sup> Na nuhuaji, janiyari Jesu masuuquiaarini cua tiajinia na miaquenura, na pueyajujuaj. Naacuajitij Jesuuri cua tiajinia tiuquitiaquiaari miaquenura. Queraatia cuarta cumaneeca masejonaari canaa cojiriquiaajuhuj, queraatia noo pojorijuhuj, Fariseocuaca jiyaniquitishano sesoriquia pueyatatej. Puetunu canaajanaari Jesuta miaquenuuriquiaani. <sup>11</sup> Fariseocuaca jaara Jesu niquiquiaari miaqueyano canaata, nojori soosano pueyani, nojoriiri naa Jesu saquiriojosano pueya nequesotaree:

—¿Casaara nia niishitiojona miaqueya cuno sacuaraatia cumaneeca masejonaatani, sesoriquia pueyatano?

<sup>12</sup> Jesuuri naa nojori sequesano tojirii. Nojori sequeree miriquiiri:

—Cante na cuaqueya jiyaniyani maja cusosu na quiniu, nojuajaari maja naarajona na paniniu. Cusosuhua cutaraari naarajona panijia. Naajuhuj, sesa miijiaca pueyari cua paniya nojori cua jiyanooniuria sesa nojori miijosanojiniji. <sup>13</sup> Niaa cuaara niishitiojosuhuara socua, maninia nia niishiniuria casaa tariucuacaanu Pueyaso sequesano niishitiojiyani naa na sequesacaritij:

“Niaacuajaari nia seya catijiaquiaa cucuara. Maninia juhuari nia taraajenura tamasacaacua. Cuno cutaraari cua shuquiritiasano”.

Naara niquiaarinijia nia sequesano sesa miijiaca cua jiyanooniuria sesa nojori miishanojiniji. Maja cutaraari mijiria cua ninu quiquiaari maninia pueyacua.

*Pueya nequesotasano casaara Jesu pueya tarinitiaaquiquiaa quenaaja miaquenuni  
(Mr 2.18-22; Lc 5.33-39)*

<sup>14</sup> Tiuquinijona Juan pueyari Jesuucua niquiaari naa na nequesotanura:

—¿Casaara quia pueya tarinitiaaquiquiaa quenaaja miaquenuni, nojori secojonura Pueyasoni? Canaacujaari miaquenu cartequiaani Pueyaso canaa secojonura taa Fariseocuaca miiquiaacuaani.

<sup>15</sup> Jesuuri nojori riucuaaree miriqui:

—Pueyano camishacari, ¿na masuusano pueyatucua taraatia quiriiri, camiriquiano pueyano jaara nojoritia quiyajaa? Maja. Tamacari cutara, camiriquiano pueyanoori nojori tajiniji rishaanutaniya. Jiyacari cutara maja cua pueya miaquenu quiniutianiya, janiya jaara nojori tajiniji rishaareni.

<sup>16</sup> Socua cua tojitiare pueyanaa. Pueyano jaara cushipirijionu paniri na toque mocua, maja na naata quiarinio toquerau ruposaanu toque mocua cuhuocojinia, jeequesoojua na quishacari. Quiarinio toquerau jaara ruposaae toque mocua cuhuocojinia, na jeequesacari, posequenutaniyari. Cunota, toque mocua cuhuocoori socua sutenutaniya.

<sup>17</sup> Naajuhuj, majaari pa naata uva caaca racatanu shoque tariucuacojinia. Uva quiariniacu jaara racatasaare juucua shoque tariucuacojinia, jaara jerema vinora na quiniuria, shoque tariucuaco surtanutaniyari. Vinoori niitiasaanutaniya najuhuanaj. Shoque tariucuacoori maja na naata tooni, uva caaca jaara jerema. Naaratej, uva caaca nia shuujiore shoque quiariquiojinia, maja najuhuaana nia niitianura uva caaca. Naajuhuj, majaari na naata cua niishitiojosano cojitishaanu tariucuacaanu niishitiojosanota. Cua niishitiojosano nia tojitiare cutara.

*Caapiqui maajipohua naatanijosacari*

*(Mr 5.21-43; Lc 8.40-56)*

<sup>18</sup> Jesu pocuasacarijia, nocua niquiaariiri Pueyaso secojojua tia camarnu. Jesu cariquimiaji mojuquetaquiaariiri. Na sequereeri:

—¡Quiyatuuri shusha cusoquee! Naajaa, miji, cuata quia quiaare. Niishianijia quiaa jaara niare nocua quia juaashiquia, samiitianutaniuhuari.

<sup>19</sup> Jesuuri saneree. Nata quiaareeri. Canaa, Jesu saquiriojosano pueyani, canaari nata quiaareejuhuj. <sup>20-21</sup> Canaa quiasacari, tamonu maaji cusosuuri Jesuucua catecanoquiaari jiyasohujaja na paramaji. Cuno maajiiri pueyaracaanu naatequiaari. Doce marijiaari tari na shoconujuquiaari pueyaracaanu na naatesacari. Tama niishiriojoriquiaajaarijia: “Janiya jaara Jesu toque quiareni, cua nanacaari curetanutaniya”. Cunora, maajiiri Jesu toque casaca quiaasee jiyasohujaja. <sup>22</sup> Jesuuri na nijiniara tacatequee. Cuno maaji niquiriiri. Na sequereeri:

—Shuquiriaatia quia quiri, sanaunaa. Cucua quia tiuushacari, quia nanacaari tari curetaquee.

Jiyacaritij, cuno maaji jiniacumaari ritia sacuantaquee.

<sup>23</sup> Jesuta canaa tiuquishacari Pueyaso secojojua tia camarnu tiajinia, canaari pueya niquishiini macura naajua joneneniuyano taraatia, sapiyoniuayanonio. <sup>24</sup> Jesuuri cuno pojori sequereeri:

—¡Niiquiji nia tohuareetare! Nio maaji samiriuri maja macu. Nareja maqueyano.

Pueyari Jesu saroojotaree saaja, naa na sequesacaritij. <sup>25</sup> Jesuuri cuno pojori tohuanatanioree saaja. Na nuhuaji, sohuacamara tiuquimiaari macuucua. Na juaashiquiajiniji na quiaaseeri. ¡Maaji samiriuri sanemaa! <sup>26</sup> Naa Jesu miishanojinijiiri pohuatasaaquiaari puetunu cuno jiyajiniajanaa.

*Jesu jeeacasacari caapiqui cariojuaru namijiaa*

<sup>27</sup> Canaa jaara tohuareetaquiaari cuno tiajinijini, caapiqui cariojuaruuri Jesu nuhuajiquiaari. Canaa nuhuaji nacariquiaari nojori niishishacari Jesuuri seetanujuanaa Pueyaso Jiyarosano. Naaratej, Jesu sequeturiquiaari:

—¡Supuetana David niquiohuacuajinio supueno pueyanonaa, canaacua quia taraajere quenaaja!

<sup>28</sup> Canaa tiuquishacariuhua canaa quijia tiajinia, cariojuarujuriiri Jesuucua catecanoquiaari. Jesuuri nojori nequesotaree:

—¿Niaate cucua tiuya nia namijiaa cua jeeacanura?

Jesu riucuatereeri:

—Jaa, jiyaniijanaa. ¡Quia naatacuaaquinatejaj!

<sup>29</sup> Jesuuri na juaashiquia niaree nojori namijiaacua. Jesuuri cariojuarujuri sequeree:  
—Cucua nia tiuuniucua, cuara quiiria taa nia sequereecuajani,

<sup>30</sup> Cuno pojori namijiaari maniniujiaacara quiquiaariuhua. Jesuuri jiyanoehua nojori rootaree:

—¡Majaari tamasaca niquiara nia pohuatanu cua miishano!

<sup>31</sup> Na tohuareetasacari, cuno cariojuarujuriiri ritia pohuatanu coteequiaari Jesu miishanojiniji. Naacujitij, Jesujiniji niishishaaquiaariiri puetunu cuno jiyajiniajanaa.

*Jesu pocuatesacari tiquia pueyano*

<sup>32</sup> Cariojuarujuri tohuareetanu nuhuaji, tamasaca pueyari Jesuucua jaatucuquiaari samaruraca pueyano. Cuno pueyanoori maja na naata pocuanu quijia. Tiquiatuhuj.

<sup>33</sup> Jesuuri samaru tohuatanirii cuno pueyanojiniji. Na nuhuaji, cuno pueyanoori ritia pocuanu coteequiaari. Naa pueya niquishacaritij, nojoriiri jiyanoehua jiuujiatequiaari. Sequetureeri:

—¡Naa miishanoori maja na niquishaanu quiquiaari Israel jiyajinia!

<sup>34</sup> Fariseocuacaari saaja Jesu macaatiquiaari pueya niquiara. Naa sequetureeri:

—Cuno Jesuni, nojuajaari samaruhua jiyaniijia cumaacaraca. Naacujitij, na naata samaruhua tohuatanijionu.

*Jesu taraajesacari pueyacua*

<sup>35</sup> Jesuuri puetunu tiacajiniajanaa rucuanajoquiaari Pueyaso rupaa na pohuatanura, puereetuuca tiacajinia, shiitianiyojua tiacajinianio. Maninia rupaa pohuataquiaariiri Pueyaso secojojua tiacajiniaqueya, pueya niishiniuria taa Pueyaso jiyanooni pania nojorini. Naajuhuj, nojuajaari queraatia tamaatia cusonu naatanijioquiaari puetunujuanaa, nootunejacanio.

<sup>36</sup> Jesu shootiasacari pueya, nojoriicua taraajequiaari jiyanohuari. Pueyari taraatia niquishano quiquiaari, juhua tashuquioono pueya. Nojoriiri taraatia quijiaa quiquiaari juhua cojuasoo borregohua. Shaaqui na camaru. <sup>37</sup> Cunora, Jesuuri canaa na saquiriojosano pueya sequequiaari:

—¡Nia niquiri! Jiyanoehua queraatia pueya. Cuno pojoriiri juhua puereetuuca sucohua. Saniniuujia, secajaari na senoona. <sup>38</sup> Nocujia nia sequeyanijia, na Camaru nia secojore, nojuaja cuara jiyaroora queraatia poonijionaa na senooriguiano nera.

## 10

*Jesu saquiriojosacari doce pueya na jiyaramiquishocoriquiano*

(Mr 3.13-19; Lc 6.12-16)

<sup>1</sup> Jesuuri canaa na doce saquiriojosano pueya sequequiaari na rootasano canaa tojinuria, canaa na jiyaramiquiyaquishacarijia. Jesuuri canaa niquitioquiaari na cumaaca, samaruhua canaa tohuatanijionura, cusosuhua canaa naatanijionura, puetunu noonujanaa canaa shaatanurajuhuj.

<sup>2</sup> Nioori canaa sesaca, na jiyaramiquishocoriquiano pueya sesacani: coteenuuri quiquiaari Simón. Pedroori na sesa quiquiaarijuhuaj. Pedro tarajanu Andrésri quiquiaarijuhuaj. Quiriquiaajaariuhua Santiago, tarajanu Juannio. Cuno pojoriiri Zebedeo niquiohua quiquiaari. <sup>3</sup> Felipeeri quiriquiaajuhuj, Bartolomé, Tomásnio. Quiriquiaajaariuhua janiya Mateoni. Janiyari tarijia quiquiaarini cumaneeca masejojua Romano jiyaniijara. Quiriquiaajaariuhua socua tamonu Santiago. Cuno Santiagoori Alfeo niyanu quiquiaari. Quiriquiaajaariuhua Lebeo. Na sesa tarajanuuri quiquiaari Tadeo. <sup>4</sup> Quiriquiaajaariuhua Simón. Nojuajaari Cananeo pueya maanujinijinio quiquiaari. Judas Iscarioteeri quiriquiaajuhuj. Nojuajaari Jesu quateriquiano quiquiaari mosocoriquiano.

*Jesu rootasano na pueya na jiyaramiquiyaquishacarijia*

(Mr 6.7-13; Lc 9.1-6)

<sup>5</sup> Jesuuri nio na doce pueya jiyaramiquiquiaari Pueyaso rupaa canaa pohuatanura. Coteenu, canaa rootaquiariiri, canaa na jiyaramiquiyaquishacarijia. Naa canaa sequequiaariiri:

—Majaari taucuacaacua nia quiojonu. Naajuhuj, majaari nia tiuquiniu Samaria pueya tiacajinia. <sup>6</sup> Saaja parta Israel pueyacua nia quiaare cutara. Nojoriiri juhua borregohua tashuquioon quiya. <sup>7</sup> Nojori niquiara nia pohuatare puetunu tiacajiniajanaa. Nojori nia sequere: “Pueyasoori quiarijia nia jiitianu paniya, niaa jaara na rupaa tojitiajacara quiri”. <sup>8</sup> Cusosuhua nia naatanijiore. Macunucua nia samiitianijiore. Canapue te lepra cusonu jiitiaani, cuno cusonu nia shaajare pueya cuaqueyajiniji. Samaruhua nia tohuatanijiore pueyajiniji. Niaacuajaari nio cumaaca maseree nareja. Naaratej, nareja nia naatanijiorejuhuaj. Majaari cua cumaaca nia jamuenu.

<sup>9</sup> Majaari cumaneece nia panu. <sup>10</sup> Majaari nia caashoque nia panu. Majaari socua toqueya nia panu, sapatunio. Saa nia cushishanotaja nia quiaare. Majaari nia panu nia miojotu. Nia naacutasano pueya cuaara niqutioora saniniuujia nia panishano.

<sup>11</sup> Nia rucuanesacari, niaa jaara tamonu tiacajinia tiuquishii, nia nequesotare tee maninia pueyano quiyani. Cuno pueyano tiajinia nia jiyojetare, niaa cuaara cuniquiji quiaarejaatijia. <sup>12</sup> Niaa jaara tamonu tiajinia tiuquishiiquia, pueya nia sequere naatej: “Pueyaso cuaara nioojia cajitiiria”. <sup>13</sup> Cuno tiajinia quiniaa jaara maninia pueya quiri, juhuajaniya quiniutianiyari taa nia sequereecuajani. Nojori jaara Pueyaso tojiyashijiaca quiri saniniuujia, nojori jiuujiacaari cajitiyaquishaanutaniya. <sup>14</sup> Tamonu tia camaru jaara nia tiuquinitianu paniyaquiri na tiajinia, Pueyaso Rupaa ruuretajaca nojori quiniucua, nojori niquiara nia nioluacaacuaji nia rapijiotare jiya joocua. Naacuajitij, cuno pueyari niishiniutianiya Pueyasoori nojori jiyanoquiniutianiya, nojori maseyaquiniucua na rupaa pohuataanaa. Naa nia miirijuhuj cuno tiaca pueya niquiara, cuno pojori jaara Pueyaso rupaa tojiniu paniyaquiri nia pohuatasacari. <sup>15</sup> Seetanujuanaa nia sequeyanijia, jiya puequesacari, cua nequesoresacari pueya, cuno pueyari jiyanohua saniitiosaanutaniya socua Sodoma tiaca pueyajiniji, Gomorra tiaca pueyajinijinio.

#### *Pueyaso rupaa pohuataanaari naquiya miishaanutaniya*

<sup>16</sup> Socua cua tojitiare. Janiyari nia jiyaroya Pueyaso tojitiaashijiaca niquiara nia pohuatanura cua rupaani. Niaari nojori tajinia puereeta quiniutianiya, naatej, taa borregohua quiya sayoru tajiniacuaani. Nojoriiri sesa miiniutianiya nijaniya. Nocuaji jiyanohua niishijiaca nia quiri, tama nia cuaqueyajaaja nia cojuanura. Naajaa, majaari nojori naminiu. Saaja maninia nia quiri juhua noseja, pueyano porocua. <sup>17</sup> Tama nia cuaqueyajaaja nia cojuare tamasa pueyacuaji. Cuno pojoriiri nia jiyatanutaniya tiaca jiyaniijianucuaacua nia saniitiosaanura, nojori tojiniu paniyaquishacari cua rupaa. Niaari Pueyaso secojojua tiacajinia piquishaanutaniya. <sup>18</sup> Cua rupaa nia pohuatanucua, niaari quioosaanutaniya tiaca jiyaniijianucuaacuara, nojori nequesoreenura nijaniya. Niaari jiyaca jiyaniijianucua niqutioosaanutaniyajuhuj. Naajaa, naacuajitij, niaari nojori niquiara pohuatanutaniya janiyajiniji, taucua jiyaniijianucua niquiaranio. <sup>19</sup> Niaa jaara jiyaniijianucua tacoji nujuatesaare nequesoresocoriquiano, majaari nia niishiriojonu taa nia riucuanutaniyani. Nia riucuanu panishacari, niaari jiyacari niishitiosaanutaniyacuaaja maninia nia riucuanura. <sup>20</sup> Naacuajitij, nia riucuasanoori maja tama nijaniyajinijiaaja quiniutianiya. Pueyaso Sohanu cutaraari nia pohuatenutaniya jiyaniijianucua niquiara.

<sup>21</sup> Pueyari tama tarajanujuaaja niqutionutaniya mosocoriquiano, tarajanu tiushacari cucua. Pueyanoori neyanu niqutionutaniya mosocoriquiano, cucua neyanu tiuuniucua. Mueraasapueeri tama na queya tacartanutaniyajaacujua na motenura, na queya tiushacari cucua. <sup>22</sup> Puetunu pueyajanaari nia niquiniu paniyaquiniutianiya, cucua nia tiushacari. Naajaa, cante seetanujuanaa cucua tiuujia quiya pueyaracaanuni, nojuaja cutaraari jatanishaanutaniya pueyaracaanu shacantuuca quijia na quiniuria. <sup>23</sup> Pueya jaara naquiya nia miiri Pueyaso rupaa nia pohuatasacari nojori tiacajinia, cuno tiacajiniji nia mashiri tamonu tiacajiniara tii nia pohuatanura. Seetanujuanaa nia

sequeyanijia, juhuanojuaja nia tucuataaquishacarijia pohuatanu Pueyaso rupaa puetunu Israel pueya tiacajinijanaa, janiyari jiyocuacaanuji tacatenutaniuhuani.

<sup>24</sup> 'Nio nia niishirijuhuj. Pueyanoori maja socua tojishano na niishitiojonajiniji. Naajuhuj, seruuri maja socua tojishano na camarnujiniji. <sup>25</sup> Pueyano jaara maninia tojiriquia na niishitiojona, maniniacujaari nojuaja jaara na nuhuaji juhua na niishitiojonara quirijuhuj. Maniniacujaari, seru jaara juhua na camarnura quirijuhuj. Naaratej, nia Jiyaniijia jaara jiyaniquishiyacuaa "Sesaacata", ¿taariquitijia socua na muerasu sesacasaanutaniyatej?

*Cante socua pa pueresanoni*  
(Lc 12.2-7)

<sup>26</sup> 'Naaratej, majaari nia puerenu niarta pueya. Puetunu jiyasohuaja pueya miishanojuanaari niishishano quiniutianiya. Puetunu pueya seetasanojuanaari niishishaanutanijuhuj. <sup>27</sup> Jiyasohuaja cua niishitiojosano nijaniyani, cuno nia pohuatare puetunu pueya niquiarajanaa. Cua sasacajosano nia numaa pajamani, cuno nia nacatare puetunu pueya niquiarajanaa. <sup>28</sup> Majaari nia puerenu pa puecojuaca. Nojoriiri maja na naata pa sohanu monu. Saaja nia puerere cutara nooj, cante cumaacaracacuajani mani quiqiojinia nia sohanu na quejoonura, nia cuaqueyano.

<sup>29</sup> 'Pa naata saaja niquiriyatu cumaneeniyajuata caapiqui shiyojuanijojua masenu pa miaquesocoriquiano. Naajaa, pa Que Pueyasoori puetunu cuno shuhua niishiyajanaa. Naacuajitij, majaari quenaaja niquiriyatujua shiyojua cusonu Pueyaso paniyaquishacari. <sup>30</sup> Naajuhuj, Pueyasoori puetunu nia naca cjasu niishiyajanaa. Puetunujuanaari na serojosano quiya. <sup>31</sup> Naacuajitij, maja nia puerenu. Niaari jiyanohua socua Pueyaso panishano queraatia shuhujiniji.

*Maja cumaati Jesucristojiniji pa caririquiniu*  
(Lc 12.8-9)

<sup>32</sup> 'Niaa jaara tamasa pueya niqiara sequere niaari cucua tiuujica cutara, janiyacua jiyocuacaanu quijia cua Que niqiara sequerejanuhuj, niaari cua muerasu. <sup>33</sup> Cante saniniujia cucuaji seetaja tamasa niqiarani, janiyari cua Que niqiara na tamacanutanijahuaj.

*Jesuucua tiuujia pueyari narta pueya juaashano*  
(Lc 12.51-53; 14.26-27)

<sup>34</sup> 'Majaari nia jyaniniu janiya mijiria niqiaarini pueya quiniuria juhuajaniya. Maja. Mijiria cua niniuucua, pueyari juayonuujutanutaniya. <sup>35</sup> Niquiaari cutaranijia pueya tiuuniuria cucua. Naacuajitij, pueya tiuushacari cucua, cucua tiuyashijica pueyari nojori niqiniu paniyaquiniutianiya. Naacuajitij, pueyanoori na que paracaaniutianiya, cucua tiuujia na que quiniuucua. Maajiiri na nucua paracaaniutianijuhuj, na nucua tiuuniuucua cucua. Pueyano niqiuocuaari na reyarucua paracaaniutianijuhuj, cucua tiuujia na reyarucua quiniuucua. <sup>36</sup> Naacuajitij, tama pueya panishano pueyajaajari na paracara quiniutianiya, cucua nojori tiuuniuucua.

<sup>37</sup> 'Cante na queya panijia socua janiyajinijini, jiyano pueyanoori maja maninia cua pueyano na quiniuria. Cante necohua panijia socua janiyajinijini, jiyano pueyanoori maja maninia cua pueyano na quiniurijuhuj. <sup>38</sup> Cante tama na cuaqueyajaaja panitiaaquijia na tojiniuria janiyani, cunoori maja maninia quiria. <sup>39</sup> Cante saaja tama na cuaqueyajaaja cojuanu paniya shuquiriaatia na quiniuria mijiriani, jiyano pueyanotej, nojuaja cutaraari shaajasaanutaniya, pueyaracaanu taraatia na miitiasaanura. Saniniujia, cante tama na cuaqueyajaaja panitiaa naquiya na miishaanura cua tojjia na quiniuucuanu, nojuaja cutaraari rishijara jatanishaanutaniya. Seetanujuanaa cuata shuquiriaatia quiniutianiya pueyaracaanuuri.

*Pueyasoori maninia miijica niqitionutaniya na jiitiasanojiniji*  
(Mr 9.41)

<sup>40</sup> 'Cante na tiaco nia tiuquinitiaja cua rupaajiniji nia pohuatasano na tojiniuriani, cuno pueyanoori cua tojjijuhuj. Cuno, cante cua tojjiani, nojuajaari cua Jiyarona

tojijajuhuj. <sup>41</sup> Naajuhuj, cante Pueyaso rupaa pohuatana tiuquinitiaja na tiaconi, Pueyaso rupaa pohuatana na quiniuucuaani, Pueyasoori cuno pueyano niqutionutaniya maninia na casaajiniji. Nojuajaari niqutiosaanutaniya mariyata taa Pueyaso rupaa pohuatana niqutiosaanutaniyacuaani, Pueyasojiniji na pohuatanu sami. Cante maninia miiija pueyano tiuquinitiaja na tiaconi, maninia pueyano na quiniuucua, na tiaco tiuquinitiaja pueyanoori maninia casaa niqutiosaanutaniya mariyata taa maninia miiija pueyano niqutiosaanutaniyacuaani. <sup>42</sup> Naajuhuj, cante quenaaja shiniitiuniacu mo-huaca raateya tamonuni, cua mueyaniyojua na quiniuucua, Pueyasoori seetanujuanaa na jiitiasanojiniji na niqutionutaniya na raatenu sami.

## 11

### *Tiuquinijiona Juanri na pueya jiyaroquiaari Jesu nequesotanura (Lc 7.18-35)*

<sup>1</sup> Jesu jaara canaa na doce saquiriojosano pueya rootanu tucuataquiaari tii, nojuajaari tiji quiaquiaari cuno jiya tiacajinia quiniaa na niishitiojonura Pueyaso rupaa.

<sup>2</sup> Tiuquinijiona Juan quishacari nujuatejojuajinia, nojuajaari jiyacari niishiquiaari Jesucristo miishanojiniji. Cunora, nojuajaari na pueya jiyaroquiaari Jesuucua naa na nequesotanura:

<sup>3</sup> —¿Quiaate seetanujuanaa Cristo, tariucuacaanu Pueyaso sequesano canaacua niriqianotej? ¿Canaate tamonu sashiya soj?

<sup>4</sup> Jesuuri nojori riucaaree:

—Nia quiaarohua. Tiuquinijiona Juan nia pohuatasuhua puetunu cua miishanojuanaa nia niquishano, nia tojishanojuhuaj. <sup>5</sup> Naa nia pohuatasuhua: “Cariyojuarujuriiri tari niqutiarohua. Shipiiniquiuuniuujiaacari maninia rucoorohua. Shu miaqueja cusonu jiiti-ajacaari tari jeequerohua. Numueejunucuaari tari tojitiarohua maninia. Macunucuaari samiitiacorohua. Casamiijiuniucua pueyari Pueyaso rupaa pohuatasaaaree, Pueyaso muerasura nojori quiniuria”. <sup>6</sup> Shuquiriaatia quijia cutaraari noo pueyano, cante cucuaji taacanuyaquijiani.

<sup>7</sup> Tiuquinijiona Juan pueya jaara quiojoquiaariuhua Juancua, Jesuuri Tiuquinijiona Juanjiniji naa pohuatanu coteequiaari pueya niquiaratej:

—¿Caaa niqiniuuucua nia quiojocanu cariiquia jiyajiniani? ¿Niaateeri paratu pi-yarojosano naajua niqiniuuucua quiacanu? Maja. ¿Tiuquinijiona Juanteeri noojia niqijijoteja? Maja. <sup>8</sup> Cua sequeture, ¿casaa niqiniuuucua nia quiojocanuni? ¿Niaa-teeeri pueyano niqiquianu maniniuqui toque cushiyano? Maja. Cuno pojori cante maniniuqui toque cushijiani, nojoriiri jiyaniijianucua tiajinia quijiaa cutara, maja cariiquia jiyajinia. <sup>9</sup> ¿Taateerinitioj? ¿Casaacua nia quiojocanuurini? ¿Pueyaso sequenu panishano caminiujiunia niqiniuuucuatee? Jaa. Seetanujuanaa nia sequeyanijia, Tiuquinijiona Juanri jiyanohua socua cutara pueyano tamasa Pueyaso sequesano caminiujiuniaajiniji. <sup>10</sup> Cuno Juanjinijicuaajaari tariucuacaanu Pueyaso Rupaajinia pohu-atasaaquiaari. Naa naajiotasaaquiaari miriquiiri Pueyaso sequesano janiya nojuajiniji: “Janiyari cua pueyano jiyaronutaniya quiocuajini. Nojuajaari quia puetanutaniya, quia nuu jecariquiano quiocuaji”.

Juanri naa maninia miiquiaari cucuaji, pueya tojiniuria janiya cua tiuquishacari.

<sup>11</sup> Seetanujuanaa nia sequeyanijia. Majaari tamonu pueyano quiniu quiquiaari socua cutara pueyano Tiuquinijiona Juanjiniji. Naajaa, cante Pueyaso muerasuniyojua quiya cucua na tiuushacarini, cunoori socua cutara pueyano Tiuquinijiona Juanjiniji.

<sup>12</sup> Tiuquinijiona Juan jaara coteequiaari Pueyaso rupaa pohuatanu, pueyari jiyanohua saniniujiuriquiaa Pueyaso muerasu nojori quiniuria. Pueyari naa saniniujiya quiari-jiujuhuj. Cante jiyanohua saniniujiya Pueyaso muerasu na quiniuriani, naa quiniu-tianiyari. <sup>13</sup> Supuetana Moisés, mariyata puetunu Pueyaso sequesano caminiujiuniaa-janaari tariucuacaanu pohuataquiaari taa Pueyaso jiitianutaniya pueyani. Naa poojo-tasaaquiaariiri Tiuquinijiona Juan jaara tiuquiquiaariijaatijia. Quiarijiani, Tiuquinijiona Juanta, nojori pohuatasanoori tari tohuateenu coteya. <sup>14</sup> Naaa jaara nio cua pohu-atanooocua tiuuniu paniri, nia tojiri nio: Tiuquinijiona Juancuaajaari tariucuacaanu



pueyara Pueyaso sequesano caminiujiunia Elíascuaja. Elíascuajaari sequesaaquiaari niriqiano. <sup>15</sup> Cante numaaracani, cuaara tojiiria cua sequesano.

<sup>16</sup> Nia pohuatareera taamuecate nio pa quishacari pueyani, quiarijiani paa na quiyani. Nio pueyari juhua naatujoori, canapue te carijiniacuma tacuarishijionu paniya juucuan. Nojoriiri narta naatujooriicua nacao, nojori tacuarishijionu panishacari juucua. <sup>17</sup> Naa nacaari: “Canaari juucua naajua jonenejiyani. Majaari nia nianujunu paniniu. Canaa jaaquequejosacari taraatia saniniuujia, majaari nia sapuenu”. <sup>18</sup> Naajuhuj pueyanaa, Tiuquinijiona Juan quishacari, nojuajaari mashaca ratuyashijia quiquiaari, sumatuu miaqueyashijiajuhuj. Pueyari saaja na sequequiaari samaruraca pueyanota. <sup>19</sup> Na nuhuaji, janiyari tiuquiquiaarini. Janiya cutaraari sumatuucua miaquejani, mashaca ratujuajuhuj. Pueyari cua sequequiaa: “Miaquejoru cuno, ratunu porocuanio. Sesa pueya cojijia, pa soosano Romano jiyaniijia seya cojijia sacuaatiajuhuj”. Naa nia soosacari janiya, Tiuquinijiona Juannio, niaari puetunu Pueyaso niishitiojosanojuanaa ruuretaa. Naajaa, pueyari na naata niishiniu maninia canaa miishanojiniji, janiya, Tiuquinijiona Juannio, canaari mariyata Pueyaso jiyaramiquishano cutarani.

*Jesu piriyojosacari tojiyashijianucua pueya*

*(Lc 10.13-15)*

<sup>20</sup> Corazín tiacajinia, mariyata Betsaida tiacajinia, Jesuuri tii socua pueya naatani-jioquiaari tamasaca tiacajiniji. Jiyajeneta casaa miiquiaari tii Pueyaso cumacataari. Pueyari saaja nocua tiuyaquiquiaari. Nojoriiri maja noojia na tacatonu quiquiaari sesa nojori miiniuujiniji. Cunora, Jesuuri nojori piriyojoquiaari. Naa sequequiaari nio caapiqui tiacajinia quiniaa pueyari:

<sup>21</sup> —¡Niaari taraatia saniitiosaanutaniya, nioojia nia tacatoyaquiniuucua sesa nia miishanojiniji! Janiya jaara Pueyaso cumacata miiquiaari Tiro tiacajiniani, mariyata Sidón tiacajinianio, taa cua miiquiaari nia tiacajiniacuaani, cuno taucuaca maara Pueyasocua tari noojia tacatocanu cutara. Nojori maara ritia cocuaque toqueya cushiyonuuquiaari nojori tacaaniu niishishaanura sesa nojori miishanojiniji. Naajuhuj, nojori maara juaca quejooquiaari na nacaacua, noojia nojori tacatosacari Pueyasocua, sesa nojori miiniuucua. <sup>22</sup> Naaratej, janiyari nia numooteyani: jiya puequesacari, niaari socua jiyanohua saniitiosaanutaniya Tiro tiacajinia quiniaa pueyajiniji, Sidón tiaca pueyajinijinio. <sup>23</sup> Capernaum tiacajinia quiniaanaa, ¿niaateeri jiyaniya niaari tamasaca tiaca shocotanutaniya nia jyanishacari niaari socua maninia cutara? ¡Maja! Niaari mani quiquiojinia quejoosaanutaniya. Janiya jaara cua cumacata cutara casaa miiquiaari Sodoma pueya tiacajiniani, taa cua miiquianu nia tajiniacuaani, Sodoma tiaca maara quiriqiaajaj. <sup>24</sup> Nocuaji nia sequeya cutaranijia: jiya puequesacari, niaari socua jyanohua saniitiosaanutaniya Sodoma tiaca pueyajiniji.

*Jesuucua tiuuniaari samaateriquiano cutara*

*(Lc 10.21-22)*

<sup>25</sup> Jiyacaritij, Jesuuri na Que Pueyaso sequequiaari:

—Quia shuquiritiaanijia cua Quenaa. Quiaari jiya camarnu, jiyocuacaanu camarnunio. ¡Quiaari maninia! Quiaari niishiyashijia pueya maninia casaa niishitirii, niishijia pueyacuaji quia jamosanoni. Niishijia pueyari saaja tama nojori niishishanoocuaaja tiuujiaca. <sup>26</sup> Naacuajitij cua Quenaa, quiaari maninia niishitirii niishiyashijia pueya, taa quia paniquiaaricuajani.

<sup>27</sup> Cua tojitiare pueyanaa, cua Queeri cua niqutioquiaari puetunu casaajanaa cua jiiiasocoriquiano. Majaari seetanujuanaa tamasaca niishiniu janiya. Saa cua Queja cutaraari cua niishiya. Naajuhuj, majaari seetanujuanaa tamasaca niishiniu cua Que. Saaja janiya, Neyanuni, na niishiya cutaranijia, naajuhuj canapue cua niishitiniu paniya cua Quecuajani. <sup>28</sup> Cucua nia nijiore, puetunu niajanijajanaa, canapue te tacaquioyoni, canapue te puera niishiriojonuujuacani. Naa jaara cucua nimia, janiyari nia samaraatanutaniyani. <sup>29</sup> Cua niishitiojosano nia tojiri. Janiyajiniji nia niishiri taamuecatucuaa janiyani. Janiyari ritia juayashijiani. Janiyari pueya shocoteyaquijiani. Naacuajitij, nioojiaari maja na tacaaniu quiniutianiya nia rupuesacari janiya. <sup>30</sup> Nia

tojishacari janiya, nioojaari juhuajaniya quiniutianiya. Cua poonitijiosacari niajaniya, majaari jiyajeneta na quiniu quiniutianiya niaara, cua cumaquishacari niajaniya.

## 12

*Jesu pueya carojotasacari trigo samaatenu juuca*

*(Mr 2.23-28; Lc 6.1-5)*

<sup>1</sup>Jiyacaritij, Jesuuri canaa na saquiriojosano pueyata cuhuariquia jiuujiaaco tajiriquiaa samaatenu juuca. Canaari jiyacari miaajeriquiaani canaa quiasacari nucuaco. Canaari secaja trigo jajau carojotanu coteequiaarini. Canaari na miojonuuriquiaani.

<sup>2</sup>Fariseocuaca jaara canaa niquiquiaari naa miyanotej, Jesu sequetureeri:

—¡Quia niquiri! ¡Quia pueya trigo shuniitiaa! ¡Na shuquiuquiojoniuyari! ¡Naa nojori miishacaritij, poonijioniuyari! Cuno maja panishano samaatenu juuca miiniuria. ¡Pa supuetana Moisés cuajaari naa pa rootaquiaaritij!

<sup>3</sup>Jesuuri cuno pojori riucuaaree:

—¿Majateeri nia serojonu quiquiaari Pueyaso Rupaajinia taa pa supuetana David miiquiaari na miaajesacarini, na pueyano? <sup>4</sup>Nojoriiri Pueyaso Secojojua tiajinia tiuquitiaquiaari. Pueyasora niquitiojosano pan satureeri. Cuno panri saaja pueyacuara secojonaa sasocoriquiano quiquiaari, maja socua tamonu pueyano sasocoriquiano. Naajaa, Davidri na saquiaari. Na miishanoori maninia quiquiaari Pueyaso niquiara.

<sup>5</sup>Naajuhuj, ¿majateeri nia serojonu quiquiaari tariucuacaanu Moisés naajiosanojinia, taa pueyacuara secojonaa pueyaracaanu poonijioquiaa Pueyaso Secojojua tiajiniani? Nojoriiri naa poonijionuuquiaa samaatenu juucajuhuaj. Naa nojori poonijiosacari Pueyaso Secojojua tiajinia samaatenu juucatej, cunoori maja sesa. <sup>6</sup>Moisés cuajaari pa rootaquiaari maja pa poonijionura samaatenu juuca. Naajaa, cuno rootasanoori seetanujanaa maja na quiniu Pueyaso Niyanura, jaara Pueyaso Secojojua tiajinia poonijionaara quiaquirijihuj. <sup>7</sup>Maja naasucuaari nia niishiniu quiquiaari casaa nio tariucuacaanu naajiotasano niishitiojiya niajaniya juucuan. Naa sequeyari: “Janiya cutaraari socua nia panitiaani niarta pueyacu nia taraajenura, maja saaja nia niquitiojonura nia seya cucuara catijiasocoriquiano”. Naa jaara nio naajiotasano niishijia quiriquia, niaa maara sesa miyashijia pueyacuara tonujiaquiriquiaj. <sup>8</sup>Cua tojitiare quiarijia. Janiyacuajaari Pueyaso Niyanuni. Naacuajitij, mijiria cua quishacari cua naata sequenu casaate samaatenu juuca miishiyani.

*Jesu jeeacasacari pueyano juaashiquia cuseetucjuara joojequetano*

*(Mr 3.1-6; Lc 6.6-11)*

<sup>9</sup>Na nuhuaji, canaari Jesuta quiojoquiaari quiniqijini. Canaari Pueyaso Secojojua tiajinia tiuquishiini. <sup>10</sup>Pueyanoori tii quiriquiaa cuseetucjuara joojequetano na juaashiquia. Taa canaa Judiocuaca camarucua Jesuucua saquiriojotanu paniriquiaa juucuacuajani, jiyacaritij, na sapojonuta Jesu nequesotaturee naari.

—¿Maninateeri samaatenu juuca cusosu naataniniuria? Paacuajaruhua niishitiojosaaquiaarini maja pa poonijionura samaatenu juuca.

<sup>11</sup>Jesuuri cuno pojori riucuaaree:

—Naa jaara niquiriyatujua borregoniyojua jiitiare, cuno jaara tiyare raama samaatenu juuca, ¿majateeri nocua nia quianu, raamaji nia panura nia seruniyojua? ¡Taaquiririnij!

<sup>12</sup>¿Majateeri pueyano socua jiyanojua panishano borregonijini? Taaquiririnij. Naaratej, maja pa tarinitianu maninia pa miiniuria pueyaracaanu, samaatenu juucajuhuaj.

<sup>13</sup>Na nuhuaji, sesarucjuua sequereeri:

—Quia juaashiquia quia shiitiore.

Na juaashiquia shiitioreeri. Ritia jeequequeeri juhua tanecaraja. <sup>14</sup>Naa Fariseocuaca niquishacari Jesu miishanotej, tohuareetaqueeri. Tama nojorijiaarijia rojotooquiaari nojori motenura Jesu.

*Jesujiniji pohuatasano tariucuacaanu naajiotasanojinia*

<sup>15</sup>Jesu jaara niishiquiaari Fariseocuaca miiniu panishano nojuaja, quiniqiji quiaqueeri. Queraatia pueyari na nuhuajiquiaari canaata. Jesuuri puetunu cusosuhujanaa

naatanijioquiaari. <sup>16</sup> Jesuuri na naatanijosano pueya rootaquiaari maja tamasaca niquiara nojori pohuatanura cante nojuajani. <sup>17</sup> Naacuajitij, tariucuaaanu Pueyaso sequesano caminiujiunia Isaías pohuatasanoori tohuateequiaari. Nojuajaari juhuacarijia naa pohuataquiaari Jesujiniji Pueyaso sequesano miriquitij:

<sup>18</sup> “Niocuajaari cua seru, cua saquiriojosano. Na timitiaanijia. Nojuajaari jiyanohua cua panishano. Janiyari cua Sohuanu jiyaronutaniya nocuani. Nojuajaari tamasaca pueyapue pohuatanutaniya janiyajiniji, nojori quiniuria cua muerasura pueyaracaanu. <sup>19</sup> Majaari pueyata juaajia na quiniu quiniutianiya. Majaari nacojojua na quiniu quiniutianiya. Majaari na rupaa tojishano quiniutianiya tiacaacaco. <sup>20</sup> Majaari quenaaja shuniitiasano naajua na shutianu quiniutianiya puetunujuanaa. Naajuhuj, majaari na maquishajanu quiniutianiya jatarinitiaja nojiyano samaritiu. Nojuajaari naa sesa miijiaca jiyanooniutianiya, nojuaja jaara tiuquiriohuajaatijaj, puetunu sesa miiniujianaa na puecanura, Jiyaniijajanaa na quiniuhuara pueyaracaanu. <sup>21</sup> Puetunu tiquiyocuacajinijinio quijiaca pueya-janaari nocua tiuuniutianiya”.

*Pueya sequesacari Jesu samaru cumaacaracana*

(Mr 3.20-30; Lc 11.14-23; 12.10)

<sup>22</sup> Tiquiaari Jesuucua jaatucusaquiaari. Cariyojuaru quiriquiaajaariuhuj. Naa quiquiaariiri samaruraca na quiniuucua. Jesuuri na jeecaree. Naacuajitij, tiquiaari pocujara quiquiaari, niquijiarajuhuj. <sup>23</sup> Cunora, puetunu pueyajanaari nocuaji jiuujiatequiaari. Sequetureeri:

—¡Nio jiyoteeri pa supuetana David niquiohuacuajinio supueno pueyano, tariucuaaanu sequesano pa jiyaniijara quiriquianotej!

<sup>24</sup> Fariseocuaca jaara tojiquiaari naa pueya sequesacari Jesujinijitij, nojoriiri na juaaniutia sequequiaari saaja:

—¡Cuno pueyanoori samaruhua tohuatanijiya Satanás cumaacata!

Satanásri samaruhua jiyaniijia. <sup>25</sup> Jesuuri cuno pueya niishiriojosano niishiquiaari. Cunora, nojori sequereeri:

—Jiya camarucua jaara juayonuujutare tama nojorijiaaja, majaari pueyaracaanu na naata quiniu camarnura. Ritia jatashiyari. Naajuhuj, tiacajinia quiniaa jaara juayonuutare jiyareta tama nojorijiaaja, cuno pueyari maja na naata quiniu jatiqiu. Naajariuhuj, pueyano jaara juayonuujutare tapueyocuacata tama na tijiniaajaaja, majaari nojori naata jatiqiu quiniu. <sup>26</sup> Jaara naa quiritij, samaruhua jaara tohuatanijosaaare Sesaaca cumaacata, tama na cuaqueya paracayaajarjia. Naacuajitij, majaari na naata na cumaaca rishiniu. <sup>27</sup> Janiya jaara samaruhua tohuatanijiya Satanás cumaacatani, taa nia sequeya janiyacujani, cua sequeretoj, ¿cante nia niishitiojosano pueya cumaquia samaruhua nojori tohuataniniuriani? ¿Satanástee? Majaruhua. Nojoricujaari samaruhua tohuataniquiaa Pueyaso cumaacata. Naacuajitij, nojori tohuatanijosacari samaruhua Pueyaso cumaacata, niaari jiyanohua jiyajeneya nia sequesacari janiya samaruhua tohuatanijiya Sesaaca cumaacatani. <sup>28</sup> Seetanujuanaa Pueyaso Sohuanu cumaquishacari janiya, samaruhua cua tohuatanijionura, niaa cumaati cua sequesano tojirii. Naa cua tohuatanijosacari samarhuatej, niaacuajaari niishiya Pueyasoori tari poonijiya juhua Jiyaniijia, mijiria nia tajinia.

<sup>29</sup> ¿Pueyanote na naata cumueeca pueyano tijania tiuquiniu na casami na jaariuutianura? Maja na naata na jaariuutianu, jaara coteenu na morojiyaquiri. Jaara na morojore coteenu, na nuhuaji cutara na naata na casami panu. Naajuhuj, janiyari Pueyaso cumaacata jaariuutiaa Sesaaca jiiitiasano pueyani.

<sup>30</sup> Cante cua jiyano quiyaquiyani, cunoori cua paraca. Cante cua naacutaaquia pueya rerecojonura Pueyasorani, nojoriiri saaja pueya cocuataa Pueyasocujaji.

<sup>31</sup> Naarate nia sequeyanijia: puetunu pueya miishano sesajanaari na naata jiyanooshaanu. Sesacojojua pueyanoori na naata jiyanooshaanujuhuj. Saniniuujia,

cante Pueyaso Sohuanu miishano sesacajani, cunoori maja na jiyanooshaanu quiniutianiya cutara. <sup>32</sup> Cante Pueyaso Niyanu sesacajani, nojuajaari na naata jiyanooshaanujuhuj. Saniniuuja, cante Pueyaso Sohuanu sesacajani, nojuaja cutaraari jiyanooyaquishaanutaniya pueyaracaanu. Na ruuretanuucua Pueyaso Sohuanu, majaari na jiyanooshaanu quiniutianiya mijiria, jiyocuacaanujuhuj.

*Naanaari niishishano na jajaujiniji*

*(Lc 6.43-45)*

<sup>33</sup> Naana jaara maninia naana quiri, maninia jajau muetuyari. Naana jaara sesarunaja quiri, sesa jajau muetuyari. Naacujitij, na jajaujiniji paari niishiyani taamueca naanatenojoni. <sup>34</sup> Niaari juhua sacocua. ¿Niaatucua taa maninia pocuajaca quirini, niaa jaara pueyaracaanu sesa miijiaca quiyajaa? Paari poojiajiniji pa niishiriojosano pocuaquiaani. <sup>35</sup> Naacujitij, maninia jiuujiaraca pueyanoori saaja maninia casaa pocuaja. Sesa jiuujiaraca pueyano saniniuuja, sacuaraatia casaa pocuajari. <sup>36</sup> Nia sequeya cutaranijia, Pueyaso saniitonu juuca, pueyari puetunu najuhuana sesa na pocuasanojinijijiana nequesoreesaanutaniya. <sup>37</sup> Cante maninia casaa pocuaja quiquiaarini, cunoori sequesaanutaniya “maninia pueyanota”. Naajuhuj, cante sesa casaa pocuaja quiquiaarini, nojoriiri saniitiosaanutaniya saniniuuja. Naaratej, majaari nia niti nia taquiriocratenu sacuaraatia casaa nia pocuanura.

*Fariseocuaca niquiniu panishacari Jesu miishano Pueyaso cumaacata*

*(Mr 8.12; Lc 11.29-32)*

<sup>38</sup> Noojiaqueya Moisés Rootasanojiniji niishitiojonaari tii quiri quiaa Fariseocuacata. Nojoriiri Jesu sequequiaari:

—Niishitiojonanaa, jiyajeneta casaa quia miiri Pueyaso cumaacata canaa niquishocoriquiano.

<sup>39</sup> Jesuuri nojori riucaaree:

—Niaari sesoriquia pueya, Pueyaso tojiyashijia. Majaari nia niquiara casaa cua miiniu quiniutianiya Pueyaso cumaacata. Niaari saaja niquiriyatu cutara miishano niquiniutianiya taa supuetana Jonás miishaaquiaaricuaani. Cuno Jonásri Pueyaso sequesano caminiujiunia quiquiaari. <sup>40</sup> Nojuajaari puereetuuca sapitiaaja seecojinia shocojotequiaari jiuujianaraca juuca, jiuujianaraca niucuanio. Naajuhuj, janiyari raaco macu niojosaqui camueenujunutaniya jiuujianaraca juucani, jiuujianaraca niucuanio. <sup>41</sup> Jonás pohuatasacari Pueyaso rupaa Nínive tiacajinia, cuno tariucuacaanu tucuacaari noojia tacatoquiaari sesa nojori miishanojiniji. Cunora, Pueyaso nequesoreenu juuca quishacari, Nínive pueyari saneecuatanutaniya nojori tonujunura nio pa quishacari pueyacuara. Nojoriiri Pueyaso saquiriojotanutaniya nio pa quishacari pueyacuara, nojori ruuretanuucua tamonu Pueyaso sequesano caminiujiunia socua jiyaniijijiana cutara Jonásjiniji. <sup>42</sup> Naajuhuj, tariucuacaanu jiyaniijia maajiiri niquiaari tucuacaanuji pa supuetanaa jiyaniijia Salomón tojiniucua. Cunoori quiquiaari jiyanohua niishijia Salomón quiniucua. Cuno maajiiri pananu shuucujaji niquiaari Salomón na tojiniuria, jiyanohua tucuacaanu na jiyajiniji. Naaratej, Pueyaso nequesoreenu juuca quishacari, cuno maajiiri sanenutaniya na saquiriojotanura nio pa quishacari pueyacuara. Nojoriicuara saquiriojotanutaniyari nojori ruuretanuucua tamonu niishijia, socua niishijia Salomónjiniji cutara.

*Samaruuri na tohuatanishaquiji tacatejohua*

*(Lc 11.24-26)*

<sup>43</sup> Samaru jaara tohuatare pueyanojiniji, joojuashiquio rucuaneyari na samaatejara na pajesacari. <sup>44</sup> Jaara riuriataaquiri na samaatejara, naa niishiriojiyari: “Tacateyarohuaraqui tariucua cua quiquiojiniohua”. Jaara tacatemohua, cuno na pueyano riuriatasuhuari juhua camaruuju tia, netoosano, maninia jeenucuasano. <sup>45</sup> Naaratej, samaruuri socua tamasaca narta samaruhua pajeya. Socua siete narta samaruhua riuriataari socua jiyanohua sesa nojuajiniji. Puetunu nojorijianaa jaara tiuquitiare cuno

pueyanoocua tii na quiniuria, cuno pueyanoori na nuhuaji socua jiyanoohua sesa quiijara jiyacateja.

Naa quiniutianiyajaariuhua nio pa quishacari pueyara na tojitiaaquiniuucua janiya. Nojoriiri socua sesa quijiacara jiyacatenutaniuhua taa cua niyacarijia quijiaca nojori quiquiaaricuajani.

*Cante seetanujuanaa Jesu nucuani, tapueyocuacajuhuj*  
(Mr 3.31-35; Lc 8.19-21)

<sup>46</sup> Jesu pohuatasacarijia pueya niquiara, na nucuaari tiuquijioquiaari Jesu tapuey-  
ocuacata Jesuucua. Carijiniacuma quitiuriquiaari. Jesuta pocoojonu paniriquiaa juu-  
cuaari. <sup>47</sup> Tamonu pueyanoori Jesu sequere:

—¡Niishitiojonanaa! Quia nucuaqui quia tapueyocuacata carijiniacuma quiya. Quiata  
pocoojonu paniyaquinaari.

<sup>48</sup> Jesuuri saaja na numootena pueyano riucaaree:

—¿Cante cua nucuani? ¿Cante cua tapueyocuacani?

<sup>49</sup> Jiyacaritij, Jesuuri canaa na tojitianaa pueya shishirii. Tii quiniaa pueya sequereeri:

—Nio cua tojitianaani, nojori cutaraari juhua cua nucu, juhua cua tapueyocuaca  
cutara. <sup>50</sup> Naacuajitij, cante cua Que Pueyaso panishano miiquiaa cutarani, nojuaja  
cutaraari cua tarajanu, cua rimiatsu, cua nucuanio.

## 13

*Natoojojua pueyanojiniji pohuatasano*  
(Mr 4.1-9; Lc 8.4-8)

<sup>1</sup> Cuno juucaja, Jesuuri tohuataquiaari tajiniji. Caminia casaqueyaji cajishiiri. Canaari  
nata quiriquiaani. <sup>2</sup> Jiyanoohua queraatia pueyari nocua rerequejoquiaari. Puera  
pueya quiniuucua, Jesuuri botejina tacaquiaari. Tii cajishiiri. Puetunujuanaa pueyari  
jaaquiajina jateequiaari, tiji na tojitianura Jesu canaata. <sup>3</sup> Jesuuri queraatia casaa pueya  
maanu niishitiojoriquiaa miriqui. Naa pohuataquiaari puetunu canaajanaari:

—Pueyanoori natoojonura quiaquiaari na cuhuariquiajina. <sup>4</sup> Na jacutasacari, seca-  
jaari nucuaco totequiaari. Shuhuari nocua rosetaquiaari. Puetunujuanaa nucuacoji  
na natau miojoquiaariiri. <sup>5</sup> Tajaacaari totequiaari tamaqui sai tajiniaqueya. Majaari  
puera jiya quiniu quiquiaari tii. Naaratej, cuno natauri ritia moritiaquiaari. <sup>6</sup> Pananu  
jaara tacaquiaari, cuno natauri ritia sorequiaari maja puera nujuacaraca na quishacari.  
<sup>7</sup> Tajaacaari totequiaarijuhua riyocuaca tajinia. Riyocuaca maashishacari, majaari cuno  
natau maashiniu quiquiaari maninia. Majaari na muetunu quiquiaari. <sup>8</sup> Maninia jiyajinia  
totequiaariiri tajaaca saniniuujia. Tii moritiaquiaari maninia cutaraari. Maninia mue-  
tuquiaari cutaraari. Puetunu cuno jiyoneejinijijianaani, noojiaqueyari muetuquiaari  
cien jajau niquiriyatu jiyonaacua. Tamonu jiyoneeri muetuquiaari sesenta jajau  
niquiriyatu jiyonaacuajuhuj. Socua tamonu jiyoneeri muetuquiaari treinta jajau. <sup>9</sup> Niaa  
jaara numaaraca quiri, nia tojitiare cua pohuatasano.

*Casaara Jesu niishitiojiya miriquini*  
(Mr 4.10-12; Lc 8.9-10)

<sup>10</sup> Jesuuri naa pohuataquiaari miriqui pueya niquiaratej. Na nuhuaji, canaa,  
Jesu saquiriojosano pueyani, canaari nocua catecanoquiaarini. Canaari na nequeso-  
taquiaarini:

—Jiyaniijianaa, ¿casaara pueya quia niishitiojoriquiaa miriquini?

<sup>11</sup> Jesuuri canaa riucaaree:

—Pueyasoori nia saquiriojoquiaari, nia niishishoo casaa Pueyasojiniji nia niishiniuria,  
taa Pueyaso poonijia pueya jiuujiajiniani, na muerasura nojori quiniuria shuquiriaa-  
tia. Tamasacara saniniuujia, majaari nio jiyasohuaja Pueyasojiniji niishishano nojori  
niishishocoriquiano. <sup>12</sup> Cante Pueyaso rupaa tojijia cutarani, nojuajaari socua niishi-  
tiojosaanutaniya, Pueyasojiniji jiyanoohua na niishiniuria. Cante Pueyaso tojiyashijiani,  
shiitianiyojua Pueyasojiniji nojori niishishanoori puetunu jaariutiasaanutaniyajanaa  
nojorijiniji. <sup>13</sup> Cunora, janiyari miriqui pohuatariquiaa nojori niquiarani. Naacuajitij,

nojoriiri najuhuana niquiquiaa cua miishano na niishiyaquiniutia. Nojori tojishacari cua pohuatasano, na numaa shama tojitiuquiaa saajaari. Majaari quenaaja nojori niishiniu na tojishano. <sup>14</sup> Naa nojori quiniuucuatej, tari tohuateereeri juhuacarjia supuetana Isafas sequesano nojorijiniji. Pueyara Pueyaso sequesano caminiujiunia na quiniuucua, nojuajaari naa sequequiaari pueyatej:

“Niaari seetanujuanaa Pueyaso rupaa tojiniutianiya najuhanaj. Majaari nia niishiniu quiniutianiya. Niaari Pueyaso miishano niquiniutianiya najuhanaj. Majaari nia niishiniu quiniutianiya nia niquishano. <sup>15</sup> Nojoriiri cumajiuujiaaca quiya. Nojoriiri juhua numueeju, tojiyashijia. Nojoriiri juhua nimishitiu quiyajuhua. Naa juhua nimishitiu quituyari nojori niquiyaquiniuucujaji. Nojoriiri naa juhua numuejunucujuhua, nojori tojitiaaquiniuucujaji noojiata. Naa quituyari nojori niishiyaquiniuucujaji noojiata, cucua nojori tacatenuhuara cua jeecanura nojori jiuujia seque”.

<sup>16</sup> Cua pueyanaa, niaari saniniuujia shuquiriaatia quiya maninia nia niishishacari cua miishano, nia tojishacari cua pohuatasanojuhua. <sup>17</sup> Seetanujuanaa nia sequeyanijia, queraatia tariucuacaanu pueyari quiarjia nia niquishano niquiniuucua jiaatiaquiaari juucua. Naa nio niquiniuucua jiaatiaquiaari tariucuacaanu Pueyaso sequesano caminiujiunia, queraatia maninia pueyano. Majaari nojori niquiniu quiquiaari saaja. Nojoriiri nia tojishano tojiniuucua jiaatiaquiaari juucujuhua. Majaari nojori tojiniu quiquiaari saaja.

*Jesu niishitiojosacari miriqui na pohuatasano natojojuajiniji*

(Mr 4.13-20; Lc 8.11-15)

<sup>18</sup> Nia pohuatareera nia niishiniuria cua pohuatasano natojojuajiniji. <sup>19</sup> Canapuate Pueyasojiniji cua pohuatasano niishiyaquiyani, nojoriiri juhua nucuaco toteno jajau. Sesaacaari niquiaa. Pueyaso Rupaa jaariutiaa nojiainijiiri. <sup>20</sup> Noojiaqueya pueyari juhua sai tajiniaqueya jacutasano jajau quiquiaa. Naaratej, nojori jaara shuquiriaatia tojiri Pueyaso Rupaa, nojoriiri ritia shitimia nocua tiuquiaa. <sup>21</sup> Nojoriiri juhua nujuacaaju. Majaari cumaatia na nujuatunu. Naaratej, nojori jaara naquiya miishaare Pueyaso Rupaa tojijia nojori quiniuucua, nojoriiri ritia Pueyaso tojiniu tarinitiaquiaa. <sup>22</sup> Noojiaqueya pueyari juhua riyocuaca tajinia toteno jajau quiquiaa. Nojoriiri Pueyaso Rupaa tojirii. Na nuhuaji, nojoriiri saaja puera tacaquiaa nio jiya casamiicua. Naajuhua, nojoriiri sapojosaaquiaa nojori jyanishacari nojori jaara queraatia casamiriaca quiriquia, nojori maara shuquiriaatia quiriquiaj. Cunora, Pueyaso Rupaari maja na naata poonijionu nojori jiuujiajinia. Naacuajitij, cuno pueyari juhua natau muetuhuo quiquiaa. <sup>23</sup> Saniniuujia, cante maninia tojijia Pueyaso Rupaani, maninia na niishiyari. Cunoori juhua jiya maniniuujia jacutasano jajau. Naacuajitij, cuno pueyari juhua maninia natau, maninia muetuna cutara. Jyanohua maninia pueyari quiquiaa na tojishacari Pueyaso Rupaa. Naaratej, tamonuuri juhua cien jajau muetujua. Tamonuuri juhua sesenta jajau muetujua. Tamonuuri juhua treinta jajau muetujuhua.

*Jesu pohuatasano miriqui trigo tajinia moritaja sesa jiyasocujiniji*

<sup>24</sup> Jesuuri tamonu miriqui pohuatasano pohuataquiaari pueya niquiara, nojori na niishitiojonura taa Pueyaso tojitiaashijia pueya quiniutianiya Pueyaso muerasu tajiniani. Jesuuri naa pueya pohuataquiaari:

—Tamonu pueyanoori maninia jajau nataquiaari na cuhuariquiajinia. <sup>25</sup> Puetunu pueyajanaa jaara niucua maqueturiquiaa, na paracaari jiyacari niquiaari. Sesa jiyasocua jajau jaquerooquiaari trigo natasano cuhuariquiajiniaari. Na natanu nuhuaji, tacateyarohuari. <sup>26</sup> Trigo jajauri maashiquiaari. Na nuhuaji, na jajau mueratuusacari shusha, sesa jiyasocuaari mariyata niquishaaquiaari maashiyano. <sup>27</sup> Cuhuariquia camaru seyari quiaquiaari na camarujanaa nojori sequenura: “Jyanijianaa, ¿majateeri maninia saquiriojosano jajau quiquianucujaji quia natasano cuhuariquiajiniani? ¿Teje cuno sesa jiyasocua moritiarucuaa quia natau tajiniacuaraari?” <sup>28</sup> Cuhuariquia camaruuri nojori riucaaree: “Pa paracaari cunohua, naa pa miiriucuaani”. Na seyari na nequesotaree:

“¿Quiaate paniya canaa quianura cuno jiyasocua jayotanura trigo tajiniaqueyajiniji?”  
<sup>29</sup> Na seya sequeree saajaari: “Maja. Maja nia jayotanu jiyasocua, niaa mariqui trigo na cojiritiareeri. <sup>30</sup> Naajaa, nia tarinitiare cuaara maashiiria, mariyata cuaara noshiirijaara trigo jajau. Na nuhuaji cutara janiyari senoonaa jiyaronutaniyani, cuaara coteenu jiyasocua namirioora, nojori jiunioconura jiyasocua catijasocoriquiano. Na nuhuaji cutara, cuaara trigo jajau racatatuura nataco”.

*Jesu pohuatasano miriqui mostaza jajaujiniji*  
 (Mr 4.30-32; Lc 13.18-19)

<sup>31</sup> Jesuuri socua miriqui pohuataquiaari pueya niquiara, na niishitiojonura taa Pueyaso poonijiya pueya jiuujajiniani, nocua nojori tiuushacari. Naa sequereeri:

—Tamonu pueyanoori mostaza jajau nataquiaari na cuhuariquiajinia.

<sup>32</sup> Seetanujuanaa mostaza jajauri socua jiyanoohua shiitianiyojua puetunu tamonu jajaujinijijianaa. Naajaa, cuno mostaza jaara maashiri, socua puereetuucara maashijaari narta nataacuacajiniji. Naacuajitij, shuhuari na cashacucuaacua jesuya. Naajuhuj, pueyano tojishacari Pueyaso rupaa, seetanujuanaa maninia Pueyaso muerasura jatanishiyari.

*Jesu pohuatasano miriqui pan poreetajjiniji*  
 (Lc 13.20-21)

<sup>33</sup> Jesuuri nio miriqui pohuatasano pohuatarohuacuhua pueya niquiara, taa Pueyaso Rupaa poonijiya mijiriani. Nojori sequereeri:

—Pueyaso rupaari jiyanoohua cumaacaraca na poonijionura juhua pan poreetaja. Maaji jaara pan poreetaja cojitiri jiuujanaraca shiitianiyojua tohuatashi mishaja trigo cashojuata, puetunujuanaa na poreeteyari. Pueyaso rupaari naa cumaacaracajuhuj, pueya na jataniniuria quiariniora.

*Casaara saaja miriqui sequesano pohuatasaaquiaa pueya niquiarani*  
 (Mr 4.33-34)

<sup>34</sup> Puetunu Jesu pohuatasanojuanaa pueya niquiarani, miriqui sequesanoori quiquiaari. Puetunu na pohuatasanojuanaari naa quiquiaaritij. <sup>35</sup> Naacuajitij, maninia tohuateequiaariiri tariucuacaanu pueyara Pueyaso sequesano caminiujunia sequesano, jaara nio naajiotaquiaari:

“Pueyasoori naa sequeyaquij: ‘Janiyari pueya niishitiojonutaniyani saaja miriqui cua pohuatasano. Naacuajitij, janiyari pueya pohuatanutaniya pueyaracaanu nojori niishishoo casaani, shusha jiya shipinishaanujiniji’ ”.

*Jesu niishitiojosacariuhua miriqui na pohuatasano sesa jiyasocujiniji*

<sup>36</sup> Na nuhuaji, Jesuuri pueya maanu sequeree:

—Tariucuaja pueyanaa. Nia quiojorohua.

Na nuhuaji, nojuajaari na quijia tiajinia tacaarohua. Jiyacaritij, canaa, na saquiriojano pueyani, canaari nocua catecanoquiaarini. Canaari Jesu sequereeni:

—Canaa quia niishitirijia miriqui quia pohuatasano cuno sesa jiyasocujiniji.

<sup>37</sup> Jesuuri canaa sequeree:

—Janiyacujaari cunoni, maninia jajau natoarjojuani. <sup>38</sup> Nio jiyari juhua cuno cuhuariquia. Pueyaso muerasuuri juhua cuno maninia jajau, cuhuariquiajinia natanoni. Tamasacaari saniniuujia Sesaaca muerasu quiya. Nojoriiri juhua cuno sesa jiyasocua, cuhuariquiajinia natau tajinia maashinioni. <sup>39</sup> Sesaacaari juhua cuno cuhuariquia camaru paraca. Nojuajaari cuno sesa jiyasocua nataquiaari. Nio jiya puequesacariiri juhua cuhuariquia senoosacari quiniutianiya. Jiyocuacaanuji Pueyaso seyari juhua cuhuariquia senoonaa quiniutianiya. <sup>40</sup> Naatej, taa sesa jiyasocua nami-tiashiya catijasocoriquianocuaani, naa quiniutianiyajaariuhua nio jiya puequesacari. <sup>41</sup> Janiyari cua seya jiyaronutaniya jiyocuacaanujini. Nojoriiri sesa miijaca quioonutaniya, mariyata canapuate tamasa miitiquiaa sesani. <sup>42</sup> Nojoriiri quejoosaanutaniya mani quiquiojinia. Nojoriiri tii sapuenutaniya pueyaracaanu. Naquiya na miishacari, na

quiaa miaquenutaniyari. <sup>43</sup> Na nuhuaji, Pueyaso tojtiajacaari jiyanoehua shacantuucara quiniutianiya juhua pananu, na Que Pueyaso jiitiasacari nojori pueyaracaanu. Cante numaacarani, cuaara tojtiaara cua sequesano.

*Jesu pahuatasano miriqui jiyanoehua panishano casaajiniji*

<sup>44</sup> Jesuuri canaa na pueya pahuataquiaari miriqui, Pueyaso muerasu pa quiniuni, cunoori jiyanoehua panishano. Nojuajaari naa sequequiaaritij:

—Tamonu pueyanoori tamasa cuhuariquia tajiriquiaa juucua. Casaa riuriatamaari, jiyanoehua panishano casaa. Tiijia na jamorohuari tee na quiriquiaacuajani. Jiyanoehua na shuquiritiasacari na riuriasano casaa, puetunujuanaa tama na casamijiaaja niqutiojoreeri queraatia cumaneeca na jiitianura. Na nuhuaji, puetunu na cumaneecajanaa pataareeri cuno cuhuariquia camaruucua, cuno cuhuariquia na masenura. Naacuajitij, cuno jiyanoehua na panishano casaari tama na casaara quiquiaarijiaaja. Naajuhuj, socua jiyanoehua panishano cutaraari, Pueyaso pueyanora nia quiniuria. Cunoori jiyanoehua socua panishano puetunu pa panishano casaajinijianaa.

<sup>45</sup> 'Socua nia tojiri nio pahuatasano. Casami niqutiojonaari pueyaracaanu rucuaneriquiaa shanoehua cohuajaaca tiujiau na pajenura. Cunoori noturu shipinijosano sai quiquiaari. <sup>46</sup> Tamonu juuca, jiyanoehua shanoehua noturu saajia niqutishaaquiaariiri. Jiyanoehua na panishano. Naaratej, puetunu na jiitiasanojuanaa niqutiojoquiaariiri, cumaneeca na jiitianura, cuno na panishano casaa na masetajara. Na nuhuaji, puetunujuanaa na casami samitia masequiaari cuno noturu saajiaari, jiyanoehua na panishanoni. Naajuhuj, nia tarinitiare puetunu nia panishano casaajanaa, Pueyaso pueyara nia quiniuria seetanujuanaa.

*Jesu pahuatasano miriqui shiyarujiniji*

<sup>47</sup> 'Pueyaso Rupaari juhua puereetuuca shiyaru na camaru jartasano caminiajinia. <sup>48</sup> Jaara mishaja quiquiaari sapitiaajata, pueyari na jayotaquiaari jaaquiaajiniara. Queraatia tamaatiuniucua sapitiaajaari tii quiriquiaa. Pueyari jaaquiaajinia cajituuquiaari saaja maninia sapitiaaja nojori saquiriojonura. Canaasatujinia na niojotureeri racatasocoriquiano. Sesa sapitiaajaari saniniuujia jacutasaaquiaari. <sup>49</sup> Naa quiniutianiyajaariuhuj jiya puequesacari. Naacuajitij, Pueyaso seyari rosetanutaniya, sesa miijiaa na saquiriojonura maninia pueya tajiniji. <sup>50</sup> Na nuhuaji, sesa pueyari quejoosaanutaniya mani quiquiojinia, taa sesa sapitiaaja jacutasaaquiaaricuaani. Nojoriiri tii sapuenu-taniya. Na quiaa miaquenutaniyajaariuhua naquiya na miiniutia.

*Pueyaso Rupaari jiyanoehua panishano: tariucuacaanu naajiotasano, quiari naataja naajiotasanonio*

<sup>51</sup> Jesu pahuatanu puecasacari, canaa na pueya nequesotaquiaariiri:

—¿Niaate maninia niishirii puetunu cua pahuatasanojuanaacuaja?

Canaari Jesu riucuaareni:

—Taaquiririnij Jiyaniijianaa.

<sup>52</sup> Jesuuri canaa sequeree:

—Maniacuajaqui. Tariucuacaanu Pueyaso Rupaajiniji niishitiojona jaara quiarinio cua niishitiojosano Pueyasojiniji niishirijuhuj, nojuaja cutaraari Pueyaso Rupaa niishijia seetanujuanaa. Nojuajaari juhua tia camaru, cante tariucuacaanu shanoehua casamiri-acacuajani, quiarinio casamiriacajuhuj, na tiajiniaaco racatasano. Na panishacari, na camaruuri na racatasanojiniji na panishano rijia.

*Jesu quishacari Nazaret tiacajinia*

*(Mr 6.1-6; Lc 4.16-30)*

<sup>53</sup> Jesu jaara puecaquiaari miriqui pahuatanu, tiji quiaquiaariuhuari. Canaari na nuhuajiriquiaani. <sup>54</sup> Canaari na maashijia tiacajinia tiuquiquiaariuhuani. Canaa tiuquiiijosacari, canaari Pueyaso secojojua tiajinia tiuquiquiaarini. Jesuuri tii pueya niishitiojonu coteequiaari. Pueyari juujiatequiaari na niishitiojosano nojori tojishacari. Nojoriiri tama sequequiaarijiaaja:



—¿Taa nio pueyano niishiya puerajaanani? ¿Tejenotejaara na cumaacani, cusosuhua na naatanijionurani? <sup>55</sup> Na shipininiocuajaari suruhuatujujini casa shipinijiona quijia. Na nucuacuajaari María. Na tapueyocuacaari Santiago, José, Simón, Judasnio. <sup>56</sup> Na rimiatuhuari mariyata niya pa tajinia quiya. ¿Taa na niishiya pueraarini?

<sup>57</sup> Naaratej, pueyari na ruuretaquiaari saaja. Naa na tiacajinijinio pueya tojiti-aaquishacari nojuajatej, Jesuuri nojori sequequiaari:

—Puetunu tiqiyocua pueyajanaari maninia tojitiaquiaa cutara Pueyaso sequenu panishano caminiujuunia. Saaja narta pueya tama na jiyajinijiniojuaarjia na tojitianu paniyaquiya, tama na tiajinijiniojuaja pueyano.

<sup>58</sup> Naa nojori ruuretenuucua Jesutej, majaari puera na cumaacata na miiniu quiquiaari tii, nojori tiyuquinuucua nocua.

## 14

### *Herodes motesacari Tiuquinijiona Juan*

*(Mr 6.14-29; Lc 9.7-9)*

<sup>1</sup> Cuno quishacari, Galilea jiya jiyaniijia Herodesri pohuatasaaquiaari Jesu miishano-jiniji na cumaacata. <sup>2</sup> Herodesri na seya sequequiaari Jesujiniji:

—¡Nojuacuajaari cua mosano Tiuquinijiona Juan! ¡Samiitiarohuacuaaqui! Naacuajitij, jiyanhua cumaca jiitiaari, jiyajeneta casa na miiniuria Pueyaso cumaacata.

<sup>3</sup> Herodesri naa sequequiaariti na monuucua Tiuquinijiona Juan. Nojuajaari naa miiquiaari Juantej: coteenu na quiatequiaariiri. Na morojoquiaariiri cumayocua shipinishano jiyocuata. Na nuhuaji, na nujuatequiaari nujuatejojuajiniaari. Herodesri naa miiquiaari na juaniutia Juantej, Juan nacasunuucua nojuaja, Herodes quiniuucua tarajanu Felipe niquiocuata. <sup>4</sup> Tiuquinijiona Juanri naa Herodes sequequiaari quiasano na quiyaquishacarijia:

—¡Quiaari Pueyaso tojiyashijia! ¡Majaari maninia quia quiniuria Herodíasta! ¡Nojuacuajaari quia tarajanu Felipe niquiocua!

<sup>5</sup> Herodesri cunora Juan monu paniriquiaa juucua. Judiocuaca puereriquiaa saajaari. Judiocuacaari niishiquiaari cutara, Juanri seetanujuanaa Pueyaso sequenu panishano caminiujuunia quiquiaari. <sup>6</sup> Tiuquinijiona Juan nujuasacarijia nujuatejojuajinia, Herodesri na rasaanu juucajinia queranacuquiaari na masuusano pueyata. Jiyacaritij, cuno maaji Herodías niyatuuri nianujuquiaari Herodes masuusano pueya niquiara. Jiyaniijia Herodesri jiyanhua na shuquiritiaquiaari. <sup>7</sup> Naaratej, Herodesri necanuru sequequiaari puetunu pueya niquiarajanaa:

—Sanaunaa, cua sequere casa quia paniyani. Janiyacua quia niquitiore quia panishanoni. ¡Seetanujuanaa quia sequeyanijia! Majaari cua rupaa cua jatanu quiniutianiya. ¿Casa quia paniniutianiya?

<sup>8</sup> Jiyacaritij, niyacoo nucua Herodíasri neyatu rootaquiaari jiyasohuaja, casa na masenutianiya. Naaratej, niyacoori jiyaniijia Herodes sequesee:

—Cua quenunaa, cua niquitiore Tiuquinijiona Juan naca miacojuajinia.

<sup>9</sup> Jiyaniijia Herodesri taraajequee niyacoo sequesano na tojishacari. Naajaa, majaari na naata na rupaa jatanu quiquiaari, seetanujuanaa na sequenuucua na masuusano pueya niquiara. Naacuajitij, Herodesri na seya sequequiaari cuara niquitiosaari-anoj. <sup>10</sup> Naaratej, na pueyano jiyaroquiaari nujuatejojuajiniaari, Tiuquinijiona Juan na nacatanura. <sup>11</sup> Na nuhuaji, Juan nacaari patasaaquiaarihua miacojuajinia. Niyacoo niquitiosaasuhuari. Niyacoori saniniuuja na nucuaacua na pataquiaari.

<sup>12</sup> Na nuhuaji, Tiuquinijiona Juan pueyari quiojoquiaari na quete na panura. Na jamotuquiaariiri. Na nuhuaji, nojoriiri nijioquiaari Jesu pohuatanuucua Tiuquinijiona Juanjiniji.

### *Jesu mianuutesacari cinco mil pueya*

*(Mr 6.30-44; Lc 9.10-17; Jn 6.1-14)*

<sup>13</sup> Jesu tojishacari Tiuquinijiona Juan tari mosaarucuaa, nojuajaari canaa jiyataquiaari botejinia tamaquiria, pueya quiyaquishaquiria. Pueya jaara niishiquiaari tee Jesu

quiaareeni, queraatia pueyari cuno jiya tiacajiniji quiojoquiaari tiriarajuhuj. Nojoriiri na neteyotaquiaari nucuaco caminia shuriuquioco. Cuno pueyari canaacuaji cutesee. <sup>14</sup> Naacuajitij, Jesu rosesacari botejiniji, jiyanoehua queraatia pueya niquishii saajaari. Nojoriicua taraajereeri. Cuno pueya patootasano cusosuhua naatanijioreeri. <sup>15</sup> Tariucua tenacari, canaa, Jesu saquiriojosano pueyani, canaari nocua niquiaarini. Canaari na sequereeni:

—Canaa Jiyaniijanaa, paa niya quiya pueya quiyaquishaquini. Paari nininiutianiyani. Juhucarijia pueya quia sequere nojori cuaara quiojohuara tiacajinia, na miaqueso-coriquiiano nojori masenura.

<sup>16</sup> Jesuuri canaa sequeree saaja:

—¿Maatucua casaara quiojiyarohuani? Niaa mariqui nojori mianuutere saniya.

<sup>17</sup> Canaari Jesu sequereeni:

—Maja canaa jitianu miaquesano. Niya quiya saajaari cinco pan, caapiqui sapitiaajanio.

<sup>18</sup> Jesuuri canaa sequeree:

—Miji nia patare.

<sup>19</sup> Jesuuri sequeree pueya cuaara cajitiuuria jiyasocujinia. Na nuhuaji, Jesuuri cuno pan pataree, sapitiaajanio. Jiyocuacaanu maureeri na Queecuara, miaquesanoocuara na secojonura. Na nuhuaji, Jesuuri pan neecasequiaari queraatiara. Canaa na niquitiojoreeri puetunu pueyajanaa canaa niquitiojosocoriquiiano. <sup>20</sup> Puetunu pueyajanaari miaquenuquiaari. Maninia tooquioreeri. Nojori puecasacari miaquenu, canaari pan neeca reratequiaariuhuani, sapitiaaja raquiquiano. Doce canaasatuuri mishinijiosaaquiaari na raacuata. <sup>21</sup> Jiyanoehua queraatia pueyari miaquenuquiaari; cinco mil quiquiaari saa canujua. Majaari maajipohua serojosaanu quiquiaari, naatujoorinio.

*Jesu rucuanesacari mohuaca caco*

*(Mr 6.45-52; Jn 6.16-21)*

<sup>22</sup> Na nuhuaji, Jesuuri canaa na saquiriojosano pueya secootequiaari botejinia canaa tacatanura, canaa puetanuracuaa nojuaja caminia taquijiria. Jesuuri jiyacari pueya maanu sequeriquiaa nojori quiojonuhua. <sup>23</sup> Pueya jaara tari quiojoquiaariuhua, Jesuuri tuhuananuucua tacaquiaari tamajaaja, na Que Pueyaso na secojonura. Jaara niniquiaari, Jesuuri tii quiriquiaa tamajaaja. <sup>24</sup> Canaari saniniuujia caminia jiuujiajinia tari jaaretariquiaacuani. Mohuacaari saaja canaacuara cajiniuucuariquiaa, paratu piyarojosacari canaacuara. <sup>25</sup> Juhuaquenu panishacari, Jesuuri canaa rupesee mohuaca caco na rucuanenuta. <sup>26</sup> ¿Canaa niquishacari casa mohuaca caco rucuaneyano, canaari jiyanoehua shiriqutiuriini! Canaari sariyocuatereeni.

—¡Yae! ¡Samaruruhua!

<sup>27</sup> Jesuuri ritia pocuaree. Canaa sequereeri:

—¡Nioojia nia cumaquiri! Janiyacuajanjia. Maja nia puerenu.

<sup>28</sup> Canaa tojishacari Jesu, Pedroori Jesu sequeree:

—¡Jaara seetanujuanaa quiajaniya quiri Jiyaniijanaa, cua sequere quiocua cua quianura mohuaca caco!

<sup>29</sup> Pedro sequereeri:

—Mijicuarajaj.

Pedroori ritia rosequiaari botejiniji. Mohuaca caco rucuanenu coteequiaariiri Jesuucua na quianura. <sup>30</sup> Na niquishacari paratu jiyanoehua piyarojiyano, Pedroori puerequiaari. Na pueresacari, moó cariquimia tiuquiniu coteequiaariiri. Nacareeri:

—¡Jiyaniijanaa cua quiare!

<sup>31</sup> Jesuuri ritia Pedro juaashiquiajiniji quiaree. Na sequereeri:

—Pedronaa, majaqui puera quia tiuuniu cucua. ¿Casaara cua sequesanoocuaji quia taacanuureeni?

<sup>32</sup> ¿Nojori jaara botejinia tacataquiaariuhua, paratuuri jiyacari pueyajeequee! <sup>33</sup> Canaa niquishacari naa Jesu miishano na cumacatatej, canaari Jesuucua mojquetacocuaarini. Canaari na sequereeni:

—¡Quiaaqui seetanujuanaa Pueyaso Niyanu!

*Jesu naatanijosacari cusosuhua Genesaret jiyajinia**(Mr 6.53-56)*

<sup>34</sup> Canaa jaara caminia taquijiria niuutiaquiaarini, canaari Genesaret jiyajinia shiitiaseeni. <sup>35</sup> Genesaret pueya jaara niishiquiaari Jesu tiuquirii, nojoriiri puetunu na jiyajiniajanaa pueya numootequiaari, cuaara patootasaaria cusosuhua Jesuucua. Naacujitij, Jesuucua patootasaaquiaariiri puetunu cusosuhujanaa. <sup>36</sup> Pueyari Jesu sequetuquiaari: —Nareja quia shanacure cusosuhua quiocua, nojori cuaara quia tucuaque toque quiaara quenaaja, nojori naataconuhua.

Jesuuri naa miirii. Puetunu na toque quianaajanaari naatacoquiaariuhua na cusonujiniji.

## 15

*Casaate sesa miitijia pueyanoni**(Mr 7.1-23)*

<sup>1</sup> Na nuhuaji, Jerusalén tiacajinijinio pueyari canacua tiuquijioquiaari Jesuta pocoojonura. Nojoriiri quiquiaari Fariseocuaca, Moisés Naajioneejiniji niishitiojonaanio. Jesu sequetureeri:

<sup>2</sup> —Quia pueyari shuquitioojua miaquenuuquiaa. ¿Casaara nojori tojitiaaquiuaa canaa niishitiojosano pa supuetanaajinijini? ¡Nojori cuaara miiria taa pa supuetanaa miiquiaaricuaani!

<sup>3</sup> Jesuuri nojori nequesotaree saniniuujia:

—¿Niajanियariuhuj? ¿Casaara nia tojitiaaquiuaa saniniuujia Pueyaso Rupaani, nia supuetanaa jiitishano miiniu nia miiniuriani? <sup>4</sup> Pueyasocuaajaari sequequiaari: “Quia que tojjia quia quiri, quia nucua tojjiano. Majaari nojori rerequetenu”. Naacujitij, maninia pa cojuare pa queya. Pueyasoori sequequiaarijuhuaj: “Cuaara mosaaria cante na que sesacajani, na nucua sesacajanio”. <sup>5</sup> Niaari saniniuujia sequequiaacujua, maniniacuaajaari pueyano jaara na queya sequere: “Cua quena, cua nucuaanaa, janiyari Pueyasora niqitionutaniya cua casamini. Naacujiti majaari cua naata nia naacunu cua jiitiasano casamitia”. <sup>6</sup> Naa nia niishitiojosacari pueyatej, niaari pueya tarinitiya na queya nojori cartenura, naacusoo nojori quiniuria. Naa nia tojishacari tama nia niishitiojosanojuaja juhua nia supuetanaa nia miiniuriatej, niaari Pueyaso Rupaa jiyateya najuhanara. <sup>7</sup> ¡Sapuenu Pueyaso Rupaa tojitiajacanaa! Supuetana Isaiasquiiri maninia naajiotaqueaaru nia niajanijini, na caminiuujishacari nio rupaa Pueyasojiniji:

<sup>8</sup> “Nio pueyari saa na rupaataja cua maniuuhuaqueetaquiaa. Nojori jiuujiaari saniniuujia tucuaaanu quiya janiyajiniji. <sup>9</sup> Nojoriiri najuhua rerejoquiaa na maniuuhuaqueetanura janiya. Nojori niishitiojosanoori tama nojori niishishanojuaja, maja cua rupaa”.

<sup>10</sup> Na nuhuaji, Jesuuri puetunu pueyajanaa sequere:

—Miji, niya cua tojitiaseecuarajaj maninia nia niishiniuria. <sup>11</sup> Pa miasanoni, cunoori maja sesara na jiyatenu poojia. Pa rupaata pa pocuasano sesani, cuno cutaraari poojia sesojua.

<sup>12</sup> Jiyacaritij, canaa, Jesu saquiriojosano pueyani, canaari nocua catecanoquiaarini naa canaa sequenura nojuaja:

—Jiyaniijanaa, ¿quiaate niishiya Fariseocuacaari juaaquioree naa quia sequesacaritij?

<sup>13</sup> Jesuuri canaa riucuaare:

—Naajaa. Cuaara juaaquioora. Cuno pojoriiri juhua sesa jiyasocua, Sesaaca natasano cua Que cuhuariquiajia. Nojoriiri juhua sesa jiyasocua jayotasaanutaniya.

<sup>14</sup> Seetanujanaa Pueyaso niishiyashijia nojori quishacari, nojoriiri juhua cariojuaru quiya. Narta cariojuaru jaatucuyari. Cariojuaru jaara narta cariojuaru jaatucure juucua, nojoriiri mariyata raama totenutaniya.

<sup>15</sup> Pedoori Jesu sequere:

—Jiyaniijanaa, canaa quia niishitiojoreja casaa quia sequenu paniriquiaa quia pohuatasacari pa miasanojinijini.

<sup>16</sup> Pedro riucuaare:

—¿Niaateeri na niishiyaquiyajuhuj? <sup>17</sup> ¿Majateeri nia niishiniu, pa miaquesano pa rupaataari pa seecojinia tiuquiya saaja? Na nuhuaji, pa marecuhuacuma tajimiaari. <sup>18</sup> Saniniuujia, pa rupaata pa pocuasano sesani, cunoori poojajiniji tohuataa cutara. Naacuajitij, pueyanoori sesa quiya Pueyaso niquiara, sesa casaa na pocuanuucua. <sup>19</sup> Pueyano jiuujiajinia coretaari puetunu sesa niishiriojosanojuanaa: monu paniniu; na camishoo maajipohua numuetucunu paniniu; saaja numuetucunuucua jiaatianu; nohuasejonu paniniu; sapojonuta saquiriojotanu paniniu; sacuaraatia coriaacojonu paniniu. <sup>20</sup> Puetunu naa sesa pueya niishiriojosanojuanaa cutaraari pueyano sesojua. Saniniuujia, pueyano jaara miaquere shuquitioojua, naajaa. Cunoori maja na sesonu pueyano Pueyasora.

*Taatu tiuushacari Jesuucua*

*(Mr 7.24-30)*

<sup>21</sup> Jesuuri Genesaret jiyajiniji quiaquiaari canaa na pueyata. Canaari quiojoquiaari tamonu taucuaca jiyajiniarani. Cuno jiyajinia quiquiaariiri Tiro tiaca, Sidón tiacajuhuj.

<sup>22</sup> Canaa rucuanijosacari tii, cuno jiyajinijinio taatuuri Jesuucua niquiaari. Nojuajaari Cananeo pueyajinijinio maaji quiquiaari. Jesu nuhuaji nacariquiaari:

—¡Jiyaniijianaa, cucua quia taraajere! ¡Pueyaso Jiyarosananaa, cucua quia taraajere quenaaja! Quiyatu samaru jiitiaa. Jiyanoehua taraatia na miiquiaari.

<sup>23</sup> Jesuuri maja na riucuanu quiquiaari. Sanaa canujuriquiaa saajaari. Naaratej, canaari Jesu catecanoquiaarini canaa sequenura nojuaja:

—¡Jiyaniijianaa, na panishano quia miiri cuaara quiohuara! ¡Taajeta naca pa nuhuajini!

<sup>24</sup> Jesuuri canaa riucuaaree:

—Janiyari saaja Israel pueyacia jiyarosaaquiaarini. Nojoriiri juhua borregohua tashuquioono. Nojoriicua taraajeyanjia.

<sup>25</sup> Cuno maajiiri Jesu sequesano tojirii. Naajaa, Jesu cariquimiaji mojoquetaseeri. Na sequereeri:

—¡Jiyaniijianaa, cua naacutare!

<sup>26</sup> Jesuuri na riucuaaree:

—Majaari maninia pa jaariutianura pa niquiohua miaquesano, sare niquiohua niquiosocoriquiano saniniuujia.

<sup>27</sup> Maajiiri saaja na sequeree:

—Maniniacuaja quia sequesano Jiyaniijianaa. Naajaa, sareyaniojuacuajaari miaquesano shiriya miaquenuquiaa, na camaru totinijosano na miaquejajiniji.

<sup>28</sup> Jesuuri maaji sequeree:

—Maniniacuaja quia sequesano maajiniaa. Quiaaqui jiyanoehua cucua tiuya. Cuaara quiiriaqui taa quia paniyacuajani.

Jiyacaritij, neyatuuri naataquiaariuhua.

*Jesu naatanijosacari queraatia cusosuhua*

<sup>29</sup> Canaari Jesuta cuniquiji quiaquiaariuhua. Canaari Galilea caminia shuriuquioco tajimiaani. Canaari tuhananuucua tacatamaani. Jesuuri tii cajishii. <sup>30</sup> Queraatia pueyari nocua nijioquiaari. Nojoriiri queraatia cusosuhua niojotaquiaari Jesu shuriucua, nojori tiacajiniji nojori patootasano. Cusosuhuari quiquiaari shipiiniquiujiunaa pueya, cariojuarujurinio, tiquianucujuhuj, sesarunecatohuano, socua queraatia tamaatia cusosuhuanio. Jesuuri nojori naatanijioquiaari puetunujuanaa. <sup>31</sup> Pueyari jiuujiatequiaari nojori niquishacari tiquianucua pocoyano, shipiiniquiujiunaa rucuaneyano maninia, cariojuarujuri niquishacari maniniajuhuaj. Naajuhuj, sesarunecatohuari maninia numatucuaraca quiquiaariuhua. Naa pueya niquishacari Jesu miishanotej, nojoriiri Pueyaso maniniuuhuaqueetaree. Sequetureeri:

—¡Jiyanoehua maninia Israel pueya Pueyaso!

*Jesu mianuutesacari cuatro mil pueya*

*(Mr 8.1-10)*

<sup>32</sup> Na nuhuaji, Jesuuri canaa na saquiriojosano pueya sequeree:

—Miji pueyanaa. Nio pueyacia taraqeyanijia. Nojoriiri tari jiuujianaraca juuca camueenujiya nia pata. Majaari nojori jiitiatunu quenaaja casaa na miaquetusocoriquiano. Majaari cua jiyaronu paniniu miaqueyojua nojori, nojori mariqui na miaajenuta cusojonuayarohua nucuacoori.

<sup>33</sup> Canaari Jesu nequesotareeni:

—¿Canaatucua tee riuriatare queraatia miaquesano nio queraatia pueyarani? Niya, majaari pueya quiniu quenaaja.

<sup>34</sup> Jesuuri canaa nequesotaree:

—¿Taa pan nia jiitiaani?

Canaari na riuacuareeni:

—Canaa saaja siete pan jiitiaani, secaja sapitiaajaniyojuanio.

<sup>35</sup> Jesuuri pueya sequeree na cajitiuniuria. <sup>36</sup> Na nuhuaji, Jesuuri cuno siete pan pataree, sapitiaajanio. Jesu jaara na Que secojoquiaari coteenu miaquesanoocuara, na nuhuaji na neecasequiaariiri canaa niquitiojonura pueya. <sup>37</sup> ¡Puetunu pueya-janaari maninia miaquenuquiaari! Tooquioreeri. ¡Canaari miaquesano cureenota mishinjioquiaari siete canaasatuni! <sup>38</sup> Queraatia pueyari na miaquenuquiaari. ¡Saaja canuuri serojosaquiaari cuatro mil pueya! Majaari maajipohua serojosaanu quiquiaari, naatujoorinio. <sup>39</sup> Na nuhuaji, Jesuuri pueya sequequiaari nojori quiojonuhua. Na nuhuaji, Jesuuri canaa jiyataquiaari botejinia Magdala jiyajiniara.

## 16

*Fariseocuaca, Saduceocuaca niquiniu panishacari Jesu miishano Pueyaso cumaacata*  
(Mr 8.11-13; Lc 12.54-56)

<sup>1</sup> Fariseocuacaari Saduceocuacata Jesuucua nijioquiaari nojori saniniuuniuria nojuaja. Nojoriiri Jesu sequequiaari:

—Casaa quia miiri quia cumaacata canaa niquishocoriquiano, canaa niishiniuria quiaate seetanujuanaa Pueyaso jiyarosano.

<sup>2</sup> Jesuuri nojori sequeree saaja:

—Jiya jaara naatuuca quiri pananu tiuquishacari, niaari sequequiaa: “Maninia juucaqui tariqui quiniutianiya”. <sup>3</sup> Naajuhuj, pananu jaara tariquicuaji jama, niquitioocua jaara niquishaarejuhuaj, niaari sequequiaa: “Maruqui niniutianiya”. Niaari naa niishiquiaa taamueca juucate quiniutianiyanii jiya nia niquishacari. ¡Mosanucuaanaa! ¿Casaara saniniuujia nia niishiyacuiya casaa Pueyaso niishitiojiya juucua nijaniyani? Nojuacuajaari juucua na cumaacata na miishano miiquiaa nia niquiara najuhuanaj.

<sup>4</sup> Jesuuri nojori niquiara sequereejuhuj:

—Nio sesoriquia pueya, Pueyaso tojitiaashijiacani, nojoriiri Pueyaso cumaacata cua miishano niquiniu paniya juucua. Majaari nojori niquitishaanu quiniutianiya socua. Nojoriiri saaja nio niquiriyatu Pueyaso cumaacata miishocoriquiano niquiniutianiya: janiyani miishaanutaniyani taa supuetana Jonás miishaaquiaaricuaani.

Naa Jesu sequenu nuhuajitij, nojori tarinitiaqueeri. Canaari quiaqueeni.

*Jesu numootesacari na pueya Fariseocuaca niishitiojosanoocuaji*  
(Mr 8.14-21)

<sup>5</sup> Canaa niuutiasacari caminia taquijiria, canaari canaa coseyaca panu niyajetaquiaari canaa sasocoriquianoni. <sup>6</sup> Jiyacaritij, Jesuuri canaa sequeree:

—Niishijia nia quiri. Tama nia cuaqueyajaaja nia cojuare Fariseocuaca pan poreetajaacuaji, Saduceocuaca pan poreetajaacuajinio.

<sup>7</sup> Cunora, canaari tama sequetooreejaanijia:

—¿Casaa na sequeyani? Pan pa paaquiniuucua naa pa sequeya jiyoteeri.

<sup>8</sup> Jesu niishishacari naa canaa sequesantej, canaa sequereeri:

—¿Majateeri juhuanajuaja cucua nia tiuuniu maninia? ¿Casaara tama nia pocoojiyajaaja panjinijini? <sup>9</sup> ¿Majateeri juhuanajuaja nia niishiniu tari cua miishanojiniji? ¿Niaateeri tari niyajetarucuaa taa canaasatu mishajate curecanuni, cinco mil canuu

jaara miaquenuucanu cinco panjinijitij? <sup>10</sup> Naa jiyoteeri niyajetarucuaajuhuaq taa canaasatu mishajate cureecanuni, cuatro mil canuu jaara miaquenuucanu siete panjinijitij. <sup>11</sup> ¿Casaara nia jiyaniiriini janiya miaquesanojiniji sequeriquiaani? Maja cua sequenu panjiniji. Nia sequeriquiaanijia tama nia cuaqueyajaaja nia cojuare Fariseocuaca pan poreetajaacuaji, Saduceocuaca pan poreetajaacuajinio.

<sup>12</sup> Naa na sequesacaritij, canaari jiyacari niishiquiini majaari Jesu sequenu quiriquiaa pan poreetajajini. Canaari shusha niishiquiini Jesuuri miriqui canaa numooteriquiaa tama canaa cuaqueyajaaja canaa cojuanura Fariseocuaca niishitiojosanoocuaji, Saduceocuaca niishitiojosanoocuajinio.

*Pedro sequesacari Jesuuri seetanujuanaa Pueyaso Jiyarosano*  
(Mr 8.27-30; Lc 9.18-21)

<sup>13</sup> Canaa tiuquijiosacari Cesareya Filipino tiaca jiyajinia, Jesuuri canaa nequesotaree:  
—¿Taa pueya sequequiaa janiyajinijini, cantena janiyani?

<sup>14</sup> Canaari Jesuuri riucaareeni:

—Noojiaqueya pueyari sequequiaa, quiaanaari Tiuquinijiona Juan. Herodes motesano naasucuaanaari samiitiarohuacuaa. Tamasacaari sequequiaacujua, quiaanaari Elías, tariucuacaanu pueyara Pueyaso sequesano caminiujiunia. Tamasacaari saniniuujia quia sequequiaacujua, quiaanaari supuetana Jeremías, pueyara Pueyaso sequesano caminiujiunijuhuaq, tamonu Pueyaso sequesano caminiujiunia soj.

<sup>15</sup> Jesuuri canaa nequesotarohua socua:

¿Niajanियariuhuaq? ¿Taa nia sequeyanijia? ¿Cante janiyani?

<sup>16</sup> Simón Pedroori na riucaaree:

—¿Quiaacuajaari Pueyaso Jiyarosano! Quiaari Cristo, Pueyaso Niyanu.

<sup>17</sup> Jesuuri Simón Pedro sequerohua:

—Quiaacuajaari Pueyaso shuquiritiasano pueyano, Jonás niyanunaa. Jiyocuacaanu Quijia cua Quecuajaari quia niishitirii cante janiyani. Janiyajiniji quia niishishanoori maja pueya niishitishano quiajanija. <sup>18</sup> Janiyari socua sequenu paniya quiajanijani Pedronaa. Quia sesaari Pedro. Nioori pueyano rupaajinia sequeya “saajia”. Naatej, taa saajiacuaani jataniyaquishoo, quiaari cumaatia nujuataja quiniutianiya, seetanujuanaa cucua quia tiuushacari, quia niishishacari janiyari Pueyaso Niyanuni. Naajuhuaq, puetunu pueyajanaa cante cucua tiuuriini taa cucua quia tiuyacuana, janiyari nojori jiyatenutaniya cua muerasurani. Puetunu cua saquiriojosano pueyajanaari cumaatia nujuatunutaniya, nojori niishishacari janiyari Pueyaso Niyanuni. Naacuajitij, nojoriiri juhua puereetuca saajiaacua tiasano quiniutianiya. Puetunu cua muerasujuaari juhua cua tia quiniutianiya, cua quiquio nojori quishacari. Sesaacaari maja na naata cua tia pojoretanu quiniutianiya. Majaari na naata na tarinitiniu quenaaja janiya, cua tiasacari cua quiquiora. <sup>19</sup> Naajuhuaq Pedronaa, quiaari juhua cua quiquio tiotiu riatataja jitianaa quiniutianiya. Naacuajitij, quiaari coteenu pohuatanutaniya pueya niquiara janiyajiniji, nojori tiuuniuria cucua, juhua Pueyasooqua nojori tiuquiniuria na muerasura nojori quiniuria. Naajuhuaq, quiaa jaara rootare taate Pueyaso muerasu naata miiniu maniniani, Pueyasoori sequenutaniya cuara naa quiiriatej. Naajuhuaq, quiaa jaara casaa tenujure, maja naa pueya miiniuriatej, Pueyasoori naa sequenutaniyajuhuaq.

<sup>20</sup> Na nuhuaji, Jesuuri canaa na pueya rootaree maja canaa pohuatanura tamasa niquiara nojuacuajaari Pueyaso Niyanu.

*Jesu numootesacari na pueya, nojuajaari mosaanutaniya*  
(Mr 8.31-9.1; Lc 9.22-27)

<sup>21</sup> Jiyacaritij, Jesuuri canaa pohuatanu coteequiaari taa nojuaja miishaanutaniyani. Canaa sequereeri:

—Janiyari Jerusalén tiacajinia quiariquianoni. Parta Judiocuaca jiyaniijianucuaari tii cua miiniutianiya naquiya jiyanoahua. Pueyacuara secojonaa jiyaniijianucuaari nojori rupuenutaniya naa cua paracaashaanurajuhuaq, mariyata tariucuacaanu Moisés Naajioneejiniji niishitiojonaanio. Naacuajitij janiyari mosaanutaniyani. Jiuujianaraca juucajinia, janiyari samiitianutaniuhua.

<sup>22</sup> Naa Jesu sequesacaritij, Pedroori Jesu jaatucuree tamocora na nacasunura tama-  
jaaja. Jiyanoehua Jesu sequereeri:

—¡Maja naa pocuanutej! ¡Pueyaso cuaara cojuara quiajaniya maja naa quia miishaa-  
nuratej!

<sup>23</sup> Jesuuri saaja Pedro nijiniaquequee. Na sequereeri:

—¡Niiquiji quia quiaare Satanásnaa! ¡Quia sanaajere! Sesaacaari naa quia pocuateree  
Pedronaa. Quia sequesanoori maja Pueyasojiniji. Quia niishiriojosanoori juhua mijiria  
pueya niishiriojosano saaja. Naa quia sequesacaritij, quiaari cua Que sequesanoocuaji  
cua tarinitiniu paniya juucua.

<sup>24</sup> Na nuhuaji, Jesuuri canaa na pueya sequequiaari:

—Pueya jaara cua tojijara quiniu paniya, nojori cuaara carteera tama nojori pan-  
ishanojuaja. Na nuhuaji cutara, cuaara miiria cua panishano, tama na cuaqueya na  
panitianutajaaja cucuara. <sup>25</sup> Naatej, pueyano jaara tama na cuaqueyajaaja shuquiritiniu  
paniya mijiria, cuno pueyanoori na nuhuaji jiyanoehua taraatia quiniutianiya. Saniniu-  
jia, cante tama na cuaqueyajaaja panitiaa cucuara mijiriani, cuno pueyanoori na nuhuaji  
pueyaracaanu shuquiriaatia quiniutianiya cutara. <sup>26</sup> Naajuhuj, pueyano jaara masere  
puetunu nio jiya casamijianaa, na casamiiri najuhuaana quiniutianiya nera, na camaru  
jaara jatasaare mani quiquiojinia na shaajesacari. Nojuajaari maja na naata Pueyaso  
jiyanootiniu tama na cuaqueyajaaja, naajaa, nojuaja jaara puetunu na casamijianaa  
niquitioore Pueyaso, Pueyaso samiitianiniuhua nojuaja.

<sup>27</sup> Janiyacuajaari jiyanoehua shacantuuca quiijara quiniutianiyani, cua Que jiyatesacari  
janiya Jiyaniijiarajanaa. Na nuhuaji, janiyari mijiria niniutianihua jiyocuacaanuji  
cua Que seyatani, puetunu pueyajanaa cua nequesoreenura. Jiyacaritij, pueyari  
maninia casaa niqitiosaanutaniya maninia nojori miiniuucua. Pueyaso tojitiaashijia-  
caari saniniuujia naquiya miishaanutaniya, sesa nojori miiniuucua. <sup>28</sup> Seetanjuanaa  
nia sequeyanijia, noojiaqueya nijaniyajinijinio niya cuata quiyani, majaari nia shaa-  
jenu quiniutianiya juhuanajuaja, niaa cuaara niquirijiaatijia Pueyaso cumaaca cucua  
tiuquiyano, cucua tiujujiaa jiiitariquiano.

## 17

### *Jesu jatasacari shacantuucara*

(Mr 9.2-13; Lc 9.28-36)

<sup>1</sup> Seis juuca nuhuaji, Jesuuri nio pojori jiyataquiaari jiyaconaja tuhuananuucua.  
Nojoriiri quiquiaari Pedro, Santiago, Santiago tarajanu Juannio. Jiyareta tama nojori-  
jiaarjia quiaquiaari. <sup>2</sup> Jesuuri tii tamaatiara jataquiaari nojori niqiuara. Na jiquiocoori  
jiyanohua shacantuucara jataquee, juhua pananu. Na toqueeri mariyata jiyanoehua co-  
huajara jataquiaarijuhuaj, juhua cuhuatana. <sup>3</sup> Jiyacaritij, nojoriiri caapiqui supuetanaa  
niquirii, Moisés, Elíasnio. Jesuta pocoojoriquiaari. <sup>4</sup> Cunora, Pedroori Jesu sequeree:

—¡Jiyaniijianaa, canaaqui namitia niya quiyani! Quiaa jaara paniri, canaa quiocuaji  
suhoronutaniyani, Moisésrajuhuaj, Elíasranio.

<sup>5</sup> Pedro pocuasacarijia, shacantuuca najacaari nojori mishiQuiomaa. Najacajiniji,  
rupaari tojishaaquiaari naa sequeyano:

—¡Niiori cua Niyanuniyojua, cua shuquiritasano! ¡Saaja nojuaja nia tojitiare!

<sup>6</sup> Naa nojori tojishacari Pueyaso pocuaanotej, nojoriiri jacamatuquiaari jiyanoehua  
na puerenuta. <sup>7</sup> Jesuuri nojoriicua nimiaa. Nojori quiaseeri na juaashiquiata. Nojori  
sequereeri:

—Nia saneecuaturohua. Maja puerenu.

<sup>8</sup> Nojori jaara niqinijionuuquiaari, majaari tari na niqitiuniu quiquiaari cuno  
supuetanaa. Saaja Jesuuri quiriqiaa.

<sup>9</sup> Nojori rosetasacariuhua tuhuananujiniji, Jesuuri naa nojori rootaquiaari:

—¡Majaari nia pohuatanu pueya niqiuara tuhuananujiniji nia niquishano! Niocua na  
pohuatarohua cutara janiya jaara samiitiarohuani.

<sup>10</sup> Na pueyari Jesu nequesotaree:

—¿Casaara tariucuacaanu Pueyaso Rupaajiniji niishitiojona sequequiaacuaraarini, supuetana Elíasnaari quiocuaji mijiria niniutianihua coteenu, pueya na jiyanoootootenuhuara necohuata?

<sup>11</sup> Jesuuri riucuaree:

—Elíasri seetanujuanaa coteenu niriqiano quiquiaari, puetunu pueya jiuujiaajanaa na jeenucuanura. <sup>12</sup> Janiya cutaraari nia sequeyani, Elíascuajaari tari niqiaari. Majaari pueya niishiniu quiquiaari cante nojuajani. Naaratej, pueyari taraatia na miiquiaari taa nojori paniquiaaricuajani. Nojoriiri naa cua miiniutianiya naquiyajuhuj.

<sup>13</sup> Naa Jesu pohuatasacari Elásjinijitij, na pueyari niishiquii nojuajaari Tiuquinijiona Juanjiniji pohuatariquiaa miriqui.

*Jesu naatanishacari samaruraca caya samijia*

*(Mr 9.14-29; Lc 9.37-43)*

<sup>14</sup> Jesu jaara tuhuananujiniji tiuquiiioquiaari canaacua, tamonu pueyanoori nocua catecanoquiaari canaata quiniaa maanujiniji. Jesuucuaa mojuquetaseeri na sequenura neyanuucuaa. <sup>15</sup> Jesu sequereeri:

—¡Jiyaniijianaa, cua niyanuucua quia taraajere quenaaja! ¡Nojuajaari pueyaracaanu cusojoquiaa! Na jiitiasano cusonuuri na taquiriocatequiaa. Na cusojosacari miiquiaa naquiyari. Naacujitij, sequeyarucua manijinia tiquiaari, moojiniano. <sup>16</sup> Janiyari quia pueyacua na tiuquitiasee na naataniniuria juucua. Nojoriiri maja na naata na naataniniu.

<sup>17</sup> Jesuuri cunora sequere:

—¡Niaaqui Pueyasooqua tiuyashijaca, na tojiyashijacanio! ¿Janiyateeri nia rejere-tanutaniya pueyaracaanuni? ¿Taacari nia niishiniutianiya Pueyaso tamajaajarini? Miji nia jaatucuma cuno mueya.

<sup>18</sup> Mueya tiuquishacari nocua, Jesuuri samaru juarii. ¡Na tohuatereeri! Jiyacaritij, caya samijiaari maninia quiquihua.

<sup>19</sup> Na nuhuaji, tamajaaja canaa quishacari Jesuta, canaari na nequesotareeni:

—Jiyaniijianaa, ¿casaara maja canaa naata cuno samaru tohuatenu quiriqiaani?

<sup>20</sup> Jesuuri canaa riucuaree:

—Maja puera maninia nia tiuuniu juhuanajuaja Pueyasooqua. Seetanujuanaa nia sequeyanijia, nia tiuuniu Pueyasooqua jaara quiriqia shiitianiyojua juhua mostaza jajau quenaaja, jiyacari cutaraari nia naata miiniu puetunu nia panishanojuanaa. Naacujitij, nio tuhuananu maara nia tojiri, niaa jaara na sequere: “Tuhuananunaa, niiquiji quia quiaare tamaqui”. <sup>21</sup> Saniniuujia, jiyano samarutej, na naata tohuatanishano cutara saaja Pueyaso nia secojosacari nia miaqueyaquiniutia.

*Jesu pacutesacari pohuatanu nojuajaari mosaanutaniya*

*(Mr 9.30-32; Lc 9.43-45)*

<sup>22</sup> Tamonu juuca Jesu rucojosacari canaa na pueyata Galilea jiyajinia, Jesuuri canaa sequere:

—Janiyari sapojonuta niqitiosaanutaniya taucuacani. <sup>23</sup> Nojoriiri cua monutaniya. Jiuujianaraca juucajinia, janiyari samiitianutanihuani.

Naa Jesu sequesacari canaatej, canaari jiyanohua taraajequiaarini.

*Cumaneeca niqitiosacari Pueyaso Secojua tiaacuara*

<sup>24</sup> Canaa jaara tiuquiiioquiaari Capernaum tiacajinia Jesutani, tamonu pueyanoori Pedroocua catecanoquiaari. Nojuajaari cumaneeca masejona quiquiaari Pueyaso Secojua tiaacuara. Cuno pueyanoori Pedro nequesotaree:

—¿Majate nia niishitiojona niqitioonu na cumaneeca Pueyaso Secojua tiaacuara, taa pa jiyaniijianucua sequequiaaricuajani?

<sup>25</sup> Pedroori na riucuaree:

—Na niqitioquiaanocujaja.

Na nuhuaji, Pedro tiuquishacarihua na tiajinia, Jesuuri na nequesotaree:



—¿Taa quia sequeyani Simónnaa? Mijiria jiyaniijianucua jaara cumaneeca paniri, ¿teyano pueyajiniji cumaneeca maseshiyani? ¿Tama na pueyajinijitii, taucuacajiniji soj?

<sup>26</sup> Pedroori Jesu riuacuaree:

—Taucuaca niqutiojoteshiyanocuaja nojori jiya jiitiana sequesano.

Jesuuri na sequeree:

—Naacuaaquiniatejaj. Naacuajitij, tama na pueyajaarijia maja na niqutionu. Pueyaso Secojoua tiacuajaari cua Que tia. Naaratej, maja cumaati Neyanu sequesaanu na niqutionura na cumaneeca. <sup>27</sup> Naajaa, pa niqutiore juhuari nojori sequesano, paa mariqui nojori juaatiriiri. Nocuaji quia rioosee caminiajinia. Quiocua coteenu quia jatasano sapitiaaja rupaama niqiri. Quiaari tii cumanee riuriatanutaniya. Quiocua cuno cumanee niqutiosuhua nojori, quiria, quiarajuhuj.

## 18

### *Cante jiyaniijajanaa cutarani*

(Mr 9.33-37; Lc 9.46-48)

<sup>1</sup> Jiyacaritij, canaa, Jesu saquiriojosano pueyani, canaari Jesuucua catecanoquiaarini naa canaa nequesotanura nojuaja:

—Jiyaniijanaa, canaa quia sequeretoj, puetunu quia pueyajinijiniojuanaani, ¿cante jiyaniijajanaa cutarani?

<sup>2</sup> Jesuuri naatujua piirii. Canaa tajinia na nujuatereeri.

<sup>3</sup> Na nuhuaji, Jesuuri canaa sequeree:

—Nia niyaretare socua tojishano pueyano nia quiniu paniniu tamasacajiniji. Seetanujuanaa nia sequeyanijia, nia jataniyaquishacari tama nia cuaqueyajaaja juhua nio naatujoori nia quiniuria, majaari Pueyaso muerasura nia quiniu quiniutianiya quenaaja.

<sup>4</sup> Naacuajitij, cante tama na cuaqueyajaaja jiyateya pueya shocoteyashijia na quiniuria juhua naatujuaani, nojuajaari socua jiyaniijajanaa quiniutianiya cutara narta Pueyaso muerasujinijinio. <sup>5</sup> Naajuhuj, cante naatujua maseja maninia na paniniuucua janiyani, nojuajaari cua maseyajuhuj.

### *Paari cocuaatia miyani sesa pa miishacari*

(Mr 9.42-48; Lc 17.1-2)

<sup>6</sup> 'Sesa cutaraari, sesa nia miitiniuria cucua tiuujia naatujua. Socua maninia cutaraari sesa miitiriquiano pueyanora, nojuaja jaara juhuacarijia caminia queronijinia jartasaare puereetujajau saajia na riquiajiniji morotasano. <sup>7</sup> ¡Mijiria quiniaari jiyanoehua cocuaatia miiquiaa sesa na miitishacari tamasaca! Mijiria, pueyari pueyaracaanu sesa miitishaaquiaajuhuanajaj. ¡Taraatia quiniutianiya cutaraari noo pueyanora, cante sesa miitirii tamonuni!

<sup>8</sup> 'Nio miriqui cua niishitiojosano nia tojiri: nia juaashiquia, nia niohuaca jaara sesa miitiya niajaniya, nia rashiquiarenoj, tucuacaanu jatasocoriquiano. Naa nia miiri niaa mariqui mani quiquiojinia jataaareeri puetunu nia cuaqueyatajanaa. Socua maninia cutaraari juaashiquiaaju, niohuacaaju nia tiuquitianura Pueyaso quiquiojinia jiyocuacaanu. Niaari tii quiniutianiya shuquiriaatia pueyaracaanu. <sup>9</sup> Naajuhuj, nia namijia jaara nia miitiri sesa, nia jiatere. Tucuacaanu nia jatarenoj. Jiyanoehua socua maninia cutaraari niaara, jiyocuacaanu nia tiuquiniuria namijijiu, maja nia jataaanura mani quiquiojinia, saniitiosocoriquiano puetunu nia namijiaatajanaa.

Naa Jesu niishitiojosacari miriquitij, nojuajaari canaa niishitiojoriquiaa canaa tarinitianura jiyanoehua canaa miiniu panishano, cuno jaara sesa miijara jiyateriquia canaa.

### *Jesu pahuatasano miriqui borrego tashucuanojiniji*

(Lc 15.3-7)

<sup>10</sup> Jesuuri naa canaa niishitiojorohua socua:

—Tama nia cuaqueyajaaja nia cojuare nia soyaquiniuucujaj tamonu muerasuniyojua, juhua nio mueyaja. Cua tojitiare. Pueyasocuajaari na seya seerataquiaa nojori cojuanura muerasu. Cuno na seyari pueyaracaanu cua Que Pueyaso jiquioco shootiaquiaa.

Naajuhuj, Pueyasocujaari na muerasuranooocua niishiriojoquiaa. <sup>11</sup> Naaratej, janiyari mijiria niqiaarini tashucucano pueya cua pajenura, nojori cua jaariuutianura Sesaaca.

<sup>12</sup> ¿Taa nia sequeyani pueyanaa? Tamonu pueyano jaara cien borregohua jiitiare, niqiriyatujua jaara tashucucare tapueyocucajiniji, ¿majateeri na camaru na borregohua cureeno tiujianu rupaquijia, tashucucano na pajenura? Taaquiririnij. <sup>13</sup> Jaara na riuriatare, seetanujuanaa socua jiyanoocua cuno borrego tashucucano shuquiritiaari tamasa na borregohujiniji. <sup>14</sup> Naajuhuj, jiyocucuanu quijia nia Queeri maja na paniniu quenaaja niqiriyatujua nio muerasujinijinio tashucuanura puetunurajanaa.

*Taa pa jiyanoocua pa tarajanuni*

*(Lc 17.3)*

<sup>15</sup> 'Quiarta Pueyaso pueyano jaara sesa miiri quiajaniya, nocua quia quiaare na nacasanura tamajaaja nia quishacari. Nojuaja jaara tojiri quiajaniya, maniacucujaari. Niaari maninia rupetoojuacara quiniutianihuacuhuj. <sup>16</sup> Nojuaja jaara tojiyaquiri quiajaniya saniniuujia, nocua quia quiaare socua tamonu pueyanota, caapiqui pueyata soj. Nojori niqiaara quia nacasure cuno sesa miinia. Niaa jaara naa miiritij, naa quiniutianiyari taa tariucucuanu Pueyaso Rupaajinia niishitiojosaaquiaricujani: "Querajaa pueya jaara mariyata pohuatare na niqishano, na tojishanojuhuaj, cunoori maja sapojonu". Naacuajitij, nojori saquiriojotasanoori seetanujuanaa quiniutianiya. <sup>17</sup> Cuno sesa quia miinia jaara nia tojiniu paniyaquiya saaja, puetunu niarta Pueyaso pueya niqiarajanaa quia pohuatare sesa na miishano. Cuno pueyano jaara tojiniu paniyaquiri puetunu Pueyaso pueyajanaa, nojuaja cuara quiriia juhua Pueyaso niishiyashijia niaara. Naacuajitij, majaari socua nia rupuenunoj.

<sup>18</sup> 'Seetanujuanaa nia sequeyanijia, cana nia jiyanoocuaquiri mijiriani, na tojiniu paniyaquishacari niajaniya, cunoori jiyanoocuaquishano quiniutianiya jiyocucuanu cua Que Pueyasorajuhuj. Naajuhuj, cana nia jiyanoocui mijiria na tojishacari niajaniyani, cunoori jiyanoocushano quiniutianiya jiyocucuanu cua Que Pueyasorajuhuj.

<sup>19</sup> 'Naajuhuj, janiyari seetanujuanaa sequeya niajaniyani. Caapiqui niajaniyajinijinio jaara mariyata niishiriojore nia panishanoocua nia secojonura Pueyaso, cua Queeri nia tojiniutianiya. Nojuajaari jiyocucuanuji naa maninia miiniutianiya niaara, taa nia secojosacari nia sequereecujanoj. <sup>20</sup> Querajaa niajaniyajinijinio jaara rerejore, cucua tiuujiaca nia quishacari, janiyari tii niaata quiyajanihuaj. Naacuajitij, cua Queeri nia secojosano tojiniutianiya cutara.

<sup>21</sup> Jiyacaritij, Pedroori Jesu nequesotasee:

—Jiyaniijianaa, tamonu pueyano jaara sesa miiniu pacutejore janiya, ¿janiyatucua pueyaracaanu na jiyanoocui? ¿Majateeri tariucucua, janiya jaara na jiyanoocui siete sesa na miishanojiniji janiyani?

<sup>22</sup> Jesuuri Pedro riucuaaree:

—Maja naatej Pedronaa. Maja quia tarinitianu na jiyanoocui. Pueyaracaanu sesa na miishacari quiajaniya, pueyaracaanu quia jiyanoocui quiarta pueyano. Majaari quia serojonu sesa na miishano quiajaniya. Pueyaracaanu quia jiyanoocui saaja.

*Jesu pohuatasano jiyanoocuyashijia serujiniji*

<sup>23</sup> 'Naaratej, cua tojiri pueyanaa. Nia pohuatareera nia niishiniuria taa Pueyaso paniya jiyanoocuijuaca na muerasu nia quiniuriani. Tamonu jiya jiyaniijaari nera poonijionaa pueya sequequiaari nojori cuara tari niqitiojora nojuaja na cumaneeca, nojori na niqitiojosanojiniji na casami. <sup>24</sup> Noojiaqueya nera poonijionaa pueya jaara tari nojori pasanó casamijiniji niqitiojoriquiacuaa tama nojori cumaneecajinijiaaja, jiyacaritij, tamonuuri tiuquinishaareejuhuj. Nojuajaari jiyanoocua queraatia casami masejoquiaari na jiyaniijaajiniji, queraatia millón cumaneeca. <sup>25</sup> Nojuajaari maja na jitianu quiquiaari na cumaneeca, na jiyaniija na niqitiohuara. Na jiyaniijaari cunora na pueya sequeree: "Tamonu camarnu nia niqitioiore nio cua seru, necocuatata, cua cumaneecara, necohujuhuj, puetunu na casamijianaanio. Naacuajitij, na cuentaari puequenutianiya". <sup>26</sup> Cuno na seru tojishacari naa na jiyaniija sequesanotej, nocuara jacamaquiaari. Na jiyaniija sequereeri: "¿Cua tarinitiare quenaaja cua jiyaniijianaa!

¡Rupaquijjara cua tarinitiarejaara! Janiyacuajaari quia cumaneeca niquitionutaniya puetunujuanaani”.<sup>27</sup> Na jiyaniijjaari nocua taraajeree. ¡Na carterohua puetunujuanaari! Naa na jiyanooriiri, nocua na taraajenuucua.

<sup>28</sup> Cuno seru tohuatasacari jiyaniijja tiajiniji, narta seruta naacuneetooreeri. Cuno narta seruuri tarijia masequiaari shiitianiyojua casami cuno jiyanooshano serujiniji. Secaja cumaneecaari quiquiaari na cuenta. Naajaa, cuno jiyanooshano seruuri narta seru quiaree. Cumaatia na riquiajinia na miniriiri. Na sequereeri: “¡Ritia cua niquitiore cumaneeca, tarijia quia masesano janiyajiniji!”<sup>29</sup> Narta seruuri na riquiajinia mininia cariquimiaji mojoquetaree. Na sequereeri: “¡Cua tarinitiarecuaraja quenaaja! ¡Janiyacujaari quia cumaneeca quia niquitionutaniyani!”<sup>30</sup> Majaari na sashiniu paniniu quiquiaari. Saaja na nujuatequiaari nujuatejojuajiniaari cuaara na cumaneeca na niquitiorejaatijia.<sup>31</sup> Narta seya niquishacari naa cuno jiyanooshano seru miishanotej, nojoriiri jiyanoohua taraajequiaari. Nojoriiri jiyaniijjaacua quiojoquiaari puetunu sesa narta seru miishanojuanaa nojori pohuatanura.<sup>32</sup> Naaratej, jiyaniijjaari tamonu na seru jiyaroree cuno jiyanooshano seru riniuucua. Na tiuquishacari, jiyaniijjaari na juaarii. Na sequereeri: “¡Quiaaqui jiyanoohua sesajuhuanajaj! Quia sequesacari janiya, janiyari quia jiyanooriicuaani, maja quia naata niquitionu quishacari quia cumaneeca.”<sup>33</sup> ¿Majateeri quia naata quiriquiaa taraajenu quiarta seruucua, taa cua taraajeree quiocuacuaani?”<sup>34</sup> Jiyaniijjaari jiyanoohua juaarii. Cunora, cuno sesa miijja seru jiyarotareeri nujuatejojuajinia na nujuatesaanura. Sequereeariuhuj cuaara naquiya miishaaria tii, cuaara puetunujuanaa na cumaneeca niquitiorejaatijia, casami na pasanoiniji.

<sup>35</sup> 'Nia Que Pueyasoori naa miiniutianiya nijaniyajuhuj, niaa jaara seetanjuanaa jiyanoyaquiri niarta Pueyaso muerasu.

## 19

### *Jesu niishitiojosano maja pa niquiocua pa cartenura* (Mr 10.1-12; Lc 16.18)

<sup>1</sup> Jesu jaara naa pohuatanu puecaquiaariti, canaa na pueyata quiaquiaari Galilea jiyajiniijiiri. Canaari Judea jiya shuriucua tiuquishii Jordán moo taquijiriani.<sup>2</sup> Jiyanoohua queraatia pueyari Jesu nuhuajiyaree. Quiniqui canaa quishacari, Jesuuri cusosuhua naatanijioree.

<sup>3</sup> Jiyacariti, noojiaqueya Fariseocuacajinijinioori Jesuucua nijioquiaari sesa na pocuatenura Jesu juucua nocuara nojori tonujunura. Naaratej, nojoriiri Jesu nequesotaree:

—¿Maniinate pa cartenura pa niquiocua, jaara pa juaatiri?

<sup>4</sup> Jesuuri nojori riucuaaree:

—¿Majate nia serojonu quiquiaacuaja Pueyaso Rupaajinia? Coteenujuanaa Pueyaso shipinishacari pueyano, Pueyasoori shipiniquiaari caya, maajinio.<sup>5</sup> Naaratej, nojori shipinijiaari sequequiaari: “Caya cuaara tiujiaara na que, na nucuanio, necocuata na quiniuria. Nojoriiri juhua niquiriyatu pueyanora quiniutianiya na camitioosacari”.<sup>6</sup> Naaratej, caya, maaji jaara camitioore, majaari tari na quiniu caapiqui pueyano. Juhua niquiriyatu pueyanojuaari quiquii. Naacuajitij, majaari maninia Pueyaso rupuetootesano rupartanura.

<sup>7</sup> Nojoriiri Jesu sequeree:

—Jaara naa quiriti, ¿casaara supuetana Moisés rootaquiaaricuararini caya cuaara naajionee niquitioora necocua, na cartenu panishacari?

<sup>8</sup> Jesuuri nojori riucuaaree:

—Moisés cuajaari niishiquiaari niaari puera cumajiuujiaaca. Naaratej Moisésri nia tarinitiaquiaari nia niquiocua nia cartenura. Coteenujuanaa, Pueyaso jaara shipiniquiaari caya, maajinio, majaari naa na quiniu quiquiaari.<sup>9</sup> Cua tojitiare pueyanaa. Janiyari nia sequeya cutarani. Cante necocua carteree najuhuanani, tamonu maajitia na caminiuria, coteenu necocua jaara tamonu cayata quiyaquiri, neyacaari jiyanoohua sesa

miya Pueyaso niquiara. Jaara naa miiritij, Pueyasora, nojuajaari sesoriquia pueyano. Nojuacuajaari juhua pueyano, cante narta pueyano niquiocua numuetucujuani. Naajuhujaj, cante artesano maaji camiyani, naa sesa miyajaariuhujaj.

<sup>10</sup> Canaa, Jesu saquiriojosano pueyani, canaa tojishacari naa Jesu sequesantej, canaari na sequereeni:

—Jaara naa quiriritij taa quia sequeriquiaacuajani, maninia naasucuaari maja mashaja caminiuria. ¿Naatejaaratej?

<sup>11</sup> Jesuuri canaa riucuree:

—Maja na naata puetunu pueyajanaa nio cua niishitiojosano tojiniu. Saaja noojuaqueya pueya cutaraari na tojiniutianiya, noo pojori canapuate jiyocuacaanuji cumaaca niquitiosaareeni na tojiniuria. <sup>12</sup> Naajuhujaj, noojuaqueya canuuri maja na naata caminiu, riyacajajaaju nojori quishacari. Nojoriiri naa rasanohuanajaj. Tamasaca canuuri maja na caminiu saniniuuja, jiatejosano nojori riyacajajau quishacari. Tamasacaari maja na caminiujuhuaj tama nojori paniyaquishacarijaa, saaja Pueyasora nojori poonijionu panishacari. Cante na naata naa miiniuni, cuara naa miiriatej.

*Naatujooriicua Jesu secojosacari Pueyaso*

*(Mr 10.13-16; Lc 18.15-17)*

<sup>13</sup> Na nuhuaji, pueyari Jesuucua nitiaquiaari necohua juucua, Jesu nianura nojoriicua na juaashiquia, nocuara na secojonura Pueyaso. Canaa, Jesu saquiriojosano pueyani, canaari saaja nojori tenujeree canaa juaaniutiani. <sup>14</sup> Jesuuri saniniuuja canaa sequeree:

—¡Maja nojori tenujunu! Nia tarinitiare naatujoori cuara cucua nijioora. Nia tojiri, canapuate seetanujuanaa juhua nio naatujoorini, nojoriiri Pueyaso muerasu quiriquiano.

<sup>15</sup> Na nuhuaji, Jesuuri na juaashiquia niaquiaari naatujooriicua, nojoriicua na secojonura, Pueyaso miiniuria maninia nojori. Na nuhuaji, Jesuuri quiniquiji quiaquiaar-  
ihua.

*Jiyanhua casamiriaca mashaja pocoojosacari Jesuta*

*(Mr 10.17-31; Lc 18.18-30)*

<sup>16</sup> Tamonu mashajaari Jesuucua niquiaari. Na nequesotaseeri:

—Niishitiojonanaa. Quiaari maninia pueyano. Cua sequere, ¿taa cua miiniutianiya maninia cua quiniuria Pueyaso niquiara, pueyaracaanu quiijara cua quiniuriani?

<sup>17</sup> Jesuuri na riucuree:

—¿Casaara quia sequeya janiya maninia pueyanotani? Saaja niquiriyatujuaari maninia quiija cutara. Nojuacuajaari Pueyaso. Naajaa, quiaa jaara maninia quiniucua jiaataa Pueyaso pueyano quia quiniuria, quia tojiri tariucuacaanu Moisés Rootasano Pueyasojiniji.

<sup>18</sup> Jesu riucureeri:

—¿Teyano rootasanoteni?

Jesuuri na sequeree:

—Maja quia monu. Maja quiarta pueyano niquiocua quia numuetucunu. Maja quia nohuasenu. Maja quia saquiriojotanu tamonuucua quia sapojonuta. <sup>19</sup> Quia que, quia nucua tojijia quia quiriquia. Maja nojori quia rerequetenu. Mariyata quiarta pueyano quia paniri taa quia paniyacuaa tama quia cuaqueyajaajani.

<sup>20</sup> Mashajaari Jesu sequeree:

—Janiyacuaajari puetunujuanaa nio tojijia quiquiaari cua naatujuajinijini. ¿Casaa cua miiniutianiya socuani?

<sup>21</sup> Jesuuri na sequeree:

—Quiaa jaara seetanujuanaa maninia quiniucua jiaataa Pueyaso niquiara, quia quiaarohua quia tiajinia. Quia niquitiojore puetunu quia casamijianaa cumaneecara. Na nuhuaji, casamijiuniucua quia niquitiojore nareja quia cumaneeca. Naacuajitij, quiaari queraatia casami jitianutianiya jiyocuacaanu. Na nuhuaji, quiocua nimiohua cutara, cua tojijia quia quiniuria.

<sup>22</sup> Na tojishacari naa Jesu sequesantej, mashajaari taraatia quiaarohua jiyanhua casamiriaca na quiniucua.

<sup>23</sup> Jiyacaritij, Jesuuri canaa sequeree:

—Seetanujuanaa nia sequeyanijia, jiyanoehua jiyajenetaari pueyano tojiniuria Pueyaso, na pueyano na quiniuria, cuno pueyano jaara puera jiyanoehua casamiriaca quiri.

<sup>24</sup> Pueyanaa, ¿camelloteeri na naata cusupuetaja cuhuoco tamajiria tajiniu? Maja na naata. Cua tojitiare. ¿Socua jiyanoehua jiyajenetaari casamiriaca pueyanora, Pueyaso pueyanora na jatanishaanura!

<sup>25</sup> Canaa tojishacari naa Jesu sequesantej, canaari jiyanoehua jiuujiatereeni. Canaari na nequesotareeni:

—¿Canteeri Pueyaso pueyanora jiyatesaanutaniya socuanitioj?

<sup>26</sup> Jesuuri canaa shootiaree tacuriitia. Canaa sequereeri:

—Pueyari maja na naata tama na cuaqueyajaaja jiyatenu Pueyaso muerasu nojori quiniuria. Pueyaso cutaraari na naata na miiniu. Nojuajaari cumaacaraca puetunu na panishanojuanaa na miiniuria.

<sup>27</sup> Pedroori Jesu sequeree:

—¿Canaarijataj? Canaari puetunu canaa casamijianaa tiujiaquiaarini canaa rupuenura quiajaniya. ¿Casaa canaa masenutaniyariniija?

<sup>28</sup> Jesuuri canaa riucuarree:

—Seetanujuanaa nia sequeyanijia. Nio jiya maniniushitishacariuhua, janiyari cajiutianiyani jiyaniija cajitiujinia puetunu cua Quejiniji shanohua cua cumaacatajanaa. Jiyacaritij cua pueyanaa, niaari mariyata cajitijiosaanutaniya doce jiyaniija cajitiucujinia. Niaari pa supuetana Israel doce niqiuoacuajinio caneno pueya nequesoreena quiniutianiya. <sup>29</sup> Cua pueya tojiniuria janiya, noojiaqueya nojorijiniioori na tia tiujianutaniya, tapueyocuaca, na rimiatuhua, na que, na nucua, necohua, na cuhuariquiano. Canapuate naa tiujiaquiaa na tojiniuria janiyani, cuno pojoriiri Pueyasojiniji socua jiyanoehua queraatia masenutaniya nojori tiujiasanojiniji. Nojoriiri pueyaracaanu shuquiriaatia quijiaca quiniutianiyajuhuj, shaajeyashijiaca. <sup>30</sup> Saniniuujia, queraatia tojishano pueyari Pueyaso shocotasano quiniutianiya na tojiti-aashijiaca nojori quiniuucua. Naajuhuj, mijiria, queraatia pueyari juhua shocotasano pueya quiya Pueyaso niishiyashijiaca pueyara. Cuno pojori jiyaniushano najuhua quijiacani, nojoriiri Pueyaso shuquiritasano pueya quiniutianiya cutara.

## 20

*Jesu pohuatasano cuhuariquiajia poonitijosano pueyajiniji*

<sup>1</sup> 'Socua cua tojiri taa Pueyaso miiquiaa na pueyani. Nojuajaari na pueya miiquiaa taa tamonu cuhuariquia camaru miiquiaari na poonitijosano pueyacuaani. Cuno cuhuariquia camaruuri quiaquiaari tariquicuaji pueya na pajenura na uva cuhuariquiajia nojori poonijionura. <sup>2</sup> Cuhuariquia camaruuri pueyata pocoojoquiaari taa cumaneeca na niqutionutaniya cuno juuca nojori poonijosanojinijini. Poonijionaa pueyari na sequeree: “Maniniacuajaari taa quia sequereecuajani”. Na nuhuj, cuno pueya jiyaroreeri uva cuhuariquiajia nojori poonijionura. <sup>3</sup> Pananu tacasacari, cuhuariquia camaruuri tohuataquiaariuhua na tijiniji. Jiyacaritij, socua tamasa pueya niqishiiri juhujaniya quiyano tiaca jiuujiajia curotasano cajitiucujinia. <sup>4</sup> Cuhuariquia camaruuri nojori sequesee: “Nia quiaarejuhuj, cua uva cuhuariquiajia nia poonijionura. Janiyacua cumaneeca nia niqitiorohua nia poonijionu samini”. <sup>5</sup> Naacuajitij, nojoriiri quiojoquiaari cuno cuhuariquiajia poonijionurajuhuj. Na camaruuri socua tohuataquiaariuhua panacari. Socua tamasa pueya niqishiiri juhujaniya quiyano tiaca jiuujiajia curotasano cajitiucujinia. Nojori sequerejaariuhuj nera nojori poonijionura cuno juuca. Pananu mueecosacari, socua pueya riuriataquiaariiri. Nojori jiyaroree poonijionuucuaariuhuj. <sup>6</sup> Tariucua pananu piriushacari, na camaruuri socua tohuataquiaariuhua. Socua tamasa pueya niqishiiri tiaca jiuujiajia curotasano cajitiucujinia najuhua quiyano. Nojori sequereeri: “¿Casaa nia quiojiaquiyaree poonijionuucuaani? ¿Casaa nia miya niyani? Niaa mariqui poonijiore”. <sup>7</sup> Nojoriiri

na riucuaaree: “¿Canaatucua taa poonijioreni, canaa jaara pajeshiyaquiri poonijionurani?” Cuhuariquia camaruuri nojori sequeree: “Nia quiaarequi cua cuhuariquiajinia nia poonijionura. Janiyacua nia poonijionu sami cumaneeca nia niqutiorohuani”.<sup>8</sup> Pananu tiuquishacari, cuhuariquia camaruuri na casami cojuana sequeree: “Cua poonitijosano pueya quia piiri miji, nojori rerejonura. Na nuhuaji, cua sequesano cumaneeca quia niqutiojore puetunu nojorijianaa taa cua sequeree coteenujuanaa quiria poonijion-aacuajani. Majaari rimiajata nojori niqutiojonu. Coteenu quia niqutiojore tariucua pananu piriushacari cua jiyaramiquishano. Naa quia niqutiojore puetunujuanaa. Quiocua naa tucuatate niqutiojonu noo pojoriujuhuaj, canapuete tariquicuaji coteere poonijionucujani”.

<sup>9</sup>Jiyacaritij, tariucua pananu piriushacari poonitijosano pueyari nijiomaa. Puetunu nojorijianaari cumaneeca niqutiosaaree taa cuhuariquia camaru coteenujuanaa tariquicuaji poonijionaa pueya sequequiaaricujani. Majaari rimiajata nojori niqutiosaanu quiquiaari cumaneeca, nojori poonijionu sami.<sup>10</sup> Na nuhuaji, coteenujuanaa poonijionaa pueyari sequesaaquiaari na cumaneeca nojori masenura. Nojoriiri jiyaniquiaari nojori naasucuaari socua cumaneeca niqutiosaanutaniya rupaquijia poonitijosano pueyajiniji. Nojoriiri saaja niqutiosaaree taa cuhuariquia camaru sequeree nojori cuno juucacujani.<sup>11</sup> Nojori masescari na cumaneeca, nojoriiri cuhuariquia camaruta juaaquioree.<sup>12</sup> Na sequeteeri: “Cuno pueyari saaja rupaquijia poonijioree. Quiaari nojori niqutioeree taa quia niqutioeree canaacuaani. Canaari pananucari cateree cutarani, pueyaracaanu canaa poonijosacari”.<sup>13</sup> Cuhuariquia camaruuri tamonu nojorijinijinio sequeree saaja: “Sanajanaa, maja sesa cua miiniu quirii quiajaniya. ¿Majateeri quia niishiniu, paa jaara tariquicuaji pocoojoriquiaatej, janiyari juhuacarijia quia sequereeni janiyari naa cumaneeca quia niqutitionutaniyani? Quiaari cua riucuaaree: ‘Maniacuaja’.”<sup>14</sup> Naaratej, quia jiyataarohua quia cumaneeca quia tiajiniohua. Janiyacuajaari naa niqutitionu paniriquiaa tariucua pananu piriushacari cua poonitijosano pueyani, taa cua niqutioeree quiajanuyacuani.<sup>15</sup> ¿Majateeri cua naata miiniu tama cua panishanojuaja tama cua cumaneecatatajaaja? ¿Quiaateeri socua cumaneecaacua jiaatijara quiqui, capora cua quiniucua?”

<sup>16</sup> Na nuhuaji, Jesuuri naa sequequiaarijuahuaj, na pohuatasanojiniji na niishitiojonura:

—Naa quiniutianiyari taa cua sequeriquiaacuajani: canapuete nuhuajishanaani, nojoriiri coteetanaa quiniutianiya. Naajuhuj, cante coteetanaani, nojoriiri nuhuajishanaa quiniutianiya saniniuujia. Queraatia masuusano pueyari quiya. Saniniuujia, secajaari saquiriojosano quiya nojorijinijinio.

*Jesu camishacarihua pohuatanu taa na mosaanutaniyani*

*(Mr 10.32-34; Lc 18.31-34)*

<sup>17</sup> Tari Jesu quiasacari Jerusalén tiacajiniara, Jesuuri canaa na doce saquiriojosano pueya piirii tamocora nuu shuriuquiocora, tamajaaja canaata na pocoojonura. Canaa sequereeri:

<sup>18</sup> —Cua tojiri. Niaacuajaari niquiya paa tari Jerusalén tiacajiniara tacataani. Janiyari tii niqutiosaanutaniya pueyacuara secojonaa jiyaniijianucuaani, Moisés Naajioneejiniji niishitiojonaanio. Nojoriiri cucuara saquiriojotanutaniya nojori sapojonuta cua mosaanura.<sup>19</sup> Nojoriiri cua niqutitionutaniya taucua. Cuno pojoriiri cua rerequetenutaniya. Cua majacutunutaniyari. Na nuhuaji, niyacutesanojinia cua teetetunutaniyari tii cua cusonura. Jiuujianaraca juucajinia janiyari macujiniji samiitianutaniuhuaani.

*Santiago, Juan nucua sequesacari Jesu, maninia na miiniuria necohua*

*(Mr 10.35-45)*

<sup>20</sup> Jiyacaritij, Zebedeo niquiocuaari Jesuucua catecanoquiaari necohuata. Jesuucuaa mojuquetaseeri Jesu na sequenura nera na miiniuria na panishano.<sup>21</sup> Jesuuri na sequeree:

—¿Casaa quia paniyani?

Jesu riucuaareeri:

—Quiaa jaara Jiyaniijiaara jiyatesaare, quiocua cua niquiohua cajitijiore quia shuriucua, Santiago, Juannio. Tamonu cuaara cajiiria quia miaquetajara, tamonu quia muenecara, quia naacunaa nojori quiniuria, juhua jiyaniijianucuaajuhuaaj.

<sup>22</sup> Jesuuri Santiago sequeree, Juannio:

—Majaari nia niishiniu casaa nia maseyani. ¿Nia naatateeri rejeretanu naquiya miiniu taa cua miishaanutaniyacuaani?

Nojoriiri saaja Jesu riuacuaaree:

—Taaquiriirinij. Canaa naatacuaaquiniatejaj.

<sup>23</sup> Jesuuri nojori sequeree:

—Seetanujuanaa, niaari naquiya miishaanutaniya taa cua miishaanutaniyacuaani. Janiya cutaraari maja cua naata sequenu nijaniya, cante cua miaquetajara cajiniutianiya, cua muenecarano, Jiyaniijia cua quishacari. Saaja cua Que cutaraari tari na saquiriojosano pueya sequenutaniya cua shuriucua nojori cajituniuria, teyano pojoriicuaaji na jeenucuaquiaaricuaajani.

<sup>24</sup> Canaa, narta saquiriojosano pueyani, canaari Juan juaariini, Santiagonio, canaa tojishacari nojori masesano juucua. <sup>25</sup> Jesuuri saniniuujia canaa sequeree:

—Miji pueyanaa. Niya cua tojitiasee. Niaacuajaari niishiya, mijiria jiyaniijianucuaari na pueya poonitijioquiaa juhua tama na seyajaaja. Mijiria camarucuaari taraatia miiquiaa na pueya, nojori na miitishacari puetunu na panishanojuanaa. <sup>26</sup> Nijaniya saniniuujia, majaari naa nia quiniu quiniutianiya. Naacuajitij, cante tojishano pueyano quiniu paniya nijaniyajinijini, cuno cuaara quiiria narta Pueyaso pueya cumaquinia. <sup>27</sup> Cante nia jiyaniijia quiniu paniya, cuno cuaara quiiria juhua nia seru, maninia na miiniuria nijaniya, naatej, taa cua miiquiaa nijaniyacuaani. <sup>28</sup> Janiya cutaraari Jiyaniijiani. Naajaa, majaari mijiria cua ninu quiquiaari pueya cua poonitijionura quiria, shuquiriaatia cua quiniuria tamajaaja. Niquiaari cutaranijia pueya cua naacunura, tama janiyajaaja mosaanura pueya niti, queraatia pueyacuaji cua ritianura Sesaaca.

*Jesu jeeacasacari caapiqui cariyujuaru namijiaa*

*(Mr 10.46-52; Lc 18.35-43)*

<sup>29</sup> Jesuta canaa quiasacari Jericó tiacajiniji, jyanohua queraatia pueyari Jesu nuhua-jiriquiaa. <sup>30</sup> Jiyacaritij, caapiqui cariyujuaruuri nuu shuucuaaji cajituriquiaa. Nojori niishishacari Jesuuri nojori tajiriquiaa, nojoriiri nakanu coteequiaari:

—¡Jiyaniijianaa! ¡Canaacua quia taraajere! Quiaacuajaari Pueyaso Jiyarosano, Jiyaniijia quia quiniuria pa supuetanaa jiyaniijia David niti.

<sup>31</sup> Pueyari nojori juaari nojori sanaajetanura juucua. Nojoriiri saaja jiyacatequee nacanura:

—¡Jiyaniijianaa, canaacua quia taraajere, Pueyaso Jiyarosanaa!

<sup>32</sup> Jesuuri socua nujuasee. Nojori sequereeri:

—¡Miji! ¿Casaa nia paniya cua miiniuria nijaniyarani?

<sup>33</sup> Jesu riuacuaareeri:

—¡Jiyaniijianaa, canaa namijiaa quia jeeicare!

<sup>34</sup> Jesuuri nojoriicua taraajeree. Nojori namijiaa quiareeri. ¡Nojoriiri niquijiacara quiquii! Na nuhuaji, Jesuucua sacuaaree canaataari.

## 21

*Jesu tiuquishacari Jerusalén tiacajinia*

*(Mr 11.1-11; Lc 19.28-40; Jn 12.12-19)*

<sup>1</sup> Canaa quiojosacari, canaari socua tiuquijiose Betfagé tiacajiniani, Olivo nacuhua tuhananu shuriucua. Cuniquiji, majaari puera tucuaaanu quiquiaari Jerusalén tiacajiniara. Jiyacaritij, Jesuuri caapiqui canaa na pueyajinijinio sequequiaari:

<sup>2</sup> —Cuno tiacajinia nia quiaare, nooj pocuaaji niquishiyatej. Niaari tii riuritanutaniya niquiojuaraca burro morotasano. Niocua na samaacartasee. Niocua miji na jaatucuyarohuanos, necojuataja. <sup>3</sup> Pueya jaara nia tenujunu paniri nocuaaji, niocua na sequere: “Jiyaniijia na paniya. Ritia na tacatonutanihuacuaja”.

<sup>4</sup> Naa tohuateequiaariiri tariucuacaanu Pueyaso sequesano caminiujiunia sequesano, nojuaja jaara naa naajiotaquiaari Jerusalén tiacajinia quiniaa pueyara:

<sup>5</sup> “Sión tiacajinia quiniaa pueya nia sequere: ‘¡Nia niquiri! Nia Jiyaniijaari burrojinia niaacua niya. Maninia pueyanoori, juayashijia. Burro nijinia cajiyano, necojuacuano’”.

<sup>6</sup> Jiyacaritij, cuarta Jesu pueyari quiaquiaari. Nojoriiri naa miiquiaari taa Jesu sequequiaari nojoricuajani. <sup>7</sup> Nocua jaatucutuquiaariuhua burroori, necojuataja. Na nuhuaji, Jesu cajijia, canaari canaa tucuaque toqueya niojoquiaari burro nijiniani, necojuaja nijiniano. Na nuhuaji, Jesuuri na nijinia cajirii. <sup>8</sup> Jiyanohua queraatia pueyari tii quiriqiaa. Nojoriiri na tucuaque toqueya muevoquiaari nucuaco Jesuucuaaji. Tamasacaari jaamasucua piyotaquiaari Jesuucuaaji niojotasocoriquiano nucuaco, nuu niqishaanura shanohua, juhua cutara jiyaniijaacuaji maniniushitishano. <sup>9</sup> Jesu puetanaa, mariyata na nuhuaji nijionajuhua, nojoriiri naa coteequiaari nacojonura: “¡Pueyanaa, nioori pocuaji Tacuna! ¡Nojuacuajaari pa Jiyaniija, pa supuetanaa jiyaniija David niti! ¡Cuaara quiiria shuquiriaatia pa Pueyaso jiyarosano! ¡Jiyanohua maniniaari pa Pueyaso! ¡Cuaara shuquiritiasano quiiria!”

<sup>10</sup> Jesu tiuquishacari Jerusalén tiacajinia, puetunu tii quiniaa pueyajanaari jiuujiatecoquiaari. Sequetureeri:

—¿Cantejaara cunoni, tiuquiyani?

<sup>11</sup> Jesuta tiuquijionaari nojori riucuaaree:

—Nojuacuajaari Jesu, Pueyaso sequenu panishano caminiujiunia, Nazaret tiacajini-jinio pueyano, Galilea jiyajinijinio.

*Jesu jaacasacari seya niqutiojonaa Pueyaso Secojoua tiacariji*

*(Mr 11.15-19; Lc 19.45-48; Jn 2.13-22)*

<sup>12</sup> Na nuhuaji, Jesuuri Pueyaso Secojoua tiacari matacajinia tiuquiquiaari. Tii pueya niqishiiri seya niqutiojiyano. Jesuuri puetunu nojorijianaa tohuatanijioree. Cumaneece tacatojojuaca juhuacutucua caponeetareeri, tee pueya niqutiojoriquiaa taucuaa cumaneeca, Pueyaso Secojoua tiajinia niqutiojosocoriquiano cumaneecaracuajani. Mococoonu niqutiojonaa cajitiucua caponeetareejaariuhua, tee mococoonu niqutiojosaariquiaacuajani Pueyasocuara catijasocoriquiano. <sup>13</sup> Jesuuri nojori sequeree:

—Pueyaso sequesano cuajaari naa naajiotasaaquiaari tarijia:

“Cua quiqioori sesojosaanutaniya Pueyaso Secojoua tia”.

¡Niaari saniniuujia na jiyatecanu nohuasenujuaca quiqiora!

<sup>14</sup> Secojoua tiajinia na quishacarijia, cariojuarujuri pueya, mariyata shipiiniquiujiunia pueyari nocua nijioquiaari. Jesuuri nojori naatanijioree. <sup>15</sup> Pueyacuara secojonaa jiyaniijanucuaari Moisés Naajioneejiniji niishitijonaata Jesu shootariquiaa cusosuhua naatanijiyano. Jiyacaritij, naatujooriiri Secojoua tiajinia naa nacooriquiaa Jesujiniji: “¡Pa supuetanaa jiyaniija David niqiuoacuajinio supueno pueyano! ¡Nojuajaari pa Jiyaniija!” Canaa Judiocuaca jiyaniijanucua niquishacari naa Jesu miishanotej, mariyata nojori tojishacari naatujoori, nojoriiri juaaquioree. <sup>16</sup> Nojoriiri Jesu nequesotaree:

—¿Quiaate naatujoori tojiya casaa nojori sequeyani? ¡Nojoriiri jiyaniya quiaari Pueyaso Jiyarosano!

Jesuuri nojori riucuaaree:

—¡Taaquiririnij! Na tojiyacujanijia. Maniniacuajaari nojori sequesano. ¿Majateeri nia serojonu quiquiaacuaja tariucuacaanu Pueyaso Rupaajinia naa sequesantej:

“Quiaari naatujoori niishitirii conaajanio, seetanujuanaa nojori maniniuhuaqueetanura quia Jiyarosano”?

<sup>17</sup> Naa nojori na sequenu nuhuajitij, Jesuuri nojori tiujiaquee. Jerusalén tiacajiniji quiaqueeri canaata Betania tiacajinia. Canaari tii maqueseeni.

*Jesu sesacasacari higo naana, muetuhua na quiniucua*

*(Mr 11.12-14, 20-26)*

<sup>18</sup> Tariquicuaji, Jesuuri Jerusalén tiacajiniara tacateriquiohua canaa na saquiriojosano pueyata. Jesuuri miaajeriquiaa. <sup>19</sup> Higo naana niquiriiri nuu shuriucua nujuanao.



Nocua canujiyareeri. Shaanoori quiriquiaa, saa na jaamasucujaja. Cunora, Jesuuri naana sequeree:

—Majaari socua quia jajau sanishaanu quiniutianiya.

¡Naanaari ritia sorequee! <sup>20</sup> Naa canaa niquishacaritij, canaari jiuujiatereeni. Canaari Jesu nequesotareeni:

—¿Taateni? ¿Casaara higo naana sorequee ritiani?

<sup>21</sup> Jesuuri canaa riuquaree:

—Seetanujuanaa nia sequeyanijia, niaa jaara Pueyasocua tiuujiaa quiri nioojia nia niqijioteyaquiniutia nocuaji, niaa maara socua cutara miishano miiri, socua jiyajeneta cua miishanojiniji. Naacujitij, niaa maara nia sequesano niqiri niaa jaara nio tuhuananu sequere: “Quia jaataare shoniacu caminiajinia”. <sup>22</sup> Puetujuanaa nia masano nia secojosacari Pueyaso, niaa jaara seetanujuanaa nocua tiuuri, niaari nia masano masenutaniya.

*Judiocuaca jiyaniijianucua nequesoreesacari Jesu, cante na jiyaronani*

*(Mr 11.27-33; Lc 20.1-8)*

<sup>23</sup> Jesuuri Pueyaso Secojoua tiajinia tiuquiquiaari. Tii pueya niishitiojoriquiaari. Jiyacaritij, canaa Judiocuaca jiyaniijianucuaari nocua catecanoquiaari. Nojoriiri pueyacuara secojonaa jiyaniijianucua quiquiaari, canaa Judiocuaca camarucuanio. Nojoriiri Jesu nequesotaree:

—¿Canteeri quijaniyani, naa quia miiniuriatej? ¿Canteeri quia jiyatecanu juhua canaa jiyaniijia quia quiniuriani?

<sup>24</sup> Jesuuri nojori sequeree saniniuujia:

—Janiyari nia nequesotanutaniya saniniunijia. Niaa jaara cua riuquare, janiyacua nia sequerohua saniniunijia cante cua jiyaroquiaari naa cua miiniuriani. <sup>25</sup> Naacujitij, cua riuquare coteenu. ¿Cante Tiuquinijiona Juan jiyaroquiaari pueya na tiuquinijionurani? ¿Pueyasotee? ¿Tama pueyajaaja soj?

Jiyacaritij, tama nojorijiaaritia juayonuutano coteequiaari jiyasohuaja. Tama seque-tooreejaaritia:

—Paa jaara na riuquareni: “Pueyaso na jiyaroquiaari”, pa sequerucua: “¿Naatee? ¿Casaara na niishitiojosanoocua nia tiuyaquiquianucuaarini?” <sup>26</sup> Saniniuujia, paa jaara sequereni: “Nojuajaari nareja pueya jiyarosano quiquiaari”, ¡puereeta quiniutianiyari pajaniyara! Paacuajaari niishiyani puetunu pueyajanaari sequequiaa Tiuquinijiona Juanna seetanujuanaa Pueyaso sequesano caminiujunia quiquiaari.

<sup>27</sup> Naaratej canaa Judiocuaca jiyaniijianucuaari Jesu riuquaree:

—Maja canaa niishiniu canariquitijia na jiyaroquiaaritijaj.

Jesuuri nojori sequeree:

—Janiyajuhuj, majaari cua sequenu quiniutianiya nijaniya cante cua Jiyaronani, naa cua miiniuriatej.

*Jesu pohuatasano pueyano niquihuajiniji*

<sup>28</sup> Jesuuri naa nojori sequerohuacuhuj:

—¡Cua tojitiare! Tamono pueyanoori caapiqui niyanuraca quiquiaari. Nojuajaari jiyapueranu jiyaroree: “Quiyanunaa, quiria quia poonijiosee uva cuhuariquiajinia quiaritia”.

<sup>29</sup> Neyanuuri saaja na riuquaree: “Maja cua quianu paniniu”. Na nuhuaji, niishiriojorohuari. Quiaqueeri. Poonijioseeri. <sup>30</sup> Na queeri naa na nuhuajishana sequereehujaj. Neyanuuri na riuquaree: “Maniacuaja, cua quena. Janiya quianutaniyani”. Na nuhuaji, majaari na quianu quiquiaari saaja. <sup>31</sup> ¿Taa nia sequeyani pueyanaa? ¿Teyano cuno caapiqui necohujinijinote na que tojijia quiquiaarini?

Nojoriiri Jesu riuquaree:

—Na jiyapueranucujaja.

Naaratej, Jesuuri nojori sequeree:

—Seetanujuanaa nia sequeyanijia. Cumaneece masejonaa pa pueyajiniji Roma tia-cajinia quijia jiyaniijiarani, mariyata paanaturinio, cuno nia soosano pueyari nia shocotanutaniya Pueyaso muerasura nojori quiniuria. <sup>32</sup> Cua tojitiare casaara naa cua sequeree nijaniyani. Tiuquinijiona Juanri niqiaari na niishitiojonura juucua

niajaniya, maninia nia quiniuria Pueyaso niquiara. Majaari nia tiuuniu quiquianu nocua. Niaari saaja na tojiyaquiquianu. Cumaneeca masejona nia soosano pueya cutaraari nocua tiuuquianu, paanatujurinio. Nojoriiri na tojitajara quiquianu. Niaacuajaari na niquiquianu taa cuno sesa miijiaca pueya maninia pueyara jatacanuni. ¡Niajanijarijataj, majaari nia tacatonu quiquianu nioojia sesa nia quiniujiniji! Niaari saaja Tiuquinijiona Juancua tiuyashijiaca quiquianu.

*Jesu niishitiojosano cuhuariquia cojuanaa sesa miijiaca jiniji*  
(Mr 12.1-12; Lc 20.9-19)

<sup>33</sup> Socua tamonu cua pohuatasano nia tojiri. Tamonu pueyanoori cuhuariquiajinia uva natoocuaari. Maninia matacoquiaari puetunu na shuriuquiocojuanaari maja casaa tiuquitianura nocua. Saajia quejaquiaarijiaariuhuj uva rapijiojuara, na caaca rerate-saanura. Jiyaconajara tiaquiaarijiaariuhuj, cojuana niquijiara tiji nohuasejojuacuaji. Na nuhuaji, na camaruuri tamasa pueya niquitioquiaari na cuhuariquia, nera nojori cojuasocoriquiano. Na nuhuaji, na camaruuri tucuaaanu quiaquiaari pueyaracaanu camueenujunura. <sup>34</sup> Jaara tari quiquiaari uva carojotasacari, saniya cuhuariquia camarujuanaari na seya jiyaramiquiquiaari na cuhuariquia cojuanaa pueyacua. Nojori jiyaramiquiquiaariiri nojori masenura cuhuariquia cojuanaa carojotasanojiniji, taa nojori pocoojoquiaari taricujani. <sup>35</sup> Cuhuariquia cojuanaari cuhuariquia camarujuanaa jiyaramiquishano seya quiooree. Niquiriyatu majacutureeri. Tamonu moturee cutaraari. Tamonu jacuturee saitiaari. <sup>36</sup> Na nuhuaji, na camaruuri socua queraatia seya jiyaramiquiquiaariuhuj. Nojoriiri naquiya miishaaquiaarijihuaj.

<sup>37</sup> Na nuhuaji, na camarujuanaari tama sequerejaaja: “Jiyareera cua niyanu. Maja cutara nojori rerequetenu quiniutianiya cua niyanu”. <sup>38</sup> Cuhuariquia cojuanaa jaara niquiquiaari camarnujuanaa niyanu nojoriicua niyano, nojoriiri tama sequetoorejaaja: “¡Cunocujajqui cuhuariquia camaru quiriqiano na que niti, na que jaara shaajequee! ¡Pa morej! Naacuajitij, pocua nio cuhuariquia camaruhua quiqiini”. <sup>39</sup> Naaratej, camarnujuanaa niyanu tiuquishacari, cuhuariquia cojuanaari na quiaree. Na jaatucutureeri cuhuariquiajiniji tamama. ¡Cuniqui na motureeri!

<sup>40</sup> Naa Jesu pohuatanu nuhuajitij, nojuajaari cuno canaa Judiocuaca camarucua nequesotaree:

—¿Taa nia sequeyani pueyanaa? Cuhuariquia camaru jaara tiuquiriohua na cuhuariquiajinia, ¿taa na miiniutianiya cuno cuhuariquia cojuanaani?

<sup>41</sup> Jesu tojitianaari na riuacuturee:

—¡Cuno cuhuariquia camaruuri nojori puecoonutaniya, nojoriicua na taraajeyaquiniutia! Na nuhuaji, tamasa pueya sequenutaniya cutaraari, nojori cojuanura nera na cuhuariquia. Nojori cutaraari cuhuariquia camaru panishano niquitionutaniya nojori carojotasanojiniji.

<sup>42</sup> Jesuuri nojori sequeree:

—Jaa, naa miiniutianiyari. ¿Majate nia serojonu quiquiaaricujaja nio, tariucuaaanu Pueyaso Rupaajiniani?:

“Pueyari saitia tiariquiaa. Nojoriiri tamonu saajia jiyaniquiaari saajia sesarujuajau naa-sucua. Cuno saajiacujajaari socua panishano saajia quiquiaari. Jiyaniijajanaari naa na jiyatequiaari. Cuno saajia tiaree maninia cutaraari. Pueya niquishacari, jiuujiatecoreeri”.

Naa naajiotasano quiyacujajaari.

<sup>43</sup> Camarucuaana, nocuaji nia numooteyanijia, Pueyasoori nia ruuretanutaniya maja tari nia quiniuria na muerasu jitianaa. Tamasa pueyari nia niti jiyatesaanutaniya cutara, nojori jitianura maninia Pueyaso muerasurano. Nojoriiri maninia Pueyaso tojitianaa quiniutianiya cutara, Pueyaso muerasu canenura jiyanohua nera, juhua cuhuariquiajiniji senoosano queraatia. <sup>44</sup> Cuno saajiajiniji saniniuuja, pueyano jaara cuno saajiacua tiyare, nojuajaari juhua rashiquijiniutianiya. Cuno saajia jaara tiyare pueyanoocua, jacaaura na miiniutianiyari.

<sup>45</sup> Pueyacuara secojonaa jiyaniijianucua, mariyata Fariseocuaca tojitasacari naa Jesu pohuatasanotej, nojoriiri niishiqui Jesuuri nojorijiniji pohuatariquiaa miriqui.  
<sup>46</sup> Naaratej, nojoriiri Jesu quianu panirii juucua, nojori juaaniutia. Nojoriiri saaja puereriquiaa pueya. Pueyacuajaari sequeriquiaa Jesuuri seetanujuanaa Pueyaso sequenu panishano caminiujiunia quiquiaari. Naaratej, jiyaniijianucuaari jiyamitia puerecoriquiaa Jesu nojori quianura.

## 22

*Jesu pohuatasano miriqui camishacari queranacunujiniji*  
*(Lc 14.15-24)*

<sup>1</sup> Na nuhuaji, Jesuuri socua niishitiojoquiaari miriqui pohuatasanota. Naa pohuataquiaaritij:

<sup>2</sup> —Pueyasoori pueya masuya nojoritia na quiniuria shuquiriaatia, taa tamonu cutara jiyaniijia miiquiaari mijiriacaani. Cuno jiyaniijiaari shuquiriaatia quiniu paniriquiaa queraatia pueyata, neyanu camishacari. Naaratej, jiyaniijiaari queraatia sumatutequiaari, queraatia pueya miaquesocoriquiano. <sup>3</sup> Na nuhuaji, na seya jiyaramiquiriiri na masuusano pueya numootenura nojori niniuria queranacunura. Masuusano pueyari maja na niniu paniniu quiquiaari saaja. <sup>4</sup> Jiyaniijiaari socua tamasaca na seya sequeree: “Cua masuusano pueya nia numootejocoo. Nia sequesee: ‘Jiyaniijia nia sashiya. Puetunujuanaari tari jeenucuasano nia queranacunura. Tari puecoosaaree na juyaca, na shiyoshitishano seyano. Tariucua rariyosanoori quiya. Ritia nia nimia. Nia miaquenuusee’ ”. Naa na seya na rootanu nuhuajitij, jiyaniijiaari nojori jiyaramiquiriiri.

<sup>5</sup> Masuusano pueyari saaja tojitiaaquirii. Puetunujuanaari tama na panishanojuaja miiriquiaa saaja. Tamonuuri na cuhuariquiajinia quiaaree. Tamonuuri na casami niquitiojosaqui quiaareecujua. <sup>6</sup> Tamasacaari saniniuujia jiyaniijia seya quiooree. Jiyanohua naquiya nojori miiriiri. Na nuhuaji, nojori puecootureeri. <sup>7</sup> Jiyaniijia niishishacari, jiyanohua juaariiri. Nocuaji na soldadohua jiyaramiquiriiri cuno monaa nojori naminiuria saniniuujia, nojori tiaca na catijiatanurajuhuj. <sup>8</sup> Na nuhuaji, jiyaniijiaari na seya sequeree: “Puetunujuanaari tari jeenucuasano pa queranacunura cua niyanu camishacari. Cua masuusano pueyacuajaari saaja cua ruuretareeni. Namitia majaari nojori nijionu quimiaa, saaja cua rerequetejaca nojori quiniuucua. <sup>9</sup> Quiarijia cutara, nia quiaare nuu tuneequetajajinia, tee queraatia pueya tajiniuucataquiaacuajani. Nia masuure puetunu nia niquishano pueyajanaa”.

<sup>10</sup> Na seyari quiojoquiaari tiaca nucuaco. Nojoriiri puetunu na riuriatasano pueyajanaa rerejoteree, maninia pueya, sesa pueyano. Queranacunuusaquiri mishiquiaari masuusano pueyata. Camarnu seyari puetunu pueyajanaa cushiyotequiaari camishacari cushiyosano toqueya, nojori tiuquitasacari tiaco queranacunura.

<sup>11</sup> Na nuhuaji, jiyaniijiajanaari tiuquiquiaari masuusano pueya na niquiniuria. Tamonu pueyano niquishiiri camishacari cushiyosano toqueeju. <sup>12</sup> Jiyaniijiaari na sequeree: “Pueyanonaa, ¿taa quia tiuquimiaa camishacari cushishano toqueejuni?” Pueyanoori sanaa na tojiriquiaa. Majaari na riucuanu quiriiri. <sup>13</sup> Cunora, jiyaniijiaari na seya sequeree: “¡Nia morojore na cashacucua, na numatucuanio! ¡Niocua na jartarohua carijiniacuma ninishiqui! Tii sapuenutaniyari. Na quiaa miaquenutaniyajaariuhua na noonuta, naquiya na miishacari”.

<sup>14</sup> Naajuhuj pueyanaa, Pueyasoori queraatia pueya masuya quiarijia na muerasu nojori quiniuria. Saniniuujia, secajaari saquiriojosaanutaniya nojorijinijinio seetanujuanaa na muerasura nojori quiniuria.

*Jiya jiyaniijia cuara niquitiojosaaria na sequesano cumaneeca*  
*(Mr 12.13-17; Lc 20.20-26)*

<sup>15</sup> Na nuhuaji, Fariseocuacaari quiojoquiaari Jesu shuriucujia tama nojori niishitiojotoonurajaaja. Nojoriiri Jesu pocuatenu paniquiaari sesa juucua, nocuara nojori saquiriojotanura. <sup>16</sup> Na nuhuaji, Fariseocuacaari na niishitiojosano pueya jiyaramiquiriiri Jesuucua, jiyaniijia Herodes panijaca pueyata. Herodesri jiyaniijia César jiyatesano

quiquiaari Judea jiyajinia jiyaniijia na quiniuria. Fariseocuaca jiyaramiquishano pueyari Jesu sequesee:

—Niishitiojonanaa, canaari niishiyani quiaari maninia pueyano. Majaari quia cuara-cashijionu. Quiaari seetanujuanaa casaa niishitiojoquiaa cutara taate canaa naata maninia quiniu Pueyaso niquiarani. Majaari quia puerenu quiquiaa, pueya niquiarana quia pohuatanura quia niishishano. Majaari rimiajata quia niquiniu pueya. <sup>17</sup> Naaratej, canaa quia sequere taa canaa miiniutianiyani. Paari sequesaaquiaarini pa cumaneeca pa niqutiojonura jiyaniijajanaa Césarra, taa cuno tahue César sequequiaaricuajani. Quiajanियariuhuj, ¿taa quia sequeya saniniunijia?

<sup>18</sup> Jesuuri ritia niishiquii, nojoriiri naa na nequesotariquiaa na sapojonuta. Nocuaji nojori sequereeri:

—Sapuenu maninia quijiacanaa, ¿casaara nia saniniujiya naa janiyani? <sup>19</sup> Cua niqutiri nia cumaneetoj, cuno, jiyaniijia César sequesano pa niqutiojonura nojuajani.

Nojoriiri Jesu niqutirii cumanee. <sup>20</sup> Jesu niquishacari cuno cumanee, nojori nequesotareeri:

—¿Cana naaquiti nio nocuani? ¿Cana sesate nocua naajiotasanojanuuhuj?

<sup>21</sup> Nojoriiri na riucuaaree:

—Jiyaniijia César naaquicuaja, na sesajuhuj.

Jesuuri nojori sequereeri:

—Jaara naa quiritij, César nia niqutiojore tama na casaajaaja. Nojuacuajaari na camaru. Saniniuuja, Pueyaso nia niqutiojore nerano tama na casaajaaja. Nojuaja cutaraari pa camarnu.

<sup>22</sup> Nojori tojishacari naa Jesu sequesantej, jiuujiatecoreeri. Na tarinitiatoreeri. Quiojiyarohuari.

*¿Macunucuate samiitiaconutaniuhua?*

*(Mr 12.18-27; Lc 20.27-40)*

<sup>23</sup> Cuno juucaja, Saduceocuacaari Jesuucua nijioquiaari. Nojoriiri jyaniquiaari macunucua maja na samiitiaconu quiniutianiuhua. Naaratej, nojoriiri Jesu sequesee:

<sup>24</sup> —Niishitiojonanaa, supuetana Moisésri pa sequequiaari na naajiotasanojinia, pueyano jaara cusoyare mueyaju, na tarajanu cuara camiiira mashiquio, mueya na mueratenura tarajanu niti. <sup>25</sup> Tarija, tamonu pueyanoori niya quiquiaari. Siete niqutiohuaraca quiquiaariiri, saa canuujuu. Jiyapueranuuri camiquiaari. Na nuhuaji, shaajequiaariiri muetuhuojuu. Naaratej, na mashiquioori camitishaaquiaari neyaca tarajanuta. <sup>26</sup> Nojuajaari muetuhuojuu shaajequiaarijuhuuj. Naaratej, neyaca tarajanuuri mashiquio camiquiaarijuhuuj. Nojuajaari mueyaju cusoquiaarijuhuuj. Naa cusionuuquiaariiri puetunu cuno siete canuujuanaa. <sup>27</sup> Na nuhuaji, mashiquioori cusoquiaarijuhuuj. <sup>28</sup> Saniniuuja, macunucua jaara samiitiacorohua, ¿teyano cuno siete neyacaajiniyote seetanu neyacajanaa quiniutianiyani, puetunu cuno pojorijianaa jaara neyaca quiquiaari?

<sup>29</sup> Jesuuri nojori riucuaaree:

—¡Niaari jyanohua jiyajeneya nia niishiyaquishacari Pueyaso Rupaajinia naajiotasano, Pueyaso cumaacanio! <sup>30</sup> Macunucua samiiticosacariuhua, majaari canuu camiyonu quiniutianiya maaji. Naajuhuj, maajipohuari maja na camiyonu quiniutianiya neyacaara. Caya, maajinio, nojoriiri juhuajaniya quijiaca quiniutianiya juhua jiyocuacaanu quijiaca Pueyaso seya, maja camiyosano. <sup>31</sup> Socua cua tojitiare. Macunucuaari seetanujuanaa samiitiacoriquianohua. ¿Majateeri nia serojonu quiquiaacuaja taa Pueyaso sequequiaari niajanuyacuajani? Naa sequequiaariiri:

<sup>32</sup> “Janiyari nia supuetana Abraham Jiyaniijiani, nia supuetana Isaac Jiyaniijiajuhuuj, nia supuetana Jacobo Jiyaniijiano”.

Naaratej, nia sequeyanijia, Pueyaso muerasu shaajecononi, nojoriiri maja macunucua na quiniu. Canapuate seetanujuanaa Pueyaso muerasuni, nojori cutaraari pueyaracaanu quijiaca.

<sup>33</sup> Pueya tojishacari naa Jesu niishitiojosantej, nojoriiri jyanohua jiuujiateree.

*Puetunu Pueyaso rootasanojinijianaani, teyanote socua na pueya tojishocoriquianoni*  
(Mr 12.28-34)

<sup>34</sup> Fariseocuaca jaara niishiquiaari Jesu Saduceocuaca sanaajaree, nojoriiri Jesuucua nijioquiaari nojori saniniujiuniuria nojuaja, nojori nequesoreenuta. <sup>35</sup> Nojoriiri jaarajaaja Jesu pocratenu paniriquiaa sesa juucua. Tamonu nojorijinijinioori Moisés Rootasanojiniji niishitiojona quiquiaari. Na saniniujiuniuria, nojuajaari Jesu nequesotaree:

<sup>36</sup> —Niishitiojonanaa, ¿Pueyaso rootasanojinijini, teyanote socua pa tojishocoriquianoni?

<sup>37</sup> Jesuuri na riucuaaree:

—Naa naajosano quiyacuajaari:

“Quia Jiyaniijia Pueyaso quia paniri puetunu quioojiatajanaa, puetunu quia sohuanutajanaa, puetunu quia niishitajatajanaano”.

<sup>38</sup> Niocujaari socua na pueya tojishocoriquiano Pueyaso rootasano. <sup>39</sup> Tamonu na sequesanoori quera juhua niojuhuaj. Naa sequeyari:

“Quiarta pueyano quia paniri taa quia paniyacuaa tama quia cuaqueyajaajani”.

<sup>40</sup> Puetunu Moisés rootasanojuanaa, mariyata puetunu tariucuacaanu Pueyaso sequesano caminiujiuniaa rootasanojuanaari nio caapiqui rootasanojinijicuaa.

*¿Cante Cristo supuetanani?*

(Mr 12.35-37; Lc 20.41-44)

<sup>41</sup> Fariseocuaca quishacarijia cuniqui, Jesuuri nojori nequesotaree:

<sup>42</sup> —¿Taa nia niishiriojiya Cristojinijini? ¿Cante na supuetanani?

Nojoriiri Jesu riucuaaree:

—Pa jiyaniijiarano Cristoni, nojuajaari pa supuetana David niquiohuacuajinio supuenutaniya.

<sup>43</sup> Jesuuri nojori sequerohuacuhuaaj:

—Taaquiririni. Jaara naa quiriritij, ¿niaateeri niishiyacuaja casaara David sequequiaari “cua Jiyaniijata” Cristocuaraarini, Pueyaso Sohuanu jaara na pocuatequiaari? Naa sequequiaariiri:

<sup>44</sup> “Jiyaniijia Pueyasoori cua Jiyaniijia Cristo sequequiaari: ‘Cua miaquetajara quia cajirijaara, janiya cuara quia paraa shocojotare quiocuajijaatijia’”.

<sup>45</sup> ¿Cristotucua taa David niquiohuacuaji supuereni, David jaara Cristo jiyaniiquiya na jiyaniijata?

<sup>46</sup> Nojoriiri Jesu niquitiaree sanaa. Nojoriiri maja na naata na riucuanu quiquiaari. Cuno nuhuaji, pueyari maja socua na nequesoreenu paniniu quiquiaari Jesu.

## 23

*Jesu juaashacari Fariseocuaca, Moisés Rootasano niishitiojonaano*

(Mr 12.38-40; Lc 11.37-54; 20.45-47)

<sup>1</sup> Na nuhuaji, Jesuuri tii quiniaa pueya sequeree, canaa na saquiriojosano pueyano:

<sup>2</sup> —Moisés Rootasanojiniji niishitiojonaa, mariyata Fariseocuacaari supuetana Moisés niti quiya, tariucuacaanu Pueyaso Rupaa nojori niishitiojonura. <sup>3</sup> Naaratej, nia tojitiare puetunu nojori sequesanojuanaa nijaniya. Saniniuujia, maja cutaraari nia miiniu taa nojori miiquiaacuaani. Nojoriiri najuhuana niishitiojoquiaa taa pueya miiniutianiyani. Majaari saniniuujia nojori miiniu tama nojori niishitiojosanojuaja. <sup>4</sup> Nojoriiri tama nojori niishishanojuaja rootaquiaa, maja saaja tariucuacaanu Pueyaso niishitiojosano pa supuetanaa. Nojori rootasano pueya miishocoriquianoni, cunoori juhua jiyanojuaa niquia casaa pueya nitiasocoriquiano. Nojoriiri maja quenaaja na naacutanu quiquiaa na juaashiquia sacasaruta. <sup>5</sup> Nojoriiri puetunu na miishanojuanaa miiquiaa saaja pueya niquishocoriquiano, pueya shuquiritianura nojori. Nojoriiri Pueyaso Rupaajiniji naajiotasano cushitiaquiaa na jiniji morotasano, na numatucuaacuano. Nojoriiri naa miiquiaa taa pa supuetanaa miiquiaaricuaani. Saniniuujia, nojoriiri najuhuana socua puereetucara na quiquiora cusupuequiaa pueya shootiasocoriquiano. Naajuhuaaj,

nojoriiri na toqueecuaji sohuatacojua tunujutaquiaa taa pa supuetanaa Pueyaso toji-tiajaca miiquiaaricuaani. Saniniuujia, nojoriiri puera tucucujuara na tunujutaquiaa saaja pueya niquishocoriquiano, pueya shootianura nojori. <sup>6</sup> Nojori jaara masuusaare tamonu tiajinia queranacunura, nojoriiri secoquiaa socua panishano cajitiujinia nojori cajitiuniuria tia camaru shuriucua. Naajuhuj, Pueyaso secojojua tiacajinia pueya rerejosacari, nojoriiri cajitiuniu paniquiaa camarucua cajitiucujinia pueya shootianura nojori. <sup>7</sup> Nojori rucuanesacari tiacajinia, nojoriiri paniquiaa pueya saruhuanura nojori. Panitiquiaajaariuhua pueya jiyaniquiniuria nojori “niishitiojonaata”.

<sup>8</sup> 'Niajaniya saniniuujia cua pueyanaa, majaari pueya shanacunu niaacua, nojori jiyaniquiniuria njajaniya “niishitiojonaata”. Niajaniya cutaraari niquiriyatujua Niishitiojonaraca. Puetunu njajaniyajanaari narta Pueyaso pueya tapueyocuaca. <sup>9</sup> Naajuhuj, majaari tamonu pueyano mijiria nia jiyaniquiniu “cua queta”. Niaacuajaari niquiriyatu Queraca. Nojuajaari jiyocuacaanu Quinia. <sup>10</sup> Naajuhuj, majaari pueya nia shanacunu niaacua, nojori jiyaniquiniuria njajaniya “cua jiyaniijiata”. Niaari niquiriyatujua Jiyaniijiaracacuja. Nojuacuajaari Pueyaso jiyarosano nia Jiyaniijiaranoni. <sup>11</sup> Cante jiyaniijiajanaa cutara njajaniyajinijinioni, cuno cuara jiyateera tama na cuaqueyajaaja nia cumaquinia na quiniuria. <sup>12</sup> Cante tama na cuaqueyajaaja jiyateja pueya shocotaja na quiniuriani, narta pueya jiyaramiquijia na quiniurijuhuj, jiyano pueyano cutaraari cararosaanutaniya. Cante saniniuujia juhua narta pueya serura jiyateja tama na cuaqueyajaajani, cunoori jiyaniijia jiyatesaanutaniya cutara.

<sup>13</sup> '¡Cua tojitiare, Moisés Rootasanojiniji niishitiojonaanaa, njajaniya Fariseocuacajuhuj, niaari cocuaatia miiquiaa! ¡Niaari sapuenu juhua maninia quijiaca niquishano! Niaari pueya tarinitiaquiquiaa nojori rupuenura Pueyaso. Niaari maja nia tiuuniu Pueyasocua. Naajuhuj, majaari pueya nia tarinitianu nojori tiuuniuria Pueyasocua, na muerasura nojori quiniuria.

<sup>14</sup> '¡Niaari taraatia miishaanutaniya, Moisés Rootasanojiniji niishitiojonaanaa, njajaniya Fariseocuacajuhuj! Niaari sapuenu juhua maninia mijiaca niquishano. Niaari mashiquiopue tiaca masequiaa secaja nia cumaneecata, nia sapojonuta nojori. Naacujitij, niaari nojori tiaca masequiaa tama njajaniyarajaaja. Naa nia miiniu nuhuajitij, niaari shitiarayocua secojoquiaa najuhua Pueyaso, pueya niquiara, maninia pueya nia jiyaniishaanura. Naaratej, niaari socua jiyanohua saniitiosaanutaniya tamasa pueyajiniji.

<sup>15</sup> '¡Niaari puereeta miishaanutaniya Moisés Rootasanojiniji niishitiojonaanaa, njajaniyajuhuj Fariseocuaanaa! Niaari sapuenu juhua maninia mijiaca niquishano. Niaari tucucuaanu rucuanajoquiaa jiya caco, shoniacu caminia taquijiriano, tamonu nia niishitiojonura najuhua Pueyaso tojiijara na quiniuria juucua, juhua tama njajaniyajaja. Nia niishitiojosano pueyano jaara nia tojiijara quiri, nojuajaari socua jiyanohua saniitiosocoriquiano quiya njajaniyajiniji, sesa nia rootasano tojiija na quiniucua.

<sup>16</sup> '¡Niaari taraatia miishaanutaniya mosanucuaanaa! Njajaniyari juhua cariyujuaru, cante tamonu pueyano jaatucuya juucua, nuu nia niishiyaquishacari. Naacujitij, niaari capa niishitiojoquiaa. Niaari rootaquiaa, pueyano panishacari tamonu tiuuniuria na sequesanoocua, nojuaja cuara sequeera: “Taa oro Pueyaso Secojojua tiajinia pueyaraacaanu quiyacuaani, naajuhuj, cua sequesano quiajaniyari seetanujanaa tohuateenutaniya quiaara”. Saniniuujia, niaari sequequiaa, Pueyaso Secojojua tiajinia oro jaara sequeyaquishaare, majaari na sequesanoocua tiuushaanu. Naacujitij, niaari sequequiaa, pueyano sequesanoori nareja sequesano, nojuaja jaara sequeera: “Taa Pueyaso Secojojua tia pueyaraacaanu quiyacuaani, naajuhuj, cua sequesano quiajaniyari seetanujanaa tohuateenutaniya quiaara”. Niaari sequequiaa cuno sequesanoocuaari maja tiuushaanu. <sup>17</sup> ¡Mosanucuaanaa, niaari juhua cariyujuaru! ¿Teyanote socua pueresanoni, cuno orotee, Pueyaso Secojojua tia soj? Cuno oroori na pueresanora jiyatesaaquiaari saaja Pueyaso Secojojua tiajinia na quiniucua. <sup>18</sup> Niaari rootaquiaajuhuj, pa sequesacari parta pueyano, casaa pa miiniutaniya nerani, pocua na tiuuniuria paa cuara sequeera naatej:

“Seetanujuanaa quia sequeyanijia. Naatej, taa casaa Pueyasooacara catijiaja juhuacutuucua niasano jiyanoahua maninia quiyacuaa Pueyasorani, naajuhuj, cua sequesanoori saaja maniniajuhuaj. Majaari cua sapojonu”. Naacuajitij, niaari sequequiaa, paa jaara naa sequereni, paa cuara miiria pa sequesano. Saniniuujia, niaari sequequiaa: “Pa sequesanoori najuhua sequesano, paa jaara saaja Pueyasooacara catijiaja juhuacutu sequereni. Majaari nocua tiuushaanu”.<sup>19</sup> ¡Cariyojuarujurinia! ¿Majateeri nia niishiniu? ¿Teyanote socua maniniani, Pueyasooacara catijasocoriquiano casaatee, Pueyasooacara catijiaja juhuacutu soj? Catijasocoriquiano casaari narejajuhuanajaj, jaara Pueyasooacara catijiajaacua niasoo quiyacua. <sup>20</sup> Naaratej, cante Pueyasooacara catijiaja sequeree seetanujuanaani, nojuajaari maja saaja Pueyasooacara catijiaja na sequenu quirii. Nojuaja cutaraari na caco niasano sequerejuhuaj. <sup>21</sup> Naajuhuj, cante Pueyaso Secojoua tia sequeree najuhuanani, cunoori maja saaja Pueyaso Secojoua tia na sequenu quirii. Nojuajaari Pueyaso sequerecuaja, Pueyaso Secojoua tia na sequesacari. ¡Pueyasocuaajaari na Secojoua tijinia quijia! <sup>22</sup> Naajuhuj, pueyano jaara sequere na sequesano seetanujuanaa juhua jiya cajiniocua, nocua tiuushaanura, cunoori maja saaja jiya cajiniocua na sequenu quirii. ¡Pueyaso cajishaqui sequerejaariuhuj, Pueyasouanaa sequerejaariuhuj, jiyocuaaanu casaa na sequesacari!

<sup>23</sup> ¡Niaari taraatia miishaanutaniya, Moisés Rootasanojiniji niishitiojonaanaa, nijaniyajuhuj Fariseocuacanaa! Niaari sapuenu juhua maninia mijiaca niquishano. Niaari Pueyaso niquitiojoquiaa maninia puetunu nio nia nataujinijianaa, shanohua jaanujua jaamasucua, miaquesanojinia jatasano casaa: menta, anis, cominonio. Niaari jacaria serojoquiaa diez casaa puetunu cunoo cien casaajinijianaa, Pueyasora nia niquitiosocoriquiano taa supuetana Moisés sequequiaaricujani. ¡Niaari saniniuujia socua pa tojishocoriquiano Moisés rootasano tojitiaaquiquiaa! ¡Naacuajitij, majaari maninia pueyano nia quiniu taa Moisés rootaquiiaaricujani! ¡Majaari nia taraajenu quiquiaa niarta pueyanoocua! ¡Majaari nia tiuuniu Pueyasooacara! Niaari maninia niquitiojoquiaa nia nataacuacajiniji. Taa nia niquitiojoquiaa nia nataacuacajinijicuaani, jnaa nia tojitiarejuhua socua pa tojishocoriquiano rootasano Moisés Naajiotasanojiniji! <sup>24</sup> Pueya nia niishitiosacari Moisés Rootasanojiniji juucua, niaari juhua cariyojuaru cante narta cariyojuaru jaatucuya juucua. Niaari juhua tamonu pueyanujuhuaj. Na ratusacari, nujujua taquirii na mashacajinijiiri. Socua na ratusacariuhua, ¡saaja cuartia miataaree juhuajaniyari!

<sup>25</sup> ¡Niaari cocuaatia miquiaa, Moisés Rootasanojiniji niishitiojonaanaa, nijaniyajuhuj Fariseocuacanaa! Niaari sapuenu juhua maninia mijiaca niquishano. Niaari juhua noo pueyajuhuj, cante nareja na ratujua cuaqueya jeequejoquiaani, na miacoua cuaqueyano. Na jiniacumaari saniniuujia jiyanoahua curuutuucua quiyajaa. Nio miriqui cua sequesano nia niishiri. Nioojaari naa quiyajuhuj. Niaari nohuasenujuuca, jamuejacio. <sup>26</sup> ¡Cariyojuaru Fariseocuacanaa, nia ratujua jiniacuma nia jeequere coteenu, nia miacoua jiniacumano! Naacuajitij, na cuaqueyari maninia jeequesano quiniutianiyajuhuj.

<sup>27</sup> ¡Niaari taraatia miishaanutaniya, Moisés Rootasanojiniji niishitiojonaanaa, nijaniyajuhuj Fariseocuacanaa! Puetunu nijaniyajanaari sapuenu juhua maninia mijiaca niquishano, juhua macunucua quiquio shanohua niquishano, cohuajata noshijosano. Saniniuujia na jiniacuma quiyari sacuaaraatia jaanujua pueya nuchua mocuaca. <sup>28</sup> Niaari naajuhuj. Niaari sapuenu juhua maninia pueya niquishano. Saniniuujia nioojaari jiyanoahua sesa, jiyanoahua sapojonu niishijia.

<sup>29</sup> ¡Niaari taraatia miishaanutaniya, Moisés Rootasanojiniji niishitiojonaanaa, nijaniyajuhuj Fariseocuacanaa! Niaari sapuenu juhua maninia mijiaca niquishano. Niaari macunucua niojotajara shanohua niquishano shipinijioquiaa, tariucuaaanu pueyara Pueyaso sequesano caminiujuniana nucuhuacua. Naajuhuj, niaari tariucuaaanu Pueyaso tojitiajaca puecosano quiquio maniniushitijia. <sup>30</sup> Naa nia miishacaritij, niaari juhua sequequiaaruhua: “Paa jaara shipinijosaaquiari pa supuetanaa

quishacarijia tariucuacaanuni, paa maara nojori cojiyaquiquiaari cutarani, nojori puecoosacari Pueyaso sequesano caminiujiuniaa”.<sup>31</sup> Saniniuuujia, naa nia sequesacaritij, niaari tama niaacuara toreejaacujua. Naaquiiiri cuno tariucuacaanu Pueyaso sequesano caminiujiuniaa puecoonaacuajinio supuenocujua.<sup>32</sup> Naa Pueyaso sequesano caminiujiuniaa puecoonaacuajinio supueno nia quishacaritij, Pueyaso Jiyarosano nia morejuhuaj, nia tucuatana nia supuetanaa coteesano.

<sup>33</sup> ¡Sesa miijiaca pueyanaa, niaari noonacuraca, juhua sacocua! ¿Niaateeri jiyaniya niaari saniitioyaquishaanutaniya mani quiquiojinia nia supuetanaata? <sup>34</sup> ¡Cua tojitiare! Janiyari Pueyaso rupaa caminiujiuniaa jiyaramiquiniutianiya niaacuani, Pueyaso Rupaa niishijiacajuhuaaj, Pueyaso rupaa niishitiojonaanio. Nojoriiri nia pohuatanutaniya Pueyasojiniji. Naaari noojiaqueya nojorijinijinio puecoonutaniya. Naaari tamasaca teetejonutaniya niyacutesanojinia nojori nia monura. Naaari tamasaca majacunutaniya Pueyaso secojojua tiacajinia. Naaari tamasaca neteyojotanutaniya puetunu tiacajinijianaa, naquiya nia miiniuria nojori.<sup>35</sup> Naaacuajaari niishiya, coteenujuanaa mosaaquiaariiri Abel, maninia miijiaca pueyano. Naa puecoosaaquiaariiri queraatia Pueyaso tojitiajaca pueya. Na nuhuaji, socua jaatesaaquiaari monuuri Zacarías, Berequías niyanu. Cuno maninia pueyanoori mosaaquiaari Pueyaso Secojojua tiajinia, Pueyasoocuara catijiasaqui shuriucua. Monu porocua nia quiniuucua taa nia supuetanaa quiquiaaricuaani, niaari saniniuuujia nocua namishaanutaniyacujua puetunu tariucuaaanu Pueyaso tojitianaa puecoosaanuucujanaa.<sup>36</sup> Seetanujuanaa nia sequeyanijia, nio pa quishacari pueyani, nojoriiri saniitiosaanutaniya puetunu cuno pueya puecoosaanuucujanaa.

*Jesu nujuquesacari Jerusalén tiacajinia quiniaa pueyacua*  
(Lc 13.34-35)

<sup>37</sup> ¡Jerusalén tiacajinia quiniaa pueyanaa, jiyano hua taraajeya niaacuaniija! Naaari Pueyaso sequesano caminiujiuniaa pueya puecoojuaca. Naaari Pueyaso jiyaramiquishano pueya jacujuaca saitia nojori pohuatanuucua Pueyaso rupaa nia niqiuara juucua. Janiyari cucua nia nijionura panijia juucuaani taraatia nia miyaquishaanuucujia cua tacunura niaacuaji, naate taa caacaraja rijioquiaacuaa necohua na nesu cariquiacorani, na cojuanura nojori. Naaari saaja cua paniyaquijia cua cojuanura nijaniya.<sup>38</sup> Cua tojitiare. ¡Naaari nia quiquiojiniji sanaajasaanutaniya niiquiji!<sup>39</sup> Seetanujuanaa nia sequeyanijia, majaari socua nia niqiniu quiniutianiya janiya, niaa cuara cua tiuquishacariuhua sequerejaatijia: “Pueyaso cuara shuquiritiiria pa jiyaniija quiriqiano na jiyarosano.”

## 24

*Jesu pohuatasacari, Pueyaso Secojojua tia niyartasaanutaniya*  
(Mr 13.1-2; Lc 21.5-6)

<sup>1</sup> Jesuuri Pueyaso Secojojua tiajiniji tohuataarohua. Nata canaa quiojosacari nucuaco, canaa, na saquiriojosano pueyani, canaari nocua catecanoquiaarini. Canaari Jesu niqitiriquiaa Pueyaso Secojojua tiani, shanohua niquishano tia. <sup>2</sup> Jesuuri saa canaa riuacuareejaa:

—Jaa, na niqiyacuajaniija. Naa cumaati maninia na niqiyacujua. ¡Seetanujuanaa nia sequeyanijia, cuno tia niaa na niqiyani, cunoori niyartasaanutaniya puetunujuanaa! ¡Majaari quenaaja tamonu saajia manu quiniutianiya tamonu caco!

*Taa pa niishiniutianiya quera jiya puequesacari*  
(Mr 13.3-23; Lc 21.7-24; 17.22-24)

<sup>3</sup> Na nuhuaji, canaari Olivo cuhuariquia tuhuananuucua quiojoquiaarini. Jesu cajiishacari tii, canaa na saquiriojosano pueyani, canaari nocua catecanoquiaarini. Tama canaa quishacarijaaja, canaari na nequesotareeni:

—Canaa quia sequere ¿taacari Pueyaso Secojojua tia niyartasaanutaniya? Naa juhuaj, ¿taa canaa niishiniutianiyarini taacari quia tacatenutaniuhua mijiriani? Canaa quia sequerejuhuaj, ¿taacari jiya puequenutaniya?



<sup>4</sup>Jesuuri canaa riucuaaree:

—Tama nia cuaqueyajaaja nia cojuare tamasaca mariqui nia sapojoreeri. <sup>5</sup>Queraatia sapojonuujuaacari supuenutaniya. Nojoriiri tama na cuaqueyajaaja sequenutaniya: “Janiyacuja Cristoni, Pueyaso Jiyarosano”. Naa nojori sequesacaritij, queraatia pueya sapojonutaniyari. <sup>6</sup>Naajuhuj, niaari pueyapue miaquetojonujiniji tojiniuuniutianiya, niya, tamonu jiyacajinianio. Niaari miaquetojonura miananajotoonujiniji tojiniuuniutianiyajuhuj. Naa jaara naa tojiniuuritij, majaari puerenu. Naa quiniutianiyari mijiria. Naajaa, juhuanajuajaari maja jiya puequesacari quiniutianiya. <sup>7</sup>Tamonu pueyari tamasaca pueyata miaquetojonutaniya. Tamonu jiyajiniji jiyaniijaari tamonu jiyaniijaata miaquetojonutaniyajuhuj. Jiyacaritij, jiyanojua miaajenuuri quiniutianiya queraatia jiyacajinia, cusonuunujuhuj. Rijaari queraatia jiyacajinia jiuuquiujutianutaniya. <sup>8</sup>Naa naquiya miishacari mijiriatej, cunoori juhua manajaraca coteesacari noonu. Na nuhuaji, socua jiyacatenutaniyari naquiya miishacari, mijiria cua tiuquiyaquishacarija.

<sup>9</sup>Jiyacaritij, niaari jiya camarucua niqitiojosaanutaniya cua muerasu nia quiniucua, naquiya nojori miitianura nijaniya. Niaari puecoosaanutaniya. Puetunu jiyacajinijinio pueyajaanaari nia niqiniu paniyaquiniutianiya, cua muerasu nia quiniucua. <sup>10</sup>Jiyacaritij, queraatia cucua tiuunaa pueyari cucua tiuuniu tarinitianutaniya nojori jaara naquiya miishaare. Nojoriiri narta Pueyaso muerasu tacartanutaniya. Majaari nojori niqiniu paniniu quiniutianiya tarijia narta Pueyaso muerasu. <sup>11</sup>Queraatia sapojonuujua Pueyaso rupaa pohuatanaari supuenutaniya. Nojoriiri queraatia pueya sapojonutaniya. <sup>12</sup>Jiyacaritij, sesa miiniuuri socua jiyanojua jiyacatenutaniya mijiria. Cunora, queraatia pueyari narta pueya paniniu tarinitianutaniya. <sup>13</sup>Saniniuujia, cucua tiuujia jaara rejeretare pueyaracaanu cuno naquiya miishacari jiya cuaara puequerejaatijia, nojuaja cutaraari shacantuuca quijiara jatanishaanutaniya, pueyaracaanu na rishiniuria. <sup>14</sup>Pueyaso rupaa jaara pohuataaare janiyajiniji pueyapue niqiuara puetunu jiyacajinijanaa, nojori niishiniuria taate nojori naata cua muerasura quiniuni, jiyacaritij, jiyari shusha puequenutaniya cutara.

<sup>15</sup>Pueyaso sequesano caminiuujunia Danielri tariucuaaanu pohuataquiaari sacuaratia casaanaari supuenutaniya, puereeta niquishano. Cunoori Pueyaso pueya shaajariquiano. (Cante nio serojiyani, cuaara niishiiria casaa na sequeyani.) Naa jaara cuno sacuaratia casaa niqiri Pueyaso Secojoua tiajinia nujuatesano, niocua mashiri. <sup>16</sup>Jiyacaritij, canapuate Judea jiyajinia quiyani, nojori cuaara mashiiria tuhuananuhuacua. <sup>17</sup>Canapuate na tia cacojiria quiyani, nojori cuaara tiuquiyaquiiiria na tiajiniaaco maja na tarishiniuria na casamiicua. <sup>18</sup>Canapuate cuhuariquiajinia quiyani, cuaara tacateyaquihuara na tiajiniohua na toqueyacua. <sup>19</sup>Jiyacaritij, jiyanojua taraatia quiniutianiyari maajipohuara, canapuate manajaatohua quiyani, mariyata canapuate supuejaca muerasu jiiitiaani. <sup>20</sup>Juhucarijia Pueyaso nia secojoriquia nia mashiyocuatunu panishacari quiyaquiniuria shuniyara, samaatenu juucanio. <sup>21</sup>Cuno quishacari, jiyanojua naquiya miiniuuri quiniutianiya seetanujuanaa. Jiya coteenujiniji, jiyano naquiya miiniuuri maja na niqushaanu quiquiaari tari. Naajuhuj, naa naquiya pueya miiniu nuhuajitij, majaari socua na caminiu quiniutianihua juhua nio naquiya miiniu. <sup>22</sup>Cuno naquiya miishacari jaara tajiyaquiri ritia, pueya maara cureyaquirij. Pueyaso cutaraari na tajitiniutianiya ritia, na saquiriojosano pueyacua na taraajesacari.

<sup>23</sup>Jiyacaritij, majaari nia tojiniu, tamonu jaara sequere nijaniya: “¡Cua tarajanunaa, Cristoqui tari tiuquiriohua! Niya quiyano”. Naajuhuj, majaari nia tojiniu tamonu jaara nia sequere: “Nooj, jati quiyatej”. <sup>24</sup>Queraatia sapojonuujuaacari supuenutaniya. Nojoriiri tama na cuaqueyajaaja jiyatenutaniya juhua Pueyaso jiyarosana. Tamasaacari sequenutaniyacujua: “Janiyari Pueyaso sequenu panishano caminiuujuniani”. Nojoriiri pueya sapojonutaniya jiyajeneta nojori miishanota. Naa nojori miishacaritij, mijiria quiniaa pueyari jiyaniutianiya nojoriqui seetanujuanaa Pueyaso jiyaramiquishano. Jaara na naata quiri, Pueyaso saquiriojosano pueya sapojonutaniyajariuhuj. <sup>25</sup>Pueyanaa, naa cua sequesacari nijaniyatej, janiyacujaari juhucarijia nia numootereeni. <sup>26</sup>Naaratej, majaari nia quianu cua pajenuucua, pueya jaara sequere

nijaniya: “Cristo jati cariiquia jiyajinia quiya”. Naajuhuj, majaari pueya nia tojiniu nojori jaara sequere nijaniya: “Miji, Cristo sohuacamara cajiya. Nia niquishijia”. Majaari nia shanacunu naa nia sapojosaanuratej. <sup>27</sup> Mijiria cua tiuquishacariuhua, majaari jiyasohua cua tiuquiniu quiniutianihua. Naatej, taa pueya niqiquiaa miacana nunujiano pananu muetasamajicuaani, pananu tiuquishocorano, pueyari naa cua niquiniutianiya cua tiuquishacariuhua. <sup>28</sup> Tee casaa mocua quiyani, mohuari tii rerequeejonutaniya.

Jesuuri naa niishitiojoriquiaa miriqui, mijiria quiniaa pueya jaara sesere puera, nojoriiri saniitiosaanutaniya.

*Taa na quiniutianiyan Cristo tiuquishacariuhua*

*(Mr 13.24-37; Lc 21.25-33; 17.26-30, 34-36)*

<sup>29</sup> Jesuuri naa canaa pohuataquiaari socuatej:

—Ritia naquiya miishaanu nuhuajijia, pananuuri ninishiquiria quiniutianiya. Racaari maja na cuhuatanu quiniutianiya. Riyari totenutaniya. Jiya cajiniocua cumaaca jitiiajacaari tetecatunutaniya. <sup>30</sup> Jiyacaritij, puereeta casaari jiya cajiniocua niquishaanutaniya, mijiria quiniaa niishiniuria janiyari quera roseyani. Puetunu nio jiyajinia pueyapuejanaari sapiyonuunutaniya, jyanohua nojori taraajenuta. Na nuhuaji, cua niqitiuniutianiyari cohuaja najacajinia roseyano, jyanohua cua cumaacata, jyanohua shacantuca. <sup>31</sup> Janiyari jiyocuacaanuji cua seyata tiuquiniutianihuani, cua jiyaramiquiniuria nojori puetunu cua saquiriojosano pueyacuajanaa. Nojori tojitiasacari trompeta jonenenu jyanohua, nojoriiri cua saquiriojosano pueya rerejotenutaniya cucua, puetunu nio jiyajinjijianaa.

<sup>32</sup> 'Nia pohuatareera higo naanajiniji, socua maninia nia niishiniuria taacari jiya puequenutaniyani. Higo naana cashacucua jaara macumaaca quiri, na jaamasucuaari mueratiyua. Naa nia niquishacaritij, niaari niishiya tacareejonuqui quera quiniutianiya. <sup>33</sup> Naajuhuj, niaa jaara puetunu cua sequesanojuanaa niquiri tari tohuateyano, niocua niishiri janiyari quera tiuquihuani. Tari jiya puequesacari quera. <sup>34</sup> Seetanujuanaa nia sequeyanijia, nio pa quishacari pueyani, majaari nojori shaajenu quiniutianiya juhuanojuaja, nojori cuara puetunujuanaa cua pohuatasano niquirijiaatijia. <sup>35</sup> Jiya, jiya cajiniocuanio, cunoori shaajenutaniya. Cua sequesano cutaraari tohuateenutaniyacujua. Cua rupaari pueyaracaanu seetanu rupaajanaa quiniutianiya.

<sup>36</sup> 'Maja cutaraari quenaaja tamonu pueyano niishiniu taacari jiya puequenutaniyani, mariyata taacari cua niniutianihuani. Jiyocuacaanu quiniaa Pueyaso seyari maja na niishiniujihuj. Majaari quenaaja cua niishiniujihuj. Saaja cua Queeri tamajaaja na niishiya cutara.

<sup>37</sup> 'Quera cua tiuquiniu panishacariuhua, mijiria pueyari juhuajaniya quiniutianiya taa Noé quishacari mijiria tariucuaaanu pueya quiquiaaricuaani. <sup>38</sup> Jiyacaritij, nio jiya pajaashitiaaquishacarijia, supuetanaari juhuajaniya miaquenuujua quiquiaari. Juhuajaniya queranacunuuriquiaajaariuhuj. Juhuajaniya necohua camiyoteriquiaajaariuhuj Noé jaara tiuquitiaquiaarijiaatijia na puereetuca buquejiniacuma. <sup>39</sup> Nojoriiri saaja juhuajaniya quiriquiaa pajaa jaara nojori pajaashitiaquiaarijiaatijia. Puetunu pueyajanaari canashiyaquiji netasaaquiaari. Mariyata naa quiniutianiyari cua tiuquishacariuhua. <sup>40</sup> Jiyacaritij, caapiqui pueya quishacari cuhuariquiajania, niquiriyatuuri rishaanutaniya, Pueyaso pueyano na quiniuucua. Tamonuuri jateenutaniya saniitiosocoriquiano saniniuujia. <sup>41</sup> Naajuhuj, caapiqui maajipohua riiquiniushacari tunanajiniacuma, niquiriyatuuri rishaanutaniya. Tamonuuri jateenutaniya. <sup>42</sup> Nocujia juhua sutejaca nia quiriquia. Majaari nia niishiniu taacari nia Jiyaniijia tiuquiniutianihuani. <sup>43</sup> Nio nia niishiri. Tia camaru jaara niishiriquia taacari nohuasejojua niniutianiya nocuani, nojuaja maara nocujia sutere maja nohuasejojua tiuquiniuria na casami nohuasenura. <sup>44</sup> Naaratej pueyanaa, niaa cumaati cua sashiya, janiya mariqui nia jiyajenetemohuarini.

*Jesu pohuatasano maninia serujiniji, sesoriquia serujinjinio*  
(Lc 12.41-48)

<sup>45</sup> Socua cua pohuatasano nia tojitiare pueyanaa. Jiyanoehua casamiriaca pueyanoori queraatia seyaraca quiquiaari. Cuno jiyaniijiaari tucuaaanu quianu paniquiaari tamonu jiyajinia. Naaratej, na nuhujiria, nojuajaari niquiriyatu na seyajinjinio jiyatequiaari juhua na tia camarura, narta seya na mianuutenura maninia, puetunu juucajanaa. Cuno seruuri niishijia quiquiaari, na camarnu tojjiajuhuaj. <sup>46</sup> Cuno seruuri shuquiriaatia quiniutianiya na camarnu jaara na riuratasuhua maninia poonijiyano taa na camarnu sequequiaari na nuhujiriacuajani. <sup>47</sup> Naaratej, seetanujuanaa nia sequeyanijia, na camarnuuri na jiyatenutaniya puetunu na jiiitasanojuanaa cojuanara. <sup>48</sup> Saniniuujia, cuno seru jaara sesa miijia quiri, nojuajaari tama sequenutaniyaacujua: “Cua jiyaniijiaari jiyanoehua tarishiniutianiya”. <sup>49</sup> Jaara naa niishiriojore, nojuajaari narta seya piquiniu coteenutaniya. Mashaasequenujuaca cojiniutaniyaajaariuhua queranacunuunura. <sup>50</sup> Naa juhuajaniya na quishacaritij, na jiyaniijiaari jiyacari na jiyajenetenutaniya. <sup>51</sup> Naa sesa na quiniuucatej, na jiyaniijiaari jiyanoehua na saniitionutaniya. Na nuhujia, na jatanutaniyari na cojiritiasocoriquiano saniitionu sapuenu juhua maninia niquishano miijiaa pueyata. Nojoriiri tii nujuquetunutaniya. Na quiaa miaquenuunutaniyari, naquiya na miiquiosacari.

## 25

*Jesu pohuatasano diez niyacoojorijiniji*

<sup>1</sup> Nia pohuatareera taa Pueyaso shuriucua tiuquitianu panijiaa quiniutianiya cua tiuquishacariuhuanu. Nojoriiri juhua diez niyacoojori quiniutianiya, canapete camiriquiano pueyano sashiriquiaacuajani. Cuno niyacoojoriiri quiojoquiaari camiriquiano pueyano sashiniuria, na tiuquishacari nojori tiuquitianura nata tiaco. Nojoriiri samaritiu patootaquiaari. <sup>2</sup> Cinco cuno niyacoojorijinijiiri mosanucua quiquiaari. Tamasacaari saniniuujia niishijiaa quiquiaari cutara. <sup>3</sup> Mosanucuaari saaja niquiriyatu samaritiu patootaquiaari. Majaari socua samaritiu nojori panu quiquiaari. <sup>4</sup> Niishijiaa cutaraari socua samaritiu pooquiaari, nojori samaritiu puequesacari na noshitishocoriquiano. <sup>5</sup> Camiriquiano pueyano tarishishacari, puetunu nojorijianaari maquenuujuquiaari. Nojoriiri socua maquetuquee. <sup>6</sup> Shiyaqueya, tamonu pueyanoori nacaquiaari: “¡Camiriquiano pueyano cumaji tari! ¡Nia naacusee!” <sup>7</sup> Puetunu cuno niyacoojorijianaari ritia saneeatuquiaari. Quera puetacoyano na samaritiu nishiriniuriiri. Nocuaji niishijiaa niyacoojoriiri socua na pootusano samari noshitirii. <sup>8</sup> Jiyacaritij, mosanucua niyacoojoriiri narta niyacoojori sequeree: “Canaara nia rashiquiojoreja nia samaritiujiniji. Canaa samaritiu tari pueetaareeni”. <sup>9</sup> Cuno cinco niishijiaa niyacoojoriiri nojori riucuaaree: “Maja. Maja maninia canaa niquisitionura nijaniya, puetunu pa samaritiujianaacua senota pueetama. Ritia nia quiaare juhuari na masejosaqui, socua nia masenura tiji”. <sup>10</sup> Cuno mosanucua niyacoojori quiojosacari samari masenuucua, camiriquiano pueyanoori nojori niyacari tiuquishii. Cuno samaritiuriaca niyacoojori cutaraari camiriquiano pueyanota tiuquitiaquiaari camishaqui tiaco queranacunura. Tia tiootiuri mishiquiosaaree. <sup>11</sup> Na nuhujia, mosanucua niyacoojoriiri tiuquiiioquiaariuhua. Tia tohateyaji jiiquioonuusuhuari. Sequetureeri: “¡Jiyaniijianaa, jiyaniijianaa, canacuaji quia riatareja tiootiu!” <sup>12</sup> Jiyaniijiaari saa sequereejaa: “Seetanujuanaa nia sequeyanijia, maja cua niishiniu nijaniya”.

<sup>13</sup> Naa na pohuatanu nuhujitij, Jesuuri canaa na saquiriojosano pueya sequeree:

—Pueyanaa, nia quiri juhua sutejaca, nia niishiyaquishacari taacari cua tiuquiniutianiuhuanu, casaa juucatej.

*Miriqui Jesu pohuatasano cumaneeca poonitijionaajiniji*  
(Lc 19.11-27)

<sup>14</sup> Na nuhujia, Jesuuri socua miriqui pohuataquiaari canaa na niishitiojonura taa Pueyaso muerasu miishaanutaniya jiya puequesacarini. Jesuuri naa canaa pohuataquiaaritij:

—Tamonu jiyaniijaari tucuacaanu quianu paniquiaari tamonu jiyajinia. Na nuhua-jiria, na seya niqutiojoquiaari na racatasano cumaneecaari, nojori cuaara poonitijioora cuno cumaneeca na canijasocoriquiano. <sup>15</sup> Naacuajitij, coteenu seru niqutiooree cinco mil cumaneecaari. Tamonuuri niqutiosaaree dos mil. Tamonuuri niqutiosaaree mil cumaneeca. Na jiyaniijaari naa nojori niqutiojoquiaari na niishishacari nojoriiri rimiajata niishijia quiquiaari, socua cuno cumaneeca nojori canijianura. Na nuhuaji, nojori jiyaniijaari quiaquiaari. <sup>16</sup> Cinco mil cumaneeca jiitianaari ritia coteequiaari casami masenura na niqutiojosocoriquiano socua cumaneecara, na reratenura na jiyaniijaara. Naacuajitij, cuno seruuri socua cinco mil cumaneeca reratequiaari coteenu na jiitiasanojiniji. <sup>17</sup> Naajuhuj, dos mil cumaneeca jiitianaari socua dos mil cumaneeca reratequiaari na jiitiasanojiniji. <sup>18</sup> Mil cumaneeca masenaari saniniuujia maja na poonitijionu quiquiaari na jiyaniija niqutiosano cumaneeca. Nojuajaari saaja jiyajinia jiuutiaquiaari na jamojuara na jiyaniija cumaneeca. <sup>19</sup> Seya jiyaniijaari camueenujuquiaari jyanohua. Socua tiuquiquiaariuhuari na cumaneeca na masejonuhuara na seyajiniji. <sup>20</sup> Coteenu nocua tiuquiquiaari cante cinco mil cumaneeca niqutiosaaquiaaricujani. Nojuajaari na jiyaniija sequeree: “Jiyaniijanaa, quiaari cua niqutiocanu cinco mil cumaneeca. Niya quiyari socua cinco mil cumaneeca quiaari, cua poonijosanojiniji cua reratesano”. <sup>21</sup> Na jiyaniijaari na sequeree: “Maniniacuja. Quiaacuajaari maninia cua seru. Majaqui najuhuaa cua tiuuniu quiqianu quiocua. Quiaacuajaqui maninia miiquianu secaja cua niqutiosanota quiajaniya. Janiyari quia jiyatenutaniya queraatia jiitianarani. Miji quia tiuquimia. Niya cuata quia quishii shuquiriaatia”. <sup>22</sup> Na nuhuaji, tamonu seruuri na jiyaniijaacua tiuquishiijuhuaj, nooj, cante dos mil cumaneeca niqutiosaaquiaaricujani. Na jiyaniija sequereeri: “Jiyaniijanaa, quiaari cua niqutiocanu dos mil cumaneeca. Niya quiyari socua dos mil cumaneeca quiaari, cua reratesano cua poonijosanojiniji”. <sup>23</sup> Na jiyaniijaari na sequeree: “Maniniacuja. Quiaacuajaari maninia cua seru. Majaqui najuhuaa cua tiuuniu quiqianu quiocua. Quiaacuajaqui maninia miiquianu secaja cua niqutiosanota quiajaniya. Janiyari quia jiyatenutaniya queraatia jiitianarani. Miji quia tiuquimia. Shuquiriaatia niya quia quishii cuata”. <sup>24</sup> Na nuhuaji, tamonu seruuri tiuquishiijuhuaj cante mil cumaneeca niqutiosaaquiaaricujani. Na jiyaniija sequereeri: “Jiyaniijanaa, janiyari niishiyani quiaacuajaari quiarta pueyacia taraajeyashijia. Quiaari tamasaca natoosanojiniji senoojua. Quiaari tamasaca poonijosanojiniji miajajuhuj. <sup>25</sup> Naaratej, janiyari quia cumaneeca pueretacanu nohuasenujuacani. Cunora janiyari quia cumaneeca jamocanu raamani. Quia niquiri. Niya quiyacuaja quia cumaneeca puetunujuanaa”. <sup>26</sup> Na jiyaniijaari na juaarii: “¡Quiaaqui sesoriquia pueyano! ¡Taajeca seque! ¿Quiaateeri niishiquianu janiyari tamasaca natoosanojiniji senoojuani, tamasaca poonijosanojiniji miajajuhuj? <sup>27</sup> Quiaa jaara cua jyaniquianu naa quiijatej, ¿casaara cua cumaneeca quia niqutioyaquiquianu cumaneeca cojuanaarini? Nojori jaara cua cumaneeca poonijotecanu, nojori maara socua na canijiacanu quiria”. <sup>28</sup> Jiyacaritij, jiyaniijaari tamasaca na seya sequeree: “Nio sesa cua serujiniji nia jaariutiare cua mil cumaneeca. Nia niqutioire cutara cua maninia seru, cante diez mil jiitiaa tariucujani. <sup>29</sup> Naacuajitij, cante casaa jiitiaacuaani, nojuajaari socua niqutiosaanutaniya, queraatia jiitaja na quiniuria. Saniniuujia, cante secaja jiitiaa najuhuanani, nojuajaari secaja na jiitiasano jaariutiasaanutaniya puetunujuanaa. <sup>30</sup> Nio najuhuaa quijia seru saniniuujia, nia jatare carijiniacuma ninishiqui. Tii sapuenutaniyari. Na quiaa miaquenutaniyari na noonuta, naquiya na miishacari”.

*Jiya puequesacari, puetunu pueyapuejanaari nequesoreesaanutaniya saniitiosocoriquiano*

<sup>31</sup> Puetunu cua seyajanaari jiyocuaanuui cua cojiniutianiya janiya jaara tiuquiriohuani Pueyaso shacantuuca cumaacata, Jiyaniijajanaa cua quiniuria mijiria. Janiyari shanohua puereeta jiyaniija cajitiujinia cajiniutianiyani, pueya cua nequesoreesacari. <sup>32</sup> Puetunu pueyapuejanaari cucua rerejotesaanutaniya puetunu nio jiyajinijiojuanaa. Janiyari maninia pueya saquiriojonutaniya sesoriquia pueya tajinijini, taa borrego cojuana na borregohua saquiriojoquiaa cabraacuaca tajinijicuaani. <sup>33</sup> Janiyari maninia

pueya nujuatejonutaniya cua miaquetajarani. Saniniuujia, janiyari sesoriquia pueya nujuatejonutaniya cua muenecarani. <sup>34</sup> Na nuhuaji, janiyari cua miaquetajara nujuatiuyano sequenutaniyani: “Miji, cua Que shuquiritiasano pueyanaa. Shusha jiya shipinishacari niaarano cua Que riuriotaca nia masere. <sup>35</sup> Cunoori niajaneyara, maninia miijaca nia quiniuucua. Cua miaajesacari, niaari cua miaqueteja. Cua jiyamuesacari, niaari cua raateja. Tucuacaanu cua rucuanajosacari, niaari nia tiaco cua tiuquinijia. <sup>36</sup> Toqueeju cua quishacari, niaari cua niqutioquiaari. Cusosu cua quishacari, niaari cua niqiniuucua quiaja. Nujuatejojuajinia cua quishacari taraatia, niaari cucua quiojojuua cua cumanijianuucua”. <sup>37</sup> Na nuhuaji, maninia pueyari cua nequesotanutaniya: “Jiyaniijanaa, ¿taacari canaa niqiuquiaari quiajaniya miaajeyanoni? ¿Canaateeri quia miaquetequiaarini? Majaruhua. ¿Taacari canaa niqiuquiaari quiajaniya jiyamueyanoni? ¿Canaateeri quia raatequiaarini? <sup>38</sup> ¿Taacari canaa niqiuquiaari quiajaniya canaa jiyajinia rucuaneyanoni? ¿Canaateeri canaa tiajinia quia tiuquiniquiaarini? Majaruhua naa canaa miiniu quiquiaari quiajaniya. ¿Naajuhuj, taacari canaa niqiuquiaari quiajaniya toqueejuni? ¿Canaateeri quia niqutioquiaari toqueni? Maja. <sup>39</sup> ¿Taacari canaa niqiuquiaari quiajaniya cusosuni, nujuatejojuajinianio? ¿Canaateeri quiocua quiojoquiaari canaa niqiniuria quiajaniani? Maja”.

<sup>40</sup> Janiyari cuno maninia pueya riucuanutaniyani: “Seetanujuanaa nia sequeyanijia. Naa jaara naa maninia miiquiaari tamonu cua muerasuniyojuajinijinio, niaari maninia cua miiquiaarijuhuaj”.

<sup>41</sup> Na nuhuaji, janiyari cua muenecara nujuatiuyano sequenutaniyani: “¿Cua shuriucuaaji niqiuji nia quiaare, sesoriquia pueyanaa! ¡Niaari cua Que sesacasano! Niaari mani quiquiojinia quejoosaanutaniya. Cuno mani quiquioori maquesaashijia. Shipinishaaquiaariiri samaruhua jiyaniijiaacuaji, na seya samaruhacuajinio. <sup>42</sup> Niaari naa miishaanutaniyaqui nia taraajeyaquiniuucua cucua. Cua miaajesacari, majaari nia miaquetenu quijia janiya. Cua jiyamuesacari, majaari quenaaja nia raatonu quijia janiya. <sup>43</sup> Cua rucuanajosacari nia jiyajinia, majaari nia tiajinia nia tiuquininiu quijia janiya. Toqueeju cua quishacarijuhuaj, majaari toque nia niqutioquinu quijia janiya. Nujuatejojuajinia cua quishacari, cusosu cua quishacarijuhuaj, majaari nia quianu quijia cua niqiniuucua quenaaja”.

<sup>44</sup> Jiyacaritij, cuno pueyari cua nequesotanutaniya: “Jiyaniijanaa, ¿taacari canaa niqiuquiaari quiajaniya miaajeyanoni, jiyamueyanujuhuaj? Majaari canaa niqiniu quijia quiajaniya canaa jiyajinia rucuaneyanoni tiaaju, toqueeju quiyano, cusosu quiyano, nujuatejojuajinia quiyanojuhuaj. Canaa jaara naa quiyano quia niqiuquiaarini, canaa maara quiocua taraajequiaarini”. <sup>45</sup> Janiyari nojori riucuanutaniyani: “Seetanujuanaa nia sequeyanijia, nia taraajeyaquiniuucua tamonu cua muerasuniyojuaacua, niaari seetanujuanaa cucua taraajeyaquiquiaari”. <sup>46</sup> Jiyacaritij, maninia miyashijia pueyari quejoosaanutaniya pueyaracaanu saniitiosocoriquiano. Saniniuujia maninia miijia pueyari Pueyaso shuriucua quianutaniya, pueyaracaanu shuquiriaatia nojori quiniuria.

## 26

### *Judiocuaca camarucua rojotoosacari Jesu nojori quianura*

(Mr 14.1-2; Lc 22.1-2; Jn 11.45-53)

<sup>1</sup> Jesu jaara puetunu nio pohuatasanojuanaa pohuatanu puecaquiaari, canaa na saquiriojosano pueya sequereeri:

<sup>2</sup> —Niaacuajaari niishiya, tama tariquiiri Pascua juucara queranacusacari. Janiyari jiyacari taucuaca niqutiosaanutaniyani, mosocoriquiano niyacutesanojinia teetesano.

<sup>3</sup> Jiyacarijuhuaj, canaa Judiocuaca camarucuaari rerejoquiaari Caifás tiajinia. Caifásri pueyacuara secojonaa jiyaniijajanaa quiquiaari. Cuno pueya rerejoquiaarini, nojoriiri quiquiaari pueyacuara secojonaa camarucua, canaa Judiocuaca camarucuanio.

<sup>4</sup> Nojoriiri cuno tiajinia pocoojoquiaari taa nojori sapojonutaniya Jesu na quiatusocoriquianoni, nojori mosocoriquiano. <sup>5</sup> Nojoriiri tama sequetooquiaarijaaja: “Maja pa monu Pascuara queranacusacari, paa mariqui pueya juatiriiri”.

*Tamonu maaji totasacari na shanohua jaanutaja Jesuucua*  
(Mr 14.3-9; Jn 12.1-8)

<sup>6</sup> Tamonu juuca, Jesuta canaa quishacari Betania tiacajinia, canaari Simón tiajinia mi-aquenuuriquiaani. Cuno Simónri tarijia lepra cusonujiniji Jesu naatanishano quiquiaari. <sup>7</sup> Miaquejajinia Jesu cajishacari, tamonu maajiiri nocua catecanoquiaari. Shiitaniyojua shucuariquiaja pataconiyojua cacatariquiaari, cohuaja saajajiniji quejasano. Tii quiriquiaari shanohua jaanutaja. Cuno jaanutajaari jiyanoehua queraatia cumaneecata masesano quiquiaari. Cuno maajiiri Jesu nacaacua na totaree puetunujuanaa. <sup>8</sup> Canaa jaara niqiquiaari naa cuno maaji miishanotej, canaari juaaquioreeni. Noojiaqueya canaajiniiniori naa sequeturee:

—¿Casaara cuno maaji niitiaree najuhua shanohua jaanutajani? <sup>9</sup> ¿Cuno jaanutaja maara queraatia cumaneecara niqitiosaare, casamijiuniucua niqitiosocoriquiano!

<sup>10</sup> Jesu tojishacari taa canaa sequeriquiaa cuno maajini, canaa sequereeri:

—¿Casaara nio maaji nia taroojiyani? ¿Na miishano janiyani, cunoori jiyanoehua maninia quiria! <sup>11</sup> Casamijiuniucuaari niaata quiriqiano pueyaracaanu cutara. Janiya saniniuujia, majaari cua quiniu quiniutianiya pueyaracaanu niaata. <sup>12</sup> Nio maaji totasacari cucua na shanohua jaanutajani, juhuacarijia cua cuaqueya jeecaari, raaco cua niasaanura janiya jaara mosaareni. <sup>13</sup> Seetanujuanaa nia sequeyanijia, pueyaracaanu pueya pohuatasacari Pueyaso rupaa janiyajiniji, nio maaji miishanoori pohuataaanutaniyajuhua puetunu jiyacajiniajanaa. Naa na miishano janiyani, majaari na niyaje-tasaanu quiniutianiya pueyaracaanu.

*Judas tacartasacari Jesu, na quiatenura*  
(Mr 14.10-11; Lc 22.3-6)

<sup>14</sup> Jiyacaritij, Judasri pueyacuara secojonaa jiyaniijianucuaacua quiaquiaari. Nojua-jaari niquiriyatu canaajinijinio Jesu doce saquiriojosano pueyano quiquiaari. Na sesaari quiquiaari Judas Iscariote. <sup>15</sup> Secojonaa jiyaniijianucua sequeeseeri:

—¿Taa cumaneeca nia niqitionutaniya janiyani, janiya jaara nia quiatere Jesuni?

Nojoriiri ritia treinta cumaneeca niqitioquiaari Judas. <sup>16</sup> Na nuhuaji, Judasri pueyaracaanu niishiriojoriquiaa maatucua taacari quiatere Jesuni.

*Jesu miaquesacari na nuhuajiria na pueyata*  
(Mr 14.12-25; Lc 22.7-23; Jn 13.21-30; 1 Co 11.23-26)

<sup>17</sup> Puetunu marijiajanaa, canaa Judiocuacani, canaari poreetesoo pan miaquenuquiaari puetunu siete juucajanaani. Coteenu juucaari sesojosaaquiaari Pascua juuca. Naaratej, Pascua juuca, canaa, Jesu saquiriojosano pueyani, canaari nocua catecanoquiaarini naa canaa nequesotanura nojuaja:

—Jiyaniijianaa, ¿tee quia paniya canaa majeetenura quiocuaji borregoni, pa miaquesocoriquiano quiarjia Pascuarani?

<sup>18</sup> Jesuuri canaa riucuaaree:

—Paacuajaari miaquenutaniyani tari cua sequesano pueyano tiajinia Jerusalén tiacajinia. Tii nia quiaare. Tia camaru nia sequeese: “Canaa niishitiojonaari naa quia sequeya: ‘Quera cua cusosacari. Janiyari cua nuhuajiria cua pueyata miaquenutaniya Pascua borrego quia tiajiniani’ ”.

<sup>19</sup> Canaari naa miiquiaarini taa Jesu sequequiaari canaacujani. Canaari tii majeetequiaari borregoni, Pascua juuca miaquesocoriquiano.

<sup>20</sup> Jaara niniquiaari, Jesuuri canaa na doce pueyata miaquejajinia cajituriquiaa.

<sup>21</sup> Canaa miaquenuusacari, Jesuuri canaa sequereeri:

—Seetanujuanaa nia sequeyanijia, tamonu niajanijiniiniori cua tacartanutaniya, cua paraa na quiatenura janiya, nojori monura janiya.

<sup>22</sup> Canaari jiyanoehua taraajequeeni naa Jesu sequesacari. Puetunu canaajanaari Jesu nequesotareeni:

—¿Janiya jiyoteeri Jiyaniijianaa?

<sup>23</sup> Jesuuri canaa riucuaaree:

—Cante cuata tureneetaa pa miacojuajinijini, nojuacuajaari cua quiatenutaniya moso-coriquireano. <sup>24</sup> Janiyacuajaari mosaanutaniyani taa janiyajiniji naajiotasaaquiaaricuajani tariucuacaanu Pueyaso Rupaaajinia. Saniniuujia, jiyanoehua taraatia miishaanutaniyari cua quiateriquiano pueyano. Maara socua maninia quiquiaari cuno pueyanora jaara raaquishaaquiaari.

<sup>25</sup> Na quiateriquiano Judasri socua Jesu nequesotareejuhuj:

—¿Janiya jiyoteeri Niishitiojonanaa?

Judas riucuaereeri:

—Taaquiririnij. Quiajaniyacuaaquiniatejaj.

<sup>26</sup> Canaa miaquesacari, Jesuuri pan ririi. Na Que Pueyaso secojoree nocuaraari.

Na nuhuaji, na neecasereeri puetunu canaarajanaa, canaa miaquesocoriquireano. Canaa sequereeri:

—Jajaa, nia masere. Nia miaquere. Nio panri cua cuaqueya.

<sup>27</sup> Na nuhuaji, Jesuuri raatonuque pataree. Pueyaso na secojonu nuhuaji nocuara, Jesuuri canaa na niqutioree. Canaa sequereeri:

—Niojiniji nia rature puetunu nijaniyajanaa. <sup>28</sup> Nioori cua nanaca, Pueyaso jiyanooniuria nijaniya. Cua nanacaari queraatia pueyacuara shoonutaniya, nojori jiyanooshaanura sesa nojori miishanojiniji. <sup>29</sup> Seetanujuanaa, majaari socua cua ratunu quiniutianiya niaata mijiria nio uva caacajiniji. Janiyari niaata na ratunutaniya cutarani janiya jaara tacatemohuani, pueyaracaanu Jiyaniijiajanaa cua quiniuria. Jiyacaritij, jiyanoehua maninia quiniutianiyari cuno quishacari. Paari mariyata jiyanoehua shuquiriatia quiniutianiya pueyaracaanuni.

*Jesu sequesacari Pedro, nojuaja nocuaji seetanutaniya*

*(Mr 14.26-31; Lc 22.31-34; Jn 13.36-38)*

<sup>30</sup> Canaa jaara jaaquequejoquiaari supuetana David naajioneejinijini, na nuhuaji canaari quiojoquiaarini Olivo cuhuariquia tuhuananuucua. <sup>31</sup> Jesuuri jiyacari canaa sequereeri:

—Puetunu nijaniyajanaari cucua tiuuniu tarinitianutaniya quiari niucujaja. Naa naajiotasano quiyacuajaari Pueyaso sequesano tarijia: “Janiyari borrego cojuana monutaniyani. Na borregohuari niaquejonutaniya tamajaaja”. <sup>32</sup> Naajaa, janiya jaara samiitiarohua macujinijini, janiyari nia puetanutaniya Galilea jiyajiniani.

<sup>33</sup> Pedroori Jesu sequereeri:

—Puetunu quia pueyajanaa jaara quiocua tiuuniu tarinitiare, janiya cutaraari maja cua catenu quiniutianiya quiocuaji.

<sup>34</sup> Jesuuri Pedro sequereeri saaja:

—Seetanujuanaa nio niucujajani, caacaraja niunijiyaquishacarijia, quiaari naa pacutejonutaniya seetanu cucuaji: “Maja cua niishiniu cuno pueyano”.

<sup>35</sup> Pedroori Jesu sequereeri:

—¡Pueya cuara moora janiyaqui, naajaa, majaari cua seetanu quiniutianiya quiocuaji! Puetunu canaa Jesu pueyajanaari mariyata naa sequequiaaritij, taa Pedro sequeriquiaacuaani.

*Jesu secojosacari Getsemani cuhuariquiajania*

*(Mr 14.32-42; Lc 22.39-46)*

<sup>36</sup> Na nuhuaji, Jesuuri tamonu cuhuariquiajania tiuquiiioquiaari canaa na saquiriojosano pueyata. Cuno cuhuariquia sesaari quiquiaari Getsemani. Jesuuri canaa sequereeri:

—Niyaja nia cajitiuri cua secojosacari cua Que jati socua nia tacoji.

<sup>37</sup> Jesuuri Pedro jiyataquiaari, caapiqui Zebedeo niqiohuanio. Jesuuri juhuacatecara taraajequiaari. Jiyanoehua tacaariquiaajaariuhuj. <sup>38</sup> Jiyacaritij, Jesuuri nojori sequereeri:

—¡Coojia quera jiaqueya jiyanoehua cua taraajenuta! ¡Quera cusoyanjia! Niyaja cua sashitiuri. Nia sutere nia tarajanura janiya quenaaja.

<sup>39</sup> Jesuuri nojori shuriucujaji canujiyaree tamajaaja socua nojori tacoji. Jiyocuara jacamaseeri Pueyaso na secojonura. Naa sequereeri:

—¡Cua Quenaa, jaara na naata quiri, maja quenaaja cua cartenu naquiya cua miishaanura! Naajaa, janiya cuaara miishaariaqui taa quia paniyacuajani, maja juhua cua panishano.

<sup>40</sup> Na nuhuaji, Jesuuri na pueya niquishuhua. Nojoriiri saaja maqueturiquiaa. Pedro sequereeri:

—Pedronaa, ¿majate nia naata cuata sutenu quenaaja rupaquijia? <sup>41</sup> Nia sutere Pueyaso nia secojonura, niaa mariqui sesa miiriiri niaa jaara saniniujiushaare. Seetanujuanaa, poojiaari maninia miiniu panijia. Pa cuaqueyari saniniuuja sasaca quiyacujua. Naacuajitij, majaari pa naata maninia miiniu Pueyaso cumaquiyaquishacari pajaniya.

<sup>42</sup> Jesuuri socua tacatequiaariuhua tamajaaja Pueyaso secojonuhua. Naa sequereeri:

—Cua Quenaa, janiya jaara naquiya miishaareni, janiya cuaara miishaariaqui taa quia paniyacuajani.

<sup>43</sup> Jesuuri na pueyacia tacateyarohuacuhua. Maquetiuyano nojori riuriatasuhuariuhua. Nojori namijiaari saaja seecutayariquiaa jiyanohua nojori maquenu paniniutia.

<sup>44</sup> Jesuuri nojori tarinitiaquiaari socua. Quiaquiaariuhuari na Que secojonuhua. Secojonu pacutequiaariiri taa na secojoriquiaa coteenucuajani. <sup>45</sup> Na nuhuaji, na pueyacia nimiohuariuhua. Nojori sequesuhuari:

—Quiarjia cutara nia maquetiuyare. Nia paniyatere cutara maquetunu. ¡Juaj! ¡Nia tojiri! ¡Janiyari tari quiatesaanutaniya sesa miijiaca pueyani! Nojoriiri cua miiniutianiya taa na panitiuyacuajani. <sup>46</sup> ¡Nia saneeculture! Pa quiaare. Cumaji tari cua quiateriquiano.

*Moronucua na paraa jaatucutasacari Jesu*

(Mr 14.43-50; Lc 22.47-53; Jn 18.2-11)

<sup>47</sup> Jesu pocusacarijia, Judasri jiyacari tiuquishii. Nio Judascuajaari niquiriyatu canaajiniinio Jesu doce saquiriojosano pueyajiniji quiquiaari. ¡Queraatia pueyari Judasta nijioquiaari! Nojoriiri secojonaa jiyaniijianucua jiyaramiquishano pueya quiquiaari, canaa Judiocuaca camarucua jiyaramiquishano pueyajuhua. Nojoriiri nijiniaquetucujaja mueruu pooriquiaa, macacanio. <sup>48</sup> Judasri tari niishitioquiaari Jesu quiaturiquiano pueya taa nojori niishiniutianiyani teyanote Jesuni. Nojuajaquiiri tari nojori sequiquiaari: “Teyano pueyano cua nujiya pa tiuquishacarini, cunocuajaari nojuaja. Niocua na quiasee ritia”. <sup>49</sup> Naacuajitij, Judas tiuquishacari Jesuucua, na sequeeseeri:

—Quiocua tiuquiyanjia Niishitiojonanaa.

Jiyacarijia na nujuureeri. <sup>50</sup> Jesuuri na sequeree:

—Cua rupuenanaa, ¿casaacua quia niyareerini?

Jiyacaritij, Judasta nijionaa pueyari Jesu quiatusee. <sup>51</sup> Jiyacaritij, tamonu canaajiniinio pueyanoori ritia shitiaree na nijiniaquetucujaja mueruu na shuucuaji. Nata jaateree secojonaa jiyaniijia seru numocoori. <sup>52</sup> Jesuuri na sequeree:

—¡Na co jiniacuma quia shiriohua quia mueruu! ¿Majate quia niishiniu, cante mueruuta miaqueja pueyanoni, mueruuta mosaanutaniyaariuhua? <sup>53</sup> ¿Quiaate niishiyaquiyajuhua, janiya jaara cua Que sequereni cucua na jiyaramiquiniuria na seya jiyocuaaanuji na cojuanura janiya, cua Que maara ritia cucua jiyaramiquiri cincuenta mil na seyajiniinio? <sup>54</sup> Naajuhua, janiya jaara naa cua Que sequere na cojuatenura janiyani, ¿tariucuaaanu Pueyaso Rupaajinia janiyajiniji naajiotasanotucua taa tohuateereni?

<sup>55</sup> Jiyacaritij, Jesuuri na paraa sequeree:

—¿Taateni? ¿Janiyateeri nohuasejojuani, naa nia tiuquitianura cua quianura mueruuta, macacatania? Niaacuajaari juucua cua niquijia puetunu juucajanaa Pueyaso Secojojua tiajinia cajiyano, pueya cua niishitiojosacari. ¿Casaara tii nia quiaaquiuanu janiyani? <sup>56</sup> Naajaa, naacuajitij puetunu nia miishanojuanaari tohuateenutaniya, taa tariucuaaanu Pueyaso Rupaajinia naajiotasaaquiaari janiyajinijicuajani.

Jiyacaritij, canaa, na saquiriojosano pueyani, canaari Jesu tiujiaquiaari niquiriyatuni. Puetunu canaajanaari mashiyocultureni.



*Judiocuaca camarucua nequesoreesacari Jesu*

(Mr 14.53-65; Lc 22.54-55, 63-71; Jn 18.12-14, 19-24)

<sup>57</sup> Jesu quianaari na jaatucuquiaari jiyaniijia Caifásqua. Caifásri pueyacuara secojonaa jiyaniijia quiquiaari. Judiocuaca camarucuaari tari Jesuucuaaji rerejoquiaari Caifás tiajinia. Nojoriiri quiquiaari Moisés Rootasanojiniji niishitiojonaa, canaa Judiocuaca camarucuanio. <sup>58</sup> Pedroori Jesu nuhuajiquiaari tucuacaanuji secojonaa jiyaniijia tiajinia. Cuno puereetuuca tia shocuaari mataca quiquiaari. Pedroori tii carijiniacuma tiuquiquiaarijuhuaj. Jiyaniijia Caifás seya tajinia cajishiiri, na niqiniuria taa nojori miiniutianiya Jesuni.

<sup>59</sup> Pueyacuara secojonaa jiyaniijianucuaari puetunu canaa Judiocuaca camarucuatajanaa pajeriquiaa pueya, nojori saquirojotanura na sapojonuta Jesuucuaara, na mosaanura. <sup>60</sup> Queraatia pueyari najuhuana Jesuucuaara saquirojotaree juucua. Nojori sequesanoori rimiajata quiquiaari tamasaca sequesanojiniji. Na nuhuaji, socua caapiqui pueyari mariyata sesa saquirojotaree Jesuucuaara. <sup>61</sup> Nojoriiri naa sequereee:

—Cuno pueyano naa sequecanutej: “Janiya jaara Pueyaso Secojoua tia niyartareni, janiyari na tianu tucuatantaniuhua jiuujianaraca juucajiniani”.

<sup>62</sup> Jesuuri sanaa nujuariquiaa saaja. Nocuaaji, secojonaa jiyaniijiaari nujuaree. Jesu sequereeri:

—¿Majate quenaaja quia riucuanuujua? ¿Quiaate pueya tojirii quiocuara saquirojotaano? ¿Seetanutejanaa nojori sequesano?

<sup>63</sup> Jesuuri saaja sanaa na tojiriquiaa. Nocuaaji secojonaa jiyaniijiaari Jesu sequereee:

—¿Cua tojiri! Paa niya quia Pueyaso niquiarani. ¿Cua riucuaare! ¿Majaari sapojonu! ¿Quiaate Cristo, Pueyaso Niyanu?

<sup>64</sup> Jesuuri na riucuaaree:

—Jaa. Nojuacuajanijia taa quia sequereecuajani. Cua tojitiare. Na nuhuaji, niaari cua niqiniutianiya Pueyaso miaquetajara cajiyanu. Niaari cua niqiniutianiyajuhuaj jiyocuacaanuji tacateyanohua cohuajajinia.

<sup>65</sup> Pueyacuara secojonaa jiyaniijia jaara tojiquiaari naa Jesu sequesanotej, tama na toque sutareejaarijia na juaaniutia. Nata quiniaa sequereeri:

—¿Juhuej! ¿Nia tojishuriucuara na sequesano! ¿Nojuajaari tama na cuaqueyajaaja jiyateya juhua Pueyaso na quiniuria! ¿Jiyanohua sacuaraatiaari na sequesano Pueyaso niquiara! ¿Paatucua casaara sashiri socua tamonu saquirojotanura nocuaraarini? Niaacuaja shusha tojitiaree tama na sequesanojuaja sacuaraatia Pueyaso niquiara.

<sup>66</sup> ¿Taa pa miiniutianianoj? ¿Taa nia sequeyani?

Nojoriiri pueyacuara secojonaa jiyaniijia riucuaaree:

—¿Cuaara mosaaria!

<sup>67</sup> Jiyacaritij, tamasaari Jesu jiquioco riocojoree. Na jiquioco na masetejotureejaariuhuj. Tamasaca saniniuujia, Jesu namijia na morotunu nuhuaji, na mcoritia na piqitiuriiri. <sup>68</sup> Na nuhuaji Jesu nequesotatureeri:

—Quiaa jaara Cristo quiri, Pueyaso jiyarosano, quia niishiritioj, ¿cante quia piriini?

*Pedro seetasacari Jesuucuaaji*

(Mr 14.66-72; Lc 22.56-62; Jn 18.15-18, 25-27)

<sup>69</sup> Pedroori jiyacari tii cajiriquiaajaa carijiniacuma. Jiyacaritij, secojonaa jiyaniijia seruuri Pedro niqishii. Nojuajaari niyacoo quiquiaari. Pedro sequereeri:

—¿Jaj, quiaacuaja cuno Jesuta rucanejojua, cuno Galilea jiyajinijinio pueyanotani!

<sup>70</sup> Pedroori jiyacari seetaree puetunu pueya niquiarajanaa. Naa sapojoreeri:

—¿Maja cua niishiniu casa quia sequeyani!

<sup>71</sup> Pedroori tohuateyajiria canujyaree. Jati, tamonu niyacoori na niquiriijiuhuaj. Cuno seruuri jiyacari tii quiniaa sequereee:

—¿Nio pueyanoori cuno Jesuta quijiajuhuaj, cuno Jesu, Nazaret tiacajinijinio pueyanoni!

<sup>72</sup> Pedroori Jesujiniji socua seetanu camiriohuacuahuaj:

—¡Maja cua niishiniu cuno pueyano! ¡Pueyasocuaajaari niishiya, seetanujuanaa nia sequeyanijia!

<sup>73</sup> Pasaja na tarishiniu nuhuaji, quiniqui quiniaari Pedro sequetusee:

—¡Quiaaqui seetanujuanaa cuno Jesu pueyajinijinio! ¡Quiaari juhua nojori pocuaa-juhuaj!

<sup>74</sup> Jiyacaritij, Pedroori socua jiyacaterree sapojonura. Naa cuno pueya sequereeri:

—¡Pueyasocuaajaari niishiya maja cua niishiniu cuno pueyano, niaa na sequeyani! ¡Pueyasocuaajaari cua sequesano tojiya! ¡Majaari cua sapojonu nijaniya!

Caacarajaari canashyaquiji niunijioquee. <sup>75</sup> Jiyacaritij, Pedroori naa cuno niucuaa Jesu sequesano niishiquii: “Pedronaa, caacaraja niunijiyaquishacarijia, quiaari tari janiyajiniji seetanu pacutejonutaniya”. Pedroori tia shocua matacainiji tohuataquiaari ritia. ¡Jiyanohua nujuquequeeri na taraajenuta!

## 27

### *Judiocuaca camarucua niqutiosacari Jesu jiyaniijia Pilato*

(Mr 15.1; Lc 23.1-2; Jn 18.28-32)

<sup>1</sup> Tariquicuaji, puetunu pueyacuara secojonaa jiyaniijianucuaajanaari rerejoree narta Judiocuaca camarucua. Nojoriiri roojotooree taa na miitiuniutianiya Jesu na motenurani. <sup>2</sup> Na nuhuaji, Jesu morotureeri na jaatucutunura jiyaniijia Pilatoocua. Pilatoori jiyaniijia Césarjanaa jiyatesano quiquiaari Judiocuaca jiyaniijia na quiniuria Judea jiyajinia.

### *Judas Iscariote cusosacari*

<sup>3</sup> Judasri jiyanohua macuhajequiaari na niquishacari Jesuuri mosaanutaniya na quiatenuucua nojuaja. Na tacaaniutia, Judasri quiaquiaari secojonaa jiyaniijianucuaacua, canaa Judiocuaca camarucuaacuanio, nojori na niqutionuhua cuno treinta cumaneeca. <sup>4</sup> Judasri nojori sequesee:

—¡Janiyaqui sesa miiriucuaani, najuhuana cua quiatenuucua maninia pueyano nijaniya!

Nojoriiri saa na riucuaareejaa:

—Naajaa. Maja canaa miishano. Cunocuaajaari tama quia miishanojuaja.

<sup>5</sup> Judasri nojori cari cuno treinta cumaneeca jatatee Pueyaso Secojojua tiajinia. Tiji quiacuahuari. Na riquiajiniji morotaquiaari sohuaneyocuaari. Naa cusoquiaariiri. Sohuaneyocuaacuaji jaasutaari. <sup>6</sup> Secojonaa jiyaniijianucuaari Judas jatasano cumaneeca reratequiaari. Nojoriiri tama sequetooquiaarijiaaja:

—Nio cumaneecaari maja na naata Pueyasora racatajajinia niasocoriquiano. Nio cumaneecaari pueyano monu sami.

<sup>7</sup> Puetunu nojorijianaa jaara niishiriojoquiaari taa na miitiuniutianiya cuno cumaneecani, nojoriiri marau paniyoru pueyano cuhuariquia masequiaari cuno cumaneecata. Cuno cuhuariquiaari jiyatesaaquiaari ruconaa jamojuara, nojori jaara cusoyare Jerusalén tiacajinia nojori quishacari. <sup>8</sup> Pueyano monu samitia cuno cuhuariquia masesaanucua, cuno cuhuariquiaari sesojosaaquiaari “Nanaca samitia masesano cuhuariquia”. Naa quiyajaari na sesa. <sup>9-10</sup> Naacuajitij, Pueyaso sequenu panishano caminiujiunia supuetana Jeremías sequesanoori maninia tohuatequiaari. Nojuajaari na sequequiaaritij:

“Nojoriiri na treinta cumaneeca pataquiaari cuhuariquia masenura marau paniyoru pueyanojiniji, taa cua jiyaniijia Pueyaso sequequiaari janiyacujani. Tarijia, cuno treinta cumaneecata, maninia pueyanoori nata masesaaquiaari. Israel pueyari naa sequequiaaritij: ‘Cuaara treinta cumaneecata masesaaria cuno pueyano’”.

### *Pilato nequesoreesacari Jesu*

(Mr 15.2-5; Lc 23.3-5; Jn 18.33-38)

<sup>11</sup> Jesuuri jaatucusaaquiaari jiyaniijia Pilatoocua. Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucuaaree:

—Jaa. Naacuaaquiniatejaj, taa quia sequereecuajani.

<sup>12</sup> Secojonaa jiyaniijianucua, canaa Judiocuaca camarucuanio, nojori jaara Jesuucuaa saquiriojotariquiaa, Jesuuri sanaa tojiriquiaa nojori. <sup>13</sup> Naaratej, jiyaniijia Pilatoori Jesu sequere:

—¿Majate quia tojiniu nojori, quiocuara tonujiyano queraatia?

<sup>14</sup> Majaari Jesu riucuanu quirii quenaaja. Pilatoori nocuaji jiuujiateree, casaara na riucuaaquiya quenaajani.

*Pilato sequesacari Jesuuri mosaanutaniya*

*(Mr 15.6-20; Lc 23.13-25; Jn 18.38-19.16)*

<sup>15</sup> Puetunu Pascua juucarajanaa, Pilatoori nujuatejojuajinia nujuatesano pueyano cartenu jiitiquiaari. Judiocuaca panishano pueyanoori cartesaaquiaari pueyaracaanu.

<sup>16</sup> Cuno quishacari, tamonu pueyanoori nujuatejojuajinia nujuatesano quiriquiaa, Barrabás jyanishano. Puetunu pueyajanaari na niishijia sesa na miiniuucua. <sup>17</sup> Pueya rerejosacari Jesu na nacojotasacari Pilato niquiara, Pilatoori nojori nequesotaquiaari:

—Judiocuacanaa, ¿teyano pueyano nia paniya cua cartenurani, Barrabáste, Jesu soj? Nojuajaari pueya sequesano, Pueyaso jiyarosanona.

<sup>18</sup> Pilatoori naa nojori nequesotaree na niishishacari casaara canaa Judiocuaca camarucua monu paniriquiaa Jesuni. Puetunu pueyajanaari tari canaa camarucua tojitiaaquiriquiaa, nojori tojtianura Jesu. Cunora, camarucuaari Jesu monu paniriquiaa.

<sup>19</sup> Pilato cajishacari na nequesoreesaqui, necocuaari nocua jiyaroquiaari tamonu na seru, naa na numootenuratej: “¿Narejatejataj, nareja! ¿Janiyari niucua maquiyojoree puereeta cuno pueyanooajini!”

<sup>20</sup> Jiyacaritij, secojonaa jiyaniijianucuaari, canaa Judiocuaca camarucua pueya ni- ishiojoriquiaa nojori sequenura, Barrabás cuaara cartesaaria, Jesu cuaara mosaaria saniniuujia. <sup>21</sup> Naacujitij, jiyaniijia Pilato jaara pueya nequesotaquiaariuhua teyano nojori paniya na cartenurani, nojoriiri na riucuaaree:

—¿Barrabás quia cartere!

<sup>22</sup> Pilatoori nojori nequesotaree:

—¿Naatee? ¿Taa cua miiniutianiya Jesuurinitioj, pueya sequesano “Pueyaso jiyarosanoni?”

Puetunu pueyajanaari ritia na riucuaaree:

—¿Cuaara teetesaria niyacutesanojinia!

<sup>23</sup> Pilatoori nojori nequesotarohuacuahuaj:

—¿Casaarateni? ¿Sesa miiritijiaara?

Pueyari saaja socua jyanohua nacaree:

—¿Cuaara mosaaria niyacutesanojinia teetesano!

<sup>24</sup> Pilato cartenu saniniuujishacari Jesu juucua, pueyari saaja socua jyanohua na-cooriquiaa. ¿Socua jyanohua juaaquioriquiaari! Pilato niishishacari maja na naata quiniutianiya Jesu cartenu, taa na paniriquiaa juucuacuajani, nojuajaari mohuaca maseree. Pueya niquiara shuquitiareeri. Na shuquitiasacari, Judiocuaca sequereeri:

—¿Majaari cucua na tiutiasaanu quiniutianiya nia mosacari nio maninia pueyano! Cunoori maja cua miishano quiniutianiya. ¿Cunoori tama nia miishanojuaja!

<sup>25</sup> Puetunu pueyajanaari na riucuaaree:

—Naajaa. ¿Jaara mosaare, cuaara tiutiasaaria canaacua, canaa niquiohuacuano!

<sup>26</sup> Na nuhuaji, Pilatoori Barrabás tohuateree nujuatejojuajiniji. Saniniuujia Jesu majacutereeri. Na nuhuaji, na soldadohua na niquitioreeri niyacutesanojinia nojori teetesocoriquiano.

<sup>27</sup> Jiyaniijia Pilato soldadohuari jiyacari Jesu jaatucuree Pilato tijajiniaaco. Nojoriiri puetunu narta soldadohuajanaa rerejoteree Jesu shocuaqueya. <sup>28</sup> Na nuhuaji, nojoriiri Jesu toque jocuaturee. Tamonu tucuaque toque cushitishaareeri, shaaruque, juhua jiyaniijajanaa cushishano. Naa na miitiuriiri na macaatiuriaria. <sup>29</sup> Nojoriiri juhuacantucua maaturee na nacaquerajuhuj. Na nuhuaji, na cushitituriiri Jesuuri.

Naajua niqutiosaareejaariuhuj, juhua na macara, na miaquetajata na muetunura juhua jiyaniijia. Na nuhuaji, soldadohuari Jesuucuaa mojuquetacoquiaari. Nojoriiri naa na macaatirii:

—¡Jejee, Judiocuaca jiyaniijianaa!

<sup>30</sup> Nojoriiri Jesu riocojoree. Na naajua na jaariutiatureeri. Nataja na naca piq-uitiuriiri. <sup>31</sup> Naa nojori macaatinuu nuhuaji Jesutej, nojoriiri cuno tucuaque toque jocuaquiaariuhua nocuaji. Tama na toquejaaja cushitishaarohuari. Na nuhuaji, nojoriiri na jiyataquiaari na teetenura niyacutesanojinia.

*Jesu teetesacari niyacutesanojinia*

(Mr 15.21-32; Lc 23.26-43; Jn 19.17-27)

<sup>32</sup> Nojori tohuareetasacari tiacajiniji puecoosaquiria nojori quiojosacari, nojoriiri tamonu pueyano naacumaa. Nojuajaari Cirene jiyajinijinio pueyano quiquiaari. Simónri na sesa quijia. Soldadohuari cuno Simón pateree Jesu teetejara niyacutesano. <sup>33</sup> Nojoriiri tiuquiiijiosee sesa miijica puecoosaqui. Pueya puecoosaquini, na sesa quiquiaari “Gólgota”. Nioori pueyano rupaajinia sequeya “Pueyano nacaco”. <sup>34</sup> Quiniqui, soldadohuari Jesu raateree vino juucua, casaa piyajata cojitishano. Jesu jaara na saniquiaari, majaari na ratunu quirii.

<sup>35</sup> Jesu jaara niyacutesanojinia teetesaaquiaari tari, soldadohuari saitia tacuarishijioree nojori niishiniuria cante Jesu toque poonutaniya nerani. Naacuajitij, tama nojorijiaarijia Jesu toque seraatiaquiaari. Naa tohuateequiaariiri tariucuaaanu Pueyaso sequesano caminiujiunia sequesano, nojuaja jaara naa naajiotaquiaari: “Pueyari saitia tacuarishijioree cua toque nojori seraatianura”.

<sup>36</sup> Na nuhuaji, cuno soldadohuari cajitiquiaari Jesu na cojuanura.

<sup>37</sup> Jesu nacaacuma, naajioneeri rupotasaquiaari. Tii naajiosano quiriquiaari casaara na teetsaareeni. Naa naajiosano quiriquiaari: “Nioori Jesu, Judiocuaca Jiyaniijia”.

<sup>38</sup> Caapiqui nohuasenuujuacaari Jesu shuriucua teetesaaquiaarijuhuaj, socua tamonu caapiqui niyacutesanojinia; tamonu na miaquetajara, tamonu na muenecara. <sup>39</sup> Tamasaca pueya tajishacari nucuaco Jesu shuriuquioco, nojoriiri Jesu macaatiquiaari. Na maanuquenuta, nojoriiri Jesu sequetuquiaari:

<sup>40</sup> —¡Jaj! ¡Cumaacaraca quijia naatiijia! Quiaacuajaari sequeja quiaa jaara Pueyaso Secojojuua tia niyartare, quia naata na tianu tucuatunuhua jiuujianaraca juucajinia. ¿Naatee? ¡Quiaa jaara naa cumaacaraca quiriritij, canaa niquiara quia roserecarajaj, quiaa jaara Pueyaso Niyanu quiri seetanujuanaa!

<sup>41</sup> Secojonaa jiyaniijianucuaari tii quiriquiaajuhua Moisés Rootasanojiniji niishitijonaata, canaa Judiocuaca camarucuanio. Nojoriiri Jesu macaatiriquiaajuhuj. Tama sequetooriquiaajaarijia:

<sup>42</sup> —Saaja tamasaca naatanijiojuaquiri. Maja cutaraari na naata tama nocuajijiaaja tacunu. Jaara seetanujuanaa pa Israel pueya jiyaniijia quiri, cuaara roseera quiarijia pa niquiara niyacutesanojiniji, nocua pa tiuuniuria. <sup>43</sup> ¡Pueyasoocua tiuujia naatiijia! Jaara naa quiriritij, Pueyaso cuaara na roshiniiria, nojuaja jaara seetanujuanaa Pueyaso panishano quiri. Nojuacuajaari pa sequeja: “Janiyari Pueyaso Niyanuni”.

<sup>44</sup> Cuno caapiqui nohuasenuujuaca Jesu shuriucua teetejosano quiriquiaani, nojoriiri Jesu macaatiriquiaajuhuj.

*Jesu cusosacari*

(Mr 15.33-41; Lc 23.44-49; Jn 19.28-30)

<sup>45</sup> ¡Panacari, mijiriaari ninishiquiria quiquii! Pananu mueecosacari cuhuatemohuari. <sup>46</sup> Jiyacaritij, Jesuuri jyanohua nacaquiaari naatej:

—¡Elí, Eliinaa! ¿lama sabactani?

Nioori pueyano rupaajinia sequeya: “¡Cua Pueyasonaa, cua Pueyasonaa!, ¿casaara quia carteree janiyani?” <sup>47</sup> Tamasaca na shuriucua nujuatunaari na tojitiariquiaa. Nojoriiri sequeree:

—¡Nia tojiri! ¡Supuetana Elías jiiquioonuyano! Noo Elías, tariucuaaanu pueyara Pueyaso sequesano caminiujiunia quiquiaaritij.

<sup>48</sup> Tamonuuri ritia netequee namasu casaa na riniuria. Naajuaacua na morotanu nuhuaji, jereeca vinojinia na shiriiri. Na nuhuaji, Jesuucua na shiitioreeri na raatenura.

<sup>49</sup> Tamasacaari sequeree:

—¡Pa shanacure! ¡Elías jiyoteeri nocua niniutianiya na roshininiuria niyacutesano-jiniji!

<sup>50</sup> ¡Jiyacaritij, Jesuuri jiyanoehua nacarohua! ¡Na nuhuaji na sohuanu tohuataniri-iri! ¡Cusoqueeri! <sup>51</sup> Pueyaso Secojoua tiajinia, shiquiaruque toquejiniji sohuacaari quiquiaari Pueyaso Quishaqui mishiquietaja. ¡Jesu cusosacari, cuno toqueeri sutequee jiyocuacaanuji jiyocuara puetunujuanaa! ¡Rijiaari jiya jiuuquiutiaquiaari jiyanoehua! ¡Sairi jiaquetacoquiaari noojiaacoji! <sup>52</sup> ¡Macunucua raacaari riatequequiaari! ¡Queraatia tariucuacaanu Pueyasocua tiuuniaari samiitiacoquee na raacajinia! <sup>53</sup> Jesu jaara samiitiaquiaarihua, cuno samiitiaconohua pueyari tohuareetaquiaari na raacajiniji. Nojori-iri Jerusalén tiacajinia tiuquitiaquiaari. Nojoriiri queraatia pueyacua muetaquiaari tii, Pueyaso panishano tiacajiniani. <sup>54</sup> Soldadoehua capitánri na pueyata Jesu cojuariquiaa, Jesu cuaara cusoyarejaatijia nojori niquiara. Nojori jaara jiya niquituaquiaari jiuuquiutiaano, socua puetunu nojori niquishanojuanaano, nojoriiri jiyanoehua puereturee. Sequetureeri:

—¡Nio pueyanoqui seetanujuanaa Pueyaso Niyanu quiquianu!

<sup>55</sup> Queraatia maajipohuari tii quiriqiaajuhuj. Nojoriiri tucuacaanuji shootia-turiquiaa Jesu. Nojoriiri Jesu nuhuajiquiaari Galilea jiyajiniji, Jesura pueraquenu-uriquiano. <sup>56</sup> Cuno maajipohua tajinia quiriqiaari María Magdalena, Santiago nucua Maríajuhuj, José nucua Marfánio, mariyata Zebedeo niquiohua nucuanio.

*Jesu quete niasacari raaco*

(Mr 15.42-47; Lc 23.50-56; Jn 19.38-42)

<sup>57</sup> Tamonu pueyanoori quiquiaari Arimatea tiacajinijinio. Jiyanoehua casamiriaca quijiaari. Na sesa quiquiaari José. Nojuajaari tarijia Jesu tojijiaari quiquiaari. Joseeri Jesu cusonu juucaja tiuquiquiaari cuno tenacari. <sup>58</sup> Joseeri Pilatoocua quiaquiaari Jesu quete na masenura. Pilatoori na pueya sequeree cuaara na niquitiosaarianoj. <sup>59</sup> Joseeri Jesu quete paquiaari na jeenucuanura raaco na niasocoriquiano. Na jiuniooreeri quenaaruque cohuajaque toquejinia. <sup>60</sup> Na nuhuaji na niaquiaari tama na raacojaarijia. Quiarinio raa quiquiaariiri, José jiuutianishano saajajinia. Na nuhuaji, Joseeri puereetuuca saajia saquitiniquiaari raa tiotuuria. Quiacuhuari. <sup>61</sup> María Magdalenaari na sesaanucua cajituriquiaa raa caneja taquijiria.

*Soldadoehua cojuasacari Jesu raa*

<sup>62</sup> Pascuara jeenucuanu juuca nuhuaji, secojonaa jiyaniijianucuaari Pilatoocua quiojoquiaari Fariseocucata. <sup>63</sup> Naa na sequetuseeri:

—Jiyaniijianaa, canaari cuno sapojoua pueyano sequesano niishiquiini, na sequesano saminio na quishacarijia. Nojuajaari sequeja: “Janiyari jiuujianaraca juucajinia samiitianutaniuhuanu”. <sup>64</sup> Nocujia na raa quia cojuatere maninia tiosano, jiuujianaraca juuca cuaara shocorejaatijia, na pueya mariqui niucua macu nohuasequeeri. Nojori jaara na nohuasere, nojoriiri sequenutaniya Jesu samiitiarohuacuaa. Nojori jaara naa sapojore pueyatej, socua jiyacatenutaniyari Jesu sequesano, nojuaja jaara sequecanu: “Janiyari Pueyaso Jiyarosani”.

<sup>65</sup> Pilatoori nojori sequeree:

—Niya quiyacuaja cua soldadoehua. Nojori nia cojuatere maninia cuno raa, taa nia paniyacuajani.

<sup>66</sup> Nojoriiri soldadoehua nujuatejoquiaari raa nojori cojuanura. Raa tiotiuuri rupana-cusaaquiaarijuhuaj jiyaniijia Pilato sesa naajiotajata.

*Jesu samiitiasacarihua*

(Mr 16.1-8; Lc 24.1-12; Jn 20.1-10)

<sup>1</sup> Samaatenu juuca jaara shocoquiaari, coteenu juuca semaanajinijinio juhuaquesacari, shusha cuhuatesacari, María Magdalenaari raa niquniuucua quiariquiaa na sesaanu-cuata. <sup>2</sup> ¡Canashiyaquiji, rijaari jiyanoehua jiuuquiutiaree! Cunoori quiquiaari Pueyaso seru rosenuucua jiyocuacaanuji raacua. Raa tiootiu saajia saquitinishiiri. Na nuhuaji, saajiaacua cajiriohuari. <sup>3</sup> ¡Pueyaso seruuri niquishaaquiaari shacantuuca juhua miacana! Na toqueeri jiyanoehua cohuajaque quiquiaari, juhua sohuanatuu. <sup>4</sup> Raa cojuatunaari jiyanoehua shiriiquitiuquiaari nojori niquishacari Pueyaso seru. Jiyanoehua tetecatureeri. Na puerenuta socua cusojonuureeri. <sup>5</sup> Maajipohua jaara tiuquiquiaari raajinia, Pueyaso seruuri nojori sequeree:

—Maja nia shiriiquiniu. Janiyacuajaari niishiyani niaari Jesu pajeya, niyacutesanojinia mosanotej. <sup>6</sup> Maja niya na quiniu. Tari samiitiarohuano, taa nojuaja sequequiaari niajanuyacuajani. Miji. Nia niquishushiiria na masaqui. Shaaqui. <sup>7</sup> Ritia nia quiaarohua. Na saquiriojosano pueya nia sequesuhua: “Jesu tari samiitiarohua. Nojuajaari nia puetanutaniya Galilea jiyajinia. Niaari jati na niquniutianiya”. Janiyacuajaari tari nia sequereeni. Naa nia pohuatasuhua na pueya.

<sup>8</sup> Maajipohuari masaacujutanuuriquioehua raajiniji na puerenuta, na shuquiriniuti-ajuhuj. Nojoriiri socua netecuatiuyarohuaquij, canaa na pohuatanuhua Pueyaso seru sequesano nojori. <sup>9</sup> ¡Jiyacaritij, Jesujuanaari canashiyaquiji nojoriicua muetaquee nuujinia! Nojori saruhuatareeri. Maajipohuari nocua catecanoree. Na cariquimiaji mojoquetacoreeri. Jesu niohuaca quiatureeri. Jesu shootiatureeri na jiuujiatenuta. <sup>10</sup> Jesuuri nojori sequeree:

—Maja nia puerenu. Nia quiaarohua. Cua pueya nia sequesuhua nojori cuara quiojora Galilea jiyajinia. Nojoriiri seetanujuanaa cua tapueyocuaca. Nojoriiri jati cua niqitiuniutianiya.

#### *Raa cojuanaa pohuatasano*

<sup>11</sup> Maajipohua quiojosacariuhua, noojiaqueya raa cojuanaajinijinioori tiacajinia quio-joquiaariuhua pueyacuara secojonaa jiyaniijianucua nojori pohuatanura nojori niquis-hano. <sup>12</sup> Pueyacuara secojonaa jiyaniijianucuaari canaa Judiocuaca camarucuata rere-joree na rojotoonura taa na miitiuniutianiya. Na nuhuaji, nojoriiri queraatia cumaneeca niqitioquiaari raa cojuanaa, pueya niqiuara nojori pohuatanura tamaatia nojori niquishanojiniji. <sup>13</sup> Soldadohuari naa rootasaaquiaaritij:

—Niocua naa sequere pueyatej: “Canaa maquesacari, Jesu pueyaquiiri niucua no-huasequee Jesu quete raajiniji”. Niocua naa sequeretej. <sup>14</sup> Jiyaniijia Pilato jaara niishiri naa nia pohuatasacaritij, majaari nia puerenu. Canaacuajaari na shinijanutaniyani jaara juaari. Naacuajitij, majaari na juaaniu quiniutianiya niajaniya.

<sup>15</sup> Jiyacaritij, soldadohuari cumaneeca maseree. Nojoriiri naa pohuatanu coteequiaari taa nojori rootasaarecuajani. Nojori cuaracashishanoori ritia caminiujuushaaquiaari canaa Judiocuacura. Naacuajitij, canaa Judiocuacaari naa sequeyajaa quiarijia.

#### *Jesu rootasacari na pueya na jiyaramiquiyaquishacarijia nojori* (Mr 16.14-18; Lc 24.36-49; Jn 20.19-23)

<sup>16</sup> Canaa, Jesu once saquiriojosano pueyani, canaari Galilea jiyajinia quiojoquiaari ta-monu tuhananuucuanu. Jesuuri canaa sequequiaari canaa quiojonura tiriara, tii canaa coquetonura nata. <sup>17</sup> Canaa niquishacari Jesu quiyano tii, canaari nocuara mojoque-tacoquiaari canaa shuquiritianura nojuajani. Tamasaca canaajinijinioori jyaniriquiaa maja naasucuaari Jesu. <sup>18</sup> Jesuuri canaacua catecanoree. Canaa sequereeri:

—Janiyari puetunu cumaacajanaa niqitiosaareeni, Jiyaniijiajanaa cua quiniuria jiy-ocuacaanu, mijirianio. <sup>19</sup> ¡Naaratej, nia quiojore! ¡Puetunu pueyapuejanaa nia pohuatare cua rupaa, cua tojitiajacara nojori quiniuria! Moojinia nia tiuquinijiore cua tojitiajaca Pueyaso sesajinia, nojori rupuesacari pa Que Pueyaso, janiya, na Sohuanunio. <sup>20</sup> Nojori nia niishitiojore puetunu cua rootasanojuanaa niajaniya, nojori tojishocoriquiano. Nia niishiri nio: ¡janiyacujaari niaata quiniutianiya pueyaracaanuni, jiya cuara puequere-jaatijia!

## MARCO NAAJIOTASANO JESUCRISTOJINIJI

*Cariiquia jiyajinia Tiuquinijiona Juan poojotasacari Pueyaso rupaa*  
(Mt 3.1-12; Lc 3.1-9, 15-17; Jn 1.19-28)

<sup>1</sup> Pueyaso Niyanu Jesucristojiniiri naa coteetasaaquiaari pohuatanutej.  
<sup>2</sup> Tariucuacaanu pueyara Pueyaso sequesano caminiujiunia Isafasri Pueyaso Niyanu niyacari naajiotaquiaari. Naajiotaquiaariiri taa Tiuquinijiona Juan poojotanutaniya pueya jeenucuanura nojori jiuujiani, niriqiano Jesu tojjia nojori quiniuria. Isafasri naa naajiotaquiaari Pueyaso sequesano miriqui Neyanutej:

“Janiyari quiocuaji jiyaronutaniya tamonuni, quiocuaji quia nuu jeenucuariquiano.

<sup>3</sup> Na nacanuuri tojjishaanutaniya cariiquia jiyajinia. Naa pueya sequeyari: ‘¡Nia jeenucuare Jiyaniijia nuu! ¡Nia nuunore maninia, maja shuutiuniu!’ ”

<sup>4</sup> Quiari naataja, Tiuquinijiona Juanri seetanujuanaa naa miiquiaari cariiquia jiyajiniatej. Nocua nijionaa pueya tiuquinijioriquiaa moojiniaari. Tiuquinijiona Juanri cuno pueya sequequiaari:

—¡Nioojia nia tacatore sesa nia miiniujiniji, moojinia cua tiuquinijionura niajaninya! ¡Pueyasocua sesa nia miishanojiniji nia jiyanoori puetunujuanaa!

<sup>5</sup> Puetunu Judea jiyajinijinio pueyajanaari nocua nijioquiaari nojori tojjitanura nojuaja, Jerusalén tiacajinijinio pueyanio. Cuno pueya jaara sesa na miishano pohuataquiaari Juan niqiara, Pueyaso niquiarajuhuj, Juanri nojori tiuquinijioquiaari Jordán moojinia.

<sup>6</sup> Tiuquinijiona Juan toqueeri camello cajacajiniji shitiasano quiquiaari. Na cajiniocua na camarucutesanoori quiquiaari shoque sacuanijiasano. Na miaquesanoori quiquiaari sequeru, samiyatunio, cariiquia jiyajinia na riuriasano. <sup>7</sup> Juanri pueya niqiara pohuataquiaari naatej:

—Tamonuuri cua nuhuaji niniutianiya. Nojuajaari socua cumaacaraca janiyajiniji. Janiya maara shuquiriaatia quirini, nojuaja jaara quenaaja cua sequere cua naacutanura nojuaja, juhua na seru, na sapatu neyocua cua samaacatanura. Nojuajaari Jiyaniijiajanaa cutara janiyajiniji. <sup>8</sup> Janiyari nia tiuquinijiya moojiniani, juhua jeequejosano nia quiniuria sesa nia miishanojiniji. Cua nuhuaji ninia cutaraari Pueyaso Sohuanu tiuquinijionutaniya nioojajinia, na cumaaca nia jiitianura, seetanujuanaa maninia miijiaca nia quiniuria.

*Jesu tiuquinishacari moojinia*

(Mt 3.13-17; Lc 3.21-22)

<sup>9</sup> Jesuuri jiyacari Nazaret tiacajiniji quiaquiaari Tiuquinijiona Juancua. Nazaret tiacaari Galilea jiyajinia quijia. Tiuquinijiona Juanri Jesu tiuquiniquiaari Jordán moojinia. <sup>10</sup> Jesu tacasacari moojiniji na tiuquinishaanu nuhuaji, jiyacaritij, nojuajaari jiya cajiniocua niqiquiaari riateyano. Pueyaso Sohuanu niqiriiri nocua roseyano juhua mococoonu. Nocua tiuushiiri. <sup>11</sup> Jiyacaritij, jiyocuaaanuji tojjishaaquiaariiri Pueyaso pocuaano. Naa Jesu sequequiaariiri:

—¡Quiaari Quiyanuniyujua, cua panishano! ¡Jiyanohua quia timitiaanijia!

*Samaruhua jiyaniijia saniniujiushacari Jesu*

(Mt 4.1-11; Lc 4.1-13)

<sup>12</sup> Na nuhuaji, Pueyaso Sohuanuuri Jesu jiyatequiaari ritia cariiquia jiyajiniara.  
<sup>13</sup> Jesuuri cuarenta juuca shocojotequiaari tii tamajaaja, puereeta jiya camaruhua casami quishaqui. Tii na quishacari, Satanásri Jesu saniniujiuriquiaa na tojjijara Jesu quiniuria juucua. Na nuhuaji, Pueyaso seyari nocua nijioquiaari na naacunura, na mianuutenurajuhuj.

*Jesu coteesacari poonijionu Galilea jiyajinia*

(Mt 4.12-17; Lc 4.14-15)

<sup>14</sup> Jiyaniijia Herodes jaara Tiuquinijiona Juan nujuatequiaari nujuatejojuajinia, na nuhuaji, Jesuuri Galilea jiyajinia quiaquiaariuhua. Nojuajaari pueya niquiara poojotaquiaari tii, maninia pohuatasano Pueyasojiniji, taa Pueyaso jiitianutaniya na muerasuni. <sup>15</sup> Jesuuri naa sequequiaari pueyatej:

—Nia sequeyanijia, nio pa quishacarini, quiarijiaari Pueyaso jiyanooshacari pueya, na muerasura nia quiniuria. Cunora, Pueyasojiniji cua pohuatasanoocua nia tiuuri. Nioojia nia tacatore sesa nia miiniujiniji, Pueyaso tojitiajaca nia quiniuria.

*Jesu saquiriojosacari pueya, na tarajariquiano*

*(Mt 4.18-22; Lc 5.1-11)*

<sup>16</sup> Galilea caminia shuriuquioco Jesu rucuanijosacari, nojuajaari Pedro niquiquiaari, tarajanu Andrésnio. Nojoriiri shiyaru jaqueroootanaa quiquiaari. Jiyacaritij, nojoriiri shiyaru jaqueroootariquiaa caminiajinia. <sup>17</sup> Jesuuri nojori sequesee:

—¡Miji, cua nuhuajitiuyare! Janiyari nia jiyatenutaniya pueya quioojuara saniniunijia, juhua sapitiaaja.

<sup>18</sup> Nojoriiri ritia na shiyaru tiujiaquiaari. Jesuta quiojijareeri.

<sup>19</sup> Socua shiitianiyojua na tacoji Jesu canujusacari, Santiago niquishiiri, tarajanu Juanio. Nojoriiri na shiyaru cushipirijionuuriquiaa botejinia. Nojoriiri Zebedeo niquiohua quiquiaari. <sup>20</sup> Jesuuri jiyacari nojori sequequiaari nata nojori quianurajuhuj. Nojoriiri na que Zebedeo tiujiaquiaari botejinia na naacunaata. Nojoriiri Jesuta quiojoquee.

*Samaruraca pueyanojiniji pohuatasano*

*(Lc 4.31-37)*

<sup>21</sup> Nojoriiri Capernaum tiacajinia tiuquishii. Samaatenu juuca, Jesuuri tiuquiquiaari Pueyaso secojojua tiajinia. Tii pueya niishitiojonu coteequiaariiri. <sup>22</sup> Pueyari jiyanohua jiuujiatequiaari na rootasano nojori tojishacari. Jesuuri juhua jiyaniijiajanaa niishitiojoriquiaa. Majaari na niishitiojonu quiquiaari taa Moisés Rootasanojiniji niishitiojonaa niishitiojoquiaaricuaani. Nojoriiri saaja Moisés pohuatasanojiniji caminiujuquiaari, pueya niquiara nojori pohuatasacari Pueyaso Rupaa. <sup>23</sup> Samaruraca pueyanoori Pueyaso secojojua tiajinia quiriquiaa tiijuhuj. Nojuajaari nacaquiaari:

<sup>24</sup> —¡Nazaret tiacajinijinio Jesunaa!, ¿quiaateeri tari canaacua nimiaa, canaa quia shaajanura? Janiyari quia niishiyani. ¡Quiaacuajaari Pueyaso Niyanu!

<sup>25</sup> Jesuuri cuno samaru juaarii. Na sequereeri:

—¡Quia sanaajere! ¡Quia tohuatare nio pueyanojiniji!

<sup>26</sup> Jiyacaritij, samaruuri jiyanohua taraatia miirii cuno pueyano. Jiyanohua na sariyotequiaariiri na tohuatasacari nojuajiniji. Juhua macu tiujiaquee pueyanoori. <sup>27</sup> Puetunu pueyajanaari shiriiquitiquiaari. Tama nojorijiaarjia nequesoreetooquiaari:

—¿Casaatucuaa nioni? ¡Nioruhua quiarinio niishitiojosano! ¡Nio pueyanoqui cumaacaraca! ¡Taa samaruhua tojitiaa nojori na jiyarosacariiri!

<sup>28</sup> Pueyari ritia caminiujuquiaari Jesujiniji puetunu Galilea jiyajiniajanaa.

*Jesu naatanishacari Simón Pedro reyarucua*

*(Mt 8.14-15; Lc 4.38-39)*

<sup>29</sup> Jaara tohuareetaquiaariuhua Pueyaso secojojua tiajiniji, Jesuuri Simón, Andrés tiajinia quiaquiaari Santiagota, Juantano. <sup>30</sup> Simón reyarucuaari naseeca matariquiaa maquetujinia. Cusosutuhuj. Tiajinia quiniaari Jesu sequeturee nojuaja cusosu mataa.

<sup>31</sup> Jesuuri nocua canujiyaree. Na juaashiquiajiniji cusosu sanaseeri. Na cusonuuri seetanujanaa ritia tajiquiaari nocuaji. Naacuajitij, nojuajaari pueya mianuutenu coteequiaari ritia.

*Jesu naatanijosacari queraatia cusosuhua*

*(Mt 8.16-17; Lc 4.40-41)*

<sup>32</sup> Shusha ninishacari, Jesuucua patootasaaquiaariiri puetunu cusosuhujanaa, samaruhuaraca cusosu pueyano. <sup>33</sup> Puetunu cuno tiacajiniji pueyajanaari tia tohuateyaji rerequeequiaari tee Jesu quiriquiaacuajani. <sup>34</sup> Jesuuri queraatia puetunu



tamaatia cusonujuanaa naatanijioquiaari na rupaa cumaacata. Queraatia samaruhua tohuatanijioquiaari tamasaca pueyajinijiaariuhuj. Samaruhuari niishiquiaari cante Jesuni. Nocuaji, majaari Jesu shanacunu quiquiaari samaruhua pocuanura quenaaja.

*Jesu pohuatasacari Pueyaso rupaa Galilea jiyajinia*

(Lc 4.42-44)

<sup>35</sup> Jesuuri jiyanoehua tariquicuaji sanequiaari, ninishiqui quishacarijia. Tiacajiniji quiaquiaari tamaquiriaari, tii Pueyaso na secojonura tamajaaja. <sup>36</sup> Na nuhuaji, Simónri Jesu pajenuucua quiojoquiaari, nata quiniaata. <sup>37</sup> Jaara na riuriatatuquiaari, na seque-tuseeri:

—¡Puetunu pueyajanaa quia juuretaa!

<sup>38</sup> Jesuuri saaja nojori sequeree:

—Pa quiaare juhuari catecanaataja tiacajinia. Tii pa pohuatarehuhua Pueyaso rupaa pueya niquiara. Janiyacuajaari cunora jiyasohuaja tohuataareeni.

<sup>39</sup> Naacuajitij, Jesuuri puetunu Galilea jiyajiniajanaa rucuanajoquiaari. Pueyaso rupaa pohuataquiaariiri Pueyaso secojojua tiacajiniaqueya puetunu Galilea jiya tiacajiniajanaa. Nojuajaari samaruhua tohuatanijioquiaarijuhuaj.

*Jesu naatanishacari lepraraca pueyano*

(Mt 8.1-4; Lc 5.12-16)

<sup>40</sup> Lepraraca cusosu pueyanoori Jesuucua catecanoquiaari. Jesu cariquimiaji mojqoquetaseeri. Na sequereeri:

—Quiaa jaara paniri, quia naata cua naataniniu cua cusonujiniji.

<sup>41</sup> Jesuuri nocua taraajequiaari. Na juaashiquia niaree nocuaari. Na sequereeri:

—Taaquiriirinij. Quia naataniniu paniyanijia. Quia cuaqueya cuara jeequehuara.

<sup>42</sup> Jesu jaara naa na sequequiaaritij, na lepraari ritia cushiriiquii. Na cuaqueyajiniji shaajequiaariiri na cusonu. Na cuaqueyari maninara quiquiaariuhua. <sup>43</sup> Na jiyaroyaquishacarijia na naatanishano pueyano, Jesuuri jiyanoehua na rootaquiaari. Na sequereeri:

<sup>44</sup> —¡Cua tojiri, majaari pueya quia pohuatanu cua miishano! Saaja pueyacuara secojonaa jiyaniijia quia cuaqueya quia niquitishii, na cartenuhuara quiajaniya, pueya tajinia quia rucuanefonuhua juhuajaniya. Mariyata ritia quia niquitioe quia seru Pueyasooacara catijasocoriquiano. Naa quia miiri taa Moisés niishitiojoquiaaricujani, puetunu pueyajanaa niishiniuria quiaa tari naatarohua quia cusonujiniji.

<sup>45</sup> Cuno pueyano jaara quiaquiaari, juhuacatecara pohuataquiaari puetunu pueyajanaari taa na naatanishaarohuani. Naaratej, puetunu pueyajanaari Jesu niquiniu panijia. Cunora, Jesuuri maja tari na naata tiuquiniu quiquiaari juhuajaniya tamonu tiacajinia. Nocuaji Jesuuri pueya quiaquishaqui rucuanajojua. Naajaa, puetunu cuno jiyajiniji pueyajanaari saaja nocua nijioquiaari na niquiniuria.

2

*Jesu naatanishacari cumatacuruhuana cusosu*

(Mt 9.1-8; Lc 5.17-26)

<sup>1</sup> Na rucuanefonu nuhuaji, Jesuuri Capernaum tiacajinia tiuquiquiaariuhua na saquiri-  
ojosano pueyata. Pueya jaara niishiquiaari Jesu tari na quijia tiacajinia tiuquiriohua,  
<sup>2</sup> queraatia pueyari nocua nijioquiaari cuno tiacajinara. Nojoriiri tiaco mishiquiaari,  
tohuateyajijiuhuaj. Jesuuri cuno pueya niquiara pohuataquiaari Pueyaso rupaa. <sup>3</sup> Jesu  
quishacari tii, nocua patasaaquiaariiri pueyano cusosu na matujinia. Cuatro pueyari na  
patamaa. Cuno cusosuuri pootia mataja quiquiaari pueyaracaanu, cumatacuruhuana  
na quiniuucua. <sup>4</sup> Cusosu patanaari maja na naata tiaco tiuquitianu quiquiaari Jesu-  
ucua, puera pueya rerequesacari tohuateyaji. Nocuaji nojoriiri tia cacojiria cusosu  
tacataquiaari tacatuhuoco. Nojoriiri tia nijinia cuhuataquiaari. Namitia Jesu nu-  
juasaquijianaa cuhuataturee tiaari. Na nuhuaji, tia cuhuocojiniji, Jesuucua roshinitiasaa-  
reeri cusosu na matujinia. <sup>5</sup> Jesuuri cusosu patanaa pueya niquirii seetanujuanaa nocua  
tiuyano. Naaratej, Jesuuri cusosu sequeree:

—Quiyanunaa, sesa quia miishanojiniji quia jiyanoorii taricujaniijia.

<sup>6</sup> Moisés Rootasanojiniji niishitiojonaari tii cajituriquiaa. <sup>7</sup> Nojori tojishacari Jesu jiyanooyano cuno pueyano, nojoriiri niishiriojonuuree: “¿Casaara nio pueyano pocuaa naani? Majaari quenaaja pueyano naata pa jiyanooni sesa pa miishanojiniji. ¡Nojuajaari tama na cuaqueyajaaja jiyateya juhua Pueyaso na quiniuria! ¡Cunoori jiyanoohua sacuraatia! ¡Saaja Pueyaso cutaraari na naata pa jiyanooni!” <sup>8</sup> Jesuuri tamajaaja ritia niishiquiaari noojiajinia naa cuno pueya niishiriojonuusano. Jesuuri cunora nojori sequeree:

—¿Casaara naa nia niishiriojiyani? <sup>9</sup> ¿Casaate jiyajenetashiya sequenurani: “Sesa quia miishano tari jiyanooshaaree”? ¿Mariyata jiyajenetateeri sequenurajuhuaaj: “Quia sanere. Quia matu quia pataarohua”? <sup>10</sup> Seetanujuanaa nia sequeyanijia, janiyari quiar-ijia nia niishitiniutianiyani, pueyano cua quishacari mijiria, naajaa, janiyari Pueyaso cumaaca jiitiaa sesa miijiaca cua jiyanooniuriani.

Jiyacaritij, Jesuuri cumatacuruhuana cusosu sequeree:

<sup>11</sup> —Cua tojiri. ¡Quia sanere! Quia matu quia patare. Quia tiajinia quia quiaarohua.

<sup>12</sup> Cusosuuri ritia sanequee. Pueya niquiara na matu pataarohuari. Naaratej, pueyari jiuujiatequiaari. Pueyaso maniniuhuaqueetatureeri. Cuno pueyari naa sequetuquiaari-tij, na shuquiritiasacari Pueyaso:

—¡Majaari quenaaja pa niquiniu quiquiaari naa miishanotej!

*Jesu sequesacari Leví na nuhuajiniuria*

*(Mt 9.9-13; Lc 5.27-32)*

<sup>13</sup> Na nuhuaji, Jesuuri na saquiriojosano pueyata tacatequiaariuhua caminia casaqueyajiria. Queraatia pueyari nocua nijioquiaari. Jesuuri cuniqui nojori niishitiojoquiaari Pueyaso rupaa. <sup>14</sup> Na nuhuaji, Jesu quiojosacari na saquiriojosano pueyata cuniquiji, Jesuuri Leví niquimíaa cajiyano Roma tiacajinia quijia jiyaniijia cumaneeca masejojuajinia. Nojuajaari Alfeo niyanu quiquiaari. Jesuuri na sequeree:

—Miji. Cua nuhuajiyare.

Jiyacaritij, Leviiri sanequiaari. Jesu pueyanora quiaquiaariiri.

<sup>15</sup> Cuno niucuaaja, Jesuuri Leví tiajinia miaqueriquiaa. Leví tiajinia miaquenuuriquiaajaariuhua queraatia narta cumaneeca masejona. Queraatia tamasaca pueyari nojoritia miaquenuuriquiaajuhuaaj, canapue Judiocuaca camarucua sequequiaari sesa pueyatacuajani. Nojoriiri Jesuta miaquenuuriquiaa, Jesu saquiriojosano pueyatano. Jiyanoohua queraatia pueyari Jesu rupuenaa quiriquiaa. <sup>16</sup> Moisés Naajioneejiniji niishitiojona, mariyata Fariseocuaca jaara Jesu niquirii cuno pueyata miaqueyano, nojoriiri Jesu saquiriojosano pueya nequesotaquiaari:

—¿Casaara nia niishitiojona miaqueya cuno cumaneeca masejonaatani, mariyata cuno sesa miijiacatani? ¿Casaara cuno pojoritia na ratuyajaaniuhuaaj?

<sup>17</sup> Jesuuri cuno pueya sequesano tojirii. Nojori sequeree miriquiiri:

—Jiyotuucaari maja na paniniu naarajona. Cante cusosuni, cuno cutaraari naarajona paniya. Majaari cua niniu quiquiaari maninia miijiacacua. Niquiaari cutaranijia nia sequesano sesa miijiacua cua jiyanooniuria sesa nojori miijosanojiniji.

*Pueya nequesotasacari Jesu, casaara na pueya miaquenu carteyaquiyaani, nojori shuquiritiniuria Pueyaso*

*(Mt 9.14-17; Lc 5.33-39)*

<sup>18</sup> Tamacari, Tiuquinijiona Juan tojitiajaca, mariyata Fariseocuaca miaqueyashacari, tamasaca pueyari Jesuucua nijioquiaari. Na sequetuseeri:

—¿Casaara quia saquiriojosano pueya carteyaquiya miaquenu quenaajani? Tiuquinijiona Juan pueya cutaraari miaajecoquiaa Pueyaso nojori shuquiritiniuria. Fariseocuaacari naa miiquiaajuhuaaj. ¿Casaara naa quia pueya miyaquiyaaniuhuaaj?

<sup>19</sup> Jesuuri nojori riucuaaree miriqui:

—¿Masuusano pueyateeri miaajenutaniya nojori jaara queranacusaqui quiya, pueyano camishacari maaji? Camiriquiano pueyano jaara nojoritia quiyajaa, maja na naata nojori miaajenu, shuquiriatia nojori quishacari. <sup>20</sup> Tamacari cutara,

cuno camiriquiano pueyanoori nojori tajiniji rishaanutaniya. Cua pueyari jiyacari miaqueyaquiniutianiya cutara.

<sup>21</sup> Seetanujuanaa nia sequeya cutaranijia, toque mocua cuhuocoori maja na naata cu-shipirijiosaanu quiariqui toquerauta. Jaara jeequesaare, quiarinio toquerauri posequeja. Naacuajitij, toque mocua cuhuocoori socua queraaquetaaree. <sup>22</sup> Naajuhuj, quiariniacu uva caacaari maja na naata racatasaanu shoque tariucuacojinia. Quiariniacu uva caaca jaara jerema, shoque tariucuaco pojuaretaari. Naacuajitij, paari najuhuana niitiaa uva caacani, shoquenio. Cunora, maninia cutaraari quiariniacu uva caaca shuujionu shoque quiariquiojinia, maja vino niitiasaanura najuhuanaj, shoquenio.

Jesuuri naa pohuataquiaaritij, pueya na niishitiojonura quiarinio na niishitiojosanoori maja na naata cojitishaanu tariucuacaanu niishitiojosanota.

*Jesu pueya carojotasacari trigo samaatenu juuca*

*(Mt 12.1-8; Lc 6.1-5)*

<sup>23</sup> Jesuuri samaatenu juuca quiojoquiaari cuhuariquiajiniaaco na saquiriojosano puey-ata. Na pueyari jiyacari trigo carojotanu coteequiaari na miaajenuta. <sup>24</sup> Fariseocuaca jaara na niquiquiaari, Jesu sequetureeri:

—¡Quia niquiri! ¿Casaara quia saquiriojosano pueya poonijiya samaatenu juucani? ¡Pueyaso Rupaajinia, paari piriyojoshiyacujani maja samaatenu juuca pa poonijionura!

<sup>25</sup> Jesuuri nojori sequeree:

—¿Majateeri nia serojonu quiquiaari Pueyaso Rupaajinia pa supuetanaa jiyaniijia David miishanojiniji, nojuaja jaara miaajequiaari na cojiniaata, nojori jiitiaaquishacari na coseyaca? <sup>26</sup> Cuno quishacari, supuetana Abiatar pueyacuara secojonaa jiyaniijia quiquiaari. Davidri tiuquiquiaari Pueyaso Secojoua tiajinia. Nojuajaari Pueyasora niquitiosano panjiniji saquiaari. Cuno panri saaja Pueyaso Secojoua tia cojuanaa sasocoriquiano quiquiaari. Naajaa, Davidri na saquiaari. Na neecasequiaarijiaariuhua nata quiniaa pueyara.

<sup>27</sup> Jesuuri nojori sequequiaarijihuaj:

—Pueyasoori samaatenu juuca shipiniquiaari pueyara. Maja cutaraari Pueyaso ship-ininiu quiquiaari pueya, samaatenu juucara. <sup>28</sup> Naaratej, pueyano cua quishacari mijiria, janiyari cumaacaraca cua Quejinijini cua sequenura casaa pa miiniutianiya samaatenu juucani. Janiyacuajaari samaatenu juuca camarnuni.

### 3

*Jesu jeeecasacari pueyano juaashiquia cuseetucojuara joojequetano*

*(Mt 12.9-14; Lc 6.6-11)*

<sup>1</sup> Jesuuri Pueyaso secojojua tiajinia tiuquiquiaariuhua na saquiriojosano pueyata. Tii quiriquiaari pueyano, cuseetucojuara joojequetano juaashiquiaraca. <sup>2</sup> Cuniqi quiniaa Fariseocuacaari shanacutariquiaa na niquiniuria taa Jesu miiniutianiyanoj. Nojoriiri tama sequetooreejaaja:

—¿Jesuteeri sesarucoua pueyano juaashiquia jeeanutaniya samaatenu juucani?

Nojoriiri Jesuucoua saquiriojotanu paniriquiaa, nojuaja jaara samaatenu juuca poonijiore. <sup>3</sup> Jesuuri jiyacari sesarucoua pueyano sequeree:

—Quia sanere. Niya quia nujuasee canaa tajinia pueya niquiara.

<sup>4</sup> Na nuhuaji, Jesuuri pueya nequesotaree:

—¿Casaate samaatenu juuca miishiyani? ¿Paate maninia miyani, paate sesa miya soj? ¿Pueyanote naatanishiya, moshijajanaa soj?

Nojoriiri sanaa niquitiariquiaa saaja, Jesu sequesacari naatej. <sup>5</sup> Jesuuri na shocuaqueya nujuatiuyano pueya niquinijioree na juaaniutia. Nojoriicua taraajeriquiaajaariuhuj, cumajiuujiaaca nojori quiniucua. Majaari nojori niishiniu paniniu quiquiaari taa Pueyaso paniya pueyacuara taraajeja pa quiniuriani. Jesuuri sesarucoua pueyano sequeree:

—¡Quia juaashiquia quia shiitiore!

Na juaashiquia shiitioreeri. ¡Jiyacaritij, na juaashiquiaari ritia jeequequee!  
<sup>6</sup>Fariseocuaca niquishacari naa Jesu miishanotej, nojoriiri tohuareetaquee na juaaniutia. Nojoriiri Herodes panijiaca pueyata pocoojoquiaari ritia, taa nojori monutaniya Jesuni.

*Queraatia pueya rerequeejosacari caminia casaqueyaji*

<sup>7</sup>Na nuhuaji, Jesuuri quiojoquiaari caminiajinia na saquiriojosano pueyata. Queraatia pueyari na nuhuajiquiaarijihua Galilea jiyajiniji. <sup>8</sup>Pueya niishishacari puetunu Jesu maninia miishanojinijijianaa na cumaacata, queraatia pueyari nocua nijioquiaari na niquiniuria. Nojoriiri nocua nijioquiaari puetunu jiyacajinijiniojuanaa: Judea jiyajinijinio pueya, Jerusalén tiacajinijinio pueyajuhuj, Idumea jiyajinijinio pueyano. Nijioquiaarijiaariuhua Jordán moo taquijirijajiniji pananu muetasamaji pueya, Tiro tiacajinijinio pueyano. Sidón tiacajinijinio pueyari nijioquiaarijihuj na niquiniuria Jesu. <sup>9</sup>Nocujaji Jesuuri na saquiriojosano pueya sequequiaari:

—Niocua juhuacarijia bote cojuare quiria, cua tacajara pueyacuaji, maja pueya tanuujunura janiya.

<sup>10</sup>Jesuuri jiyacari jiyanoehua queraatia pueya naatanijioriquiaa. Nocujaji cusosuhuari Jesuucua riutioconeetariquiaa na quianura Jesu, nojori cusonujiniji nojori naataconuhuara.

<sup>11</sup>Samaruhuaraca pueya jaara Jesu niquitiuquiaari, nojoriiri nocuara mojuquetacoquiaari. Naa nacatuquiaariiri:

—¡Quiaacuajaari Pueyaso Niyanu!

<sup>12</sup>Nocujaji Jesuuri nojori sequequiaari na juaaniutia, maja nojori sequenura pueya niquiara cante nojuajani.

*Jesu saquiriojosacari doce pueya na pueyajinijinio, na rupaa pohuatariquiano*

*(Mt 10.1-4; Lc 6.12-16)*

<sup>13</sup>Na nuhuaji, Jesuuri tacaquiaari tuhuananuucua. Nojuajaari tiji sequequiaari cana na paniquiaaricujajani. Nocua nijioquiaariiri na jiyaniquishano pueya. <sup>14</sup>Jesuuri doce pueya saquiriojoquiaari nata nojori quiniuria. Nojori jiyatereeri na jiyaramiquishocoriquiano, Pueyaso rupaa nojori pohuatanura. <sup>15</sup>Nojori niquitioree na cumaacaari, cusosuhua nojori naatanijionura, samaruhua nojori tohuatejonurajuhuj. <sup>16</sup>Nioori na saquiriojosano doce pueya sesaca: Simón, Jesuuri na sesojoquiaari Pedro; Santiago, tarajanu Juannio. <sup>17</sup>Jesuuri nojori sesojoquiaari “Boanerges”. Naa sequenu paniyari nio, “Ritia juaajia, juhua miacana”. Nojoriiri Zebedeo niquiohua quiquiaari. <sup>18</sup>Socua quiquiaariiri Andrés, Felipe, Bartolomé, Mateo, Tomás, Santiagonio. Nojuajaari Alfeo niyanu quiquiaari. Socua quiquiaari Tadeo, Simónnio. Nojuajaari Romano pueya jatanu panijiaca pueya maanujinijinio quiquiaari. <sup>19</sup>Quiquiaarijiaariuhua Judas Iscariote, Jesu quiatequiaari mosocoriquianoni.

*Judiocuaca camarucua sapojosacari, Jesu samaruhua cumaaca jiitiaa*

*(Mt 12.22-32; Lc 11.14-23; 12.10)*

<sup>20</sup>Na nuhuaji, Jesuuri na saquiriojosano pueyata tamonu tiajinia tiuquitiaquiaari tamonu tiacajinia. Queraatia pueyari tiuquitiaquiaarijihua cuno tiajinia Jesuucua. Naacuajitij, majaari nojori naata miaquenu quiquiaari. <sup>21</sup>Jesu tapueyocuaca jaara niishiquiaari naa nocujatij, nojoriiri nocua nijioquiaari na riniuucua juucua. Tama sequetooriquiaajaarijia:

—¡Jesuqui tari paatecara quirijuhuanajaj!

<sup>22</sup>Moisés Rootasanojiniji niishitiojonaa Jerusalén tiacajiniji nijiono pueyari saniniujia naa sequetuquiaari Jesujiniji:

—Samaruhua jiyaniijia Satanás cuajaari cumaaca niquitiorucuaa cuno pueyano. Cunora, samaruhua tohuatanijiya pueyajinijiiri.

<sup>23</sup>Naaratej, Jesuuri cuno pojori sequequiaari nojori na niishiriojotenura:

—Miji, niya cua tojitiasee. ¿Pueyanoteeri na naata Satanás tohuatenu pueyanojiniji tama Satanás cumaacatajaaja? Maja na naata. <sup>24</sup>Naajuhuj, mijiria jiya jiyaniijia jaara juayonuutaa tama na pueyatajaaja, nojuajaari maja na naata nujuatanu na paraa, jaara

nocua niijioma. Nojuajaari shocotasaanutaniya. <sup>25</sup> Naajaariuhuj, pueyano jaara tapuey-ocucata juayonuutare, majaari nojori naata jatiqúi quiniu nojori tiajinia. <sup>26</sup> Niaari saniniuuja cua sequeree, janiyana Satanás cumaacata tohuatanijioquiaa samaruhuani. Satanás jaara naa miiritij, cuno maara tari quiri na shaajasaanurajanaa.

<sup>27</sup> 'Naajuhuj, pueyano maja na naata tiuquiniu cumueeca pueyano casamiriaca tiajinia, na casami na jaariuutianura, jaara coteenu na camaru morojiaquiri. Pueyano jaara coteenu na camaru morojorejaatijia, naa cutara na naata na casami jaariuutianu.

<sup>28</sup> 'Seetanujuanaa nia sequeya cutaranijia, pueyano sesa miishanoori na naata jiyanooshaanu. Janiyajiniji sesa na pocuanoori jiyanooshiyajuhuj. <sup>29</sup> Saniniuuja, cante sesa rimiaaqueja Pueyaso Sohuanuucuarani, cuno cutaraari maja na jiyanooshaanu quiniutianiya quenaaja. Jiyano pueyanotej, nojuajaari pueyaracaanu saniitiosaanutaniya.

<sup>30</sup> Jesuuri naa nojori sequequiaaritij, pueya sequesacari, nojuajana samaruraca quijia, Pueyaso Sohuanu cumaacata na tohuatejosacari samaruhua.

*Jesu nucuajiniji pohuatasano, Jesu tapueyocucajinijinio*  
(Mt 12.46-50; Lc 8.19-21)

<sup>31</sup> Jiyacaritij, Jesu nucuuari tiuquijioquiaari, Jesu tapueyocucanio. Majaari tiajiniaaco na tiuquitianu quiquiaari Jesuucua. Saaja carijiniacumaji tamonu pueyano sequetureeri na numootenura Jesu nojoriicua. <sup>32</sup> Jesu shocuaqueya cajitiuniaari Jesu sequeturee:

—Quia nucuana quia tapueyocucata jati carijiniacuma nujuatiuya. Quia pa-jenuyaquinia.

<sup>33</sup> Jesuuri saaja nojori sequeree:

—¿Cante cua nucuani, cua tapueyocucajuhuj?

<sup>34</sup> Na nuhuaji, na shocuaqueya cajitiuniaa niqinijioreeri. Sequereeri:

—Nio pueyari cua nucu, cua tapueyocucanio. <sup>35</sup> Cante cua Que panishano miijiani, nojuaja cutaraari cua tarajanu, cua rimiātu, cua nucuano.

## 4

*Miriqui pohuatasano natoojoua pueyanojiniji*  
(Mt 13.1-9; Lc 8.4-8)

<sup>1</sup> Jesuuri socua Pueyaso rupaa niishitiojonu coteequiaariuhua caminia casaqueyaji. Jijanohua queraatia pueyari rerequeejoquiaari nojori tojitianura nojuaja. Boteeri tii cuatariquiaa caminiajinia. Naacuajitij, Jesuuri botejinia tacaquiaari. Tii cajishiiri, caminia casaqueyaji rerequeejono pueya na niishitiojonura tiji. <sup>2</sup> Cuno pueya niishitiojoreeri queraatia miriqui pohuatasanota. Na niishitiojosacari pueya, Jesuuri naa sequequiaaritij:

<sup>3</sup> —Nia tojitiare nio sequesano. Tamonu juuca, pueyano na cuhuariquiajinia natoojonuucua quiaquiaari. <sup>4</sup> Na jacutasacari, nucuaco totequiaariiri tajaaca. Shuhuari na mijoree. Majaari na moritianu quiquiaari. <sup>5</sup> Tajaacaari totequiaari sai tajiniaqueyajuhuj. Majaari cuniqui puera jiya quiniu quiquiaari na maashiniuria. Naacuajitij, najuhuaana ritia moritiaquiaariiri. <sup>6</sup> Pananu jaara jaquiaari, na catijiareeri. Maja puera nujuacaraca na quishacari, ritia sorequeeri. <sup>7</sup> Tajaacaari totequiaarijuhua riyocuaca tajinia. Jiohuacacaari socua ritia maashiquiaari. Natauri tarinitiuucara quiquiaari saniniuuja. Naaratej, majaari na muetunu quirii. <sup>8</sup> Tajaacaari saniniuuja totequiaari maninia jiyajinia cutara. Cuno cutaraari maninia maashiquiaari cuno jiyajinia. Senoosaareeri queraatia. Niquiriyatu jiyonajiniji carojosaaquiaariiri treinta jajau. Tanajajiniji socua sesenta jajau, naajuhuj socua cien jajau tanajajiniji.

<sup>9</sup> Jesuuri nojori sequeree:

—Cante numaaracani, cuara cua sequesano tojitiara.

*Casaarate miriqui pohuatasanoni*  
(Mt 13.10-17; Lc 8.9-10)

<sup>10</sup> Na nuhuaji, Jesu quishacari tamajaaja, na saquiriojosano doce pueyari na nequesotaquiaari, tamasaca pueyano. Cuno pojoricuajaari Jesu shuriucua quiriquiaa. Nojoriiri Jesu sequeree:

—¿Casa miriqui quia pohuatasano sequenu paniyani?

<sup>11</sup> Jesuuri nojori sequeree:

—Pueyasoori nia niishitiojiya jiyasohua na miiniu panishano, taa na muerasu na jiitianutaniya pueyaracaanu cutarani. Tamasacara saniniuujia, canapuate Pueyaso ruuretajacani, nojoririaari miriqui pohuatahiyacujua. <sup>12</sup> Naacuajitij, nojoriiri cua cumaacata cua miishano niqutiuiquiaa pueyaracaanu najuhuanaj. Majaari nojori niishiniu na niqishano. Naajuhuj, nojori jaara Pueyaso Rupaa tojitiare, majaari na niishiniu na tojishano. Nojori jaara niishiri, nojori mariqui noojia tacatorohuari sesa nojori miishanojiniji nojori jiyanooshaanura.

*Jesu niishitiojosacari miriqui na pohuatasano natoononajiniji*  
(Mt 13.18-23; Lc 8.11-15)

<sup>13</sup> Jesuuri nojori sequequiaarijuhuaj:

—¿Majateeri nia niishiniu miriqui cua pohuatasano? ¿Niaatucua taa niishiriquia socua tamonu cua pohuatasanoni? <sup>14</sup> Cua pohuatasano cuhuariquiajinia natoononajinijini, nojuajaari juhua Pueyaso Rupaa pohuata. <sup>15</sup> Noojiaqueya pueyari juhua nucuaco toteno jajau. Najuhua Pueyaso Rupaa tojiyari. Na tojiniu nuhuaji, Satanásri nimiaa. Nojuajaari puetunu Pueyaso Rupaa jaanaa noojiajinia natasano jaariutiaquiaa. <sup>16</sup> Tamasaca pueyari juhua noo jajau saniniuujia, sai tajiniaqueya jacutasanotej. Nojori jaara Pueyaso Rupaa tojiri, jyanohua na timitiaari. <sup>17</sup> Cunoori juhua secaja nujuacaraca moritiano jajau, sai tajinia na moritianuucua. Majaari na rishiniu. Naajuhuj, cuno pueya jaara saniniuujishaare taraatia, jaara naquiya miishaarejuhuaj Pueyaso Rupaa tojijia nojori quiniuucua, nojoriiri ritia Pueyasocua tiuuniu tarinitiaja. <sup>18</sup> Noojiaqueya pueyari juhua noo jajau, jiohuacaca tajiniaqueya jacutasanotej. Pueyaso Rupaa tojiyari. <sup>19</sup> Na nuhuaji, nojoriiri puera niishitiojiya taa nojori quiniutianiya maninia mijiriani. Nojoriiri sapojosaaquiaa puera na shuqiritiasacari mijiria casami. Nio jiya casamiicua jiaatiaquiaaarijuhuaj. Puetunu cunorajanaa, nojoriiri Pueyaso rupaa tojitiaquiaa na numaa shama. Naacuajitij, nojoriiri juhua muetuhuo quiya. <sup>20</sup> Noojiaqueya pueya saniniuujia, nojori cutaraari maninia tojitiaja Pueyaso Rupaa. Cuno pueyari juhua cuhuariquiajinia natau, queraatia muetujua, maninia jiyajinia natasano. Cuno maninia nataujinijinioni, noojiaqueyari maja puera na muetunu. Tarajanuuri maninia muetuna. Naajuhuj, tarajanuuri jyanohua queraatia muetujua. Naajuhuj, cante Pueyaso Rupaa tojijia cutarani, nojuajaari juhua maninia muetujua natau.

*Pueyaso muerasuuri juhua samari*  
(Lc 8.16-18)

<sup>21</sup> Jesuuri nojori sequereejuhuaj:

—¿Samaritiutiiri noshitishano, conatu cariquiaco jamotasocoriquiano, maquetu cariquiacojuhuaj? Maja. Samaritiu jaara noshitishaare, morijiuucua morotashiyari, tijiniaaco na cuhuatanura maninia. <sup>22</sup> Naajuhuj, jiyasohua nia miishanoori puetunujuanaa niishishaanutaniya. Cua pohuatasanoori juhua samaritiu, puetunu pueya jiuujiaajanaa na cuhuatanura. Naajuhuj, Pueyaso Rupaa jaara nioojiajinia jamosaare, juhua muetunutanitari puetunu pueya niqishocoriquianojuanaa. <sup>23</sup> Niajaniya, canapuate numaa jiitiaani, nia tojitiare cua pohuatasano.

<sup>24</sup> Jesuuri naa nojori sequequiaarijuhuaj:

—Nia niishiri nia tojishano. Nia shanacutajataja, teyanota nia shanacujuquiaa nia niquitiosocoriquianocujani, Pueyasoori cunotaja niaara shanacunutaniyajuhuaj. Naacuajitij, niaa jaara capora quiriquia tamasacata, Pueyasoori socua capora quiniutianiya niaarajuhuaj. <sup>25</sup> Cante na rupaa tojijiani, socua na niishitiojonutanitari. Saniniuujia, canapuate na rupaa tojitiaquiiani, secaja na niishishanoori puetunu jaariutiasaanutanijanaa.

*Miriqui pohuatasano natau moritianojiniji*

<sup>26</sup> Jesuuri nojori sequequiaarijuhuaj:

—Nia niishitiojonu saniriiria taa Pueyaso muerasu supuequiaani, Pueyaso jiitiasano nojori quiniuria. Tamonu pueyanoori na cuhuariquiajinia nataquiaari jajau. Na nuhuaji, majaari na tacatenu quiquiaariuhua pueyaracaanu na natasano na niquiniuria. <sup>27</sup> Cuno pueyanoori na natanu nuhuaji camueenujuquiaari. Cuno jajauri moritiaquiaari juuca, niucuanio. Maashiquiaariiri na camaru maquesacari, na niquishacarijuhuaj. Tamonu juuca, na camaru tacatesacariuhua na natasano na niquiniuria, tariucua puereetucaari quiquiaari. Majaari na camaru niishiniu quiquiaari taa na moritiareeni. <sup>28</sup> Jiyari tamajaaja moritianijia natau. Coteenu moritiaari na jiyona. Na nuhuaji, na jajau coori supueya. Na nuhuaji, na jajauri querasapijiaacara quimiaa na noshiniuria. <sup>29</sup> Na natau jaara noshimia, na senonaari na senoojua na racatasocoriquiano. Pueyaso muerasuuri naa miishaanutaniyajuhuj.

*Miriqui pohuatasano mostaza jajaujiniji*

(Mt 13.31-32; Lc 13.18-19)

<sup>30</sup> Jesuuri socua sequequiaari:

—¿Juhua casaa niquishanote Pueyaso cumaacani? ¿Casaatate pa naata na saniniujiuniuni, taa Pueyaso Rupaa poonijija pueya jiuujiajiniani? Quiarijia nia pohuatareeraj. <sup>31</sup> Pueyaso Rupaari pueya jiuujiajinia quiya juhua mostaza jajau. Mostaza jajauri jiyanhua socua shiitianiyojua puetunu tamasaca jajaujinijijianaa, majaari puera maatia na niquishaanu. Pueyaso Rupaari naajuhua pueya jiuujiajinia, nocua nojori tiuushacari. <sup>32</sup> Mostaza jajau jaara natasaare, maashiyari socua puereetuucara tamasaca nataujiniji. Na cashacucuaari maashiya puereetucucua. Shuhuari na cashacucua cariquiaco nujuatujua shinishiqui.

Pueyaso Rupaari pueyano jiuujiajinia naa cumaacaracajuhuj, na jataniniuria na tojijia, maninia miiija na quiniuria.

*Jesu niishitiojosacari pueya saa na miriqui pohuatasanotaja*

(Mt 13.34-35)

<sup>33</sup> Jesuuri naa queraatia miriqui pohuatasanota niishitiojoquiaari Pueyaso rupaa saaja pueya niishishano casaata. Majaari socua jiyajeneta casaa na pohuatanu quiquiaari. <sup>34</sup> Naacuajitij, nojuaja jaara casaa niishitiojonu paniquiaari pueya niquiara, nojuajaari puetunujanaa naa niishitiojoquiaari miriqui na pohuatasanota. Tamajaaja nojori quishacari saniniujia, Jesuuri na saquiriojosano pueya niishitiojoquiaari maatia, casaa miriqui na pohuatasano sequenu paniriquiaani.

*Jesu pueyajetesacari paratu, mohuaca cajiniuucuanunio*

(Mt 8.23-27; Lc 8.22-25)

<sup>35</sup> Cuno juuca jaara niquiaari, Jesuuri na saquiriojosano pueya sequequiaari:

—Camina taquijiria pa quiaare.

<sup>36</sup> Cuniqijia pueya tiujiatiuyareeri, nojori quianura caminia taquijiria. Na pueyari Jesuta quiojiyaree cuno botejiniaja, tee nojuaja quiriqiaacuajani. Jesu quiasacari caminia taquijiria, tamasaca boteeri nata jaatequetariquiaajuhuj. <sup>37</sup> Maja puera na quenaacoyaquishacarijia, maruuri paratuta canashiyaquiji jiyanhua niquiaari nojoriicua nojori niuutiasacari. Paratuuri jiyanhua cajiniuucuatequiaari mohuaca nojori botejiniaacumara. Nocuaji na boteeri tari quera tiuquitiariquiaa mohuacata. <sup>38</sup> Jesuuri jiyacari bote pajamaji maqueriquiaa juhuajaniya. Na nacaacuaji mataja caco maqueriquiaari. Na pueya niucujatusacari nojuaja, Jesu sequetureeri:

—¿Niishitiojonanaa!, ¿majateeri quia puerenuujua paa tari tiuquitiaareeni?

<sup>39</sup> Jesuuri sanemaa. Paratu sequereeri, caminianio:

—¿Quia suraajere! ¿Tariucujaja!

Paratuuri tajimiohua. Caminiaari pootia maquee. <sup>40</sup> Jesuuri na saquiriojosano pueya sequereeri:

—¿Casaara nia puereya puerani? ¿Niaateeri Pueyasooocua tiuyashijiaca quiya-  
jaaruhujaj?

<sup>41</sup> Nojoriiri jiyanoohua shiriiquitiurii. Tama nojorijiaarijia sequetooquiaari:

—¿Cantejaaranojoni? ¡Paratu, caminiaari na tojirii!

## 5

*Gerasa jiyajinjinio samaruhuaraca pueyanojiniji pohuatasano*  
(Mt 8.28-34; Lc 8.26-39)

<sup>1</sup> Na nuhuaji, nojoriiri caminia taquijiria tiuquijioquiaari, Gerasa jiyajinia. <sup>2</sup> Jesu tacasacari botejiniji, nocua niqiaariiri tamonu pueyano raacajiniji, macunucua nu-  
cuhua paaquiosaquiji. Cuno pueyanoori samaruraca quiquiaari. <sup>3</sup> Raacajinia quijia  
quiquiaariiri. Majaari na naata moronu quishaaquiaari quenaaja cumayocua shipinis-  
hano casaata. <sup>4</sup> Pueyari juucua na morojoua, na cashacucua, na juaashiquiacanio. Saaja  
na turojotajaari. Majaari quenaaja na nujuataja pueyano quiniu quijia. <sup>5</sup> Pueyaracaanu  
tuhuananuhucua rucuanajoquiaariiri, raacajinianio. Na rucuanajosacari sariyacojo-  
juaari, juuca, niucuanio. Tama na cuaqueyajaaja piquijia saitiaari. <sup>6</sup> Nojuaja jaara  
Jesu niqiquiaari tucuaaanuji, nocua netequiaariiri. Jesu cariquimiaji mojuquetaseeri.  
<sup>7</sup> Jesuucuaa nacareeri:

—¿Casaacua miji quia niyani, Jesunaa, jiyocuacaanu Quijia Pueyaso Niyanunaa? ¡Quia  
secojiyanijia maja naquiya quia miiniuria janiya!

<sup>8</sup> Samaruhuaraca pueyanoori naa sequeree Jesutej, tari Jesu sequenuucua samaru  
nojuajiniji na tohuatanura.

<sup>9</sup> Jesuuri na nequesotaree:

—¿Taa sesanaacatequia?

Na riuacuareeri:

—Canaa jiyanoohua queraatiani, cunora cua sesa “Queraatia”.

<sup>10</sup> Cuno samaruuri jiyanoohua Jesu secojoriquiaa maja nojori na taanuunura cuno jiya-  
jiniji. <sup>11</sup> Cushiyari jiyacari cateca naataja miaquenuuriquiaa tuhuananucari. Jiyanoohua  
queraatia cushiyari quiriqiaa. <sup>12</sup> Samaruhuari Jesu secojoree naatej:

—¡Canaa quia jiyarore canaa tiuquitianura cuno cushiyacua!

<sup>13</sup> Jesuuri samaruhua jiyaroree. Samaruhuari pueyanojiniji tohuareetaquee. Cushiy-  
acua tiuquitiaseeri. Dos mil cushiya naasucuaari quiriqiaa. Cuno cushiyari cocuate-  
quiaari, samaruhuaraca nojori quiniucua. Tacobiniji totesee caminiajiniaari. Puetunu-  
juanaari tii shushiniuuquiaari.

<sup>14</sup> Cushiya cojuanaari jiyacari netecuaturuhua na shiriiquiniutia. Na tiacajinia pueya  
poojotanuuhua nojori niquishanoori, cuhuariquiacajinia quinia pueyano. Nocuaji  
pueyari nijioquiaari nojori niqiniuria casaate quiquiaarini. <sup>15</sup> Cuno pueya jaara  
tiuquijioquiaari Jesu quishaqui, cuno tarijia samaruhuaraca quijia pueyano niqiu-  
tiushiiri panaatia cajiyano, toqueraca. Naa nojori niquishacari nojuajatej, pueyari  
pueretuquiaari. <sup>16</sup> Jesu miishano niqitiuniaari cuno pueya pohuataquiaari taa  
samaruhuaraca pueyano miishaareeni, mariyata cushiyajinjinio. <sup>17</sup> Cunora, cuno  
pueyari Jesu secoteree na quianuhuaa cuniquiji, nojori jiyajiniji.

<sup>18</sup> Jesu jaara tacaquiaariuhua na botejinia, cuno tarijia samaruhuaraca quijia  
pueyanoori nata quianu paniquiaari juucua. <sup>19</sup> Majaari Jesu paniniu quiquiaari. Na  
sequeree saajaari:

—Quia quiaarohua quia tijinia quia pueyacua. Quia pohuatasuhua nojori taa Pueyaso  
miirii quiajaniani, quiocua na taraajenuucua.

<sup>20</sup> Pueyanoori quiaarohua. Nojuajaari pohuatanu coteequiaari cuno na jiya diez  
tiacajinia taa Jesu miiquiaari maninia nojuajani. Puetunu pueyajanaari jiuujiatequiaari  
nojori tojishacari nojuaja. Cuno diez tiaca sesa quiquiaari “Decápolis”.

*Jairo niyatujiniji pohuatasano, Jesu toque quiana maajininijihuujaj*  
(Mt 9.18-26; Lc 8.40-56)



<sup>21</sup> Jesu jaara niuutiaquiaariuhua botejinia caminia taquijiriohua, queraatia pueyari nocua tiuquiiioquiaari na quishaqui. <sup>22</sup> Jesu quishacarijia caminia casaqueyaji, nocua tiuquiquiaariiri tamonu pueyano, Pueyaso secojojua tia jiyaniijia. Na sesa quiquiaari Jairo. Jaara Jesu niquiquiaari, na cariquimiaji mojoquetaseeri. <sup>23</sup> Naa Jesu secojoree jiyanohuari:

—¡Quiyatu quera cusoya! ¡Miji, quia juaashiquia nocua quia niaquee na naatanuhua!

<sup>24</sup> Jesuuri jiyacari nata quiaaree, na saquirojosano pueyano. Puera jiyanohua queraatia pueyari na nuhujiriquiaa. Jesu tanuujuturiquiaari. <sup>25</sup> Cuno pueya tajinia quiriqiaajaariuhua tamonu cusosu maaji. Doce marijiaari tari na shoconujuquiaari pueyaracaanu na naatesacari. <sup>26</sup> Queraatia naarajonaari nareja naquiya na miiquiaari. Socua na jiyacatojoquiaari saajaari. Najuhuana na cumaneeca puecaquiaariiri na naarajosaanura juucua. <sup>27</sup> Cuno maaji jaara Jesujiniji tojiquiaari, na nijiniji na nuhujiquiaari jiyasohuari. Na tucuaque toque quiasee pueya tajiniaari. <sup>28</sup> Cuno maajiiri tama sequequiaarijiaaja: “Janiya jaara quenaaja na toque quiareni, janiyari naatanutaniuhuani”. <sup>29</sup> Naacujitij, na quiasacari Jesu toque, na nanacaari ritia curetaquee. Jiyacari na niishiquiiri. Tama sequequiaarijiaarijia: “¡Cua cusonu tari tajiyatema!” <sup>30</sup> Jesuuri jiyacari niishiquiiri nojuaja na cumaacata cusosu naatanirii. Cunora, nojuajaari tacareecuaree na niquiniuria pueya. Pueya nequesotareeri:

—¿Cante cua toque quiareeni?

<sup>31</sup> Na saquirojosano pueyari na sequeree:

—Quiaacuajaari queraatia pueya niquiya quia tanuujiyano. Quiaari najuhuana nequesotaariquiohua saajuhujaj: “¿Cante cua quiareeni?”

<sup>32</sup> Jesuuri saaja na shocuaqueya niquinijiriquiaa, na niquiniuria cante na toque quiareeni. <sup>33</sup> Maajiiri jiyacari tetecariquiaa na puerenuta. Jesu cariquimiaji mojoquetasee ritiaari. Nojuajaari niishiquiaari Jesu cumaaca na naataniriohua. Cunora, Jesu sequeree puetunu seetanujuaanaari. <sup>34</sup> Na nuhujaj, Jesuuri na sequeree:

—Sanaunaa, cucua quia tiuuniucua, quiaacuaja tari quia cusonujiniji naatarohua. Juhujaniya quia quiaarohua. Quia cusonucua tari tajiyatemohua quiocuaaji.

<sup>35</sup> Jesuuri cuno maajiicua pocuariquiaajaa pueya tiuquiiijosacari Jairo tiajiniji. Cuno pojoriiri maaji samiriu que sequetusee:

—¡Quia niyatu tari cusoquee! Maja najuhuana Niishitiojona riniu quia tiajiniaari.

<sup>36</sup> Jesuuri nojori sequesano tojirii. Naaratej, maaji samiriu que sequereeri:

—¡Maja puerenu! ¡Cucua quia tiuuri saaja!

<sup>37</sup> Majaari Jesu paniniu quiquiaari tamasa quiojonura nata. Saaja nata quiojoquiaari cutaraari Pedro, Santiago, Santiago tarajanu Juannio. <sup>38</sup> Nojori jaara tiuquiiioquiaari Jairo tiajinia, pueya niquishii nujuquetiuyanoori, sariyocuatuyanonio. <sup>39</sup> Jesu jaara tiajiniaaco tiuquiquiaari, cuno pojori sequereeri:

—¿Casaara puera nia cojuatuneyani? ¿Casaara naa nia nujuqueyani? Maaji samiriu maja macu. Nareja maqueyano.

<sup>40</sup> Pueyari saaja Jesu saroojotaquiaari nojuaja na rerequetenuta, naa nojori na sequenuucuatej. Jesuuri cunora nojori tohuananijioree tiajiniaacoji. Jesuuri macuucua sohuacamara tiuquinitiaquiaari Jairo necocuata, tama na pueyajaajanio, cuniqui tii nata qutiuriquiaani. <sup>41</sup> Macu juaashiquiajiniji quiaseeri. Na sequereeri:

—Talita, cumi.

Nioori pueyano rupaajinia sequeya: “¡Maaji samiriuniaa, quia sequeyanijia, quia sanere!”

<sup>42</sup> Jiyacaritij, maaji samiriuri ritia sanequee. Juhucatecara rucuanereeri. Doce marijiaari tari cuno maaji samiriu shocojoquiaari na queyata na quishacari. Pueya niquishacari naa Jesu miishanotej, nojoriiri jiyanohua jiuujiatequiaari. <sup>43</sup> Jesuuri jiyanohua nojori rootaree maja nojori pohuatanura pueya niquiara na miishano. Saaja sequere cutaraari maaji samiriu cuara mianuutesaaria.

## 6

*Jesu quishacari Nazaret tiacajinia*  
(Mt 13.53-58; Lc 4.16-30)

<sup>1</sup> Jesuuri cuniquiji quiaquiaariuhua tama na jiyajiniohuaaja. Na saquiriojosano pueyari nata quiojoquiaarijuhuaj. <sup>2</sup> Jaara quiquiaari samaatenu juuca, Jesuuri tii niishitiojonu coteequiaari Pueyaso secojojua tiajinia. Queraatia pueyari na tojitiariquiaa. Nojoriiri jiuujiatequiaari. Tamajaaja sequetooquiaariiri:

—¿Tee nio pueyano niishitiojosaaquiaari puetunu niojuanaani? ¿Teje na masecanu puetunu na niishishanojuanaani, cuno cumaacanio, jiyajeneta miishano na miiniuriani?

<sup>3</sup> Nojuacuajaari suruhuatujiniji casaa shipinijiona tiajiniaacora, niya pa tiacajiniani. Nojuajaari pa tiacajinia quinia María niyanu. Niya quiyajaariuhua na tapueyocuaca: Santiago, José, Judas, Simónnio. Na rimiatuhuari niya quiyajuhuj pa tiacajiniani.

Cunora, majaari nojori tojtianu paniniu quiquiaari Jesu. <sup>4</sup> Naaratej, Jesuuri nojori sequeree:

—Pueyari tiquiyocua Pueyaso sequenu panishano caminiujiunia tojiniu paniquiaa cutara. Saaja tama na tiacajinijinio pueya cutaraari maja na tojitiuniu paniniu, na jiyasojinijinio supueno pueyajuhuj, tama na tiajinia quiniaajaajanio.

<sup>5</sup> Naacuajitij, nocua nojori tiuyaquiniucua, majaari na naata na cumaacata na miiniu quiquiaari. Saaja secaya cusosuhuacua niojoquiaari na juaashiquiaari, nojori na naatanijionura. <sup>6</sup> Jesuuri jiuujiatequiaari nojori tiuyaquishacari nocua. Na nuhuaji, Jesuuri rucanejoquiaari pueya na niishitiojonura, queraatia shiitianiyojua tiacajinia catecaja na tiaca shocua.

*Jesu jiyaramiquishacari na saquiriojosano pueya Pueyaso rupaa pahuatanura*  
(Mt 10.5-15; Lc 9.1-6)

<sup>7</sup> Na nuhuaji, Jesuuri na saquiriojosano doce pueya sequequiaari nocua nojori niniuria. Nojori jiyaramiquiniu coteereeri, nojori quiojonura caapiqui, caapiqui, Pueyaso rupaa nojori pahuatanura. Nojori niqutioree na cumaacari samaruhua nojori tohuatanijionura pueyajiniji. <sup>8</sup> Nojori sequereeri maja nojori panura nojori panishano, saaja nojori miojotu cutara. Nojori sequereeaariuhuj, maja nojori panura caashoque, coseyaca, cumaneecanio. <sup>9</sup> Nojori sequereeri saaja nojori cushiniuria na sapatu cutara, maja socua toque nojori panura na cushishocoriquiano. <sup>10</sup> Nojori sequereeaariuhuj:

—Niaa jaara tiuquishiiquia tamonu tiajinia, cuniquijia nia jiyojetare, niaa jaara cuniquiji quiaarejaatijia. <sup>11</sup> Pueya jaara nia tiuqunitianu paniyaquiri na tiajinia, nia pahuatasano nojori tojiniu paniyaquishacarijuhuaj, niocua cuniquiji quiaare. Niocua nia nioluacaacuaji jiya joocua piitiare nojori niqiara, nojori niishiniuria Pueyasoori nojori saniitionutaniya, na rupaa tojiyashijianucua nojori quiniucua.

<sup>12</sup> Na nuhuaji, Jesu jiyaramiquishano pueyari quiojoquiaari. Nojoriiri Pueyaso rupaa pahuatanuuquiaari pueya tacatonuhua nojori jiuujia Pueyasoocua. <sup>13</sup> Nojoriiri queraatia samaruhua tohuatanijioquiaari. Naajuhuj, nojoriiri cusosuhuacua tarooquiaari naana jajau shiyocua, nojori naatanijiosacari queraatia pueya.

*Tiuquinijiona Juan mosacari*  
(Mt 14.1-12; Lc 9.7-9)

<sup>14</sup> Jesu miishanojinijiiri caminiujiushaaquiaari puetunu cuno jiyajiniajanaa. Naacuajitij, Galilea jiya jiyaniijia Herodesri Jesujiniji pahuatasaaquiaarijuhuaj. Herodesri cunora sequequiaari:

—¡Tiuquinijiona Juanqui samiitiarohuacuaa, cua mosano pueyanotej! Naaratej, cuno Jesuuri cuno cumaacaraca, jiyajeneta casaa na miiniuria na cumaacata. Nojuacuajaari cua mosano Juan samiitianohua.

Jiyaniijia Herodesri na jiyajenetaquiaari jiyanohua cumaacaraca Jesu quiniucua. <sup>15</sup> Tamasaca pueyari Jesujiniji sequequiaari tamaatia saniniuuujia, nojori jiyajenesacar-jiuhuj. Naa sequetuquiaariiri:

—¡Nojuacuajaari tariucuacaanu pueyara Pueyaso sequesano caminiujiunia Elías!

Tamasaca pueyari saniniuujia naa sequequiaari, nojori jiyajenesacarijiuhujaj:

—Nojuacuajaari quiarijia nio pa quishacari Pueyaso sequesano caminiujiunia pajaniyara, juhua tariucuacaanu pueyara Pueyaso sequesano caminiujiuniaajuhujaj.

<sup>16</sup> Herodes jaara pueya sequesano tojiquiaari, nojuajaari saa sequequiaarijia:

—Nojuacuaja Tiuquinijiona Juan, cana cua nacataniquianucujani. Samiitiarohuacuaaquiiri.

<sup>17</sup> Tiuquinijiona Juan moyaquishacarijia, nojuajaari Herodías rupaaajinia nujuate-saaquiaari. Cuno maaji Herodíasni, nojuajaari Herodes tarajanu Felipe niquiocua quiquiaari coteenu. Herodesri tarajanu Felipe niquiocua jaariutiaquiaari necocua.

<sup>18</sup> Nocujaj, Tiuquinijiona Juanri Herodes nacasujujua. Naa na sequejaari:

—¡Pueyasora, majaari maninia quia jiitianura quia tarajanu niquiocua!

<sup>19</sup> Cunora, cuno maaji Herodíasri maja na niquiniu paniniu quijia Tiuquinijiona Juan.

Na monu panijiaari. Majaari na naata quiquiaari saaja. <sup>20</sup> Herodesri Tiuquinijiona Juan

puereja. Nojuajaari niishiquiaari Tiuquinijiona Juanri maninia pueyano, Pueyaso tojjijia

pueyano, maja sesa miijia. Naaratej, Herodesri maninia na cojuateja nujuatejojuajinia.

Majaari na shanacunu quiquiaari sesa na miishaanura. Herodesri Tiuquinijiona Juan

pohuatasano tojiniu maniniucujaja. Nojuajaari saaja noojia niquijjoteja quiquiaari.

Majaari na niishiniu quijia taa na miiniutianiyani. <sup>21</sup> Saniniuujia, cuno maaji Herodíasri

pueyaracaanu niishiriojoriquiaa, Tiuquinijiona Juan na motenura. Jiyacaritij, namitia

nera, Herodes rasaanu juuca quiquiaari. Cuno juuca, jiyaniijia Herodesri queraatia pueya

ata queranacuree. Na queranacunura, nojuajaari Galilea jiyajinijinio jiyaniijianucua

masuuquiaari, tama na soldadohua jiyaniijianucujajaajanio. <sup>22</sup> Jiyacaritij, Herodías niya-

atuuri tiuquiquiaari queranacusaqui, tii na nianujunura puetunu pueya niquiarajanaa.

Herodesri niyacoo nianujunu shuquiritiaquiaari jyanohua. Nata miaquenaa pueyari

jiyanohua na shuquiritiaquiaarijiuhujaj. Naaratej, jiyaniijia Herodesri niyacoo sequeree:

—Cua masere quia panishano. Janiyacua quia niquitioreni.

<sup>23</sup> Herodesri socua puetunu pueya niquiarajanaa na sequerohuacuhujaj:

—¡Seetanujanaa quia sequeyanijia, maja cua sapojonu! Janiyari quia niquitionutaniya quia masesanoni. Quiaa jaara cua masere cua jiitiasano cajiniocua, naajaa, janiyari quia niquitionutaniyani.

<sup>24</sup> Niyacoori tohuataquee na nucua Herodías na nequesotanura. Na sequeeseeri:

—Cua nucuaanaa, ¿cuaa cua masenutaniya cua quenuni?

Na nucuaari na sequeree:

—¡Quia masere Tiuquinijiona Juan naca!

<sup>25</sup> Cuno niyacoori ritia tiuquiquiuhua jiyaniijia Herodes quishaqui. Na sequereeri:

—¡Quiarijia cua niquitiore Tiuquinijiona Juan naca miacojuajinia!

<sup>26</sup> Naa jiyaniijia Herodes tojishacaritij, jyanohua taraajequeeri. Naajaa, seetanujanaa

na sequenuucua na masuusano pueya niquiara, majaari tari na naata ruuretanu

quiquiaari cuno niyacoo masesano. <sup>27</sup> Naaratej, jiyaniijiaari ritia jiyaroree na soldado,

Juan naca na niquitionura cuno niyacoo. <sup>28</sup> Soldadoori quiaaree nujuatejojuajinia. Juan

nacataseeri. Na naca patamohua miacojuajiniaari. Soldadoori niyacoo na niquitiosuhua.

Nojuajaari na nucua na niquitiose saniniuujia.

<sup>29</sup> Tiuquinijiona Juan pueya jaara na niishiquiaari, na maanu patuquiaariiri, na jamotusocoriquiano.

*Jesu mianuutesacari cinco mil pueya*

*(Mt 14.13-21; Lc 9.10-17; Jn 6.1-14)*

<sup>30</sup> Jesu jiyaramiquishano pueyari tiuquijioquiaariuhua Jesuucua nojori rucuanajonu nuhuaji Pueyaso rupaa nojori pohuatanura. Nojoriiri Jesu pohuataquiaari puetunu nojori miitishanojuanaa, nojori niishitiojosanojinijinio. <sup>31</sup> Na nuhuaji, Jesuuri nojori sequeree:

—Miji, pueya quiaquishaqui pa quiaare tamaqui, tii pa samaatenura rupaquijia quenaaja.

Jiyanohua queraatia pueyari pueyaracaanu nojoriicua nijjoriquiaa. Tamasacaari quiojoriquiohuacuaa. Tamasacaari saniniuujia shusha tiuquijjoriquiaacujua. Naaratej, majaari jeya nojori quiniu quiquiaari na miaquenura quenaaja. <sup>32</sup>Jiyacaritij, Jesuuri saaja na jiyaramiquishano pueyata quiaquiaari botejina, pueya quiaquishaqui. <sup>33</sup>Queraatia pueyari saaja nojori niquitiurii quiaano. Cuno pojoriiri Jesu niishitiuquiaari. Naaratej, puetunu caminia shuriuquioco tiacajinijijianaa pueyari netecuatuquiaari. Nojoriiri Jesuucujaji cutesee. <sup>34</sup>Jesu rosesacari botejiniji, saaja queraatia pueya niquiriiri. Nojori na niquishacari, cuno pojoriicua taraajequiaariiri. Nojoriiri juhua cojuanaaju borregohua quiriqiaa. Naaratej, Jesuuri nojori niishitiojonu coteeree queraatia casaa Pueyasojiniji. <sup>35</sup>Jaara quiquiaari tari tenacari, na saquiriojosano pueyari nocua nijioquiaari. Na sequetuseeri:

—Tari tenacari. Paa tiajiyaqui quiyani. <sup>36</sup>Pueya quia sequere, nojori cuaara quiojoora cateca naataja tiacajinia, na miaquesocoriquiano nojori masenura tii.

<sup>37</sup>Jesuuri nojori riucuaaree saaja:

—Niaa mariqui nojori miaquetereja saniya.

Nojoriiri na sequeree:

—¿Quiaateeri paniya queraatia pan masenuucua canaa quianura puetunu cuno pojoriirijanaa? ¡Pa mianuutenura nojori, panishiyari dosciento cumaneeca! Majaari pa jiitiano.

<sup>38</sup>Jesuuri nojori nequesotaree:

—¿Taa pan nia jiitiaani? Nia niquishiitioj.

Nojori jaara niishiquiaari taa pante quiyani, na sequetusuhuari:

—Cinco pan quiya, caapiqui sapitiaajanio.

<sup>39</sup>Jesuuri jiyacari na pueya sequeree nojori cajitijionura pueya jiyasocujajinia, na mianuutesocoriquiano. <sup>40</sup>Pueyari cajituriu cien, tamocora cincuenta, tamaqui socua cien, camiria cincuenta. Pueyari naa queraatia maapuera raquiriojotasaaree nojori mianuutesaanura. <sup>41</sup>Jesuuri cuno pan pataree, sapitiaajanio. Na nuhuaji, jiyocuaacaanu maureeri Pueyaso na secojonura nocuara. Na nuhuaji pan necasequiaari na saquiriojosano pueyaraari, nojori serotasocoriquiano pueya. Cuno caapiqui sapitiaaja shiquioreereejaariuhua puetunu pueyarajanaa. <sup>42</sup>Puetunu pueyajanaari maninia miaquenuquiaari. Maninia tooquioreejaariuhuj. <sup>43</sup>Na nuhuaji, doce canaasatuuri mishinijiosaaquiaari pan raacuata, sapitiaaja raquiquiatanio. <sup>44</sup>Cinco mil pueyari cuno panjiniji miaquenuunaa quiquiaari.

*Mohuaca caco Jesu rucuanenujiniji pohuatasano*

*(Mt 14.22-27; Jn 6.16-21)*

<sup>45</sup>Nio nuhuaji, Jesuuri na saquiriojosano pueya tacanitiaquiaari botejina, nojori puetanura nojuaja caminia taquijiria Betsaida tiacajiniara. Jiyacaritij, Jesuuri pueya sequeriquiaa nojori quiojonuhua na tiacajinihua. <sup>46</sup>Pueya jaara tari quiojoquiaariuhua, Jesuuri tuhananuucua tacaquiaari tii na secojonura na Que Pueyaso. <sup>47</sup>Jaara niniquiaari, boteeri tari caminia jiuujiajinia jaaretariquiaa. Jesuuri juhuanajuaja na jateesaqui quiriqiaajaa. <sup>48</sup>Jesuuri nojori niquiquiaari najuhuana juaarioconuyano. Majaari nojori naata jaaretanu quiriqiaa, puera paratu piyarojosacari nojoriicua. Quera juhuaquenu panishacari, Jesuuri nojori rupuesee. Mohuaca caco canujuriquiaari. Quera nojori tajiriquiaari. <sup>49</sup>Nojori jaara na niquitiuquiaari mohuaca caco canujiyano, nojoriiri na jiyanitiuquiaari samaru. Nocujaji sariyocuatereeri. <sup>50</sup>Puetunu nojorijianaari na niquitiurii. Shiriiquitiuriiri. Jesuuri ritia pocuaaree. Nojori sequereeri:

—¿Casaara nia puereyani? ¡Nioojia nia cumaquiri! ¡Maja pueretunu! Janiyacuajanjia.

<sup>51</sup>Botejina tacasee nojoriicuaari. Paratuuri jiyacari pueyajequee. Nojoriiri na shootiariquiaa tacuriitia, jiyanohua na jiuujiatenuta. <sup>52</sup>Nojoriiri juhuanajuaja maja na niishiniu quiquiaari Jesu miishano, queraatiara na jiyatesacari pan, pueya miaquesocoriquiano. Nojori jiuujiaaari juhua ninishiQUI quiquiaarijia.

*Jesu naatanijosacari cusosuhua Genesaret jiyajinia*

*(Mt 14.34-36)*

<sup>53</sup> Jesuuri na pueyata caminia niuutiaquiaari. Tiuquijioseeri Genesaret jiyajinia. Nojoriiri tii morotasee na bote. <sup>54</sup> Nojori jaara tohuareetaquiaari botejiniji, cuniquijinio pueyari ritia Jesu niishiquiaari. <sup>55</sup> Pueyari jiyacari netecuatuquiaari, Jesujiniji nojori pohuatanura puetunu cuno jiyajiniajanaa. Cusosuhuari juhuacatecara patootasaaquiaari na matucuajinia tee Jesu quiriquiaa na rucuanajosacari nojori jiyajiniacuajani. <sup>56</sup> Tiquiyocua Jesu rucuanajosacari, cusosuhuari nocuaji niojotasaaquiaari nucuaco, tuhuaqui tiacajinia, queraatia shiitianiyojua tiacajiniajuhuaj, cuhuariquiaca-jiniano. Pueyari Jesu secojoree cusosuhua na quiatenura quenaaja na toque casaca. Canapuate na toque quiaquiaarini, puetunu nojorijianaari na cusonujiniji naatacoquiaariuhua.

## 7

*Casaate sesoriquiara pa jiyateja Pueyasorani*  
(Mt 15.1-20)

<sup>1</sup> Jesuucua catecanoquiaariiri Fariseocuaca, Moisés Rootasanojiniji niishitiojonaanio, canapuate Jerusalén tiacajiniji nijioquiaaricuajani. <sup>2</sup> Cuno pojori quishacari tii, nojoriiri noojiaqueya Jesu pueyajinijinio niquiquiaari shuquitioojua miaqueyano. Nojoriiri jiyanjia, nojori rucuanajosacari sesa miijiaca pueya tajinia, sesa nojori quiniu na naata nojoriicua pacunu. Nojoriiri cunora shuquitianu jitiquiaari, nojori jiyanihacari nojori jiuujia naasucua curuushiniutianiya, shuquitioojua nojori miaquesacari. Naaratej, cuno pueyari Jesu pueya pocuanu coteequiaari. <sup>3</sup> Cuno Fariseocuaca, puetunu narta Judiocuacajanaanio, nojoriiri maja na cartenu quijia tariucuacaanu nojori supuetanaa niishitiojosano. Naaratej, majaari nojori miaquenu quijia shuquitioo. <sup>4</sup> Naacuajitij, nojori jaara miaquesano niquitiojosaquiji tacatequiohua, majaari nojori miaquenu shuquitioojua. Socua queraatia quiyari cuno pojori niishishano. Naacuajitij, nojoriiri jiyaniquiaa, sesa nojori quiyaquiniuucujaji Pueyaso niquiara, nojori cuaara na ratujua jeequejoora, pataco, coshi, na maquetucuanio. <sup>5</sup> Naaratej, Fariseocuaca, Moisés Rootasanojiniji niishitiojonaanio, nojoriiri Jesu nequesotaquiaari:

—¿Casaara quia pueya tojitiaaquiya pa supuetanaa niishitiojosanoni? Nojoriiri maja na shuquitianu quiquiaa na miaquenuunura.

<sup>6</sup> Jesuuri cuno pojori riucuaaree:

—¡Niaari sapuenu juhua maninia pueya niquishano! ¡Niaacuajaari seetanujuanaa sesa miijiaca! Pueyaso sequesano caminiujiunia Isaíasri maninia sequequiaari nijajaniyajini-jicuaaja, naa na naajiotasacari Pueyaso sequesano:

“Nio pueyari saaja na rupaata shuquiritiaa janiya. Nojori jiuujiaari saniniuujia tucuaacaanu quiya janiyajiniji. <sup>7</sup> Nojori miishano quiriani, cunoori najuhuanaj. Naa nojori miishanoni, majaari na shuquiritiniu janiya. Nojori niishitiojosanoni, cunoori tama pueya niishitiojosanojuaaja, maja cua sequesano”.

<sup>8</sup> Niaari cua pueya pocuariquiaa. ¿Niajaniyariuhuaaj? ¿Casaara Pueyaso sequesano nia tojiyaquiquiaanijia? Niaacuajaari Pueyaso sequesano tojiyaquiya, tama nia supuetanaa niishishanojuaaja nia miiniuria najuhuanaj.

<sup>9</sup> Jesuuri socua naa sequequiaari cuno pojoritij:

—Tama nia miiniu jiiitishanoocua nia miiniuriajaaja, ¡niaari Pueyaso sequesano shocortaa saaja! <sup>10</sup> Moisés cuajaari naa rootaquiaari: “Maninia quia miiri quia que, quia nucuano. Majaari nojori rerequetenu. Cante na que, na nucua sesacajani, cuno pueyano cuaara mosaaria”. <sup>11</sup> Niaari sequeya saniniuujia, maniniacuaja, pueyano jaara na que, na nucua sequere: “Maja cua naata naacutanu nijajaniya cua casamitia. Janiya tari Pueyasora jiyateree puetunu cua jiiitiasanojuanaani”. <sup>12</sup> Niaari sequequiaajuhuaaj, pueyano jaara naa sequeretej, maniniacuaja maja na naacutanura na que, na nucuano. <sup>13</sup> Naacuajitij, niaari Pueyaso sequesano shocortaa saaja, tama nia niishishanojuaaja nia miiniuria najuhuanaj. Cuno nia niishishanocuajaari saaja nia supuetanaajiniji caminiujiushano. Niaari socua queraatia casaa miiquiaa juhua cunojuhuaj.

<sup>14</sup> Naa na nacasunu nuhuaji cuno pojoritij, Jesuuri pueya rerejoterohua na shocua. Nojori sequereeri:

—Cua tojitiare puetunu niajanijajanaa, maninia nia niishiniuria. <sup>15</sup> Casaa pa miaqueyani, Pueyasora naajaa. Cunoori maja na naata pueyano jiyatenu sesa miijiara. Poojiajinia pa niishiriojosano cutaraari sesara pa jiyateya Pueyasora. <sup>16</sup> Cante numaacarani, nojuaja cuaara tojitiaara cua sequesano.

<sup>17</sup> Jesu jaara tiujiaquiaari cuno pueya, tiajiniaaco tiuquiyarohuari. Na saquiriojosano pueyari tii na nequesotaree pueya na niishitiojosanojiniji. <sup>18</sup> Jesuuri nojori sequeree:

—¿Niaateeri cua sequesano niishiyaquiyajuhuj? ¿Majateeri nia niishiniu? Puetunu pa jiniacuma tiuquijiajanaani, cunoori maja na jiyatenu sesa miijiara pajaniya. <sup>19</sup> Pa miasanoni, majaari na tiuquiniu poojiajinia, saaja pa seecojinia mishiya cutaraari. Na nuhuaji pocoma tajiyari pa marecuhuacuma.

Nio sequesana, pueya niishitiojoriquiaari, puetunu miaquesanojuanaari maniniacuaja pa miaquesocoriquiano. Maja cutaraari na naata na jiyatenu pajaniya juhua curuutuucara Pueyasora. <sup>20</sup> Jesuuri sequereejuhuj:

—Pueyano niishiriojosano sesa noojiajiniani, cuno cutaraari sesara na jiyatequiaa. <sup>21</sup> Pueyano jiuujiajiniji supueya cutaraari sesa niishiriojosano, sesa na miiniuria. Naacua-jitij, pueyanoori na camishoo maajipohua numuetucujua, seya numuetucujuhuj. Tamonu pueyano casami nohuasejoquiaari. Pueya moquiaajaariuhuj. <sup>22</sup> Narta pueyano niquiocua numuetucquiaari. Tamonu pueyano casamiicua jiaatiaquiaari. Jiyanohua sesa miiquiaari. Cuaracashijionu niishiyari. Tama na cuaqueyajaaja shuquiritiquiaari na miiniu jiiishanota. Narta pueyano miananajoquiaari. Tamonuucua tonujuquiaari. Naajuhuj, saaja tama na cuaqueyajaaja shuquiritiaja quiquiaari. Juhujaniya sesa miiquiaajaariuhuj, moseca na quiniucua. <sup>23</sup> Puetunu nio sesa miishanojuanaari pueya jiuujiajiniji supuequiaa. Cuno cutaraari sesa quijiara pueya jiyateja Pueyano niquiara.

*Taatu tiuushacari Jesuucua  
(Mt 15.21-28)*

<sup>24</sup> Jesuuri cuniquiji quiaaree Tiro tiaca shocua jiyajiniara. Tii tiuquishii tamonu tiajiniaari. Majaari na paniniu quiquiaari pueya niishiniuria nojuajiniji, tee na quiyani. Naajaa, majaari na naata jamaaniu quiriquiaa. <sup>25</sup> Tamonu maajiiri ritia Jesujiniji niishiquiaari. Neyatuuri samaruraca quiriquiaa. Naaratej, maajiiri Jesuucua niquiaari. Na cariquimiaji mojuquetaseeri. <sup>26</sup> Cuno maajiiri Sirofenicia jiyajinijinio taatu quijia. Jesu secojoseeri samaru na tohuataniniuria neyatujiniji. <sup>27</sup> Jesuuri maaji sequeree miriqui:

—Quia tarinitiare, muerasu cuaara coteenu miaquenuura. Majaari maninia muerasu pa jaariutianura na miaquesano, sareyacari jatasocoriquiano.

<sup>28</sup> Maajiiri Jesu riuuaree:

—Jaa, Jiyaniijianaa. Naajaa, sareyacuaajaari miaqueja cariquiacoji tatucuaaja, muerasu totinijosano miaquesano shiriya.

<sup>29</sup> Jesuuri na sequeree:

—¡Quiaacuaja maninia cua riuuaree! Quia tacateyarohua. Samarucuajaari tari tohuataree quia niyatujiniji.

<sup>30</sup> Maaji tiuquishacariuhua na tiajiniohua, neyatu riuriatasuhuari na maquetujinia mataano. Samaruuri tari tohuatano quiriquiaa nocuaji.

*Jesu jeeacasacari numueeju, tiquia pueyano*

<sup>31</sup> Jesuuri tacatequiaariuhua Tiro tiaca shocua jiyajiniji. Na tacatesacariuhua, Sidón tiaca shocojoquiaariuhuari, Decápolis jiya tiacanio. Galilea caminiajinia tiuquishuhuari.

<sup>32</sup> Tii na quishacari, nocua jaatucusaaquiaariiri numueeju, tiquia pueyano. Na jaatucunaari Jesu secojotuchiaari na juaashiquia na nianura nocua, na jeeanura cuno pueyano.

<sup>33</sup> Jesuuri pueyano numueeju jaatucuree tamocora pueyacuaji. Na numaama shirii na juaashiquiaari. Na nuhuaji, tama na juaashiquiajiniaaja riocoreeri. Na riacau cojuata

pocuaashijia niti quiareeri. <sup>34</sup> Jiyacaritij, jiyocuacaanu maureeri. Noojia niareeri. Na nuhuaji, cusosu numaa sequereeri:

—¡Efata!

Nioori pueyano rupaajinia sequeya: “¡Quia riatere!”

<sup>35</sup> Jiyacaritij, numueju numaari riatequee. Na nitiiri jeequeejuhuaj. Ritia pocuaquee maniniaari. <sup>36</sup> Jesuuri cuno pojori rootaree maja nojori pohuatanura na jecasano pueyanojiniji tamasa niquiara. Nojoriiri saaja tiqiyocua pohuatanu-uquiaari. Naa Jesu rootasacari na naatanijosano pueyatej, maja nojori pohuatanura na miishanojiniji, nojoriiri saaja socua jiyacatequiaari pohuatanura. <sup>37</sup> Pueyari jiyanohua jiuujiatequiaari Jesu miishano na niquitiushacari. Tama nojorijiaarjia sequetooquiaari:

—¡Puetunujuanaa miya maniniaari! Numuejunucua jiyateya tojitiajacaraari. Tiquianucua pohuateyajaarihuaj.

## 8

### *Jesu mianuutesacari cuatro mil pueya*

(Mt 15.32-39)

<sup>1</sup> Jiyacaritij, jiyanohua queraatia pueyari rerejoquiaari Jesu na tojtianura. Majaari nojori jiitianu quiquiaari casaa quenaaja na miaquetusocoriquiano. Jesuuri na saquiriojosano pueya piirii. Nojori sequereeri:

<sup>2</sup> —Nio pueyacua taraajeyanjia. Nojori tari jiuujianaraca juuca quiya niya cuata. Majaari quenaaja nojori jiitiatunu miaquesano. <sup>3</sup> Janiya jaara nojori jiyaramiquiriohua na tiajinia miaqueyojuani, nucuaco cusojoniuvarohuacua. Noojiaqueya nojorijinijinoori niyara nijiorucuaa tucuaaanuji.

<sup>4</sup> Na saquiriojosano pueyari na riucuaaree:

—¿Paatucua taa miaquetere nojori niyani, pueya quiyaquishaquini?

<sup>5</sup> Jesuuri nojori nequesotaree:

—¿Taa pan nia jiitiaani?

Nojoriiri na sequeree:

—Nareja siete.

<sup>6</sup> Jesuuri na pueya sequeree, nojori cuaara sequeera puetunu pueyajanaa nojori cajitiuniuria. Na nuhuaji, Jesuuri cuno siete pan pataree. Pueyaso secojoree nocuaraari. Na nuhuaji, na saquiriojosano pueyara na neecasereeri. Nojoriiri saniniuujia pueya na serotaree puetunujuanaa. <sup>7</sup> Secaja sapitiaaja jiitiatuquiquiaarihuaj. Jesuuri socua nocuara secojorohuacuahuaj. Na nuhuaji, na pueya sequereeri nojori niquitiojonura pueya. <sup>8</sup> Puetunu pueyajanaari maninia miaquenuuree. Tooquioreejaarihuaj. Miaquesano cureenota mishinijosaaquiaariiri siete canaasatu. <sup>9</sup> Na miaquena pueyari quiquiaari cuatro mil pueya. Na nuhuaji, Jesuuri nojori sequeree nojori quiojonuhua. <sup>10</sup> Na nuhuaji, Jesuuri botejinia tacataquiaari na saquiriojosano pueyata. Quiaareeri Dalmanuta jiyajiniara.

### *Fariseocuaca niquiniu panishacari Jesu miishano Pueyaso cumaacata*

(Mt 16.1-4; Lc 12.54-56)

<sup>11</sup> Fariseocuacaari Jesuucua tiuquijiosee. Nata juayonuutaseeri. Nojori saniniuujia Jesu, nojoriiri na sequeree juucua cuaara nojori niquishocoriquiano casaa miiria Pueyaso cumaacata. Nojoriiri naa na sequeturee, nojori niishiniuria Jesute seetanujuanaa Pueyaso Jiyarosano. <sup>12</sup> Jesuuri noojia niaree na taraajenuta. Sequereeri:

—¿Casaara nio pueya niquiniu paniya Pueyaso cumaacata miishanoni? Seetanujuanaa nia sequeyanijia, majaari cua niquitiniu quiniutianiya nijaniya cua cumaacata cua miishano.

<sup>13</sup> Jiyacaritij, cuno pojori tiujiaqueeri. Na pueyata botejinia tacataaruari. Caminia taquijiria niuutiaareeri.

### *Jesu numootesacari na pueya Fariseocuaca niishitiojosanoocuaji*

(Mt 16.5-12)

<sup>14</sup> Jesu pueyari na coseyaca niyajetatuquiaari. Nareja niquiriyatujua panniyojua jiitaturiquiaa botejiniari. <sup>15</sup> Jiyacaritij, Jesuuri nojori sequeriquiaa miriqui:

—Cua tojitiare. Niocua tama nia cuaqueyajaaja cojuariquia Fariseocuaca pan poreeta-jaacuaji, Herodes pan poreetajaacuajijihuaaj.

<sup>16</sup> Majaari na pueya niishiniu quiriquiaa naa Jesu sequesacaritij. Nojoriiri cunora tama sequetooriquiaajaaja:

—Pa jiyaniijia jiyoteeri naa pa sequeya, coseyaca pa paaquiniucua pa sasocoriquiano.

<sup>17</sup> Jesuuri na saquiriojosano pueya niishiriojosano niishiquii. Nojori sequereeri:

—¿Casaara naa nia niishiriojiya pan nia jiitiaaquishacarini? ¿Majateeri juhuanajuaja nia niishiniu tamonu juuca cua miishanojiniji? ¿Niaateeri cumajiuujiaacato, maja nia niishiniuria? <sup>18</sup> ¿Majateeri cua miishano nia niquiniu quiquiaacuaja nia namijiata? ¿Majateeri nia tojinu quiquiaa nia numaatajuhuj? ¿Niaateeri ritia niyajetarucuaa cua miishano? <sup>19</sup> Janiya jaara cinco pan neecasecanu cinco mil pueyatej, ¿taa canaasatu nia mishinijiocanu miaquesano cureenotani?

Nojoriiri na riucuaaree:

—Doce.

<sup>20</sup> —Naajuhuj, janiya jaara siete pan neecaserucuaa cuatro mil pueyatej, ¿taa canaasatu nia mishinijiorucuaani?

Nojoriiri na riucuaaree:

—Siete.

<sup>21</sup> Naaratej, Jesuuri nojori sequeree:

—¿Majateeri juhuanajuaja nia niishiniu naa cua miishanojinijitij?

Jiyacariti nojoriiri Jesu sequesano niishiquii.

*Jesu jeecasacari cariyojuaru pueyano, Betsaida tiacajinia*

<sup>22</sup> Na nuhuaji, Jesuuri Betsaida tiacajinia tiuquijioquiaari na pueyata. Tii na quishacari, Jesuucua jaatucusaquiaariiri cariyojuaru pueyano. Pueyari Jesu secojotujuiaari cuno cariyojuaru namijia na quianura quenaaja. <sup>23</sup> Jesuuri cariyojuaru quiaree na juaashiquiajiniji. Tiaca jiyaquiria na jaatucuyareeri. Cariyojuaru namijia piquiojoree na riacautaaari. Na nuhuaji, na juaashiquia niaree nocuaari. Na nequesotareeri:

—¿Quia naatate niquiniu shiitianiyojua quenaaja?

<sup>24</sup> Cariyojuaruuri niquiniu sanirii. Jesu sequereeri:

—¡Jaa! ¡Pueya niqiyaniijia, juhua nacuhua rucoyano!

<sup>25</sup> Jesuuri socua pacuterohua na juaashiquia nianu cariyojuaru namijiaacua. Cariyojuaruuri niquiniu saniriohuacuhuj. Jiyacaritij, tojetaarucujanaa maninia niquijiaa quiquiiiri. <sup>26</sup> Jesuuri na tiajinia na jiyarorohua. Cariyojuaru rootaree naari:

—Majaari tiacajinia quia quianuhua pueya quia pohuatanura cua miishanojiniji quiajaniya.

*Pedro sequesacari, Jesu seetanujuanaa Pueyaso Jiyarosano*

*(Mt 16.13-20; Lc 9.18-21)*

<sup>27</sup> Na nuhuaji, Jesuuri quiojoquiaari na saquiriojosano pueyata tucuaqui tiacajiniara Cesareya Filipino tiaca shocuaqueya. Na quiasacari nucuaco, na pueya nequesotareeri:

—¿Taa pueya sequequiaa janiyani, cantena janiyani?

<sup>28</sup> Nojoriiri na riucuaaree:

—Noojiaqueya pueyari quia sequequiaa, quiaanaari Tiuquinijiona Juan. Tamasacaari saniniuujia quia sequequiaacujua quiaanaari supuetana Elías. Naajuhuj, tamasaacari quia sequequiaa, quiaa naasucuaanaari tariucuaaanu pueyara Pueyaso sequesano caminiuujia, samiitianohuatuhuj.

<sup>29</sup> Na nuhuaji, Jesuuri nojori nequesotaree:

—¿Niajaniyarijiataj, taa nia sequeyani, cante janiyani?

Pedroori na sequeree:

—Quiajaniyacujua Cristo, Pueyaso Jiyarosano.

<sup>30</sup> Jesuuri nojori rootaree maja nojori pohuatanura tamasa niqiiara nojuajiniji Pedro niishishano.



*Jesu numootesacari na pueya, nojuaja mosaanutaniya*  
(Mt 16.21-28; Lc 9.22-27)

<sup>31</sup> Jiyacaritij, Jesuuri na pueya niishitiojonu coteequiaari tama nojuajiniijiaaja, taa Pueyaso Niyanu miishaanutaniya jiyano hua naquiya taraatiani. Naa na pueya sequeereeri:

—Parta Israel pueya jiyaniijianucuaari cua tojitiaaquiniutianiya, pueyacuara Pueyaso secojonaa jiyaniijianucuaajuhuj. Naajuhuj, Moisés Rootasanojiniji niishitiojonaari cua rerequetejaca quiniutianiya. Janiyari mosaanutaniyani. Na nuhuaji, janiyari jiuujianaraca juucajinia samiitianutaniuhuanu.

<sup>32</sup> Jesuuri naa seetanujuanaa nojori sequequiaari. Na pohuatasanoori maja miriqui na quiniu quiquiaari. Jesu jaara naa sequequiaari, Pedroori tamocora na jaatucuree. Cuniqúi na nacasureeri maja naa na pocuanuratej. <sup>33</sup> Jesuuri na nijiniara tacatequee saaja. Na saquiriojosano pueya na niquniutia, Pedro sequeereeri:

—¡Cua shuriucuaaji quia quiaare, Satanásnaa! Quia niishiriojosanoori maja Pueyasojiniji. Majaari quia niishiriojonu juhua Pueyaso panishano. Quiaari saaja juhua nio jiyajiniinio pueya niishiriojiya.

<sup>34</sup> Naa na sequenu nuhuajitij, Jesuuri na saquiriojosano pueya piirii, puetunu cuniqúi quiniaa pueyajanaano. Nojori sequeereeri:

—Pueyano jaara cua tojijiaara quiniu paniri, nojuaja cuaara niiria cucua, seetanujuanaa noojiata na panishacari janiya. Nojuaja cuaara niyajetaara tama na cuaqueya na cojuanurajaaja. Cuaara cucuara panitiaara tama na cuaqueyajaaja. <sup>35</sup> Saniniuujia, cante tama na cuaqueyajaaja shuquiritiniu panijiani, na nuhuaji, nojuajaari jiyano hua taraatia quiniutianiya pueyaracaanu. Saniniuujia, cante tama na cuaqueya panitiaa cua panishano na miiniuriani, na pohuatanura janiyajiniijiuuhuj, cuno pueyano cutaraari pueyaracaanu quiniutianiya shuquiriaatia. <sup>36</sup> ¿Niaarate maninia, pueyano jaara puetunu nio jiya casamijianaa jiitiare, na nuhuaji na sohuanu jaara jatasaare mani quiquiojinia pueyaracaanura? <sup>37</sup> ¿Pueyanote na naata Pueyaso niqutionu queraatia na casamijiniinio, Pueyaso jiyatenuhuara nojuaja pueyaracaanu rishijia na quiniuria nata? Maja na naata. <sup>38</sup> Cante cua rupaa pohuatanu caririquiya sesa miijiaca pueya niqiiara nio jiyajiniani, janiyari nojori caririquiniutianiyajaacuhuj. Naajuhuj, cante caririquiya mijiria quiniaa niqiiara sequenurani, janiya nojori jiyaniijiani, janiyari cua tacatesacariuhua nojori caririquiniutianiyajuhuj. Janiyari jiyacari cua Que cumaacata jiyocuacaanuji tacatenutaniuhuanu, maninia miijiaca cua Que seyatajuhuj.

## 9

<sup>1</sup> Jesuuri nojori sequequiaarijiuhuj:

—Seetanujuanaa nia sequeyanijia pueyanaa. Noojiaqueya niya quiniaajiniinio quiarijiani, majaari nojori cusonuunu quiniutianiya juhuanujuaja, nojori cuaara niquirijaatijia Pueyaso cumaaca tiuquiyano cucua, na muerasu jiitiriquianoni.

*Jesu jatasacari shacantuucara*  
(Mt 17.1-13; Lc 9.28-36)

<sup>2</sup> Seis juuca nuhuaji, Jesuuri jiyaconaja tuhananuucua tacaquiaari. Saaja nata quiojoquiaari Pedro, Santiago, Juannio. Jesu quishacari tuhananujiniiji, na cuaqueyari tamaatiuucua jataquiaari nojori niqiiara. <sup>3</sup> Na toqueeri shacantuquera jataquiaari, socua jiyano hua cohujara sohuanatuujiniiji. Nio jiyajinia toqueya jeequejonaari maja na naata jiyano hua cohujaquera toque na jiyatenu, taa Jesu toque jataquiaaricuaani. <sup>4</sup> Jiyacaritij, nojoriiri supuetana Elías niqutiuhuaari, supuetana Moisésjuhuj, Jesuta pocoojiyano tii. <sup>5</sup> Jiyacaritij, Pedroori Jesu sequeeree:

—Niishitiojonanaa, ¡canaa namitia niya quiyani! ¡Canaacua niaacuaji suhuorojoreni: quiara, Moisésra, Elíasranio!

<sup>6</sup> Jesu pueyari shiriqutiuriquiaa. Nocuaaji Pedroori naa juhujaniya pocuariquiaa. Majaari na niishiniu quiriquiaa casaa na pocuariquiaani. <sup>7</sup> Jiyacaritij, jiyocuacaanuji

cohuaja najacaari nojoriicua rosequiaari. Cohuajaari nojori mishiQuiomaa. Cohuaja najacajiniji, Pueyasoori tojishaaree pocuaano. Naa sequequiaaritij:

—¡Niocujaja cua Niyanuniyoyua, cua shuquiritasano! ¡Saaja nojuaja nia tojiri!

<sup>8</sup> Jiyacaritij, nojori jaara ritia niquinijionuuquiaari na shocuaqueya, majaari quenaaja tamonu na niquitiuniu quiquiaari socua. Saaja Jesuuri tamajaaja quiriQuiaa.

<sup>9</sup> Nojori rosetasacariuhua tuhuananuucocoji, Jesuuri nojori rootaquiaari maja nojori pohuatanuhuaa tamasaca niquiara nojori niquishano. Jesuuri nojori sequequiaari cuaara noojiajinia racatatuura, nojuaja jaara samiitarohuajaatijia. <sup>10</sup> Cunora, tama nojorijiaaritia maninia racataquiaari noojiajinia nojori niquitiushano. Maja cutaraari nojori niishitiuniu quiquiaari, casaara naa Jesu sequeree nojorini “cua samiitiasacariuhua”. <sup>11</sup> Cunora, nojoriiri Jesu nequesotaquiaari:

—¿Casaara Moisés Rootasanojiniji niishitiojona sequequiaacuararini, Elíasna coteenu tiuquiniutianihua Pueyaso Jiyarosocoriquianoocujaji?

<sup>12</sup> Jesuuri nojori riucuaaree:

—Seetanujuanaacuaaquiniatejaj, Elíasri coteenu tiuquiriquiano quiquiaari, puetunu cucujaji jeenucuariquianojuanaa. ¿Niaate niishiya casaara tariucuaaanu Pueyaso Rupaajinia naa naajiotasaaquiaari janiyajinijini: “Pueyaso Jiyarosanoori naquiya miishaanutaniya? Pueyari na soonutaniyajuhaaj”. <sup>13</sup> Janiyari seetanujuanaa nia sequeyani, Elíascuajaari tari niquiaari. Pueyari naquiya na miiquiaari taa nojori paniquiaaricujajani. Pueyaso Rupaajiniacuajaari naajiotasaaquiaari nojuajaari naa miishaanutaniyaquij. Seetanujuanaa tari naa miishaaquiaariiri.

*Jesu tohuatesacari samaru, caya samijiajiniji*

*(Mt 17.14-21; Lc 9.37-43)*

<sup>14</sup> Na nuhuaji, Jesu jaara tacatequiaariuhua na saquiriojosano pueya quishaqui, queraatia pueya niquishuhuari nojori shocua maano. Tii qutiuriquiaajaariuhua Moisés Rootasanojiniji niishitiojona. Nojoriiri Jesu pueyata juayonuutariquiaa. <sup>15</sup> Pueya jaara Jesu niquitiuquiaari, puetunu pueyajanaari nocujaji jiuujiatequiaari. Nojoriiri nocua netecuatuquiaari na saruhuatanura. <sup>16</sup> Jesuuri na saquiriojosano pueya nequesotaree:

—¿Casaajiniji nia juayonuutariquiaa cuno pojoritiani?

<sup>17</sup> Tamonu cuno pueyajinijinoori Jesu riucuaaree:

—¡Niishitiojonanaa, quiocua nitiaaree quiyanunijia! ¡Samaru jiitiaano! ¡Samaruuri na jiyatequiaari tiqiuara! <sup>18</sup> Tiquiyocua na quishaqui, samaruuri na pojotequiaa. Naa na cusojosacaritij, cushau jataquiaa na rupaamajiiri. Na quiacaa miaquequiaajaariuhua. Na nuhuaji, pootia maquiaari juhua macu. Quiyanuuri cunora sasacara quiyaree. ¡Socua piriuquiuniutianiyari! Janiyacuajaari tari sequeree quia pueyani, nojori tohuatenura cuno samaru nojuajiniji. Nojoriiri maja na naata na tohuatenu quiriQuiaa.

<sup>19</sup> Jiyacaritij, Jesuuri naa sequeree:

—¡Niaaqui Pueyasocua tiuyashijiacaja! ¿Janiyatucua pueyaracaanu nia jiitariquiani? ¿Janiyateeri pueyaracaanu nia rejeretananiyajaaniuhuaaj? ¡Miji nia jaatucure cuno caya samijia!

<sup>20</sup> Nocua jaatucusaareeri caya samijia. Samaru niquishacari Jesu, caya samijia miirii taraatiaari. Caya samijiaari pojoquee Jesu niquiara. Tii taquiriocuariquiaari. Na rupaamajiiri cushaariquiaa. <sup>21</sup> Jesuuri caya samijia que nequesotaree:

—¿Taacari na coteecanu naa na quiniuria juhuacatecarani?

Na queeri Jesu riucuaaree:

—Na naatujuajiniji naa quijiajuhanajaj. <sup>22</sup> Na cusojuanura juucua, cuno samaruuri sequeyarucua na pojotequiaa manijinia, moojiniajuhuaj. Naaratej, ¡jaara quia naata quiri, canaacua quia taraajere quenaaja! ¡Canaa quia naacure!

<sup>23</sup> Jesuuri na sequeree:

—¿Casaara naa quia sequeree janiyani, “jaara quia naata quiri”? Cante Pueyasocua tiuya noojiata seetanujuanaani, nera miishiyari puetunu na panishanojuanaa.

<sup>24</sup> Jiyacaritij, caya samijia queeri nacaree:

—¡Jaa, quiocua tiuyanijia! ¡Cua naacure socua cua tiuuniuria quiocua!

<sup>25</sup> Jesu niquishacari queraatia pueya nocua rerequeejiano, ritia samaru sequereeri:

—¡Tojiyashijia, tiquia samarunaa, janiya quia sequeyani, quia tohuatare nio caya samijiajiniji! ¡Puetunu quia tohuatarejanaa! ¡Majaari socua quia tacatenuhua, nocua quia tiuquiniuhua!

<sup>26</sup> Samaruuri sariyocuaquee. Caya samijia taquiriocuaterohuariuhuj. Na tohuata-sacari caya samijiajiniji, juhua macu na tiujiaqueeri. Nocuaji, queraatia na niqutianaa pueyari sequequiaari:

—¡Juaj! ¡Tari cusoquee cutaratej!

<sup>27</sup> Jesuuri na juaashiquiajiniji na quiaree. Na sanareeri. Caya samijiaari juhuajaniya nujuaquiaariuhua.

<sup>28</sup> Na nuhuaji, Jesuuri tiaco tiuquitiaquiaari na pueyataja. Tamajaaja nojori quishacari tii, na saquiriojosano pueyari na nequesotaree:

—¿Casaara maja canaa naata cuno samaru tohuatenu quiriquiaani?

<sup>29</sup> Jesuuri nojori riucuaaree:

—Jiyano samaruuri na naata tohuatanishaanu cutara saaja jiyanohua Pueyaso nia secojonuta nia miaqueyaquiniutia.

*Jesu pohuatanu pacutesacariuhua nojuaja mosaanutaniya*

*(Mt 17.22-23; Lc 9.43-45)*

<sup>30</sup> Nojori jaara quiojoquiaariuhua tiji, Galilea jiya tajimiaari. Majaari Jesu paniniu quiquiaari pueya niishiniuria tee na quiyani. <sup>31</sup> Jesuuri jiyacari saaja na saquiriojosano pueyata quiniu paniriquiaa. Jiyacari, nojori niishitiojoriquiaari. Naa nojori sequereeri:

—Janiyari pueya niqutiosaanutaniyani, nojori miiniuria janiya taa nojori paniyacua-jani. Nojoriiri cua monutaniya. Jiuujianaraca juucajinia, janiyari samiitianutaniuhua.

<sup>32</sup> Majaari quenaaja na pueya niishiniu quiriquiaa Jesu sequesano. Nojoriiri saaja puereriquiaa maninia na nequesoreenura casaa naa na sequenu paniriquiaani.

*¿Cante jiyaniijiajanaa cutarani?*

*(Mt 18.1-5; Lc 9.46-48)*

<sup>33</sup> Nojoriiri Capernaum tiacajinia tiuquiiiose. Tari nojori quishacari tiajinia, Jesuuri nojori nequesotaree:

—¿Casaajiniji nia juayonuutariquiaa nucuamajini?

<sup>34</sup> Nojoriiri saaja sanaajetaquee. Na juayonuutanujiniji niishitiuriquiaacuajaari. Nucuamaji, nojoriiri riutioconeetariquiaa teyano nojorijinijiniote socua tojishano pueyanoni. <sup>35</sup> Jesuuri jiyacari cajirii nojori na rootanura. Na doce pueya piiriiri. Nojori sequereeri:

—Cante socua tojishano pueyanora quiniu paniyani, nojuaja cuara quiiria juhua serura, narta pueya na naacunura puetunujuanaa.

<sup>36</sup> Na nuhuaji, Jesuuri mueya nujuatequiaari nojori tajinia. Cuno mueya paree nojori niqiuaraari. Na pueya sequereeri:

<sup>37</sup> —Cante jiyano mueya maseja na paniniutia janiyani, nojuajaari cua maseya-jaacuhuj. Cante cua maseyani, majaari saaja na masenu janiya. Jiyocuaanu Quijia cua Jiyarona maseyajaariuhuj.

*Tamonu pueyano tohuatanijosacari samaruhua Jesu cumaacata*

*(Mt 10.42; Lc 9.49-50)*

<sup>38</sup> Tamacari, Juanri Jesu sequereeri:

—¡Niishitiojonanaa, canaari tamonu pueyano niquiriini quia sesa jiyaniquiyano samaruhua na tohuatanijonura pueyajiniji! Nojuajaari maja pajaniyajinijinio. Nocuaji, ¡canaari na tenujureeni maja socua naa na miiniuriatej!

<sup>39</sup> Jesuuri nojori sequereeri:

—¿Casaara nia tenujureeni? Pueyano jaara maninia miishano miiri cua sesa cumaacata, na nuhuaji, nojuaja maja na naata sesa pocuanu janiyajiniji. <sup>40</sup> Nia niishiri, cante maja pa paracani, nojuajaari pa jiyano. <sup>41</sup> Nia rucuanijosacari, cante nia raateya

mohuacaniyojua na paniniutia janiyani, cua pueya nia quiniuucujuhuj, Pueyasoori saniniuujia maninia casaa na niqutionutaniya na jiitiasanojiniji.

*Puereeta quiniutianiyari sesa miijacara*

*(Mt 18.6-9; Lc 17.1-2)*

<sup>42</sup> 'Nio mueyari cucua tiuujia. Cante jiyano mueya miitirii sesani, nera maara socua maninia quiri, puereetujuajau saajia jaara morotasaare na riquiajiniji, caminia queronijinia jartasocoriquiano. <sup>43-44</sup> Nio miriqui cua niishitiojosano nia tojiri: tama nia juaashiquiaaja jaara nia jiyatere sesa miijara, nia juaashiquia nia rashiquiare juhuari niaa mariqui mani quiquiojinia jataaareeri, sesa miijia nia quiniuucua. Cuno mani quiquiojiniani, majaari mani maquesanu. ¿Niaateeri paniya tii nia jataaanura caapiquiquiojuata? Jiyanojua socua maninia cutaraari niaara, juaashiquiaaju nia tiuquinishaanura Pueyaso shuriucua, pueyaracaanu shuquiriaatia nia quiniuria nata. <sup>45-46</sup> Naajuhuj, nia niohuaca jaara nia jiyatere sesa miijara, nia rashiquiarenoj maja nia jataaanura mani quiquiojinia. ¿Niaateeri paniya tii nia jataaanura caapiquiniocuata, pueyaracaanu tii nia saniitiosaanura? Jiyanojua socua maniniaari niqiniocuata Pueyasocua nia tiuquiniuria, pueyaracaanu nata nia quiniuria shuquiriaatia. <sup>47-48</sup> Naajuhuj, nia namijia jaara sesa miitiriquia niajaniya, nia jiaterenoj. Naa nia tarinitiare sesa nia miiniu, maja nia jataaanura caapiqui namijiata pueyaracaanu mani noshishaqui. Sesa miijiaaari cuno mani quiquiojinia quejoosaanutaniya, pueyaracaanu nojori saniitiosaanura. Cuno manijinia, majaari porohua cusonuunu. Maniiri tii pueyaracaanu noshiya. Majaari na maquesanu. Jiyanojua socua maniniaari nia tiuquiniuria Pueyasocua niqiriyatujua namijiata pueyaracaanu shuquiriaatia nia shootianura nojuaja.

Naa Jesu niishitiojosacari miriquitij, nojuajaari pueya niishitiojoriquiaa nojori tarinitianura jiyanojua na miiniu panishano, cuno jaara sesa miijara jiyateriquia nojori.

<sup>49</sup> Jesuuri socua niishitiojorohua:

—Puetunu Pueyaso muerasujuanaari saniniujiushaanutaniya juhua manitia, taa shu caquishiyacuaani na moqueyaquiniuucujia. <sup>50</sup> Naajuhuj, shoniiri jiyanojua maninia, shu moqueyaquiniuucujia. Saniniuujia, shoni jaara shaacara quiri, ¿maatucua taa tiqiriiquiara quiriohua saajaniuhuj? Maja na naata. Naajuhuj, Pueyaso cumaaca nia jiitiare nioojajinia, niaa mariqui najuhuaa quijia quiriiri juhua Pueyaso niishiyashijia pueya. Naajuhuj, jiyanojia nia quiri, jatiqui nia quiniuria shuquiriaatia.

## 10

*Jesu niishitiojosano maja pueya cartenura necocua*

*(Mt 19.1-12; Lc 16.18)*

<sup>1</sup> Na nuhuaji, Jesuuri Capernaum tiacajiniji quiaquiaari na saquiriojosano pueyata. Judea jiyajinia quiojiyareeri, Jordán moo taquijirijuhuj, pananu muetasamaji jiyajinia. Pueyari jati nocua rerejoquiaariuhua Jesu quishaqui. Jesuuri nojori niishitiojonu coteeree socua, taa na niishitiojoquiaari tarijiacuajani. <sup>2</sup> Jiyacaritij, noojiaqueya Fariseocuacaari Jesuucua nijioquiaari na saniniujiuniuria nojori nequesotanuta, nocuara nojori saquiriojotanura juucua. Cunora, cuno pojoriiri Jesu nequesotaree:

—¿Maninate pueyano cartenura necocua?

<sup>3</sup> Jesuuri nojori nequesotaree saniniuujia:

—Cua sequeretoj, ¿taa Moisés sequequiaari niajaniyani?

<sup>4</sup> Cuno pueyari Jesu riucuaaree:

—Moisésri pa sequequiaaricujia, pueyanoori na naata necocua cartenu. Neyaca cuara coteenu na niqutioora na cartetaja naajionee, necocua na cartenura. Moisés-cujaari naa pa sequequiaaritij.

<sup>5</sup> Jesuuri cuno pojori sequere:

—Moisésri naa sequequiaari niajaniyatej, pueyaracaanu cumajiuujia nia quiniuucua, nia niqiuocua nia taraajeyashijia nia quiniuucujuhuj. <sup>6</sup> Saniniuujia, Moisésri naa naajiotaquiaari pueyajiniji:

“Pueyaso jaara puetunu casaajanaa shipiniquiaari, nojuajaari niqiriyatu caya shipiniquiaari, niqiriyatu maajinio”.

<sup>7</sup> Naaratej, pueyanoori na queya tiujianutaniya necocuara na caminiuria. <sup>8</sup> Nojori jaara camitioore, nojoriiri juhua niquiriyatujua pueyanora quiquii. Naacuajitij, nojoriiri maja juhua caapiqui pueya na quiniu tari. Saaja juhua niquiriyatujua pueyano quiyari. <sup>9</sup> Cunora, pueyano cuaara necocua carteyaquiiria, Pueyaso rupuetootesano nojori quiniuucua.

<sup>10</sup> Majaari Jesu saquiriojosano pueya niishitiuniu quiquiaari naa Jesu sequesano. Na nuhuaji, tiajinia nojori quishacariuhua, na saquiriojosano pueyari Jesu nequesotaquiaari casaa na sequenu paniriquiaa naani. <sup>11</sup> Jesuuri nojori sequere:

—Cante necocua carteya tamonu maajitia na caminiuriani, cuno pueyanoori jiyanoohua sesa miya coteenu necocua. Pueyasora, naa na miishacaritij, nojuajaari juhua narta pueyano niquiocuata quijia. <sup>12</sup> Naajuhuj, maaji jaara cartere neyaca tamonuta na caminiuria, cuno maajiiri sesa miya Pueyaso niquiarajuhuj.

*Jesu niasacari na juaashiquia naatujooriicua*

*(Mt 19.13-15; Lc 18.15-17)*

<sup>13</sup> Na nuhuaji, Jesuucua jaatucunuusaaquiaariiri naatujoori, Jesu nianura na juaashiquia nojori nacaacua. Na saquiriojosano pueyari naatujoori jaatucunaa tenujuriquiaa saaja. <sup>14</sup> Jesu jaara na niquiquiaari, juaaquiiri. Nojori sequereeri:

—¡Nia tarinitiare naatujoori cuaara niiria cucua! ¡Maja na tenujunu! Canapuate Pueyaso muerasura quiniu paniyani, nojori cuaara juhua nio naatujooriria jataara. <sup>15</sup> Seetanujuanaa nia sequeyanijia, Pueyasocua nia tiuuri seetanujuanaa, taa naatujoori tiuya cucuacuaani na taacanuyaquiniutia. Saaja naacuajiti niari Pueyaso pueyara jiyatesaanutaniya cutara, pueyaracaanu Pueyaso jiitiasano nia quiniuria.

<sup>16</sup> Jesuuri jiyacari cuno naatujooriniyosua pooree. Nojori nacaacua niojoree na juaashiquiaari Pueyaso na secojonuta, Pueyaso miiniuria maninia nojori.

*Jiyanoohua casamiriaca mashaja pocoojosacari Jesuta*

*(Mt 19.16-30; Lc 18.18-30)*

<sup>17</sup> Quera Jesu quianu panishacari quiniquiji, nocua netequiaariiri tamonu pueyano. Jesu cariquimiaji mojuquetaseeri. Na nequesotareeri:

—Maninia niishitiojonanaa, ¿taa cua miiniutianiyani, seetanujuanaa Pueyaso pueyanora cua quiniuriani?

<sup>18</sup> Jesuuri na sequere:

—¿Casaara quia sequeya janiya maninia pueyanotani, quia niishiyaquishacari janiyani? Saaja Pueyaso cutaraari seetanujuanaa maninia. <sup>19</sup> Quiaacuajaari Pueyaso niishitiojosano niishiya. Moisés cuajaari naa na naajiotaquiaari:

“Maja quia camishoo maaji quia numuetucunu. Maja monu. Maja nohuasenu. Maja tamonuucua tonujunu sapojonuta. Maja cuaracashijionu. Quia queya tojjia quia quiriquia”.

<sup>20</sup> Pueyanoori Jesu riucaaree:

—Niishitiojonanaa, janiyacujaari puetunu cuno rootasanojuanaa tojjia pueyara caanu cua naatujuajinjini.

<sup>21</sup> Jesuuri na paniniutia na niquirii. Na sequereeri:

—Juhuanoyuaja niquiriyatu casaari quiyajaa quia miishoo. Quia quiaarohua. Puetunu quia casamijiana quia niquitiojocoo. Na nuhuaji, casamijiuniucua nareja quia niquitioore quia masesano cumaneeca quia casami sami. Naacuajitij, quiaari quia casami jiitianutaniya jiyocuaanu Pueyaso shuriucua. Na nuhuaji cutara, quiocua nimiohua cua nuhuajiriquiano.

<sup>22</sup> Cuno pueyano jaara tojjiquiaari naa Jesu sequesantej, jiyanoohua taraajequeeri. Na taraajenuta quiacuhua na tiajiniaari. Nojuajaari jiyanoohua casamiriaca pueyano quiquiaari. <sup>23</sup> Na nuhuaji, Jesuuri na shocuaqueya niquinioree. Na saquiriojosano pueya sequereeri:

—¡Jiyanoohua jiyajeneta cutaraari casamiriaca pueyano quiniuria Pueyaso pueyanora!

<sup>24</sup> Na saquiriojosano pueyari shiriiquitiuquiaari naa na sequesacaritij. Na nuhuaji, Jesuuri nojori sequenu pacutequiaari:

—Sanajooriniaa, seetanujuanaa nia sequeyanijia. Jiyanoohua jiyajenetaari casamiriaca pueyano quiniuria Pueyaso pueyanora. <sup>25</sup> Taa camello maja na naata cusupuetaja cuhuoco tamajiria tajiniucuaani, naajuhuj, casamiriaca pueyanoori maja na naata tama na cuaqueyajaaja jiyatenu Pueyaso pueyano na quiniuria.

<sup>26</sup> Na saquiriojosano pueya jaara na tojtiaquiaari, nojoriiri socua jiyanoohua jiuuji- ateree. Naaratej, tama nojorijiaarijia nequesoreetooquiaari:

—¿Canteeri Pueyaso pueyanora jiyatesaanutaniya socuanitioj?

<sup>27</sup> Jesuuri nojori niquirii. Naa sequereeri:

—Pueyano maja na naata tamajaaja Pueyaso pueyanora quiniu. Pueyaso cutaraari na naata na jiyatenu na muerasura. Pueyasora, maja jiyajeneta casaa quiniu.

<sup>28</sup> Pedroori Jesu sequeree:

—Jiyaniijanaa, canaari puetunu canaa jiitiasanojuanaa tiujiaquiaarini quia pueya canaa quiniuria.

<sup>29-30</sup> Jesuuri nojori riucuaaree:

—Seetanujuanaa nia sequeyanijia, shuquiriaatia quijia quiniutianiya cutaraari noo pueyano cante na jiitiasano tiujaja cua tojjia na quiniuucuaani, janiyajiniji pohuatana na quiniuucujuhuj. Cante na tia tiujajani, tapueyocuaca, na rimiatuhua, na queya, necohua, na cuhuariquiano, nojuajaari maninia miishaanutaniya quiarijia mijiria na quishacarijia. Nojuajaari socua jiyanoohua queraatia niqutiosaanutaniuhua na tiujiasanojiniji. Niquitiosaanutaniyari tiaca, tapueyocuaca, na rimiatuhua, na nucua, necohua, cuhuariquiano. Naajuhuj, naquiya miishano quiniutianiyari cua tojjia na quiniuucua. Naajaa, na nuhuaji, pueyaracaanu Pueyasota shuquiriaatia quiniutianiyari quiarinio jiyajinia. <sup>31</sup> Saniniuujia, queraatia tojishano pueyari najuhua quijiaca quiniutianiya Pueyasora, nojori tojiyaquiniuucua nojuaja. Saniniuujia, Pueyaso ru- uretjacara, queraatia Pueyaso pueyari quiarijia juhua najuhua quijiaca niqushano quiquiaa. Naajaa, nojoriiri na nuhuaji seetanujuanaa juhua jiyaniijianucua quiniutianiya Pueyasora, na tojtiajaca nojori quiniuucua.

*Jesu pacutesacariuhua pohuatanu nojuaja mosaanutaniya*

*(Mt 20.17-19; Lc 18.31-34)*

<sup>32</sup> Jerusalén tiacajiniara nucuamaji nojori quiasacari, Jesuuri na saquiriojosano pueya puetariquiaa. Nojoriiri na nuhuaji sacuariquiaa na puerenuta. Socua pueyari na nuhuaji- tiuriquiaa nojori puerenutajuhuj. Nu cajiniocua, Jesuuri na doce saquiriojosano pueya jaatiaree tamocora tamajaaja. Tii nojori sequeriquiaari taa nojuaja miishaanutaniyani, nojori tiuquishacari Jerusalén tiacajinia.

<sup>33</sup> Nojori sequereeri:

—Niaacuajaari niishiya, paa tari Jerusalén tiacajinia quiaani, tee cuniqui Pueyaso Niyanu niqutiosaanutaniya pueyacuara secojona jiyaniijianucuaani, Moisés Rootasano- jiniji niishitiojonaanio. Cuno pojoriiri cucuara tonujunutaniya jiyaniijianucua na saponuta, cua mosaanura. Janiyari taucuaca niqutiosaanutaniyani. Janiyari jiyanoohua naquiya miishaanutaniyani. <sup>34</sup> Nojoriiri cua rerequetenutaniya. Cua riocojotunutani- yari. Cua piquitiuniutianiyajaariuhuj. Naa cua miishaanu nuhuajitij, nojoriiri socua cua monutaniya. Naajaa, jiuujianaraca juucajinia, janiyari seetanujuanaa samiitianuta- niuhuaani.

*Santiago, tarajanu Juanta, nojori sequesacari Jesu, maninia nojori na miiniuria*

*(Mt 20.20-28)*

<sup>35</sup> Na nuhuaji, Santiagoori, tarajanu Juanta Jesuucua catecanoquiaari. Nojoriiri Zebedeo niquiohua quiquiaari. Jesu sequetuseeri:

—Niishitiojonanaa, canaara quia miiri canaa masenu panishano quiajaniya.

<sup>36</sup> Jesuuri nojori nequesotaree:

—¿Casaa nia paniya cua miiniuria niaarani?

<sup>37</sup> Nojoriiri Jesu riucuaaree:

—Pueyaso jaara quia jiyatere pueya jiyaniijia, quiocua canaa cajitijiore quia shuricua, tamonu quia miaquetajara, tamonu quia muenecara, quia naacunaa canaa quiniuria.

<sup>38</sup> Jesuuri nojori sequeree:

—Majaari nia niishiniu nia masesano. ¿Nia naatateeri rejeretanu naquiya miiniu taa cua miishaanutaniyacuaani? Naquiya cua miiniuuri jiyanoehua noonu quiniutianiya juhua pueyano jaara mani noshiyanojinia tiuquinishaare.

<sup>39</sup> Nojoriiri na riucuaaree:

—Taaquiriirinij, canaa naatacuaaquiniateja naquiya miiniu rejeretanu juhua quiajaniya.

Jesuuri nojori sequeree:

—Seetanujuanaa, niaari na nuhuaji cua ratusano raturiquianojuhuj. Niaari juhua manijinia tiuquinishaariquianojuhuj, taa cua tiuquinishaanutaniyacuaani.

Jesuuri naa nojori sequeriquiaa miriqui, taa jiyanoehua naquiya na miishaanutaniyani, na cusosacari pueyacuara. Jesuuri naa nojori sequeree socuatej:

<sup>40</sup> —Maja cutara cua naata niqutionu niajaniya nia masesano, cua cajitiniuria niajaniya cua miaquetajara, cua muenecarano. Cunoori noo pojori niqitiosaanutaniya cutara, canra tari na jeenucuasaaquiaaricuaajani.

<sup>41</sup> Narta saquiriojosano pueya jaara tojiquiaari nojori masesano Jesu juucua, nojoriiri juaaquiocuaari. <sup>42</sup> Jesuuri nojori piirii. Nojori sequereeri:

—Niaacuajaari niishiya, mijiria jiya jiyaniijianucuaari na pueya jiitiaquiaa juhua na seya, tama nojori panishano na miiniuriajaaja nojoritia. Naajuhuj, pueya jiyaniijianucuaari na jiitiasano pueyacu paaretaquiaa na cumaaca, tojishano pueya nojori quiniuria. <sup>43</sup> Niajaniya saniniuujia, majaari naa nia quiniu quiniutianiya. Cante tojishano pueyanora quiniu paniya niajanijiniinioni, cuno cuara jiyateera tama na cuaqueyajaaja juhua narta Pueyaso pueya serura na quiniuria. <sup>44</sup> Cante nia jiyaniijia quiniu paniyani, nojuaja cuara quiiria narta Pueyaso muerasu cumaquinia. <sup>45</sup> Janiyajuhuj, majaari mijiria cua ninu quiquiaari pueya cua poonijiotenura quiria, tama cua cuaqueya cua shuquiritiniuriajaaja. Janiya cutaraari niquiaarini pueya cua naacutanura, tama janiyajaaja mosaanura pueya niti, queraatia pueyacuaji cua ritianura Sesaaca.

*Jesu jeecasacari Bartimeo namijia*

*(Mt 20.29-34; Lc 18.35-43)*

<sup>46</sup> Nojoriiri jiyacari tiuquijioquiaari Jericó tiacajinia. Jesuuri cuno tiacajiniji quiariquiaa na saquiriojosano pueyata. Queraatia pueyari nata quiariquiaajuhuj. Jiyacaritij, tamonu cariyujuaru pueyanoori tii cajiriquiaa nuu shuucua. Na sesa quiquiaari Bartimeo, Timeo niyanu. Nojuajaari cumaneeca mashiniquijiona quiquiaari, cariyujuaru na quiniuucua. Nojuajaari maja na naata poonijionu quijia tamajaaja. <sup>47</sup> Nojuaja jaara tojiquiaari cuno tajiyo pueyano quiquiaari Jesu, Nazaret tiacajinijinio, nojuajaari naa nacanu coteeree:

—¡Jesunaa, Pueyaso Jiyarosanonaa, cucua quenaaja quia taraajereja!

<sup>48</sup> Queraatia pueyari na tenujuriquiaa na sanaajanura juucua. Saaja socua nacaree jiyanoehuari:

—¡Pueyaso Jiyarosanonaa, cucua quia taraajere!

<sup>49</sup> Jiyacaritij, Jesuuri socua nujuasee. Pueya sequereeri:

—Miji nia sequere cuno nacaani.

Cariyujuaruuri na sequesaree:

—¡Quia sanere! ¡Quia shuquiriri! ¡Quia sequeyacuaja! ¡Nocua quia canujiyare!

<sup>50</sup> Naa na tojishacaritij, cariyujuaruuri na tucuaque toque jataquee. Ritia jaaqueeri Jesuucua na catecanonura. <sup>51</sup> Jesuuri na nequesotaree:

—¿Casa quia paniya cua miiniuria quiajaniyani?

Cariyujuaruuri na riucuaaree:

—¡Niishitiojonanaa, niqijiara quiniu panihuanijia! ¡Cua namijia quia jeecarohua quiria!

<sup>52</sup> Jesuuri na sequeree:

—Quia quiaarohua. Quia namijiaacuaja tari jeequerohua cucua quia tiuuniuucua.

Jiyacaritij, cariyujuaruuri tari na naata niquniu quiriquiaa. Nucuaco Jesu nuhuajiyareeri.

## 11

### *Jesu tiuquishacari Jerusalén tiacajinia*

(Mt 21.1-11; Lc 19.28-40; Jn 12.12-19)

<sup>1</sup> Nojoriiri tari catecanoriquiaa Jerusalén tiacaacua. Jiyacaritij, nojoriiri tiuquijiose Olivo cuhuariquia tuhuananuucua. Cunoori Betfagé tiaca shuriucua, Betania tiaca shurucuanio. Jesuuri caapiqui na saquiriojosano pueya jiyaroree tiji. <sup>2</sup> Nojori sequereeri:

—Cuno tiacajinia nia quiaare, pa tacoji niquishiyani. Niaa jaara tiuquishii tii, niaari burro riuriatanutaniya morotasano, pueyano cajishoojua na nijinia. Niaa jaara niquishiinioj, niocua na samaacartasee. Niocua na jaatucumohua miji. <sup>3</sup> Pueya jaara na nequesotare nijaniya: “¿Casaara nia samaacartaanoj?”, niocua na sequere: “Jiyaniijia na paniya rupaquijia. Ritia na niqutionutaniuhuacuaja”.

<sup>4</sup> Nojoriiri quiojoquiaari. Burro riuriatatuseeri morotasano nuujinia, tamonu tia tohuateya shuriucua. Nojoriiri na samaacartasee.

<sup>5</sup> Tamasaca tii quiniaari nojori sequere:

—¿Casa nia miyani? ¿Casaara nia samaacartaa cuno burroni?

<sup>6</sup> Nojoriiri na riucuaquiaari taa Jesu rootaquiaari nojoricuajani. Naaratej, cuno pueyari nojoriria na tarinitiaquiaari. <sup>7</sup> Na nuhuaji, Jesuucua jaatucutumohua cuno burroori. Pueyari na toqueya niojoquiaari burro nijinia, Jesu cajijiara. Na nuhuaji, Jesuuri nocua cajirii. <sup>8</sup> Queraatia pueyari na toqueya muevojoquiaari nucuaco, Jesuucuaaji nojori maniniushitiniuria nuu. Tamasacaari jaamasucua piyotaquiaari cuhuariquiacajiniji, Jesuucuaaji nojori niojotasocoriquiano na nucuacujuhuaj. <sup>9</sup> Jesu puetanaa, mariyata na nuhuaji nijionaari jiyanojua nacojonu coteequiaari nojori shuquiriniutia. Naa sequeturiquiaari:

—¡Pa shuquiritiare pa Jiyaniijia Pueyaso! ¡Jiyanojua maniniacuaja pa Jiyaniijia, cuno, Pueyaso cumaacata tiuquiyani! <sup>10</sup> ¡Pueyaso cuaara na jiyateera maninia Jiyaniijia na quiniuria pajaniyara! ¡Nojuajaari pa supuetanaa jiyaniijia David niti pa jitianutaniya maninia cutara! ¡Jiyocuacaanu Quijia pa Pueyasocuajaari pa shuquiritasano!

<sup>11</sup> Jesuuri naa tiuquiquiaari Jerusalén tiacajiniatej. Pueyaso Secojojua tiajinia tiuquishiiri. Na niqunijionu nuhuaji puetunu casaajanaa, Betania tiacajiniara quiaquiaari ritiaari na doce saquiriojosano pueyata. Jiyacaritij, tari tenacariiri quiriquiaa.

### *Jesu sesacasacari jajauju higo naana*

(Mt 21.18-19)

<sup>12</sup> Tariqui, nojori quiojosacari Betania tiacajiniji, Jesuuri miaajeriquiaa. <sup>13</sup> Tucuaaanuji niquirii higo naanaari queraatia jaamasucuaraca. Nocua canujiyareeri na niquniuria seetanujuanaa jajauracate quiriquiaa. Saaja queraatia jaamasucuaari quiriquiaa. Maja higo muetusacari quiquiaari jiyacari. <sup>14</sup> Jesuuri naa sesacaree higo naana:

—Maja quiocuaji socua quia jajau miasaanu quiniutianiya.

Na saquiriojosano pueyari na tojitiariquiaa naa na sequesacaritij.

### *Jesu jaacasacari seya niqutiojonaa Pueyaso Secojojua tiajiniji*

(Mt 21.12-17; Lc 19.45-48; Jn 2.13-22)

<sup>15</sup> Nojori jaara tiuquijioquiaari Jerusalén tiacajinia, Jesuuri tiuquiquiaari Pueyaso Secojojua tiajinia. Tiji pueya tohuatanijionu coteereeri, cuno pojori, canapuate Pueyasocuaara puecosocoriquiano seya niqutiojoriquiaa cumaneecaracuajani. Na masejonaa tohuatanijioreejaarihuaj. Cumaneeca tacatojojuaca juhuacutucua caponeetareeri, tee pueya tacatojoriquiaa taucuaa cumaneecacuajani, Pueyaso Secojojua tiajinia niqutiojosocoriquiano cumaneecaracuajani. Naajuhuj, Jesuuri mococoonu niqutiojonaa cajitiucua caponeetaree. <sup>16</sup> Naajuhuj, majaari na shanacunu quiquiaari pueya



niyacunura najuhuana Pueyaso Secojoua tia, na nitiootasano casamitia. <sup>17</sup> Na nuhuaji, pueya niqiuara niishitiojonu coteereeri. Naa sequereeri:

—Tariucuacaanu Pueyaso Rupaajinia naa naajiotasanocujaari quiya:

“Cua tia sesaari quiniutianiya, Pueyaso Secojoua tia. Puetunu jiyacajinijiniojuanaa pueya secojonuujuara quiniutianiyari”.

Niaari saniniuujia na jiyatequiaari nohuasenuujuaca quiquiora.

<sup>18</sup> Pueyacuara secojonaa jiyaniijianucua, mariyata Moisés Rootasanojiniji niishitiojonaari niishiquiaari naa Jesu miishanojiniji. Cunora, nojoriiri rojotooquiaari taa na motunutaniya Jesuni. Saniniuujia, puetunu pueyajanaari jiuujiateriquiaa Jesu niishitiojosano nojori tojishacari. Cunora, Judiocuaca jiyaniijianucuaari Jesu puereturiquiaa, puetunu pueyajanaa tojishacari na niishitiojosano. <sup>19</sup> Jaara niniquiaari, Jesuuri Jerusalén tiacajiniji quiacuhua na saquiriojosano pueyata.

*Higo naana sorenojiniji pohuatasano*

*(Mt 21.20-22)*

<sup>20</sup> Tariquiiuajia, nojori shocosacari higo naana, na niqituuquiaariiri tariucua soreno, puetunu na nujuacatajanaa. <sup>21</sup> Pedroori jiyacari Jesu sequesano niishiquii. Jesu sequereeri:

—Niishitiojonanaa, ¡quia niquiri! ¡Quia sesacasano higo naanaqui tari soreree!

<sup>22</sup> Jesuuri nojori riucuaaree:

—Pueyasooocua nia tiuuri. <sup>23</sup> Seetanujuanaa nia sequeyanijia, niaa jaara Pueyasooocua tiuuriquia nia taacanuyaquiniutia, nia naata nio tuhuananu sequenu: “Shiiquia ni-iqiji. Quia jaataare shoniacu caminiyajinia”. Niaa jaara naa sequere seetanujuanaa Pueyasooocua nia tiuuniutia, niaari nia sequesano niquiniutianiya. Naacuajitij, Pueyasooocua nia taacanuyaquishacari, nia sequesanoocujaari tohuateenutaniya taa nia sequereecuajani. <sup>24</sup> Janiyari cunora nia sequeyani, puetunujuanaa nia masesano nia secojosacari Pueyasoni, nia niishiri niaa na jiiitiaa tari. Na nuhuaji, niaari seetanujuanaa na masenutaniya. <sup>25</sup> Nia secojosacari, niaa jaara niishiquii niaa sesa quiya tamonu pueyanota, sesa na miiniuucua nijaniya, nojuaja nia jiyanoori. Naacuajitij, jiyocuaacaanu Quijia nia Queeri nia jiyanooniutianiya sesa nia miishanojinijijiuhuaj. <sup>26</sup> Niaa jaara jiyanyashijia quiriquia, jiyocuaacaanu Quinia nia Queeri nia jiyanyoquiniutianiya, sesa nia miishanojinijijiuhuaj.

*Pueya nequesotasacari Jesu, cante na jiyaronani*

*(Mt 21.23-27; Lc 20.1-8)*

<sup>27</sup> Na nuhuaji, nojoriiri quiaquiaariuhua Jerusalén tiacajiniohua. Jesu rucuanajosacari Pueyaso Secojoua tiajinia, nocua catecanoquiaariiri pueyacuara secojonaa jiyaniijianucua, Moisés Rootasanojiniji niishitiojonaajuhuj, narta Judiocuaca camarucuanio.

<sup>28</sup> Nojoriiri Jesu nequesotaree:

—¿Cante quia sequecanu naa quia miiniuriani? ¿Cante quia jiyatecanu Pueyaso Secojoua tia jiyaniijia quia quiniuriani?

<sup>29</sup> Jesuuri nojori riucuaaree:

—Janiya nia nequesotanutaniya saniniunijia. Niaa jaara cua nequesotasano riucuaare coteenucuaa, janiyari nia sequenutaniyajuhuj cante cua jiyaroquiaari naa cua miiniuriani. <sup>30</sup> Cua riucuaturotoj, ¿cante Tiuquinijiona Juan jiyaroquiaari pueya na tiuquinijionura moojiniani? ¿Narejaca pueyatee, Pueyaso soj? Cua riucuaare.

<sup>31</sup> Jiyacaritij, cuno pueyari jiyasohuaja tama juayonuutano coteequiaarijiaaja. Naa sequetooquiaariiri:

—Paa jaara na sequereni Pueyaso na jiyaroquiaari, pa riucuarucua: “¿Casaara nocua nia tiuyaquiquianucuaarini?” <sup>32</sup> ¿Paatucua taa sequereeri, nojuaja nareja pueya jiyarosano quiquiaari?

Cuno pojoriiri narta Israel pueya puereturiquiaa sequenura, Tiuquinijiona Juanri nareja pueya jiyarosano quiquiaari. Nojoricujaari niishiriquiaa puetunu pueyajanaari niishiquiaari Tiuquinijiona Juanri seetanujuanaa Pueyaso sequesano caminiujunina

quiquiaari. Cunora, nojoriiri Tiuquinijiona Juan rerequetenu pueretuquiaari, pueya quishacari tii. <sup>33</sup> Naacujitij, maja na naata na riucuatunu quishacari, Jesu sequetureeri:

—Maja canaa niishiniu.

Jesuuri nojori sequeree:

—Janiyajuhuj, maja cua sequenu quiniutianiya nijaniya, cante cua jiyaroquiaari naa cua miiniuriani.

## 12

*Miriqui pohuatasano sesa miijiaca poonijionaajiniji*

*(Mt 21.33-46; Lc 20.9-19)*

<sup>1</sup> Jiyacaritij, Jesuuri miriqui pohuatanu coteequiaari cuno pojori niqiuara. Cuno camarucua sequereeri:

—Tamonu pueyanoori cuhuariquiajinia uva natoquiaari. Na nuhuaji, na shuriuquioco maticoreeri. Naajuhuj, saajia quejaquiaari uva rapijiojuara, na caaca reratesaanura. Jiyaconajara tiareejaariuhuj, tiji na cuhuariquia na cojuajara nohuase-jojuacuaji.

'Na nuhuaji, tamasa poonijionaa pueya na niqitioereeri nojori cojuasocoriquiano nera. Naacujitij, uva carojotasacari, nojoriiri nojuaja niqitionutaniya tijijiuhuaj, na camarujanaa na quiniuucua. Na nuhuaji, nojuajaari tucuacaanu quiaquiaari, tii marijia na shocotejonura. <sup>2</sup> Jaara tari quiquiaari uva carojotasacari, saniya cuhuariquia camarujanaari na seru jiyaroquiaari cuhuariquia cojuanaa pueyacua. Na jiyaroquiaari cuhuariquia cojuanaa niqitionura nojori carojotasanojiniji, taa na camarujanaa pocoojoquiaaricuaaja nojoritia tarijiani. <sup>3</sup> Cuhuariquia cojuanaa pueyari saaja jiyarosano seru quiaturee. Na piquitiuriiri. Na nuhuaji, juhuasu na jiyaroturohua na camarnuucuaari. <sup>4</sup> Na camaruuri socua jiyaroquiaari tamonu na seru. Cuno seruuri jacusaaree saitia. Na nacaari surtasaaree saajiata jasano. Na sesacatureejaariuhuj. <sup>5</sup> Na camaruuri socua jiyaroquiaari tamonu na seru. Cuno na seru cutaraari mosaaquiaari. Na nuhuaji, socua jiyaramiquiquiaari queraatia na seyari. Puetunu nojorijinijiojuanaani, tamasaari piquishaaquiaari. Tamasaari puecoosaaquiaari cutara.

<sup>6</sup> 'Cuhuariquia camaruuri saaja niquiriyatujua niyanuniyojua jiitiaquiaari, jiyanohua na panishano. Cunora, nojuajaari socua cuno neyanuniyojua jiyaroquiaari. Na queeri tama sequequiaarijaaja: "Cuno pueya jaara niqiri cua niyanu, nojoriiri na tojiniutianiya cutara". <sup>7</sup> Cuno cuhuariquiajinia poonijionaa niquishacari nojori camarnu niyanu nojoriicua niyano, nojoriiri saaja tamajaaja niishitiojotooquiaari:

—¡Nioori pa camarnu niyanu! Nio cuhuariquiaari tama nerajaaja quiniutianiya, na que jaara cusoyare. ¡Pa morej! ¡Pocua nio cuhuariquia camaruhuaa quiquii tamajaajani!

<sup>8</sup> 'Cunora, na quiatureeri. Na motureeri. Na motunu nuhuaji, nojoriiri macu jataree cuhuariquiajiniji tamama.

<sup>9</sup> Jiyacaritij, Jesuuri cuno pojori nequesotaree:

—¿Taa cuhuariquia camaru miiniutianiya socuani? Nia sequereera pueyanaa. Nojuajaari cuhuariquia cojuanaa puecoonutaniya. Na nuhuaji, tamasa pueya niqitionutaniya cuno cuhuariquiaari, nera nojori cojuanura.

<sup>10</sup> '¿Majateeri tariucuaaanu Pueyaso Rupaajinia nia serojonu quiquianucuaaja nio? Naa sequeyari:

“Tiajonaa pueyari tamaatiujiajau saajia jataree nojori tiasacari saijiniji tia. Na nuhuaji, cuno jatasano saajiaari socua cutara saajia jiyatesaarohua tamasa saijiniji.

<sup>11</sup> Cunoori pa Jiyaniija miishano. Pajaniyara, na miishanoori jiyanohua maninia. Nocuaji jiuujiatasano”.

<sup>12</sup> Jiyacaritij, cuno Judiocuaca camarucuaari niishiriicuaaja miriqui Jesu pohuatasanoori tama nojorijinijiaaja quiriqiaa. Naaratej, nojoriiri Jesu quiatunu panirii juucua, nojori nujuatesocoriquiano. Nojoriiri pueya puereriquiaa saaja, naa nojori miiniuria Jesutej. Naacujitij, nojoriiri nareja quiojoquiaariuhua. Naa Jesu pohuatasacari miriqui cuno saajiajinijitij, nojuajaari tama na cuaqueyajinijiaaja pohuatariqiaa.

*Jiya jiyaniijia cuaara pueyaracaanu niqutiosaaria na sequesano cumaneeca*  
(Mt 22.15-22; Lc 20.20-26)

<sup>13</sup> Na nuhuaji, Jesuucua jiyaramiquishaaquiaariiri noojiaqueya Fariseocuacajiniijinio, Herodes paniijaca pueyajiniijiojuhuaj. Cuno pojoriiri Jesu pocuatenu paniquiaari sesa juucua, jiyaniijia nojori saquiriojotanura nocuara. <sup>14</sup> Naaratej, cuno pojoriiri Jesuucua nijioquiaari. Na sequetuseeri:

—Niishitiojonanaa, canaari niishiyani quiaa cutaraari sapojijashijia. Quiaari seetanujuanaa sequeja. Majaari rimiajata quia niqiniu pueyajuhuj. Majaari pueya naata sapojonu quiajaniya. Quiaari seetanujuanaa pueya jiuujia niqijia. Quiaa cutaraari seetanujuanaa Pueyasojiniiji niishitiojua, taate pa naata maninia quiniu Pueyaso niqiarani. Naaratej, canaa quia sequere, ¿maniniate pa niqutiojonura pa cumaneecajiniiji jiyaniijia Césarra, taa cuno tahue sequequiaari pajaniyacujani? ¿Taa quia sequeyani, niqutiojoshiyatee, maja soj?

<sup>15</sup> Jesuuri ritia niishiquii, naa nojori nequesotasacari nojuajatej, cuno pojoriiri na saniniuujiriquiaa sesa na pohuatenura najuhuanaj. Naaratej, Jesuuri nojori sequeree:

—¿Casaara nia saniniujiya janiyani? Miji nia riri cumanee cua niqishocoriquiano.

<sup>16</sup> Nera rishaareeri cumanee. Jaara na niqiquiaari, Jesuuri nojori nequesotaree:

—¿Cana naaquiti nocuani? ¿Cana sesateeri nocua naajiotasanojaniuhuj?

Nojoriiri na riucuaaree:

—Jiyaniijia César naaquicuaja, na sesajuhuj.

<sup>17</sup> Jesuuri jiyacari nojori sequeree:

—Jaara tama César casaajaaja quiri, tama na casaajaaja nia niqutiore na camaru. Saniniuujia, Pueyaso nia niqutiore nerano tama na casaajaaja.

Jesu jaara naa nojori riucuaquiaaritij, nojoriiri jiyanojua jiuujiatequiaari.

*¿Macunucuate samiitiaconutaniuhua?*

(Mt 22.23-33; Lc 20.27-40)

<sup>18</sup> Fariseocuaca nuhuaji, noojiaqueya Saduceocuacajiniijioori Jesuucua nijioquiaari. Saduceocuacaari jiyaniya macunucua maja na samiitiaconu quiniutianihua. Naaratej, nojoriiri Jesu nequesotasee nojori niishiniuria taa na sequenutaniya macunucujiniijini. Na sequetuseeri:

<sup>19</sup> —Niishitiojonanaa, supuetana Moisés cuajaari pa rootaa na naajioneejinia, pueyano jaara cusoyare mueyaju, tarajanu cuaara camiiria mashiquio, mueya na mueratenura tarajanu niti. <sup>20</sup> Tariija, tamonu pueyanoori niya quiquiaari. Siete niqiuohuaraca quiquiaariiri, saa canuujua. Jiyapueranuuri camiquiaari. Na nuhuaji, shaajequiaariiri muetuhuojuua. <sup>21</sup> Naaratej, na nuhuajishanaari tarajanu mashiquio camiquiaari. Nojuajaari muetuhuojuua cusoquiaarijuhuaj. Naajuhuj, jiyareta na nuhuajishanaari na camiquiaari. Nojuajaari juhua tapueyocuaca cusoquiaari mueyajuhuj. <sup>22</sup> Cuno siete canuuri naa camiyoquiaari cuno maaji. Puetunu nojorijianaari cusonuuquiaari. Majaari quenaaja niqiriyatujua mueya nojori mueratenu quiquiaari. Na nuhuaji, cuno maajiiri cusoquiaarijuhuaj. <sup>23</sup> Naacuajitij, macunucua jaara samiitiacorohua, ¿teyano cuno siete neyacaajiniijiniote seetanu neyacajanaa quiniutianiyani, puetunu cuno pojorijianaa jaara neyaca quiquiaari?

<sup>24</sup> Jesuuri nojori riucuaaree:

—Niaari jiyanojua jiyajeneya Pueyaso Rupaajinia naajiotasano nia niishiyaquishacari, Pueyaso cumaacanio. <sup>25</sup> Macunucua samiiticosacariuhua, majaari canuu camiyonu quiniutianiya maaji. Naajuhuj, maajipohuari maja na camiyonu quiniutianiya neyacaara. Canuu, maajipohua, nojoriiri mariyata quiniutianiya juhua jiyocuacaanu quijiaca Pueyaso seya, maja camiyosano. <sup>26</sup> Naa macunucua samiitianijionujiniiji nequesoreetaate. ¿Majateeri nia serojonu quiquiaacuaja supuetana Moisés naajioneejinia, taa Pueyaso sequequiaari Moisés cuaja nequeru casaja noshiyanojiniijini? Pueyasoori naa sequequiaari Moisés:

“Janiyari quia supuetana Abraham Jiyaniijiani, quia supuetana Isaac Jiyaniijiajuhuaj, quia supuetana Jacobo Jiyaniijianio”.

<sup>27</sup> Naacujitij, paari niishiyani Pueyaso pueya shaajeconoori saminiucua quiya Pueyasora cutara. Pueyasoori maja macunucua Jiyaniijia, saaja saminiucua pueya Jiyaniijia cutaraari. Janiyari cunora nia sequeyani, niaari jiyanoehua jiyajeneya nia niishiyaquiniucua Pueyaso Rupaa.

*Puetunu Pueyaso Rootasanojinijianaani, teyanote socua pa tojishocoriquianoni*  
(Mt 22.34-40)

<sup>28</sup> Tamonu pueyanoori Jesu tojiriquiaa Saduceocuaca riuhaneyano maninia saaja. Cuno pueyanoori Moisés Rootasanojiniji niishitiojona quiquiaari. Nojuajaari Jesuucua catecanoquiaari. Jesu nequesotareeri:

—¿Teyano tariucuacaanu Pueyaso Rootasanojinijiniote socua pa tojishocoriquianoni?

<sup>29</sup> Jesuuri na riucaaree:

—Pueyaso sequesano socua na pueya tojishocoriquianoori nio: “Nia tojitiare Israel pueyanaa, pa Jiyaniijia Pueyasoni, nojuacuajaari pa Jiyaniijiajanaa. Majaari tamonu quiniu socua. <sup>30</sup> Nia Jiyaniijia Pueyaso nia paniri puetunu nioojiatajanaa, puetunu nia sohuanutajanaa, puetunujuanaa nia niishitajata, puetunu nia cumaacatajanaano”.

Nio rootasanoori socua pa tojishocoriquiano puetunu Pueyaso rootasanojinijianaa. <sup>31</sup> Socua tarajanu na rootasano pa tojishocoriquianoori quera juhua coteenu na rootasanojuhuj. Naa sequeyari: “Quiarta pueyano quia paniri taa quia paniyacuaa tama quia cuaqueyajaani”. Puetunu Pueyaso rootasanojinijianaani, majaari socua tamonu rootasano quiniu socua tojishocoriquiano nio caapiqui na rootasanojiniji.

<sup>32</sup> Jiyacaritij, cuno Moisés Rootasanojiniji niishitiojonaari na sequeree:

—Quiaacuaja maninia sequeree, niishitiojonaana. Seetanujuanaari quia sequesano: quiyacuaaquinateja niquiriyatujua Pueyaso. Majaari socua tamonu quiniu juhua nojuaja. <sup>33</sup> Seetanujuanaa jiyanoehua maninia cutaraari Pueyaso pa paniniuria puetunu poojiatajanaa, puetunujuanaa pa niishitajata, puetunu pa sohuanutajanaa, puetunujuanaa pa cumaacatano. Naajuhuj, jiyanoehua maniniaari parta pueyano pa paniniu, juhua tama pa cuaqueyajaaja. Paa jaara nio sequesano tojijica quirini, cunoori jiyanoehua socua maninia Pueyasora, puetunu seya catijiasanojinijianaa nocuara, mariyata puetunu pueya niquitiojosano na casamijinijianaa nera.

<sup>34</sup> Jesu jaara tojiquiaari naa cuno pueyano riuucasano maninatej, na sequereeri:

—Quiaaqui quera Pueyaso pueyanora quiya.

Na nuhuaji, majaari socua pueya nequesoreetanu paniniu quiriquiaa Jesu.

*¿Canaacuajinio supuenote Cristoni?*  
(Mt 22.41-46; Lc 20.41-44)

<sup>35</sup> Jesuuri Pueyaso Secojoua tiajinia niishitiojori quia pueya. Jiyacaritij, nojuajaari na tojitianaa pueya nequesotaree:

—¿Casaara Moisés Rootasanojiniji niishitiojona sequequiaacuaraarini: “Cristonaari supuetana David niqiuacuajinio supuenutaniya”? <sup>36</sup> Pueyaso Sohuanu pohuatesacari supuetana David, nojuacuajaari sequequiaari:

“Jiyaniijia Pueyasoori cua Jiyaniijia Cristo sequeree: ‘Quia cajirijaara cua miaquetajara, janiya cuaara quia paraa shocojotare quiocuajijiatijia, Jiyaniijiajanaa quia quiniuria pueyaracaanu cutara’ ”.

<sup>37</sup> Supuetana David jiyaniijiacasacari Cristo, ¿Cristotucua taa supuetana David niqiuacuajinio supueno quirini? Davidcuajaari na jiyaniquiya “cua Jiyaniijata”.

Queraatia pueyari shanohua tojitariquiaa Jesu pohuatasano.

*Jesu sequesano Moisés Rootasano niishitiojonaajiniji*  
(Mt 23.1-36; Lc 11.37-54; 20.45-47)

<sup>38</sup> Jesuuri nojori na niishitiojosacari sequeriquiaa:

—Tama nia cuaqueyajaaja nia cojuare Moisés Rootasano niishitiojonaacuaji. Cuno pojoriiri puera tucuaque toque cushiyonu maniniucuaaja nojori rucuanajotajara, pueya shootianura nojori. Nojoriiri timiquiaa pueya saruhuatasacari nojori, nojori quishacari tiaca jiuujiajinia curotasano cajitiucujinia. <sup>39</sup> Nojori jaara masuusaare tamonu tiajinia

queranacunura, nojoriiri ritia secoquiaa socua panishano cajitiujinia nojori cajituniuria tia camaru shuriucua. Naajuhuj, Pueyaso secojojua tiacajiniaqueya pueya rerejosacari, nojoriiri camarucua cajitiucujinia cajituniu paniquiaa, pueya shootianura nojori. <sup>40</sup> Nojoriiri mashiquiopue tiaca masequiaa secaja cumaneecata nojori na sapojonuta. Naa nojori miiniu nuhuajitij, nojoriiri Pueyaso secojoquiaa shitiarayocua pueya niquiara, maninia pueya nojori jiyanishaanura. Naaratej, Pueyaso saniitiosacari maninia miyashijiaca pueya, nojoriiri socua jiyanohua naquiya miishaanutaniya tamasacajiniji.

*Casamijiu mashiquio niquitiosacari na cumanee juuranee Pueyasora*  
(Lc 21.1-4)

<sup>41</sup> Tamacari, Jesuuri cajiriquiaa Pueyaso Secojojua tiajinia cumaneeca niquitiojojua tajoji, tee pueya niojoriquiaa na cumaneeca Pueyasoracuajani. Jesuuri tiji pueya shootiariquiaa na cumaneeca niquitiojiyano. Queraatia casamiriaca pueyari queraatia cumaneeca niquitiojoriquiaa. <sup>42</sup> Jiyacari tiuquishijiaariuhua casamijiu mashiquio. Caapiqui cumaneeniyojua niasee cumaneeca niojojuajiniaari. Cuno cumaneeca na niasanoori maja puera cumaneeca na quiniu quiriquiaa. Saaja cobrejiniji shipinishano quiquiaariiri. <sup>43</sup> Jesuuri jiyacari na saquiriojosano pueya piirii. Nojori sequereeri:

—Seetanujuanaa nia sequeyanijia, nio casamijiu mashiquio cutaraari socua queraatia niquitioree puetunu tamasacajinijianaa. <sup>44</sup> Puetunu pueyajanaari na cumaneeca cureenonijini niquitiojoriquiaa. Saniniuujia, nio maajiiri puetunujuanaa na miaquesocoriquiano na masetajarano niquitioree cutara.

## 13

*Jesu sequesacari Pueyaso Secojojua tia niyartasaanutaniya*  
(Mt 24.1-2; Lc 21.5-6)

<sup>1</sup> Jesu tohuareetasacari Pueyaso Secojojua tiajiniji, tamonu na saquiriojosano pueyainijinioori na sequereeri:

—Niishitiojonanaa, quia niquiri Pueyaso Secojojua tia, puereetujuaaca saitia tiasano. ¡Jiyanohua shanohua tia!

<sup>2</sup> Jesuuri na riucuaere:

—¿Quiaateeri cuno shanohua tia niquiya, saijiniji tiasano jiyaconajani? Cuniqii, majaari saaja cureenu quiniutianiya tamonu caco maano quenaaja. Puetunu niyartasanujuanaa quiniutianiyari.

*Taa pa niishiniutianiyani jiya puequesacari quera*  
(Mt 24.3-28; Lc 21.7-24; 17.22-24)

<sup>3</sup> Na nuhuaji, nojoriiri quiojoquiaari olivo cuhuariquia tuhuananuucua. Cuniqiji, maja puera tucuacaanu quiquiaari Pueyaso Secojojua tia. Na taquijirija quiquiaariiri. Jesu cajishacari tii, nocua catecanoquiaariiri Pedro, Santiago, Juan, Andrésnio. Nojoriiri na sequetuquiaari jiyasohuja:

<sup>4</sup> —Canaa quia sequere taacari Pueyaso Secojojua tia niyartasaanutaniyani. ¿Casaa Pueyaso miiniutianiyani canaa niishiniuria quia sequesano quera tohuateya?

<sup>5</sup> Jesuuri nojori riucuaere:

—Tama nia cuaqueyajaaja nia cojuare tamasaca sapojiaquiniuucujia nijaniya. <sup>6</sup> Nia numooteyacuajaniija, queraatia sapojonuujuacaari nijionutaniya nojori sequenura nijaniya: “Janiya Cristoni”. Naa sapojotunutaniya queraatia pueyari.

<sup>7</sup> Naa jaara tojiniuuri miaquetojonujiniji niya, tucuacaanujuhuj, majaari najuhuana nia shiriiquitiuniu. Seetanujuanaa naa quiniutianiyari. Naajaa, jiyacari, majaari jiya puequesacari quiniutianiya juhuanojuaja. <sup>8</sup> Tamonu rupaa pocuajacaari miaquetojonutaniya tamaatiuucua rupaa pocuajacata. Pueyari tamonu jiyajiniji miaquetojonutaniya tamonu jiyajinijinio pueyata. Naajuhuj, rijiaari jiuuquiujiutianutaniya queraatia tiqiyocua tiacajinia. Jiyanohua miaajesacariiri quiniutianiya jiyacari. Naajaa, puetunu niojuanaari saaja shusha naquiya miiniu coteesacari quiniutianiya.

<sup>9</sup> Tama nia cuaqueyajaaja nia cojuare. Niaari tama nia tiacajinia jiyaniijianucuaajaaja niquitiosaanutaniya saniitiosocoriquiano. Naajuhuj, niaari Pueyaso Secojoua tiacajiniajanaa majacusaanutaniya. Niaari jiyatasaanutaniyajuhua tiaca jiyaniijiaacua, jiya jiyaniijianucuaacuanio, nojori nequesoreenura nijaniya, janiyajiniji pohuatanaa nia quiniuucua. Naacuajitij, niocua janiyajiniji pohuatane nojori niquiarajuhuj. <sup>10</sup> Jiya puequeyaquishacarijia, Pueyaso rupaari tari pohuatasano quiniutianiya puetunu jiyacajiniajanaa. <sup>11</sup> Cua tojiri, niaa jaara jiyatashiyare jiyaniijianucuaacua nequesoreesocoriquiano, majaari nia tacaani taa nia sequenutaniyani, taa nia pocuanutaniyani. Majaari quenaaja nia niishiriojonu naatej. Saaja nia sequere nojori niquiara jiyacari Pueyaso Sohuanu niishitiojosano nijaniya. Nia pocuasanoori maja nijaniyajiniji quiniutianiya, nia pocuasacari nojori niquiara. Cunocuaajaari Pueyaso Sohuanu niishitishano quiniutianiya, na pocuatesacari nijaniya. <sup>12</sup> Jiyacarijihuuj, pueyanoori sesa miiniutianiya tama tarajanujuaaja, cua tojijia tarajanu quiniuucua. Tama tarajanujuarjia na niquitionutaniya mosocoriquiano. Jiyacaritij, pueyari tama necohuajaaja miiniutianiya sesa, cucua tiuujiaa necohua quiniuucua. Naajuhuj, necohuari tama na queya tacartanutaniya monujuaaja, na queya tojiniuucua Pueyaso rupaa. <sup>13</sup> Puetunu nio jiyajinijinio pueyajanaari maja na niquiniu paniniu quiniutianiya nijaniya, cua tojiti-ajaca nia quishacari. Naajaa, cante seetanujuaana pueyaracaanu cucua tiuyajaani nio jiya jaara puequerejaatijia, nojuaja cutaraari shacantuuca quijiara jatanishaanutaniya, pueyaracaanu cuata na quiniuria shuquiriaatia.

<sup>14</sup> Niaa jaara cuno jiyanohua sacuaraatia casaa niquiri Pueyaso Secojoua tiajinia nujuatesano, taa supuetana Daniel sequeya na naajioneejiniaacujani, niocua ritia mashiri. (Cante nio serojiyani, nojuaja cuaara niishiiria casaa na sequeyani.) Judea jiyajinia quinaa cuaara mashiiria ritia tuhuananuhucua, cuno sacuaraatia casaa jaara nujuatesaare Pueyaso Secojoua tiajinia. <sup>15</sup> Canapete jiyacari quiya na tia cacojiriani, nojori cuaara tiuquitiaaquiiria tiajiniaaco na casaa na riniuria juucua. <sup>16</sup> Canapete jiyacari quiya na cuhuariquajiniani, nojori cuaara tacateyaquiuhua na toqueya na poonuhua. <sup>17</sup> Jiyacaritij, jiyanohua taraatia quiniutianiyari maajipohua, nojori jaara manajaatohua quiya, jaara jiyacari jiitiare supuejaca conaajajuhuj. <sup>18</sup> Nia secosacari, Pueyaso nia maseriquia juhuacarijia, nia mashiyocuatusacari cuaara quiyaqui-iria shiniquia quishacari. <sup>19</sup> Cuno quishacari, jiyanohua naquiya miiniuuri quiniutianiya. Tariucuaaanu, majaari naa naquiya miiniu quiquiaari Pueyaso shipininiu nuhuaji nio jiya. Naajuhuj, cuno naquiya miiniu nuhuaji, majaari jiyano naquiya miiniu quiniutianihua socua, juhua nio. <sup>20</sup> Pueyaso jaara ritia tajitiyaquiri cuno naquiya miiquiosacari, pueya maara mijiria cureyaquirij. Pueyasocuaajaari ritia tajitiniutianiya cuno naquiya miiniu, na saquiriojosano pueyacua na taraajenuucua.

<sup>21</sup> Jiyacaritij, tamasa jaara nia sequere: “Nia niquiri, Cristo tari niya quiya”, jaara sequerejuhuj: “Nooj, jati quiyatej”, majaari na tojitianunoj. <sup>22</sup> Jiyacaritij, queraatia sapojonuujuacaari supuenutaniya. Nojoriiri sequenutaniya: “Janiyacuaaja Cristoni”. Tamasacaari sequenutaniyajuhuj: “Janiya Pueyaso sequenu panishano caminiujiuniani”. Nojoriiri pueya niquishoo casaa miiniutianiya na cumaacata, Pueyaso saquiriojosano pueya na sapojonura juucua. Jiyacaritij, queraatia pueya cutaraari sapojosaanutaniya. <sup>23</sup> Cunora pueyanaa, tama nia cuaqueyajaaja nia cojuare. Janiyacuajaari tari juhuacarijia nia numooteyani. Majaari cua sequesano nia niyajetanu.

*Pueyaso Niyanu tacatenujiniji pohuatasano  
(Mt 24.29-35, 42, 44; Lc 21.25-36)*

<sup>24</sup> Naa naquiya pueya miiniu nuhuajitij, pananuuri ninishiquiria quiniutianiya. Naajuhuj, racaari maja na cuhuatanu quiniutianiya mijiria. <sup>25</sup> Riyari totenutaniya. Jiyocuaaanu cumaacaraca quijiacaari tetecatunutanijajuhuj. <sup>26</sup> Jiyacari, janiya Pueyaso Niyanuuri niquishaanutaniya jiyocuaaanuji roseyano cohuajajiniani, jiyanohua shacantuuca cua cumaacata. <sup>27</sup> Jiyacaritij, janiyari cua seya jiyaramiquiniutianiyani nojori rerejotenura puetunu cua saquiriojosano pueyajanaa. Nojoriiri puetunu nio

jiyajinijiojuanaa rerejotesaanutaniya, socua jiyanoehua tucuacaanu jiya cajiniocua puequeetujinijio.

<sup>28</sup> Quiarijia cutara nia niishiri higo naanajiniji. Shuniyara, na jaamasucuaari totequiaa jaranacujua na quiniuria. Na nuhuaji, na cashacucua jaara macumaaca quiri, quiarinio jaamasucuaari mueratumohua. Niaa jaara naa niquiritij, niaari niishiquiaa tacareejonuqui quiniutianiya. <sup>29</sup> Quiarijia saniniuujia, naatej taa nia niishiquiaa higo naanacuaani, niocua naa niishirijiuhuaj janiya quera tiuquiuhuani, niaa jaara puetunu cua pohuatasanojuanaa niquiri tohuateyano. <sup>30</sup> Seetanujuanaa nia sequeyanijia, puetunu cua pohuatasanojuanaari niquishaanutaniya nio pa quishacari quiniaa pueya cusonuyaquishacarijia. <sup>31</sup> Jiya cajiniocuaari shaajenutaniya, nio jiyajuhuj. Cua Rupaa cutaraari maja na jatanu quiniutianiya. Cua sequesanoori puetunujuanaa tohuateenu-taniya.

<sup>32</sup> Maja cutaraari nia niishiniu taacari cua tiuquiniutianihuani, casaa juucatej. Majaari jiyocuacaanu quijiaca Pueyaso seya niishiniuujihuaj. Janiyajanaari maja cua niishiniu. Saaja cua que Pueyaso cutaraari tamajaaja na niishiya.

<sup>33</sup> Cunora, janiyari nia sequeya cutarani, maja juhua maquenuujuuaca nia quiniu. Pueyaracaanu nia niqutiare cucuaji, juhua sutejaca. Tamajaaja nia soquere. Saaja pueyaracaanu nia secojoriquia Pueyaso. Majacuajaari nia niishiniu taacari cua tiuquiniutianihuani. <sup>34</sup> Cunoori quiniutianiya juhua tamonu pueyano quianu panishacari tamonu jiyajiniara tucuacaanu. Na quianura, nojuajaari na seya seerataaree maninia nojori cojuanura na tia. Tamasaca niqutiyaree na poonijosanoori, nojori poonijosocoriquiano. Tamonu sequereeri, tohuateyaji na cojuanura pueyaracaanu, nojuaja cuara tiuquihuarajaatijia. <sup>35</sup> Naaratej, nia sutere. Maja maquenuujunu. Majaari nia niishiniucua taacari tia camaru tiuquiniutianihuani, shusha ninishacari, shiyaqueya, caacaraja niunijosacari, tariquicuaji soj. ¿Taacari cua tiuquiniutianihuani? Johuaj, maja pa niishiniu. <sup>36</sup> Cunora, juhua sutejaca nia quiriquia, janiya mariqui nia jiyajenetesuhuari, canashiyaquiji cua tiuquishacariuhua niaacua. <sup>37</sup> Cua sequesano niajaniani, cunoori puetunu pueyarajanaa: “¡Nia sutereja! ¡Maja maquenu!”

## 14

*Judiocuaca camarucua roojotoosacari nojori quianura Jesu*

*(Mt 26.1-5; Lc 22.1-2; Jn 11.45-53)*

<sup>1</sup> Jiyacari, juhuanujuaja querajaa juuca quiriquiaajaari Pascua juucara queranacunura. Pascua juucajuhuj, poreetajaaju shipinishano pan miaquenu coteesaaquiaari siete juucara. Pueyacuara secojona jiyaniijianucuaari jiyacari Moisés Rootasanojiniji niishitiojonaata roojotooriquiaa Jesuucua. Nojoriiri roojotooriquiaa taa nojori sapojonuta nojori quiatunutaniya Jesu jiyasohujani, na motusocoriquiano. <sup>2</sup> Nojoriiri naa sequetooriquiaa:

—Maja queranacusacari naa pa miiniutij, paa mariqui puetunu pueyajanaa juaatiriiri.

*Tamonu maaji totasacari na shanohua jaanutaja Jesuucua*

*(Mt 26.6-13; Jn 12.1-8)*

<sup>3</sup> Jesuuri Betania tiacajinia quiriquiaa Simón tiajinia na saquirojosano pueyataja. Cuno Simónri tarijia lepra cusotaja quiquiaari. Jesu cajishacari tii miaquejajinia, tamonu maajiiri tiuquiquiaari. Shiitianiyojua shucuariquiaja pataconiyojua cacatariquiaari, shanohua cohuaja saajajiniiji quejasano. Mishaja quiriquiaari shanohua jaanutajata, nardo jaamasucuaajiniiji shipinishano. Jiyanoehua queraatia cumaneecata masesano quiquiaariiri. Jiyacaritij, cuno maajiiri na shucuariquiaja pataconiyojua cocuataree, na totanura Jesu nacaacua. <sup>4</sup> Tamasaca tii quiniaa pueyari juaarii naa cuno shanohua jaanutaja niitiasaanuucua. Tama nojoriijaarijia sequetooriquiaa:

—¿Casaara cuno shanohua jaanutaja niitiasaaree najuhuanani? <sup>5</sup> ¡Cuno jaanutaja maara niqutiosaacanu queraatia cumaneecara, casamiijiuniucua niqutiosocoriquiano! Nojoriiri juhucatecara cuno maaji juaarii.

<sup>6</sup> Jesuuri nojori sequere saaja:

—¡Nia tarinitiare! ¿Casaara nia rimiaaqueya nio maajiicuarani? Naa na miishano janiyani, cunoori jiyanhua maninia quiria. <sup>7</sup> Casamiiuniucua pueyacuajaari pueyacaanu quiriquiano niaata. Nia naatacuajaari maninia miiniu nojori nia panishacari. Janiya saniniuujia, maja cutaraari cua quiniu quiniutianiya pueyacaanu niaata. <sup>8</sup> Nio maajiiri maninia miirii. Majaari na naata miiniu quiriquiaa socua maninia nio na miishanojiniji. Na totasacari cucua na shanhua jaanutajani, nojuajaari juhuacarijia cua cuaqueya jeenucuaa, raaco cua niasaanura janiya jaara mosaareni. <sup>9</sup> Seetanujuanaa nia sequeyanijia, puetunu jiyacajiniajanaa tee Pueyaso rupaa pohuataaanutaniyani, nio maaji miishanoori pueyacaanu pohuataaanutaniyajuhuj. Naa na miishano janiyatej, majaari na niyajetasaanu quiniutianiya.

*Judas tacartasacari Jesu, na quiatenura*

*(Mt 26.14-16; Lc 22.3-6)*

<sup>10</sup> Jiyacaritij, Judas Iscarioteeri quiaquiaari pueyacuara secojonaa jiyaniijianucuaa roojotoonura taa nojori na quiatenutaniya Jesuni. Nojuajaari Jesu saquiriojosano pueyajinijinio quiquiaarijuhuaj. <sup>11</sup> Jiyaniijianucua jaara tojiquiaari, Judas nojori quiatenu paniya Jesu, nojoriiri jiyanhua shuquiririi. Nojoriiri Judas sequeree:

—Canaa quia niqutionutaniya cumaneecani, canaa quia quiatenu sami Jesu.

Cunora, Judasri niishiriojonu coteequiaari taacari nojori na quiatenutaniya Jesuni.

*Jesu miaquesacari na nuhuajiria na pueyata*

*(Mt 26.17-29; Lc 22.7-23; Jn 13.21-30; 1 Co 11.23-26)*

<sup>12</sup> Puetunu marijarajanaa, Judiocuacaari Jerusalén tiacajinia rerejoquiaari poreetesoo pan nojori miaquenuunura siete juuca. Coteenu juuca sesaari quiquiaari “Pascua”. Cuno juuca puecoosaaquiaariiri Pascuara riuriotaca borregohua, Pueyaso niquiara miaquenuusocoriquiano. Naaratej, Pascua juuca quishacari, Jesu saquiriojosano pueyari Jesu nequesotaree:

—Jiyaniijianaa, ¿tee quia paniya canaa majeetenura quiocuaji borregoni, pa miaquesocoriquiano quiarjia Pascuarani?

<sup>13</sup> Jiyacaritij, Jesuuri caapiqui na saquiriojosano pueyajinijinio sequeree:

—Nia quiaare Jerusalén tiacajinia. Niaari tii riuritanutaniya tamonu pueyano, na mohuaca pataano na patacojina. Niaa jaara na riuriatasee, niocua na nuhuajimia.

<sup>14</sup> Jaara tiuquishii tiajina, niocua cuno tia camaru sequeese: “Niishitiojona naa quia sequeya: ‘¿Tee cuniqui cua miaquenutaniya cua saquiriojosano pueyata quiarjia Pascua niucuan?’” <sup>15</sup> Jiyacaritij, nojuajaari nia niqitiniutianiya puereetuuca sohuaca, jiyocuaaanu nataco, tariucua maninia jeenucuasano. Niocua cuniqui borrego majeetesee, niucua pa miaquesocoriquiano.

<sup>16</sup> Na saquiriojosano pueyari quiojoquiaari. Tiacajinia tiuquijioseeri. Nojori tiuquijiosacari, nojoriiri puetunujuanaa riuriatasee taa Jesu sequeree nojoricuajani. Nojoriiri tii majeetesee borrego, Pascuara miaquesocoriquiano.

<sup>17</sup> Jaara niniquiaari, Jesuuri tiuquijiose na saquiriojosano doce pueyata. <sup>18</sup> Nojori miaquenuusacari, Jesuuri nojori sequeree:

—Seetanujuanaa nia sequeyanijia, tamonu niajanijajinijinio niya cuata miaqueyani, nojuajaari cua tacartanutaniya na quiatenura janiya, naquiya cua miishaanura.

<sup>19</sup> Jesu sequesacari naatej, nojoriiri jiyanhua taraajequee. Jiyacaritij, tama nojoriijiaari na nequesoretanu coteeree:

—¿Janiya jiyoteeri quia quiatenutaniyani Jiyaniijianaa?

Puetunu nojoriijianaari naa na nequesotaree.

<sup>20</sup> Jesuuri nojori riucaaree:

—Niquiriyatujua doce niajanijajinijiniocuaja, nojuacuajaari nio, shusha pan shiya miacojuajiniani, nojuajaari cua quiatenutaniya. <sup>21</sup> Janiyacuajaari maninia tohuateenutaniya puetunujuanaani, taa tariucuacaanu Pueyaso Rupaajinia janiyajiniji naajio-tasaaquiaaricuajani. Saniniuujia, jiyanhua taraatia quiniutianiyari cuno pueyanora, cantucuaja cua quiatenutaniya mosocoriquianoni. Maara socua maninia quiquiaari cuno pueyanora, nojuaja jaara raaquishaaquiaari.



<sup>22</sup> Nojori miaquenuusacari, Jesuuri pan ririi. Na Que Pueyaso secojoree nocuaraari. Na neecasenu nuhuaji, nojori niqutiojoreeri. Na niqutiojosacari, naa miriqui sequequiaariiri:

—Jajaa. Nia miaquere. Nioori cua cuaqueya.

<sup>23</sup> Na nuhuaji, Jesuuri ratujua pataree. Na Que Pueyaso secojoreeri nojori ratuso-coriquianoocuara. Na secojonu nuhuaji, na saquiriojosano pueya niqutioereeri nojori ratunura tiji. Puetunu nojorijianaari ratujuajiniji raturee. <sup>24</sup> Nojori sequeree miriquiiri:

—Nioori cua nanaca. Cua nanacaari queraatia pueyacuara shoonutaniya. Naacujitij, Pueyasoori seetanujuanaa jiyanooniutianiya pueya, saaja nojori tiuuniuucua cucua, taa Pueyaso sequequiaaricujani. <sup>25</sup> Seetanujuanaa nia sequeyanijia, maja socua cua ratunu quiniutianihua uva caacajiniji, janiya cuaara tacatemohuajaatijia pueyaracaanu Jiyaniijajanaa cua quiniuria. Jiyacaritij, janiyari shusha niaata na ratunutaniuhuani.

*Jesu sequesacari Pedro, nojuaja nocuaji seetanutaniya*

*(Mt 26.30-35; Lc 22.31-34; Jn 13.36-38)*

<sup>26</sup> Pueyasora na jaaquequenuunu nuhuaji, nojoriiri quiojoquiaari olivo cuhuariquia tuhuananuucua. <sup>27</sup> Na quiojosacari, Jesuuri nojori sequeree:

—Nio niucujani, puetunu nijaniyajanaari cucua tiuuniu tarinitianutaniya. Naa naajiotasano quiyacuajaari nijaniyajiniji tariucuacaanu Pueyaso Rupaaajinia. Naa sequeyari:

“Janiyari borrego Cojuana monutaniyani. Na borregohuari na camaru nuhuaji niyaquejonutaniya tamajaaja”.

<sup>28</sup> Na nuhuaji, janiya jaara samiitiarohua macujinijini, janiyari nia puetanutaniya Galilea jiyajiniani.

<sup>29</sup> Pedroori jiyacari Jesu sequeree:

—Niya cuata quiniaa naasucua quiocuaji carajenutaniya. ¡Janiya cutara maja cua catenu quiniutianiya quiocuaji!

<sup>30</sup> Jesuuri saaja na sequeree:

—Pedronaa, janiya seetanujuanaa quia sequeyani, nio niucujani, quiaari janiyajiniji naa seetanutaniya pueya niqiara: “¡Maja cua niishiniu Jesu!” Quiaari naa pacutejonutaniya sequenutej, caacaraja caminiujiaquishacarijia niunijionu.

<sup>31</sup> Pedroori saaja na pataariquiaa naa Jesu sequesacari nojuajatej. Socua sequerohuari: —¡Janiya cuaara mosaaria quiataqui, naajaa, majaari cua seetanu quiniutianiya quiocuaji!

Narta saquiriojosano pueyari naa sequetureejuhuj.

*Taraatia Jesu secojosacari Getsemaní cuhuariquiaajinia*

*(Mt 26.36-46; Lc 22.39-46)*

<sup>32</sup> Nojoriiri jiyacari tiuquiiioquiaari tamonu cuhuariquiaajinia. Cuno cuhuariquia sesa quiquiaari Getsemaní. Jesuuri na saquiriojosano pueya sequeree:

—Niyaja nia cajitiuri, cua secojosacari cua Que socua nia tacoji.

<sup>33</sup> Nojuajaari saaja nocua rupojyaree jiuujianaraca na pueya: Pedro, Santiago, Juannio. Jesuuri juhuacatecara shiriiquiriquiaa. Tacaariquiaajaariuhuj. <sup>34</sup> Nojori sequereeri:

—¡Coojiajinia taraajeya jyanohuanijia, quera cusoyanijia! Niyaja nia jiyojetare. ¡Niocua niqutiareja! ¡Majaari maquenu!

<sup>35</sup> Jesuuri socua shiitianiyojua quiaaree nojori tacoji. Na secojonura Pueyaso, mojuquetaseeri. Jiyocuara jacamaquiaariiri. Pueyaso masereeri, maja naquiya na miishaanura juucua. <sup>36</sup> Na secojosacari, nojuajaari naa sequequiaaritij:

—Cua Quenaa, quiara maja jiyajeneta quia panishano quia miiniuria. Naaratej, janiya quia secojiyani, nio raatonuque cucujaji quia tajitiri. Naajaa, cuaara quiyaquiiiria juhua cua panishano. Saaja cuaara quiiria cutara taa quia paniyacuajani.

“Nio raatonuque” na sequesacari, Jesuuri miriqui sequeriquiaa naquiya na miishocoriquiano.

<sup>37</sup> Na secojonu nuhuaji, na saquiriojosano pueyacuatacategyarohuari. Nojori riuriatasuhua maquetiuyanoori. Jesuuri Pedro sequere:

—Simónnaa, ¿quiaate maqueya? ¿Majateeri quenaaja quia naata rejeretanu rupaquijia quia maquenu? <sup>38</sup> Nia sutere. Maja maquenu. Pueyaso nia secojore niaa mariqui sesa miitishaareeri. Seetanujuanaa, poojiaari maninia miiniu panijia. Pa cuaqueyari saniniuujia sasaca quiyacujua. Majaari pa naata maninia miiniu pa panishano tamajaaja. Cunora, Pueyaso nia secojore na cumaquiniuria nijaniya maninia nia miiniuria.

<sup>39</sup> Jesuuri quiaquiaariuhua socua secojonuhua. Na secojosacari, socua sequenu pacutequiaariiri juhua coteenu na sequesano. <sup>40</sup> Na nuhuaji, socua tacatequiaariuhua na saquiriojosano pueyacuataari. Nojori riuriatasuhuariuhua maquetiuyano. Nojori namijiaari saaja seecutayariquiaa na maquenuujunuta. Jiyacaritij, nojoriiri maja na niishiniu quiriquiaa taa na riucuatunutaniano. <sup>41</sup> Jesuuri socua quiaquiaariuhua na Que secojonura. Na tacatesacariuhua secojonujiniji, nojori sequesuhuari:

—¿Niaate maquetiuyajaa? ¿Niaate samaateyajaa? ¡Tariucuaja! ¡Quiarijia cutara janiyari sesa miijiaa pueya quiatesaanutaniyani, nojori miiniuria janiya taa nojori panitiuyacuajani! <sup>42</sup> Nia saneeculture. Pa quiaare. Cua quiateriquiano tari cumaji.

*Na paraa quiasacari Jesu*

*(Mt 26.47-56; Lc 22.47-53; Jn 18.2-11)*

<sup>43</sup> Jesuuri pocuariquiaajaa Judas tiuquishacari nojoriicua. Cuno Judasri, Jesu saquiriojosano doce pueyajinijinio quiquiaarijuhuaj. Queraatia pueyari Judasta nijioquiaari. Cuno pueyari nijiniaquetucuaja mueruu pooriquiaa, macacanio. Cuno pojoriiri pueyacuara secojonaa jiyaniijianucua jiyaramiquishano pueya quiquiaari, Moisés Rootasanojiniji niishitiojonaa jiyaniijianucua jiyaramiquishanojuhuaj, Judiocuaca camarucua jiyaramiquishanonio. <sup>44</sup> Judas, Jesu quiateriquianoni, nojuajaari juhuacarijia nata quiniaa pueya rootaquiaari, nojori niishiniuria teyanote Jesuni. Naa nojori sequequiaariiri:

—Teyano pueyano cua nujuya pa tiuquishacarini, cunocuajaari nojuaja. Niocua na quiasee. ¡Niaari maninia morojosano jaatucutaarohuaquinioj!

<sup>45</sup> Naacuajitij, Judas jaara tiuquiquiaari Jesuucua, nocua catecanoquiaariiri. Na sequereeri:

—¡Niishitiojonanaa!

Jiyacari na nujuureeri. <sup>46</sup> Judasta nijionaa pueyari jiyacari Jesu quiasee. Morojosanoori jaatucutashiyarohua.

<sup>47</sup> Cuniqiu Jesuta quiniaa pueyajinijinioni, niquiriyatu nojorijinijinioori na shuucuaji shitiaquiaari nijiniaquetucuaja mueruu. Nata jaateree pueyacuara secojonaa jiyaniijia seru numocoori. <sup>48</sup> Jesuuri nocua nijionaa pueya sequere:

—¿Casaara cucua nia nijioree nijiniaquetucuaja mueruutani, macacatanio, morojosano nia riniuria janiya juhua nohuasejojuani? <sup>49</sup> Janiyacuajaari puetunu juucajanaa nia tajinia quiquiaani, Pueyaso Secojoua tiajinia cua niishitiojosacari pueya niqiuara. Majaari tii cua quishacari nia quianu quiquianu janiya. Naajaa, naa nia miiriqui, tariucuacaanu janiyajiniji Pueyaso Rupaajinia naajiotasano tohuateenura.

<sup>50</sup> Jiyacaritij, puetunu Jesu saquiriojosano pueyajanaari na shuriucuaji mashiyocuatiquiaari. Tamajaaja Jesu tiujiatuqueeri. <sup>51</sup> Saaja tamonu mashajaari Jesu nuhuaji sacuariquiaa cutara. Cuno mashaja sesaari Marco. Nojuajaari saaja puereetueque lino toquerauta cuhuajaatiariquiaa. Jesu quiatunaa niquishacari nojuaja, na quiatureejaariuhuj. <sup>52</sup> Nojuajaari saaja na toque tiujiaquee nojori juaashiquiajinia. Juhuasuuri ritia netequee. Mashimiaari. Janiyacuajaari cuno pueyano quiquiaarini, nio naajionajuhuj.

*Judiocuaca camarucua nequesoreesacari Jesu*

*(Mt 26.57-68; Lc 22.54-55, 63-71; Jn 18.12-14, 19-24)*

<sup>53</sup> Jesu quiatunaari Jesu jaatucuquiaari pueyacuara secojonaa jiyaniijia tiajinia. Puetunu nio pojorijianaari tii rerejoquiaari: pueyacuara secojonaa jiyaniijianucua, Judiocuaca camarucujuhuj, Moisés Rootasanojiniji niishitiojonaanio. <sup>54</sup> Pedroori Jesu

nuhuajiquiaari tucuacaanuji. Jateeseeri pueyacuara secojonaa jiyaniijia tia carijiniacuma. Cuno jiyaniijijanaa seya tajinia cajishiiri. Mani jitiuriquiaa nojoritia cuniquiiri.

<sup>55</sup> Pueyacuara secojonaa jiyaniijianucua, puetunu Judiocuaca camarucujanaari niishiriojonuuriquiaa nojori saquiriojotanura Jesuucuara. Jesuucuara tonujuriquianoori pajesaaquiaari juucua, na motenura. Saaja shaaqui quiquiaariiri sesa casaa, nocuara tonujusocoriquiano. <sup>56</sup> Queraatia pueyari nocuara tonujuriquiaa juucua, nojori saponuta. Nojori saquiriojotasanoori saaja rimiajata quiriquiaa puetunujuanaa. <sup>57</sup> Na nuhuaji, tamasaari sanetaquiaari nocuara nojori tonujunura na saponotajuhuj. Nojoriiri naa sequetuquiaariti:

<sup>58</sup> —Canaa na tojiquianu sesa sequeyanoni. Naa sequecanuuri: “Janiya nio Pueyaso Secojoua tia niyartanutaniyani, pueya tiasanoni. Jiuujianaraca juucajinia, janiyari tamajaaja na tianu tucutanutaniuhuani. Cunoori maja pueyata tiasano na quiniutianiya”.

<sup>59</sup> Nojori saquiriojotasanoori saaja rimiajata quiquiaari jiyaniijianucua niqiara.

<sup>60</sup> Jiyacariti, pueyacuara secojonaa jiyaniijiaari nujuaree pocuanura. Jesu nequesotareeri:

—¿Majate quenaaja quia riucuanuujua? ¡Quia tojiri, pueyaruhua quiocuara tonujiya!

<sup>61</sup> Jesuuri saaja sanaa nujuariquiaa. Majaari na riucuanu quiriquiaa quenaaja. Pueyacuara secojonaa jiyaniijiaari socua na nequesotaquiaariuhua:

—¿Quiaate Cristo, jiyocuacaanuji Pueyaso Jiyarosano?

<sup>62</sup> Jesuuri na riucuarere:

—Jaa, nojuacuajaniija. Niaari cua niqiniutianiya jiyocuacaanu cumaaca Jiitiana miaquetajara cajiyano. Na nuhuaji, niaari cua niqiniutianiya tacatehuano cohuajajinia jiyocuacaanuji.

<sup>63</sup> Pueyacuara secojonaa jiyaniijia jaara tojiquiaari naa Jesu sequesantej, tama na toquejaaja sutaree na juaaniutiari. Sequereeri:

—¿Casaara pa sashiya tamasa saquiriojotanura saa nocuarajaanihuaj?

<sup>64</sup> Niaacuaja shusha tojirii Pueyasoocuara na sequesano sacuaratia. ¿Niajaniyarijiata, taa nia niishiriojiyani?

Puetunu pueyajanaari sequequiaari:

—¡Cuaara mosaaria!

<sup>65</sup> Jiyacariti, tamasaari Jesu riocojonu coteequiaari. Na jiquioco morotureejaariuhua maja na niqiniuria. Na nuhuaji, pueyari na piquiniu coteequiaari. Na piniu nuhuaji, na nequesotaturiquiohuari:

—Quia niishiritioj, ¿cante quia piriini?

Secojoua tia cojuanaa pueyari na jiquioco piquitiurijihuaj.

### *Pedro seetasacari Jesujiniji*

(Mt 26.69-75; Lc 22.56-62; Jn 18.15-18, 25-29)

<sup>66</sup> Pedroori jiyaniijia tia carijiniacuma quiriquiaa. Jiyacariti, tamonu niyacoori rucuaneriquiaa carijiniacuma. Nojuajaari pueyacuara secojonaa jiyaniijia seru quiquiaari. <sup>67</sup> Pedro niqishii cajiyanoori, mani jitiuyano. Tacuriitia na shootariquiaari. Na nuhuaji na sequereeri:

—Jaj, quiaacuajaruhua Jesuta rucuanerijuhuj, cuno Nazaret tiacajinijinio pueyanotani.

<sup>68</sup> Pedroori na seetaree. Na sequereeri:

—¡Cuno pueyano maja cua niishishano! ¡Majaari quenaaja cua niishiniu casaa quia sequeyani!

Pedroori canujyaree. Mataca tohuateyaji nujuaseeri. Caacarajaari jiyacari niunijioree. <sup>69</sup> Cuno niyacoo jaara Pedro niqiquiaariuhua socua, juhuacatecara nata quiniaa sequereeri:

—¡Nio pueyanoori cuno Jesu pueyajinijiniojuhuaj!

<sup>70</sup> Pedroori socua na seetaquiaari. Pasaja na tarishishacari, cuniqui nata quiniaari Pedro sequeere socua:

—Seetanujuanaa, quiaari cuno pueyajinijinio. Quiaacuajaari Galilea jiyajinijinio pueyano. Canaa tojishacari quiajaniya, quia pocuanuuri juhua nojori pocuanujua.

<sup>71</sup> Pedroori socua jiyanojua sapojonu coteequiaari. Naa sequereeri:

—¡Pueyaso cuaara saniitioora janiyaqui, janiya jaara sapojiani! ¡Seetanujuanaa, maja cua niishiniu cuno pueyano, canajiniji nia nequesoreetaacuajani!

<sup>72</sup> Jiyacaritij, caacarajaari niunijionu pacuterohuacuhuj. Pedroori jiyacari niishiquii naa Jesu sequesano nojuajatej: “Juhuanajuaja caacaraja niunijionu pacutejiyaquishacar-ijia juhuaquenu panishacari, quiaari janiyajiniji tari seetanu pacutejonutaniya”. Pedro jaara niishiquii naa Jesu sequesano nojuajatej, jiyanojua nujuquequeeri.

## 15

### *Jesuucua pueya saquiriojotasacari Pilato*

(Mt 27.1-2, 11-14; Lc 23.1-5; Jn 18.28-38)

<sup>1</sup> Tariquicuaji, pueyacuara secojonaa jiyaniijianucuaari rerejoquiaari Judiocuaca camaruata, Moisés Rootasanojiniji niishitiojonaatajuhuaj, Sanedrín maanutanio. Nojoriiri moronucua Jesu jaatucutaquiaari Pilatoocua. Cuno Pilatocuajaari Judea jiya jiyaniijia quiquiaari. <sup>2</sup> Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucuaaree:

—Jaa. Naacuaaquiniatejaj, taa quia sequereecuajani.

<sup>3</sup> Pueyacuara secojonaa jiyaniijianucuaari Jesuucuaa tonujuriquiaa queraatia sesa casaa. <sup>4</sup> Pilatoori Jesu nequesotarohuacuhuj:

—¿Majateeri quenaaja quia riucuanuujua? Quia tojiri taa cuno pojori saquiriojotaa quiocuarani.

<sup>5</sup> Jesuuri maja na riucuanu quiriqiaa quenaaja. Cunora, Pilatoori jiyanojua jiuujiatequiaari.

### *Na paraa sequesacari Jesu cuaara mosaaria*

(Mt 27.15-31; Lc 23.13-25; Jn 18.38-19.16)

<sup>6</sup> Puetunu marijarajanaa, Pascuara queranacunu juuca, Pilatoori nujuatesano pueyano tohuataniniu jiitiquiaari nujuatejojuajiniji, cana pueya paniquiaari na cartesaanuracuajani. <sup>7</sup> Jiyacaritij, tamonu pueyanoori nujuatejojuajinia nujuariquiaa. Na sesa quiquiaari Barrabás. Nojuajaari tamasa pueyata pueyano moquiaari. Cunoori quiquiaari nojori juaashacari, Romano taucuaa jiyaniijia jiitianuucua Judiocuaca. <sup>8</sup> Pilato nequesoreesacari Jesu, jiyacaritij, queraatia pueyari Pilatoocua nijioquiaari naa nojori secojonura nojuaja:

—Pueyano quia carterohua nujuatejojuajiniji, taa quia miiquiaacuaja puetunu marijarajanaani.

<sup>9</sup> Pilatoori nojori riucuaaree:

—¿Cana nia paniya cua cartenurani? ¿Niaate niarta Judiocuaca jiyaniijia paniya cua cartenura?

<sup>10</sup> Nojuajaari tama niishiquiaarijiaaja, pueyacuara secojonaa jiyaniijianucuaari Jesu niqiniu paniyaquiquiaari pueya shocotenuucua nojori saniniuujia Jesuucua. <sup>11</sup> Pilato nequesotasacari nojori, pueyacuara secojonaa jiyaniijianucuaari jiyacari pueya shiniuujiquiaari nojori sequenura Pilato, nojuaja cuaara carteira Barrabás. <sup>12</sup> Naarate Pilatoori nojori nequesotarohua socua:

—¿Taa nia paniya cua miiniuria nio pueyanoni, nia sequesano niarta Judiocuaca jiyaniijiani?

<sup>13</sup> Nojoriiri naa nacaree jiyanojua:

—¡Cuaara mosaaria niyacutesanojinia teetesano!

<sup>14</sup> Pilatoori nojori riucuaaree:

—¿Casaarateni? ¿Casaa na miiquianu sesajaarani?

Nojoriiri saaja jiyanojua nacaree:

—¡Niyacutesanojinia quia teetere!

<sup>15</sup> Pilatoori socua tariniquiaari. Nojuajaari maninia quiniu paniquiaari Judiocuacata. Cunora, Barrabás cartereeri. Saniniuujia, Jesu majacuteree cutaraari. Na nuhuaji, na soldadohua na niqutioreeri, niyacutesanojinia na teetsaanura.

<sup>16</sup> Jiyacaritij, soldadohuari Jesu jaatucuquiaari jiyaniijia Pilato tiajiniaaco. Nojoriiri puetunu narta soldadohuajanaa rerejoteree Jesu shocua. <sup>17</sup> Soldadohuari Jesu cushitiquiaari shaaruque toque, juhua jiyaniijiajanaa cushishano. Juhuacontucua maatusano cushitishaarejaariuhua na nacaquera. <sup>18</sup> Na nuhuaji, nojoriiri na rupaa paaretanu coteequiaari Jesu na macaatiiniuria:

—¡Jejejee, Judiocuaca camarnuna nooj!

<sup>19</sup> Nojoriiri na naca piquirii naajuata. Na riocojotureejaariuhuj. Nocuara mojquetacoreeri juhua jiyaniijiajanaa cariquimiaji, nojori sapojonuta na macaatiiniuria nojuaja. <sup>20</sup> Naa na rerequetesaanu nuhuajitij, toque naatuqueeri nocuaji jocusaaquiaari. Tama na toquejaaja cushitishaarohuari. Na nuhuaji, soldadohuari na tohuataniquiaari. Na jiyatatuquiaariiri niyacutesanojinia na teetsaanura.

*Jesu teetesacari niyacutesanojinia*

(Mt 27.32-44; Lc 23.26-43; Jn 19.17-27)

<sup>21</sup> Soldadohua jiyatasacari Jesu, tamonu pueyanoori jiyacari tacateriquiohua na cuhuariquiajiniji. Cuno pueyano sesa quiquiaari Simón. Soldadohuari Jesu teetejarano niyacutesano patanirii nojuaja. Nojuacuajaari Alejandro que, Rufo quenio.

<sup>22</sup> Jesuuri shiitianiyojua tuhuananuucua jiyatasaaquiaari. Cuno tuhuananu sesa quiquiaari Gólgota. Nioori pueyano rupaaajinia sequeya, “Pueyano nacaco”. <sup>23</sup> Soldadohuari Jesu raatequiaari vino juucua, mirrata cojitishano. Saaja na ratuyaquiriiri. <sup>24</sup> Jiyacaritij, nojoriiri Jesu teetequiaari niyacutesanojinia. Na nuhuaji, soldadohuari saitia tacuarishijioquiaari, nojori niishiniuria cantucua Jesu toque poore nerani. Naacuajitij, nojoriiri Jesu toqueya seraatiaquiaari tama nojoririjaaja.

<sup>25</sup> Jiyacaritij, niyacutesanojinia na teetesacari, shusha pananu tacasacariiri quiquiaari. <sup>26</sup> Naajioneeri na nacaacuma rupotasano quiquiaarijiuhuj. Tii sequequiaariiri casaara na mosaareeni. Naa naajiosano quiquiaariiri cuno rupotasanojinia: “Nioori Judiocuaca jiyaniijia”. <sup>27</sup> Jiyacaritij, caapiqui nohuasenuujuacaari Jesu shuriucua teetejosaaquiaarijiuhuj, socua tamonu caapiqui niyacutesanojinia; tamonu na miaquetajara, tamonu na muenecara. <sup>28</sup> Naa tohuateequiaariiri taa tariucuacaanu Pueyaso Rupaaajinia na naajiotasaaquiaaricujani. Naa sequeyari: “Na sesaari sesa miijica pueya sesacata cojiritiasaaquiaari naajiotasaanujuhuj”.

<sup>29</sup> Pueya tajishacari nucuaco Jesu shuriuquico, nojoriiri na macaatiquiaari. Na maanuenufa naa na sequetuquiaariiri:

—¡Jaj! ¿Majateeri quiajaniya cumaacaracacujaja? ¿Quiaateeri jiyaniriquiaa, quiaa jaara Pueyaso Secojoua tia niyartare, quia naata na tianu tucuatenuhua jiuujianaraca juucujinia? <sup>30</sup> Quiaa jaara naa cumaacaraca quirijitij, niyacutesanojiniji quia roserecuarajaj.

<sup>31</sup> Pueyacuara secojona jiyaniijianucua, Moisés Rootasanojiniji niishitiojonaari na macaatiquiaarijiuhuj. Tama nojorijaarijia naa sequetooquiaari:

—¿Maatucua saa tamasa naatanijioriquiaari? Tama nojuaja cutaraari maja na naata niyacutesanojiniji rosenu. <sup>32</sup> Jaara seetanujuanaa quiri Pueyaso Jiyarosano, pa jiyaniijia na quiniuria, cuara roseera niyacutesanojiniji pa niqiara. Pocua jiyacari nocua tiuuri cutarani.

Cuno nohuasenuujuaca Jesu shuriucua teetejosano quiriquiaani, nojoriiri na sesacariquiaajuhuj.

*Jesu cusosacari*

(Mt 27.45-56; Lc 23.44-49; Jn 19.28-30)

<sup>33</sup> Panacari, jiyari ninishiquiria quiquiaari puetunujuanaa. Tarishiquiaariiri. Shusha tenacariishacari cuhuatemohuari. <sup>34</sup> Jiyacaritij, Jesuuri jiyanohua na rupaa paaretaquiaari:

—Eloi, Eloi, ¿lama sabactani?

Nioori sequeya: “Cua Pueyasonaa, cua Pueyasonaa, ¿casaara quia carteree janiyani?”

<sup>35</sup> Na shuriucua nujuatunaa tojtiasacari naa Jesu paaretasacari na rupaatej, nojoriiri sequeturee:

—¡Nia tojiri, supuetana Elías jiiquioonuyano, nocua na niniuria!

<sup>36</sup> Tamonu pueyanoori ritia netequiaari namasu casaa na shiniuria jereeca vinojinia. Na nuhuaji, na morotaree naajuacuaari, na shitiasocoriquiano Jesu rupaama. Na raatereeri. Na nuhuaji, nojuajaari sequequiaari:

—¡Pa shanacure! ¡Supuetana Elías jiyoteeri nocua niniutianiya na roshininiuria niyacutesanojiniji!

<sup>37</sup> Jiyacaritij, Jesuuri jiyanoehua na rupaa paaretarohuacuhuj. Cusoqueeri.

<sup>38</sup> Jiyacaritij, Pueyaso Secojoua tiajiniaacuma, shiquiquia toquejiniji sohuacaari sutequee tamajaaja, jiyocuacaanuji jiyocuara. Cunoori pueya pueresano quiquio mishiquiotaja quiquiaari, pueya mariqui cusoqueeri Pueyasooeja nojori tiuquishacari juucua, jiyanooshoojua nojori quishacari. <sup>39</sup> Cuno Romano soldadoehua jiyaniijaari Jesu tajoji nujuariquiaa. Na niquishacari taa Jesu nacaquiaarini, naajuhuj, taa Jesu cusoquiaari na rupaa na paaretanutani, jiyacariti nojuajaari naa sequeree:

—¡Nio pueyanoqui seetanujuanaa Pueyaso nianu!

<sup>40</sup> Maajipohuari tii quiriqiaajuhuj. Tucuacaanuji Jesu shootiaturiquiaari. María Magdalenaari nojoritia quiriqiaajuhuj, socua narta maajipohuanio. Cuno maajipohuani, nojoriiri quiriqiaari Salomé, Maríano, cante Santiago, José nucua quiriqiaaricujani. Nio Santiagoni, nojuajaari socua naatujua na sesaanucua Santiagojiniji. <sup>41</sup> Puetunu nio maajipohujanaari Jesu nuhuajiniaa quiriqiaari. Nojoriiri nera pueraquenuunaa quiriqiaari, Galilea jiyajinia na quishacari. Socua queraatia maajipohuari tii quiriqiaajuhuj, canapuate Jerusalén tiacajiniara nijioquiaari Jesutacujani.

*Jesu quete niasacari raaco*

*(Mt 27.57-61; Lc 23.50-56; Jn 19.38-42)*

<sup>42</sup> Jesu cusonu juucani, cuno juuca sesa quiriqiaari “Jeenucuanu juuca”, maja samaatenu juuca poonijionura. Saniniuuja, tariqui quiriqiaariiri samaatenu juuca. Cunora, pueyari juhuacarijia jeenucuaquiaari puetunujuanaa. <sup>43</sup> Cuno juucajani, jeenucuanu juuca ninishacari quera, tamonu pueyanoori Pilatoocua quiaquiaari. Nojuajaari José, Arimatea tiacajinijinio pueyano. Cuno Joseeri tojishano pueyano quiriqiaari narta Sanedrín pueyara. Joseeri mijiria Pueyaso Jiyarosocoriquiano niquniuucua jiaatiaja quiriqiaarijuhuaj, canaa Jiyaniijajanaa na quiniuria. Nojuajaari maja na puerenu quiriqiaari Pilatoocua na tiuquiniuria, Jesu quete na masenura. <sup>44</sup> Pilatoori jiyanoehua jiuujiatequiaari na tojishacari Jesu tari cusoquee. Pilatoori soldadoehua jiyaniija sequeree nocua na niniuria. Nocua na tiuquishacari, na nequesotareeri:

—¿Taacari Jesu cusoqueeni?

<sup>45</sup> Soldadoehua jiyaniija jaara na riucuaquiaari taacari na cusoqueeni, Pilatoori jiyamitia José sequeree Jesu quete na panura. <sup>46</sup> Joseeri jiyacari shanohua quenaaruque toque masequiaari tama na cumaneecatajaaja. Na nuhuaji, macu roshiniriiri niyacutesanojiniji. Cuno toquejinia na jiuniooreeri. Na nuhuaji, na niaquiaari raacoori. Cuno raari jiuutiasano quiriqiaari saajiajinia. Joseeri raa tioree jiyanoehua puereetuuca quejasano saajiaata. <sup>47</sup> María Magdalena, José nucua Maríano, nojoriiri na niqutiariquiaa tee na niasareeni.

## 16

*Jesu samiitiasacariuhua*

*(Mt 28.1-10; Lc 24.1-12; Jn 20.1-10)*

<sup>1</sup> Samaatenu juuca jaara shocoquiaari, María Magdalena, Santiago nucua Maríajuhuaj, Salomeenio, nojoriiri shanohua jaanutaja masequiaari macuucua na tuujutasocoriquiano. <sup>2</sup> Jiyanoehua tariquicuajia Domingo juuca, shusha pananu muetasacari, nojoriiri raajinia quiojoquiaari. <sup>3</sup> Nucuo na quiojosacari, tama nojoriijaarijia sequetooriquiaa:

—¿Canteeri pocuaji shuquitiniutianiya tamocora raa tiotiini?

<sup>4</sup> Nojori jaara niqiquiaari raa, saajia niquitiuriiri tariucua tamocora shuquitishano. Puereetuuca saajiaari quiquiaari raa tiotiu. <sup>5</sup> Nojoriiri raaco tiuquitiamaa. Mashaja niquitiushiiri tii cajiyo nojori miaquetajara, cohuaja tucuaque toque cajitiaano. Nojoriiri jiyanohua shiriiquitiuquiaari na niquitiushacari nojuaja. Cuno mashajaari Pueyaso seru quiriquiaa. <sup>6</sup> Maajipohua sequereeri:

—¡Maja nia shiriiquiniu! Janiyari niishiyacuajani, niaari Jesu pajeya, Nazaret tiacajiniinio pueyano, niyacutesanojinia teetesaarucuaani. ¡Nojuacuaja tari samiitiarohua! Maja niya na quiniu. Nia niquishuriiria na maja, tee na niasaarucuaacuajani, shaaqui. <sup>7</sup> Na saquiriojosano pueya nia sequesuhua, Pedrojaajanio: “Nojuajaari nia puetanutaniya Galilea jiyajiniara. Niaari tii na niquiniutianiya, taa na sequecanu niajanuyacuajani”.

<sup>8</sup> Maajipohuari netecuatuquiaariuhua raajiniji. Nojoriiri tetecaturiquiaa na shiriiquiniutia. Majaari quenaaja tamasa pueya na sequetunu quiquiaari na puerenuta.

*Jesu muetasacari María Magdalenaacua*  
(Jn 20.11-18)

<sup>9</sup> Jesu samiitianu nuhuaji, cuno Domingo juucaja, shusha semaana coteenu juucani, Jesuuri coteenujuanaa muetaquiaari María Magdalenaacua. Jesucujaari tarijia siete samaruhua tohuatanijioquiaari cuno Maríajiniji. <sup>10</sup> María Magdalena niqiniu nuhuaji Jesu, nojuajaari quiaquiaari Jesu cojiniaa na numootenura. Cuno pojoriiri jiyacari taraajecoriquiaa. Nujuqueturiquiaari Jesu mosaanuucua. <sup>11</sup> María Magdalenaari nojori sequesee:

—Pueyanaa, ¡Jesu tari samiitiarohua! ¡Janiya na niquiriini!  
Nojoriiri María sequesano cuaracashitirii saaja.

*Jesu muetasacari caapiqui na saquiriojosano pueyacua*  
(Lc 24.13-35)

<sup>12</sup> Na nuhuaji, Jesuuri socua caapiqui na pueyacua muetaquiaari nojori quiojosacari tamocora. Nojuajaari tamaatia niquishano quiriquiaa nojoriria. <sup>13</sup> Nojori niishishacari nojuacuaja Jesu quiquiaari, nojoriiri ritia riujuuquiaariuhua tamasa nojorijinijinio nojori numootenuhuara. Naajuhuj, Jesu saquiriojosano pueyari nojori pahuatasano cuaracashitiriijuhuaj.

*Jesu rootasacari na jiyaramiquishocoriquiano pueya*  
(Mt 28.16-20; Lc 24.36-49; Jn 20.19-23)

<sup>14</sup> Tamacari, Jesuuri na once saquiriojosano pueyacua muetaquiaari. Nojoriiri mi-aquejajinia cajitiuriquiaa jiyacari. Jesuuri jiyacari nojori juaarii cumajiuujiaaca nojori quiniuucuaaja. Majaari quenaaja nojori tiuuniu quiquiaari nojorijinijinio pueyacua, nojori sequesacari: “Canaa Jesu niquiriini, samiitiarohuacuaaqui”. <sup>15</sup> Na nuhuaji, Jesuuri nojori sequeree:

—Nia quiaare puetunu jiyacajinijanaa, janiyajiniji Pueyaso rupaa nia pahuatanura, puetunu nia pahuatanooocua tiuujiaa pueyapuejanaa jiyanooshaanura. <sup>16</sup> Cante moojinia tiuquinishiya Pueyaso rupaacua na tiuuniuucuaani, Pueyasoori na jiyatunianiya na pueyanora. Saniniuujia, cante Pueyaso rupaacua tiuyaquiyani, nojuajaari saniitosano quiniutianiya. <sup>17</sup> Cucua tiuujiaacari nocuaji pueya jiuujiatesano casaa miiniutianiya cua cumaacata, pueya niishiniuria Pueyaso rupaaqui seetanu rupaajanaa. Naacuajitij, cucua tiuuniaa pueya nia quiniuucua, niaari samaruhua tohuatanijionutianiya cua cumaacata, nia jiyaniquishacari cua sesa. Niaari nia niishiyaquishoo rupaaca pocuajaca quiniutianiyajuhuj. <sup>18</sup> Naajuhuj, niaa jaara soconu sajitishaare, niaa jaara casaa raatesaarejuhuj nia cusojuasaanura juucua, majaari nia cusonu quiniutianiya. Naajuhuj, cusosuhucua nia niasacari nia juaashiquia, cusosuhuari naataconutaniuhua.

*Jesu tacasacariuhua jiyocuacaanu na Queecua*  
(Lc 24.50-53)

<sup>19</sup> Na pocuanu nuhuaji, Jiyaniijia Jesuuri tacanishaaquiaariuhua jiyocuacaanu. Nojuajaari Pueyaso miaquetajara cajiquiaariuhua. <sup>20</sup> Na nuhuaji, na saquiriojosano pueyari quiojoquiaari Pueyaso rupaa nojori pahuatanura puetunu jiyacajinijanaa. Jiyaniijia

Jesuuri pueyaracaanu nojori cumaquiriquiaa. Pueya niqitiriijaariuhua na cumacata na pueya mijiosano, pueya niishiniuria maatia, Jesu jiyaramiquishano pueya pohu-atasanoori seetanu rupaajanaa.



## LUCAS NAAJIOTASANO JESUCRISTOJINIJI

### *Niya pohuatashiyari casaara Lucas naajiotaquiaari nioni*

<sup>1</sup> Queraatia pueyari suraatia naajionu saniniujuquiaari puetunu canaa tajinia miishanojuanaa. <sup>2</sup> Nojoriiri naajioquiaari taa Jesu jiyaramiquishano pueya pohuataquiaari Jesujiniiji pajaniyani. Cuno pojoriiri Jesu niquiniaa quiquiaari, shusha poonijionu na cotelesacari. Nojoriiri na nuhuaji na rupaa pohuatanaara jiyatesaaquiaari. <sup>3</sup> Janiyari niishiriojoriquiaani, maniniaruhua quiocuara cua naajionurajuhuj cua panishano Teófilonaa. Naaratej, janiyari pueyaracaanu jacaria nequesoreeriquiaa puetunu Jesu miishanojuanaani, na coteejajiniiji. <sup>4</sup> Naacuajitij, quiocuara naajiyaniija na coteenujiniiji, seetanujuanaa quia niishiniuria puetunujuanaa, taa quia niishitiojosaacanucujani.

### *Pueyaso seru pohuatasacari Tiuquinijiona Juan rasaanutaniya*

<sup>5</sup> Herodes jaara jiyaniija quiquiaari Judea jiyajinia, Zacaríasri jiyacari pueyacuara secojona quiquiaari. Nojuajaari supuetana Abías niqiuohuacuajinio supueno quiquiaari. Necocua sesa quiquiaari Isabel. Cuno maajiiri supuetana Aarón niqiuohuacuajinio supueno quiquiaari. Nojori supuetanaari mariyata tariucuacaanu pueyacuara secojona quiquiaari. <sup>6</sup> Zacaríasri necocua Isabelta maninia miijiaca quiquiaari Pueyaso niqiuara. Nojoriiri puetunu Pueyaso rootasanojuanaa tojitiajaca quiquiaari, taa Pueyasojiniji caminiujiuniaa naajionuutaquiaaricujani. Nojoriicuara maja na naata sesa casaa tonujusaanu quiquiaari, saaja maninia miijiaca nojori quishacari. <sup>7</sup> Nojoriiri maja na muetunu quijia, niyajaru Isabel quiniucua. Naajuhuj, nojoriiri maja tari na naata muetunu quiquiaari, saaquiapue nojori quishacari.

<sup>8</sup> Tamacari, Zacaríasri narta pueyacuara secojonaata poonijioriquiaa Pueyaso Secojua tiajinia Pueyaso niqiuara Jerusalén tiacajinia. Jiyacari saniniuujia nojori poonijosacariiri quiquiaari. <sup>9</sup> Shanohua jaanutajaari catijiasaaquiaari puetunu juucajanaa Pueyaso Shuriucua Quiquiojinia, Secojoua tiajinia. Pueyacuara secojo naari jiitiquiaari saajia naajiosano jacutanura juhua tacuarishijosacari, nojori niishiniuria teyano nojorijinijiniote Pueyaso Shuriucua Quiquio tiuquiniutianiyani, shanohua jaanutaja na catijianura tii. Cuno juuca saniniuujia, saajiaari Zacaríascuara tacatequiaari. Naacuajitij Zacaríasri seeratasaaquiaari tii na tiuquiniuria shanohua jaanutaja na catijianura. <sup>10</sup> Na catijiasacari, puetunu pueyajanaari Pueyaso secojonuuriquiaa Secojoua tia carijiniacuma. <sup>11</sup> Jiyacaritij, Pueyaso seruuri Zacaríasqua muetaquiaari. Nujuariquiaari shanohua jaanutaja catijiasaqui miaquetajara. <sup>12</sup> Zacaríasri shiriiquirii na niquishacari Pueyaso seru. Jiyanhua na puerereeri. <sup>13</sup> Pueyaso seruuri na sequeree:

—Maja puerenu Zacaríasnaa. Pueyasocuajaari quia secojosano tojiquiaari. Quia niqiuocua Isabelri quia muetunutaniya. Quiocua na sesojore “Juan”. <sup>14</sup> Quiaari shuquiriaatia quiniutianiya. Quiaari quia mueya timitianutaniya. Queraatia pueyari na shuquiritianutaniya na rasacari. <sup>15</sup> Quia niyanuuri cutara pueyano quiniutianiya Pueyaso niqiuara. Nojuajaari vino ratuyashijia quiniutianiya, najatunacunio. Pueyaso Sohuanuraca pueyano quiniutianiyari na rasaacarijiyojua. <sup>16</sup> Nojuajaari queraatia Israel pueya tacatonutaniuhua nojori Jiyaniija Pueyasocua. <sup>17</sup> Nio Juanri pa Jiyaniija puetana quiniutianiya. Nojuajaari pueyara Pueyaso sequesano caminiujiunia supuetana Elías sohuanu jiitianutaniya, na cumaacanio. Naacuajitij, pueya jiuujia taraajonutaniyani, nojori jiyanooniuria necohua. Naajuhuj, nojuajaari tojitiaashijia pueya rootanutaniya maninia, Pueyaso tojitiajaca nojori quiniuria. Naacuajitij, pueya jiuujiacaari jeenucuasano quiniutianiya pa Jiyaniijaacuaji.

<sup>18</sup> Zacaríasri Pueyaso seru nequesotaree:

—¿Taa cua niishiniutianiyarini quia sequesano seetanujuanaa tohuateenutaniya quiria? Janiyari tari saaquianoni. Cua niqiuocuaari motajajuhuj.

<sup>19</sup> Pueyaso seruuri na riucuaree:

—Janiyacuajaari Gabrielni, Pueyaso tacoji nujuana, na sequesano cua miiniuria. Nojuajaari cua jiyaroree cua pohuatanura quiajaniya nio maninia casaa Pueyasojiniiji.  
<sup>20</sup> Quiarijia saniniuujiia, cua sequesanoocua quia tiuyaquiniuucua, quiaari tiquia quiniutianiya. Majaari quia pocuanu quiniutianiya cuaara rasaarejaatijia quia niyanu. Naajaa, puetunu cua sequesanojuanaari naa quiniutianiya taa Pueyaso paniyacuajani.

<sup>21</sup> Jiyacaritij, pueyari Pueyaso quiquio carijiniacuma sashiriquiaa, Zacarías cuaara tohuatohuara. Nojoriiri shiriiquitiurii pueyaracaanu Zacarías tarishishacari Pueyaso Shuriucua Quiquiojinia. <sup>22</sup> Zacaríasri socua tohuatamohua. Majaari na naata pocuanu quiriqiaa. Nareja shishiniojoriquiaari. Naacuajitij, pueyari niishirii Pueyasoqui casaa niquitirii Zacarías, Pueyaso Shuriucua Quiquiojinia na quishacari.

<sup>23</sup> Zacarías jaara puecaquiaari puetunu na poonijionu juucajanaa taa na sequesaaquiaaricuajani, na tiajinia quiaarohuari. <sup>24</sup> Na nuhuaji, necocua Isabelri manajeree. Na manaja jamaatiaquiaariiri. Majaari na muetanu quiquiaari na tiajiniji cuaara na shocojoquiaarijiaatijia cinco raca. Nojuajaari tama sequequiaarijiaaja: <sup>25</sup> “Quiarijiani, cua Jiyaniijaari maninia miirii janiya. Majaari socua pueya rerequetenu quiniutianiya janiya, muetujua cua quishacari tari”.

*Pueyaso seru sequesacari Jesu rasaanutaniya*

<sup>26</sup> Seis raca jaara shocojoquiaari Isabel manajesacaricuaa, Pueyasoori na seru Gabriel jiyaroree Nazaret tiacajinia, Galilea jiyajinia. <sup>27</sup> Tamonu niyacoocua na jiyaroreeri, cante tari sequesaaquiaaricuajani José jiyaniishano pueyanota na caminiuria. Na camiriquianoori supuetana jiyaniija David niquiohuacuajinio supueno pueyano quiquiaari. Niyacoo sesa quiquiaari María. <sup>28</sup> Pueyaso seruuri nocua tiuquimiaa. Na sequereeri:

—Janiyari quiocua jiyarosaareeni, Pueyaso shuquiritiasano niyacoona. Jiyaniija Pueyasoori quiata quiya, socua shuquiriaatia quia quiniuria tamasa maajipohuajiniiji.

<sup>29</sup> Maríari jiyanohua tacaquiaari naa Pueyaso seru sequesacari nojuaja. Nojuajaari tamajaaja niishiriojoriquiaa: “¿Casaara naa na sequeree janiyani?” <sup>30</sup> Na nuhuaji, Pueyaso seruuri na sequeree:

—Maríanaa, maja puerenu. Pueyasoori quia shuquiritiniutianiya. Quiaacuajaari na timitiasano. <sup>31</sup> Quiarijiani, quiaari manajenutaniya. Quiaari cayaniyoyua ranutaniya. Quiocua na sesojore “Jesu”. <sup>32</sup> Nojuajaari cutara pueyano quiniutianiya. Sesojosaanutaniyari “Pueyaso Niyanu”, jiyocuacaanu Quijia Niyanu. Pa Jiyaniija Pueyasoori na jiyatenutaniya Jiyaniijiarajanaa na quiniuria na supuetana David niti. <sup>33</sup> Israel pueya jiyaniija quiniutianiyari. Pueyaracaanu jitianutaniya na pueyari. Majaari na shaajenu quiniutianiya Jiyaniija na quishacari.

<sup>34</sup> Maríari Pueyaso seru nequesotaree:

—¿Taa cua manajenutaniyari, niyacaaju cua quishacari?

<sup>35</sup> Pueyaso seruuri na sequeree:

—Pueyaso Sohanuuri quiocua niniutianiya. Na cumaaca naaquiiri quiocua pacunutaniya. Naacuajitij, quia niyanuranoni, cunoori Pueyaso Niyanu quiniutianiya. Nojuajaari seetanujuanaa Pueyaso tojijia quiniutianiya. <sup>36</sup> Naajuhuj, quia supuetana-jinijinio motaja Isabelri neyanu ranutaniyajuhuj. Cuno maajiiri sequesaaquiaari “niyajaru maajitia”. Naajaa, seis racaari tari na shocojiya na manajesacari. <sup>37</sup> Pueyasora, majaari jiyajeneta casaa quiniu. Nojuajaari cumaacaraca na miiniuria puetunu na panishanojuanaa.

<sup>38</sup> Maríari sequeree:

—Maniniacuajaqui. Janiyacuajaari cua Jiyaniija Pueyaso seruni. Pueyaso cuaara miiria janiya taa quia sequereecuajani.

Na nuhuaji, Pueyaso seruuri quiacuhua.

*María quiasacari Isabel niquiniuucua*

<sup>39</sup> Maríari jiyacari quiaquiaari na secoonuta Judea jiyajinia, Zacarías tiajinia tamonu tiacajinia. Cuno jiyari tuhuananuhuaraca. <sup>40</sup> Zacarías tiajinia María tiuquishacari, Isabel sequereeri. <sup>41</sup> Isabel tojishacari María sequesano nojuaja, jconajaari na jiniacuma

njuanequequee! Pueyaso Sohuanuuri Isabelcua tiuquiquii na cumaaca na jiitianura.  
<sup>42</sup> Naacuaajitij, Isabelri jiyacari na rupaa paaretaree. Naa María sequereeri:

—¡Pueyasocuajaari socua maninia miiriucuaa quiajaniya tamasa maajipohuajiniji!  
 ¡Maninia miiniutianiya quia niyanujaarihuaj! <sup>43</sup> ¿Janiyateeri pueya tojishano maajini,  
 cua Jiyaniijia nucua tiuquiniuria cua tiajinia, na niquiniuria janiya? ¡Maja! Naajaa,  
 jjiyanohua timiyanijia! <sup>44</sup> Shusha cua tojishacari quiajaniya cua sequeyano, cua mueyari  
 cua jiniacuma njuanequequee na shuquiriniutia. <sup>45</sup> Shuquiriaatia quia quiri, quia  
 tiuuniucua Pueyaso sequesanoocua quiajaniya.

<sup>46</sup> Maríari sequereer:

—¡Coojia jiyanoohua shuquiritiaa cua Jiyaniijia Pueyaso! <sup>47</sup> ¡Cua sohuanuuri cua Jiyanoo-  
 nia Pueyaso timitiaani! <sup>48</sup> Juhua najuhuaa quijianijia. Naajaa, Pueyasoori  
 cua jiyanoorii. Cua saquiriojorucuaari na tojijia cua quishacari. Quiarijiani,  
 pueyari pueyaracaanu cua sequenutaniya: “Pueyaso shuquiritiasano María”.  
<sup>49</sup> ¡Pueyasoori jiyanoohua maninia miirii janiya! Nojuajaari puetunu cumaacara-  
 cajanaa. Nojuajaari tojetaarucujanaa maninia quijia. <sup>50</sup> Nojuajaari pueyara-  
 caanu jiyanooquiaa na tojitianaa, canapute na rerequeteyaquijiacacuajani.  
<sup>51</sup> ¡Nojuajaari jiyanoohua maninia miiquiaa na cumaacata! Nojuajaari niishijiaca  
 pueya shocotequiaari, canapute tama na cuaqueyajaaja jiyatequiaari juhua  
 niishijiacaracuajani. <sup>52</sup> Nojuajaari cutara jiyaniijianucua jatatee, cuno pojori  
 jiyaniishano niishiyashijiaca pueya jiyatesaanura jiyaniijiaara nojori niti sanini-  
 uujia. <sup>53</sup> Miaajeejunucua tootijioreeri maninia sumatuuta. Puera casamiriaca  
 pueya taanuuquiaariiri, casaaju nojori quiojonura. <sup>54</sup> Na pueya Israel naacureeri.  
 Majaari na niyajetanu quiquiaari nojoriicua na taraajenu. <sup>55</sup> Naa miiquiaariiri  
 taa na sequequiaari pa supuetanaacuajani. Pueyasoori naa pa supuetana Abra-  
 ham sequequiaari: “Seetanujanaa quiocua taraajenutaniyanijia, quiocuajinio  
 superiquiano pueyacuanio”.

<sup>56</sup> Na nuhuaji, Maríari queraatia tarishiquiaari Isabel tiajinia. Jiuujianaraca raca  
 nuhuaji, Maríari tacatequiaarihuua na tiajiniohua.

#### *Tiuquinijiona Juan rasacari*

<sup>57</sup> Na nuhuaji, Isabel rasacari quiquiaari. Jiyapueratereeri. <sup>58</sup> Na shuriucua quiniaa,  
 mariyata na jiyasoocuajinio supueno pueyajuhuj, nojoriiri jiyanoohua shuquiriquiaari  
 nojori tojishacari taa Pueyaso jiyanoohua taraajequiaari Isabelcuani, na shuquiritiniuria  
 neyanuta. Nojoriiri Isabelta shuquiriquiaarijuhuaj. <sup>59</sup> Nojoriiri Zacarías tiajinia  
 rerejoquiaari conaaja jiitiasacari ocho juuca, na cararaatiuuquia co miatesaanura, taa  
 Moisés rootaquiaaricuajani. Nojoriiri na sesojonu paniriquiaa juucua Zacarías, na que  
 sesaanucua na quiniuria. <sup>60</sup> Na nucuaari saaja sequereer:

—¡Maja! Sesojosaanutaniyano “Juan”.

<sup>61</sup> Pueyari saaja sequereer:

—¿Casaarateni? ¡Majaari quenaaja tamonu quia pueyajinijinio cuno sesaraca na  
 quiniu quiquiaari! ¿Casaara naa quia sesojonu paniyarini?

<sup>62</sup> Cunora, pueyari na que Zacarías shishinioree na nequesotanura taa na sesojonu  
 paniriquiaa neyanuni. <sup>63</sup> Zacaríasri naajioju casaa maseree na naajionura tii neyanu  
 sesarano. Naajioreeri: “Na sesa, Juan”. ¡Pueyari jiuujiatequee! <sup>64</sup> Jiyacaritij, Zacarías  
 nitiiri sasaquitiacuhua. Jhuacatecara pocuarohuari. Pueyaso miishano pohuataree  
 pueya niqiiaraari, na shuquiritiasacari Pueyaso. <sup>65</sup> Cunora, na tia shuriucua quiniaa  
 pueyari jiuujiateree. Puetunu niojuanaari caminiujiushaaquiaari puetunujuanaa cuno  
 Judea tuhuananuhucua quijiaa pueyara. <sup>66</sup> Puetunu nio tojitianaa pueyajanaari  
 niishiriojonuuquiaari. Tama nojorijiaarijia nequesoreetooquiaari:

—¿Casaquitijia cuno mueya quiniutianiya na nuhuajitijaj?

Pueyari niishiquiaari Pueyasoori seetanujanaa cuno mueyata quiriquiaa, na  
 cumaquiniuria.

#### *Zacarías sequesano na shuquiritiasacari Pueyaso*

<sup>67</sup> Na que Zacarías jiuujjaari jyanohua mishaja quiriquiaa Pueyaso Sohuanuta. Pueyaso Sohuanuuri na pohuateree. Naaratej, Zacaríasri naa sequequiaari:

<sup>68</sup> —¡Jyanohua maninia pa Jiyaniijia Pueyaso, pa supuetana Israel Jiyaniijia! ¡Cuaara jyanohua shuquiritiasaaria mijiria na niniuucua na pueyacua, pocuaji na tacunura! <sup>69</sup> Pocua jiyaroree cumaacaraca pocuaji Tacuriquianoori. Pa Jiyaniijiaranoori Pueyaso seru David niquiohuacuajinio rasaanutaniya, taa Pueyaso sequequiaari tariucuacaanucujani. <sup>70-71</sup> Tariucuacaanu na sequenu panishano caminiujiuniaacuajaari naa pohuataquiaari pa supuetanaa niquiaratej, taa pa paraa na ritianutaniya pocujini, pa niquiniu paniyaquijia pueyano. <sup>72</sup> Nojuajaari sequequiaarijuhuaj, majaari na niyajetanu quiniutianiya na sequesano pa supuetanaa, pocua na taraajenura. <sup>73-74</sup> Pueyasoori pa supuetana Abraham sequequiaari seetanujuanaa, nojuajanaari pocuaji ritianutaniya pa paraa, pa puereyaquiniutia nera pa poonijionura shitimia. <sup>75</sup> Nojuajaari Abraham sequequiaarijuhuaj maninia quijira pa jataniniutianiyaquiniaari, saaja nera pa quiniuria pueyaracaanu. <sup>76</sup> Quiajaniya saniniuujia, quiyanuniyojuanaa, quiaari sesojosaanutaniya Jiyocuacaanu Quinia sequenu panishano caminiujiunia. ¡Quiaari pa Jiyaniijiaranojuanaa puetanutaniya, juhua na nuu jeenucuariquiano! <sup>77</sup> Quiocua Pueyaso saquiriojosano pueya niishitiojore, nojoriiri na naata jiyanooshano quiniu sesa nojori miishanojiniji Pueyaso pueya nojori quiniuria. <sup>78</sup> ¡Pa Pueyasoori jyanohua jyanoojia! Pocua taraajeja. Na jiyarosacari poojia Cuhuatariquiano, nojuajaari pa cuhuatanutaniya, maja ninishiqui pa quiniuria socua. <sup>79</sup> Maninia pa cuhuatanutaniyari, maninia pa rucuanenonura Pueyaso niquiara, panaatia poojiacata. Naacuajitij, majaari socua pa cajitiuniu quiniutianiya taraatia ninishiqui, juhua pa jamaca shuriucua.

<sup>80</sup> Conajaari maashiquiaari. Nojuajaari tama na cuaqueyajaaja cumaquiquiaari socua seetanujuanaa Pueyasoocua tiuujia na quiniuria. Nojuajaari pueyaracaanu cariiquia jiyajinia quijia quiquiaari nojuaja jaara Pueyaso sequenu panishano caminiujiuniu coteequiaarijiaatijia narta Israel pueya niquiara.

## 2

### *Jesu rasacari* (Mt 1.18-25)

<sup>1</sup> Tiuquinijiona Juan rasaanu nuhuaji, jiyaca jiyaniijiajanaa César Augustoori Roma tiacajiniji sequequiaari puetunu na jiitiasano pueyapuejanaa cuaara serojosaaria puetunu nojori jiyacajiniajanaa. <sup>2</sup> Pueya jaara coteenujuanaa serojosaaquiaari, Cirenio jyanishano pueyanoori jiyacari Siria jiyajinia jiyaniijia quiquiaari. Nojuajaari jiyaniijia César Augusto jiyatesano quiquiaari. <sup>3</sup> Puetunu pueyajanaari sequesaaquiaari nojori cuaara quiojohuara na raja tiacajinia, na sesaca naajiotasaanura tii.

<sup>4</sup> Joseeri jiyacari Nazaret tiacajinia quiriquiaa, Galilea jiyajinia. Na raja cutaraari quiquiaari Belén tiacajinia, Judea jiyajinia, tee na supuetana David rasaaquiaaricuaani. Naaratej, Joseeri Belén tiacajinia quiaquiaariuhua. <sup>5</sup> Maríari tari sequesaaquiaari nojuaja Joseeta caminiutianiya. Naaratej, Maríari nata quiaquiaarijuhuua Belén tiacajinia, nojori sesaca naajiotasaanura tii. José niquiocuaranoori tariucua manajaraca quiriquiaa. <sup>6</sup> Belén tiacajinia nojori quishacari, jiyacari tari quiquiaari María ranu juuca. <sup>7</sup> Tii jiyapueratereeri. Conaja jiuuicoquiaari toqueraacuacajiniaari. Na nucuaari na niaquiaari juyaca miaquejajinia. Maríari naa raquiaari cuniqui maja quiquio quishacari nojoriria rucoonaa tiuquijia tijajinia.

### *Pueyaso seya muetasacari borrego cojuanaa pueyacua*

<sup>8</sup> Belén tiaca shuriucua cuno niucujaja, borregohua cojuanaari suteriquiaa cuhuariquijajinia, na seya nojori cojuasacari. <sup>9</sup> Canashiyaquiji Pueyaso seruuri nojoriicua muetaquiaari. Jiyaniijia Pueyaso shacantuuca cumaacaari nojori cuhuataquiaari. ¡Nojoriiri jyanohua shiriiquitiirii! <sup>10</sup> Pueyaso seruuri nojori sequeree:

—¡Maja nia puerenu! Niaacua nimiaanijia, jiyanoehua maninia casaa cua pohuatanura niajaníya. Cunora, puetunu pueyajanaari shuquiriniutianiya. <sup>11</sup> ¡Niaacuaji Tacunaari tari rasaaree supuetana David tiacajinia! Nojuajaari Pueyaso Jiyarosano, pa Jiyaniijia Cristotuhuj. <sup>12</sup> Níaa jaara nocua quíaae, níaaari conaaja riuríatanutaniya toqueraacua-cajinia jiuniocosano, juyaca miaquejajinia maano. Naacuajitij, níaaari niishiniutianiya, seetanujuanaari cua pohuatasano niajaníya.

<sup>13</sup> Jiyacaritij, narta Pueyaso seyari na cojishii. Jiyanoehua queraatia quiriquíaaari. Nojoriiri naa maniniuhuaqueetariquiaa Pueyaso:

<sup>14</sup> —¡Jiyanoehua maninia pa Pueyaso, jiyocuacaanu Quijia! ¡Nojuajaari jiyanoehua pa shuquirítiasano, na jiyaronuucua jiyacua quíniaa Jiyanoonia! Naacuajitij, cana Pueyaso shuquirítiaani, nojoriiri jiyanoootoonutaniya narta pueyata.

<sup>15</sup> Pueyaso seya jaara tacataquiaariuhua jiyocuacaanu na quiquiojiníohua, borregohua cojuanaari tama sequetooquiaaríiaaja:

—¡Belén tiacajinia pa quíaaequíj! ¡Pa níquishíi cuno, casaajiníi pa Jiyaniijia nu-mooteree pajaniyacuaajani!

<sup>16</sup> Nojoriiri ritia quíjoquiaari. Conaaja riuríatatuséeri, María, Josénio. Conaajaari juyaca miaquejajinia niasano maríquiaa. <sup>17</sup> Nojori níquishacari conaaja, nojoriiri ritia tíi quíniaa pueya camíniujíurii conaajajiníi Pueyaso seru pohuatasano nojori. <sup>18</sup> Puetunu pueyajanaa, cante nojori pohuatasano tojiríquiaani, nojoriiri jíuujíateree. <sup>19</sup> Majaari María níyájetanu quíquiaari puetunu nojori pohuatasanojuanaa. Noojíajinia na níishíri-ójoríquiaa pueyaracaanuuri. <sup>20</sup> Borregohua cojuanaari quíjoquiaariuhua. Nojoriiri Pueyaso maniniuhuaqueetariquiaa nojori tojishanojiníi, nojori níquishanojiníinio. Puetunujuanaari naa quíquiaari taa cuno níucua Pueyaso seru pohuataree nojoricuaajani.

*Conaaja Jesu pasacari Pueyaso Secojoua tíajinia, Pueyasora jíyatesocoríquiano*

<sup>21</sup> María conaaja jaara ocho juuca jíitíquiaari, na cararaatíuuquia coori míatesaaquiaari, taa Moisés rootaquiaarícuajani. Na míatesaanu nuhuají, nojuajaari sesojosaaquiaari “Jesu”, taa Pueyaso seru sequequiaari Maríacuajani, na manajeyaquishacarijia.

<sup>22</sup> Na nuhuají, Moisés sequesano juucaari quíquiaari na nucua neyacata cuaara juhua tuteera, jeequesano nojori quíniuria Pueyaso níquiara, mueya rasaanu nuhuají. Naaratej, nojoriiri conaaja Jesu paquíaaari Jerusalén tiacajinia, Pueyasora na jíyatesaanura, Pueyasora na quíniuria. <sup>23</sup> Na queyari naa míiquíaaaritíj, tariucuacaanu Pueyaso Rupaajinia naajíotasano tojítíajaca nojori quíniuuca. Naajíotasanoori naa quíyatej: “Puetunu nía jíyapueranuhajanaa cuaara Pueyasora jíyatesaaria”. <sup>24</sup> Naaratej nojoriiri quíaae na seru mosaanura nojoriícuara Pueyaso Secojoua tíajinia, juhua jeequesano nojori quíniuria Pueyaso níquiara, taa pueya rootasaaquiaari Moisés naajíotasanojíníicuaajani. Pueyasoori naa sequequiaari Moisés tarijiatej:

“Cuaara puecoosaaria caapíquí mocoonu. Mocoonu jaara quíyáquíri, cuaara puecoosaaria caapíquí shíníjia”.

<sup>25</sup> Jiyacaritij, tamonu pueyanoori Jerusalén tiacajinia quíjia quiríquiaa. Na sesa quíquiaari Símeón. Nojuajaari maninia míjia quíquiaari Pueyaso níquiara. Pueyara-caanu Pueyaso shuquirítíaja quíquiaaríiri. Nojuajaari pueyaracaanu sashíjia Pueyaso cuaara jíyaroora Israel pueyacuají Tacuríquiano. Nojuajaari Pueyaso Sohuanu jíitíaja.

<sup>26</sup> Pueyaso Sohuanuuri na níishítíquiaari májaari na shaajenu quíniutianiya nojuaja cuaara níquíri Cristojatíjia, Pueyaso jíyaroosaaríquiano. <sup>27</sup> Pueyaso Sohuanuuri na jíyatequiaari namítia cuno juuca Pueyaso Secojoua tíajíníara. Naacuajitij, Jesu jaara pasaaquiaari Secojoua tíajinia, nera na míishaanura puetunu tariucuacaanu rootasanojuanaa, Símeónrí jíyacari tíi na níquírii. <sup>28</sup> Símeónrí Jesu páree. Na cacanuureeri. Naa Pueyaso sequeree jíyanoehua na shuquiriniutíaaari:

<sup>29</sup> —¡Cua Jiyaniíjianaa, tariucuaja! ¡Quíaríjia cutara cua naata cusonu júhuajaniya, shuquíriaatia cua quíshacari! Quíaaacuajaari tari cua níquírtírii taríjia quíaa sequesano jáníya, quíaa seru cua quíniuuca. <sup>30</sup> Tari níquírii quíaa Jiyarosano cuajáníjia,

canaacuaji Tacuriquianoni. <sup>31</sup> Nojuajaari quia niqutiosano puetunu jiyacajinia quiniaa pueyapueecuarajanaa. <sup>32</sup> Nojuajaari puetunu taucuaca jiuujiajanaa cuhuatanutaniya, maninia nojori niishiniuria quiajaniya. Naajuhuj, quia pueya Israelni, nojoriiri tamasa pueya shuquiritasano quiniutianiya na seera.

<sup>33</sup> Jesu que, na nucuajuhuj, nojoriiri jiuujiateree naa Simeón sequesacari conaajajiniji. <sup>34</sup> Na nuhuaji, Simeónri nojoriicua niaree na juaashiquia. Naa sequereeri: —Pueyaso cuaara jiiitaara maninia niajaniya.

Jesu nucu María sequereejariuhuj:

—¡Cua tojiri! ¡Nio conaajaari cutara pueyano quiniutianiya! Queraatia Israel pueyari juhua tiuriiniutianiya nojori ruuretasacari nojuaja. Saniniuujia, queraatia Israel pueyari cumaatia nujuatujuaca quiniutianiya, nocua nojori tiuushacari. Na cumaacata na miiniuucua, pueyari na naata Pueyaso niishiniu maninia. Naajaa, queraatia pueyari na ruuretanutaniya saaja. <sup>35</sup> Naacuajitij, tama pueya niishiriojosano noojiacajiniajaarijia niishishaanutaniya. Quiara saniniuujia, jyanohua taraatiaari quiniutianiya. Quioojaari juhua mueruuta tohuariquitiishaanutaniya quia mueyacu quia miishacari.

<sup>36</sup> Cuniqijia, Pueyaso Secojoua tiajiniani, tamonu motajaari tii quiriqiaajuhuj. Cuno motajaari Pueyaso sequesano caminiujiunia quiquiaari. Na sesa quiquiaari Ana, Fanuel niyatu. Nojuajaari supuetana Israel niyanu Aser niqiuoacuajinio supueno maaji quiquiaari. Jyanohua motaja quiquiaariiri. Shusha niyacoo na quishacari, nojuajaari camiquiaari. Na nuhuaji, siete marijaari na shocojoquiaari neyacata na quishacari.

<sup>37</sup> Neyaca cusonu nuhuaji, socua ochenta y cuatro marijia na shocojoquiaari mashiquio na quishacari. Nojuajaari pueyaracaanu quiquiaari Pueyaso Secojoua tiajinia, Pueyaso na shuquiritasacari juuca, niucuanio. Nojuajaari sequerarucua miaqueyaquiquiaari Pueyaso na secojosacari pueyaracaanu. <sup>38</sup> Simeón pocuasacarijia, jiyacaritij, Anaari nocua nimiaa. Na niquishacari conaaja Jesu, Anaari noojiajinia niishiquiaari cante nojuajani. Cunora, Pueyaso sequeree na shuquiriniutiaari: “¡Paacarasho!” Na nuhuaji, nojuajaari juhuacatecara Jesujiniji pohuataree Pueyaso Jiyarosocoriquiano sashijiaca pueya niqiuara. Nojori sequereeri:

—¡Niocuajaari pa sashishano pa pueyacuaji Tacuriquiano!

#### *Na queya tacartasacariuhua conaaja Nazaret tiacajiniohua*

<sup>39</sup> Jesu queyari puetunu Moisés naajioneejinia Pueyaso rootasanojuanaa tucataquiaari na conajara. Na nuhuaji, nojoriiri Galilea jiyajiniara tacatequiaariuhua tama nojori tiacajiniohuajaaja, Nazaret tiacajinia. <sup>40</sup> Naatujua Jesuuri maashiquiaari. Socua cumueecara quiquiaariiri, maninia niishijiaranio. Pueyasoori jyanohua na naacujua.

#### *Mashajaniyoyua Jesu quishacari Pueyaso Secojoua tiajinia*

<sup>41</sup> Puetunu marijarajanaa, Jesu queyari quiojoquiaari Nazaret tiacajiniji, Jerusalén tiacajiniara, Pascua juucajinia nojori queranacunura. <sup>42</sup> Doce marijia jaara Jesu shocojoquiaari tari, Jesuuri nojoritia jiyacari quiaquiaari shushajanaa, taa nojori quianu jii-tiquiaaricujani puetunu marijarajanaa. <sup>43</sup> Queranacunuunu jaara puequequiaari, Jesu queyari quiojoriqiuohua juhujaniya. Jesuuri jiyacari Jerusalén tiacajinia jiyojequiaari. Majaari na queya niishiniu quiriqiaa. <sup>44</sup> Nojoriiri jyaniquiaari Jesu naasucua narta quiojonaa tajinia quiariquiohuajuhuj. Naacuajitij, nojoriiri juhuajaniya rucuaneree puetunu cuno juucajanaa. Cuno niucujaja, nojoriiri Jesu pajequiaari nojori pueya tajinia, nojori niishishano pueya tajinianio. <sup>45</sup> Shaaqui quiriqiaari. Cunora, nojoriiri Jerusalén tiacajinia tacatequiaariuhua, tii na pajenuhuara.

<sup>46</sup> Jiuujianaraca juuca nuhuaji, nojoriiri socua Jesu riuriataquiaari Pueyaso Secojoua tiajinia, Moisés Rootasanojiniji niishitiojonaa pueya tajinia cajiyo. Nojori tojiriqiaari. Nojori nequesoreetariquiaajariuhuj. <sup>47</sup> Puetunu pueyajanaa, canapueete na tojitiariquiaani, nojoriiri jiuujiatequiaari niishijia Jesu quishacari. Jesuuri maninia nojori riuhaneriquiaa saaja, nojori jaara na nequesoreeriquiaa. <sup>48</sup> Na queya jaara na niqiuquiaari, nojoriiri shiriiquitiuquiaari. Na nucuari na sequeree:

—Quiyanunaa, ¿casaara naa quia miirii canaani? ¡Janiyari quia queta quia pajeriquiaani jiyanoehua canaa tacaaniutia quiocua!

<sup>49</sup> Jesuuri na riucaaree:

—¿Casaara nia pajeriquiaa janiyani? ¿Majateeri nia niishiniu, janiyari cua Que Secojojua tiajinia quiniucua jiaatiaani?

<sup>50</sup> Majaari nojori niishiniu quiquiaari Jesu sequesano.

<sup>51</sup> Jesuuri na queyata quiaarohua nojori tiajiniohua Nazaret tiacajinia. Na queya tojjia quiquiaariiri. Na nucuaari pueyaracaanu noojiajinia racataja puetunu na niishishanojuanaa neyanu Jesujiniji. <sup>52</sup> Jesuuri socua maashiquiaari, socua niishijara quiquiaarijiaariuhuj. Pueyaso shuquiritiasano quiquiaariiri. Puetunu pueyajanaari na shuquiritiaarijihuaj.

### 3

#### *Tiuquinijiona Juan pahuatasacari Pueyaso rupaa cariquia jiyajinia*

*(Mt 3.1-12; Mr 1.1-8; Jn 1.19-28)*

<sup>1</sup> Na nuhuaji, Tiuquinijiona Juanri Pueyaso rupaa pahuatanu coteequiaari. Jiyacaritij, quince marijiaari tari shocojoquiaari César Tiberio, jiyaniijiajanaa na quishacari Roma tiacajinia, puetunu jiyaca pueyapuejanaa camarnu na quishacari. Jiyacaritij, Poncio Pilatoori jiyaniijia quiriquiaa Judea jiyajinia. Herodesri saniniuujia jiyaniijia quiriquiaa Galilea jiyajinia. Tarajanu Felipeeri jiyaniijia quiriquiaajuhua Iturea jiyajinia, Traconite jiyajinianio. Lisanasri jiyaniijia quiriquiaa Abilinia jiyajinia. Puetunu cuno jiyaniijianucujanaani, nojoriiri jiyaniijianucua César Tiberio jiyatesano quiquiaari cuno jiyacajinia. <sup>2</sup> Jiyacaritij, Anásri Caifásta Judiocuacaacuara secojona jiyaniijianucua quiriquiaa. Jiyacaritij, Zacarías niyanu Juanri cariquia jiyajinia quiriquiaa. Tii na quishacari, Pueyasoori na rupaa na niishitiquiaari. <sup>3</sup> Naaratej, Juanri puetunu Jordán moo shuriuquico jiyacajanaa tajiquiaari na poojotasacari Pueyaso rupaa pueya niquiara. Nojuajaari naa pahuataquiaritij:

—¡Nioojia nia tacatore maja socua sesa nia miiniuria, moojinia cua tiuquinijionura nijaniya, Pueyaso jiyanooniuria nijaniya sesa nia miishanojiniji!

<sup>4</sup> Naacuajitij, supuetana Isaías naajiotasanoori tohuateequiaari. Pueyaso sequenu panishano caminiujiunia na quiniucua, nojuajaari naa miriqui naajotaquiaari supueriquiano Juanjiniji:

“Pueyano rupaari tojishiya cariquia jiyajinia nacaano. Sequeyari: ‘¡Jiyaniijia nuura nia jeenucuare! ¡Puetunu maniajanaa nia nuunure, maja shuutiuniu na quiniuria! <sup>5</sup> ¡Puetunu tacocuajanaa cuara mishiquiojosaaria maninia jamatunu na nuu quiniuria! ¡Puetunu tuhananuhujanaa cuara jiuurioosaaria jacananu na nuu quiniuria! ¡Shuyorocotunu nuu cuara pocuareesaaria! ¡Puetunu surocoshiquiajanaa cuara mishiquiojosaaria jacananu na nuu quiniuria! <sup>6</sup> Naacuajitij, puetunu jiyacajinia pueyajanaari Pueyaso Jiyarosano niishiniutianiya, Pueyaso jiyanootiriquiano pueyani’ ”.

Naa miriqui Isafás naajiotasanooni, cunoori pueya numooteriquiaa juhuacarijia nojori jeenucuanura noojiaa, Jiyaniijia Jesu tojitajaca nojori quiniuria.

<sup>7</sup> Pueya jaara quiojoquiaari na tiacajiniji Tiuquinijiona Juancua, Juan tiuquinijionura nojori, Juanri naa nojori juaaquiaari:

—¡Niaacuajaari juhua sacocua! ¿Cante nia numooteree nia mashiniuria jiyanoehua Pueyaso saniitionu panishacari nijaniyani? <sup>8</sup> ¡Maninia mijiara nia quiri, canaa niishiniuria niaari seetanujanaa nioojiaa tacatoree sesa nia miiniujiniji! ¡Majaari najuhuana tama nia cuaqueyajaaja nia sequenu: “Pueyaso pueyanonijia, supuetana Abrahamjinijinio cua supenuucua”! ¡Nia niishiri, Pueyaso jaara paniri, nojuajaari na naata nio saijiniji shipininiu Abraham niquiohuarajuhuj! <sup>9</sup> ¡Pueyaso cajiiri tari mataa

naana pajama, sesa naana nuujutajara! Naana jaara sesa jajau muetujua quiri, nushi-yari catijiasocoriquiano. Naajuhuj, nijaniyari juhua sesa muetuna naana, maninia miyashijia nia quishacari. ¡Niaari quera saniitioshiyacuaaja!

<sup>10</sup> Naaratej, pueyari Tiuquinijiona Juan nequesotaree:

—¿Taa canaa miyarinitioj?

<sup>11</sup> Juanri nojori riucuaaree:

—Cante querajaqueya toqueracani, nojuaja cuaara niqutioora taque cante toqueejuni. Naajuhuj, cante miaquesanoracani, nojuaja cuaara niqutioora miaquesanoojunucua.

<sup>12</sup> Roma tiacajinia quijia jiyaniijiajanaa Césarra cumaneeca masejonaari Tiuquinijiona Juancua nijioquiaarijuhuaj. Nojoriiri tiuquinijosano quiniu paniriquiaajuhuj. Naaratej, nojoriiri Juan nequesotaree:

—Niishitiojonanaa, ¿canaarijataj, casaa canaa miyarinjia?

<sup>13</sup> Juanri nojori riucuaaree:

—Maja puera cumaneeca nia masenu pueyajiniji. Saaja nia jiyaniijia sequesano nia masejore.

<sup>14</sup> Naajuhuj, soldadohuari Tiuquinijiona Juan nequesotaree:

—¿Canaarijataj? ¿Casaa canaa miiniutianiyarinijia?

Juanri nojori riucuaaree:

—Niaacuajaari puecootajaraca. Naajaa, majaari pueya casami nia jaariuutianu, nojori nia miananajonuta, nojoriicuaara nia tonujusacarijuhua nia sapojonuta. Juhujaniya nia quiri saaja nia jiyaniijia niqutiosano cumaneecafa.

<sup>15</sup> Pueyari jyanohua niishiriojoriquiaa Tiuquinijiona Juanjiniji. Nojoriiri Pueyaso sequesano na Jiyarosocoriquiano niquniuucua jiaatijaa. Naaratej, nojoriiri jyaniriquiaa Tiuquinijiona Juan naasucua Cristo, tariucuacaanu Pueyaso sequesano na Jiyarosocoriquianotej. <sup>16</sup> Nocuaji, Tiuquinijiona Juanri puetunu pueyajanaa sequeree:

—Janiya nareja nia tiuquinijia moojiniani, juhua jeequejosano nia quiniuria sesa nia miishanojiniji. Tamonu cutaraari cua nuhuaji niniutianiya. ¡Nojuajaari Pueyaso Sohuanu tiuquinijionutaniya nioojiajinia, na cumaaca nia jitianura, seetanujanaa maninia miiija nia quiniuria! ¡Nojuajaari juhua manitia nia saniniujiuniutianiyajuhuj, maninia jiuujjaraca nia quiniuria! ¡Nojuajaari socua jyanohua cumaacaraca janiyajiniji! Janiya maara shuquiriaatia quirini, nojuaja jaara cua sequere cua naacutanura nojuaja juhua na seru, quenaaja na sapatu neyocua cua saacatanura. <sup>17</sup> Niaari niishiyacuaja taa pueyano miiquiaa na trigoni paratu panura na cocua, na sucuanio, saniniuujia na jajau na racatasocoriquiano tajiniaaco. Naajuhuj, cuno pueyanoori tari niya quiya na pueya na saquiriojonura na tojiyashijia pueya tajiniji, na rijiosocoriquiano nata nojori quiniuria. ¡Sesa pueyari juhua trigo sucua catijiasaanutaniya saniniuujia! ¡Nojoriiri jataasaanutaniya manijinial! ¡Cuno maniiri maja na maquesanu quiniutianiya!

<sup>18</sup> Tiuquinijiona Juanri naa pohuataquiaari Pueyaso rupaa pueya niqiuara. Maninia rupaari, na tojitajaca pueya quiniuria shuquiriaatia. Socua queraatia quiquiaariiri na pohuatasano na numootenura pueya. <sup>19</sup> Jiyaniijia Herodesri jiyacari tarajanu Felipe niqiuocua jitiariquiaa necocuara. Cuno maaji sesa quiquiaari Herodías. Tiuquinijiona Juanri jiyaniijia Herodes piriyojoquiaari sesa na miishanojiniji. Herodesri maja na tojinii quiquiaari saaja. Jiyaniijia Herodesri socua queraatia sesa casaa miiija quiquiaari. <sup>20</sup> Na nuhuaji, jiyaniijia Herodesri socua sesa miiquiaari: Tiuquinijiona Juan nujuatequiaari nujuatejojuajiniaari.

*Jesu tiuquinishacari moojinia*

*(Mt 3.13-17; Mr 1.9-11)*

<sup>21</sup> Tiuquinijiona Juan jaara puetunu pueyajanaa tiuquinijioriquiaajaa, nojuajaari Jesu tiuquiniquiaarijuhuaj. Jesu tohuatasacari moojiniji, na que Pueyaso secojoriquiaari. Jiyacaritij, jiya cajiniocuaari riatequee. <sup>22</sup> Pueyaso Sohuanuuri Jesuucua roseyaree juhua mococoonu niquishano. Jiyocuacaanuji, Pueyaso rupaari tojishaaree sequeyano:

—¡Quiaacuajaari cua panishano quiyanuniyojua! ¡Jyanohua quia shuquiritiaanijia!



*Jesu supuetanaa sesaca*  
(Mt 1.1-17)

<sup>23</sup> Treinta marijia jaara na shoconujuquiaari, Jesuuri na Que Pueyasora poonijionu coteequiaari. Pueyari jiyaniquiaari José naasucua seetanujuanaa na que quiquiaari. Joseeri Elí niyanu quiquiaari. <sup>24</sup> Eliiri Matat niyanu quiquiaari. Matatri Leví niyanu quiquiaari. Leviiri Melqui niyanu quiquiaari. Melquiiri Jana niyanu quiquiaari. Janaari José niyanu quiquiaari. <sup>25</sup> Joseeri Matatías niyanu quiquiaari. Matatíasri Amós niyanu quiquiaari. Amósri Nahúm niyanu quiquiaari. Nahúmri Esli niyanu quiquiaari. Esliiri Nagai niyanu quiquiaari. <sup>26</sup> Nagairi Maat niyanu quiquiaari. Maatri Matatías niyanu quiquiaari. Matatíasri Semei niyanu quiquiaari. Semeiri Josec niyanu quiquiaari. Josecri Judá niyanu quiquiaari. <sup>27</sup> Judaari Joanán niyanu quiquiaari. Joanánri Resa niyanu quiquiaari. Resaari Zorobabel niyanu quiquiaari. Zorobabelri Salatiel niyanu quiquiaari. Salatielri Neri niyanu quiquiaari. <sup>28</sup> Neriiri Melqui niyanu quiquiaari. Melquiiri Adi niyanu quiquiaari. Adiiri Cosam niyanu quiquiaari. Cosamri Elmadam niyanu quiquiaari. Elmadamri Er niyanu quiquiaari. <sup>29</sup> Erri Jesús niyanu quiquiaari. Jesúsri Eliezer niyanu quiquiaari. Eliezerri Jorim niyanu quiquiaari. Jorimri Matat niyanu quiquiaari. <sup>30</sup> Matatri Leví niyanu quiquiaari. Leviiri Simeón niyanu quiquiaari. Simeónri Judá niyanu quiquiaari. Judaari José niyanu quiquiaari. Joseeri Jonam niyanu quiquiaari. Jonamri Eliaquim niyanu quiquiaari. <sup>31</sup> Eliaquimri Melea niyanu quiquiaari. Meleari Mena niyanu quiquiaari. Menaari Matata niyanu quiquiaari. Matataari Natán niyanu quiquiaari. <sup>32</sup> Natánri David niyanu quiquiaari. Davidri Isaí niyanu quiquiaari. Isaiiri Obed niyanu quiquiaari. Obedri Booz niyanu quiquiaari. Boozri Sala niyanu quiquiaari. Salaari Naasón niyanu quiquiaari. <sup>33</sup> Naasónri Aminadab niyanu quiquiaari. Aminadabri Admin niyanu quiquiaari. Adminri Arni niyanu quiquiaari. Arniiri Esrom niyanu quiquiaari. Esromri Fares niyanu quiquiaari. Faresri Judá niyanu quiquiaari. <sup>34</sup> Judaari Jacobo niyanu quiquiaari. Jacoboori Isaac niyanu quiquiaari. Isaacri Abraham niyanu quiquiaari. Abrahamri Taré niyanu quiquiaari. Tareeri Nacor niyanu quiquiaari. <sup>35</sup> Nacorri Serug niyanu quiquiaari. Serugri Ragau niyanu quiquiaari. Ragauri Peleg niyanu quiquiaari. Pelegri Heber niyanu quiquiaari. Heberri Sala niyanu quiquiaari. <sup>36</sup> Salaari Cainán niyanu quiquiaari. Cainánri Arfaxad niyanu quiquiaari. Arfaxadri Sem niyanu quiquiaari. Semri Noé niyanu quiquiaari. Noeeri Lamec niyanu quiquiaari. <sup>37</sup> Lamecri Matusalén niyanu quiquiaari. Matusalénri Enoc niyanu quiquiaari. Enocri Jared niyanu quiquiaari. Jaredri Mahalaleel niyanu quiquiaari. Mahalaleelri Cainán niyanu quiquiaari. <sup>38</sup> Cainánri Enós niyanu quiquiaari. Enósri Set niyanu quiquiaari. Setri Adán niyanu quiquiaari. Adánri Pueyaso niyanu quiquiaari.

4

*Samaruhua jiyaniijia saniniujiushacari Jesu*  
(Mt 4.1-11; Mr 1.12-13)

<sup>1</sup> Jesu quiasacariuhua Jordán moojiniji, Pueyaso Sohuanuuri noojiajinia quiriquiaa puetunu na cumaacajanaa na jitianura. Pueyaso Sohuanuuri na jiyatequiaari pueya jiyaqui carriquia jiyajiniara. <sup>2</sup> Tii camueenujuquiaariiri cuarenta juuca. Sesaacaari tii na saniniujiuriquiaa. Majaari quenaaja casaa na miaquenu quiquiaari tii na quishacari. Na nuhuaji miaajequiaariiri. <sup>3</sup> Jiyacaritij, Sesaacaari na sequeree:

—Quiaa jaara seetanujuanaa Pueyaso Niyanu quirri, nio saajia quia jataniri neecaruura na quiniuria.

<sup>4</sup> Jesuuri saaja na riucuaaree:

—Pueyaso Rupaajiniacuajaari naa naajiotasano quiya:

“Pueyanoori maja saminio na quiniu saa miaquesanotaja. Seetanujuanaa saminio quiyari na tojishacari puetunu Pueyaso Rupaajanaa”.

<sup>5</sup> Na nuhuaji, Sesaacaari Jesu jiyataaree jiyanoohua jiyaconaja tuhuananuucua. Sesaacaari ritia niqutirii Jesu puetunu mijiria jiyacajanaa. <sup>6</sup> Jesu sequereeri:

—Janiya quia niqutionutaniya puetunu nio jiyaca jiyaniijianucua cumaacajanaani, maninia jiyaniijiajanaa quia quiniuria mijiria. Janiyari puetunu nio jiyacajanaa niq-uitiosaaquiaarini. Naacuajitij, janiyari cumaaca niqutioquiaani cana cua niqutionu paniyacuajani, jiyaniijiaara na quiniuria. <sup>7</sup> Puetunujuanaari quiara quiniutianiya, quiaa jaara cucuara mojuquetare quia shuquiritianura janiya.

<sup>8</sup> Jesuuri saaja na sequeree:

—Pueyaso Rupaajiniacuajaari naa naajiotasano quiya:

“¡Quia Jiyaniijia Pueyaso quia shuquiritiare! ¡Saaja nojuaja quia tojiri!”

<sup>9</sup> Na nuhuaji, Sesaacaari Jesu jiyataaree Jerusalén tiacajinia. Na tacaniriiri Pueyaso Secojojua tia cacojiria, jiyocuacaanu. Jesu sequereeri:

—Niiquiji quia jaataare jiyocua, quiaa jaara seetanjuanaa Pueyaso Niyanu quiri.

<sup>10</sup> Pueyaso Rupaajiniacuajaari naa naajiotasano quiya:

“Pueyasoori na seya sequenutaniya na cojuanura quiajaniya. <sup>11</sup> Nojoriiri quia quianu-taniya, saajiaacua quia jiriataaquiniuucujaji”.

<sup>12</sup> Jesuuri na riucuree saaja:

—Naa naajiotasano quiyajaariuhua Pueyaso Rupaajinia:

“Maja quia Jiyaniijia Pueyaso quia saniniujiuniu”.

<sup>13</sup> Sesaacaari naa Jesu saniniujiuniu puecaquiaari puetunujuanaa. Majaari quenaaja na naata quiri quiaa sesa na miitiniuria. Naaratej, rupaquijia na tarinitiaquiaari tamacariri-aari.

*Jesu cotelesacari na poonijosano miiniu Galilea jiyajinia*

*(Mt 4.12-17; Mr 1.14-15)*

<sup>14</sup> Na nuhuaji, Jesuuri tacatequiaariuhua Galilea jiyajinia puetunu Pueyaso Sohuanu cumaacatajanaa. Puetunu cuno jiyajiniajanaa pueyari Jesujiniji caminiujiutiooquiaari.

<sup>15</sup> Jesuuri Pueyaso secojojua tiajiniaqueya niishitiojoquiaari puetunu tiacajiniajanaa cuno jiyajinia. Puetunu pueyajanaari na timitiaja.

*Jesu quishacari Nazaret tiacajinia*

*(Mt 13.53-58; Mr 6.1-6)*

<sup>16</sup> Jiyacaritij, Jesuuri quiaquiaari Nazaret tiacajinia, tee na canashitishaaquiaaricua-jani. Samaatenu juuca, Jesuuri Pueyaso secojojua tiajinia tiuquiquiaari taa na jiitiquiaari miiniucujani. Nojuajaari nujaquiaari Pueyaso Rupa serojonura pueya niqiuara.

<sup>17</sup> Pueyari na niqutioree tariucuaacaanu Pueyaso sequesano caminiujiunia Isaías naa-jionee jiuniocosano, pueya niqiuara na serojosocoriquiano. Jesuuri na saacartaree. Serojonu coteereeri tee nio naajiotasano quiyacuajani:

<sup>18</sup> “Pueyaso Sohuanuuri coojiajinia quiyani, na cumaaca cua jiitianura. Naacuajitij, Pueyasoori cua seeratarucuaa maninia rupaa cua pohuatanura casamiijiuniucua pueya niqiuara. Cua jiyaroreejaariuhua Sesaaca quioosano pueya cua pohu-atanura maninia rupaa Pueyasojiniji. Naacuajitij, nojoriiri cartesano quiriuhua Sesaaca sapojosanojiniji. Cua jiyaroreejaariuhua cariyojuarujuri pueya namijiaa cua jeecanura, maninia niqiujiara nojori quiniuhua. Cua jiyaroreejaariuhua taraatia miitiasusano pueya cua jiyatenura shuquiriaatia quijiacara. <sup>19</sup> Cua jiyaroreejaariuhua cua pohuatanura pueya niqiuara, quiarjiaari Jiyaniijia Pueyaso jiyanooshacari pueya”.

<sup>20</sup> Na serojonu nuhuaji, Jesuuri naajionee jiuniorohua. Na niqutiorohua na cojuanaari. Jesuuri cajiriohua. Puetunu pueyajanaari tacuriitia na shootiatuquiquiaa.

<sup>21</sup> Jesuuri juhuacatecara pocuarohua. Naa sequereeri:

—Quiarjiani, Pueyaso Rupaajinia nio naajiotasanoori tari tohuateeree nia niqiuara.

<sup>22</sup> Puetunu pueyajanaari jiuujiateree shanohua Jesu pohuatasano nojori tojishacari. Naaratej, nojoriiri maninia pocoojoriquiaa Jesujiniji. Tama nojorijaarijia nequesoree-tooriquiaa:

—¿Majate nio pueyano José niyanucujaja, niya pa tiacajinia maashiniotej?

<sup>23</sup> Jesuuri nojori sequeree:

—Niaa jiyoteeri cua sequenu paniya nio tariucuaacaanu sequesano: “Naarajonanaa, tama quia cuaqueyajaaja quia naarajore”. Niaari naa cua sequenu paniya jiyajeneta casaa

cua miiniuria cua cumaacata niya tama cua tiacajiniajaajani, taa nia tojiquianucuaaja cua miishanojiniji Capernaum tiacajiniacuaani.

<sup>24</sup> Jesuuri socua sequeree:

—Seetanujuanaa nia sequeyanijia, puetunu Pueyaso sequenu panishano caminiujiuni-aajanaari tojishoo quijia, tama nojori tiacajiniajaaja. <sup>25</sup> Supuetana Elías quishacari, queraatia mashiquiopueeri quiquiaari Israel jiyajinia. Jiyanohua miaajesacari quiquiaari maru niaquishacari pueyaracaanu. Jiuujanaraca marijiaari shocojoquiaari socua seis racanio, maru niaquishacari. <sup>26</sup> Naajaa, majaari Pueyaso jiyaronu quiquiaari Elías narta Israel jiyajinia quiniaa mashiquioocua. Pueyaso cutaraari na jiyaroquiaari taatu mashiquioocua Sarepta tiacajinia, Sidón tiaca shuriucua. Naacuajitij, cuno taatu mashiquioori miaquesano jiitiaquiaari pueyaracaanu cutara, Elías na mianuutesacari miaajenu quishacari pueyaracaanu. Elías quiniucua Pueyasoocua tiuujia, cuno taatu miaquesanoori maja na pueetanu quiquiaari nojoriria. <sup>27</sup> Naajuhuj, supuetana Eliseo quishacari, queraatia leprata cusosuhuari quiquiaari Israel jiyajinia. Majaari quenaaja tamonu nojorijinijinio naatanishaanu quiquiaari Eliseo jiitiasano Pueyaso cumaacata. Saaja cuno tahue Naamánri naatanishaaquiaari cutara, Siria jiyajinijinio pueyanoni.

<sup>28</sup> Pueyaso secojojua tiajinia quiniaa pueya tojishacari naa Jesu pohuatasantej, puetunu nojorijianaari jiyanohua juaaquioree. <sup>29</sup> Nojoriiri saneecuatuquee. Jesu caponeeturee nojori tiacajinijiiri. Nojoriiri Jesu jaatucuquiaari socua jiyocuacaanu nojori quijia tuhuananujinijiria, teyanooocua nojori tiaca tiasano quiquiaaricuaajani. Nojoriiri na capotunu paniriquiaa juucua tacojiyaji naa na monura. <sup>30</sup> Jesuuri saaja nojori tajiniaaco canujuquiaari juhuajaniya. Quiniquiji tamocora quiaareeri.

#### *Samaruraca pueyanojiniji pohuatasano*

*(Mr 1.21-28)*

<sup>31</sup> Jesuuri Capernaum tiacajinia quiaquiaari, Galilea jiyajinia tiaca. Samaatenu juuca, Jesuuri pueya niishitiojoriquiaa. <sup>32</sup> Nojoriiri jiuujiateree na niishitiojosano nojori tojishacari. Na niishitiojosanoori seetanujuanaa cumaacaraca quiquiaari juhua jiyaniijia niishitiojosano, maja juhua nareja rootasano caminiujiunia.

<sup>33</sup> Pueyaso secojojua tiajinia, samaruraca pueyanoori jiyacari tii quiriquiaa. Na niquishacari Jesu, naa jiyanohua nacareeri:

<sup>34</sup> —¡Nazaret tiacajinijinio Jesunaa! ¿Taa quia miiniu paniya canaani? ¡Canaa quia niquiri nareja! ¿Quiaate tari niyaree canaa saniitionuucua? ¡Quia niishiyacuajanjia, cante quiajaniani! ¡Quiaacuajaari sesa miyashijia Pueyaso Nyanu!

<sup>35</sup> Jesuuri samaru sequeree:

—¡Quia sanaajere! ¡Quia tohuatare nio pueyanojiniji!

Samaruuri pueyano pojotequee puetunu pueya niquiarajanaa. Pueyanojiniji tohuataqueeri. Majaari na nuhuajiria sesa na miiniu quirii pueyano. <sup>36</sup> Puetunu pueyajanaari shiriiquitiurii. Tama Jesujiniji sequetooreejaarijia:

—¡Nia tojiri! ¿Taamueca rupaatucuaanojoni? ¡Nio pueyanoori samaruhua jiyaronu niishiya juhua jiyaniijia! ¡Na rupaari jiyanohua cumaacaraca! ¡Cunora samaruhua tohuataniriiri!

<sup>37</sup> Puetunu cuno jiyajiniajanaa, Jesu miishanojinijiiri caminiujiushaaquiaari pueya niquiara.

#### *Jesu naatanishacari Simón Pedro reyarucua*

*(Mt 8.14-15; Mr 1.29-31)*

<sup>38</sup> Jesuuri Pueyaso secojojua tiajiniji tohuareetaquiaari na pueyata. Quiojiya-reeri. Simón tiajinia tiuquitiushiiri. Simón reyarucuaari jiyacari jiyanohua naseeca matariquiaa. Pueyari Jesu sequeree na naataniniuria. <sup>39</sup> Jesuuri cusosu caco nujuasee. Jesuuri na naseeca cusonu jiyaroree. ¡Na naseecaari ritia shinitiaquee! Tariucua jiyotuucuaari jiyacari sanemaa, na tiajinia quiniaa pueya na mianuutenura.

*Jesu naatanijiosacari queraatia cusosuhua**(Mt 8.16-17; Mr 1.32-34)*

<sup>40</sup> Pananu tiuquishacari, puetunu pueyajanaa, cante cusosuhua jiitiaquiaarini, nojori-iri na jiyataquiaari Jesuucua. Jesuuri na juaashiquia niaquiaari puetunu cusosuhuaacua-janaa. Nojoriiri queraatia tamaatia cusonu jiitiaquiaari. Jiyacari na naatanijioree puetunujuanaari. <sup>41</sup> Naajuhuj, queraatia samaruhuari tohareetaquiaari cusosuhua-jiniji. Samaruhuari naa nacaquiaari Jesuucua:

—¡Quiaacuaja Pueyaso Niyanu!

Jesuuri nojori juaarii. Majaari na shanacunu quirii nojori pocuanura, nojori mariqui pueya niquiara pahuatateeri, nojuajaari Pueyaso Jiyarosano.

*Jesu pahuatasacari Pueyaso rupaa Pueyaso secojonuujua tiajiniaqueya**(Mr 1.35-39)*

<sup>42</sup> Tariquicuaji, Jesuuri tiacajiniji quiaquiaari tamaquiicua tamajaaja. Pueyari na pajequiaari. Nojoriiri socua nocua tiuquijioquiaari na pajenuusacari. Majaari nojori cartenu paniniu quiquiaari Jesu quianura cuniquiji. <sup>43</sup> Jesuuri nojori sequeree saaja:

—Janiyari jiyarosaaquiaarini pueyapue niquiara cua pahuatanura quiarinio Pueyaso Rupaa. Quiarijiani, Pueyasoori pueya jiyanoonu paniya, nojori quiniuria na pueya, nojori tiuushacari nocua. Naaratej, janiyari na rupaa pahuatanura quianu paniya tamonu tiacajiniajaniuhuj. Janiyacuajaari cunora jiyarosaaquiaarini.

<sup>44</sup> Naacuajitij, Jesuuri puetunu Judiocuaca jiyajiniajanaa rucuanajoquiaari Pueyaso rupaa pahuatanura puetunu Pueyaso secojonuujua tiajiniaqueyajanaa.

## 5

*Sapitiaajara jaquerootanaa shiriiquitiushacari**(Mt 4.18-22; Mr 1.16-20)*

<sup>1</sup> Tamacari, Jesuuri caminia casaqueyaji quiriquiaa na pueyata. Jesuuri Pueyaso rupaa pahuatariquiaa. Puera jiyanoehua pueyari nocua catecanoquiaari catecaji na tojitianura nojuaja. Nojoriiri Jesu tanuujuriquiaa puera. <sup>2</sup> Jesuuri caapiqui bote niquirii caminia casaqueyaji. Shaama quiriquiaari. Na camaruhuari na shuriucua jeequejonuuriquiaa na shiyaruhua. <sup>3</sup> Jesuuri Simón botejinia tacaquiaari. Simón sequereeri cuara bote juaariocotaara caminia jiuujajinia naata. Na nuhuaji, Jesuuri cajirii. Quiniquiji pueya niishitiojonu coteequiaariiri. <sup>4</sup> Jesu jaara niishitiojonu puecaquiaari, Simón sequereeri:

—Queronijinia pa jaaretaare. Niocua tii jartasee nia shiyaruhua sapitiaajara.

<sup>5</sup> Simónri na riucuaaree:

—Niishitiojonanaa, canaacuajaari tari jaquerootariquiaa najuhuanani. Canaari naajaa nocua juhuaquemaani. ¡Saa shaa quiriquiaanojua! Naajaa, quiaacuaja na sequeya, socua canaa jaquerootarohuacuaraqij.

<sup>6</sup> Nojori jaara socua na shiyaruhua jartaquiaariuhua, jiyanoehua queraatia sapitiaaja ritiatureeri! Shiyaruhuari sureequetanu coteequiaari. <sup>7</sup> Nojoriiri jatiqui nata poonijionaa piinioree bote tarajanujinia quiyano, nojori niniuria na naacutanura. Nojoriiri ritia nimiaa. Cuno caapiqui bote mishinijioturee sapitiaajataari. ¡Quera tiuquitiariquiaari queraatia sapitiaajata! <sup>8</sup> Simón Pedro niquishacari naa Jesu miishano nojoririatej, Jesuucua mojoquetateeri. Jesu sequereeri:

—¡Jiyaniijianaa, maja cua rpuenu socua! Janiya puera sesa pueyanoni quia rpuena cua quiniuria.

<sup>9</sup> Simónri shiriiquirii, jiyanoehua queraatia sapitiaaja nojori quiasacari. Nata quinia pueyari shiriiquitiuriijuhuj. <sup>10</sup> Cuno pojoritia quiriquiaajaariuhua Zebedeo niquiohua, Santiago, Juannio. Nojoriiri Simón cojiniaa quiquiaari. Jesuuri Simón sequeree miriqui:

—Maja puerenu. Quiaari saniniujia pueya quioojua quiniutianiya juhua sapitiaaja.

<sup>11</sup> Nojori shiitiasacari, nojoriiri puetunu na casaajanaa tiujiaquiaari Jesuta nojori quiojonura.

*Jesu naatanishacari lepraraca cusosu**(Mt 8.1-4; Mr 1.40-45)*

<sup>12</sup> Tamonu tiacajinia Jesu quishacari, lepraraca cusosu pueyanoori tii quiquiaari. Na niquishacari Jesu, nocuara jacamareeri. Jesu sequereeri:

—Jiyaniijianaa, quiaa jaara paniri, quia naata cua naataniniu cua cusonujiniji.

<sup>13</sup> Jesuuri na quiaree. Na sequereeri:

—Taaquiririnij. Quia naataniniu paniyanijia. Quia cuaqueya cuaara jeequehuara.

Naa na sequesacaritij, na lepraari shaajeeque na cuaqueyajiniji. <sup>14</sup> Jesuuri na rootaree maja na pohuatanura na miishano tamasaca niquiara. Na sequereeri:

—Saaja pueyacuara secojona jiyaniijia quia niqitishii quia cuaqueya, na cartenuhuara quiajaniya, pueya tajinia quia rucanejonuhuara juhuajaniya. Naajuhujaj, quia seru quia niqitiose Pueyasocuara catijasocoriquiano. Naa quia miiri taa Moisés rootaquihaaricujani, puetunu pueyajanaa niishiniuria quiaa tari jeequerohua quia cusonujiniji.

<sup>15</sup> Maninia Jesu miishanojinijiiri jiyanohua socua tamaquiicua caminiujiushaaquiaari pueya niquiara. Naaratej, jiyanohua queraatia pueyari nocua nijioquiaari na tojiniuria, mariyata Jesu naatanijionura nojori, nojori cusonujiniji. <sup>16</sup> Jesuuri saaja pueya quiyaquishaqui quiaquiaari na Que Pueyaso na secojonura. Nojuajaari naa pueyaracaanu miiquiaari.

*Jesu naatanishacari cumatacuruhuana cusosu**(Mt 9.1-8; Mr 2.1-12)*

<sup>17</sup> Tamonu juuca, Jesuuri pueya niquiara niishitiojoriquiaa. Na tojitianaa tajinia cajitioriquiaajaariuhua Fariseocuaca, Moisés Rootasanojiniji niishitiojonaanio. Nojoriiri nijioquiaari puetunu Galilea jiya tiacajiniijianaa, Judea jiya tiacajiniji, Jerusalén tiacajinijinio. Jesuuri jiyanohua Pueyaso cumaaca jiitariquiaa cusosuhua na naatanijionura. <sup>18</sup> Jiyacaritij, socua pueyari tiuquiiioquiaari. Nojoriiri cumatacuruhuana cusosu patariquiaa na matujinia. Nojoriiri juucua na tiuquitianu paniriquiaa tiajiniaaco Jesuucua. <sup>19</sup> Puera queraatia pueya rerejosacari tohuateyaji, majaari na naata cusosu tiuquinitiasaanu quiquiaari. Nocuaji, nojoriiri tia cacojiria tacanitiaquiaari cusosu. Cuno pueya tiaca tucuruuri quiquiaari marauneeca majeetejosano. Nojoriiri tia nijinia papataquiaari. Na nuhuaji, nojoriiri cusosu roshinitiaree cuhuocojiniji na matujinia, Jesu nujuasaqui pueya tajinia. <sup>20</sup> Jesu niquishacari taa nojori tiuuriquiaa nocuani, cunora Jesuuri cusosu sequereeri:

—Pueyanonaa, quiaacuaja tari jiyanooshaaree sesa quia miishanojiniji.

<sup>21</sup> Naa Jesu sequesacaritij, Moisés Rootasanojiniji niishitiojona, mariyata Fariseocua-caari naa niishiriojonuuriquiaa: “¿Cantejaara cuno pueyanoni? ¡Nojuajaari tama na cuaqueyajaaja jiyateya juhua Pueyaso na quiniuria! ¡Pueyanoori maja na naata tamonu pueyano jiyanooniu sesa na miishanojiniji! ¡Saaja Pueyaso cutaraari na naata pa jiyanooniu!”

<sup>22</sup> Jesuuri naa nojori niishiriojosano niishiriquiaa. Cunora, nojori sequereeri:

—¿Casaara naa nia niishiriojiyani? ¿Niaateeri cucuaji taacanuyajaa? <sup>23</sup> Janiyara, maja jiyajeneta cua sequenura: “Quiaari tari jiyanooshaaree sesa quia miishanojiniji”. ¿Jiyajenetatejaariuhua sequenura: “Quia sanere. Quia rucuanere”? <sup>24</sup> Cunora, janiyari quiarijia nia niishitiniutianiyani, janiyari mijiria jiyarosaaquiaarini pueya cua jiyanooniuria sesa nojori miishanojiniji.

Naacuajitij, Jesuuri cumatacuruhuana pueyano sequereeri:

—Cua tojiri. ¡Quia sanere! ¡Quia matu quia pataarohua quia tiajinia!

<sup>25</sup> Jiyacaritij, pueyanoori sanequee nojori niquiara. Na tiajinia pataarohua na matuuri. Shuquiriaatia quiariquiohua na tiajiniohuari Pueyaso na maniniuhuaqueetanuta.

<sup>26</sup> Puetunu pueyajanaari shiriiquituri. Nojoriiri Pueyaso maniniuhuaqueetariquiaa cuno maninia casaa nojori niqiniuucua. Nojoriiri na puerenuta naa sequetuquiaari-jiuhujaj:

—¡Paari quiarijia jiyanohua maninia miishano niquiriini! ¡Nocuaji jiuujiatesano!

*Jesu sequesacari Leví, na pueyano na quiniuria*

*(Mt 9.9-13; Mr 2.13-17)*

<sup>27</sup> Nio nuhuaji, Jesuuri tohuataquiaari. Tamonu pueyano niquiriiri jiyaniijajanaa Césarra cumaneeca masejosaqui cajiyano. Na sesa quiquiaari Leví. Jesuuri na sequeree:

—¿Cua nuhuajiri, cua pueyano quia quiniuria!

<sup>28</sup> Jiyacaritij, Leviiri ritia sanequiaari. Puetunu na jiiatasanojuanaa tiujiaqueeri. Jesuta quiaqueeri.

<sup>29</sup> Na nuhuaji, Leviiri jiyano hua queraatia sumatuquiaari na tiajinia, Jesu na querana-cutanura. Queraatia narta cumaneeca masejonaari tii quiri quiaaajuacuhua. Nojoritia miaquejajinia cajitiri quiaari, socua tamasaca pueyano. <sup>30</sup> Moisés Rootasanojiniji niishitiojanaa, mariyata narta Fariseocuacaari juhuacatecara Jesu pueyacuara rimi-aaquenu coteequiaari. Nojoriiri naa Jesu pueya sequeturee:

—¿Casaara cuno sesa pueyata nia miaqueyani, nia ratuyani, tama parta pueya tacartajacatajaajanio? Nojoriiri pa paraa sequera cumaneeca masejonaa.

<sup>31</sup> Jesuuri nojori riucuaaree:

—Cante na cuaqueya jiyaniyani nojuaja maja cusosu na quiniu, nojuajaari maja naarajona na paniniu. Cusosuhua cutaraari naarajona paniya. <sup>32</sup> Naajuhua, majaari mijiria cua niniu quiquiaari maninia miihia pueyacu. Niquiaari cutaranijia sesa miihiaca cua tacatonuhua Pueyasocua, maninia miihia nojori quiniuria.

*Pueya nequesotasacari Jesu, casaara na pueya carteyaquiya miaquenu quenaajani Pueyaso nojori secojonura*

*(Mt 9.14-17; Mr 2.18-22)*

<sup>33</sup> Pueyari Jesu sequeree:

—Tiuquinijiona Juan pueya cutaraari sequeyarucua miaqueyaquiquiaa. Nojoriiri naa Pueyaso secojoquiaa pueyaracaanu. Fariseocuacaari naa miiquiaajuhua. Quia pueya saniniuujia, saaja miaquequiaari, ratuquiaari. ¿Casaarateni?

<sup>34</sup> Jesuuri nojori riucuaaree:

—Pueyano camishacari maaji, majaari masuusano pueya miaajenu, camiriquiano pueyano jaara nojoritia quiyajaa. <sup>35</sup> Tamacari, camiriquiano pueyano jaara jaariutiasaare nojori tajiniji, jiyacariti nojori cutaraari miaqueyaquiniutianiya. Naajuhua, janiyari cua pueya tajiniji jaariutiasaanutaniyani. Jiyacariti nojori cutaraari miaqueyaquiniutianiya.

<sup>36</sup> Jesuuri socua nojori niquiara pohuataquiaari nio miriqui sequesano:

—Majaari pueyano miatenu quijia na toque quiariquijini, na toque mocua cuhuoco na cushipirijiotajara. Saniniuujia, jaara naa miiritij, na toque quiariqui sesoyari. Quiarinio toquerauri sesoshiyajuhua, toque mocujinia na posequesacari. Cua rupaari naajuhua, juhua quiarinio toque. <sup>37</sup> Naajuhua, majaari na naata quiariniacu uva caaca mishinshaanu shoque tariucacojinia, tariucaco shoque mariqui pojuaretareeri, uva caaca jaara jerema vino na quiniuria. Jaara naa miishaaretej, vinoori najuhua niitashiya. Shoqueeri najuhua sesoshiyajuhua. <sup>38</sup> Naaratej, maninia cutaraari quiariniacu uva caaca shuujionu shoque quiariquiojinia, maja vino niitiasaanuucua, na quiquio shoqueno. Naajuhua, nia niishitiojosanoori juhua tariucaco shoque.

<sup>39</sup> Naajuhua, pueyano jaara vino tariucuanacu ratujua quiri, majaari na paniniu quiariniacu vino. Sequeyari: “Tariucuanacuuri maniniacuaja”. Naajuhua, majaari cua niishitiojosano nia paniniu, quiarinio na quiniuucua.

*Jesu pueya carojotasacari trigo samaatenu juuca*

*(Mt 12.1-8; Mr 2.23-28)*

## 6

<sup>1</sup> Tamonu samaatenu juuca, Jesuuri trigo cuhuariquiajiniaaco quiojoriquiaa na puey-ata. Na pueyari trigo carojotariquiaa. Nojoriiri na juaashiquiajinia na shuquiojoriquiaa na corequetanura. Na nuhuaji, na jajau miojonuuriquiaari. <sup>2</sup> Fariseocuacaari na niquitariquiaa. Nojoriiri Jesu pueya juaarii:

—¿Casaara nia tojitiaquiya Moisés Rootasano, taa na sequequiaaricuajani maja pa poonijionura samaatenu juuca?

<sup>3</sup> Jesuuri nojori riucuaaree:

—¿Majateeri nia serojonu quiquiaacuaja casaa supuetana David miiquiaari na miaa-jesacarini, mariyata na cojiniaa miaajesacarijiuhuaj? <sup>4</sup> Nojuajaari Pueyaso Secojojua tiajinia tiuquiquiaari. Pueyasora niojosano pan pooquiaariiri. Na sareeri. Mariyata nata quiniaa niquitiojoreeri nojori sanurajuhuj. Cuno panri sequesaaquiaari saaja pueyacuara secojonaa sasocoriquiano. Naajaa, Davidri na saquiaari. Majaari Pueyaso juaaniu quiquiaari naa David miiniuucua.

<sup>5</sup> Jesuuri socua cuno Fariseocuaca sequequiaari:

—Janiyacuajaari Pueyaso Jiyarosanoni. Jiyaniijara jiyatesaaquiaarinijia cua sequenura casaate samaatenu juuca miishiyani, Pueyaso pa shuquiritiniuria.

*Jesu jeeccasacari pueyano juaashiquia, cuseetucjuara joojequetano*

*(Mt 12.9-14; Mr 3.1-6)*

<sup>6</sup> Tamonu samaatenu juuca, Jesuuri Pueyaso Secojojua tiajinia tiuquiquiaari. Tii niishitiojoriquiaari. Quiniqui quiriquiaari pueyano, cuseetucjuara joojequetano na juaashiquia miaquetajara. <sup>7</sup> Moisés Rootasanojiniji niishitiojona, mariyata Fariseocua-caari Jesu shanacutariquiaa. Nocuara tonujunu paniriquiaari Jesu jaara cuseetucjuara joojequetano juaashiquiaraca pueyano jeeccare samaatenu juuca. <sup>8</sup> Jesuuri tari niishiriquiaa taa nojori niishiriojoriquiaani. Jesuuri cuno rimiajatucojua pueyano sequeree:

—¡Quia sanere! ¡Niya quia nujuasee pueya tajinia!

Pueyanoori sanequee. Nujuaseeri tee Jesu sequequiaari na nujuanuracuajani.

<sup>9</sup> Jesuuri nocuara tonujunu panijiaa pueya sequeree:

—Nia nequesotareeraj. Cua sequere, ¿taa pa niishitiojosaaquiaari Moisés Rootasanojinijini? ¿Paate maninia miya samaatenu juucani? ¿Paate sesa miya soj? ¿Cusosuhuate naatanijioshiya, puetushiyajanaa monu soj? ¿Taa nia sequeyani?

<sup>10</sup> Jesuuri puetunu na shocuaqueya quiniaajanaa niquinijioree. Na nuhuaji cusosu sequereeri:

—¡Quia juaashiquia quia shiitiore!

Pueyanoori na juaashiquia shiitioree. ¡Na juaashiquiaari ritia jeequequee! <sup>11</sup> Cuno pueyari jiyanojua juaaquioree naa Jesu miishacaritij. Nojoriiri naa pocoojoquiaari tamajaaja: “¿Taa pa miiniutianiya socua cuno Jesuurini?”

*Jesu saquiriojosacari doce pueya na jiyaramiquishocoriquiano*

*(Mt 10.1-4; Mr 3.13-19)*

<sup>12</sup> Jiyacaritij, Jesuuri tamonu tuhuananuucua quiaquiaari, Pueyaso na secojonura. Puetunu niucujanaa secojoriquiaa Pueyasoori. <sup>13</sup> Jaara juhuaquequiaari, Jesuuri na tojitiajaca pueya sequequiaari nocua nojori nijionura. Puetunu nojorijinijiniojuanaa, Jesuuri nareja doce pueya saquiriojoquiaari. Nojori sesojoreeri, “cua jiyaramiquishocoriquiano pueya”. <sup>14-15</sup> Nioori Jesu saquiriojosano pueya sesaca: Simón. Jesuuri na sesojoquiaarijuhua “Pedro”. Simón tarajanu Andrésri saquiriojosaaquiaarijuhua, mariyata Santiago, Juan, Felipe, Bartolomé, Mateo, Tomás, Alfeo niyanu Santiago, socua tamonu Simónnio. Nojuajaari Celote maanujiniji pueyano quiquiaari. <sup>16</sup> Santiago niyanu Judasri saquiriojosaaquiaarijuhua, Judas Iscarioteno. Nojuajaari quiquiaari Jesu quiateriquiano mosocoriquiano.

*Jesu niishitiojosacari queraatia pueya*

*(Mt 4.23-25)*

<sup>17</sup> Na nuhuaji, Jesuuri tuhuananujiniji rosetaquiariuhua na saquiriojosano puey-ata, jamatujiniara. Cuno jamatujinia, queraatia na nuhuajiniaa pueyari tari nocuaji quiriquiaa. Mariyata jiyanojua queraatia pueyari tii quiriquiaa puetunu Judea jiyajinijinio, Jerusalén tiacajinijiniojuhua, shoniacu caminia shuriuquiumia quiijacajinijinio pueyano. Saaja nio pojoriiri quiquiaari Tiro tiacajinijinio, mariyata Sidón tiacajiniji pueyano. Puetunu cuno pueyajanaari cuniquiria nijioquiaari nojori tojinuria Jesu, na cusunujiniji nojori naatanijosaanurajuhuj. Jesuuri nojori naatanijioree. <sup>18</sup> Naajuhuj,

taraatia samaruhua miishano pueyari naatanijosaaquiaarijuhuaj. <sup>19</sup> Puetunu cusosuhujanaari Jesu quianu paniriquiaa, naatanijosano nojori quiniuria. Jesu cumaacaari jiyanohua poonijioriquiaa. Naaratej, puetunu pueyajanaari naatanijosaariquiaa, saaja nojori quiasacari nojuaja.

*Jesu pahuatasano shuquiriaatia quijiajiniji, taraatia quijiajinijinio*

*(Mt 5.1-12)*

<sup>20</sup> Na nuhuaji, Jesuuri na pueya niquirii na pocuanura. Naa sequereeri:

—Niaari Pueyaso shuquiritasano, niaa jaara niishiriquia nioojia saaja sesa miiija. Niaa jaara niishiri nioojia naa quiyatej, niaari Pueyaso jiitiasano pueya quiniutianiya.

<sup>21</sup> 'Niaari Pueyaso shuquiritasano, niaa jaara maninia miiija quiniuucua jiaatiaa, taa miaajeyano pueyano miaquesanoocua jiaatiaacuaani. Niaa jaara naa quiniuucua jiaatiaa, Pueyasocuaajaari nia jataniniutianiya maninia quijiaara nia quiniuria.

'Niaari Pueyaso shuquiritasano, niaa jaara sesa nia miiniu nuhuaji taraajequiaa. Niaari na nuhuaji saroojonutaniya nia shuquiriniutia, niaa jaara jiyanooshaarohua.

<sup>22</sup> 'Niaari Pueyaso shuquiritasano, pueya jaara nia niqiniu paniyaquiri, pueya jaara nia taanuure, pueya jaara nia macaatiri, pueya jaara nia soore cua tojijiaa nia quishacari. <sup>23</sup> Niaa jaara naa miishaaretej, jiyanohua nia timiri. Nia jaacuatare nia shuquiriniutia. Niaa jaara naa nia miishacari rejeretajaca quiri, Pueyasoori nia niishishoo casaa racatasano jiitiaa jiyocuacaanu, na niqitiosocoriquiano niajaniya. Nia paraa supuetanaari naa taraatia miiquiaari tariucuacaanu Pueyaso sequenu panishano caminiujiunaa pueyajuhuj.

<sup>24</sup> 'Niaari saniniuuja taraatia quijiaa quiniutianiya, jamuejaca casamiriaca pueyanaa. Niaacuajaari tari shuquiriaatia quiquianu, puetunu nia panishanojuanaa nia jiitiasacari.

<sup>25</sup> 'Taraatia quijiaaari niajaniya, cante sequejani: "Janiyacuaja maninia pueyanoni. ¿Janiyatucua casaa paniri Pueyaso jiyanooniuria janiyani?" Naa sequejaca pueyanaa, na nuhuaji, niaari niishiniutianiya niaari saaja sesoriquia pueya seque.

'Taraatia quijiaaari niajanijuhuj, jeya nia quiyaquishacari Pueyasora, saaja tamaaja shuquiriaatia nia quiniuria nia cojesacari pueyaracaanu. Niaari na nuhuaji sapuenutaniya Pueyasooju nia quishacari pueyaracaanu.

<sup>26</sup> 'Taraatia quijiaaari niajaniya, puetunu pueyajanaa jaara maninia pahuataquiaa niajanijajiniji, maninia nia kojiniuucua cuno pueya, Pueyaso tojiyashijiaa pueyani. Cuno pojori supuetanaacuajaari naa shuquiritiaquiaari cuno sapojonuujuaa, canapuete maja seetanujuanaa Pueyaso sequesano caminiujiunaa quiquiaaricujani.

*Pa paraa panijiaa pa quirij*

*(Mt 5.38-48; 7.12)*

<sup>27</sup> 'Niajaniya, cante niya cua tojtiaacuajani, cua tojitiuri. ¡Nia paraa nia paniri! Maninia nia miiri nia niqiniu paniyashijia pueya. <sup>28</sup> Saaja maninia nia riucua nia juayano pueyano. Sesa nia miiijaca pueyacuara nia secojore Pueyaso. <sup>29</sup> Pueyano jaara quia maseca piri, quia jiyanoori nojuaja. Jaara taquijiria pirijihuj, socua quia jiyanoori. Majaari na naminiu. Pueyano jaara shiniquiaacuaji quia cushishano toque jaariutiare, quia cacojoqui quia niqitioreruhuj. <sup>30</sup> Pueyano jaara quia sequere quia casamijiniji quia niqitionura nojuaja, quia niqitioreruhuj. Pueyano jaara quia casaa jaariutiare, majaari na sequenu: "Cua niqitioruhua". <sup>31</sup> Maninia nia miiri tamasaca, taa nia paniquiaa tamasaca miiniuria niajanijacuani.

<sup>32</sup> 'Niaa jaara saaja nia panijiaa paniriquia, majaari nia jyaniniu Pueyasoori nia shuquiritiaa naa nia miishacari. Sesa miiijaca pueyari naa paniquiaa nojori panijiaajuhuj. <sup>33</sup> Maja puera maninia miiija niajaniya, niaa jaara maninia miiquiaa saaja noo pojori, canapuete maninia miiquiaa niajanijacuani. Sesa miiijaca pueyari naa maninia miiniu niishiquiaajuhuj, noo pojori canapuete maninia miiquiaa nojoricuaani. <sup>34</sup> Maja puera maninia miiija niajaniya, niaa jaara nia masena niqitioquiaa na panishano, nia niishishacari nojuaja ritia niqitionutaniuhua niajanijajiniji na masesano casaa. Sesa miiijaca pueyari na casaa rupaquijiaa niqitioquiaa narta sesa miiija pueyajuhuj, na niishishacari nojori ritia niqitionutaniuhua nojori masesano casaa rupaquijiaa.



<sup>35</sup> Nia paniri nia paraa. Maninia nia miiri nojori. Nia casami nia niqutiore nareja, pueya jaara na paniya rupaquijiara. Majaari nia taraajenu cuno pueyano jaara nia niqutioyaquiriohua nia casaa. Naa nia miishacaritij, niaari seetanujuanaa Jiyocuacaanu Quijia muerasu. Pueyasoori socua jiyanoehua queraatia nia niqutionutaniya tamasaca nia niqutiosanojiniji. Naaratej, capora nia quiri, taa nia Que Pueyasocuaani. Nojuajaari nareja niqutiojoquiaa sesa miijiaca pueya, mariyata canapueete na sequeyashijiacani “paacarasho”. <sup>36</sup> Naaratej, jiyanootio nia quiri, taa nia Que Pueyasocuaani, jiyanoojia.

*Maja sesa nia niishiriojonu niarta pueyanoocuara  
(Mt 7.1-5)*

<sup>37</sup> Maja nia rimiaaquenu tamasacaacuara, Pueyaso mariqui saniniuujia nia jiyanooy-aquiriiri. Naa jaara tamasacaacuara tonujiyashijia quiri, naajuhuj, Pueyasoori maja na saneenu quiniutianiya sesa nia miishanojuhuaj. Naa jaara jiyanootio quiri, Pueyasoori nia jiyanooniutianiyajaacuhuj. <sup>38</sup> Naa jaara tamasaca niqutioquiaa na panishano, Pueyasoori naa nia niqutionutaniya nia panishanojuhuaj, maninia shanacusano, jiu-uquiutiasano, maninia quianujusano, mishaja quera niitiano. Pueyasoori mariyata juhua nia shanacutajajiniya niqutionutaniya nijaniya, taamueca shanacutajajinia nia niqutioquiaa pueyacuani.

<sup>39</sup> Jesuuri socua niishitiojoquiaari pueya, nio miriqui sequesanta:

—¿Cariyojuarute na naata narta cariyojuaru jaatucunu? Naa na jaatucusacari narta cariyojuarutej, nojoriiri mariyata totenutaniya raama. <sup>40</sup> Pueyanoori maja socua niishijia na niishitiojonajiniji. Jaara puetunu maninia niishitiojosaarejanaa, saaja jiyacariti niishijia quiniutianiyajaariuhuj, juhua na niishitiojonaja.

<sup>41</sup> ¿Casaara nia niquiya rucucua maano quia tarajanu namijiajiniani, niaa jaara puereetuuca maca jiiitaa tama nia namijiajiniajaaja? <sup>42</sup> Naa jaara puereetuuca maca shanacuya tama nia namijiajiniajaaja, ¿niaatucua casaara sequere quiarta pueyanoni: “Cua tarajanunaa, cuno rucucua pa taquiri quia namijiajiniji”? Sesa jiuujiaracanaa, tama nia namijiajinijiajaaja nia pare coteenu cuno maca. Na nuhuaji cutara nia naata maninia niqiniu, cuno rucucua nia taquiniuria nia tarajanu namijiajiniji. Naaratej, majaari nia rimiaaquenu niarta pueyanoocuara.

*Naanaari niishishano na jajaujiniji  
(Mt 7.17-20; 12.34-35)*

<sup>43</sup> Maninia naanaari maja na naata piiquia jajau muetunu. Saniniuujia, sesa naanaari maja na naata shoqueeca jajau muetunu. <sup>44</sup> Puetunu naanajanaari maninia niishishano na muetusanojiniji. Majaari pa naata satuna carojonu shuunijajiniji. Naajuhuj, majaari pa naata tuhuaracona carojotanu saarianajiniji. <sup>45</sup> Naajuhuj, maninia pueyanoori maninia pocuaa cutara, maninia jiuujiaraca na quishacari. Sesa pueyanoori saniniuujia sacuraatia rimiaaqueja, sesa jiuujiaraca na quishacari. Casaa pa niishiriojoquiaa poojiajiniani, paari cuno pocuaani.

*Miriqui Jesu pohuatasano cumueeca jiyajiniji, sasaca jiyajinijinio  
(Mt 7.24-27)*

<sup>46</sup> ¿Casaara nia sequequiaa janiyani, “Cua jiyaniijianaa, cua jiyaniijianaa”, niaa jaara cua rootasano tojitiaaquiiaa? <sup>47-48</sup> Cua tojiri. Cante cua rupuenara quiri cu rootasano tojijia na quiniuriani, nojuajaari juhua tamonu pueyano cante maninia tiaquiaarini. Cuno pueyanoori coteenu tucuaara jiuutiaquiaari cumueeca jiyajinia na morijiuucujia. Na nuhuaji, moo jaara pajaashiquiaari, pajaacaari jiyanoehua cajiquiaari cuno tiaacua. Naajaa, majaari na mueecurujutanu quiquiaari, maninia nujuatejosano na morijiuucua quishacari cumueeca jiyajinia. <sup>49</sup> Saniniuujia, cante najuhuaa cua niishitiojosano tojiaquiiaani, na miyaquishacari cua sequesano, cuno pueyanoori juhua tianu niishiyashijia. Cuno pueyanoori sesa tiaquiaari sasaca jiyajinia. Na nuhuaji, moo pajaashishacari, pajaacaari jiyanoehua cajiquiaari cuno tiaacua. Cuno tia pojoretaquiaariiri. Pajaari cuno tia niyartaquiaari puetunujuanaa.

## 7

*Jesu naatanishacari Romano capitán seru*  
(Mt 8.5-13)

<sup>1</sup> Jesu jaara pueya niishitiojonu puecaquiaari, na pueyata quiaaree Capernaum tiacajiniaari. <sup>2</sup> Romano soldadohua capitánri quiniqui quijia quiquiaari. Jiyano hua na panishano seruuri cusosu matariquiaa. Quera cusoriquiaari. <sup>3</sup> Capitán jaara tojiquiaari Jesujiniji, nojuajaari Judiocuaca camarucua jiyaramiquiquiaari Jesuucua, nojori sequenura Jesu cuaara niiria nocua na seru na naataniniuria. <sup>4</sup> Judiocuaca camarucuaari Jesuucua quiojoquiaari. Nojoriiri juhuacatecara Jesu secojonu coteequiaari jiyano hua, nojoritia na quianura. Nojoriiri Jesu sequere:

—Cuno Romano capitánri canaa jiyaroreeni, ¡nojuajaari jiyano hua maninia pueyano! ¡Quenaaja quia miiri na panishano! <sup>5</sup> Nojuajaari parta Judiocuaca panijia. ¡Nojuacuajaari Pueyaso secojojuua tiatequiaari canaara tama na cumaneecatajaaja!

<sup>6</sup> Naacuajitij, Jesuuri nojoritia quiaquiaari capitán tijiniara. Tari Jesu quishacari cateca na tiaacuara, capitánri na rupuenaa pueya jiyaroquiaari Jesuucua, nojori caminiujiuniuria na sequesano Jesura. Naaratej, nojoriiri naa Jesu caminiujiushii capitán sequesano:

—Jiyaniijianaa, capitán naa sequeya: “Cua Jiyaniijianaa, majaari cua taajetenu paniniu quiajaniya. Janiyari maja maninia pueyanoni cucua quia tiuquiniuria cua tijinia. <sup>7</sup> Nocuaji, majaari cua quianu quiyaree janiyajanaa, cua pajenura quiajaniya. Nareja cuniquiji quia sequere cua seru naatanura. Janiyari niishiyani, quiaa jaara naa sequere, cua seruuri naatanutaniuhua. <sup>8</sup> Janiyari niishiyajaaniuhuj, cuno cusonuuri quia tojiniutianiya taa cua tojiquiaa cua jiyaniijianucuaaani. Janiyari cua jiyaramiquishano soldadohua jiiitiaajuhuj. Janiya jaara tamonu sequerene, ‘Quia quiaare’, nojuajaari quiaqueequiaa. Janiya jaara tamonu sequerene, ‘Miji’, ritia nimiaquiaari. Janiya jaara cua seru sequerene casaa na miiniuria, ritia na miyari. Niishiyanjia quiaari jiyano cumaacaracajuhuj”.

<sup>9</sup> Jesu tojishacari cuno pojori caminiujiushano capitán sequesano, Jesuuri jiuujiateree. Jesuuri na nuhuajiniaa pueya niquinijioree. Nojori sequereeri:

—Seetanujuanaa nia sequeyanijia, puetunu parta Israel pueyajinijiniojuanaani, ¡majaari quenaaja cua niquiniu quiquianu Pueyasoocua tiuujia pueyano juhua nio tahue!

<sup>10</sup> Capitán jiyaramiquishano pueya tiuquijiosacariuhua capitán tijiniahua, nojoriiri Capitán seru niquishuhua tariucua naatanohua.

*Jesu samiitanishacariuhua mashiquio niyanu*

<sup>11</sup> Na nuhuaji, Jesuuri tamonu tiacajinia quiaquiaari. Cuno tiaca sesa quiquiaari Naín. Na pueyari nata quiojoriquiaajuhuj, socua queraatia tamasaca pueyano. <sup>12</sup> Nojori catecanosacari Naín tiacaacua, Jesuuri pueya niquiquiaari macu pataano jamosocoriquiano. Macuuri jiyacunojuanaa na nucua niyanu quiquiaari. Na nucuaari mashiquio quitiasuquiaari. Queraatia pueyari na nucuaata macu nuhuaji sacuariquiaa, jamajiniara nojori quiojosacari. <sup>13</sup> Jesu niquishacari mashiquio, nocua taraajereeri. Na sequereeri:

—Maja nujuquenu.

<sup>14</sup> Jesuuri macuucua catecanoree. Macu quiquio quiatereeri. Na patanaari pootia na nujuataquee. Jesuuri macu sequere:

—Mashajanaa, janiya quia sequeyani: “¡Quia sanere!”

<sup>15</sup> ¡Macuuri cajiquii! Juhuacatecara pocuareeri. Jesuuri na nucuaacua na jaatucuree.

<sup>16</sup> Puetunu pueyajanaa jaara naa Jesu miishano niquiquiaari, jiyano hua pueretureeri. Nojoriiri Pueyaso shuquiritiaree jiyano hua. Na puerenuta sequetureeri:

—¡Pueyaso sequenu panishano caminiujiuniaqui niya supere pa tajinia! ¡Jiyano hua cumaacaraca!

Nojoriiri naa sequetureejuhuj:

—¡Pueyasoori shusha quiarjia na saquiriojosano Israel pueya niishiriohuacuuhuj, na cumaquiniuria pajaniya!

<sup>17</sup> Jesujiniji pueya pohuatasanoori caminiujiushaaquiaari puetunu Judiocuaca jiyajini-janaa, mariyata puetunu na shocuaqueya jiyacajiniajanaano.

*Tiuquinijiona Juan jiyaramiquishano pueya nequesoreesacari Jesu (Mt 11.2-19)*

<sup>18</sup> Tiuquinijiona Juan pueyari puetunu Jesu miishanojuanaa pohuataquiaari Tiuquinijiona Juan. Na nuhuaji, Tiuquinijiona Juanri caapiqui na pueya sequequiaari:

<sup>19</sup> —Jesuucua nia quiaare. Niocua na sequesee: “¿Quiaate seetanujuanaa Pueyaso Jiyarosano, tariucuacaanu sequesano niriquianotej, tamonute sashishiyajaara soj?”

<sup>20</sup> Naaratej, Tiuquinijiona Juan jiyarosano pueyari Jesuucua quiojoquiaari. Na seque-tuseeri:

—Tiuquinijiona Juanri canaa jiyaroree quiocuani, canaa nequesotanura quiajaniya: “¿Quiaatena Cristo, Pueyasojiniji niriquianotej, canaate tamonu sashiyajaara soj?”

<sup>21</sup> Nojori tiuquijiosacari Jesuucua, jiyacaritij, Jesuuri queraatia pueya naatanijioree nojori niquiara; cusosuhua, pueyaracaanu nootunejaca, samaruhuaraca pueyano. Mariyata queraatia cariyobarujuri jiyaterohua niquijiacaraari. <sup>22</sup> Na nuhuaji, Jesuuri naa Tiuquinijiona Juan pueya sequere:

—Nia quiaarohua. Tiuquinijiona Juan nia pohuatasuhua taa nia niquiriicujani, nia tojishanonio. Nia sequesuhuanoj: “Cariyobarujuriiri niquijiacara quiriohua. Shipiiniuquiujuniaari maninia rucoorohua. Lepra cusotajacaari cushiriitishaarohua juhua juhuanaraja nojori quiniuhua. Numueejunucuaari tojijiacara quiriohua. Macunucuaari samiitianijiosaarohua. Casamiijuniucua pueyari Pueyaso rupaa pohuatasaa-ree, Pueyaso pueyara nojori jiyatesaanura. <sup>23</sup> Shuquiriaatia quijia cutaraari nooj, cante cucua tiuuniu tarinitiaaquiyani”.

<sup>24</sup> Tiuquinijiona Juan jiyarosano pueya jaara quiojoquiaariuhua, Jesuuri juhuacatecara pueya pohuataree Tiuquinijiona Juanjiniji. Jesuuri naa nojori nequesotaree:

—¿Casaa niquiniucua nia quiojocanu cariquia jiyajiniani? ¿Niaate noojia niquijiteja niquiniucua quiojocanu? ¿Tiuquinijiona Juante juhua paratu piyarojosano naajua jiyareta na tacarojosano? Majaruhua. <sup>25</sup> ¿Casaa niquiniucua nia quiojocanunitioj? ¿Niaate maniniuqui toque cushijia niquiniucua quiojocanu? Niaacuajaari niishiya, shanohua toqueya cushiyonuujuaaari saaja jiyaniijianucua tiajinia quiyano niquishano. Nojoriiri tama na panishanojuaaja miijica. <sup>26</sup> ¿Taateerinitioj? ¿Casaa niquiniucua nia quiojocanuurini? ¿Pueyaso sequenu panishano caminiujiuniate quiquianu? Taaquiri-irini. Nia niquishano pueyanoori seetanujuanaa socua tojishano pueyano puetunu Pueyaso sequenu panishano caminiujiunijianajinijianaa. <sup>27</sup> Cuno Juanjinijicuaaari tariu-cuacaanu Pueyaso Rupaajinia naajiotasano quiquiaari. Pueyaso sequesano nojuajiniijiri naa naajiotasaaquiaritij:

“Cua sequenu panishano caminiujiuriquiano jiyaroyanjia, na puetanura quiajaniya, nuu jeenucuariquiano quiocujaji”.

<sup>28</sup> Seetanujuanaa nia sequeyanijia, puetunu Pueyaso sequenu panishano caminiujiunijianajinijiojuanaani, majaari tamonu socua cutara pueyano quiniu quiquiaari Tiuquinijiona Juanjiniji. Naajaa, cante Pueyaso muerasuniyojua quiya cucua na tiuushacarini, Pueya-sora, nojuajaari socua cutara pueyano Tiuquinijiona Juanjiniji.

<sup>29</sup> 'Puetunu pueyajanaa, mariyata cumaneeca masejona Roma tiacajinia quijia jiyaniijiarani, nojoriiri niishiquianu Tiuquinijiona Juan pohuatasano Pueyasojinijiiri seetanu rupaajanaa quiquianu. Naaratej, nojori tacatosacari nojori jiuujia sesa nojori miishanojiniji, nojoriiri moojinia tiuquinijiosaacanu.

<sup>30</sup> 'Saniniuujia, Fariseocuaca, mariyata Moisés Rootasanojiniji niishitiojanaani, no-joriiri Tiuquinijiona Juan pohuatasano ruuretacanu saaja. Naacuajitij, majaari nojori tiuquinijiosaanu quiquianu, nojori seetanuucua nojoriiri sesa miijiacajuhuj. Nojori-iri Pueyaso miiniu panishano nojoriria soocanu saaja. Naacuajitij, majaari nojori jiyanooshaanu quiquianu.

<sup>31</sup> Jesuuri socua sequere:

—¿Quiarijia nio pa quishacari pueyarijataj? <sup>32</sup> Nojoriiri juhua naatujuori, na tacuarishijionu panishacari, na cajitiushacari tiaca jiuujiajinia cajitiucua curaasanoinia. Nojoriiri narta naatujuoriicua naca: “Canaari juucua naajua jonenejiyani. Majaari nia nianujunu paniniu. Canaari taraatia jaaquequejosano jaaquequejiyani. Majaari nia sapuenu paniniujuhuaj”. <sup>33</sup> Naajuhuj pueyanaa, niaari Tiuquinijiona Juan tojiyaquiquianu Pueyaso rupaa na pohuatasacari nia niquiara. Nojuaja cutaraari miaquesano miaqueyashijia quijia, vino ratuyashijiano. Naaratej, niaari na sequeja, “samaruraca”. <sup>34</sup> Na nuhuaji, janiyari niquianuni. Janiyari saniniuujia miaquesano miaquejuani, vino ratujuajuhuj. Cunora niaari cua sequequiaa: “Cunoori sacuaraatia miaquejoru, ratunu porocuanio, sesa miijiaa rupueja sacuaraatia, mariyata pa soosano cumaneeca masejonaa rupuenanio”. Naa nia sequesacaritij, niaari cua tojitiaaquiya-jaacuhuj. <sup>35</sup> Naajaa, pueya jaara canaa pohuatasano tojiijaca quiri, jiyacari cutara nia naata niishiniu canaa niishitiojosanoori seetanujuanaa Pueyasojiniji, cua tojiijaca jatasacari maninia quijiacara.

*Jesu miaquesacari Fariseo Simón tiajinia*

<sup>36</sup> Tamonu Fariseo pueyanoori Jesu masuuquiaari na tiajinia na miaquenura. Jesuuri na tiajinia quiaaree. Miaquenuujua shuriquiumia roshishiiri. <sup>37</sup> Paanatuuri cuno tiacajinia quijia quiquiaari. Na niishishacari Jesuuri cuno Fariseo tiajinia tiuquirii miaquenura, nojuajaari cuno tiajinia quiaquiaarijuhuaj. Shiitianiyojua seesariquiaja pataconiyojua cacatariquiaari, cohuaja saajiajiniji quejasano. Mishaja quiriquiaari shanohua jaanutajata. <sup>38</sup> Maajiiri Jesu cashacuucuma mojuquetasee. Nujuqueriquiaari. Na namijiaacaari Jesu niohuacaacua totejoriquiaa. Naa Jesu niohuaca piquiojoreeri. Na nuhuaji, na muecacata na sacuanijiarohuari. Na niohuaca nujuureeri. Na shanohua jaanutaja totaree Jesu niohuacaacuaari. <sup>39</sup> Cuno Fariseo pueyano niquishacari naa cuno maaji miishanotej, noojiajinia niishiriojoriquiaari: “Jesu jaara seetanujuanaa Pueyaso sequenu panishano caminiujunia quiri, mariqui niishiri cante na coyani, taamueca maajitijianojoni”. <sup>40</sup> Jesuuri cuno Fariseo pueyano niishiriojosano niishiriquiaa. Cunora na sequereeri:

—Simónnaa. Quia sequenu paniyanijia.  
Fariseo pueyanoori Jesu riucaaree:

—Cua sequere, Niishitiojonanaa.

<sup>41</sup> Jesuuri na sequeree:

—Caapiqui pueyanoori cumaneeca masequiaari rupaquijiaara tamonu cumaneeca niqutiojonajiniji. Niquiriyatu pueyanoori queraatia cumaneeca masequiaari, juhua quiniento juuca poonijiosanojiniji masesano. Tamonu pueyanoori masequiaari nareja juhua cincuenta juuca poonijiosanojiniji masesano. <sup>42</sup> Na nuhuaji, nojori sequesano juuca jaara tari quiquiaari na camaru nojori niqutionuhuaara na cumaneeca, majaari nojori jitianu quiquiaari cumaneeca. Naaratej, cumaneeca niqutiojonaari nojori sequeree: “Naajaa, maja socua nia niishiriojonu nia niqutionuhuaara tarijia cua niqutiosano cumaneeca nijaniya”. Cumaneeca niqutiojonaari naa cuno caapiqui pueya jiyanooquiaari. Simónnaa, cua sequeretoj, ¿teyano cuno caapiqui pueyanojinijiniote socua cuno cumaneeca niqutiojona panijiaara quiniutianiyani?

<sup>43</sup> Simónri Jesu riucaaree:

—Cunocujani, cante socua queraatia cumaneeca niqutiosaaquiaaricujani.

Jesuuri na sequeree:

—Taaquiririnij.

<sup>44</sup> Jiyacaritij, Jesuuri cuno maajiicua tacateree. Simón sequereeri:

—¿Quiaate nio maaji niquiya? Cua tiuquishacari quia tiajinia, majaari quenaaja quia niqutionu quirii mohuaca janiya, cua niohuaca cua jeequetajara. Nio maaji cutaraari cua niohuaca jeequeree na namijiaacata. Na sacuanijiarohua na muecacataari.

<sup>45</sup> Majaari quenaaja quia nujuunu quirii janiya, quia saruhuatasacari janiya. Nio maaji cutaraari cua niohuaca nujuunequejoriquiaa pueyaracaanu, niya cua cajishacari.

<sup>46</sup> Naajuhuj, majaari quia totanu quirii miesu nunacu cua nacaacua. Nio maaji cutaraari

cua nioluacaacua totaree shanohua jaanutaja. <sup>47</sup> Naaratej cua tojiri. Nio maajiiri jiyanoohua sesa miiija quiriquiaa. Naaratej, jiyanoohua cua paniyari puetunu sesa na miishanojinijianaa cua jiyanooniucua nojuaja. Saniniuujia, cante secaja sesa na miishanojiniji jiyanooshaareeni, naajuhuj, nojuajaari secaja panijia na jiyanoonia.

<sup>48</sup> Na nuhuaji, Jesuuri cuno maaji sequeree:

—Quiaacuajaari tari jiyanooshaaree sesa quia miishanojiniji.

<sup>49</sup> Narta masuusano pueya nata cajitiyanoori juhuacatecara tama sequetooreejaaja:

—¿Cantucuaa nio pueyanoni, sesa miiija jiyanooriquianoni?

<sup>50</sup> Jesuuri maaji sequeree saaja:

—Cucua quia tiushacari, quiaacuajaari tari jiyanooshaaree. Juhujaniya quia quiaarohua.

## 8

### *Jesura pueraquena maajipohujiniji pohuatasano*

<sup>1</sup> Na nuhuaji, Jesuuri rucanejoquiaari queraatia tiacajinia, shiitaniyojua tiacajini-ajuhuj. Nojuajaari tii Pueyaso rupaa pohuatariquiaa, taa Pueyaso jiitanu paniya na muerasuni. Na doce saquiriojosano pueyari na cojiriquiaajaacuhuj. <sup>2</sup> Noojiaqueya maajipohuari na tarajiriquiaajuhuj. Cuno maajipohuari tamaatia cusonujiniji Jesu naatanijosano quiquiaari. Tii quiriquiaajaariuhua noo maajipohua, Jesu nojorijiniji tohuatanijioquiaari samaruhaatej. Nojorijinijinoori quiquiaari María Magdalena. Jesuuri cuno Maríajiniji tohuatanijioquiaari siete samaruha. <sup>3</sup> Quiriquiaajaariuhua Juana, Cuza niquiocuani. Cuzaari jiyaniija Herodes jiitiasano casami cojuana quiquiaari. Susaanaari nojorijinijinio quiquiaarijuhuaj. Socua queraatia maajipohuari quiriquiaa. Puetunu cuno maajipohujanaari Jesu naacutaquiaari tama nojori jiitiasano casaatajaaja. Nojori-iri nera pueraquenuuna quiquiaarijuhuaj, tiqiyocua nojori rucanejosacari Jesuta.

### *Jesu pohuatasano natoojona pueyanojiniji*

(Mt 13.1-9; Mr 4.1-9)

<sup>4</sup> Queraatia cuno jiya tiacajinijinio pueyari nijioquiaari nojori niquiniuria Jesu. Jaara nocua rerequeejoquiaari queraatia pueya, Jesuuri nojori niishitiojoquiaari miriqui, nio pohuatasanota. Nojori sequereeri:

<sup>5</sup> —Tamonu pueyanoori na cuhuariquiajia quiaquiaari natoojonuucua. Na jacutasacari, secajaari totequiaari nucuaco. Tii rapijosaaquiaariiri. Shuhuari na miojquiaari. <sup>6</sup> Tajaacaari toteree sai tajinia. Cuno jajau jaara moritiaquiaari, ritia sorereeri puera joojuashiqui na quishacari. <sup>7</sup> Tajaacaari toteree riyocuaca tajinia. Riyocuacaari socua ritia maashiquiaari. Na natanooori tarinitiuuara quirii. <sup>8</sup> Socua tajaacaari maninia jiyajinia toteree. Tii maashiquiaari maniniaari. Queraatia mueturee cutaraari. Noojiaqueya cuno nataujinijiiri cien jajau quiquiaari niquiriyatu jiyonajiniji.

Nio pohuatasano na puecasacari, Jesuuri na rupaa paaretaree. Naa sequereeri:

—¡Niaa jaara numaaraca quiri, nia tojitiare cua pohuatasano!

### *Casaarate miriqui pohuatasanoni*

(Mt 13.10-17; Mr 4.10-12)

<sup>9</sup> Na nuhuaji, Jesu pueyari na nequesotaree casaa na miriqui pohuatasano niishitiojonu paniyani. <sup>10</sup> Jesuuri nojori riuuaree:

—Niaari saquiriojosaaquiaari nia niishiniuria taa Pueyaso poonijiya pueya jiuujiajini-ani, na muerasura nojori quiniuria. Cunoori tariucuacaanu pueya niishishoo. Janiyari tamasaca pueya niquiara pohuataquiaa miriqui cutarani. Naacuajitij, nojoriiri cua pohuatasano niishiyaquiquiaa na tojitiasacari. Naajuhuj, cua cumaacata cua miishano cariyoshitiquiaari, nojori niquiara cua miishacari.

### *Jesu niishitiojosacari na pueya, miriqui na pohuatasano natoojonajiniji*

(Mt 13.18-23; Mr 4.13-20)

<sup>11</sup> 'Nia niishitiojoreera miriqui cua pohuatasano natoojonajiniji. Pueyano natoojosano jajauri juhua Pueyaso rupaa. <sup>12</sup> Pueyano jaara Pueyaso rupaa tojiri najuhuanaj, nojuajaari juhua nucuaco toteno jajau. Sesaacaari nimiaa. Pueyaso rupaa na tojishano jaariutiarohua noojiajinijiiri, maja nocua na tiuuniuria, nojuaja mariqui jiyanooshaareeri. <sup>13</sup> Sai tajinia toteno jajauri juhua noo pueya, canapuate Pueyaso rupaa tojiriini. Na nuhuaji, rupaquijia Pueyasooqua tiuquuaa shuquiriaatiaari. Naa miijicaari juhua puera shiitianiyojua nujuacaraca. Naacuajitij, nojori jaara saniniujiushaare, nojoriiri ritia Pueyasooquaji rupatequiaa. <sup>14</sup> Riyocuaca tajinia toteno jajauri juhua noo pueya, canapuate maninia tojirii Pueyaso rupaani. Na nuhuaji, nojoriiri puera tacaquiaa mijiria casaacua, casamiriaca nojori quiniuria, tama na cuaqueyajaaja nojori shuquiri-tiniuriajuhuaj. Naaratej, nojoriiri juhua muetuhuo natau quiya, tarinitiucua riyocuaca tariyoshitishano. <sup>15</sup> Maninia jiyajinia toteno jajauri saniniuujia juhua noo pueya, canapuate maninia tojitiareecuaja Pueyaso rupaani. Na racataa maninia noojiajiniaari. Pueyaracaanu na tojitiaquiaari. Majaari na pishiniu Pueyasooquaji. Naacuajitij, nojoriiri juhua queraatia muetujua natau.

*Pueyaso muerasuuri juhua samaritiu cuhuataja*  
(Mr 4.21-25)

<sup>16</sup> 'Majaari pueya noshitiniu quiquiaa samaritiu, na jamotasocoriquiano conatu cariquiaco, maquetu cariquiaconio. Samaritiu jaara noshitishaare, morijiuucua morotashiyari na cuhuatanura, pueya tiuquitasacari tiajiniaaco. Naajuhuj, Pueyaso Rupaari pueya jiuujia cuhuataja. Cunora, Pueyaso Rupaa cuara maatia pohuatasaria puetunu pueya niquiarajanaa. <sup>17</sup> Puetunu jamojosano casaajanaari riuriatasaanutaniya. Puetunu jiyasohuaja nia miijiosanojuanaari niishishaanutaniyajuhuj. Cuhuatasaanutaniyari maninia niquishocoriquiano. <sup>18</sup> Cunora, cua sequesano tojitiajaca nia quiri maninia. Cante maninia jiitiaa cua rupaani, nojuajaari socua na niishijara jiyatesaanutaniya. Saniniuujia, cante cua rupaa tojiyashijiani, secaja najuhua na niishishanoori jaariutiasaanutaniya, puetunu shaaquiriajanaa.

*Jesu tapueyocuaca tiuquijiosacari Jesuucua nojori nucuata*  
(Mt 12.46-50; Mr 3.31-35)

<sup>19</sup> Jiyacaritij, Jesu nucua Jesu tapueyocucata tiuquijioquiaari Jesu quishaqui. Majaari nojori naata tiuquitianu quiriquiaa Jesuucua. Jiyanojua queraatia pueyari nocuara ritariquiaa saaja tia tohuateyaji. <sup>20</sup> Tamonuuri Jesu numooteree:

—Quia nucua quia tarajanuhuata jati carijiniacuma quiya. Quia niqutiuniu paniyaquinia.

<sup>21</sup> Jesuuri tii quiniaa niquira sequeree saaja:

—Canapuate seetanujuanaa Pueyaso Rupaa tojitiajacani, nojoriiri cua nucua cutara, cua tarajanuhuanio.

*Jesu pueyajetesacari paratu, mohuacanio*  
(Mt 8.23-27; Mr 4.35-41)

<sup>22</sup> Tamonu juuca, Jesuuri botejinia tacataquiaari na saquiriojosano pueyata. Nojori sequereeri:

—Pa niuutiaare caminia taquijiria.

Naaratej, nojoriiri niutiariquiaa. <sup>23</sup> Nojori niuutiasacari, Jesuuri maqueriquiaa. Canashiyaquiji paratuuri juhuacatecara piyarojonu coteeree jiyanojua. Mohuaca queyaqueteriquiaa bote jiniacumaraari. Boteeri quera tiuquitiariquiaa tari. <sup>24</sup> Jiyacaritij, na pueyari Jesu niucuajasee ritia. Na sequetuseeri:

—¡Niishitiojonanaa! ¡Niishitiojonanaa! ¡Paa tari tiuquitiaani!

Jesuuri sanemaa. Paratu sequereeri, mohuacanio:

—¡Tariucujaja! ¡Nia suraajere!

Paratu, mohuacaari ritia suraajee. Paratu piyarojonuuri tajimiaa, caminia queyocuaanonio. <sup>25</sup> Jesuuri na pueya sequerohua:

—Niaacuaja juucua Pueyasooqua tiuujia. ¿Casaa nia tojetareerini?

Nojoriiri Jesuucuaaji jiuujiatecoree. Shiriiqitiuriquiaari Jesu miishano nojori niquishacari. Tama nojorijiaarijia nequesoreetooriquiaa:

—¿Cantucuaanojoni? ¡Paratu, mohuacaari na tojirii na sequesacari!

*Gerasa jiyajinjinio samaruhuaraca pueyanojiniji pahuatasano*

*(Mt 8.28-34; Mr 5.1-20)*

<sup>26</sup> Na nuhuaji, nojoriiri shiitiaseequiaari Gerasa jiyajinia, Galilea jiya taquijiria. <sup>27</sup> Jesu jaara rosequiaari botejiniji, jiyacaritij, samaruhuaraca pueyanoori nocua niquiaari, cuno jiya tiacajinjinio pueyano. Cuno pueyanoori pueyaracaanu samaruhuaraca quiquiaari. Majaari toque na cushiniu quijia. Naajuhuj, majaari tiajinia na quiniu quijia. Saaja raacajinia quijiaari, macunucua nuchua paaquiosaqui. <sup>28</sup> Na niquishacari Jesu, na cariquimiaji mojuquetaseeri. Jesuucua nacareeri:

—¿Casaara quia niyaree miji canaa quia cushitionurani Jesunaa? ¡Quia niishianijia! ¡Quiaacuaajari Jiyaniijajanaa Pueyaso Niyanu! ¡Cua tarinitiare quenaaja! ¡Maja naquiya cua miiniu!

<sup>29</sup> Samaruhuaraca pueyanoori naa sequeriquiaa Jesutej, Jesu sequesacari tari nojuaja, cuara tohuataara cuno pueyanojiniji. Samaruuri sequeyarucua cuno pueyano miitiquiaari sesa. Narta pueyari juucua na cashacucua, na numatucua morojouquiaari cumayocua jiyocua shipinishanota, na cojuasaanura maninia. Samaruhuaraca pueyanoori saaja na turojotaquiaari. Samaruuri na mashiquijia tiquiyocua, pueya quiaquishaqui na quiniuria. <sup>30</sup> Jiyacaritij, Jesuuri na nequesotaree:

—¿Taateja quia sesani?

Samaruuri na riucuaaree:

—Cua sesa “Queraatia”.

Naa Jesu sequequiaariiri jiyanoehua queraatia samaruhua na jiiiasacari. <sup>31</sup> Samaruhuari jiyanoehua secojoree Jesu, maja nojori na jiyaronura puequeetuujuraama saniitosocoriquiano. <sup>32</sup> Jiyacaritij, queraatia cushiyari miaquenuuriquiaa cateca naataja, tuhuananujinia quiniqui. Samaruhuari cunora Jesu secojoree nojori na tiuquitaniniuria cushiyajinia. Jesuuri nojori tarinitiaree. <sup>33</sup> Cunora, samaruhuari pueyanojiniji tohuareetaquee. Cushiyajinia tiuquitiaseeri. Puetunu cushiyajanaari cocuateree. Tacinijiji totesee caminijajiniaari. Tii shushiniuuriiri.

<sup>34</sup> Cushiya cojuanaa jaara niquiquiaari naa miishanotej, nojoriiri netecuatuquiaari na shiriiquiniutia, Jesu miishano nojori pahuatanura tiacajinia, cuhuariquiacajiniajuhuaj, tee pueya quiriquiaacuajani. <sup>35</sup> Puetunu pueyajanaari Jesuucua nijioquiaari na tiacajiniji, pueya pahuatanuusanojiniji nojori niquiniuria. Nojori tiuquiiijosacari Jesuucua, nojoriiri cuno pueyano niquishii, canajiniji samaruhua tohuareetareecuajani. Nojuajaari Jesu shuriucua cajiriquiaa toqueraca, panaatia na quishacariuhua. Naa pueya niquishacari nojuajatej, pueretuquiaariiri. <sup>36</sup> Jiyacaritij, Jesu miishano niquitiuniaari shusha nijiono pueya pahuataree taa samaruhuaraca pueyano naatanishaarohuani. <sup>37</sup> Cunora, puetunu Gerasa jiyajinjinio pueyajanaari jiyanoehua puereturiquiaa. Naaratej, ¡Jesu secojotureeri na quianura nojori jiyajiniji! Naaratej, Jesuuri botejinia tacataquiaariuhua na pueyata na quianuhua. <sup>38</sup> Cuno pueyano, canajiniji samaruhua tohuareetareecuajani, nojuajaari Jesu secojoree juucua nata na quianura. Jesuuri saaja naa na sequeree:

<sup>39</sup> —Quia tiajinia quia quiaarohua. Quia pueya niquiara quia pahuatasuhua taa Pueyaso miirii maninia quiajaniani.

Pueyanoori quiaarohua. Puetunu na tiacajinijanaa pahuatasuhuari taa Jesu miiriu-cuaa maninia nojuajani.

*Jesu naatanishacari Jairo niyatu, Jesu toque quiana maajinio*

*(Mt 9.18-26; Mr 5.21-43)*

<sup>40</sup> Jesu jaara niutiaquiaariuhua caminia taquijiria na pueyata, pueyari na timitiarohua na tiuquishacariuhua. Puetunu nojorijianaari na sashiriquiaa. <sup>41</sup> Jiyacaritij, tamonu pueyanoori Jesuucua tiuquishii. Na sesaari quijia Jairo. Nojuajaari Pueyaso secojojua tia jiyaniijia quiquiaari cuno tiacajinia. Jesu cariquimiaji mojuquetaseeri na secojonura

na tiajinia Jesu quianura. <sup>42</sup> Neyatuniyojuuari quera cusoriquiaa jiyacari. Majaari socua niquiohwaraca na quiniu quijia. Doce marijiaari tari shocojoquiaari cuno neyatu.

Jesu quiasacari Jairota, jiyanohua queraatia pueyari nata quiojoriquiaajuhuj. Pueyari jiyanohua na tanuujuriquiaa, nata nojori quiojosacari nucuaco.

<sup>43</sup> Tamonu maaji cusosuuri cuno pueya tajinia quiriquiaajuhuj. Doce marijiaari tari na shocojoquiaari pueyaracaanu na naatesacari. Cuno maajiiri puetunu na cumaneeca puecaquiaarijianaa najuhuanaj, na naarajosaanura juucua. Naarajonaari maja na naata na naataniniu quiquiaari. <sup>44</sup> Maaji cusosuuri Jesu nijiniji catecanoquiaari nocua. Na tucuaque toque casaca quiasee jiyasohuari. ¡Na nanacaari ritia curetaquee!

<sup>45</sup> Jiyacaritij, Jesuuri pueya nequesotaree:

—¿Cante cua quiareeni?

Puetunu na shocuaqueya pueyajanaari sequeree:

—Maja canaa quianu quirii quiajaniya.

Pedroori Jesu sequeree:

—Niishitiojonanaa, ¿majateeri quia niquiniucujaja? Queraatia pueyacuajaari quia tanuujija.

<sup>46</sup> Jesuuri saaja sequeree:

—Maja. Cusosu cua quiareeni. Niishiyaniija cua cumaacaari tari na naatanirii.

<sup>47</sup> Maaji niishishacari na miishano jiyasohujaja tari niishishaaree, Jesuucua nimiaari. Na puerenuta tetecariquiaari. Jesu cariquimijaji mojuquetaseeri. Puetunu pueya niquiarajanaa pohuatereeri casaara Jesu na quiareeni. Pohuatereejariuhuj taa na naataquee ritiani, Jesu na quiasacari. <sup>48</sup> Jesuuri na sequeree:

—Sanaunaa, cucua quia tiuuniucua, quiaari naatarohua. Quioojia quia cajitiriohua. Juhujajaniya quia quiaarohua.

<sup>49</sup> Jesu pocoojosacarijia cuno maajitia, tamonu pueyanoori tiuquiquiaari Jairo tiajiniji. Jairo sequeeseeri:

—¡Quia niyatu tari cusoquee! Maja najuhuaana riniu paniniu Niishitiojona quia tiajinia.

<sup>50</sup> Jesu tojishacari cuno pueyano sequesano, Jairo sequereeri:

—Maja puerenu. Cucua quia tiuuri saaja. Quia niyatucujaja naatanutaniuhua.

<sup>51</sup> Jesu tiuquishacari Jairo tiajinia, nojuajaari maja na shanacunu quirii quenaaja tamonu pueyano tiuquiniuria macuucua. Saaja nata tiuquitiamaa cutaraari Pedro, Santiago, Juan, maaji samiriu que, na nucuanio. <sup>52</sup> Puetunu tii quiniaa pueyajanaari maaji samiriuucua nujuqueturiquiaa. Sapiyonuuriquiaajariuhuj. Jesuuri nojori sequeree:

—Maja najuhuaana nia nujuquenu. Maaji samiriu maja macu, nareja maqueyano.

<sup>53</sup> Naa Jesu sequesacaritij, pueyari na saroojotaree saaja. Nojoricujajaari niishiriquiaa maaji samiriuuri seetanujanaa macu quiriquiaa. <sup>54</sup> Jiyacaritij, Jesuuri macuucua tiuquiquii. Na juaashiquiajiniji na quiaseeri. Jiyanohua na sequereeri:

—Maaji samiriuniaa, ¡quia sanere!

<sup>55</sup> Na sohuanuuri nocua tacatemohua jiyacari. Samiitiamohuari. Ritia sanequeeri. Jesuuri na nucua sequeree na mianuutenura. <sup>56</sup> Na queyari jiyanohua jiuujiateree. Jesuuri nojori sequeree, maja nojori pohuatanura tamasaca niquiara na miishano.

## 9

*Jesu jiyaramiquishacari na doce pueya Pueyaso rupaa nojori pohuatanura  
(Mt 10.5-15; Mr 6.7-13)*

<sup>1</sup> Jesuuri na doce saquiriojosano pueya rerejotequiaari na jiyaramiquishocoriquiano. Nojori niquitioree cumaacaari, puetunu tamaatia sesa samaruhujanaa nojori tohuatejonura, cusosuhua nojori naatanijionurajuhuj. <sup>2</sup> Nojori jiyaramiquiriiri Pueyaso rupaa nojori pohuatanura pueya niquiara, pueya niishiniuria taa Pueyaso jiyanooni paninya nojorini, na muerasu nojori quiniuria. Nojori jiyaramiquiriijaariuhua cusosuhua nojori naatanijionura. <sup>3</sup> Jesuuri nojori sequeree:



—Maja nia panu nia rucuanejotajara nia panishano. Majaari nia miojotu nia panu, nia caashoque, nia coseyaca, nia cumaneecanio. Saa nia cushishano toquetaja nia quiaare cutara. Maja socua toque nia panu nia cushishocoriquiano. <sup>4</sup> Naa jaara tamonu tiajinia tiuquishiiquia, niocua cuniqui jiyojetaseequiaja, niaa jaara cuno tiacajiniji quiaarejaatia. <sup>5</sup> Naa jaara tamonu tiacajinia tojiniu paniyaquishaare, cuno tiacajiniji nia quiaare. Nia nuhuajiria, cuno pueya niqiara niocua nia niohuacajiniji cuno tiaca jaaquia nuutare. Naacuajitij, cuno pueyari niishiniutianiya, Pueyasoori nojori jiyanoyaquiniutianiya, nojori tojitianu paniyaquiniucua Pueyaso rupaa pohuatanaa.

<sup>6</sup> Na nuhuaji, Jesu pueyari quiojoquee puetunu cuno jiyajinia shiitianiyojua tiacajinijanaa, Pueyaso rupaa nojori pohuatanura tii. Nojoriiri Pueyaso rupaa pohuatanuquiaari pueya jiyanooshaanura, Pueyaso pueya nojori quiniuria. Naajuhuj, cusosuhua naatanijiotuquiaariiri.

*Jiyaniijia Herodes niishiniu panishacari cante Jesuni*

*(Mt 14.1-12; Mr 6.14-29)*

<sup>7</sup> Jiyaniijia Herodesri pohuatasaaquiaari puetunu Jesu miishanojinijijanaa. Herodesri saaja jiyajenequiaari cante Jesuni. Jiyacaritij, noojiaqueya pueyari sequeriquiaa: “Jesucujaaari jiyaniijia Herodes nacatanishano Tiuquinijiona Juan samiitianohua”.

<sup>8</sup> Tamasaca pueyari Jesujiniji sequeriquiaajuhuj: “Supuetana Elíascaja tari tiuquiriohua”. Nojuacuajaari tariucuacaanu Pueyaso sequenu panishano caminiujiumia quijia. Saniniuujia, tamasa pueyari sequeriquiaajuhuj: “Jesucujaaari tamonu tariucuacaanu Pueyaso sequenu panishano caminiujiumia samiitianohua”. <sup>9</sup> Herodesri saniniuujia sequere:

—Janiyacujaaari cua pueyano jiyarocanu Tiuquinijiona Juan na nacatanurani. ¿Cantejaara cuno Jesuni? Janiyari queraatia nocuaji tojiniuyani.

Cunora, Herodesri jiyanohua Jesu niqiniu paniriquiaa juucua.

*Jesu mianuutesacari cinco mil pueya*

*(Mt 14.13-21; Mr 6.30-44; Jn 6.1-14)*

<sup>10</sup> Jesu jiyaramiquishano pueya tacatesacariuhua, nojoriiri Jesu pohuataquiaari puetunu nojori miishanojuanaa. Na nuhuaji, Jesuuri nojori jiyataaree tamaquiria, Betsaida tiaca shuriucua, tii tamajaaja nojoritia na quiniuria. <sup>11</sup> Pueya niishishacari tee Jesu quiriquiaani, nojoriiri saaja nocua quiojoquiaari. Naajaa, Jesuuri maninia nojori maseree saaja. Cuno pueya pohuatareeri taa Pueyaso quiniu paniya nojori jiyaniijiarani. Jesuuri nojori cusosuhua naatanijioreejuhuj.

<sup>12</sup> Tenacariishacari, Jesu doce pueyari nocua catecanoquiaari. Na sequetureeri:

—Pueya quia jiyaramiquiri cateca tiacajinia, nojori cuara cuniqui pajenuura na miaquenuusocoriquiano, na maquetujuarajuhuj. Nojori panishanoori shaaqui niya pa quishaquini.

<sup>13</sup> Jesuuri nojori sequeree saaja:

—Naa mariqui nojori mianuutere saniya.

Nojoriiri Jesu sequeturee:

—¿Canaateeri miaquesanoracajaarani? Canaa saaja cinco panniyojua jiiitiaani, caapiquiriyatu sapitiaajanio. ¿Canaateeri secaja pa cumaneecata masenutaniya queraatia miaquesano puetunu nio pueyarajanaani?

<sup>14</sup> Cuniqui nojoritia quiriquiaa naasucuaari cinco mil pueya. Jesuuri na pueya sequeree:

—Pueya nia raquiriojotare maninia. Cuara cajitiuuria cincuenta jatiqui, socua cincuenta tamaqui. Mianuutesocoriquiano puetunu pueyajanaa, cuara naa cajitiuuriatej.

<sup>15</sup> Nojoriiri Jesu sequesano miirii. Puetunu pueyajanaari cajitiurii. <sup>16</sup> Na nuhuaji, Jesuuri cuno cinco pan pataree, caapiqui sapitiaajanio. Jiyocuacaanu maureeri na Que Pueyaso na secojonura miaquesanoocuara. Na nuhuaji na neecasereeri. Na pueya na niqitioreeri puetunu pueyajanaa nojori serotasocoriquiano. <sup>17</sup> Puetunu pueyajanaari na miaquenuuree. Maninia tooquioreeri. Na nuhuaji, doce canaasatuuri mishinijosaaquiaari pan raacuata, sapitiaaja raquiquiatanio.

*Pedro sequesacari Jesuuri seetanujuanaa Cristo*

*(Mt 16.13-19; Mr 8.27-29)*

<sup>18</sup> Tamacari, Jesuuri Pueyaso secojoriquiaa tamajaaja. Na saquiriojosano pueyari nata quiriquiaa. Jiyacaritij, Jesuuri nojori nequesotaree:

—¿Taa pueya sequequiaa janiyani, cantena janiyani?

<sup>19</sup> Nojoriiri na riucuaaree:

—Noojiaqueya pueyari quia sequequiaa, quiaana nacatasano samiitianohua Tiuquini-jiona Juan. Tamasacaari quia sequequiaajuhuj, quiaana Elías, tariucuacaanu Pueyaso sequenu panishano caminiujiunia. Tamasacaari saniniuujia quia sequequiaa, quiaa naasucuaana tamonu tariucuacaanu Pueyaso sequenu panishano caminiujiunia samiitianohua.

<sup>20</sup> Jesuuri saniniuujia nojori nequesotaree:

—¿Niajanियariuhuj? ¿Taa nia sequeyani, cante janiyani?

Pedroori na sequeree:

—Quiajanियacuajaari Cristo, Pueyaso Jiyarosano.

<sup>21</sup> Jesuuri jiyanojua nojori rootaree maja nojori pohuatanura tamasa niquiara cante nojuajani.

*Jesu numootesacari na pueya, nojuaja mosaanutaniya*

*(Mt 16.20-28; Mr 8.30-9.1)*

<sup>22</sup> Jesuuri naa nojori sequerohuacuhuj:

—Janiyari jiyanojua naquiya miishaanutaniyani. Pa Judiocuaca camarucuaari cua niquiniu paniyaquiniutianiya, na tojtianu paniyaquishacari janiya. Naajuhuj, pa pueyacuara secojonaa jiyaniijianucuaari cua niquiniu paniyaquiniutianiya, Moisés Rootasanojiniji niishitiojonaanio. Nojoriiri cua monutaniya. Naajaa, jiuujianaraca juucajinia, janiyari samiitianutaniuhuanu.

<sup>23</sup> Na nuhuaji, Jesuuri puetunu pueyajanaa sequeree:

—Cante cua nuhuajiniu paniyani, cua pueyano na quiniuria, nojuaja cuaara niya-jetaara tama na miiniu panishanojuaaja. Cuaara panitiaara tama na cuaqueyajaaja puetunu juucajanaa, cua tojjia na quiniuria seetanujuanaa. <sup>24</sup> Saniniuujia, cante tama na cuaqueyajaaja shuquiritiniuria niishiriojoquiaani, nojuajaari jiyanojua taraatia quiniutianiya na nuhuaji. Saniniuujia, cante tama na cuaqueyajaaja panitiaquiaa cua panishano na miiniuriani, nojuaja cutaraari Pueyaso pueyanora jiyatesaanutaniya, pueyaracaanu shuquiriaatia na quiniuria. <sup>25</sup> Pueyano jaara puetunu nio jiya casamijianaa jiitiana quiri, cuno maara najuhua quiri, nojuaja jaara na shaajesacari jataasaare mani quiquiojinia Pueyasooju. <sup>26</sup> Cante cua seera caririquiya mijiria quiniaa pueya niquiara sequenurani, janiyari nojori jiyaniijiani, naajuhuj janiyari nojori seera caririquiniutianiyanu cua tiuquishacariuhua Jiyaniijia cua quiniuria. Janiyari shanojua niquishano quiniutianiya cua tiuquishacariuhua cua Que shacantuuca cumaacatani, na seya cumaacatajuhuj. Naajuhuj, cante cua rupaa pohuatanu caririquiya sesa miijica pueya niquiarani, janiyari nojori seera caririquiniutianiyajuhuj. <sup>27</sup> Seetanujuanaa nia sequeyanijia, noojiaqueya nijaniyajinijinioori maja nia cusonuunu quiniutianiya juhuanojuaaja, niaa cuaara niquirijaatijia Pueyaso cumaaca tiuquiyano cucua, na muerasu jiitiariquianoni.

*Jesu jatasacari shacantuucara*

*(Mt 17.1-8; Mr 9.2-8)*

<sup>28</sup> Naa Jesu sequenu nuhuajitij, ocho juuca nuhuaji, nojuajaari tuhuananuucua tacaquiaari na Que Pueyaso na secojonura. Nata quiaareeri Pedro, Santiago, Juan-nio. <sup>29</sup> Jesu secojosacari Pueyaso, na jiquiocoori tamaatiara jataquiaari. Na toqueeri jiyanojua cohuajara jataquiaarijuhuj, shacantuquera. <sup>30</sup> Jiyacaritij, caapiqui pueyari nocua muetaquiaari. Jesuta pocoojoriquiaari. Nojoriiri quiriquiaa supuetana Moisés, supuetana Elíasnio. <sup>31</sup> Nojori nujuatusaquiiri shacantuuca quiriquiaa puetunu nojori shocujanaa. Nojoriiri pocoojoriquiaa taa Jesu mosaanutaniya Jerusalén tiacajiniani. <sup>32</sup> Jiyacaritij, Pedroori jiyanojua maquenuujuriquiaa, nata quiniaajuhuj. Naajaa,

majaari nojori maquenu quiriquiaa. Naacuajitij, nojoriiri Jesu shacantuuca niquiquiaari. Cuno caapiqui supuetanaa niquitiuriijaariuhua, Jesuta pocoojiyano. <sup>33</sup> Cuno caapiqui pueya quiojonu panishacariuhua Jesu shuriucua, Pedroori Jesu sequeree najuhanaj:

—¡Niishitiojonanaa, canaa namitia niya quiyani! ¡Canaa suhuororeera jiuujianaraca suhuorotucua; quiara, Moisésra, Elfasranio!

Pedroori naa najuhuaa pocuariquiaa. Majaari na niishiniu quiquiaari casaa na sequeriquiaani. <sup>34</sup> Pedro pocuasacarijia, cohuaja najacaari nojori mishiquioma. Nojoriiri puereturiquiaa cohuaja najacajinia nojori quishacari. <sup>35</sup> Na nuhuaji, nojoriiri Pueyaso tojirii pocuaano cuno cohuaja najacajiniji. Naa sequereeri:

—¡Niiori cua Niyanu, cua saquiriojosano nia Jiyaniijia na quiniuria! ¡Nojuaja nia tojitiare!

<sup>36</sup> Naa nojori tojiniu nuhuaji cuno rupaatej, nojoriiri Jesu niquiriohua. Tari tamajaaja nujuariquiaari. Nojoriiri sanaa na niquitariquiaa. Na nuhuaji, majaari quenaaja tamonu nojori pohuatanu quiquiaari nojori niquishano, Jesu jaara samiitiaquiaariuhuaatijaj.

*Caya samijajiniji Jesu tohuatesacari samaru*

*(Mt 17.14-21; Mr 9.14-29)*

<sup>37</sup> Tariqui, nojori jaara rosetaquiaariuhua tuhuananujiniji, queraatia pueyari Jesuucua nijioquiaari. <sup>38</sup> Cuno pueya tajiniji, tamonu pueyanoori naa nacaquiaari:

—¡Niishitiojonanaa, cucua quia taraajere quenaaja! ¡Cua niyanuniyojua quia niquiri! ¡Jiyaniojuanaari quiyanuniyojua! <sup>39</sup> ¡Samaruuri na miiquiaa taraatia! ¡Na sariyotequiaari! ¡Na taquiriocatequiaaariuhua! ¡Na rupaamajiiri cushaaquiaa! ¡Na cuaqueya miiquiaa moquitiuriariaari! Majaari ritia na cartenu paniniu quiquiaa. <sup>40</sup> Janiyari juucua quia pueya sequereeni, cuno samaru nojori tohuatenura. Majaari nojori naata quiriquiaa na tohuatenura.

<sup>41</sup> Jesuuri sequeree:

—Pueyaso tojtiaashijiacanaa, niaaqui Pueyasocua tiuyashijiacajuhuanajaj. ¿Janiya-teeri pueyaracaanu rejeretanutaniya nijaniyani? Miji quia niyanu quia jaatucure.

<sup>42</sup> Caya samijia catecanosacari Jesuucua, samaruuri na pojotequee. Na taquiri-ocuatereeri. Jesuuri samaru sequeree na tohuatanura. Caya samijia naataniriiri. Na niquitiorohua na queeri. <sup>43</sup> Puetunu pueyajanaari jiyanohua jiuujiateree nojori niquishacari Jesu miishano Pueyaso cumaacata.

*Jesu pacutesacari pohuatanu nojuaja mosaanutaniya*

*(Mt 17.22-23; Mr 9.30-32)*

Pueya jiuujiatesacarijia puetunu Jesu miishanojinijianaa, Jesuuri na pueya sequeree: <sup>44</sup> —Maninia nia tojiri casaa cua sequenutaniya nijaniyani. Majaari na niyjetanu. Janiyari niquitiosaanutaniyani pueya miiniuria janiya taa nojori paniyacuajani.

<sup>45</sup> Majaari na pueya niishiniu quiriquiaa Jesu sequesano. Juhua miriqui sequesanoori quiriquiaa nojoriria. Naacuajitij, majaari nojori naata niishiniu quiquiaari. Nojoriiri Jesu nequesotanu puereturiquiaajuhua, casaa nojori na pohuatasano sequenu paniriquiaani.

*Cante jiyaniijajanaa cutarani*

*(Mt 18.1-5; Mr 9.33-37)*

<sup>46</sup> Jesu pueyari juhuacatecara juayonuutariquiaa teyano nojorijinijiniote jiyaniijia-janaa quiniutaniyani. <sup>47</sup> Jesuuri nojori niishiriojosano niishirii. Naaratej, Jesuuri naatujua nujuateree na shuriucua. <sup>48</sup> Na pueya sequereeri:

—Cante nio mueya rupueya na cumaquiniuria cucua tiuujia cuno mueya quiniuucuni, nojuajaari cua rupueyajuhua. Cante cua rupueyani, cua Jiyarona rupueyajaariuhua. Naacuajitij, cante tama na cuaqueyajaaja jiyateya pueya shocoteyashijia na quiniuria juhua naatujua, nojuajaari jiyaniijajanaa quiniutaniya puetunu narta Pueyaso muera-sujinijiniojuanaa.

*Cante maja pa paracani, nojuajaari pa jiyano*

*(Mr 9.38-40)*

<sup>49</sup> Juanri Jesu sequeree:

—Niishitiojonanaa, canaari pueyano niquiriucuaani samaruhua tohuatanijiyano quia cumaacata. Čanaari na tenujurucuaani nojuaja quiaquiniucua pajaniyajinijinio.

<sup>50</sup> Jesuuri na riucuaaree:

—¿Casaara nia tenujurucuaarinioj? ¿Niaateeri niishiyaquiya, cante pa paraca quiaquiyani, nojuajaari pa jiyano?

*Jesu nacasusacari Santiago, Juannio*

<sup>51</sup> Quera Jesu tacanu panishacari jiyocuacaanu, nojuajaari juhuacatecara Jerusalén tiacajiniara quiaaree, juhua jiuujiaaju na puereyaquiniutia. <sup>52</sup> Jerusalén tiacaacuara nuu cajiniocua Samaria jiyajinia Jesu quishacari na pueyata, noojiaqueya na pueyajinijinio puerateree tamonu tiacajinia nojori masenura tia nojoriicuaajiiri. Naacuajitij, na pueyari Samaria jiyajinia quijia shiitianiyojua tiacajinia quiojoquiaari tii Jesu maquejara nojori pajenura. <sup>53</sup> Cuno Samaria pueya jaara niishiquiaari Jesuuri Jerusalén tiacajiniara quiariquiaa, majaari nojori paniniu quirii Jesu maquenura nojori tiacajinia. <sup>54</sup> Santiago, Juan niishishacari cuno Samaria pueyari nojori sooriquiaa, nojoriiri cunora Jesu nequesotaree:

—Jiyaniijianaa, ¿quiaate paniya canaa tininiuria mani jiyocuacaanuji, cuno pojori na catijianura, taa tariucuacaanu Pueyaso sequenu panishano caminiujunia Elías miiquiaaricuaani?

<sup>55</sup> Jesuuri nojoriicua tacateree. Nojori nacasureeri naa nojori saniitionu panishacari cuno Samaria pueya. Naa nojori sequereeri:

—Majaari nia niishiniu cana sohuanute naa nia niishiriojoteyani. Nia niishiri, majaari cua ninu quiquiaari mijiria cua puecoonura pueya. Saaja niquiaari cutaranijia, pueyacuaji cua tacunura.

<sup>56</sup> Na nuhuaji, nojoriiri tamonu shiitianiyojua tiacajinia quiojijaree tii maquenura.

*Tamasaca pueya quiniu panishacari Jesu pueyara juucua*

*(Mt 8.19-22)*

<sup>57</sup> Nojori quiojosacari nucuaco, tamonu pueyanoori Jesu sequequiaari:

—Jiyaniijianaa, quia pueyanora quiniu paniyanijia. Janiyacua quia tarajareni puetunu tiquiyocua quia rucuanijosacarijianaa.

<sup>58</sup> Jesuuri na riucuaaree:

—Quiojuapueeri na raaca jiitiaa cutara. Shuhuari na jesuhua jiitiaajuhujaj. ¿Saniniu-ujia Pueyaso Niyanuurijataj? Majaari cua jiitianu tama cua maquejarajaaja.

<sup>59</sup> Jesuuri tamonu pueyano sequeree:

—Cua nuhuajiniara quia quiri.

Nojuajaari saa sequereaja:

—Cuaara Jiyaniijianaa. Cua que cuaara cua niqiara shaajeerajaara. Janiya jaara na jamoreni, janiyacua na nuhuaji quiata rucuanejore cutarani.

<sup>60</sup> Jesuuri na riucuaaree:

—Naajaa, quia tarinitiare. Cua tojitiaashijiacaari juhua macunucua. Naaratej, cuno macunucua cuaara jamoora tama narta macujuaaja. Quia rucuanejore cutara Pueyaso rupaa quia pohuatanura.

<sup>61</sup> Na nuhuaji, tamonu pueyanoori Jesu sequeree:

—Jiyaniijianaa, janiya cutara quiata quianu paniyani. Coteenu cua tiajinia quiquiooraj, cua pueya cua niqiniuria cua nuhuajiria.

<sup>62</sup> Jesuuri miriqui na riucuaaree:

—Pueyano jaara na juyaca poonitijiya, jiya jiacataja na jayotanura na cuhuariquia na jeenucuanura, maja cumaati na nijiniara na niqiniuu. Na camaru jaara na nijiniara niquiri, sesa naaniutianiyari shuyorocotiuyocuara. Naajuhujaj, cua pueyano jaara na quiquiojinia tacatenu panijiohua quiri, nojuajaari maja maninia Pueyasora poonijiona.

## 10

*Jesu jiyaramiquishacari setenta y dos na pueyajinijinio, Pueyaso rupaa nojori pohuatanura*

<sup>1</sup> Nio nuhuaji, Jesuuri socua setenta y dos pueya saquiriojoquiaari, nojori puetanura nojuaja, puetunu Israel pueya tiacajinijianaa Pueyaso rupaa nojori pohuatanura. Jesuuri

nojori nuhuaji tii quianu paniriquiaajuhuj. Puetunu nojorijianaa jiyaramiquiriiri caapiqui, caapiqui. <sup>2</sup>Nojori nuhuajiria, Jesuuri nojori rootaree nio miriqui sequesano:

—Queraatia Pueyaso muerasuranoori quiya, juhua senoosocoriquiano. Saniniuujia, secaja na senoonaari quiya. Cunora, cuhuariquia camaru nia secojore, socua senoona na jiyaramiquiniuria puetunujuanaa na senoosaanura. <sup>3</sup>Nia quiojiyare pueyanaa. Nia niishiri, janiyari nia jiyaramiquiya juhua borrego niquiohuani puereeta sareya tajinia. Pueyaso paraari juhua puereeta sareya. <sup>4</sup>Nia quiojosacari, majaari nia caashoque nia patanu, nia cumaneeca quiquiojuhuaj, nia sapatunio. Majaari nucuaco nia tarishiniu pueya nia saruhuatasacari. <sup>5</sup>Tamonu tajinia nia tiuquishacari, coteenu nia saruhuatare na camaru nio sequesanta: “Juhujaniya nia quiri, nio tajinia quiniaanaa”. <sup>6</sup>Cuno tajinia quiniaa pueya jaara jiyanoojiaca quiri, naa nia sequesacari, Pueyasoori nojori miiniutianiya maninia. Nojori jaara juaajiaca quiri saniniuujia, Pueyasoori nojori shuquiritiyaquiniutianiya. <sup>7</sup>Tee nia masesaareni, cuno tajinia nia jiyojere. Nia miaquere, nia rature nojori niquitiosano niajaniya. Nia pohuatanuucua Pueyaso rupaa nojori niquiara, niajaniya cuaara niquitiosaaria nia panishano. Majaari tamasa tajinia nia pacunujunu tii nia miaquenura. <sup>8</sup>Nia tiuquijiosacari tamonu tiacajinia, pueyano jaara nia masuure na tajinia nia quiniuria, niocua niaara nojori rupojosano miaquere. Majaari na soonu. <sup>9</sup>Cusosuhua nia naatanijiore cuno tiacajinia. Pueya niquiara nia sequere: “Pueyasoori quiarjia nia jiyatenu paniya na muerasu nia quiniuria”. <sup>10</sup>Nia tiuquishacari tamonu tiacajinia, pueya jaara tii nia tojiniu paniyaquiri, niocua cuno tiaca nuucujinia naa nacare pueya niquiara: <sup>11</sup>“Nia tiacajinijinio jaaquiani, canaari canaa nioluacaacuaji na majiriutiaani. Cunoori nia niishiniuria, Pueyaso jaara nia saniitiore, majaari canaacia na tiutiasaanu quiniutianiya. Pueyasocuaari nia jiyanooni paniriquiaa juucua, na muerasu nia quiniuria”. <sup>12</sup>Seetanujuanaa nia sequenyajia pueyanaa, Pueyaso saniitionu juuca jaara quiri, cuno tiacajinia quiniaari socua jiyanoohua saniitiosaanutaniya Sodoma tiacajinia quiniaa pueyajiniji.

*Jesu piriyojosacari Pueyaso tojtiaashijiaca pueya  
(Mt 11.20-24)*

<sup>13</sup> ¡Corazín tiacajinia quiniaa pueyanaa, mariyata Betsaida tiacajinia quiniaa pueyanaa! Cua tojiri. ¡Niaari jiyanoohua saniitiosaanutaniya! ¡Niaari socua Pueyaso tojiyashijiaca quiya cuno tariucuacaanu Tiro tiacajinia quiniaa pueyajiniji, Sidón tiacajinia quiniaa pueyajinijinio! Cuno pueya jaara Pueyaso cumaacata miishano niquiquiaari, taa cua miiquianu nia tiacajiniacuaani, nojori maara ritia noojia tacatoquiaari cutara, sesa nojori miishanojiniji. Cuno tiacajinijinio pueya maara cocuaque toqueya cushiyonuuquiaari, nojori taraajesacari sesa nojori miiniuucua. Naajuhuj, nojori maara juaca niojoquiaari nojori nacaacia quera nojori macaashacari, sesa miijiaca nojori quiniuucua. <sup>14</sup>Niaa cutaraari cua cumaacata cua miijiosano niquijiaca. Naajaa, majaari nioojia nia tacatonu quiquianu Pueyasocua. Naaratej, Pueyaso saniitionu juucajinia, ¡niaari socua jiyanoohua saniitiosaanutaniya Tiro tiaca pueyajiniji, Sidón tiaca pueyajinijinio! <sup>15</sup>Niajanijiataj, Capernaum tiacajinia quiniaa pueyanaa, ¿niaateeri jiyaniya niaari jiyocuacaanu quiniaara jiyatesaanutaniya? ¡Maja! ¡Niaari puequeetuujuraama quejoosaanutaniya saniya!

<sup>16</sup> Cua pueyanaa, cante nia tojtiajacani, nojoriiri cua tojtiajacajuhuj. Naajuhuj, cante nia ruuretaa cua rupaa nia pohuatasacari, nojoriiri cua ruuretaajuhuj. Cante cua ruuretaani, nojoriiri cua Jiyarona ruuretaajuhuj.

*Jesu jiyaramiquishano setenta y dos pueya tiuquijiosacariuhua nocua*

<sup>17</sup> Jesu jiyaramiquishano setenta y dos pueyari Jesuucua tiuquijioquiaariuhua. Nojoriiri jiyanoohua shuquiriaatia quiriqiaa. Jesu sequetureeri:

—¡Jiyaniijianaa, samaruuari canaa tojtiaacanuni canaa tohuatanijiosacari nojori, canaa jiyaniquishacari quia sesa!

<sup>18</sup> Jesuuri nojori sequere:

—Taaquiririni. Janiyari Sesaaca niquiquianuni juhua niaco tiyano jiyocuacaanuji.  
<sup>19</sup> Janiyacuajaari cua cumaaca nia niquitioacanuni, juhuajaniya nia rucuanenura sacocua caco, turucuaniniu cacionio. Cua cumaacata, naari puetunu Sesaaca cumaacajanaa shocotanutaniya, juhuajaniya panaatia nia rucuanenonura, cua rupaa nia pohuatanura. Majaari quenaaja tamonu casaa miiniu quiniutianiya naquiya nijaniya. <sup>20</sup> Naajaa, majaari saaja shuquiriaatia nia quiniu samaruhua tojitianuucua nijaniya. Shuquiriaatia nia quiri cutara nia sesaca naajiotasano quishacari jiyocuacaanu, Pueyaso muerasu sesaca naajiotasaqui.

*Jesu shuquirishacari*

(Mt 11.25-27; 13.16-17)

<sup>21</sup> Jiyacaritij, Pueyaso Sohuanuuri Jesu shuquiritirii jiyanoehua. Cunora, Jesuuri na Que Pueyaso sequeree:

—¡Quia shuquiritiaanijia cua Quena! ¡Quiaacuajaari Jiyaniijajanaa quiya jiyocuaacaanu, mijiriano! ¡Quiaari maninia miirii! Cua pueyari juhua naatujoori, maja puera niishijia. Naajaa, quiaari quiarijia nojori niishitirii quia niishishano, quia jamosano mijiria niishijiaacuaji. Jaa, cua Quena, quiaacuajaari naa nojori panitiaja.

<sup>22</sup> Cua Queeri tari cua niquitioquiaari puetunu na jiitiasanojuanaa, Jiyaniijiarano cua quishacari. Majaari tamonu niishiniu quenaaja cante Pueyaso Niyanuni, saaja cua Que cutaraari cua niishiya. Naajuhuj, majaari tamonu niishiniu cutara cante cua Queni. Saaja janiya cutaraari na niishiyani. Naajuhuj, noo pueyari na niishiya, canapue cua niishitiniu paniya cua Quecuajani.

<sup>23</sup> Na nuhuaji, Jesuuri na pueyacuatacaterree. Saaja nojori sequereeri:

—Shuquiriaatia quijia cutaraari nijaniya, nia niquiniuucua puetunu nia niquishanojuanaa nia rupenuucua janiya. <sup>24</sup> Seetanujuanaa nia sequeyanijia, queraatia tariucuaacaanu Pueyaso sequesano caminiujunaa pueya, mariyata jiyaca jiyaniijianucuanio, nojoriiri nia niquishano niquiniuucua jiaatiaquiaari juucua. Majaari na niquitiuniu quiquiaari. Nojoriiri cuata nia quishacari nia tojishano tojitianuucua jiaatiaquiaari juucujuhuj. Majaari na tojitiuniu quiquiaari.

*Samaria jiyajinijinio maninia miijajiniji pohuatasano*

<sup>25</sup> Na nuhuaji, Moisés Rootasanojiniji niishitiojona pueyanoori Jesuucua niquiaari nata na pocoojonura. Jesu na pocuatenura sesa juucua, naa na nequesotareeri:

—Niishitiojonanaa, ¿taa cua miiniutianiya pueyaracaanu rishijia cua quiniuriani?

<sup>26</sup> Jesuuri na riucuarree:

—¿Taate Moisés Rootasanojinia naajiotasani? ¿Taa quia niishiriojoquiaani, quiaa jaara na serojoquiaa?

<sup>27</sup> Moisés Rootasanojiniji niishitiojonaari Jesu riucuarree:

—Naa sequeyano:

“Quia Jiyaniijia Pueyaso quia paniri puetunu quioojatajanaa, puetunu quia sohuanutajanaa, puetunu quia cumaacatajanaa, puetunu quia niishitijatajanaanio. Naa juhuaj, quarta pueyano quia paniri taa quia paniyacuaa tama quia cuaqueyajajani”.

<sup>28</sup> Jesuuri na sequeree:

—Quiaacuajaari maninia riucuarree. Naa quia miishacaritij, quiaari pueyaracaanu rishijia quiniutianiya.

<sup>29</sup> Moisés Rootasanojiniji niishitiojonaari tama nocuaji tacunu paniriquiaajaaja, maninia quijia na quiniuria Pueyaso niquiara. Naaratej, naa nequesotarohua Jesuuri:

—¿Canteeri cuarta pueyanoni?

<sup>30</sup> Jesuuri nio pohuatasano na pohuataree na niishitiojonura nojuaja. Naa coteereeri:

—Tamonu parta Judio pueyanoori Jericó tiacajiniara quiariquiaa juucua, Jerusalén tiacajiniji. Nohuasenuujuaca pueyari na quiaree. Puetunu na jiitiasanojuanaa na jaariuutiatuereeri, na cushishano toquenio. Na piquitiuriiri. Quera macu na tiujiatuqueeri. <sup>31</sup> Na nuhuaji, pueyacuara secojonaari cuno nucuaco quiariquiaajaacuhuj. Na niquishacari

piquishano narta Judio pueyano mataano nuu shuriuquiocora, na shocortamaa saajaari.<sup>32</sup> Na nuhuaji, Levita pueyanoori cuno nucuaco quiariquiaajuhuj. Na niquishacari narta Judio piquishano pueyano, nojuajaari saaja na shocortamaajuhuj.<sup>33</sup> Na nuhuaji, Samaria jiyajinijinio tahueri cuno nucuaco quiariquiaajuhuj. Na niquishacari parta Judio pueyano mataano, Samaria jiyajinijinio tahueri nocua taraajeree.<sup>34</sup> Na cacataseeri. Nohuasenuujuaca piquiyashiquia matejoree shiyocuataari, vinotanio. Na nuhuaji, na piquiyashiquia morojoreeri. Na nuhuaji, na niataree tama na seru nijiniajaarijia. Ritia na jiyataaree rucoojuaca tiuquijiojua tiajiniaari. Cuniqui na cojuatareeri.<sup>35</sup> Tariqui, cuno tahue quianu panishacariuhua, nojuajaari caapiqui cumaneeca pueraree. Ruconaa tia camaru na niquitioreeri. Na sequereeri: “Cucua quia jiyanoori. Nio pueyano quia cojuatare quiria. Quiaa jaara socua quia cumaneeca nocua puecare, janiyacua saniniuujia quia niquitioruhanijia cua tacatesacariuhua”.

<sup>36</sup> Nio pohuatanu nuhuaji, Jesuuri cuno pueyano nequesotaree:

—Quiarijiani, ¿taa quia sequeyani? Cuno jiuujianaraca ruconaa pueyajinijinioni, ¿teyano cuno pojorijinijiniote narta pueyanoocua taraajeja cutarani?

<sup>37</sup> Moisés Rootasanojiniji niishitiojona pueyanoori Jesu riucuaaree:

—Cuno Samaria jiyajinijinio tahuecuajani, nocua taraajequiaarini.

Jesuuri na sequeree:

—Taaquiririnij. Quia quiaarohua. Naa pueyacua taraajeja quia quirijiuhuj, taa cuno tahue taraajequiaaricuaani.

#### *Jesu quishacari Marta, María tiajinia*

<sup>38</sup> Socua na rucuanesacari, Jesuuri tamonu tiacajinia tiuquiquiaari na pueyata. Cuno tiacajinia na quishacari, tamonu maajiiri na masuuquiaari. Naaratej, na tiajinia na tiuquinitiareeri. Cuno maaji sesa quiquiaari Marta.<sup>39</sup> Martaari tarajanu jiitiaja. Na sesaari quiquiaari María. Maríari Jesu niohuaca shuriuquiumia cajiriquiaa, na tojiniuria Jesu pohuatasano.<sup>40</sup> Marta cutaraari poonijioriquiaa queraatia na miishocoriquiano na jiitiasacari. Cunora, Martaari Jesuucua catecanoree. Na sequereeri:

—Jiyaniijianaa, ¿majate cucua quia taraajenu? Cua tarajanuuri cua tarinitiaquee niquiriyatujua, puetunu nio poonijiosanotajanaa. ¿Quia sequere na naacutanura janiya!

<sup>41</sup> Jesuuri saaja na sequeree:

—Martanaa, quioojia quia cajitiri sanaunaa. Quiaari puera quia miishano tacaatiaa.

<sup>42</sup> Saaja niquiriyatu casaa cutaraari jiyanohua panishano. María cutaraari cuno socua panishano casaa saquiriojoree. Tamonuuri maja na naata na tojishano jaariutianu noojiajiniji.

## 11

#### *Jesu niishitiojosacari na pueya nojori secojonura Pueyaso*

(Mt 6.9-15; 7.7-11)

<sup>1</sup> Tamacari, Jesuuri Pueyaso secojoriquiaa tamaqui. Na puecasacari secojonu, tamonu na pueyajinijinioori na sequeree:

—Jiyaniijianaa, canaa quia niishitiojore canaa secojonura Pueyaso, taa Tiuquinijiona Juan niishitiojoquiaari na pueyacuaani.

<sup>2</sup> Jesuuri nojori sequeree:

—Pueyaso nia secojosacari, naa nia sequere:

“Jiyocuacaanu quijia canaa Quenaa, puetunu pueyajanaa cuaara niishiiria quiaari tojearucuaajanaa sesa miyashijia. Pueya cuaara seetanujuanaa quia jiyateera nojori jiyaniijia quia quiniuria. Quia panishano cuaara miishiiria mijiria, taa jiyocuacaanu miishiyacuaani.<sup>3</sup> Canaa quia niquitioriquia canaa miaquesocoriquiano canaa panishano puetunu juucajanaa.<sup>4</sup> Canaa quia jiyanoori sesa canaa miishanojiniji, taa canaa jiyanooquiaacuaa sesa canaa miiniaani. Naajuhuj, canaa quia cojuare, maja sesa canaa miitishaanura”.

<sup>5</sup> Jesuuri naa sequereejuhuj, socua nojori na niishitiojonura:

—Niaa jaara nia rupuenaacua quiaare shiyaqueya, casaa nia masenura nojuajiniji, ¿nojuajatucua taa quia sequereni?, quiaa jaara na sequere: “Cua rupuenanaa, cua niquitiore jiuujianaraca pan. <sup>6</sup>Tamonu cua cojiniaari shusha tiuquiriohua tucuaaanuji, miaajeyari. Shaaquiri cua sumatuu cua miaquetesocoriquiano nojuaja”. <sup>7</sup> ¿Quiaatucua taa miirini quia rupuena jaara na tiajiniaacumaji quia riuquare?: “Maja cua taajetenu. Cua tia tiotiu tioree tarinijia. Tari cua mueya mataa maquetujinianijia. Maja cua naata sanenu cua niqutionura quia panishano”. <sup>8</sup> Jaara naa sequeretej, niaa jaara na tia tiotiu piquiniu tarinitiaaquiri, janiyari seetanujuanaa nia sequeyani, nojuajaari sanenutaniya na niqutionura niajaniya puetunu nia panishanojuanaa. Majaari na sanenu quiniutianiya saaja nia rupuena na quiniucua. Sanenutaniyari pueyaracaanu taajeta nia piquishacari na tia tiotiu. <sup>9</sup> Naajuhuj, maja nia tarinitianu Pueyaso nia secojonu. Nojuajaari nia panishano nia niqutionutaniya. Cunora, nia panishano nia pajeriquia. Niocua na riuriatare. Tiotiu nia piquiriquia. Niaara riatasaanutaniyari. <sup>10</sup> Naaratej, cante Pueyaso secojoquiaani, nojuajaari na panishano masenutaniya. Cante na pajejani, na panishano riuriatanutaniyari. Cante tiotiu piquiquiaani, nera riatasaanutaniyari.

<sup>11</sup> ¿Niaatucua nia niyanu niquitiore saajia, neecaruu na masesacari niajaniya? Maja. ¿Niaatucua soconu niquitiore nia niyanu, sapitiaaja na masesacari niajaniya? Maja. <sup>12</sup> ¿Niaatucua turucuaniiinu niquitiore nia niyanu, caacaraja riuriuquiu na masesacari niajaniya? Maja. <sup>13</sup> Puetunu niajanijajanaari sesa miiniu niishijiaca. Naajaa, niaari maninia casaa niqutionu niishiya nia niquiohua. ¿Taatucuaa socua jiyocuacaanu Quijia nia Que Pueyasoni, tojetaarucujanaa sesa miyashijiani? Seetanujuanaa capora na quishacari, nojuacuajaari na Sohuanu niqutionu niishijia na muerasu, canapuate na masequiaacujani.

*Pueya sequesacari Jesu, samaru cumaacaracana*  
(Mt 12.22-30; Mr 3.20-27)

<sup>14</sup> Tamacari, Jesuuri samaru tohuataniriquiaa tamonu pueyanojiniji. Cuno pueyanoori tiquia quiquiaari samaru na jiitiasacari. Samaru jaara tohuataquiaari cuno pueyanojiniji, pocujara quiriohuari. Pueya niquishacari naatej, nocuaji jiuujiatereeri. <sup>15</sup> Tamasaca pueyari saa sequequiaarijia:

—Cuno pueyanoori samaruhua tohuatanijija samaruhua jiyaniijia Satanás cumaacata.

<sup>16</sup> Tamasaca pueyari Jesu saniniujiuniu paniriquiaa. Naaratej, nojoriiri na sequeturee na cumaacata na miiniuria casaa, na niqitiniuria nojori, nojori niishiniuria nojuajaari seetanujuanaa Pueyasojinijinio. <sup>17</sup> Jesuuri nojori niishiriojosano niishiriquiaa. Nocuaji nojori sequereeri:

—Tamonu jiyajinia, cuno pueya jaara miaqueetoojija tama nojori pueyataajaaja, nojoriiri maja na naata na paraa nujuatanu, na paraa jaara nocua tiuquitiare raquiritiano nojori quishacari. Naajuhuj, niquiriyatu tiajinia quiniaa jaara tama nojorijiaaja juayonuujutaquiaa, nojoriiri maja na naata jatiqui quiniu. <sup>18</sup> Naajuhuj, niaari cua sequeriquiaa, janiyana samaruhua tohuatanijija Satanás cumaacatani. Jaara naa quiritij, ¿Satanástucua taa pueyaracaanu quiri jiyaniijiani, nojuaja jaara tama na samaruhuaajaaja tohuatanijija tama na cumaacatajaaja? <sup>19</sup> Naajuhuj, janiya jaara samaruhua tohuatanijija Satanás cumaacatani, taa nia sequeyacuajani, ¿nia niishitiojosano pueyariuhuj, cana cumaacata nojori tohuatanijioquiaa samaruhuanu? ¿Taa nia sequeyani? ¿Satanás cumaacataate? Majaruhua. Naacuajitij, tama niajanijajaaja nia niishiri, niaari jiyajeneya. <sup>20</sup> Naa Pueyaso cumaacata cua tohuatanijosacari samaruhuatej, naacuajiti nia niishiri, Pueyasoori tari nia masuya seetanujuanaa na muerasu nia quiniuria.

<sup>21</sup> Niojinia nia niishiriojorejuhuaj: cumueeca pueyano jaara na tia cojuua queraatia na miaquejetaja casaata, majaari tamonu naata na jiitiasano casami jaariuutianu. <sup>22</sup> Saniniuuja, socua cumueeca pueyano jaara nocua tiuquiri, na miaquejetaja casaa jaariuutiaari, cuno, nocua na tiuushano juucuanu. Na nuhuaji, na jaariuutiasano casami paari, na pueya na serotasocoriquiano. Naajuhuj, janiyari Satanás jiitiasano jaariuutiajani.



<sup>23</sup> 'Cante cua jiyano quiyaquiyani, nojuajaari cua paraca. Cante cua naacutaquiya pueya rerecojonura Pueyasorani, nojoriiri saaja pueya cocuataa Pueyasocuaaji. Naaratej, jacaria nia niishiriojore casaa nia niishiriojiya janiyajinijini.

*Samaruhuari riujiuujia na quiqiojiniohua*

(Mt 12.43-45)

<sup>24</sup> 'Samaru jaara tohuatare pueyanojiniji, joojuashiquio rucuaneyiyari na samaatejara na pajenura. Jaara na riuriataaquiri, niishiriojiyari: "Cua quiqiojinia riujiuyarohuaraqui teje cua tohuatacanucujani". <sup>25</sup> Samaru tiuquishacariuhua cuno pueyanocua, na riuriatasuhuari shaaco, juhua maninia netoonujusano tia, maninia jeenucuasanojuhuaj. <sup>26</sup> Naaratej, cuno samaruuri socua sesa miijiaca nojuajiniji siete narta samaruhua riquiohua nata na quiniuria. Puetunu nojorijianaari cuno pueyanojinia tiuquitiasuhua. Naacuajitij, cuno pueyanoori socua sesara jiyacateja, tarijia na quiniujiniji.

*Seetanujuanaa shuquiriaatia quiniu cutara*

<sup>27</sup> Jesu pohuatasacari nio, tamonu maajiiri jiyacari pueya tajiniji naa nacaree:

—jShuquiriaatia quijia cutaraari cuno maaji cante quia raquiaarini, cante quia canashitiquiaarini!

<sup>28</sup> Jesuuri saaja na riucaree:

—Socua shuquiriaatia quijia saniya sajara cante Pueyaso rupaa tojjiani, cante Pueyaso panishano miiquiaajaaniuhuj.

*Sesa pueyari saaja Pueyaso cumaacata miishano niqiniu panijiaca*

(Mt 12.38-42; Mr 8.12)

<sup>29</sup> Socua queraatia pueyari Jesuucua rerejoriquiaa puetunu na shocuaqueyjanaa. Jesuuri juhuacatecara naa pohuataree nojori niqiuara:

—Nio pa quishacari pueyari sesa miijiaca. Nojoriiri cua sequequiaa, jiyajeneta casaa cua miiniuria Pueyaso cumaacata, nojori niishiniuria janiyari Pueyaso Jiyarosanoni. Seetanujuanaa majaari socua cua niqitiniu quiniutianiya nojori, cua cumaacata cua miishano. Nojoriiri saaja niqiniutianiya cutara taa cua miishaanutaniyani, naatej taa supuetana Jonás miishaaquiaaricuaani. <sup>30</sup> Jonás miishaanuuri nocuaji jiuujiate-sano quiquiaari cutara. Naacuajitij, Nínive tiacajinia quiniaa pueyari niishiquiaari Jonásri Pueyaso jiyarosano quiquiaari. Janiyari naa miishaanutaniyajaaniuhuj, nio pa quishacari pueya niishiniuria janiyari Pueyaso Jiyarosanoni. <sup>31</sup> Cua supuetana Salomón jaara Israel pueya jiyaniijia quiquiaari, jiyacari tamonu maajiiri pananu shuucuaaji jiyajinia jiyaniijia quiquiaari. Nojuajaari jiyanohua tucuaaanuji niqiuari narta jiyaniijia Salomón tojinuuucua, jiyanohua niishijia Salomón quishacari. Jiya puequesacari Pueyaso saniniujiushacari pueya, cuno maajiiri jiyacari sanenutaniya nio pa quishacari pueyacuara na tonujunura, nojori ruuretanuucua socua Niishijijanaa cutara Salomónjiniji. Cuno Niishijiaari niya nia tajinia quiyacuaja. Janiyacuajaari nojuajani. <sup>32</sup> Naajuhuj, cuno tariucuacaanu Nínive tiacajinia quiniaa pueyari saneecuatunutaniya Pueyaso nequesoreesacari nio pa quishacari pueya. Nojoriiri nio pa quishacari pueyacuara tonujunutaniyajuhuj, nojori tacatoyaquiniuucua nojori jiuujia sesa nojori miishanojiniji, Pueyaso rupaa nojori tojiyaquiniuucua. Nínive pueya cutaraari noojia tacatoquiaari sesa nojori miishanojiniji, Pueyaso sequenu panishano caminiujiunia Jonás jaara Pueyaso rupaa pohuataquiaari nojori niqiuara. Pueyaso sequenu panishano caminiujiunia quiarjia nia tajinia quiyani, nojuajaari socua cutara Jonásjiniji. Janiyacuajaari nojuajani.

*Pueya jiuujia cuhuatanajiniji pohuatasano*

(Mt 5.15; 6.22-23)

<sup>33</sup> 'Pueya jaara samaritiu noshitiri, majaari na jamotanu. Majaari na niatanu conatu cariquiaco. Maninia cutaraari jiyocuacaanu na morotanu, tiaco tiuquitianaa cuhuatariquiano. <sup>34</sup> Pa namijiaari juhua pa cuaqueya cuhuatanajuhuj. Naacuajitij, paa jaara Pueyaso casaacua jiaatiaja quirini, paari cuhuashiqui quiya puetunujanaani.

Saniniuujia, pa namijia jaara sesa casa niquiniuucua jiaatiaja quiri, paari ninishiqui quiya puetunujuanaani. <sup>35</sup> Tama nia cuaqueyajaaja nia cojuare, niaa mariqui nioojia cuhuatana maquishajareeri. <sup>36</sup> Niaa jaara puetunujuanaa juhua cuhuashiqui quiya, sesa casaacua jiaatiaashijia nia quishacari, niocua maninia niquijia quiri puetunujuanaa, juhua samaritiu cuhuatasacari nijaniya. Naacuajitij, niocua niishijia quiri, maninia miiijia nia quiniuria.

*Jesu nacasusacari Fariseocuaca, Moisés Rootasanojiniji niishitiojonaanio*

*(Mt 23.1-36; Mr 12.38-40; Lc 20.45-47)*

<sup>37</sup> Jesu puecasacari pocuanu, tamonu Fariseo pueyanoori na masuuquiaari na tiajinia na miaquenura. Jesuuri na tiajinia quiaquiaari. Na tiuquishacari, miaquejajinia cajishiiijianaari. <sup>38</sup> Fariseo pueyanoori jiuujiatequiaari na niquishacari Jesuuri shuquitioo tari cajiriquiaa miaquenura. Judiocuacaari jiyanjia, nojori rucojosacari tamasaca pueya tajinia, tamasaca sesa miishanoori na naata nojoriicua pacunu. Nocuaji nojoriiri shuquitianu niishijia, tiajinia nojori tiuquishacariuhua. <sup>39</sup> Naa cuno Fariseo pueyano niishiriojosacaritij, Jesuuri saa na sequerejaa:

—Nijaniya Fariseocuacanaa, niaari juhua noo pueya, canapue te saaja na ratujua cuaqueya jeequejoquiaacuajani, saaja na miacajua cuaqueyano. Majaari na jiniacuma na jeequenu. Niaari naajuhuj. Niaari sapuenu maninia pueya niquishano. Saniniuujia nioojiacaari jiyanoohua sesa quiya, casami nia masejonuucua nia nohuasejonuta, puetunu sesa nia miiniutiajanaajuhuj. <sup>40</sup> Mosanucanaa, ¿niaateeri niishiyaquiya, pa cuaqueya Shipininaari poojia shipiniquiaarijiuhuj? Naaratej, nioojia nia jeequere cutara, maja saaja nia cuaqueya. <sup>41</sup> Naa jaara puetunu nioojiajinia nia jiiitasanojuanaa jiyatere Pueyasora na quiniuria, niaa maara juhua jeequesano quiri puetunujuanaa.

<sup>42</sup> ¡Niaari taraatia miishaariquiano, Fariseocuacanaa! Niaari miaquesano jaamasucua serojoquiaa jacaria diez jaamasucua, puetunu cien jaamasucua jinijiojuanaa, Pueyasora nia niquitiosocoriquiano. Cuno jaamasucuaari culantro, menta, socua tamonu jaamasucuaniojuanio. Niaari naa maninia miiquiaa taa Moisés niishitiojoquiaaricujani. Naajaa, Moisésri niishitiojoquiaarijiuhua maninia pa miiniuria parta pueya, Pueyaso pa paniniuriajuhuaj. Majaari cuno na sequesano nia miiniu quiquiaa. Puetunu na sequesanojuanaa tojijia nia quiri. Majaari saaja jaamasucua niquitiojojuaca nia quiniu.

<sup>43</sup> ¡Niaari taraatia miishaariquiano, Fariseocuacanaa! Niaari jiyaniijianucua shurucua cajiniuucua jiaatiaquiaa, Pueyaso secojua tiajinia nia quishacari, juhua cutara pueya nia quiniuria pueya niquiara. Naajuhuj, niaari pueya paniquiaa nojori saruhutanura nijaniya juhua jiyaniijianucua, nia rucuanijosacari tiacajinia.

<sup>44</sup> ¡Niaari taraatia miishaariquiano! Niaacuajaari juhua niquishoo jamaca. Pueyari juhuajaniya na caco rucoquiaa na niishiyaquishacari. Naajuhuj, pueyari juhuajaniya nia rupuequiaa, nojori niishiyaquishacari nioojaari jiyanoohua sesa, juhua pueyano mocua jamajinia.

<sup>45</sup> Jiyacaritij, tamonu Moisés Rootasanojiniji niishitiojonaari Jesu sequeree:

—¡Niishitiojonanaa, naa quia sequesacari Fariseocuatej, quiaari canaa sequeyajujuaj!

<sup>46</sup> Jesuuri na riucuarree:

—Taaquiririnij. ¡Niaari taraatia miishaariquianojuhuaj, Moisés Rootasanojiniji niishitiojonaanaa! Puetunu nia rootasanojuanaari juhua jiyanoohua niiquia casaa nitiasocoriquiano. Majaari nia tojitiajaca pueya nia naacunu quiquiaa quenaaja nia juaashiquia sacasaruta, cuno niiquia casaa nitiasaanura. Naacuajitij, pueyari maja na naata rejeretanu nia niishitiojosano.

<sup>47</sup> ¡Niaari taraatia miishaariquiano! Niaari macunucua niojotajara shipinijioquiaa shanohuara, tariucuaaanu pueyara Pueyaso sequesano caminiujiunaa nucuhuacuaji, teyano nia supuetanaa puecoquiaaricujani. <sup>48</sup> Naacuajitij, canaari niishiyani, niaari nia supuetanaa miishano shuquiritiaa, nia cojuasacari nojori puecoosano nucuhua.

<sup>49</sup> Naacuajitij, Pueyasoori na niishiniutia sequequiaari:

“Janiyari cua sequenu panishano caminiujiuniaa jiyaramiquiniutianiya Israel pueyacuani, cua rupaa niishitiojonaanio. Israel pueyari noojiaqueya puecoonutaniya. Tamasacaari naquiya miishaanutaniyajuhujaj”.

<sup>50</sup> Cunora, Pueyasoori nio pa quishacari pueya naminiutianiya puetunu na sequenu panishano caminiujiuniaa nanacaacuajanaa, canapuate nio jiya coteejajiniji puecoosaaquiaaricujani. <sup>51</sup> Coteenujanaa mosaaquiaariiri Abel. Na nuhuaji, queraatia Pueyaso sequesano caminiujiuniaari puecoosaaquiaari. Na nuhuaji, Zacaríasri socua jaatesaaquiaari monujuhujaj. Nia supuetanaari na moquiaari Pueyaso Secojoua tiajinia, Pueyaso Shuriucua Quiquio tacoji, Pueyasooacara catijiasaqui shuriucua. Seetanujanaa nia sequeyanijia, nio pa quishacari pueyari namishaanutaniya puetunu nojori puecoosaanuucujanaa.

<sup>52</sup> ;Niaari taraatia miishaariquiano, Moisés Rootasanojiniji niishitiojonaanaa! Niaari najuhuaana Pueyaso Rupaa jiitiaa. Majaari nia tojiniu paniniu, Pueyaso jiyanooshano pueya nia quiniuria. Saniniuujia, tamasa jaara Pueyaso Rupaa niishiniu paniri, Pueyaso muerasu nojori quiniuria, majaari nojori nia niishitiojonu paniniu quiquiaa.

<sup>53</sup> Jesu jaara nio sequequiaari, Moisés Rootasanojiniji niishitiojonaa, mariyata Fariseocuacaari jyanohua juaaquioree. Jyanohua nojori juaaquiiosacari, nojoriiri Jesu nequesoreenu coteeree queraatia. Nojoriiri Jesu pocuatenu paniriquiaa sesa juucua.

<sup>54</sup> Nojoriiri nocuara tonujunu paniriquiaa juucua, jaara sesa quiri na sequesano.

## 12

### *Jesu niishitiojosano, maja sapuenu maninia pueyano niquishano pa quiniuria*

<sup>1</sup> Jiyacaritij, jyanohua jyanohua queraatia pueyari Jesuucua rerejoree. Tama nojoriijia rapijiotooriquiaa puera nojori rerequeejosacari. Jiyacaritij, Jesuuri saa na pueyaja sequenu coteeree. Naa nojori sequereeri:

—Tama nia cuaqueyajaaja nia cojuare Fariseocuaca pan poreetajaacuaji. Nojori niishitiojosanoori juhua pan poreetaja. Majaari na jataniniu pueya, sesa nojori miiniujiniji. Nojoriiri sapuenu maninia miijiaca pueya niquishano tamasa niquiara. Saniniuujia, nojori jiuujiaari saa sesaja pueyaracaanu. <sup>2</sup> Nia niishiri, puetunu jiyasohuaja miishanojuanaari niishishaanutaniya. Puetunu jamosano casaajanaari niquishaanutaniyajuhujaj. <sup>3</sup> Puetunu nia sequesanojuanaa ninishiquini, cuhuashiqui caminiujiushaanutaniyari. Naajuhujaj, nia sasacojosano tama nia sohuacamaraajaajani, cunoori jiyocuacaanu tia nijiniji nacatasaanutaniya puetunu pueya tojishocoriquianojuanaa.

### *Cante puereshiya cutarani*

*(Mt 10.26-31)*

<sup>4</sup> 'Cua rupuentaanaa, majaari nia puerenu canapuate nareja pa cuaqueya mojuani. Nojoriiri maja na naata socua sesa na miiniu pajaniya, paa jaara tariucua macu quiyani.

<sup>5</sup> Seetanujanaa nia sequereeraj, cante puereshiya cutarani. Noo nia puerere cutara, cante cumaacaraca cutara na jatanura nijaniya mani quiquiojiniani, na cusojuanu nuhuaji nijaniya. Saaja nojuaja nia puerere cutara.

<sup>6</sup> 'Cinco shuhuari saaja caapiqui cumaneecaniyojuata masesano. Pueyara, cunoori najuhuanaj. Naajaa, majaari Pueyaso niyajetanu cuno shuhua jaara puecoosaare. Nojuajaari na niishiya cutara. <sup>7</sup> Naajuhujaj, nia miesuuri puetunu serojosanojuanaa. Pueyasoori na niishiya. Naaratej, maja nia puerenu. Niaari socua jyanohua Pueyaso panishano cutara queraatia na cojuasano shuhujajiniji.

### *Tamasaca niquiara pa sequere paari Jesucristo pueyani*

*(Mt 10.32-33; 12.32; 10.19-20)*

<sup>8</sup> 'Cua tojitiare. Cante tamasa niquiara sequejani: “Janiya Jesucristo pueyanoni”, naajuhujaj, janiyari cua Que Pueyaso seya niquiara sequenutaniyani: “Nojuaja cua pueyano”. <sup>9</sup> Cante saniniuujia tamasa pueya niquiara seetaa janiyajinijini, cua pueyano na quishacarini, janiyari cua Que Pueyaso seya niquiara na tamacanutaniyajuhujaj.

<sup>10</sup> Cante cua sesacareeni, nojuaja na naata jiyanooshaanu. Saniniuujia, maja cutaraari na naata jiyanooshaanu cante Pueyaso Sohuanu sesacareeni.

<sup>11</sup> Cua muerasu nia quiniuucua, niaari Pueyaso secojojua tijiniaqueya jiyatasaanutaniya, nequesoreenaa niqiuara, mijiria jiyaniijianucua niqiuarani. Nojori nequesoresacari nijaniya, majaari nia niishiriojonu taa nia riucuanutaniyanoj, casaa nia sequenutaniyajaaniuhuj. <sup>12</sup> Nia riucuanu panishacari, Pueyaso Sohuanuuri jiyacari nia niishitiojonutaniya taa nojori nia riucuanutaniyani.

*Puereetaari casamiriaca pa quishacari*

<sup>13</sup> Tamonu pueyanoori pueya tajiniji naa Jesu sequequiaari:

—Niishitiojonanaa, cua tarajanu quia sequere na niqutionura janiya canaa shipininio jiitiasanojiniji, taa canaa shipininio sequequiaari canacuajani, saminio na quishacarijia.

<sup>14</sup> Jesuuri saaja na riucuaaree:

—Pueyanonaa, ¿janiyateeri pueya nequesoreenara jiyatesaaquiaarini, cua serotanura nijaniya nia shipininio casamini?

<sup>15</sup> Jesuuri naa nojori sequequiaarijuhuaj:

—Jiyanohua nia cojuare tama nia cuaqueyajaaja, maja casamiicua jiaatiajaca nia quiniuria. Pa naata shuquiriaatia quiniu casamiiju. Queraatia casamiiri maja na naata seetanujuanaa shuquiriaatia quijiacara na jiyatenu pajaniya.

<sup>16</sup> Na nuhuaji, Jesuuri pueya niishitioree nio miriqui pohuatasanota. Naa sequereeri:

—Tamonu pueyanoori quiquiaari, jiyanohua casamiriaca. Na cuhuariquiajinia na natoosanoori jiyanohua muetuquiaari. Naacuajitij, queraatia miaquesocoriquiano jiitiaquiaariiri na cuhuariquiajiniji na carojotasano. <sup>17</sup> Tama sequereearijia: “¿Taa cua miiniutianiyani? Cua tiajosano cua racatajara cua carojotasanoori puetunujuanaa tari mishaja quia. ¿Tee cua racatanutaniya shusha cua carojotasanoorinitioj? <sup>18</sup> ¡Jaj, niishiquiinijia! Coteenu cua tiajosano cua casamiicua niyaroorohuaraqij. Janiyari socua puereetucocua tiajonutaniyani. Janiyari cuniqui mishinijionutaniya puetunu cua carojotasano cua cuhuariquiajinijinojuanaani, puetunu cua jiitiasano casamijianaanio.

<sup>19</sup> Na nuhuaji, janiyari tama cua cuaqueyajaaja sequenutaniyani: ‘Pueyanonaa, quiarijia cutara juhuajaniya quia quiri. Quiaari queraatia casamiriacacuaja, queraatia marijara. Quiaari queraatia quia miaquesocoriquiano jiitiaacuaja. Quiarijia cutara quia samaatere. Quia miaquere. Quia rature. Tama quia cuaqueyajaaja quia shuquiritiri’”. <sup>20</sup> Cuno niucua, Pueyasoori na sequequiaari: “Moseecanaa, quiaari quiarijia macu juhuaquenu-taniya. ¿Canteeri puetunu quia jamuesano casamijianaa jiitianutaniya quia nuhuajini? ¿Canra na quiniutianiyarini?” <sup>21</sup> Naa miishaanutaniyari puetunu pueyajanaa, cante saaja tama nerajaaja reratequiaa casamini. Cuno, jamuejaca casamiriaca pueyani, nojoriiri seetanujuanaa casamiijiuniucua Pueyasora.

*Pueyasoori na muerasu cojuaja maninia*

(Mt 6.25-34)

<sup>22</sup> Na nuhuaji, Jesuuri na saquiriojosano pueya sequequiaari:

—Naaratej nia sequeyanijia pueyanaa, majaari nia tacaaniu casaa nia miaquenu-taniyani, casaa nia cushiniutianiyani. <sup>23</sup> Pueyaso jaara pa shipiniquiaari saminio pa quiniuria, majaari jiyajeneta nera na rishitiniuria pajaniyajuhuj. Naajaariuhuj, nojuaja jaara pa cuaqueya shipiniquiaari, majaari jiyajeneta na cushitiniuria pajaniyajuhuj. <sup>24</sup> Riquiacujua nia niqiriqia. Majaari nojori natoojonu. Majaari nojori carojotanu na racatasocoriquiano, na nuhuaji na miojosocoriquiano. Naajuhuj, majaari nojori jiitianu na miojosano na racataja. Majaari tiaca nojori jiitianu na carojotasano nojori racatajarajuhuj. Naajaa, Pueyasoori nojori miojotequiaa. Naa cutaraari socua jiyanohua Pueyaso panishano cuno riquiacuhujini. <sup>25</sup> Naajuhuj, nia nequesotaanijia, niaa jaara socua tamonu juucara rishiniu paniriquia quera nia shaajenu panishacari, ¿nia naatateeri socua rishiniu, jiyanohua nia tacaaniutia? Maja nia naata. <sup>26</sup> Naaratej, nia tacaaniu jaara najuhuaa quia socua shiitaniyojua nia rishiniuria, ¿niaatucua casaara tacaari tamonu casaacuan?

<sup>27</sup> 'Natau shuucuaca nia niquishurij, taa nojori corequetaani. Majaari nojori poonijonu. Majaari na cusupuenunujuhuj. Supuetana jiyaniijia Salomónri jiyanoehua shanohua toqueyaraca quiquiaari. Cuno jiyanoehua shanohua niquishano na cushishano toqueni, naajaa, majaari na shocotanu cuno natau shuucuaca. <sup>28</sup> Pueyasoori cuno natau shuucuaca shipiniquiaari rupaquijia naa shanohua niquishocoriquianotej. Jaara sorere, tariqui catijiashiya saniniuurijia pan majeetetajara. Pueyaso jaara naa maniniushi-tiyacuaa shuucuacatej, ¿majateeri na naata cushitiniu nijaniyajuhuj, jatarinitiaja Pueyasocua tiujujacanaa? <sup>29</sup> Naaratej, nia sequeyanijia, maja nia tacaaniutia nia pajenu casaa nia miaquenutaniyani, casaa nia ratunutaniyani. <sup>30</sup> Pueyaso niishiyashijia pueyari pueyaracaanu na panishano casaacua tacaquiaa. Nijaniya cutaraari Queraca. Nojuacuajaari tari niishiya puetunu nia panishanojuanaa. <sup>31</sup> Naaratej, nia niishiriojore Pueyaso panishano nia miiniuria. Nojuajaari saniniuurijia nia niquitionutaniya puetunu nia panishanojuanaa.

*Nia casami nia racatare Pueyaso shuriucua*

*(Mt 6.19-21)*

<sup>32</sup> 'Maja nia puerenu, cua muerasuniyojuanaa. Niaari secajaniyojua. Naajaa, cua Queeri nia panijia. Capora na quiniucua, ¿nia niquitionutaniya puetunu na jiitiasanojuanaari! <sup>33</sup> Nia casami nia niquitiojore cumaneecara. Na nuhuaji, cuno cumaneeca nia niquitiojore nareja casamiijiuniucua pueya. Naa nia miishacaritij, niaari jiyocuacaanu racataa nia jiitiasano. Tee Pueyaso racataa nareja nera nia niquitiosanocujani, cuniqui, nia cumaneeca quiqioori maja na piquiniu. Niaari tii nia racatasano jiitianutaniya pueyaracaanu. Majaari nohuasejojua na naata nocua tiuquiniu na nohuasenura. Naajuhuj, surequeyari maja na naata miaquenu nia casami tii. <sup>34</sup> Nia casami jaara naa racatasano quiya jiyocuacaanu Pueyaso shuriucuatej, niaari saaja Pueyasocua niishiriojonutaniya, tee nia casami racatasano quiyacuaani.

*Jeenucasano nia quiri nia Jiyaniijiaacuaji*

<sup>35</sup> 'Juhuata jeenucasano nia quiri pueyaracaanu, nia sashishacari nia Jiyaniijia, taa tiajiniaaco maninia seyacuani. Nojori sashishacari na jiyaniijia, nojoriiri na toqueya cushiyono quiya tari, na samaritiu noshitishanojuhuaj. <sup>36</sup> Naa jeenucasano nia quirijihuhuj, juhua cuno seyaja. Nojoriiri na jiyaniijia sashiya na caminiujiniji na tiuquishacariuhua. Nojuaja jaara tohuateya piquishuhua, nojoriiri ritia nocuaji riatanutaniya tia tohuateya. <sup>37</sup> Shuquiriaatia quijiaca cutaraari cuno seya, canapuate na jiyaniijiaacuaji suteyajaani, na jiyaniijia cuaara tiuquiriohuajaatijia. Seetanujuanaa nia sequeyanijia, nojori jiyaniijiaari nojori cajitijionutaniya miaquejajinia. Na toque maniniuqui jocuanutaniyani na mianuutenura nojori. <sup>38</sup> Nojori jiyaniijia jaara tiuquiriohua shiyaqueya, juhuaquenu panishacari, naajaa, shuquiriaatia quijiaca quiniutianiyari cuno seya, nojori jaara suteyajaa tia tohuateya riatariquiano nojori jiyaniijiaacuaji. <sup>39</sup> Nio nia niishirijihuhuj, tia camaru jaara niishiri taacari nohuasejojua niniutianiyani, nojuaja maara sutere na tia cojuanura, maja nohuasejojua tiuquiniuria na casami na nohuasenura. <sup>40</sup> Naajuhuj, jeenucasano nia quiri pueyanaa, juhua cuno sutejaca seyaja. Niaa jaara jiyaniya juhuanajuaja maja cua tiuquiniu quiniutianihua, janiyani jiyacari nia jiyajenetanutaniyani.

*Jesu pohuatasano maninia serujiniji, sesa serujinjinio*

*(Mt 24.45-51)*

<sup>41</sup> Jiyacaritij, Pedroori Jesu nequesotaree:

—Jiyaniijianaa, ¿quiaate nio pohuataree saa canaaraja, puetunu pueyarajanaa soj?

<sup>42</sup> Jiyaniijiaari na riucuarree:

—Tamonu seru jaara maninia seru quiri, nocua tiuushano, niishijiajuhuaj, na jiyaniijiaari cuno na seru jiyatenutaniya narta seya jiitariquiano na niti na niyacari. Nojori jiyaniijia niyacari, cuno seeratasano seruuri narta seya mianuutenutaniya maninia, taa nojori jiyaniijiajanaa mianuutequiaa nojoricuaani. <sup>43</sup> Cuno seruuri shuquiriaatia quiniutianiya na jiyaniijia jaara na riuriasuhua naa maninia miyanojua, taa na

sequesaaquiaari na miiniuriacuajani. <sup>44</sup> Seetanujuanaa nia sequeyanijia, na jiyaniijiaari cuno maninia seru jiyatenutaniya puetunu na jiitiasano casamijianaa cojuana na quiniuria. <sup>45</sup> Saniniuuja, cuno seru jaara sesa miiniuria niishiriojore, na jyanishacari na jiyaniijiaari jyanohua tarishiniutianiya, nojuajaari niishiriojonutaniya nojuaja na naata miiniu na panishano. Cunora, nojuajaari narta seya majoonu coteenutaniya, seya maajipohuanio. Naajuhuj nojuajaari saaja miaquejonutaniya. Pueyaracaanu rarujunutaniyari. Mashaasequejonutaniyajaariuhuj. <sup>46</sup> Na jyanishacari na jiyaniijiaaru juhuanojuaja maja na tiuquiniu quiniutianihua, jiyacaritij, cuno juucaja, na jiyaniijiaari tiuquiniutianihua canashiyaquiji. Naa cuno seru miiniuucua sesatej, na jiyaniijiaari jyanohua na saniitionutaniya. Na jatanutaniyari Pueyaso tojiyashijiaca pueyata na saniitiosocoriquiano.

<sup>47</sup> Tamonu jiyaniijia jaara na seru rootare maninia, taa nojuaja miiniutianiyani, cuno seru jaara jeenucuaaquiri na jiyaniijiaacuaji, mariyata jaara miyaquiri taa na jiyaniijia sequequiaari na nuhuajiriacuajani, nojuajaari jyanohua majacusaanutaniya cutara. <sup>48</sup> Saniniuuja, tamonu seru jaara sesa miiri na niishiyaquiniuucua na jiyaniijia panishano na miiniuria, nojuajaari saaja secaja majacusaanutaniya. Naajuhuj, cante queraatia niqitiosareeni, cuno serujiniijiri queraatia masenu panishaanutaniya. Naajuhuj, cante jiyatesaree queraatia jiitiana na quiniuriani, na jiyaniijiaari nocua tiuuniutianiya socua jyanohua maninia miijia na quiniuria.

*Jesuucua tiuujiacaari narta pueya panishoo*

*(Mt 10.34-36)*

<sup>49</sup> Mijiria niquiaarinijia, juhua mani cua noshitiniuria pueya tajinia. ¡Seetanujuanaa na noshitiriquia tarinij! Cua rupaari juhua mani quiniutianiya. <sup>50</sup> Coteenu, janiyari jyanohua saniniujiushaanutaniya juhua manitiani. Nocuaji coojiaari tacaya janiya jaara naa miishaarejaatijia. Seetanujuanaa na jiyateriquia tariucua tucuateenonij. <sup>51</sup> ¿Niaateeri jiyaniya janiyari niquiaarini mijiria quiniaa quiniuria juhuajaniya? ¡Maja! Seetanujuanaa nia sequeyanijia, janiyari niquiaarini pueya cua raquiriojotanura. <sup>52</sup> Naaratej, pueyari quiarijia juayonuutanu coteenutaniya. Pueyano jaara necocuata jiitiare jiuujianaraca niquiohua na tiajinia, jiuujianaraca nojorijinijinio jaara cucua tiuuri, cuno caapiqui cucua tiuyashijiacaari saniniuuja nojori juaajiaca quiniutianiya. Naa noojiaqueya pueyajinijinio tiuuniuucua cucuatej, queraatia pueyari naa tama tacaresetanutaniyajaacujua. Naacuajitij, tamonu tiajinia, querajaa pueyari caapiquiriyatu cucua tiuujiaca juaajiaca quiniutianiya. <sup>53</sup> Pueyari necohua paracaajia quiniutianiya, necohua tiuushacari cucua. Naajuhuj, necohuari na que paracaajia quiniutianiya na que tiuushacari cucua. Naajuhuj, maajipohuari necojori paracaajia quiniutianiya necojori tiuushacari cucua. Naajuhuj, necojoriiri na nucua paracaajia quiniutianiya na nucua tiuushacari cucua. Naajuhuj, maajipohuari necohua niquiocohua paracaajia quiniutianiya, necohua niquiocohua quiniuucua cucua tiuujiaca. Naajuhuj, pueya niquiocohuari na quinia paracaajia quiniutianiyajuhuj, cucua tiuujiaca na quinia quiniuucua.

*Pueya cuaara niishiiria quiarijia Pueyaso miishanojiniji, casaa na niishitiniu paniyani*

*(Mt 16.1-4; Mr 8.11-13)*

<sup>54</sup> Jesuuri naa sequequiaari pueyajuhuj:

—Niaa jaara niqutioocua niquiquiaa pananu tiuquishocora, niaari sequequiaa: “Maruqui niniutianiya”. Seetanujuanaa naa quiquiaari. <sup>55</sup> Naajuhuj, paratu jaara piyarojoquiaa pananu shuucuaji, niaari sequequiaa: “Tacareejonuqui quiniutianiya”. Naa quiquiaari. <sup>56</sup> Pueyanaa, ¿niaateeri seetanujuanaa niishijiaca? Niaari maninia niishiquiaa jiya cajiniocua nia niquishano, nio jiyajinia nia niquishanonio. Saniniuuja, nia niquishacari quiarijia Pueyaso miishano nia niquiara, majaari cuno nia niishiniu, casaa na sequenu paniyani. Naaratej, majaari seetanujuanaa niishijiaca nijaniya.

*Niaacuara tonujunata nia jeecatoore*

*(Mt 5.25-26)*

<sup>57</sup> 'Niaacuajaari niishiya, sesa miijiacaari saniitiosaanutaniya. Naaratej, tama ni-janiyajaaja nia niishiriojore, casaate maninia nia miiniuriani. <sup>58</sup> Tamonu pueyano jaara quiocuara tonujure quia sesonuucua na casaa, quia saniri juhuata nata pocoojonu maninia, na jaatucusacari quiajaniya nequesoreena pueyanoocua. Quia sequerenoj casaa quia miiniutianiya nerani, na jiyanooniuria quiajaniya. Quiaa jaara jecatoy-aquiri nata, nojuajaari quiocuara saquiriojotanutaniya nequesoreena pueyano. Jaara quiocuara saquiriojotare nequesoreena pueyano, nequesoreenaari saniniuujia quia niquitionutaniya na pueya, quia nujuatesaanura nujuatejojuajinia. <sup>59</sup> Seetanujuanaa nia sequeyanijia, majaari nia tohuatanu quiniutianiya nujuatejojuajiniji, niaa jaara puetunu nequesoreena sequesano cumaneecajanaa niquitiorejaatijia niaacuara tonujuna pueyano.

## 13

### *Nioojia nia tacatore sesa nia quiniujiniji*

<sup>1</sup> Jiyacari, tamasaca pueyari Jesuucua tiuquiiioquiaari. Cuno pueyari naa Jesu pohuataquiaari:

—Jiyaniijia Pilatoori Galilea jiyajinijinio pueya puecoorucuaa! ¡Na nuhuaji, nojori nanaca cojitiriiri Pueyasooacuara nojori puecoosano seya nanacata!

<sup>2</sup> Jesuuri nojori sequeree:

—¿Niaateeri jiyaniya cuno Galilea pueyari naa miishaarucuaa socua jiyanohua sesa miijiaca nojori quiniucua narta Galilea pueyajiniji? <sup>3</sup> Seetanujuanaa nia sequeya cutaranijia, nojoriiri maja socua sesa miijiaca quiqianu nijaniyajiniji. Nijaniyajuahuj, niaa jaara tama nioojiajaaja tacatoyaquiri sesa nia miiniujiniji, niaari taraatia puecoosaariquianojuhuaj. <sup>4</sup> ¿Cuno dieciocho pueyarihuaj, canapuede cusonuucanu cuno jiyaconaja tia jaara nojori shiniacacanu Siloé cuari shuriucuatej? ¿Niaateeri jiyaniya nojori socua sesa miijiaca quiqianu narta Jerusalén tiacajinia quiniaa pueyajiniji? <sup>5</sup> Seetanujuanaa nia sequeyanijia, nojoriiri maja socua sesa miijiaca quiqianu nijaniyajiniji. Janiyari quiarijia nia numooteyani, niaa jaara tacatoyaquiri nioojia sesa nia miiniujiniji, niaari taraatia puecoosaanutaniyajuhuj.

### *Miriqui Jesu niishitiojosano muetuhuo naanajiniji*

<sup>6</sup> Jesuuri na nuhuaji pueya niishitiojoquiaari nio miriqui pohuatasanta:

—Tamonu pueyanoori higo naana jiitiaquiaari na uva cuhuariquiajinia. Tamacari, na camaruuri nocua quiaquiaari na niquiniuria. Na jajau mianu paniriquiaa juucuaari. Shaanoori quiriquiaa. <sup>7</sup> Cunora, na cuhuariquia cojuana sequereeri: “Quia niquiri nio naana. Janiyari pueyaracaanu najuhuana niquiaani na jajau pajenura. Pueyaracaanu muetuyaquiyari. Tari na shocorucuaari jiuujianaraca marijia. ¡Quia nure! Tamonu cuaara na nujuasaqui natasaaria, na muetunura cutara”. <sup>8</sup> Cuhuariquia cojuanaari na riuucuaere: “Jiyaniijianaa, quia tarinitiarejaara tamonu marijiara. Janiya na pajama jiya tacarojotanutaniyani na sasetanura. Na nuhuaji, janiyari juunu cueaca na pajama paatiniutaniyani. <sup>9</sup> Janiya jaara naa na miirini, muetunutaniya naasucua. Jaara muetuyaquiri, pocua socua na nureni”. Naajuhuj pueyanaa, Pueyasoori sashiya, maninia miijiaca nia quiniuria.

### *Jesu jeeacasacari porocuatucua samaatenu juuca*

<sup>10</sup> Tamonu samaatenu juuca, Jesuuri tamonu tiacajinia niishitiojoriquiaa Pueyaso secojojua tiajinia. <sup>11</sup> Tamonu maaji cusosuuri tii quiriquiaajuhuj. Dieciocho marijiari na shoconujuquiaari porocuatuu na quishacari. Samaruuri naa na jiyatequiaari. Majaari quenaaja na naata maninia nujuanu quijia. <sup>12</sup> Jesu jaara na niquiquiaari, na sequereeri:

—¡Maajinia miji! ¡Quia nijiniacuaja tari jeequerohua!

<sup>13</sup> Jesuuri na juaashiquia niaree maajiicua. Jiyacaritij, maajiiri maninia jeequequee. Nojuajaari Pueyaso maniniuhuaqueetanu coteeree naa na miishaanuucuatej. <sup>14</sup> Pueyaso secojojua tiajinia jiyaniijaari juaarii naa Jesu miiniucua samaatenu juuca. Naaratej, tii quiniaa pueya sequeree Jesu niquiaraari:

—¡Seis juucacujaari quiya puetunu semaanajiniajanaa pa poonijionura! ¡Niocua cuno juuca nijioriquia nia naatanijiosaanura, maja samaatenu juuca!

<sup>15</sup> Jiyaniijia Jesuuri sequeree:

—¡Sapuenu juhua maninia miijiaca niquishano pueyanaa, puetunu nijaniyajanaari nia juunu, nia burro samaacartaquiaa samaatenu juuca, nia jaatucusocoriquiano mo-huaca na raatenura! <sup>16</sup> ¿Nio maajiirihuaj? Nojuaja cutaraari supuetana Abraham niqiuohuacujinio supueno. ¿Majateeri maniniajuhua samaatenu juuca pa samaacatanura Satanás morojosano? Dieciocho mariijaari tari nio maaji shoconujurucuaa pueyaracaanu porocuatú na quishacari.

<sup>17</sup> Naa Jesu sequesacariitij, puetunu na paraajanaari caririquitiurii. Saniniuuja, puetunu pueyajanaari shuquiriaatia quiriquiaa nojori niquishacari queraatia maninia Jesu miishano na cumaacata.

*Miriqui Jesu pohuatasano mostaza jajaujini*

(Mt 13.31-32; Mr 4.30-32)

<sup>18</sup> Jesuuri sequequiaari:

—¿Taate cua naata niishitiojonu nijaniyani, nia niishiniuria taa Pueyaso poonijiya pueya jiuujiajinia na rupaatani? <sup>19</sup> Na rupaari juhua mostaza jajauniyojua, pueyano natasano na cuhuariquiajinia. Cuno jajau jaara moritiare, puereetuucara caneyari. Naacuajitij, shuhuari na cashacucuaacua jesuya. Naajuhuj, Pueyaso rupaari caneya pueya jiuujiajinia puetunu nio jiyajiniajanaa maninia miijiaca nojori quiniuria.

*Miriqui Jesu pohuatasano pan poreetajajini*

(Mt 13.33)

<sup>20</sup> Jesuuri nio pohuataquiaari socua:

—¿Casaa cua pohuatanutaniya nia niishiniuria taa Pueyaso poonijiya mijiria na rupaatani? <sup>21</sup> Pueyaso rupaari juhua pan poreetaja maaji cojitishano trigo cashojuata, shanacusano jiuujianaraca shiitianiyojua tohuatashijinia. Pan poreetajaari puetunu cuno cashojua miniquiootasanojuanaa poreeteja. Pueyaso rupaari naa poonijiojua-juhuj.

*Juhua shiitianiyojua tohuateyari quiya Pueyasoocua pa quianura*

(Mt 7.13-14, 21-23)

<sup>22</sup> Jesuuri Jerusalén tiacajiniara quiariquiaa na pueyata. Nucucaco na quiasacari, pueya niishitiojoriquiaa tiacajiniaari, shiitianiyojua tiacajinianio. <sup>23</sup> Jiyacaritij, tamonu pueyanoori na nequesotaree:

—Jiyaniijianaa, ¿saaja quenaaraqui pueyateeri Pueyaso pueyara jiyatesaanutaniya? Jesuuri nojori riucuaaree miriqui:

<sup>24</sup> —Jiyanhua nia saniniujiuri shiitianiyojua tohuateyaco nia tiuquiniuria, Pueyaso nia rupuenura. Juhucarijia nia numooteyanijia, queraatia pueyari nocua tiuquitianu paniniutianiya juucua. Majaari nojori naata quiniutianiya saaja. <sup>25</sup> Cua tojitiare. Tia camaru jaara sanere, tohuateya tionutaniyari. Nijaniya, cante na tia carijiniacuma quiyajaani, niaari tohuateya piquiniuniutianiya najuhuanaj. Niaa jaara naa nacare: “¡Jiyaniijianaa, canaacuaji quia riatare tohuateya!”, nojuajaari nia riucuanutaniya: “Maja cua niishiniu tejenote nijaniyani”. <sup>26</sup> Jiyacaritij, niaari juhuacatecara sequenutaniya: “¿Majateeri canaa quia niishiniu? Canaacujaari quiata miaquenujuani. Canaari quiata ratujua mariyatani. Quiaacujaari canaa tiaca nuucucujinia niishitiojua”. <sup>27</sup> Tia camaruuri nia riucuanutaniya: “Janiyacujaari tari nia sequereeni, maja cua niishiniu tejenote nijaniyani. Nia quiojorohua niiquiji, puetunu nijaniyajanaa sesa miijiacanaa”. <sup>28</sup> Naa na taanuusacari nijaniyatej, niaari nujuquetunutaniya. Niaari nia quiaa miaquenutaniya jiyanhua nia taraajenuta, nia niquishacari Abraham, Isaac, Jacobo, puetunu pueyara Pueyaso sequesano caminiujiunaa Pueyaso shuriucua quiyanocuaa. <sup>29</sup> Queraatia tamasa pueyapueeri nijionutaniya puetunu jiyacajiniinjiojuanaa Pueyaso shuriucua cajitiuniuria, nojori miaquenuunura nata. Nijionutaniyari



pananu muetasamaji, pananu tiuquishacojinio, pananu shuucuaji jiyacajinijinio, pananu muetasamaji miaquetajara jiyacajinijiojuhuaj. <sup>30</sup> Quiarijiani, queraatia pueyari juhua tojishoo quiya narta pueyara. Cuno quishacari saniniuujia, nojori cutaraari seetanujuanaa tojishano pueya quiniutianiya Pueyasora, Pueyaso tojitiajaca nojori quiniuucua mijiria. Naajuhuj, quiarijiani, queraatia pueyari juhua tojishano pueya quiya narta pueyara. Saniniuujia, jiya puequesacari, nojoriiri najuhuaa quijiaca quiniutianiya Pueyasora, nojori tojitiaaquiniuucua nojuaja.

*Jesu taraajesacari Jerusalén tiacajinia quiniaa pueyacua*

*(Mt 23.37-39)*

<sup>31</sup> Jiyacari nojiaqueya Fariseocuacaari Jesuucua tiuquijioquiaari. Nojoriiri Jesu numooteree:

—¡Niiquiji quia mashiri! ¡Jiyaniijia Herodes quia monu paniya!

<sup>32</sup> Jesuuri nojori sequeree saaja:

—Cuno pueyanoori niishijia juhua jaami. Naa nia caminiujiushuhua cua sequesano cuno jaamiria: “Janiyari samaruhua tohuatanijiyani. Janiyari cusosuhua naatanijiyajaaniuhuj. Janiyari naa miya quiarijiani, tariquijiuhuaj. Janiyari tama tariqui tucuatanutianiya puetunu cua miiniu panishanojuanaani”. Naa nia sequesuhua cuno pueyano. <sup>33</sup> Cuaara rupaquijia cua sashiiria. Janiya quiarijia rucuanenutaniyajaarani, tariqui, tama tariquinio. Janiya cuaara mosaaria cutara Jerusalén tiacajinia, tee cuniqui puetunu pueyara Pueyaso sequesano caminiujiuniaajanaa puecoosaaquiaaricuaani. Majaari tamaqui cua monu quishaanutianiya.

<sup>34</sup> Jerusalén tiacajinia quiniaa pueyanaa, niaacuajaari Pueyaso sequesano caminiujiuniaa puecojuaca. Niaari Pueyaso jiyaramiquishano pueya jacujuaca saitia. Janiyari juucua pueyaracaanu nia rerejonuucua jiaatiajani, taa caacaraja necohua rijioquiaacuaa na nesu cariquiaconi. Niaari saaja paniyaquiquiaa cua cojuanura nijaniya. <sup>35</sup> ¡Cunora, cua tojitiare! Nia quiquoori tojetaarucujanaa shaaqui quiniutianiya. Naajuhuj, majaari socua nia niquniu quiniutianiya janiya, niaa jaara nia timitiasacari janiya sequerejaatijia: “¡Cuaara shuquiriaatia quiiria pa Jiyaniijia, Pueyasojiniji tiuquihuano!”

## 14

*Jesu naatanishacari cusosu poreeno pueyano*

<sup>1</sup> Tamonu samaatenu juuca, Jesuuri tamonu Fariseocuaca jiyaniijia tiajinia quiaquiaari miaquenura, socua tamasaca Fariseocuacatanio. Nojoriiri Jesu shootiaturiquiaa nojori niishiniuria casaa na miiniutianiya samaatenu juucani. <sup>2</sup> Jiyacaritij, tamonu pueyanoori Jesu tacoji nujuariquiaa, poreeno cusotaano. <sup>3</sup> Jesuuri Moisés Rootasanojiniji niishitijonaa nequesotaree, Fariseocuacanio:

—¿Taa nia serojoquiaa Moisés Rootasanojiniani? ¿Maninate cusosu pa naataniniu samaatenu juuca?

<sup>4</sup> Nojoriiri saaja sanaa na tojitariquiaa. Jesuuri cusosu quiaree jiyacari. Na naataniriiri. Na jiyarorohua na tiajiniaari. <sup>5</sup> Na nuhuaji, Jesuuri cuno Fariseocuaca sequeree:

—Nia burro, nia juunu jaara raama tiyare samaatenu juuca, ¿niaatucua samaatenu juuca shocoterejaara, raamaji nia jaaniuhuara nia seru?

<sup>6</sup> Majaari nojori riucuanu quirii quenaaja.

*Taa pa miyani queranacunura masuusano pa quishacari, taamueca pueyate masuushiyajaanihuaj*

<sup>7</sup> Jesuuri shootariquiaa taa masuusano pueya socua panishano cajitiucujinia nojori cajitiuniuria riutioconeetariquiaani. Jesuuri cunora nojori niqiuara pohuataree nio pohuatasano. Naa sequereeri:

<sup>8</sup> —Quiaa jaara masuusaariquia camishacari queranacunura, maja cumaati quia cajiniu socua tojishano pueyano cajijiaranojinia, tamonu pueyano mariqui tiuquiriiri socua tojishano pueyano quiajanijini. <sup>9</sup> Socua tojishano pueyano jaara tiuquishii, nia

masuuna pueyano naasucuaari quiocua niniutianiya na sequenura quiajaniya: “Shi-iquia. Quia sanere nio pueyanoocuaaji”. Naacuajitij, quiaari cajitishaanutaniya quia caririquiniutia pueya paniyaquishano cajitiujinia, miaqueja puequeetujinia. <sup>10</sup> Nocuaaji nia sequeyanijia, niaa jaara masuusaariquia miaquenura tamonu tiajinia, niocua cajishiiquia socua paniyaquishano cajitiujinia. Naacuajitij, quia masuuna jaara niqiri quiajaniya, nojuajaari quia sequenutaniya: “Cua rupuenanaa, jniya quia cajishii socua panishano cajitiujiniani!” Naacuajitij, cuniqui quiata quiniaari niishiniutianiya, quiajaniyaqui nia masuuna panishano pueyano. <sup>11</sup> Naajuhua Pueyasora, cante tama na cuaqueyajaaja jiyateya juhua tojishano pueyano na quiniuriani, nojuajaari cararosaanutaniya. Saniniuujia, cante tama na cuaqueyajaaja jiyateya juhua panishoo pueyanoni, nojuajaari maninia jiyatesaanutaniya juhua tojishano pueyanora.

<sup>12</sup> Jesuuri na masuuna pueyano sequereejuhuj:

—Quiaa jaara queranacunu paniya, majaari quia masuunu saaja quia rupuenaa, quia tapueyocuaca, quia panishano pueyano. Naajuhuj, majaari quia masuunu quia shuriucua quiniaa casamiriaca pueya. Quiaa jaara nojori masuure, nojoriiri quia masuunutaniya saniniuujia. Naacuajitij, quiaari tari namishaarohuacuaaja. Cunora, majaari socua quia masenu quiniutianiya Pueyasojiniji. <sup>13</sup> Naaratej, quiaa jaara queranacunu paniya, quia masuure casamiijiuniucua pueya, sesaruneca pueya, sesacujuanucua pueya, cariojuarujurinio. <sup>14</sup> Naacuajitij, quiaa jaara naa miiri, quiaari shuquiriaatia quijia quiniutianiya cutara. Majaari nojori naata masuunu quiajaniya saniniuujia. Naaratej, Pueyaso cutaraari maninia miiniutianiya quiajaniya saniniuujia, na samiitianijiosacariuhua maninia miijiaca pueya.

*Miriqui Jesu pohuatasano na queranacunujiniji*

*(Mt 22.1-10)*

<sup>15</sup> Jesuta cajiyano pueyano tojishacari naa Jesu pohuatasanotej, Jesu sequereeri:

—¡Shuquiriaatia quijia cutaraari cuno, cante Pueyaso shuriucua miaquenutaniya jiyocuacaanuni!

<sup>16</sup> Jesuuri na sequeree:

—Tamonu pueyanoori queraatia sumatuquiaari pueyata na queranacunura. Nojuajaari coteenu queraatia pueya masuquiaari. <sup>17</sup> Quera miaquenuusacari, na seru jiyaroreeri na masuusano pueya na sequenura: “Miji, puetunujuanaa tari jeenucuasaaree niaacuaji. Nia miaquesee”.

<sup>18</sup> Puetunu masuusano pueyajanaari juhuacatecara sequequiaari maja na naata quianu miaquenuucua. Coteenu masuusano pueyanoori cuno seru sequeree: “Janiyari shusha maseree tamonu cuhuariquiani. Janiyari nocua quiaa na niqiniuucuan. Cua jiyanoori quenaaja. Maja cua naata quianu quiata queranacunuucua”. <sup>19</sup> Tamonu masuusano pueyanoori sequeree: “Janiyari diez poonijiojuaca juyaca masereeni. Na saniniuucua quiaanjia. Quiocua cua jiyanoori cua quiaaquishacari queranacunujinia”.

<sup>20</sup> Tamonu masuusano pueyanoori sequereejuhuj: “Shusha camiriinjia. Cunora, maja cua naata quianu”. <sup>21</sup> Seruuri tamajaaja tacateyarohua na camarnu tiajiniohua. Na jiyaniijia pohuatasuhua na masuusano pueya sequesanoori. Na jiyaniijaari juaaqui. Na seru sequereeri: “Ritia quia quiaare tamasaca pueya masuunuucua tiaca nucuaacaco. Miji quia rijiooco casamiijiuniucua pueya, sesaruneca pueya, sesacujua pueya, cariojuarujuri pueyano”. <sup>22</sup> Seru tiuquishacariuhua, na jiyaniijia sequesuhuari: “Jiyaniijianaa, janiyari tari miiriini taa quia sequeree janiyacuajani. Juhuanajuaja maja tia mishiniu”. <sup>23</sup> Na jiyaniijaari na sequeree: “Socua pueya quia pajecoo tiaca nucuaacaco, tamasaca tiacajinara nucuaaconio. ¡Socua pueya quia nenecojocoo nojori niniuria, cua tia mishiniuria! <sup>24</sup> Seetanujuanaa nia sequeyanijia, coteenu cua masuusano pueyajinijinioni, majaari quenaaja niqiriyatu nojorijinijinio saniniu quiniutianiya cua sumatusano”.

*Saaja tama na cuaqueya panitajajaarija na naata Cristo nuhuajiniu*

*(Mt 10.37-38)*

<sup>25</sup> Jiyano hua queraatia pueyari Jesuta quiojoriquiaa. Jesuuri nojoriicua tacateree. Nojori sequereeri:

<sup>26</sup> —Cante cucua niya cua pueyano na quiniuriani, nojuaja cuaara niishiiria nio. ¡Maja nia naata cua pueyano nia quiniu nia paniyaquishacari janiya socua nia quejiniji, nia nucuajinijinio! Nia niquiocua, nia niquiohua, nia tapueyocuaca, nia rimiatuhua-juhuaj, nia panishacari nojori socua janiyajiniji, ¡majaari nia naata cua pueyara nia quiniu! Naajuhuj, ¡majaari quenaaja nia naata tama nia cuaqueyajaaja panijia nia quiniu socua janiyajiniji! <sup>27</sup> Cante tama na cuaqueyajaaja panitiaaquijia cucuarani, majaari na naata cua pueyanora na quiniu. <sup>28</sup> Naa jaara jiyaconaja tia tianu paniri, ¿majate coteenu nia cajiniu nia niishiriojonura taa cumaneecate panishaanutaniyani, na tucuatnura puetunujuanaa? Naajuhuj, niaari niishiriojiya, queraatia quiyacuajate nia cumaneeca. <sup>29</sup> Naa jaara coteenu naa miyaquiri, niaari najuhuaana morijiucua nujuatejonutaniya, na nuhuaji majaari socua nia cumaneeca quiniu nia tucuatnura nia tia. Puetunu nia tia niquiniaajanaari juhuacatecara nia macatiniutianiya. <sup>30</sup> Nojoriiri sequenutaniya: “Cuno pueyanoori tianu coteecanu najuhuanaj. Majaari na naata na tucuatnura quiarijia”. <sup>31</sup> Naajuhuj, jiya jiyaniijia jaara quianu paniri narta jiyaniijata miaquetoona, ¿majate coteenu na cajiniu na niishiriojonura, na naatate diez mil na pueyata shocotanu cuno tamonu jiyaniijia, nocua niyano veinte mil na pueyatani? <sup>32</sup> Cuno jiyaniijia jaara niishiri, maja na naata na shocotanu quiniutianiya narta jiyaniijia nocua niyano, majaari na miaquetoona quiniutianiya. Sañiniuujia, tucuaaanu narta jiyaniijia quishacarijia, nocua jiyaramiquiniutianiya na pueyari, nata nojori pocoojonura maninia, nojori jiyanoootoonura. <sup>33</sup> Naajuhuj, niaa jaara carteyaquiri puetunu nia jiitiasanojuanaa, majaari nia naata cua pueyanora nia quiniu.

*Miriqui Jesu pohuatasano shonijiniji*

*(Mt 5.13; Mr 9.50)*

<sup>34</sup> 'Shoni jaara tiquiriquia quiya, maniniaari, pa panishano. Jaara shaacara quiqui, ¿taate na naata tiquiriquiara na quiniuhuani? Maja na naata. <sup>35</sup> Najuhuaana quiyari. Majaari quenaaja maninia na quiniu cuhuariquijinia jatasocoriquiano maninia na moritianiniuria natacuaca. Majaari quenaaja maninijuhuj, na paatishaanura na moquijianura, natau pajama niojosocoriquiano. Jaara naa maninia quiyacuriritij, nareja jatashiyari. Cante numaacani, cuaara tojtiaara miriqui cua pohuatasano. Cuaara na niishiirijuhuj. Seetanujuanaa cua tojtiajaca pueyani, nojoriiri juhua shoni mijiria.

## 15

*Jesu pohuatasano miriqui tashucano borregojiniji*

*(Mt 18.10-14)*

<sup>1</sup> Roma tiacajinia quijia jiyaniijara cumaneeca masejona, mariyata sesa miijiaa pueyari Jesuucua nijoriquiaa na pohuatasano nojori tojtianura. <sup>2</sup> Cuno pojoriiri Fariseocuaca soosano pueya quiriquiaa, Moisés Rootasanojiniji niishitiojona soosano pueyano. Cunora, Fariseocuacaari, mariyata Moisés Rootasanojiniji niishitiojonaari tama rimiaaqueturiquiaaja Jesuucua. Naa pocuaturiquiaa Jesuuri:

—Cuno pueyanoori sesa miijiaa pueya shanacuquiaa nocua nojori nijionura. ¡Juhua-janiya nojoritia miaquequiaajaariuhuj!

<sup>3</sup> Naaratej, Jesuuri nojori niquiara pohuataree nio miriqui pohuatasano:

<sup>4</sup> —Naa jaara cien borregohua jiitariquia, nojorijinijinio niquiriyatuniyojua jaara tashucua, ¿taa nia miiquiaani? ¿Niaatucua nia noventa y nueve borregohua cureeno tiujiaaquiri rupaquijia cuhuariquijinia, tashucano borrego nia pajenura, niaa cuaara na riuriatarohuajaatijia? Taaquiririnij. Niaacujaari naa miiquiaaquiri. <sup>5</sup> Naa jaara na riuriatasee, niaari nia shuquiriniutia na paquiohua nia numuecuaji. <sup>6</sup> Naa jaara na tiuquitiarohua nia tijinihua, niaari nia rupuenaa, mariyata nia shuriucua quiniaa

rerejotenutaniya nia sequenura nojori: “¡Cuata nia shuquiriri quiaríjia! ¡Tari riuriatarohua cua borregoniojua tashucuanoníjia!” <sup>7</sup> Seetanujuanaa nia sequeyaníjia, naajaari-uhuj, jiyocuacaanu quiniaari jiyanojua shuquirítuquiaa níquiriyatu sesa miijia jaara noojia tacatore sesa na miiniujiníjia. Cuno pueyanoori socua jiyanojua shuquirítiasano tamasaca noventa y nueve pueyajiníjia, canapuetucujaja tari maninia pueyacuaani.

*Jesu pohuatasano miriqui juurequetesano cumaneejiníjia*

<sup>8</sup> Naajuhuj, tamonu maaji jaara diez cumaneecaraca quiri, jaara níquiriyatu juurequetere tiajiniaaco, ¿maatucua taa miirini? Na samarítu noshitiniutianiyari, na tia na netoonujunura. Pueyaracaanu jacaria na pajenutaniyari cuaara na riuriatarejatíjia. <sup>9</sup> Na riuriatasacari na juurequetesano cumanee, maajiiri na rupuenaa, mariyata na shuríucua quiniaa maajipohua rerejotenutaniya na sequenura nojori: “¡Miji nia nimia! ¡Cuata nia shuquiriri! ¡Tari riuriatarohua cua juurequetesano cumaneeníjia!” <sup>10</sup> Seetanujuanaa nia sequeyaníjia, jiyocuacaanu Pueyaso seyari naa shuquiríquiaajuhuj sesa miijia jaara noojia tacatore sesa na miiniujiníjia.

*Jesu pohuatasano taa tamonu pueyano jiyanojuaari neyanuni*

<sup>11</sup> Na nuhuaji, Jesuuri nio pohuatareejuhuaj:

—Tamonu pueyanoori caapiqui niyanuraca quiquiaari. <sup>12</sup> Socua naatujuaari na que sequere: “Cua quenea, quiaríjia cua níquitore quia jíitiasanojiníjia, quíría quíríquiao quíiaa jaara shaajeyare”. Naacuajitíj, na queeri puetunu na jíitiasanojuanaa níquitiojoree necohua. <sup>13</sup> Socua naatujuaari rupaquíjia camueenujuquiaari na que tiajinia. Na nuhuaji, puetunu na que níquitiosanojuanaa nojuajani, nojuajaari saniniuuja tamasaca na níquitiojoree na cumaneecara. Na nuhuaji, na cumaneecata quiaquiaari tucuaaanuuri, tamonu jíyajiníjia. Cuniqui, puetunu na cumaneecajanaa puecaquiaariiri sesa na miiniutia. <sup>14</sup> Nojuaja jaara puetunu na cumaneeca puecaquiaarijianaa, cuno jíyajiníjiaari jiyanojua miaajesacari quiquiaari. Mashajaari juhuacatecara miaajequiaari. <sup>15</sup> Cunora quiaaree tamonu tahuécua cuno jíyajiníjiaari, nera na pooníjionura. Cuno tahuéri na jíyaroree na cuhuaríquiajinia na cushiya na cojuanura. <sup>16</sup> Mashajaari cushiya miaquesano miaquenu paníríquiaa juucua na miaajenuta. Cunoori tamaatía purootu cocua quiquiaari. Majaari tamonu pueyano níquitíonu quíjia quenaaja na miaquesocoríquiano. <sup>17</sup> Na nuhuaji, tama sequereejarijia: “Cua queeri queraatia na tiajiniaaco seyaraca. Nojoriiri maninia miaquenuquiaa taquíya. Nojori sumatuuri cureequiaajuhuj. ¿Janíyaríjiaataj? ¿Janíyari níya quera cusoya cua miaajenutani! <sup>18</sup> ¡Cua queecua tacateyarohuaraqíj! Janíyacua na sequesuhuaní: ‘Cua quenea, janíyari Pueyaso miiquíanu sesani. Janíyari sesa miiquíanu quiajaníyajuhuaj. <sup>19</sup> Majaari socua cua sequenu quia níyanuta. Janíyari puera sesa miijíjani. Cua jíyateré juhuari juhua quia seru cua quiniuria, quiara cua pooníjionura’ ”.

<sup>20</sup> Naa na níshiríojonu nuhuajitíj, mashajaari quiaquiaariuhua na queecua.

’Tucuaaanu na quishacarijia na que tiajiníjia, na queeri na níquiríi. Nocua taraajereeri. Nocua neteyareeri na naacunura. Na cacaseeri. Na nujuuneequereejariuhuj. <sup>21</sup> Neyanuuri na que sequere: “Cua quenea, janíyari sesa miiquíanu Pueyasoni, quiajaníyano. Majaari cua sequenu quia níyanuta”. <sup>22</sup> Na queeri saaja na tiaco seya sequere: “¡Rítia! ¡Socua maníniuqui toque míjia nia ríquío! ¡Níocua quíyanu cushítiríníj! ¡Jaaniisho nia cushítirí! ¡Sapatu nia cushítiríjuhuaj! <sup>23</sup> Pa riutianishano juunu níquío-juua nia quíaco mosocoríquiano. Quiaríjia pa queranacure. Pocua miaquenuureni, quíyanu pa shuquirítiasacari. <sup>24</sup> Nio quíyanuníyojuaari juhua macu quíríquiaa. Quiaríjia samíitíarohuari. Nojuajaari shaajequiaari. ¡Tari pocua muetarohuari!” Naacuajitíj, nojoriiri juhuacatecara queranacuquiaari.

<sup>25</sup> Jiyacarítíj, jíyapueranuuri cuhuaríquiajinia quíríquiaa. Na tacatesacariuhua tiajiníohuara, jaara tari cateca quíríquiaa, saaja pueya tojiríi jaaquequenuyanoori, níanjuníuyanónio. <sup>26</sup> Naaratej, na que tiaco seru píiríiri: “Míjia, cua sequere, ¿casaara tiajinia cojuatuneshiyani?” <sup>27</sup> Seruuri na rícuaree: “Quia nuhuajíshanacujaja tari tíuquishacariuhua. Quia queeri shuquiríaatia quíya maninia na tíuquishacariuhua, maja cusosu. Naaratej, canaa sequereeri querasapíquia juunu níquíojuua canaa monura”.

<sup>28</sup> Jiyacaritij, jiyapueranuuri jiyanoehua juaaqui. Majaari tiajinia na tiuquiniu panini quiriquiaa. Nocuaji na queeri nocua tohuatamaa carijiniacuma, na nenecojonura tiajinia na tiuquiniuria. <sup>29</sup> Na que sequeree saajaari: “Quiaacuajaari niishiya, janiyari pueyaraaanu poonijioquiaa quiarani. Majaari quenaaja cua tarijonu quiquiaa quiajaniya. Naa maninia tojijia cua quishacari quiajaniyatej, ¡majaari quia niqutionu quiquiaari janiya quenaaja niquiriyatu cabraniyojua, cua queranacunura cua rupuenata! <sup>30</sup> Quiarjia saniniuujia, quia niyanu seque tiuquishacariuhua, ¡quiaari querasapiquia juunu niquiojua moree nera! ¡Nojuajaari quia cumaneeca puecaganu paanatujuuricua!” <sup>31</sup> Na queeri na sequeree: “Sanajanaa, quiaari pueyaraaanu cuata quiya. Puetunu cua jiiitasanojuanaari quia casaa. <sup>32</sup> Naajaa, quiarjiani, maninia pa queranacure. Shuquiriaatia pa quirij. Quia tarajanuuri juhua macu quiriquiaa tari. Quiarjia samiitiarohua pajaniyaraari. Nojuajaari juhua tashucuaganu pocuaji. Quiarjia pocua muetarohuari”.

## 16

*Miriqui Jesu pohuatasano pueyanojiniji, cante na jiyaniijia cumaneeca riutiocojuani*

<sup>1</sup> Jesuuri na pueya pohuataquiaari nio miriqui pohuatasanojuhuaj, nojori na niishitiojonura:

—Tamonu casamiriaca pueyanoori tamonu pueyano jiiitaja na casami cojuariquiano, na cumaneecanio. Tamasaca pueyari cuno camarnu pohuataree na seruna na cumaneeca riutiocoriquiaa jiyasohuaja, tama nerajaaja. <sup>2</sup> Cunora, jiyaniijaari cuno na seru sequeree: “¿Taa quia miiquiaa janiyani? ¡Quiaana sesa miiquiaa! Quiarjia cua niqutiore quia naajiotasano puetunu quia miishanojinijianaa. Majaari socua quia quiniu quiniutianiya cua casami cojuana”. <sup>3</sup> Cunora, cumaneeca cojuanaari niishiriojooquee. Tama sequereejaarija: “¿Taa cua miiniutianiyarini cua jiyaniijia jaara cua jatara cua poonijosanojiniji? Janiyari maja cumueecani, cuhuariquiajinia cua poonijionura. Naajuhuj, jiyanoehua cararaatiaari quiria, pueyajiniji nareja cua mashiniquijionura cua panishano. <sup>4</sup> ¡Jaj! Tari niishiquiinijia taa cua miiniutianiyani tamasaca taraajenura cucua, nojori masuunura janiya nojori tiajinia cua quiniuria, janiya jaara nio poonijosanojiniji jataaareni”. <sup>5</sup> Naaratej, nojuajaari naa miiquiaari. Juhucatecara sequequiaari pueyari, nojori nijionura nocua, canapue na jiyaniijia niqutiojoquiaari casamicuajani. Coteenu tiuquinia pueyano nequesotareeri: “¿Casaa cua jiyaniijia niqutiojocanu quiajaniyani?” <sup>6</sup> Pueyanoori na riuquaree: “Cua niqutiojanu cien patacua mishaja shiyocuan”. Cumaneeca cojuanaari na sequeree: “Ritia quia cajiri. Niya quiya quia masasano casamijiniji naajiotasano. Tamonu quiarinio quia miiri. Quia naajiotare saaja cincuenta patacua mishaja shiyocua”. <sup>7</sup> Na nuhuaji, tamonu pueyano nequesotareeri: “¿Quiajaniyariuhuj? ¿Casaa cua jiyaniijia niqutiojocanu quiajaniyani?” Na riuquareeri: “Cua niqutiojanu cien canaasatu mishaja trigoni”. Cumaneeca cojuanaari na sequeree: “Niya quiya quia masasano casamijiniji naajiotasano. Tamonu quiarinio quia naajiotare saaja ochenta canaasatu mishaja trigo”. <sup>8</sup> Na jiyaniijia jaara niishiquiaari sesa na seru miishano, na sequereeri: “¡Quiaaqui jiyanoehua niishijia tama quia cuaqueyajaaja quia cojuanura!”

’Seetanjuanaa pueyanaa, Pueyaso niishiyashijia pueyari socua jiyanoehua niishijia cuhuashiqui quijia pueyajiniji. Nojori cutaraari niishijia maninia nojori miiniuria narta pueya, pueya paniniuria saniniuujia nojori.

<sup>9</sup> Naarate nia nacasuyanijia, naa capora nia quirijuhuj, maninia nia miiniuria pueya. Maja nia casami nia jamenu. Cunocujaari nareja Pueyaso niqutiosano niajaniya. Naacuajitij, capora nia quishacari mijiria jaara puequema, nia Jiyaniijaari nia tiuquinitianutianiya pueyaraaanu quishaqui jiyocuaaanu, jiyanoehua na shuquiriatiasacari niajaniya.

<sup>10</sup> Pueyano jaara jiyatesaare secaja casami cojuana na quiniuria, nojuaja jaara maninia cojuaquiaa cuno secaja casami, na camarnuuri nocua tiuuniutianiya. Naaratej, na camarnuuri queraatia casami cojuanara na jiyatenutianiya. Saniniuujia, cante jiyatesaare secaja casaa cojuana na quiniuriani, cuno pueyano jaara secaja na cojuasanojiniji nohuasejoquiaa jiyasohuaja, majaari tari nocua tiuushaanu. Nojuaja jaara jiyatesaare

queraatia casami cojuanara, naa nohuasejonutaniyajaariuhuj. <sup>11</sup> Naajuhuj, niaa jaara maninia jiitiaaquiquiaa mijiria casami, Pueyasoori niaacua tiyuaquiniutianiya seetanujanaa maninia jiyocuacaanuji casami nia jiitianura. <sup>12</sup> Naacujitij, niaa jaara tamonu pueyano casami cojuaaquiquiaa maninia, ¿Pueyasotucua taa niqutiore niaarano na riuriotacani? Maja cutaraari nia niqutiosaanu quiniutianiya.

<sup>13</sup> 'Poonitijosano pueyanoori maja na naata caapiqui jiyaniijara poonijionu. Jaara caapiqui jiyaniijiaraca quiri, tamonu samiritiaari, na panishacari tamonu. Naajuhuj, niquriyatu jiyaniijia tojijia quiniutianiya maniniaari, na soosacari tamonu. Naajuhuj pueyanaa, majaari nia naata Pueyasocua jiaatianu, cumaneecaacuanio. Niaa jaara cumaneeca panijia quiri, niaari cumaneecara poonijotesaanutaniya saaja. Naacujitij, Pueyasoori maja na naata nia poonitijionu nera.

<sup>14</sup> Fariseocuacaari jiyanoohua cumaneeca panijiaa quijia. Naaratej, nojori tojishacari Jesu sequesano, nojoriiri saaja na rerequeteree. <sup>15</sup> Jesuuri nojori sequeree:

—Niaacuajaari tama nia cuaqueyajaaja jiyatequiaa sapuenu pueyano maniniu nia niqushaanura. Pueyasocujaari nioojia niishiya. Niaari pueya jiyajenetequiaa nojori jyanishacari niaari Pueyaso panishano cutara, queraatia casami nia jiitiasacari. Saniniuujia, casaa pueya jiyatequiaa socua jyanohua na panishanorani, Pueyasoori cuno soya cutara.

*Moisés Rootasanoori coteenu quiquiaari, quiarijia quiya cutaraari quiarinio Pueyaso Rupaa*

<sup>16</sup> 'Moisés Rootasano, mariyata puetunu tariucuacaanu Pueyaso sequenu panishano caminiujiunaa pohuatasanojuanaari pueya tojtiasocoriquiano quiquiaari, Tiuquini-jiona Juan pohuatasanojuhuaj. Quiarijia saniniuujia, maninia rupaa Pueyasojiniijiri pohuatasaaquiaa, taa Pueyaso jyanooniu paniya pueyani, na muerasu nojori quiniuria. Quiarijiani, puetunu pueyajanaari jyanohua saniniuujia Pueyaso muerasu nojori quiniuria.

<sup>17</sup> 'Nio jiyari shaajeriquiano, jiya cajiniocuanio. Saniniuujia, tariucuacaanu pueyara Pueyaso sequesano caminiujiunaa pohuatasano cutaraari maja na shaajenu quiniutianiya quenaaja.

*Jesu niishitijosano, pueyano carteyaquiniuria necocua*

*(Mt 19.1-12; Mr 10.1-12)*

<sup>18</sup> 'Pueyano jaara necocua cartere tamonu maajitia na caminiuria, cuno pueyanoori jyanohua sesa miya Pueyaso niqiara. Naajuhuj, cante cartesano maajitia camiyani, cunoori sesa miyajuhuj.

*Jesu pohuatasano casamiriaca pueyanojiniji, Lázarojinijinio*

<sup>19</sup> 'Casamiriaca pueyanoori quiquiaari. Jyanohua maniniuqui toqueya cushiyojuaari, juhua jiyaniijianucua toqueya. Jyanohua na shuquiriniutia, puetunu juucajanaa queranacujuaari. <sup>20</sup> Jiyacaritij, casamiiju pueyanoori quijijajuhuj. Jyanohua sapueyaraca. Nojuajaari cuno casamiriaca pueyano tia tohuateyaji niojotasano puetunu juucajanaa. Na sesaari quijia Lázaro. <sup>21</sup> Nojuajaari casamiriaca miaquejajiniji totinijosano raacua miaquenu panijia juucua. Saaja sareyari na sapueya rimianacunuujua.

<sup>22</sup> Na nuhuaji, cuno casamiiju pueyanoori cusoquiaari. Pueyaso seyari na riquiaari supuetana Abrahamta na quiniuria, Pueyaso muerasurano shanohua quiquiojinia. Cuno casamiriaca pueyanoori cusoquiaarijuhuaj. Jamosaaquiaariiri. <sup>23</sup> Sesa miijiacarano quiquiojinia na quishacari, naquiya na miishacari tii, nojuajaari mauquiaari. Cuniqiji tucuacaanu niqirii Lázaroori, shuquiriaatia quiyano supuetana Abrahamta.

<sup>24</sup> Casamiriaca pueyanoori nacree: “¿Cua supuetana Abrahamnaa, cucua quia taraajere quenaaja! ¡Lázaro quia jiyarore cucua! ¡Cuaara na juaashiquia nacatu shiiria mohuacajinia! ¡Cua niti shiniajaquee quenaajacua! ¡Janiyari puera jyanohua naquiya miya nio manijiniani!”

<sup>25</sup> Abrahamri saaja na riucuaare: “Sanajanaa, quia niishiri taa jyanohua maninia quia quiquiaarini, pueyaracaanu jiyocua quia quishacari. Lázaroori saniniuujia jyanohua taraatia quiquiaari pueyaracaanu, jiyocua na quishacari. Lázaroori quiarijia niya cumanijiashiya. Quiaari saniniuujia naquiya miishiyacujua.

<sup>26</sup> Naajuhuj, jyanohua tucuaa tacroori pa tajinia quiya. Cunora, cante niqiji niuuniu

paniya cuniquijiria quiocuani, majaari na naata. Naajuhuj, cante quia quiquiojiniji niuuniu paniya niiquijiriani, majaari na naatajuhuj”. <sup>27</sup> Casamiriaca pueyanoori supuetana Abraham sequerohuacuhuj: “Naa naasucuj cua supuetana Abrahamnaa. Naajaa, quia secojiyanijia, Lázaro quia jiyarorohua cua que tiajinia. <sup>28</sup> Tii quiyajaari cua tapueyocuaca. Cinco tarajanuhuaracanijia. Lázaro cuaara nojori numooteera, maja nojori quejoosaanurajuhua nio saniitiosaqui quiquiojinia”. <sup>29</sup> Abrahamri na riucuree: “Nojoricujajaari Moisés Rootasano jiitaa, puetunu Pueyaso sequesano caminiujunias naajiotasanojuanaano. Quia tapueyocuaca cuaara tojtiaara cuno”. <sup>30</sup> Casamiriaca pueyanoori riucuree: “Naa naasucuatuhuj, cua supuetana Abrahamnaa. Naajaa, tamonu pueyano macunucujinijinio jaara muetarohua nojoricua, nojoriiri noojia tacatonutaniya sesa nojori miiniujiniji”. <sup>31</sup> Abrahamri saaja na riucuree: “Nojori jaara Moisés Rootasano tojtianu paniyaquiquiaa, Pueyaso sequesano caminiujunias naajionuutasanonio, majaari nojori tojtianu quiniutianiyajuhuj, macu pueyano jaara samiitiarohua”.

## 17

*Puereetaari quiniutianiya sesa miijiacara**(Mt 18.6-7, 21-22; Mr 9.42)*<sup>1</sup> Na nuhuaji, Jesuuri na pueya sequequiaari:

—Mijiria, pueyari pueyaracaanu sesa miitishaaquiaa. Jiyanojua taraatia quijiaari cuno, cante sesa miitirii tamonuni. <sup>2</sup> Jiyano pueyanoratej, maara socua maninia quiri nera, puereetuca saajia jaara na riquiajiniji morotasaare, shoniniacu caminia jiuujiajinia jartasocoriquiano. Jaara naa miishaaretej, maara maninia quiri, maja sesa miijiaara na jiyatenura niquiriyatu nio muerasuniyojuajinijinio. <sup>3</sup> Cunora, tama nia cuaqueyajaaja nia cojuare maja quenaaja sesa nia miitiniuria pueya.

’Quia tarajanu jaara sesa miiri, quia nacasurenoj. Nojuaja jaara taraajerohua sesa na miiniucua quijaniya, quia jiyanoorinijoj. <sup>4</sup> Nojuaja jaara sequeyarucua sesa miya quijaniya niquiriyatu juuca, naajaa, quia jiyanooriquia, nojuaja jaara quia sequere: “Sesa miirii quijaniyanijia. Cua jiyanoori quenaaja”. Nojuaja jaara quia pacutejore sesa miiniu siete cuno juucaja, naajaa, majaari na tarinitianu jiyanooniu.

*Pueyasocua tiuujia pueyanoori jiyanojua cumaacaraca*<sup>5</sup> Jesu saquiriojosano pueyari Jesu sequequiaari:

—Jiyaniijianaa, socua jiyanojua canaa quia tiutiri Pueyasocua, socua cumaaca canaa jiitianura.

<sup>6</sup> Jiyaniijia Jesuuri nojori riucuree:

—Pueyasocua nia tiuuniu jaara quiri quenaaja juhua mostaza jajauniyojua, jiyanojua shiitianiyojua, niaa jaara nio satuna jiyona sequere: “Niiquiji quia pacure. Moojinia quia nujuasee”, maara nia sequesano tojiri.

*Pueyasora poonijionatucua taa miijia quiriqianij*

<sup>7</sup> Naa jaara seruraca quiriqia, nojuaja jaara tiajinia tiuquiriohua quia cuhuariquia-jiniji tee na namitariquiaacuajani, quia seya cojuanujiniji soj, ¿niaatucua na sequere: “Miji, quia miaquesuhuaaja”? <sup>8</sup> Majaruhua. Naaari saaja na sequenutaniya: “¿Quiria quia sumature! Cua mianuutere coteenu. Cua raaterejuhuj. Cua miaquenu nuhuaji, quiocua saniniuuja miaquerohua. Quiocua raturuhujuhuj”. <sup>9</sup> Na nuhuaji, nia seru jaara puetunu nia sequesanojuanaa miiri, ¿niaateeri na sequequiaa “paacarasho”? ¡Maja! <sup>10</sup> Naajuhuj, niaa jaara puetunu Pueyaso sequesanojuanaa miiri, tama nia sequerejaaja: “Janiyari maja maninia seruni. Majaari tama cua niishitajajinijiaaja cua miiniu quiquiaa cua Jiyaniijiaara. Janiyari saaja pueyaracaanu paniquiaa cucua na tequejonura juhua naatujuaacuani”.

*Jesu naatanijiosacari diez pueya, lepraraca cusosuhua*

<sup>11</sup> Jesuuri Jerusalén tiacajiniara na pueyata quiariquiaacuuhuj. Jiyacari, Galilea jiya, Samaria jiya tajiniaaco quiariquiaari. <sup>12</sup> Quera na tiuquishacari shiitianiyojua tiacajinia,

diez pueya lepraraca cusosuhuari na naacuquiaari. Nojoriiri tucuacaanujijia Jesuucuaaji nujuatusee. <sup>13</sup> Nojoriiri Jesuucua nacaree:

—¡Niishitiojona Jesunaa, canaacua quia taraajere!

<sup>14</sup> Jesu niquishacari nojori, nojori sequereeri:

—Nia cuaqueya nia niquitishii pueyacuara secojonaa, taa supuetana Moisés sequerquiaaricuaajani.

Nojori canujuucuatucarijia, nojori cusonuuri shaajequee. <sup>15</sup> Tamonu nojorijinijinio niquishacari na cuaqueya tari cushiriiquii, nojuajaari Jesuucua tacateyarohua. Nojuajaari na rupaa paaretariquiaa na maniniuhuaqueetasacari Pueyaso. <sup>16</sup> Jesu cariquimiaji mojuquetaseeri. Jiyocuara naniriiri. Jesu sequereeri: “¡Paacarasho Jesunaa!” Cuno pueyanoori Samaria jiyajinijinio tahue quiquiaari. <sup>17</sup> Jesuuri na pueya niquiara na sequereeri:

—¿Majateeri diez cusosuhua naatanijiosaanu quirii? ¿Teeteeri narta naataconohua nueve pueyani? <sup>18</sup> ¿Saaja nio tahueteeri tacaterohua Pueyaso na maniniuhuaqueetanura?

<sup>19</sup> Na nuhuaji, Jesuuri cuno tahue sequereeri:

—Quia sanere. Quia quiaarohua. Quiaacuaja naatarohua cucua quia tiuuniuucua.

*Taa na quiniutianiyani, Jiyaniijia Cristo tiuquishacariuhua*

*(Mt 24.23-28, 36-41)*

<sup>20</sup> Fariseocuacaari Jesu nequesotaquiaari taacari Pueyaso Jiyarosocoriquiano niniutianiya jiyaniijiaara na quiniuria mijiriani. Jesuuri nojori riuacuaree saaja:

—Pueyaso Jiyarosano jitiiasacari na muerasu, majaari namijiata niquishano. <sup>21</sup> Majaari na naata sequesaaanu: “Niya quiya pa Jiyaniijia quiquio”, “Jati quiyaruhua”. Pueyasocuaajari tari niya jitiiaa na muerasu nia tajinia.

<sup>22</sup> Na nuhuaji, Jesuuri tama na pueyajaaja sequequiaari:

—Na nuhuaji, taraatia quishacariiri quiniutianiya. Niaari cua niquiniuucua jiaatiantaniya niaata cua quiniuria rupaquijia, taa niaata cua quiya quiarijiacuani. Majaari nia niquiniu quiniutianiya janiya. <sup>23</sup> Tamasacaari nia sequenutaniya: “¡Niya quiyacuaja nia Jiyaniijia!” Tamasacaari saniniuujia sequenutaniyacujua: “¡Nooj, jati quiyatej!” Majaari nia tojiniu jiyano pueyatej, nojori jaara naa nia sequeriquia. Majaari nojori neteyotanu najuhuanaj. <sup>24</sup> Mijiria cua tacatesacariuhua, cuno juuca, janiyari niquishaanutaniyani, naatej, taa miacana puetunu jiya cajiniocuajanaa niquishaaquiaacuani na nunujusacari.

<sup>25</sup> Saniniuujia, mijiria cua quishacarijia, janiyari coteenu jiyanoohua naquiya miishaanutaniyani. Nio pa quishacari pueyari cua paniyaquiniutianiya. <sup>26</sup> Quera cua tiuquiniu panishacariuhua mijiria, naa quiniutianiyari taa mijiria quiniaa pueya quiquiaaricuaa supuetana Noé quishacarini. <sup>27</sup> Naa quiquiaariiri cuno quishacari. Mijiria quiniaa pueyari juhuajaniya miaquenuujua. Raruujuaari. Juhuajaniya maaji camiyojuaari. Pueyari necojori camiyoteja. Pueyari naa juhuajaniya mijiioriquiaa Noé jaara tiuquiti- aquiaari na puereetuca buquejinia. Canashiyaquiji, maruuri jiyanoohua niquiaari. Puetunu mijiria quiniaajanaari cusonuquiaari pajaacajinia. <sup>28</sup> Naa quiquiaarijiuhua supuetana Lot quishacari Sodoma tiacajinia. Cuno pueyari juhuajaniya miaquenuujua. Raruujuaari. Casami masejojuaari. Juhuajaniya na casami niquitiojojuaari. Na cuhuariquiaca natoojuaari. Na tiacara tiajojuaariuhuj. <sup>29</sup> Naa juhuajaniya nojori quishacaritij, Lotri tohuataquiaari Sodoma tiacajiniji. Jiyacaritij, maniiri asufreta cojitishano juhua maru niquiaari jiyocuacaanuji. Puetunu cuno sesa miijiicajanaari manijinia catequiaari. <sup>30</sup> Naa quiniutianiyajaariuhua quera jiya puequesacari. Pueyari juhuajaniya quiniutianiya. Janiyari jiyacari canashiyaquiji tiuquiniutianihuani.

<sup>31</sup> Cuno juuca, pueyano jaara na tia cacojiria quiya, cuara roseyaquiiira na casami- icua tiajiniaaco. Naajuhuj, pueyano jaara na cuhuariquijajinia quiya, nojuaja cuara tacateyaquihuara na tiajinia. <sup>32</sup> Nia niishiriquia supuetana Lot niquiocua. Na mashishacari, nojuajaari ritia cusoquiaari na nijiniara na niquiniuucua, na casamiicua na taraajesacari. <sup>33</sup> Cante saaja shuquiriaatia mijiria na quiniuria niishiriojjuani, nojuajaari na nuhuaji jiyanoohua taraatia quiniutianiya Pueyasooju. Saniniuujia, cante



tama na cuaqueyajaaja panitiaja cua tojjiara na quiniuriani, nojuajaari pueyaracaanu shuquiriaatia quijiara jiyatesaanutaniya.

<sup>34</sup> Cua tojiri. Cuno niucujuhuj, caapiqui pueya jiuriatoosacari juucua na maquetujinia, niquiriyatujuaari rishaanutaniya jiyocuaaanura, Pueyaso pueyano na quiniuucua. Tamonuuri tiujiasaanutaniya saniitiosocoriquiano. <sup>35</sup> Cuno juucajuhuj, caapiqui maa-jipohua riiquiniuushacari jatiqui juucua, cucua tiuujaari tarajanu shuriucujaji rishaanutaniya. Tamonuuri tiujiasaanutaniya saniitiosocoriquiano. <sup>36</sup> Caapiqui pueya quishacari cuhuariquiajinia, cua pueyanoori rishaanutaniya. Tamonuuri tiujiasaanutaniya saniitiosocoriquiano.

<sup>37</sup> Jesu pueya tojishacari naa Jesu sequesantej, nojoriiri na nequesotaree:

—¿Tee nio quia pohuatasano niqishaanutaniyarini?

Jesuuri nojori riucaaree miriqui:

—Tee casaa moqueyani, mohuari tii rerejiya.

Naajuhuj, majaari quenaaja niquiriyatu Pueyaso tojiyashijia cureenu quiniutianiya saniitiosoo.

## 18

### *Jesu pohuatasano mashiquiojiniji, pueya nequesoreena pueyanojinijinio*

<sup>1</sup> Jesuuri na pueya pohuataquiaari nio miriqui pohuatasano nojori na niishitiojonura, nojori cuaara Pueyaso secojoora pueyaracaanu, nojori taacanuyaquiniutia. <sup>2</sup> Naa nojori sequereeri:

—Tamonu tiacajinia, pueya nequesoreena pueyanoori quijia. Pueyaso puereyashijia quijiaari, pueya rerequetejanio. <sup>3</sup> Cuno tiacajiniaja tamonu mashiquioori quiquiaarijihuaj. Mashiquioori cuno nequesoreenaacua rucanejojua pueyaracaanu. Na secojojaari sesa na miinia pueyano cuaara na niqutiohuara na casaa saniniuuja, sesa na miishanojiniji nojuaja. <sup>4</sup> Majaari nequesoreena tojiniu paniniu quijia pueyaracaanu cuno mashiquio. Naajaa, pueyaracaanu nocua na rucanejosacari, cuno nequesoreenaari socua tama sequequiaarijaaja: “Janiyari maja Pueyaso puerejani. Janiyari pueya tojiyashijia cutarani. <sup>5</sup> Naajaa, naa nio mashiquio taajetesacari janiya pueyaracaanutej, janiyari quiarijia na panishano miiniutianiya nerani, mariqui cua juaatijiore pueyaracaanuuri na nenecojosacari janiya”.

<sup>6</sup> Maninia na pueya niishiniuria na pohuatasano, Jiyaniijia Jesuuri naa nojori sequerohuacuhuj:

—Naa miiquiaariiri, cuno pueya nequesoreena seque. Jiyanohua pueya rerequeteja quiquiaariiri, naajaa, nojuajaari maninia miiquiaari cuno mashiquiora. <sup>7</sup> ¿Nia que Pueyasoorijiataj? ¿Niaateeri jiyaniya maja nojuaja tojiniu quiniutianiya na muerasu, canapuate na secojoquiaani juuca, niucuanio? ¿Pueyasoteeri nia sashitiniutianiyajaara? ¡Maja! <sup>8</sup> Nojuajaari maja na tarishiniu quiniutianiya. Ritia nia naacunutaniyari sesa nia mijiaca pueyacuaji. Sesa nia mijiacaari namishaanutaniya niaacua. Naaratej, majaari secojonu nia tarinitianu. Mijiria cua tiuquishacarihua, ¿janiyate Pueyasooocua tiuujiaca riuriatanutaniya naa pueyaracaanu secojonuujuacani?

### *Jesu pohuatasano miriqui Fariseo pueyanojiniji, Romano jiyaniijia cumaneeca masejojua-jinijinio*

<sup>9</sup> Jesuuri socua nio miriqui pohuatasano pohuataquiaari noo pueya niqiuara, canapuate tama na cuaqueyajaaja jiyaniijiani nojoriiri maninia pueyano. Naacuajitij, nojoriiri tamasaca pueya soojea, nojori jiyaniishacari cuno pueyari socua sesa mijiaca nojorijiniji. Cunora, Jesuuri nojori niqiuara naa pohuataquiaari:

<sup>10</sup> —Fariseo pueyanoori quiaquiaari Pueyaso Secojoua tiajinia na secojonura Pueyaso. Jiyacaritij, Romano jiyaniijia cumaneeca masejojua pueyanoori quiaquiaari Pueyaso na secojonura tijiuhuj. <sup>11</sup> Fariseo pueyanoori nujuariquiaa Pueyaso na secojosacari. Naa sequeriquiaari: “Pueysonaa, paacarasho janiyari maja juhua tamasaca pueyani. Tamasaca cutaraari nohuasenujuaca, sesa mijiaca, maaji porocujuhuj. Naajuhuj,

shuquiriaatia quiyanijia, janiyari maja sesa miijiani juhua nio pueyanojua niya cuta secojiyani, cumaneeca masejona pueyanoni. <sup>12</sup> Janiyari caapiqui juuca miaqueyaquiquiaani puetunu semaanajanaa cua shuqiritiniuria quiajaniya. Naajuhuj, janiyari pueyaracaanu puetunu cua masesanojinijianaa niqutioquiaa quiarani, taa Moisés rootaquihaaricujani”. <sup>13</sup> Cumaneeca masejonaari saniniuujia tucuacaanu nijuasee. Na secojosacari, majaari quenaaja na maunu quiriquiaa jiyocuacaanu. Tama nojuajaari na jiriquia piquiriquiaa na taraajenuta sesa na miishanojiniji. Naa sequereeri: “Pueyasonaa, cucua quia taraajere. ¡Cua jiyanoori! ¡Sesa miijianijia!” Naa secujoquiariiri. <sup>14</sup> Seetanujuanaa nia sequeyanijia, cumaneeca masejonaari Pueyaso jiyanooshano tacateyarohua cutara. Fariseo pueyanoori saniniuujia jiyanoaquisshoo tacateyarohuacujua. Naacuajitij, cante tama na cuaqueyajaaja jiyateya juhua maninia pueyano na quiniuria tamajaajani, nojuajaari cararosaanutaniya. Saniniuujia, cante sesa na miishano seetaaquijiani Pueyaso jiyanooniuria nojuajani, Pueyasoori cuno pueyano jiyatenutaniya seetanujuanaa sesa miyaquijia na quiniuria.

*Jesu niasacari na juaashiquia conaajaacua*

(Mt 19.13-15; Mr 10.13-16)

<sup>15</sup> Jiyacaritij, conaajaari poosaariquiaa Jesuucua, Jesu nianura nojoriicua na juaashiquia, Pueyaso jiitianura maninia nojori. Jesu saquiriojosano pueya jaara niqiquiaari conaaja pooshiyano Jesuucua, nojoriiri na poonaa juaarii. <sup>16</sup> Jesuuri saaja conaaja poonaa sequeree, conaaja cuara nocua poosaaria. Na nuhuaji, na pueya sequereeri:

—Naatujoori cuara poosaaria cucua. Maja na poonaa tenujunu. Cante Pueyaso muerasura quiniu paniyani, nojori cuara jiyateera tama na cuaqueyajaaja juhua nio naatujooriria. <sup>17</sup> Seetanujuanaa nia sequeyanijia, cante tama na cuaqueyajaaja jiyateyaquiya juhua naatujooriria Pueyaso rupaacua na tiuuniuriani, cuno pueyanoori maja na naata Pueyaso muerasura na quiniu.

*Casamiriaca pueyano pocoojosacari Jesuta*

(Mt 19.16-30; Mr 10.17-31)

<sup>18</sup> Tamonu Judiocuaca camarnuuri Jesu nequesotaquiaari:

—Maninia niishitiojonanaa, ¿taa cua miiniutianiyani, jiya puequesacari cua samiitianishaanura, pueyaracaanu quiijara cua quiniuria Pueyasotani?

<sup>19</sup> Jesuuri na riucuaaree:

—¿Casaara quia sequeya janiya maninia pueyanotani? Saaja Pueyaso cutaraari seetanujuanaa maninia. Majaari socua tamonu quiniu. <sup>20</sup> Pueyanonaa, quiaacuajaari Moisés Rootasano niishijia. Naa naajiotasanocuajaari quiya: “Maja quia camishoo maaji numuetucunu. Maja monu. Maja nohuasenu. Maja tamonuucua saquiriojotanu quia sapojonuta. Quia que, quia nucua tojjia quia quiri”.

<sup>21</sup> Pueyanoori Jesu riucuaaree:

—Janiyacuaajaari cua naatujuaajiniji puetunu cuno tojjiajanaani.

<sup>22</sup> Naa na sequesacaritij, Jesuuri na sequeree:

—Quiyajaari niquiriyatu casaa quia miishoojua. Nio quia miiri: puetunu quia jiitiasanojuanaa quia niqutiojore cumaneecara. Na nuhuaji, casamijiuniucua pueya cuno cumaneeca quia niqutiojore nareja. Naacuajitij, quiaari jiyanoohua casamiriaca quiniutianiya cutara jiyocuacaanu. Na nuhuaji, quiocua nimiohua cutara, cua pueyano quia quiniuria.

<sup>23</sup> Na tojishacari Jesu sequesano, nojuajaari jiyanoohua taraajequee, jiyanoohua queraatia casamiriaca na quishacari. <sup>24</sup> Jesu niquishacari nojuaja taraajeyano, Jesuuri na pueya sequeree:

—Casamiriaca pueyara, jiyanoohua jiyajenetaari Pueyaso muerasu nojori quiniuria.

<sup>25</sup> ¿Camelloteeri na naata cusupuetaja cuhuoco tamajiria tajiniu? Maja na naata. Naajuhuj, casamiriaca pueyanora, socua jiyanoohua jiyajenetaari Pueyaso muerasu na jatanishaanura.

<sup>26</sup> Pueya tojishacari naa Jesu sequesantej, nojoriiri naa na nequesotaree:

—¿Canteeri Pueyaso muerasura quiniutianianitioj?

<sup>27</sup> Jesuuri nojori riucuaaree:

—Maja pueya na naata tama na cuaqueyajaaja jiyatenu Pueyaso muerasu nojori quiniuria. Naajaa, Pueyaso cutaraari na naata.

<sup>28</sup> Pedroori Jesu sequeree:

—Jiyaniijianaa, ¿canaarijataj? Canaari puetunu canaa jiitiasanojuanaa tiujiaquiaarini canaa nuhuajiniuria quiajaniya.

<sup>29</sup> Jesuuri na riucuaaree:

—Seetanujuanaa nia sequeyanijia, cante na panishano casaa tiujiaquiaari Pueyasora na poonijionurani: na tia, na que, na nucua, tapueyocuaca, necocua, necohua, nojuajaari socua jiyanoehua queraatia masenutaniya mijiria na quishacarijia. <sup>30</sup> Na nuhuaji, samiitianishano quiniutianiyari pueyaracaanu shuquiriaatia na quiniuria Pueyaso ship-inishocoriquiano quiarinio jiyajinia.

*Jesu pacutesacari pohuatanu, nojuaja mosaanutaniya*

*(Mt 20.17-19; Mr 10.32-34)*

<sup>31</sup> Jesuuri saaja na doce saquiriojosano pueya jiyataaree tamocora. Naa nojori sequereeri:

—Paari quiarijia Jerusalén tiacajinia quiaani. Janiyari quiniqui puetunujuanaa mi-ishaanutaniyani taa tariucuacaanu pueyara Pueyaso sequesano caminiujuuniana sequequiaaricuaja janiyajinijini. <sup>32</sup> Naacuajitij, janiyari tahua niqitiosaanutaniyani. Nojoriiri cua macaatiutianiya. Taraatia cua miitiuniutianiyari. Cua riocojotunutaniyari. <sup>33</sup> Cua piquitiuniutianiyajaariuhuj. Na nuhuaji, cua motunutaniyari. Naajaa, jiuujianaraca juucajinia, janiyari samiitianutaniuhuanu.

<sup>34</sup> Majaari Jesu pueya niishiniu quiriquiaa quenaaja na sequesano. Majaari nojori niishiniu quiriquiaa casaa Jesu sequeriquiaani. Juhua miriqui sequesanoori quiriquiaa nojoriria.

*Jesu jeeecasacari cariojuaru pueyano Jericó tiacajinia*

*(Mt 20.29-34; Mr 10.46-52)*

<sup>35</sup> Na pueyata Jesu quishacari tari cateca Jericó tiacaacuara, cariojuaru pueyanoori nuu shuucuaji cajiriquiaa, cumaneeca na masejonura pueya tajishacari nuacuaco.

<sup>36</sup> Cariojuaru tojishacari queraatia pueya tajiyano, pueya nequesotareeri:

—¿Casaatejanojoni?

<sup>37</sup> Pueyari na sequeree:

—Nazaret tiacajinijinio Jesucuaja tajiya.

<sup>38</sup> Cariojuaruuri nacaquee:

—¡Jesunaa! ¡Supuetana David niquiohuacuajinio supueno pueyanonaa! ¡Cucua quia taraajere quenaaja!

<sup>39</sup> Jesu puetanaa pueyari na juaarii na sanaajanura juucua. Nojuajaari saaja socua jiyanoehua nacaree:

—¡Supuetana David niquiohuacuajinio supueno pueyanonaa! ¡Cucua quia taraajere!

<sup>40</sup> Jesu tojishacari nojuaja, nujuaseeri. Jesuuri pueya sequeree cariojuaru cuaara jaatucusaaria nocua. Cariojuaru tiuquishacari nocua, Jesuuri na nequesotaree:

<sup>41</sup> —¿Casaa quia paniya cua miiniuria quiajanianiyani?

Cariojuaruuri Jesu riucuaaree:

—¡Jiyaniijianaa, niquijia quini panihuanijia!

<sup>42</sup> Jesuuri na sequeree:

—¡Niquijia quia quiriohua! Quia namijiacuaja tari jeequerohua cucua quia tiuushacari.

<sup>43</sup> Jiyacaritij, cariojuaruuri maninia niquijia quiqui. Jesu nuhuaji sacuaareeri na shuquiritianuta Pueyaso. Puetunu Jesu miishano niquiniaajanaari Pueyaso maniniuhuaqueetariquiaa.

## 19

*Jesu pocoojosacari Zaqueota*

<sup>1</sup> Jesuuri Jericó tiacajinia tiuquiiioquiaari na pueyata. Tiaca jiuujiaaco quiariquiaari.  
<sup>2</sup> Cuno tiacajinia quiquiaariiri casamiriaca pueyano. Na sesa quiquiaari Zaqueo. Zaqueori Roma tiacajinia quijia jiyaniijiaara cumaneeca masejonaa camarnu quiquiaari.  
<sup>3</sup> Nojuajaari Jesu niishiniu panijia juucua. Majaari na naata niquiniu quiriquiaa Jesu, puera jiyanohua pueya quiniucua Jesu shocua. Naajuhuj, Zaqueori puera posucuashi quijia. <sup>4</sup> Cunora, Zaqueori netequiaari Jesu tacoji. Nu shuucujaji sicómoro naanaacua macaseeri, maninia na niquiniuria tiji Jesu, jaara cunoco tajimia. <sup>5</sup> Jesu tajishacari Zaqueo cariquiaco, Jesuuri nocua mauree. Na sequereeri:

—Zaqueonaa, ritia quia rosemohua! Janiya quiarijia quia tiajinia maquenutaniyani.

<sup>6</sup> Zaqueori ritia rosemohua. Jesu tiuquiniitiree na tiajiniaari jiyanohua na shuquiriniutia. <sup>7</sup> Tamasaca pueya jaara Jesu niquiquiaari Zaqueo tiajinia tiuquiyano, puetunu nojorijianaari Jesu sesacanu coteequiaari. Tama sequeturiquiaajaarijia: “Cuno pueyanoori sesa miijia pueyano tiajinia tiuquishii”. <sup>8</sup> Na nuhuaji, Zaqueori nujuaree. Jesu sequereeri:

—Seetanujuanaa quia sequeyanijia, Jiyaniijianaa, janiyari quiarijia quiocua tiuuriini. Naacuajitij, janiyari casamiijuniucua nareja niquitiojonutaniya puetunu cua jiitiasano cajiniocuajiniijianaani. Naajuhuj, janiya jaara puera cumaneeca masecanu tamasa pueyajiniji cua sapojonutani, janiyari nojori niquitiojonutanihua socua jiyanohua queratía cumaneecani cua nohuasesanojiniji nojori.

<sup>9</sup> Jesuuri na sequeree pueya niquiara:

—¡Quiarijiani, nio tiajinia quiniaa pueyari tari jiyanooshaaree! Nio pueyanocujaari supuetana Abraham niquiohuacuajinio supuenojuhuj. Nojuajaari cucua tiuuri taa Abraham tiuquiaari Pueyasocuaacuaani. <sup>10</sup> Janiyacujaari cunora mijiria niquiaarini, tashucano pueya cua pajenura, nojori cua jaariutianura Sesaaca.

*Miriqui Jesu pohuatasano diez cumaneecajiniji*

(Mt 25.14-30)

<sup>11</sup> Tii quiniaa pueyari Jesu pohuatasano tojtitariquiaa. Jesuuri tari cateca quiriquiaa Jerusalén tiacajiniji. Pueyari jyaniriquiaa Jesuuri Israel pueya jiyaniijiaara quiniutianiya tari, Pueyaso muerasu na jiitianura mijiria. Nocujaji, Jesuuri nojori pohuataree nio miriqui pohuatasano, nojori na niishitiojonura. <sup>12</sup> Naa nojori niquiara pohuataree:

—Tamonu jiyaniijia niyanuuri quiquiaari. Nojuajaari tucuacaanu tamonu jiyajinia quiaquiaari jiyaniijiaara na jiyatesaanura. Jiyaniijiaara na jiyatesaanu nuhuaji, nojuajaari tacateriquianohua quiriquiaa, narta pueya jiyaniijia na quiniuria. <sup>13</sup> Na nuhuajiria, nojuajaari diez na seya sequeree nocua nojori nijionura. Nojuajaari puetunu nojorijianaa niquitiojoree niquiriyatu cumanee, orojiniji shipinishano. Nojori sequereeri: “Nio cumanee nia poonitijore, janiya cuara tiuquiriohuajaatiinijaj”. <sup>14</sup> Na nuhuaji quiaqueeri. Na jiyajinijinio pueyari maja na niquiniu paniniu quijia cuno pueyano. Cunora, nojoriiri pueya jiyaramiquirii na nuhuaji, jiyaniijiajanaa nojori sequenura: “Maja canaa paniniu cuno pueyano, canaa jiyaniijia na quiniuria”.

<sup>15</sup> Naajaa, nojuajaari saaja jiyatesaaree jiyaniijia na quiniuria. Na nuhuaji, na jiyajinia tacateyarohuari. Jaara tiuquishuhua, na cumaneeca na niquitiojosano seya sequereeri, nocua nojori nijionura. Nojuajaari niishiniu paniriquiaa taa cumaneeca socua nojori reratequiaarini, nojori poonitijosacari na niquitiojosano cumaneeca. <sup>16</sup> Coteenu seruuri nocua nimiaa. Na jiyaniijia sequeereeri: “Cua jiyaniijianaa, cua poonitijosacari quia niquitiosano cumanee janiya, janiyari socua diez cumaneeca reratecanuni”. <sup>17</sup> Na jiyaniijiaari na sequeree: “¡Maniacujaja! ¡Quiaacujajaari maninia cua seru! Quiaari secaja cua niquitiosano quiajaniya poonitijioriquiaa shitimia quiria. Naaratej, janiyari quia jiyatenutaniya diez tiaca jiyaniijiaara quia quiniuriani”. <sup>18</sup> Na nuhuaji, tamonu na seruuri nocua nimiaajuhuj. Nojuajaari na jiyaniijia sequeree: “Cua jiyaniijianaa, cua poonitijosacari quia niquitiosano cumanee janiya, janiyari socua cinco cumaneeca

reratecanuni”. <sup>19</sup> Na jiyaniijjaari na sequereejuhuj: “Quiaari cinco tiaca jiyaniijjara quiniutianiya”.

<sup>20</sup> 'Na nuhuaji, tamonu na seruuri nocua nimiaajuhuj. Na jiyaniijja sequeeseeri: “Jiyaniijjanaa, niya quiya quia cumanee quia niquitiosano janiya. Janiyari na cojuacanu maniniani, toqueraujinia jiuniosano. <sup>21</sup> Janiyari naa miiquianuni cua pueresacari quiajaniya. Janiyari niishiyani, quiaari quiarta pueyacia taraajeyashijia. Quiaari tamasa racatasanojiniji poojua. Quiaari tamasa natoosanojiniji senoojuajuhuj”. <sup>22</sup> Na jiyaniijjaari na juaarii: “Sesaacanaa, tama quia sequesanojaja janiya quia nequesoreenutaniyani. ¿Naatee? ¿Quiaateeri niishiquianu janiya pueyacia taraajeyashijiani? ¿Janiyateeri tamasa racatasanojiniji poojuani? ¿Janiyateeri tamasa natoosanojiniji senoojuajuhuj? <sup>23</sup> Quiaa jaara jiyaniquianu janiya naa miijiani, ¿casaara cua cumanee quia niquitioyaquiquianu cumaneeca cojuanaarini? Nojori jaara cua cumanee poonitijiocanu, janiya maara socua queraatia na riuriatasuhuanu, cua tiajinia cua tiuquishacariuhua”. <sup>24</sup> Cunora, na jiyaniijjaari tii quiniaa pueya sequeree: “¿Cua cumanee nia jaariutiare cuno! Nia niquitiore cua maninia seru, cante diez cumaneeca jiitiaacujani”. <sup>25</sup> Nojoriiri na sequeree: “Jiyaniijjanaa, ¿casaarateni? Nojuacuaja tari diez cumaneeca jiitiaa”. <sup>26</sup> Jiyaniijjaari saaja nojori riucuaare: “Seetanujuanaa nia sequeyanijia, cante tari jiitiaani, nojuajaari socua niquitiosaanutaniya. Cante na jiitiaaquiyani, secaja na jiitiasanoori puetunujuanaa jaariutiasaanutaniya, cucua tiuyashijia na quiniuucua. <sup>27</sup> Quiarijia, cua paraa saniniuujia, cuno pojori canapueete cua paniyaquiquianu nojori jiyaniijja cua quiniuriani, miji nia jayore nojori. Niya cua niqiara nia puecoore cua ruuretajaca seque”.

*Jesu tiuquishacari Jerusalén tiacajinia*

(Mt 21.1-11; Mr 11.1-11; Jn 12.12-19)

<sup>28</sup> Nio na pohuatanu nuhuaji, Jesuuri na pueya puetaareecuuhuj Jerusalén tiacajiniara. <sup>29</sup> Jaara cateca quiriquiaa tari Betfagé tiaca, Betania tiacanio, Olivo cuhuariquia tuhuananujuhuj, Jesuuri caapiqui na pueya sequeree:

<sup>30</sup> —Cuno shiitianiyojua tiacajinia nia quiaare, pa tacoji niquishiyani. Niaa jaara tiuquishii, niaari burro riuriatanutaniya morotasano, pueyano cajishoojua na nijinia. Niaa jaara na niquishii, niocua na samaacartasee. Niaari na jaatucumohua miji. <sup>31</sup> Pueya jaara nequesotare nijaniya casaara nia samaacartaanoj, niocua na riucuaare: “Jiyaniijja na paniya”.

<sup>32</sup> Jesu pueyari quiaaree. Nojoriiri na riuriatasee taa Jesu sequequiaaricujani. <sup>33</sup> Nojori samaacartasacari burro, na camaruhuari nojori nequesotaree:

—¿Casaara nia samaacartaa canaa burroni?

<sup>34</sup> Nojoriiri na riucuaare:

—Jiyaniijja na paniya.

<sup>35</sup> Na nuhuaji, nojoriiri na jaatucuyarohua Jesuucua. Jesu pueyari na toqueya niojoree burro nijinia Jesu cajijiara. Na nuhuaji, nojoriiri Jesu cajitirii na nijinia. <sup>36</sup> Na quiasacari Jerusalén tiacajiniara, pueyari na toqueya muevojiaari nucuaco Jesuucujia. <sup>37</sup> Nojori rosetanu panishacari Olivo cuhuariquia tuhuananujiniji, puetunu Jesu pueyajanaari juhuacatecara nacoquiaari nojori shuquiriniutia. Nojoriiri Jesu maniniuuaqueetariquiaa puetunu na cumacata na miishanojuanaa nojori niquiniuucua. Nojoriiri cunora jyanohua shuquiritariquiaa Pueyaso. <sup>38</sup> Nojoriiri naa nacooriaquiaa:

—¿Pueyaso cuara shuquiritiiria pa Jiyaniijja, Pueyaso Jiyarosano na quiniuucua! Pueyaso pocua taraajerohuani. Pa jiyanooriohuani. ¡Nojuajaari jyanohua maninia! ¡Pa shuquiritiarenoj!

<sup>39</sup> Cuniqui pueya tajinia quiniaa Fariseocuaca tojishacari naa nojori sequesanoj, nojoriiri Jesu sequeree:

—¿Niishitiojonanaa, quia pueya quia sanaajare, maja naa nojori sequenura!

<sup>40</sup> Jesuuri saa sequereejaa:

—Seetanujuanaa nia sequeyanijia, nio pojori jaara sanaajetare, ¡sairi saniniuujia nacoanutaniyacujua!

<sup>41</sup> Tari Jesu quishacari Jerusalén tiaca shuriucua, na niquishacari cuno tiaca, Jesuuri cuno tiacajinia quiniaacua nujuqueree. <sup>42</sup> Cunora, juhua pueyano sequeree Jerusalén tiacaari:

—Jerusalén tiacanaa, quia niishitiriquia quiarijiani, casaa quia paniya jiyanooshano quia quiniuriani, shuquiriaatia quia quiniurijuhuj. Taraatia quijjanaa, quia Jiyanooriquianoori juucua niya quiya. Majaari quia niishiniu nojuaja, juhua nimishitiu quia quishacari. <sup>43</sup> Cunora, na nuhuajiiri jiyanohua taraatia quiniutianiya quiara. Quia paraari quia mataconutaniya quia shocuaqueya, na cosenura maninia quiajaniya quia mashiyaquiniucuaaji. Naacuajitij, quia paraari quiocua juhuacunutaniya na mi-aquejonura quiajaniya. <sup>44</sup> Quiaari jiyareta sureesaanutaniya. Quia tiacajinia quiniaari puecoosaanutaniya. Quia tiacaari puetunu niyartasaanutaniyajanaa. Majaari tamonu saajia cureenu quiniutianiya quenaaja tamonu saajia caco maano. Quiaari naa mi-shaanutaniyatej quia niishiyaquiniucua, Pueyasoori quiocua niquiaari najuhuanaj, quiocuaaji na tacunura juucua. Quiaari saaja na ruuretacanu.

*Jesu jaacasacari seya niquitiojonaa Pueyaso Secojoua tiajiniji*

*(Mt 21.12-17; Mr 11.15-19; Jn 2.13-22)*

<sup>45</sup> Na nuhuaji, Jesuuri Pueyaso Secojoua tiajinia tiuquiquiaari na pueyata. Nojuajaari juhuacatecara pueya tohuatanijioree, canapuate na seya niquitiojoriquiaacuajani Pueya-soocuara puecoosocoriquiano. <sup>46</sup> Jesuuri nojori sequeree:

—Tariucuaaanu Pueyaso Rupaajinia naa naajiotasaaquiaariti Pueyaso sequesano: “Cua tiaari pueya secojonuujua janiya”. ¡Niaari saniniuujia na jiyatecanu nohuasenu-juuaca quiquiora!

<sup>47</sup> Puetunu juucajanaa, Jesuuri jiyacari pueya niishitiojoriquiaa Pueyaso Secojoua tiajinia. Narta Judiocuaca jiyaniijianucuaari saaja na monu paniriquiaa. Pueyacuara secojonaa jiyaniijianucua, Moisés Rootasanojiniji niishitiojonaa, mariyata narta Judiocuaca jiyaniijianucuanio, puetunu nojorijianaari tari rojotooriquiaa juucua taa na motunutaniya Jesuni. <sup>48</sup> Puetunu pueyajanaari saaja shamaatia tojitiariquiaa puetunu Jesu sequesanojuanaa. Cunora, majaari cuno jiyaniijianucua naata monu quiriqiaa Jesu.

## 20

*Pueya nequesotasacari Jesu, cante na jiyaronani*

*(Mt 21.23-27; Mr 11.27-33)*

<sup>1</sup> Tamonu juuca, Jesuuri Pueyaso Secojoua tiajinia niishitiojoriquiaa. Pueya niquiara pohuatariquiaari taate nojori naata Pueyaso muerasura quiniuni. Jiyacaritij, pueyacuara secojonaa jiyaniijianucuaari Jesuucua nijiomaa. Moisés Rootasanojiniji niishitiojonaari nojoritia nijiomajuhuj, narta Judiocuaca camarucuanio. <sup>2</sup> Nojoriiri Jesu nequesotaree:

—¿Cante quia jiyatecanu Pueyaso Secojoua tia jiyaniijia quia quiniuriani? ¡Canaa quia riucuaare! ¿Cante quia jiyaronani?

<sup>3</sup> Jesuuri nojori sequeree saniniuujia:

—Janiya nia nequesotanu panijuhuj. Cua riucuaare. <sup>4</sup> ¿Cante Juan jiyaroquiaari na tiuquinijionura pueyani? ¿Pueyasote na jiyaroquiaari, tama narta pueyajaaja soj?

<sup>5</sup> Nojoriiri juhuacatecara tamajaaja pocoojoquiaari. Tama sequetooriquiaajaarijia:

—¿Taa pa riucuanutaniyani? Paa jaara sequereni: “Pueyaso na jiyaroquiaari”, nojuajaari pa sequenutaniya: “¿Casaara nocua nia tiuyaquiquiaariirini?” <sup>6</sup> Saniniuujia, paa jaara na sequereni: “Juancuaja nareja pueya jiyarosano quiquiaari”, puetunu pueyajanaari pa jacunutaniya saitia na puecoonura pajaniya. Nojoricuajaari sequequiaa: “Juanna seetanujuanaa Pueyaso sequenu panishano caminiujiunia quiquiaari”.

<sup>7</sup> Nojoriiri cunora Jesu riucuaare:

—Johuj. Maja canaa niishiniu canaquitijia Juan jiyaroquiaari na tiuquinijionura pueyatej.

<sup>8</sup> Naaratej, Jesuuri nojori sequeree:

—Janiyajuhuj, majaari cua sequenu quiniutianiya nijaniya, cante cua jiyaroquiaarini naa cua miiniuriatej.

*Miriqui Jesu pohuatasano sesa miijiaca poonijionaajiniji*  
(Mt 21.33-44; Mr 12.1-11)

<sup>9</sup> Na nuhuaji, Jesuuri pueya niishitiojonu coteerohuacuhuj nio miriqui pohuatasano. Sequereeri:

—Tamonu pueyanoori cuhuariquiajania uva natoouquiaari. Na nuhuaji, na niqutioquiaari tamasaca pueyari, nojori cojuanura nera. Na camaruuri tucuacaanu quiaaree, tii na shocotejonura marijia. <sup>10</sup> Uva quishacari noshuriujua, saniya cuhuariquia camarujuaanaari na seru jiyaroree cuhuariquia cojuanaa pueyacia. Jiyarosaareeri tiji na masenura na camarurajanaa, uva carojotasanojiniji. Na camarujuaanaacuajaari tarijia pocoojoquiaari cuhuariquia cojuanaa pueyata, taa nojori niqutionutaniya na carojotasanojinijini. Cuhuariquia camaru seru tiuquishacari, ¡cuhuariquia cojuanaari na piquitiurii saaja! Na jiyaroturohua juhuasuuri. <sup>11</sup> Cunora, cuhuariquia camarujuaanaari tamonu na seru jiyaroree. Cuhuariquia cojuanaari na miitiurii sesajuhuj. Na saarijitureeri. Na piquitiuriiri. Na jiyaroturohua juhuasujaariuhuj. <sup>12</sup> Cuhuariquia camarujuaanaari socua tamonu na seru jiyaroree nojoriicua. Nojoriiri sesa miitiurii nojuajuhuj. Na nuhuaji, nojoriiri na caponeeree cuhuariquiajiniji tariucua naatishano.

<sup>13</sup> Naaratej, cuhuariquia camaruuri tama sequereajaaja: “¿Taa cua miiniutianiyarini? Quiyanuniyujua jiyaroreeraquij. Cuno pojori jaara cua panishano niyanu niqutiuri, maja naasucua nojori rerequetenu quiniutianiya nojuaja”. <sup>14</sup> Saniniuujia, cuhuariquia cojuanaa jaara cuhuariquia camaru niyanujuaanaa niquirii nojoriicua niyano, tama nojorijiaarijia sequetooree: “Nojuacuaja cuhuariquia camarura quiniutianiya na que niti, na que jaara shaajeyariquia. ¡Pa morej! Paari nio cuhuariquia camarura quiniutianiya saniniunijia”. <sup>15</sup> Naacuajitij, cuno cuhuariquia cojuanaa pueyari cuhuariquia camaru niyanu jaatiurii cuhuariquiajiniji. ¡Cuniqui na motureeri!

Naa nojori na pohuatanu nuhuajitij, Jesuuri pueya nequesotaree:

—Naa nojori miiniucua neyanutej, ¿taa na que miiniutianiya cuno sesa pueyarini?  
<sup>16</sup> Seetanujuaanaa nia sequeyanijia, nojuajaari nocua quianutaniya nojori na puecoonura. Na nuhuaji, na cuhuariquia niqutionutaniya tamasaca pueyari, nera nojori cojuanura cutara.

Pueya tojishacari nio, nojoriiri sequequiaari:

—¡Juhuej! ¡Pueyaso cuara naa miyaquiiriatej!

<sup>17</sup> Jesuuri nojori niqiniijoree. Nojori sequereeri:

—¿Naatee? ¿Nio naajiotasanoorihuj, tariucuacaanu Pueyaso Rupaajiniani? ¿Niaate niishiya casaa na sequeyani? Naa sequeyariquij:

“Saitia tianaa pueyari tamonu saajia soojotanutaniya, nojori jyanishacari cuno saajia sesarujajau. Na nuhuaji, cuno saajiaari socua panishano saajiaari jiyatesaanutaniuhua”.

<sup>18</sup> Cante cuno saajiaacua tiuriyani, nojuajaari juhua rashiquijiniutianiya. Cuno saajia jaara pueyanoocua tiyare, cuno pueyano jacanajonutaniyari. Shahuej.

<sup>19</sup> Jiyacaritij, pueyacuara secojonaa jyanijianucua, mariyata Moisés Rootasanojiniji niishitiojonaari Jesu quianu panirii juucua. Nojoricuajaari niishirii, Pueyaso saquiriojosano Israel pueya jiitianaa nojori quiniucua, Jesuuri miriqui pohuatariquiaa nojorijiniji, tianaajiniji na pohuatasacari. Naajaa, jiyacaritij, majaari nojori quiatunu quiquiaari Jesu, nojori pueresacari Jesu panijiaa pueya.

*Jiya jyanijia cuara niqutiosaaria na sequesano cumaneeca*  
(Mt 22.15-22; Mr 12.13-17)

<sup>20</sup> Naaratej, nojoriiri tamasaca pueya jiyaramiquiquiaari Jesuucua, sapuenu juhua maninia pueya niquishano. Cuno pueyari jiyaramiquishaaquiaari Jesu nojori pocuatenura sesa juucua, nocuara tonujusaanura. Jesu jaara nojori riucuaquiaari sesa, maara Romano jyanijia niqutiosaaquiaari saniitiosocoriquiano. <sup>21</sup> Naacuajitij, cuno pueyari Jesu nequesotaquiaari:

—Niishitiojonanaa, canaari niishiyani, quiaari maninia niishitiojona. Majaari sesa quia sequesano. Naajuhuj, majaari rimiajata quia niqiniu pueya. Quiaacuajaari

seetanujuanaa niishitiojoquiaa, taa Pueyaso paniya canaa miiniuriacuajani. <sup>22</sup> Cunora, canaa quia sequere taa canaa miiniutianiyani. Roma tiacajinia quijia jiyaniijiaari pa sequequiaari Judiocuaca cuaara cumaneeca niqutiojooora nera, na jiitiasano pueya pa quishacari. Naaratej, ¿maniniateeri pa miiniuria na sequesano?

<sup>23</sup> Jesuuri niishiquii nojoriiri nojuaja nequesotariquiaa najuhuanaj, nojori sapojonuta. Cunora, nojori sequereeri:

<sup>24</sup> —Cua niqutiri quia cumanee. ¿Niooriuhuj? ¿Cana naaquiti nocuani? ¿Cana sesate nocua naajiotasanoni?

Jesu riuacuatureeri:

—Cunocujaja canaa sequesano Roma tiacajinia quijia jiyaniijia César naaqui, na sesajuhuj.

<sup>25</sup> Jesuuri nojori sequereeri:

—Jiyaniijia César cuaara tama na casaajaaja niqutiosaaria. Nojuacuajaari na camaru. Saniniuujia, Pueyaso nia niqutiore cutara nerano tama na casaajaaja. Nojuajaari pa camarnu.

<sup>26</sup> Saaja maninia Jesu riuucasacari pueya niqiuara nojori, majaari nojori naata nocuara tonujunu quirii. Nojoriiri saniya jiuujateree Jesu riuucasacari saaja maninia nojori. Naacuajitij, nojoriiri socua sanaajetaree.

*¿Paate samiitiaconutaniuhuani?*

*(Mt 22.23-33; Mr 12.18-27)*

<sup>27</sup> Na nuhuaji, noojiaqueya Saduceocuacajinijinioori Jesuucua niqiuari. Saduceocua-caari jiyaniijia macunucua pueya maja na samiitiaconu quiniutianihua. Naaratej, nojoriiri Jesu sequereeri:

<sup>28</sup> —Niishitiojonanaa, supuetana Moisés cuajaari pa rootaa na naajioneejinia, pueyano jaara cusoyare mueyaju, tarajanu cuaara camiiria mashiquio, mueya na mueratenura tarajanu niti. <sup>29</sup> Tamonu mashajaari seis tapueyocucaraca quiquiaari. Nojuajaari jiyapueranu quiquiaari. Coteenu camiquiaariiri. Nojuajaari cusoquiaari muetuhuoju. <sup>30</sup> Cunora, na nuhuajishanaari na mashiquio camirii. Nojuajaari muetuhuoju cusoquiaarijuhuaj. <sup>31</sup> Naaratej, neyaca tarajanuuri mashiquio camiquiaarijuhuaj. Nojuajaari muetuhuoju cusoquiaarijuhuaj. Puetunu cuno mashiquiorijianaari naa camiyoquiaari cuno maajitia. Puetunu nojorijianaari cusonuuquiaari muetuhuoju. <sup>32</sup> Na nuhuaji, pueya mashiquioori shaajequiaarijuhuaj. <sup>33</sup> Naacuajitij, macunucua jaara samiitiacorohua, ¿teyano cuno siete neyacaajinijiniote seetanu neyacajanaa quiniutianiyani? Cuno mashiquiocuajaari puetunu cuno siete pueya niqiuocua quiquiaari.

<sup>34</sup> Jesuuri nojori riuacuaree:

—Mijiria pa quishacarijia, canuu, maajipohuari camiyoquiaa. <sup>35</sup> Saniniuujia, majaari noo pojori camiyonu quiniutianiya canapute samiitianijiosaanutaniuhuacuajani, maninia quijia nojori quiniucua Pueyaso niqiuara mijiria. <sup>36</sup> Majaari nojori shaajenu quiniutianihua. Nojoriiri shaajeyashijia quiniutianiya juhua Pueyaso seya. Nojori samiitiaconuucua macujiniji, cunora, nojoriiri Pueyaso muerasujuanaa quiniutianiya cutara. <sup>37</sup> Supuetana Moisés cuajaari pa niishitiquiaari, macunucuaari samiitianijiosaanutaniuhua. Moisésri naa naajiotaquiaari Pueyaso sequesano nojuaja nequeru casaja noshiyanojinijitij. Pueyasoori naa sequesquiaari Moisés:

“Janiyari quia supuetana Abraham Jiyaniijiani, quia supuetana Isaac Jiyaniijiano, quia supuetana Jacobo Jiyaniijiajuhuaj”.

<sup>38</sup> Naacuajitij, paari niishiyani, puetunu Pueyasoocua tiuujia shaajecono pueyajanaani, nojoricuajaari saminiucua quiya Pueyasora. Pueyasoori maja macunucua Jiyaniijia. Na pueya shaajeconocujajaari saminiucua quiya nera cutara.

<sup>39</sup> Noojiaqueya Moisés Rootasanojiniji niishitiojona pueya tojishacari naa Jesu sequesantej, nojoriiri Jesu sequereeri:

—Maniniacuajaari quia sequesano, Niishitiojonanaa.

<sup>40</sup> Naa Jesu riuhuanesacari saaja maninia nojoritij, majaari socua pueya nequesoreenu paniniu quiriquiaa nojuaja.



*¿Cante Cristo supuetanani?*

*(Mt 22.41-46; Mr 12.35-37)*

<sup>41</sup> Jesuuri naa nojori nequesotaree saniniuujia:

—¿Casaara na sequesaaquiaacuaraarini, Pueyaso Jiyarosanonaari supuetana David niquiohuacuajinio supuenutaniya? <sup>42-43</sup> Supuetana Davidjanaacuajaari naa naajio-taquiaari na jaaquequejoneejinia:

“Jiyaniiija Pueyasoori cua Jiyaniiija Cristo sequequiaari: ‘Cua miaquetajara quia cajirijiaara, janiya cuaara quia paraa shocotare puetunujuanaajaatijia’ ”.

<sup>44</sup> ¿Cristotucua taa David niquiohuacuajinio supuereni? Davidcuajaari na sequeya “cua Jiyaniiija”.

Cuno pueyari maja na naata na riucuanu quiriquiaa.

*Jesu numootesacari na pueya, Moisés Rootasanojiniji niishitiojona pueyacuaji*

*(Mt 23.1-36; Mr 12.38-40; Lc 11.37-54)*

<sup>45</sup> Puetunu pueyajanaa tojitiasacarijia Jesu, Jesuuri naa na saquiriojosano pueya sequeree:

<sup>46</sup> —Tama nia cuaqueyajaaja nia cojuare Moisés Rootasanojiniji niishitiojona pueyacuaji, nia miyaquiniucuaaji taa nojori miiquiaacuaani. Nojoriiri tucuaque toqueya cushiniu maniniucuaquiaa na rucuanejotajara pueya niquiara, pueya shootianura nojori. Nojoriiri paniquiaa pueya saruhuatanura nojori juhua tojishano pueya, nojori rucuanesacari tiaca jiuujiajinia curotasano cajitiucuaajinia. Nojoriiri socua panishano cajitiucuaajinia cajiniu maniniucuaquiaa Pueyaso Secojojua tiajinia, tamasaca tiajinia-juhuaj, nojori jaara masuusaare queranacunura. <sup>47</sup> Naajuhuj, nojoriiri mashiquiopue tiaca masequiaa secaja cumaneecata nojori sapojonuta. Naa jiyasohuaja nojori miiniu nuhuajitij, pueya niquiara, nojoriiri najuhuana tucuyocua secojoquiaa Pueyaso, pueya jiyaniuria nojori maninia pueya cutara. Naa nojori miiniuucuatej, nojoriiri jiyanhua saniitiosano quiniutianiya.

## 21

*Casamiiju mashiquio niquitiosacari na cumanee juuranee Pueyasora*

*(Mr 12.41-44)*

<sup>1</sup> Pueyaso Secojojua tiajinia, Jesuuri casamiriaca pueya shootiariquiaa na cumaneeca niojiyano cumaneeca racataja quiquiojinia, nojori niquitiosano Pueyasora. <sup>2</sup> Jesuuri tamonu casamiiju mashiquio niquiriijuhua caapiqui cumaneeniyojua niaano tiijihuj. Na niasanoori nareja cobrejiniiji shipinishano cumaneeca quiquiaari. <sup>3</sup> Jesuuri na pueya sequeree:

—Seetanujuanaa nia sequeyanijia, cuno casamiiju mashiquioori socua queraatia niquitioree Pueyaso, cuno casamiriaca pueyajiniiji. <sup>4</sup> Puetunu cuno pojorijianaari saaja na cureeno cumaneecajiniiji niquitiojiya puetunu nojori panishanojuanaa nojori masejonu nuhuaji. Cuno mashiquio cutaraari puetunu na miaajaara na masetajara cumaneecajanaa niquitioree.

*Jesu pohuatasacari, Pueyaso Secojojua tia niyartasaanutaniya*

*(Mt 24.1-2; Mr 13.1-2)*

<sup>5</sup> Noojiaqueya tii quiniaa pueyari pocoojoriquiaa Pueyaso Secojojua tiajiniji. Jiyanhua shanhua saitia shipinishano quiriquiaari. Nojoriiri na shootiariquiaa, naajuhuj taa na maniniushitishaaquiaari nareja pueya niquitiojosano casamitiani. Jesuuri nojori sequeree:

<sup>6</sup> —Puetunu cunojuanaa niaa na niquiyani, tamacari niyartasaanutaniyari. Majaari quenaaja tamonu saajia cureenu quiniutianiya tamonu caco maano. Puetunu niyartasaanutaniyajanaari.

*Taa nio jiya puequenu panishacari quiniutianiyan*

*(Mt 24.3-28; Mr 13.3-23)*

<sup>7</sup> Na pueyari Jesu nequesotaquiaari:

—Niishitiojonanaa, ¿taacari nio tia niyartasaanutaniyarini? ¿Casaa canaa niqiniutianiyarini, canaa niishiniuria quia sequesanoori quera tohuateya?

<sup>8</sup> Jesuuri nojori riucuaaree:

—Tama nia cuaqueyajaaja nia cojuare niaa mariqui sapojosaareeri. Queraatia sapojonuujua pueyari supenuutaniya. Nojoriiri sequenuutaniya: “¡Janiya Cristoni, Pueyaso Jiyarosano! ¡Nio jiya quera puequeya!” Niaa jaara naa sequesaretej, majaari nia tojiniu cuno sapojonuujua. <sup>9</sup> Naajuhuj, majaari nia puerenu niaa jaara tojiri tamonu jiyajiniinio pueyari tamasaca jiyacajiniji pueyata miaquetoojiya, naajuhuj, pueya jaara juaatioquiaa tama nojori jiyaniijia nojori jatanurajaaja. Naa quiniutianiyari coteenu. Naajaa, juhuanojuaja maja nio jiya puequesacari.

<sup>10</sup> Jesuuri naa nojori pohuatariquiaa socua:

—Tamonu rupaa pocuajacaari miaquetoojonutaniya tamaatia rupaa pocuajacata. Naajuhuj, tamonu jiyajiniinio jiyaniijiaari miaquetoojonutaniya tamonu jiyajiniinio narta jiyaniijiaata. Naa queraatia miaquetoojonuuri quiniutianiya. <sup>11</sup> Rijiaari jiyanohua jiuuquiujutianutaniya queraatia jiyacajinia. Jiyanohua miaajenuuri quiniutianiya queraatia tamonu jiyacajiniajuhuaj. Paaqueja cusonuuri quiniutianiya niya, tamaquicua-juhuj. Naajuhuj, jiyanohua puereeta casaari niqishaanutaniya jiyocuacaanu, mijiria quiniaa niishiniuria jiya puequenuraari tari catecanoya.

<sup>12</sup> Cuno puereeta quiaquishacarijia, niaari quioosaanutaniya naquiya nia miishaanura, cua pueya nia quiniuucua. Niaari jaatucusaanutaniya Pueyaso secojonuujua tiajiniaqueya nequesoresocoriquiano. Niaari nujuatejuacajinia nujuatejosaanutaniya. Niaari nia pueya camarucuaacua, mariyata jiyaca jiyaniijianucuaacua jaatucusaanutaniya nequesoresocoriquiano. Niaari naa miishaanutaniya nia pohuatanuucua janiyajiniji pueya niquiara. <sup>13</sup> Naacuajitij, nia naata cuno jiyaniijianucua niquiara pohuatanu janiyajiniji. <sup>14</sup> Nioojia nia cajitiri, maja juhuacarijia nia niishiriojonura taa nia riucuanutaniya nojorini. <sup>15</sup> Janiyacuajaari jiyacari nia niishitiojonutaniyani taa nia riucuanutaniyanoj, mariyata casaa nia pohuatanutaniya jiyanohua cua niishitiajatani. Niaari nojori sanaajanutaniya maninia nia rihuanesacari saaja. Nia paraari maja na naata nia sequesano rerequetenu quiniutianiya. <sup>16</sup> Jiyacarijuhuaj, tama nia queyajaarijia nia tacartanutaniya, cua pueya nia quiniuucua. Nia tapueyocuacaari nia tacartanutaniyajuhuj, nia jiyasoocujiniinio supueno pueyajuhuj, nia rupuenaanio. Nojoriiri noojiaqueya niajanijiniinio puecoonutaniya. <sup>17</sup> Puetunu mijiria quiniaa pueyajanaari nia niqiniu paniyaquiniutianiya cua pueya nia quishacari. <sup>18</sup> Naajaa, majaari nia puerenu. Majaari quenaaja niquiriyatu muesu shaajenu quiniutianiya nia nacajiniji, Pueyaso jaara paniyaquiri. Pueyaso jaara naa nia muesu cojuaacuaa, ¿maatucua casaara cojuaaquiri saniya niajanianiyani? <sup>19</sup> Naaratej, rejeretajaca nia quiri. Niaa cutaraari shacantuca quijiacara jatanishaanutaniya pueyaracaanu nia rishiniuria, niaa jaara cumaatia nujuatare pueya miishacari sesa niajaniana.

<sup>20</sup> Niocua niishiri Jerusalén tiaca tari niyartasaanutaniya, niaa jaara na paraa niquiri puetunu na shocuaqueyajanaa maano. <sup>21</sup> Jiyacaritij, canapuete Judea jiyajinia quiyani, cuno pojori cuaara mashiiria tuhuananuhucua. Canapuete Jerusalén tiacajinia quiyani, nojori cuaara ritia mashiiria tiji. Canapuete na cuhuariquajinia quiyani, nojori cuaara tacateyaquiuhuara Jerusalén tiacajinihua. <sup>22</sup> Cuno quishacari, jiyanohua saniitiosacariiri quiniutianiya. Jiyacaritij, puetunu Pueyaso Rupajinia naajiotasanojuanaari tohuateenutaniya. <sup>23</sup> Jiyanohua taraatia quiniutianiyari noo maajipohuara, canapuete manajaatohua quia jiyacariini, mariyata canapuete conaaja supueja jiiitiaani. Jiyanohua naquiya quiniutianiyari cuno quishacari nio jiyajinia. Nio jiya pueyari jiyanohua saniitiosaanutaniya. <sup>24</sup> Noojiaqueya nojorijiniinioori puecoosaanutaniya tahua miaquetootosacari nojoritia. Tamasaca nojorijiniinioori quioosaanutaniya. Nojoriiri puetunu jiyacajiniarajanaa rijiosaanutaniya poonitijosocoriquiano. Taucuacaari Jerusalén tiaca jiiitianutaniya tama nojoririjaaja, Jerusalén tiaca nojori jiiitanu cuaara puequerejaatijia, taa Pueyaso sequequiaari tamajacujani.

*Taa na quiniutianiyani Jesu tacatesacariuhua*  
(Mt 24.29-35, 42-44; Mr 13.24-37)

<sup>25</sup> Mijiria quiniaa niishiniuria jiya quera puequeya, nojoriiri puereeta casaa niqiniutianiya pananujinia, racajinia, riyajiniajuhuaj. Shoniniacu caminiaacuaji shiriquitiuniutianiyajaariuhuj, jyanohua na queyocuasacari. Nojoriiri cushitiiniutianiya na pueretunutajujuaj, jyanohua cojuata shoniniacu caminia cajiniuucuasacari. <sup>26</sup> Mijiria quiniaari cusojonuunutaniya na puerenuta, nojori niishiriojosacari taa nio jiya miishaanutaniyani. Puetunu jiya cajiniocua Pueyaso shipinishano casaajanaari jiuuquiutiasaanutaniya jyanohua. <sup>27</sup> Jiyacaritij, mijiria quiniaari cua niqitiuniutianiya cohuaja najacajinia niyano, jyanohua shacantuuca cua cumaacata. <sup>28</sup> Naaratej, niaa jaara nio cua pohuatasano niqiri tari coteyano, niocua tama cumaquitioorejaaja. ¡Niocua timiri! ¡Niaacuajaari quera rijiosaanutaniya niqiji, pueyaracaanu cuata nia quiniuria!

<sup>29</sup> Jesuuri nojori pohuataree nio miriqui pohuatasanojuhuaj:

—Higo naana nia niqiri, tamonu jaranacujua naananio. <sup>30</sup> Na jaamasucua jaara mueratuure, niaari niishiya, tacarejonuqui quera quiniutianiya. <sup>31</sup> Naajuhuj, niaa jaara puetunu cua pohuatasanojuanaa niqiri tari tohuateyano, niocua jiyacari niishiri, janiyari quera tiuquiuhuani, Jiyaniijajanaa cua quiniuria.

<sup>32</sup> Seetanujuanaa nia sequeyanijia, puetunu cua sequesanojuanaari tohuateenutaniya Pueyaso tojtiaashijiaca pueya puequeyaquishacarijia. <sup>33</sup> Jiya cajiniocua, mariyata nio jiyari shaajenutaniya. Cua sequesanoori saniniuujia puetunu tohuateenutaniyajanaa cutara, taa cua sequeyacuajani.

<sup>34</sup> Tama nia cuaqueyajaaja nia cojuare niaa mariqui cua tojiyashijiacara quiriohuari. Naaratej, majaari shuquiriaatia nia quiniu paniniu juucua nia queranacunuunuta, nia mashaasequejonuta, mijiria casaacua nia niishiriojonutano. Maja naa nia quiniu, janiya mariqui nia cariyatureeri, jeenucuasoo nia quishacari, canashiyaquiji cua tiuquishacariuhua. <sup>35</sup> Cua tiuquishacariuhua, juhua norijiotaja quiniutianiyari puetunu mijiria quiniaa pueyarajanaa, taa norijiotaja canashiyaquiji majaacuaani. <sup>36</sup> Cunora, cucuaji jeenucuasano nia quiri juhuacarijia. Pueyaso nia secojore pueyaracaanu, maja naquiya nia miishaanura cuno taraatia quishacari, taa cua sequeyacuajani, mariyata juhuajaniya nia nujuatunura cua tacoji, cua nequesoreesacari puetunu pueyajanaa.

<sup>37</sup> Jesuuri puetunu juucajanaa niishitiojua Pueyaso Secojoua tiajinia. Saniniuujia, niucua quiojuaari Olivo cuhuariquia tuhuananujinia tii na quiniuria. <sup>38</sup> Puetunu pueyajanaari tariquicuaji quiojua Pueyaso Secojoua tiajinia, nojori tojiniuria Jesu pohuatasano.

## 22

*Judiocuaca camarucua rojotoosacari Jesu nojori quianura*  
(Mt 26.1-5, 14-16; Mr 14.1-2, 10-11; Jn 11.45-53)

<sup>1</sup> Quera Pascuara queranacunuusacari quiquiaari, pueya miaquesacari pan na poreetajaaju shipinishano. <sup>2</sup> Jiyacari, pueyacuara secojonaa jiyaniijianucua, mariyata Moisés Rootasanojiniji niishitiojonaari rojotooriquiaa juucua taa nojori motunutaniya Jesuni, nojori juaatiyaquiniutia pueya. Nojoriiri narta pueya pueretujuaca, jyanohua queraatia pueya paniniuucua Jesu.

<sup>3</sup> Jiyacaritij, Satanásri Jesu pueyano Judas Iscariote jiuujiajinia tiuquiquiaari. <sup>4</sup> Nojuajaari pueyacuara secojonaa jiyaniijianucuaacua quiaquiaari, Pueyaso Secojoua tia cojuanaa jiyaniijianucuaacuajuhuj. Judasri cuno pojoritia pocoojoquiaari. Nojori sequereeri nojuaja na naata nojori quiatenu Jesu. <sup>5</sup> Nojoriiri shuquiririi. Cunora, Judas sequetureeri taa cumaneeca nojori niqitionutaniya nojuajani. <sup>6</sup> Judasri jaarajaaja nojori sequesano tojirii. Jiyacaritij, Judasri juhuacatecara niishiriojoquiaari taa na quiatenutaniya Jesu jiyasohujani.

*Jesu miaquesacari na nuhuajiria na pueyata*  
(Mt 26.17-29; Mr 14.12-25; Jn 13.21-30; 1 Co 11.23-26)

<sup>7</sup> Poreetajaaju pan miaquenu juucaari tari quiquiaari. Cuno juucajuhuaj, borre-  
goori mosano quijia, Pueyaso niqiara miaquesocoriquiano Pascuara queranacusacari.

<sup>8</sup> Cunora, Jesuuri Pedro jiyaroree Juannio, nojori miaquesocoriquiano nojori ma-  
jeetenura. Nojori sequereeri:

—Nia quiaare. Borrego nia majeeteseecuaa pocuaji, pa miaquesocoriquiano quiarijia  
Pascuara.

<sup>9</sup> Nojoriiri na nequesotaree:

—¿Tee quia paniya canaa majeetenurani?

<sup>10</sup> Jesuuri nojori riucuaaree:

—Niaa jaara Jerusalén tiacajinia tiuquishii, niaari tamonu pueyano riuriatanutaniya  
mohuaca taquitiaano patacojinia. Niocua na nuhuaji rupaamia na tiajinia. <sup>11</sup> Cuno  
tiajinia na tiuquishacari, niocua cuno tia camaru sequesee: “Canaa niishitiojona naa quia  
sequeya: ‘¿Teete sohuacani, cua pueyata cua miaquejara quiarijia Pascua niucuaani?’ ”

<sup>12</sup> Nojuajaari nia niqitiniutianiya puereetuca sohuaca, nataco na tiajinia, tariucua  
jeenucuasano. Niocua cuniqui miishii puetunujuanaa pa miaquesocoriquiano.

<sup>13</sup> Jesu pueyari quiaaree. Nojoriiri puetunujuanaa riuriatquiaari taa Jesu seque-  
quiaari nojoricuajani. Nojoriiri tii miishii puetunujuanaa, Pascua niucua nojori miaque-  
socoriquiano.

<sup>14</sup> Jaara tari quiquiaari Pascuara miaquesacari niucua, Jesuuri na saquiriojosano  
pueyata cajitiushii miaquejajinia. <sup>15</sup> Jesuuri nojori sequeree:

—Janiyari jiyanohua niaata miaquenu paniriquiaa nio Pascua niucua, pueya moy-  
aquishacarijia janiya. <sup>16</sup> Seetanujuanaa nia sequeyanijia, majaari socua cua miaquenu  
quiniutianiya Pascuara, janiya jaara tiuquiriohuajaatijia puetunu Pueyaso muerasuran-  
otajanaa. Jiyacari cutara, paari jatiqui miaquenutaniyani, Jiyaniijajanaa cua quishacari.

<sup>17</sup> Na nuhuaji, Jesuuri ratujua pataree. Pueyaso sequereeri:

—Paacarasho nio mashacara.

Na pueya sequereeri:

—Jajaa, nio nia masetare. Nia rature puetunu niajanijajanaa. <sup>18</sup> Seetanujuanaa  
nia sequeyanijia, majaari socua cua ratunu quiniutianiya uva caacajiniji, janiya jaara  
tiuquiriohuajaatijia, Jiyaniijajanaa cua quiniuria puetunu Pueyaso muerasurajanaa.

<sup>19</sup> Na nuhuaji, Jesuuri pan ririi. Pueyaso secojoree nocuaraari. Na necasereeri. Na  
pueya na niqitiojoreeri. Nojori sequereeri:

—Nioori cua cuaqueya niaacuara mosocoriquiano. Niocua naa miiriquia pueyara-  
caanutej, nia niishiriojonura janiya.

<sup>20</sup> Nojori miaquenu nuhuaji, Jesuuri ratujua patareejuhuaj. Naa sequereeri:

—Cua nanacaari niaacuara shoonutaniya nia jiyanooshaanura seetanujuanaa. Majaari  
socua seya nanaca panishaanu quiniutianiya. Quiarijiani, saaja cua nanaca shoonuucua,  
Pueyasoori pueya jiyanooniutianiya.

<sup>21</sup> Cua tojitiare. Quiarijiani, cante cua tacartanutaniya pueya na motenura janiyani,  
nojuajaari cuata miaqueya. <sup>22</sup> Janiyari naa miishaanutaniyani taa janiyajiniji juhuacarijia  
pohuatasaaquiaaricujani tariucuacaanu Pueyaso Rupaajinia. Saniniuujia, cua tacar-  
tanaari jiyanohua taraatia quiniutianiya naa na miiniuucua janiya.

<sup>23</sup> Jesu pueyari jiyacari juhuacatecara nequesoreetooree tama nojorijiaaja:

—¿Canteeri na tacartanutaniyani?

*Cante seetanujuanaa jiyaniijajanaani*

<sup>24</sup> Jesu pueyari tama juayonuutariquiaajaacujua, teyano nojorijinijiniote jiyaniijia-  
janaani. <sup>25</sup> Jesuuri nojori sequeree saaja:

—Mijiria, jiya jiyaniijianucuaari jiyanohua jiyaramiquiniu niishijia nojori jiidiasano  
pueya, juhua nojori poonitijosano pueya. Nojoriiri tama nojorijinijiaaja sequeja:  
“Canaari maninia miiquiaa canaa pueyani”. <sup>26</sup> Nijaniya saniniuujia, majaari naa nia  
quiniu juhua nojorijia. Cante socua tojishano pueyano quiya niajanijajinijini, nojuaja  
cuara tama na cuaqueyajaaja jiyateyaquiiria na cumaaca paaretaja pueyacu. Cuara  
quiiria jacaria pocuaja. Naajuhuj, cante jiyaniijajanaa quiya niajanijajinijini,  
nojuaja cuara jiyateera tama na cuaqueyajaaja juhua nia serura. <sup>27</sup> ¿Taa nia sequeyani?

¿Cante jiyaniijajanaani? ¿Miaqueyano pueyanotee? ¿Na mianuutena soj? ¡Miaqueyano pueyanocuaja! Naajaa, janiyari juhua nia seru quiquiaa niaarani, maninia cua miiniuria nijaniya. Naajuhuj, naa maninia miijiaca nia quiriquia.

<sup>28</sup> 'Niaacuajaari pueyaracaanu cua cojiriquiaa janiya jaara saniniujiushaariquiaani. <sup>29</sup> Naaratej, janiyari nia jiyatenutaniya jiyaniijianucua nia quiniuriani, taa cua Que jiyatequiaari janiyacuaani, Jiyaniijia cua quiniuria. <sup>30</sup> Naacuajitij, niaari cua miaquejajinia cajitiuniutianiya cuata nia miaquejonura, cuata nia raruujunurajuhuj, Jiyaniijajanaa cua quishacari. Niaari mariyata jiyaniijianucua quiniutianiya, supuetana Israel doce niqiuoacuajinio supueno pueyapue nequesoreenaa nia quiniuria.

*Jesu sequesacari Pedro, nojuaja nocuaji seetanutaniya*

*(Mt 26.31-35; Mr 14.27-31; Jn 13.36-38)*

<sup>31</sup> Jiyaniijia Jesuuri Pedro sequequiaari:

—Simónnaa, cua tojiri. Satanásri niaacuara sequerucuaa Pueyaso, jyanohua na saniniujiuniuria nijaniya. Naacuajitij, niaari jyanohua saniniujiushaanutaniya, naatej, taa trigo quejooshiya jiyocuaaanucuaani, paratu panura na cocua. <sup>32</sup> Janiyari saniniujia Pueyaso secojoree quiocuara cutarani Simónnaa, cucua tiuuniu quia tarinitiaaquini-uucujaji. Naacuajitij, quiaa jaara quioojia tacatorohua cucua, quiocua cuarta pueya cumaquiriohuajuhuj, nojori tiuuniuria seetanujuanaa pueyaracaanu cucua.

<sup>33</sup> Simónri Jesu sequeree:

—¡Cua Jiyaniijianaa, quiaa jaara nujuatejojuajinia nujuatesaare, janiya cuaara nujuatesaaria quiatajuhuaj! ¡Quiaa jaara mosaare, naajaa, janiya cuaara cojiritiasaaria quiajanijuhuj!

<sup>34</sup> Jesuuri na sequeree:

—Pedronaa, seetanujuanaa quia sequeyanijia, caacaraja niunijiyaquishacarijia quiarjia, quiaari tari naa cucujaji seetanu caminiujiuniutianiya pueya niqiara: “¡Maja cua niishiniu Jesu!”

*Quera Jesu miishacari taraatia*

<sup>35</sup> Jesuuri na pueya nequesotaree:

—Janiya jaara nia jiyaramiquiquiaari Pueyaso rupaa nia pohuatanura caashoquee-juni, cumaneeca quiquioju, sapatuujunio, ¿niaateeri nia panishano casaa niqitioy-aquishaaquiaari?

Nojoriiri Jesu riucuaaree:

—Maja. Canacuajaari puetunu canaa panishanojuanaa niqitiojosaaquiaarini.

<sup>36</sup> Jesuuri nojori sequeree:

—Quiarjia saniniujia, cante caashoqueracani, cuaara na pataara. Cante cumaneeca quiquioracani, cuaara na pataarajuhuj. Cante nijiniaquetucujaja mueruu jiitiaaquiyani, cuno cuaara niqitioora na shiniquiaacuaji toque, nijiniaquetucujaja mueruu na masenura na toque samitia. <sup>37</sup> Seetanujuanaa nia sequeyanijia, tariucuaaanu Pueyaso Rupaajinia janiyajiniji naajiotasanoori tohuateenutaniya. Janiyajiniji naajiotasanoori naa sequeyatej: “Nojuajaari jyanishaaree sesa miijia, sesa miijiacata na teetesacari”. Puetunu janiyajiniji naajiotasanojuanaari tari tohuateya taa na naajiotasaaquiaaricujani.

<sup>38</sup> Nojoriiri Jesu sequeree:

—Jiyaniijianaa, niya quiya caapiqui nijiniaquetucujaja mueruu.

Nojori riucuaaree:

—Tariucujaja.

*Jesu secojosacari Pueyaso, Getsemaní cuhuariquiajia*

*(Mt 26.36-46; Mr 14.32-42)*

<sup>39</sup> Na nuhuaji, Jesuuri tohuataquiaari tiajiniji. Olivo cuhuariquia tuhuananujiniara quiaareeri. Nojuajaari cuniqui quianura jiitiquiaari. Na saquiriojosano pueyari na nuhuajiyaree. <sup>40</sup> Na tiuquishacari tii, Jesuuri nojori sequeree:

—Pueyaso nia secojore, niaa mariqui sesa miiriiri niaa jaara saniniujiushaare.

<sup>41</sup> Na nuhuaji, Jesuuri tamajaaja quiaaree socua nojori tacoji, juhua saajia tishaqui, pueyano jasacari. Tii mojoquetasee Pueyaso secojonuraari. <sup>42</sup> Naa secojoreeri:

—¡Cua Quenaa, maja cua miiniu paniniu naquiya! Naajaa, janiya cuaara miyaquishaaria taa cua paniyani. Janiya cuaara miishaaria cutara taa quia paniyacujani.

<sup>43</sup> Jiyacaritij, Pueyaso seruuri jiyocuaaanuji nocua nimiaa na cumaquiniuria. <sup>44</sup> Jesuuri jiyanhua naquiya miiriquiaa. Noojiaari quera jiaqueriquiaa na tacaaniutia. ¡Jiyanhua, jiyanhua secojoriquiaa Pueyasoori! Cunora, na paneyacaari puereetujuaaca juhua nanaca quiriquiaa, na caatesacari jiyocua. <sup>45</sup> Na secojonu nuhuaji, Jesuuri sanerohua. Na pueyacia tacateyarohuari. Nojori niquishuhua maquetiuyano saajaari, puera nojori taraajenuucua. <sup>46</sup> Jesuuri nojori sequeree:

—¿Casaara nia maquetiuyani? Nia saneecuatere. Pueyaso nia secojore na cojuanura nijaniya, maja sesa nia miiniuria niaa jaara saniniujushaare.

*Judiocuaca camarucua quiasacari Jesu*

(Mt 26.47-56; Mr 14.43-50; Jn 18.2-11)

<sup>47</sup> Jesu pocuasacarijia na pueyata, queraatia pueyari jiyacari nocua tiuquishii. Judasri cuno pojori puetariquiaa. Nojuajaari Jesu doce saquiriojosano pueyajinijinio quiquiaari. Judasri Jesuucua nimiaajanaa. Na saruhuataseeri na nujuunuta. <sup>48</sup> Jesuuri na sequeree:

—Judasnaa, ¿quiaate tama cua tacartaajaaja, quia nujuunuta sapojonu janiya?

<sup>49</sup> Jesu pueya niquishacari casaa cuno pueya miiniu paniriquiaani, nojoriiri Jesu nequesotaree:

—Jiyaniijianaa, ¿canaate nojori miaqueyani?

<sup>50</sup> Tamonu nojorijinijinioori pueyacuara secojonaa jiyaniijia seru pirii na mueruuta. Saaja na miaquetajara numoco jaatereeri. <sup>51</sup> Jesuuri na sequeree:

—¡Tariucuaja! Maja naa miiniu.

Jesuuri numoco ririi. Na ruporohuari. <sup>52</sup> Judasta quiriquiaari pueyacuara secojonaa jiyaniijianucua, Pueyaso Secojojua tia cojuanaa jiyaniijianucujuhuj, Judiocuaca camarucuanio. Nojoriiri Jesuucua nijioquiaari na quianura. Jesuuri cuno pojori sequeree:

—¿Casaara cucua nia nijioree nijinaquetucuaja mueruutani, macacatanio nia quianura janiyani? ¿Janiyateeri nohuasejojuani, naa nia nijionura cucuatej? <sup>53</sup> Pueyaracaanu cua quishacari niaata Pueyaso Secojojua tiajinia, majaari nia quianu quijia janiya. Naajaa, quiarijia cutaraari nijaniyara, nia panishano nia miiniuria janiya. Quiarijiani, Sesaacaari cumaacaraca na panishano na miiniuria.

*Pedro seetasacari Jesujiniji*

(Mt 26.57-58, 69-75; Mr 14.53-54, 66-72; Jn 18.12-18, 25-27)

<sup>54</sup> Jiyacaritij, nojoriiri Jesu quiaaree. Na jaatucutiuyareeri pueyacuara secojonaa jiyaniijia tiajinia. Pedroori tucuaaanuji na nuhuajiriquiaa. <sup>55</sup> Jiyacaritij, pueyari jiyaniijia tia carijiniacuma mani noshitirii. Na shocua cajitiuriohuari. Pedroori nojori tajinia cajishiijuhuaj. <sup>56</sup> Cuno jiyaniijia serujinijinioni, niyacoori Pedro niquirii mani jitiuyano. Nojuajaari Pedro shootariquiaa. Na nuhuaji, niyacoori Pedro shishirii. Sequereeri:

—Noo pueyanoori cuno quiasano pueyanota quijiajuhuaj.

<sup>57</sup> Pedroori seetaree. Naa sequereeri:

—Niyacoona, ¡majaari quenaaja cua niishishano cuno pueyano!

<sup>58</sup> Na nuhuaji, tamonu pueyanoori Pedro niquiriijuhuaj. Nojuajaari cuno jiyaniijia seru quiriquiaajuhuj. Pedro sequereeri:

—¡Quiaaqui cuno pojorijinijinio pueyanojuhuj!

Pedroori saa sequereejaa:

—¡Maja, pueyanonaa! ¡Janiya maja nojorijinijinioni!

<sup>59</sup> Pasaja na tarishiniu nuhuaji, tamonu pueyanoori sequenu pacuterohua:

—Nio pueyanocujaari cuno pueyanota quijia. Nojuajaari Galilea jiyajinijiniojuhuaj.

<sup>60</sup> Pedroori saa sequereejaa:

—¡Pueyanonaa, maja cua niishiniu quenaaja casaa quia sequeyani!

Pedro pocuasacarijia, jiyacaritij, caacarajaari niunijioree. <sup>61</sup> Jiyaniijia Jesuuri tacate-quee. Na nijiniara niquirii Pedroori. Pedroori jiyacari Jiyaniijia sequesano nojuaja niishiquii, naa na sequesantej: “Quiaari tari seetanu caminiujiuniutianiya janiyajiniji pueya niquiara, caacaraja niunijiyaquishacarijia”. <sup>62</sup> Pedroori cuniquiji tohuataquee. Jiyanojua nujuquereeri na taraajenuta, sacuaratia na seetanuucua.

*Pueya macaatishacari Jesu*  
(Mt 26.67-68; Mr 14.65)

<sup>63</sup> Jesu cojuanaa pueyari Jesu macatiriquiaa. Nojoriiri na piquitiuriquiaa. <sup>64</sup> Nojoriiri Jesu namijia morotuquiaari coteenu. Na jiquioco piquitiuriohuari. Na nuhuaji, na sequetureeri:

—¡Quia niishiritioj! ¿Cante quia piriini?

<sup>65</sup> Nojoriiri socua queraatia sesa casaa sequeturiquiaa na macatiniuria Jesu.

*Judiocuaca jiyaniijianucua nequesoreesacari Jesu*  
(Mt 26.59-66; Mr 14.55-64; Jn 18.19-24)

<sup>66</sup> Jaara juhuaquequiaari, Judiocuaca camarucuaari rerejoree pueyacuara secojonaa jiyaniijianucuaata, mariyata Moisés Rootasanojiniji niishitiojonaatajuhuaj. Nojoriiri Jesu jiyataquiaari Judiocuaca jiyaniijianucua rerejosaquiria. Nojoriiri na nujuatesee jiyaniijianucua tajoji, nojori nequesoreenura tii nojuaja. Nojoriiri naa Jesu nequesoreeree:

<sup>67</sup> —Canaa quia sequere, ¿quiaate Cristo, Pueyaso Jiyarosano?

Jesuuri nojori riucuaaree:

—Janiya jaara nia sequereni: “Taaquiririnij”, niaari saaja cua sequenutaniya: “Quiaa sapojiya”. <sup>68</sup> Saniniuujia, janiya jaara nia nequesoreere Pueyaso Jiyarosanojinijini, majaari nia riucuanu quiniutianiya janiya. <sup>69</sup> Naajaa, quiarijiani, janiyari puetunu cumaacaraca Quijajanaa miaquetajara cajiniutianiya jiyocuacaanuni.

<sup>70</sup> Naa Jesu sequesacaritij, puetunu nojorijianaari na sequeree:

—¿Quiaateeri tama sequeyajaaja quiaari Pueyaso Niyanu?

Jesuuri nojori riucuaaree:

—Taaquiririnij. Naacuaaquinatejaj, taa nia sequeyacuajani.

<sup>71</sup> Nojoriiri tama sequetooreejaaja:

—¿Paatucua casaara socua tamonu pueyano pajere nocuara tonujuriquianoni? Paacuajaari tari tama pa numaatajaaja sesa na sequesano tojitiareeni.

## 23

*Pilato nequesoreesacari Jesu*  
(Mt 27.1-2, 11-14; Mr 15.1-5; Jn 18.28-38)

<sup>1</sup> Cuno nuhuaji, puetunu nojorijianaari sanetaree. Jesu jiyatatiuyareeri jiyaniijia Pilatoocua. <sup>2</sup> Cuniqui, nojoriiri juhuacatecara Jesuucua saquiriojotaree na sapojonuta. Pilato sequetureeri:

—Canaari nio pueyano niishiyani. Nojuajaari canaa Israel pueya nasojoquiaa pocuara. Nojuajaari niishitiojoquiaajuhuj, maja canaa Israel pueya niquitiojonura canaa cumaneeca pa jiyaniijijanaa Césarra, taa César sequequiaaricuajani. Naajuhuj, tama nojuajaari naa sequequiaa: “Janiya Cristoni, Pueyaso Jiyarosano, nia jiyaniijia cua quiniuria”.

<sup>3</sup> Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucuaaree:

—Taaquiririnij. Naacuaj, taa quia sequereecuajani.

<sup>4</sup> Jiyacaritij, Pilatoori pueyacuara secojonaa jiyaniijianucua sequeree, pueya maa-nunio:

—Nio pueyano nequesoreeree tarinijia. Nojuajaari maja sesa miijia.

<sup>5</sup> Nojoriiri saaja socua jiyacateree Jesuucua tonujunu. Naa sequetureeri:

—¡Nojuajaari puetunu canaa Judiocuacajanaa sesoya na niishitiojosanota! Nojuajaari Galilea jiyajinia niishitiojonu coteequiaari. Quiarijia, niya niishitiojiyajaariuhua Judea jiyajiniani.

*Jiyaniijia Herodes nequesoreesacari Jesu*

<sup>6</sup> Pilato tojishacari naa nojori sequesantej, nojori nequesotareeri:

—¿Nio pueyanote Galilea jiyajinijinio?

<sup>7</sup> Nojoriiri na riucuree:

—Jaa.

Cunora, Pilatoori pueya jiyarotaree Jesu, Galilea jiya jiyaniijia Herodescua. Herodesri namitia tii Jerusalén tiacajinia quiriquiaa jiyacari. <sup>8</sup> Nojuajaari pueyaracaanu Jesu niqiniucua jiaatiaja juucua. Herodesri tari pohuatasaaquiaari Jesujiniji. Naaratej, Herodesri Jesu miishacari na cumaacata niqiniu panijia juucua. Naacuajitij, na niquishacari Jesu, nojuajaari timirii. <sup>9</sup> Herodesri queraatia nequesoreeree Jesu. Majaari quenaaja Jesu riucuanu quiquiaari nojuaja. <sup>10</sup> Pueyacuara secojona jiyaniijianucuaari tii quiriquiaajuhua, Moisés Rootasanojiniji niishitiojonaanio. Cuno pojoriiri jiyanoehua Jesuucua saquiriojotariquiaa queraatia sesa casaa. <sup>11</sup> Herodesri na soldadohuata Jesu rerequeteriquiaa. Na macatiriiri. Na cushitirii jiyanoehua shanoehua toqueeri juhua jiyaniijia cushishano. Na nuhuaji, Herodesri pueya jiyarotarohua Jesu Pilatoocua. <sup>12</sup> Herodesri cuno juuca Pilato rupenara quiquiaari. Coteenu, majaari nojori niqitioonu paniniu quijia. Nojoriiri saaja shocotetoojua.

*Puetunu pueyajanaa sequesacari Jesu cuaara mosaaria*

*(Mt 27.15-26; Mr 15.6-15; Jn 18.39-19.16)*

<sup>13</sup> Na nuhuaji, Pilatoori pueyacuara secojona jiyaniijianucua rerejotequiaari na tajoji, Judiocuaca camarucujuhua, tii quinia pueyano. <sup>14</sup> Nojori sequereeri:

—Niaari nio pueyano jaatucuree cucua najuhanaj. Niaari cua sequeturee, nojuajaari niarta pueya nasojoquiaa. Janiyacuajaari na nequesoreeriquiaa nia niquiarani. Ni-aacuajaari cua tojitiariquiaa cua nequesoreesacari nojuaja. Quiarijia niishiya cutaranijia, puetunu nocua nia tonujusanajuanaari maja seetanujuanaa. <sup>15</sup> Jiyaniijia Herodesquiiri tari niishiyajuhua, majaari seetanujuanaa nocua nia saquiriojotasano. Cunora, Herodesri pocua na jiyarorohua. Seetanujuanaa, majaari sesa na miiniu quiquianu na mosaanura. <sup>16</sup> Janiyari na majacutenutaniya narejani, cartesaarohuari.

<sup>17</sup> Pascua juucara queranacusacari, Pilatoori nujuatesano pueyano cartenu jiitiquiaari nujuatejoajiniji. Nojuajaari na miiquiaari pueyaracaanutej, pueya na shuquiritinuria. <sup>18</sup> Jiyacaritij, puetunu pueyajanaari juhuacatecara jiyanoehua nacaree jatiqui:

—¡Jesu quia more! ¡Barrabás quia cartere saniniuujia!

<sup>19</sup> Tarijia cuno Barrabásri narta nasojosano Judiocuacata Romano pueya taanuuquiaari juucua Jerusalén tiacajiniji. Nojuajaari jiyacari pueyano moquiaarijuhuaj. Cunora, nojuajaari nujuatejoajinia nujuatesano quiriquiaa. <sup>20</sup> Pilatoori Jesu cartenu panijia juucua. Naaratej, Pilatoori pueyata pocoojorohua socua. <sup>21</sup> Pueyari saaja jiyacateree jiyanoehua nacoonura jatiqui:

—¡Cuaara mosaaria niyacutesanojinia teetesano! ¡Cuaara mosaaria!

<sup>22</sup> Pilatoori pueya sequenu pacuterohuacuahuaj:

—¿Maatucua casaara mosaarejaarani? ¿Sesa miiritijiaaraj? Janiyacuajaari tari na nequesoreereeni. Majaari sesa na miiniu quirii na mosaanura. Janiyari na majacutenutaniya narejani. Na nuhuaji cartesaarohuari.

<sup>23</sup> Pueyari saaja socua jiyanoehua nacooree niyacutesanojinia na mosaanura. Pueyacuara secojona jiyaniijianucuaari mariyata pueyata jiyanoehua nacooriquiaa. Puera jiyanoehua nojori nacoosacari, nojoriiri Pilato shocotaree. Cunora, Pilatoori maja na naata cartenu quirii Jesu, taa na paniriquiaacuajani. <sup>24</sup> Naaratej, Pilatoori socua tarinirioehua. Pueya panishano miiriiri. <sup>25</sup> Pueya sequesano pueyano cartereeri, cante nujuatesaaquiaari nujuatejoajiniacuajani na taanuunu paniniuucua Romano pueya,



na monuucua pueyanojuhuj. Na nuhuaji, Pilatoori Jesu tarinitiaree socua, nojori mosocoriquiano, taa nojori paniriquiaacuajani.

*Niyacutesanojinia Jesu teetesacari*

(Mt 27.32-44; Mr 15.21-32; Jn 19.17-27)

<sup>26</sup> Pueya jiyatasacari Jesu puecoosaquiria, nojoriiri tamonu pueyano quiaree Jerusalén tiacajiniara riujiuyano juucua. Nojuajaari Cirene jiyajinijinio pueyano quiquiaari. Na sesa quiquiaari Simón. Nojuajaari niyacutesano patesaaree Jesu nuhuaji.

<sup>27</sup> Queraatia pueyari Jesu nuhuajiriquiaa, queraatia maajipohuanio. Maajipohuari Jesuucua nujuqueturiquiaa, na nuhuaji nojori sacuasacari. Nocua sapiyonuuriquiaari, nocua nojori taraajenuta. <sup>28</sup> Jiyacaritij, Jesuuri cuno maajipohuacua tacateree. Nojori sequereeri:

—Jerusalén tiacajiniji maajipohuanaa, maja cucua nujuquetunu. Tama niaacuajaaja nia nujuquette, nia niquiohuacuanio. <sup>29</sup> Na nuhuaji, jiyanoehua taraatia quishacariiri quiniutianiya niaara, jiyanoehua taraatia. Jiyacaritij, pueyari sequenutaniya: “Socua shuquiriaatia quijiaca cutaraari noo maajipohua cante muetuyashijiani, cante manajeyashijianucuanu, mariyata cante mueya supueteyashijianucujaniuhuj”. Mueyaraca maajipohuari jiyacari jiyanoehua taraajenutaniya, nojori niquishacari necohua miishacari naquiya. <sup>30</sup> Naquiya miishacari, jiyacaritij, pueyari tuhuananuhua sequenutaniya: “¡Canaacua quia jiyaretaare!” Naajuhuj, shiitianiyojua tuhuananuhua sequenutaniya: “¡Canaacua nia tiyare canaa nia jamonura!” <sup>31</sup> Jiyacariiri jiyanoehua naquiya miishacari quiniutianiya. Quiaritia, janiya jaara naa naquiya miishiyacuaani, ¿taaqitijia Pueyaso tojitiaashijia miishaanutaniyatejaj?

<sup>32</sup> Caapiqui sesa miijiacaari jaatucunuusaariquiaajuhuj, mariyata teetejosocoriquiano Jesuta. <sup>33</sup> Nojoriiri puecoosaqui tiuquijiosee. Cuniqi pueya puecoosaquini, na sesa quiquiaari “Pueyano Nacaco”. Nojoriiri tii Jesu teeteree maca niyacutesanojinia. Cuno caapiqui sesa miijiacaari teetejosaareejuhuj, niquiriyatu na miaquetajara, tamonu na muenecara. <sup>34</sup> Jesu jaara tari pijiosaariquiaa maca niyacutesanoocua, nojuajaari na Que Pueyaso sequereeri:

—¡Cua Quenaa, quia jiyanoori nio pojori! Majaari nojori niishiniu casaa na miitiuyani.

Na nuhuaji, soldadohuari saitia tacuarishijioree, nojori niishiniuria taa nojori seraatianutaniya Jesu toqueni. <sup>35</sup> Pueyari Jesu shootiariquiaa. Judiocuaca jiyaniijianucuaari jaarajaaja Jesujiniji naa tama sequetooriquiaajaaja:

—Nojuajaari saaja tamonu pueya naatanijiojua. Quiaritia, nojuaja jaara seetanujuanaa Pueyaso Jiyarosano Cristo quiri, cuara roseera niyacutesanojiniji pa niquiara.

<sup>36</sup> Soldadohuari Jesu macaatiriquiaajuhuj. Nojoriiri Jesu raateree piiquia vino juucua. <sup>37</sup> Jesu sequetureeri:

—Quiaa jaara Judiocuaca jiyaniijia quiri, ¡niyacutesanojiniji quia roserecuarajaj!

<sup>38</sup> Jesu nacaacuma, suruhuatuneeri rupotasaquiaari naajiosano Griego rupaajinia, Romano pueya rupaajinia, Hebreo rupaajiniano. Tii naajiotasano quiriquiaari naa nocuara pueya saquiriojotasano: “Nio pueyanoori Judiocuaca jiyaniijia”.

<sup>39</sup> Tamonu cuno sesa miijiacajinijinio Jesu shuriucua teetesano quiriquiaani, nojuajaari Jesu rerequeteriquiaajuhuj. Naa Jesu sequeriquiaari:

—Quiaa jaara Pueyaso jiyarosano Cristo quiri, tama quia roserejaaja cuniqiji. ¡Canaa quia roshinijiorejuhuj!

<sup>40</sup> Narta sesa miijiaari na juaarii:

—¿Quiaateeri Pueyaso puereyashijia? Quiaari mosaanutaniyajuhuj. <sup>41</sup> Pajaniya cutaraari sesa pa miiniuucua naquiya miishiyani. Paacuajaari maninia saniitioshiyani sesa pa miiniuucua. Saniniuujia, nio pueyano pa tajinia nujuataani, ¡nojuajaari sesa miyashijia cutara!

<sup>42</sup> Na nuhuaji, narta sesa miijia juaaniaari Jesu sequereeri:

—Jesunaa, majaari cua niyajetanuuja, Pueyaso jaara quia jiyatere Jiyaniijajanaa quia quiniuria.

<sup>43</sup> Jesuuri na riucuaree:

—Seetanujuanaa quia sequeyanijia, quiarijiani, nio juucaja, quiaari cuata quiniutianiya shuquiriaatia quishaqui cutara.

*Jesu cusosacari*

(Mt 27.45-56; Mr 15.33-41; Jn 19.28-30)

<sup>44</sup> Panacari, jiyari ninishiquiria quiquiaari puetunujuanaa, juhua niucua! Pananu piriuushacari, cuhuatemohuari. <sup>45</sup> Jiya quishacarijia ninishiqui, jiyacaritij, Jerusalén tiacajinia Pueyaso Secojoua tiajinia, jiyanojua shiquiiquia toquejiniji sohuacaari noojiaacoji sutequiaari puetunujuanaa querajaquera! <sup>46</sup> Jiyacarijiuhuj, Jesuuri nacaree:

—¡Cua Quenaa, cua sohanu quia cojuare!

Naa na sequenu nuhuajitij, Jesuuri cusoquee.

<sup>47</sup> Romano soldadohua jiyaniijia niquishacari puetunu niojuanaa, nojuajaari maninia sequeree:

—¡Seetanujuanaa, nio pueyanoqui sesa miyashijia quiqianu!

Naa na sequesanoori Pueyaso shuquiritirii.

<sup>48</sup> Puetunu pueyajanaa, canapuate Jesu shootiariquiaa cusoyanoni, nojoriiri taraatia na tiajinia quiojoquiaariuhua. Nojoriiri tama na jiriquiaaja piquiniuuquiaariuhua, jiyanojua nojori tacaaniutia naa nojori monuucua Jesu. <sup>49</sup> Saniniuujia, puetunu Jesu niishishano pueyajanaari tii jiyojetarohujaa, maajipohujuhuj, canapuate Jesu nuhuajiquiaari Galilea jiyajinjicujani. Puetunu nojorijianaari tucuacaanuji niqutiariquiaa Jesu.

*Jesu quete niasacari raaco*

(Mt 27.57-61; Mr 15.42-47; Jn 19.38-42)

<sup>50</sup> Tamonu maninia pueyanoori quiquiaari. Nojuajaari Pueyaso tojjia pueyano quiquiaari Arimatea tiacajinjini. Cuno tiacaari Judea jiyajiniajuhuj. Cuno pueyano sesa quiquiaari José. Nojuajaari Judiocuaca jiyaniijianucujinjini quiquiaari. <sup>51</sup> Cuno Joseeri Pueyasocua tiuujia quiquiaari. Nojuajaari pueyaracaanu sashijia, Pueyaso Jiyarosocoriquiano cuaara Jiyaniijia jiyatesaaria cutara. Cunora, majaari José paniniu quiquiaari cutara, narta jiyaniijianucua sequesacari Jesu cuaara mosaaria. <sup>52</sup> Naacuajitij, Jesu cusosacari, Joseeri Pilatoocua quiaquiaari, Jesu quete na masenura. <sup>53</sup> Na nuhuaji, Jesu quete roshinirii niyacutesanojinijiri. Na jiuniocoreeri cohuajaque quenaaruque toquejinia. Jesu quete niaree tarijia na jiuutianishano saajiajiniaari. Cuno raajinia, juhuanojuaaja maja macu niasaanu quiquiaari. <sup>54</sup> Cuno juucaari quiquiaari Judiocuaca jeenucuasacari juhuacarijia samaatenu juucaacuara. Nojori samaatenu juucaari quera coteriquiaa tari. Judiocuacaara, pananu tiuquishacari, tamonu juucaari tari cotequiaari nojoriria.

<sup>55</sup> Cuno maajipohua, cante Jesuta nijioquiaari Galilea jiyajinjicujani, cuno pojoriiri José nuhuajiquiaari raajinara. Nojoriiri raaco niquishii, taa Jesu quete niasaareeni.

<sup>56</sup> Nojori riujuushacariuhua na tiajiniohua, nojoriiri juhuataja shanohua jaanutaja cojitijiosuhua, macuucua nojori niojosocoriquiano. Na nuhuaji, nojoriiri pootia quiriouhua samaatenu juuca, taa Moisés rootaquiaaricujani.

## 24

*Jesu samiitiasacariuhua*

(Mt 28.1-10; Mr 16.1-8; Jn 20.1-10)

<sup>1</sup> Coteenu semaana juucajinia, cuno maajipohuari tariquicuaji raajinara quiaquiaari. Nojori cojitijosano shanohua jaanutaja patootaareeri. <sup>2</sup> Nojori tiuquijiosacari raajinia, saajiajiniji quejasano raa tiotiu niqutiushiiri tariucua tamocora shuquitishano.

<sup>3</sup> Naaratej, nojoriiri raaco tiuquitiamaa. Shaaqui quiriquiaari Jiyaniijia Jesu quete.

<sup>4</sup> Nojoriiri shiriquirii. Majaari nojori niishiniu quiriquiaa taa nojori miiniutianiyani. Canashiyaquiji caapiqui pueyari nojori shuriucua nujuatuquee. Nojori toqueeri shacantuque quiriquiaa. <sup>5</sup> Maajipohuari na puerenuta jiyocuara naniquioree. Cuno canuuri nojori sequeree:

—¿Casaara nia pajeya saminio pueyano macu niojosaquini? <sup>6</sup> Maja tari niya na quiniu. ¡Tari samiitiarohuano! ¿Niaateeri tari niyajetaree na sequesano niajaninya, Galilea jiyajinia na quishacarijia? <sup>7</sup> Nojuajaari tari nia sequecanucuaaja, nojuaja sesa miijiaca niquitiosaanutaniya. Nojoriiri na monutaniya niyacutesanojinia. Na nuhuaji, nojuajaari samiitianutaniuhua jiuujianaraca juucajinia.

<sup>8</sup> Jiyacaritij, maajipohuari shusha niishiquii tarijia Jesu sequesano nojori. <sup>9</sup> Nojori tacatesacariuhua jamajiniji, nojoriiri Jesu once saquiriojosano pueya caminiujiushuhua puetunu niojuanaa, puetunu Jesuucua tiuunaa pueyajanaano. <sup>10</sup> Cuno maajipohua, Jesu saquiriojosano pueya pohuataquiaariuhua, nojoriiri nio maajipohua quiquiaari: María Magdalena, Juana, Santiago nucua Maríajuhuj, socua tamasa maajipohuaano. <sup>11</sup> Jesu once pueyara, maajipohua pohuatasanoori juhua paateca sequesano quiquiaari saaja. Nojoriiri saa cuaracashitirijiaa maajipohua pohuatanuusano.

<sup>12</sup> Naajaa, Pedroori tiajiniji netequiaari raajiniara. Raaco na cuuquesacari, saaja Jesu jiunocotaja cohuajaque toque niquiquiaari maanoori. Pedroori juhua jiuujiaaju tacateyarohua na shiriquiniutia, na niquishanojiniji, maajipohua pohuatasanojinijinio.

*Jesu tojitianaa pueya niquishacari Jesu, nojori quiasacari Emaús tiacajiniara*  
(Mr 16.12-13)

<sup>13</sup> Cuno domingo juucaja, caapiqui Jesu pueyari Emaús tiacajiniara quiojoriquiaa. Emaús tiacaari querajaa hora quiquiaari Jerusalén tiacajiniji, niohuacata quiasacari tirira. <sup>14</sup> Nojori quiojosacari nucuaco, nojoriiri Jesujiniji pocoojoriquiaa, mariyata shusha naataja pueya miishanojiniji Jesu. <sup>15</sup> Naa nojori pocoojosacari nucuacotej, Jesujuanaari jiyacari nojori rupuesee. Juhuajaninya nojoritia pacutaareeri. <sup>16</sup> Majaari nojori niishiniu quiquiaari cana pueyanote cuno quiquiaarini. Nojori namijiaari tojequiaari, maja nojori niishiniuria Jesu. <sup>17</sup> Jesuuri nojori nequesotaree:

—¿Casa nia pocoojotaacuaani?

Nojoriiri nujuatuquee. Taraajecoyano niquishaariquiaari.

<sup>18</sup> Cuno caapiqui pueyanojinijini, tamonu sesa quiquiaari Cleofas. Nojuajaari Jesu riucuaaree:

—Puetunu pueyajanaacuaajaari niishiya casaate Jerusalén tiacajinia miishaarucuaa taraatiani. Quiaacuaajaari Jerusalén tiacajinia quiquianujuhuj. ¿Quiaatucua casaara niishiyaquirini casaate miishaarucuaani?

<sup>19</sup> Jesuuri nojori nequesotaree:

—¿Casaate tii miishaarucuaajaarani?

Jesu sequereeri:

—¡Nazaret tiacajinijinio Jesuuri mosaarucuaajaj! Nojuajaari Pueyaso sequesano caminiujiunia quiquianu. ¡Jiyanohua maninia quijiaari na cumaacata na miijosano, na niishitiojosanojuhuj! Pueyaso timitiasano quijiaari, puetunu pueya panishanojuanaano. <sup>20</sup> Pueyacuara secojonaa jiyaniijianucua, mariyata pa camarucuaari na niquitiorucuaa Romano jiyaniijia na motesocoriquiano. Niyacutesanojinia mosaarucuaari. <sup>21</sup> Canaari juucua jiyaniquianuni, nojuajaari Romano pueya taanuunutaniya, pa Israel pueya quiniuria juhuajaninya tama pajaniyajaaja. Quiarijiani, jiuujianaraca juucaari tari na shoconujiya na mosaanujiniji. <sup>22</sup> Tamasaca maajipohua canaa maanujinijinioori canaa shirioree nojori pohuatasano. Nojoriiri quiarijia tariquicuaji quiojomaa Jesu raajinia. <sup>23</sup> Nojoriiri maja na riuritanu quishii na quete. Nojori tacatesacariuhua, nojoriiri canaa pohuatasuhua, nojorinia Pueyaso seya niquirii juhua na maquenujinia. ¡Cuno Pueyaso seyanaari nojori sequeree, Jesu tari samiitiarohua! <sup>24</sup> Na nuhuaji, tamasa canaajinijinioori raajinia quiojyareejuhuj. Seetanujuanaa naa quiriquiaari, taa maajipohua sequeree canaacuaajani. Maja cutaraari nojori niquiniu quirii Jesu.

<sup>25</sup> Jiyacaritij, Jesuuri nojori sequeree:

—Pueyanaa, majaquiri juhuanujuaja nia niishiniu. Niaari taacanuyajaa puetunu tariucuaaanu Pueyaso sequesano caminiujiunaa naajiotasanoocuaajanaa nia tiuuniuria.

<sup>26</sup> ¿Majateeri naa na pohuatasaanu quiquiaaricuaja: “Cristoori coteenu naa mosaanutanियाकुइ. Na nuhuaji cutara, jiyano hua cumaacaracara quijiara jiyatesaanutaniuhuari Jiyaniijajanaa na quiniuria”?

<sup>27</sup> Jesuuri juhuacatecara nojori niishitiojoree puetunu tariucuaaanu Pueyaso Rupaajiniijijanaa, tee nojuajiniji naajiotasano quiyacuajani. Moisés naajiotasanojiniji pohuatano coteereeri, na nuhuaji, puetunu Pueyaso sequesano caminiujiuniaa naajiotasanojinijijianaanio.

<sup>28</sup> Nojori tiuquishacari cuno tiacajinia, terara nojori quiojoriquiaacuajani, Jesuuri juhua shocoriquiano canujuriquiaa. <sup>29</sup> Nojoriiri nojoritia na jiyojetenu paniriquiaa jiyano hua. Nojoriiri na sequere:

—¡Niyaja canaata quia jiyojere! Paa tari niniyareeni.

Naaratej, Jesuuri nojoritia jiyojese cuniqui. <sup>30</sup> Jesu jaara nojoritia cajiriquiaa tari miaquejajinia, nojuajaari pan ririi. Nocuara Pueyaso secojoreeri. Nojoriria na neecasereeri. Na nuhuaji, nojori serotareeri. <sup>31</sup> Jiyacaritij, nojori namijiaari juhua riatequequee. Jiyacariqui na niishitiquiiri. Jesuuri saaja shaajequee cuniquijia nojori tajiniji. <sup>32</sup> Nojoriiri sequetoore:

—¡Jesucuaajaquiiri quiriquiaa! ¡Cunora poojiaqui jiyamitia timiriquiaa na pocoojosacari pajaniyata nucuamaji, nojuaja jaara niishitiojoriquiaa pajaniya Pueyaso Rupaajinia naajiotasanotej!

<sup>33</sup> Jiyacaritij, nojori shuquiriniutia, nojoriiri ritia sanetaquee. Cuniquiji Jerusalén tiacajiniara tacaretaarohuari. Nojori tiuquishacariuhua, nojoriiri puetunu Jesu once saquiriojosano pueyajanaa riuriatasuhua tii tariucua rerejono, mariyata socua narta Jesu pueyata. <sup>34</sup> Tariucua tiajinia quiniaari Emaús tiacajiniji tiuquijionaa sequere:

—¡Pa Jiyaniijiaqui seetanujanaa samiitarohua! ¡Simónri na niquirii!

<sup>35</sup> Na nuhuaji, shusha tiuquijionaari nojori pohuatareejuhuaj, taa Jesu pocoojoriquiaa nojoritiani, nucuaco nojori quiasacari, mariyata taa nojori niishirii nojuajani, pan na neecasacari nojoriria.

*Jesu muetasacariuhua na saquiriojosano pueyacu*

*(Mt 28.16-20; Mr 16.14-18; Jn 20.19-23)*

<sup>36</sup> Nojori pocoojosacarijia nojori niquishanojiniji Jesu, jiyacaritij, Jesujuanaari canashiyaquiji nojori tajinia nujuaquee. Naa nojori sequereeri:

—¿Niaate quiyajaa? Nioojia nia cajitiri.

<sup>37</sup> Nojoriiri shiriiquitiuquii. Jiyano hua puereturiquiaari. Nojoriiri Jesu jyaniriquiaa naaqui. <sup>38</sup> Jesuuri nojori sequere:

—¿Casaara nia pueretiuyani? ¿Casaara nia jiyajenetaa janiyani? <sup>39</sup> Cua juaashiquia nia niquiri, cua niohuacanio, nia niishiniuria janiyacuajaari quiyani. ¡Cua cootiuri! ¡Cua niquitiuri! Naaquiiri maja cuaqueyaraca, maja nucuahuaraca taa nia niquiya janiyacuajani.

<sup>40</sup> Naa nojori na sequesacaritij, Jesuuri nojori niquitijioree na juaashiquia, na niohuacanio. <sup>41</sup> Puera nojori jiuujatesacari, puera nojori shuquirishacarijuhuaj, nojoriiri taacanuuriquiaajaa, maja naasucua Jesu. Cunora, Jesuuri nojori sequere:

—¿Niaate miaquesocoriquiano jiitiaacuaa?

<sup>42</sup> Nojoriiri Jesu niquitiooree sapitiaaja raqui caquishano. <sup>43</sup> Jesuuri na maseree. Nojori niquiara na miaquereeri. <sup>44</sup> Na nuhuaji, nojori sequereeri:

—Janiyari naa miishaarucuaani taa cua pohuataquiaari nijaniyacuajani, pueyaraanu niaata cua quishacari tarijia. Nia sequequiaaricuajani, janiyari naa miishaanutaniani, taa Moisés naajiotaquiaari janiyajinijicuajani. Puetunu Pueyaso sequesano caminiujiuniaajanaari janiyajiniji naajionuutaquiaarijuhuaj. Supuetana Davidri janiyajiniji naajiotaquiaarijuhua na jaaquequejoneejinia. Quiaritia tari tohuateerucuaari puetunu janiyajiniji cuno naajionuutasanojuanaa.

<sup>45</sup> Jiyacaritij, Jesuuri nojori niishitirii tariucuaaanu Pueyaso Rupa naajiotasano.

<sup>46</sup> Nojori sequereeri:

—Tariucuacaanu naa naajiotasanoori quiya: “Pueyaso Jiyarosocoriquianoori mosaariquiano, na nuhuaji, jiuujianaraca juucajinia samiitianutaniuhuari”. <sup>47</sup> Naa naajiotasaaquiaarijiuhuj, Jerusalén tiacajinia, janiyajiniiri pohuatasaanutaniya pueya niquiara, na nuhuaji puetunu jiyacajiniajanaano. Pueya tiuushacari cucua, nojori jaara nojiaca tacatorohua sesa nojori miiniujiniji, sesa nojori miishanoori tuujusaanutaniya, Pueyaso jiyanooshacari nojori. <sup>48</sup> Niaacujaari puetunu cua miishanojuanaa niquijiaca. <sup>49</sup> Cua tojitiare. Janiya jaara jiyocuacaanu quiaarohua cua Queecuani, janiyari Pueyaso Sohuanu jiyaronutaniya niaacuani, taa cua Que sequequiaaricujani. Niyaja pootia nia quiri Jerusalén tiacajiniani, niaa jaara jiyocuacaanuji niriqiano cumaaca maserejaatijia.

*Jiyocuacaanu Jesu tacasacariuhua*

*(Mr 16.19-20)*

<sup>50</sup> Na nuhuaji, Jesuuri nojori jiyataquiaari Jerusalén tiacajiniji, Betania tiacajiniara. Cuniqii nojori quishacarijia, Jesuuri na juaashiquia shiitioquiaari nojoriicuara na sec-ojosacari Pueyaso, Pueyaso jiiitianura maninia pueyaracaanu nojori. <sup>51</sup> Nojoriicuara na secojosacarijia, Jesuuri nojori shuriucujaji tacanishaaquiaari jiyocuacaanu. <sup>52</sup> Nojoriiri na shuquiritiaree. Na nuhuaji, nojoriiri Jerusalén tiacajinia panaatia tacateyarohua. Nojoriiri jiyanoohua shuquiriaatia quiriqiaa. <sup>53</sup> Nojoriiri pueyaracaanu quijia Pueyaso Secojoua tiajinia. Tii Pueyaso maniniuhuaqueetajua pueyaracaanuuri. Tariucuaja.

## JUAN NAAJIOTASANO JESUCRISTOJINIJI

### *Pueyaso Rupaa jatasacari pueyanora*

<sup>1</sup> Paari Jesucristojiniji niishiyani taamuecateja na Que Pueyasoni. Naaratej, Jesucristoori sesojosaaquiaari “Pueyaso Rupaa”. Nojuajaari tari pueyaracaanu quijia, jiya quiyaquishacarijia. Na Que Pueyasota quijiaari. Pueyaso quijiajaariuhuj. <sup>2</sup> Jiya cotelesacari, nojuajaari na Que Pueyasota quiriqiaa. <sup>3</sup> Na Queeri na shipinitiquiaari puetunu casaajanaa. Puetunu casaajanaari na shipinishano. Maja tamonu shipinina quiniu socua. <sup>4</sup> Nojuajaari quijiajuhanajaj. Naaratej, nojuajaari na naata pueya jiuujia cuhuatanu, pueyaracaanu rishijia nojori quiniuriajuhuaj. <sup>5</sup> Jesucristoori cuhuashiqui quijia. Naaratej, na rupaata poojia cuhuataari. Saniniuujia, Sesaacaari ninishiqui quijia. Naajaa, majaari na naata Pueyaso Rupaa na shocotanu. <sup>6</sup> Pueyasoori quiari naataja tamonu pueyano jiyaroquiaari, Neyanujiniji pohuatariquiano. Na sesa quiquiaari Tiuquinijiona Juan. <sup>7</sup> Pueyasoori na jiyaroquiaari pueya na niishitiniuria cante Jesucristoni, pueya tiuniuria Jesucua, nojori jiuujia na cuhuatanura. <sup>8</sup> Juanri maja pueya jiuujia cuhuatana. Nojuajaari Jesucristojiniji pohuataquiaari pueya niishiniuria cante saniya poojia cuhuatana cutarani. <sup>9</sup> “Pueyaso Rupaari” seetanu poojia cuhuatanajanaa. Nojuajaari Jesucristo. Jiyocua niquiaariiri puetunu pueyajanaa niishiniuria cante Pueyasoni.

<sup>10</sup> “Pueyaso Rupaari” mijiria rucanejojua quiquiaari. Pueyari tama nojori Shipinijajaaja niishiyaquiquiaari. <sup>11</sup> Tama na saquiriojosano Israel pueyacia niquiaariiri. Nojoriiri na tamacaquiaari saaja. <sup>12</sup> Saaja noojiaqueya pueyari nocua tiuuquiaari. “Pueyaso Rupaari” cuno pueya jiyatequiaari Pueyaso muerasura nojori quiniuria. <sup>13</sup> Nojoriiri Pueyaso jatanishano, seetanujanaa na muerasu nojori quiniuria. Pueyaso saquiriojosano pueyajiniji pueyano supuesacari, cunoori maja na naata na jiyatenu Pueyaso pueyano na quiniuria. Pueyari maja na naata muetunu tariucua Pueyaso pueya. Naajuhuj, pueyanoori maja na naata tama na cuaqueyajaaja jiyatenu Pueyaso pueyano na quiniuria. Pueya cutaraari Pueyaso muerasura jataquiaa Neyanuucua nojori tiushacari saaja.

<sup>14</sup> “Pueyaso Rupaari” seetanujanaa pueyanora jataquiaari mijiria na quiniuria. Nojuajaari Jesucristo. Canaata quiquiaariiri. Canaari na cumaacata na miijosano niquiquiaarini. Jiyanojua maninia quiquiaariiri. Na Que Pueyasoori na cumaquijia jiyanojua maninia na miiniuria, Neyanuniyojua na quishacari. Nojuajaari saaja seetanu rupaaajanaa sequeja Pueyasojiniji. Jiyanojua quijiaari. <sup>15</sup> Tiuquinijiona Juanri Jesucristojiniji pohuataquiaari pueya niquiara. Jiyanojua na rupaa paaretaquiaariiri pueya tojitianura nojuaja. Naa sequejaari:

—Janiyacujaari nojuajiniji nia pohuatajani, janiya jaara nia sequejani: “Tamonu pueyano cua nuhuaji niniutianiya”. Nojuajaari jiyaniijajanaa cutara janiyajiniji. Nojuajaari tari quijia cua quiyaquishacarijia.

Juanri naa pohuataquiaari Jesucristojiniji.

<sup>16</sup> Jiyaniijajanaa Jesucristo quiniuucua, puetunu pajaniyajanaari na jiiiasanojiniji masequiaani. Jiyanojua capora na quiniuucua, nojuajaari pueyaracaanu pa cumaquiquiaa. <sup>17</sup> Pueyasoori supuetana Moisés naajiotequiaari na rootasano pajaniyara. Cunoori maja na cumaquiniu quiquiaari pajaniya. Quiarjia saniniuujia, pa panijia Pueyaso quiniuucua, nojuajaari Neyanujanaa jiyaroquiaari pocua, pa jiyanooshaanura, naajuhuj, seetanu rupaaajanaa pa niishiniuria nojuajiniji. <sup>18</sup> Majaari quenaaja tamonu pueyano niquiniu quijia Pueyaso. Neyanu, cante na Que shuriucua quijiacuajani, nojuajaari na Que pa niishitioquiaari.

*Tiuquinijiona Juan pohuatasano Jesucristojiniji*  
(Mt 3.11-12; Mr 1.7-8; Lc 3.15-17)

<sup>19</sup>Jerusalén tiacajinijinio canaa Judiocuaca camarucuaari na pueya jiyaramiquiquiaari Tiuquinijiona Juancua, nojori nequesoreenura Juan cante nojuajani. Nojori jiyaramiquishano pueyari quiquiaari supuetana Leví niquiohuacuajinio supueno pueya. Noojiaqueya cuno pojorijinijinioori quiquiaarijuhua pueyacuara secojonaa pueya.

<sup>20</sup>Nojori nequesotasacari Tiuquinijiona Juan, nojuajaari maja quenaaja na seetanu quiquiaari cante nojuajani. Seetanujuanaa naa nojori sequequiaariiri:

—Janiyari maja Pueyaso Jiyarosano Cristoni.

<sup>21</sup>Cuno pueyari socua na nequesotarohua:

—¿Canteeri quiajaniyani? ¿Quiaa jiyoteeri Pueyaso sequesano caminiujiunia Elías soj? ¿Quiaa jiyoteeri samiitarohuacuaa?

Tiuquinijiona Juanri saaja nojori riucuaaree:

—Maja. Janiya maja supuetana Elíasni.

Cuno pueyari socua na nequesotarohuacuhuj:

—¿Quiaa jiyoteeri Pueyaso sequesano caminiujiunia, noj tariucuaaanu sequesaaquiaari niriquianotej?

Juanri saaja nojori riucuaaree:

—Maja.

<sup>22</sup>Cuno pueyari socua na sequeree:

—Canaa quia pohuatareja, ¿cante quiajaniyani? Canaacua saniniuujia canaa camarucua pohuatasuhanijia.

<sup>23</sup>Juanri saaja naa nojori riucuaaree:

—Janiyacuajaari nooni, cariquia jiyajinia nacajatej, taa supuetana Isaías juhuacarijia naajiotaquiaari janiyajinijicuaajani: “¡Jiyaniijiaacuaji nia nuunore maninia! ¡Maja shuutiuniu!”

<sup>24</sup>Jiyacaritij, Fariseocuaca camarucua jiyaramiquishano pueyari Tiuquinijiona Juan nequesotaree:

<sup>25</sup>—Quiaa jaara quiyaquiri Cristo, Elíasjuhuaj, cuno tariucuaaanu sequesaaquiaari niriquiano Pueyaso sequenu panishano caminiujiuniatej, ¿casaara pueya quia tiuquinijiya moojinacuaraarini?

<sup>26</sup>Juanri nojori riucuaaree:

—Janiyari nareja moojinia tiuquinijiya pueyani. Saniniuujia, tamonuuri niya quiya, nia niishiyaquishoojua. <sup>27</sup>Nojuajaari cua nuhuaji niniutianiya. Nojuajaari Jiyaniijiajanaa cutara. Majaari quenaaja cua naata na seru quiniu na sapatu neyocua cua saacatanura nera.

<sup>28</sup>Naa cuno pojori nequesoreesacari Tiuquinijiona Juantej, cunoori quiriqiaa Betania jyanishano tiacajinia, Jordán moo taquijiria, tee cuniqui Juan tiuquinijioriquiaa moojinia pueyacuajani.

### *Jesu juhua Pueyaso borregonijojua pocuara mosaariquiano*

<sup>29</sup>Tariqui saniniuujia, Tiuquinijiona Juanri Jesu niquirii nocua niyano. Juanri naa sequeree canaa niquiara:

—Paari pueyaracaanu mooquiaa borregohuani Pueyaso jiyanooniuria pajaniya. ¡Nia niquiri! ¡Cuno cumaji canujiyani, cunoori Pueyaso Jiyarosano, juhua borrego puetunu pueyacuara mosocoriquiano, seetanujuanaa sesa pa miishanojiniji pa jiyanooshaanura!

<sup>30</sup>Janiyacuajaari nojuajiniji nia pohuatajani janiya jaara nia sequejani: “Cua nuhuaji niniutianiyari Jiyaniijiajanaa cutara. Nojuajaari tari rishijia cucuaji cua quiyaquishacarijia”. <sup>31</sup>Janiyari na niishiyaquijiajuhuaj, cante nojuajani. Naajaa, janiyari parta Israel pueya tiuquinijioquiaa moojiniani, noojia nojori jeenucuanura, Pueyaso Jiyarosano nojori niishiniuria cutara.

<sup>32</sup>Tiuquinijiona Juanri pueya sequereejuhuj:

—Janiyari Pueyaso Sohuanu niquiriucuaani jiyocuacaanuji roseyano nocua juhua mococoonu. Nocua tiuushiiri. <sup>33</sup>Cuno, cua jiyaroquiaari pueya cua tiuquinijionura moojiniani, nojuajaari cua sequequiaari: “Quiaa jaara cua Sohuanu niquiri pueyanooocua roseyano, nocua na tiuuniuria, quiocua niishiri, cunocuaajaari cua sequesano quiajaniya. Nojuajaari cua Sohuanu tiuquinijionutaniya pueya jiuujiajinia cutara, seetanujuanaa

cua muerasu nojori quiniuria”. Nojuaja jaara naa cua sequeyaquiquiaari, janiya maara na niishiyaquiquianuni. <sup>34</sup> Janiyacuajaari tari na niquiquianuni. Naaratej, janiyari saniniuujia nia pohuataani pueyanaa, ¡nojuajaari seetanujuanaa Cristo, Pueyaso Niyanu!

*Coteenujuanaa Jesu pueyajiniji pohuatasano*

<sup>35</sup> Tariqui, Tiuquinijiona Juanri tii quishiiquihua caapiqui na pueyata. Janiyari niquiriyatu cuno caapiqui pueyanojinijinio quiriqiaani. <sup>36</sup> Tiuquinijiona Juan jaara Jesu niquiquiaari shocoyano, jiyacari canaa sequereeri:

—¡Nia niquiri! Cunoori cua sequesano nijaniya, Pueyaso Jiyarosano pocuara moso-coriqiano juhua borrego, sesa poojia seque jeequesaanura.

<sup>37</sup> Naa canaa tojishacari Juan sequesanootej, canaari Jesu nuhuajiquiaarini. <sup>38</sup> Jesuuri canaacua tacateree. Canaa na niquishacari na nuhuaji sacuaano, canaa sequereeri:

—¿Casa nia paniani?

Canaari na sequereeni:

—Niishitiojonanaa, ¿tee quia maquequiaacuaani?

<sup>39</sup> Jesuuri canaa riucuree:

—Miji. Nia niquiquii.

Canaari nata quiaareeni. Canaari na quijia niquitiushiini. Tari pananu piriushacariiri quiriqiaa jiyacari. Cunora, canaari tii maquetusee Jesutani.

<sup>40</sup> Tiuquinijiona Juan niquitiniucua Jesu canaa, canaari Jesu nuhuajiquiaarini. Andrésri cua cojiriquiaa. Andrésri tarajanu jiiitaja. Na sesaari quijia Simón Pedro.

<sup>41</sup> Tariquicuaji, Andrésri ritia tarajanu Simón pajenuucua quiaquiaari. Na riuratasacari, na sequereeri:

—¡Cua tarajanunaa, canaari Cristo niquiriqiaacuaani, tariucuaaanu Pueyaso sequesano na jiyarosocoriqianotej!

<sup>42</sup> Na nuhuaji, Andrésri tarajanu Simón jiyataaree Jesuucua. Jesu niquishacari Simón, na sequereeri:

—Quiaacuajaari Simón, Juan niyanu. Quiarjia saniniuujia, quia sesaari quiniutianiya Cefas.

Griego rupaajinia, nioori sequeya Pedro. Pedroori saniniuujia pueyano rupaajinia sequeya “Saajia”.

*Jesu saquiriojosacari Felipe, Natanaelnio*

<sup>43</sup> Tariqui, Jesuuri Galilea jiyajiniara quiariquiaa. Felipe riuriatamaari. Na sequereeri: —Cua tarajare cua pueyano quia quiniuria.

<sup>44</sup> Felipeeri nata quiaaree. Nojuajaari Betsaida tiacajinijinio quiquiaari. Andrésri tarajanu Pedrota cuno tiacajinijinio quiquiaarijuhuaj. <sup>45</sup> Na nuhuaji, Felipeeri Natanael pajeree. Na riuratasacari, na sequereeri:

—¡Canaa noo pueyano niquiriini, Moisés nojuajiniji naajiotaquiaari tariucuaaanutej! Tariucuaaanu Pueyaso sequesano caminiujunaa pueyari nojuajiniji naajionuu-taquiaarijuhuaj. ¡Nojuajaari Nazaret tiacajinijinio Jesu, José niyanu!

<sup>46</sup> Natanaelri saa riucureeja:

—¡Jaj! ¿Na naatate maninia miihia pueyano supenujuaara cuno sesa miijiaca Nazaret tiacajiniji?

Felipeeri na sequeree saaja:

—¡Miji! ¡Pa niquishii!

<sup>47</sup> Jesuuri Natanael niquirii nocua niyano. Na sequereeri:

—Nio pueyanoori seetanu pa supuetana Israel niquiohuacuajinio supenujuanaa cutara. Majaari na niishiniu sapojonu.

<sup>48</sup> Natanaelri na sequeree:

—¿Taa quia niishiya janiyarini?

Jesuuri na riucuree:

—Felipe sequeyaquishacarijia quiajaniya cucua quia niniuria, janiyari tari quia niquirii coojiatani, higo naana pajama tateyano.

<sup>49</sup> Natanaelri shiriiquirii. Jesu sequereeri:



—Niishitiojonanaa, ¡quiaacuajaqui Pueyaso Niyanu! ¡Quiaari parta Israel pueya jiyaniijiaranojuhuaj!

<sup>50</sup> Jesuuri na sequeree:

—¿Quiaateeri cucua tiuuquii shusha saaja cua sequesacari quiajaniya: “Quia niquirii higo naana pajama tateyanonijia”? Seetanujuanaa quia sequeyanijia, quiaari na nuhuaji cua cumaacata cua miijosano niqiniutianiya cutara.

<sup>51</sup> Jesuuri cuniqui quiniaa pueya sequereejuhuaj:

—Seetanujuanaa nia sequeyanijia, niaari jiya cajiniocua niqiniutianiya riateno. Pueyano cua quishacari, niaari Pueyaso seya niqiniutianiya cucua roseetaano, cucuaji taqueetaanojuhuaj.

## 2

### *Jesu jatanishacari mohuaca vinora, pueyano camishacari*

<sup>1</sup> Jiuujianaraca juuca nuhuaji, tamonu pueyanoori camiquiaari Caná tiacajinia, Galilea jiyajinia. Masuusano pueyari queranacuriquiaa. Jesu nucuaari tii quiriquiaajuhuaj.

<sup>2</sup> Jesuuri na saquiriojosano pueyata masuusaaquiaarijuhuaj, camishacari queranacunura. Janiyari na saquiriojosano pueyano quiriquiaa jiyacari tarijuhuaj. <sup>3</sup> Jiyacaritij, mashacaari ritia puequema. Na nucuaari Jesu sequeree:

—Sanaa, mashaca tari puequema.

Mashacaari quiquiaari uva caaca, vinotuhuaj. <sup>4</sup> Jesuuri na nucua riucuaaree saaja:

—Maajinia, ¿casaara quia sequeya janiyani? Juhuanajuaja maja cua poonijosacari Pueyaso cumaacata.

<sup>5</sup> Na nucuaari pueya raatojonaa sequeree:

—¡Niocua Jesu tojirijia! Jaara nia sequere, niocua puetunu na sequesanojuanaa miiri.

<sup>6</sup> Tii cajitiuriquiaari seis conatu, saajiajiniji quejasano. Canaa Judiocuacaari sequeyarucua shuquiriojua tiajinia nojori tiuquishacariuhua, juhua jeequesano nojori quiniuria Pueyaso niqiara. Nojori mohuaca cajitiacojua quiquiaari cuno conaa. Jiyanojua puereetucua quijiaari. Cuno conatuuri setenta tumococua mishaja mohuacata mishinishano quijia. <sup>7</sup> Jesuuri pueya raatojonaa sequeree:

—Mohuaca nia taquirioore. Niocua nio conaa mishinijiore.

Pueya raatojonaari conaa mishinijioree. Mohuacaari conaa rupaacuma puecacosee.

<sup>8</sup> Jesuuri nojori sequeree:

—Quiarijiani, tiji nia shuuri. Queranacunu camaru nia sanitiore coteenu.

Raatojonaari na raatesee. <sup>9</sup> Queranacunu camaruuri vinora jatano mohuaca sanirii. Majaari na niishiniu quiquiaari cuno na ratusanoori mohuacajiniji jatanishaaree vinora. Saaja pueya raatojonaa cutaraari na niishiriquiaa. Nojoricuajaari mohuaca mishinijioree cuno conaajinia. Queranacunu camaru saniniu nuhuaji cuno ratusano, camiyano pueyano piiriiri. <sup>10</sup> Na sequereeri:

—Pueyaruhatijia coteenu raateja shocuanacu vinote. Puetunu masuusano pueya jaara tari raruure queraatia, na nuhuaji raatesano cutaraari shaarunacu vino. ¡Quiarijia saniniuujia, nio cua rusanoni, cunoori socua maniniuniacu vino coteenu quia raatojotesanojiniji!

<sup>11</sup> Naa Jesu jatanishacari mohuaca vinoratej, cunoori coteenujuanaa na cumaacata na miishano quiquiaari Caná tiacajinia, Galilea jiyajinia. Nojuajaari na niqitiquiaari Pueyasojiniji na cumaaca. Naacuajitij, canaa na saquiriojosano pueyani, canaari niishiquiaarini Jesuuri seetanujuanaa Pueyaso Jiyarosano.

<sup>12</sup> Na nuhuaji, Jesuuri Capernaum tiacajinia quiaaree na nucuaata, tapueyocucatajuhuaj, canaa na saquiriojosano pueyano. Canaari tii camueenujuquiaari pasajani.

*Jesu jaacasacari seya niqutiojonaa Pueyaso Secojoua tiajiniji*  
(Mt 21.12-13; Mr 11.15-18; Lc 19.45-46)

<sup>13</sup> Quera canaa Judiocuaca queranacusacari Pascua juucara Jerusalén tiacajinia, Jesuuri tii canaa jiyataareejuhuj. <sup>14</sup> Na tiuquishacari, Pueyaso Secojoua tiajinia quia-maari. Tii niquishii pueyari juyaca niqutiojiyano Pueyasocuara puecosocoriquiano, borregohua, noseyano. Pueyari tii na juhuacutucujinia cajituriquiaajuhuj, pueya na tacatojonura taucuaca cumaneeca, Pueyaso Secojoua tiajinia niqutiojosocoriquiano cumaneecara. <sup>15</sup> Naa na niquishacari pueya miyano Pueyaso Secojoua tiajinatej, Jesuuri seya morojotaja jiyocua tatucaree. Na majacutajara na shitiareeri. Cunota, puetunu nojorijianaa jaacaree Pueyaso Secojoua tiajinijiiri, puetunu nojori borregohuatajanaa, mariyata puetunu nojori juyacatajanaano. Cumaneeca rerecojoree jiyocua juhuacutucujinijiiri. Naajuhuj, cumaneeca juhuacutucua caponeetareeri. Pojotaariquiaacuaari. <sup>16</sup> Noseya niqutiojonaa pueya sequereeri:

—¡Niiquiji nia patootare nio noseya! ¿Casaara nia jiyatecanu juhua casami niqutiojosaquiria cua Que tiani?

<sup>17</sup> Jiyacaritij, canaa, Jesu saquiriojosano pueyani, canaari niishiquini, seetanujanaa tariucuacaanu Pueyaso Rupaajinia naa naajiotasanoori quiya: “Quia tiaacua juaatishaaree jyanohuanijia, jyanohua cua panishacari quia tia”.

<sup>18</sup> Naa Jesu miiniuucuatej, narta Judiocuaca camarucuaari Jesu nequesotaturee:

—¿Cante quia sequerucuaa naa quia miiniuriani? ¡Canaa quia niqutiricuaraja Pueyaso cumaacata quia miishano, canaa niishiniuria quiaari seetanujanaa Pueyaso Jiyarosano!

<sup>19</sup> Jesuuri nojori riucaree miriqui:

—Pueyaso tia nia niyartare, janiyacua saaja jiuujianaraca juucajinia na tucuatrohua tianu tamajaajani.

<sup>20</sup> Narta Judiocuaca camarucuaari na riucaree:

—¡Cuarenta y seis marijiaari shoconujuquiaari pueya tucuatnura nio secojoua tia! ¿Quiaateeri jiyaniya quia naata na tianuhua ritia, saaja jiuujianaraca juucajinia? ¡Maja quia naata!

<sup>21</sup> Jesuuri tama na cuaqueyajaaja pohuatariquiaa, Pueyaso tia na sequesacari.

<sup>22</sup> Naacujitij, Jesu jaara samiitiaquiaariuhua, canaa na pueyari jiyacari shusha niishiquiaari naa Jesu sequesano miriquini. Naaratej, canaari tariucuacaanu Pueyaso Rupaajinia naajiotasanoocua tiuqujaarini, Jesu sequesanoocuanio.

### *Jesu puetunu jiuujia niishijajanaa cutara*

<sup>23</sup> Canaari ocho juuca camueenujuquiaari Jesuta Jerusalén tiacajiniani, Pascuara queranacunuusacari. Tii canaa quishacari, tii quiniaa pueyari Jesu cumaacata na miiijosano niqiquiaari. Naaratej, queraatia pueyari nocua tiuququiaari. <sup>24</sup> Naajaa, majaari Jesu tiuuniu quiriquiaa seetanujanaa nojoriicua. Nojuajaari nojori niishiriquiaa, taamueca pueyate nojorini. <sup>25</sup> Tamonu pohuataaquishacarijia nojuaja, nojuajaari tari niishiya taamueca jiuujiaracate pueyani.

## 3

### *Nicodemo pocojosacari Jesuta*

<sup>1</sup> Niucua, tamonu pueyanoori niqiaari Jesuucua. Na sesa quiquiaari Nicodemo. Nojuajaari canaa Judiocuaca camarucujinijinio quijia, Fariseocuaca maanujinijiniojuhaj. Tojishano pueyano. <sup>2</sup> Jesuucua na tiuquishacari, naa na sequeseeeri:

—Niishitiojonanaa, quia cumaacata quia miiniuucua canaa niqiara, canaari cunora niishiyani quiaari Pueyaso jiyarosano, canaa niishitiojoriquiano. Seetanujanaa, Pueyaso jaara pueyano naacuyaquiri na cumaacata, nojuajaari maja na naata cusosuhua naatanijionu taa quia miiquiaacuaani.

<sup>3</sup> Jesuuri Nicodemo sequereeri:

—Seetanujanaa quia sequeyanijia, pueyano jaara juhua conaaja raaquishaarohua, majaari na naata Pueyaso pueyanora na quiniu, Pueyaso jitianura nojuaja.

<sup>4</sup> Nicodemoori Jesu nequesotaree:

—¿Pueyanotucua taa rasaarohuani, nojuaja jaara tari cumantumaca quiya? Majaari na naata na nucua saracajinia tiuquiniuhua na rasaanuhua.

<sup>5</sup> Jesuuri na riucaaree:

—Seetanujuanaari cua sequesano. Cua tojiri. Paari coteenu rasaaquiaari pueyano pa quiniuriani. Saniniuujia, cante quiarinio pueyanora jataniyaquishano Pueyaso Sohuanutani, nojuajaari maja Pueyaso jiitiasanonijoua na quiniu quiniutianiya. <sup>6</sup> Mijiria pueya muetusanoori saaja pueyano. Saniniuujia, cante Pueyaso Sohuanu jatanishano quiarinio pueyano na quiniuriani, nojuajaari Pueyaso pueyano cutara, pueyaracaanu rishiriquiano. <sup>7</sup> Naaratej, majaari quia shirriquiniu puera, naa cua sequenuucua quiajaniyatej, quiaa cuaara rasuhuara, seetanujuanaa quiarinio pueyano quia quiniuria. <sup>8</sup> Mijiria, paratuuri piyarojoquiaa taa na paniyacujani. Paari nareja na cojuatunenu tojiquiaani. Majaari pa niishiniu teje na piyarojiyani, tee cunocora na quiaaaniuhua. Naajaariuhua, majaari quia niishiniu taa Pueyaso Sohuanu jataniquiaa pueyanoni, quiarinio pueyano na quiniuria.

<sup>9</sup> Nicodemoori Jesu nequesotarohuacuhua:

—¿Pueyanotucua taa quiarinio pueyanora jatanishaarejaarani?

<sup>10</sup> Jesuuri na riucaaree:

—¿Majateeri quia niishiniu cua sequesano quiajaniya? Quiaari Pueyaso Rupaa niishitiojonacuaja Israel pueyara. <sup>11</sup> Canaari seetanujuanaa pohuataquiaa canaa niishishanoni, canaa niquishanojuhuaj. Niaari saniniuujia saaja na cuaracashitiquiaa, canaa pohuatasacari nijaniya seetanu rupaajanaa. <sup>12</sup> Naa jaara saaja cuaracashitiquiaa cua pohuatasano mijiria casaajiniji, ¿niaatucua taa niishiriquiani, janiya jaara nia pohuatare jiyocuacaanuji casaani? <sup>13</sup> Janiyari jiyocuacaanu quijiani. Majaari quenaaja tamonu pueyano tacanu quiquiaari jiyocuacaanu, saaja tijinio roseno cutara. Nojuacuajaari janiya. <sup>14</sup> Cariiquia jiyajinia pa supuetanaa Israel pueya rucanejosacari, Moisésri na shipinishano soconu nujuaretaquiaari macaacua, soconu sasuhua niquishocoriquiano. Na niquiniaa pueyari naatacoquiaariuhua. Naajuhua, janiyari macaacua nujuaretasocoriquianoni. <sup>15</sup> Naacuajitij, puetunu cucua tiuuniaajanaari pueyaracaanu quijiaca quiniutianiya.

#### *Pueyasoori puetunu mijiria quiniaa pueyajanaa panijia*

<sup>16</sup> 'Jiyanhua cua Que Pueyaso paniniuucua puetunu mijiria quiniaa pueyajanaa, nojuajaari Neyanujuanaa jiyaroquiaari puetunu pueyapueecuarajanaa mosocoriquiano. Puetunu cucua tiuuniaa pueyajanaari saniitioyaquishaanutaniya cutara. Nojori cutaraari pueyaracaanu rishijiaca quiniutianiya Pueyaso shuriucua. <sup>17</sup> Pueyasoori maja na jiyaronu quiquiaari janiya pueya cua saniitionura. Seetanujuanaa cua jiyaroquiaari cutaraari pueyacuaji Tacuna cua quiniuria.

<sup>18</sup> 'Cante cucua tiuujiani, majaari na saniitiosaanu quiniutianiya. Saniniuujia, cante cucua tiuyashijiani, nojuajaari tari pueyaracaanu saniitiosocoriquiano jiyatesano quiya. <sup>19</sup> Janiyari mijiria niquiaarini pueya jiuujia cua cuhuatanura Pueyaso Rupaata. Pueyari saaja na ruuretaquiaa, ninishiqui nojori jiuujia quiniuucua. Sesa miijiaca nojori quiniuucua, majaari nojori paniniu cuhuatasano nojori quiniuria. Naaratej, nojoriiri saniitiosaanutaniya. <sup>20</sup> Puetunu sesa miijiacajanaari cua niquiniu paniyashijia, pueya jiuujia cuhuatana cua quishacari. Majaari nojori niniu paniniu cucua, sesa nojori miishano mariqui niishishaareeri. <sup>21</sup> Saniniuujia, cante maninia miiquiaani taa Pueyaso sequeya na Rupaajiniacuajani, nojoriiri cuhuashiqui quiniu panijia cutara. Nojoriiri cucua nijioquiaa na niishishaanura nojori miishano cutaraari puetunu maniajanaa, taa Pueyaso paniyacujani.

#### *Tiuquinijiona Juan pohuatasacari socua Jesujiniji*

<sup>22</sup> Na nuhuaji, Jesuuri quiojoquiaari canaata Judea jiyajinia, canaa na saquiriojosano pueyatani. Tii canaa quishacari Jesuta, canaari pueya tiuquinijioriquiaa moojiniani, pueya tacatosacari noojia sesa nojori miishanojiniji. <sup>23</sup> Tiuquinijiona Juanri jiyacari pueya tiuquinijioriquiaajuhua Enón tiacajinia, Salím tiaca shuriucua. Juanri tii tiuquinijioriquiaa pueya, queraatia mohuaca quishacari tii. Pueyari nocua quiojoquiaarijuhuaj tiuquinijosano nojori quiniuria. <sup>24</sup> Juanri jiyacari nujuatejojuajinia nujuatesoo quiriqiaajaa.

<sup>25</sup> Cuno quishacari, Tiuquinijiona Juan pueyari tamonu narta Judio pueyanota pocoo-joriquiaa taate pueya naata juhua jeequesano quiniu Pueyaso niquiarani. <sup>26</sup> Nocuaji nojoriiri Tiuquinijiona Juan sequetusee Jesujiniji:

—Niishitiojonanaa, noo pueyano, quiaa nojuajiniji canaa pohuatacanutej, noo quiata quiqianu Jordán moo taquijiriatej, nojuajana pueya tiuquinijiyajuhuj. Puetunu pueyajanaana nocua quiojiya tiuquinijosano nojori quiniuria.

<sup>27</sup> Tiuquinijiona Juanri nojori riucuaaree saaja:

—Saaja Pueyaso cumaquishacari pueyano, pueyano na naata maninia miiniu Pueyasora. <sup>28</sup> Niajanicyajaaari cua tojiquianu sequeyano: “Janiyari maja Pueyaso Jiyarosano Cristoni. Janiyari nareja nocuaji jeenucuariquiano jiyarosaaquiaarini”. <sup>29</sup> Pueyano rupuenta jaara camiya necocuara, quiarjia cutara necocuaari seetanujuanaa saaja nerano. Naajaa, na rupuenta quishacari na shuriucua, na timitiaari na tojishacari necota pocoojiyano shuquiriaatia. Naajuhuj, janiyari cunora shuquiriaatia quiarjia quiyani pueya rupuesacari Jesucristo. <sup>30</sup> Janiyari cunora jiyarosaaquiaaricujani, pueya cua tojitiniuria nojuaja. Naaratej, pueya cuaara carteera janiya, Cristoocua nojori pacunura saniniuujia, nojori tojiniuria nojuaja. <sup>31</sup> Cante jiyocuacaanuji niqiaaricujani, nojuajaari Jiyaniijajanaa cutara. Janiyari saaja mijiria quiniani. Cunora, cua pohuatasanoori saaja mijiria cua tojishano. Jesucristo saniniuujia, nojuajaari jiyocuacaanuji ninio cutara. Nojuajaari Jiyaniijajanaa. <sup>32</sup> Naacuajitij, na pohuatasanoori tama na niquishanojuaaja jiyocuacaanu, na tojishanonio. Pueyari na pohuatasano cuaracashitiquiaa saaja. <sup>33</sup> Canapuate Jesucristo pohuatasanoocua tiuujiacani, nojoriiri sequeya, seetanujuanaaqui Pueyaso sequesano Neyanujiniji. <sup>34</sup> Pueyasoori jiyanojuaa queraatia na Sohuanu niqitioquiaari na Jiyarosano. Naacuajitij, seetanu Pueyaso rupaaajanaa pohuataari. <sup>35</sup> Pueyasoori jiyanojuaa panijia Neyanu. Naaratej, nojuajaari na jiyatequiaari puetunu casaa jitianarajanaa na quiniuria. <sup>36</sup> Canapuate Neyanuucua tiuujiacani, nojoriiri tari jatanishano pueyaracaanu rishijia nojori quiniuria Pueyasota. Saniniuujia, canapuate Neyanuucua tiuyashijiacani, nojoriiri tariucua Pueyaso juaashano quiya. Nojoriiri saniitiosaanutaniya Pueyasooju nojori quiniuria pueyaracaanu.

#### 4

##### *Jesu pocoojosacari Samaria jiyajinijinio maajitia*

<sup>1</sup> Fariseocuacaari pohuatasaaquiaari, jiyanojuaa queraatia pueya Jesuucua quiojiya na tojitianaa nojori quiniuria. Nojoriiri pohuatasaaquiaarijuhuaj, Jesuuri socua queraatia pueya tiuquinijia Tiuquinijiona Juanjiniji. <sup>2</sup> Seetanujuanaa majaari Jesujuanaa tiuquinijionu quiriquiaa pueya. Saaja canaa cutaraari pueya tiuquinijioriquiaani. <sup>3</sup> Jesu jaara niishiquiaari Fariseocuaca naa pohuataaarucuaa nojuajinijitij, nojuajaari Judea jiyajiniji jiyataquiaariuhua canaa Galilea jiyajiniara.

<sup>4</sup> Canaa quiasacari nucuaco, canaari Samaria jiyacuma tajiriquiano quiriquiaani. <sup>5</sup> Naa canaa quiasacari nucuacotej, canaari Sicar tiacajinia tiuquishiini, Samaria jiyajinia. Cuniqiji, cateca quiriquiaari supuetana José cuhuariquia, na que Jacobo niqitiosano nojuaja. <sup>6</sup> Cuno cuhuariquiaajinia quiriquiaari cuari, supuetana Jacobo jiuutiasano tariucuaanu. Pueyaracaanu Jesu rucuanenuucua nucuamaji, nojuajaari cuno cuari shuriucua cajishii na samareenuta. Panacariiri quiriquiaa. <sup>7-8</sup> Jiyacaritij, canaari tiacajinia quiamaani canaa miaquesocoriquiano canaa masenura casaa. Canaa niyacari, cuno Samaria tiacajinijinio maajiiri cuarimia quiaquiaari mohuaca taqitianura. Jesuuri na sequeree:

—Cua raatere.

<sup>9</sup> Cuno maajiiri Jesu sequeree:

—Pueyanonaa, ¿casaara quia sequeya Samaria jiyajinijinio maaji raatenura quia-janiyani? Quiaacuajaari Judio.

Cuno maajiiri naa sequeree Jesutej, na niishiniuucua Judiocuacuajaari maja na niqiniu paniniu quijia Samaria jiyajinijinio pueya.

<sup>10</sup> Jesuuri saaja na sequeree:

—Majaari quia niishiniu cante quia sequereeni: “Cua raatere”. Quiaa jaara niishiriquia casaa Pueyaso jiitiaa quiarani, quiaa maara cua sequere cua raatenura quiajaniya. Quiaa jaara cua masere, janiya maara quia raatere pueya samiitianijia mohuacani.

<sup>11</sup> Maajiiri na sequeree:

—Jiyaniijianaa, majaari quenaaja quia jiitianu casaa, mohuaca quia taquiriatajara. Nio cuariiri jiyanoehua tucuaa. ¿Quiaatucua teje taquitiare cuno mohuacani, pueya samiitianijiani? <sup>12</sup> ¿Quiaateeri jiyaniijianaa cutara, socua pa supuetana Jacobojiniji? Nojuajaari nio cuari tiujiaquiaari canaara. Nojuajaari niiquiji ratujua quiquiaari neco-huata, na seesano seyano.

<sup>13</sup> Jesuuri na riucuarree miriqui:

—Puetunu nio cuarijiniji ratujuacajanaari saaja jiyamuecoquiaa. <sup>14</sup> Saniniuujia, cante cua mohuaca ratunutaniyani, majaari socua na jiyamuenu quiniutianihua. Cua mohuacaari juhua samo naca pacartanutaniya pueyaracaanu noojiajinia, shuquiriaatia na rishiniuria pueyaracaanu.

<sup>15</sup> Cuno maajiiri Jesu sequeree:

—¡Pueyanonaa, cuno mohuaca cua niqutiore cua ratusocoriquiano, maja socua cua jiyamuenura, naajuhuj, maja pueyaracaanu cua taquirioojonura nio cuarijiniji!

<sup>16</sup> Jesuuri na sequeree:

—Miji quia niyaca quia sequecoo coteenu.

<sup>17</sup> Maajiiri na riucuarree:

—¿Janiyate niyacaracajaarani, quiaa jaara naa cua sequere?

Jesuuri na sequeree:

—Quiaacuajaari seetanujuanaa cua sequeree: “Niyacaajunijia”. <sup>18</sup> Seetanujuanaari. Quiaari tari cinco niyacaaraca quiquiaari. Mariyata cuno, quiarijia quiata quiyani, majaari quia niyacajuhuj.

<sup>19</sup> Naa cuno maaji tojishacari Jesu sequesantej, Jesu sequereeri:

—Jiyaniijianaa, ¡quiaaqui Pueyaso sequenu panishano caminiujuunia! <sup>20</sup> Canaa supuetanaa pueyari niya nio tuhananuucua Pueyaso secojonuujua tarijia. Niajaniya saniniuujia, Judiocuacani, niaari sequequiaa Pueyaso cuaara secojosaaria saaja Jerusalén tiacajinia.

<sup>21</sup> Jesuuri na riucuarree:

—Seetanujuanaa quia sequereera maajiniaa. Cua sequesanoocua quia tiuuri. Quera quiniutianiyari Pueyaso nia secojosacari puetunu tiquiyocua nia quishacarijanaa. Majaari tari Pueyaso secojosaanu quiniutianiya saaja Jerusalén tiacajinia, nio tuhuananuucujuhuj, taa quia sequerecuajani. <sup>22</sup> Niajaniyari maja nia niishiniu cana nia secojoquiaani. Canaa Judiocuacani, canaa cutaraari niishiyani cana canaa secojoquiaani. Pueyasocujaari canaa Judiocuaca supuetanaa niishitioquiaari pueyacuaji Tacunaari supuentaniya tama canaa Judiocuacajinijiojuaaja. <sup>23</sup> Quiarijia cutara, cante seetanujuanaa Pueyaso shuquiritiajani, nojoriiri na Que Pueyaso secojonutaniya puetunu nojiatajanaa, seetanujuanaa na tojjiaca nojori quishacari. Pueyasoori naa paniya pueya secojonura nojuaja, cante na secojonuujacuajani. <sup>24</sup> Pueyasoori sohanu. Naaratej, cante Pueyaso shuquiritini panijiacani, nojori cuaara secojoora Pueyaso puetunu nojiatajanaa, Pueyaso Sohanu tojjiaca nojori quishacari.

<sup>25</sup> Cuno maajiiri Jesu sequeree:

—Janiyacuajaari niishiyani Pueyaso sequesano Cristo mijiria na jiyarosocoriquianoori niniutianiya. Nojuaja jaara tiuquiri, nojuajaari puetunu maninia pa pohuatanutaniyanaa.

<sup>26</sup> Jiyacaritij, Jesuuri maatia na sequeree:

—Janiyacuajaari cunoni, quiata pocoojiyacuajani.

<sup>27</sup> Jiyacaritij, canaari Jesuucua tiuquijiorohuani. Canaari jiuujiatequiaarini canaa niquishacari Jesu pocoojiyano cuno maajitia. Majaari quenaaja canaa nequesotanu quirii Jesu, casaa cuno maaji paniriquiaani, mariyata casaajiniji nojori pocoojoriquiaani.

<sup>28</sup> Cuno maajiiri cuniquijia na pataco tiujiaquee. Na tiacajinia quiaarohuari. Na tiuquishacari, na tiacajinia quiniaa pueya sequesuhuari:

<sup>29</sup> —¡Miji pueyanaa, nia niquiqui pueyano! ¡Nojuajaari cua sequeree puetunu cua miishanojuanaa! ¿Majate Cristoni, tariucuacaanu Pueyaso sequesano pocua na jiyarosocoriquianotej?

<sup>30</sup> Pueyari cuno tiacajiniji Jesuucua nijioquiaari. <sup>31</sup> Cuno maaji quiasacari na tiacajinohua, jiyacaritij, canaari Jesu mianuutenu paniriquiaa juucuan. Canaari na sequeriquiaani:

—¡Niishitiojonanaa, quia miaquere!

<sup>32</sup> Jesuuri saaja canaa sequeree:

—Janiyacuja miaquesanoracani, cuno miaquesanoori nia niishishoo.

<sup>33</sup> Canaa, Jesu saquiriojosano pueyani, canaari naa tama nequesoreetooreejaanijia:

—Pa niyacari miaquetesaaquee jiyotucuaajaari.

<sup>34</sup> Jesuuri miriqui canaa sequeree:

—Cua miishacari cua Jiyarona panishano, cunoori cua miaquesano, naajuhuj, cua tucuatasaari na panishano. <sup>35</sup> Niaari sequequiaa: “Cuaara shocojorajaara cuatro raza. Pueyari jiyacari shusha coteenutaniya na nataacuaca carojotanu”. Janiyara, maja naatej. Seetanujuanaa nia sequeya cutaranijia, nia namijia nia riatare maninia nia niquiniuria. Nataacuacacuja tari noshiquia, carojotasocoriquiano. <sup>36</sup> Na carojotanaari na poonijionu sami niquitioshiya. Na carojotasanoori pueyaracaanu quiriquiano. Naacuajitij, cuhuariquia natoonaari jatiqui shuquiriniutianiya nataacuaca carojotanaata. <sup>37</sup> Naaratej, seetanujuanaari nio tariucuacaanu sequesano. Naa sequeryari: “Tamonuuri saaja nareja nataja. Na nuhuaji, tamonuuri saniniuuja na carojotaja”. <sup>38</sup> Janiyari saniniuuja nia jiyaramiquiquianuni nataacuaca nia carojotanura quenaaja nia poonijiaquishoo cuhuariquiajinia. Cunoori tamasa poonijosano quiquiaari. Niaari juhuajaniya tamasa poonijosanojiniji carojotaquiaa shuquiriaatia.

<sup>39</sup> Queraatia pueya cuno Samaria tiacajinijinoori Jesuucua tiuuquiaari, nojori tojishacari naa cuno maaji sequesantej: “Cua sequeree puetunu cua miishanojuanaani”.

<sup>40</sup> Naaratej, cuno pueya jaara Jesuucua tiuquijioquiaari, nojoriiri na masuuquiaari tii na camueenujunura nojori tiacajinia quenaaja. Naaratej, canaari Jesuta tii camueequiaari caapiqui juucani. <sup>41</sup> Socua queraatia cuno pueyajinijinoori Jesuucua tiuuquiaari, nojorijianaa jaara Jesu tojiquiaari Pueyaso rupaa pohuataano. <sup>42</sup> Naaratej, nojoriiri cuno maaji sequeturee:

—Quiarijiani, majaari canaa tiuuniu Jesuucua, saaja canaa quia pohuatanuucua nojuajiniji. Quiarijia cutara, canaacujaari tama canaa numaatajaaja tojirii na pohuatasani. Naaratej, canaari quiarijia niishiyani, Jesuuri seetanujuanaa Pueyaso jiyanootiriquiano pajaniya, puetunu mijiria quiniaa pueyajanaano.

### *Jesu naatanishacari jiyaniijia Herodes pueyano niyanu*

<sup>43</sup> Caapiqui juuca Jesu camueetanu nuhuaji canaa, Samaria pueya tiacajinia, nojuajaari cuniquiji canaa na pueya jiyataaree Galilea jiyajiniara. <sup>44</sup> Jesuuri tarijia sequequiaari: “Nio tariucuacaanu sequesanoori seetanujuanaa sequesano. Naa sequeryari: ‘Pueyaso sequenu panishano caminiujiunaaari maja tojishano quijia tama na jiyajiniajaaja’”.

<sup>45</sup> Naajaa, Jesu jaara canaa tiuquitiaseequiaari jiyacari Galilea jiyajinia, cuniquijinio pueyari maninia na tiuquitiquiaari saaja. Nojoriiri naa maninia na tiuquitiquiaari tari nojori niquiniuucua Jesu miishano na cumaacata Jerusalén tiacajinia, Pascuara nojori queranacusacari tii.

<sup>46</sup> Galilea jiyajinia canaa quishacari, Jesuuri canaa jiyataaree Caná tiacajinia, tee na jataniquiaari mohuaca vinoracujani. Jiyacaritij, Capernaum tiacajinia quiquiaariiri tamonu pueyano, Galilea jiya jiyaniijia jiyatesano camarnura. Cuno pueyano niyanuuri jiyanohua cusosu matariquiaa. <sup>47</sup> Cuno camarnu jaara niishiquiaari Jesu tari tiuquiriohua Judea jiyajiniji, nojuajaari jiyacari niquiaari Capernaum tiacajiniji Jesuucua, Caná tiacajinia. Na tiuquishacari Jesuucua, na sequeeseri:

—¡Jiyaniijianaa, cucua quia taraajere! ¡Cua niyanu quia naataniqui, quera cusoyano!

<sup>48</sup> Jesuuri na riuquaree:

—Niaa jaara cua cumaacata cua miishano niquiyaquiri, niaari cucua tiuyaquiquiaa.

<sup>49</sup> Cuno camarnuuri saaja Jesu sequeree:

—¡Jiyaniijianaa, mijijiaj, jati pa quiaare cua tiajinia, quiyanu cusoyaquishacarijia!

<sup>50</sup> Jesuuri na sequeree:

—Quia quiaarohua. Quia niyanucuaa tari naatarohua.

Cuno camarnuuri Jesu sequesanoocua tiuuri. Quiaarohuari. <sup>51</sup> Jiyacari na tiajinia, na seyari niquiquiaari camarnu niyanuuri seetanujuanaa maninia naatarohua. Naaratej, nojoriiri quiojoquiaari na camarnu numootenuucua. Nojori quiojosacari, na camarnu naacuteree saaja nuu cajiniocuaari. Nojoriiri na sequeree:

—¡Quia niyanu tari naatarohua!

<sup>52</sup> Nojori camarnuuri nojori nequesotaree:

—¿Taacari na casonu tajiyatemohuacuaani?

Nojoriiri na riucaaree:

—Naseca nocuaji tajimiohuacuaa shusha pananu mueecosacari nio niniriquiacuaani.

<sup>53</sup> Cusosu queeri niishiQUII, Jesucuaaari jiyacari na sequeriquiacuaa: “Quia niyanu tari naatarohua”. Naaratej, camarnuuri necocuataja Jesuucua tiuuri, puetunu necohuata-janaanio.

<sup>54</sup> Judea jiyajiniji Jesu tiuquishacariuhuj, naa na naatanishacari cuno cusosutej, cunota tari caapiqui quiquiaariiri na cumaacata na miishano Galilea jiyajinia.

## 5

### *Jesu naatanishacari cumatacuruhuana cusosu Betzata cuari shuriucua*

<sup>1</sup> Tamacariuhua, socua canaa Judiocuaca queranacusacari quiquiaari Jerusalén tia-cajinia. Naaratej, canaari Jesuta nocua quiojoquiaarijuhuaj. <sup>2</sup> Jerusalén tiacaari puetunujuanaa puereetuca sohuacajiniacuma quiya. Tohuateyacaari quiya tiuquitia-ajara. Tamonu tohuateya sesa quiquiaari “Borregohua tiuquitiaja”. Na shuriucua quiyari cuari. Canaa Judiocuaca rupaaajiniani, cuno cuariiri sesojosaaquiaari “Betzata”. Cinco suhuorotucuaari quijia cuno cuari shuriuquioco. <sup>3</sup> Queraatia cusosuhuari tii matacojua cuno cuari shuriuquioco. Cuno cusosuhuari quiquiaari cariojuarujuri, shipiiniquiujiunaa, cumatacuruhuana cusosuhuanio. Nojoriiri mohuaca sashijia cuaara queyaquetesaaria. <sup>4</sup> Pueyaso seruuri noojiaqueya rosequiaari mohuaca na queya-quetenura. Cuari queyaquesacari, cante coteenujuanaa rosequiaari tiini, nojuajaari naataquiaariuhua na casonujiniji. <sup>5</sup> Tamonu cusosuuri tii narta cusosuhua tajinia matariquiaajuhuj. Tari na shoconujuquiaariiri treinta y ocho marijia, pueyaracaanu na matasacari. <sup>6</sup> Jesuuri na niquiquiaari mataano. Noojiajinia niishirijiaariuhuj cuno pueyano tari shocotejoquiaari queraatia marijia, naa pueyaracaanu na matasacari. Nocuaji Jesuuri na sequeree:

—¿Quiaate naatanu paniya?

<sup>7</sup> Cusosuuri na riucaaree:

—¿Cantucua cua naacure cuarijinia cua rosenurani, mohuaca jaara queyaquetesaare-cuaa? Janiya jaara rosenu paniquiaa juucuaani, cuarta cusosuuri saaja cua shocotaquiaani.

<sup>8</sup> Jesuuri na sequeree:

—¡Quia sanere! Quia matu quia pataarohua.

<sup>9</sup> Jiyacaritij, cusosuuri ritia jeequequee. Na matu pataarohuari. Cuno juucaari Sábado quiriquiaa, canaa Judiocuaca samaatenu juuca Pueyaso niquiara. <sup>10</sup> Canaa Judiocuaca camarucua jaara cusosu niquiquiaari na matu pataano, na juaatiuriiri. Naa na sequetureeri:

—¿Majateeri quia niishiniu, quiarijiaari Sábado? ¡Maja quia matu quia patanujuj!

<sup>11</sup> Cusosu naatanohuari nojori riucaaree:

—Cua naataniniacuaa cua sequereeno: “Quia matu quia pataarohua”. Janiyari cunora na pataani.

<sup>12</sup> Narta Judiocuaca camarucuaari na nequesotaree:

—¿Cantejaara naa quia sequereeni?

<sup>13</sup> Nojori riucaareeri:

—Johuaj. Maja cua niishiniu canaquitijia cua naataniriitij.

Jesu naatanishacari cuno pueyano, queraatia pueyari namitia tii quiriquiaa. Naacuajitij, Jesuuri ritia tajiniocuareequiaari pueya tajinia, na naatanishano pueyanoocuaji. <sup>14</sup> Na nuhuaji, Jesuuri na riuriataquiaari cuno juucaja Pueyaso Secojoua tiajinia. Jiyacari na sequereeri:

—Quiaacuajaari tari naatanishaarohua. Quiarijia cutara tama quia cuaqueyajaaja quia cojuare maja sesa quia miiniuhuara socua, quiaa mariqui socua taraatia miiriiri.

<sup>15</sup> Naacuajitij, cuno pueyanoori Jesu niishirii. Cunora, canaa Judiocuaca camarucuaa quiaareeri. Nojori sequeseeri:

—Jesuqui cunocuaja cua naataniriini.

<sup>16</sup> Naa Jesu miiniuucua samaatenu juucatej, narta Judiocuaca camarucuaari na qiatunu panijia juuca. <sup>17</sup> Jesuuri saaja nojori sequere:

—Cua Queeri pueyaracaanu poonijija. Janiyari cunora poonijijajaacuhuj.

<sup>18</sup> Naa Jesu sequesacari nojoritij, narta Judiocuaca camarucuaari jiyanohua na monu paniriquiaa. Nojoriiri maja na monu paniniu quiriquiaa saaja samaatenu juuca na poonijionuucua. Socua jiyanohua na motunu paniriquiaari Jesu jiyatenuucua tama na cuaqueyajaaja juhua Pueyaso, Pueyaso na jiyaniquishacari na Queta.

### *Jesuuri Jiyaniijajanaa, Pueyaso Niyanu na quishacari*

<sup>19</sup> Nocuaji Jesuuri narta Judiocuaca camarucua sequere:

—Seetanujuanaa nia sequeyanijia, Pueyaso Niyanu cua quishacari, maja cua naata casaa miiniu tamajaaja. Janiyari saaja miiquiaani taa cua Que cua niquiquiaa miyanocuaani. Casaa cua Que miiquiaacuaani, janiyari naa miiquiaajaacuhuj. <sup>20</sup> Cua Queeri cua panijia. Cunora, nojuajaari puetunu na miishanojuanaa cua niishitiojoquiaa. Naajuhuj, cua niishitiojonutaniyari socua jiyajeneta casaa tariucua cua miishanojinijicuaa. Niaari nocuaji shiriqutiuniutianiya. <sup>21</sup> Cua Queeri macunucua samiitianijioquiaa, pueyaracaanu rishijia nojori quiniuria. Naajuhuj, janiyari pueya samiitianijioquiaani, cana cua samiitianiniu paniyacujani. <sup>22</sup> Cua Queeri maja na nequesoreenu quiniutianiya pueya. Nojuacuajaari tari cua niquitocanu na cumaaca, puetunu pueyajanaa cua nequesoreenura. <sup>23</sup> Nojuajaari naa miiquianu puetunu pueyajanaa quiniuria cua tojtiajaca, naatej, taa cua Que na tojtiatuquiaacuaani. Cante cua ruuretajani, cunoori cua Que ruuretajajuhuj, nooj, cante mijiria cua jiyaroquiaaricujani.

<sup>24</sup> 'Seetanujuanaa nia sequeyanijia, cante cua sequesano tojjiani, mariyata cante cua Jiyaronaacua tiuyajaaniuhuj, nojuajaari pueyaracaanu Pueyasota rishiriquiano cutara. Nojuajaari maja na saniitiosaanu quiniutianiya. Nojuacuajaari tari samiitianishaarohua juhua macu na quiniujiniji Pueyasooju na quishacari. <sup>25</sup> Seetanujuanaa nia sequeyanijia, quera quiniutaniyari juhua macunucua quijiaca samiitiasacari. Seetanujuanaa quiarijiaari, juhua macunucua quijiacaari cua rupaa tojtianutaniya. Cua rupaa tojtiajacaari samiitiaconutaniya, pueyaracaanu rishijia nojori quiniuria. <sup>26</sup> Cua Queeri quiijajuhanajaj. Majaari na naata shaajenu. Nojuajaari naa quijiara cua jiyatequiaarijuhuj, juhua nojuarajuhuj. Naacuajitij, cua naata pueya jiyatenu naa quijarajuhuj. <sup>27</sup> Pueyanora cua quiniuucua, na cumaaca cua niquitioreeri cuarta pueya cua nequesoreenura, nojori cua saniitionurajuhuj. <sup>28</sup> Cua tojitiare. Majaari nio sequesanoocuaji nia shiriqiniu. Tamacari, puetunu macunucujanaari cua rupaa tojitiuniutianiya. <sup>29</sup> Macunucua tojitiushacari cua rupaa, nojoriiri samiitiaconutaniya, na jamacajiniji nojori tohuareetanura. Cante maninia mijiaca quiquiaarini, samiitiaconutaniuhuari pueyaracaanu shuquiriaatia quijiaca nojori quiniuria Pueyasota. Saniniuujia, cante sesa mijiaca quiquiaarini, puetunu nojorijianaari quejoosaanutaniya pueyaracaanu saniitiosocoriquiano.

### *Jiyaniijajanaa na quiniuucua, Jesu tama nojuajiniji pohuataajaaja*

<sup>30</sup> Pueyaso Niyanu cua quishacari, naajaa, majaari cua miiniu tama cua panishanojuaaja. Janiyari sesa mijiaca juaaquiaacujani, saaja cua Que niishitishacari janiya, nojori miishanoori sesa. Tama cua panishanojuaaja miyashijia cua quiniuucua, janiyari namitijanaa nojori juaaquiaani. Janiyari pueyaracaanu miiquiaa saaja cua Jiyarona



panishanoni. <sup>31</sup> Pueyano jaara tama nojuajiniijiaaja pohuataa narta pueyano, na pohuatasanoocua maja tiuushano. Naaratej, janiya jaara tama janiyajiniji pohuatariquia nia niquiarani, tama cua pohuatasanojuaja maara najuhuana quiriquiaj. <sup>32</sup> Naajaa, quiaritia cutara nia naata niishiniu cua pohuatasanoori seetanujuanaa. Tamonucuajaari janiyajiniji pohuataa seetanujuanaa. Nojuajaari cua Que. Cunora, niishianijia na pohuatasano janiyajiniiri maja najuhanaj.

<sup>33</sup> 'Niaari nia pueya jiyarocanu Tiuquinijiona Juancua, nojori nequesotanura janiyajiniji. Nojuajaari saaja seetanujuanaa nia pohuatacanu janiyajiniji. Majaari na seetanu quiquianu janiyajiniji. <sup>34</sup> Nojuaja jaara seetacanu janiyajiniji nijaniya, quiria, naajaa. Janiyacuajaari niishiyani seetanujuanaari cua pohuatasano nijaniya tama janiyajiniijiaaja. Tiuquinijiona Juanri seetanujuanaa pohuatacanu janiyajiniji nijaniya. Naa cuara na pohuatasanoocua tiuuria, Pueyaso jiyanooniuria nijaniya. Janiyari saaja cunora nia pohuataa Tiuquinijiona Juanjinijini. <sup>35</sup> Nojuajaari juhua samaritiu noshitishano nia tajinia na quishacari. Niaari rupaquijia na timitiacanu, juhua na cuhuatasacari nijaniya. Niaari najuhuana tojiquianu na pohuatasano. <sup>36</sup> Tiuquinijiona Juan pohuatasano janiyajiniiri seetanujuanaa. Naa jaara na pohuatasanoocua tiuuniu paniyashijiaa quiyajaa, naajaa. Cua cumaacata cua miishacari, cunora seetanujuanaa nia niishiri, cua Que Pueyasoori cua jiyaroquiaari. Nojuacuajaari cua sequequiaari naa cua miiniuriatej. <sup>37</sup> Cua Quejanaari cua jiyaroquiaari. Nojuajaari janiyajiniji niishitioquiaari pueya. Naajaa, majaari quenaaja nia tojiniu quiquiaari na pocuanu. Nojuajaari nia niquishoojuhuaj. <sup>38</sup> Majaari quenaaja na rupaa quiniu nioojiajinia, nia tiuyaquishacari na Jiyarosanoocua. <sup>39</sup> Niaari suraatia serojoquiaa tariucuaaanu naajiosano Pueyaso Rupaa. Niaari jiyaniya niaa jaara Pueyaso Rupaa niishijiaa quiri, niaari naa pueyaracaanu quiijara quiniutianiya. Seetanujuanaa majaari naatej. Cuno Naajioneejinia, tiiri janiyajiniji naajiotasano quiyacuaja. <sup>40</sup> Niaari saaja cucua niniu paniyaquiquiaa cua jiyatenura nijaniya pueyaracaanu quijiacara cutara.

<sup>41</sup> 'Maninia cua miishanoori maja pueya sequenura janiya: "Quiaari maninia pueyano". Janiyari saaja cua Que shuquiritiquiaa cutarani. <sup>42</sup> Janiyari seetanujuanaa nia niishiyani. Niaari Pueyaso shuquiritiaashijiaa, nia paniyaquishacari nojuaja. <sup>43</sup> Cua Quecuajaari cua jiyaroquiaari cua niishitiojonura nijaniya nojuajiniji. Quiarijiani, majaari nia tojiniu paniniu janiya. Saniniuujia, tamonu jaara tama na cuaqueyajaaja jiyateya juhua Pueyaso Jiyarosana na quiniuria, niaa maara cuno tojiri cutara, nojuaja jaara niaacua nimia na niishitiojonura nijaniya tama na niishishanojuaja. <sup>44</sup> Majaari nia naata cua pohuatasanoocua tiuuniu, niaa jaara saaja niarta pueya shuquiritiasano quiniu paniquiaa, maja Pueyaso shuquiritiasano. <sup>45</sup> Majaari nia jiyaniyu janiya niaacuara tonujunutaniya cua Queni. Tama Moisés cuajaari niaacuara tonujunutaniya, cua tojitiaashijiaa nia quiniucua. Niaari jiyaniya niaa Pueyaso muerasu, juhua Moisés tojijiaa nia quishacari. ¿Niaateeri seetanujuanaa Moisés tojijiaa? ¡Maja! <sup>46</sup> Nojuacuajaari janiyajiniji naajiotaquiaari. Naacuajitij, niaa jaara seetanujuanaa na naajiotasanoocua tiuuriquia, niaa maara cucua tiurijuhuj. <sup>47</sup> Nocuaji, niaa jaara Moisés naajiotasanoocua tiuyaquiquiaa, ¿niaatucua taa tiuri quiaritia cua pohuatasanoocuan?

## 6

### *Jesu mianuutesacari cinco mil canuu*

(Mt 14.13-21; Mr 6.30-44; Lc 9.10-17)

<sup>1</sup> Na nuhuaji, canaari Jesuta niuutiaquiaari Galilea caminia taquijiriani. Galilea caminia sesa quiquiaarijuhua Tiberias caminia. <sup>2</sup> Jiyanoohua queraatia pueyari Jesu niquiquiaari tari, cusosuhua na naatanijiosacari. Naaratej, nojoriiri Jesu neteyotariquiaa caminia shuriuquiuco. <sup>3</sup> Canaa shiitiasacari caminia taquijiria, Jesuuri canaa tacatamaa tuhananuucua. Tii cajitiasee canaari. <sup>4</sup> Jiyacaritij, quera Pascuara queranacusacariiri quiriquiaa. <sup>5</sup> Jesu niquishacari jiyanoohua queraatia pueya nocua niyano, canaa cojinia Felipe sequereeri:

—¿Tee pa masenutaniya queraatia pan nio pueyaraarini?

<sup>6</sup> Naa Felipe nequesotareeri nareja na saniniuria. Jesuuri tari niishiriquiaa taa nojuajanaa mianuutenutaniya cuno pueyani. <sup>7</sup> Felipeeri na riucuaeree:

—¡Paa jaara cumaneeca jiitiare doscientos juuca pa poonijosanojiniji pan pa maseta-jarani, cuno maara najuhuana secaja quiri puetunu nojoririjanaa!

<sup>8</sup> Jiyacaritij, canaa cojinia Andrésri Jesuucua nimiaa. Andrésri Simón Pedro tarajanu. Nojuajaari Jesu saquiriojosano pueyanojuhuaj. Jesu sequeeseeri:

<sup>9</sup> —Jiyaniijianaa, caya samijia niya cinco pan jiitiaa cebada cashojuajiniji shipinishano, caapiqui sapitiaajanio. Naajaa, cunoori najuhuana puetunu cuno pueyarajanaa.

<sup>10</sup> Jesuuri saaja canaa na saquiriojosano pueya sequeree:

—Puetunu pueyajanaa nia sequere cuaara cajitiuuria.

Cuniqui, canaa tii quiriquiaani, shanohua jiyasocuaari quiriquiaa, maninia cajitijua. Naaratej, pueyari cajituri. Puetunu cuno pueya maanujinijinojuanaani, saaja canuuri quiquiaari cinco mil pueya. <sup>11</sup> Jiyacaritij, Jesuuri cuno pan pataree. Pueyaso secojoree nocuaraari. Na nuhuaji, canaa na serotaniriiri. Canaari cajituyano pueya puetunu na panishanojuanaa niqutiojoreeni nojori miaquenuusocoriquiano. Jesuuri naa miirii sapitiaajajuhuj. <sup>12</sup> Puetunu pueyajanaa jaara tooquioquiaari, Jesuuri canaa na saquiriojosano pueya sequereeni:

—Puetunu miaquesano raquiquiajanaa nia reraterohua, maja najuhuana na niitiasaanura.

<sup>13</sup> Canaari cuno cinco panjiniji pueya miaquesano raacua reratereeni. Canaa reratesacari, canaari doce canaasatu mishinijioreeni. <sup>14</sup> Pueya niquishacari naa Jesu miishano na cumaacatej, nojoriiri sequeturiquiaa:

—¡Nio pueyanoqui seetanujuanaa Pueyaso sequenu panishano caminiujiunia, noj, tariucuaaanu sequesaaquiaari pocua niriqianotej!

<sup>15</sup> Jesuuri niishirii cuno pueyari na quianu paniriquiaa, nojori jiyatenura nojuaja puetunu Israel pueyajanaa jiyaniijia na quiniuria. Nocuaji, Jesuuri tamajaaja tacaquee socua jiyaconaja tuhananuucua.

*Jesu rucuanesacari mohuaca caco*

*(Mt 14.22-27; Mr 6.45-52)*

<sup>16</sup> Tariucua pananu tiuquishacari, canaa, Jesu saquiriojosano pueyani, canaari rose-taarohua caminiajiniarani. <sup>17</sup> Canaari botejinia tacataseeni, cuniquiji Capernaum tiacajiniara canaa niuutianura caminia taquijiria. Tariucua ninishiquiiri quiriquiaa. Majaari Jesu tiuquiniu quiriquiohua juhuanojuaja canaacua. <sup>18</sup> Tari canaa niuutiasacari, paratuuri jiyanohua piyarojoriquiaa. Caminiaari cunora jiyanohua cajiniuucuariquiaa. <sup>19</sup> Canaari tari caminia jiuujiajinia quiriquiaani, seis kilómetroruhua canaa rupare-tasaquiji. ¡Canaari jiyacari casaa niquirii canaacua catecanoyanoni! ¡Mohuaca caco canujuriquiaari! ¡Canaari nocuaji shiriiquituriiri jiyanohuani! <sup>20</sup> Jiyacaritij Jesuuri canaa sequereeni:

—¡Maja pueretunu! ¡Janiyacujanijia!

<sup>21</sup> Na rupaa canaa tojishacari, canaari shuquiriaatia na tacanituriiri botejiniani. Canashiyaquiji boteeri ritia shiitiasee terara canaa quiariquiaacuajani.

*Jesu mianuutesano pueya pajesacari nojuaja*

<sup>22</sup> Jaara juhuaquequiaari, Jesu mianuutesano pueyari na pajenuunu coteequiaari tee canaa quiriquiaa caminia taquijiriacuajani. Nojoricuajaari tenacari niquiquiaari saaja niquiriyatu boteeri shiitiriquiaa. Saaja canaa, Jesu saquiriojosano pueyani, canaari cuno botejinia quiaquiaariuhua nojori niquiarani. Majaari Jesu quianu quiriquiaa cutara canaata. <sup>23</sup> Jiyacaritij, Tiberias tiacajiniji boteeri tiuquijioquiaari catecaja nojorijiniji, tee Jesu mianuutequiaari nojoricuajani. <sup>24</sup> Cuno pojori niishishacari maja Jesu quiniu quiriquiaa tari tii, canaa na saquiriojosano pueyajuhuj, nojoriiri cuno boteyajinia tacataquiaari. Nojoriiri Capernaum tiacajinia nijioquiaari cuno boteyajinia, tii nojori pajenura Jesu.

*Jesucristo juhua poojia miaquesano*

<sup>25</sup> Cuno pojori tiuquiiijosacari caminia taquijiria, Jesu riuriatatusseeri. Na nequesotatureeri:

—Niishitiojonanaa, ¿taacari quia niyarohuacuaarini?

<sup>26</sup> Jesuuri saaja nojori sequeree:

—Janiyari seetanujuanaa nia sequeyani, majaari nia pajenu janiya nia niqiniuucua cua cumaacata cua miishano. Niaari cua pajenuya saaja cua mianuutenuucua niajaniya, taa nia tooquiorucuaacujani, cua mianuutesacari niajaniya. <sup>27</sup> Maja saaja miaquesanoocua nia tacaaniu, nia cuaqueya nia cumaquitajara. Cunoori maja na jiyatenu quiniutianiya niajaniya pueyaracaanu rishijiara. Saaja nia tacaari cutara nioojia samiitianijia miaquesanoocua, pueyaracaanu rishijia nia quiniuria. Janiyacuajaari cuno nia niqitioriquianoni, pueyano cua quiniuucua. Cua Quecuajaari cunora cua jiyaroquiaari. Cunora, cua Queeri cua miitiquiaa cua miishano na cumaacata, nia niishiniuria janiyari na jiyarosani.

<sup>28</sup> Cuno pueyari Jesu nequesotaree:

—¿Casaa canaa miiniutianiyanii Pueyaso panishano canaa miiniuria, Pueyaso shuquiritasano canaa quiniurijahuaj?

<sup>29</sup> Jesuuri nojori riucaaree:

—Pueyaso Jiyarosanoocua nia tiuuri. Saaja naa nia miishacarij, Pueyasoori nia shuquiritianutaniya.

<sup>30</sup> Cuno pueyari Jesu sequeturee:

—Canaa niqiuara quia cumaacata casaa quia miiricuarajaj, canaa niishiniuria quiaari seetanujuanaa Pueyaso Jiyarosano. ¿Casaa canaa quia niqitiniutianiya canaa tiuuniuria quiocuani? <sup>31</sup> Canaa quia niqitiricuaraja quia cumaacata quia miishano, taa Moisés niqitiquiaari canaa supuetanaacuaani. Nojuajaari jiyocuacaanuji pan tiniquiaari pueyaracaanu nojoriria, cariiquia jiyajinia nojori rucuanesacari. Naa naajiotasano quiyacuajaari tariucuacaanu Pueyaso Rupajinia:

“Nojuajaari nojori mianuutequiaari jiyocuacaanuji tinio pan”.

Naacuajitij, canaari niishiyani Moisés cuajaari Pueyaso jiyarosano quiquiaari.

<sup>32</sup> Jesuuri nojori riucaaree:

—Seetanujuanaa nia sequeyanijia, cuno jiyocuacaanuji panni, cunoori maja Moisés tinishano quiquiaari. Majaari seetanujuanaa jiyocuacaanuji pan na quiniu quiquiaarijihuaj. Quiarijia cutara, cua Queeri niaacua jiyarorucuaa seetanujuanaa jiyocuacaanuji panjanaa cutara. <sup>33</sup> Cuno, Pueyaso niqitiosano pan jiyocuacaanuji rosenoni, cunoori puetunu mijiria quiniaa pueyajanaa samiitianijiojua cutara.

<sup>34</sup> Naaratej, cuno pueyari Jesu sequeree:

—¡Jiyaniijianaa, quiocua pueyaracaanu canaa niqitioriquia cuno pan!

<sup>35</sup> Jesuuri nojori sequeree:

—Janiyacuajaari cuno panni, pueya samiitianijiojuani. Cante cucua niyani, majaari na miaajenu quiniutianiya socua. Cante cucua tiuurijiaaniuhuaaj, majaari na jiyamuenu quiniutianiyajuhuaj. <sup>36</sup> Taa cua sequeree tari niajanijacuajani, niaari juucua cua niqiuia. Majaari quenaaja cucua nia tiuuniu. <sup>37</sup> Naajaa, puetunu cua Que niqitiosanojuanaa janiyani, nojoriiri cucua niya. Cuno pojori, cante cucua nijiyani, majaari cua ruuretanu nojori. <sup>38</sup> Majaari jiyocuacaanuji cua roseno quiquiaari cua miiniuria tama cua miiniu panishanojuaja. Mijiria niqiaarinijia saaja cua Que panishano cua miiniuria, cante cua jiyaroquiaaricujani. <sup>39</sup> Majaari cua Jiyarona paniniu cua juurequetenura quenaaja niqiriyatujua na niqitiosanojiniji janiya. Nojuajaari paniya cutara, nojori cua samiitianijionura jiya puequesacari. <sup>40</sup> Canapute cucua tiuujiacani, nojori niishishacari janiya Pueyaso Niyanuni, cua Queeri puetunu cuno pojorijianaa paniya pueyaracaanu rishijaca nojori quiniuria. Naacuajitij, janiyari nojori samiitianijionutaniya jiya puequesacarini.

<sup>41</sup> Jesu sequenuucua, “Janiya jiyocuacaanuji roseno panni”, tii quiniaa narta Judiocuaacari cunora juaaquioree. <sup>42</sup> Sequetureeri:

—¿Majate nio pueyano Jesucuja, José niyanutej? ¡Paacuajaari na queya niishiyani! ¿Casaara quiarijia na sequeyari: “Jiyocuacaanuji rosenonijia”?

<sup>43</sup> Jesuuri nojori sequeree:

—¡Tariucuaja! ¡Maja nia juaaquionu! <sup>44</sup> Pueyanoori maja na naata tiuuniu cucua tamaajaaja, cua Que jaara noojiajinia poonijyaquiri. Janiyari puetunu cucua tiuuniaajanaa samiitianijionutaniya jiya puequesacarini. <sup>45</sup> Tariucuacaanu pueyara Pueyaso sequesano caminiujiunia naajiotasanocujaari naa sequeya:

“Pueyasocujaari puetunu nojorijianaa niishitiojonutaniya”.

Naacuajitij, cante cua Que niishitiojosano tojjia seetanujuanaani, nojuajaari cucua tiuya.

<sup>46</sup> ‘Cua Queeri maja pueya niquishano quenaaja. Saaja na niquinia cutaraari janiya cante Pueyasojiniji niquiaaricujani. <sup>47</sup> Seetanujuanaa nia sequeyanijia, cante cucua tiuujiani, nojuajaari tari pueyaracaanu rishijiara jatanishaaree. <sup>48</sup> Janiyacuajaari pueya samiitianijia panni. <sup>49</sup> Cariiquia jiyajinia nia supuetanaa camarucuneejotasacari, nojoriiri cuno jiyocuacaanuji tinio pan miaquenuuquiaari juucua. Naajaa, saaja cusonuquiaariiri. <sup>50</sup> Saniniuujia, cante quiarijia seetanujuanaa jiyocuacaanuji roseno pan miaqueyani, majaari Pueyaso shaajanu quiniutianiya nojuaja. <sup>51</sup> Janiyacuajaari cuno samiitianijia panni, jiyocuacaanuji rosenoni. Cante nio panjiniji miaquejani, nojuajaari pueyaracaanu quijia quiniutianiya. Nio pan, janiya na niqutionutaniya puetunu mijiria quiniaa pueyacuaraajanaani, cunoori tama cua cuaqueyajaaja.

<sup>52</sup> Jiyacaritij, tii quiniaa narta Judiocuacaari naa sequetooree tamajaaja na juaaniutia:

—¿Nio pueyanotucua taa miaquetera tama na cuaqueyajaaja pajaniyani?

<sup>53</sup> Jesuuri jiyacari nojori sequere miriqui:

—Seetanujuanaa nia sequeyanijia, niaa jaara miaqueyaquiri cua shu, niaa jaara ratuyaquiri cua nanacajuhuj, majaari samiitianijosano nia quiniu quiniutianiya, pueyaracaanu quijia nia quiniuria. <sup>54</sup> Cante cua shu miaquereeni, cante cua nanaca ratureejaaniuhuj, nojuajaari tari naatarohua shuquiriaatia na quiniuria pueyaracaanu. Jaara cusoyare, naajaa, janiyari na samiitianiniutianiuhua jiya puequesacarini. <sup>55</sup> Cua shuuri seetanujuanaa miaquesano cutara. Naajuhuj, cua nanacaari seetanujuanaa ratusano cutara. Cunoori maja juhua mijiria nia miaquesano. <sup>56</sup> Cante cua shu miaquenani, cante cua nanaca ratunajaniuhuj, nojuajaari coojia rupueja. Janiyari noojia rupuejajuhuj, pueyaracaanu rupuetootesano canaa quiniuria. <sup>57</sup> Cua Jiyarona cua Queeri seetanujuanaa quijia cutara. Cua Que rupueja cua quishacari, janiyari cunora shaajeyashijiani. Naaratej, cante cua miaquenani, nojuajaari pueyaracaanu quijia quiniutianiyajuhuj, na rupuesacari janiya. <sup>58</sup> Janiyari maja juhua nia supuetanaa miaquesano panni. Nia supuetanaari cuno pan miaquenuuquiaari najuhuanaj. Naajaa, saaja cusonuquiaariiri. Janiyari seetanujuanaa jiyocuacaanuji roseno pan cutarani, nia miaquesocoriquiano. Cante cua miaquejani, jaara cusoyare, naajaa, samiitianutaniuhuari pueyaracaanu quijia na quiniuria.

<sup>59</sup> Jesuuri puetunu niojuanaa pohuataquiaari pueya niquiara Pueyaso secojojua tianinia Capernaum tiacajinia.

#### *Queraatia Jesu nuhuajinia pueya artesacari nojuaja*

<sup>60</sup> Naa pueya tojishacari Jesu niishitiojosanotej, queraatia na nuhuajinia pueyari na sequetooquiaari tamajaaja:

—Cuno na sequesanoori jiyanohua jiyajeneta pa miiniuria puetunujuanaa. Maja pa naata. ¿Cantucua na tojirijaaraaranijia?

<sup>61</sup> Jesuuri naa nojori sequesano niishirii noojiajinia. Nocuaji nojori sequereeri:

—¿Niaateeri naa cua sequenuucua juaya? <sup>62</sup> ¿Niaatucua taa sequere socuani, niaa jaara cua niquiri tacaano jiyocuacaanuhua, teje cua niquiaaricujani? <sup>63</sup> Cua shu maja cumaacaraca pueya na samiitianiniuria. Saaja cua Sohuanu cutaraari pueya samiitianijia, pueyaracaanu rishijia nojori quiniuria. Niaa jaara cua sequesanoocua tiuuri, cunoori cumaacaraca cutara na samiitianiniuria nijaniya. <sup>64</sup> Noojiaqueya nijaniyajinijinoori cucuaji taacanuyajaa.

Jesuuri tarijia niishijia cante nocua tiuyashijiacani, mariyata cante na paraa na quiatenutaniyani.

<sup>65</sup> Naa sequere socua cuno pojoriiri:

—Janiyacuajaari cunora nia sequereeni: “Maja pueyano naata cucua tiuuniu, cua Que jaara noojiajinia poonijyaquiri”.

<sup>66</sup> Jiyacaritij, queraatia Jesu nuhuajinia pueyari na cartequiaari. Nojoriiri maja tari Jesuta na rucojonu quijia. <sup>67</sup> Nocuaji, Jesuuri jiyacari canaa na saquiriojosano pueya nequesotaree:

—¿Niajanियariuhuj, niaateeri cua cartenutaniyajaacuhuj?

<sup>68</sup> Simón Pedroori Jesu riucuaaree:

—¡Maja Jiyaniijajanaa! ¿Canaatucua tamonu jiyaniijiaacua pacureni? Canaa quia pohuatasanocuaajaari na naata canaa jataniniu pueyaracaanu rishijia canaa quiniuria. <sup>69</sup> Canaacuaajaari tari quiocua tiuquianuni, canaa niishishacari quiaari Pueyaso Nyanu, saa maninia miijaja.

<sup>70</sup> Jesuuri canaa sequeree:

—Niaacuaajaari tama cua saquiriojosano doce pueyajaaja. Saniniuujia, niquiriyatu niajanियajiniiniori sesaaca.

<sup>71</sup> Naa Jesu sequesacaritij, Judasjiniji sequeriquiaari, Simón Iscariote niyanuni. Nojuajaari seetanujanaa niquiriyatu canaajiniiniao Jesu doce saquiriojosano pueyajiniiniao quiquiaari. Naajaa, tama na Jiyaniijajaja tacartariquiano quiquiaaquiiri.

## 7

### *Tama Jesu tapueyocuaajaaja Jesuucua tiuyashijiaa quiquiaari*

<sup>1</sup> Na nuhuaji, Jesuuri Galilea jiyajinia rucuaneriquiaa. Canaari na cojiriquiaani. Majaari na quiniu paniniu quiriqiaa Judea jiyajinia, tii quiniaa Judiocuaca monu panishacari nojuaja. <sup>2</sup> Jiyacaritij, quera socua canaa Judiocuaca queranacusacariiri quiquiaari Jerusalén tiacajinia. Cuno queranacusacariria pueyari ocho juuca shocotejoquiaari suhorotucujinia nojori quishacari. Naa miitiquiaariiri puetunu marijajanaa canaa niishirionura, canaa supuetanaa Israel pueyari saaja suhorotucujinia quiijia quiquiaari, pueyaracaanu nojori camarucuneejotasacari cariiquia jiyajinia nojori quishacari. <sup>3</sup> Jiyacaritij, tama Jesu tapueyocuaajaari naa Jesu sequeturee nojori macatiniuria nojuaja:

—¡Majaari niyaja quia jateenu! Quiocua queranacunuucua Judea jiyajinia quiaarejuhuaj. Quiocua tii miijiosee quia cumaacata, quia jiyopue niqiniuria puetunu quia miishanojuanaa. <sup>4</sup> Pueyano jaara puetunu pueyajanaa tojiniu panishano pueyano quiniu paniri, ¿maatucua casaara jiyasohuaja miijiore na cumaacatani? Naatej, taa niya quia miijioquiaa quia cumaacatacuaani, naa quia miijiosee puetunu pueya niqiarajanaa Jerusalén tiacajiniajuhuj.

<sup>5</sup> Majaari quenaaja tapueyocuaa tiuuniu quijia Jesuucua. Cunora naa na sequetureeri.

<sup>6</sup> Jesuuri saaja nojori riucuaaree:

—Juhuanajuaja maja cua quiasacari cua miiniuria taa nia sequeyacuajani. Naa jaara quianu paniri, niama juhuajaniya quiaaretej. <sup>7</sup> Niarta mijiria quiijia pueyari maja na naata juaaniu niajaniya. Janiya cutaraari nojori niqiniu paniyaquishooni. Cua niqitiuniu paniyaquiquiaari, nojori cua niishitishacari nojori miishanoori sesa. <sup>8</sup> Nia quiojiyare queranacunuucua. Janiya cutaraari maja cua quianu quiniutianiya juhuanojuaja. Quiarijiani, puera juhuacarijaari cua miiniuria taa nia sequeree janiyacujani.

<sup>9</sup> Naa nojori na sequenu nuhuajitij, Jesuuri cuniquijia jiyojeree Galilea jiyajinia.

### *Jesu quishacari cuno queranacunuujinia*

<sup>10</sup> Na tapueyocuaa jaara quiojoquiaaricuaa Jerusalén tiacajiniara tii queranacunuunura, Jesuuri jiyasohuaja quiaaree nojori nuhuajijuhuj. <sup>11</sup> Queranacunuusacari, narta Judiocuaca camarucuaari Jesu pajenuuriquiaa. Nojoriiri naa sequeturiquiaa:

—¿Tee cuno pueyano quiyarini?

<sup>12</sup> Puetunu pueyajanaari Jesujiniji sasacotooriquiaa. Noojiaqueyari sequeriquiaa:

—Jesuuri maninia pueyano.

Tamasacaari saniniuujia sequeriquiaacujua:

—¡Maja maninia pueyano! ¡Pueya sapojoua najuhuanaj!

<sup>13</sup> Puetunu pueyajanaari naa sasacotooriquiaa jiyasohuaja, nojori pueresacari narta Judiocuaca camarucua.

<sup>14</sup> Jiuujianaraca juuca jaara tari shocojoquiaari nojori queranacunuusacari, Jesuuri jiyacari shusha tiuquiquiaari Pueyaso Secojojuia tiajinia. Tii coteeree pueya niishitiojonuuri. <sup>15</sup> Canaa Judiocuaca camarucuaari jiuujiatequiaari nojori tojishacari Jesu niishitiojosano. Naa sequetureeri:

—¡Cuno pueyanoori maja quenaaja na serojonu quiquiaari! ¿Taa na niishiya puer-aarini?

<sup>16</sup> Jesuuri nojori sequeree:

—Cua niishitiojosanoori maja tama cua niishishanojuaaja. Cunoori cua Jiyarona niishitishano janiya. <sup>17</sup> Cante Pueyaso panishano miiniu paniyani, nojuaja cuaara miiria taa cua niishitiojiyacuaani. Naacuajitij, nojuajaari jiyacari niishiniutianiya, cua niishitiojosanocuaajaari Pueyasojiniji seetanujuanaa, maja tama cua niishishanojuaaja. <sup>18</sup> Cante tama na niishiriojosanojuaaja pohuatajani, nojuajaari saaja naa miiquiaa juhua tojishano pueyano na quiniuria. Jiyano pueyano cuaara tojiyaquishaaria. Saniniuujia, cante na jiyarona niishitiojosano pohuataa pueyani, pueya tojiniuria na jiyarona, cuno pueyano pohuatasano cutaraari seetanujuanaa. Cuno pueyanoori maja pueya sapojojuia.

<sup>19</sup> ¿Niaateeri seetanujuanaa supuetana Moisés Rootasano tojitiajaca? Majaruhua. Majaari quenaaja niquiriyatu nijaniyajinijinio na rootasano tojjia. ¿Casaara nia monu paniya janiyani? ¿Supuetana Moiséste naa nia niishitiojiya na naajioneejinia?

<sup>20</sup> Nojoriiri Jesu riucaturee na juaaniutia:

—¡Quiaaqui samaruraca! ¿Cante quia monu paniyani? ¡Canaa quia sequeretoj!

<sup>21</sup> Jesuuri nojori sequeree:

—Puetunu nijaniyajanaari shiriiquituuquianu samaatenu juuca cua miishacari niquiriyatu casaaniyojuia cua cumaacata. <sup>22</sup> Supuetana Moisés cuajaari nia rootaquiaari nia mueya cararaatuuquia co nia miatenura, ocho juuca jaara na shocojore na rasaanujiniji. Seetanujuanaa, nio niishishanoori maja tama Moisés niishishanojuaaja. Cunoori tariucuacaanu pa supuetanaa niishishano Moisés niyacarijia. Pueyari naa rootasaaquiaari naa nojori miiniuria necohua, seetanujuanaa Pueyaso saquiriojosano Israel pueya nojori quiniuriajuhuaj. Naaratej, jaara quiri samaatenu juuca, naajaa, niaari naa nia niquiohua cararaatuuquia co miatejoquiaa. <sup>23</sup> Naa nia miishacari samaatenu juucatej Moisés Rootasano nia tojiniuria, ¿casaara nia juaya janiyani, cua naataniniuucua cusosu samaatenu juucani? Niaari saaja shiitianiyojuia miatejiya, maninia nia niquiohua quiniuria Pueyaso niquiara. Janiya cutaraari puetunu cuno cusosu cuaqueyajanaa jecacanuni. <sup>24</sup> Naaratej, maja ritia pueya juaajia nia quiniu, nia niishiyaquishacari maninia. Jacaria niishiriojojuia nia quiri, niaa mariqui najuhuana pueya juaariiri na miishano jaara sesa quiaquiri.

### *Jesu pohuatasacari tama nojuajinijiaaja*

<sup>25</sup> Jiyacaritij, noojiaqueya Jerusalén tiacajinijinio pueyari tama sequetooreejaaja:

—¿Majate nio pueyano pa camarucua pajesanocuaaja na mosocoriqianotej?

<sup>26</sup> ¿Taateni? Noocuajaruhua juhuajaniya pohuataa pueya niquiaratej. Majaari quenaaja pa camarucua tenujununoj. ¿Pa camarucuate jiyaniya soj, nojuaja seetanujuanaa Cristo, tariucuacaanu sequesano pocua jiyarosaariqianotej? <sup>27</sup> Paacuajaari nio pueyano niishiyani, tejenote nojuajani. Saniniuujia, Cristojuanaa jaara tiuquiri, majaari quenaaja na niishishaanu quiniutianiya cutara tejenote nojuajani.

<sup>28</sup> Jesuuri jiyacari niishitiojoriquiaa Pueyaso Secojojuajinia. Naa na tojishacari pueya sequesantej, naa na rupaa paaretareeri:

—¿Naatee? ¿Niaateeri cua niishiya? ¿Niaateeri niishiyajuhua, tejenote janiyani? Naajaa, majaari cua ninu quiquiaari tama cua panishacarijiaaja. Janiyari jiyarosanoni. Cua Jiyaronaari seetanujuanaa quijiajuhanajaj. Nojuajaari nia niishishoo. <sup>29</sup> Janiyari na niishiya cutarani. Janiyacuajaari tiji ninioni. Nojuajaari cua jiyaroquiaari.

<sup>30</sup> Nojoriiri jiyacari Jesu quiatunu panirii. Naajaa, majaari quenaaja tamonu naata quiriquiaa na quianura. Majaari na naata quianu quishaaquiaari, juhuanajuaja na monu

juuca quiyaquishacarijia. <sup>31</sup> Saniniuujia, queraatia cuniqui quiniaa pueyari Jesuucua tiuquuaari. Nocua tiuuniaari naa sequetuquiaari:

—¿Cristojuanaa jaara tiuquiri, nojuajatucua socua jiyajeneta casaa miiri na cumaacata nio pueyano miishanojiniji?

*Fariseocuaca quiatenu panishacari Jesu juucua*

<sup>32</sup> Fariseocuacaari cuno pueya tojiqiaari naa nojori maniniuuhuaqueetaano Jesu. Naaratej, cuno Fariseocuaca, pueyacuara secojonaa camarucuanio, puetunu nojorijianaari Jesuucua rojotooquiaari. Na nuhuaji, nojoriiri Pueyaso Secojoua tia cojuanaa pueya jiyaramiquiquaari Pueyaso Secojoua tiajinia, tii nojori quianura Jesu. <sup>33</sup> Jesuuri jiyacari nojori sequeree:

—Janiyari saaja rupaquijia niaata quiniutianiyani. Na nuhuaji, janiyari cua Jiyaron-aacua riujiuuniutianihuani. <sup>34</sup> Niaari cua pajenuunutaniya najuhuanaj. Majaari nia riuriatanu quiniutianiya janiya. Majaari nia naata quianu quiniutianiya tee cua quiniutianiyacuaani.

<sup>35</sup> Nocuaji, cuno Judiocuacaari tama sequetooreejaaja:

—¿Tee na quianutaniyajanojoni naa pocuaaniquitij, na riuriataaquishaanurajuhua? ¿Parta Judiocuacaacua quianutaniya soj, noo pojoriicua Griegohua tajinia niyaquejoquiaaritij? ¿Tii niishitiojonutaniya cuno taucuaca soj? <sup>36</sup> ¿Casaa na sequenu paniya pajaniyarini na sequesacari: “Niaari cua pajenutaniya najuhuanaj. Majaari nia riuriatanu quiniutianiya janiya”, na sequesacarijuhuaj: “Maja nia naata quianu quiniutianiya tee cua quiniutianiyacuaani”?

*Jesu pohuatasano miriqui Pueyaso Sohuanujiniji*

<sup>37</sup> Siete juuca jaara tari shocojoquiaari, queranacunuunu puequesacari juucajanaari juhuaquequiaari. Cuno juucaari quiquaari socua Pueyaso timitiasaanu juuca. Jiyacaritij, Jesuuri nujuaquiaari pueya niqiara. Jiyanohua na rupaa paaretareeri. Naa sequereeri:

—¿Cante jiyamueyani, nojuaja cuara niiria cucua, na ratunura janiyajiniji! <sup>38</sup> Cucua na tiuushacari, nera quiniutianiyari taa na naajiotasaaquiaari tariucuacaanu Pueyaso Rupaajiniacuajani. Naa sequeyari:

“Cante cucua tiuyani, pueyano samiitianijiojua mohuacaari noojiajiniji jaatenutaniya”.

<sup>39</sup> Naa Jesu sequesacaritij, nojuajaari Pueyaso Sohuanujiniji pohuatariquiaa miriqui. Jiyacaritij, Pueyaso Sohuanuuri juhuanouaja maja na quiniu quiriquiaa mijiria, Jesu tacaquishacarijia Jiyaniijajanaa na quiniuria. Naaratej, tii quiniaa pueya sequeriquiaari, cante quiarijia nocua tiuyani, nojoriiri Pueyaso Sohuanu masenutaniya na nuhuaji, nojuaja jaara na jiyarosee jiyocuacaanuji.

*Pueya juaatiosacari Jesuucua*

<sup>40</sup> Jesu jaara pohuatanu puecaquiaari, tii quiniaa pueyari tama pocoojoriquiaajaaja. Noojiaqueya nojorijinijinioori sequeree:

—¿Nio pueyanoqui seetanujuanaa Pueyaso sequenu panishano caminiujiunia, nooj, tarijia sequesaaquiaari pocua niriqianotej!

<sup>41</sup> Tamasacaari saniniuujia naa sequeriquiaacujua:

—¿Nojuacuajaari Cristo, Pueyaso Jiyarosano pocua!

Tamasacaari saaja nojori riucuaaree:

—¿Cristoteeri Galilea jiyajiniji supenutaniya? ¡Maja! <sup>42</sup> Tariucuacaanu Pueyaso Rupaajinia naajiotasanojiniji, paari niishiyani, Cristoori pa supuetanaa jiyaniijia David niqiuohuajiniji supenutaniya. Belén tiacajinia rasaanutaniyari, supuetana David tiacajinia.

<sup>43</sup> Naacuajitij, puetunu pueyajanaari Jesuucua juayonuutaquiaari. <sup>44</sup> Tamasacaari saniniuujia Jesu quianu paniriquiaa juucua. Naajaa, majaari na quiatunu quirii.

*Judiocuaca camarucua tiuyaquishacari Jesuucua*

<sup>45</sup> Pueyaso Secojoua tia cojuanaa pueyari Jesu tojitiariquiaa juhuajaniya. Na nuhuaji, socua quiojiyarohuari na jiyaramiquiniaa pueyacu. Nojori jiyaramiquiniaa pueyari

quiquiaari Fariseocuaca, pueyacuara secojonaa camarucuanio. Nojori jiyaramiquiniaari nojori sequeree:

—¿Casaara Jesu nia jaatucuyaquimiohuani?

<sup>46</sup> Nojori jiyaramiquishano pueyari saaja nojori riucuaaree:

—¡Majaari quenaaja tamonu pueyano pocuanu juhua cuno pueyanojua, seetanu rupaajanaa pohuataja cutara!

<sup>47</sup> Fariseocuacaari cunora nojori juaarii:

—¿Niaateeri niaacua na shanacuree na sapojonura niajanijajuhuj? <sup>48</sup> ¿Tamonu pa camarucujinijiniote nocua tiuurii, canaa Fariseocuacajinijiniójuhuj? ¡Maja! <sup>49</sup> ¿Cuno pojori Jesuucua tiuujacani, nojoriiri Moisés Rootasano niishiyashijia! ¡Nojoriiri sesoriquia seque!

<sup>50</sup> Nicodemoori narta Fariseocuacata tii quiriquiaa. Nojuajaari noo Nicodemo quiriquiaa Jesuucua niqiaari niucuatej. Nojuajaari narta Fariseocuaca sequeree:

<sup>51</sup> —Pueyanaa, supuetana Moisés cuajaari pa rootaquiaari maja najuhua pa sesacatura pueyano, paa jaara coteenu na nequesoreyaquirini casaa na miiriini.

<sup>52</sup> Narta Fariseocuacaari Nicodemo juaarii saaja:

—¿Quiaateeri narta Galilea jiyajinijinio pueyanójuhuj? ¡Jacaria quia pajere tariucuaanu Pueyaso Rupaajinia! ¡Quiocua jiyacari niishiri majaari quenaaja niquiriyatu Pueyaso sequesano caminiujunua pueyano supueni quiniutianiya Galilea jiyajinia!

<sup>53</sup> Na nuhuaji, puetunu cuno pojorijianaari na tiajinia quiojyarahua.

## 8

### *Jesu jiyanooshacari maaji*

<sup>1</sup> Jesuuri saniniujia Olivo cuhuariquajinia quiaaree. <sup>2</sup> Jesuuri tariquicuaji tiuquiriohua Pueyaso Secojoua tiajinia. Canaari nata quiriquiaajuhuj. Pueyari nocua rerejioquiaari. Nojuajaari cajirii pueya na niishitiojonura juucua.

<sup>3</sup> Moisés Rootasanojiniji niishitiojonaa, mariyata Fariseocuacanio, cuno pojoriiri jiyacari maaji jaatucumaa Jesuucua. Cuno maajiiri riuratasaaquiaari numuetucushiyano. Nojoriiri cuno maaji nujuateree pueya tajoji. <sup>4</sup> Jiyacari Jesu sequetureeri:

—Niishitiojonanaa, nio maajiiri quiasaaree numuetucushiyano. <sup>5</sup> Moisés Rootasanojiniji paari niishiyani, jiyano maaji cuara mosaaria saitia jacusano. ¿Quiajanijarijataj, taa quia sequeyanijia?

<sup>6</sup> Judiocuaca camarucuaari naa Jesu nequesotaree najuhuanaj, nojori tojiniuria casaa na sequenutaniyani. Jesu jaara nojori sequere maja nojori miiniuria Moisés Rootasano, nojori maara nocuara saquiriojotare nojori jiyaniijianucua. Jesu cutaraari maja quenaaja nojori na riucuanu quirii. Nojuajaari saaja jojoree, jiyajinia na naajionura na juaashiquiata. <sup>7</sup> Pueyaracaanu nojori nequesoreesacari nojuaja, Jesuuri socua sanerohua. Nojori sequereeri:

—Teyano niajanijinijiniote sesa miyashijiani, nojuaja cuara na coteetaara janu.

<sup>8</sup> Jesuuri jojorohuacuhua socua na naajionura jiyacua. <sup>9</sup> Cuno pojori tojishacari naa Jesu sequesantej, puetunujuanaari sanaa quiojorohua. Juhucatecara quiojonu coteequaariiri socua saaquiapue, na nuhuaji, socua naatujoori nojorijiniji. Nojoriiri naa quiojoquiaariuhua puetunujuanaa. Saaja Jesuuri jateequuee cuno maajitia. <sup>10</sup> Jiyacaritij, Jesuuri sanerohua. Maaji sequereeri:

—¿Teete quiocuara saquiriojotanaani? ¿Majate quenaaja tamonu cureenu quirii na jacunura quiajanijia saitia?

<sup>11</sup> Maajiiri Jesu riucuaaree:

—Shaaqui puetunujuanaa, Jiyaniijianaa.

Jesuuri maaji sequeree:

—Janijari quia jiyanoja cutarani. Juhujaniya quia quiaarohua. Majaari sesa quia miiniu socua.

### *Jesuuri pueya jiuujia cuhuatana*

<sup>12</sup> Nojori nuhuaji, Jesuuri pueya niishitiojonu coteerohua. Nojori sequereeri:



—Janiyari pueya jiuujia cuhuatanani. Cante cucua tiuuriini, majaari tari ninishiqui quijia na quiniu quiniutianiya. Pueyaracaanu cuhuashiqui quijia quiniutianiya cutaraari.

<sup>13</sup> Tii quiniaa Fariseocuacaari naa Jesu juaarii:

—¡Quiaacuajaari tama quia cuaqueyajiniji pihuataa! ¡Puetunu quia pahuatasanojuanaari maja tojishano!

<sup>14</sup> Jesuuri nojori riucuaaree:

—Tama cua cuaqueyajinijiaaja cua pahuatasacari, cunoori maja najuhuaana pahuatasano. Cua pahuatasanoori seetanujuanaa cutara. Janiyacuajaari niishiyani teje cua niquiaarini, tee cua quianutaniuhuani. Niaari saniniuujia niishiyaquiyacujua teje cua niquiaarini, tee cua quianutaniuhuani. <sup>15</sup> Niaari pueyacuara saquiriojotaquiaa saaja nia niquishanojiniji, nia tojishanojinijiuhuaj. Janiya cutaraari maja cua saquiriojotanu pueyacuara. <sup>16</sup> Janiya jaara juaari sesa miijia cutarani, cua sequesano cutaraari seetanujuanaa, niquiryatujua cua quiyaquishacari. Cua Jiyarona cua Quecuajaari cua cojiquiaa cuata na juaniuria sesa miijia. <sup>17</sup> Niaacuajaari Moisés Rootasanojiniji niishitiojoquiaa: “Caapiqui pueyano pahuatasano jaara juhua tarajanu pahuatasano quirijiuhuaj, cunoo cutaraari seetanujuanaa”. <sup>18</sup> Naajuhuj, canaari caapiquini. Tama cua cuaqueyajaaja cua pahuatasacari, cunoori seetanujuanaa, cua Jiyarona cojishacari janiya. Nojuajaari cua Que.

<sup>19</sup> Fariseocuacaari na nequesotaree:

—¿Teeteeri quia queni?

Jesuuri nojori riucuaaree:

—Majaari nia niishiniu janiya, cua Quejuhuaj. Niaa jaara cua niishiriquia, niaa maara cua Que niishirijiuhuaj.

<sup>20</sup> Jesuuri puetunu nio pahuatariquiaajanaa Pueyasora niquitiojosano cumaneeca racataja shuriucuaji, Pueyaso Secojojuaja tiajinia. Naajaa, majaari pueya quianu quiri-quinioj, juhuanujuaja na monu juuca quiyaquishacarijia.

### *Jesuucua tiuyashijiaaari jiyanoaquishaanutaniya*

<sup>21</sup> Jesuuri cunoo Fariseocuaa sequerohuacuahuaj:

—Janiyari quianutaniyani. Niaari cua pajenuunutaniya juucua. Niaari cusonuunutaniya sesa miijiaaja, jiyanooshoo nia quishacarijia, cucua nia tiuyaquiniucua. Naaratej, majaari nia naata quianu quiniutianiya tee cua quianutaniyacuaani.

<sup>22</sup> Naa Jesu sequesacarij, cunoo narta Judiocuacaari tama sequetooreejaaja:

—¿Casaara na sequereecuaarini: “Maja nia naata quianu quiniutianiya tee cua quianutaniyacuaani”? Tama na cuaqueyajaaja miaquenutaniya jiyoteeri.

<sup>23</sup> Jesuuri nojori sequeree:

—Niaari ninishiqui quiquiojinijinio. Janiya cutaraari jiyocuacaanujinijionio. Niaari saaja mijiria quijiaa. Janiya cutaraari maja niiquijiniono. <sup>24</sup> Janiyacuajaari cunora nia sequereeni, niaari jiyanooshoojua cusonuunutaniya nia cuaracashitiniucua janiyari maja Pueyaso Niyanuni, taa cua sequequiaa niajanuyacuajani. Cunora niaari jiyanooshoo quiniutianiya, pueyaracaanu saniitiosano nia quiniuria.

<sup>25</sup> Nojoriiri Jesu nequesotaree:

—¿Canteeri quiajaniani?

Jesuuri nojori riucuaaree:

—Janiyari najuhuaana niaata pocoojiyani. Majaari nia tojiniu janiya. Janiyacuajaari tari nia sequereeni cante janiyani. <sup>26</sup> Janiyari queraatia jiitiaajaa cua sequesocoriquiano niajaniani. Niaa jaara nocua tiuyaquiri, niaari pueyaracaanu saniitiosaanutaniya. Puetunu cua sequesanojuanaa niajaniani, cunoori seetanujuanaa. Cua pahuatasano mijiria, cunoori cua Jiyarona sequesano janiya. Na sequesanoori seetanujuanaa cutara.

<sup>27</sup> Majaari nojori niishiniu quiriquiaa Jesuuri na Que Pueyasojiniji pahuatariquiaa na sequesacari “cua Jiyarona”. <sup>28</sup> Jesuuri cunora nojori sequeree:

—Niaa jaara cua teetere, niaari shusha jiyacari niishiniutianiya, janiyari Pueyaso Niyanuni. Niaari niishiniutianiyajuhuj, majaari tama cua niishiriojosanojuaja cua miiniu

quijia. Janiyari saaja cua Que niishitiojosano pohuatajani. <sup>29</sup> Cua Jiyaronacuajaari cuata quiya. Majaari cua Que cartenu janiya, pueyaracaanu cua miiniuucua na panishano.

<sup>30</sup> Naa Jesu pohuatasacari pueya niquiaratej, queraatia pueyari jiyacari nocua tiuuri.

*Pueyaso pueyajiniji pohuatasano, Sesaaca pueyajinijinio*

<sup>31</sup> Jesuuri shusha nocua tiuuniaa narta Judiocuaca sequeree:

—Niaa jaara seetanujuanaa cua pohuatasano tojjijaca quiri pueyaracaanu, niaari cua pueya quiniutianiya. <sup>32</sup> Niaa jaara naa miiritij, niaari seetanu rupaajanaa niishijaca quiniutianiya. Naacuajitij, niaari seetanujuanaa juhua cartesano pueya quiniutianiya, juhuajaniya quijijaca nia quiniuria.

<sup>33</sup> Narta Judiocuacaari Jesu riucuaaree:

—Canaacuajaruhua supuetana Abraham jiuhuacuajinio supueno pueyani. Majaari quenaaja canaa quiniu quijia tamasa poonijioteseano pueya. ¿Casaara naa quia sequeya canaarini, canaa quiniuria cartesano pueyani?

<sup>34</sup> Jesuuri nojori sequeree:

—Seetanujuanaa nia sequeyanijia, cante sesa miijiacani, nojoriiri juhua poonijioteseano pueya quiya. Majaari na naata maninia miijia na quiniu. <sup>35</sup> Poonijioteseano pueyanoori maja seetanujuanaa na quiniu juhua na camarnu niyanu. Maja na naata sequenu: “Janiya pueyaracaanu quiniutianiya cua camarnutani”. Na camarnu jaara na paniyaquiri, na naata na jatanu na panishacari. Camarnu niyanu cutara, na queeri maja na jatanu quijia, neyanu na quiniuucua. <sup>36</sup> Naajuhua, janiya jaara nia jaariuutiare nia poonijiotenajinijini, niaari seetanujuanaa cartesano pueya quiniutianiya, Pueyaso muerasura nia quiniuria cutara. <sup>37</sup> Janiyacuajaari niishiyani, niaari seetanujuanaa pa supuetana Abraham jiuhuacuajinio supueno pueya. Naajaa, niaari cua tojiniiu paniyaquiya. Niaari cunora cua monu paniya. <sup>38</sup> Janiyari nia pohuatariquiaa cua Quejiniji cua niquishanoni. Niaari saniniuujia nia que sequesano miiquiaacujua.

<sup>39</sup> Nojoriiri Jesu sequeree:

—¡Abrahamcuajaari canaa shipininio!

Jesuuri nojori riucuaaree saaja:

—Abraham jaara seetanujuanaa nia shipininio quiri, niaa mariqui maninia miijijaca quiricuara, taa Abraham quiquiaaricuaani. <sup>40</sup> Saniniuujia, niaari cua monu paniya saaja cua pohuatanuucua seetanu rupaajanaa, cua tojishano Pueyasojiniji. Abrahamri maja naa na miiniu quijia cutara. <sup>41</sup> Niaari saaja sesa miijijaca taa nia que miiquiaacuaani.

Nojoriiri Jesu juaarii:

—¿Casa quia sequeyani? ¡Canaari maja saa maaji rasanajuani! ¡Pueyasocuajaari canaa Que, maja tamonu!

<sup>42</sup> Jesuuri nojori sequeree:

—Pueyaso jaara nia Que quiri seetanujuanaa, niaa mariqui cua paniricuara, Pueyasojiniji ninio cua quishacari. Majaari tamajaaja cua ninu quiquiaari. Cua Que Pueyasocuajaari cua jiyaroquiaari. <sup>43</sup> Cua rupaa nia tojiniiu paniyaquishacari, niaari cunora cua pohuatasano niishiyaquiya. <sup>44</sup> Seetanujuanaa, nia quecuajaari Sesaaca, samaruhua jiyaniijia. Niaari cunora miiniu paniquiaa na panishano. Nojuaja jaara shushajanaa cotequiaari sesa miiniuria, nojuajaari naajuhuanajaj, mona. Nojuajaari maja na niishiniu sequenu seetanujuanaa. Pueyaracaanu sapojoujaari. Na sapojosacari, na miyari sapojouja na quiniuucua. Sapojonu niishiniuni, cunoori nojuajiniji supuequiaari. Niaari cuno nia que tojjijaca. Nocuai niaari naa sapojonuujacuajuhua. <sup>45</sup> Saniniuujia, cua pohuatasacari seetanu rupaajanaa nijaniya, majaari cucua nia tiuuniu quiquiaa. <sup>46</sup> ¿Casa cua miiquianu sesani? Cante na niishiyani cuara sequeera. Saniniuujia, janiya jaara sesa miyashijia quirini, ¿casaara cucua nia tiuyaquiyacuaraarini, seetanu rupaajanaa cua pohuatasacari nijaniyani? <sup>47</sup> Cante Pueyaso pueyani, nojoriiri Pueyaso rupaa tojiquiaa cutara. Nijaniya saniniuujia, niaari na rupaa tojijiaquiya, na muerasura nia quiaquishacari.

*Jesucristoori tariucuacaanu quijiajuhanaja Abrahamjiniji*

<sup>48</sup> Narta Judiocuacaari naa Jesu juaarii:

—¡Canaacuajaquiiri maninia sequeriquiaa quiajaniyajiniini, quiaari Samaria jiyajini-jinio tahue, samaruraca pueyanotuhuj!

<sup>49</sup> Jesuuri nojori riucuaaree:

—Majaari janiya samaruracani. Janiya cutaraari saaja cua Que tojiquiaani. Ni-aari saniniuujia cua rerequetequiaacujua. <sup>50</sup> Naajaa, majaari cua tacaani naa nia sesacasacari janiya. Tamoñu cutaraari quiya, nojuajaari paniya pueya tojiniuria janiya. Nojuajaari cua rerequetejaca saniitioriquiano. <sup>51</sup> Seetanujuanaa nia sequeyanijia, cante cua rupaa tojijiani, nojoriiri maja na shaajenu quiniutianiya.

<sup>52</sup> Narta Judiocuacaari na sequeree:

—¡Quiarijia cutara canaari niishiyani quiaari seetanujuanaa samaruraca! Canaa supuetana Abrahamri cusoquiaari, mariyata puetunu Pueyaso sequenu panishano caminiujiuniaajanaano. Quiaari saniniuujia quiarijia sequeyacuaja: “Cante cua rupaa tojijiani, majaari na shaajenu quiniutianiya”. <sup>53</sup> ¿Quiaateeri jiyaniya quiaa socua cutara pueyano canaa supuetana Abrahamjini? ¡Maja! Nojuajaari shaajequiaari. Mariyata puetunu Pueyaso sequesano caminiujiuniaa pueyajanaari shaajequiaarijuhuaj. ¿Can-teeri quiajaniyani naa quia sequenuratej?

<sup>54</sup> Jesuuri nojori riucuaaree:

—Janiya jaara tama cua cuaqueyajaaja jiyatenu paniri juhua jiyaniijiarani, cunoori najuhanaj. Seetanujuanaa, cua Quecuajaari cua jiyatequiaari Jiyaniijiarajanaa. Nojuajaari nia sequesano nia Pueyasota. <sup>55</sup> Niaari seetanujuanaa na niishiyashijia. Janiya cutaraari cua Que Pueyaso niishiyani. Janiya jaara nia sequereni, maja cua niishiniu nojuaja, janiya maara sapojoua quirini taa nia quiyacuaani. Janiya cutaraari na niishiyani. Janiyari cunora na rupaa tojijiani. <sup>56</sup> Nia supuetana Abrahamri timiquiaari na niishishacari janiya mijiria supenutaniyani. Nojuaja jaara cua niquiquiaari mijiria quiyano tari, jyanohua timiquiaariiri.

<sup>57</sup> Narta Judiocuacaari Jesu juaarii. Naa na sequetureeri:

—¡Jaj! Majaruhua juhuanajuaja cincuenta marijia shocjonu quiajaniya. ¿Taa quia sequeyarini quiaa canaa supuetana Abraham niquiquiaari?

<sup>58</sup> Jesuuri nojori riucuaaree:

—Janiya nia sequeya seetanujuanaani, Abraham raaquishacarijia, janiyari tari quijiani.

<sup>59</sup> Naa nojori tojishacari Jesu sequesantej, narta Judiocuacaari sai pajenuuree Jesu na jacutajara juucua. Jesuuri nojoriicuaaji jamaarii saaja. Pueyaso Secojoua tiajiniji tohuatamaari.

## 9

### *Jesu jeeacasacari cariojuaru namijia, naa rasanjuhuanajaj*

<sup>1</sup> Tamacari Jesu rucuanijosacari canaata, canaari cariojuaru pueyano niquiriini, naa rasanjuhuanajaj. <sup>2</sup> Canaari cunora Jesu nequesotareeni:

—Niishitiojonanaa, ¿casaara naa cuno pueyano rasaaquiaari cariojuaruni, na queya miiniuucua sesatee, tama sesa na miiniuucuaajaaja soj?

<sup>3</sup> Jesuuri canaa riucuaaree:

—Maja. Maja cunora naa na rasaanu quiquiaari. Naa rasaaquiaariiri Pueyaso cumaaca niishishaanura, na namijia jaara jeecasaare niquijiaara na quiniuria. <sup>4</sup> Juuca quishacarijia, pa tucuatate miiniu cua Jiyarona sequesano cua miiniuria. Paa quera niniyani. Jaara niquiii, majaari pa naata poonijionu quiniutianiya tari. <sup>5</sup> Mijiria cua quishacarijia, janiyari pueya jiuujia cuhuatanani.

Jesu sequesacari: “Paa quera niniyani”, nojuajaari pa shaajenujiniji sequeriquiaa miriqui.

<sup>6</sup> Naa Jesu sequenu nuhuajitij, nojuajaari jiyocua riocoree. Na riacauta coniquioreeri. Coriyacau mara ruporohua cariojuaru namijiaacuaari. <sup>7</sup> Cariojuaru sequerohuari:

—Siloé cuarimia quia jeequese quia namijia.

Hebreo rupaajinia, Siloé cuariiri sequeya “Pueyaso Jiyarosano cuari”. Cariojuaru-ur cuarimia quiaaree. Tii na namijia jeequeseeri. Tariucua niquijiaari na tiajinia

tiuquiriohua. <sup>8</sup> Cariyojuaru na quishacarijia, nojuajaari na miajajau na masetajara cumaneeca mashiniquijiojua quiquiaari. Puetunu pueyajanaari na niquitiujia naa na mashiniquijosacari. Naacuajitij, nojuaja jaara niquijiara quiquiaari, tarijia na niquiniaa pueyari, mariyata na shuriucua quiniaa pueyano, nojoriiri tama sequetooquiaarijiaaja:

—¿Cante cuno pueyanojaarani? ¿Majate noocuaja tarijia cumaneeca mashiniquijiojuatej?

<sup>9</sup> Noojiaqueya pueyari sequeree:

—¡Taaquiririnij, nojuajacuj!

Tamasacaari saniniuujia sequereecujua:

—Nojuajaquinio naasucua. Juhua nojuaja niquishiyacuj, majaari seetanujuanaa nojuaja.

Tarijia quijia cariyojuaruuri saa sequereejaa:

—Taaquiririnij, janiyacuaaquiniatejaj.

<sup>10</sup> Naaratej, pueyari na nequesotaree:

—¡Quiaacuaja cariyojuaru quijiaruhua! ¿Taa niquijiara quia quiriohuarini?

<sup>11</sup> Nojuajaari pueya riucuree:

—Cuno, Jesu jiyaniushano pueyanoni, nojuajaari mara coniquioree cucuara. Cua namijiaacua na ruporohuari. Na nuhuaji, cua jiyaroreeri Siloé cuarimia cua jeequenura cua namijia. Janiyari quiaareeni. Cua namijia cua jeequesacari, jjaniyari niquijiara quiquiini!

<sup>12</sup> Pueyari na nequesotaree:

—¿Teeteeri quia namijia jeecana pueyanoni?

Nojori riucureeri:

—Johuj. Maja cua niishiniu.

*Fariseocuaca nequesoreesacari na namijia jeecasano pueyano*

<sup>13</sup> Pueyari Fariseocuacaacua jiyataaree Jesu jeecasano cariyojuaru pueyano. <sup>14</sup> Jesu jaara mara coniquioquiaari na jeecanura cuno pueyano namijia, cuno juucaari Judiocuaca samaatenu juuca quiquiaari. <sup>15</sup> Nocuaji Fariseocuacaari tarijia cariyojuaru quijia nequesotaree taa niquijiara na quiriini. Nojuajaari nojori riucuree:

—Jesu cua namijiaacua rupojorucuaa marani. Na nuhuaji, janiyari cua namijia jeequeseeni. Naacuajitij, janiyari quiarijia niquijia quiyani.

<sup>16</sup> Noojiaqueya cuno Fariseocuacajininijioori saa sequereejaa:

—Cuno pueyano, nio pueyano namijia jeecarucuaani, nojuaja maja Pueyaso Jiyarosano. ¡Nojuajaari Moisés Rootasano tojiyashijia, naa na miiniuucua samaatenu juuca!

Tamasacaari saniniuujia sequeriquiaacujua:

—Jaara sesa miiijia quiri, ¿maatucua casaara poonijiore Pueyaso cumaacatacuaraarini?

Naa nojori juayonuutauucuatej, nojoriiri juhua raquitiiri. <sup>17</sup> Nocuaji tarijia quijia cariyojuaru nequesotaturuhuarihuaj:

—Niquijia quia quishacari quiarijia, ¿taa quia sequeya Jesuni? ¿Maninia miiijiatee?

Nojuajaari saaja Fariseocuaca riucuree:

—Janiyara, nojuajaari Pueyaso sequesano caminiujiunia.

<sup>18</sup> Tii quiniaa Judiocuacaari na cuaracashitirii saaja. Nojoriiri jiyaniquiaari maja naasucua seetanujuanaa cariyojuaru cuno pueyano quiniu quijia. Nocuaji nojoriiri na queya sequeturee nojoriicua na niniuria. <sup>19</sup> Nojori tiuquishacari, cuno Judiocuacaari nojori nequesotaree:

—Canaa nia sequere, ¿nio pueyanote seetanujuanaa nia niyanu, nia sequesano cariyojuaru rasanohuanani? ¿Taa quiarijia niquijiara na quiriohuarini?

<sup>20</sup> Na queyari cuno pojori riucuree:

—Taaquiririnij, nojuacuaaquiniateja canaa niyanujuaj. Naa cariyojuaru rasaaquiaariiri. <sup>21</sup> Majaari canaa niishiniu cutara taa na quiriohua niquijiarani. Majaari canaa niishinijuhuj, cante na namijia jeecarucuaani. Nojuaja nia nequesotare, tari cumantumacacuaja. Nojuajanaa cuara nia pohuataara cutara.

<sup>22</sup> Na queyari naa riucuaquiaari narta Judiocuaca camarucuatej, na pueretusacari nojori. Judiocuaca camarucuaari tari sequetuquiaari: “Cante Jesu sequeyani nojuaja seetanujuanaa Pueyaso Jiyarosano, naa sequejaca pueya cuaara tenujusaaria maja Pueyaso secojojua tiajinia na tiuquiniuria socua”. <sup>23</sup> Naaratej, na queyari naa narta Judiocuaca riucuaquiaari: “Nojuaja nia nequesotare, cumantumacacujaja”.

<sup>24</sup> Cunora cuno Judiocuacaari socua piiriohua na namijia jeecasano pueyano. Nojori-icua na nishacari, na sequetureeri:

—¡Paacujajaari Pueyaso niqiara niya quiyani! Naaratej, ¡seetanujuanaa canaa quia pohuatare cuno pueyanojiniji! ¡Canaa cutaraari niishiyani cuno pueyanoori sesa miijia!

<sup>25</sup> Na namijia jeecasano pueyanoori nojori riucuaaree:

—Naajaa, jaara sesa miijia quiri, jaara maninia miijia quirijihujaj, maja cua niishiniu cuno. Janiya cutaraari niishiyani, ¡janiyari tarjia niqiyashijia quiquiaarini! ¡Janiyari saniniuujia quiarjia niqijia quiya cutarani!

<sup>26</sup> Nojoriiri na nequesotarohuacuhujaj:

—¿Taa na miirucuaa quiajanijajaarani, niqijia quia quiniuriani?

<sup>27</sup> Narta Judiocuaca camarucua sequeree saajaari:

—Janiyacuaja tari nia pohuatareeni. Majaari nia tojiniu paniniu janiya. ¿Casaara nia paniya socua cua pacutenura sequenu niajanijani? ¿Niaate na pueyara quiniu paniya soj?

<sup>28</sup> Naa na sequesacari nojoritij, cuno Judiocuaca camarucuaari na sesacaturee. Naa na sequetureeri:

—¡Quiaari cuno pueyano tojjiaacuaja! ¡Canaa cutaraari supuetana Moisés Rootasano tojitiajacani! <sup>29</sup> ¡Canaa cutaraari niishiyani Pueyasojuanaari Moisés cua muetaquiaari na rootanura nojuaja! ¡Saniniuujia cuno pueyanoorijiataj, majaari quenaaja pa niishiniu teje na supuequiaarini!

<sup>30</sup> Na namijia jeecasano pueyanoori nojori riucuaaree:

—¡Niaaquiiri mosanucua seetanujuanaa! ¿Majateeri nia niishiniu teje na supuequiaarini? ¡Nojuajaari cua namijia jeecarucuaa! <sup>31</sup> ¡Paacujajaari niishiyani Pueyaso maja na tojiniu quijia sesa miijica secojosano! ¡Saaja na timitiajaca secojosano tojia cutaraari, cante na panishano miiquiaacuajani! <sup>32</sup> ¡Majaari quenaaja pa tojiniu quijia tamonu pueyanojiniji, cante cariyujuaru namijia jeecajani, naa cariyujuaru rasanohuanaj! <sup>33</sup> Cuno pueyano jaara Pueyaso Jiyarosano quiaquiri, ¿taa cua namijia na jeecarucuaacuaraarini?

<sup>34</sup> Cuno pojoriiri na juaaniutia na sequeturee:

—¡Quiaari sesa miijia rasaaquiaari! ¿Quiaateeri jiyanojuua canaa niishitiojonu paniyaruhua?

Naaratej, narta Judiocuaca camarucuaari na tenujuturee maja socua na tiuquiniuria Pueyaso secojojua tiajinia. Naacuajitij, cuno pueyanoori juhua taanuusano pueyano quiquiaari narta Pueyaso timitiajaca pueyajiniji.

### *Jesu tojitiaashijia pueya juhua cariyujuaru*

<sup>35</sup> Jesuuri niishiquiaari cuno pueyanoori tenujusaarucuaa. Jaara na riuriataquiaari, Jesuuri na sequeree:

—¿Quiaate Pueyaso Niyanuucua tiuujia?

<sup>36</sup> Jesu sequereeri:

—Jiyaniijianaa, cua sequere canteeri nojuajani, nojuaja cua niishiniuria nocua cua tiuuniuria.

<sup>37</sup> Jesuuri na sequeree:

—Quiaacuaja na niqiyaruhua. Nojuajaari cunocujaja, quiata pocoojiyani.

<sup>38</sup> Jiyacaritij, pueyanoori Jesu cariquimiaji mojuquetaree. Na sequereeri:

—¡Quiocua tiyanijia, cua Jiyaniijianaa!

<sup>39</sup> Na nuhuaji, Jesuuri cuniqui quiniaa pueya niqiara sequeree:

—Janiyari mijiria niqiaarini juhua cua raquiriojotanura mijiria quiniaa. Naacuajitij, cante niishiyani nojuaja juhua cariyujuaru quiya, nojuajaari juhua namijiaraca

quiniutianiya cucua na tiuushacari. Saniniuujia, cante jiyaniyani nojuaja niqijia cutara, nojuajaari juhua cariyojuarura tari jiyatesaaree, cucua na tiuyaquiniuucua.

<sup>40</sup> Tii quiniaa Fariseocuaca jaara tojiqiaari naa Jesu sequesantej, nojoriiri Jesu sequere:

—Naa quia sequesacaritij, ¿quiaateeri sequeya canaari cariyojuarurijihuaj?

<sup>41</sup> Jesuuri nojori riucaaree:

—Niaa jaara tama nia cuaqueyajaaja jiyatere juhua cariyojuarura cucua nia tiuuniuria, Pueyaso maara nia jiyanoori. Quiarijiani, tama nia sequenucuajaaja, “Canaa niqijia cutarani”, niaari jiyanooshoojua nioojia nia tacatoyaquiniuucua.

## 10

### *Jesu pohuatasano miriqui borrego cojuanajiniji*

<sup>1</sup> Jesuuri socua pohuatarohua pueya niqiara. Naa sequereeri:

—Seetanujuanaa nia sequeyanijia, cante borrego mataca tohuateyaco tiuquiyaquijiani, nojuaja jaara tamocoji tiuquimia, cunoori nohuasejojua. <sup>2</sup> Saniniuujia, cante tohuateyaco tiuquijia cutarani, cunoori borregohua camarujuanaa cutara. <sup>3</sup> Tohuateya cojuanaari tiotiu riataquiaa nocuaji. Borregohua camaruuri puetunu na seya sesacajanaa jiyaniqijia. Na borregohuari na rupaa niishijia. Na camaruuri naa na tohuatanijiojua puetunujuanaa na matacainiji. <sup>4</sup> Puetunu na borregohuajanaa jaara tohuareetama, na camaruuri na puetaja. Na seyari na nuhuaji sacujaja, na camaru rupaa nojori niishishacari. <sup>5</sup> Saniniuujia, borregohuari maja na nuhuajini quijia na niishiyaquishoo pueyano. Saaja nocuaji cocuatejaari na niishishacari cunoori maja na camaru rupaa.

<sup>6</sup> Jesuuri naa pohuataquiaari miriqui nojori niqiara. Nojoriiri saaja niishiyaquiquiaari casaa na niishitiojonu paniriquiaa nojorini.

### *Jesucristo, maninia pa cojuana*

<sup>7</sup> Nocuaji Jesuuri naa nojori sequerohua maatia:

—Seetanujuanaa nia sequeyanijia, janiyari juhua tohuateyani, cua borregohua tiuquitianura cua Que Pueyasocua. <sup>8</sup> Cante cua niyacarijia nijioquiaari coteenuni, nojoriiri sesa miijiaa quiquiaari, nohuasenujuaca. Cua borregohuari namitia nojori numueejushiquiaari. <sup>9</sup> Janiyari juhua tohuateyani. Cante janiyajiniji tiuquiya cua Queecuani, nojuajaari Pueyaso pueyanora jiyatesaanutaniya cutara. Cuno pueyanoori maninia cojuasano juhua borrego. Janiyari na tiuquininiutianiya, tii na quiniuria maninia cojuasano. Janiyari juuca na tohuatenutaniya, jiyasocua cua miaquetenura carijiniacuma.

<sup>10</sup> Nohuasejojuaari saaja tiuquijia borregohuacua na nohuasenuja, na puecoonurajuhuj. Naa na shaajaaja puetunujuanaari. Janiyari saniniuujia niqiariini cua borregohua cua jiyatenura pueyaracaanu quijiacara, seetanujuanaa jiyanoohua shuquiriaatia quijiaa nojori quiniuria. <sup>11</sup> Janiyari maninia cojuanani, maja tamonu. Pueyano jaara maninia na seya cojuana maniniu quiri, tama na cuaqueyajaaja panitiaja na seyacuari. <sup>12</sup> Saniniuujia, borregohua camarujuanaa jaara tamonu cojuateya na seya, cuno pueyano jaara niquiri sare nocua canujiano, nojuajaari na puerenuta neteja. Borregohua tiujiaqueeri. Naa miijiaari cuno borregohua quiyaquiniuucua na seyajanaa. Naacuajitij, sareeri borregohua soojua. Naa na cocuatajaari. <sup>13</sup> Cuno borregohua cojuanaari naa neteja sareecuaji na tacayaquishacari seetanujuanaa cuno borregohuacua. Nojuajaari saaja paniya na poonijosano sami na niqitiosaanura.

<sup>14</sup> Janiya cutaraari maninia cojuaja borregohuani, na camarujuanaa cua quishacari. Janiyari puetunu cua seyajanaa niishijiani. <sup>15</sup> Nojoriiri cua niishiyajuhuj, taa cua Que niishiya janiyacuaani, mariyata taa cua niishiya cua Quejaniuhuj. Janiyari tama cua cuaqueyajaaja panitiaja cua borregohuacuarani. <sup>16</sup> Janiyari socua borregohua jiitiaani. Nojoriiri maja nio cua borregohua maanujinijinio. Janiyari nojori rijionutaniya niyarajuhuj. Nojoriiri cua tojitiariquiano. Naacuajitij, puetunu cua borregohuajanaari jatiqui quiriqiano, niquiriyatu cojuanaracajuhuj.

<sup>17</sup> 'Cua Queeri cua paniya naa cua panitiasacari tama cua cuaqueyajaaja cuno borregohuacuara. Janiyari tama cua panishacarijiaaja mosaanutaniyani, na nuhuaji cua samiitianuhuara, pueyaracaanu quijia cua quiniuhuara. <sup>18</sup> Majaari quenaaja tamonu naata monu janiya cua paniyaquishacari. Janiyari cua panishacari cusonutaniya cua borregohuacuarani. Janiyari cumaacaracani nojoriicuara cua cusonura. Janiyari cumaacaracajuhuj cua samiitianuhuara. Cua Quecuajaari naa cua miiniuria cua jiyaroquiaari mijiria.

<sup>19</sup> Narta Judiocuaca jaara tojiquiaari naa Jesu sequesantej, nojoriiri socua tama juayonuutaquiaarijiaaja Jesuucua. <sup>20</sup> Queraatia pueyari jiyacari sequeree:

—¡Cuno pueyanoori samaruraca! ¡Maja na tojiniu, pueyanaa! ¡Najuhuaana pocuaano!

<sup>21</sup> Tamasacaari saniniuujia sequeriquiaacujua:

—¿Samaruraca pueyanoteeri maninia casaa pohuatajajaara juhua nio pueyanojua? ¡Maja! ¿Pueyanoteeri na naata samaru cumaacata jeecanu cariyojuaru namijiajaara? ¡Maja na naata!

*Judiocuaca camarucua niqiniu paniyaquishacari Jesu*

<sup>22</sup> Tamacari, Jerusalén tiacajiniaari queranacusaariquiaa. Cunoori quiriquiaa pueya niishiriojonura nojori juhua cuno juucajinia Pueyaso Secojoua tia jiyatequiaariuhua seetanujuanaa juhua Pueyaso quiquiora na quiniuhuara. Jiyacariiri shuniya quiriquiaa. <sup>23</sup> Jesuuri tii quiriquiaajuhuj. Pueyaso Secojoua tiajinia quiriquiaari. Nojuajaari pueya jiyaniquishano tariucuacaanu jiyaniijia Salomón canujuucojojuajinia riujuuni-uquiojoriquiaa. <sup>24</sup> Jiyacaritij, canaa Judiocuaca camarucuaari tii na cosesee. Naa na nequesotatureeri:

—¿Taacari canaa quia sequenutaniya socuaari cante quiajaniyani? ¡Quiaa jaara seetanujuanaa Pueyaso Jiyarosano quiri, quiarijia canaa quia sequere!

<sup>25</sup> Jesuuri nojori riucuaaree:

—Janiyacuaja tari nia sequecanuni. Niaari saaja na cuaracashitiquianu. Niaa cuara niishiiria cante janiyani, nia niquishacari cua miishano cua Que sequesano janiya. <sup>26</sup> Niaari saaja cucua tiuyaquiquiaa cua borregohua maanujinijinio nia quiyaquishacari. <sup>27</sup> Cua borregohuari cua rupaa tojjia cutara. Janiyari nojori niishiyajaaniuhuj. Nojoriiri cunora cua nuhuajiquiaa. <sup>28</sup> Janiyari pueyaracaanu quijara nojori jiyatequiaani. Majaari nojori juurequenu quiniutianiya. Majaari quenaaja tamonu naata jaariuutianu quiniutianiya nojori janiyajiniji. <sup>29</sup> Cua Queeri cua borregohua cua niquitioquiaari. Nojuajaari socua jiyanoohua cumaacaraca tamasa cumaacaraca quijiacajiniji. Naacuajitij, maja quenaaja tamonu naata cua borregohua jaariuutianu cua Quejiniji. <sup>30</sup> Janiya cua Queta, canaari juhua niquiriyatuni.

<sup>31</sup> Jiyacaritij, canaa Judiocuaca camarucuaari sai rijiorohuacuhuj, Jesu na jacutajara juucua. <sup>32</sup> Jesuuri saaja nojori sequeree:

—Janiyari queraatia maninia casaa miiquianu saaja cua Que cumaacata nia niquiarani. ¿Teyanoocua nia jacunu paniya janiyani?

<sup>33</sup> Nojoriiri Jesu riucuaaree:

—Majaari canaa jacunu quiniutianiya quiajaniya maninia quia miiniuucua. ¡Canaari quia jacanutaniyani sacuaraatia quia pocuanuucua Pueyaso niqiara! ¡Quiaari tama quia cuaqueyajaaja jiyateya juhua Pueyasora! ¡Cunoori jiyanoohua sesa! ¡Quiaacuajaari pueyano, juhua canaajuhuj!

<sup>34</sup> Jesuuri nojori sequeree:

—Niaacuajaari tariucuacaanu naajiosano Pueyaso Rupaa jiitiaa. Pueyaso sequesanoori naa naajiotasano quia tii:

“Janiyacuajaari nia sequequiaarini, niaari pueyasohua”.

<sup>35</sup> Paacuajaari niishiyani, Pueyaso Rupaaajinia naajiotasanoori maja na naata cuaracashitishaanu. Pueyasojuanaari pueya jiyaniquiquiaari “pueyasohuata”, noo pojori, teyano nojuaja jiyatequiaari Israel pueya jiitianaaracuajani. <sup>36</sup> Naajuhuj, Pueyasocuaajaari cua saquiriojoquiaari mijiria na jiyarosocoriquiano. Naa Pueyasojuanaa Jiyarosano cua quishacaritij, ¿niaatucua casaara sequereni janiya Pueyaso niqiara pocuaaree

sesani, cua sequesacari janiya Pueyaso Niyanuni? <sup>37</sup> Janiya jaara cua Que panishano miyaquiri na cumaacatani, janiya maara nia juayaquirini cucua nia tiuyaquiniuucua. <sup>38</sup> Niaacuajaari cua Que cumaacata cua miishano niquiquiaa. Niaa jaara cua pohu-atasanooocua tiuuniu paniyaquiri, naajaa, cua Que cumaacata cua miishanoocua nia tiuuri quenaaja. Niaa jaara niishiri puetunu cua miishanojuanaari cua Que Pueyaso cumaacata miishano, niaa maara niishiri Pueyasoori coojia rupueja, janiyari noojia rupueyajaaniuhuj.

<sup>39</sup> Jiyacaritij, nojoriiri socua Jesu quiatunu paniriohuacuhuj. Jesuuri saaja nojori-icuaji mashiQUII.

<sup>40</sup> Jesuuri canaa jiyataarohua Jordán moo taquijiria tee Juan tiuquinijioquiaari tarijia pueyacuajani. Canaari tii quishiini. <sup>41</sup> Queraatia pueyari Jesuucua nijioquiaari tee canaa quiriquiaacuajani. Nojoriiri tama sequequiaarijaaja Jesujiniji:

—Tiuquinijiona Juanri maja quenaaja na miiniu quijia casaa Pueyaso cumaacata. Naajaa, puetunu nio pueyanojiniji na sequesanojuanaaquiiri seetanujuanaa quijia.

<sup>42</sup> Naacuajitij, queraatia pueyari Jesuucua tiuquiaari tii, tee canaa quiriquiaacuajani.

## 11

### *Lázaro shaajenujiniji pohuatasano*

<sup>1</sup> Jiyacaritij, tamonu pueyanoori cusosu matariquiaa. Na sesa quiquiaari Lázaro. Nojuajaari Betania tiacajinijiniojuanaa quiquiaari, Judea jiyajinia. Na rimiatuhua quiquiaari María, Martanio. Nojoriiri cuno Betania tiacajinijinio quiquiaarijuhuaj.

<sup>2</sup> Lázaro rimiatu Maríani, nojuajaari noo maajicuaja Jesu niohuaca sacuanijiaquiaari na muecacatatej, nocua na totanu nuhuaji na shanohua jaanutaja. <sup>3</sup> Lázaro matasacari cusosu, na rimiatuhuari pueyano jiyarotuchiaari Jesu numootenuucua. Naaratej, cuno pueyano tiuquishacari Jesuucua, nojuajaari naa caminiujuquiaari Lázaro rimiatuhua sequesano nojuaja:

—Jiyaniijanaa, quia panishano pueyanona cusosu mataa.

<sup>4</sup> Jesu tojishacari naa cuno pueyano sequesanotej, tii quiniaa pueya sequereeri, canaajuhuj:

—Nojuajaari maja na cusonu quiniutianiya na shaajenura puetunujuanaa. Cuno cusonu na jiiitasanojinijini, pueyari Pueyaso cumaacata miishano niquiniutianiya. Pueyari cunora Pueyaso Niyanu maniniuhuaqueetanutaniya, cua Que Pueyasojuhuj.

<sup>5</sup> Marta, María, Lázaronio, nojoriiri Jesu panishano pueya quijia. <sup>6</sup> Naajaa, Jesu jaara numootesaaquiaari Lázarojiniji, majaari nocua na quianu quiquiaari ritia. Caapiqui juuca camueeree cuniquijiaaraari, tee canaa quiriquiaacuajani. <sup>7</sup> Na nuhuaji, canaa na saquiriojosano pueya sequereeri:

—Judea jiyajinia pa quiaarohuacuara socua.

<sup>8</sup> Canaari Jesu sequereeni:

—Niishitiojonanaa, cuniquijinio Judiocuacacuajaari shusha naataja tii quia jacunu paniquianu. ¿Casaara socua tii quia quianu paniuhuariniuhuj?

<sup>9</sup> Jesuuri canaa riuquaree miriqui:

—Janiyara, juuca juhuanujuaja. Juucaari maninia seetanujuanaa pa rucuanefonura. Paa jaara pananu tiuquiyaquishacarijia rucuanefonura, paari maninia niquiya pocuajini. Majaari pa tiuriini. <sup>10</sup> Paa jaara ninishiqui rucuanefonura saniniunijia, paari tiuriijiani cuhuashiqui na quiyaquishacari.

Jesuuri naa sequeriquiaa miriquitij, nera, maja puereeta na quiniu quiriquiaa Judiocuaca niquiara na rucuanefonura, na mosaanu juuca quiyaquishacarijia. <sup>11</sup> Na nuhuaji, Jesuuri naa canaa sequereeri socua:

—Pa rupuena Lázaroori tari maquequee. Janiyari na niucujanuucua quianutaniyani.

<sup>12</sup> Canaari Jesu sequereeni:

—Jiyaniijanaa, nojuaja jaara maqueya, maniniacuajaqui. Naacuajiti paari niishiyani naatanutaniuhacuajaqui. ¿Paatucua casaara najuhuaa nocua quiaareni?



<sup>13</sup> Naa Jesu pohuatasacari canaa Lázarojinijitij, canaa sequeriquiaa juucuaari Lázaro tari macu quiriquiaa. Canaari saniniuujia jiyaniriquiaani Jesu naasucuaari canaa pohuatariquiaa Lázaro nareja maqueriquiaa. <sup>14</sup> Nocuaji Jesuuri maatia canaa sequeree:

—Lázaro tari cusoyarucuaa. <sup>15</sup> Janiyari timiyani tii cua quiyaquiniuucua Lázaro quishacarijia saminio. Naa quiarijia macu na quishacaritij, niaari socua jiyajeneta casaa cua miishano niquiniutianiya, seetanujuanaa cucua nia tiuuniuria cutara. Quiarijia cutara, nocua pa quiaare.

<sup>16</sup> Jiyacaritij, Tomásri canaa narta saquiriojosano pueya sequeree:

—Pa Jiyaniijata pa quiaarejuhuj, nata pa cojiritiasaanura puecoonu.

Cuno Tomásri pueya sesojosano quiquiaari “Caapueya muetusano”.

### *Jesu, macunucua samiitianijiojua*

<sup>17</sup> Canaa jaara tiuquijioseequiaarini, Jesuuri pohuatasaaquiaari Lázaro tari cuatro juuca shocotejoriquiaa raaco na niasaanujiniji. <sup>18</sup> Betania tiacaari catecaja Jerusalén tiacajiniji. (Nareja media hora paa jaara ritia rucuaneyareni). <sup>19</sup> Naaratej, queraatia narta Judiocuacaari quiojoquiaari Marta, María tiajinia, nojori na cumanijianura na nanu nuhuaji. <sup>20</sup> Marta jaara niishiquiaari Jesu shusha tiuquiriquiaa, nojuajaari nocua tohuataquiaari canaa na naacunura. Majaari María niniu quiriquiaa cutara. Tiajiniaja quiriiri. <sup>21</sup> Canaacua Marta tiuquishacari, nojuajaari Jesu sequesee:

—Jiyaniijianaa, ¡quiaa jaara niya quiquianu, cua nanu maara shaajeyaquiquianu!

<sup>22</sup> Naajaa, janiyari niishiyani quiaa jaara Pueyaso secojore, Pueyasoori quia secojosano tojiniutianiya.

<sup>23</sup> Jesuuri Marta sequeree:

—Quia nanucuaa samiitianutaniuhua.

<sup>24</sup> Martaari na riucuaare:

—Taaquiririnij, janiyacuaa niishiyani nojuajaari samiitianutaniuhua macunucua samiitiacosacariuhua jiya puequesacari.

<sup>25</sup> Jesuuri na sequeree:

—Janiyacuaaari macunucua samiitianijiojuani. Cante cucua tiuujiani, jaara cusoyare, naajaa, samiitianutaniuhuari. <sup>26</sup> Cante cucua tiuuri saminio na quishacarijiani, nojuaja jaara cusoyare, naajaa, majaari na shaajenu quiniutianiya seetanujuanaa. ¿Quiaate cua sequesanoocua tiuya Martanaa?

<sup>27</sup> Nojuajaari Jesu riucuaare:

—Jaa, Jiyaniijianaa. Janiyacuaja niishiyani quiaari Cristo, Pueyaso Niyanu, noj tariucuaaanu sequesaaquiaari mijiria niriqianotej.

<sup>28</sup> Naa Marta riucuanu nuhuaji Jesutej, na tiajinia quiaarohuari. Naa María numaama sasacasuhuari:

—Niishitiojona jati quiya. Quia sequeyano nocua quia quianura.

<sup>29</sup> Naa María tojishacari Marta sequesantej, ritia sanequeeri. Jesuucua nimiaari tee canaa quiriquiaacuajani. <sup>30</sup> Jesuuri juhuanujuaja maja na tiuquitianu quiquiaari canaa cuno tiacajinia. Canaari tiaca shuriucua quiriquiaaani tee Marta naacuquiaari canaacuajani, Jesuucua na nishacari. <sup>31</sup> Nojori cumanijianaa pueya jaara María niquiquiaari ritia tohuataano tiajiniji, nojoriiri na jiyaniquiaari na nanu raajinia nujuquenuucua quiaa naasucua. Naaratej, nojoriiri na nuhuaji quiaaree.

<sup>32</sup> María tiuquishacari canaacua, Jesu cariquimiaji mojuquetaseeri. Naa na sequereeri:

—Quiaa jaara niya quiquianu, cua nanu maara shaajeyaquiquianu.

<sup>33</sup> Jesu niquishacari María nujuqueyano, mariyata nata quiniaa nujuqueyanojuhuaj, Jesuuri nojori taraajetaree. <sup>34</sup> Jesuuri pueya nequesotaree:

—¿Tee na niasaarucuaani?

Pueyari Jesu sequeree:

—Miji, Jiyaniijianaa. Quia niquiquii. Niya niasaarucuaano.

<sup>35</sup> Jesuuri nujuquesee. <sup>36</sup> Tii quiniaa Judiocuaca niquishacari Jesu nujuqueyano, tama sequetooreejaarijia:

—¡Nia niquiri! Jiyanohua Lázaro panijiaquiiri.

<sup>37</sup> Noojiaqueya cuno pojorijinijinioori sequeriquiaajuhuj:

—Jesu jaara cariojuaru namijia jeecacanucuaa, maara Lázaro naataniquianujuhuj maja na shaajenura.

*Jesu samiitianishacari Lázaro*

<sup>38</sup> Jesuuri jiyanoehua na taraajenuta raa jiyajiria catecanoquiaari, canaajuhuj. Raari puereetuca saajiata mishiquiosano quiriquiaa. <sup>39</sup> Jesuuri pueya sequeree:

—¡Saajia nia ruutiniri tamocora!

Martaari Jesu sequeree:

—¡Jiyaniijianaa, cuatro juuca tari na shoconujiya! ¡Tari mocuaatia jaaniuya naasucua!

<sup>40</sup> Jesuuri Marta sequeree:

—Janiyacuaa tari quia sequereeni, quiaa jaara cua sequesanoocua tiuuri, quiaari Pueyaso cumaacata cua miishano niqiniutianiya.

<sup>41</sup> Jiyacaritij, pueyari saajia ruutinirii tamocora. Jesuuri jiyocuacaanu mauree. Naa Pueyaso sequereeri:

—Cua Quenaa, quia timitiaanijia. Quiaari tari cua sequesano tojiriucuaacuaa.

<sup>42</sup> Janiyari niishiyani quiaari pueyaracaanu cua tojiquiaa. Janiyari naa quia sequereeni, niya quiniaa pueya niishiniuria quiaari mijiria cua jiyaroquiaari.

<sup>43</sup> Naa Jesu sequenu nuhuajitij, jiyanoehua na rupaa paaretareeri. Naa sequereeri:

—¡Lázaronaa, quia tohuatama!

<sup>44</sup> Macuuri tariucua saminio tohuatamaa. Na juaashiquiaca, na niohuacaari jiunio-cosano quiriquiaajaa. Na nacaari puetunu na jiquiocotajanaa mishiquiosano quiriquiaajuhuj, toquerauta morosano. Jesuuri pueya sequeree:

—Nia saacatare, cuara rucuaneeera.

*Judiocuaca camarucua rojotoosacari na monura Jesu*

*(Mt 26.1-5; Mr 14.1-2; Lc 22.1-2)*

<sup>45</sup> Naa Jesu samiitianishacari Lázarotej, queraatia narta Judiocuacaari nocua tiuquiaari, noo pojori canapuate Maríacua nijioquiaari na cumanijianuracuajani.

<sup>46</sup> Noojiaqueya cuno Judiocuacajinijinioori Fariseocuacaacua quiojoquiaari nojori pohuatanura Jesu miishano. <sup>47</sup> Naaratej, Fariseocuaca, pueyacuara secojonaa jiyani-ijianucuanio, nojoriiri rerejoquiaari puetunu Judiocuaca camarucuatajanaa. Nojoriiri sequetuquiaari:

—¿Taa pa miiniutianiya? Cuno pueyanoori queraatia casaa miiquiaa na cumaacata pueya niqiuara. <sup>48</sup> Paa jaara nareja na shanacure naa na miiniuriatej, ¡puetunu pueyajanaari na pueyara quiniutianiya, nocua nojori tiuushacari! Nojoriiri na jiyaniijia socua na jiyatenutianiya. Naaratej, pa jiitianaa Romano pueyari pocua nijionutianiya Pueyaso Secojoja tia nojori niyartanura, pa pueya na pueconurajuhuj.

<sup>49</sup> Caifásri tii quiriquiaajuhuj. Nojuajaari canaa pueyacuara secojonaa jiyaniijiajanaa quiriquiaa cuno marijia. Jiyacaritij, nojuajaari narta camarucua sequeree:

—¡Niaaquiiri niishiyashijia seetanujanaa! <sup>50</sup> ¿Majateeri nia niishiniu? Maninia cutaraari niquiriyatu pueyano cusonura pa niti, maja najuhuaana puetunu pa pueyajanaa puecoosanura.

<sup>51</sup> Caifás sequesanoori maja tama na sequesanojuaaja quiquiaari. Pueyacuara secojonaa jiyaniijiajanaa na quishacari, Pueyasoori naa na pohuaterree taa Jesu cusonutianiya puetunu Judiocuacaacuarajanaani. <sup>52</sup> Seetanujanaari. Jesuuri maja cusoriquiano quiquiaari saaja Judiocuacaacuara. Nojuajaari cusoriquiano quiquiaari puetunu tariucua Pueyaso saquiriojosano pueyapueecuarajanaajuhuj, tee tiquiyocua niyaquejonu na muerasurano quiyacuajani. Nojuajaari cusoriquiano puetunu cuno pojorijianaa na rerejotenura, jatiqii na qitiuniuria juhua niquiriyatu maanu. <sup>53</sup> Naacuajitij, cuno juucajiniji, cuno Judiocuaca camarucuaari rojotooriquiaa taa nojori monutianiya Jesuni.

<sup>54</sup> Nocuaaji, Jesuuri maja tari na rucuaneejonu quijia narta Judiocuaca niqiuara. Cunora tamaquiria canaa jiyataquiaariiri. Canaari nata quishii cariquia jiya shuriucua tamonu tiacajiniani. Cuno tiaca sesa quiquiaari Efraín.

<sup>55</sup> Jaara quera quiquiaari tari canaa queranacusacari Pascua juucara, queraatia pueyari quiojoriquiaa Jerusalén tiacajiniara tama na tiacajiniijiaaja. Nojoriiri quiojoquiaari juhuacarijia nojori jeenucuanura na cuaqueya nojori puecoosacari tama na seyajaaja nojoriicuara. Nojoriiri naa miiquiaari jiyanooshano nojori quiniuria Pueyaso niquiara, taa supuetana Moisés rootaquiaaricuajani. Nojoriiri naa miiquiaari juhuajaniya nojori queranacunura Pueyaso niquiara Pascua juuca. <sup>56</sup> Pueyari tii Jesu pajenuuriquiaa. Pueyaso Secojoua tiajinia nojori quishacari, nojoriiri tama nequesoreetooriquiaajaaja:

—¿Taa nia sequeyani? ¿Pa queranacunujinia niniutianiyatenojotij, maja soj?

<sup>57</sup> Pueyacuara secojonaa jiyaniijianucua, Fariseocuacanio, nojoriiri tari pueya rootaquiaari, tamonu pueyano jaara niishiri tee Jesu quiyani, cuaara nojori numooteera nojori quiatenura Jesu.

## 12

### *María totasacari na shanhua jaanutaja Jesuucua*

(Mt 26.6-13; Mr 14.3-9)

<sup>1</sup> Seis juuca jaara cureeriquiaaja Pascua juucara, canaari jiyacari Jesuta Betania tiacajinia quiaareeni, Lázaro quijia tiacajinia, teyano Jesu samiitiani quiaaricuajani.

<sup>2</sup> Cuno tiacajinijinio Jesu rupuenaa pueya timitiasacari Jesu, nojoriiri sumatunuquiaari nojori miaquenuunura cuno niucua Jesuta. Martaari miaquesano patootariquiaa pueyara. Lázaroori Jesuta miaquenuuriquiaa narta masuusano pueyata, canaatano.

<sup>3</sup> Jiyacaritij, Maríari Jesuucua pataree na shanhua jaanutaja. Cunoori “nardo” jyanishano nataujiniji shipinishano quiquiaari. Jyanohua queraatia cumaneecata masano. Puereetuca motiiquio cajiniocua puecariquiaari cuno shanhua jaanutaja. Maríari Jesu nihuacaacua na totaree. Na nuhuaji, na sacuanijiarohua na muecacataari. Puetunu tiacojuanaari shanhua jaanuriquiaa. <sup>4</sup> Naa María miishacaritij, niquiriyatu canaajinijinio Jesu saquiriojosano pueyanoori juaarii. Nojuajaari Judas Iscariote quiri quiaa, na nuhuaji Jesu quiatequiaari na paraani. Nojuajaari naa sequere:

<sup>5</sup> —¿Casaara cuno shanhua jaanutaja niquitioyaquishaaree queraatia cumaneecarani, casamijiuniucua pueya niquitiojosocoriquianoni? ¡Jaara masenu panishaare, maara niquitiosaare juhua niquiriyatu marijiaara pueyano poonijionu sami!

<sup>6</sup> Naa Judas sequesacaritij, majaari seetanujanaa na taraajenu quiri quiaa casamijiuniucua pueyacu. Naa sequereeri saaja cumaneecaacua jiaatiaja na quiniucua, nohuasejojua na quishacari. Judasri cumaneeca quiquio cojuatana quijia puetunu canaarajanaa. Naacuajitij, nojuajaari tiji nohuasejojua, pueya niquitiojosanojiniji canaara. <sup>7</sup> Jesuuri saaja Judas sequere:

—Nareja quia niquiri. Nojuajaari nio shanhua jaanutaja cojuataja pueyaracaanu, juhuacarijia na jeenucuatajara cua cuaqueya, pueya niaaquishacarijia janiya raajinia, janiya jaara mosaareni. <sup>8</sup> Casamijiuniucua pueyari pueyaracaanu niaata quiri quiano cutara. Saniniujia, janiyari maja pueyaracaanu niaata quiri quianoni.

### *Pueyacuara secojonaa jiyaniijianucua roojotoosacari Lázaroocua*

<sup>9</sup> Queraatia canaa Judiocuacaari niishiquiaari Jesu Betania tiacajinia quiri quiaa. Cunora, nojoriiri nocua quiojoquiaari na niquiniucua, Lázaro niquiniucua juhujaj, teyano Jesu samiitiani quiaaricuajani. <sup>10-11</sup> Jesu samiitianiucua Lázaro, queraatia canaa Judiocuacaari Jesuucua tiuquiaari, na pueya nojori quiniuria. Cunora, canaa pueyacuara secojonaa jiyaniijianucuaari roojotooquiaari Lázaro na motunurajuhujaj.

### *Juhua Jiyaniijianucua Jesu tiuquishacari Jerusalén tiacajinia*

(Mt 21.1-11; Mr 11.1-11; Lc 19.28-40)

<sup>12</sup> Cuno queraatia pueya, tari Jerusalén tiacajinia quiri quiaacua Pascua juucara queranacunurani, nojoriiri niishiquiaari Jesu tariqui tiuquiniutianiyajuhujaj. <sup>13</sup> Nocuaji, nojoriiri tucuru piyotaree. Na nuhuaji, nijiyareeri Jesu naacunuucua, na tucuru shiiniotanuuriquiaari. Naa nacooriquiaajaariuhua nojori shuquiritiasacari Jesu:

—¡Pocujaji Tacuna! ¡Pocujaji Tacuna! ¡Cuaara shuquiriaatia quiiria pa Jiyaniijia, teyano Pueyaso jiyaroquiaari pocuacuajani! ¡Nojuacuajaari Israel pueya Jiyaniijijanaa!

<sup>14</sup> Jesuquiiri jiyacari burro niquiojua riuriatamaa. Tari na nijinia cajiriquiaari, taa tariucuacaanu Pueyaso Rupaajinia naajiotasano quiyacuajani. <sup>15</sup> Naa sequeyari:

“¡Sión tuhananuucua quiniaa pueyanaa, maja puerenu! ¡Nia niquiri! ¡Nia Jiyaniijia cumaji niya niaacua! ¡Burro niquiojua nijinia cajiyari!”

<sup>16</sup> Jiyacaritij, majaari canaa niishiniu quiriquiaa naa canaa tiuquitishacari canaa Jiyaniijia Jesutej, canaari nio tariucuacaanu Pueyaso Rupaajinia naajiotasano tohua-teeriquiaani. Pueyaso jaara Jesu samiitianiquiaariuhua, canaari jiyacari shusha ni-ishiquiaarini cuno naajiotasanoquiiri Jesujiniji quiquiaari.

<sup>17</sup> Cuno pueya, Jesu samiitianishacari Lázaro niquiquiaarini, nojoriiri pueya pohu-atariquiaa taa Jesu jiiquiooquiaari Lázaro na raacoji na tohuatanurani. <sup>18</sup> Queraatia pueya niishishacari naa Jesu miishano na cumaacatatej, nojoriiri Jesu naacunuucua nijiyaree. <sup>19</sup> Nocujaji, Fariseocuacaari tama sequetooriquiaajaaja:

—¡Canaacuajaari cunora nia sequequiaani pa morejanaa! ¿Niaate na niquiya? ¡Puetunu pueyajanaari cuno pueyanooqua pacuree, na pueya nojori quiniuria!

#### *Grecia jiyajinijinio taucuaca pocoojonu panishacari Jesuta*

<sup>20</sup> Grecia jiyajinijinio taucuacaari Jerusalén tiacajiniara nijioquiaarijuhuaj Pueyaso niquiara nojori queranacunuunura Pascuara. <sup>21</sup> Cuno pojoriiri canaa cojinia Felipecua catecanoquiaari. Felipeeri Betsaida tiacajinijinio quiquiaari. Cunoori Galilea jiyajinia tiaca. Cuno Griegohuari Felipe sequeturee:

—Pueyanonaa, canaa quia Jiyaniijia Jesuta pocoojonu paniyani.

<sup>22</sup> Jiyacaritij, Felipeeri Andrés sequesee cuno pojori sequesano nojuaja. Na nuhuaji, Andrésri Felipeta quiaaree Jesuucua. Nojoriiri Jesu pohuataseejuhuj. <sup>23</sup> Jesuuri naa nojori riucuaaree:

—Quiarijiani, tama janiyajaarijia mosaanutaniya pueya nitini. <sup>24</sup> Seetanujuanaa nia sequeyanijia, sohujajau jaara raama jataaquishaare, pueyaracaanu niquijijajau quiniutianiyari. Saniniuujia, jaara natasaare juhua na moquenura, saaja moritianutaniyari queraatia na muetunura. <sup>25</sup> Naajuhuj, cante tama na cuaqueyajaaja panijia puerani, nojuajaari puetunu shaajenutaniyajanaa. Saniniuujia, cante tama na cuaqueyajaaja panitijia na tojiniuria janiya mijiriani, nojuajaari pueyaracaanu shuquiriaatia rishijara jiyatesaanutaniya. <sup>26</sup> Cante quiria poonijionu paniyani, cuaara seetanujuanaa cua tojjijia quiiria. Tee cua quiniutianiyacuani, cua tojitijajacaari tii quiniutianiyajuhuj. Cua Queeri cua tojjijia timitianutaniya. ¡Jiyanohua maninia nojori miiniutianiyajaariuhuj!

#### *Jesu pohuatasacari nojuaja mosaanutaniya*

<sup>27</sup> Quiarijiani, janiyari jiyanohua tacayani. ¿Casaa cua sequeyarini? ¿Janiyate sequeya soj: “Cua Quenaa, maja naquiya cua miitiniu”? Maja. Maja naa cua sequenu quiniutianiya. Janiyacuajaari cunora niquiaari mijiriani. <sup>28</sup> ¡Cua Quenaa, janiya cuaara miishiiriaqui taa quia paniyacuajani, pueya niishiniuria quiaari jiyanohua maninia!

Jiyacaritij, Pueyasoori tojishaaree pocuaano jiyocuacaanuji. Naa Neyanu sequereeri:

—Janiyacuajaari naa niishitirii pueyani, pueyaracaanu quia miishacari cua panishano. Janiyari socua pacutenutaniuhua pueya niishitiniuni, quiaa jaara nojoriicuara mosaare.

<sup>29</sup> Cuno pueya, canaata tii quiriquiaa Jesutani, nojori tojishacari Pueyaso pocuaano, nojoriiri sequeturee:

—¡Miacanacuaja cuno tojishaareeni!

Tamasacaari saniniuujia sequereecujua:

—¡Pueyaso serucuaja nocua pocuaareno!

<sup>30</sup> Saniniuujia, Jesuuri canaa sequereeri:

—Cuno rupaa niaa na tojiriini, majaari quiria na quiniu quiriquiaa. Cunoori nia tojishocoriquiano quiriquiaa, nia niishiniuria cua Queeri cua tojiquiaa cua secojosacari nojuaja. <sup>31</sup> Quiarijiani, mijiria quiniaa miishacari naquiya janiya, nojoriiri saniniuujia

saniitiosocoriquiano jiyatesaaree tari. Naajuhuaaj, mijiria jiyaniijia Sesaacaari jataasaanu-taniyajuhuaaj, maja cumaacaraca na quiniuria socua. <sup>32</sup> Janiya jaara nujuaretasaareni, janiyari puetunu pueyapuejanaa nijiotenutaniya cucuani. Nojoriiri juhua jaatiasaanu-taniya cucua, cucua nojori tiuuniuria, nojori ruuretanura janiya soj.

<sup>33</sup> Naa Jesu sequesacaritij, canaa niishitiriiri taa pueya monutaniya nojuajani. <sup>34</sup> Tii quiniaa pueyari na riucuaaree:

—Canaacuaajaari tariucuacaanu Pueyaso Rupaajiniji niishiyani, Pueyaso Jiyaroso-coriquiano Cristoori pueyaracaanu rishiriquiano cutara. Quiajanijarijataj, ¿casaara quia sequeyariniijia, Pueyaso Jiyarosanoori nujuaretasaanutaniya tii na cusonura? ¿Canteeri cuno pueyanoni, quiaa na sequeya Pueyaso Jiyarosanoni?

<sup>35</sup> Jesuuri nojori sequereee saaja:

—Janiya, nioojia cuhuatanani, janiyari niaata quiniutianiyajaara rupaquijiani. Nocua nia tiuuri juhuacarijia, ninishiqui quiaquishacarijia. Cante ninishiqui rucuanajojuani, nojuajaari maja na niishiniu tee na quiaani. <sup>36</sup> Nioojia cuhuatanaacua nia tiuuri, niaata cua quishacarijia, seetanujuanaa cuhuashiqui quijiaca nia quiniuria.

Naa Jesu sequenu nuhuaji cuno pojoritij, quiacuhuari. Nojoriicuaaji jamaashiiri.

#### *Judiocuaca tiuyaquishacari Jesuucua*

<sup>37</sup> Jesuuri jiyanohua queraatia jiyajeneta na cumaacata miishano miiquiaari pueya niquiara. Nojoriiri saaja nocua tiuyaquiquiiaari. <sup>38</sup> Naacuajitij, tariucuacaanu Pueyaso sequenu panishano caminiujiunia Isafas pohuatasanoori tohuateequiiaari, nojuaja jaara naa sequequiaari:

“Jiyaniijianaa, ¿cante canaa pohuatasanoocua tiuuriini, canaa pohuatasacari quia Jiyarosocoriquianojinijini? ¡Shaaqui! ¿Cante niishirijiaaniuhuaaj, jiyajeneta casaa nojori niquishanoori seetanujuanaa quia cumaacata miishano quiriquiaa? ¡Shaaqui!”

<sup>39</sup> Naacuajitij, majaari nojori naata tiuuniu quiquiiaari Jesuucua. Isafasri naa naajio-taquiiaarijuhuaaj:

<sup>40</sup> “Pueyasoori nojori jiyateree juhua nimishitiuria, maja nojori niquiniuria na namijjata. Nojori niishitijaja cushitiooreejaariuhuaaj, maja nojori niishiniuria nojori jiuujjata. Naa nojori miiriiri maja nojori tacatonura nojori jiuujja, cua jiyanooniuria nojori, quiarinio pueyara cua jataniyaquiniuria nojorijiuhuaaj”.

<sup>41</sup> Supuetana Isafasri naa caminiujuquiaari Pueyaso niishitishano nojuajatej, Jesu na niquiniucua na shacantuuca cumaacajinia quiyano. Naa na pohuatasacaritij, nojuajaari juhuacarijia Jesujiniji pohuatariquiaa.

<sup>42</sup> Naajaa, queraatia narta Judiocuacaari Jesuucua tiuquiaari. Queraatia canaa jiyaniijianucuaari nocua tiuquiaarijuhuaaj. Cuno jiyaniijianucuaari maja na pohuatanu quijia pueya niquiara, Jesuucua tiuujjaca nojori quishacari. Nojoriiri na pohuataaquijia, Fariseocuaca na pueretusacari, Fariseocuaca mariqui nojori tenujureeri maja socua nojori tiuquitianura Pueyaso secojojua tiacajinia. <sup>43</sup> Nojoriiri saaja narta pueya shuquiritiasano pueya quiniu panijia, maja Pueyaso shuquiritiasano cutara.

#### *Pueya tojitiaaquiniucua Jesu sequesano, nojoriiri saniitiosaariquiano*

<sup>44</sup> Jesuuri jiyanohua na rupaa paaretaree. Naa sequereeri:

—¿Cante cucua tiuuriini, majaari saaja na tiuuniu cucua! ¡Cua Queecua tiuuriijiaariuhuaaj, cante cua jiyaroquiaaricuaajani! <sup>45</sup> ¡Cante cua niquiriini, nojuajaari cua Jiyarona niquiriijiuhuaaj! <sup>46</sup> Janiyari mijiria niquiaarini cua cuhuatanura nijaniya. Naacuajitij, cante cucua tiuuriini, majaari tari na quiniu ninishiqui. <sup>47</sup> Pueyano jaara cua rupaa tojiriquia najuhanaj, janiyajanaari maja nocuara cua saquiriojotanu quiniutianiya na saniitiosaanura. Majaari cua ninu quiquiiaari mijiria, pueya cua saniitionura. Janiya cutaraari niquiaarini nojoriicuaaji cua tacunura. <sup>48</sup> Cante cua ruuretaja saajani, cua sequesano tojiyaquiyajaariuhuaaj, nojuajaari tari nocuara saquiriojotana jiiitia na saniitiosaanura. Nojoriiri cua sequesano cutaraari tama nojoriicuaara saquiriojotariquianojuaja nio jiya puequesacari. <sup>49</sup> Cua pohuatasanoori maja tama cua niishishanojuaja. Cua

Jiyarona cua Quecuajaari cua niishitiquiaa casaa cua sequenutaniyani, mariyata casaa cua niishitiojonutaniyani. <sup>50</sup>Janiyari niishiyani cante cua Que rupaa tojjiani, nojuajaari pueyaracaanu quijia quiniutianiya cutara. Naaratej, janiyari seetanujuanaa saaja na sequesano caminiujuquiaani, taa na niishitiquiaa janiyacujani.

## 13

### *Jesu jeequejosacari na saquiriojosano pueya niohuaca*

<sup>1</sup> Jesuuri canaa na saquiriojosano pueyata rerejoquiaari Pascuaacuara juucajinia. Jesuuri jiyacari niishiquiaari tari quiquiaariiri quera na tiujiasacari canaa mijiria, na Queecua na tacanuhuara. Nojuajaari canaa paniriquiaajaa, taa canaa na paniquiaari pueyaracaanucujani, mijiria na quishacari canaata.

<sup>2</sup> Cuno niucuaja, Jesuuri canaa na saquiriojosano pueyata miaqueriquiaa. Sesaacaari tari Judas Iscariote niishitirii noojiajinia, nojuaja cuaara Jesu quiateera na paraa, na mosaanura. Cuno Judasri tamonu Simón jyanishano pueyano niyanu quiquiaari.

<sup>3</sup> Jesuuri niishijia nojuaja seetanujuanaa Pueyasojiniji niquiaari. Naajuhuj, nojuajaari niishiquiaari, na Que Pueyasoori na jiyatequiaari Jyaniijarajanaa, puetunu casaa jiitianajanaa na quiniuria. Niishiriquiaajaariuhua nojuajaari quera na Queecua tacanutaniuhua. <sup>4</sup> Jyaniijarajanaa na quishacari, naajaa, nojuajaari miaquejajiniji sanequiaari. Na tucuaque toque jocuareeri. Na nuhuaji na cajiniocua camarucuteree cuaqueya tuujutajaari. <sup>5</sup> Na nuhuaji, mohuaca shuurii tohuatashijiniaari. Canaa niohuaca jeequejoriquiaari juhua tiaco seru. Na nuhuaji, na sacuanijiariquiaajaariuhuj na cajiniocua na camarucutesano cuaqueya tuujutajata.

<sup>6</sup> Na jeequenu panishacari Simón Pedro niohuaca, Pedroori saaja Jesu sequeree:

—Jyaniijanaa, ¿taa quia miyani? ¿Quiaateeri cua niohuaca jeequenutaniya?

<sup>7</sup> Jesuuri Pedro riucaaree:

—Quiarijiani, majaari quia niishiniu casaara naa cua miyani. Naajaa, quiaacuaja na nuhuaji niishiniutianiya.

<sup>8</sup> Pedroori Jesu sequeree:

—¡Cua Jyaniijanaa, janiya cutaraari maja quenaaja cua shanacunu quiniutianiya cucua quiajaniya, cua niohuaca quia jeequenura!

Jesuuri na riucaaree:

—Janiya jaara quia niohuaca jeequejiaquirini, majaari cua pueyano quia quiniu quiniutianiya.

<sup>9</sup> Simón Pedroori na sequeree:

—¡Jaara naa quirij Jyaniijanaa, maja saaja cua niohuaca jeequenucarajaj! ¡Quia jeequerejuhua cua juaashiquiaca, cua nacanio!

<sup>10</sup> Jesuuri na sequeree:

—Cante shusha nanajani, saaja na niohuacaari jeequeshiya cutara. Na cuaqueyacuaajaari tariucua jeequesano quia. Puetunu niajanijajanaari tari jeequejosano quiyacuaja. Saa niquiriyatujuaari jeequesoo quia saniniuujia.

<sup>11</sup> Jesuuri tari niishiquiaari cante na quiatenutaniya na paraani. Nocuaji sequeriquiaari: “Niquiriyatu pueyanoori jeequesoo quia cutara”.

<sup>12</sup> Canaa niohuaca na jeequejonu nuhuaji, Jesuuri na toque cushiriohua. Miaquejajinia cajiriohuari. Canaa nequesotareeri:

—¿Niaate niishiya casaara naa cua jeequejoree nia niohuacani? <sup>13</sup> Niaacuajaari cua sequequiaa “Niishitiojonata”, nia “Jyaniijatanio”. Seetanujuanaa nojuacuajanjia, taa nia jyaniquiquiaa janiyacujani. <sup>14</sup> Naaratej, janiya jaara jeequejoree nia niohuacacuaani, nia Jyaniijia cua quishacari, nia Niishitiojonajuhuj, naa nia miiriquia niarta Pueyaso muerasujuhuj. <sup>15</sup> Janiyari naa miiriini, cua niishitiojonura niajaninya, naa nia miitioonurajuhuj taa cua miirii niajaniyacuaani. <sup>16</sup> Seetanujuanaa nia sequeyanijia, seruuri maja socua tojishano quijia na camarnujiniji. Naajuhuj, jiyarosano pueyanoori maja socua tojishano quijia na jiyaronajiniji. <sup>17</sup> Niaa jaara cua rootasano niishiri, niaari shuquiriaatia quijia quiniutianiya niaa jaara na tojjiaa quiri.

<sup>18</sup> 'Shusha cua sequesano niajaniani, cunoori maja puetunu niajanianojuaana. Janiyacuajaari niishiyani canapue cua saquiriojoquiaarini, taamueca pueyate niajaniani. Naacuajitij, tariucuacaanu Pueyaso Rupaajinia janiyajiniji naajiotasanoori tohuateenutaniya. Naa sequeyari:

“Tama cuata miaquenajaaritia cua paracara quirii”.

<sup>19</sup> Janiyari juhuacarijia nia toyani. Naacuajitij, cua pohuatasano jaara tohuateere, niaari niishiniutianiya janiyari seetanujuanaa Pueyaso Niyanuni. <sup>20</sup> Seetanujuanaa nia sequeyanijia, cante cua jiyaramiquishano pueya tojjiani, nojuajaari cua tojjijahuaj. Cante cua tojjijara quiriini, nojuajaari cua Jiyarona tojjijara quiriijihuaj.

*Jesu pohuatasacari, Judascuajaari na paraa na quiateriquiano*

(Mt 26.20-25; Mr 14.17-21; Lc 22.21-23)

<sup>21</sup> Naa Jesu sequenu nuhuaji canaatej, jiyanoohua na taraajenuta naa canaa sequereeri: —Seetanujuanaa nia sequeyanijia, niquriyatu niajanijiniinooori cua paraa cua quiatenutaniya.

<sup>22</sup> Canaari jiyacari tama niqutiooreejaanijia. Majaari canaa niishiniu quiriquiaa canajiniji naa Jesu sequeriquiaani. <sup>23</sup> Jiyacaritij, janiyari na shuriucuaji cajiriquiaa miaquenujuajiniani, na panishano pueyano cua quiniucua. <sup>24</sup> Naaratej, Simón Pedroori cua mashiniquirii sanaa cua nequesotanura Jesu, canajiniji naa na sequereeni. <sup>25</sup> Naarate janiyari Jesuucua tatereeni, jiyasohuaja cua nequesotanura nojuaja. Janiyari naa na sasacareeni:

—Jiyaniijanaa, ¿canteeri naa quia miiniutianiya?

<sup>26</sup> Jesuuri cua riucuaaree:

—Janiyari pan rau piquiojonutaniya caacajiniani. Cana cua niqutionutaniya, nojuajaari cuno.

Jesuuri jiyacari pan rau piquiojoree. Judas Iscariote na niqutiooreeri. Nojuajaari tamonu Simón jiyanihana niyanu. <sup>27</sup> Judas masesacari cuno pan rau, Satanásri noojiajinia tiuquiquii. Jesuuri jiyacari Judas sequereeri:

—Cuno, quiaa na niishirojiya miiniuni, quiocua ritia miirinioj.

<sup>28</sup> Canaa na saquiriojosano pueya nata miaquenuuriquiaani, majaari quenaaja canaa niishiniu quiriquiaa casaara naa Jesu sequereeri Judasni. <sup>29</sup> Judasri canaa cumaneeca cojuatana quijia. Naaratej, noojiaqueya canaajiniinooori jiyaniuriquiaani Jesu naasucua na jiyaroriquiaa socua casa na masenura canaa queranacunuutajara, casamijuniucua na niqutiojonura cumaneeca soj. <sup>30</sup> Judas jaara masequiaari Jesu niqutiosano pan, jiyacari tohuataqueeri. Tariucua niucuaari quiriquiaa.

*Jesu rootasano quiarinio*

<sup>31</sup> Judas tohuatanu nuhuaji, Jesuuri canaa sequereeri:

—Quiaritia cua miishanojiniji, janiyari maniniuhuaqueetasanutaniya. Pueyasoori jiyanoohua maniniuhuaqueetasanutaniyajuhaj, naa cua miishanojiniji. <sup>32</sup> Pueyaso jaara maniniuhuaqueetasare naa maninia cua miiniucuatej, nojuajaari cua jiyatenu-taniya cumaacaraca quijia cua quiniuria na shuriucua. Quera naa cua miiniutiani-yari. <sup>33</sup> Quiquiohuanijoyuanaa, janiya rupaquijia niaata quiniutianijajaarani. Taa cua sequecanu parta Judocuacacuaani, janiyari naa nia sequeyajaaniuhaj. Niaari cua pajenuunutaniya juucua. Majaari nia naata quianu quiniutianiya cucua, tee cua quianutaniyacuaani. <sup>34</sup> Quiaritia nia niishitiriiria nio quiarinio rootasano. Nia tojiri. ¡Panitiojuaca nia quiri! Naatej, taa cua paniquiaacuaa niajaniani, naa nia panitioorejuhaj. <sup>35</sup> Naa jaara naa panitiojuaca quiri, puetunu Pueyaso niishiyashijiaa pueyajanaari naacuaji niishiniutianiya, niaari cua tojjitajaca pueya.

*Jesu pohuatasacari Pedro nocuaji seetanutaniya*

(Mt 26.31-35; Mr 14.27-31; Lc 22.31-34)

<sup>36</sup> Simón Pedroori jiyacari Jesu nequesotaree:

—Jiyaniijanaa, ¿tee quia quianutaniya?

Jesuuri na riucuaaree:

—Tee cua quianutaniyacuaani, majaari quia naata nuhuajiniu janiya. Naajaa, quiaari na nuhuaji quiariquiano.

<sup>37</sup> Pedroori na sequeree:

—Jiyaniijanaa, ¿casaara quia sequeyarini, quiarijia cutara maja cua naata quianu quiata? Janiyacuaja tama cua cuaqueyajaaja tarinijotaaree quiocuarani.

<sup>38</sup> Jesuuri na riucuaaree:

—¿Naatee? ¿Quiaate tama quia cuaqueyajaaja tarinijotaaree cucuara? Janiyari seetanujuanaa quia sequeyani: juhuaquenu panishacari caacaraja niunijyaquishacarijia, quiaari jiyacari cucuaji seetanu pacutejonutaniya tari.

## 14

### *Jesuuri juhua nuu Pueyasooocua*

<sup>1</sup> Jesuuri naa canaa sequeree socua:

—Maja nia tacaaniu, pueyanaa. Nioojia nia cajitiri. Saaja Pueyasooocua nia tiuuri. Cucua nia tiurijiuhuaj. <sup>2</sup> Cua Que tiaari puereetuuca. Queraatia quiquoori tii quiya. Cunora, janiyari coteenu nia puetanutaniyani, niaacuaji cua jeenucuanura nia quijiara. Jaara naa quiyaquiritij, janiya maara nia sequeyaquirini janiya nia puetanutaniyani, niaacuaji cua jeenucuanura. <sup>3</sup> Cua jeenucuanu nuhuaji nia quiqiora, janiyari niaacua tacatenutaniuhuani, cua rijionuhuaa niajaniya, cuata nia quiniuriajuhuaj tee cua quiniutaniyacuaani. <sup>4</sup> Niaacuajaari cua quiquojiniara neteja nuu niishiya, tee cua quianutaniyacuaani.

<sup>5</sup> Tomásri Jesu sequeree:

—Jiyaniijanaa, ¡maja canaa niishiniu quenaaja tee quia quiaani! ¿Canaatucua taa cuno nuu niishirini, quiaa na sequeyani?

<sup>6</sup> Jesuuri na riucuaaree:

—Janiyacujaari cuno nuuni, Pueyasooocua nia quianura. Janiyacuajaari seetanujuanaa Pueyaso Rupaani. Janiyari pueya samiitianijajuhuj. Majaari pueya naata Pueyaso rupenu tamajaaja. Saaja janiya cutaraari pueya ruputeja Pueyasoni, nojori tiushacari cucua. <sup>7</sup> Niaa jaara seetanujuanaa cua niishiquiaaricuaa, niaa maara cua Que niishirijiuhuaj. Seetanujuanaa, niaari tari na niishiyacuaja. Niaari na niquiquiaajuhuj.

<sup>8</sup> Felipeeri na sequeree:

—Jiyaniijanaa, quiaa jaara canaa niqitiri quia Que Pueyaso, canacua panaatia quiriohuani.

<sup>9</sup> Jesuuri Felipe riucuaaree:

—Felipenaa, janiyacujaruhua pueyaracaanu niaata quiquiaa juucuaani. ¿Majateeri juhuanujuaja quia niishiniu janiya? Cante cua niquiquiaani, cua Que niquiquiaajaarihuaj. ¿Casaara quia sequeya cua niqitiniuria cua Que niajaniyarini? <sup>10</sup> ¿Majateeri quia tiuuniu cucua cua sequesacari quiajaniya, janiyari cua Que jiuujajinia quiyani, cua Queeri saniniuujia coojajinia quiyacujua? Canaari maja rimiajatani. Nio, cua sequesano niajaniyani, cunoori maja tama cua niishishanojuaja. Cua Que, coojajinia quiyani, nojuajaari na panishano miitiquiaa janiya. <sup>11</sup> Cucua nia tiuuri cua sequesacari niajaniya, janiyari cua Que jiuujajinia quiyani, cua Queeri saniniuujia coojajinia quiyacujua. Niaa jaara cua sequesanoocua tiuuniu paniyaquiri, cucua nia tiuuriqui na cumacata cua miiniuucua nia niquiara. <sup>12</sup> Seetanujuanaa nia sequeyanijia, cante cucua tiuujiani, nojuajaari puetunu cua miishanojuanaa miiniutaniyajuhuj. Cua tacasacariuhua cua Que shuriucua cua quiniuhuaa, cucua tiuujiaacari cua cumacata seetanujuanaa socua jiyajeneta casaa miiniutaniya cua miishanojiniji. <sup>13</sup> Seetanujuanaa nioojajinia cua quishacari, janiyari niaara miiniutaniyani puetunu nia masesanojuanaa nia secojosacari cua Que. Naacuajitij, pueyari cua Que timitianutaniya, nojori niishishacari cua Queeri jiyanhua maninia mijia. <sup>14</sup> Nioojia rupuetosacari coojiata, janiyari puetunu nia masesanojuanaa miiniutaniya niaarani.

### *Jesu sequesacari, nojuaja Pueyaso Sohuanu jiyaronutaniya mijiria*

<sup>15</sup> Niaa jaara seetanujuanaa cua panijaca quiri, niaari cua rootasano tojitiajaca quiniutaniya. <sup>16</sup> Naajuhuj janiyari cua Que secojonutaniyani, niaacua na jiyaronura



tamonu cua niti mijiria, nia cumaquiriquiano. Nojuajaari pueyaracaanu niaata quiriquiano. <sup>17</sup> Nojuajaari Pueyaso Sohuanu, seetanu rupaa jiitianajanaa. Pueyaso tojiyashijiaca pueyari maja na naata cuno Sohuanu na jiitianu, nojori niquiyaquiniuucua nojuaja, na niishitiuyaquiniuucua nojuajuhuj. Niaa cutaraari na niishijiaca. Nojuajaari niaata quiyacuaja. ¡Pueyaracaanu nioojiajinia quiriquianojaariuhuj!

<sup>18</sup> 'Majaari seetanujuanaa cua tiujianu quiniutianiya niajaniya juhua japueyojuaca nia quiniuria. Janiyacuajaari tacatenutaniuhuanu niaata cua quiniuhua. <sup>19</sup> Pueyaso tojitiaashijiaca pueyari quiari naataja cua niquiyaquiniutianiya socua. Niaa cutaraari cua niquijiaca quiniutianiya. Samiitianijiojua cua quiniuucua, niaari pueyaracaanu quijiaca quiniutianiyajuhuj. <sup>20</sup> Jiyacaritij, niaari niishiniutianiya janiyari cua Que jiuujia rupuejani, niaari coojia rupuejacajuhuj. Janiyari saniniuujia nioojiajinia quijiani. <sup>21</sup> Cante cua rootasano niishijiani, nojuaja jaara na tojjia quirijiuhuj, nojuajaari cua panijia cutara. Cante cua panijiani, cua Queeri na panijia quiniutianiyajuhuj. Janiyari na panijia quiniutianiyajuhuj. Janiyari cua panijiaacua niniutianiyani, seetanujuanaa na niishiniuria janiyari nata quiyani.

<sup>22</sup> Canaa cojinia Judasni, nooj, Judas Iscariote sesaanucuatej, nojuajaari Jesu nequesotaree:

—Jiyaniijianaa, ¿casaara saaja canaacua quia niniutianiyarini, maja puetunu mijiria quiniaa pueyacuajanaa?

<sup>23</sup> Jesuuri na riucuaaree:

—Cante cua panijiani, cua rootasano tojjiajaariuhuj. Cua Queeri jiyano pueyano panijia. Naaratej, canaari nocua niniutianiyani, noojiajinia canaa quiniuria, canaa quiquiora canaa jiyatenura nojuaja. <sup>24</sup> Saniniuujia, cante cua paniyaquijiani, jiyano pueyari cua rootasano tojiyashijiacajuhuj. Puetunu cua rootasanojuanaa, niaa na tojiquiaani, cunoori maja tama cua niishishanojuaja. Cunoori cua Que niishitishano janiya, cante mijiria cua jiyaroquiaaricujani.

<sup>25</sup> 'Janiyari puetunu niojuanaa nia pohuataani, niaata cua quishacarijia mijiria. <sup>26</sup> Cua Que jiyarosocoriquiano na Sohuanuuri nia cumaquiriquiano. Nojuajaari nia niishitiojonutianiya puetunu cua niishitionu panishanojuanaa niajaniya. Naajuhuj, nojuajaari nia niishitiniutianiuhua puetunu tari cua pohuatasano niajanijajanaa.

<sup>27</sup> 'Janiyari nioojia cajitiniutianiyani. Janiyari coojia nianutianiya nioojiajiniani, juhuajaniya quijiaca nia quiniuria taa cua quiyacuani. Naacuajitij, niaari seetanujuanaa juhuajaniya quiniutianiya. Mijiria quiniaa pueyari maja na niishiniu cumanijianu juhua janiya. Naaratej, maja nia tacaaniu. Majaari puerenujuhuj. <sup>28</sup> Tari nia sequereecujanijia: "Janiya quera quiohuani. Janiyari na nuhuaji tacatenutaniuhuanu niaata cua quiniuria". Niaa jaara seetanujuanaa cua panijia quiriquia, niaa maara shuquiriri nia niishishacari janiyari cua Queecua quiohuani. Nojuajaari seetanu Jiyaniijajanaa cutara janiyajiniji. <sup>29</sup> Janiyacuajaari juhuacarijia nio nia sequeyani. Naacuajitij, niaa jaara niquiri tohuateyano cua sequesano niajaniya, niaari niishiniutianiya puetunu cua pohuatasanojuanaari seetanujuanaa.

<sup>30</sup> 'Majaari puera cua pocoojonu quiniutianiya niaata tari. Cua Paraca cucua quenaacoya tarini, na miiniuria janiya taa na paniyacuajani. Nojuajaari Pueyaso tojitiaashijiaca jiyaniijia. Pueyaracaanu cua Que Pueyaso tojjia cua quiniuucua, cua Paraca maara naquiya cua miyaquiri janiya jaara cucua na shanacuyaquirini. Na cumaacaari maja na shocotanu cua cumaaca cutara. <sup>31</sup> Naajaa, na miishanojiniji janiya, puetunu pueyajanaari niishiniutianiya, janiyari puetunu cua Que sequesanojuanaa tojjiani, na panijia cua quiniuucua.

'Nia sanetare. Niiquiji pa quiaare.

## 15

*Jesu pueyari juhua Jesu cashacucua, Jesu quishacari juhua neyona*

<sup>1</sup> Jesuuri naa pohuataquiaari socua canaa niquiara:

—Janiyari juhua uva jiyonani, cua Que natau. <sup>2</sup> Cua pueyari juhua cua cashacucua. Tamonu cua cashacucujinijinio jaara muetuyashijia quiri, cua Queeri na piyotaja. Teyano cua cashacucujinijiniote muetujua saniniunijia, cua Queeri na nacareetaja, socua queraatia na muetunura. <sup>3</sup> Nia tojiniuucua cua rootasano, niaari tari juhua nacareetasano quiya. <sup>4</sup> Pueyaracaanu coojia nia rupuere, taa cua rupueya nioojiacuaani, niaa mariqui juhua uva cashacucua piyotasaareeri. Jaara neyonaacuaji piyotasaare, majaari na naata muetunu tari. Naajuhuj, majaari nia naata muetujua quiniu, niaa jaara coojia rupueyashijia quiri.

<sup>5</sup> 'Janiyari juhua nia jiyonani. Niaari juhua cua cashacucua. Cante coojia rupuejani, taa cua rupueya nijaniyacuaani, naacuajitij, niaari juhua queraatia muetujuaca quiniutianiya. Cucuaji rupatejacaari maja na naata casaa miiniu janiyaju. <sup>6</sup> Cante cua rupueyashijiani, nojuajaari taraatia miishaanutaniya juhua uva cashacucua piyotasano neyonajiniji, tamocora jaquerootasano. Jaara sorere, tatucusaarohuari manijinia quejoosocoriquiano. Tii cateyari.

<sup>7</sup> 'Niaa jaara coojia rupuejaca quiri, niaa jaara cua rootasano tojijia quiriuhuj, puetunu nia panishanoocuarajanaa nia secojore Pueyaso. Nojuacuajaari nia masasano miiniutianiya. <sup>8</sup> Naa cua Que miishacari nia panishanotej, niaari juhua queraatia muetujuaca quiniutianiya. Naacuajitij, cua Queeri jiyanohua timitiasaanutaniya. Naacuajitij, niishishaanutaniyajaariuhua niaari cua tojitijaca pueyaniyojua. <sup>9</sup> Janiyari nia panijiani, taa cua Que paniya janiyacuaani. Coojia rupuejaca nia quiri pueyaracaanu, cua panishano pueya nia quiniuria. <sup>10</sup> Janiyari cua Que panishanoni, pueyaracaanu cua miiniuucua na panishano. Naajuhuj, niaa jaara cua rootasano tojijia quiri quia, niaari pueyaracaanu cua panishano pueya quiniutianiyajuhuj.

<sup>11</sup> 'Janiyari naa nia sequeyani, shuquiriaatia quiijaca nia quiniuria, taa shuquiriaatia quiija cua quiyacuaani. Naacuajitij, niaari tojetaarucujanaa shuquiriaatia quiijaca quiniutianiya. <sup>12</sup> Cua tojiri. Nioori cua sequesano niaara: “¡Pueyaracaanu panitiojuaca nia quiri quia, taa cua paniya nijaniyacuaani!” <sup>13</sup> Cante tama na cuaqueyajaaja panitiaja na cusonura na rupuenaa nitini, naa miiija cutaraari seetanujuanaa jiyanohua narta pueya panijia. <sup>14</sup> Niaa jaara cua sequesano miiijaca quiri, niaari cua rupuenaa. <sup>15</sup> Naacuajitij, majaari cua sequenu quiniutianiya tari nijaniya cua seyata. Pueyano seruuri maja na niishiniu casaa poonijosano na camarnu miiquiaacuaani. Janiyari quiarijia nia sequeya cua rupuenaatani, cua niishitiniuucua nijaniya puetunu cua Que sequesanojuanaa janiya. <sup>16</sup> Majaari nia saquiriojonu quiquiaari janiya. Janiya cutaraari nia saquiriojoquiaarini cua jiyaramiquiniuria nijaniya, cua panishano nia miiniuria. Naa nia miishacari cua panishanotej, niaari juhua queraatia muetujua naana quiniutianiya. Puetunu nia miishanojuanaa cua cumaacatani, cunoori pueyaracaanu rishijia quiniutianiya. Cuno miishanoori maja najuhuanaj. Naaratej, cua Queeri puetunu nia masasanojuanaa nia niqutionutaniya seetanujuanaa coojia rupuejaca nioojia quishacari. <sup>17</sup> Janiyari cunora nia sequeyani: “Pueyaracaanu panitiojuaca nia quiri”.

#### *Pueyaso niishiyashijia pueyari Pueyaso muerasu niqiniu paniyashijia*

<sup>18</sup> 'Pueyaso niishiyashijia jaara nia niqiniu paniaquiriquia, majaari nia tacaaniu. Cuno pojoricujajaari naa cua niqitiuniu paniaquijiacacuaa. <sup>19</sup> Niaa jaara Pueyaso muerasu quiaquiriquia, Pueyaso niishiyashijia maara nia panijia quiri quia, taa nojori paniquiaa narta Pueyaso niishiyashijiacacuaani. Niaari Pueyaso niishiyashijia quiquiaarijuhuaj. Naajaa, janiyari nojori tajiniji nia saquiriojoquiaarini, cua pueya nia quiniuria. Cunora, Pueyaso niishiyashijiaari nia niqiniu paniaquiquiaa, maja tari nia quishacari juhua nojori. <sup>20</sup> Majaari nio cua sequesano nia niyjetanu: “Seruuri maja socua tojishano na camarnujiniji”. Naaratej, Pueyaso niishiyashijia jaara naquiya cua miiquiaacuaa, niaari naquiya miishaanutaniyajuhuj. Naajuhuj, nojori jaara cua rootasano tojiquiaacuaa, nojori nia rootasano tojijia quiniutianiyajuhuj.

<sup>21</sup> Nojoriiri naa naquiya miiniutianiya nijaniyatej, cua pueya nia quiniuucua, nojori niishiyaquishacari cua Jiyarona.

<sup>22</sup> 'Janiya jaara niyaquiquiaari nojori cua pohuatanura Pueyaso rupaani, nojoriicua maara saquiriojotaaquishaare, sesa nojori miishanojiniji. Nojori niquiara cua pohuatanuucua Pueyaso rupaa, majaari nojori naata sequenu quiniutianiya: "Cua jiyanoori. Maja cua niishiniu quiquiaari quia rootasano". <sup>23</sup> Cante cua niquiniu paniyashijiani, nojoriiri cua Que niquiniu paniyashijajuhuj. <sup>24</sup> Sesa nojori miishano maara nojoriicua saquiriojotaaquishaare, janiya jaara cua cumaacata miyaquiquiaari nojori niquiarani. Janiyari socua jiyajeneta casaa miijoquiaari cua cumaacata nojori niquiarani, socua tamasaca miishanojiniji. Naajaa, naa nojori niquishacari cua cumaacata cua miishanotej, nojoriiri saaja cua niqutiuniu paniyaquijiacaa, cua Que niqutiuniu paniyaquijiacajaariuhuj. <sup>25</sup> Naajaa, naa nojori miiniuucua janiyatej, tariucuacaanu Pueyaso Rupaa jinia naajiotasano janiyajiniiri tari tohuateeree. Naa sequeyari: "Janiyari najuhuana niquiniu paniyaquishiyani".

<sup>26</sup> 'Janiya jaara cua Que shuriucua quishuhuani, janiyari tiji Pueyaso Sohuanu jiyaronutaniya mijiriani. Nojuajaari seetanu rupaajanaa jiitiaja. Nojuajaari janiyajiniiji niishitiniutianiya pueya. <sup>27</sup> Niaari janiyajiniiji pohuatanutaniya pueyajuhuj, pueyaracaanu cuata nia quiniuucua shushajanaa cua coteesacari pohuatanu Pueyaso rupaa.

## 16

<sup>1</sup> 'Janiyari naa nia numooteyani maja nia tarinitianura cucua tiuuniu niaa jaara naquiya miishaare. <sup>2</sup> Cua pueya nia quiniuucua, majaari nia shanacusaanu quiniutianiya nia tiuquitianura Pueyaso secojojua tiacajinia. Pueya jaara nia puecoorejuhuj cua tojitiajaca nia quiniuucua, nojoriiri jiyaniutianiya nojori maninia miya Pueyasora, naa nojori miishacari. <sup>3</sup> Nojoriiri naa miiniutianiya nijaniyatej, nojori niishiyaquiniuucua janiya, cua Quejuhuj. <sup>4</sup> Janiyacuajaari juhuacarijia naa nia sequeyani. Naacuajitij, niaa jaara naquiya miishaare, niocua jiyacari niishiri janiyacuajaari tari naa nia sequequiarini. Majaari quenaaja nio cua sequenu quijia nijaniya, pueyaracaanu niaata cua quiniuucua.

### *Pueyaso Sohuanu miishanojiniji pohuatasano*

<sup>5</sup> 'Quiarijiani, janiyari cua Jiyaronaacua quiohuani. Quiarijiani, majaari quenaaja nijaniyajinijinio nequesotanu janiya: "¿Tee quia quiohuarini?" <sup>6</sup> Janiya jaara nia sequereeni janiya quianutaniuhuani, niaari saaja taraajequee. <sup>7</sup> Seetanujuanaa nia sequeyanijia, socua maninia quiniutianiya niaaraari, janiya jaara quiaarohuani. Janiya jaara quiaaquiyarohuani, majaari Pueyaso Sohuanu niniu quiniutianiya niaacua, na cumaquiniuria nijaniya. Janiya jaara quiaarohua cutarani, janiyari niaacua na jiyaronutaniyani. <sup>8</sup> Mijiria na tiuquishacari, nojuajaari pueya jiuujajinia poonijionutaniya, nojori na niishitiniuria nojoriiri seetanujuanaa sesa miijiacaa. Nojori niishitiniutianiyajaariuhua nojoriiri na naata sesa miyashijiacara jiyatesaanu. Naajuhuj, nojori niishitiniutianiyari Pueyasoori na naata jiyanooni nojori, maja Sesaacata nojori cojiritiasaanura mani quiquiojinia quejoonu. <sup>9</sup> Seetanujuanaa, Pueyasora, nojoriiri sesa miijiacaa nojori tiuyaquiniuucua cucua. <sup>10</sup> Jiyocuacaanu cua tacasariuhua cua Queecua, majaari socua nia niquiniu quiniutianiya janiya. Naacuajitij, Pueyaso Sohuanuuri pueya niishitiniutianiya, janiyari seetanujuanaa cua Que Pueyaso jiyanootijia cucua tiuuriquiano pueyani. <sup>11</sup> Cua shocotasacari Sesaaca, Pueyaso Sohuanuuri pueya niishitiniutianiya, nojoriiri saniitiosaanutaniya. Naacuajitij, nojori jiyaniijia Satanás jaara tari saniitiosocoriquiano quiyacuaa, nojoriiri saniitiosaanutaniyajuhuj, cucua nojori tiuyaquiniuucua.

<sup>12</sup> 'Janiyari queraatia jiitiaajaa cua pohuatanura nijaniyani. Naajaa, majaari cua pohuatanu quiniutianiya quiarijia nijaniya. Juhuanujuaja maja nia naata na niishiniu. Pueraruhua. <sup>13</sup> Pueyaso Sohuanu tiuquishacari niaacua, nojuajaari nia niishitiniutianiya puetunujuanaa cutara. Nojuajaari seetanu rupaajanaa jiitiaja. Nojuajaari maja tama na niishishanojuaja na niishitiniu quiniutianiya nijaniya. Puetunu na tojishanojuanaa janiyajiniijini, cuno nia niishitiniutianiya cutaraari. Nia niishitiniutianiyajaariuhua taate

nio pa quishacari nuhuaji quiniutianiyani. <sup>14</sup> Niaari cua shuquiritianutaniya, nojuaja niishitiniuucua niajaniya janiyajiniji. <sup>15</sup> Puetunu cua Que jiitiasanojuanaani, cunoori cua casaajuhuj. Naaratej, janiyari nia sequereeni, Pueyaso Sohuanuuri janiyajiniji masenutaniya cua jiitiasano niaara, na caminiujiuniuria niajanijarajuhuj.

<sup>16</sup> 'Niaari saaja quiarjia cua niquiya. Na nuhuaji cutara, majaari socua nia niquiniu quiniutianiyani janiya. Pasa naataja na nuhuaji, niaari cua niquiniutianihuacuahuaj.

*Nia taraajenuuri jatanutaniya shuquiriaatia nia quiniuria*

<sup>17</sup> Jiyacaritij, noojiaqueya canaa na saquirojosano pueyajinijinioori tama nequesoree-tooreejaaja:

—¿Casaa na sequenu paniyarini, nojuaja jaara sequeree: “Niaari saaja quiarjia cua niquiya. Na nuhuaji cutara, majaari socua nia niquiniu quiniutianiyani janiya”? ¿Casaa na sequenu panijaaaranuhua na sequesacari: “Pasa naataja na nuhuaji niaari cua niquiniutianihuacuahuaj”, na sequesacarijuhuaj: “Cua Queecua quianutianihuanijia”? <sup>18</sup> Naajuhuj, ¿casaa na sequeyarini na sequesacari “quiarjiani”, mariyata “pasa naataja na nuhuaji”? ¡Majaari pa niishiniu casaaraqui na sequeyatejaj!

<sup>19</sup> Jesuuri tari canaa nequesotanu panishano nojuaja niishirii. Cunora naa canaa sequereeri:

—Janiyari nia sequereeni: “Niaari quiarjia cua niquiya, na nuhuaji cutara maja socua nia niquiniu quiniutianiyani janiya. Pasa naataja na nuhuaji, niaari cua niquiniutianihuacuahuaj”. ¿Niaatejaara niojiniji nequesoreetoya tama niajanijajaaja?

<sup>20</sup> Seetanujuanaa nia sequeyanijia, niaari nujuquenutaniya. Niaari taraajeconutaniyajujuaj. Jiyacaritij, Pueyaso niishiyashijiacaari taquiya shuquiriaatia quiniutianiyacuaa niajanijajiniji. Naajaa, cuno nia taraajenuuri jatanutaniya shuquiriaatia nia quiniuria.

<sup>21</sup> Naajaariuhuj, maaji ranu panishacari na mueya, jiyanoehua naquiya miyari. Naajaa, mueya na ranu nuhuaji, naquiya na miiniu niyajetaqueeri, na mueya na timitiasacari.

<sup>22</sup> Quiarjiani, niaari naa taraatia quiyajuhuj. Naajaa, niaacua tacatenutianihuanijia. Niaari jiyanoehua shuquiriniutianiyani nia niquishacari janiya. Majaari quenaaja tamasa pueya naata quiniutianiyani cuno nia shuquiriniu jaariutianu.

<sup>23</sup> Jiyacaritij, majaari socua nia nequesotanu quiniutianiyani janiya. Seetanujuanaa nia sequeyanijia, cua Queeri nia niquitionutaniya puetunu nia masesanojuanaa nojuaja, seetanujuanaa coojia rupuejaca nioojia quishacari. <sup>24</sup> Majaari juhuanujuaja nia secojonu Pueyaso seetanujuanaa taa cua sequeyacuajani, seetanujuanaa coojia rupuejaca nioojia quishacari. Naa nia secojoretej. Niocua nia panishano niquitiosaare, seetanujuanaa shuquiriaatia nia quiniuria.

*Jiyaniijia Jesuuri Sesaaca shocotana*

<sup>25</sup> Janiyari pueyaracaanu nia pohuataquiaa miriquini. Janiya quera nia pohuatanutaniya maatia seetanujuanaa cua Quejiniji cutarani. <sup>26</sup> Jiyacaritij, niaari cua Que secojonutaniya coojia rupuesano nia quishacari. Jiyacaritij, majaari na panishaanu quiniutianiyani cua shiniujiuniuria cua Que, na tojinijuria niajanijia. <sup>27</sup> Cua Quejanaacuajaari nia panijia, nia paniniuucua janiya, nia niishiniuucujuhuj janiyari na jiyarosani. <sup>28</sup> Niaacuajaari niishiya, janiyari cua Que shuriucujaji niquiaarini pueyanora cua quiniuria mijiria. Quiarjia saniniuujia, janiyari nio jiya tiujianutaniyani, cua Queecua cua quianuhua.

<sup>29</sup> Naa Jesu sequesacari canatej, canaari na sequereeni:

—Quiarjia cutara, quiaari maatiajanaa sequeree, maja miriqui. <sup>30</sup> Quiarjia cutara, canaari niishiyani quiaari puetunu casaajanaa niishijia. Majaari quenaaja na panishaanu pueya nequesoreenura quiajanijia. Naacuajitij, canaari niishiyani, quiaacuajajqui Pueyaso Jiyarosano.

<sup>31</sup> Jesuuri canaa sequeree:

—¿Naatee? ¿Niaate shusha cucua tiyuruhua? <sup>32</sup> Tari quenaacoyari naquiya cua miishaanura. Seetanujuanaa quiarjiaari. Niaari cucujaji cocuatasaanutaniya puetunujuanaa. Niaari tamajaaja cua tiujianutaniya. Naajaa, seetanujuanaa maja cua quiniu

tamajaaja. Cua Quecuajaari cua cojiyani. <sup>33</sup> Janiyari puetunu niojuanaa nia sequeyani, nioojia nia cajitiniuria nio cua pohuatasanoocua nia tiuushacari. Mijiria nia quishacari, niaari seetanujuanaa naquiya miiniutianiya. Naajaa, janiyacuaajaari mijiria jiyaniijia shocotareeni. Naacuajitij, nioojia nia cumaquiri tamajaaja.

## 17

### *Jesu secojosacari na pueyacuara*

<sup>1</sup> Naa Jesu sequenu nuhuajitij, jiyocuacaanu na mausacari, naa na Que sequereeri:

—Cua Quenaa, janiya nio juuca naquiya miishaanutaniyani taa quia sequequiaar-icuaajani. Cua tojiniuucua quiajaniya, quia Jiyarosano quia jiyatere pueya timitiasano cua quiniuria. Naacuajitij, janiyacua saniniuujia quia jiyatere pueya timitiasano quia quiniuriani, tojetaarucuajanaa maninia mijia quia quiniuucua. <sup>2</sup> Quiaacuajaari quia cumaaca cua niqutioquiaari puetunu pueyajanaa cua jitianura. Naacuajitij, janiyari saniniuujia nojori jiyatenutaniya pueyaracaanu quijiaca nojori quiniuriani, teyano pojori quia niqutioquiaari janiyacuaajani. <sup>3</sup> Nojori niishishacari saaja quiajaniyari seetanujuanaa Pueyasocuaaja, naajuhuj, nojori niishishacari janiyari quia jiyarosaroni, naacuajitij, nojoriiri pueyaracaanu quijiara quiniutianiya shuquiriaatia.

<sup>4</sup> Janiyari tari tucuatere quia sequesano cua miiniuria mijiriani. Naa cua miiniuucua puetunu quia panishanojuanaatej, pueyari quia timitiaa. <sup>5</sup> Jiya shipiniyaquishacarijia, janiyari jyanohua shuquiriaatia quijia quiquiaari quia shuriucua, jiyaniijiajanaa cua quishacari. Cua Quenaa, naa quijiara cua jiyaterohua quiarrijiani, quia shuriucua cua quiniuhuara.

<sup>6</sup> Quia niqutiosano pueya janiya, quia saquiriojosano pueya quia niishiyashijiaca pueyajinijinioni, quiarjia cutara, nojoriiri niishiya cante quiajaniyani. Nojoriiri quia niishiya, nojori niqiniuucua cua mijiosano quia cumaacata, cua pohuatasano quia-janiyajiniji nojori tojiniuucuaajuhuj. Nojoriiri quia pueya quijia. Quiaari saniniuujia nojori cua niqutioquiaari. Nojoriiri quiarjia quia rupaa tojitiajaca cutara. <sup>7</sup> Nojoriiri niishiya puetunu cua jitiananojuanaani, cunoori quia niqutiosano janiya. <sup>8</sup> Janiyari quia rupaa rootacanu nojorini, quia niishitishano janiyani. Nojoriiri seetanujuanaa nocua tiurii. Nojoriiri seetanujuanaa niishiya, janiyari quia shuriucua niqiaarini. Niishitiuyajaariuhuj, janiyari seetanujuanaa quia jiyarosaroni.

<sup>9</sup> Janiyari cunora nojoriicuara quia secojiyani, seetanujuanaa quia pueya nojori quiniuucua. Majaari cua secojonu quia niishiyashijiaca pueyacuara. Saaja noo pojoriicuara quia secojiyanijia, quiaa na niqutioquiaari janiyatej. <sup>10</sup> Naaratej, puetunu cua jitianano pueyajanaari quia pueyajuhuj. Mariyata puetunu quia jitianano pueyajanaari cua pueyajuhuj. Nojori tiuniucua cucua, nojoriiri jatanishano pueya quiniutianiya. Naacuajitij, queraatia pueyari cua timitianutaniyajuhuj, naa nojori niquishacari cua cumaaca.

<sup>11</sup> Majaari puera cua tarishiniu quiniutianiya mijiria. Cua pueya cutaraari mijiria quiniutianiyajaara, janiya jaara quiaarohua quiocuani. Jyanohua maninia cua Quenaa, nojori quia cojuare quia cumaacata, teyano pojori quia niqutioquiaari janiyacuaajani. Naa quia jitiare nojori, jatiqui nojori quiniuria juhua niquiriyatu jiuujaraca, taa pa quiyacuaani. <sup>12</sup> Mijiria cua quishacari nojoritia, janiyari nojori cojuajani quia cumaacata, quia rupaacua tiuujaca nojori quishacari. Majaari quenaaja niquiriyatu nojorijinijinio cua juurequetenu quiquiaari. Saa noojuaari juurequecanu cutara, tariucua juurequeriquiano quijiacuajatej. Naacuajitij, tariucuaaanu quia rupaajinia naajiotasanoori tohuatecanu.

<sup>13</sup> Quiarrijiani, janiyari quiocua quianutaniyani, tee quia quiyacuaani. Niya cua quishacarijia, janiyari nio sequeya nojori niquiarani, nojori jitianura cua shuquiriniujihuj, tojetaarucuajanaa shuquiriaatia quijiaca nojori quiniuriajuhuj. <sup>14</sup> Janiyari nojori niishitocanu quia rupaani. Naa nojori tojishacari quia rupaatej, quia niishiyashijiaca pueyari nojori niqiniu paniaquiquiaa. Cua pueya nojori quishacari, nojoriiri maja saaja mijiria quijiaca na quiniu tari, taa janiyacuaani. Naaratej, mijiria quijiaca pueyari nojori niqiniu paniaquiquiaa. <sup>15</sup> Naa cua secojosacari quiarjia nojoriicuaratej, majaari

cua sequenu quiajaniya nojori quia rijionura niiquiji. Saaja quia secojiya cutaranijia, nojori quia cojuanura Sesaacaacuaaji. <sup>16</sup> Nojoriiri maja mijiria quijiaca na quiniu tari cua pueya nojori quishacari, taa nio jiyajinijinio cua quiyaquiyacuaani. <sup>17</sup> Quia rupaa quia poonijiotere nojori jiuujiajinia, tojetaarucujanaa quia tojijiaca nojori quiniuria. Quia rupaari seetanu rupaajanaa cutara. <sup>18</sup> Quiaacuajaari cua jiyaroquiaari mijiria quiniaa pueya niquiara cua pohuatanura quia rupaa. Naajuhuj, janiyari cua pueya jiyaramiquiyani mijiria quiniaa pueyacuajuhuj. <sup>19</sup> Quia tojijiaca nojori quiniuria seetanujuanaa, janiyari tama cua cuaqueyajaaja jiyateya puetunu quia panishanojuanaa miiija cua quiniuriani. Naacuajitij, nojori niishishacari seetanu rupaajanaa janiyajiniji, nojoriiri tojetaarucujanaa maninia miijiacara jatanishaanutaniya.

<sup>20</sup> 'Majaari saaja cua secojonu nio pojoriicuara, tariucua quia tojitiajacacuaani. Janiyari secojiyajuhuj na nuhuaji cucua tiuuriquiano pueyacuara, noo pojoriicuara cante cucua tiuuniutianiya na nuhuajini, nojori tojishacari nio pojori pohuatasano janiyajiniji. <sup>21</sup> Cucua tiuuriquiano pueyacuara secojiyanijia puetunu cucua tiuuniaajanaa cuaara quiiria jatiqúi, juhua rupuetootesano, taa pa quiyacuaani, cua Quenaa. Naatej, taa cua quia quioojiajiniaacuaani, quiaari saniniuujia coojiajinia quiyacujua. Nojori jiuujia cuaara juhua rupuetootesano quiiria poojiatajuhuj, mijiria quiniaa pueya niishiniuria, quiaari cua jiyaroquiaari mijiria. <sup>22</sup> Janiyari nojori cumaquiya quia Sohuanutani, quia niqúitiosano janiyacuaa, juhua niquiriyatu jiuujiaraca nojori quiniuria, naatej, taa niquiriyatu jiuujiaraca pa quiyacuaani. <sup>23</sup> Quiaari coojiajinia quia. Naajuhuj, janiyari nojori jiuujiajinia quiyajaacuhuj. Naacuajitij, paari nojoritia juhua niquiriyatu quiniutianiyaní. Naacuajitij, mijiria quijiacaari niishiniutianiya, quiaari seetanujuanaa mijiria cua jiyaroquiaari. Nojoriiri niishiniutianiyajuhuj, quiaari jiyanojua cua pueya panijia, taa quia paniya janiyacuaani.

<sup>24</sup> 'Cua Quenaa, cuno pueya quia niqúitiosano janiyani, janiyari paniyani nojori quiniuria cuata quia shuriucua, nojori niquiniuria cua shacantuuca cumaaca. Quiaari cuno cumaaca cua niqúitioquiaari pueyaracaanu quia paniniuucua janiya, jiya shipiniyaquishacarijia. <sup>25</sup> Tojetaarucujanaa sesa miyashijia cua Quenaa, mijiria quijiaca pueyari maja na niishiniu quiajaniya. Janiya cutaraari quia niishiyani. Nio cua pueyari niishiyajuhuj, janiyari seetanujuanaa quia jiyarosononi. <sup>26</sup> Janiyari nojori niishitocanucujani cante quiajaniyani. Janiyari naa pueyaracaanu nojori jiuujiajinia niishitiniutianiya quiajaniyajinijini, seetanujuanaa nojori niishiniuria quiajaniya. Naacuajitij, taa quia paniya janiyacuaani, nojori cuaara cuno paniniu jiiitiaara nojori jiuujiajiniajuhuj. Naa nojori niishishacari quiajaniyatej, janiyari nojori jiuujiajinia quiniutianiyajuhuj.

## 18

*Na paraa quiasacari Jesu*

*(Mt 26.47-56; Mr 14.43-50; Lc 22.47-53)*

<sup>1</sup> Naa Jesu secojonu nuhuaji na Quetej, nojuajaari canaa puetaaree Cedrón surocono taquijiria. Tii quiquiaari olivo cuhuariquia. Cuno cuhuariquiaari matacosano quijia puetunu na shocujanaa. Jesuuri tii tiuquitiamaa canaa, na Que Pueyaso na secojonura. <sup>2</sup> Jesuuri tii jiiitiquiaari canaata na rerejonura. Naacuajitij, na paraa na quiateriquiano Judasri cuno cuhuariquia niishiquiaarijuhuj. <sup>3</sup> Canaa quishacari tii, Judasri jiyacari soldadohua tiuquitiasee, Pueyaso Secojoua tia cojuanaa pueyano. Cuno pojoriiri pueyacuara secojonaa jiyaniijianucua jiyaramiquishano pueya quiriquiaa, Fariseocuaca jiyaramiquishano pueyano. Nojoriiri pueya na miaquetaja pooriquiaa, nocuaji na nunutaja jayoco, samarinio. <sup>4</sup> Jesuuri tari puetunujuanaa niishiriquiaacuaja taa nojuaja miishaanutaniyani. Naaratej, nojuajaari cuhuariquia matakajiniji tohuatamaa, na paraa na naacunura. Na naacusacari nojori, nojori nequesotareeri:

—¿Cana nia pajeyani?

<sup>5</sup> Na paraari na riucuaaree:

—Canaa Nazaret tiacajinijinio Jesu pajeyani.

Jesuuri nojori riucuaaree:

—Janiyacuaaja nojuajani.

Jesu tacartana Judasri cuno pojoritia quiriquiaa tii. <sup>6</sup> Jesu sequesacari, “Janiyacuaaja nojuajani”, na paraari na nijiniara pojotuquee. <sup>7</sup> Jesuuri socua nojori nequesotarohua:

—¿Cana nia pajeyani?

Nojoriiri socua pacuterohua sequenu:

—Canaa Nazaret tiacajinijinio Jesu pajeyani.

<sup>8</sup> Jesuuri nojori riucuaaree:

—Janiyacuaaja tari nia sequereeni, janiyacuaaja nojuajani. Niaa jaara cua pajeya, nareja nia niquiri nio, cua cojiniaani.

<sup>9</sup> Naacuajitij, tama Jesu sequesanojuaarijia tohuatteequiaari, nojuaja jaara naa na Que sequequiaari: “Majaari quenaaja niquiriyatu pueyano cua juurequetenu quiquiaari quia niqutiosano pueyajinijinio janiya”. <sup>10</sup> Jiyacaritij, Simón Pedroori tama na mueruujuaaja shitiaree na shuucuaaji shiyano. Nata, pueyacuara secojonaa jiyaniijia seru numoco jaatereeri, na miaquetajara na numoco. Cuno seru sesa quiquiaari Malco. <sup>11</sup> Jesuuri Pedro sequeree:

—Na co jiniacuma quia shiiriohua quia mueruu. Cua Que jaara paniya naa cua miishaanura naquiyatej, ¿janiyatucua nio pojoriria tama cua cuaqueyajaaja tarinitiaaquiri naquiya cua miishaanurani? ¡Taaquiririnij!

*Anás nequesoreesacari Jesu*

(Mt 26.57-58; Mr 14.53-54; Lc 22.54)

<sup>12</sup> Jiyacaritij, na paraari Jesu quiaaree. Nojoriiri quiquiaari Romano soldadohua, nojori jiyaniijiajuhuaj, Pueyaso Secojoua tiaco cojuanaa pueyano. Nojoriiri Jesu morojoturee. <sup>13</sup> Na nuhuaji, nojoriiri coteenu na jaatucutaquiaari Anáscua, canaa pueyacuara secojonaa jiyaniijia Caifás cama na quiniuucua. Cuno marijara, Caifásri pueyacuara secojonaa jiyaniijiajanaa quiriquiaa. <sup>14</sup> Cuno Caifáscuaajaari tari naa sequequiaari narta Judiocuaca camarucua: “Maniniacuajaari niquiriyatu pueyano mosaanura puetunu pueya nitijianaa, maja najuhuaana puetunu pueyajanaa puecoosaanura”.

*Pedro coteesacari seetanu Jesujiniji*

(Mt 26.69-70; Mr 14.66-68; Lc 22.55-57)

<sup>15</sup> Simón Pedroori cuata Jesu nuhuajiriquiaa tucuacaanuji. Janiya cutaraari pueyacuara secojonaa jiyaniijiajanaa niishishano pueyano quiquiaarini. Naacuajitij, janiyari tiuquinishaaree cutara Jesutani, jiyaniijia tia shocua mataca jiniacuma. <sup>16</sup> Saaja Pedro cutaraari tohuateyaji jateesee. Jiyaniijiajanaa niishishano pueyano cua quiniuucua, janiyari tohuateyaji cojuana niyacoota pocoojoseeni, Pedro na tiuquininiuriajuhuaj.

<sup>17</sup> Cuno niyacoori Pedro nequesotaree:

—¿Majate quiajaniya cuno Jesu pueyajinijiniojuhuaj?

Pedroori na riucuaaree:

—¡Maja janiya!

<sup>18</sup> Shiniquiaari jiyacari jaanujuriquiaa. Nocuaaji cuno jiyaniijia seyari Pueyaso Secojoua tiajinia cojuanaa pueyata mani naatequiaari. Nojoriiri na jitiuriquiaa. Pedroori nojoritia tii quiriquiaajuahuaj. Mani jitiuriquiaari.

*Pueyacuara secojonaa jiyaniijia nequesoreesacari Jesu*

(Mt 26.59-66; Mr 14.55-64; Lc 22.66-71)

<sup>19</sup> Jiyacaritij, pueyacuara secojonaa jiyaniijia Anásri Jesu nequesoreenu coteeree canaa na saquiriojosano pueyajiniji. Jesu niishitiojosanojiniji Jesu nequesoreerejaarihuaj.

<sup>20</sup> Jesuuri na sequeree:

—Janiyacuaajaari pueyaracaanu puetunu pueya niquiarajanaa maatia niishitiojoquiaani. Janiyari pueyaracaanu tiqiyocua Pueyaso secojonuujuaca tiacajiniaqueya niishitiojoquiaa pueyani. Naajuhuj, janiyari niya Jerusalén tiacajinia Pueyaso Secojoua tiajinia niishitiojoriquiaani, tee puetunu parta Judiocuacajanaa rerejoquiaacuajani. Majaari quenaaja jiyasohua cua rootanu quiquiaa pueya. <sup>21</sup> ¿Casaara quia nequesoreya

janiyani? Quia nequesoreere juhuari cuno pojori, canapuate cua pohuatasano tojiquia-nuni. Nojoricuajaari quia sequenutaniya casaa cua rootaquiaa nojorini.

<sup>22</sup> Jiyacaritij, Pueyaso Secojojua tiaco cojuana pueyanoori Jesu shuriucua nujuariquiaa. Naa Jesu riucuasacari jiyaniijia Anástej, Secojonuujua tiaco cojuana pueyanoori Jesu jiquioco maseteree. Naa Jesu sequereeri:

—¿Naa riucuasanote pueyacuara secojonaa jiyaniijia?

<sup>23</sup> Jesuuri na riucuaaree:

—Janiya jaara sesa riucuaareeni, cua sequere casaate sesa quiriini. Saniniuujia, janiya jaara maninia sequereeni, ¿casaara quia maseteree cua jiquiococuaraarini?

<sup>24</sup> Canaa pueyacuara secojonaa jiyaniijiajanaa Caifás quiniuucua, jiyacaritij, Anásri Jesu moronucua jiyarotaree Caifáscua.

*Pedro pacutesacari seetanu Jesujiniji*

*(Mt 26.71-75; Mr 14.69-72; Lc 22.58-62)*

<sup>25</sup> Anás nequesoreesacarijia Jesu, Pedroori tii jitiuriquiaajaa. Tii quiniaa pueyari jiyacari na nequesotaree:

—¿Majate quiajaniya cuno pueyano pueyajinijiniojuhuaj?

Pedroori saaja seetaree. Sequereeri:

—¡Maja janiya!

<sup>26</sup> Pueyacuara secojonaa jiyaniijia seruuri Pedro niquirii. Nojuajaari noo pueyano cuna quiriquiaa, Pedro jaatesano na numocotej. Nojuajaari Pedro sequeree:

—¡Janiyacuaruhua quia niquirii cuno pueyanota quia quishacari olivo cuhuariquia-jiniani!

<sup>27</sup> Pedroori na seetarohuacuhuj. Caacarajaari jiyacari niunijioquee.

*Jiya jiyaniijia Pilato nequesoreesacari Jesu*

*(Mt 27.1-2, 11-14; Mr 15.1-5; Lc 23.1-5)*

<sup>28</sup> Caifás tiajiniji, Jesuuri jaatucusaquiaari Romano jiyaniijia tiajinia. Cuno tiaari jyanohua puereetuca quiriQuiase, jiyaniijiaacuaji tiasano. Cuno jiyaniijiani, nojuajaari Romano jiyaniijiajanaa César jiyatesano quiquiaari jiyaniijiajanaa na quiniuria Judea jiyajinia. Na sesa quiquiaari Pilato. Canaa Judiocuaca jaara tiuquijioquiaari Jesuta Pilato tia carijiniacuma, shusha juhuaqueriquiaari. Nojoriiri maja na tiuquitianu quiquiaari Pilato tiaco, nojori mariqui juhua curuushiriiri Pueyaso niquiara, nojori tiuquitianuucua tahue tiajinia. Nojori jaara juhua curuutuucua quiri Pueyaso niquiara, naacuajitij, nojori maara Pascuara miaquesano borrego miaqueyaquirij. <sup>29</sup> Naaratej, Pilatoori nojoriicua tohuataquiaari. Nojori nequesotareeri:

—¿Casaa nio pueyano miirucuaani, miji nia nitianura cucuani?

<sup>30</sup> Nojoriiri saaja riucuaaree:

—Jaara sesa miyashijia quiriquia, ¿canaatucua casaara quiocua na nitiamani?

<sup>31</sup> Pilatoori nojori sequeree:

—¡Niiquiji nia jiyataarohua! ¡Tama nia nequesoreesuhuaajaaja, taa nia supuetanaa rootasano sequeyacuajani!

Canaa Judiocuaca camarucuaari Pilato riucuaaree:

—¡Niajaniya Romano pueyani, niaacuajaari canaa sequecanu maja canaa monura pueyano!

<sup>32</sup> Naacuajitij, naa tarijia Jesu sequesanoori tohuateeriquiano quiquiaari, nojuaja jaara sequequiaari taa na mosaanutaniya niyacutesanojiniani. Saaja Romano pueyari naa monu niishiquiaari niyacutesanojinia. <sup>33</sup> Jiyacaritij, Pilatoori na tiaco tiuquiyarohua. Jesu piiriiri nocua na niniuria. Tii Jesu nequesotareeri:

—¿Quiaate seetanujuanaa Judiocuaca jiyaniijia?

<sup>34</sup> Jesuuri Pilato sequeree:

—¿Cunote tama quia niishishanojuaaja naa quia nequesotanura janiyatej? ¿Tamonu soj quia pohuatacanu janiyajiniji?

<sup>35</sup> Pilatoori Jesu juarii. Na sequereeri:



—¡Quiaa jaara Judiocuaca jiyaniijiarano quiri, janiyara naajaa! ¿Janiyateeri quiarta Judio pueyanoni? ¡Tama quiarta Judiocuacacuaajaari cucua nitiamaa quiajaniya, nia pueyacuara secojona jiyaniijianucuata! ¡Cua sequere casaa quia miiriucuaani!

<sup>36</sup> Jesuuri na riucuaaree:

—Janiyacuajaari Jiyaniijiani, maja juhua mijiria jiyaniijia. Janiya jaara mijiria jiyaniijia quiriqiani, cua pueya maara cua quiatunaa cuarta Judiocuacata miaquetoore, maja nojori quiatunura janiya. Majaari jiyaniijia cua quiniu mijiria, taa quia quiyacuaani.

<sup>37</sup> Pilatoori Jesu nequesotaree:

—¿Naatee? ¿Quiaateeri jiyaniijia?

Jesuuri na riucuaaree:

—Jaa. Janiyacuaja Jiyaniijiani. Janiyacuajaari cunora rasaaquiaarini. Janiyari mijiria niqiaarini seetanu rupaajanaa cua niishitiniuria pueya. Cante seetanu rupaajanaa panijiani, nojoriiri cua sequesano tojitiajaca.

<sup>38</sup> Pilatoori najuhuaana na nequesotaree:

—¿Casaateeri cuno seetanu rupaajanaani?

Naa na nequesotanu nuhuajitij, Pilatoori tohuatamohuacuhua canaa Judiocuacaacua.

*Pueya sequesacari Jesu cuara mosaaria*

*(Mt 27.15-31; Mr 15.6-20; Lc 23.13-25)*

Pilatoori jiyacari pueya sequeree:

—Nio pueyano nequesoreereecuaajaniija. Nojuajaqui maja sesa na miiniu quiqianu.

<sup>39</sup> Nijaniya Judiocuacani, niaari puetunu Pascua juucarajanaa cua nenecojoquiaa cua cartenura nujuatejojuajiniji nujuatesano pueyano. Quiarrijiani, ¿cana nia paniya cua cartenura nio Pascua juucarani? ¿Niarta Judiocuaca jiyaniijiatee?

<sup>40</sup> Puetunu pueyajanaari naa jyanohua nacoorohuacuhuj:

—¡Maja cuno cartenu! ¡Barrabás quia cartere cutara!

Cuno Barrabásri nohuasejojua quijia.

## 19

<sup>1</sup> Jiyacaritij, Pilatoori na soldadohua majacuteree Jesu, coqueeca casaata. <sup>2</sup> Soldadohuari juhuacontucua maaturee Jesu nacaquera. Na nuhuaji cushitishaarohuari. Na macaatiuria, shaaruque toque cushitishaarohuari, juhua jiyaniijia toque. <sup>3</sup> Naa nojori miiniu nuhuaji Jesutej, nojoriiri nocua catecanoquiaari. Na sequetureeri:

—¡Judiocuaca jiyaniijianaa! ¡Quia timiri, Judiocuaca jiyaniijianaa!

Naa nojori sequesacari Jesutej, nojoriiri na jiquioco piquitiurii.

<sup>4</sup> Pilatoori socua tohuataquiaari canaa Judiocuacaacua. Nojori sequereeri:

—¡Nia niquiri! Janiya na tohuateya niaacuani, nia niishiniuria janiyacuaja tari na nequesoreereeni. Janiyari quiarijia niishiyani, nio pueyanoqui maja sesa na miiniu quiiriucuaa.

<sup>5</sup> Jesu muetasacari nojoriicua, juhuacontucuaajiniji nacaque cushiriquiaari, shaaruque toquenio. Pilatoori Judiocuaca sequeree:

—Nia niquiri niarta pueyano.

<sup>6</sup> Canaa pueyacuara secojona jiyaniijianucua, Pueyaso Secojoua tiaco cojuanaa pueyajuhuj, nojori jaara Jesu niqiquiaari, naa nacoonu coteetureeri:

—¡Niyacutesanojinia quia teetere tii na cusonura! ¡Niyacutesanojinia quia teetere!

Pilatoori nacoyano riucuaaree saaja:

—¡Maja! Janiyacuajaari niishiyani, nio pueyano maja sesa na miiniu quiqianu! ¡Niaa jaara na monu paniri, nia teetere tama nijaniyajaaja!

<sup>7</sup> Canaa Judiocuacaari Pilato riucuaaree:

—¡Canaari Pueyaso Rootasano naajione jitiiaani! ¡Canaari cunojiniji niishiyani, nio pueyano cuara mosaaria tama na cuaqueyajaaja na jiyatenuucua Pueyaso Niyanura!

<sup>8</sup> Pilato tojishacari naa canaa Judiocuaca sequesantej, nojuajaari socua puerequiaari.

<sup>9</sup> Pilatoori na tiaco tiuquiyarohua Jesuucua. Na nequesotareeri:

—¿Tejenotejaara quiajaniyani?

Jesuuri maja na riucuanu quirii. <sup>10</sup> Pilatoori na sequeree:

—¡Cua riucuaorejaj! ¿Quiaate niishiyaquiya, janiya jiyaniijiani? ¡Janiya jaara panirini, cua naata cua pueya sequenu na teetenura quiajaniya! ¡Janiya jaara paniyaquirijuhujaj, cua naata quia cartenujuhujaj!

<sup>11</sup> Jesuuri saaja na riucuaeree:

—Jiyocuacaanu Quijia jaara quia jiyateyaquiuaari jiyaniijia quia quiniuria, quiaa maara quia cumaaca paaretaquiri cucujaj. Naaratej, cante niyara cua nitiamaa quiocuani, nojuajaari socua jiyanojuaa sesa miirii quiajanijajini.

<sup>12</sup> Naa Pilato tojishacari Jesu sequesantej, nojuajaari socua shiriiquiuaari. Nocuaji, Jesu cartenu saniniujiuriquiaa juucuaari. Judiocuacaari saa nacooreejaa. Naa Pilato sequeteeri:

—¡Cante tama na cuaqueyajaaja jiyateja jiyaniijiarani, nojuajaari pa jiyaniijia César paracara quijia! ¡Naaratej, quiaa jaara cuno pueyano cartere, majaari socua pa jiyaniijiajanaa César rupuenta quia quiniu quiniutianiya!

<sup>13</sup> Naa Pilato tojishacari pueya sequesano nojuajatej, nojuajaari na soldado sequeree na tohuatenuhuara Jesu pueya niquiara. Pilatoori jiyacari cajirii pueya na nequesoreesaquiji cajitujinia. Pilato tii cajiriquiaani, na tajoji pueya nujuatusaquini, cunoori shanohua saitia shipinishano quiquiaari. Naaratej, na sesa quiquiaari “Saitia maniniushitishano”. Judiocuaca rupaajinia saniniujia, cunoori quiquiaari “Gábata”. <sup>14</sup> Jiyacariiri panacari quiriquiaa. Cuno juuca, canaa Judiocuacaari juhuacarijia jeenucuariquiaa Pascuara juucujinia. Pilatoori jiyacari tii quiniaa Judiocuaca sequeree:

—¡Nia niquiri nia jiyaniijia!

<sup>15</sup> Pueyari saa nacooreejaa:

—¡Cunoori maja canaa panishano canaa jiyaniijia na quiniuria! ¡Niyacutesanojinia quia teetere!

Pilatoori nojori sequeree:

—¿Janiyatucua nia jiyaniijia teetereni? ¡Maja!

Pueyacuara secojonaa jiyaniijianucuaari Pilato sequeree:

—¡Jiyaniijia Césarcajaari canaa jiyaniijiajanaa! ¡Maja socua tamonu jiyaniijia canaa jitianu!

<sup>16</sup> Pilatoori socua Judiocuaca niquitioree Jesu, nojori teetesocoriquiano. Naaratej, nojoriiri na jiyataquiuaari na teetenucua.

### *Jesu teetesacari*

(Mt 27.32-44; Mr 15.21-32; Lc 23.26-43)

<sup>17</sup> Jesuuri tama na teejaranojuaaja canujutaaree pueya puecoosaquiria. Puecoosaqui sesa quiquiaari “Pueyano nacaco tuhuananu”. Judiocuaca rupaajinia saniniujia, “Gólgota”. <sup>18</sup> Jesuuri tii teetesaaquiuaari, socua caapiqui pueyano. Jesuuri cuno pojori tajinia nujuaretasaaree. <sup>19</sup> Pilatoori naa naajiotequiaarijuhujaj Jesu nacaacuma rupertasocoriquiano: “Nazaret tiacajinijinio Jesu, Judiocuaca jiyaniijia”. <sup>20</sup> Naajiosano quiriquiaari canaa Judiocuaca rupaajinia, Romano pueya rupaajiniajuhujaj, Griego rupaajiniano. Jesuuri catecaja teetesaaquiuaari Jerusalén tiacajiniji. Naacuajitij, queraatia Judiocuacaari cuno naajio serojoquiuaari. <sup>21</sup> Naaratej, Judiocuacaacuara secojonaa jiyaniijianucuaari Pilato juaatiurii:

—¿Casaara naa quia naajiotereeni: “Judiocuaca jiyaniijia”? Cuaara naajiosaaria cutara: “Tama na cuaqueya sequejajaaja, Judiocuaca jiyaniijianijia”.

<sup>22</sup> Pilatoori nojori riucuaeree saaja:

—Janiyacujaari naa naajiotereeni. ¡Cuaara naa quiiriatej!

<sup>23</sup> Cuno cuatro soldadohua teetenu nuhuaji Jesu, nojoriiri Jesu toqueya seraatiaree. Socua quiriquiaari Jesu tucuaque cacojoqui. Cuno toqueeri shitiasano quiquiaari na riqiajiniji jiyocuara. Maja cusupesano. <sup>24</sup> Naaratej, cuno soldadohuari seque-tooquiuaari:

—Maja pa sureenu nio toque. Coteenu pa tacuarishijiore, pa niishiniuria cante nera na panutaniyani.

Naacujitij, tariucuacaanu Pueyaso Rupaajinia naajiotasanoori tohuateequiaari. Naa naajiotasano quiyari:

“Cua toqueeri seraatiasaaree. Cua tucuaque toqueecua tacuarishiyonuureeri, na pasocoriquiano”.

Seetanujuanaa, naa miitiquiaariiri cuno soldadohua.

<sup>25</sup> Niyacutesano shuriucua tee Jesu teeriquiaacuajani, tii nujuaturiquiaari na nucua, na nucua tarajanujuhuaj, Cleofas niquiocua Maríajuhuj, María Magdalenanio. <sup>26</sup> Jiyanoohua Jesu panishano pueyanoori Jesu nucua shuriucua nujuariquiaa. Cuno pueyanocuaaari janiya. Jesu niquishacari canaa, na nucua sequereeri:

—Maajiniaa, cua panishano pueyano cuara quiiria juhua quia mueya cua niti.

<sup>27</sup> Na nuhuaji, cua sequerejaariuhuj:

—Juannaa, cua nucua cuara quiiria juhua quia nucua.

Naaratej, janiyari María riquiaari cua tiajinarani, tii na quiniuria canaata.

#### *Jesu cusosacari*

(Mt 27.45-56; Mr 15.33-41; Lc 23.44-49)

<sup>28</sup> Na nuhuaji, Jesuuri niishiquiaari puetunu nojuajiniji naajiotasanojuanaari tari tohuateeree. Naajuhuj, tariucuacaanu Pueyaso Rupaajinia naajiotasano tohuateenu-rajuhuj, Jesuuri sequequiaari:

—¡Jiyamueyanijia!

<sup>29</sup> Cuniqii, vino jerecaari patacojina mishaja cajitariquiaa. Jiyacaritij, namasu casaari jereca vinojina shishaaree. Naajuacua na morotatureeri. Na nuhuaji, Jesu rupaama shitiasaareeri. <sup>30</sup> Jesu ratunu nuhuaji cuno jereca vino, naa sequerohuari:

—¡Tari tucuatarae puetunujuanaacuajani!

Naa na sequenu nuhuajitij, naniquiiri. Cusoqueeri.

#### *Soldado jitasacari Jesu shuucuaji na cashanata*

<sup>31</sup> Cuno juucaari canaa Judiocuaca jeenucuasacari quiriquiaa Pascuaacuara juucajinia. Cuno marijara, Pascua juucaari Sábado juucajinia quiriquiaajuhuj, samaatenu juuca. Naaratej, canaa Judiocuaca camarucuaari maja na paniniu quiquiaari samaatenu juuca macunucua jaasuconura na niyacutesanojinia. Naaratej, nojoriiri Pilato sequeree cuno teetejosano pueya cashacucua na shuniitianiniuria, ritia nojori cusonuunura, na roshinjiosaanura cuno juucaja. <sup>32</sup> Naaratej, Pilatoori na soldadohua jiyaramiquirii. Cuno soldadohuari coteenu shuniitiaree niquiriyatu pueyano cashacucua. Na nuhuaji, tamonu cashacucua shuniitiatorejaariuhuj. <sup>33</sup> Saniniuuja, nojori pacusacari Jesuucua, Jesuuri tariucua macu quiriquiaa cutara. Nojoriiri cunora na cashacucua shuniitiaaquirii.

<sup>34</sup> Naajaa, tamonu soldadoori Jesu shuucuaji jitiaree na cashanata najuhuanaj. Ritia shooqueeri nanaca, mohuacanio. <sup>35</sup> Cuno pueyano, na naajiojina naa nia pohuataani, cunocuaaari janiya. Janiyajanaari na niquiquiaarini. Naarate janiyari seetanujuanaa nia pohuataani. Tama janiyajaarijia niishiyani cua sequesanoori seetanujuanaa, nocua nia tiuuniuria. <sup>36</sup> Jesuuri naa miishaaquiaritij, tariucuacaanu nojuajiniji naajiotasano tohuateenura. Naa sequeyacuajaari juhuacarijia nojuajiniji naajiotasano:

“Majaari quenaaja na nucu shuniitiasaanu quiniutianiya”.

<sup>37</sup> Tamaquiiri nojuajiniji naa naajiotasano quiyajuhuj:

“Cashanata na shuucuaji na jitiatusano niquitiuniutianiya”.

#### *Jesu quete niasacari raaco*

(Mt 27.57-61; Mr 15.42-47; Lc 23.50-56)

<sup>38</sup> Na nuhuaji, Arimatea tiacajinijinio Joseeri Pilato sequesee:

—Cua niquitiore Jesu quete raaco cua niasocoriquiano.

Nio Joseeri jiyasohuaja Jesuucua tiuuja quiquiaari, na pueresacari narta Judiocuaca. Pilatoori na sequequiaari na panura Jesu quete. Naacujitij, Joseeri quiaaree. Macu

paquiaariiri. <sup>39</sup> Nicodemojuhuaj, noo pueyano Jesuucua niquiaari niucua nata pocoo-jonuratej, nojuajaari jiyacari tiuquishii Joseecua. Nojuajaari queraatia shanohua jaanutaja nitiariquiaa, macuucua niojosocoriquiano. Na niiquiaari quiquiaari cuarenta y cinco kilo. Cuno shanohua jaanutajaari quiquiaari mirra, aloeta cojitijosano. <sup>40</sup> Joseeri Nicodemota Jesu jiuniocoree toqueneecajinia. Nojori jiuniocosacari, nojoriiri nocua niojoriquiaa cuno shanohua jaanutaja. Canaa Judiocuacaari naa miitiujiaca quiquiaari, na macu na niatunura raaco. <sup>41</sup> Tee Jesu teetesaaquiaaricujani, cuniquijia na shuriucua quiquiaariiri cuhuariquia. Cuno cuhuariquiajiniani, quiarinio jiuutiasano raari quiriquiaa, macunucua niojojuara. Cuno raaconi, juhuanajuaja maja macu niasaanu quiquiaari. <sup>42</sup> Macuuri cuno raaco niasaaquiaari, cateca na quiniuucua. Naajuahuaj, quera puequeriquiaari canaa Judiocuaca jeenucuanu juuca. Cunoori, Pascuaacuara juuca.

## 20

*Jesu samiitiasacariuhua**(Mt 28.1-10; Mr 16.1-8; Lc 24.1-12)*

<sup>1</sup> Domingo, coteenujuanaa semaana juucani, María Magdalenaari tariquicuajii quiaquiaari Jesu raajiniara. Ninishiquiri quiriquiaajaa. Na tiuquishacari, cuno puereetuuca saajia niquishiiri tariucua tamocora ruutinishano, teyanota raa tiosaaquiaaricujani. <sup>2</sup> Naa na niquishacaritij, nojuajaari neterohua Simón Pedroocua, cucuanio. Canaa sequesuhuari:

—¡Pueyanaa, pa Jiyanijiaqui na raajiniji pasaaree! ¡Majaari canaa niishiniu teeriquitijia na niasaaretejaj!

<sup>3</sup> Naaratej, janiyari Pedrota netequiaari raajinarajuhuj. <sup>4</sup> Canaari mariyata netecuraturiquiaa coteenuni. Janiya cutaraari socua ritia netequiaari Pedrojinijini. Naacujitij, janiyari coteenu tiuquishii raajiniani. <sup>5</sup> Janiyari raaco cuuqueseeni. Janiyari saaja Jesu jiuniocotaja toque niquirii maanoni tee Jesu quete niasaarucuaacujani. Majaari cua tiuquiniu quimiaa raaco. <sup>6</sup> Simón Pedroori cua nuhuaji tiuquishii. Cami tiuquimiaajanaa cutaraari. Nojuajaari Jesu jiuniocotaja toque niquishii tii maanojuhuaj. <sup>7</sup> Jesu naca jiuniocotaja niquiriijaariuhuj tamoco maano, maninia mariquiosano. Majaari na manu quiriquiaa Jesu cuaqueya jiuniocotaja toqueta. <sup>8</sup> Pedro tiuquiniu nuhuaji raaco, janiyari shusha jiyacari tiuquimiaajaaniuhuj. Cua niquishacari Jesu jiuniocotaja toque, janiyari niishiquiini Jesuqui tari samiitiarohua. <sup>9</sup> Canaari juhuanajuaja maja canaa niishiniu quiriquiaa tariucuaaanu Pueyaso Rupaajinia naajiotasano Jesujiniji. Tii sequeyacuajaari Jesuuri samiitianutaniuhua macujiniji. <sup>10</sup> Na nuhuaji, canaari tiajinia quiaarohuani.

*Jesu muetasacari María Magdalenaacua**(Mr 16.9-11)*

<sup>11</sup> Canaa quiojosacariuhua raajiniji, María Magdalenaari tijia jateequiaari. Raa shuriucua nujuqueriquiaari. Na nujuquenuta, raaco cuuquereeri. <sup>12</sup> Raaco na niquishacari, caapiqui Pueyaso seya niquiriiri, cohuajaque toqueyaraca. Nojoriiri macu niasaqui cajituriquiaa, tamonu na nacaacora, tamonu na cashacuucumara. <sup>13</sup> Pueyaso seyari María Magdalena sequeree:

—Maajiniaa, ¿casaara quia nujuqueyani?

Nojuajaari Pueyaso seya riucuaaree:

—Cua jiyaniijia quete niiquiji pasaarucuaa. Majaari cua niishiniu teeriquitijia na niasaarucuaatejaj.

<sup>14</sup> Naa na sequenu nuhuajitij, na nijiniara tacaterohuari. Saaja Jesu niquirii na shuriucua nujuaanoori. Maja cutaraari na niishiniu quiriquiaa nojuaja Jesu.

<sup>15</sup> Jesuuri na nequesotaree:

—Maajiniaa, ¿casaara quia nujuqueyani? ¿Cana quia pajeyani?

Maríari na jyanirii cuno cuhuariquia cojuana pueyano naasucua. Cunora, naa na sequereeri:

—Pueyanonaa, quiaa jaara canaa macu parucuaa, cua sequere tee quia niarucuaanoj. Janiyacua nocua quiaare na panurani.

<sup>16</sup> Jesuuri na sequeree:

—¡Maríanaa!

Jiyacaritij, Maríari nocua tacatequee na niishishacari nojuajaari Jesu. Hebreo rupaa-jinia na sequereeri:

—¡Rabuni!

Cunoori sequeya, “Cua Niishitiojonanaa”. <sup>17</sup> Jesuuri María sequeree:

—Maja cua quianu. Juhuanajuaja maja cua tacanu quiquioo cua Queecua. Quia quiaarohua. Cua tapueyocuaca quia sequesuhua: “Janiya cua Que Pueyasocua tacanutanihuani. Nojuajaari nia Quejuhuaj. Nojuajaari cua Jiyaniijia, nia Jiyaniijiajuhuaj”.

Jesuuri naa na saquiriojosano pueya sequeree na tapueyocuacata, na Que Pueyaso na jiyatesacari nojori Quejuhuaj. <sup>18</sup> Jiyacaritij, María Magdalenaari nimiohua canaacua, Jesu saquiriojosano pueyacua. Nojuajaari canaa pohuatasuhua taa Jesu na niquiriini. Naajuahuaj, Jesu sequesano caminiujiurii canaaraari.

*Jesu muetasacari na saquiriojosano pueyacua*

(Mt 28.16-20; Mr 16.14-18; Lc 24.36-49)

<sup>19</sup> Cuno domingo juucajani, shusha ninishacari, canaa, Jesu saquiriojosano pueyani, canaari jatiqiri quiriqiaa tiaconi. Canaari tia tohuateya mishiquiojoquiaari cumaatiani, canaa pueresacari Jesu motenaa Judiocuaca. Naa tia tiotiu mishiquiojosano quishacaritij, Jesuuri saaja canaacua tiuquimiaa. Canashiyaquiji nujuasee canaa tajiniaari. Naa canaa sequereeri:

—¿Niaate quiyajaa? Juhujaniya nia quiri.

<sup>20</sup> Naa canaa na sequenu nuhuajitij, canaa niqitijioree na juaashiquiaari, na shuucujaji cashana jiyanio. Canaari jiyanohua timiriini canaa niquishacari canaa Jiyaniijia.

<sup>21</sup> Jesuuri socua pacuterohua sequenu:

—¡Juhujaniya nia quiri! Naatej, taa cua Que jiyaroquiaari janiya mijiria na rupaa cua pohuatanuracuaani, janiyari naa nia jiyaramiquiniutianiyajuahuaj.

<sup>22</sup> Naa canaa na sequenu nuhuajitij, canaa caco nooriiri. Sequereeri:

—Pueyaso Sohuanu nia tiuquiniri nioojiajinia. <sup>23</sup> Naa jaara pueyano jiyanoori sesa na miishanojiniji, seetanujuanaa jiyanooshano quiniutianiyari. Saniniuujia, niaa jaara pueyano jiyanoyaquiri sesa na miishanojiniji, Pueyasora, jiyanooshoo quiniutianiyajaarihuaj.

*Tomás niquishacari Jesu, saminio seetanujuanaa*

<sup>24</sup> Majaari Tomás quiniu quiriqiaa canaata, narta saquiriojosano pueyatani, Jesu muetasacari canaacua. <sup>25</sup> Naaratej, canaari Tomás sequequiaari na nuhuajini:

—¡Caapueyanonaa, canaa pa Jiyaniijia niquiriicuaani!

Tomásri saa canaa sequereejaa:

—Majaari cua tiuuniu quiniutianiya nia sequesanoocua, janiya jaara Jesu juaashiquia-jinia niquiyaquiri clavo jiyacani. Janiya jaara cua juaashiquia shiyaquiri clavo jiyamani, janiya jaara cashana jiyama pueraaquiri na shuucujajihuaj, janiyari nia cuarachitiniutianiyani.

<sup>26</sup> Cuno nuhuaji, socua tamonu domingora, canaa, Jesu saquiriojosano pueyani, canaari rerejoquiaarihuani. Tomásri jiyacari canaata quiriqiaa cutara. Tia tiotiuuri maninia mishiquiojosano quiriqiaa. Naajaa, Jesuuri saaja canaacua tiuquiquiaari. Canashiyaquiji canaa tajinia nujuaseeri. Canaa sequereeri:

—¿Niaate quiyajaa? Juhujaniya nia quiri.

<sup>27</sup> Jiyacari Tomás sequereeri:

—Miji, Tomásnaa. Cua juaashiquia quia niquiri. Quia juaashiquia quia shiri clavo jiyama. Cashana jiyama cua shuucujaji quia puerarejuhuaj. ¿Casaara cucujaji quia taacanuyajaani? Cucua quia tiuuri.

<sup>28</sup> Tomásri jiyacari Jesu sequeree:

—¡Cua Jiyaniijanaa! ¡Cua Pueyasonaa!

<sup>29</sup> Jesuuri na sequeree:

—Quia niquishacari janiya, quiaari shusha cucua tiuya. Socua shuquiriaatia quiniutianiya cutaraari noo pojori, canapue te cucua tiuuniutianiya saaja nojori tojishacari janiyajiniini, nojori niqiyaquishacari janiya.

*Casaara Juan naajioquiaari nio naajioneeni*

<sup>30</sup> Jesuuri jiyano hua socua queraatia casaa miiquiaari na cumaacata canaa na saquiriojosano pueya niqiara. Cunoori nio nequesoretuneejinia naajiotasoo. <sup>31</sup> Janiyari secaja saquiriojoree niya cua naajiotasocoriquianoni, nia niishiniuria Jesuuri seetanujuanaa Pueyaso Jiyarosano, Pueyaso Niyanutuhuj. Janiyari nio naajioreeni nocua nia tiuuniuria, Pueyaso muerasura nia jiyatesaanura, pueyaracaanu rishijiaca nia quiniuria.

## 21

*Tiberias caminiajinia Jesu muetasacari na saquiriojosano pueyacua*

<sup>1</sup> Na nuhuaji, Jesuuri canaa na saquiriojosano pueyacua muetaquiaariuhua Tiberias caminiajinia. Naa quiquiaariti na muetasacari canaacua. <sup>2</sup> Nio pojoriiri jiyacari mariyata quiriquiaa: Simón Pedro, Tomás (Caapueyano jyanishano), Natanaeljuhuaj. Nojuajaari Caná tiacajinijinio quiquiaari, Galilea jiyajinijinio. Janiyari cua tarajanuta tii quiriquiaajaaniuhuj. Canaari Zebedeo niqiuohuani. Socua caapiqui Jesu saquiriojosano pueyajinijinioori tii quiriquiaajuhuj. <sup>3</sup> Simón Pedroori jiyacari canaa sequeree:

—Sapitiaajara quejootaseera shiyaru.

Canaari na riucuaareeni:

—Canaa quiata quiaajuhuj.

Naacuajitij, canaari quiojiyareeni. Canaari botejinia tacataseeni. Canaari puetunu cuno niucujanaa shiyaru quejootariquiaa sapitiaajara juucuaani. Canaari shaa juhuaquetumaani. <sup>4</sup> Jiyacaritij, Jesuuri caminia casaqueyaji jaaquiajinia nujuariquiaa. Majaari canaa niishiniu quiquiaari cante nojuajani. <sup>5</sup> Jesuuri canaa jiiquiooree. Canaa nequesotareeri:

—¡Sanajooriniaa! ¿Niaate na quiaree?

Canaari na riucuaareeni:

—¡Maja! ¡Shaaqui sacaj!

<sup>6</sup> Jesuuri canaa sequeree:

—¡Nia shiyaru nia jartare nia miaquetajara bote tamajiria! ¡Niaari cuniqui na quianutaniya cutara!

Canaari naa miiriini taa na sequeree canacuajani. Na nuhuaji, majaari canaa naata canaa shiyaru jaatianu quiriquiaa, queraatia sapitiaaja canaa ritiasacari. <sup>7</sup> Jiyacaritij, janiyadi Pedro sequereeni:

—¡Pa Jiyaniijiaqui!

Naa Pedro tojishacari cua sequesantej, nojuajaari ritia na toque cushirii. Nojuajaari juhuasu quiriquiaa. Na toque na cushiniu nuhuaji, caminiajinia jaataareeri Jesuucua na quianura. Jirituuri quiriquiaa. <sup>8</sup> Canaari na nuhuaji jaatariquiaa shiyaru botejinijini. Jaaquiaari namitia maja tucuaaanu na quiniu quiriquiaa, saaja cien metroruhua. <sup>9</sup> Canaa rosetasacari botejiniji, canaari na mani niquishiini. Sapitiaajaari tii majeeriquiaa, pannio. <sup>10</sup> Jesuuri canaa sequeree:

—Nia sapitiaajajiniiji miji nia riri rarishocoriquiano.

<sup>11</sup> Simón Pedroori ritia botejinia tacamaa. Shiyaru tacanitiaree jaaquiajiniiaari. Queraatia sapitiaajaari quiriquiaa. Ciento cincuenta y tres sapitiaaja, saa puereetunucuaaja. Naa queraatia sapitiaaja quishacaritij, naajaa, majaari shiyaru turejetanu quirii quenaaja. <sup>12</sup> Jesuuri canaa sequeree:

—Pueyanaa, miji. Nia miaquese.

Majaari quenaaja niquiriyatu canaajinijinio nequesotanu quiriquiaa, cantejaaranoni. Canacuajaari niishiriquiaani nojuacuajaari canaa Jiyaniijia Jesu. <sup>13</sup> Jiyacaritij,

Jesuuri pan rishii manijiniji. Canaa na serotareeri. Sapitiaaja rariquia canaa niqutiojoreejaariuhuj.

<sup>14</sup> Jiyacari Jesu muetasacari canaa na saquirojosano pueyacuatej, cunota tari quiquiaari jiuujianaraca na muetasacari canaacua na samiitianu nuhuaji.

*Jesu pocoojosacari Simón Pedrota*

<sup>15</sup> Canaa miaquenuunu nuhuaji, Jesuuri Simón Pedrota pocoojoriquiaa. Na nequesotareeri:

—Juan niyanu Simónnaa, ¿quiaate cua panijia socua nio quiarta saquirojosano pueyajiniji?

Pedroori na riucuaaree:

—Jaa, Jiyaniijianaa, quiaacuajaari niishiya janiyari quia paniyani.

Jesuuri na sequeree:

—Cua borregohua niquiohuaniyojua cojuanara quia quiriqui.

Naa Jesu sequesacari Pedrotej, nojuajaari miriqui na sequeriquiaa maninia na jiitiana nura narta Pueyaso muerasu. <sup>16</sup> Jesuuri Pedro nequesotaruahuaju:

—Juan niyanu Simónnaa, ¿quiaate cua panijia?

Pedroori Jesu riucuaaree:

—Jaa, Jiyaniijianaa. Quiaacuajaari niishiya janiyari quia paniyani.

Jesuuri na sequeree:

—Cua borregohua cojuanara quia quiriqui.

<sup>17</sup> Jesuuri socua camiriohua Pedro nequesotanu:

—Juan niyanu Simónnaa, ¿quiaate cua paniya?

Pedroori socua taraajequee pueyaracaanu Jesu nequesoreesacari nojuaja. Seetanujuanaa Jesu riucuaareeri:

—¡Jiyaniijianaa, quiaacuajaari puetunujuanaa niishijia! ¡Quiaari niishiya janiyari quia paniyani!

Jesuuri na sequeree:

—Cua borregohuaniyojua cojuanara quia quiriqui. <sup>18</sup> Seetanujuanaa quia sequeyanijia, mashaja quia quishacari, tama quiajanijia quia toque cushijia, quia quianura quia panishaqui. Saniniuujia, quiaa jaara saaquiano quiri, quiaari nareja quia numatucua shiitionutaniya tamasaca cushitiniuria quia toque. Na nuhuaji, quiaari canujutesaanutaniya quia paniaquishaquiria.

<sup>19</sup> Naa Jesu pohuatasacari miriqui Pedrotej, nojuajaari Pedro numooteriquiaa taa nojuaja mosaanutaniyani. Pedro jaara naa mosaare, nojuajaari Pueyaso timitiniutaniya na mosaanuucua. Na nuhuaji, Jesuuri na sequeree:

—¡Pueyaracaanu cua tojijia quia quiri! Pa quiaarej.

*Juanjiniji pohuatasano*

<sup>20</sup> Pedro tacatesacari na nijiniara, Jesu panishano pueyano niquirii na nuhuaji sacuaanoori. Nojuacuajaari janiya. Janiyari noo pueyanocujani, canaa miaquenuusacari Pascuara, Jesu shuriucua cua cajishacari na nequesotaquiaaritij: “¿Cantejaara cunoni, quia quiatenutaniyani?” <sup>21</sup> Quiarijiani, Pedro niquishacari janiya saniniuujia, Jesu nequesotareeri:

—Jiyaniijianaa, janiya jaara naa mosaanutaniyacuaani, ¿nojuajaarijijataj, taa na miishaanutaniyarini?

<sup>22</sup> Jesuuri Pedro riucuaaree:

—Janiya jaara paniri nojuaja rishiniuria pueyaracaanuni, janiya jaara jiyocuacaanuji tiuquiriohuajaatijia, quiara, naajaa. Quiajaniya cutara, pueyaracaanu cua tojijia quia quiri.

<sup>23</sup> Naa Jesu sequenuucua Pedrotej, puetunu cuarta Jesu pueyajanaari jyaniriquiaa janiya naasucua shaajeyaquiriquianoni. Jesuuri seetanujuanaa maja naa na sequenu quiquiaari janiyajiniji. Nojuajaari saaja naa sequequiaari Pedro: “Janiya jaara paniri pueyaracaanu na rishiniuriani janiya jaara jiyocuacaanuji tacatemohuajaatijia, quiajaniyara naajaa”.

<sup>24</sup> Janiyacuajaari nojuajani, Jesucristo panishano pueyanoni. Nio cua naajiojiniani, janiyari nojuajiniji cua niquishano pohuataani. Cua pohuatasanoori seetanujuanaa.

<sup>25</sup> Jesuuri jiyanoohua queraatia socua casaa miiquiaari na cumaacata mijiria. Puetunu na miishanojuanaa jaara naajiotasaare, naa naasucua nio jiyajinia maara quiquio quiyaquiri puetunu cuno nequesoreetuneecaacuajijianaa.



## JESUCRISTO JIYARAMIQUISHANO PUEYA MIISHANO

*“Pueyaso Sohuanu niaacua jiyarosaanutaniya”*

<sup>1</sup> Quiocuara naajionu pacuterohuanijia, cua panishano Teófilonaa. Coteenu cua naajiosanojinia, janiyari quia pohuataquiaarini taa Jesu na poonijosano coteequiaari mijiriani. Puetunu na miishanojuanaa naajiotaquiaarinijia, mariyata na niishitiojosano na coteenujiniji, jaara tacanishaaquiaariuhua jiyocuacaanu na Queta na quiniuhuara.

<sup>2</sup> Mijiria na quishacarijia, Jesuuri na jiyaramiquishocoriquiano pueya rootaquiaari Pueyaso Sohuanu cumaacata, taa nojori miiniutianiya na nuhuajini. <sup>3</sup> Jesu cusonu nuhuaji, nojuajaari muetaquiaariuhua na saquirojosano pueyacua. Nojoriicua mueranacujuquiaariiri. Cuarenta juuca nuhuaji tacaquiaariuhua puetunujuanaari. Na miishanota nojoriicua na mueranacujusacari, nojori niishitiriiri nojuaja seetanujuanaa saminio quiya. Nojoritia pocoojosacari tamonu juuca, Jesuuri nojori numootequiaari maja ritia nojori quianuhuara Jerusalén tiacajiniji. Nojori sequequiaariiri:

<sup>4</sup> Nojoritia na pocoojosacari tamonu juuca, Jesuuri nojori numootequiaari maja ritia nojori quianuhuara Jerusalén tiacajiniji. Nojori sequequiaariiri:

—Nia sashirijiaara cua Que cuaara niqutioorajaara na Sohuanu nijaniya. Nojuajaari cua sequequiaari na niqutionutaniya nijaniyana, taa cua caminiujuquiaari tari niaaracuajani. <sup>5</sup> Naa sequequiaari nijaniyacujajani: “Tiuquinijiona Juanri nia tiuquinijioquiaari moojinia, Pueyaso tojijiara nia jatasacari. Pueyasoori saniniuujia na Sohuanu nioojiajinia tiuquinijionutaniya, seetanujuanaa Pueyaso tojijiara nia quiniuria”. Quera niaacua tiuquiniutaniyacujajani. Naaratej, nia sashiri.

*Jesu tacasacariuhua jiyocuacaanu*

<sup>6</sup> Tamonu juuca, Jesu pueyari Jesuucua rerejoquiaari. Na nequesotatureeri:

—Jiyaniijianaa, ¿quiaate Jiyaniijiaara jiyatesaanutaniya quiarijia Israel pueyara, maninia pa quiniuhuara tama pa jiyaniijiatajaaja, taa pa supuetanaa quiquiaaricuaani?

<sup>7</sup> Jesuuri nojori riucuaaree:

—Nio cutaraari maja nia niishishocoriquiano, taacari Israel pueya jiyaniijiaara cua jiyatesaanutaniyani. Pa Que Pueyasoori cuno niishishano racataa tama nerajaaja. Saa nojuajaari na niishiya cutara. <sup>8</sup> Naajaa, niaari Pueyaso cumaaca masenutaniyacujaja, Pueyaso Sohuanu jaara nioojiajinia tiuquiri. Niaari janiyajiniji pohuatanutaniya pueya niquiara Jerusalén tiacajinia, puetunu Judea jiyajiniajanaano, Samaria jiyajiniajuhuaj. Naa pohuataaanutaniyajaariuhua puetunu jiyacajiniajanaa, socua tucuacaanu jiya puequeetujinianio.

<sup>9</sup> Jesu puecasacari pocuanu, nojuajaari tacanishaaquiaari na pueya shootiasacarijia nojuaja. Cohuajajinia shaajemaari pueya niquiyaquiniuucujaja nojuaja. <sup>10</sup> Nojori mautasacari jiya cajiniocua Jesu tacasacari, canashiyaquiji, caapiqui pueyari nojori shuriucua nujuatuquiaari. Nojori toqueeri jiyanojua cohuajaque quiriqiaa. Nojoriiri jiyocuacaanujinio Pueyaso seya quiquiaari. <sup>11</sup> Nojoriiri Jesu pueya sequere:

—Galilea jiyajinijinio pueyanaa, ¿casaara nia mautaa jiyocuacaanuni? Taa nia niquirii tacaanocujajani, niaari naa na niquiniutianiya tacatehuanohujahuaj.

<sup>12</sup> Nojoriiri jiyacari Olivo nacuhua tuhuananuucua quiriqiaa. Pueyaso seya nuhuaji, Jesu pueyari Jerusalén tiacajiniohua tacatequiaari. Cuniqiji, cateca naataja quiquiaari Jerusalén tiaca. Moisés Naajiotasanojiniji, Judiocuacaari naa rootasaaquiaari maja socua tucuacaanu nojori rucuanenura samaatenu juuca. <sup>13</sup> Nojori tiuquijiosacari Jerusalén tiacajinia, nojoriiri nojori quijia tijinia tiuquitiaquiaariuhua. Nojoriiri nataco tacataquiaari na sohuacajinia, tee nojori sashiquiaari Pueyaso Sohuanucujajani. Nojoriiri quiquiaari Pedro, Juan, Santiago, Andrés, Felipe, Tomás, Bartolomé, Mateo, tamonu Santiagonio cante Alfeo niyanu quiquiaaricujajani. Quiquiaarijiaariuhua Simón, cante tari quiquiaari Romano pueya jatanu panijiacujajani. Mariyata quiriqiaari Judas,

Santiago tarajanu. <sup>14</sup> Nojoriiri jiyacari pueyaracaanu Pueyaso secojonuuriquiaa tii maajipohuata, mariyata Jesu nucua Maríata, Jesu tapueyocuataniao.

*Pueya saquiriojosacari Matías Judas niti*

<sup>15</sup> Nojori sashishacari Pueyaso Sohuanu tii, tamonu juuca, Pedroori nujuaquiaari pueya niquiara na sequenura nojori. Naa naasucuatuhuaaj ciento veinte pueyari tii quiriquiaa puetunujuanaa. Naa nojori sequereeri:

<sup>16</sup> —Cua tapueyocuaanaa, Pueyaso Sohuanu sequesanoori maja na naata naajaa tajiniu. Seetanujuanaa tari tohuateerucuaari Judasjiniji na pohuatanishano pa supuetanaa jiyaniijia David. Naacuajitij, Judasri Jesu monaarano niishitiquianu tee Jesu quiriquiaani, nojori na quiatenura. Judasri cunora niqitiosaacanu cumaneeca, naa nojori na niishitiniucua Jesu quiasaanura. <sup>17</sup> Nojuacuajaari parta Jesu saquiriojosano pueyano quiquiaarijuhuaj. Nojuajaari mariyata Jesu jiyaramiquishano quiriquiaa juhua pajaniyajuhuaaj. <sup>18</sup> Tamonu cuhuariquiaari masesaacanu sesa na miishano samitia. Na nuhuaji, tama cusoyareejaarijia. Jiyocuaaanuji tiquianu na nacaraari. Na saracaari cocuaretasee. <sup>19</sup> Jerusalén tiacajinia quiniaa jaara na niishiquianu, nojoriiri cuno cuhuariquia sesojoree “Acéldama”. Acéldamaari pueyano rupaaajinia sequeya “Nanaca samitia masesano cuhuariquia”. <sup>20</sup> Judasjinijiiri naa naajiotasaaquiaarijuhua tariucuaaanu supuetana David jaaquequejojuajinia. Naa sequeyari:

“Na quiquio cuaara quiiria shaaco. Cuaara quiiria sanaaca, camaruuju”.

Sequeyajaarijuhuaj:

“Tamonu pueyano cuaara jiyatesaaria na poonijosano miiriquiano na niti”.

<sup>21</sup> ‘Cuarta Jesu saquiriojosano pueyanaa, niya quiyacuaja pueya, canapuetucuaja pa tarajaquiaarini pueyaracaanu pa Jiyaniijia Jesu quishacari pata. <sup>22</sup> Nojoriiri Juan niquiquiaarijuhuaj Jesu tiuquiniyano moojinia, Jesu tacasacariuhua jiyocuaaanunio. Canapuetucuaja puetunu nio niquiquiaarijianaani, niquiriyatu nojoriijinijinio cuaara jiyatesaaria Jesu jiyaramiquishanora, pata na quiniuria, Jesu samiitianujiniji na pohuatanurajuhuaaj.

<sup>23</sup> Naaratej, pueyari caapiqui pueya saquiriojoquiaari. Cuniqui quiriquiaari José. Nojuajaari socua caapiqui sesaraca quiquiaari: Barsabás, mariyata Justo. Tamonu pueyanoori quiriquiaajuhuaaj, Matías. <sup>24</sup> Na nuhuaji, pueyari naa secojoquiaari Pueyaso:

—Jiyaniijianaa, quiaari puetunu pueya jiuujia niishijajanaa. Canaa quia niishitiri teyano pueyano tari quia saquiriojoreeni, quia jiyaramiquishocoriquiano na quiniuria, Judas niti poonijioriquiano. <sup>25</sup> Judasri quia niqitiosano poonijosanojiniji catecanu sesa na miiniucua, naquiya miishaqui na quianura, sesa miijia na quiniucua.

<sup>26</sup> Na nuhuaji, pueyari naajiosano saajia jaquerooree nojori niishiniuria teyanote Pueyaso panishano pueyanoni. Saajiaari Matíascuara tacatasee. Naacuajitij, Matíasri Jesu saquiriojosano pueyanora quiquiaarijuhuaj. Naacuajitij Jesu saquiriojosano pueyari juhua juhuanoraja quiquiaariuhuaa doce.

## 2

*Pueyaso Sohuanu tiuquishacari*

<sup>1</sup> Pentecostés juuca jaara quiquiaari, puetunu Jesuucua tiunaaajanaari rerejono quiquiaari tamonu tiajinia Jerusalén tiacajinia. <sup>2</sup> ¡Canashiyaquiji, paratuuri tojishaquiaari jiyocuaaanuji, juhua paratu pocuaano jiyanojua cojuata! Jiyanojua tojishaareeri cuno tiajinia tee Jesu pueya cajitiuriquiaacuajani. <sup>3</sup> Jiyacari, juhua maniiri niquishaaree pueya caco rimianuqueyano. Puetunu nojori cacojuanaa rimi-anacuriquiaari juhua mani. <sup>4</sup> Jiyacaritij, Pueyaso Sohuanuuri puetunu tiajinia quiniaa jiuujiajiniajanaa tiuquirii. Pueyari juhuacatecara tamaatia rupaaca pocuaree. Pueyaso Sohuanuuri naa nojori pocooteree puetunujuanaa tamaatia rupaaca.

<sup>5</sup> Cuno quishacari, queraatia Judiocuaca puetunu jiyacajinijiniojuanaari camueenujuriquiaa Jerusalén tiacajinia. Nojoriiri jiyacari Jerusalén tiacajinia queranacunuuriquiaa Pentecostés juuca. Nojoriiri Pueyaso tojitiajaca quiquiaari.

<sup>6</sup> Nojori tojishacari cuno cojuatunenu, nojoriiri cuqueree tee Jesu pueya pocooriquiaa tamaatia rupaacacuajani. Nojori tojishacari naatej, nojoriiri jiyanoehua cushitiirii. Naatej, puetunu rucoonaajanaari tama na jiyajiniinio rupaacajaaja tojitiariquiaa, cuno pojori pocoosacari. Nojoriiri maja na niishiniu quiquiaari casaara naa nojori miiriini.

<sup>7</sup> Nojoriiri jiyanoehua jiuujiatecoree. Tama sequetooreejaarijia:

—¡Juhuej! ¿Cuno pojoriti maja Galilea jiyajiniinio pueyacuaja naa pocoyaniquitij?

<sup>8</sup> ¿Taa nojori pocuaa puetunu coteenu pa rupaacajanaani? Pajaniyacuaajaari queraatia tamaatia jiyacajiniinioni, puetunu tamaatia rupaaca pocuajacajanaa.

<sup>9</sup> Seetanujuanaari. Cuno pojoriiri Partiya jiyajiniinio nijiono quiquiaari, Media jiyajiniinio, Elam jiyajiniinio, Mesopotamia jiyajiniinio, Judea jiyajiniinio, Capadocia jiyajiniinio, Ponto jiyajiniinio, Asia jiyajiniinionio. <sup>10</sup> Quiquiaarijiaariuhuj Frigia jiyajiniinio, Panfilia jiyajiniinio, Egipto jiyajiniinio, África jiyajiniinionio. Cuno Africa jiyajiniinio pueyari quera Cirene tiaca shuriucuaaji quiquiaari. Roma tiacajiniinio pueyari tii quiquiaarijuhuaj, canapuate Jerusalén tiacajinia pacunaa quiquiaaricuaajani. Puetunu cuno pojorijianaari Judiocuaca quiquiaari. Noojiaqueyari rasaaquiaari Judiocuacajanaa. Tamasacaari na cararaatiuuquia co miatejosaaquiaari Judiocuacara na quiniuria, Pueyaso tojijiacara nojori quiniu panishacari. <sup>11</sup> Creta jiyajiniinio pueyari tii quiriquiaajuhuj, Arabia jiyajiniinionio. Puetunu cuno jiyacajiniijanaari tamaatia rupaaca pocuajaca quiquiaari. Nojoriiri socua naa sequetooquiaari:

—¿Taateni? ¡Puetunu pajaniyajanaari cuno Galilea pueya tojitiaani Pueyaso cutara miishano pahuataano, tama pa coteenu rupaajiniijaaja!

<sup>12</sup> Puetunu nojorijianaari jiuujiateriquiaa nojori jiyajenenuta. Tama nojorijiaarijia nequesoreetooquiaari nojori tacaaniutia:

—¿Casaa na miitiuyajaanonjoni?

<sup>13</sup> Tamasaca nojorijiniiniori saaja Jesu pueya macaatirii. Tama nojorijiaarijia tama sequetooreejaacujua:

—Cuno pojoriqui mashaasequenuya shocuanacuhuata.

#### *Pedro pohuatasano pueya niquiara*

<sup>14</sup> Jiyacaritij, Pedroori juhuacatecara pocuaree cuno pojori niquiara. Pedroori nujuaturiquiaa narta once pueyata. Na rupaa paaretaree Judiocuaca tojiniuriaari. Naa sequereeri:

—Cuarta Judiocuacanaa, maninia nia tojitiare casaa cua sequenutaniya nijaniyani. Puetunu Jerusalén tiacajinia quiniaajanaa cuaara niishiiria cua pohuatasano. <sup>15</sup> Niaari canaa jiyaniya mashaasequenuyano. Pananucuaajaari shusha taqueejia. Maja canaa mashaasequenuunu. <sup>16</sup> Niaari canaa tojitiaa tamaatia rupaaca pocuaano. Niocuajaari tariucuacaanu Pueyaso sequesano caminiujiunia Joel pohuatasano. Cuno niaa na niquiyani, cunocuaajaari na sequesano, shusha tohuateyani. Nojuajaari na sequequiaar-itij:

<sup>17</sup> “Pueyasoori naa sequeyaquij: ‘Quera jiya puequesacari, janiyari cua Sohuanu niq-uitionutaniya puetunu pueyarajanaani. Naacuajitij, mashiquioriiri janiyajiniji pohuatanutaniya, niyacoojorinio. Cua Sohuanuuri cua niishishano niqitiniutianiya mashiquiori juhua na maquenujinia. Cua niishishano nishitiojonutaniya saaquiapue na maquenujiniaariuhuj. <sup>18</sup> Cuno quishacari, janiyacua cua Sohuanu niqitioire puetunu cua tojtianaajanaani, canuu, maajipohuanio. Nojoriiri janiyajiniji pohuatanutaniya pueya niquiara. <sup>19</sup> Puereeta cua miishanoori jiya cajiniocua niquishaanutaniya. Cua miishanoori jiyacua niquishaanutaniya-juhuaj, pueya na numootenura. Nanacaari niquishaanutaniya, mani, jiyanoehua najacanio. <sup>20</sup> Pananuuri ninishiquiria quiniutianiya. Racaari juhua nanacara quiniutianiyajuhuj. Naa coteenutaniyari jiya puequenura. Na nuhuaji, Jiyani-ijiaajanaari rosenutaniya mijiria quiniaa na nequesoreenura, saminiucua pueya, macunucuanio. Na rosesacari, cutara juuca quiniutianiyari, puereetajuhuj. Jiyanoehua shanohua quiniutianiyari na rosesacari. <sup>21</sup> Puetunu Jiyaniijia secon-sonaa pueyajanaari jiyanooshaanutaniya Pueyaso pueya nojori quiniuria’”.

'Supuetana Joelri naa naajiotaquiaari Pueyaso sequesano tarijiatej. <sup>22</sup> Naaratej, socua cua tojitiare cuarta Israel pueyanaa. Jesujiniji nia pohuatanutaniyanijia, Nazaret tiacajinijinio pueyano. Pueyasocuaajaari pa niishitiquiaari, Jesuuri na jiyarosano pueyano quiquiaari. Naacuajitij, Pueyasoori na poonitijioquiaari pa niquiara jiyanoehua jiyajeneta casaa na miiniuria. Paacuajaari nocuaji jiuujiatequiaarini pa niquishacari Jesu miishano Pueyaso cumaacata. Na miishanoori maninia quiquiaari pa niishiniuria Jesuuri seetanujuanaa Pueyaso Jiyarosano quiquiaari. Niajanijacuaajaari maninia niishiya puetunu maninia na miishanojuanaa. <sup>23</sup> Saniniuujia, Jesu jaara niquitiosaarucuaa nijaniya, niaari na quiarucuaa juhua sesa miijia. Na nuhuaji, niaari Pueyaso tojjijashijiaa pueya na moterucuaa maca niyacutesanojinia, taa Pueyaso paniquiaari tarijiacuajani. Pueyasocuaajaari niishiquiaari naa mosaanutaniyari Jesu. <sup>24</sup> Pueyaso cutaraari na samiitaniriohuacuaa macujiniji. Na carterohua macujinijiiri. Majaari quenaaja tamonu cumaacaraca quijia quiniu quiquianu Jesu na jiyojetenura macu quiquiojinia pueyaracaanura. <sup>25</sup> Pueyaso Sohuanu jaara pohuatequiaari pa supuetanaa jiyaniijia David, nojuajaari juhuacarijia naa pohuataquiaari Jesu sequesocoriquianotej:

“Cua shuriucua niquiquiaa Jiyaniijianijia. Nojuajaari cua shuriucua quia, cua mi-aquetajara, maja quenaaja casaa teteyatenura janiya. <sup>26</sup> Naaratej, coojaari timirii. Cua niti taquiriocuateree cua shuquiriniutianijia. <sup>27</sup> Naajuhuj, cua cusosacari, cua queteeri juhuajaniya quiniutianiya, cua niishishacari quiaari cua tarinitiaaquiniutianiya macunucua quiquiojinia. Quiaari cua shu moquijiaaquiniutianiya saa maninia miijijaja cua quishacari quia niquiara. <sup>28</sup> Quiaari cua niishitiojoree maninia cua miiniuria, pueyaracaanu quijiaara cua quiniuria. Quiaari jiyanoehua cua shuquiriniutianiya quiata cua quishacari pueyaracaanu”.

<sup>29</sup> 'Cua pueyanaa, paacuajaari niishiyani, pa supuetanaa jiyaniijia Davidri jamosaquiaari na cusosacari. Na jamaari niya quiyajaa Jerusalén tiacajinia. <sup>30</sup> Nojuajaari niishiquiaari Pueyasoori tari na sequequiaaricuaaja:

“Davidnaa, tamonu pueyanoori supuenutaniya quiajanijajiniji, jiyanoehua quia nuhuaji. Cuno pueyanoori Jiyaniijiaara cua jiyatesano quiniutianiya quia niti. Nojuajaari cua jiyarosocoriquiano Cristo. Seetanujuanaa naa quiniutianiyari Davidnaa. Maja cua sapojonu”.

'Pueyanaa, paacuajaari niishiyani Davidri Pueyaso sequesano caminiujunina quiquiaari. <sup>31</sup> Naacuajitij, Davidri Cristojiniji pohuatariquiaa jiyanoehua tariucuaaanujiniji, juhua tari na niquishano. Pueyaso Sohuanuuri na niishitiquiaari taa Cristo miishaanutaniyani. Naacuajitij, Davidri Cristo samiitanujiniji pohuatariquiaa naa na sequesacari: “Pueyasoori na tarinitiaaquiniutianiya macunucua quiquiojinia”, mariyata naa na sequesacari: “Na quete moquijiaaquiniutianiyari”. <sup>32</sup> Pueyasoori nio Jesu samiitaniriohuacuaa. Na samiitanu nuhuaji, puetunu canaajanaari na niquiquianuni. Janiyari nia pohuataa seetanu canaa niquishanojuanaani. <sup>33</sup> Cutara na cumaacata, Pueyasoori na tacanirioehua na miaquetajara cajiriquiano, Jiyaniijiajanaa na quiniuria. Na nuhuaji, Jesuuri Pueyaso Sohuanu maseree na Quejiniji, taa Pueyaso sequequiaari tarijiacuajani. Jesuuri saniniuujia quiarijia canaa na niquitioree. Naaratej, niaari canaa niquirii tamaatia rupaaca pocuaano. <sup>34</sup> Majaari David tacanu quiquiaari jiyocuaaanu cutara. Nojuacuajaari Jesujiniji sequequiaari:

“Jiyaniijia Pueyasoori cua Jiyaniijia sequequiaari: <sup>35</sup> ‘Cua miaquetajara quia cajishiijiaara, janiya cuara quia paraa shocotarejaatijia’ ”.

<sup>36</sup> Cunora, puetunu nijaniyajanaa Israel pueyanaa, niaa cumaati niishiya, Pueyasocuaajaari nio Jesu jiyatecanu Jiyaniijiajanaa na quiniuria. Niaacuajaari niyacutesanojinia na mocanucuaaja. Nojuajaari Cristo, Pueyaso jiyatesano Jiyaniijiaara. Majaari canaa pohuatasanojiniji nia taacanunu pueyanaa.

<sup>37</sup> Pueya tojjishacari naa Pedro pohuatasanojetej, nojoriiri tetecatuquiaari. Pueyari saniniuujia Pedro nequesotaquiaari, na cojiniaanio:

—Canaa pueyanaa, ¿taa canaa miiniutianiyarinijia?

<sup>38</sup> Pedroori nojori rucuaquiaari:

—Nioojia nia tacatore sesa nia miiniujiniji. Niajaniya cuaara moojinia tiuquinijiosaaria Jesucristoocua nia tiuushacari, nia jiyanooshaanura sesa nia miishanojiniji. Naa nia miishacaritij, Pueyasocua nia niqutiore na Sohuanu. <sup>39</sup> Pueyaso sequesacari nojuaja na Sohuanu niqutionutaniya pueya, cunoori niaaranocuaaja, nia niquiouharanonio, tucuaaanu quijiacarajuhuj. Pueyaso Sohuanucuaajaari puetunu pueyajanaa niqutiosaanutaniya, cana pa Jiyaniijia Pueyaso sequeya na muerasura na quiniuriacuajani.

<sup>40</sup> Pedroori jiyacari pueya pohuatatee queraatia socua Jesujiniji na niishishano. Jiyanohua nojori nacasureeri. Naa nojori sequereeri:

—Nioojia nia tacatorohua Pueyasocua, maja Jesu ruuretajaca nia cojiritiasaanura quejoonu mani quiqiojinia.

<sup>41</sup> Pedro pohuatasanoocua tiuuniaari tiuquinijiosaaquiaari. Cuno juuca, tres mil pueya naasucuaari coteenu Jesu tojtianaa rupuenara quiquiaari. Pueyaso pueyari naa canequiaaritij. <sup>42</sup> Puetunu nojorijianaari maninia tojtiaquiaari pueyaracaanu Jesu jiyaramiquishano pueya niishitiosano. Nojoriiri jatiqiu quiqia maninia. Majaari nojori juayonuujutani quiqia. Nojoriiri pueyaracaanu rerejojua neecaru serofanura Jesu cusonu niishiniuria. Mariyata Pueyaso secojonuujua pueyaracaanuuri.

#### *Panitiojuaca Jesu tojtianaa quishacari juhua tapueyocucata*

<sup>43</sup> Jesu jiyaramiquishano pueyari jiyajeneta miishano miijioriquiaa Pueyaso cumaacata. Naacuajitij, puetunu pueyajanaari puereturiquiaa. Pueyari shiriqutiurii.

<sup>44</sup> Puetunu Jesuucua tiuuniaajanaari maninia rupuetooquiaari juhua tapueyocucata. Nojoriiri maja jamuejaca quiquiaari. Casamiriaca pueyari na casami niqutiojoquiaari nareja casamijiuniucua pueya. <sup>45</sup> Tamasacaari na jiitiasano casami niqutiojoquiaari na cumaneeca na masenura na casami sami. Na cumaneeca na masenu nuhuaji, nojoriiri

tamasaca niqutiojoquiaarijuhuaj, casamijiuniucua jiitianura puetunu nojori panishanojuanaajuhuj. Tamasaca pueyari na cuhuariquia niqutiojoquiaari nojori jiitianura na cumaneeca, tamasa na naacunurajuhuj. <sup>46</sup> Nojoriiri jatiqiu rupuetooquiaari. Nojoriiri rerejojua puetunu juucajanaa Pueyaso Secojoua tiajinia. Mariyata tama nojori tiajiniaaja nojoriiri rerejojua, neecaru neecasenura Jiyaniijia Jesu cusonu nojori niishiniuria, mariyata jatiqiu nojori miaquenuunura nojori shuquiriniutia. Nojoriiri maninia

jiuujaraca quiquiaari. Nojoriiri maja tamonu pueya shocotanu panijica quiquiaari. <sup>47</sup> Nojoriiri pueyaracaanu Pueyaso maniniuhuaqueetariquiaa nojori shuquiriniutia. Puetunu Jesuucua tiuyashijica pueyajanaari nojori paniquiaari. Puetunu juucajanaa, Jiyaniijia Jesuuri nojori canijiariquiaa, socua pueya tiuushacari nocua.

### 3

#### *Sesarunocua pueyano jeeacasacari*

<sup>1</sup> Tamonu juuca, Pedroori Juanta tacatariquiaa Pueyaso Secojoua tiajinia. Tari quiquiaariiri pananu piriuushacari. Nojoriiri jiyacari quiojonu jiitiquiaari Pueyaso secojonura Secojoua tiajinia. <sup>2</sup> Jiyacaritij, tamonu sesarunocua pueyanoori tii cajitiariquiaa Secojoua tia tohuateyaji. Nojuajaari naa rasanouhuanaja quiquiaari. Pueyaracaanu patoojotasaquiaariiri Pueyaso Secojouajiniara, pueya na mashiniquiniuria cumaneeca nojori tiuquitasacari. Na cajitiasaqui tohuateya sesa quiquiaari “Tohuateya Maniniu”. <sup>3</sup> Sesarunocua pueyano jaara niqiquiaari Pedro, Juannio, nojori tiuquitianu panishacari Secojoua tiajinia, nojori maseree juucua na cumaneecaari. <sup>4</sup> Pedroori Juanta na shootiaree tacuriitia. Jiyacaritij, Pedroori na sequeree:

—Canaa quia niqiri.

<sup>5</sup> Sesarunocuaari juucua shootiariquiaa nojori. Cumaneeca niqutiosariquiano jiyaniriquiaa juucuaari. <sup>6</sup> Pedroori na sequequiaari:

—Shaaqui cua cumaneeca. Shaaqui tojetaarucujanaa. Naajaa, cua jiitiasanota quia naacureera quiarijia. Quia sequeya Jesucristo sesajinianijia: “Quia sanere. Quia rucuanerejuhuj”.

<sup>7</sup> Pedroori na juaashiquiajiniji na quiaquiaari. Na nujuatereeri. Na niohuacaari jiyacari ritia jeequequiaari na sanesacari. Na sairi maniniujiaacara quiqiijuhuj.

<sup>8</sup> Sesarunocuaari juhuacatecara rucuanequiaari. Nojoritia tiuquiquiaari Pueyaso Secojoua tiajiniaari. Maninia rucuaneriquiaari. Jaacuatariquiaari. Pueyaso maniniuhuaque-etariquiaajaariuhuj. <sup>9</sup> Puetunu pueyajanaari na niquiquiaari rucuaneyano, Pueyaso maniniuhuaqueetaanojuhuaj. <sup>10</sup> Puetunu pueyajanaari na niishiquiaari nojuajaari sesarunocuacuaaja, Secojoua tiajinia tohuateya Maniniujinia cumaneeca mashiniquijio-juatej. Pueyari cunora jiuujiatequiaari. Jiyanohua shiriiquitiuquiaariiri.

*Pedro pahuatasacari Pueyaso rupaa pueya niquiara*

<sup>11</sup> Sesarunocuaari Pedro juaashiquia carteyaquiquiaari, Juan juaashiquiano. Nojoriiri Pueyaso Secojouajinia nujuaturiquiaa tamocora. Nojori nujuatusaquiiri pueya jiyaniquishano tariucuacaanu jiyaniijia Salomón canujuucojojua quiquiaari. Puetunu pueyajanaari nocua netecuatuquiaari na shiriiquiniutia. <sup>12</sup> Pedro niquishacari nojori, pueya sequequiaariiri:

—Cuarta Israel pueyanaa, ¿casaara nia jiuujiateya nocuajini? ¿Casaara nia niquitiaa canaani? ¿Niaate jiyaniya canaa na niohuaca jee careeni? Maja canaa. Majaari canaa cumaacata na jeequenu quirii. Niaa naasucuaari jiyaniya canaari nio miiriini socua maninia miijia canaa quiniuucua Pueyaso niquiara tamasa pueyajiniji. ¡Maja! <sup>13</sup> ¡Jesucuaajaari na jee carohua! Nojuacuajaari na Que Pueyaso jiyatesano Jiyaniijiajanaa na quiniuria. Jiyaniijiajanaara na jiyatenacuajaari Pueyaso, cante nio pojori pa supuetanaa jiyaniijia quiquiaaricuajani: Abraham Jiyaniijia, Isaac Jiyaniijiano, Jacobo Jiyaniijiajuhuaj. Tama pa supuetanaa Jiyaniijia Pueyasocuajaari Neyanu Jesu jiyatequiaari Jiyaniijiajanaa na quiniuria. Niaa cutaraari Pueyaso Niyanu niquitiocanu jiyaniijia Pilato, nojuaja na motenura. Pilato cartenu panishacari Jesu, majaari nia paniniu quiquianu na cartesaanura. <sup>14</sup> Niaa maara maninia pueyanoocuaaji tacucanu saniya cutara, niaari pueyano puecoojuacua shiriiquitiurii saaja Pilato cartenura jiyano sesoriquia pueyano seque. <sup>15</sup> Niaari naa motecanu pueyano samiitianiijiacuajatej. Naajaa, Pueyasoori na samiitianiquianuhua macujiniji. Canaari na niquiquianuni. Naacuajitij, canaari nojuajiniji nia pahuataani. <sup>16</sup> Nio sesarunocua pueyanoori Jesuucua tiurii. Naacuajiti jeequerohuari. Nojuacuajaari sesarunocua quiquiaari taa nia niquiquiaaricuajanoj. Jesuucua na tiushacari, na cuaqueya cumaquiriiri. Na cuaqueyari seetanujuanaa jeequerohua maninia, taa nia niquiyacuajanoj. <sup>17</sup> Cuarta Israel pueyanaa, quarijia niishianijia, majaari nia niishiniu quiquianu casaa nia mi-iquianuni. Majaari pa camarucua niishiniu quiquianujuhuaj. Niaari Pueyaso Jiyarosano mocanu nia niishiaquishacari cante nojuaja quiquianuni. <sup>18</sup> Naacuajitij, Pueyasoori na sequesano tohuatecanu, tarijia na niishitishano na rupaa caminiujiuniaa. Seetanujuanaa, puetunu Pueyaso sequesano caminiujiuniaajanaari pa supuetanaa niquiara poojotaquiaari: “Pueyaso Jiyarosanoorori naquiya miishaanutaniya”. Jesuuri naa miishaacanu taritij. <sup>19</sup> Naaratej, nioojia nia tacatore sesa nia miishanojiniji. Pueyasocua nia tacaterohua sesa nia miiniu tuujasaanura. <sup>20</sup> Naacuajitij, pa Jiyaniijia Pueyasoori na naata juhua maniniushiquiariria jiyatenuhua pajaniyara, shuquiriaatia pa quiniuhuara mijiria na jiyarosacariuhua Jesu. Pueyasoori tarijia na sequequiaari pa Jiyaniijia nia quiniuria. <sup>21</sup> Nojuajaari jiyocuacaanu quiniutianiya na Que shuriucua, Pueyaso cuara tucutarejaatijia puetunu tariucuacaanu na pahuatanishanojuanaa na sequenu panishano caminiujiuniaa. <sup>22</sup> Moisés cuajaari naa sequequiaari pa supuetanaatej:

“Jiyaniijia Pueyasocuajaari niaacua jiyaronutaniya nojuajiniji pahuatana tama nia niquiohuacuajinio supuenojuaja, taa na jiyaroquiaari janiyacuaani. Nojuaja jaara supuere, niocua puetunu na sequesanojuanaa tojiri. <sup>23</sup> Canapueete cuno pueyano pahuatasano ruuretanutaniyani, nojoriiri Pueyaso saquiriojosano pueya tajiniji shaajasaanutaniya puetunurajanaa”.

<sup>24</sup> Pueyanaa, puetunu Pueyaso sequesano caminiujiuniaajanaari Moisés nuhuaji naa Jesujiniji pahuatanuuquiaarijuhuaj. Naacuajitij, Samuelri Jesucristojiniji pahu-ataquiaari taa na niniutianiyani. Naajuhuj, Samuel nuhuaji, puetunu Pueyaso sequesano caminiujiuniaajanaari naa pahuatanuuquiaarijuhuaj. <sup>25</sup> Puetunu Pueyaso

sequesano Jesujinijijianaani, cunoori quiarjia pajaniyara, taa Pueyaso pohuataniquiaari tariucuacaanu na sequenu panishano caminiujiuniaacuajani. Nojoriiri pa supuetanaa quiquiaari. Pajaniyaranojaariuhuj Pueyaso sequesano pa supuetana Abraham. Pueyasoori naa sequequiaari pa supuetana Abraham:

“Quia muetusanoiniji tamonu pueyanoori supuenutaniya quia nuhuaji, cante pueya shuquiritiniutianiya puetunu jiyacajiniyajanaacuajani”.

<sup>26</sup> Pueyaso jaara na tojjia Niyanu samiitianiuianu, coteenu na jiyaroree pocuaari poojia tacatoriquiano, sesa pa miiniu pa cartenura, shuquiriaatia quijara pa quiniuria.

Pedroori naa pohuataquiaari pueya niquiaratej.

#### 4

##### *Judiocuaca camarucua nequesoreesacari Pedro, Juannio*

<sup>1</sup> Pedro pohuatasacarijia pueya niquiara, nocua nijioquiaariiri pueyacuara secojonaa, Pueyaso Secojoua tia cojuanaata, Saduceocuatano. <sup>2</sup> Nojoriiri Pedro tojiquiaari pueya niishitiojiyano. Nojuajaari pueya niishitiojoriquiaa macunucuaari saneecuatunutuuhua na jamacajiniji, naatej taa Jesu samiitiarohuacuaani. Cuno jiyaniijianucua jaara naa tojiquiaari sequeshiyanotej, nocuaji jiyanojuaa juaaquiocuaariiri, na ruuretasacari Pedro sequesano. <sup>3</sup> Cuno juaaquiocuaari Pedro quiatuquiaari, Juannio. Jiyacariiri tariucua tenacari quiquiaari. Tariucua niucua nujuatejosaaquiaariiri. Nojoriiri tii juhuaquequiaari nujuatejojuajinia. <sup>4</sup> Naajaa, queraatia pueyari Jesuucua tiuquiaari Pedro pohuatasacari Jesujiniji. Quera cinco mil saaja canuuri tari Jesuucua tiuuniaa quiquiaari. Maajipohuari serojoso quiquiaari.

<sup>5</sup> Tariqui, Judiocuaca camarucuaari rerejoquiaari camarucua nacasunaata, Moisés Rootasanoiniji niishitiojonaatano. Nojoriiri Jerusalén tiacajinia rerejoquiaari Jesujiniji pohuatanaa nojori nequesoreenura. <sup>6</sup> Anásri tii quiriqiaajuhuj. Nojuajaari pueyacuara secojonaa jiyaniijia quiquiaari. Caifásri tii quiriqiaajuhuj, tamonu Juannio, Alejandro-nio, mariyata puetunu secojonaa jiyaniijia tapueyocuatano. <sup>7</sup> Pedro, Juannio, nojoriiri nujuatejojuajiniji tohuatejosaaquiaari. Nujuatejosaaree jiyaniijianucua tajiniaari. Pedro shocua, Juan shocua cajitiuniaari nojori nequesoreere:

—¿Taa nia miiruucuaa noonijia, sesarunocuatej? ¿Cana cumaacata nia jecaru-huacuaanoj? ¿Cante nia sequecanu naa nia miiniuriani?

<sup>8</sup> Jiyacaritij, Pueyaso Sohuanuuri Pedro jiuujia cumaquiaari Pueyaso niishitiajata na pocuanura. Naacujitij, Pedroori naa nojori riucuaquiaari:

<sup>9</sup> —Canaa camarucuaana, nia pohuatareera sesarunocujiniji, taa na jeequero-huacuaani. <sup>10</sup> Níaa canaa nequesoreetaate, nia tojitiare canaa sequesano, nia niishiniuria cua pohuatasano, puetunu Israel pueyajanaa niishiniuriajuhuaj. Nio pueyano niya nujujaani, nojuajaari Jesucristo cumaacata jeequerohuacuaa. Niaari Nazaret tiacajinijinio Jesu cusojuacanu niyacutesanojinia. Pueyaso cutaraari na sanacanhua macujiniji, pueyaracaanu na quiniuhua. <sup>11</sup> Niajanijari juhua saitia tiajonaa Pueyasora. Nia tiasacari, niaari maniniujajau saajia jataquiaari, nia jyanishacari sesarujajau naasucua. Na camaruuri saniniujia sequeya:

“Cuno nia jatasano saajiani, cunoori saniya cua maniniujajau saajia”.

Niaari naa Jesu jataquiaari juhua saajia sesarujajau. Naajaa, Pueyasoori na niaquiaariuhua socua maniniushiqui. <sup>12</sup> Majaari tamonu quiniu pocuaji tacuna. Puetunu pueya tajinijiniojuanaani, maja Pueyaso tamonu pueyano sesa jyaniquiniu quiquiaari cante pocuaji tacuriquianoni. Saaja Jesu cutaraari sequesaaquiaari pocuaji tacuriquianora.

<sup>13</sup> Judiocuaca camarucuaari jyanohua na namijiaa riunitiquioquiaari nojori niquishacari taa Pedro, Juan seetanujanaa cumaacata pohuatariquiaa nojori niquiarani. Nojoriiri Pedro, Juan niishiquiaari nojoriiri seetanujanaa maja puera naajionuujuaca quiquiaari. Nareja poonijionuujuaca pueyajinijinio quiquiaariiri. Naa nojori niishishacaritij, nojoriiri seetanujanaa niishirii nojoriiri Jesu cojiniaa quiquiaari.

<sup>14</sup> Sesarunocua jeequenohuari cuniqui nojori shuriucua nujuariquiaajaacuhuj. Naaratej, jyanijianucuaari socua sanaajetaquiaari. Saaja niishiriojonuuriquiaari.

<sup>15</sup> Camarucuaari Pedro, Juan tohuatanijioquiaari tamocora nojori tajiniji. Jiyareta camarucuaari tama pocoojoquiaariijaaja. <sup>16</sup> Naa sequetuquiaariiri:

—¿Taa pa miya socua nio pueyarini? Puetunu Jerusalén tiacajinia quiniaajanaari nojori cutara miishanojiniji niishiya. Majaari pa naata seetanu parta Israel pueya, pa sequenura nojori, cuno sesarunocuaari jeecasoo. Nojoricuaajaari tari maninia na niishitiuya. <sup>17</sup> Nio pojori pa piriyojore juhuari, maja socua quiaritia nojori pohuatanura Jesujiniji pueya niquiara, nojori miishano paaqueyaquiniuria socua niya pa tiacajiniani.

<sup>18</sup> Camarucuaari socua piiquiaariuhua Pedro, Juannio. Nojori nacasree jiyanoahuari, maja socua quenaaja nojori pohuatanura Jesujiniji pueya niquiara.

<sup>19</sup> Pedroori Juanta nojori riucuaquiaari:

—¿Canaatucua casaara Pueyaso samiritiare canaa tojiniuria niajaniani? ¿Taa nia sequeyani jiyaniijianucuaanaa? <sup>20</sup> Maja cutaraari canaa naata tarinitianu pohuatanu canaa niquishano, canaa tojishanonio.

<sup>21</sup> Camarucuaari nojori piriyojoquiaari juucuohuaj. Puetunu pueyajanaari saaja maniniuhaqueetariquiaa Pueyaso, puetunu maninia na miishanojinijijianaa. Naaratej, camarucuaari socua Pedro tarinitiaquiaari Juannio. Majaari na mojoosaanu quirii.

<sup>22</sup> Pedro jeecasanohua sesarunocua pueyanoni, nojuajaari cuarenta marijia shocotejoquiaari tari na quishacari.

*Jesu pueya secojosacari Pueyaso, na cumaquiniuria nojori*

<sup>23</sup> Pedro, Juan jaara cartesaaquiaari, nojoriiri narta Pueyaso pueyacua quiojoquiaariuhua. Nojori pohuataatureeri Judiocuaca camarucua sequesano nojori, camarucua nacasunaa sequesanojuhuaj. <sup>24</sup> Na tojishacari camarucua piriyojosano, puetunu nojorijianaari Pueyaso secojonu coteequiaari. Naa sequetuquiaariiri:

—Canaa Jiyaniijianaa, quiaari jiya cajiniocua shipinina, jiyanio. Shoniacu caminiari quia shipinishanojuhuaj. Puetunu casaajanaari quia shipinishano. Quiaari jiyanohua maninia. <sup>25</sup> Canaa supuetanaa jiyaniijia Davidri quia seru quiquiaari. Naacuajitij, quia Sohuanuuri na pohuatequiaari quia sequesano Jesujiniji juhua tariucua miishano. Quiaari naa na pohuatequiaaritij:

“¿Casaara jiyacua quiniaa pueya juayani? Pueyari najuhuana sesa niishiriojoriquiaa juucua. <sup>26</sup> Jiyajinijinio jiyaniijianucuaari na juaaquiaca sanetaree. Queraatia tiacajinijinio camarucuaari Jiyaniijia Pueyasoocuaara roojotooree, na jiyarosano Cristoocuaranio”.

<sup>27</sup> Pueyasonaa, naacuaaquiniatejaj. Jiyaniijia Herodes, Poncio Pilatonio, nojoriiri nio tiacajinia rerejocanu narta taucacata, Israel pueyatania. Quia Niyanuucuaara roojotoocanuuri, tama quia Jiyarosanoocuarajaaja. <sup>28</sup> Naa nojori miiniuucuatej, nio pueyari tari quia miiniu panishano miiriucuaa, taa quia sequequiaari tariucuaanucuaajani: “Cua Niyanu cuara mosaaria puetunu pueyacuaraajanaa”. <sup>29</sup> Canaa Pueyasonaa, quia tojishuriucuaraj. Nojoriiri quiaritia canaa miananojiya saniniuujia. Canaacuaajaari quia seyani. Canaa jiuujia quia cumaquiri quiaritia, canaa pohuatanura socua quia rupaa canaa puereyaquiniutia. <sup>30</sup> Cusosuhua cuara naatanijiosaaria quia cumaacata. Canaa jiyaniquishacari quia Niyanu sesa, jiyajeneta casaa cuara miiijiosaaria quia cumaacata pueya niquishocoriquiano. Nojuacuajaari saa maniniaja.

<sup>31</sup> Nojori puecasacari secojonu, nojori quishaqui tiaari canashiyaquiji jiuuquiuti-aquiaari. Pueyaso Sohuanuuri puetunu nojori jiuujiajinia tiuquiquiaari, nojori na cumaquiniuhua. Naacuajitij, pueyari saaja maninia pohuataquiaari Pueyaso rupaa pueya niquiara. Majaari na pueretunu quiquiaari.

*Jamueyashijiaca Jesu tojitianaa quishacari*

<sup>32</sup> Jesuucua tiuuniaari maninia juhua rupuetootesano quiquiaari puetunujuanaa. Nojoriiri juhua seetanujanaa tapueyocucataja quiquiaari. Majaari nojori sequenu quiquiaari: “Cua casami saaja quiria quiniutianiya”. Nojori jiiitasano casamiiri saniniuujia puetunu narta Jesuucua tiuuniaarajanaa quiquiaarijuhuaj. <sup>33</sup> Jesu saquiriojosano



pueyari Jesu samiitianujiniji poojotaquiaari jiyanoehua cumaacata. Naajuhuj, Pueyasoori puetunu Jesuucua tiuuniaajanaa naacuriquiaa jiyanoehua, shuquiriaatia nojori quiniuria. <sup>34</sup> Puetunu Pueyaso pueyajanaari na panishano jiitiaquiaari puetunujanaa. Nojorijinijinio jaara cuhuariquia jiitiaquiaari, tianio, nojoriiri na niqutioquiaari cumaneecara. <sup>35</sup> Jaara cumaneeca masequiaari na casaa sami, nojoriiri nareja na niqutioquiaari Jesu saquiriojosano pueya. Nojoriiri saniniuujia casamiiju Pueyaso pueya na serotaquiaari, nojori jiitianura na panishanojuhuaj. <sup>36</sup> Nojorijinijinio, tamonu pueyanoori quiquiaari. Na sesaari José, Levita pueyano. Jesu jiyaramiquishano pueyari na sesojoquiaari Bernabé. Nioori sequeya “Cumanijiana”. Chipre jiyajinia na raja. <sup>37</sup> Bernabeeri cuhuariquia jiitiaquiaari. Na cuhuariquia niqutioquiaari cumaneecaraari. Jaara masequiaari cumaneeca na cuhuariquia sami, nojuajaari nareja na niqutioquiaari Jesu jiyaramiquishano pueya, casamiiju narta Pueyaso pueya niqutiojosaanura saniniuujia.

## 5

*Ananías, Safira sesa miishanojiniji pohuatasano*

<sup>1</sup> Tamonu pueyanoori quiquiaari. Na sesaari Ananías quijia. Necocua sesa quiquiaari Safira. Nojoriiri na cuhuariquia niqutioquiaari cumaneecarajuhuj. <sup>2</sup> Ananíasri na cuhuariquia samijiniji queyataquiaari nera. Na cureeno pataquiaari Jesu saquiriojosano pueyacuaari. Juhua papatasoo niqutioquiaari na sapojonutaari. Necocuaari na miishano niishiquiaarijuhuaj. Majaari neyacata na quiniu quiriqiaa Ananías niqutiosacari nareja na cumaneeca. <sup>3</sup> Ananías niqutiosacari na cumaneeca, Pedroori na sequeree:

—Ananíasnaa, ¿casaara quia tiuquinirii Sesaaca quioojajiniani, quia sapojonura Pueyaso Sohuanu juucuaani? ¡Nojuacuajaari cua niishitiquii nio cumaneecaari maja puetunu quia masanojuanaa quia cuhuariquia samijiniji! ¡Quiaacuajaari tiji queyataree! <sup>4</sup> Quia cuhuariquia quia niqutioyaquishacarijia cumaneecara, cuno cuhuariquiaari quia casaa quiriqiaa. Na nuhuaji, quiaa jaara quia cuhuariquia niqutioree cumaneecara, quia cuhuariquia samiiri quia casaa quiriqiaajuhuj. ¿Casaara naa sesa quia niishirojoreerini? Naa sacuaatia quia miishacarijij, majaari quia sapojonu quiri parta pueyano. ¡Quiaa cutaraari Pueyaso sapojoree juucua!

<sup>5</sup> Ananías tojishacari naa Pedro sequesantej, ¡macuuri pojoquee! Puetunu pueyajanaa jaara tojinuuquiaari nocuaji, jiyanoehua shiriqutioquiaariiri. <sup>6</sup> Mashiquioriiri na jiunioquiaari toquejinia. Na nuhuaji, na patuquiaari na jamonuraari.

<sup>7</sup> Jiuujianaraca hora nuhuaji, necocuaari juhuajaniya tiuquiquiaari Pedroocujuhuj. <sup>8</sup> Pedroori na nequesotaree:

—Cua sequere, ¿niojuanaate nia cuhuariquia sami quiriucuaa?

Na riucuaareeri:

—Jaa, niojuanaacuaaquinatejaj.

<sup>9</sup> Pedroori na sequeree:

—¿Casaara naa nia rojotoorucuaa Pueyaso Sohuanu nia sapojonurani? Quia niquiri. Cuno mashiquioriiri quia niyaca jamonu nuhuaji shusha tiuquijiohua. Nojoriiri quiarijia quia panutanijuhuj.

<sup>10</sup> Jiyacaritij, maajiiri macu pojoquee Pedro shuriucujuhuj. Mashiquiori tiuquijiosacarihua, nojoriiri Safira niqishuhua pojijanojuhuaj, tariucua macu. Nojoriiri na patuquiaarijuhuaj. Neyaca shuriucua na jamotuquiaariiri. <sup>11</sup> Puetunu Pueyaso pueyajanaa, tamasa pueyano, nojori jaara tojinuuquiaari puetunu nio miishanojinijianaa, jiyanoehua pueretuquiaariiri.

*Queraatia mijiosacari Pueyaso cumaacata pueya niqiuara*

<sup>12</sup> Jesu jiyaramiquishano pueyari jiyano hua cutara casaa miijioquiaari Pueyaso cumaa-cata. Queraatia pueya naatanijioquiaariiri. Puetunu Pueyaso pueyajanaari pueyara-caanu rerejoquiaari pueya jiyaniquishano tariucuacaanu jiyaniijia Salomón canujuuco-jojuajinia, Pueyaso Secojoua tiajinia. <sup>13</sup> Tamasaca pueyari nojori puerequiaari. Majaari nojori rupesaanu quijia. Na pueretujuacaari nojorijiniji sequetujua:

—Cuno pojoriiri maninia pueya.

<sup>14</sup> Queraatia pueyari Jiyaniijia Pueyasocua tiuquiaari, canuu, maajipohuanio. <sup>15</sup> Naajuhuj, cusosuhuari patootasaaquiaari na maquetucuajinia nuujiniara. Pueyari naa niishiriojioquiaari, Pedro jaara cusosuhua shuriuquioco tajimia, cusosuhuari naat-aconutaniuhua Pedro naaqui jaara nojori caco netema. <sup>16</sup> Queraatia Jerusalén tiaca shocua quiniaa pueyari na cusosuhua patootaquiaarijuhuaj, Jerusalén tiacajiniara. Samaruhua sesosano pueyari jaatucunuusaaquiaarijuhuaj. Puetunu pueyajanaari naatanijosaaquiaari.

*Pedro, Juan nujuatejosacari nujuatejojuajinia*

<sup>17</sup> Naaratej, pueyacuara secojonaa jiyaniijia, nata quiniaa narta Saduceocucanio, nojoriiri juaaquioquiaari shocotasano nojori quishacari. <sup>18</sup> Secojonaa jiyaniijiaari na pueya jiyaroquiaari Jesu jiyaramiquishano pueya nojori quioonura. Jaara na quiootuquiaari, nujuatejosaaquiaariiri Judiocuaca nujuatejojuajinia. <sup>19</sup> Pueyaso seruuri niucua jiyocua-caanuji nojoriicua rosequiaari. Nujuatejojuua tohuateya riataseeri. Na tohuatejosacari Pedro, Juannio, nojori sequereeri:

<sup>20</sup> —Juhujaniya nia quiaarohua. Pueyaso Secojoua tiajinia puetunu Jesujinijijianaa nia pohuatate pueya niquiara. Nia pohuatatejuhuaj taa jatanishano pueya nia quia quiarijiani.

<sup>21</sup> Nojoriiri Pueyaso seru sequesano tojiquiaari. Nojoriiri tariquicuaji quiojoquiaari Pueyaso Secojoua tiajinia. Tii niishitiojonuuriquiaa juhuajaniya Jesujiniji pueyari. Jiyacari, pueyacuara secojonaa jiyaniijiaari nata quiniaata saniniuujia quiojoquiaari pueya nequesoreesaaqui. Puetunu Israel pueya camarucujanaa rerejotereeri, nojori nequesoreenura Jesu jiyaramiquishano pueya. Puetunu nojorijianaa jaara tari rerejoquiaari, na pueya sequequiaariiri nojori tohuatejonura Jesu jiyaramiquishano pueya nujuatejojuajiniji, nequesoreesocoriquiano. <sup>22</sup> Na pueya jaara tiuquitiaquiaari nujuatejojuajinia, majaari nujuatejosano na riuriatatanu quishii nujuatejojuajinia. Nojoriiri tacaretacuhua na shaacanu nuhuaji. <sup>23</sup> Naa pohuatanuusuhua camarucua niquiaraari:

—Canaa tiuquishacari nujuatejojuajinia, canaari maninia cumaatia mishiquionucua na riuriataseeni. Tii cojuanaari maninia cojuariquiaa na tiotiu. Canaa riatasacari tohuateya, jshaacoori quiriquiaa!

<sup>24</sup> Secojoua tia cojuanaa camarnu, mariyata pueyacuara secojonaa jiyaniijianucuaari tama sequetooquiaarijiaaja nojori shiriiquiniutia:

—¿Taateerini? ¿Taariquitijia socua na nuhuaji quiniutianiyatej?

<sup>25</sup> Jiyacaritij, tamonu pueyanoori camarucuaacua tiuquishii. Naa nojori sequeereeri:

—¡Noo pojori, niaa na nujuatejocanu nujuatejojuajiniatej, nojoriiri juhuajaniya pueya niishitiojonuya Pueyaso Secojoua tiajinia!

<sup>26</sup> Tari nojori niishishacari tee Jesu jiyaramiquishano pueya quiriquiaani, Secojoua tia camarnuuri na pueyata quiojoquiaari Jesu jiyaramiquishano pueya quioonura. Jaara na quiootuquiaari, nojoriiri jacaria na jaatucunuquiaariuhua. Secojoua tia camarnuuri pueya puereriquiaa. Nojori jaara caponeere Jesu jiyaramiquishano pueya na juaaniutia, pueya mariqui nojori jacure saitia saniniuuriijia. Nojoriiri cuno puerequiaari. Nocujaji Jesu jiyaramiquishano pueyari jacaria jaatucunuusaaquiaari. Majaari na caponeesaanu quiquiaari. <sup>27</sup> Jaara tiuquitasaaquiaariuhua, nojoriiri Israel pueya camarucujanaa tajinia nujuatejosaaquiaari, Sanedrínucua tajiniatuhuj. Pueyacuara secojonaa jiyaniijiaari nojori sequequiaari:

<sup>28</sup> —¡Majaquiiri nia niishiniu tojinii! Canaacuajaari tari nia tenujucanu juucuanii maja socua cuno Jesujiniji nia pohuatanura pueya niquiara. ¿Niaate nia numaa shama tojiquianu canaa sequesano? Naa nia niishitiojosacaritij, puetunu Jerusalén tiacajinia

quiniaajanaari canaacua tiuutianutaniya Jesu mosaanu! Canaa sequetunutaniyari: “Cuno pojoriiri Jesu motucanu”.

<sup>29</sup> Pedroori narta Jesu saquiriojosano pueyata nojori riucuaquiaari:

—Seetanujuanaari, pueya cuaara Pueyaso sequesano miiria coteenu, maja narta pueya sequesano. Maja cutaraari canaa tarinitianunoj. Na nuhuaji cutara, nio jiyajinia jiyaniijianucua sequesano cuaara miishaaria. <sup>30</sup> Pueyasoori tariucuacaanu pa supuetanaa Jiyaniijia quiquiaarijuhuaj. Cuno Pueyasojuanaacuajaari niyacutesanojinia nia cusojuasano samiitiani-quianuhua. <sup>31</sup> Pueyasoori na tacaniquianu jiyocuaacaanu. Na miaquetajara na cajitiquianuuri Jiyaniijiajanaa na quiniuucua, pocuaji Tacuna na quiniuucujuhua. Naa miiquianuuri Israel pueya tacatonuhua noojia Pueyasocua, Pueyaso jiyanooniuria pajaniya sesa pa miishanojiniji. <sup>32</sup> Naaratej, canaari canaa tojishano pohuataani, canaa niquishanonio. Naajuhua, Pueyaso Sohuanuuri canaa niishitiojoquiaa maninia canaa pohuatanura pueya niquiara. Pueyasocuaajaari na tojitiaanaa niqutioquiaa na Sohuanu.

<sup>33</sup> Naa Judiocuaca camarucua tojishacari nojori sequesantej, juaaquioreeri. Nojori puecoonu panirii juucuaari. <sup>34</sup> Jiyacaritij, tamonu pueyanoori narta camarucua tajiniji nujuaquiaari pocuanura. Na sesa quiquiaari Gamaliel, Fariseo pueyano. Nojuajaari Pueyaso tariucuacaanu rootasano niishijia quiquiaari cutara. Naajuhua, nojuajaari jiyanoohua narta Israel pueya tojishano pueyano quiquiaari. Gamalielri Secojoua tia cojuanaa camarnu sequequiaari Jesu jiyaramiquishano pueya na tohuatanijionura rupaquijia. <sup>35</sup> Na nuhuaji, saa camarucua quishacarijia tii nata, nojuajaari naa nojori sequequiaaritij:

—Cuarta Israel pueyanaa, jacaria nia niishiriojore taa nia miiniutianiya nio pueyani. <sup>36</sup> ¿Majateeri nia niishiniu taa Teudas miiquiaari quiari naatajani? Nojuajaari jiyaniijia quiniu paniquiaari juucua. Queraatia pueyari na nuhuajiquiaari, quera cuatrociento pueya. Na nuhuaji, Teudasri mosaaquiaari. Puetunu na pueyajanaari niyaquejoquiaariuhua. Naa puequequiaariiri Teudas miiniu panishano. <sup>37</sup> Teudas nuhuaji, jiyaniijia César naajiotanishacari puetunu pueya sesacajanaa, Galilea jiyajinijinio tamonu Judasri jiyacari César ruuretaquiaari. Queraatia pueyari na nuhuajiquiaari nojori jiyaniijia na quiniuria juucua. Nojuajaari mosaaquiaarijuhuaj. Puetunu na pueyajanaari niyaquejoquiaariuhua. <sup>38</sup> Naaratej, naa nia sequeyanijia: nia tarinitiare nio canuu. Nojori niishitiojosano jaara tama nojori niishishanojuaaja quiri, shaajenutaniyari. <sup>39</sup> Saniniuujia, nojori miishano jaara seetanujuanaa Pueyasojiniji quiri, majaari nia naata nojori tarinitiniu quiniutianiya nojori miishanojiniji. Nocuaji tama nia cuaqueyajaaja nia cojuare, majaari Pueyasota nia miaquetojonuruhua, naa nojori nia miishacaritij.

<sup>40</sup> Puetunu camarucuaajanaari Gamaliel sequesano tojiquiaari. Na nuhuaji, Jesu jiyaramiquishano pueyari tiuquinitiasaahua. Camarucuaari nojori mojooree nareja. Nojori tenujitureeri maja Jesujiniji nojori pohuatanura socua pueya niquiara. Naa nojori miishaanu nuhuajitij, Jesu pueyari carteqesaaquiaariuhua. <sup>41</sup> Jesu jiyaramiquishano pueyari camarucua rerejuajiniji tohuareetaquiaariuhua shuquiriaatia. Nojoriiri timiquioriquiaa cararaatia nojori camarucua miiniuucua nojori, Jesujiniji nojori poojotanuucua maninia. Majaari nojori seetanu quiquiaari nojori Jiyaniijia Jesujiniji. <sup>42</sup> Majaari nojori pishiniu quiquiaari nojori pohuatanura Jesujiniji. Socua pueya niishitiojonura jiyacatequiaariiri. Nojoriiri pueyaracaanu pueya niquiara pohuatariquiaa Jesucristojiniji, puetunu juucajanaa, Pueyaso Secojoua tiajinia, mariyata puetunu Jerusalén tiacajiniaqueyajanaanio.

## 6

### *Mashiquiopue mianuutenaara saquiriojosacari*

<sup>1</sup> Jiyacaritij, Jesuucua tiuuniaa pueyari socua canequiaari. Puetunu nio pojorijinijiojuanaani, noojiaqueyari Judio rupaa pocuanaa quiquiaari. Naajuhua, noojiaqueyari Griego rupaa pocuanaa quiquiaari. Jiyacaritij, Griego rupaa pocuanaari juaaquiouquiaari

Judio rupaa pocuanaata. Griego rupaa pocuanaari naa sequequiaari Judio rupaa pocuanaatej:

—¿Casaara canaa mashiquiopue nia niquitioyaquiquiaa miaquesanonijia?

<sup>2</sup> Nocuaji, Jesu jiyaramiquishano doce pueyari puetunu Jesuucua tiuuniaa pueyajanaa rerejoquiaari. Naa nojori sequequiaariiri:

—Maja maninia canaa cartenura Pueyaso rupaa pohuatanu, canaa mianuutenura mashiquiopue. <sup>3</sup> Cunora canaa tapueyocucanaa, tama nijaniyajinijinio nia saquiriojore siete maninia mijiaca pueya, niishijaca, Pueyaso Sohuanuraca cutara. Nojori nia seeratare nio poonijosano, maninia nojori mianuutenura pa mashiquiopue. <sup>4</sup> Canaacua saniniuujia saa Pueyaso secojorenijia. Naajuhuj, majaari canaa tarinitianu quiniutianiya Jesujiniji niishitiojonu.

<sup>5</sup> Puetunu pueyajanaari na shuquiriniutia naa rucuaquiaari:

—Taaquiririnij, naacuaquiniateja maninijaj.

Jiyacaritij, pueyari Esteban saquiriojoquiaari. Nojuajaari jiyanohua Pueyasocua tiuujia pueyano quiquiaari. Nojuajaari Pueyaso Sohuanu cumaacaraca quiquiaarijuhuaj. Nio pojoriiri Estebanta saquiriojosaaquiarjuhuaj: Felipe, Prócoronio, Nicanornio, Timónnio, Parmenasjuhuaj, Nicolásnio. Nicolásri tahue quiquiaari Antioquiya tiacajinijinio. Tii rasaaquiaariiri. Nojuajaari tarijia Judiocuaca niishitijosano pueyano quiquiaari, Judio pueyanora na quiniuria. <sup>6</sup> Puetunu pueyajanaa jaara cuno siete pueya saquiriojoquiaari, nojori jiyataquiaariiri Jesu jiyaramiquishano doce pueyacua. Jesu saquiriojosano pueyari cuno siete canuu nacaacua niaquiaari na juaashiquiaca. Pueyaso secojoturee nojoriicuaaraari Pueyaso Sohuanu cumaquiniuria nojori, miaquesano niquitijonaa nojori quiniuria.

<sup>7</sup> Jiyacariti Pueyaso rupaari socua tojishano quiquiaari. Jesuucua tiuuniaari socua canequiaarijuhuaj. Queraatia Judiocuacaacua secojonaa pueyari Jesuucua tiuquiaarijuhuaj.

#### *Jesu ruuretajaca quiasacari Esteban*

<sup>8</sup> Estebanri Pueyaso cumaacaraca quiquiaari jiyanohua. Pueyasoori maninia na jiitiaquiaari. Naacujitij, nojuajaari cusosuhua pueya naatanijioquiaari Pueyaso cumaacata. Pueyari niishiquiaari Esteban pohuatasanoori seetanjuanaa Pueyasojiniji quiquiaari, nojori niquishacari jiyajeneta na miishano Pueyaso cumaacata. <sup>9</sup> Jiyacariti, tamasa Judiocuacaari Jerusalén tiacajinia quiriquiaa. Nojori maanuuri sesojosaaquiaari “Quioosanojiniji carteqesano pueya”. Quiquiaarijuhuaj Cirene tiacajinijinio pueya, Alejandría tiacajinijinio pueya, Cilicia jiyajinijinio pueyajuhuj, Asia jiyajinijinio pueyano. Puetunu nojorijianaari Estebancua rerejoquiaari nata juayonuu-tanura. <sup>10</sup> Nojoriiri maja na naata Esteban shocotanu quiquiaari nojori niishishanota. Estebanri saniya nojori shocotaquiaarijia. Nojuajaari Pueyaso Sohuanu niishitijosanota saa maninia pohuataquiaarijia nojori niquiara. <sup>11</sup> Maja socua nojori rejeretasacari Esteban pohuatasano, nojoriiri tamasa pueya niquitioquiaari cumaneeca, najuhua nojori cuaracashiniuria camarucua niquiara Estebancuara. Cuno pueya, cumaneeca niquitijosaaquiaari na cuaracashiniuriani, nojoriiri naa sequequiaari Judiocuaca camarucua niquiaratej:

—¡Taaquiririnij, canaacujaari cuno pueyano tojiquianu Moisés sesacaanoni, Pueyaso sesacaanojuhuaj!

<sup>12</sup> Naa nojori sequesacaritij, puetunu pueyajanaari juaaquioree, Judiocuaca camarucujuhuj, Moisés Rootasano niishitiojonaanio. Puetunu nojorijianaari Estebancua catecanoquiaari. Na quiatureeri. Na nuhuaji, na jaatucutuquiaari pueya nequesoresaquiriaari, Israel pueya camarucua nequesoresocoriquiano tii nojuaja. <sup>13</sup> Socua pajesaaquiaariiri tamasa, Estebancuara tonujuriquiano najuhuanaj, na cuaracashiniutia. Cuno pojoriiri naa sequequiaari camarucua niquiaratej:

—Nio pueyanoori pueyaracaanu sesacaquiaa Pueyaso Secojoua tia. Moisés Rootasano sesacaariquihuariuhuj. <sup>14</sup> Canaari socua naa na sequesano tojiquiaajaniuhuj:

“Nazaret tiacajinijinio Jesuni, nojuajaari Pueyaso Secojoua tia niyartanutaniya”. Naa-juhuaj, tariucuacaanu Moisés niishitiojosano pajaniya pa cartetenutaniyaquiniaari.

<sup>15</sup> Puetunu camarucujanaari na cajitiushaquiiji niquitiariquiaa Esteban. Nojoriiri na jiquioco niquiquiaari shacantuuca, juhua Pueyaso seru jiquioco.

## 7

*Esteban pohuatasano*

<sup>1</sup> Pueyacuara secojona jiyaniijaari Esteban nequesotaquiaari:

—¿Seetanutejanaa taa nio pojori sequereecuajani?

<sup>2</sup> Nojuajaari na riucuaare:

—Cua panishano pueyanaa, cua camarucuaanaa, cua tojitiare. Pueyasoori jiyano hua maninia. Nojuajaari pa supuetana Abrahamcua muetaquiaari Mesopotamia jiyajinia na quishacari, na pacuyaquishacarija Harán tiacajinia. <sup>3</sup> Pueyasoori jiyacari naa na sequequiaari:

“Quia tiujiaare quia jiya, quia pueyano. Niiquiiji quia quiaare, janiya cuara quia sequerejaatijia, niya quia quishii. Quiocua tii jiyojese cutara”.

<sup>4</sup> Abrahamri Pueyaso sequesano tojiquiaari. Quiaquiaariiri Caldeo pueya jiyajiniji. Harán tiacajinia quishiiri. Tii shaajaquiaari na shipininioori. Na nuhuaji, niyara pacuquiaariiri, paa tii quiyani. <sup>5</sup> Jiyacaritij, Pueyasoori juhuanouaja maja Abraham na niquitionu quiquiaari nio jiya. Naacuajitij, Abrahamri maja quenaaja jiya na jiitianu quiquiaari tama na quijiarajaaja. Naajaa, Pueyasoori na sequequiaari:

“Janiya na nuhuaji quia niquitionutaniya nio jiyani. Quiaa jaara shaajeyare, quia niquiohuara quiniutianiya saniniuuriija”.

Pueyaso jaara naa sequequiaari Abrahamtej, Abrahamri jiyacari juhuanouaja niquiohuaju quiquiaari. <sup>6</sup> Pueyasoori naa pacutequiaari sequenu Abrahamtej:

“Puetunu quia jinianuucujinio supueno pueyajanaani, nojoriiri na niishishoo pueya jiyajinia quiniutianiya. Cuno jiya pueyari nojori poonijiotenutaniya jiyano hua. Naa naquiya miishaanutaniyari. Tii nojori quishacari, na shoconujunutaniyari cuatro ciento marijia”.

<sup>7</sup> Pueyasoori Abraham sequerejuhuaj:

“Janiyari saniniuujia cuno taucuaca naminiutianiya quiocujinio supueno pueyacuani. Janiyari nojori saniitionutaniya saniniunijia nojori poonijiotenuucua quiocujinio supueno pueya. Na nuhuaji, nojoriiri tiji quiojonutaniuhua niyara. Nojori tiuquiiijosacariuhua, nojoriiri cua secojonuujuaca quiniutianiya niya”.

<sup>8</sup> Pueyasoori naa Abraham rootaquiaarijuhuaj:

“Niocua nia cararaatiuuquia co miatejore. Cunoori juhua naajiosano nia cuaqueyajinia quiniutianiya, pueyaracaanu nia niishiniuria cua sequesano nijaniya”.

Naa Pueyaso sequesanoori quiquiaari puetunu Israel pueyarajanaa. Naaratej, Abraham niyanu Isaac jaara rasaaquiaari, na queeri neyanu cararaatiuuquia co miatequiaari na camueesacari ocho juuca. Isaacri naa miiquiaari neyanu Jacobojuhuaj. Pueyasoori Jacobo sesojoquiaari “Israel”. Jacoboori naa miiquiaari necohuajuhuj. Necohuari quiquiaari doce canuu. Cuno doce canuu, Jacobo niquiohuani, nojoriiri puetunu pa doce Israel pueyapue supuetanaajanaa.

<sup>9</sup> Pa supuetana Jacobo niquiohuajinijinioni, tamonuuri sesojosaaquiaari José. Tapueyocuacaari José juaajiaca quiquiaari jiyano hua, puera na que panishano José quishacari. Majaari nojori niquitiuniu paniniu quijia nojuaja. Na queeri socua jiyano hua José panijia quiquiaari na pueranaajiniji. Tapueyocuacaari cunora casami niquitiojona pueya niquitioquiaari cumaneecara tarajanu José. Casami niquitiojonaari José jiyataquiaari Egipto jiyajinia, saniniuujia tii na niquitiosocoriquiano serura. Naajaa, Pueyasoori Joseeta quiriquiaa. <sup>10</sup> Pueyasoori na naacuquiaari naquiya na miishacari. Pueyasoori na jiyatequiaari niishijara. Naaratej, Egipto jiya jiyaniija Faraónri na maniniucuaquiaari. Na jiyatequiaariiri puetunu Egipto jiya pueya camarnurajanaa. Na jiyateree na tia camarnurajaariuhuj.

<sup>11</sup> 'Na nuhuaji, miaajenuuri quiquiaari puetunu Egipto jiyajiniajanaa, Canaán jiyajiniano. Pa supuetanaa quishacari Canaán jiyajinia, nojoriiri quera titiacoquiaari na miajajaara. Seetanujuanaa shaaqui quiquiaariiri nojori miasano. <sup>12</sup> Jiyacaritij, Jacoboori caminiujiushaaquiaari: "Egipto jiyajinia quiyaquinia trigo". Naaratej, necohua jiyaroreeri trigo masenura. Jiyacari nojori quiojosacarini, cunoori shushajanaa nojori quianu quiquiaari Egipto jiyajinia. Cuno Jacobo niquiohuani, nojoriiri pa supuetanaacuaja. <sup>13</sup> Coteenu nojori masenura jaara puequequiaari, nojoriiri Egipto jiyajinia tacatequiaariuhua socua trigo nojori masenura. Jiyacaritij, Joseeri tapueyocuaca sequequiaari: "Janiya nia tarajanuni". Joseeri Faraón niishitiquiaari tapueyocuacajuhuj. Naaratej, Faraónri shusha niishiquiaari tejeno pueyanote José quiquiaarini. <sup>14</sup> Joseeri tapueyocuaca sequequiaari: "Pa que Jacobo nia riquioo niyara, puetunu necohuatajanaa". Puetunu nojorijianaari quiquiaari setenta y cinco pueya. <sup>15</sup> Jacoboori naa pacuquiaari Egipto jiyajiniaratej. Na nuhuaji, saaquianoori tii shaajeseequiaari. Necohuari tii puequeseequiaarijiuhuj, tariucua saaquiapue. <sup>16</sup> Na nuhuaji, Egipto jiyajiniji pacusaaquiaariiri nojori nucuhua. Siquem tiacajinia niojosaaquiaariiri na supuetana Abraham raaco. Cuno raari cuhuariquiajina quiija. Abrahamri cuno cuhuariquia masequiaari tariucuacaanu pueyajiniji raa na jiitianura necocua na nijara jaara cusoyare. Cuno cuhuariquia masequiaariiri cumaneecata Hamor niquiohuajiniji, Siquem tiacajinia.

<sup>17</sup> 'Pueyasocuajaari tariucuacaanu Abraham sequequiaari nojuajaari nio jiya na niq- uitionutaniya. Quera na niqutionu panishacari, Israel pueyari jiyanoehua canequiaari Egipto jiyajinia. <sup>18</sup> Jiyacaritij, tamonu pueyanoori jiyaniijia quiquiaari Egipto jiyajinia. Cunoori jiyanoehua tarijia quiquiaari José shaajenu nuhuaji. Naacuajitij majaari cuno jiyaniijia niishiniu quiquiaari José. <sup>19</sup> Cuno jiyaniijiaari taraatia miiquiaari shusha roosano pa supuetanaa niquiohua. Pa supuetanaa sequequiaariiri shusha roosano cuara quejoosaria moojinia. Pa supuetanaari taraatia miiquioquiaari naacuatej. <sup>20</sup> Moisésri jiyacari rasaaquiaari. Pueyasoori na maniniucuaquiaari. Na queyari na jiitiaquiaari rupaquiija. Jaara na shoconujuquiaari jiuujianaraca raca, conaajaari carijiniacuma niasaaquiaari. <sup>21</sup> Faraón niyatuuri na paquiaari saniniuuujia. Na canashitiquiaari juhua na mueyari. <sup>22</sup> Egipto pueyari Moisés niishitiojoquiaari puetunu nojori niishishanojuanaa. Puetunu Moisés sequesanojuanaari jiyanoehua tojishano quiquiaari cutara. Puetunu na miishanojuanaari maninia quiquiaarijiuhuj.

<sup>23</sup> 'Cuarenta marijia jaara shocojoquiaari Moisés, mashaja na quishacarijia, narta Israel pueyacu rucuanenu paniquiaariiri, nojori na niquiniuria. Judiocuacacuajaari cuno pojori, na sesojoshiya Israel pueyatani, maja tamonu. <sup>24</sup> Naacuajitij, Moisés jaara quiaquiaari narta Israel pueya niquiniuucua, saaja Egipto pueyano niquishii narta Israel pueyano majacuyanoori. Moisésri narta Israel pueyanoocua namiquiaari. Na juaaniutia moquiaari saniniuuujia cuno Egipcio pueyanoori. <sup>25</sup> Moisésri juucua jiyaniquiaari narta Israel pueyari niishiniutianiya Pueyasoori na jiyaroree nojori na mashiquiniuria Egipto jiyajiniji. Majaari nojori niishiniu quiquiaari saaja. <sup>26</sup> Moisésri socua tariqui quiaquiaari narta Israel pueya niquiniuquiohuaj. Nojuajaari saaja riuriatasee tama nojori piy- otaanojuaja. Juucua nojori ruparetanu panishiiri. Nojori sequereeri: "¿Niaateeri tamonu, niaa jaara naa miitioyaniquitij? ¿Casaara naa nia nootujutoyani?" <sup>27</sup> Cuno narta pueyano piquiriquiaani, nojuajaari saaja Moisés caporee. Na sequereeri: "¿Cante quia jiyatecanu juhua canaa jiyaniijia quia quiniuriani, naa quia sequenura canatej? ¿Cante quia jiyatecanu canaa nequesoreenarani?" <sup>28</sup> ¿Quiaateeri cua monu panijajuhuj, naatej taa quia morucuaa cuno Egipto pueyanocuaani?" <sup>29</sup> Moisés tojishacari naa cuno pueyano sequesantej, ritia mashiquiaari Egipto jiyajiniijiri. Madián jiyajinia quishiiri tamonu pueya jiyajinia. Moisés quishacari cuno jiyajinia, tii camiquiaariiri. Caapiqui canuuniyojua mueratejoquiaariiri.

<sup>30</sup> 'Cuniqui na quishacari, na shocojoquiaariiri cuarenta marijia socua. Tamonu juuca, Moisésri rucanejoriquiaa cariiquia jiyajinia, pueya sesojosano Sináí tuhua-

nanu shuriucua. Pueyaso seruuri tii nocua muetaquiaari nequeru casaja noshiyano-jiniji. <sup>31</sup> Moisés niqushacari mani noshiyano, nojuajaari shiriiquiquiaari. Jaara nocua catecanoquiaari na niquniuria maninia, saaja Jiyaniijia Pueyaso tojirii manijiniji pocuaanoori. <sup>32</sup> Pueyasoori naa na sequequiaaritiij:

“Janiyacuaajaari Pueyasoni: quia supuetanaa Jiyaniijia: Abraham Jiyaniijia, Isaac Jiyaniijiajuhuj, Jacobo Jiyaniijiano”.

Moisés jaara naa tojiquiaaritiij, tetecareeri. Majaari mani noshiyano na niquniu paniniu quiquiaari na puerenuta. <sup>33</sup> Pueyasoori na sequequiaari:

“Cuniquijia quia jocojore quia sapatu. Niya, quiaa tii nujuaani, nioori cua quishaqui.

<sup>34</sup> Janiyacuajaari cua pueya niqiquiaa Egipto jiyajinia quiyanoni. Egipto pueyari nojori miitaa puera. Cua pueyari noonu rejeretacoya. Janiyari nojori sariyocuatunu tojiquiaa taraatiani. Nojoriicua roseyareenijia cua mashiquiniuria nojori Egipto pueyajiniji. Cunora, janiyari quia jiyaronutaniya Egipto jiyajiniani”.

Pueyasoori naa Moisés sequequiaaritiij.

<sup>35</sup> Israel pueyari tarijia Moisés juaaquiaaricuaaja. Naa na sequetuquiaariiri: “¿Cante quia jiyatecanu juhua canaa jiyaniijia quia quiniuriani, canaa nequesoreenarajuhuj?” Naajaa, Pueyaso cutaraari seetanujuanaa na jiyaroquiaariuhua nojori jiyaniijia na quiniuria, Pueyaso seru jaara nocua pocuaquiaari nequeru casaja noshiyanojiniji. Na jiyaroquiaariiri puetunu nojori tohuatanijioriquianojuanaa Egipto jiyajiniji. <sup>36</sup> Moisés cuajaari pa supuetanaa mashiquiquiaari Egipto jiyajiniji. Nojuajaari jiyajeneta miishano miijioquiaari Pueyaso cumaacata cuno jiyajinia, mariyata nojori niutiasacari Naatunacu jiyaniishano caminiajuhuj. Naa miiquiaari pueyaracaanu cariquia jiyajiniajaariuhuj. Cuarenta marijiaari nojori shocojoquiaari pueyaracaanu nojori rucuanesacari tii.

<sup>37</sup> Nio Moisésni, nojuajaari naa sequequiaari puetunu Israel pueyajanaa:

“Pueyasoori niaacua jiyaronutaniya tamonu pueyano, na rupaa pohuatariquiano nia niqiuara, taa na jiyaroquiaari janiyacuaani. Tama nia niqiuhuacuajiniojuaja supuenutaniyari. Niocua saa nojuaja tojiri cutara”.

<sup>38</sup> Nio Moisésri narta Israel pueyata quiquiaari cariquia jiyajinia. Nojuajaari Pueyaso seruta pocoojoquiaari Sinaí tuhananuucua pa supuetanaa jateesacari tuhananu cari. Moisésri Pueyaso seru rootasano na tojishano niishitiojoquiaariuhua pa supuetanaa. Cuno rootasanoori samiitianiijia rupaa quiquiaari pajaniyara, maninia pa quiniuria pueyaracaanu.

<sup>39</sup> Pa supuetanaari saa na ruuretaquiaarijia. Majaari nojori tojiniu paniniu quiquiaari Moisés. Egipto jiyajinia tacatenu paniquiaariuhua saajaari. <sup>40</sup> Naacuajitiij, Moisés tarishishacari tuhananuucua Pueyaso seru na tojishacari, pueyari socua Moisés tarajanu Aarón sequequiaari: “Puera quia shipinijiorequi pueyasohua, nojori puetariquiano pajaniya. Majaari pa niishiniu taa Moisés miishiicuaani. Shaajeseecuaa naasucujuhuanajaj, mariqui tiuquiriohua. Nojuajaari najuhua pa mashiquiquianu Egipto jiyajiniji”.

<sup>41</sup> Naacuajitiij, nojoriiri na pueyasora shipiniquiaari juhua seru juunu niyanujua niqishano. Nojoriiri na seya puecooquiaari na shuquiriniutia na juaashiquiata na shipiniutishano pueyasooacara. Nojoriiri jiyacari sacuaraatia timiquioriquiaa. <sup>42</sup> Pueyasoori socua nojoriicuaaji pishiquiaari. Nojori tarinitiaquiaariiri jiya cajiniocua nunucojuua nojori jiyatenura tama nojori pueyasohuarajaaja. Seetanujuanaa naa naajiotasano quiyajaariuhua tariucuaaanu Pueyaso sequesano caminiujiuniaa naajioneejinia. Naa sequeyari:

“Israel pueyanaa, ¿canaacuara nia puecooquiaari pueyaracaanu nia seyani cariquia jiyajinia nia camarucuneetasacari cuarenta marijia cuaara nia shocojoquiaarijiaatijia? ¿Cucuaratee? ¡Maja! ¿Canaacuara nia catijiaquiaari nia seyani? ¿Cucuaratee? ¡Maja! Niaari puetunu cuno miiquiaarijianaa tama nia jiyatesano pueyasohuarajaaja. <sup>43</sup> Niaari Moloc suhuorotu pataquiaari, shoquejiniji suhuorotu, nia pueyasora nia jiyatesanoni. Cunocuaajaari nia sequesano, ‘canaa pueyaso’. Niaari Refam pataquiaarijuhuj, juhua rijia niqishano shipinishano. Niaari puetunu nio shipinijioquiaarijianaa nia pueyasohuara, nojori cariquimiaji

nia mojoquetaconura, nia shuquiritiasacari nojori. Nocuaji, janiyari nia jiyaronu-taniya tucuaaanuni, Babilonia jiya tamajiria”.

Pueyasocuaajaari naa sequequiaari pa supuetanaatej nojori miiniuucua sesa.

<sup>44</sup> Estebanri socua pohuataquiaari naatej:

—Pa supuetanaari Pueyaso secojojua suhuorotu jiitiaquiaarijuhuaj, carriquia jiyajinia nojori quishacari. Nojoriiri tii racataquiaari Pueyaso niquitiosano saajianeeca. Nocua naajiotasano quiquiaariiri Pueyaso rootasano na pueyara. Pueyasoori cuno suhuorotujiniji pocuaquiaari na pueyacia. Cuno suhuorotuuri shipinishaaquiaari taa Moisés niquitishaaquiaaricuajani Sinaí tuhuananuucua na quishacari. Pueyasoori jiyacari naa sequequiaari Moisés: “Quia shipiniri taamueca cua niquitiquianu quiajanियacuajani”.

<sup>45</sup> Na nuhuaji, pa supuetanaa, canapuate naatujoori quiriquiaa Moisés quishacarini, nojoriiri cuno suhuorotu pataquiaari. Na patatuquiaariiri Josuéta nojori pacusacari nio jiyajinia paa tii quiyani. Nojori miaquetoosacari taucuacata, nojoriiri Pueyaso secojojua suhuorotu patariquiaa. Pueyasoori cuno taucuaca jataquiaari nio jiyajiniji, saniniuujia pa supuetanaa jiya na quiniuria. Cuno suhuorotuuri pa supuetanaata quiquiaariija, David jaara jiyaniijia quiquiaari. <sup>46</sup> Jacoboori pa supuetanaa jiyaniijia David supuetana quiquiaarijuhuaj. Davidri Pueyaso tojijia quiquiaarijuhuaj. Pueyasoori na shuquiritiaquiaari. Naaratej, Davidri Pueyaso Secojojua tiara tianu paniquiaari juucua. <sup>47</sup> David niyanu Salomón cutaraari Pueyasora tiaquiaari. <sup>48</sup> Naajaa, jiyocuacaanu Quijiaari maja na quiniu pueyano tiasanojiniaaco. Tariucuacaanu Pueyaso sequesano caminiujiuniaari naa naajiotaquiaari Pueyaso sequesano nojuaja:

<sup>49</sup> “ ‘Jiyocuacaanuuri cua quiquio. Jiyari saniniuujia cua niohuaca cua niaja. ¿Taamueca tia nia tianutaniya quirijaarani?’ Jiyaniijiaari naa sequeyaquij. ‘¿Taa nia sequeyani: na mueecujuara pa miiri, shuquiriaatia na quiijara? Maja. <sup>50</sup> ¿Majateeri puetunu nio jiyajinia niquishanojuanaa cua juaashiquiata cua miishanocua, jiyocuacaanujuhua?’ ”

<sup>51</sup> Estebanri socua nojori sequequiaari:

—¡Niaari tojtiaashijianucua! ¡Niaari Pueyaso sequesano ruuretaquiaa juhua nia supuetanaa! Nioojaari maja juhua Pueyaso pueya jiuujia. Nia numaacaari maja Pueyaso rupaa na tojiniu paniniu. Niaari pueyaracaanu tojiaquia Pueyaso Sohuanu niishitiojosano. Niaari Pueyaso tojyashijianucua juhua nia supuetanaajuhua. <sup>52</sup> Nia niishiritioj, ¿nia supuetanaate quena niquiriyatujua Pueyaso sequesano caminiujiuniaa miitiaaquiaari? Nia supuetanaari puetunu Pueyaso sequesano caminiujiuniaajanaa miiquioquiaari naquiya. ¿Quenaaja niquiriyatu nojorijinijiniote miitiasoo curequiaari? Maja. Nojoriiri tari puecoquiaari noo pueya, canapuate maninia miijia mijiria niriqianojiniji pohuatanuuquiaaricuajani. Cuno maninia miijia jaara tiuquiaari, niaari sesa miijia pueya na niqutiocanu nojori mosocoriquiano. ¡Niaari naa mocanu Pueyaso Jiyarosantej! ¡Niaari pueyaracaanu Pueyaso ruuretaquiaa! <sup>53</sup> Naacuajitij jiyocuacaanuji Pueyaso seya pohuatasano Pueyaso rootasano niaarani, majaari cuno nia tojiniu quiquiaajuhua.

### *Jesu ruuretajaca mosacari Esteban*

<sup>54</sup> Pueya jaara naa tojtiquiaari Esteban sequesantej, nojoriiri jiyanojua juaaquioree. Na juaaniutia miaquenuuree na quiaacari. <sup>55</sup> Jiyanojua Pueyaso Sohuanu cumaquishacari Esteban jiuujia, nojuajaari jiyocuacaanu mauquiaari. Saaja Pueyaso shacantuuca niqiriiri. Jesu niqiriijiaariuhua na Que Pueyaso miaquetajara nujuaano. <sup>56</sup> Naa na niquishacaritij, nojori sequere juucuaari:

—¡Nia niquishuriniaja! Jiyocuacaanu niqiyia riatenonijia. ¡Pueyaso Niyanu niqiyani-  
jia na Que miaquetajara nujuaano!

<sup>57</sup> Pueyari na numaaca mishiquiojonuuquiaari saaja, maja na tojtiniuria Esteban sequesano. Jiyanojua sariyocuatiquiaari na juaaniutiaari. Na nuhuaji, Estebancua



cocuatequiaariiri. <sup>58</sup> Na caponeetuquiaari Jerusalén tiacajiniijiiri. Tiacajiniji tohuatesaaree tamamaari. Na tohuatesaanu nuhuaji, tii na jacutuquiaari saitiaari. Na jacuturiquianoori na toqueya cojuatequiaari tamonu mashaja. Nojori toqueya cojuana sesa quiquiaari Saulo. <sup>59</sup> Nojori jacutusacari saitia Esteban, Estebanri Pueyaso secojoriquiaa naatej:

—Jiyaniijianaa, cua sohuanu quia riri quia shuriucuaa.

<sup>60</sup> Na nuhuaji, mojuquetareeri. Jiyanohua nacaquiaari na nuhuajiriaari:

—Jiyaniijianaa, majaari nio pojori saniitionu naa nojori miiniuucua janiyatej!

Naa na sequenu nuhuajitij, cusoqueeri.

## 8

### *Saulo miishacari naquiya Jesuucua tiuuniaa*

<sup>1-2</sup> Pueyaso panijiaca pueyari Esteban quete patuquiaari na jamotusocoriquiano. Nojoriiri Esteban sapuequiaari. Cuno juuca, Jerusalén tiacajinia quiniaa Judiocua-caari juhuacatecara miitianu coteequiaari puetunu Jesuucua tiuuniaajanaa. Nocuaji, puetunu nojorijianaari tiji mashiquiaari. Saaja Jesu saquiriojosano doce pueyari tii cureequiaari nojori nuhuaji. Nojoriiri na mashishacari niyaquejoquiaari puetunu Judea jiyajiniaajanaa, Samaria jiyajiniaranio. <sup>3</sup> Jiyacari Sauloori socua jiyacateriquiaa miitianu Pueyaso pueya. Nojori pajequiaari puetunu tiacajiniaqueyajanaari Jerusalén tiacajinia. Na riuriasacari, na jayoquiaari tiacojiiri, na nujuatejosocoriquiano nujuatejojuajinia, maajipohua, canuunio.

### *Jesujiniji pohuatasacari Samaria jiyajinia*

<sup>4</sup> Mashiyocuatuno pueyari puetunu na quiasacojuanaa Jesujiniji pohuatanuuquiaari pueya niquiara. <sup>5</sup> Nojorijinijinio quiquiaarijuhuaj Felipe. Nojuajaari mashiquiaarijuhuaj tamonu tiacajiniara Samaria jiyajinia. Cuno tiacajinia juhuacatecara pohuataquiaari Jesucristojinijiaarijuhuaj. <sup>6</sup> Puetunu pueyajanaari Felipe pohuatasano tojinuuucua rerejoquiaari. Pueyari sanaa na tojtiaquiaari. Nojoriiri Felipe shootiaquiaari tacuriitia, na miishacari jiyajeneta casaa Pueyaso cumaacata. <sup>7</sup> Samaruhua tohuatanijioriquiaa pueyajiniijiiri. Samaruhua tohuareetasacari pueyajiniji, sariy-ocuaquiaari. Queraatia cumatacuruhua cusosuhuari naatanijosaaquiaarijuhuaj, sesacujanucuanio. <sup>8</sup> Naaratej, puetunu cuno tiacajinia quiniaa pueyajanaari jiyanohua shuquiriquiaari.

<sup>9</sup> Shimiacuuri cuno tiacajinia quijiajuhuaj. Na sesa quiquiaari Simón. Cuno tiacajinia quiniaa pueyari na pueretujua. Puetunu pueyajanaa sapojouaari jiyajeneta na miiijosanota. Naa sequeja tama na cuaqueyajaarijia: “Janiya cutaraari tojishano pueyanoni”. <sup>10</sup> Puetunu pueyajanaari na tojjia quiquiaari, camarucua, muerasunio. Nojoriiri sequetuquiaari: “Nio pueyanoqui jiyanohua Pueyaso cumaaca jiitiaa”.

<sup>11</sup> Puereeta Simón miishacari pueyaracaanu, pueyari sapojosaaquiaari. Naaratej, pueyari na sequesanoocua tiuquiaari. <sup>12</sup> Na nuhuaji, nojori jaara tojiquiaari Felipe pohuatasacari Pueyaso rupaa, Jesucristojinijiuhuaj, cuno Samaria pueyari Jesuucua tiuquiaari cutara. Canuu, maajipohuajuhuj, nojoriiri tiuquinijosaaquiaari moojinia. <sup>13</sup> Simónri Jesuucua tiuquiaarijuhuaj. Tiuquinishaaquiaarijuhuaj. Na tiuquinishaanu nuhuaji Felipeecua sacuaquiaariiri. Felipe shootiaquiaari tacuriitiaari Felipe miiijosacari jiyajeneta casaa Pueyaso cumaacata.

<sup>14</sup> Jerusalén tiacajinia Jesu saquiriojosano pueya jaara tojiquiaari taa Samaria pueya tiuuri Pueyasoocuanu, nojoriiri cuniquiji jiyarotuchiaari Pedro, Juannio. <sup>15</sup> Nojori tiuquishacari Samaria jiyajinia, cuniqui quiniaa Pueyaso pueyacuara secojotureeri nojori jiuujajinia Pueyaso tiuquitiniuria na Sohuanujuhuj. <sup>16</sup> Majaari Pueyaso Sohuanu tiuquiniu quiquiaari juhuanouaja nojori jiuujajinia. Nojoriiri nareja moojinia tiuquinijosano quiquiaari Jesuucua nojori tiuushacari. <sup>17</sup> Pedro, Juan, cunora na juaashiquia niojoquiaari pueyacu, nojoriicuaa na secojotusacari Pueyaso. Naa nojori miishacaritij, Pueyaso Sohuanuuri cuno pueya jiuujajinia tiuquiquiaari cutara.

<sup>18</sup> Simónri niquiriquiaa taa Pueyaso Sohuanu tiuquiquiaari pueya jiuujiajania Jesu saquirojosano pueya niasacari na juaashiquia nojoriicuaani. Naaratej nojuajaari Jesu saquirojosano pueya niqutionu paniquiaari cumaneeca juucua, cuno cumaaca na jiitianurajuhuj. <sup>19</sup> Simónri naa sequequiaari nojori:

—Cua niqitiotureja cuno cumaaca. Janiyacua Pueyaso Sohuanu panijiaacua niare cua juaashiquianijia, Pueyaso Sohuanu nojori masenurajuhuj, taa nia miyacuaani.

<sup>20</sup> Pedroori na sequequiaari saaja:

—¡Quia cumaneeca cuaara shaajeera quiatajuhuj! Quiaa naasucuaari jiyaniya Pueyaso Sohuanu cumaneecata masesano. Quia niishiri, Pueyasoori na Sohuanu niqutioquiaa nareja na tojitiajaca pueya. <sup>21</sup> ¡Pueyaso Sohuanu cumaacaari maja quiarano! Quioojiaari jiyanojua sesa quiya Pueyaso niqiara, nocuaji maja na cumaaca niqitiosaanu quiniutianiya quiajaniya. <sup>22</sup> Jiyanojua sesa quia niishiriojosanojiniji quia pishiriohua. Pueyaso quia secojore na jiyanooniuria quiajaniya naa quia niishiriojosanojiniji quioojiajiniatej. <sup>23</sup> Niishiyacuajaniija, quiaari juhua cartesoo quiyajaa, sesa miiniuucua jiitinio quia quishacarijia. Quioojiaari puera najiquitishano quiyajaa jiyanojashijia quia quiniucuajuhuj.

<sup>24</sup> Simónri na riucuaquiaari:

—¡Pueyaso nia secojorequi cucuara, mariqui cua saniitioreeri taa nia sequeyacuajani!

<sup>25</sup> Na nuhuaji, Pedroori Juanta socua pohuataquiaari Jiyaniija Pueyaso rupaa cuno pueya niqiara. Pueya niqiara pohuatajureeri socua Samaria jiya tiacajinia, cuniqui quiniaa tiuuniuria Jesuucuajuhuj. Maninia rupaari Pueyasojiniji pohuatasaaquiaari queraatia tiacajinia, Samaria jiyajinia. Na nuhuaji, Pedroori tacatequiaariuhua Juanta Jerusalén tiacajinihua.

### *Jesujiniji Felipe pohuatasacari Etíope pueyano*

<sup>26</sup> Cuno nuhuaji, Pueyaso seruuri Felipeecua rosequiaari. Na sequeeeri:

—Quia sanere Felipeana. Pananu shuucuajiria nucuama quia quiaare. Quiocua tiuquishii tamonu nuujinia, Jerusalén tiacajiniji neteja Gaza tiacajiniara. Cuno nuuri cariiquia jiyacuma neteya.

<sup>27</sup> Felipe tojishacari naatej, nojuajaari ritia sanequiaari. Nucuama quiaquiaariiri. Nuujinia naacuneetooquiaari saaja Etiopía jiyajinijinio pueyanotaari. Cuno pueyanoori riyacajajaaju quiquiaari Etiopía jiya jiyaniija naacutana na quiniucuua, maaji na jiyaniija quiniucuua. Na jiyaniija sesa quiquiaari Candace. Cuno maajiiri cuno pueyano jiyatequiaari Etiopía jiya casami jiitianara, na cumaneeca cojuariquiano nera. Nio Etíope pueyanoori Jerusalén tiacajinia quiaquiaari Pueyaso secojonuucua. Cuniquiji tacateyanoori Felipeeta naacuneetooquiaari nuujinia. <sup>28</sup> Nucuacaji na tacatesacariuhua na jiyajinihuara, caballoori na jaatariquiohua, rucuanajotajarujinia cajiiano. Pueyaso rupaa serojoriquiohuari, tariucuacaanu Pueyaso sequesano caminiujiumia Isaías naajoneejiniji. <sup>29</sup> Pueyaso Sohuanuuri jiyacari Felipe sequequiaari:

—¡Ritia nocua quia catecanore! Quiocua nata quiaare.

<sup>30</sup> Jaara nocua catecanoquiaari, Felipeeri Etíope pueyano tojiquiaari Isaías naajiosano serojiyano cojuata. Felipeeri na nequesotaquiaari:

—¿Quiaate quia serojosano niishiya casaa na sequeyani?

<sup>31</sup> Etíope pueyanoori na riucuaquiaari:

—¿Janiyatucua taa niishirinio, tamonu jaara cua serojosano niishitioyaquiri janiyani? Felipe sequeeeri:

—Miji quia tacama. Cua shuriucua quia cajishii.

<sup>32</sup> Etíope pueyanoori nio serojoriquiaa tariucuacaanu Pueyaso Rupajinia:

“Juhua borrego jaatucusaquiaariiri mosocoriquiano. Naatej, taa borregocuaani sanaa niqiyari na cajaca miatejosacari, nojuajaari naa quiquiaarijuhuaj. Maajari na sariyocuanu quiquiaari quenaaja naquiya na miishacari. <sup>33</sup> Naquiya miishaquiaari cararaatiaari. Nocua namiyaquishaquiaariiri. Mashaja na

quishacarijia, nojuajaari shaajasaquiaari nio jiyajiniji. Cunora, majaari na muetunu quiquiaari. Niquiohuajuuri mosaaquiaari”.

Etíope pueyanoori nio serojoriquiaa Pueyaso rupaajiniji.

<sup>34</sup> Na nuhuaji, Etíope pueyanoori Felipe nequesotaree:

—Cua sequere pueyanonaa, ¿canajiniji Isaías pohuataa niya na naajiosanojiniani? ¿Tama nojuajiniji pohuataatee? ¿Tamonujiniji soj?

<sup>35</sup> Felipeeri Etíope pueyano niishitiojonu coteequiaari Jesujiniji shusha na serojosano Isaías naajiosanojiniji. Felipeeri naa na sequeree:

—Isaías naajiosacari nio, nojuajaari juhuacarijia Jesujiniji pohuataquiaari, taa quiarjia Jesu miishaacanu taraatiacuajani.

Felipeeri socua na pohuataquiaari Jesu miishanojiniji. <sup>36</sup> Nojori quiasacari nucuaco, caminiaco shuriuquioco tajitariquiaari. Etíope pueyano jaara caminiaco niquiquiaari, Felipe sequereeri:

—¿Majate maninia cua tiuquinishaanura niya?

<sup>37</sup> Felipeeri na sequeree:

—Quiaa jaara seetanujuanaa tiuuri Jesuucua, quia naata tiuquinishaanu.

Cuno pueyanoori na riucuarree:

—Jaa, janiya Jesucristoocua tiuyani. Nojuacuajaari Pueyaso Niyanu. Na niishiyanjia.

<sup>38</sup> Etíope pueyanoori jiyamitia na seru sequeree:

—Quia nujuaretare rucuanejotaja.

Felipeta rosetamaa caminiacojiniaari. Felipeeri tii na tiuquiniquiaari Jesuucua na tiushacari. <sup>39</sup> Nojori tacatasacariuhua caminiacojiniji, Pueyaso Sohuanuuri Felipe riquiaari canashiyaquiji cuno Etíope pueyano shuriucuaji. Nojuajaari juucua taca-reecuaciaari na tiuquininiaacua. Majaari socua na niquiniu quiquiaari Felipe. Tariucua tiuquinishanoori shuquiriaatia quiaquiaariuhua na jiyajiniohua. <sup>40</sup> Pueyaso Sohuanuuri Felipe jataquiaari Azoto tiacajinia. Nojuajaari cuniquiji puetunu tiacajinia poojotaquiaariuhujanaa Pueyaso rupaa Jesujiniji. Naa tiuquishuhua Cesareya tiacajiniaari.

## 9

### *Saulo jatasacari Jesu tojiniaara na quiniuria*

<sup>1</sup> Sauloori jiyacari pueyaracaanu Jesuucua tiuuniaa miananajoriquiase. Nojori puecoonu paniquiaari puetunujuanaari. Naaratej, Sauloori pueyacuara secojonaa jiyaniijiaacua quiaquiaari. <sup>2</sup> Naa na sequeeseri:

—Damasco tiacajinia quianu paniyanijia. Quiria quia naajiore cuniqui secojojua tiaca camarucuaacuara Damasco tiacajiniani, cuno naajioneeta cua tiuquiiijionura nojori rerejojuacajinia. Jesu tojiniaa pueya morojonu paniya cuniquijinjia. Janiyari cua quioosano jaatucunutaniya niyara Jerusalén tiajinianani, canuu, maajipohuanio.

<sup>3</sup> Naacuajitij, nucuaco Saulo quiasacari, tari quenaacoturiquiaa Damasco tiacajiniaraari. Jiyacaritij, ¡shacantuucaari canashiyaquiji nunuquiaari jiyocuacaanuji!

<sup>4</sup> Sauloori juhua jatasaaquiaari na cari. Na pojosaquiji tojiquiaari rupaa na sequeyanoori:

—¡Saulonaa, Saulonaa, cua tojiri! ¿Casaara quia miitiaa puera janiyani?

<sup>5</sup> Sauloori na riucuarree:

—¿Cantequia Jiyaniijianaa?

Jiyocuacaanuji nocua pocuaanoori na riucuaquiaari:

—Janiya Jesuni. Quiaari puera cua miitiaajanaajataj, cucua tiuuniaa quia miitiasacari puera. Naa quia miishacari puera quia juaaniutatej, quiaari tama quia cuaqueya sesoyajaacujua. Quiaari juhua juaajia pueyano. Quiaari quia juaaniutia juhua jiohuaca patiyashijia.

<sup>6</sup> Sauloori na puerenuta na tetecasacari na sequequiaari:

—Jiyaniijianaa, ¿casaa quia paniya cua miiniuriani?

Jiyaniijiaari na sequeree:

—Quia sanere. Naajaa quia tiuquishii Damasco tiacajinia. Quiaari tii sequesaanutaniya cua panishano quia miiniuria.

<sup>7</sup> Saulota quiojonaari shiriiquitiuquiaari nojori jaara tojitiuquiaari jiyocuacaanu jii pocuanu. Nojoriiri juucua na niquiniu paniquiaari. Saaja shaaquiiri quiriquiaa.

<sup>8</sup> Na nuhuaji, Sauloori na pojosaquiji sanerohua juucua. Majaari na naata niquiniu quiquiaari saaja. Nata quiniaari na jaatucutaquiaari Damasco tiacajiniara. <sup>9</sup> Nojuajaari tii camueenujuquiaari jiuujianaraca juuca, cariyujuaru na quishacari. Majaari na miaquenu quiquiaari pueyaracaanu cariyujuaru na quishacari. Ratuyaquiquiaarijiaariuhuj.

<sup>10</sup> Tamonu Jesuucua tiuunia pueyanoori Damasco tiacajinia quijia. Na sesa quiquiaari Ananías. Jiyaniijia Jesuuri na sequequiaari juhua na maquenujinia:

—¡Ananíasnaa!

Nojuajaari na riucuaquiaari:

—¿Casaate cua Jiyaniijianaa?

<sup>11</sup> Jiyaniijiaari na sequere:

—Quiarijia quia quiaare Saulo pajenuucua. Nojuajaari noo Saulo, Tarso tiacajinijinio pueyanotej. Nojuajaari Judas tiajinia quiya. Judas tiaari jati tamonu nuujinia quiya. Cuno nuu sesa, Nuu Maniniu. Sauloori cuno tiajinia secojiya Pueyaso. <sup>12</sup> Nojuajaari juhua na maquenujinia tari niquirii quiajaniya nocua tiuquiyano. Tari quia sesa niishiyajaariuhuj. Sauloori tari quia niquirii na maquenujinia. Quiaari quia juaashiquia niariquiaa nocua, na namijia jeequenuhuara, maninia na niquinihuara.

<sup>13</sup> Ananías jaara naa tojiquiaari Jiyaniijia sequeyanotej, nojuajaari sequere:

—¡Cua Jiyaniijianaa, queraatia pueyari cuno pueyanojiniji cua pohuatacanuni! ¡Quiocua tiuuniaa pueya miitiaquiaa taraatia Jerusalén tiacajiniaari! <sup>14</sup> Pueyacuara secोजनाa jiyaniijia jiyarosanonaari cunohuj, quiarijia niya tiuquiriini. ¡Nojuajanaari quia secोजनाa pueya quioonutaniya, morojonucuaca canaa na jiyatasocoriquiano Jerusalén tiacajiniara!

<sup>15</sup> Jiyaniijiaari Ananías sequequiaari saaja:

—Naajaa, quia quiaare. Janiyacuajaari cuno pueyano saquiriojoquiaari tarijia cua jiyaramiquishocoriquianoni. Nojuajaari tamasa jiyacajinia poojotanutaniya janiyajiniji taucuaca niquiara. Taucuaca jiyaniijianucua poojotanutaniya janiyajinijiaariuhuj, Israel pueyano. <sup>16</sup> Janiyacuajaari Saulo niishitiojonutaniyani taa jiyanohua naquiya pueya miitianutaniya nojuajani, janiyajiniji na pohuatasacari.

<sup>17</sup> Naaratej, Ananíasri quiaquiaari. Judas tiajinia tiuquishiiri, tee Saulo quiriquiaacua-jani. Na tiuquishacari, Sauloocua niasee na juaashiquiaari. Na sequereeri:

—Cua tarajanunaa, pa Jiyaniijia Jesu, quiocua muetarucuaa nio tiaca nucuamaji niyara quia nishacarini, nojuajaari quiocua cua jiyaroreeni. Cua jiyaroreeni quia namijia jeequenuhuara maninia, Pueyaso Sohuanu tiuquiniuria quioojiajiniajuhuaj.

<sup>18</sup> Jiyacari ritia totequiaariiri juhua sapitiaaja cocua Saulo namijiajiniji. Maninia niquiquiaariuhua na nuhuajiiri. Na nuhuaji, Sauloori ritia tiuquinishaaquiaari moojinia Jesuucua na tiuushacari. <sup>19</sup> Na nuhuaji, miaquereeri, raturuhuaariuhuj. Noojia jatarduari. Pasaja camueenujuquiaari Damasco tiacajiniaari Jesuucua tiuuniaa pueyata.

### *Jesujiniji Saulo pohuatasacari Damasco tiacajinia*

<sup>20</sup> Sauloori juhuacatecara coteequiaari Jesujiniji pohuatanu narta Judiocuaca secojuuca tiajinia Damasco tiacajinia. Nojuajaari pueya niquiara na pohuatasacari sequeja:

—¡Jesuuri seetanujuanaa Pueyaso Niyanu!

<sup>21</sup> Naa nojori tojishacari Saulo pocuaanotej, pueyari shiriiquiquiaari. Na shiriiquitiu-niutia sequetureeri:

—Nio pueyano pocuaani, ¿majate nootej, naquiya miiquiaa Jesuucua tiuuniaa pueya Jerusalén tiacajinatej? Niyara niyareejaariuhuj, Jesuucua tiuuniaa pueya na morojonura. Nojuajaari nojori jiyatanu paniriquiaa juucua Jerusalén tiacajinia secोजनाa jiyaniijianucua na niqutiosocoriquiano, nojori nujuatejosaanura.

<sup>22</sup> Sauloori socua noojia cumaquiquiaari Pueyaso Sohuanuta, jiyanohua maninia na pohuatanura puetunu juucajanaa. Nocujia pataquiaari saaja Damasco tiacajinia quiniaa narta Judiocuacaari. Sauloori maninia pohuataquiaari tariucuacaanu Pueyaso

Rupaajiniji, seetanujuanaa maatia pueya niishiniuria Jesuuri Pueyaso Jiyarosano pocuaji tacuriquiaano.

*Saulo mashishacari narta Judiocuacaacuaji*

<sup>23</sup> Quiniqui Saulo camueenujusacarijia pueyaracaanu, narta Judiocuacaari nocuara rojotooquiaari na motunura juucua. <sup>24</sup> Tamonuuri Sauloocua jiyanoocua. Naa na sequequiaariiri:

—¡Quiaa monu panishiya sacaj!

Judiocuacaari na sashiriquiaa tiaca tohuateyaji, na monu paniniutia juucua Saulo. Na shanacuturiquiaari juuca, niucuanio. <sup>25</sup> Damasco tiacaari puereetuuca sohuacaraca quiquiaari puetunu na shocuajanaa. Jesuucua tiuuniaa pueyari saaja Saulo mashiquiquiaari niucua. Sohuacajiniji roshinitiasaaquiaari jiyocuacaanu puereetuuca canaasatujiniaari. Sauloori naa mashiquiaaritij.

*Saulo quishacarihua Jerusalén tiacajinia*

<sup>26</sup> Na tiuquishacarihua Jerusalén tiacajinia, Sauloori Jesuucua tiuuniaa pueya rupuenu paniquiaari juucua. Nojoriiri saaja na puerequiaari. Na puerenuta sequequiaariiri:

—Pueyasocua tiuujiaquinio naasucua jiyanotej.

<sup>27</sup> Bernabé cutaraari maja na puerenu quiquiaari Saulo. Nojuajaari Jesu saquiriojosano pueyacu na jiyataquiaari, Saulo niishiniuria puetunu nojorijianaa. Bernabeeri Jesu jiyaramiquishano pueya sequequiaari:

—Sauloori pa Jiyaniijia niquiquianu Damasco tiacaacua neteja nucuamaji. Jiyaniijiaari nata pocoojocanu. Sauloori cunora juhuajaniya pohuatariquiaa Jesujiniji Damasco tiacajinia.

<sup>28</sup> Sauloori narta Jesuucua tiuuniaa pueyata jijojequiaari cuniquijia Jerusalén tiacajinia. Nojoritia rucuanajojuuari, mariyata Jesujiniji pohuataja juhuajaniyari. <sup>29</sup> Saulo pocuasacari, nojuajaari seetanujuanaa cumaacata pocuaquiaari Jiyaniijia Jesuucua na tiuushacari. Griego rupaa pocuanaa Judiocuacata pocojoquiaariiri. Noojiaqueyari Saulota juayonuutaquiaari saaja. Nojoriiri socua na motunu paniquiaari. <sup>30</sup> Jesuucua tiuuniaa pueya jaara niishiquiaari naatej, nojoriiri Saulo jiyataquiaari Cesareya tiacajinia. Cuniquiji jiyarosaaquiaari na raja Tarso tiacajiniaari.

<sup>31</sup> Na nuhuaji, puetunu Judea jiyajinia Jesuucua tiuuniaa pueyajanaari panaatia quiquiaari quenaaja, Samaria jiyajinia, Galilea jiyajinianio. Tamasacaari maja tari naquiya na miishaanu quijia. Nojoriiri socua Jiyaniijia tojitiajacara quiquiaari nojori pueretusacari nojori mariqui na tojiyashijiara quiriohuari. Pueyaso Sohuanu naacacari nojori, Pueyaso pueyari socua canequiaari queraatiara.

*Pedro naatanishacari Eneas*

<sup>32</sup> Pedroori pueyaracaanu rucuanajojuua Jesuucua tiuuniaa pueyacu, nojori na niishitiojonura socua Jesujiniji. Tamonu juuca nojuajaari Pueyaso pueya niquiniuucua quiaquiaari Lida tiacajiniajuhuaj. <sup>33</sup> Tii quiriquiaari tamonu pueyano. Na sesa quiquiaari Eneas. Cuno pueyanoori cumatacuruhuaana cusosu quijia. Tari na shocojoquiaari ocho marijia pootia na matasacari na matujinia. <sup>34</sup> Pedroori cuno cusosu sequequiaari:

—Eneasnaa, ¡Jesucristo tari quia naatanirii! ¡Quia sanere! Quia matu quia jecare.

Eneasri ritia sanequiaari. <sup>35</sup> Puetunu pueyajanaa Lida tiacajinia quiniaa, mariyata Sarón tiacajinijinio pueyajuhuj, puetunu nojorijianaari nio miishano niquiquiaari. Nojoriiri cunora tama na supuetanaa niishitiushano casaajaaja cartequiaari. Puetunu nojorijianaari Jesuucua tiuquiaari.

*Dorcas samiitianishaanujiniji pohuatasano*

<sup>36</sup> Jiyacarijuhuaj, Jope tiacajinia quiquiaari tamonu maaji. Na sesa quiquiaari Tabita. Tabitaari griego rupaajinia sequesano “Dorcas”. Dorcasri saniniujia pueyano rupaajinia sequeshiyacujua “nequeru”. Cuno maajiiri Jesuucua tiuujia quiquiaari. Nojuajaari maninia miijia maaji quiquiaari. Casamiijuniucua pueya niquitiojua nareja na jiitiasanojinijiiri. <sup>37</sup> Na nuhuaji, Pedro quishacari Lida tiacajinia, Dorcasri cusoquiaari.

Na cusonu nuhuaji, pueyari macu cuaqueya jeequequiaari. Na jeequetunu nuhuaji, nojoriiri na niaquiaari cuno tiajinia nataco, tamonu sohuacajinia. <sup>38</sup> Jope tiacaari cateca quiya Lida tiacajiniji. Pedroori Lida tiacajinia quiriquiaajaa Dorcas shaajesacari. Jesuucua tiuuniaa pueyari tari niishiriquiaa tee Pedro quiyani. Naaratej, caapiqui pueyano jiyarotureeri Pedro na numootenura. Nojoriiri na jiyarosano caapiqui pueyano sequequiaari:

—Niocua naa Pedro sequesee: “Quia quiaarena ritia Jope tiacajinia. Majaari tarishiniu”.

<sup>39</sup> Pedroori nojoritia tacatequiaariuhua Jope tiacajinihua. Na tiuquishacari, quiniqui quiniaari Pedro tiuquiniquiaari macuucua sohuacamara. Mashiquiopueeri Pedro shocua rerejoquiaari na nujuquetunuta. Nojoriiri Pedro niqitijioquiaari Dorcas cusupuenuusano toqueya, cacojoquiyanio. Cunoori quiquiaari na cusupuenuusano saminio na quishacarijia. <sup>40</sup> Pedroori jiyacari puetunujuanaa pueya tohuanijioquiaari sohuacama. Na nuhuaji, nojuajaari mojuquetaquiaari Pueyaso na secojonura. Na secojonu nuhuaji, macuucua tacatereeri. Na sequereeri:

—¡Dorcasnaa, quia sanere!

Macuuri juhua na maquenujiniji niucuaquiaari. Na niquishacari Pedro, cajiriiri. <sup>41</sup> Pedroori na juaashiquiajiniji na quiaquiaari. Na nujuatereeri. Na nuhuaji sequequiaari Jesuucua tiuuniaa pueyari, mashiquiopuenio:

—Miji pueyanaa, jnia nimia!

Nojori tiuquitasacari, saaja maaji niqutiushii nujuanoori, tariucua saminio. <sup>42</sup> Pedro miishanoori puetunu Jope tiacajiniajanaa niishishaaquiaari. Queraatia pueyari cunora Jesuucua tiuquiaari. <sup>43</sup> Pedroori na nuhuaji janiya camueenujuquiaarijiaara Jope tiacajinia. Nojuajaari Simón tiajinia quiriquiaa cuniqui na camueenujusacari. Nio Simónri piiquia casaata shoqueya majeetejua quiquiaari, casaara shipinishocoriquiano shoquejiniji.

## 10

### *Pedro quiasacari Cornelio niqiniuucua*

<sup>1</sup> Cesareya tiacajinia quiquiaariiri tamonu tahue, Romano soldadohua jiyaniijia. Na sesa quiquiaari Cornelio. Na soldadohuari cien quiquiaari. Cuno soldadohua maanuri sesojosaaquiaari “Italiano”. <sup>2</sup> Cornelioori Pueyaso secojojua pueyano quiquiaari, mariyata puetunu na tiajinia quiniaatajanaano. Nojuajaari seetanujuanaa Pueyaso shuquiritiniu panijia quiquiaari. Cornelioori queraatia na cumaneecajiniji niqitiojojua quiquiaari nareyajuhuj, casamijuniucua Judiocuaca niqitiosocoriquiano. Pueyaso secojojua pueyaracaanuuri. <sup>3</sup> Tamonu juuca, tariucua pananu piriuushacari, Cornelioori Pueyaso seru niqiquiaari juhua na maquenujinia nocua niyano na tiajinia. Na seque-seeri:

—Cornelionaa.

<sup>4</sup> Cornelioori saaja Pueyaso seru shootiaquiaari na shiriiquiniutia. Na nuhuaji na riucuaereeri:

—¿Casaate jiyaniijianaa?

Pueyaso seruuri na sequereeri:

—Pueyasoori quia secojosano tojiquiaa. Quia timitiaari capora quia quiniuucua, quia jiiitiasanojiniji quia niqitiosacari nareja casamijuniucua pueyara. <sup>5</sup> Naaratej, quia seya quia jiyaramiquiri Jope tiacajinia. Nojori cuuara Simón masuunuucua quiaara. Na sesaari Pedrojuhuj. <sup>6</sup> Nojuajaari na sesaanucua pueyano tiajinia quiya. Tia camaruuri shoque majeetejua piiquiajinia. Cunoori na poonijiosano. Na tiaari shoniniacu caminia casaqueyaji naniya. Simón Pedroori quia sequenutaniya casaa quia miiniutianiyani Pueyaso jiyanooniuria quiajaniya.

<sup>7</sup> Pueyaso seru jaara quiaquiaariuhua, Cornelioori caapiqui na seyajinijinio piiquiaari, niqiriyatu na soldadonio. Cuno soldadoori Pueyaso secojona quiquiaarijuhuj. Maninia na jiyaniijia naacujua quiquiaarijuhuj. <sup>8</sup> Cornelio jiyarosaacarijia na seya,

nojori pohuataree coteenuuri puetunu Pueyaso seru sequesanojuanaa nojuaja. Na nuhuaji, nojori jiyaramiquirii Jope tiacajiniaari.

<sup>9</sup> Tariqui, Cornelio seya quiasacari nucuaco, nojori quenaacotusacari tari Jope tiacajiniara, Pedroori jiyacari tacaquiaari tia cacojiria, Pueyaso na secojonura. Pananu quishacari pa nacasuhuojuajinia quiquiaari jiyacari. <sup>10</sup> Nojuajaari jiyacari miaajeriquiaa. Neraari juucua sumatusaariquiaacuaja. Nera sumatusacarijia, Pueyasoori casaa na niquitiquiaari juhua na maquenujinia, na quishacari tia cacojiria. <sup>11</sup> Pedro niquishacari jiyocuacaanu, saaja jiya cajiniocua niquirii riateyanoori. Sonaque queraque niquirii tiji roshinitiashiyanoori, na nacatucujiniji morojotasano. Pedroocua roshinitiasaareejanaari. <sup>12</sup> Sonaque jiniacuma quiriquiaari puetunu casaajanaa: sacocua, jiyacua rucojuacanio, jiyocuacaanu jaacuatujuacajuhuj. Cuno casamiiri quiquiaari Judiocuaca pueresano casaa puetunujuanaa. Maja nojori miaquesano. <sup>13</sup> Jiyacaritij, Pedroori rupaa tojirii jiyocuacaanuji na sequeyano. Naa sequeriquiaari:

—¡Pedronaa, nocua quia sanere! Quia puecoore quia miaquesocoriquiano.

<sup>14</sup> Pedroori na riucuaaree:

—¡Maja cua Jiyaniijianaa! ¿Janiyatucua taa miaquere sacuaraatia cua miaquesooni? ¡Cunocuaajaari tarijia quia sequesano canaa pueresocoriquiano!

<sup>15</sup> Jiyocuacaanuji rupaari socua na sequerohua:

—Pedronaa, majaari miaquesocoriquiano Pueyaso jiyatesano soonu.

<sup>16</sup> Pueyasoori naa pacutejoquiaari sequenu Pedrotej. Na nuhuaji, sonaqueeri tacaniti-saaquiaariuhua jiyocuacaanu. <sup>17</sup> Pedro tacaashacari naa na niquiniuucua juhua na maquenujinatej, jiyacari Cornelio jiyaramiquishano pueyari tia tohuateyaji tiuquijioquiaari, Simón tia na pajetunura. Cornelio pueyari nequesoretariquiaa nucuacoji nojori tiuquiniuria Simón tiajinia. <sup>18</sup> Nojoriiri tohuateyaji nacaquiaari:

—¿Niya quiyate Simón jiyaniishano pueyano? Na sesaari Pedrojuhuaj.

<sup>19</sup> Pedroori juhuanajuaja niishiriojoriquiaa na niquishanojiniji juhua na maquenujinia tia cacojiria. Pueyaso Sohuanuuri jiyacari na sequeree:

—Pedronaa, jiuujianaraca pueya quia pajeya. <sup>20</sup> Tariucuaaja. Quia sanerohua. Nojoriicua quia roseyarohua. Quiocua nojoritia quiaarohuajuhuj. Majaari taacanuunu. Janiyacuajaari nojori jiyaramiquiriucuaa quiocuanu.

<sup>21</sup> Pedroori Cornelio jiyarosano pueyacua rosequiaari. Nojori sequeeseeri:

—Janiyacuaja nia pajesano pueyanoni. ¿Casaacua nia niyareecuarani?

<sup>22</sup> Nojoriiri na riucuaaree:

—Canaa jiyaniijiaari Romano soldadohua jiyaniijia. Na sesa Cornelio. Nojuajaari canaa jiyarorucuaa quiocuanu. Maninia miiija pueyanoori. Jiyaniijia Pueyaso tojjiajaariuhuj. Puetunu Judiocuacajanaari maninia na miiniuucua na panitiuya. Pueyaso seruuri na sequerucuaa, nojuaja masuunura quiajaniya na tiajinia quia quianura, na tojiniuria puetunu quia sequesanojuanaa.

<sup>23</sup> Pedroori Cornelio pueya tiuquinitiaquiaari na quijia tiajinia. Nojori sequereeri:

—Niyaja nia maquesejaara. Pocua tariqui quiaariquiani.

Jaara juhuaquequiaari, Pedroori nojoritia quiaquiaari. Nata quiojoquiaarijiaariuhua Jope tiacajinijinio Jesuucua tiuuniaa pueya.

<sup>24</sup> Tama tariqui saniniuujia, nojoriiri Cesareya tiacajinia tiuquijioquiaari. Cornelioori na tiajinia sashiriquiaa Pedro, puetunu na tiajinia quijiacatajanaa, queraatia na rupuenaatano. Cornelioori puetunu nio pueyajanaa masuquiaari, nojori rerejonura juhuacarijia na tiajinia Pedro tiuquiyacuquishacarijia. <sup>25</sup> Pedro tiuquishacari, Cornelioori nocua tohuataquiaari. Carijiniacuma na naacuseeri. Pedroocuara mojuquetaquiaariiri juhua Pueyasoocuara. <sup>26</sup> Pedroori saaja na sanaquiaari. Na sequereeri:

—¡Quia nujuare! Janiyari cayajuhuj, juhua quiajaniya.

<sup>27</sup> Tiaco na tiuquitasacari, pocoojoriquiaa Pedrotaari. Pedro tiuquishacari, saaja queraatia pueya niquishiiri. <sup>28</sup> Pedroori nojori sequeree:

—Taucuacanaa, niaacuajaari niishiya canaari Judiocuacani. Judiocuacaari rootasaaquiaari maja canaa rupuenura taucua, maja quenaaja tahue tiajinia canaa

tiuquiniuriajuhuaj. Saniniuuja, Pueyasoori quiarijia cua niishitiorucuaa cutara maja cua soonura tamasaca. Taucuacaari maja sacuaraatia quiarijia quiria. <sup>29</sup> Naaratej, cua niishishacari niaari cua masuurucuaa niyara, janiyari ritia canujiyarucuaani cua taacanuyaquiniutia. Cua totureja, ¿casaara nia masuurucuaa janiyani?

<sup>30</sup> Cornelioori na riucuaaree:

—Cuatro juucaari tari shoconujiya. Janiyari jiyacari Pueyaso secojoriquiaa juucua cua tiajiniani, pananu mueecosacari. Jiyacaritij, pueyanoori cucua muetarucuaa. Jiyacaricuajaari quiriqiaa, tee pananu tiuyanijia. Cuno pueyano toqueeri shacantuque quiriqiaa. <sup>31</sup> Cua sequereeri: “Cornelionaa, Pueyasoori quia secojosano tojirii. Naajuhuj, niishiyari taa quia niquitiojoquiaa quia casami casamijiuniucuaani. <sup>32</sup> Naaratej, quia seya quia jiyaramiquiri Jope tiacajinia, cuara Simón masuunuucua quiatuura. Na sesaari Pedrojuhuaj. Nojuajaari na sesaanucua tiajinia quiya, shoniacu caminia casaqueyaji. Tia camaruuri piiquajinia shoqueya majeetejonu poonijiojua. Simón Pedro jaara nimia quia tiajinia, quiata pocojonutaniyari”. Pueyaso seruuri naa cua sequerucuaaqui Simónnaa. <sup>33</sup> Janiyari jiyamitia ritia jiyarorucuaa cua seya Jope tiacajiniani, nojori pajenura tii quiajaniya. Quiaacuajaari maninia miirii cucua quia nishacari. Quiarijiani, puetunu pajaniyajanaari niya Pueyaso niquiara quiyani. Naa quia pohuatate canaa tojishocoriquiano quiarijia, taa Pueyaso niishitiojorucuaa quiajaniya canaa quia pohuatanuracuajani.

#### *Pedro pohuatasacari Cornelio tiajinia*

<sup>34</sup> Pedroori juhuacatecara pohuatanu coteequiaari. Sequereeri:

—Quiarijia niishiya seetanujuanaa cutaranijia, Pueyasoori maja rimiajata na niquiniu pajaniya. Majaari nia jyaniniu Pueyasoori saaja Judiocuacaacua jiaatiaa, Israel pueya nojori quiniucua. Maja. Nojuajaari tamasacaacua jiaatiaajuhuj. <sup>35</sup> Tiquiyocua jiyacajinia Pueyaso secojojua pueya quishacari, nojoriiri Pueyaso jiyanooshano pueya quiyajuhuj, maninia miijia nojori quishacari. <sup>36</sup> Pueyasoori na rupaa pohuataniquiaari puetunu canaa Israel pueyarajanaa, jiyanooshano canaa quiniuria Jesucristoocua canaa tiuushacari. Nio Jesucristoori puetunu mijiria quiniaa Camarnujuanaa. <sup>37</sup> Tiuquinijiona Juanri Pueyaso rupaa pohuataquiaari pueya tiuquinijiosaanura. Na nuhuaji, Jesuuri cutara miishano miiniu coteequiaari Pueyaso cumaacata. Niaari tari niishiyacuaja na miishano canaa Galilea jiyajinia, na nuhuaji na miishano puetunu Judea jiyajini-janaano. <sup>38</sup> Niaari niishiyajuhuj, Pueyasoori na Sohuanu niquitioquiaari Jesu, na cumaaca na jiitianura. Nojuajaari maninia miiquiaari pueya, tiquiyocua na rucuanesacari. Cusosuhua naatanijiojuaari. Samaruhua camarnu sesosano jeecaquiaarijiaari-uhuj. Puetunu naa miijia maninijanaari na Que Pueyaso quiniucua nata. <sup>39</sup> Canaari puetunu na miishanojuanaa niquiquiaarini, puetunu canaa Judiocuaca jiyajinijanaa, Jerusalén tiacajiniajuhuaj. Janiyari seetanujuanaa canaa niquishano pohuataani. Na nuhuaji, pueyari na teetequiaari niyacutesanojinia. Tii na cusojuatuquiaariiri. <sup>40</sup> Jiuujianaraca juucajinia, Pueyasoori na samiitianiquiaariuhua. Jiyacaritij, na saquiriojosano pueyacua na mueratereeri. <sup>41</sup> Majaari na muetanu quiquiaari puetunu pueyacuajanaa. Saaja canaacua muetaquiaariiri, teyano Pueyaso saquiriojoquiaari coteenu tariucuaaanucujani, Jesujiniji pohuatanuuriquiano. Na samiitiasacariuhua, canaari nata miaquenuquiaari mariyatani. Canaari nata raruquiaarijuhuaj. <sup>42</sup> Jesu jaara canaa jiyaramiquiaari, nojuajaari canaa sequequiaari: “Naa nia pohuatate pueya niquiara: ‘Pueyasoori Jesu jiyatequiaari puetunu mijiria quiniaa nequesoreenarajanaa, macunucua nequesoreeriquianojuhuaj’ ”. <sup>43</sup> Tariucuaaanu pueyara Pueyaso sequesano caminiujiuniaari naa juhuacarijia sequetuquiaari Jesujinijijuhuj: “Cante nocua tiuyani, nojuajaari jiyanooshaanutaniya sesa na miishanojiniji”.

#### *Pueyaso Sohuanu tiuquishacari taucuaa jiuujiajiniajuhuaj*



<sup>44</sup> Pedro pahuatasacarijia taucuaca niqiuara, Pueyaso Sohuanuuri Pedro tojitianaa taucuacaacua niqiuari, nojori jiuujiajinia na tiuquiniuria. <sup>45</sup> Pueyasocua tiuunaa Judioacuani, Pedrota nijioquiaari Jope tiacajinijini, nojoriiri shiriiquiaari Pueyaso niq-uitiosacari cuno taucuaca na Sohuanu. <sup>46</sup> Cuno taucuacaari nojori niqiuara pocooriquiaa tamaatia rupaacajinia. Pueyaso maniniuhaqueetaturiquiaari. <sup>47</sup> Naaratej, Pedroori sequequiaari:

—Nio pueyari tari jiitiaa Pueyaso Sohuanu noojiajinia, taa pa jiitiaacuaani. Naaratej, nojori cuara tiuquinijiosaaria quiarjia. ¿Cantucua nojori tenujere maja na tiuquinijiosaananurani?

<sup>48</sup> Pedroori na nuhuaji sequequiaari cuno taucuaca tiuquinijiosaanura Jesucristo sesajinia, nojori tiuushacari nocua. Na nuhuaji, Cornelioori Pedro sequequiaari:

—Niyaja quia camueenujerejaara canaata. Maja senota quianuhua.

## 11

### *Taucuacajiniji Pedro pahuatasacari Jerusalén tiacajinia*

<sup>1</sup> Jesu jiyaramiquishano pueya, mariyata puetunu Jesucua tiuunaa pueyajanaa Judea jiyajinia, nojoriiri naa pahuatasaaquiaariti: “Taucuacanaari Pueyaso rupaacua tiuuriucuaajuhua”. <sup>2</sup> Nocuaji, Pedro jaara tacatequiaariuhua Jerusalén tiacajinihua, narta Pueyaso pueyari na juaaquiaariuhua. Na juaniaari taucuaca cararaatiuuquia co miatejonu panijiaa quiquiaari, taucuaca quiniuria seetanujuanaa Pueyaso pueya nojoriria. <sup>3</sup> Nojoriiri naa juaaquiaari Pedro:

—¿Casaara quia quiaarucuaa cuno taucuacaacuani? Nojoriiri maja Judiocuaca juhua pajaniya. ¡Quiaanaari nojoritia miaquejocanujuhua! Quia miishanoori maja maninia taa Pueyaso rootaquiaari tariucuaaanucujani.

<sup>4</sup> Pedroori suraatiaja nojori pahuataquiaari puetunujuanaa tahuajiniji. Coteenu pahuataree na niquishano juhua na maquenujiniaari. Naa sequereeri:

<sup>5</sup> —Jope tiacajinia cua quishacari, janiyari panacari secojoriquiaani. Janiyari jiyacari juhua cua maquenujia sonaque na nacatucujiniji morojotasano niquiriini. Jiyareta cucujanaa roshinitiasaareeri. <sup>6</sup> Cua niquishacari sonaquejia cua niishiniuria casaate mii quiriqiaani, janiyari saa puereeta casami niquirijiaani. Janiyari niquiriini jiy-  
 acua rucojuaca, sacocujuhua, jiyocuaanu jaacuatujucanio. Puetunujuanaari pa miaquesocoriquiano pa pueresano casa quiriqiaa. <sup>7</sup> Janiyari jiyacari jiyocuaanu  
 rupaa tojiriini. Cua sequereeri: “Pedronaa, nocua quia sanere. Quia puecoore quia miaquesocoriquiano”. <sup>8</sup> Janiyari saaja na riuacuareeni: “¡Maja cua Jiyaniijiana! ¿Janiyatucua taa miaquere sacuaraatia cua miaquesooni?” <sup>9</sup> Jiyocuaanu  
 rupaa socua cua sequerohuani: “Pedronaa, majaari miaquesocoriquiano Pueyaso jiyatesano soonu”. <sup>10</sup> Pueyasoori naa pacutejocanu sequenu juucua janiyatej. Na nuhuaji, sonaque tapanitiarohua jiyocuaanuuri. <sup>11</sup> Jiyacariti, jiuujianaraca canuuri cua quijia tiajia tiuquishii. Nojoriiri Cesareya tiacajiniji jiyaramiquishano quiquianu, na pajenuunura janiya. <sup>12</sup> Nojori tiuquiyaquishacarijia, Pueyaso Sohuanuuri cua sequere: “Quiocua nojoritia quiaare. Majaari taacanuunu. Majaari tahua soonu nojori quia rupesacari”. Naa cua tojinuucuatej, janiyari cunora juhujaniya nojoritia quiaarucuaani. Nio seis parta Jesucua tiuunaa pueyari cuata quiojyarucuaajuhua. Canaari mariyata cunohua tahuu tiajia tiuquishiini. <sup>13</sup> Tia camaruuri cana pahuatarucuaa taa na niquiquianu Pueyaso seru na tiajia nocua nujuaanoni. Pueyaso serunaari na sequere: “Jope tiacajinia quia jiyarore quia seya, nojori cuara quiaara Simón masuunuucua. Na sesaari Pedrojuhua. <sup>14</sup> Nojuajaari quia sequenutaniya taate quia naata jiyanooshano quiniuni, Pueyaso pueyano quia quiniuria, puetunu quia tiajia quiniaajuhua”. <sup>15</sup> Saaja cua cotesacari Pueyaso rupaa pahuatanu nojori niqiuara, Pueyaso Sohuanuuri nojoriicua niquianu, taa pocua coteenujuanaa na niquianucujani. <sup>16</sup> Janiyari jiyacari niishiqui pa Jiyaniijia sequesaroni. Naa na sequesaronetej: “Juanri moojinia tiuquinijia pueya. Pueyaso cutaraari na Sohuanu jiyaronutaniya niaacua, nioojiajia na tiuquiniuria”.

<sup>17</sup> Naacuajitij, taucuaca tiuushacari pa Jiyaniijiaacua, Pueyasoori na Sohuanu niquitiorucuaa nojoriujuhuaj, taa na niquitiocanu pajaniyacuaani. Cante Jesucristoocua tiuyani, Pueyasoori na Sohuanu na niquitioya. ¿Janiyatucua taa Pueyaso sequereruhuarini: “Maja cuno pojori niquitionu quia Sohuanu”?

<sup>18</sup> Jerusalén tiacajinia quiniaa Pueyaso pueya jaara tojiqiaari naa Pedro sequesantej, nojoriiri sanaajetaquiaari. Tama nojoriijaarijia Pueyaso maniniuhuaqueetaquiaari. Naa sequetuquiaariiri:

—¡Pueyasojuhanaja jiyanoehua maninia! Nojuajaari taucuaca panijajuhuj nojori tacatonura noojia sesa nojori miishanojiniji, jiyanooshano nojori quiniuriajuhuaj, pueyaracaanu nojori rishiniuria Pueyasota.

### *Antioquiya tiacajinia Jesu pueyajiniji pohuatasano*

<sup>19</sup> Esteban jaara mosaaquiaaricuaa, Judiocuacaari juhuacatecara Jesuucua tiuuniaa miiquiaari naquiyajuhuj. Queraatia Jesuucua tiuuniaa pueyari nocuaji mashiyocuatquiaari. Nojoriiri tiquiyocua niyaquejoquiaari. Noojiaqueyari na mashiyocuatyacari tiuquiiioquiaari Fenicia jiyajinia. Tamasacaari tiuquiiioquiaari Chipre jiyajinia. Noojiaqueyari Antioquiya tiacajinia tiuquiiioquiaarijuhuaj. Nojoriiri tii pohuatanuuquiaari Pueyaso rupaa Jesujiniji saa Judiocuacajaja, maja taucuacaa. <sup>20</sup> Mashiyocuatunaa tajinia quiquiaariiri Chipre jiyajinijinio pueya, Cirene tiacajinijinio pueyajuhuj. Nio pueya jaara tiuquiiioquiaari Antioquiya tiacajinia, nojoriiri Jesujiniji pohuataquiaari Griegohua niquiarajuhuj. <sup>21</sup> Jiyaniijia Jesu cumaacaari nojoritia quiquiaarijuhuaj. Naacuajitij, queraatia Griegohuari tariucuaaanu tama nojori niishishanojaa cartequiaari, Jiyaniijia Jesu tojijiaa nojori quiniuria.

<sup>22</sup> Jerusalén tiacajinia quiniaa Pueyaso pueya jaara nio niishiquiaari, nojoriiri Bernabé jiyarotuchiaari Antioquiya tiacajinia. <sup>23</sup> Bernabé jaara tiuquiquiaari nojoriicua, nojuajaari jiyanoehua shuquiriquiaari na niquishacari taa Pueyaso miiriucuaa maninia cuno Griegohuani, nocua nojori tiuushacari. Naaratej, nojuajaari naa rootaquiaari nojori:

—Pa Jiyaniijiaacua nia tiuuri pueyaracaanu. Majaari nocua tiuuniu nia cartenu. Suraatia na tojijiaa nia quiri.

<sup>24</sup> Bernabeeri jiyanoehua maninia pueyano quiquiaari. Pueyaso Sohuanuuri noojia cumaquiquiaari jiyanoehua. Naacuajitij, na pohuatasacari Jesujiniji, queraatia pueyari Jiyaniijiaacua tiuquiquiaari.

<sup>25</sup> Na nuhuaji, Bernabeeri Tarso tiacajinia quiaquiaari Saulo pajenuucua. Jaara na riuriataquiaari, na jiyataquiaari Antioquiya tiacajiniaari. <sup>26</sup> Nojori quishacari Pueyaso pueyata cuno tiacajinia, nojoriiri tii shocotequiaari niquiriyatu marijia. Nojoriiri queraatia Pueyaso pueya niishitiojonuuquiaari. Tii Antioquiya tiacajiniani, Jesuucua tiuuniaa pueyari coteenu sesojosaaquiaari “Cristiano”. Nioori pueyano rupaajinia sequeshiya “Cristo tojiniaa pueya”.

<sup>27</sup> Cuno quishacari, Jerusalén tiacajiniji Pueyaso sequenu panishano caminiujiuniaa pueyari tiuquiiioquiaari Antioquiya tiacajinia. <sup>28</sup> Tamonu nojorijinijinioni, na sesa quiquiaari Ágabo. Nojuajaari Jesuucua tiuuniaa pueya rerejonaa tajiniji nujaquiaari pocuanura. Naa caminiujiuquiaari Pueyaso Sohuanu niishitiosano nojuajaari:

—¡Pueyanaa, puetunu pa jiyacajiniajanaani, miaajenuuri quiniutianiya!

Seetanujuanaa sequequiaariiri Ágabo. Cuno miaajenuuri quiquiaari Claudio quishacari jiyaniijiajanaa, Césartuhuj. Nojuajaari Roma tiacajiniji jiiatiaquiaari puetunu jiyacajanaa. <sup>29</sup> Antioquiya tiacajinia quiniaa Pueyaso pueya tojishacari naa Ágabo sequesantej, nojoriiri sequequiaari:

—¡Judea jiyajinia quiniaa parta Pueyaso pueya pa naacure!

Nojoriiri naa miiquiaari. Naaratej, cante queraatia cumaneeca jiiatiaquiaarini, nojoriiri queraatia niqutioquiaari. Saniniuuja, cante maja puera cumaneecaraca quiquiaarini, nojoriiri secaja niqutioquiaari na jiiatianojiniji. <sup>30</sup> Na nuhuaji, nojoriiri nareja na niqutiojosano cumaneeca jiyarotuchiaari Bernabeeta, Saulotanio. Nojoriiri Pueyaso pueya jiiitanaa niqutioquiaari saniniuuja Judea jiyajinia.

## 12

*Jacobo nacatasaanujiniji pohuatasano, Pedro nujuatesaanujinijinio*

<sup>1</sup> Jiyacaritij, Herodesri jiyaniijia quiquiaari Judea jiyajinia. Nojuajaari Jesuucua tiuunaa miiquiaari naquiya. Noojiaqueya quiotequiaari na saniitiosocoriquiano nujuatejojuajiniaari. <sup>2</sup> Naa Juan tarajanu Santiago motequiaaricuaajaari nijiniaquetucuja mueruuta. <sup>3</sup> Judiocuacaari shuquiriquiaari naa nojori jiyaniijia motesacari Santiagotej. Naaratej, Herodesri Pedro quiatequiaari na soldadohuajuhuj, Judiocuaca timitianura socua nojuaja. Pedroori quiasaaquiaari Judiocuaca queranacunuusacari, nojori sasacari pan na poreetajaaju majeetesano. <sup>4</sup> Pedro quiasaanu nuhuaji, Herodesri na nujuatequiaari nujuatejojuajinia. Na tohuatenu paniriquiohua juucua Pascua nuhuajiiri, na nequesoresocoriquiano puetunu quiniqui quiniaa Judiocuaca niquiarajanaa. Dieciséis soldadohuari Pedro cojuariquiaa pueyaracaanu. Nocua sanitijiootocuaariiri; coteenu cuatro, na nuhuaji socua cuatro. Nojoriiri naa sanitijiootocuaariitij. <sup>5</sup> Pedroori maninia cojuasaaquiaari nujuatejojuajinia. Jiyacaritij, Jesuucua tiuunaa pueyari saniniuujia nocuara secojonuuriquiaa jiyanoehua, Pueyaso naacunura Pedro.

*Pueyaso mashiquishacari Pedro nujuatejojuajiniji*

<sup>6</sup> Cuno niucujani, na juhuaqueyaquishacarijia, quera Herodes tohuatesee tariquicuajaji Pedroni, na nequesoresocoriquiano puetunu pueya niquiarajanaa. Pedroori caapiqui soldadohua tajiniocoma maqueriquiaa, maninia saatijiotasano cumayocuatata na numatucua cajiniocua. Tamasaca soldadohuari nujuatejojuaja tohuateyaji cojuariquiaacujua. <sup>7</sup> Jiyacaritij, Pueyaso seruuri canashiyaquiji coretaquiaari jiyareta Pedro shuriucujanaa nujuatejojuaja jiniacuma. Na shacantuucaari jiyanoehua cuhuataquiaari nujuatejojuaja. Pueyaso seruuri Pedro jiuuquirii na shuucujaji. Na niucujareeri. Na niucuasacari, na sequereeri:

—¡Ritia quia sanere!

Cumayocuaari tamajaaja saacarejetaquiaari Pedro numatucuaacujaji. <sup>8</sup> Pueyaso seruuri na sequerejhuaj:

—¡Quia cajiniocua camarucujua quia saatiri socua! ¡Quia sapatu quia cushirijihuaj!

Pedro jaara naa miiquiaari puetunu na sequesanojuanaa, Pueyaso seruuri socua na sequerohua:

—¡Quia toque quia cushiri ritia! Majaari tarishiniu. ¡Quiocua cua nuhuaji rupaashijia!

<sup>9</sup> Pedroori ritia Pueyaso seru nuhuaji sacuariquiaajaa. Jiyanoehua jiyajeneriquiaari. Majaari na niishiniu quiriquiaa puetunu na niquishanojuanaa. Nojuajaari jyaniriquiaa na maquenujina niquiya naasucua. <sup>10</sup> Nojoriiri coteenu shocoma na tacoji cojuanaa soldadohua. Socua na tacoji cojuanaa tajitiumiaajaarihuaj. Naa quenaacoturee nujuatejojuaja tohuateyajiiri. Nojuajaari Pueyaso seruta nujuatusee jiyareta tohuateyaji. Tohuateyari cumueca casaata shipinishano quiquiaari. Jiyacaritij, tohuateyari tamajaaja riatequee. Nojoriiri tohuareetamaa carijiniacuma. Pueyaso seruuri Pedro jiyatariquiaa sapuenujuara tiaca jiuujiaaco. Na nuhuaji, na shuriucujaji shaajequeeri. <sup>11</sup> Pedroori jiyacari shusha niishiquii. Naa sequereeri:

—¡Seetanujuanaaqui quiriquiaa! ¡Cua Jiyaniijiaquiiri na seru jiyaroree cucua, na mashiquiniuria janiya Herodescujaji, cuarta Judiocuacaacujijihuaj! Naa na jiyaroreeri maja cua miishaanura taa nojori niishiriojoriquiaa na miiniuria juucua janiyani.

<sup>12</sup> Nojuajaari naa na niishiriojonuta María tijajinia quiaquiaari. Nio Maríacuajaari tamonu Juan nucua. Cuno Juan sesaari Marcojuhuaj. Cuno tijajinia, queraatia Pueyaso pueyari Pedrocuara tii secojonuuriquiaa jiyacari. <sup>13</sup> Pedroori jiyacari piquiquiaari carijiniacuma mataca tohuateyaji. Tiaco seruuri na tojiquiaari piquiyano. Nio seru sesaari quiquiaari Rode, niyacoo. Nojuajaari juucua catecanoquiaari tohuateyaji, na niquiniuria cante quiriquiaani. <sup>14</sup> Nojuajaari saaja Pedro tojishii tia camaru jyaniquiyano, na tiotiu na riatanura nocujaji. Niyacoo tojishacari seetanujuanaa Pedro rupaa, majaari tiotiu na riatanu quiquiaari na shuquiriniutia. Saaja netequiaariuhua tiaco quiniaa numootenuraari. Nojori sequesuhuari:

—¡Pedrocuajaqui nooj, tohuatheyaji nujuaatej!

<sup>15</sup> Pueyari saa niyacoo riucuaquiaarijia:

—¿Quiaate paateya? Teyano Pedrote nujuatesaarucuaacuajani.

Niyacoori nojori sequenu pacutequiaariuhua:

—¡Taaquiriririnj! ¡Pedrocuaaquiniatejaj, nooj nujuaatej!

Pueyari saaja sequequiaari:

—Maja nojuaja. Pedro cojuana Pueyaso seru naasucuaajaja.

<sup>16</sup> Nojori nacojosacari tiaco, Pedroori tohuatheyaji piquijioriquiaajaa. Tiootiu jaara socua riatasaaquiaari, nojuacuajaari quiriquiaa. Pueyari na niquishacari shiriquitiquiaari. <sup>17</sup> Pedroori nojori sanaajaree jiyacari na juaashiquiata. Cuniqiu quiniaa pohuatereeri taa Pueyaso tohuaterohua nojuaja nujuatejojuajinjini. Pedroori naa sequequiaari nojoritij:

—Niocua naa pohuatere Santiagojuhuaj, parta Jesuucua tiuuniaanio.

Na nuhuaji, Pedroori tiji tohuatacuhua. Tamaqui quiaareeri.

<sup>18</sup> Jaara juhuaquequiaari, nujuatejojuajinia cojuanaa soldadohuari jiyanoehua shiriquitiquiaari. Majaari nojori niishiniu quiquiaari taa Pedro miirij nujuatejojuajinjini nojori tajinjini. Tama nojorijiaarijia naa sequetuquiaari na puerenuta:

—¡Pa jiyaniijia Herodesri quiarjia pa puecoonutaniya, maninia pa cojuaaquiniucua Pedro!

<sup>19</sup> Herodes niishishacari, na shuriucua nujuatunaa soldadoehua jiyaroquiaariiri nujuatejojuajinia nojori pajenura Pedro. Nojori jaara na riuriataaquiquiaari, Herodesri nujuatejojuajinia Pedro cojuanaa soldadoehua nequesoreequiaari na juaaniutia, na niishinuria juucua taa Pedro juurequere nojori shuriucujini. Na nuhuaji, Herodesri jiyanoehua na juaaniutia na shuriucua nujuatunaa soldadoehua sequequiaari, nojori puecoonura narta soldadoehua, nojori cojuaaquiniucua maninia Pedro nujuatejojuajinia. Naa na miiniu nuhuajitij, Herodesri Judea jiyajinjini pacuquiaari. Cesareya tiacajinia quishiiri.

### *Herodes shaajenujini pohuatasano*

<sup>20</sup> Jiyacaritij, Herodesri jiyanoehua juaariquiaa Tiro tiacajinia quiniaa pueyata, Sidón tiacajinia quiniaatano. Nio caapiqui tiacajinjini pueyari jiyaniijia Herodes tiacajinia quiojoquiaari nata nojori pocoojonura juucua. Majaari cuno juuca nojori pocoojonu quirij jiyaniijia Herodesta. Nocuaji, nojoriiri Herodes seru sequere:

—Quiocua quia jiyaniijia sequere, canaa nata jyanootoonu paniyani.

Cuno Herodes seru sesaari quiquiaari Blasto. Nojuajaari na jiyaniijia panishano quiquiaari. Na jiyaniijia maqueja cojuana quiquiaarijiaariuhuj. Tiro tiacajinjini pueya, mariyata Sidón tiacajinjini, nojoriiri na cumaneecata masetujua na miaquesocoriquiano jiyaniijia Herodes jiitiasano pueyajinjini. Nojoriiri jiyamitia jecatoonu paniriquiaa cuno jiyaniijata, maninia nojori quiniuhuara nata, Herodes niquitiojotenuhuara na jiitiasano pueya na miajajaura Sidón tiacajinjini pueya, Tiro tiacajinjini pueyano. <sup>21</sup> Herodes seruuri nojori sequequiaariuhua:

—Niocuaana tamonu juuca nimia, jiyaniijata nia pocoojonura.

Na nuhuaji, cuno pueyari na sequesano juucajinia niquiaariuhua. Jiyaniijia Herodesri nojoriicuaaji maniniushiquiaari. Na maniniuqui toque cushiquiaariiri. Jiyaniijiaacuajinio shipinishano cajitujinia cajiriohuari. Tiji pocuaquiaari cuno pueyacuaari. <sup>22</sup> Puetunu cuniqiu quiniaa pueya tojishacari naa maninia Herodes pocuaano nojori niquiaratej, nojoriiri nacoonu coteequiaari. Naa sequetuquiaari na nacoosacariiri:

—¡Nio pueyano pocuaani, majaari nareja pueyano! ¡Nojuajaqui Pueyaso!

<sup>23</sup> Pueya sequesacari naa Herodestej, nojuajaari juhua shuquiuriosaaquiaari saajaruhua. Majaari quenaaja cuno pueya na sequenu quirij: “Maja naa cua sequetunutej. Janiya maja Pueyasoni”. Nocuaji, Pueyaso seruuri canashiyaquiji na tojetequiaari. Na pocuasacarijia cusomaari. Na sarapiyari na jiniacuma miaquequiaari. Naa cusotaquiaari tama na sarapiyajarjia.

<sup>24</sup> Pueyaso rupaari saniniuujia socua niyacasaquiaari, tiquiyocua pohuatasacari puetunu pueya niqiarajanaa. Naacujitij, Pueyasocua tiuunaa pueyari socua quer-aatiara canequiaarijiuhua. <sup>25</sup> Bernabé, Saulonio, nojori jaara niqutioquiaari cumaneeca Jerusalén tiacajinia Pueyaso pueya jiitanaa, nojoriiri ritia quiojoquiaariuhua Antioquiya tiacajinihua. Nojoriiri jiyacari Jerusalén tiacajiniji riquiaariuhua Juan. Juan sesaari quiquiaarijiuhua Marco.

## 13

### *Saulo Bernabeeta rucuanenjonu coteesacari Jesujiniji pohuatanura tiquiyocua*

<sup>1</sup> Antioquiya tiacajinia Jesuucua tiuunaa pueyajinijinioni, nojiaqueyari quiquiaari Pueyaso sequenu panishano Pueyaso pueyara caminiuunaa. Quiquiaarijiuhua Pueyaso Rupaa niishitijonaa. Niiori nojori sesaca: Bernabé; Simónnio, na sesa tarajanu quiquiaari Negro; Lucionio. Nojuajaari Cirene tiacajinijinio pueyano. Quiquiaarijiuhua Manaén. Nojuajaari mariyata Galilea jiyajinia jiyaniijiarano Herodesta canashitijiosaaquiaari. Quiquiaarijiuhua Saulo. <sup>2</sup> Tamonu juuca, puetunu nojorijianaari Pueyaso secojonuuriquiaa. Cuno juucajuhuaj, majaari nojori miaquenuunu quiriquiaa socua na secojonuunura Pueyaso. Jiyacaritij, Pueyaso Sohuanuuri nojori sequequiaari:

—Bernabé Saulonio, nojori nia jiyatere cua panishano miiriquiano, taa cua sequequiaari tariucuacaanucujani.

<sup>3</sup> Nojoriiri jiyacari socua maja na miaquenuunu quiquiaari. Saaja Pueyaso secojonuuriquiaa socua jiyanohuari. Na secojonuunu nuhuaji, nojoriiri Bernabé nacaacua, mariyata Saulo nacaacua niatuquiaari na juaashiquiaca. Nojoriiri naa miishaaquiaari nojori jiyatesaanura Pueyaso jiyaramiquishano pueyara, Pueyaso rupaa pohuatanuuriquiano jiyanohua Pueyaso Sohuanu cumaacata.

### *Jesujiniji pohuatasacari Chipre jiyajinia*

<sup>4</sup> Pueyaso Sohuanu jiyaramiquishano Bernabé, Saulonio, nojoriiri cuniquiji janiya quiquiaarijiuhua nucuaco Seleucia tiacajiniara, shoniniacu caminia casaqueyaji. Nojoriiri cuniquiji quiquiaari puereetuca buquejina Chipre jiyaniishano jiyajiniara. Chipre jiyari jiya tucuaatija, shoniniacu caminia jiuujajinia. <sup>5</sup> Nojori tiuquijiosacari Salamina tiaca tacatajajiniji, tii Pueyaso rupaa pohuatanuunu coteequiaari puetunu cuniqui quiniaa Judiocuaca secojojuaca tijiniaqueyajanaari. Juanri nojoritia quiriqiaajuhua, nojori naacuriquiano. <sup>6</sup> Naa nojori rucojosacari Pueyaso rupaa pohuatanura Chipre jiya tucuaatijaacuatej, socua tiuquijioseequiaari Pafos tiacajiniaari Chipre tamajiria. Nojoriiri tii riurataquiaari shimiacu, narta Judio pueyano. Na sesa quiquiaari Barjesús. Nojuajaari cuniqui quiniaa sapojoquiaari naatej: “Janiyacuaa Pueyaso sequenu panishano caminiuunua pajaniyarani”.

<sup>7</sup> Cuno shimiacuuri pueyaracaanu Sergio Paulota quiquiaari. Sergio Pauloori Chipre jiya jiyaniijia quiquiaari. Cuno jiyaniijiaari jiyanohua niishijia quiquiaari. Nojuajaari Bernabé masuuquiaari Saulonio, nojori pohuatanura Pueyaso rupaa nojuaja. <sup>8</sup> Cuno shimiacu sesaari Griego rupaajinia sequesaaquiaari Elimas. Nojuajaari saaja cuno jiyaniijia niqiuara cuaracashitiquiaari Pueyaso rupaa. Naa sequereee cuno jiyaniijiaari:

—Maja cuno pojori tojinuu. Jiyanohua sesaari nojori pohuatasano. Quia sapojotiuyano.

<sup>9</sup> Saulo sesaari Pablo quiquiaarijiuhua. Jiyacari, Pueyaso Sohuanu cumaquishacari nojuaja, Pabloori jiyanohua shitimia shimiacu jiquioco shootiaree naa na sequesacari nojuaja:

<sup>10</sup> —¡Sesaaca niyanu sequenaal! ¡Maninia miijiaa paracaajianaal! ¿Casaara pueya quia tenujiya Pueyasocujini? <sup>11</sup> ¡Cua Jiyaniijiaari quiaritia quia saniitionutaniya! ¡Quiaari cariyojuarura quiniutianiya seetanujuanaa! ¡Quiaari pasaja tarishiniutianiya cariyojuaru quia quishacari!

Jiyacaritij, juhua niniquiaari na namijiajinia cajimaa. Cariyojuarura quiquiiri. Juhua ninishiqui quiaquejoquiaari puetunu cunocojuanaari, na juaashiquiajiniji na jaatucusaanura juucua. <sup>12</sup> Cuno jiyaniijia jaara naa niquiaaaritij, Pueyasocua tiuriiri na niqiara nojori pohuatasacari shanohua Jiyaniijia Jesujiniji.

*Pablo, Bernabé quishacari Antioquiya tiacajinia, Pisidia jiyajinia*

<sup>13</sup> Pabloori na cojiniaata Pafos tiacajiniji quiaquiaari buquejina Perge tiacajiniara, Panfilia jiyajinia. Juanri Perge tiacajinia cateseequiaari nojoriicuaji. Tiji riujuuquiaruhua Jerusalén tiacajinihuari. <sup>14</sup> Na nuhuaji, Pabloori Bernabeeta Perge tiacajiniji quiaquiaari Antioquiya tiacajinia. Antioquiya tiacaari Pisidia jiyajinia. Tii nojori quishacari, nojoriiri samaatenu juuca quiaquiaari narta Judiocuaca secojonuujua tiacajinia. Na tiuquishacari, cajitiushiiri. <sup>15</sup> Jiyacaritij, tariucuacaanu Moisés Rootasanoori serojosaaquiaari. Tariucuacaanu Pueyaso sequesano caminiujiunia naajiotasanoori serojosaaquiaarijuhuaj. Na nuhuaji, rerejovia tia camarnuuri naa sequequiaari Pablo, Bernabeenio:

—Cuarta Judiocuacanaa, niaa jaara Pueyasojiniji nia niishishano casaa sequenu paniri, nia niishitiojore quiarjia niya quinia niqiara.

<sup>16</sup> Pabloori sanequiaari. Na juaashiquiata sanaajaree pueyari. Naa nojori sequereeri:

—Nia tojitiare cuarta Israel pueyanaa, nijaniyajuhuj, canapuee Pueyaso tojitiacacajani tamasa pueyapuejinijinio. <sup>17</sup> Paari sequequiaani: “Pueyasoori pa Jiyaniijia, Israel pueya pa quiniucua”. Seetanujuanaa, paacuajaari Pueyaso saquiriojosano pueyacuajinioni. Tariucuacaanu, Pueyasoori maniniushiquiari pa supuetanaa saquiriojoquiaari na pueyara quiriqiano. Na nuhuaji, jiyanoohua pa supuetanaa canetequiaariiri Egipto jiyajinia nojori quishacari. Na nuhuaji, Pueyasoori nojori mashiquiiaari cuno jiyajiniji na cumaacata. <sup>18</sup> Cuarenta marijiaari pa supuetanaa shoconujuquiaari pueyaracaanu nojori rucojosacari najuhuaa cariiquia jiyajinia. Pueyasoori jiyacari nojori rejeretaquiaari na tojitiaaquishacari nojuaja. <sup>19</sup> Na nuhuaji, Pueyaso cumaacata, siete tamaatiucua rupaa pocuajaca taucuacaari puecoosaaquiaari Canaán jiyajiniji, saniniuujia cuno jiya na niqitiosocoriquiano pa supuetanaa. <sup>20</sup> Pa supuetanaa jaara Canaán jiya camaruhua quiquiaari tari, socua cuatrociento cincuenta marijiaari nojori shoconujuquiaari saaja nequesoreenaa jiiatasacari nojori. Na nuhuaji Samuelri nojori nequesoreenara jiyatesaaquiaarijuhuaj. Nojuajaari Pueyaso sequesano caminiujiunia quiquiaarijuhuaj. <sup>21</sup> Samuel quishacarijia, pa supuetanaari Pueyaso secojonuquiaari na panitushacari jiyaniijia, nojori jiiitariqiano nequesoreenaa niti. Naacuajitij, Pueyasoori nojori jiyaniijia jiyatequiaari Saúl, Cis niyanu, supuetana Benjamín niqiohuacuajinio supueno pueyano. Saúlri nareja cuarenta marijia shocotejoquiaari pa supuetanaa jiyaniijia na quishacari. <sup>22</sup> Na nuhuaji, Pueyasoori Saúl sojotaquiaariuhua Saúl tojiyaquiniucua nojuaja. Saúl niti David jiyatequiaariuhua Israel pueya jiyaniijia saniniurijia. Pueyasoori naa sequequiaari Davidjiniji, na timitiasacari nojuaja:

“Isaí niyanu Davidcuajaari cua shuquiuriojua. Nojuajaari cua panishano pueyano. Nojuajaari puetunu cua panishano miiniutianiyajanaa”.

<sup>23</sup> Quiari naataja, Pueyasoori na sequesano tohuateequiaari na mueratesacari pocuaji Tacuna. Nojuajaari Jesu, David niqiohuacuajinio supuenoni. Pueyasoori na seerataquiaari Israel pueyacuaji Tacuna quiriqiano, taa na sequequiaari tariucuacaanucujani. <sup>24</sup> Jesu coteyaquishacarijia rucuanenu na Quejiniji pohuatanura, Tiuquinijiona Juanri coteenu nocuaji pohuataquiaari Pueyasojiniji puetunu Israel pueya niqiarajanaa. Tiuquinijiona Juanri nojori sequequiaari nojia nojori tacatonuhua Pueyasocua, naajuhuj, moojinia nojori tiuquinijosaanura, Pueyaso tojijia nojori quiniuria. <sup>25</sup> Quera Tiuquinijiona Juan shaajesacari, nojuajaari naa sequequiaari: “Janiyari maja Pueyaso Jiyarosani taa nia jiyaniquiaa najuhuaa janiyacujani. Na Jiyarosano cutaraari cua nuhuaji niniutianiya. Nojuajaari seetanujuanaa Jiyaniijajanaa cutara. Janiya maara jiyanoohua shuquiriaatia quirini, nojuaja jaara cua sequere na serura cua quiniuria quenaaja na sapatu cua jocuanura nera. Nojuaja cutaraari saaja maninia miijia”.

<sup>26</sup> 'Cuarta pueyanaa, niajaniya cante Abraham niquiohuacuajinio pueyacujani, cua tojitiare, niajanijajuhuj taucucanaa, canapuate Pueyaso tojijiacacujani. Niaara-noori nio maninia rupaa Pueyasojiniji, nia jiyanooshaanura sesa nia miishanojiniji. <sup>27</sup> Jerusalén tiacajinia quiniaa, mariyata na camarucuanio, nojoriiri maja na niishiniu quijia cante Jesu quiquiaarini. Majaari nojori niishitiuniu quiquiaarijijuhuj Pueyaso sequesano caminiujiuniaa naajiotasano tariucuaaanu. Cunoori najuhuaana nojori serojonuusano puetunu samaatenu juucajanaa. Naacuajitij, nojori jaara moquiaari Jesu, maninia tohuateequiaariiri Pueyaso sequesano caminiujiuniaa naajiotasano, taa Jesujiniji sequesaaquiaari tariucuaaanucujani. <sup>28</sup> Jesuuri seetanujanaa maja na miiniu quiquiaari sesa. Tama nojoriijaarijia juhua sesa miijiaara na jiyatequiaari cutara. Naacuajitij, Pilato sequetuquiaariiri cuaara na moteeranoj. <sup>29</sup> Nojori jaara tari miiquiaari taa nojuajiniji naajiotasano quiya tariucuaaanu Pueyaso Rupaajiniacuajani, na roshinitiuquiaari niyacutesanojinijiiri. Raaco na niatureeri. <sup>30</sup> Naajaa, macu na quishacari, Pueyasoori saaja na samiitiani quiaariuhua. <sup>31</sup> Na samiitianu nuhuaji, Jesuuri sequeyarucua na pueyacia mueranacujuquiaari, noo pojoriicua canapuate na tarajaquiaari na quiasacari Galilea jiyajiniji Jerusalén tiacajiniaracuajani. Nojoricuajaari quiarjia nojuajiniji poojotaniuhua puetunu pueya niquiarajanaa.

<sup>32</sup> 'Canaari timiyani canaa pohuatasacari niajaniya, ¡Pueyaso pohuatasano pa supuetanaari tari tohuatecanu! ¡Pocuaji Tacunacuajaari tari miiquianu puetunu pa jiyanooshaanurajanaa! <sup>33</sup> Seetanujanaa, Pueyaso sequesano pa supuetanaa Israel pueyarani, cunoori shusha pajaniyara tohuatecanu, pa supuetanaa Israel pueyacujinio pa quiniuucua. Pueyasoori tari tohuatecanu na sequesano pajaniyara, na samiitianishacariuhua Jesu, naatej, taa David jaaquequejonee Salmojinia na sequesano quiyacuajani. Naa naajiotasano quiyari segundo Salmojinia:

“Quiaari cua Niyanucuja. Janiyari quiarjia quia samiitianiriini”.

<sup>34</sup> Pueyasocujaari sequequiaari, nojuacuajaari na samiitianiniutianiuhua na moqueyaquiniuucujia na raaco. Niioori naajiotasano quiyajuhuj tariucuaaanu Pueyaso Rupaajinia. Naa sequeyari:

“Janiyari maninia niaara miiniutianiyani taa cua sequequiaari Davidcujani”.

<sup>35</sup> Naa naajiotasanoori Jesujiniji quiyajuhua David jaaquequejonee Salmojinia:

“Majaari quia panishano seru cuaqueya quia shanacunu quiniutianiya na moquenura”.

<sup>36</sup> Pueyanaa, paari seetanujanaa niishiyani Davidri puetunu Pueyaso panishano na miiniu nuhuajijianaa shaajequiaari. Nojuajaari na supuetanaa rupuequiaari macunucua quiquiojinia. Na cuaqueyari seetanujanaa moquequiaari cutara. <sup>37</sup> Noo Jesu saniniuuja, Pueyaso cutaraari na samiitiani quiaariuhua. Majaari na moquenu quiquiaari cutara.

<sup>38</sup> Cuarta Israel pueyanaa, niaa cumaati canaa pohuatasano niishiya. Canaari Jesujiniji nia pohuataani. Niaa jaara nocua tiuuri, niaari sesa nia miishanojiniji jiyanooshaanutaniya. <sup>39</sup> Moisés Rootasanojinia, paari tariucuaaanu niishitiojosaaquiaarini pa seya pa puecoonura Pueyasora, Pueyaso jiyanooniuria pajaniya sesa pa miishanojiniji, maja pa mosaanura saniniuuja. Majaari seetanujanaa pa jiyanooshaanu quiquiaari naa pa miishacaritij. Quiarjia cutara, canapuate Jesuucua tiuya saniniunijia, nojoriiri puetunu sesa na miishanojinijijianaa jiyanooshiya. <sup>40</sup> Niaa cutaraari cocuaatia miiniutianiya pueyanaa, nia jaara cua pohuatasano ruuretare. Pueyasoori na tojiyashijiaa saniitionutaniya taa tariucuaaanu Pueyaso sequesano caminiujiuniaa sequequiaaricujani. Naa sequetuquiaariiri:

<sup>41</sup> “Nia tojitiare, rerequetecajanaa. Niaari jiuujiatenutaniya najuhuanaj. Na nuhuaji, niaari shaajasaanutaniyajuhuj. Janiyari Pueyasoni. Janiyari tarijia nia niquishoo casaa miiniutianiyani. Tamasaca jaara nia pohuatare, niaari saaja na cuaracashitiniutianiya”.

<sup>42</sup> Na nuhuaji, Pabloori narta Judiocuaca rerejojua tiajiniji tohuareetaquiaariuhua na cojiniaata. Taucuacaari tii quiri quiaajuhuj. Nio taucuaaari Judiocuacaacua pacunaa quiquiaari, Judiocuaca nojori quiniuriajuhuj, Pueyaso sequesano tojitianaara na quiniuria. Nojoriiri Pablo sequequiaari, Bernabeenio:

—Niocua tamonu sábadu canaa pohuatareeruhuj, socua canaa tojiniuria Jesujiniji.

<sup>43</sup>Nojori quiojosacariuhua Judiocuaca rerejojua tiajiniji, queraatia narta Judiocuacaari nojori nuhuajiquiaari, queraatia taucuacajinijinio Judiocuacaacua pacunaanio. Cuno pojoriiri maninia Moisés niishitijosano tojitianaa quiquiaari. Nojoriiri Pablo, Bernabé nuhuaji sacuariquiaa. Naaratej, Pabloori Bernabeeta naa rootaquiaari nojori:

—Saaja Pueyasocua tiuujiaca nia quiri. Majaari nocuaji taacanuunu. Nojuacuajaari pa cumaquijia.

<sup>44</sup>Cuno nuhuaji, Sábado juuca jaara tari quiquiaari, quera puetunu cuno tiacajiniji pueyajanaari Pueyaso rupaa tojiniucua rerejoquiaari. <sup>45</sup>Judiocuaca secojojua tia camarucua jaara niquiquiaari queraatia pueya na rerejojuajinia mishiyo, Pablo pohu-atasano na tojitianura, nojoriiri juaaquiouquiaari. Nojoriiri tama sequetooquiaarijiaaja:

—Puetunu pueyajanaari cuno pojori tojitiajacara quiniutianiya. Pa tojiyaquiniutianiya saniniuurijia.

Naa sequeturiquiaa pueya niquiara Pablojinijiaariuhuj:

—¡Pabloori maja maninia na niishiniu Pueyaso rupaa! ¡Najuhuana sesa pohuataano!  
¡Nojuajaari niishiyashijia!

<sup>46</sup>Pabloori saaja Bernabeeta sequequiaari na puereyaquiniutia:

—Maniacuajaqui, cuarta Judiocuacanaa. Canacuajaari naa panitaja nijaniyatej, Pueyaso rupaa canaa coteetanura pohuatanu nijaniya, Pueyaso saquiriojosano Judiocuaca nia quiniucua. Niaacuajaari saa na ruuretareejaa. ¡Majaquiri nia rishiniu paniniu, pueyaracaanu nia quiniuria Pueyasota! Quiarijiani, canaari saniniuuria taucuacaacua quianutaniyani, Pueyaso rupaa canaa pohuatanura nojori niquiara. <sup>47</sup>Canaa Jiyaniijia jaara canaa jiyaramiquiquiaari, nojuajaari naa canaa sequequiaaritij: “Quia jiyatequiaari mijiria cuhuatariquianonijia. Quia pohuatasano janiyajinijiri caminiujiushaanutaniya taucuaca niquiara puetunu jiya puequetujinijanaa, Pueyaso jiyanooniuria nojoriuhuj”.

<sup>48</sup>Cuniqui quiniaa taucuaca jaara naa tojiquiaari sequeshiyantej, nojoriiri shuquiriquiaari. Pueyaso rupaa maniniuhuaqueetareeri. Sequetureeri:

—¡Jiyanohua maninia pa Jiyaniijia Pueyaso rupaa!

Teyano pueya Pueyaso saquiriojoquiaari tariucuaaanu na pueyara quiriqianocua-jani, pueyaracaanu nata rishiniuriacuajani, jiyacaritij, nojoriiri Jesuucua tiuquiaari.

<sup>49</sup>Jiyaniijia rupaari pohuatasaaquiaari puetunu cuno jiyajinijanaa. <sup>50</sup>Judiocuacaari na juaaniutia Pueyaso panijaca maajipohua shiniujuquiaari na cojitiuniuria nojori, nojori miiniuria naquiya Pablo, Bernabeenio. Naa rootatuquiaari cuno tiacajiniji camarucuaajaariuhuj, mariyata cuno jiyajiniji nojori taanuunura Pablo, Bernabeenio.

<sup>51</sup>Naaratej, na nuhuajiria, Pablo, Bernabeenio, nojoriiri na niocuacajiniji seseeca rapijionuutaquiaari. Naacuajitij, Antioquiya tiacajinia quiniaa pueyari niishiquiaari, Pueyaso saniitiosacari nojori, majaari nojori Pabloocua, Bernabeecua na tiutianu quiniutianiya Pueyaso jiyanoaquisacari nojori. Na nuhuaji, Pabloori Bernabeeta cuno tiacajiniji quiaquiaari Iconio tiacajinia. <sup>52</sup>Jesuucua tiuuniaa pueyari saniniuuria shuquiriaatia jatequiaari Antioquiya tiacajinia, nojori jiiitiasacari Pueyaso Sohanu.

## 14

### *Pablo, Bernabé quishacari Iconio tiacajinia*

<sup>1</sup>Pablo, Bernabeeta naa miiquiaarijuhua Iconio tiacajinia. Nojoriiri narta Judiocuaca rerejojua tiajinia tiuquitiaquiaari. Nojoriiri tii pohuataquiaari Jesujiniji puetunu nojori niquiarajanaa. Queraatia pueyari Jesuucua tiuquiaari, Judiocuaca, taucuacanio.

<sup>2</sup>Noojiaqueya Judiocuacajinijiniori maja na tojiniu paniniu quiquiaari Jesujiniji pohu-atasano. Cuno pojoriiri taucuaca shiniujuquiaari nojori juaaniuria Jesuucua tiuuniaa pueya. <sup>3</sup>Pabloori, Bernabeeta cunora socua jiyojequiaari pueyaracaanu cuniqui, Jesuucua tiuuniaa nojori cumaquiniuria. Nojoriiri maja na puerenu quiquiaari Jiyaniijajiniji nojori pohuatasacari. Seetanujanaa, Jiyaniijiaari nojori naacuquiaari jiyanohua cutara maninia miishano nojori miiniuria, pueya naatanijionurajuhuj. Jiyaniijiaari nojori



naacuquiaari cuno pueya niishiniuria, seetanujuanaari quiquiaari Pablo, Bernabé pohuatasano. <sup>4</sup> Cuno tiacajinia quiniaa pueyari raquitiquiaari. Noojiaqueyari tama narta Judiocuaca tojiquiaarijaaja. Saniniuujia, tamasacaari Jesu jiyaramiquishano pueya tojijiaara quiquiaari. Nojoriiri naa quiquiaari cuno tiacajinia. <sup>5</sup> Naa nojori quishacaritij, Judiocuacaari taucucata rojotooquiaari cuno tiacajinia jiyaniijianucuata. Naa rojotooquiaariiri nojori sesacanura Pablo, Bernabeenio, na jacutunura saitiajuhuaj. <sup>6</sup> Pablo, Bernabé jaara niishiquiaari naa cuno pueya miiniu panishacari nojoritij, tiji mashiyocuatiquiaariiri Licaonia jiyajiniara. Nojoriiri Litra tiacajinia quiojoquiaari, Derbe tiacajiniaranio, cuno caapiqui tiaca shocua quijiaca tiacajiniajuhuaj. <sup>7</sup> Nojoriiri tii poojotaquiaari Jesujiniji nojori niishishano.

*Litra tiacajinia pueya jacutusacari Pablo saitia*

<sup>8</sup> Litra tiacajinia quiquiaariiri sesarunocua pueyano. Majaari na rucuanenu quijia. Nojuajaari na rasaanuquiarjuhanajaj. Majaari na pooniniu quijia na cajitiujiniji. <sup>9</sup> Cuno pueyanoori Pablo tojiriquiaa na pohuatasacari Jesujiniji. Pablo jaara na niquiquiaari, na niishiriiri nojuajaari seetanujuaanaa tiuuriquiaa na pohuatasanoocua. Naa Jesuucua na tiuuniuucuatej, Pabloori niishirii cuno pueyano na naata na cashacu jeequenuhua. <sup>10</sup> Pabloori jiyamitia jiyanohua na sequeree:

—¡Maninia quia nujuare! ¡Maja porequetanu!

Cuno pueyanoori ritia sanequee. Rucuanenu saniriiri. <sup>11</sup> Cuno Licaonia pueya jaara niquitiuquiaari naa Pablo miishanotej, nojoriiri tama na rupajiniajaaja sequetuquiaari:

—¡Cumaacaraca quijiacaari juhua pueyasohua pocua rosetareeni, juhua pueya niquishano!

<sup>12</sup> Naa nojori sequesacaritij, majaari Pablo, Bernabé niishiniu quiquiaari nojori sequesano tama nojori rupajiniajaaja. Cuno pueyari Bernabé sesojoree Júpiterta, juhua nojori pueyaso sesa. Pabloori sesojosaareecujua Mercurio, jiyanohua pocuanu niishijia na quiniuucua, juhua nojori pueyaso Mercurio. Nio sesacaari Licaonia pueyapue pueyasohua sesaca quiquiaari, nojori jiitiasano juhua na pueyasohuara cuno jiyajinia. <sup>13</sup> Júpiter secojojua tiaari Litra tiaca tohuateya shuriucua quiquiaari. Jiyacaritij, Júpiter secojojua tia cojuanaari juyaca jaatucunuquiaari, Pabloocuara nojori puecoosocoriquiano Bernabeecuaranio, juhua nojori pueyasohuacuara. Maniniushitajara naana shuucua shiyosano patootaquiaarijiaariuhuj. Cuno pueyanoori puetunu pueyatajanaa Pablo, Bernabé shuquiritianu paniriquiaa juucua, juyaca na puecoosacari nojoriicuara juhua Pueyasooacuara. <sup>14</sup> Pablo, Bernabé jaara niquiquiaari naa cuno pueya miiniu paniyano nojoritij, nojoriiri na toqueya sutaquiaari nojori tacaaniutia. Pueya tajiniaaco netecuatiquiaariiri nojori miiniu panishano nojori tarinitianura. Pabloori naa nacaquiaari puetunu cuno pueya tojishocoriquianojuanaa:

<sup>15</sup> —¡Pueyanaa! ¿Casaara naa nia miya canaani? ¡Canaari nareja pueyani taa niajanuyacuaani! ¡Canaari naacua niyarucuaa niaacuatej canaa sequenura niajanuya, puetunu nio najuhuaana nia miishanojuanaa nia cartenura! ¡Saaja nia shuquiritiare cutara pueyaracaanu rishijia Pueyaso! Nojuajaari nio jiya shipiniquiaari, jiya cajiniocua. Na shipinishanojaariuhua shoniniacu caminia. Puetunu pa niquishanojuanaari na shipinishano. <sup>16</sup> Pueyasoori tarijia puetunu pueyajanaa tarinitiaquiaari nojori miiniuria tama nojori panishanojuajaaja. <sup>17</sup> Naajaa, nojuajaari pa supuetanaa niishitiquiaari cante nojuajani, maninia na miishacari nojoriria. Nojuajaari maru nitiquiaa pajaniyara, pa nataacuaca moritianura, pa miasocoriquiano pa jiitianura queraatia, shuquiriaatia pa quiniurijahuaj.

<sup>18</sup> Pablo, Bernabé jaara naa sequequiaari cuno pueyatej, pueyari jatarinitiaja socua tarinitiaquiaari nojoriicuara na puecoonu panishano juyaca.

<sup>19</sup> Jiyacaritij, Antioquiya tiacajinijinio Judiocuacaari tii tiuquijioseequiaari, Iconio tiacajinijinio. Nojoriiri cuniqui quiniaa nasojosee Pabloocuara, Bernabeecuaranio. Cuniqui jacuteree saitia Pabloori. Nojori jaara jiyaniquiaari Pablo naasucuaari tari cusoyaree saitia jacusano, na jaatiuquiaari tiacajiniji tamamaari. <sup>20</sup> Jesuucua tiuuniaa pueya

jaara rerejoquiaari Pablo shocua, macu na quishacari, nojuajaari saaja sanequiaariuhua, saitia jacusano juucua. Na jacunaa tiacajinia tiuquiquiaariuhua saajaari. Tariqui cuno tiacajiniji quiaquiaari Bernabeeta Derbe tiacajiniaari.

<sup>21</sup> Jaara Jesujiniji pohuataquiaari tii, queraatia pueyari Jesuucua tiuquiquiaari. Na nuhuaji, nojoriiri Derbe tiacajiniji riujiuutiaquiaariuhua. Tiuquijioquiaariuhuari Litra tiacajinia, Iconio tiacajinia, Antioquiya tiacajinianio. <sup>22</sup> Pabloori Bernabeeta puetunu cuno tiacajinia quiniaa Pueyaso pueya rootaquiaari socua, maja nojori tarinitianura Jesuucua tiuuniu. Pabloori naa nojori sequequiaari:

—Canapuate Pueyaso shuriucua quiriqianoni, nojoriiri naquiya miiniutianiya mijiria.

<sup>23</sup> Nojoriiri maninia Pueyaso tojjijaca pueya saquiriojotuquiaari, nojori jiyateso-coriquiano Pueyaso pueya jiitariquiano. Naa miitiuquiaari puetunu cuno tiacajinijanaari, Pueyaso pueya jiitianura tama nojori nacasunaajaaja. Jesu saquiriojosano pueyari maja na miaquenuunu quiquiaari Pueyaso na secojonuusacari. Nojoriiri naa secojoquiaari Pueyasotej, narta Pueyaso pueya jiitariquianoocuara:

—Canaa Jiyaniijianaa, nio pueya quiocua tiuujiacani, nojori quia naacure quiocua tiuunaa narta pueya nojori jiitianura maninia.

*Pablo tacatesacariuhua Bernabeeta Siria jiyajinia Antioquiya tiacajiniara*

<sup>24</sup> Nojori riujiuuniuhuara Antioquiya tiacajinihuara, Pisidia jiya shocotumohuari. Na nuhuaji, tiuquijioquiaariuhua Panfilia jiyajiniaari. <sup>25</sup> Tii Pueyaso rupaa pohu-atatuquiaari Perge tiacajiniaari cuno pueya niquiara. Nojori pohuatanu nuhuaji, Atalia tiacajinia quiojoquiaarijiaariuhuj. <sup>26</sup> Cuniquiji, buquejina jaaretatuquiaari Antioquiya tiacajiniaraari. Cuno Antioquiya tiacaari quiquiaari tee cuniqui narta Pueyaso pueya niaquiaari nojoriicua na juaashiquiacuajani, Pueyaso nojori secojosacari. Nojori naa miiquiaari, Pablo, Bernabé jiyatesaanura tucuaaanu nojori quiojonura Pueyaso rupaa nojori pohuatanura taucuaca. Cunoori quiquiaari shushajanaa nojori coteenu panishacari rucuanenonu tamaquicua. Naacuajitij, nojori tohuateenu nuhuaji puetunu Pueyaso panishanojuanaa, jiyacari shusha tiuquijioriquiohuari. <sup>27</sup> Antioquiya tiacajinia nojori quishacari tari, nojoriiri puetunu Jesuucua tiuunia pueya masuunujuquiaarijianaa. Cuniqui pohuataree puetunu nojori niquiarajanaari, taa Pueyaso naacucanu maninia nojori pohuatasacari Jesujinijini. Pohuatanuuquiaarijiaariuhuj taa Pueyaso taraajetequiaari taucuaca jiuujiani, Jesuucua nojori tiuuniurajuhuj. <sup>28</sup> Pabloori, Bernabeeta cuniqui tarishiquiaarijiaara narta Jesuucua tiuuniaata.

## 15

*Jesuucua tiuunaa jiitianaa nacoosacari Jerusalén tiacajinia*

<sup>1</sup> Jiyacaritij, Judea jiyajinijinio pueyari Antioquiya tiacajinia quiojoquiaari. Nojoriiri tii sesa niishitiojonu coteequiaari cuniqui quiniaa Jesuucua tiuunaa pueya. Nojoriiri naa sequeriquiaa Antioquiya tiacajinia quiniaa narta Pueyaso pueyatej:

—¡Pueyanaa, Jesuucua tiuunaa pueya cuaara na cararaatiuuquia co miatejoteera, taa Moisés niishitiojoquiaaricuajani! ¡Jaara mialesoo quiri, majaari Pueyaso jiyanooni quiniutianiya jiyanotej, na pueya nojori quiniuria!

<sup>2</sup> Pablo, Bernabeenio, nojori jaara tojiquiaari naa cuno pojori niishitiojosanotej, nojoriiri cuno pojoritia nacojoquiaari jiyanohua. Naacuajitij, Antioquiya tiacajinia quiniaa Pueyaso pueyari Pablo, Bernabé sequequiaari nojori quianura noojiaqueya cuniquijinio pueyata Jerusalén tiacajinia. Nojori jiyaroreeri na nequesotanura Jesu jiyaramiquishano pueya Jerusalén tiacajinia, mariyata Jesuucua tiuunaa pueya jiitianaanio. Nojoriiri jiyaramiquishaaree cuno pojori nequesotasaanura, ¿seetanutejanaa naa miishiyatena, taa cuno Judea jiyajinijinio nijiono pueya niishitiojiya canaacuajani?

<sup>3</sup> Naacuajitij, Pabloori Bernabeeta jiyarosaaquiaari Jerusalén tiacajiniara. Nojori quiasacari Jerusalén tiacajiniara, Fenicia jiyacuma quiojomaquiaariiri, Samaria jiyacumano. Nojoriiri cuno jiyacajinia Pueyaso pueya pohuatanuumaquiaari taa taucuaca

cartequiaari tama sesa nojori miishanojuaajani, Pueyaso tojjiara nojori quiniuria. Jesuucua tiuunaa pueya jaara naa tojiquiaariti, nojoriiri jiyanojua shuquiriquiaari.

<sup>4</sup>Nojori tiuquiiijosacari Jerusalén tiacajinia, puetunu Jesuucua tiuunaa pueyajanaari nojori rerejotaquiaari, mariyata puetunu Jesu jiyaramiquishano pueyajanaano. Pablo, Bernabeeri jiyacari nojori pohuataquiaari puetunujuanaa, naajuhuj, taa Pueyaso naacuquiaari maninia nojorini, nojori pohuatasacari taucuaca Jesujiniji. <sup>5</sup>Cuniqui quiriqiaajaariuhua Fariseocuaca, tariucua Jesuucua tiujujaca. Cuno pojoriiri rerejonaa tajiniji nujuatuquiaari. Naa sequetureeri:

—Cuno taucuaca Jesuucua tiuunaa, na cararaatiuuquia co cuaara miatejosaaria Judiocuaca nojori quiyaquishacari. Na nuhuaji, nojori cuaara Moisés niishitijosano tojjiara quiri, taa Moisés rootaquiaari tariucuacaanucujani.

<sup>6</sup>Naa nojori nacojonu nuhuajiti, saa Jesu jiyaramiquishano pueyajaari rerejoquiaari jiyareta Jesuucua tiuunaa narta pueya jiitianaata. Nojoriiri maninia niishiriojonu- uquiaari taa na miiniutianiyani. <sup>7</sup>Naa pueyaracaanu nojori pocoojosacariti, Pedroori socua nojori tajiniji nujuatuquiaari. Naa nojori sequereeri:

—Pueyanaa cua tojitiare. Niaacuajaari niishiya, pa Jiyaniijaari cua saquiriojoquiaari na rupaa pohuatariquiano taucuaca tojishocoriquiano, nojori tiuuniuria Pueyasocua- juhuaj. <sup>8</sup>Pueyasocuaajaari poojia niishijia. Nojuajaari cuno taucuaca niishitiquiaari, nojuajaari nojori jiyateree na pueyarajuhuj, na Sohuanu na niquitiosacari nojori, taa na niquitioquiaari pajaniyacuaani. <sup>9</sup>Majaari nia jiyaniinu Pueyasoori saaja Judiocuaca paniya. Pueyasoori maja rimiajata na paniniu. Nojuajaari puetunu pueya panijanaa. Cuno taucuaca jaara nocua tiuquiaari, nojuajaari nojori jiuujia jeequereehuj saaja Jesuucua nojori tiushacari. <sup>10</sup>Naa nia tamacasacari taucuacajinijinio parta Pueyaso pueyatej, niaari Pueyaso miishano sojotaaruhua. ¿Casaara nia tamaca Pueyaso miishanoni? Niaari quiarjia Moisés niishitijosano tojitiniu paniya Jesuucua tiuunaa pueya, juhua pa tojishanocuaa. Saniniuujia, majaari quenaaja pa supuetanaa na naata na miiniu quiquiaari puetunujuanaa, taa Moisés niishitiojoquiaaricujani. <sup>11</sup>Paari niishiyani pa Jiyaniija Jesuuri pa jyanoojia. Naaratej, pa jyanooquiaari, na pueya pa quiniuria. Mariyata naa miiquianu cuno taucuacajaariuhuj. Majaari seetanujuanaa maninia pa miiniu quiquiaari pa jiyanooshaanura.

<sup>12</sup>Naa Pedro sequesacariti, puetunu pueyajanaari socua sanaajetaquiaari. Bernabeeri Pablota jiyacari pohuataquiaari taa Pueyaso na cumacata miitiquiaari maninia taucuaca niquiarani, naajuhuj, taa nojori naatanijioquiaari cusosuhujaniuhuj. <sup>13</sup>Naa nojori pohuatanu nuhuajiti, Santiagoori sequequiaarijuhuaj:

—Cuarta Pueyaso muerasunaa, cua tojitiare. <sup>14</sup>Simón Pedrocuajaari tari pa pohuataree taa Pueyaso coteecanu shusha na Sohuanuta poonijionura cuno taucuaca jiuujiajiniani. Pueyasocuaajaari nojorijinijinio jiyateya seetanujuanaa na pueyara, nojori maniuhuaqueetanura nojuaja. <sup>15</sup>Seetanujuanaari nio. Naajuhuj, tariucuacaanu Pueyaso sequenu panishano caminiujiuniaacuajaari naa naajionuutaquiaari Pueyaso sequesantej:

<sup>16</sup>“Janiyari David niquiohuacuajinio mueratenutaniya tamonu pueyanoni. Davidcuajaari na supuetanarano. Nojuajaari Jiyaniijaanaa quiriqiano puetunu pueya-puerajanaa, taa David quiquiaari Israel pueya jiyaniijiacuaani. <sup>17</sup>Naacuajiti, puetunu taucuacajanaari cua pajenuunutaniya, noo pojori teyano cua saquiriojoquiaari tariucuacaanucujani, nojori jiyatesocoriquiano na Jiyaniijia janiya’.

<sup>18</sup>Jiyaniijaari naa sequeyaquij. Nojuajaari tariucuacaanu pueya toquiaari nio”.

<sup>19</sup>Naaratej pueyanaa, janiyari nia sequeyani, nareja nia niquiri cuno taucuaca, Jiyaniija Jesuucua tiuunaa. Majaari nojori najiuitiniu Pueyasocuaaji, nia tojitiniu panishacari nojori tariucuacaanu Moisés niishitijosano. <sup>20</sup>Nareja nojoriicuara pa naajiore. Pocua pa naajionejina sequere nojorini, maja tari nojori miaquenuunura shipinishano pueyasocuaara na puecotusano casaa, juunu, borregonio. Cuaara quitu- uria saa necocuataja, maja tamonu na numuetucunura socua. Jaara shu miaquetunu paniri, cuaara na miaqueera puetunu na nanaca caatinijasanojuanaa, naajuhuj, maja

na miaquenuunura casami nanaca. <sup>21</sup> Puetunu nio cua sequesanojuanaari parta Judiocuaca tojishano. Cuno niishitiojosanoori pueyaracaanu parta Judiocuaca rerejojuaca tiajiniaqueya naa serojosaaquiaa Moisés naajioneejiniji puetunu samaatenu juucajanaa, puetunu tiqiyocua tiacajiniajanaa.

<sup>22</sup> Naa nojori pocoojonu nuhuajitij, Jesu jiyaramiquishano pueya, puetunu tii quiniaa Jesuucua tiuuniaa pueyajanaano, nojori jiitianaajuhuaaj, puetunu nojorijianaari mariyata niishiriojonuuquiaari. Naacujitij, nojoriiri narta Pueyaso pueya saquiriojotuquiaari na jiyarotusocoriquiano Antioquiya tiacajinia Pablota, Bernabeetano. Jiyacari saquiriojosaareeri Judas, Silasnio. Judas sesaari Barsabás quiquiaarijuhuaaj. Cuno pojoriiri Jesuucua tiuuniaa pueya tojishano quijia cutara, cuniqui Jerusalén tiacajiniani. <sup>23</sup> Nojoritia jiyarotasaquiaariiri naajionee. Cuno naajioneejiniaari naa sequequiaari:

“Niaacuara naajionaani, canaari Jesu jiyaramiquishano pueyani, Jesuucua tiuuniaa jiitianaano, Jerusalén tiacajinia niarta Jesuucua tiuniaa pueyajuhuaaj. Canaari nia saruhuataani pueyanaa. Taucuaca nia quishacari, naajaa. Jesuucua tiuuniaa nia quishacari, niaari canaa tapueyocucajuhuaaj, tiqiyocua Antioquiya tiacajinia quijiaa, Siria jiyajinia quiniaano, Cilicia jiyajinia quiniaajuhuaaj. <sup>24</sup> Canaari niajanijajiniji pohuataaarucuaani, niiquiji pueyanaari niaacua quiacanu. Canaa nia jiyanoori. Majaari canaa jiyaronu quiqianu nojori. Cuno pojoriniaari nia taajetecanu tamaatia nojori niishitiojosacari niajanija. Naajuhuaaj, nia cushitocanuuri nojori sequesacari nia cararaatiuuquia co nia miatejonura taa Moisés niishitiojoquiaaricuaajani. Nojoriniaari nia shiniujuuquianu nia tojitianura socua Moisés Rootasanojuhuaaj. Quiaritia maja naate pueyanaa. <sup>25</sup> Naaratej, saa jiyareta canaajaari niya rerejoreeni canaa niishiriojonura canapue canaa saquiriojonutaniyani niaacua jiyaramiquishocoriquiano. Canaari nojori saquiriojoree tarini canaa jiyarosocoriquiano Pablota, Bernabeetano, nojori pocoojoriquiano maninia niaata. <sup>26</sup> Canaa panishano pueya Pablo, Bernabeenio, nojoriiri tama na cuaqueya panitiaquiaaritiaaja Jesujiniji nojori pohuatasacari tiqiyocua. <sup>27</sup> Quiarijiani, canaari niaacua jiyaroya canaajinijinio canaa saquiriojosano pueyani. Nojoriiri Judas, Silasnio. Nojoriiri nia sequenutaniya casaa nia miiniutaniyani, naatej, taa canaa pocoojoree canaa rerejosacaricuaajani. <sup>28</sup> Canaa niishiriojosanoori maninia quiya Pueyaso Sohuanura. Canaari na shuquiritiaajuhuaaj. Majaari canaa cushitionu paniniu niajanija puera canaa supuetanaa niishitiojosanota najuhuanaj. <sup>29</sup> Canaari saaja nio nia sequenu paniyani pueyanaa. Nia tojitiare. Majaari socua nia miaquenu shipinijiosano pueyasohuacuara puecoosano casaa. Majaari nanaca miaquenu. Naajuhuaaj, niaa jaara shu miaquenu paniri, nia miaquere maninia na nanaca caatinijasano. Naajuhuaaj, saaja nia niquiocoahuata nia quiriquia. Majaari socua tamonu numuetucunu. Niaa jaara nio tojijia quiri, niaari maninia miyacuaja. Tariucuaja pueyanaa”.

<sup>30</sup> Naacujitij, cuno cuatro pueyari jiyarosaaquiaari Jerusalén tiacajiniji. Jaara tiuquijioquiaari Antioquiya tiacajinia, nojoriiri puetunu Jesuucua tiuuniaa pueyajanaa numootejoquiaari na rerejonura. Puetunu nojorijianaa jaara tari rerejoquiaari, jiyacari niquitiosaaquiaariiri cuno naajionee puetunu nojori niquiarajanaa serojosocoriquiano. <sup>31</sup> Naajionee jaara serojosaaquiaari, puetunu Jesuucua tiuuniaa taucacajanaari shuquiriquiaari jyanohua. Naacujitij, nojoriiri nojia cajitiquiaariuhua tacaquioyano juucua. <sup>32</sup> Na nuhuaji, Judasri Silasta cuniqui Antioquiya tiacajinia camueenujuquiaari. Nojoriiri Pueyaso Sohuanu cumaaca jiitiaquiaari, Pueyaso sequenu panishano nojori caminiuuniuria. Naacujitij, nojoriiri Jesuucua tiuuniaa pueya cumanjiaquiaari jyanohua. Na rootatuquiaariiri maja nojori tarinitianura Jesuucua tiuuniu. <sup>33</sup> Nojoriiri Antioquiya tiacajinia camueenujuquiaari pasaja. Na nuhuaji, nojori quianu panishacariuhua Jerusalén tiacajiniohua na jiyaronaacua, Antioquiya tiacajinia quiniaa Pueyaso pueyari nojori sequequiaari:

—Maniniacuaja. Juhuaajaniya nia quiaarohuaqui.

<sup>34</sup> Silasri saaja na cojiniaacuaji jateequiaari cuniquijia Antioquiya tiacajinia. Naacujitij, Judasri tamajaaja tacatequiaariuhua Jerusalén tiacajiniohua. <sup>35</sup> Pablo, Bernabeeri Antioquiya tiacajinia camueenujuquiaarijuhuaaj. Nojoriiri cuniqui Jesuucua tiuuniaa

pueya niishitiojoquiaari. Queraatia cuniquijinio pueyari nojori rupuequiaari niishitiojonurajuhuj. Puetunu nojorijianaari Jiyaniijia Jesujiniji pohuataquiaari tamasaca niquiarajuhuj.

*Pablo pacutenu panishacariuhua quianu Pueyaso pueya na niquiniuhua*

<sup>36</sup> Nojori jaara tari tarishiquiaari tii, Pabloori Bernabé sequequiaari:

—Noo tiacajinia pa camiquioocuara socua niquiniuhua, paa tii pohuatacanu Jiyaniijia rupaatej. Naa pa miiri pa niishiniuria taa parta Jesuucua tiuuniaa pueya quiyani.

<sup>37</sup> Bernabeeri na riucaaree:

—Jajaa. Juan pa riyarecuarajaj, pa tarajariquiano.

Juan sesaari Marco quiquiaarijuhuaj. <sup>38</sup> Majaari Pablo paniniu quiquiaari Juan quianura nojoritia. Nocuaji Bernabé sequequiaariiri:

—¿Paatucua casaara rupoyare pocua Marco saajaanuhua? Nojuacuajaari pa tiujiaquiaariuhua Panfilia jiyajinia pa quishacari. ¿Pueyaso rupaa pa pohuatasacari pa tarajacanu maniniatucuaa? Naacuajaa.

<sup>39</sup> Saa nojorijiaari socua juayonuutaquiaari Juan Marcoocua. Nocuaji Bernabeeri jiyacari Pabloocua rupatequiaari. Na rupatesacari na rupuena Pablojiniji, nojuajaari Juan riquiaari cutara na tarajariquiano. Jiyacaritij, tama nojorijiaarijia buquejinia quiaquiaari Chipre jiyajiniara. <sup>40</sup> Pabloori saniniujia Silas saquiriojoquiaari na tarajariquiano. Nojori quiaaquishacarijia, Jesuucua tiuuniaa pueyari nocuara Pueyaso secojotuquiaari. Naa na miitiuniu nuhuajitij, Pablo, Silasnio, nojoriiri panaatia quiaquiaari cutara Pueyaso rupaa pohuatanura. <sup>41</sup> Nojori quiasacari Jesuucua tiuuniaa pueya shiniujiuniucua, Siria jiyacuma tajitiumiaquiaariiri, Cilicia jiyacumano. Pabloori cuno jiyaca tiacajinia socua poojotaquiaari Jesujiniji. Naa cumaquiquiaari Jesuucua tiuuniaa pueyari.

## 16

*Timoteo cojishacari Pablo, Silasnio*

<sup>1</sup> Pabloori Silasta tiuquijioquiaari Derbe tiacajinia, Listra tiacajinianio. Tii riatatutuquiaari Timoteo jyanishano pueyanoori. Cuno mashajaari Jesuucua tiuujia pueyano quiquiaari. Na nucuaari Judio maaji quiquiaari, Jesuucua tiuunijuhuj. Timoteo queeri tahue quiquiaari cutara. <sup>2</sup> Listra tiacajinia Jesuucua tiuuniaa pueyari Timoteo maniniucuatujua. Naa sequetujuaari nojori: “Timoteori jyanohua maninia pueyano”. Iconio tiacajinijinio Jesuucua tiuuniaa pueyari naa sequetujuhuj. <sup>3</sup> Naaratej, Pabloori Timoteo riniu paniquiaari na tarajariquiano. Cunora, coteenu Timoteo cararaatiuuquia co miatetequiaariiri, cuno jiyajinia quiniaa Judiocuca soojotanuucuaari nojuaja. Puetunu pueyajanaari na niishijia, na queeri seetanujanaa tahue quijia. Nocuaji naa miishaareeri. Na nuhuaji, Timoteo cutaraari Pablo cojiquiaari. <sup>4</sup> Pabloori Jesuucua tiuuniaa taucuaa niquiquiaari puetunu tiacajinijanaa. Nojori niquiara caminiujuquiaari Jerusalén tiacajiniji Jesu jiyaramiquishano pueya sequesano nojoririaari, mariyata Jesuucua tiuuniaa pueya jiiitanaa sequesanojuhuaj. <sup>5</sup> Naa Pablo caminiujiushacaritij, puetunu Jesuucua tiuuniaa pueyajanaari socua noojia cumaquiquiaari jyanohua. Tamasaari socua Jesuucua tiuquiaarijuhuaj. Jesuucua tiuuniaa pueyari naa canequiaari socua. Naa caneriquiaa puetunu juucajanaari.

*Pueyaso Sohuanu tosacari Pablo, Macedonia jiyajiniara na quianura*

<sup>6</sup> Na nuhuaji, Pueyaso Sohuanuuri Pablo tenujuquiaari maja nojori pohuatanura Jesujiniji Asia jiyajinia. Naacuajitij, nojoriiri Frigia jiyacuma quiojoquiaari, Galacia jiyacumano. <sup>7</sup> Naa tiuquijioseequiaari Misia jiya shuriucuaari. Nojoriiri cuniquiji quianu paniquiaari Bitinia jiyajinia juucua. Naajuhuj, majaari Pueyaso Sohuanu paniniu quiquiaari tii nojori quianura. <sup>8</sup> Cunora, Pabloori na cojiniaata cuaniquiaari Misia jiyacuma. Troas tiacajinia tiuquijioseeri. Nio Troas tiacaari shoniniacu caminia casaqueyaji quiya. Tiiri buque tiutiacojua. <sup>9</sup> Pabloori cuno niucua juhua na maquenujinia niquiquiaari Macedonia jiyajinijinio pueyano nocua nujuaano. Cuno pueyanoori

Pablo sequequiaari: “¡Miji! Canaa quia naacutaquee Macedonia jiyajinia”. Cuno Macedonia jiyari quiquiaari shoniniacu caminia taquijiria. <sup>10</sup> Naa Pablo niqiniu nuhuaji juhua na maquenujinatej, canaari jiyacari ritia pajequiaarini taa canaa quianutaniya cuniquijini. Canaari sequereeni:

—¡Pa quiaarequij! Pueyasocujaari pa panitiaa Jesujiniji pa pahuatanura cuno pueya niquiarajuhuj.

*Pablo quishacari Filipino tiacajinia Silasta*

<sup>11</sup> Canaari Troas tiacajiniji quiaquiaari buquejiniani. Canaari Samotracia jiya tu-cuaatiajaacua tiuquishiini. Canaari cuniquiji sanequiaari tariquiniuhuj, tiuquishiiri Neápolis tiacajinia. <sup>12</sup> Canaari cuniquiji quiaamaa Filipino tiacajiniani. Filipino tiacaari socua panishano tiaca quiquiaari tamasa tiacajiniji Macedonia jiyajinia. Roma tiacajinijinio pueyari tii pacuquiaari tarijia. Nojoriiri cuno Filipino tiaca jiyatequiaari nojori quiquiora. Canaari tii camueenujuquiaari rupaquijiani. <sup>13</sup> Cuniqui canaa quishacari, canaari samaatenu juuca quiaquiaari cuno tiacajiniji moo casaqueyajiriani. Canaari soquequiaarini cuno pueyari tii jiitiquiaari Pueyaso secojonura. Canaari tii nare-jashiquijia cajitiuquiaari mariyatani. Jiyacaritij, maajipohuari cuniqui rerejoquiaari na secojonuunura juucua. Canaari saaja nojori niquiara pahuataree Jesujinijini. <sup>14</sup> Cuniqui maajipohua rerejosaquini, nojori tajinia quiquiaarijiaariuhua tamonu maaji. Na sesa quiquiaari Lidia. Nojuajaari Tiyatira tiacajinijinio quiquiaari. Shanohua quenaaruqueya naatuque toqueya niqitiojojua quiquiaari na cumaneecaraari. Nio maajiiri tarijia Pueyaso secojojua quiquiaari. Tii na quishacari, Pablo pahuatasano tojiriquiaari. Pueyasoori jiyacari na tojeteree. Juhua noojia riatareeri seetanujuanaa Pablo pahuatasano na tojiniuria maninia. Jesuucua tiuuriiri. <sup>15</sup> Na nuhuaji, Lidiaari puetunu na tiajinia quiniaatajanaa tiuquinijosaaquiaari moojinia. Canaa tiuquinijionu nuhuaji puetunu nojorijianaa, Lidiaari canaa sequequiaari:

—Niaa jaara cucuaji taacanuyaquiri, miji, nia quishii cua tiajinia. Janiyari pa Jiyaniijia tojijiajuhuaj.

Nojuajaari seetanujuanaa canaa panitiaquiaari na tiajinia canaa quiniuria. Naacuajitij, canaari na tiajinia camueenujuquiaarini.

<sup>16</sup> Tamonu juuca, socua canaa pacutesacari quianu pueya secojonujuajiniara, canaari samaruraca niyacoo niquiquiaarini. Cuno niyacoori camaruhuaraca quiquiaari. Niyacoori “niishijia samaru” jiitiaja. Naaratej, cuno niyacoori puetunu pueya niishiniu panishanojuanaa pahuataja nojoriria. Naa na miishacaritij, na camaruhuara maseja queraatia cumaneecaari. <sup>17</sup> Cuno niyacoori canaa nuhuaji sacuariquiaa. Naa nacariquiaa canaa na nuhuajishacariiri:

—¡Nio canuu cutaraari jiyocuacaanuji Jiyaniijajiniji pahuatanaa! Nia niishitiojiyari Pueyaso jiyoosshano nia quiniuria, pueyaracaanu nia rishiniuria nata.

<sup>18</sup> Saa naa canaa nuhuaji nacajaari, cuno tiacajinia canaa camueenujusacari. Pabloori socua na juaatiaquiaari. Nocua tacatequiaariiri. Cuno niyacoojinia quijia samaru sequereeri:

—¡Janiyari Jesucristo sesajinia quia jiyaroyani! ¡Cuno maajijiniji quia tohuatare!

Naa Pablo sequesacaritij, samaruuri na tojiquiaari. Ritia tohuataquiaari cuno niya-coojiniiri.

<sup>19</sup> Cuno niyacoo camaruhuari niishiquiaari maja tari nojori masenu quiniutianiya socua cumaneeca juhua coteenu, niyacoo pahuatasanojiniji. Naaratej, nojoriiri Pablo, Silas quiooquiaari na juaaniutia. Nojori jaatucunuquiaari tiaca jiuujiajinia curotasano pueya cajitucuaajiniaraari. Tiaca jiyaniijianucuaari tii quijiaa pueyaracaanu, nojori jiitianura pueya. <sup>20</sup> Niyacoo camaruhuari Pablo, Silas nujuatejoquiaari tiaca jiyaniijianucua tacoji, cuniqui na nequesoreesanura. Jiyaniijianucua sequetureeri:

—¡Nio canuuri Judiocuaca! Nojoriiri niya pa tiacajinia quiniaa pueya juaatijioosee.

<sup>21</sup> Nojoriiri tamaatia niishishano niishitiojonuya. Maja cumaati pa tojiniunioj. ¡Paari Romano pueyani!

<sup>22</sup> Naacujitij, puetunu cuno pueyajanaari na juaaniutia, Pablo, Silas cosequiaari ritia. Jiyaniijianucuaari nojori toqueya jaamitiquiaari jiyanoehua, na jocojosacari nojorijini. Na nuhuaji, tamasaari seeratsaaree nojori na mojoonura macata. <sup>23</sup> Jiyanoehua na mojoosaanu nuhuaji, nojoriiri socua na tiuquinijioquiaari nujuatejojuajinia. Na nuhuaji, nujuatejojua tia camarnu seeratsaareeri maninia na cojuatenura nojori nujuatejojua-jinia. <sup>24</sup> Naacujitij, cuno nujuatejojua tia camarnuuri Pablo, Silas nujuatejoquiaari socua mij, nujuatejojua cariquimiatej. Cuniqum nujuatejosaaquiaariiri tii na cojuasaanura maninia, na mashiyocuatuunucuaaji. Nojori cashacucuaari suruhuatuneecca quejasano tajiniocoma saatijosaaquiaarijuhuaj.

<sup>25</sup> Cuno niucua shiyaqueya, Pabloori Silasta Pueyaso secojonuuriquiaajaa. Pueyaso maniniuhuaqueetaturiquiaari na jaquequejosanota. Cuniqum nujuatejosano pueyari nojori tojitiariquiaa. <sup>26</sup> Jiyacaritij, rijiaari canashiyaquiji jiuuquiutiaquiaari jiyanoehua cuno nujuatejojua tia. Puetunu na tiotiuhujanaari riataquequiaari. Puetunu pueya numatucuaacua morojotasano casaajanaari tamajaaja saacarejetaquiaari. <sup>27</sup> Nujuatejojua camarnuuri ritia niucuaquiaari. Saaja niquirii puetunu tohuateya riataquenोजनाari. Cunora, na nijiniaquetucuaaja mueruu shitiaree ritia na shuucuaajiiri tama na cuaqueya na miaquenurajaaja. Naa miiriiri na jyanishacari puetunu nujuatejosano pueyajanaa naasucuaari tari mashiyocuatuneecca. <sup>28</sup> Pablo jaara na niqumquiaari, nocua nacareeri:

—¡Maja najuhuaana naa miiniutij! ¡Canaacuaajaa puetunujuanaa niya quiyani!

<sup>29</sup> Nujuatejojua camarnuuri na shiriiniutia tetecariquiaa. Tamonu sequereeri ritia samaritiu na patanura nocua. Samaritiu caaniuji netequee cutaraari nujuatejojua jiniacumara. Pablo, Silas cariquimij mojuquetaseeri. <sup>30</sup> Jiyacari nojori tohuatejoree carijiniacumaari. Nojori nequesotareeri:

—¡Pueyanaa! ¿Taa cua miyariniija, Pueyaso jiyanooshano cua quiniuriajuhuaj?

<sup>31</sup> Nojoriiri na riucaaree:

—Jiyaniija Jesucristoocua quia tiuuri jiyanooshano quia quiniuria, puetunu quia tiajinia quinia quiniuria jiyanooshanojuhuaj.

<sup>32</sup> Naaratej, Pabloori Silasta na niqumia pohuataree Pueyaso rupaa Jesujiniji, mariyata puetunu na tiajinia quiniaajanaa niqumiaranio. <sup>33</sup> Jiyacaritij, nujuatejojua camarnuuri cuno niucuaaja Pabloocua jiyanoocua, Silascuanio. Nojori cuaqueya majacuyashiquia jeequejoreeri. Na nuhuaji, puetunu cuno pueyajanaari ritia tiuquinijosaaquiaari moojinia Jesucua nojori tiuushacari. <sup>34</sup> Jiyacari na tiajinia nojori jiyataquiaariiri. Tii Pablo, Silas mianuutereeri. Cuno nujuatejojua camarnuuri jyanohua shuquiriaatia quiriquiaa puetunu na tiajinia quiniaatajanaa, Pueyasocua tiuuniaa nojori quishacari.

<sup>35</sup> Cuno tariqui, Filipo tiaca jiyaniijianucuaari na seya jiyaroquiaari nujuatejojua tia camarnucua, na sequenura nojuaja cuara Pablo, Silas tohuanijioora tari. <sup>36</sup> Nujuatejojua camarnuuri Pablo sequesee:

—Tiaca jiyaniijianucua cucua jiyaroree na rupaani, cua cartenura quiaritia niajanija. ¡Juhujaniya nia quiaarohuaqui!

<sup>37</sup> Pabloori saaja jiyaniijianucua seya sequequiaari:

—¿Majateeri nia jiyaniijianucua niishiniu canaari Romano pueyajuhuj? Canaa mojuoturiquiaacuaa puetunu pueya niqumiarajanaari. Majaari coteenu canaa nequesoreesaanu quiriucuaa. Canaari jyanojuaa nujuatejosaarucuaani. ¿Taa na miitiuniu paniya quiaritia canaari, jiyasohuj tohuatejonu paniniu? ¿Jiyasohuj mojuoturiquiaacuaa canaatucuaa? ¡Nojorijanaa cuara niiria quiaritia, niqumij nojori tohuatejonura canaa!

<sup>38</sup> Jiyaniijianucua seya jaara tacatequiaariuhua, puetunu Pablo sequesanojuanaa pohuataquiaari Filipo tiaca jiyaniijianucua niqumiaari. Nocuaaji jiyaniijianucuaari puertuquiaari nojori niishishacari Pablo, Silas Romano pueya quiquiaarijuhuaj. <sup>39</sup> Naaratej, cuno jiyaniijianucuaari ritia quiaquiaari nujuatejojuajinia Pabloocua, Silascuanio, nojori jyanootoonura. Jiyaniijianucuaari nojori tohuatejosee. Nojori sequereeri cuara quiojoora quenaaja nojori tiacajiniji. <sup>40</sup> Naacujitij, Pablo, Silas jaara tohuareetaquiaari

nujuatejojuajiniji, Lidia tiajinia quiojoquiaariiri. Tii rootatuquiaari socua Jesuucua tiuun-  
niaa pueyari, socua Pueyasocua nojori tiuuniuria. Na nuhuaji, tiji quiojoquiaariuhuari.

## 17

### *Tesalónica pueya juaashacari Pueyaso pueya*

<sup>1</sup> Pablo rucuanajosacari Silasta Jesujiniji nojori pohuatasacari, nojoriiri jiyacari shoconujutuquiaari Anfípolis tiaca, Apolonia tiacanio. Naa tiuquiiioseequiaari socua Tesalónica tiacajiniaari. Cuno tiacajinia quiquiaariiri Judiocuaca rerejojua tia. <sup>2</sup> Taate Pablo quijiacuajani, nojuajaari narta Judiocuaca rerejojua tiajinia quiaquiaari. Cuno tiacajinia na quishacari, jiuujianaraca semaana shocotejoquiaariiri. Puetunu semaana shocojosacarijianaa, samaatenu juuca, cuno pueya niquiara pohuataquiaari Pueyaso rupaari. <sup>3</sup> Pabloori nojori niishitiojoquiaari taa tariucuacaanu Pueyaso sequesano caminiujiunaa naajiotaquiaari Pueyaso Jiyarosocoriquianojinijicuajani. Niishitiojoquiaariiri cuno naajiotasanoori tari tohuateequiaari Jesu jaara naquiya miishaaquiaari, naajuhuj, Jesu jaara na cusonu nuhuaji samiitiaquiaariuhua. Naa nojori sequereeri:

—Nio Jesucujani, janiya nia pohuataani, nojuajaari Pueyaso Jiyarosano pocua.

<sup>4</sup> Jiyacaritij, noojiaqueya Judiocuacaari Jesuucua tiuquiaari. Queraatia taucuacaari Jesuucua tiuquiaarijuhuaj, canapute tari Moisés niishitiojosano tojjijaca quiquiaar-  
icuajani. Queraatia cuno tiacajinia quiniaa pueya tojishano maajipohuari Jesuucua tiuquiaarijuhuaj. <sup>5</sup> Pueyasocua tiuyashijaca Judiocuacatej, nojoriiri juaaquoquiaari juhua shocotasano nojori quiniucua. Nocuaji, nojoriiri sesa mijiaca taajecori masu-  
unujuquiaari. Nooj, nareja rucojuaca tiacaacacotej. Cuno pojoriiri masuusaaquiaari nojori na cojiniuria, tamasa nojori nasojonura. Na nuhuaji, puetunu cuno pojorijianaa jaara tonujutooquiaari taa na miituniutianiyani, nojoriiri puetunu cuno tiacajinia quiniaajanaa juaatiquiaari Pueyaso pueyacuara. Nocuaji, puetunu cuno pojorijianaari Jasón tiaco tiuquitiaquiaari, Pablo, Silas nojori quioonura juucua, juaaquiyoano pueya nojori niquitiosocoriquiano. <sup>6</sup> Nojori jaara na riuriataaquiquiaari, noojiaqueya Jesuucua tiuunaa pueyari Jasóna cojiritiasaaquiaari quioonu. Cuno tiacajinia jiyaniijiacacua na jayotuquiaariiri. Naa nacatureeri:

—¡Nio canuuri puetunu jiyacajinia pueya sesojijajanaa! ¡Niya tiuquiiioreejaariuhua naa na miiniurijahuaj! <sup>7</sup> ¡Jasónri nojori masecanu maninia na tiajinia! ¡Puetunu nojorijianaari pa jiyaniijia César sequesano tojitiaashijaca! ¡Nojoriiri saaja sequequiaa socua tamonu jiyaniijianaari quiya! ¡Na sesanaari “Jesu”! Naa sequetuquiaaqui nio pojori.

<sup>8</sup> Puetunu pueyajanaa, mariyata tiaca jiyaniijianucuanio, nojori jaara naa tojiquiaari sequeshiyanotej, nojoriiri juaaquoquiaari. <sup>9</sup> Jiyacaritij, tiaca jiyaniijianucuaari queraatia cumaneeca masequiaari Jasónjiniji, narta Jesuucua tiuunaa pueyajinijinio. Naa sequeturee nojoriiri:

—¡Pablo jaara niiquiji quiaaquiri, majaari canaa niqutionu quiniutianiuhua nia cumaneeca!

Naa na miishaanu nuhuajitij, Jasónri nata quioosano pueyata cartequesaaquiaariuhua.

### *Berea tiacajinia Pablo quishacari Silasta*

<sup>10</sup> Cuno niucujaja, cuno tiacajinia quiniaa Jesuucua tiuunaa pueyari Berea tiacajiniara mashiquiquiaari Pablo, Silasno. Berea tiacajinia na tiuquiiijosacari, cuniqui quiniaa Judiocuaca rerejojua tiajinia quiojoquiaariiri. <sup>11</sup> Cuniqui quijaca Judiocuaca cutaraari maninia pueya quiquiaari, maja juhua Tesalónica tiacajinia quiniaa. Naacuajitij, Pablo jaara Jesujiniji pohuataquiaari nojori niquiara, nojoriiri maninia tojitiaquiaari na pohu-  
atasano. Na nuhuaji, puetunu juucajanaa, tama nojorijiaarijia tariucuacaanu Pueyaso Rupaajinia naajiotasano pajenuuquiaari, nojori niishiniuria seetanujuanaa quiriquiaate Pablo niishitiojosano. <sup>12</sup> Naacuajitij, queraatia Judiocuacaari Jesuucua tiuquiaari, queraatia taucuacanio, canuu, mariyata queraatia tojishano maajipohuanio. <sup>13</sup> Tesalónica tiacajinia quiniaa Judiocuaca jaara niishiquiaari Pabloori Berea tiacajinia Pueyaso rupaa



pohuataseecuhuj, nojoriiri nocua quiojoquiaari nojori taanuunura nojuaja cuniqui-jijiuhuaj. Na tiuquiiijosacari Berea tiacajinia, cuniqui pueya nasojoseeri, Pablo na juaatiuniuria. <sup>14</sup> Nocuaji, Jesuucua tiuniaa pueyari cuniquiji ritia mashiquiaari Pablo shoniacu caminiajiniara. Silasri Timoteota Berea tiacajinia jatequiaari saaja. <sup>15</sup> Berea tiacajinijinio pueyari Pablo mashitiaquiaari, nuu na niishitiniuria. Nojoriiri Pablo jiyataquiaari Atenas tiacajiniara. Nojoriiri cuniqui jataquiaari Pablo. Cuno pojori jaara tacaretanu paniquiaarihua cuniquiji Berea tiacajiniohuara, Pabloori nojori sequequiaari:

—Niocua ritia jiyarosuhua Silas, Timoteonio. Nojoricua niyaja cua coquese.

*Pablo quishacari Atenas tiacajinia*

<sup>16</sup> Pabloori Silas, Timoteo sashiquiaari Atenas tiacajinia. Cuno tiacajinia na rucanejosacari pueya na sashishacari, Pabloori niquiquiaari tama cuno pueya shipinijosanojuaaja na pueyasohuara. Nojori shipinijosanoori puetunu cuno tiacajinijanaa quiriqiaa. Pabloori cunora jyanohua tacaquiaari. <sup>17</sup> Pabloori Jesujiniji Judiocuaca poojotaquiaari nojori rerejonuujua tiajinia, noo pojori taucacajuhuj, canapueete Pueyaso tojtiajaca quiquiaaricujani. Naajuhuj, Pabloori cuno tiaca jiuujiajinia pueya cajitiucua curotasanojinia pohuataquiaari Jesujiniji cuniqui quiniaa niquiara. <sup>18</sup> Tamasaca niishijiaaari Pablo pohuatasacari Jesujiniji tojtiaquaa. Nojoriiri caapiqui maapuejinijinio quiquiaari. Tamonu maanuuri sesojosaaquiaari “Epicureohua”, Epicuro jyanishano niishijia niishitiojosano tojtiajaca nojori quiniucua. Tamonu maanuuri saniniuujia sesojosaaquiaari “Rejeretajaca”. Naa sesojosaaquiaariiri Zenón jyanishano niishijia niishitiojosano nojori tojiniucua. Pablo pohuatasacari nojori niquiara, nojoriiri maja na niishitiuniu quiquiaari casaa na pohuatariquiaani. Nocuaji tama nojorijiaaritia sequetooquiaari:

—¿Casaariquitijia cuno paateca pohuataa pajaniyatejaj? Najuhuana pocuaa pueyara-caanuuri.

Tamasacaari saniniuujia sequetuquiaari:

—Tamasaca pueyasohuajiniji poojotana juhuanaruhua.

Nojoriiri naa sequeriquiaa Pablo pohuatanuucua Pueyaso rupaa Jesujiniji, mariyata taa cusonuuno samiitiaconutaniuhuanu. <sup>19</sup> Na nuhuaji, nojoriiri Pablo jiyataquiaari tuhuananujiniji, tee nojori jiitiquiaari rerejonuunucujani. Cuno tuhuananu sesaari quiquiaari Areópago. Nojoriiri naa sequetuquiaari Pablo:

—Miji. Socua canaa tojishocoriquiano quia pohuataqueeruhuj. Canaari quia pohuatasanojiniji socua maninia niishiniu paniyani. <sup>20</sup> Quiaari jiyajeneta sequeriquiaa canaa niquiara quia pohuatasacari. Quiarijia canaa quia tore maninia.

<sup>21</sup> Puetunu Atenas tiacajinia quiniaa pueyajanaa, mariyata tamonu jiyacajinijinio cuniqui quiniaajuhuj, nojoriiri maja socua tamonu casaa na miitiumu quijia. Saaja quiarinio sequesanojiniji niishitiuniu panijiaaari.

<sup>22</sup> Jiyacaritij, Pabloori Areópagojiniji nujuaquiaari na pohuatanura na tojtianu panijiaa niquiara. Naa coteereeri:

—Atenas tiacajinia quiniaa pueyanaa, janiyari quiarijia niishiyani, niaaqui pueyasohuacua jiaatiajaca jyanohua. <sup>23</sup> Janiyari naa nia sequeyani pueyanaa, cua niquiniucua queraatia nia shipinijosano pueyasohua, cua rucanejosacari nia tiacajinia. Naajuhuj, janiyari saajiajiniji nia shipinishano juhua juhucutura niquiriucuaajuhuj. Nocua naajoori sequeya, “Niishishoo Pueyasora”. Cuno Pueyaso niaa na tojtiaquiaa na niishiyaquiniutiani, nojuajaari nio Pueyasocuaaja janiya nia pohuataani.

<sup>24</sup> Cuno Pueyasoori nio jiya shipiniquiaaricuaaja, puetunu pa niquishanojuanaano. Nojuajaari jiyocuaaanu camarnujuhuj. Nojuajaari puetunu tiqiyocuaajanaa Quijia. Majaari pueya tiajosano secojojua tiajinia na quiniu. <sup>25</sup> ¿Taa nia jiyaniyani pueyanaa, cutara Pueyasojuaanaate pa jiitiasano casamijiniji panijajuhuj? Maja. Nojuacuajaari puetunu pa jiitiasanojuanaa shipiniquiaari puera. Pa rishiniuria, na Sohuanujiniji pa niquitioquiaarihua, pa rijiosocoriquiano paratunio.

<sup>26</sup> Pueyasoori niquiriyatu pueyano shipiniquiaari juhuacatecara. Paari cuniquiji canequiaarini, puetunu jiyacajiniajanaa pa quiniuria. Pueyasoori tarijia sequequiaari tee pueya quiniutianiyani. Sequequiaarijuhuaj taacari tii pa quiniutianiyani. <sup>27</sup> Pueyasoori naa panitiaquiaaricuaja puetunu jiyacajinia quiniaa pueyajanaa pajenura nojuaja. Pueyasoori pa saniya, na niishiniuria, ¿pueyate na pajenutaniyani pa riuriatanura nojuaja? Pueyasocuaajaari maja na quiniu tucuacaanu pajaniyajiniji. <sup>28</sup> Pueyasoori pa samiitianiya. Pa cumaquiquiaajaariuhua pa poonijionura. Pa rishitiquiaajaariuhua. Naatej, taa nia pahuatajaca sequequiaaricuajani: “Paari Pueyaso muerasuni”. <sup>29</sup> Paa jaara seetanujuanaa Pueyaso muerasu quirini, majaari socua pa jiyaniyu Pueyaso naasucuaari juhua orojiniji pa shipinijosano niquishano. Majaari juhua platajiniji shipinishano, juhua saajajiniji shipinishanonio. Pueyaso cutaraari maja na niquishaanu juhua tama pa niishiriojosanojuaja. Majaari na niquishaanu taa pueya shipinijioquiaacuajani, nojori jiyaniyacari Pueyaso naasucuaari naa niquishanotej. <sup>30</sup> Pueyasocuaajaari pueya miiniu sesa rejeretariquiaa pueyaracaanu. Saniniuujia, nojuajaari quiarijia puetunu tiquiyocua quijiaca pueyajanaa sequeya, nojori cartenura puetunu sesa na miiquiosanojuanaa, saaja nojuaja nojori tojitianura. <sup>31</sup> Pueyasocuaajaari tari saquiriojoquiaari tamonu juuca taacari na nequesoreenutaniya mijiria quiniaani. Maninia pa nequesoreenutaniya puetunujuanaari. Pueyasoori tari na saquiriojosano pueyano jiitiaa pa nequesoreeriquianojuhuaj. Na samiitianishacari cuno pueyano macujiniji, nojuajaari naa pa niishitiquiaari, cunocuaajaari na saquiriojosano pueyano.

<sup>32</sup> Nojori jaara tojiquiaari Pablo pahuatasacari taa macunucua samiitiaconutaniuhuani, cuno niishijiaacari na saroojotaquiaari na rerequetenuta. Tamasacaari saniniuujia Pablo sequequiaari:

—Canaacua tamacari quia tojiriirianiuhua.

<sup>33</sup> Na nuhuaji, Pabloori cuno pueya tajiniji quiacuhua. <sup>34</sup> Noojiaqueya cuno pueyajinijioori Jesuucua tiuquuaari, Pablo pahuatasano nojori tojitasacari. Nojorijinijioori quiquiaari Dionisio jiyaniyhano pueyano. Nojuajaari Areópago niishijia pueya maanujinijio quiquiaari. Jesuucua tiuquuaarijuhuaj tamonu maaji. Dámaris na sesa. Socua tamasaca pueyari Jesuucua tiuquuaarijuhuaj.

## 18

### *Pablo quishacari Corinto tiacajinia*

<sup>1</sup> Na nuhuaji, Pabloori Atenas tiacajiniji quiaquiaari Corinto tiacajinia. <sup>2</sup> Cuniqui riuriataseequiaari tamonu Judio pueyanoori. Na sesaari Aquila quiquiaari. Nojuajaari Ponto jiyajinia rasaaquiaari. Aquilaari necocua Priscilata shusha Italia jiyajiniji tiuquijiono quiriquiaa Corinto tiacajinia, tii Pablo tiuquishacari. Jiyacaritij, Claudioori jiyaniijajanaa quiquiaari Roma tiacajinia, Italia jiyajinia. Nojuajaari puetunu pueyapue camarnujuanaa quiquiaari puetunu jiyacajiniajanaa. Nojori jiitiaquiaari Roma tiacajinijiiri. Nojuajaari tama na tiacajinia pueyajaaja sequequiaari puetunu Judioacuajanaa nojori taanuunura Roma tiacajiniji. Naaratej, Aquilaari necocuata quiaquiaari Roma tiacajiniji. Corinto tiacajinia quishiiri. Pabloori nojoriicua quiaquiaari nojoritia na pocoojonura. <sup>3</sup> Aquilaari necocuata suhuoronuutaja toqueya cusupuenuujua quiquiaari juhua Pablojuhuaj. Naaratej, Pabloori nojoritia quishii, mariyata na poonijionuunura tii. <sup>4</sup> Pabloori maja nareja na shocotenu quijia samaatenu juuca. Nojuajaari Judiocuaca rerejojua tiacajinia rucuanerujua. Tii nojori pahuataquiaari Jesujinijiiri, taucuaca niquiaranio, noo pojori canapuate Judiocuacaa jiyatesaaquiaaricuajani, tariucuacaanu Moisés niishitiojosano nojori tojishacari.

<sup>5</sup> Silas jaara Timoteota Pabloocua tiuquijioquiaari Macedonia jiyajiniji, Pabloori jiyacari coteequiaari puetunu juucajanaa Jesujiniji pahuatanura Judiocuaca niquiarano. Nojori sequequiaariiri:

—Jesuucuaajaari nia sashishano, Pueyaso Jiyarosano seetanujuanaa pocua!

<sup>6</sup> Judiocuaca jaara tojiquiaari naa Pablo sequesantej, na tojitiaquirii saajaari nojori cuaracashitiniutia Pablo sequesano. Saaja juaaquioreeri. Sesa pocoreejaariuhua.

Naaratej, Pabloori nojori niqiuara na toque nuutojoquiaari, nojori niishiniuria Pablo tari nojori tiujiaarohua. Pabloori nojori sequequiaari:

—Majaari cucua nia tiutianu, Pueyaso jaara mijiria quiniaa saniitiore. Niaacuajaari Pueyaso rupaa ruuretaquiaa saaja. Quiaritia taucuacaacua quiaa cutaranijia, nojori cua pohuatanura Pueyaso rupaa Jesucristojiniji.

<sup>7</sup> Na nuhuaji, Pabloori cuno Judiocuaca rerejojua tiajiniji tohuataquiaariuhua. Tamonu pueyano tiajinia quiaquiaariiri. Cuno pueyano sesaari quiquiaari Justo. Nojuajaari Pueyaso tojinia quijia. Na tiaari jiyareta Judiocuaca rerejojua tia shuriucua quiriquiase.

<sup>8</sup> Crispoori jiyacari cuno Judiocuaca rerejojua tia camarnu quijia. Nojuajaari puetunu na tiajinia quiniaa pueyatajanaa Jesuucua tiuquiaari. Naajuhuj, queraatia Corinto pueyari Jesuucua tiuquiaari Pueyaso rupaa nojori tojishacari. Naaratej, puetunu Jesuucua tiuuniaajanaari moojinia tiuquinijosaaquiaari. <sup>9</sup> Jiyacari tamonu niucua, Jiyaniijia Jesuuri Pablo sequequiaari na maquenujinia:

—Maja quia puerenu Pablonaa. Socua quia pohuatare cuno pueya tojishocoriquiano. Majaari sanaajenu. <sup>10</sup> Janiyacuajaari quiata quiyani. Majaari quenaaja tamonu pueyano jiyashiniu quiniutianiya taa na miiniu paniniuria quiajaniya. Janiyari queraatia pueya nio tiacajinia jiitiaa cucua tiuuriquianoni.

<sup>11</sup> Naaratej, Pabloori Corinto tiacajinia jiyojequiaari. Tii na quishacari, quera shocojotequiaari caapiqui marijaari. Cuniqiu na quishacari, Pueyaso rupaa niishitiojoriquiaa cuno pueyari.

<sup>12</sup> Jiyacaritij, Galión jiyaniishano tahueri Acaya jiyajinia pueya camarnu quiquiaari. Corinto tiacaari Acaya jiyajinia quiriquiasejuhuj. Jiyacari, Judiocuacaari tii Pabloocuara rojotooquiaari. Na nuhuaji, na quiatuquiaariiri. Naa na jaatucutuquiaari cuno jiya camarnuucuaari, Pablo nequesoreesaanura. <sup>13</sup> Naa sequetusee camarnuuri:

—¡Canaa camarnunaa, nio pueyanoori pueya shiniujiya Pueyaso nojori shuquiritia-nura tamaatia canaa supuetana Moisés Rootasanojiniji!

<sup>14</sup> Pabloori jiyacari juucua pocuanu paniriquiaa. Galiónri saa na rupaa niyacutequeejaa senota. Cuno Judiocuaca sequereeri:

—Judiocuacanaa, niaa jaara maninia miyashijiaca cucua jaatucure cutara, sesa miijiaca sequenio, janiya maara jiyano pueyanooacara nia tonujusacari tojiri cutarani. <sup>15</sup> Niaari saaja tama nia niishishanojiniji juayonuutaajaacujua. Maja cua nequesoreenu quiniutianiya tama nia juayonuutasacarijiaaja nia sequesano tamasa shaajecono pueya sesacajiniji, tama nia supuetanaa rootasanojinijiaajanio. ¡Tama nia jecatoorejaaja!

<sup>16</sup> Na nuhuaji, cuno camarnuuri nojori juaarii. Na shuriucuaari na jiyaramiquiriohuari.

<sup>17</sup> Naa Galión miishacari nojoritij, narta taucuacaari cuniquijia quiatuquiaari Sóstenes, Judiocuaca rerejojua tia cojuana. Na piquitirii camarnu Galión niqiuara cuniquijiaari. Majaari Galión tenujunu quirii nojori. Nareja na niquiriquiaari.

*Pablo riuujiushacariuhua Antioquiya tiacajiniahua. Na nuhuaji jiuujianaraca pacutequiaariuhua quianuuri*

<sup>18</sup> Pabloori cuniqiu queraatia camueenujuquiaarijiaara Corinto tiacajinia. Tari na riuujiushacariuhua cuniquiji, na nuhuajiria saruhuataarohua narta Jesuucua tiuuniaa pueyari. Buquejinia quiaarohua Siria jiyajiniohuari. Na cojiriquiaajaari Priscila, neyaca Aquilano. Nojori tacataaquishacarijia buquejiniacuma, Cencrea tiacajiniji na quiojonura, Pabloori jiyacari na naca riuujiuquiaari caritianajara. Nojuajaari Pueyaso sequequiaari tari, maja na naca na riuujiutiniu quiniutianiya nojuaja jaara na sequesano Pueyaso tucataaquiri.

Cunora, naa quiaritia riuujiutirii na nacaari. <sup>19</sup> Nojori tiuquijiosacari Éfeso tiacajinia, Pabloori tii jatamaquiaari Priscila, Aquilano. Nojuajaari tajimiaa Judiocuaca rerejojua tiajinia. Cuniqiu rerejono Judiocuaca pohuatasee Jesujiniiri. <sup>20</sup> Nojoriiri Pablo nenecojoquiaari juucua cuniqiu na camueenujunurajaara nojoritia. Majaari Pablo paniniu quiquiaari. <sup>21</sup> Cuniqiu quiniaa sequereeri:

—Quiohuanijia pueyanaa. Jerusalén tiacajiniara secohuanijia. Canaari tii rerejonu-taniya Jesuucua tiuunaa pueyatani. Pueyaso jaara paniri, janiyacua nia niquniuria tacatemohuaraniuhuj.

Cuniquiji tacaquiaariuhua buquejiniari. Éfeso tiacajiniji quiaarohuari. <sup>22</sup> Pablo tiuquishacariuhua Cesareya tiacajiniohua, cuniquiji quiamaa Jerusalén tiacajiniari, puetunu Jesuucua tiuunaa na saruhuatanurajanaa. Na nuhuaji, quiaarohua Antioquiya tiacajiniari. <sup>23</sup> Cuniqui tarishiquiaari pasajaari. Na nuhuaji, socua quiaquiaariuhua cuniquijiiri puetunu jiyacajiniarajanaa. Quiariquiaari na niquniuhua Jesuucua tiuunaa pueya Galacia jiyajinia, Frigia jiyajinianio. Pabloori nojori niquiara pohuataquiaari socua Pueyaso rupaaajiniji. Jesuucua tiuunaa nacasuquiaariiri maja nojori tarinitianura Jesuucua tiuuniu.

### *Éfeso tiacajinia Apolo pohuatasacari Pueyaso rupaa*

<sup>24</sup> Jiyacaritij, tamonu Judio pueyanoori Éfeso tiacajinia tiuquiquiaari. Alejandría tiacajinijio pueyano. Na sesaari Apolo quijia. Nojuajaari maninia Pueyaso rupaa pohuatana quiriquiase. Tariucuacaanu Pueyaso Rupaa naajiosano niishijia quiquiaarijiaariuhuj. <sup>25</sup> Nojuajaari maninia niishitiojosaquiaari Jiyaniijia Jesu niishitiojanojiniji. Shitimia pohuataja pueya niquiaraari. Maninia niishitiojua Jesujiniji na pohuatasacarijiaariuhuj. Seetanujuanaa sequeja Jesujiniji puetunujuanaari. Maja cutaraari na niishiniu quijia Pueyaso Sohuanute pueyano jiuujajinia tiuquijia. Saaja moojinia tiuquinijionu niishiquiaariiri, taa Tiuquinijiona Juan niishitiojoquiaaricuaani. <sup>26</sup> Apoloori na puerenu jataquiaari tii na pohuatasacari Pueyaso rupaa narta Judiocuaca rerejuaa tiajinia. Aquilaari Priscilata tii quiriquiaajuhuj. Apolo pohuatasano tojitiariquiaari. Apolo jaara puecaquiaari pohuatanu, nojoriiri tamocora na jaatucuquiaari na niishitiojonura taa pa jatanishaaquiaa Pueyaso Sohuanutani, Pueyaso muerasu pa quiniuria cutara. <sup>27</sup> Na nuhuaji, Apolo jaara quianu paniquiaari Éfeso tiacajiniji Acaya jiyajiniara, Jesuucua tiuunaa pueyari na cumaquiquiaari. Naajuhuj, nojoriiri Acaya jiyajinia Jesuucua tiuunaa pueyacuara naajioquiaari Apolo patasocoriquiano, maninia cuno pueya tojiniuria nojuaja na tiuquishacari tii. Jaara tiuquishiiquiaari Acaya jiyajinia, Apoloori Jesuucua tiuujica cumaquiquiaari jiyanoehua, nojori na niishitiojosacari. <sup>28</sup> Apoloori nojori niquiara niishitiojoquiaari tariucuacaanu Pueyaso Rupaaajiniji naajiotasano. Jiyanoehua maninia na niishitiojosacari Jesuuri seetanujuanaa nojori sashishano quiquiaari, naacujitij Judiocuaca niishishano pataquiaariiri.

## 19

### *Pablo quishacari Éfeso tiacajinia*

<sup>1</sup> Apolo quishacari Corinto tiacajinia, Pabloori saniniuujia Antioquiya tiacajiniji quiaquiaari nucuaco Éfeso tiacajiniara. Na quiasacari, tuhuananuhua shoconujuquiaariiri. Naa tiuquishiiquiaari Éfeso tiacajiniari. Tii riuriataquiaari Pueyaso pueya maanuri. <sup>2</sup> Pabloori jiyacari nojori nequesotaquiaari:

—¿Niaate Pueyaso Sohuanu tiuquiniqianu nioojajinia, Pueyaso rupaacua nia tiushacari?

Pablo riucatureeri:

—Majaari quenaaja canaa niishiniu quijia Pueyaso Sohuanute quiyajuhuj.

<sup>3</sup> Pabloori nojori sequequiaari:

—¿Casaara nia tiuquinijosaaacuanucuararini?

Nojoriiri na riucuaquiaari:

—Canaari tiuquinijosaaquiaarini taa Tiuquinijiona Juan niishitiojoquiaaricujani.

<sup>4</sup> Pabloori nojori riucuaaree:

—Taaquiriirini. Tiuquinijiona Juancuaaquinateja pueya tiuquinijioquiaarijiaaj, nojori jaara noojia tacatoquiaari sesa na miitiushanojiniji. Nojori sequequiaarijiaariuhuj: “Cua nuhuaji Niriquianoocua nia tiuuri”. Naa Tiuquinijiona Juan sequesacaritij, nojuajaari Jesucristojiniji sequeriquiaa.

<sup>5</sup> Cuno pojori jaara Pablo pohuatasano Jesucristojiniji tojiquiaari, nojoriiri socua tiuquinijosaaquiaariuhua Jesuucua nojori tiuushacari seetanujuanaa. <sup>6</sup> Naacujitij, Pablo niasacari na juaashiquia nojori nacaacua Pueyaso na secojosacari, Pueyaso Sohuanuuri cuno pojori jiuujiajina tiuquiquiaari. Naacujitij, nojoriiri niishishoo rupaacajinia pocooree. Naajuhuj, Pueyaso Sohuanu niishitiojosano Pueyasojiniji pohuatanuuquiaariiri. <sup>7</sup> Cuno pojoriiri doce canuu quiquiaari.

<sup>8</sup> Pablo quishacari cuno tiacajinia, nojuajaari tii shocotejoquiaari jiuujianaraca raca. Jiyacari, puetunu samaatenu juucajanaa quiaja Judiocuaca rerejojua tiajiniaari. Tii pohuataja Pueyaso rupaa pueya niquiaraari. Naajuhuj, nojori niishitiojojuaari taa Pueyaso jiitianutaniya pueyaracaanu Jesuucua tiuuniaa pueyani. Pueyari na tojitiaquiaari maninia, na puereyaquiniutia na niishitiojosacari. <sup>9</sup> Noojiaqueya cuno pueyajinijiniori saaja ruuretaquiaari Pueyaso rupaa. Na rerequetequiaari saajaari. Sacuaraatia pocoquiaari Jesu rupaajiniji pueya niquiaraari, Jesuucua nojori tiuuniu paniyaquishacari. Nocuaji, Pabloori saa jiyareta Jesuucua tiuuniaa pueya jiyataquiaari cuniquiji, tamaquiria serojonuujua tiajiniaara. Tirano jiyaniushano pueyanoori cuno serojonuujua tia camaru quiquiaari. Pabloori cuniqui puetunu juucajanaa niishitiojojua Pueyaso rupaa Jesuucua tiuuniaa pueya. <sup>10</sup> Caapiqui marijaari socua Pablo shocojoquiaari tii na poojotasacari Pueyaso rupaa Tirano serojonuujua tiajinia. Naacujitij, puetunu Asia jiyajinia quiniaa pueyajanaari Pueyaso rupaajiniji caminiujiushaaquiaari, Judiocuaca, taucuacajuhuj. <sup>11</sup> Pueyasoori jiyacari Pablo cumaquiquiaari jiyajeneta casaa na miiniuria Pueyaso cumaacata. <sup>12</sup> Naacujitij, pueyari Pablo paneyaca tuujutaqueya rijioquiaari, Pablo cooshano toqueraacuanio. Cuno pueya jaara na cusosuhucua niojoquiaariuhua cuno toqueraacua, ¡cusosuhuari naatacoquiaariuhua! Naajuhuj, samaruhuari tohuaretaquiaarijuuhuj, samaruhua jiitiaja pueyacuaji.

<sup>13</sup> Tamasaca Judiocuacajinijiniori quiriquiaajuhuj, pueyajiniji samaruhua tohuatanijiojua. Nojoriiri puetunu tiacajiniajanaa rucoojuuca quiquiaari. Jiyacaritij, nojoriiri juhua Pablo miiniu paniquiaarijuuhuj. Juucua naa sequetuquiaari samaruhuari:

—Pablo pohuatasano Jesu sesajinia nia sequeyanijia: “¡Nio pueyanojiniji nia tohuaretare!”

<sup>14</sup> Naa miijiaaari siete canuu quijia. Nojoriiri Esceva jiyaniushano pueyano niquihua quiriquiaa. Escevaari pueyacuara secojonaa camarnu quiriquiasejuuhuj, Judio pueyanotuhuj. <sup>15</sup> Cuno pojori jaara saniquiaari juucua Jesu sesajinia samaruhua tohuatanijionura pueyanojiniji, samaruuri saaja nojori riucuaquiaari:

—Jesu niishiyacuajanjia. Janiyari Pablo niishiyajaniuhuj. ¿Canteerini niajanijianijia, naa nia sequenura janiyatej?

<sup>16</sup> Samaruhuaraca pueyanoori jiyacari nojoriicua jaaquee. Nojori piyoree saajaari. Maja na naata nojori nujuataaquishacari, nocuaji netecuatuquiaari tiacojiiri juhua sunucua, jiyareta naatiquishanojuuhuj. <sup>17</sup> Puetunu Éfeso tiacajinia quiniaa Judiocuacajanaa, mariyata tii quiniaa taucuacuanio, nojori jaara niishiquiaari naa miishanojinijitij, jiyanohua pueretuquiaariiri. Naacujitij, puetunu Éfeso tiacajinia quiniaa pueyajanaari sequequiaari:

—¡Jesuqui seetanujuanaa Jiyaniijajanaa cutara!

<sup>18</sup> Naajuhuj, queraatia Jesuucua tiuuniaa pueyari nijioquiaari, tarijia sesa na miitiushano pohuatanura puetunu pueya niquiarajanaa. <sup>19</sup> Naajuhuj, queraatia pueyari juhua shimiacuri mijiojuuca quiquiaari. Nojoriiri na nequesoreetuneeca mueratejotaquiaari. Cuno nequesoreetuneecajiniaari serojosano quijia taate pueyano cumueeca shimiadura quiniuni. Na camaruhuari jiyacari puetunu cuno nequesoreetuneecajanaa patootaquiaari. Na catijiaquiaari puetunu pueya niquiarajanaari. Puetunu cuno nequesoreetuneecajanaa catijiasaaquiaarini, cunoori cincuenta mil platajiniji shipinijosano cumaneecata masano quiquiaari. <sup>20</sup> Naacujitij, Pueyaso rupaari socua cuno jiyajinia paaquequiaari, na cumaaca poonijosacari pueya jiuujiajina.

<sup>21</sup> Na nuhuaji, Pabloori cuniquiji naquerejoquiaari Macedonia jiyajiniarajuhuaaj, Acaya jiyajiniarano. Cuniquiji riujuuuniu paniriquiohua Jerusalén tiacajiniohuaraari. Sequequiaariijaariuhuaaj:

—Janiya jaara tiuquishuhua Jerusalén tiacajiniohuani, janiyari Roma tiacajinia tajiriquianohuani.

<sup>22</sup> Jiyacaritij, Pabloori na naacunaa jiyaramiquiquiaari Macedonia jiyajinia. Na jiyaramiquishanoori quiquiaari Timoteo, Erastonio. Nojuajaari cuniqui Asia jiyajinia jiyojequiaariijaara.

*Éfeso pueya cushitiishacari na juaaquionuta najuhuanaj*

<sup>23</sup> Pablo quishacari Éfeso tiacajiniaja, Éfeso tiacajinia quiniaa pueyari jiyanoehua juaaquioquiaari Pablo niishitiojonuucua Jesucristojiniji. <sup>24</sup> Naa quiquiaariiri. Demetrio jiyanihano pueyanocuaajaari juhuacatecara narta pueya nasojoquiaari. Cuno pueyano, Demetrioni, nojuajaari shiirijiaa tia platajiniji shipinijiojua quiquiaari. Cuno shiirijiaa tiacaari juhua nojori jiyanihano pueyaso secojojua tia niquishano quiquiaari. Nojori pueyasoori maaji sesaanucua quijia, “Artemisa”. Na shipinijosano niquitiojojua na cumaneecaraari. Naacuajitij, Demetrioori nata poonijionaa pueyata queraatia cumaneecaraca quijia. <sup>25</sup> Demetrioori jiyacari nata poonijionaa rerejotequiaari nojori nacootanura Pablo miishanojiniji nojori tiacajinia. Nojoritia rerejoquiaariiri tamasa pueya, casaa shipinijionaa platajiniji juhua nojorijiuuhuaaj. Puetunu cuno pueyajanaa jaara tari rerejoquiaari, Demetrioori nojori sequequiaari:

—Pueyanaa, niaacuajaari niishiya, paari puetunu pa panishanojuanaa jiitiaani pa niquitiojosacari pa cumaneecara pa shipinijosano. <sup>26</sup> Quiarjiaa cuno Pablo jiyanihano pueyanoni, nojuajaari queraatia pueya niishitiojoquiaa, pueyano shipinijosano pueyasohuanaari maja seetanu pueyasohuajanaa. Niaari na niquiriquiaacuaja naa na niishitiojosacari. Niaari na tojiriquiaajuhuaaj. Naacuajitij, majaari tari pueya masenu quiniutianiya pa shipinijosano platajiniji casami. Queraatia nio Éfeso tiacajinia quiniaa pueyari na sequesano tojiya. Puetunu pa Asia jiyajinia pueyapuejanaari na sequesano tojitiaajuhuaaj. <sup>27</sup> Taa cua sequeyacuajani, pa shipinijosano jaara shocotesaare saaja, paari pa poonijosano carteriquiano socuani. Majaari pueya shocotenu quiniutianiya saa pajaniyaja, pa pueyaso Artemisa rerequetenutaniyajaariuhuaaj. Nocuaji, majaari pueya nijionu quiniutianiya tari pa pueyaso Artemisa secojojua tiajiniaara, tii nojori secojonura, naa cuno Pablo niishitiojonuucua pueyaracaanu pueyatej. ¡Naacuajitij, puetunu pa Asia jiyajinijinio pueya, mariyata puetunu jiyacajinijinio pueyapuejanaari pa pueyaso Artemisa rerequetejacara jatanutaniya! ¡Puetunu pueyapuejanaari na niyajetanutaniya socua pa pueyaso Artemisatej!

<sup>28</sup> Cuniqui quiniaa pueya jaara tojiquiaari naa Demetrio sequesantej, nojoriiri jiyanoehua juaaquioquiaari. Naa nacoquiaariiri:

—¡Pa timitiasano Artemisa cuara pueyaracaanu quiiria Éfeso tiacajinia quiniaa pueyaso!

<sup>29</sup> Naa nojori juaaquiosacaritij, puetunu cuno tiacajiniajanaa pueyari cushitiquiaari. Nojoriiri jiyacari quiooturee caapiqui Pablo cojiniaa pueya, Macedonia jiyajinijinio pueya. Nojoriiri quiquiaari Gayo, Aristarconio. Na jayoturee Éfeso tiacajinijinio pueya rerejojua tiajiniaaraari. <sup>30</sup> Pabloori cuno pueya nacoosaqui tiajinia tiuquiniu paniquiaari juucuajuhuaaj. Quera na pocuasee cuno pueya tajiniani. Jesuucua tiunnaa pueyari saa na cosequiaariija na tiuquiyaquiniuucujaji. <sup>31</sup> Asia jiya camarucuaari na seya jiyaroquiaari Pabloocuajuhuaaj. Camarucuaari coteenu naa sequequiaari na seya:

—Niocua Pablo sequesee, maja cumaati jaarajaaja na tiuquiniu pueya nacojosaqui, mariqui mosaareeri.

Cuno camarucua na seya jiyaroquiaari nocuani, nojoriiri Pablo rupuenaa quijia. <sup>32</sup> Cuno nasojosano rerejono pueyari saaja cushitiquiaari na juaaquionuta. Jiyanoehua nacooreeri. Tamasacaari saniniuujia tamaatia nacooriaaajuhuaaj. Jiyacaritij, tama cuno nojorijinijinio pueyari maja na niishiniu quiquiaari casaajiniji na nacooriaaani.

Secaja nojorijinijinioori na niishiquiaari cutara. <sup>33</sup> Jiyacaritij, Judiocuacaari Alejandro jiyanihano pueyano caponeequiaari pueya nacoyano tacoji na nujuatesocoriquiano. Cuniqijinio pueyajaari tii toquiaari Alejandro casaara pueya nacoyani. Alejandroori Judio pueyano quiquiaarijiuhuj. Naaratej, Judiocuacaacuaji tacunu paniriquiaa juucuaari. Alejandro jaara nujuaquiaari pocuajajiniji, na juaashiquia shiitioquiaariiri pueya sanaajetanura. <sup>34</sup> Saniniuujia, cuno pueya jaara niishiquiaari Alejandroori Judio pueyano, puetunu pueyajanaari socua jiyacatequiaari nacoona. Nojoriiri caapiqui hora shocoteree pueyaracaanu naa na nacoosacari najuhuanaj. Naa sequeturiquiaa na nacoosacariiri:

—¡Pa timitiasano Artemisa cuaara pueyaracaanu quiiria Efesio tiacajinia quiniaa pueyaso!

Naa pueyaracaanu nacooriguiaari. <sup>35</sup> Cuno tiaca camarucuaa naajiona pueyano jaara na naata quiriquiaa nojori na sanaajanura, nojori sequereeri:

—Cuarta Éfeso pueyanaa, puetunu jiyacajinia quiniaajanaari niishiya, pajaniya Éfeso tiacajinia quiniaari pa pueyaso Artemisa secojojua tia cojuanaani. Niishitiuyajaari-uhuj paacuajaari cuno casaa juhua pa pueyaso Artemisa niquishano cojuaquiaani, jiya cajiniocuaji tinio pa riuriatasanoni. <sup>36</sup> ¡Canteeri nio niishiyaquianijia! Shaaqui. Cunora tariucuaa. ¡Nia sanaajetarohua! Majaari najuhuaa sesa nia miituniu, maninia nia niishiriojiyaquishacari. <sup>37</sup> Nio canuu niaa niyara na jayoreeni, nojoriiri maja na nohuasenu quirii casaa pa pueyaso secojojua tiajiniji. Majaari na sesacatunu quiquiaa pa pueyasojuhuaj. <sup>38</sup> Demetrio jaara nata poonijionaata cuno pueyacuara tonujunu paniri, ¿casaara na quiaaquiya pa nequesoreenaa niqiara tonujunuraarini? ¿Casaara pa jiiitaa nequesoreenaa pa tiacajiniaarini? ¿Najuhuanaj? Pa nequesoreenaari pa paraa tacujua pocuaji. <sup>39</sup> Niaa jaara tamonu casaacua juaaquioreja, pocua tamonu juuca na rerejotariquiani pa jiyaniijianucuaa pa jeeanura puetunu nia sequesanojuanaa. <sup>40</sup> Pueyanaa, ¿majate nia puerenu, Roma tiacajinia quijia pa jiyaniijiajanaa jaara pocuara tosaare pa nacojonujiniji? Paa jaara sequesaaare nocua quiojonurani, ¿paatucua taa pocuaji tacureni jaara pa nequesoreere pa nacojonujiniji?

<sup>41</sup> Tiaca camarucuaa naajiona pueyano jaara puecaquiaari pocuanu, pueya sequiquiaariiri:

—Nia quiojorohua pueyanaa.

Naacuajitij, puetunu pueyajanaari cuniquiji niyaquejoquiaariuhua.

## 20

### *Pablo rucuanesacariuhua Macedonia jiyajinia, Grecia jiyajinianio*

<sup>1</sup> Pueya jaara na juaaniutia na nacojonu nuhuaji sanaajetaquiaariuhua, Pabloori jiyacari Jesuucua tiuuniaa pueya sequequiaari tama jiyareta nojorijiaaja rerejonura. Tii nojori nacasuree maniniaari. Tari na quiasacari cuniquiji, na nuhuajiria cacanuquiaari puetunu nojorijianaari. Na nuhuaji, Macedonia jiyajinia quiaareeri. <sup>2</sup> Nojuajaari puetunu cuno jiyajinia rucuanequiaarijianaa. Jesuucua tiuuniaa pueya cumashitiquiaari socuaari, maja nojori tarinitianura Jesuucua tiuuniu. Naa na rucuanesacari cuno jiyajinatej, socua tiuquishiiquiaari Grecia jiyajiniaari. <sup>3</sup> Pabloori tii na quishacari shocotejoquiaari jiuujianaraca raca. Juucua cuniquiji quianu paniriquiaa buquejinia Siria jiyajiniaraari. Judiocuacaari na niishiquiaari saaja. Nojoriiri jiyacari na monu paniquiaari. Naa Pablo niishishacaritij, nojuajaari nocuaji Macedonia jiyajiniara neteja nucuacohua tacatequiaariuhua saaja. <sup>4</sup> Nucuaco na quiasacariuhua, na tarajaquiaariiri Sópater jiyanihano pueyano Berea tiacajinijinio, Pirro niyanu. Na tarajaquiaariijiaariuhua Aristarco, Segundonio. Nojoriiri Tesalónica tiacajinijinio pueya quiquiaari. Nata quiaquiaariijiaariuhua Gayo, Derbe tiacajinijinio. Timoteori nojoritia quiriquiaajaacuhuj, Tíquiconio, Trófimojuhuaj. Nojoriiri Asia jiyajinijinio quiquiaari. <sup>5</sup> Puetunu nio canaa tapueyocuacajanaari canaa puetaquiaari. Canaacuaji tiuquijioseequiaari coteenu Troas tiacajiniaari. Cuniqui sashitiuquiaari canaari. <sup>6</sup> Jiyacariiri queranacunuusacari quiquiaari, poretajaaju shipinijosano pan miaquesacari. Queranacunuunu nuhuaji, canaari Filipino

tiacajiniji jaaretaquiaari buquejiniani. Canaari cinco juuca camueenujuquiaari canaa tiuquiniuria Troas tiacajiniani. Canaari tii nojori coqueseeni. Canaari mariyata tii camueenujuquiaari siete juucani.

*Pablo niishitiojosacari Troas tiacajinia*

<sup>7</sup> Shusha semaana coteejajinia domingo juuca, canaari rerejoquiaarini pan neecasenura pa Jiyaniijia cusosacari niishiriojonura. Pabloori jiyacari Jesuucua tiuuniaa pueya rootariquiaa niucua. Nojuajaari cuno tariqui quiariquiiano quiriquiaa cuniquiji. Naaratej, na nuhujiria pocoojoriquiaa pueyataari. Pueyaracaanu na pohuatasacari, shiyaqueyari tari quiquiaari. <sup>8</sup> Cuno tiajinia canaa tii quiriquiaani, canaari jiyocuacaanu tercero na natacojinia rerejoriquiaani. Queraatia samariiri canaa caaniuji noshiquioriquiaa. Pabloori shitimia pohuatariquiaa pueya niquiara. <sup>9</sup> Jiyacaritij, tamonu mashajaari tia shuucuaji tacuhujiniji cajiriquiaa. Na sesaari Eutico quijia. Pablo pohuatasacari pueyaracaanu, socua maquequiaari na cajishaquiiri. Jiyanohua na maquesacari, jiyocua tiquii socuaari. Cusoseejanaari. <sup>10</sup> Pabloori nata quiniaata ritia nocua netecuatuquiaari jiyocua. Pabloori nocua jacamasee na cacatanura. Narta Jesuucua tiuuniaa pueya sequereeri:

—Maja najuhuana shiriiquitiuniu. Saminiocuaja.

<sup>11</sup> Na nuhujia, puetunu nojorijianaari tiniota shuquiriaatia tacataquiaariuhua. Pabloori neecaruu neecasequiaari canaa miaquenuusocoriquiano. Pabloori socua pohuataquiaari pueya na niishitiojonura. Naa juhuaquemaajaa socuaari. Tariucua juuca quiaqueeri. Nojuajaari nucuaco quianu paniquiaari cuniquiji Asón tiacajiniara. <sup>12</sup> Cuno mashajaari saminio jaatucusaaquiaariuhua na tiajiniohua. Puetunu pueyajanaari noojia cajitiquiaariuhua, saminio mashaja tacatesacariuhua.

*Pablo quiasacari Mileto tiacajiniara*

<sup>13</sup> Pabloori na quiaaquishacarijia tari canaa sequequiaari:

—Nia puetaarecuaa buqueta. Niocua cua rimia Asón tiacajiniji. Janiya nucuaco quianu paniyani.

<sup>14</sup> Naacuajitij, canaari coquetoquiaari Asón tiacajiniani. Canaari cuniquiji Pablo tacanimiaquiaarini. Canaari mariyata tiji quiaaree Mitilene tiacajiniani. <sup>15</sup> Canaari tariqui shocomaa Quío jiya tucuaatijani. Canaari tama tariqui tiuquishii Samos tiaca tacatajajinijini. Canaari rupaquijia samaatemaacuara Trogilio tiacajiniani. Canaari cuniquiji sanetaaree tariquiniuhuj. Canaari Mileto tiacajinia tiuquishiini. <sup>16</sup> Canaari naa secooriquiohua ritiani. Majaari Pablo tarishiniu paniniu quiquiaari Asia jiyajinia. Naaratej, majaari na quianu paniniu quiquiaari Éfeso tiacajiniajuhuaj. Ritia tiuquiniu paniquiaariuhua Jerusalén tiacajiniara. Pentecostés juucara quiniu paniriquiaa tiiri.

*Pablo cumashitishacari Éfeso tiacajinijinio Jesuucua tiuuniaa jiiitanaa pueya*

<sup>17</sup> Canaa quishacari Mileto tiacajinia, Pabloori pueyano jiyaroquiaari na masuunura Éfeso tiacajiniji Jesuucua tiuuniaa pueya jiiitanaa. <sup>18</sup> Nojori jaara canaacua tiuquijioquiaari, Pabloori nojori sequereeri:

—Niaacuajaari maninia niishiya taa cua quishiiquiaari niaatani, cua tiuquishacari Asia jiyajinia niaacua. <sup>19</sup> Niaata cua quishacari, janiyari pueyaracaanu nia niishitiojuuani, pueyaracaanu pa Jiyaniijiaa cua poonijosacari. Naa cua miishacaritij, majaari cua quiniu paniniu quijia juhua nia jiyaniijia. Janiyari niaacua cua tacaashacari nujuquejuuani. Janiyari pueyaracaanu naquiya miishanoni, cuarta Judiocuaca paracaashacari janiya. <sup>20</sup> Naajaa, majaari cua pishiniu quijia nia niquiara cua pohuatanura Pueyaso rupaa. Janiyari nia niishitiojuuani puetunujuanaa maninia nia quiniuria, maninia miiijia nia quiniurajuhuj. Majaari cua niishitiojonu quijia jiyasohujia. Janiyari puetunu pueya niquiarajanaa nia niishitiojuuani, tama nia tiacajiniaqueyajaajanio. <sup>21</sup> Janiyari Judiocuaca sequejani taucucanio, nojori tacatonuhua noojia Pueyasoocua, sesa nojori miishanojiniji, pa Jiyaniijiaacua nojori tiuuniuria cutara. <sup>22</sup> Quiarijiani, Pueyaso Sohuanuuri cua jiyaroya Jerusalén tiacajinia. Majaari cua niishiniu taa cua



miishaanutaniya cuno tiacajiniani. <sup>23</sup> Janiyari saaja niishiya cutarani, puetunu tiacajini-ajanaa cua quiasacari, Pueyaso Sohuanuuri cua sequeya: “Quiaari nujuatesaanutaniya. Quiaari naquiya miishaanutaniyajuhuj”. <sup>24</sup> Janiya jaara naa niishirini, majaari cua tacaaniu quiquiaa. Cuaara cua motuuraqui jaara monu panitiuri. Janiyari saaja pa Jiyaniijia sequesano tucuatenu paniya cutarani. Pa Jiyaniijia Jesuuri cua jiyaroquiaari cua pohuatanura pueya niquiara, taa Pueyaso jiyanooniu paniya pueyani.

<sup>25</sup> Janiyari seetanujuanaa nia sequeyani pueyanaa. Puetunu niajanijajanaa, cana niquiara cua pohuataquiaari Pueyaso rupaacuajani, majaari socua nia niquiniu quiniutianiya mijiria janiya. <sup>26</sup> Naaratej, janiyari nia sequeyani, majaari na nuhuaji nia sequenu: “Maja canaa pohuataaunu quiquiaari Pueyaso rupaani”. <sup>27</sup> Janiyacuajaari tari nia pohuataquiaari puetunu Pueyaso sequesanojuanaa pajaniyarani. <sup>28</sup> Quiarijiani, tama nia cuaqueyajaaja nia cojuare. Maninia nia cojuare Jesuucua tiuuniaa pueyaju-juhaj. Pueyaso Sohuanucujaari nia jiyatequiaari Jesuucua tiuuniaa pueya jiitianaa nia quiniuria. Nojuajaari nojori masequiaari na nanacata tama nerajaaja, pocuara na cusosacari. <sup>29</sup> Janiyari seetanujuanaa niishiyani, janiya jaara niiquiji quiaque-eni, tamasaacari cua nuhuaji nijionutaniya. Jesuucua tiuuniaa pueya sesonutaniyari, sacuaraatia nojori niishitiojosanota. Nojoriiri juhua marucatuque sareya tiuquitianutaniya Jesuucua tiuuniaa pueya tajinia. Taa marucatuque sare tiuquiya borregohua tajiniacuaani, puetunu na sooseejanaari, cuno pojoriiri naa miiniutianiya Pueyaso muerasutej. <sup>30</sup> Naajuhuj, tama niajanijajinijiojuaarjia najuhuaana tamaatia niishitiojonu coteenutaniya na sapojonuta. Majaari Pueyaso panishano na niishitiojonuunu quiniutianiya tari. Naa sapojotunutaniya Jesuucua tiuuniaa pueyari, pueya tojinuria nojori saniniuujia. <sup>31</sup> Janiyacuajaari nia sequeyani, jiyanohua nia cojuare tama nia cuaqueyajaaja. Nia niishirijuhuj, jiuujianaraca marijiaari tari cua shocojoree pueyaracaanu cua niishitiojosacari niajaniya. Majaari cua tarinitianu quijia rootanu niajaniya, juuca, niucuanio. Janiyari naajaa cua namijiaacatenuta niishitiojua puetunu niajanijajanaani. Majaari naa cua miishano nia niyajetanu pueyanaa.

<sup>32</sup> Nia tiujianutaniya tarinjia. Janiyacuajaari pa Jiyaniijia juaashiquiajinia nia jataani. Na rupaa nia tojiriquia pueyaracaanu, juhua rishimiaca pueyano nia quiniuria, cumueecara. Nia jaara naa miiritij, Pueyasoori nia rijionutaniya na shuriucua, na saquiriojosano pueyata nia quiniuria. <sup>33</sup> Niaata cua quishacari, majaari tama quiriajaaja cua paniniu quijia cumaneeca, toquenio. <sup>34</sup> Niaari naa quiyano cua niquijijuhuj. Janiyari tama cua juaashiquiatajaaja poonijiojuani, cua panishano cua masetajara, cua cojiniaa panishano masetajarajuhuj. <sup>35</sup> Janiyari nia niishitiojuani, naa poonijiosanotej casamijiuucua pa naacunura pa jiitiasanota. Majaari pa Jiyaniijia Jesu sequesano nia niyajetanujuhuj. Naa sequequiaariiri: “Maninia pueyano jaara na jiitiasanojiniji niquitiore nareja tamonu pueyano, na niquitiosacari tamonu, nojuajaari socua shuquiriaatia quiya, niquitiosano masejajiniji”.

<sup>36</sup> Naa nojori na sequenu nuhuajitij, Pabloori mojuquetaree. Puetunu nojoritianaa secojoreeri. <sup>37</sup> Puetunu pueyajanaari nujuquetaree. Pablo cacanuutereeri. Na nujuunetureejaariuhuj. <sup>38</sup> Pueyari jiyanohua taraajeriquiaa Pablo sequenuucua nojori, maja tari socua na niquitiuniu quiniutianiya nojuaja. Nojoriiri caminiajiniaara rosetaquiaarijuhuaj, Pablo na niquitiuniuria buquejinia na tacasacari.

## 21

### *Pablo quiasacari Jerusalén tiacajiniara*

<sup>1</sup> Éfeso tiacajiniji canaa ruparetasacari, canaari shoniniacu caminia jiuujiaaco quiaareeni. Canaari Cos tiacajinia tiuquishiini. Cuniquiji canaa quiasacari tariqui, canaari Rodas tiacajinia tiuquishiiniuhuj. Tama tariqui canaa quiasacari Rodas tiacajiniji, canaari Pátara tiacajinia tiuquishiini. <sup>2</sup> Pátara tiacajinia canaa tiuquishacari, canaari tii riuriatasee tamonu buque quera Fenicia jiyajiniara ruparetaanoni. Canaari tii tacataareeni. <sup>3</sup> Canaa jaaretasacari, canaari canaa muenecara niquimiohua Chipre jiya tucuaatijani. Canaari Siria jiyajinia tiuquishiini. Cuno buquejinia canaa tii

quiariquiaani, casami pariquiaari Tiro tiacajinia jatasocoriquiano. Naaratej, canaari Tiro tiaca tacatajajiniji tiuutiaseeni, casami jatanura tii. <sup>4</sup> Jesuucua tiuunaa pueyari tii quijiajuhuaj. Canaari nojoritia quishiini. Canaari siete juuca camueenujusee cuniqui nojoritiani. Pueyaso Sohuanuuri cuniquijinio Jesuucua tiuunaa pueya niishitioquiaari taa Pablo miishaanutaniyani. Nocuaji nojoriiri Pablo sequetuquiaari maja na quianura Jerusalén tiacajinia. <sup>5</sup> Naajaa, siete juuca jaara tari shocojoquiaari cuniqui canaa quishacari, canaari tiji quiaquiaarini. Jiyacaritij, puetunu Jesuucua tiuunaa pueyajanaari necocohuata, mariyata necohuata canaata quiaquiaari canaa na jatanura buquejinia. Canaari rosetaquiaari tiacajiniji tacatajajinijiriani, Pueyaso canaa seconjura jaaquiajinia. Puetunu canaajanaari mojuquetacoquiaarini shoniniacu caminia casaqueyaji. <sup>6</sup> Na nuhuaji, canaari nojori cacanuuree canaa nuhuajiriani. Canaari buquejinia tacataqueeni. Nojoriiri tacatajajiniji quiojoquiaariuhua na tiajiniohua.

<sup>7</sup> Canaari Tiro tiacajiniji jaaretaareeni. Canaari Tolemaida tiacajinia tiuutiaseeni. Canaari cuniqui tacatasee puetunujuanaani. Canaari tii quijiaa Jesuucua tiuunaa pueya saruhuataaseeni. Canaari nojoritia quishii niquiriyatu juucani. <sup>8</sup> Tariqui saniniuujia, puetunu canaajanaari mariyata quiojoquiaari Pablotani. Canaari Cesareya tiacajinia tiuquishiini. Felipeeri cuno tiacajinia quiriquiaa. Canaari na tiajinia quishiini. Felipeeri Jesujiniji pohuatana quijia. Nojuacuajaari Jerusalén tiacajinia coteenujuanaa tamacata jiyatesaaquiaari mashiquiopue mianuuteriquiano. <sup>9</sup> Felipeeri necojori jiitiaja, saa caqueetacaneeja, niyacoojori. Cuno niyacoojoriiri Pueyaso Sohuanuuri jiitiaja. Naacuajitij, Pueyaso Sohuanuuri niishitiojosano nojori jiuujiajinia Pueyasojiniji pohuatanuujuuani. <sup>10</sup> Canaa camueenujusacari cuniqui, jiyacari tiuquishiiquiaariiri Judea jiyajinijinio pueyano. Nojuajaari Pueyaso sequenu panishano caminiujunio quijiajuhuaj. Ágabo jiyaniishano pueyano. <sup>11</sup> Nojuajaari canaacua niquiaari Felipe tiajinia. Jiyacaritij, Pablo cajiniocua camarucujua samaacataseeri. Nata morojoree tama na cashacucuajaariija, na numatucuanio. Na nuhuaji sequerohuari:

—Jerusalén tiacajinia parta Judiocuacaari naa morojonutaniya nio cajiniocuaque camarutej. Na nuhuaji, taucuaca niquitiosaanutaniyani. Pueyaso Sohuanuuri naa cua sequereequij.

<sup>12</sup> Naa Cesareya tiacajinia quiniaa Jesuucua tiuunaa pueya tojishacaritij, canaajuhuj, puetunu canaajanaari juucua Pablo nenecojoquiaarini maja na quianura Jerusalén tiacajinia. <sup>13</sup> Saa canaa sequereejaaari:

—¿Casaara nia nujuquetiuyajaarani? ¿Niaateeri cua taraajonu paniyaruhua? Majaari saaja cua paniniu pueya morojonura janiya Jerusalén tiacajinia; janiyari tama cua cuaqueyajaaja panitiaacujua. Cuaara cua motuuraqui, cua pohuatanuucua cua Jiyaniijia Jesujiniji.

<sup>14</sup> Maja canaa naata na tarinitiniu quishacari, canaari socua na tarinitiareeni.

—Cuajaquij. Pueyaso cuaara miiria taa na miiniu paniyacujani.

<sup>15</sup> Naa canaa sequenu nuhuaji nojuaja juucuatej, canaari canaa jiitiasano casaa jeenucuareeni. Canaari Jerusalén tiacajinia quiaareejaaniuhuj. <sup>16</sup> Canaata quiojoquiaariiri Cesareya tiacajiniji Jesuucua tiuunaa pueyajuhuj. Canaata quiariquiaaariuhua Mnasón jiyaniishano pueyano. Nojuajaari Chipre jiya tucuaatiajajinijinio pueyano quiquiaari. Nojuajaari tarijia Jesuucua tiuujia quijia. Nojuajaari canaa sequequiaari:

—Paa jaara Jerusalén tiacajinia tiuquishiini, niocua cua tiajinia quishii cuata.

### *Pablo pocoojosacari Santiagota*

<sup>17</sup> Canaa tiuquijiosacari Jerusalén tiacajinia, cuniquijinio Jesuucua tiuunaa pueyari canaa timitiaree canaa tiuquijiosacari. <sup>18</sup> Pabloori tariqui canaata quiaquiaari Santiago niquniuucua. Tii quiriquiaaariuhua puetunujuanaa Jesuucua tiuunaa jiitianaa pueya. <sup>19</sup> Canaa tiuquishacari, canaari nojori saruhuataquiaarini. Na nuhuaji, Pabloori nojori pohuataquiaari puetunu Pueyaso miishanojuanaa na pohuatanuucua Jesujiniji, na rucanejosacari tucuaaanu taucuaca quijia jiyacajinia. <sup>20</sup> Pueya jaara naa tojiquiaari Pablo

pohuatasanotej, puetunu tii quiniaajanaari Pueyaso maniniuhuaqueetaquiaari nojori shuquiritiasacari Pueyaso.

Na nuhuaji, nojoriiri Pablo sequequiaari:

—Canaa tarajanunaa, taa quia niquiquiaacuajani, jiyanoehua queraatia parta Judiocuacaari Jesuucua tiuya. Puetunu nojorijianaari tariucuacaanu Moisés niishitiojosano tojiti-ajacajuhuj, nocua nojori jiaatianuta jiyanoehua. <sup>21</sup> Nio Jerusalén tiacajinia quiniaa Jesuucua tiuunaa pueyari quiocuaji tojiquianujuhuj. Quiaanaari tamonu jiyacajinia quijiaca parta Judiocuaca niishitiojoquiaa maja nojori miiniuria tari tariucuacaanu Moisés niishitiojosano. Quiaanaari niishitiojoquiaajuhuj maja nojori necohua cararaatiuuquia co nojori miatejonura, taa pa supuetanaa niishitiojosaaquiaaricuaani. <sup>22</sup> Naacuajitij, pueya jaara niishiri quiaa tari niya tiuquiriohua, nojoriiri quia rerejotanutaniya ritia. ¿Taa pa miyarini? <sup>23</sup> Canaari naa niishiriojiyani, naa quia miiri juhuari. Niya quiyari cuatro pueya na naca tuquenuuteriquiano, tarijia na sequetusano Pueyaso na tohuateenura. <sup>24</sup> Nojori quia jiyataare Pueyaso Secojoua tiajinia. Niocua nia cuaqueya jeequejosee taa pa supuetanaa sequequiaaricuaajani. Naajuhuj, quiocua nojoriria cumaneeca niquitiore nojori naca riuujiushaanura. Quiaa jaara naa miiritij, puetunu pueyajanaari niishiniutianiya majaqui seetanujuanaa quiquianu pueya sequesano quiajanijajiniji. Niishitiniutianiyaajariuhuj, quiaaqui tariucuacaanu Moisés niishitiojosano miyajaa. <sup>25</sup> Majaari Jesuucua tiuunio taucuacaacua quia tacaaniu. Canaacuajaari tari nojori nacasuquiaari canaa naajioneejiniani, nojoriicuara canaa naajiosacari. Canaari nojori sequequiaari cutarani maja tari nojori tojiniuria Moisés niishitiojosano. Canaari nojori sequequiaarijuhuaj, maja na miaquenuunura shipinishano pueyasohuacuara puecoosano casaa, naajuhuj, maja na miaquenuunura nanaca. Canaari nojori sequequiaarijuhuaj maja na miaquenuunura shu na nanacataja, naajuhuj, maja na numuetucunura na camishoo maaji. Puetunu pa supuetanaa rootasanojinijianaani, saa niojuuari taucuaca tojishocoriquiano rootasano.

*Na cojiniaata Pablo quioosacari Pueyaso Secojoua tiajinia*

<sup>26</sup> Pabloori narta Pueyaso pueya sequesano tojiquiaari jaarajaaja. Naaratej, nojuajaari cuno cuatro pueya jiyataquiaari tariqui. Nojoritia jeequejoquiaari na cuaqueyari taa Moisés niishitiojoquiaaricuaajani. Naa na miiniu nuhuajitij, Pueyaso Secojoua tiajinia tiuquitiaquiaariiri pueyacuara secojonaacua. Na sequetuquiaariiri casaa juuca na tucuatatunutaniya na cuaqueya na jeequejonuununi, naajuhuj, casaa juuca nojori panutaniya Pueyasora na niqúitiosocoriquianoni.

<sup>27</sup> Quera nojori tucuatasaacari puetunu cuno semaana juucajanaa, Asia jiyajinijinio narta Judiocuacaari Pablo niquiquiaari Pueyaso Secojoua tiajinia. Nojoriiri puetunu pueyajanaa nasajoquiaari ritia. Jiyacari Pablo quiatureeri. <sup>28</sup> Na quiatusacari Pablo, pueya na jiiquioonuutareeri:

—¡Israel pueyanaa, miji! ¡Canaa nia naacuseeja! Nioori noo pueyanocuaja tiquiyocua na rucuanesaqui pueya niishitiojoquiaa sacuaratia pocuaratej, nio Pueyaso Secojoua tiaacuaraajuhuj. Naajuhuj, tariucuacaanu Moisés Rootasano sesacatequiaa pueyajaariuhuj. ¡Quiarijiani, pa Secojoua tiajinia sacuaratia tiuquinitiaree taucuacaari!

<sup>29</sup> Cuno Judiocuacaari naa sequetuquiaari Pablotej, Trófimo jiyanihano pueyanota nojori niqiniuuca nojuaja tarijia na rucanejosacari cuno tiacajiniaja. Trófimoori Jesuucua tiuunia tahue quijia, Éfeso tiacajinijinio pueyano. Naaratej, cuno Judiocuacaari jiyaniquiaari Pablo naasucuaari cuno tahue tiuquinirii Pueyaso Secojoua tiajinia.

<sup>30</sup> Puetunu Jerusalén tiacajinia quiniaa pueyajanaari juaaquioquiaari. Pabloocua netecuatuquiaariiri. Na quiatureeri. Pueyaso Secojoua tiacoji na jaatiuquiaari carijiniacumaari. Pueyaso Secojoua tia tohuateyari ritia tionujusaaquiaari na nuhuaji.

<sup>31</sup> Pueyari tari monu paniriquiaa Pablo. Jiyacaritij, tii Jerusalén tiacajinia quijia Romano soldadohua comandanteeri numootesaaquiaari: “¡Judiocuaca na juaaniutia nacoya!” Cuno comandanteni, nojuajaari soldadohua capitáncuaca jiyaniijia. <sup>32</sup> Jiyacaritij, comandanteeri na soldadohua rerejotequiaari ritia, na capitáncuacano. Tee pueya

nacooriquiaani, nocua netecuatuquiaariiri. Judiocuaca jaara niquiquiaari comandante na soldadohua neretaano nojoriicua, jiyacari shusha cartetuquiaari Pablo piquitiuniuuri. <sup>33</sup> Comandante tiuquishacari nojoriicua, Pablo quiaseejanaari. Na soldadohua sequereeri:

—Caapiqui cumayocua casaa nia saatijiore na numatucua cajiniocua.

Comandanteeri na nuhuaji pueya nequesoreeree:

—¿Cante nio pueyanoni? ¿Casaa na miiriini?

<sup>34</sup> Pueyari saaja jiyajeneta nacooriquiaa. Nioori tamaatia nacooriquiaacujua. Tamasacaari socua tamaatia nacooriquiaajanaajataj. Comandanteeri cunora maja na niishiniu quiquiaari casaa Pablo miirijiaarani, puera nojori cojuatunenuucua na na-coosacari. Cunora na soldadohua sequereeri:

—¡Pa quijia tiajinia nia jaatucuyarohua!

<sup>35</sup> Soldadohua tacatasacari tari nojori quijia tia tacatuhuoco Pablo nojori jaatucusacari, Judiocuacaari jiyacari quera na macaniutia socua shiiniuquitiaquiaari Pabloocua, na monu paniniuria juucua. Soldadohuari nojoriicuaaji Pablo shiitioquiaari jiyocuacaanu. <sup>36</sup> Pueyari soldadohua nuhuaji na cocuatesacari jiiquioonuuriquiaa:

—¡Nia more cuno sesaaca! ¡Nia more!

#### *Tama nocuaji Pablo tacusacarijiaaja*

<sup>37</sup> Quera soldadohua tiuquinishacari Pablo nojori quijia tiaco, Pabloori soldadohua comandante sequeree:

—Quenaaja niquiriyatu rupaa sequereera cuno pueya.

Comandanteeri na riuquaree:

—¿Quiaaquiiri Griego rupaa pocuaja? Janiya juucua quia jiyaniriquiaa Egipto jiyajinijinio pueyanoni. <sup>38</sup> ¿Majateeri noo quiajanija quiquianucuaaja, cariiquia jiyajinia jiyatacanu cuatro mil puecojuaca pueyatej?

<sup>39</sup> Pabloori saaja na sequeree:

—Janiyari Judio pueyanoni, Tarso tiacajinia rasanotuhuj. Naacuajitij, janiyari Tarso tiacajinijinio pueyanoni, teyano tiacatucuaaja socua panishano tiaca Cilicia jiyajiniani. Quenaaja rupaquijia cua tarishitiricuarajaj. Cuno pueya sequenu paniya niquiriyatu rupaa quenaajanijia.

<sup>40</sup> Comandanteeri socua na sequeree:

—Quia pocuare.

Pabloori jiyacari tacatujiniji nujaquiaari. Na juaashiquia shiitioquiaari pueya na sanaajanuraari. Puetunujuanaa jaara sanaajetaquiaari, nojoriicuaara pocuaree tama nojori Hebreo rupaaajiniaari. Naa nojori sequereeri:

## 22

<sup>1</sup>—Cua tapueyocucanaa, cua jiyaniijianucuaanaa, nia tojitiare cua sequesano niajanija tama cua tacusacarijiaaja cucuaji.

<sup>2</sup> Cuno pueya jaara tojiquiaari Pablo pocuasacari nojoriicuaara Hebreo rupaaajinia, pueyari maninia sanaajetaquiaarijianaa. Pabloori nojori sequeree:

<sup>3</sup>—Janiyari Judio pueyanoni. Tarso tiacajinia cua raja, Cilicia jiyajinia. Janiyari nio Jerusalén tiacajinia maashiquiaarini. Gamalielri cua niishitiojona quijia. Jiyanohua rootasaaquiaari pa supuetanaa niishitiojosanonijia. Janiyari pueyaracaanu Pueyaso panishano miiniucuaa jiaatiaquiaani, taa quiarijia nia miiniu paniyanijia. <sup>4</sup> Janiyari tarijia Jesuucua tiuuniaa pajejani naquiya cua miitiasocoriquiano. Janiyari na mooquiaarijiuhuj. Janiyari canuu cojiritiaquiaari quioonu maajipohuatajani, cua nujuatejosocoriquiano nujuatejojuajinia. <sup>5</sup> Pueyacuara secojona camarnuuri cua miijosano niishiyajuhuj, puetunu pa jiyaniijianucuaajanaanio. Nojoricuaajaari cua niqutioquiaari nojori naajione Damasco tiacajinia quiniaa parta Judiocuacaacuara. Janiyari juucua quiariquiaa Jesuucua tiuuniaa pueya cua pajenura Damasco tiacajiniani. Quera cua quioosano cua nitiamohua niya Jerusalén tiacajiniani, saniitiojosocoriquiano.

#### *Pablo pohuatasacari Jesuucua na tiuuniujiniji*

<sup>6</sup> 'Janiyari juucua nucuaco quiariquiaani. Quera cua tiuquishacari Damasco tiacajinia, panacariiri quiriquiaa. Canashiyaquiji jiyano hua shacantuuca juhua miacanaari cua nunuquiaari. <sup>7</sup> Janiyari juhua jatasaareeni. Jiyacaritij, janiyari rupaa tojirii cua sequeyanoni: "Saulo, Saulonaa, ¿casaara quia miitiaa puera janiyani?" <sup>8</sup> Janiyari na nequesotareeni: "¿Cantequia Jiyaniijianaa?" Cua sequereeri: "Janiyacuaaari Jesuni, Nazaret tiacajinijinio pueyano. Cunocuaaari quiaa na miitiaani". <sup>9</sup> Cua cojiniaa pueyari cuno shacantuuca na niquishacari shiriiquitiuquiaari. Majaari na tojitiuniu quiquiaari cutara jiyocuacaanuji rupaa cucua pocuaano. <sup>10</sup> Janiyari socua na sequereeni: "¿Casaa cua miyarini Jiyaniijianaa?" Jiyaniijaari cua sequereeni: "Quia sanerohua. Naajaa quia quiaare Damasco tiacajinia. Quiaari tii sequesaanutaniya puetunu cua panishanojuanaa quia miiniuria". <sup>11</sup> Cuno shacantuuca cua nunuquiaari jiyocuacaanujini, cua namijia sesoquiaariiri. Janiyari cariyjuaru quiriquiaani. Naacuajitij, cua cojiniaari cua jaatucutuquiaari. Naa cua tiuquitiatusee Damasco tiacajiniaari.

<sup>12</sup> Tamonu pueyanoori cuniqui quijia, parta Judio pueyano. Na sesaari Ananías quijia. Nojuajaari seetanujuanaa tariucuacaanu Moisés niishitiojosano tojijia cutara. Puetunu Damasco tiacajinia quiniaa Judiocuacaari na panijia. Nojoriiri na sequetujua: "Ananías cutaraari maninia pueyano". <sup>13</sup> Ananíasri jiyacari cua niqiniuucua niqiaari. Jaara tiuquiquiaari cucua, cua sequeseeri: "Cua tarajanu Saulonaa, maninia niqijijara quia quiriouhua". Jiyacaritij, cua namijiaari ritia jeequequee. Janiyari maninia niqiquii Ananíasni. <sup>14</sup> Cua sequerejaariuhuj: "Pa supuetanaa Jiyaniijia Pueyasocuaaari quia saquirojoquiaari tariucuacaanujiniji, na niishitionura quiajaniya na panishano quia miiniuria. Quia saquirojoquiaarijaariuhuj quia niqiniuria taquiya pocuajinio sesa miyashijia cutara, tama na camaru rupajiniji quia tojiniuria na sequesanojuhuaj. Nojuacuajaari pa Jiyaniijia Jesucristo. <sup>15</sup> Quiaari puetunu pueyapue niqiarajanaa pohuatanutaniya nojuajiniji quia niquishano, quia tojishanonio".

<sup>16</sup> 'Ananíasri socua cua sequequiaari: "¿Casaara quia tarishiyarini? Quiarijiani, quiaa cuaara tiuquinishaaria. Jiyaniijia Jesu quia sequere: 'Cua jiyanoori sesa cua miishanojiniji'. Nocua quia tiuushacari, quia sesa miishanoori jeequesaanutaniya".

#### *Pablo pohuatasano taa Jesu jiyaroquiaari nojuaja taucuacaacuani*

<sup>17</sup> 'Janiya jaara riujuuquiaariuhua Jerusalén tiacajiniouhuan, janiyari Pueyaso Secojonuujuu tiajinia secojoriquiaani. <sup>18</sup> Cua secojosacari, janiyari Jesu niqiquiaari juhua cua maquenujiniani. Cua sequereeri: "Ritia quia quiaare niqijiji. Nio pueyari maja na tojitianu quiniutianiya quiajaniya, nojori quia pohuatasacari janiyajiniji". <sup>19</sup> Janiyari saaja na sequereeni: "Cua Jiyaniijianaa, nojoricuajaruhua niishiya janiyari quiocua tiuuniaa pueya quioojuani puetunu rerejojua tiajinijianaa cua nujuatejosocoriquiano nojori. Janiyari nojori mojujuahuaj. <sup>20</sup> Naajuhuj, quia rupaa pohuatana Esteban jaara mosaaquiaaritij, janiyari catecaji saitia na jacusacari shootiaquiaarini. Janiyari na jacunaa toqueya cojuariquiaaaniuhuj, nojori mosacari Esteban. Janiyari jaarajaaja sequequiaarini: 'Cuaara mosaaria' ". <sup>21</sup> Naa cua sequesacaritij, Jiyaniijaari saaja cua sequereeni: "¡Niiquiji quia quiaarejaj! Janiyacuajaari tucuacaanu quia jiyaronutaniya taucuacaacuani".

#### *Comandante jiiiasacari Pablo*

<sup>22</sup> Pueyari sanaa tojitariquiaa Pablo pohuatasacari. Saniniuujia, Pablo jaara jiyaniquiquiaari taucuaca, pueyari jiyacari coteequiaari nacoonu, taucuaca sojeaca nojori quiniuucua:

—¡Cuaara mosaaria cuno pueyano! ¡Majaari maninia jiyano pueyano rishiniuria socuatej!

Cuno pueyari naa nacooriaquiaa.

<sup>23</sup> Na juaaquionuta na nacoosacarijia, na toqueya quejootuquiaari jiyocuacaanuuri quera na macaaniutia. Naa quejootuquiaari jiyajuajaariuhuj. <sup>24</sup> Comandanteeri na capitancuaca sequequiaari Pablojiniji:

—Nio pueyano nia tiuquiniri nia quijia tiajinia. Niocua na saniri majacununoj, cuaara sequeera casaara naa pueya nacoyani.

<sup>25</sup> Soldadohua jaara tari Pablo morojotuquiaari tiaacuara na majacutusocoriquiano juucua, Pabloori capitán sequequiaari:

—¿Jiyaniijia César rootasanotee, naa nequesoreesoojua nia majacunura narta Romano pueyanotej?

<sup>26</sup> Capitán jaara tojiquiaari naa Pablo sequesantej, ritia netequiaariiri. Na comandante sequeseeeri:

—¡Quiaa cocuaatia miya! ¡Cuno pueyanona Romano!

<sup>27</sup> Comandanteeri ritia Pabloocua catecanoquiaari. Na nequesotaseeri:

—¿Seetanutejanaa? ¿Quiaatena Romanotej?

Pabloori na riucuaaree:

—Taaquiririnij.

<sup>28</sup> Comandanteeri na sequerohuacuahuaj:

—Romano pueyano cua quiniuria, janiyari queraatia cua cumaneeca niqutioquiaarini.

Pabloori saaja na sequere:

—Janiyari Romano cutarani, nojori tiacajinia cua rasaanuucua.

<sup>29</sup> Cuno pojori, Pablo majacunura seeratasaaquiaari juucuan, naa nojori tojiti-asacaritij, Pablo shuriucuaaji ritia shiriquitiaquiaariiri. Comandante niishishacari Pablo seetanujuanaa Romano quiquiaari, puererejaariuhuj, Pablo na morojotenuucua.

### *Tama nocuaji Pablo tacusacarijiaaja Judiocuaca jiyaniijianucua niqiuara*

<sup>30</sup> Tariqui saniniuujia, comandanteeri maninia niishiniu paniquiaari casaara Judiocuaca nacootariquiaacuaa naa Pablóni. Naaratej, comandanteeri Judiocuacaacuara secojonaa jiyaniijianucua rerejotequiaari. Puetunu Judiocuaca camarucua nacasunaa maanujuanaa rerejotequiaariuhuj. Nojoricuajaari Sanedrín maanu. Jiyacari Pablo numatucuaajiniji rupareetaquiaari cumayocua saatijiotasanoori. Puetunu nojorijianaa jaara tari rerejoquiaari, jiyacari Pablo tohuatequiaariiri. Nojori tacoji na nujuatereeri.

## 23

<sup>1</sup> Pabloori juhuacatecara pohuatanu coteequiaari camarucua niqiuara. Nojori sequesereeri:

—Cua tapueyocuacanaa, janiyari pueyaracaanu juhuajaniya quiquiaani, Pueyaso tojijia cua quishacari pueyaracaanu.

<sup>2</sup> Naa Pablo sequesacaritij, pueyacuara secojonaa jiyaniijiajanaari juaarii. Ananías na sesa. Nojuajaari Pablo jiyaniquiaari najuhuaana pocuaa naasucua. Nocuaji, Ananíasri Pablo shuriucua nujuatunaa sequequiaari ritia:

—¡Na rupaajinia nia piri naa pocuaaniquitij!

Pablo shuriucua nujuanaari jaarajaaja na piquii. <sup>3</sup> Majaari Pablo niishiniu quiquiaari casaate Ananías quiquiaarini. Naacuajitij, Pabloori juhuajaniya Ananías sequequiaari:

—¡Pueyasoori saniniuujia cucua quia naminiutianiyacujua, Moisés Rootasano tojiyashijianaa! Nia jyanishacari janiyari Moisés Rootasano tojiyashijiani, niari coteenu cua nequesoreya maninia taa Moisés rootaquiaaricuajani. ¡Quiaa sajara Moisés Rootasano tojiyashijia cutara, quia sequesacari cua pishaanura nia nequesoreyaquishacari maninia janiya!

<sup>4</sup> Pablo shuriucua nujuatunaari Pablo sequequiaari:

—¿Quiaateeri saa rerequeteyajaa pueyacuara secojonaa jiyaniijiaruhua?

<sup>5</sup> Pabloori nojori riucuaaree:

—Cua tapueyocuacanaa, cua jiyanoori. Paacuajaari naa rootasaaquiaari Moisés nequesoreetuneejiniani:

“Majaari sacuaraatia rimiaaquenu nia camarnuucuaa”.

Cua pueyanaa, maja cutaraari cua niishiniu quiriquiaa nojuajate pueyacuara secojonaa jiyaniijia.

<sup>6</sup>Pabloori niishiquii cuno Judiocuaca camarucua nacasunaa cuniqui quiriquiaani, noojiaqueya nojorijinijinioori Saduceocuaca maanujiniji quiriquiaa. Tamasacaari saniniuujia narta Fariseocuaca maanujiniji quiriquiaacujua. Naaratej, Pabloori jiyanoehua na rupaa paaretaquiaari naa na sequenura nojori:

—¡Cua tapueyocuacanaa, janiyari Fariseo pueyanoni! Cua shipininioori Fariseo pueyano quiquiaarjihuaj. Canaari Pueyaso Rupaacua tiuujiacani. Naacuajitij canaari niishiyani Pueyasoori macunucua samiitianijionutaniuhua taa puetunu cuarta Fariseocuaca niya quiniaa tiuyanijia. ¡Niaaquiiri jiyamitia cua nequesoreya!

<sup>7</sup>Pablo jaara naa sequequiaaritij, Fariseocuacaari Saduceocuacata juhuacatecara juayonuutaquiaari tama nojorijiaaja. Naacuajitij, nojoriiri caapiqui maapuera raquti-iquiaari. <sup>8</sup>Saduceocuacaari jiyaniya maja macunucua samiitiaconu quiniutianiuhua. Nojoriiri sequeyajuhaaj: “Maja Pueyaso seya quiniu”. Pueyapuenaaari sohuanuujuhuaj. Fariseocuaca cutaraari nojori cuaracashitishanoocua tiuya. <sup>9</sup>Naacuajitij, puetunu pueyajanaari nacooriaquiaa na juayonuutasacari. Jiyacaritij, tariucuacaanu Moisés Naajiotasanojiniji niishitiojonaa pueyari sanetaquiaari. Nojoriiri Fariseocuaca quijiajuhuaj. Nojoriiri naa sequetuquiaari Pablojiniji:

—¡Nio pueyanoori maja sesa na miiniu quiqianu! Maninia sohuanu jiyoteeri nocua muetacanu, Pueyaso seru soj. Majaari pa niishiniu. ¿Paatucua casaara tenujure Pueyaso panishano na miishacarini?

<sup>10</sup>Pueyari socua jiyacatequiaari nacoonu. Comandanteeri puerequiaari, na jiyani-ishacari Pablo naasucua socua sureesaanutaniyaquij. Naa jiyaniquiaariiri, puerajanaa pueya juaaquisacari. Nocuaji, comandanteeri ritia na soldadohua jiyaramiquiquiaari, na tajinia nojori tiuquininiuhua Pablo pueya tajiniji. Naa miitiquiaariiri.

<sup>11</sup>Cuno niucujani, Jiyaniijia Jesuuri Pabloocua muetaquiaari. Na sequereeri:

—Quioojia quia cumaquiri Pablonaa. Naatej, taa quia pohuatarucuaa janiyajiniji niya Jerusalén tiacajiniacuaani, quiaari naa pohuatanutaniya janiyajiniji Roma tiacajinia quiniaajuhuaaj, Césarjanaa niqiarajuhuaaj.

#### *Judiocuaca roojotoosacari Pablo na motunura juucua*

<sup>12</sup>Tariqui saniniuujia, noojiaqueya Judiocuacajinijinioori Pabloocua roojotooquiaari na monura. Nojoriiri naa sequetuquiaaritij:

—Paa jaara Pablo moyaquirini, pocua miaqueyaquirini, pocua ratuyaquirijianiuhuaaj.

<sup>13</sup>Nojoriiri cuarenta canuu quiquiaari, naa sequetuquiaarini. <sup>14</sup>Na nuhuaji, cuno pojoriiri pueyacuara secojonaa jiyaniijianucuaacua quiaquiaari, Sanedrín maanuucuanio. Nojoriiri naa sequetuquiaari:

—Majaari canaa miaquenu quiniutianiya quenaaja casaa, canaa cuaraa more Pablo-jaatijia. <sup>15</sup>Niajaniya, pueyacuara secojonaa jiyaniijianucuaanaa, puetunu Sanedrín maanujuaanaano, nia sequere comandante cuaraa nitiaara tariqui Pablo niaacua. Niocua naa na sequerenoj: “Miji Pablo quia nitiaare. Canaari socua maninia na nequesoreenu paniyani”. Canaacua jiyacari niaacua na tiuquiyaquishacarijia nuu cajiniocua na moreni.

<sup>16</sup>Tamonu pueyanoori Pablo raaquia caminiujuquiaari naa cuno pojori sequesano camarucuatej. Pablo raaquiaari nocuaji ritia soldadohua quijia tajinia quiaquiaari na cama Pablo na pohuatanura. <sup>17</sup>Jaara tari na pohuataquiaari, Pabloori jiyacari cuniqui cojuanaajinijinio capitán piiquiaari. Na sequereeri:

—Nio caya samijia quia jiyataare comandanteecua. Nojuajaari comandante nu-mootenu paniya.

<sup>18</sup>Jiyacaritij, capitánri Pablo raaquia jiyataquiaari. Na tiuquishacari, comandante sequequiaariiri:

—Pa quiasano Pabloori cua piiriini. Cua sequereeri cua nitianura quiocua nio caya samijia. Nojuajanaari casaa quia sequenu paniya.

<sup>19</sup>Jiyacaritij, comandanteeri caya samijia numatujiniji quiaquiaari. Tamocora na jaatucureeri. Tii na nequesotaseeri:

—¿Casaa quia sequenu paniya janiyani?

<sup>20</sup>Caya samijiaari na sequere:

—Noojiaqueya Judiocuacajinijinioori Pabloocuara rojotoorucuaa. Quiaari saponu sequesaanutaniya tariqui quia jiyatanura Pablo, puetunu Sanedrín maanujuanaa niqiuara nequesoresocoriquiano. <sup>21</sup> Quiaa jaara sequesaaare, majaari nojori tojiniu. Cuarenta canuuri tari nuu cajiniocua nocuaji jamaatiuya. Cuno pojoriniaari maja na miaquenuunu quiniutianiya, majanaari na raruunu quiniutianiyajuhuj, cuaara moture Pablojaatijia.

<sup>22</sup> Comandanteeri caya samijia sequequiaari:

—Maniniacuaja. Majaari tamasa pohuatanu quia sequesano janiya. Tariucuaja. Quia quiaarohua.

*Soldadohua jiyatasacari Pablo camarnu Félix*

<sup>23</sup> Comandanteeri caapiqui capitán piiquiaari. Nojori sequereeri na numootejonura dosciento soldadohua, Cesareya tiacajinia quiojoriquiano cuno niucuaja. Mariyata cuaara quiojora setenta soldadohua caballohua nijinia cajitiujiacajuhuj, socua dosciento soldadohua saa cashiriacajanio. <sup>24</sup> Comandanteeri na capitáncuaca sequequiaarijiuhuj, nojori niojotanura cajitiucua tamasa caballohua nijinia Pablo cajijia. Nojori sequequiaarijiuhuj:

—Niocua maninia cojuaare Pablo, cuaara tiuquiiiria camarnu Félix nequesoresocoriquiano.

<sup>25</sup> Comandanteeri na naajionee niqutioquiaari Pablo jiyatanaa. Naa naajiosanoori quiquiaari camarnu Félix:

<sup>26</sup> “Camarnu Félixnaa. Nio Claudio Lisias naajionee. ¿Taa quia quiyani cua panishano camarnunaa? <sup>27</sup> Cua jiyarotasano pueyanojiniji quia pohuatareeraj. Na sesa Pablo. Narta Judiocuacaari na motunu paniquianu. Janiyari jiyacari cua soldadohuata nocua tiuquishii namitiani. Janiya jaara niishiquianuni nojuaja Romano pueyano, janiyari cua soldadohua sequereeni: ‘Judiocuacaacuaaji nia quiare ritia cuno pueyano, mariqui na motureeri’. <sup>28</sup> Maninia cua niishinuria casaara naa pueya nacootariquiaa Pablóni, janiyari puetunu Judiocuaca camarucua nacasunaa rerejotecanuni. Janiyari nojoriicua tohuatecanu Pablóni, nojori nequesoreenura nojuajanaa cua tojishocoriquiano. Janiyajanaa jaara Pablo tojiquianuni, casaara pueya monu paniriquiaanoj, janiyari jiyacari shusha niishiriini. <sup>29</sup> Nojoriqiiiri na nacootacanu Pablo tojiyaquiniucua tariucuacaanu tama nojori supuetanaa rootasanojuaaja. Cunora na motunu paniriquiaari. Janiyari quia sequeyani, ¿maatucua cunora mosaareeri? Majaari quenaaja sesa na miiniu quiquianu, pueyaracaanu na nujuatesaanura. <sup>30</sup> Janiyari sequesaarucuaajuhuj, noojiaqueya Judiocuacajinijionaaari na monu paniya. Janiyari jiyamitia quiocua cua soldadohua na jiyarotareeni. Janiyari nocuara saquiriojotanaa sequerucuaajuhuj, cuaara quia saquiriojotatuura nocuara cutara. Cunojuanaa quia sequeyanijia cua camarnunaa. Tariucuaja”.

<sup>31</sup> Soldadohuari naa miiquiaari taa comandante sequequiaari nojoricuajani. Nojoriiri cuno niucuaja Pablo jiyataquiaari. Antípatris tiacajinia tiuquiiioseeri. <sup>32</sup> Na niohuacata quiojonaa soldadohuari Antípatris tiacajiniji tariquiiicuaaji riujiuutiaquiaariuhua Jerusalén tiacajiniahua. Caballohua nijinia cajitiuniaa soldadohua cutaraari Pablo jiyataquiaari. <sup>33</sup> Pablo jiyatanaa jaara tiuquiiioseequiaari Cesareya tiacajinia, nojoriiri comandante naajionee niqutiosee camarnu Félix. Pablo na niqutiojorejaariuhuj.

<sup>34</sup> Camarnu serojonu nuhuaji comandante naajionee, Pablo nequesotaquiaariiri:

—¿Tee quia rasaaquiaarini?

Pabloori na riucuaree:

—Cilicia jiyajinia rasanonijia.

<sup>35</sup> Camarnuuri na sequere:

—Janiyacu quia nequesoreeriquiani quiocuara saquiriojotanaa jaara tiuquiiiore.

Jiyacariitij, camarnuuri na soldadohua sequequiaari cuaara maninia cojuatuura Pablo tariucuacaanu jiyaniijia Herodes tiaco. Herodes quishacari jiyaniijia, cuno tiaari nocuaji tiasaaquiaari na quijia.



## 24

*Tama Pablo tacusacari nocuajjiaaja camarnu Félix niquiara*

<sup>1</sup> Pabloori cinco juuca camueequiaari tari Cesareya tiacajinia. Jiyacari tiuquijio- quiaariiri nocuara saquiriojotanuuriquiano pueya. Nojoriiri quiquiaari pueyacuara secojonaa jiyaniijia Ananías, mariyata secaja Judiocuaca camarucuanio. Nojoritia tiuquiquiaariiri Tértulo jyanishano pueyanojuhuj. Jyanohua pocuanu niishijia. Puetunu nio pojorijianaari camarnu Félix cua tiuquitiaquiaari Pabloocuara na saquirio- jotanura. <sup>2</sup> Pablo jaara tohuatesaaquiaari nojoriicua, Tértulo juhuacatecara coteequiaari camarnu Félix saquiriojotanu nocuara. Naa sequequiaari camarnu Félixri:

—Canaa camarnunaa, quiaari jyanohua niishijia. Naa niishijia quia quishacaritij, quiaari maninia quia pueya jiitiaa. Canaari naacua juhuajaniya quiyani, maninia canaa quia jiitiasacari. <sup>3</sup> Canaari cunora quia timitiaani camarnunaa, maninia quia jiitianuucua canaa pueyaracaanu, puetunu canaa jiyajiniajanaa. <sup>4</sup> Maja puera cua tarishitiniu paniniu quiajaniya. Quenaaja rupaquijia canaa quia tojiricuara. <sup>5</sup> Nio pueyanoori tariucuacaanu canaa supuetanaa rootasano tamacateya queraatia cuarta Judiocuaca. Nojuajaari tamaatia niishitiojoquiaa tamonu jiyacajinia quinia Judiocuacajuhuj. Naa sesa na niishitijonuucua pueyatej, tamasaari maja tari na rupuenu paniniu narta pueyano. Nio pueyano tojtiajacaari sesojosaaquiaari Nazarenoocua tiuuniaa maapue. Nio pueyanocujaari cuno pojori jiyaniijia. <sup>6</sup> Juucua Pueyaso juaatiniu paniquianujaar- iuhuj, tahue na tiuquininiu panishacari Pueyaso Secojojua tiajinia. Canaari jiyamitia na quiarucuaani, canaa nequesoreesocoriquiano taa tariucuacaanu canaa supuetanaa rootasaaquiaaricujani. <sup>7</sup> Comandante Lisiasri canaa na jaariutiarucuaa saajani. <sup>8</sup> Canaa sequerucuaajaariuhuj: “Cante nio pueyanooacara saquiriojotanu paniyani, cuara quiaara camarnu Félix cua”. Naa canaa sequerucuaari. Nio pueyano quia nequesotasure, quia niishiniuria maninia. Seetanujuanaacuj, canaari cunora nocuara quia saquiriojo- taani.

<sup>9</sup> Cuniqi quinia Judiocuacaari jaarajaaja sequeturee:

—Taaquiririnij, camarnu Félixnaa. Naacuaaquiniatejaj, taa Tértulo sequeyacuajani.

<sup>10</sup> Camarnuuri na juaashiquia shiitioquiaari Pablo pocuanura saniniuujia. Pabloori jiyacari coteeree. Naa sequereeri:

—Taaquiririnij, pocuashiyacuaaquiniatejaj. Camarnunaa, janiyari niishiyani, quiaari tari queraatia marijia shocotejiya cuarta Judiocuaca nequesoreena quia quishacari. Naaratej, janiyari juhuajaniya quia niquiara tama cucuaji tacunu paniyani, cuarta Judiocuaca saquiriojotasacari cucuara quiajaniya. <sup>11</sup> Janiyari shusha tiuquiriohuacuaa Jerusalén tiacajiniani, Pueyaso cua secojonura Secojonuujua tiajinia. Janiyari shusha camueesuhua doce juucani. Cucuara saquiriojotanaa quia nequesoreesureeraj. <sup>12</sup> Nojoriiri maja quenaaja na riuriatanu quiquianu janiya tamonu pueyanota juayonuutaano. Majaari na riuriatatunu quiquianu janiya pueya ruutaqueyano quenaaja Pueyaso Secojojua tiajinia. Majaari quenaaja nojori riuriatanu quiquianu janiya canaa Secojojua tiajinia juayonuutaano pueyata. Majaari quenaaja naa cua miiniu quiquiaari puetunu tiacajini- ajanaa cua rucuanijosacari. <sup>13</sup> Nio pojori cucuara quia saquiriojotaani, nojoriiri maja na naata sequenu seetanujuanaa janiya sesa miiijiani. <sup>14</sup> Nojori sequesacari janiyanaari Pueyaso tojjia tamaatia nojorijinijini, cua tojinuuucua cuno Nazareno pueyano, taaquiri- rinij. Saaja cuno nojori sequesano cutaraari seetanujuanaa. Janiyari Nazareno toji- jiani seetanujuanaa cua tiuushacari puetunu Moisés naajiotasanoocujajanaa, naajuhuj, cua tiuushacari puetunu canaa supuetanaa caminiujiushano Pueyasojiniji naajionu- utasanoocujajanaano. <sup>15</sup> Janiyari juhua cucuara saquiriojotanaa pueya tiuya Pueya- soocujuhuj, taa Pueyaso samiitianijionutaniuhua macunucuan; maninia miijiaca, sesa miijiacano. <sup>16</sup> Naaratej, janiyari pueyaracaanu sesa miyaquiniu saniniujuquiaani, maninia cua quiniuria Pueyaso niquiara, pueya niquiaranio. Naacuajitij, janiya jaara samiitiarohuani, majaari cua macuhujenu quiniutianiya.

<sup>17</sup> Queraatia marijia cua shocotejonu nuhuaji cua rucuanijosacari tamonu jiyaca- jinia, janiyari shusha tiuquiriohuacuaa cua jiyajiniani. Tamonu jiyacajiniji Jesuucua

tiuuniaa niqutiojosano cumaneeca tiuquitiarohuacuaanijia. Janiyari na tiuquitiarohuani na jatanuhuara Jerusalén tiacajinia, Jesuucua tiuuniaa casamiijiuniucua niqutiojosocoriquiano, mariyata cua jiitiasanojiniji cua niqutionuhuara Pueyasora. <sup>18</sup> Naa cua miiniu nuhuaji Pueyaso Secojoua tiajinatej, Asia jiyajinijinio Judiocuacaari cua naacutucanu tohuataano juucua Pueyaso Secojoua tiajiniji. Janiyari juucua tohuatariquihuani cua cuaqueya cua jeequenu nuhuaji, taa canaa supuetanaa niishitiosaaquiaaricujani. Cuno juuca, majaari queraatia pueya quiniu quiriquiaa Pueyaso Secojouuujajinia. Majaari quenaaja pueyata cua juayonuutunu quiriquiaajuhuj. <sup>19</sup> ¿Teete cuno pojoricuarani? Mariqui niya nimiacuara cucuara na saquiriojotanuunura, janiya jaara sesa miiquianuni. <sup>20</sup> Cucuara saquiriojotanaa jaara nijiyaquimia, naajaa, nio pojori niya quiyani, nojoriiri Judiocuaca camarucua nacasunaa nequesoreesacari janiya tii quituquianu jiyacarijuhuaj. Nojori cuaara sequeera, ¿cuno camarucuate cua sequecanu janiya sesa miiquianuni? <sup>21</sup> ¿Pueyateeri cucuara saquiriojotaa soj, nio cua sequenuucua Judiocuaca camarucua: “Niaari cua nequesoreya quiarijia, cua niishishacari macunucuaari samiitianijiosaanutaniuhua”? Janiyacuajaari naa nacacanu camarucua nequesoreesacari janiyani.

<sup>22</sup> Camarnu Félix jaara naa tojiquiaari Pablo sequesantej, nojuajaari pueya sequequiaari:

—Comandante Lisias cuaara tiuquiirijaara, janiyacua Pablo nequesoreeriquiani.

Camarnu Félixri Jesujiniji pohuatasano tari maninia niishiquiaari. Naaratej, nojuajaari Pabloocuara saquiriojotanaa pueya tarinitiaquiaarijaara. <sup>23</sup> Na nuhuaji, camarnu Félixri soldadohua capitán sequequiaari:

—Pablo nia tiuquiniriohuajaara. Niocua maninia na cojuarenoj. Na rupuenaa, tapueyocucacano, nojori jaara Pabloocuara nimiaquia, majaari nocuaji na tenujununoj. Nojori cuaara na niqutiojuura na panishano.

<sup>24</sup> Na nuhuaji, camarnu Félixri tamaqui quiaquiaari camueenujunura. Na nuhuaji, juhua shusha tiuquiquiaariuhua necocuataari. Necocua Drusilaari Judiocuacajinijinio maaji quijia. Camarnu Félixri na soldadohua sequequiaari:

—¡Pablo nia tohuatere! Janiyari cua niquicuata na tojiniu paniyani. Cuaara canaa niqiuara pohuataara taate Jesuucua tiuushanojuaarani.

<sup>25</sup> Naacuajitij, Pabloori Félix pohuataquiaari nojori niqiuara taate pa naata maninia mijiara pa quiniuni. Pohuataquiaarijuhuaj taate pa naata tama pa cuaqueyajaaja pa cojuanu maniniani, sesa pa miyaquiniucujaji. Naajuhuj, Pabloori na numootequiaari Pueyasoori sesa mijiaca saniitionutaniya.

Camarnu Félix jaara naa tojiquiaaritij, jiyanohua shiriiquiquiaariiri. Pablo sequereeri:

—¡Tariucujaja! Quia quiaarohuacuarajaara. Janiya jaara jeya quiriquiani, janiyacua quia sequereeraniuhuj.

<sup>26</sup> Camarnu Félixri naa sequeyarucua na soldadohua sequequiaari Pablo na jiyatanura nocua, nata na pocoojonura. Nojuajaari juucua jiyaniquiaari Pablo naasucuaari cumaneeca na niqutionutaniya na cartesaanura. <sup>27</sup> Pablo shocojoquiaariiri caapiqui marijia, nujuatesano na quishacari Cesareya tiacajinia. Jiyacaritij, Porcio Festoori saniniuuja camarnura jiyatesaaquiaari Félix niti. Majaari Félix tohuatenu quiquiaari na nuhuajiria Pablo. Naajaa na tiujiaquiaari nujuatesanoori. Naa miiquiaariiri Judiocuaca timitianura nojuaja.

## 25

### *Pablo pohuatasacari Festo niqiuara Jesujiniji*

<sup>1</sup> Jiyacaritij, Festoori tiuquiquiaari Cesareya tiacajinia, Judea jiya camarnu na quiniuria. Jiuujianaraca juuca nuhuaji, Cesareya tiacajiniji quiaquiaari Jerusalén tiacajiniaari. <sup>2</sup> Jerusalén tiacajinia na quishacari, pueyacuara secojonaa jiyaniujanucuaari tii Judiocuacajinijinio socua tojishano camarucuate Pabloocuara saquiriojotakuiaari camarnu Festo. <sup>3</sup> Nojoriiri camarnu Festo sequequiaari cuaara na soldadohua jiyaroora, Pablo na riniuria Jerusalén tiacajiniara. Nojoriiri naa sequequiaari camarnu juucuatej,

na motunu panishacari Pablo nucuamaji na nishacari. <sup>4</sup> Camarnu Festoori saaja nojori riucuaquiaari:

—Njuatesano quiya Cesareya tiacajiniacujaruhua. ¿Maatucua casaara niyara rishaareni? Janiyacuajaari nocua tacatenutaniuhuanu.

<sup>5</sup> Camarnuuri nojori sequequiaarijiuhuj:

—Niajanijajinijinio socua tojishano pueya cuaara quiojohuara cuata Cesareya tiacajinia. Nojoriiri na naata Pabloocuara saquiriojotanu cua niquiara tii, cua niishiniuria maninia, Pablote seetanujuanaa sesa miiquianujuaara.

<sup>6</sup> Camarnu Festoori camueenujuquiaari Jerusalén tiacajinia ocho juuca, diez juucaruhua. Na nuhuaji, quiaquiaariuhua Cesareya tiacajiniohuari. Na tiuquiniu nuhuaji, saniniuujia tariqui cajiquiaari nequesoreesaqui camarnu cajitiujiniaari, camarnu na quishacari. Jiyacari na soldado sequequiaariiri cuaara Pablo tohuateera na nequesoreesocoriquiano. <sup>7</sup> Judiocuacaari tari tiuquiiioquiaari Jerusalén tiacajinijijuhuj, Pabloocuara na saquiriojotanuunura. Pablo jaara nujuatesaaquiaari camarnu tacoji, cuno pojoriiri jaarajaaja catecanoquiaari Pabloocua. Nojoriiri jiyanohua sesa nocuara saquiriojotanuquiaari najuhuana queraatia casa. <sup>8</sup> Jiyacaritij, Pabloori tama nocuaji na tacsacarijiaaja naa sequequiaari:

—Maja sesa cua miiniu quiquianu. Janiyari tariucuacaanu Moisés Rootasano tojiquiaajaniuhuj. Majaari sesa cua miiniu quiquianu Pueyaso Secojoua tijuhuj. Majaari Roma tiacajinia quijia pa jiyaniijia tojiyashijia cua quiniu.

<sup>9</sup> Camarnu Festoori jaarajaaja Judiocuaca panishano miiquiaari, cuno pueya paniniuria nojuaja. Naaratej, Pablo nequesotaquiaariiri:

—¿Quiaate Jerusalén tiacajinia quianu paniya, tii cua nequesoreenura quiajaniya?

<sup>10</sup> Pabloori na riucuaquiaari:

—¿Majateeri Roma tiacajiniji pa jiyaniijijajanaa quia jiyatecanu niya camarnura quia quiniuriacuaja? ¿Casaara niyaja quia nequesoreyaquiya janiyarini? Roma tiacajinia quijia pa jiyaniijiacuajaari niya camarnura quia jiyatecanu. Quiaacuajaari niishiyajuhuj, majaari sesa cua miiniu quiquianu Judiocuaca. <sup>11</sup> Janiya jaara sesa miirii seetanujuanaani, cuaara cua motuuraqui. Cucuara cuno pojori saquiriojotasano jaara coriaa quiri, majaari quenaaja tamonu pueyano naata niqutionu janiya cua mosaanura. ¿Janiyatucua casaara mosaare najuhuanani? Naaratej, janiyari quia sequeyani camarnunaa: jiyaniijia Césarjanaa cuaara cua nequesoreeraqui.

<sup>12</sup> Camarnu Festo pocojonu nuhuaji na nacasunaata, Pablo sequequiaariiri:

—Quiaacuajaari cua sequeree cua jiyaronura quiajaniya pa jiyaniijia Césarqua, nojuajanaa nequesoreenura quiajaniya. Janiyari nocua quia jiyaronutaniya cua soldadohuatani.

### *Jiyaniijia Herodes Agripa niquiara Pablo pohuatasacari Jesujiniji*

<sup>13</sup> Naa Pablo sequesaaanu nuhuajitij, pasaja camueenujuquiaariiri. Jiyacari jiyaniijia Agripaari Cesareya tiacajinia tiuquiquiaari Festoocua, na saruhuatanura nojuaja. Agripaari tiuquiquiaari na rimiutu Bereniceta. <sup>14</sup> Nojori camueenujusacari camarnu Festo tijajinia, Festoori socua jiyaniijia Agripa pohuataquiaari Pablojiniji. Na sequequiaariiri:

—Tamonu pueyanoori niya quiya, Félix tiujiasano nujuatesano. <sup>15</sup> Jerusalén tiacajinia cua quishacari, Judiocuacaacuara secojonaa jiyaniijianucuaari nocuara cua saquiriojotacanu, Judiocuaca camarucua. Nojoriiri cua sequetucanu Pablo cua motenura.

<sup>16</sup> Janiyari saaja nojori riucuaacanuni: “Roma tiacajiniji jiyaniijiaari maja ritia na monu pueyano. Nocuara saquiriojotanaa cuaara niijoma niya nocuara saquiriojotanuunura-jaatijia. Monu panishano cuaara rihuaneera tamajaaja quenaaja nocuaji, jaara seetanujuanaa quiyaquiri nocuara saquiriojotasano”. <sup>17</sup> Naacuajitij, Jerusalén tiacajinijinio pueya nocuara saquiriojotanuuriquiano jaara cucua tiuquijiocanu, majaari socua cua tarishiniu quiquianu. Janiyari tariquicuaji nequesoreeja cajitiujinia cajiquianuni, pueya camarnu cua quishacari. Janiyari jiyacari cua soldadohua sequereeni nojori jaatucunura cucua cuno pueyano. <sup>18</sup> Cuno pojori Pabloocuara saquiriojotanuucanuni, nojoriiri maja quenaaja na saquiriojotanuunu quiriucuaa juhua cua niishiriojosano. <sup>19</sup> Saaja

tamaatia nocuara cua saquiriojotanuureeri. Pablonaari nojori supuetanaa Pueyasojiniji rootasano tamacaquiaa saaja. Cua sequetureejaariuhuj, Jesu jiyanishano pueyanonaari mosaaquiaari. Pablonaari saaja pueya niishitiojiyacujua, cuno Jesu jiyanishanonaari samiitiaquiaariuhua. Saminionaari quiari quiyajaa. <sup>20</sup> Naa cua tojishacari nocuara pueya saquiriojotasantej, majaari cua niishiniu quiqianu taa cua miiniutianiyani. Janiyari cunora Pablo nequesotarucuaani: “¿Quiaate Jerusalén tiacajinia quianu paniya, tii cua nequesoreenura socua quiajaniya?” <sup>21</sup> Nojuajaari saaja cua sequecanu: “Jiyaniijia César Augustojuanaa cuaara cua nequesoreera juhuari”. Janiyari cunora niyaja nujuatesano na jiitiaani, janiya cuaara na jiyarore jiyaniijia César Augustoocujaatijia.

<sup>22</sup> Jiyaniijia Agripaari camarnu Festo sequequiaari:

—Janiyari cuno pueyano tojiniu panijajaacuhuj.

Festoori na riucuaquiaari:

—Quiaacuajaari tariqui na tojiniutianiya.

<sup>23</sup> Tariqui, jiyaniijia Herodes Agripaari niqiaariuhua Bereniceta. Nojoriiri tiuquiti- aquiaari nequesoreeja sohuacajinia, shanohua jacaria na rucuanenuta, shanohua na toqueya maniniuquiyatajuhuaj. Puereeta niqishano. Nojori tiuquitiyacari, nojori cojiqiaariiri soldadohua camarucua, mariyata tama cuno tiacajinijinio camarucujaa- janio. Camarnu Festoori jiyacari na soldadohua seerataquiaari Pablo na riniuria, nojori tacoji na nujuatesocoriquiano. <sup>24</sup> Pablo tiuquishacari, Festoori sequequiaari:

—Jiyaniijia Agripanaa, puetunu niya canaata rerejono pueyajanaanaa, cua tojitiare. Cuno pueyano niaa na niqiyani, queraatia Judiocuacaari nocuara cua saquiriojotanu- uquiaa, Jerusalén tiacajinia cua quishacari, niya Cesareya tiacajiniajuhuaj. Nojoriiri pueyaracaanu cua taajetequiaa. Cua sequetuquiaari: “Cuno pueyano cuaara mosaaria camarnunaa”. <sup>25</sup> Janiyacuajaari tari niishiyani, nio pueyanoori maja sesa na miiniu quiqianu. Naacuajitij, janiyari niishiriojiyani, ¿pueyanotucua casaara najuhuaana mosaareni? Tama nojuajaari cua sequerucuaani, cua jiyaronura nojuaja pa jiyaniijia César Augustoocua, pa Jiyaniijiajanaa nequesoreenura nojuaja. Janiyari cunora na jiyaronutaniyani. <sup>26</sup> Saniniuujia majaari cua niishiniu taa cua pohuatanutaniya cua jiyani- ijia cua naajiojiniani. Cunora, nio pueyano nitirii niya nia nequesoreesocoriquianonijia, pueyanaa. Janiyari quia panitiaa cutara nojuajanaa quia nequesoreenurani, jiyaniijia Agripanaa. Quia nequesoreere, cua naajionura pa jiyaniijia Augustoocuaara casaara nio pueyano cua jiyarore nocuani. <sup>27</sup> Majaari cua naata naajaa jiyaronu quiasano pueyano, maninia nequesoreyaquishoojua.

## 26

### *Pablo riuhanesacari jiyaniijia Agripa*

<sup>1</sup> Jiyacaritij, Jiyaniijia Agripaari Pablo sequequiaari:

—Quiocuaji quia riuhanereja, jaara seetanujuanaa quiyaquiri quiocuara pueya saquiriojotasano.

Pabloori na juaashiquia sanaquiaari. Naa coteequiaari pocuanuuri:

<sup>2</sup> —Timianijia jiyaniijia Agripanaa, quia sequesacari cua pocuanura quia niqiaara, tama cua tacunura cucuajijiaaja, Judiocuaca saquiriojotasanojiniji cucuara. <sup>3</sup> Quiaari puetunu cuarta Judiocuaca miiijosanojuanaa niishijiajuhuaj, puetunu canaa nacojo- tasanajuanaanio. Janiyari cunora quia sequeyani, nareja cua tojiri cua pohuatasacari quiajaniya.

### *Pablo pohuatasacari taa na quiqiaari Jesucua na tiuyaquishacarijiani*

<sup>4</sup> Puetunu Judiocuacajanaari niishijajuhuj taa quijia cua quiqiaari cua naatujua- jiniji nojoritia cua quishacari cua jiyajiniani, Jerusalén tiacajinianio. <sup>5</sup> Cuno Judiocuaca quia nequesotasureeraj. Nojori cuaara quia pohuataara jaara paniri pohuatanu. Cua mashajajiniji, janiyari seetanujuanaa Fariseo quijiani. Fariseocuacaari puetunu canaa supuetanaa rootasano Pueyasojinijianaa tojitiaja cutara, socua tamasaca cuarta Ju- diocuacajiniji. <sup>6</sup> Nojorijiaari cucuara saquiriojotacanu cua tiuushacari Pueyasocua,

taa na samiitianijionutaniuhua macunucuaani. Pueyasoori nojori samiitianijionutaniuhua taa na sequequiaari tariucuacaanu canaa supuetanaacuajani. <sup>7</sup> Quiarijiani, canaa supuetana Israel doce niquiohuacuajinio caneno pueyari naa seetanujuanaa Pueyaso sequesano niquiniuria sashiyajaa. Naaratej, nojoriiri pueyaracaanu Pueyaso secojonuuquiaa, juuca, niucuanio, Pueyaso na tojitasacari. Naa cua sashishacari Pueyaso sequesanojuhuaj Jiyaniijia Agripanaa, nio cuarta Judiocuacaari quiarijia cucuara saquiriojotanuquiaa. <sup>8</sup> ¿Niaateeri jiyaniya Pueyasoori maja na naata macunucua samiitianijionuhua?

*Taa Pablo miitiaquiaari Jesuucua tiuuniaa tarijiani*

<sup>9</sup> 'Janiyari tarijia sequequiaari tamajaajani sesa cua niishiriojosacari Jesujiniji: "Nazaret tiacajinijinio pueyanocua tiuuniaa pueya paracaariirij". <sup>10</sup> Janiyari seetanujuanaa taraatia nojori miitiaquiaari Jerusalén tiacajiniani. Pueyacuara secojonaa jiyaniijianucuaari cua jiyatequiaari nojori cua miitianura. Naacuajitij, janiyari queraatia Jesuucua tiuuniaa riuniujuquiaari nujuatejojuajiniani. Nojori jaara puecoosaaquiaari ijuhuaj, janiyari jaarajaaja sequequiaarini: "Maniniacuaja, cuara puecoosaa". <sup>11</sup> Janiyari sequeyarucua naa miitiaquiaari Jesuucua tiuuniaa pueyani, nojori cua pishonura Jesuucua nojori tiuuniu.

'Janiyari naa miiquiaari nojorini puetunu cuarta Judiocuaca rerejojua tiacajiniaqueyajanaa canaa jiyajinia. Janiyari jiyanojua nojori juaajia quiquiaarini. Majaari quenaaja nojori cua niquiniu paniniu quijia. Naa cua miitiasocoriquiano nojoritij, janiyari nojori pajequiaari tucuacaanu tamonu jiyaca tiacajiniani.

*Pablo pahuatasacari taa Jesuucua tiuujiaara na quiquiaarini*

<sup>12</sup> 'Naacuajitij, janiyari juucua quiariquiaa Damasco tiacajiniani, pueyacuara secojonaa jiyaniijianucua jiyarosano. Janiyari tiriara quiariquiaani cua pajenura socua Jesuucua tiuuniaa pueya cua miitiasocoriquiano. <sup>13</sup> Nucuaco cua quiasacari jiyaniijia Agripanaa, janiyari jiyocuacaanuji nunusaaquiaarini, cuata quiojonaajuhua. Cuno shacantuucaari socua jiyanojua shacantuuca quiquiaari pananujiniji. Panacariiri jiyacari quiriquiaa. <sup>14</sup> Cuno shacantuuca jaara canaa nunuquiaari, canaari juhua quejoosaaquiaarini. Janiyari jiyacari tojiquiaari rupaani. Hebreo rupaajinia cua sequeriquiaari: "¿Saulo, Saulona! ¿Casaara puera quia miitiaa janiyani? Naa quia miishacaritij, quiaari tama quia cuaqueya miitiaajaacujua. Juhua juaajia pueyano, na juaashacari saaja mocoshoco patiyashiyari". <sup>15</sup> Janiyari na sequereeni: "¿Cantequia Jiyaniijiana?" Cua riuquareeri: "Janiyacujaari Jesuni, quiaa na miitiaquiaani. <sup>16</sup> Quia sanerohua. Janiyacuajaari quiocua muetareeni puetunu cua panishanojuanaa miijiaara cua jiyatenura quiajaniya, quiarijia janiyajiniji quia niquishano quia pahuatanurajuhua. Naajuhua, na nuhuaji janiyari quiocua muetanutaniuhuaani janiyajiniji quia niquishanorano pahuatana quia quiniuria. <sup>17</sup> Cua jiyarosacari quiajaniya, janiyari quiarta Judiocuacaacuaji quia cojuanutaniyacujani, tamonu jiyacajinijinio taucuacaacuajinio, tiquiyocua quia rucuanijosacari janiyajiniji quia poojotasacari. <sup>18</sup> Nojoriicua quia jiyaroyanijia, janiyajiniji nojori quia pahuatanura, maja juhua nimishitiu nojori quiniuria pueyaracaanu. Quia pahuatasacari janiyajiniji nojori, nojori jiuujiaari juhua cuhuatasaanutaniya cucua nojori tiuushacari. Nojori jaara naa miiri, Sesaacaari maja tari nojori jiyaniijia na quiniu quiniutaniya. Naa nojori tiuushacari cucuatej, Pueyasoori puetunu sesa nojori miishanojuanaa jiyanooniutaniya. Pueyasoori puetunu na saquiriojosano pueyatajanaa nojori rupuetootenutaniya, puetunu Pueyaso jiiitasanojinijijianaa nojori jiiitanurajuhua".

*Pablo pahuatasano Jesu tojijiaara na jatanujiniji*

<sup>19</sup> 'Naacuajitij jiyaniijia Agripanaa, janiya jaara naa tojiquiaari sequeshiyano jiyocuacaanujini, majaari cua tarijionu quiquiaarinioj. <sup>20</sup> Janiyari jiyacari juhuacatecara Damasco tiacajinia Pueyaso rupaa Jesujiniji pahuatanu coteequiaarini, na nuhuaji Jerusalén tiacajinia, mariyata puetunu cuno Judea jiyajiniajanaanio. Maja saaja cuarta Judiocuaca cua pahuatanu quiquiaari Jesujiniji, janiyari taucuaca pahuataquiaarijuhuaj.

Nojori nacasuquiaarinijia cuaara sesa nojori miishano carteera, Pueyasooqua nojori tacatonuhuara nojori jiuujia. Janiyari nojori sequequiaarijuhuaj, cuaara saaja maninia miijiaa quiiria, na niishishaanura Pueyasoori seetanujuanaa nojori jataniquianu. <sup>21</sup> Naa cua pohuatanuucuatej jiyaniijianaa, cuarta Judiocuacaari cua quiatucanu Pueyaso Sec-  
 ojonuujua tiajinia. Cua motunu paniquianuuri. <sup>22-23</sup> Naajaa, Pueyaso cumaquishacari janiya, majaari cua tarinitianu quiquiaa puetunu pueyajanaa cua pohuatanu Pueyaso-  
 jiniji; poonijionuutesano pueya, tojishano pueyano. Majaari tama cua niishishanojuaja  
 cua pohuatanu quiquiaa. Janiyari pueya niishitiojoquiaani taa tariucuacaanu Pueyaso  
 sequesano caminiujiuniaa naajionuutaquiaaricujani, naajuhuj, taa Moisés naajio-  
 tasano quiya tariucuacaanu Pueyaso Rupaajiniacuajani. Nojori naajionuutasanoori  
 seetanujuanaa. Naa sequeyari:

“Pueyaso Jiyarosocoriquianoori naquiya miishaanutaniya. Na cusonu nuhuaji, no-  
 juajaari coteenu samiitariquianohua. Jaara samiitiarohua, nojuajiniji pohu-  
 atasanoori puetunu pueyapuejanaa cuhuatanutaniya. Naacuajitij, nojoriiri ni-  
 ishiniutianiya nojori jaara nocua tiuuri, nojoriiri samiitiaconutaniuhuajuhujaj;  
 Judiocuaca, taucucanio”.

*Pablo tiuutiniu panishacari jiyaniijia Agripa Jesuucua juucua*

<sup>24</sup> Pablo jaara naa sequequiaari tama nocuaji na tacusacaritij, camarnu Festoori  
 nacaquiaari:

—¿Taa quia miyani Pablonaa? ¿Quia mueyocuaquui seseree puera quia niishiniuucua!

<sup>25</sup> Pabloori na riucuaquiaari saaja:

—Maja cua paatenu, camarnu Festonaa. Cua sequesanoori seetanujuanaa, maja cuara-  
 cashiniu. <sup>26</sup> Jiyaniijia Agripaari puetunu cua sequesanojiniji niishiyajuhuj. Cunora  
 majaari cua puerenu na niqiuara pocuanu. Nojuaja naasucuaari tarijia tosaquiaaricujaja  
 Jesujiniji, Jesuucua tiuniaa pueya miishanojinijijuhuj. Puetunu canaa miishano-  
 juanaari maja jiyasohujaja na miishaanu quiquiaa. <sup>27</sup> Jiyaniijia Agripaanaa, ¿quiaate  
 tariucuacaanu Pueyaso sequesano caminiujiuniaa naajionuutasanoocua tiuyajuhujaj?  
 Quiaacuajaari nocua tiuya. ¿Naatejaaratej?

<sup>28</sup> Jiyaniijia Agripaari na sequequiaari:

—¿Quiaateeri ritia cua jiyatenu paniya Jesuucua tiuuniara?

<sup>29</sup> Pabloori na riucuaquiaari:

—Naajaa, ritia, na nuhuaji soj, taa quia paniyacuajani. Pueyaso maara seetanujuanaa  
 naara quia jiyatere taa quia sequeyacuajani; maja saaja quiajaniya, mariyata puetunu  
 pueyajanaa niya cua tojitiaani, juhua janiya nia quiniuriajuhuaj. Maja naatej, taa  
 cumayocuata moronucua cua nujuatashuyanijia.

<sup>30</sup> Jiyacaritij, jiyaniijia Agripaari sanequee, camarnu Festojuhuj, Berenicenio,  
 puetunu cuniqui nojoritia cajitiuniaa pueyano. <sup>31</sup> Nojoriiri cuniquiji tamaqui pacu-  
 taquiaari jiyareta nojori pocoojonura Pablojiniji. Tama nojoriiri sequetooquiaari:

—Cuno pueyanoqui seetanujuanaa maja sesa na miiniu quiquianu na mosaanura, maja  
 quenaaja na nujuatesaanurajuhuj.

<sup>32</sup> Jiyaniijia Agripaari camarnu Festo sequequiaari:

—Paa maara cuno pueyano cartereni nojuaja jaara quia sequeyaquiquianu pa jiyani-  
 ijjiaacua quia jiyaronura nojuaja.

## 27

*Roma tiacajiniara Pablo jiyarosaanujiniji pohuatasano. Nio naajiona Lucasri nata quiriquiaa  
 na cojiriquiano*

<sup>1</sup> Camarucua jaara sequequiaari canaa buquejinia jiyarosaanutaniya Italia jiyajiniani,  
 Pabloori jiyacari narta quioosano pueyata cojiritiasaaquiaari niqutionu soldadohua  
 capitán. Cuno capitán sesaari quiquiaari Julio. Na soldadohua maanuuri seso-  
 josaaquiaari “Augusto”. <sup>2</sup> Jiyacaritij, Adramitio tiacajiniji buqueeri quera rupare-  
 tariquiaa, Asia jiya tiacajinia shiiniuquitiariquiano. Canaari cuno buquejinia jaare-  
 taquiaarini. Canaata quiriquiaajaariuhua Aristarco. Nojuajaari Macedonia jiyajinia

Tesalónica tiacajinijinio pueyano quijia. <sup>3</sup> Canaa quianu nuhuaji Cesareya tiaca tacatajajiniji, canaari tariqui tiuquishiiquiaari Sidón tiaca tacatajajiniani. Capitán Julioori jiyacari cuniqui maninia miiquiaari Pablo. Nojuajaari Pablo tarinitiaquiaari cuaara tacaara na rupuenaa pueyacua, nojori na saruhuatanura Sidón tiacajinia, naajuhuaaj, na rupuenaa niqutionura puetunu Pablo panishanojuanaanio. <sup>4</sup> Canaa jaara jaaretaquiaari Sidón tiacajinijini, canaari canaa muenecara niquimiaa Chipre jiya tucuaatiajani. Paratuuri buque nacaacoji piyarojoriquiaa saaja. <sup>5</sup> Canaari Sidón tiacajiniji niuti-  
 aquiaari Cilicia jiyacuani, Panfilia jiyacuano. Canaari na shuriuquiumia jaaretamaani. Canaari Mira tiacajinia tiuutiaseeni, Licia jiyajinia.

<sup>6</sup> Capitánri cuniqui riuriataquiaari Alejandría tiacajinijinio buque. Italia jiyajinia quiariquiaari. Naaratej, canaa tacanitiaquiaari cuno buquejinaari, tii canaa quianura saniniuujia. <sup>7</sup> Canaari camueenujuquiaarini, puera jacaria canaa jaaretanuucua. Naa canaa tarishiniuucuatej, canaari socua tiuquishiiquiaari Gnido tiaca taquijiriani. Paratuuri saa canaa patariquiaajaa. Naacuajitij, canaari Salmón jiya tucuaatiajanijoyua shuriucuaratamaani. Canaari Creta jiya tucuaatiaja camarucutamaajaaniuhuaaj. <sup>8</sup> Naa puera canaa tarishiniuucua canaa jaaretasacari Creta jiya shuriuquiumiatej, canaari socua tiuquishiiquiaari pueya jiyaniquishano “Tacataja Maniniuujiniani”. Cunoori Lasea tiaca shuriucua quiya.

<sup>9</sup> Canaari puera tarishiiquiaari tarini. Judiocuaca miaquenuyaquiniu juucaari tari shocoquiaari. Jiyacaritij, shoniniacu caminiajajiniaari puereeta quijia tari buqueta jaaretanura. Pabloori juucua sequequiaari:

<sup>10</sup> —Camarucuaanaa, janiya niishiyani paari cocuaatia miiniutianiyani. Paa jaara socua jaaretaareni, pa buqueeri jiaquetanutaniya socua. Pa pasano casamiiri niitiiniutianiya. Paa naasucuaari cusonuunutanijajuhuaaj. ¿Casaatejaj pa toyani?

<sup>11</sup> Pablo jaara naa sequequiaaritij, majaari buque jiyatana capitán tojiniu quiquiaarinioj. Saaja buque camarujuaanaa tojiquiaariiri, buque capitánio. <sup>12</sup> Cuno tacatajajiniji canaa tii tiutiariquiaani, majaari maninia quiquiaari shuniya canaa tajitiniuria tii. Nocuaji, puetunu pueyajanaari sequetuquiaari:

—¡Niiquiji pa quiaarej! Fenice tiacajinia pa quishii shuniyacujaji.

Cuno Fenice tiaca tacatajaari pananu muetasamaji quiquiaari, cuno Creta jiya tucuaatiajaacuaja.

*Shoniniacu caminiajajinia paratu piyarojosacari jiyanohua nojori*

<sup>13</sup> Jiyacaritij, paratuuri jacaria piyarojonu coteequiaari pananu shuucujaji, canaa muenecarajiniji. Naaratej, nojoriiri sequetuquiaari:

—¡Pa naatacuajaqui niiquiji quianu!

Canaari cuniquiji ruparetaquiaarini. Creta jiya tucuaatiaja shuriuquiumia jaaretaareeri. <sup>14</sup> Na jaaretasacari shiitianiyojua, paratuuri canashiyaquiji jiyanohua piyarojoriquiaari buque. Cuno paratu sesaari quijia “Noreste”. <sup>15</sup> Paratuuri buque capotariquiaa na shuucujajiria saaja. Naaratej, majaari canaa naata jaaretanu quiriquiaa paratu piyarojosacoji. Paratuuri saa canaa patariquiaajaa. Nocuaji, canaari buque tarinitiaquiaarini paratu cuaara na capotaara tamajaaja. <sup>16</sup> Paratuuri canaa capotaquiaari tamonu jiya tucuaatiaja tamajiria. Cuno jiya tucuaatiaja sesaari quiquiaari Cauda. Majaari puera paratu piyarojonu quiriquiaa tii. Canaa rishano boteniyojuaari buque pajamaji jaasutariquiaa. Canaari jiyanohua poonijioquiaari cuniquini, canaa tacaniniuhuaa buque cacojiria cuno boteniyojua. <sup>17</sup> Bote tacanishaanu nuhuaji, canaari buque cuaqueya morojoquiaarini na cumaquiniuria na jiaqueyaquiniuucujaji. Pueyari na puerenuta sequetuquiaari:

—¡Paratuuri pa capotanutaniya jaaquijajiniara! ¡Paari tii riitianutaniyani!

Cuno canaa pueresano jaaquiani, na sesa quiquiaari Sirte. Nocuaji, nojoriiri buque toqueya roshinitiaquiaari. Paratuuri saaja capotaquiaari buque. <sup>18</sup> Jaara juhuaquequiaari, paratuuri saaja jiyanohua piyarojoriquiaajaa. Naaratej, nojoriiri buque pasano casami quejoonu coteequiaari moojinia. <sup>19</sup> Canaa camueenujusacari jiuujianaraca juuca naquiya canaa miishacari, canaari buque casamijanaa quejooquiaari socuani, buque namuenura

quenaaja. <sup>20</sup> Tari canaa shocojoquiaariiri queraatia juuca. Majaari quenaaja canaa niquniu quiquiaari pananu, riyanio. Paratu piyarojosacari canaacua, mohuacaari socua jiyanohua cajiniuucuaquiaari canaacua. Nocuaji, canaari niishiriojoriquiaani canaari quiarjia cusonuunutaniyani.

<sup>21</sup> Majaari tojetaarucujanaa quenaaja canaa miaquenu quiquiaari pueyaracaanu. Pabloori jiyacari nujuaquiaari canaata quiniaa tajiniji. Naa nojori sequequiaariiri:

—Camarucuaanaa, niaa jaara tojiquianu quenaaja cua sequesano, maja pa ruparetanura Creta jiya tucuaatiajajiniji, paatuma naa miya naquiyan. <sup>22</sup> Naajaa, nioojia nia cumaquiri. Maja quenaaja niquiriyatu pajaniyajinijinio cusonu quiniutianiya. Pa buque cutaraari juhua rapitiasaanutaniya puetunujuanaa. <sup>23</sup> Janiyari quiarjia cua maquenujinia cua Jiyaniijia Pueyaso seru niquirii cua shuriucua nujuaanoni. Janiyari cuno Pueyaso tojjijani. Janiyacuajaari na pueyanoni. <sup>24</sup> Pueyaso seruuri cua sequeree: “Majaari puerenu Pablonaa. Quiaacuajaari jiyaniijajanaa Augustoocua tiuquiniutianiya Roma tiacajinia. Quiaari na tacoji nujuanutaniya quia pocuanura. Naajuhuj, Pueyasoori quia secojosano tojiriucuaa. Naaratej, puetunu quiata quiniaajanaari quiata rishiniutianiyajuhuj”.

<sup>25</sup> Naacuajitij camarucuaanaa, nioojia nia cumaquiri. Janiyacuajaari seetanujuanaa niishiyani, naa quiniutianiyari taa Pueyaso seru sequeree janiyacujani. <sup>26</sup> Naajaa, paari tamonu jiya tucuaatijaacua juhua niojosaanutaniyani.

Pabloori naa canaa cumanijiaquiaari.

<sup>27</sup> Pueyaracaanu canaa jaaretasacari shoniniacu caminiajinia, caapiqui semaanaari tari canaa shocoquiaari. Tamonu niucua canaa jaaretasacari, canaari Adriaajinia quiriquiaa tarini. Pueyari cuno shoniniacu caminia jiuujiajinia sesojoquiaari Adria. Paratuuri canaa niyacuneetetariquiaa jiyareta. Jaara shiyaqueya quiriquiaa cuno niucua, buque jiniacuma poonijionaari niishiquiaari canaari tari jiyacua catecanoyani. <sup>28</sup> Buque jiniacuma poonijionaari jiya shanacuquiaari, na niishiniuria queroniti quiriquiaajaa. Na shanacutusacari, saaja treinta y seis metro queroni quiriquiaari. Jaara socua na tacoji shanacutuquiaariuhua, saaja veintisiete metro queroni quiriquiaari. <sup>29</sup> Nojoriiri puerequiaari buque naasucuaari shoniniacu caminia casaqueyaji pojotujua saicua cutedanutaniya. Nocuaji, buque pajamaji sohuaneyocuata morojotasano cuatro niajaaca casaa quejootuquiaariiri, buque nujuatanura pootia. Nojoriiri cuniquijia na puerenuta sashiquiaari cuara juhuaqueera. <sup>30</sup> Jiyacaritij, buquejinia poonijionaa pueyari juucua cuno niucuaa jiyasohuaja mashiyocuatunu paniriquiaa buquejiniji. Naaratej, nojoriiri buque nacaacoci sapojonu tinijiotariquiaa niajaaca casaa moojinia. Jiyasohuaja roshini-tiuriquiaa jiyocuaaanu tacanishano boteeri, tii na mashiyocuatunura. <sup>31</sup> Pabloori jiyacari na jiyatana capitán toquiaari, na soldadohuanio. Naa nojori sequequiaariiri:

—Cuno pojori jaara niya juhuaqueyaquimia pata, niaari cusonuuriquiano.

<sup>32</sup> Soldadohuari ritia jiyocuaaanu tunusano bote neyocua jiyatajotaquiaari. Moojinia na tinituriiri. Paratuuri na piyarojoquiaari tamoco nojorijiniji.

<sup>33</sup> Juhuaquenu panishacari, Pabloori puetunu buquejinia quiniaajanaa sequequiaari cuara quenaaja miaquenuura. Naa nojori sequequiaariiri:

—Tari nia shocojiyari catorce juuca pueyaracaanu nia sutesacari. Majaari nia miacquenu quiquiaajuhuj. <sup>34</sup> Quiarjia nia miacquerecuara, nia cuaqueya nia cumaquitajara quenaaja. Majaari quenaaja niquiriyatu niajanijajinijinio cusonu quiniutianiya quiarjia.

<sup>35</sup> Naa na sequenu nuhuajitij, Pabloori pan riquiaari. Na miacquayaquishacarjia, coteenu Pueyaso secojoree puetunu nata quiniaa niquiarajanaari. Na nuhuaji miacquerohuari. <sup>36</sup> Tamasaca jaara naa niquiquiaari Pablotej, puetunu nojorijianaari noojia cajitiquiaari. Pan satureejaariuhuj. <sup>37</sup> Cuno buquejinia, puetunu canaajanaari quiquiaarini dosciento setenta y seis pueya. <sup>38</sup> Puetunu pueyajanaa jaara tooquioquiaari, na nuhuaji trigo quejootuquiaari moojiniaari, buque namuenura quenaaja.

*Buque coquesacari caminiajinia*



<sup>39</sup> Jaara juhuaquequiaari, buquejinia poonijionaa pueyari maja na niishiniu quiquiaari teyano jiya tucuaatiajatejaara cunoni, nojori na niquiriquiaani. Nojoriiri cuno jiya tucuaatiajaacua niquiriquiaari puereetuuca surocohua. Jaaquiaari puetunu na shocujanaa quiriqiaa. Naacuajitij, nojoriiri sequetuquiaari:

—Buque pa saniri shiitianiniu cuno surocohua.

<sup>40</sup> Buquejinia poonijionaa pueyari niajaaca sohuaneyocua jiyatajotaquiaari. Cuno niajaacaari caminia jiuujiajinia jateequiaari cuniquijia. Nojoriiri buque niqiniijiotetajaa roshinitiaquiaarijuhuaj, buque tactajara. Buque nacaacuaji teeja toque tacanitiatureejaarihuaj. Buqueeri canujutaaree jaaquiajiniara, paratu piyarojosano. <sup>41</sup> Buqueeri saacariji jaaquiajinia riitaseequiaari, caminia cajiniuucasacari mohuaca paatishano jaaquiajinia. Buque nacaari jiyanohua tiuquishii cumaatia jaaquiajinia. Majaari quenaaja na naata pooni quiriqiaa na matasaquiji. Na pajaari maa rapuequiaarijia moo cajiniuucasacari jiyanohua nocua. <sup>42</sup> Soldadohuari nojori jiyatasano quioosano pueya pueconu paniquiaari cuniquijia, nojori jyanishacari cuaconutaniya naasucua, mashiyocuatumaari. <sup>43</sup> Capitán cutaraari Pablo tiuquitiniu paniquiaari jiyaniijia Augustoocua. Naaratej, na soldadohua sequequiaariiri:

—¡Maja quioosano pueya puecootunu!

Cuno capitánri puetunu pueyajanaa sequequiaari:

—Cante cuacojua cutarani, nojori cuaara cuacoora coteenu, jaaquiajinia rupaatiushicuaari. <sup>44</sup> Cuaashijianucua saniniuujia cuaara buque jiniacumaji suruhuatuneeacaacua jacamatuura na cuatajara. Tamasaca cuaara buque neecaacua jacamatuurajuhuj.

Naa miitiquiaariiri. Puetunu pueyajanaari jaaquiajinia rupaatiushiiquiaari.

## 28

### *Pablo quishacari Malta jiya tucuaatiajajinia*

<sup>1</sup> Puereeta canaa cuaconu nuhuaji shoniacu caminiajinia, canaari namitia puetunujuana maninia tacataseequiaari cuno jiya tucuaatiajaacuani. Canaari jiyacari shusha niishiquiaarini, cuno jiya tucuaatiaja sesaari quiquiaari Malta. <sup>2</sup> Cuno jiya tucuaatiajaacua quijia taucuacaari maninia canaacua jiyanoquiaari. Shiniquiaari quiriqiaa. Maruri niriqiaajuhuj. Naa canaa shiniquiosacaritij, taucuacaari canaara noshitiquiaari puereetuuca mani. Na nuhuaji canaa sequetureeri:

—Miji. Nia jitiushii.

<sup>3</sup> Pabloori naanacucua reratejoriquiaajuhuj. Manijinia na quejoriquiaari. Jiyacaritij, soconuquiri maniicujaji mashiriquiaa juucua. Pablo juaashiquia saariiri. <sup>4</sup> Cuno jiya tucuaatiajaacua quijia pueyari soconu niquiriquiaari Pablo juaashiquiaacuaji sohuataano. Jaara naa niqitiquiaaritij, tama nojoriijaarijia sequetooquiaari:

—¡Nio pueyano naasucuaari pueyano moju! Cocuaatia miirii juucua shoniacu caminiajinia na cuasacari buquejinijiiri. Pueyasoori quiarijia saniniuujia cunora soconu na sajitirii na cusonura.

<sup>5</sup> Pabloori saaja manijinia majiriataree soconu. Majaari quenaaja na sajiyashi noonu quirii. <sup>6</sup> Puetunu pueyajanaari na sashiriquiaa, taacari na poreenutaniyani. Na sashituriquiaajarihuaj na jyanitiushacari canashiyaquiji cusonutaniya naasucua. Naa pueyaracaanu na sashitiushacari juucuatej, nojoriiri socua tamaatia niishirojonuquiaari. Nojoriiri Pablojiniji sequetooquiaari:

—¡Cuno pueyano naasucuaari pueyasojuhuanajaj!

<sup>7</sup> Cuniqui canaa quishaquini, canaari tamonu pueyano cuhuariquia shuriucua quiriqiaani. Na camaruuri cuno Malta jiya tucuaatiaja camarnu quiquiaari. Na sesaari Publio quijia, maninia pueyano. Nojujaari canaa masuquiaari na tiacora. Canaa mianuutequiaari maninia tiiri. Canaari jiuujianaraca juuca na tiajinia camuequiaarini. <sup>8</sup> Cuno camarnu queeri jiyacari cusosu matariqiaa. Jyanohua nasecaari quiriqiaa. Coriyacau rurequeriquiaajarihuaj, na jiniacuma noonunio. Pabloori nocua tiuquiquiaari na matasaqui. Pueyaso secojoree nocuaraari. Na secojosacari, nocua niaquiaari na juaashiquiaari. Pueyanoori naatarohua. <sup>9</sup> Cuno jiya tucuaatiajaacua

cusosuhua jaara niishiquiaari naa Pablo naatanishanocuaa cuno pueyanotej, nojoriiri nijioquiaarijuhuaj. Pabloori puetunujuanaa na naatanijioquiaari. <sup>10</sup> Naa Pablo miiniuucuatej, cuno pueyari na jiitiasano casamijiniji canaa niqutiojoquiaari nareja. Na nuhuaji, canaa jaara quiaquiaari cuniquiji tamonu buquejiniani, nojoriiri canaa jiyatajara canaa panishano niqutiojotuchiaari narejajuhuj.

*Pablo tiuquishacari Roma tiacajinia*

<sup>11</sup> Canaa sashishacari shuniya cuaara tajiiria, jiuujianaraca racaari canaa shocojoquiaari Malta jiya tucuaatiajaacua canaa quishacari. Alejandría tiacajinijinio buqueeri tii nuuatariquiaajuhuj. Shuniyacuaji tiutiaquiaari tiiquiri. Cuno buque nacatuuri juhua nojori pueyasohua Cástor nacara quejasano quiquiaari, juhua Pólux nacanio. Canaari cuno buquejinia quiojoquiaari cuniquijini. <sup>12</sup> Canaari Siracusa tiaca tacatajajiniji tiutiaseequiaarini. Canaari jiuujianaraca juuca camueenujusee tiini. Siracusa tiacaari Sicilia jiya tucuaatiajaacua. <sup>13</sup> Cuniquiji canaa quiasacari, canaari cuno jiya tucuaatiaja shuriucuataareeni. Canaari Regio tiacajinia tiuquishiini. Tariqui, paratuuri maninia piyarojoriquiaa buque nijiniji. Canaari cunora tama tariqui tiuquishii Puteoli tiacajiniani. Canaari quiniqui tacatasee puetunujuanaani. <sup>14</sup> Puteoli tiacajinia Jesuucua tiuuniaa pueyari canaa masuuquiaari na tijiniara. Canaa sequetuchiaariiri:

—¡Maja canaa shoconu pueyanaa! Canaa tijinia nia camueenujumajaara.

Naaratej, canaari siete juuca nojoritia camueenujuquiaarini. Na nuhuaji, canaari cuniquiji Roma tiacajiniara neteja nucuaco quiaquiaarini. <sup>15</sup> Roma tiacajinijinio Jesuucua tiuuniaa pueya jaara niishiquiaari canaa tari nucuamaji niyani, nojoriiri nucuacoji canaa naacunuucua nijioquiaari. Coteenu nijionaari canaa naacuquiaari Foro de Apio tiacajinia. Tamasacaari saniniuujia canaa naacuquiaari Tres Tabernas jyanishano tiacajinia. Pablo jaara narta Jesuucua tiuuniaa niqiquiaari, noojia cumaquiquiaariiri. Naaratej, Pueyaso sequequiaariiri:

—¡Paacarasho cua Pueyasonaa!

<sup>16</sup> Canaa jaara tiuquiquiaari Roma tiacajiniani, Pablo jiyatana capitánri puetunu quioosano pueyajanaa niqutiojoquiaari Roma tiacajinia quioosano cojuanaa camarnu. Pabloori saniniuujia tarinitiasaaquiaari tamonu tijinia na quiniuria tamajaaja, tamonu soldadota na cojuariquiano.

*Pablo pohuatasacari Jesujiniji Roma tiacajinia*

<sup>17</sup> Jiuujianaraca juuca na quishacari tari Roma tiacajinia, Pabloori puetunu tii quijiaca narta Judiocuaca camarucujanaa masuuquiaari, nata nojori rerejonura. Cuno pueya jaara rerejoquiaari, Pabloori nojori sequequiaari:

—Cua tapueyocucanaa, majaari cua miiniu quiquiaari sesa parta Judiocuacani. Majaari cua numueejushiniu quiquiaa pa supuetanaa nishitiojosanojuhuaj. Naajaa, pueyari cua quiatucanu Jerusalén tiacajinia. Cua niqutiojutucanu Romano pueyari, cua morosaanura. <sup>18</sup> Nojori nequesoreenu nuhuaji janiya, cua cartetunu paniquianu juucuaari, nojori niishishacari maja sesa cua miiniu quiquiaari cua mosaanura. <sup>19</sup> Romano camarucua jaara cua cartenu paniquianu, parta Judiocuacaari saaja juaaquioree. Janiyari jiyamitia sequecanuni, cuaara cua jiyarotuura jiyaniijajanaacua niya Roma tiacajiniani, Césarjanaa nequesoreenura janiya. Naajaa, majaari cua saquiriojotanu quiniutianiya saniniuujia nojoriicuaara, cuarta Judiocuaca nojori quiniuucua. <sup>20</sup> Janiyari cunora nia niqiniu paniriquiaani, cua pohuatanura nijaniya taa puetunujuanaa parta Israel pueya niishiyacuajani, nijaniyajuhuj; macunucuaari samiitianijiosaanutaniuhua. Janiyari cunora cumayocuata moronucua niya quiyani.

<sup>21</sup> Judiocuaca camarucuaari Pablo riucuaquiaari:

—Maja quenaaja canaa masetanu quiquianu Judea jiyajiniji naajionee, canaa pohuataaanura quiajanijajiniji. Cuniquijinio parta Judiocuacaari niya tiuquijiocanujuhuj. Naajaa, nojoriiri maja quenaaja sesa na pohuatanuunu quiquianu canaa quiajanijajiniji. <sup>22</sup> Canaari saaja niishiyani, puetunu tiqiyocujanaa sesacasaaquiaaquiniaari Jesujiniji pohuatasano. Quiaa mariqui cunojiniji canaa pohuatare, canaa niishiniuria socua.

<sup>23</sup> Jiyacaritij, Judiocuacaari Pablo sequetuquiaari:  
—Canaacua tamonu juuca quia tojiquiuiquiani.

Na nuhuaji, nojoriiri na sequetusano juuca nijioquiaari. Pablo quijia tiajinia mishi-tiuquiaariiri. Pabloori nojori niquiara pohuatanu coteequiaari tariquicuaji. Naa niniya-reejaari. Juucua nojori niishitiojoquiaariiri, Jesuuri seetanujuanaa Pueyaso Jiyarosano quiquiaari. Nojori sequequiaarijiaariuhuj taa Pueyaso jiitiaa na jiyanooshano pueyani. Naajuhuj, tariucuacaanu Moisés naajiotasano Jesujiniji niishitiojoquiaariiri, Pueyaso sequesano caminiujiuniaa naajionuutasanonio. <sup>24</sup> Noojiaqueya nojorijinijiniori Pablo sequesano tojiquiaari cutara. Tamasacaari saaja na cuaracashitiquiaari saniniuujia. <sup>25</sup> Nojorijinijinio jaara Pablo niishitiojosano tojiquiaari cutara, tamasaari nojoritia juayonuutatanu coteequiaari. Naa na juayonuutasacaritij, tohuareetaquiaariiri na quiojonuhuara. Pabloori jiyacari nojori sequequiaari:

—Pueyaso Sohuanuquiiri seetanujuanaa tariucuacaanu Pueyaso sequenu panishano caminiujiunia Isaiás pohuataniquiaari parta Israel pueya niquiara, jaara na sequequiaari: <sup>26</sup> “Quia quiaare cuno pueyacua. Quiocua nojori sequesee: ‘Niaari cua rupaa tojiniutianiya. Majaari nia niishiniu quiniutianiya casaa nia tojiyani. Niaari cua cumaacata cua miishano niquiniutianiyajuhuj. Majaari quenaaja nia niishiniu quiniutianiya’. <sup>27</sup> Cuno pueyari noojia cumantaree maja na tojitianura cua rupaa. Naaratej, saaja sesa tojitiaquiaari. Nojori namijiaari mishiquiojosanojuhuj, na niquitiaaquiniucuaji, maja na numaata na tojitianura, nojiata na niishi-tiuyaquiniurianio. Naa jiyatecanu nojorinjia, maja na niishitiuniuria janiya, mariqui cucua tacateturohuari, nojori cua naarajonura”.

<sup>28</sup> Pueyanaa, nia niishiri. Naa jaara ruuretare cua pohuatasano Jesujiniji, taucuacaari saniniuujia pohuatasaanutaniyacujua, taa Pueyaso jiyanooni paniya pueyani, maninia na jitianura nojori. Taucuacaari na tojitianutaniya cutara.

<sup>29</sup> Pablo jaara naa sequequiaari nojoritij, Judiocuacaari quiojyarahua. Tama nojorijiaarijia juayonuutaarohua na quiojosacariuhua.

<sup>30</sup> Caapiqui marijiaari Pablo shocojoquiaari rupaquijia na masano tiajinia moronucua na quishacari Roma tiacajinia. Puetunu pueyajanaa jaara nocua niquiaari na niquiniuria, nojuajaari maninia na masequiaari na quijia tiajinia. <sup>31</sup> Majaari jiyasohujia na pohuatanu quijia taa Pueyaso jiitiaa na jiyanooshano pueyani. Jiyaniijia Jesujiniji niishitiojojuajaariuhuj. Majaari na sanaajasaanu quijia.

## PABLO NAAJIONEE ROMA TIACAJINIA QUINIAA PUEYASO PUEYACUARA

### *Pablo saruhuatasacari Pueyaso pueya*

<sup>1</sup> Janiyari Pabloni, Jesucristo seru. Nojuajaari cua saquiriojoquiaari saa neraja cua poonijionura. Nojuajaari cua jiyatequiaari na jiyaramiquishano cua quiniuria, seetanu rupaajanaa cua pohuatanura pueya niquiara, Pueyaso pueyara nojori jatanishaanura. Janiyari cunora nio naajioteya niaacuarani.

<sup>2</sup> Pueyasocujaari tariucuacaanu na sequenu panishano caminiujiunaa pueya niishitiquiaari, nojori naajiotanura Pueyaso Rupaa, pa niishiniuria taa Neyanu na miiniutianiya pocuarani. <sup>3</sup> Pueyano na quiniuria mijiria, Neyanu Jesucristoori rasaaquiaari. Na supuetanaari quiquiaari Israel pueya jiyaniijia David. <sup>4</sup> Jesu sohuanuuri saniniuujia pueyaracaanu Pueyaso Niyanujuhanajaj. Paa cutaraari quiari naataja niishitishaaquiaarini, nojuajaari seetanujanaa Pueyaso Niyanu. Paari quiarjia na niishiya seetanujanaa cutarani, Pueyaso Sohuanu samiitianiniuucua nojuaja macujiniji. Nojuajaari tari jiyatesaaquiaari Jiyaniijiajanaa na quiniuria, puetunu cumaacajanaa na jiitianurajuhuj. Nojuajaari pa Jiyaniijia Jesucristo.

<sup>5</sup> Nocua canaa tiuuniuucua, Pueyasoori canaa jiyatequiaari na jiyaramiquishano pueya canaa quiniuria, Neyanujiniji canaa pohuatanura. Canaa cumaquiriiri puetunu jiyacajinijinio pueyajanaa canaa tiuutiniuria Neyanuucua, na tojitiajaca nojori quiniuria. <sup>6</sup> Niajanijuhuj, Roma tiacajinia quiniaa Pueyaso pueyanaa, Pueyasoori nia saquiriojoquiaari Jesucristo pueya nia quiniurajuhuj. <sup>7</sup> Puetunu Pueyaso panishano pueyajanaa, canapue Pueyaso saquiriojoquiaari saa maninija nojori quiniuriacuajani, janiyari niaacuara naajioteyani. Pa Que Pueyaso, pa Jiyaniijia Jesucristojuhuj, nojori cuara cumaquiiria nijaniya, maninia na tojijaca nia quiniuria. Naajuhuj, nojori cuara nioojiaca cajitiiria shuquiriaatia nia quiniuria pueyaracaanu.

### *Pablo naquerejosacari Roma tiacajiniara*

<sup>8</sup> Coteenu nia sequenu panianijia, janiyari nia timitiaquiaani, maninia nijanijajiniji pueya pohuatanuucua puetunu jiyacajinijanaa. Nojoriiri pohuataquiaa, niaanaari maninia tiuujaca pa Jiyaniijia Jesucristoocua. Naa Jesucristo miiniuucua nijanijatej, janiyari cua Pueyaso sequequiaani: “¡Paacarasho! Quiaari jiyanohea maninia”. <sup>9</sup> Janiyari pueyaracaanu cua Pueyasora poonijioquiaani puetunu cua cumaacatajanaa, Neyanujiniji cua pohuatanura. Pueyasocujaari niishiya, pueyaracaanu cua secojosacari nojuaja, janiyari niaacuara secojoquiaajuhuj. <sup>10</sup> Naa cua secojosacari nojuajatej, janiyari na sequequiaani cuara cua tiuquitiiria niaacua, rupaquijia cua quiniuria niaata, nojuaja jaara naa paniri. <sup>11</sup> Janiyari nia niquiniuucua jiaatiaani, cua cumaquiniuria socua nijaniya na Sohuanu cumaacata, socua jiyanohea Pueyasooocua tiuujaca nia quiniuria. <sup>12</sup> Majaari cua cumaquiniu paniniu saa nijanijaja. Janiyari paniani nia cumaquiniuria janiyajuhuj. Naacuajitij, mariyata pa tiuushacari Jesucristoocua, paari mariyata cumaquitiojonutaniyani.

<sup>13</sup> Cuarta Pueyaso muerasunaa, janiyari nia sequenu paniani nia niishiniuria, janiyari sequeyarucua niaacua naquerejoquiaa juucuanu. Majaari juhuanujuaja cua naata quianu niaacua. Janiyari Jesucristojiniji pohuatanu panija tii Roma tiacajiniani, tee nia quiyacuajani, cuno taucuaca tiuuniuria Jesuucujuhuj. Tamonu jiyacajinia taucuacaari tari Jesucristoocua tiuujaca quiyacuaa, cua pohuatanuucua Jesucristojiniji nojori niquiara. Janiyari naa miiniu panija nia tajinijuhuj. <sup>14</sup> Cua Jiyaniijiaari cua jiyatequiaari na rupaa pohuatanara. Janiyari cunora na rupaa pohuataquiaani. Majaari na tojiyashijia cua quiniu paniniu. Naaratej, janiya cuara pohuataara na rupaa puereetuuca tiacajinia pueya niquiara, mariyata tiquiyocua quijaca pueya niquiarajuhuj. Janiya cuara na rupaa pohuataara niishijaca pueya, niishiyashijaca pueyano. <sup>15</sup> Janiyari cunora quianu panija Roma tiacajiniani, cua pohuatanura Jesucristojiniji nijaniya.

*Pueyaso Rupaari cumaacaraca na jataniniuria pajaniya*

<sup>16</sup> Maja cutaraari cua caririquiniu Jesucristojiniji cua pohuatanura. Jesucristo ru-paacuajaari Pueyaso cumaacaraca, pueya na jataniniuria Pueyaso muerasu nojori quini-uria, nocua nojori tiuushacari. Puetunu Jesuucua tiuuniaa pueyapuejanaari Pueyaso pueyara jatanishaanutaniya, taa Judiocuaca jatanishaaquiaa Pueyaso pueyaracuaani.

<sup>17</sup> Jesucristo pohuatasanojiniji paari niishiyani, Pueyasoori pa jiyanooquiaa sesa pa miishanojiniji, saaja Jesucristoocua pa tiuushacari. Saaja nocua pa tiuuniuucua, paari Pueyaso pueyara jatanishaaquiaani. Cunora, naa naajiotasano quiyacuajaari tariucua-caanu Pueyaso Rupaajinia:

“Pueyaso jiyanooshano pueyanoori pueyaracaanu shuquiriaatia quijia quiniutianiya, saaja Pueyasooocua na tiuushacari”.

*Pueyasora, puetunu pueyajanaari sesa miijiaca*

<sup>18</sup> Pueyasoori jiyocuacaanuji na tojiyashijiaca pueya saniitioquiaa. Naa nojori na saniitiosacaritij, Pueyasoori nojori numootequiaa, nojuajaari puetunu na tojiyashijiaca pueyajanaa saniitionutaniya jiyanoohua na juaaniutia. Naa saniitiosaanutaniyajaari-uhuaaj, puetunu sesa miijiaca pueyajanaa. Naa sesa miijiaca pueya quishacaritij, nojoriiri Pueyasojiniji niishishano ruuretaquiaa saaja. <sup>19</sup> Nojori jaara Pueyaso niishiniuucua jiaatiariquia, nojori maara na niishirij. Pueyasocuaajaari tari nojori niishitiquiaari taamuecate nojuajani. Nojoricuajaari tari maninia nojuajiniji niishiya. <sup>20</sup> Majaari pa naata Pueyaso niquiniu pa namijiata, pa niishiniuria taamuecate nojuajani. Naa-jaaj, Pueyaso shipininiuucua jiya, maatia niishishiyacuajaari nojuajaari Pueyaso, pa niquishacari puetunu na shipinishanojuanaa. Na shipinishanojiniji niishishiyajaari-uhuaaj, majaari na cumaaca puequenu quiniutianiya. Pueyaracaanu quiriquianoori.

Naacuajitij, Pueyaso saniitionu panishacari na tojiyashijiaca pueya, nojoriiri maja na naata sequenu quiniutianiya Pueyaso: “Maja canaa niishiniu quijia quiajanijajiniji”.

<sup>21</sup> Nojoricuajaari Pueyaso niishijia najuhuanaj. Na niishijiaca nojori quishacari, nojoriiri saaja na rerequeteja. Nojoriiri na tojtiaaquiQUIAajuhuaaj. Pueyaso miiniuucua maninia pueyaracaanu nojori, nojoriiri maja quenaaja na sequetunu quijia: “Paacarasho Pueya-sonaa”. Tama nojorijiaarjia jiyanoohua cushitiquiaa sesa nojori niishiriojonuusacari najuhuanaj. Naa mosanucua nojori quishacaritij, nojori jiuujiaari juhua ninishiquiria quiquiaa. <sup>22</sup> Nojori jyanishacari nojori cutaraari seetanujanaa niishijiaca, naacuajitij nojoriiri socua niishiyashijiacara quiquiaa. <sup>23</sup> Nojoriiri Pueyaso shuqiritiaaquiQUIAa tama nojori shipinishano casaajaaja nojori shuqiritianura. Pa shipinia Pueyaso cutaraari jyanohua cumaacaraca, pueyaracaanu quijiajuhanaj. Nojoriiri Pueyaso niti shuqiritiaquiaa tama nojori shipinijosanojuaja. Cuno, nojori shipinijosano Pueyaso niti na shuqiritiasocoriquianoni, cunoori quiquiaa juhua shaajeja pueya niquishano, juhua jaacuatujuaca niquishanojuhuaaj, juhua nacujiniaaco canujuucuatujuaca niquis-hanojuhuaaj, juhua roshiyocuatujuaca niquishanonio.

<sup>24</sup> Naaratej, Pueyasoori nojori tarinitiaquiaa sacuaraatia casaa nojori miiniuria tama na cuaqueyatajaaja, taa nojori miiniu paniquiaacuajani. Nojoriiri socua jiyacatequiaa sesa miiniuria. Naacuajitij, pueyari tama na cuaqueyajaaja miiquiaa sesa, cararaatia nojori miitiosacari narta pueyanota. <sup>25</sup> Naa sesa miijiaca nojori quishacaritij, pueyari see-tanu casaajanaa Pueyasojiniji niishishano ruuretaquiaa, sapojonuunu nojori tojiniuria saniniuuja. Naaratej, pueyari Pueyaso shipinijosano casami shuqiritiaquiaa, saniya na Shipinia niti. Nojuajaari pa Pueyasojanaa cutara. Nojuaja cuara shuqiritiasaaria pueyaracaanu cutara.

<sup>26</sup> Pueya jaara Pueyaso cartequiaa, Pueyasoori nojori tarinitiaquiaajuhuaaj, cararaatia casaa nojori miiniuria, taa nojori jiaatiaquiaa miiniuriacuajani. Naacuajitij, maajipo-huari maja na caminiu paniniu quiquiaa. Saaja narta maajipohuata cararaatia casaa mi-iquiaari juhua canuu. <sup>27</sup> Naajuhuaaj, canuuri maajitia quiniu paniyaquiquiaa, sacuaraatia na jiaatiasacari narta canuucua. Canuuri jyanohua cararaatia miitiooquiaa. Naa nojori miiniuucuatej, nojoriiri tama na cuaqueyajaaja miitiaquiaa naquiya na miishaanura.

<sup>28</sup> Nojori niishiniu paniyaquiniuucua Pueyaso, Pueyasoori nojori tarinitiaquiaa nojori miiniuria tama nojori niishiriojosano sesajaaja. Nojoricuajaari niishiya, nojori miishanoori sesa. Naajaa, nojoriiri saaja na miijiaca quiquiaa, cararaatia miiniu niishiriojonuujuaca nojori quiniuucua. <sup>29</sup> Naacuajitij, nojoriiri puetunu tamaatia sesa miishanojuanaa miiniu niishijiaca. Jaara sesa miiri, timiquioyari. Nojoriiri nio miijiaca: puera casamiriaca quiniuucua jiaatiajaca. Sesa miiquiaari na panishano nojori jiitianura. Nojoriiri tamasaca pueya jiitiasano casamiicua jiaatiajaca. Nojoriiri pueya puecoojuaca. Nojoriiri pueya ruutaqueja. Nojoriiri na panishano casami nohuasenuujuaca jiyasohua. Nojoriiri narta pueya miitianu panijiaca. Rimiaacaturijiaariuhuj. <sup>30</sup> Nojoriiri sacuaraatia sequejovia narta pueya. Nojoriiri Pueyaso niquniu paniyashijiaca. Nojoriiri tamasaca soojeaca. Nojoriiri tama na cuaqueyajaaja jiyatequiaa juhua socua maninia pueyara tamasacajiniji. Nojoriiri najuhuana sequeja: “Janiya maninia miiijani”. Nojoriiri jiyanoohua niishijiaca, niishishoo sesa casaa na miiniuria. Nojoriiri na queya tojiyashijiaca. <sup>31</sup> Nojoriiri seetanjuanaa mosanucua Pueyaso na tojitiaaquiniuucua. Nojoriiri saaja tama na rupaajaaja jataja. Majaari na sequesano na miiniu. Nojoriiri narta pueya paniyashijiaca. Majaari nojori niishiniu jiyanooniu. Majaari nojori niishiniu taraajenu narta pueyacu. <sup>32</sup> Nojoricuajaari tariucuacaanu naa Pueyaso sequesano niishiya: “Cante naa sesa miijiacani, cuara puecoosaaria”. Naajaa, nojoriiri saaja sesa miiquiaa juhuajaniya. Majaari nojori quiniu shuquiriaatia saaja tama nojori miishacarijaaja sesa, nojoriiri shuquiriquiaajuhuj tamasaca jaara sesa miiri juhua nojori.

## 2

### *Pueyasoori sesa miijiaca saniitionutaniya sesa nojori miiniuucua*

<sup>1</sup> Naacuajitij pueyanaa, niaa jaara tamonuucua tonujujua quiriquia, majaari nia jyaniniu niaari sesa miyashijiaca cutara. Niaa jaara tamonuucua tonujure sesa na miishano, niaari tama niaacuarajaaja tonujiya naa sesa miiniu niishijiaca nia quishacarijuhuaj. <sup>2</sup> Paacuajaari niishiyani, Pueyasoori puetunu sesa miijiacajanaa saniitionutaniya, maninia na niishishacari nojori miiijosano. <sup>3</sup> Quiajaniya saniniuujia, quiarta pueyacuara tonujuanaa, majaari quenaaja quia jyaniniu quiaa saniitioy-aquishaanutaniya. Quiaari saniitiosaanutaniyajuhuj. Quiaacuajaari juhua nojori, sesa miiijajuhuj. <sup>4</sup> ¿Majateeri quia niishiniu, Pueyasocuajaari pueyaracaanu quia sashiquiaa juucua, quioojia quia tacatonuhua nocua? Naaratej, nojuajaari pueyaracaanu maninia quia miiquiaa. Quia rejeretaquiaajaariuhuj. ¿Quiaateeri jyaniquiaa Pueyasoori naa maninia quia miiquiaa, maninia quia quiniuucua na niqiuara? ¡Maja! <sup>5</sup> Quiaari quioojia tacatonu paniyaquiquiaa, sesa quia miishanojiniji quia taraajeyaquishacari. Cunora, quiaari puetunu sesa quia miishanojinijianaa saniitiosaanutaniya jiya puequesacari. Jiyacaritij niishishaanutaniyari, Pueyasoori seetanjuanaa maninia saniitiojua. <sup>6</sup> Pueyasoori puetunu pueyajanaa miiniutianiya taa nojori miishano quiquiaari mijiri-acuajani. <sup>7</sup> Naacuajitij, Pueyasoori maninia miijiaca jiyatenutaniya pueyaracaanu rishijiacara. Nojoriiri pueyaracaanu maninia miijiaca quiquiaari mijiria, Pueyaso timitiasano nojori quiniuria, shaajeyashijiaca nojori quiniuriajuhuaj. <sup>8</sup> Saniniuujia, Pueyasoori na tojiyashijiaca saniitionutaniya jyanohua na juaaniutia. Naa saniitiosaanutaniyajaariuhua noo pojori, canapute saaja sesa miiniu panijiaca quiquiaarini. <sup>9</sup> Puetunu sesa miijiaca pueyapuejanaari naquiya miishaanutaniya, taa Pueyaso tojiyashijiaca cuarta Judiocuaca miishaanutaniyacuaani. <sup>10</sup> Saniniuujia, Pueyasoori puetunu maninia miijiaca pueyapuejanaa miiniutianiya maninia, taa maninia miijiaca Judiocuaca miishaanutaniyacuaani. Pueyaso timitiasano pueya nojori quiniuucua, nojoriiri jyanohua shuquiriaatia quijiaca quiniutianiya pueyaracaanu. Naacuajitij, nojoriiri juhuajaniya quiniutianiya Pueyasota pueyaracaanu.

<sup>11</sup> Pueyasoori maja rimiajata na miiniu quiniutianiya taucuaca, Judiocuacanio. Puetunu maninia pueyajanaari maninia miishaanutaniya. Sesa pueyari saniitiosaanutaniyacujua. <sup>12</sup> Naacuajitij, pueya jaara Pueyaso rootasano Moisés niishiyashijiaca

quiriquia, naajaa, nojori jaara sesa miijiaca quiri, nojoriiri saniitiosocoriquiano. Naajuhuj, pueya jaara Pueyaso rootasano Moisés niishijiaca quiri quia, nojori jaara na tojiyashijiaca quiquiaarijuhuaj, nojoriiri cuno Moisés Naajioneejiniji nequesoreesaanutaniya na tojitiaaquinuucua. <sup>13</sup> Majaari nia jiyaniini niaari jiyanooshaanutaniya sesa nia miishanojiniji nareja najuhuana nia tojishacari Moisés Rootasano. Niaari jiyanooy-aquishaanutaniya maja seetanujuanaa na tojijiaca nia quiniuucua. Noo pojori cutaraari jiyanooshaanutaniya, canapute seetanujuanaa na tojjiacacuajani. <sup>14</sup> Moisés Rootasano jiitiaashijiaca pueya jaara tamajaaja maninia miiniu niishijiaca quiri quia, naacujitij, niishishiyari, nojoriiri tamajaaja maninia miiniu niishijiaca cutara. <sup>15</sup> Naa maninia miiniu niishijiaca nojori quiniuucuatej, niishishiyari, Pueyaso rootasano Moisésri juhua nojori jiuujiajinia naajiotasano quia. Naaratej, nojori jaara sesa miiri, tama nojori jiuujiajaarijia nojori niishitiya: “Sesa miiriinjia”. Naajuhuj, nojori jaara maninia miiri, tama nojori jiuujiajaarijia nojori niishitiya: “Maninia miiriinjia”. <sup>16</sup> Naacujitij, cuno juuca, Pueyaso nequesoreetesacari Neyanu Jesucristo puetunu mijiria quiniaa pueyajanaani, jiyacaritij, tama pueya jiuujiaari nojoriicuara tonujunutaniya sesa nojori miishanojiniji jiyasohua. Naaratej, janiyari pueyaracaanu pueya numootequiaacuajani cua pohuatasacari Pueyaso rupaa Jesucristojiniji.

*Pablo nacasusacari Judiocuaca nojori tojitiaaquinuucua Moisés Rootasano*

<sup>17</sup> Cuarta Judio pueyanonaa, quiaari jiyaniya quiaa Pueyaso pueyano cutara, na saquiriojosano Israel pueyajinijinio quia quishacari, Moisés Rootasano niishijia quia quishacarijuhuaj. Cunora, quiaari sequequiaa: “Janiya cutaraari Pueyaso pueyanoni. <sup>18</sup> Janiyari niishiyani casaa Pueyaso paniya cua miiniuriani. Moisés Rootasano niishijia cua quishacari, janiyari niishiyani teyano casaate socua tojishocoriquiano rootasano Pueyaso cua shuquiritiniuria”. <sup>19</sup> Quiaari sequequiaajuhuj: “Janiyacuaaari seetanu rupaajanaa niishiyashijiaca pueya niishitiojonani. Janiyari juhua ninishiqui quijiaca pueya cuhuatanani. <sup>20</sup> Janiyari niishiyashijiaca niishitiojuani, naatujoorinio, maninia cua niishishacari seetanu rupaajanaa Moisés Naajioneejiniji”. <sup>21</sup> Naa tamasaca niishitiojona quia quishacaritij, tama quia cuaqueyajaaja quia niishitiojore coteenu, maninia miijia quia quiniuria. Quiaa jaara tamasaca niishitiojoquiaa maja na nohuasenuunura, ¿casaara nohuasejovia quia quiyacuaraarini? <sup>22</sup> Quia rootasacari tamasaca, maja nojori numuetucunura niyacaraca maaji, ¿casaara saniniuujia naa quia miiquiaacuaraarini? Quiaacuajaari sequeja: “Janiyari pueya shipinijosano casaa soojeani, nojori shipinijosano na secojonuusocoriquiano juhua Pueyasoni”. Naa quia soosacari nojori shipinijosano casaatej, ¿casaara quia nohuasejoquiaa cuno casaa nojori secojonuujuu tiacajinijicuaraarini? <sup>23</sup> Quiaari sequequiaajuhuj: “Moisés Rootasanoori jiyanoohua maninia. Na timitiaanijia”. Naajaa, quiaari Pueyaso rerequetequiaa quia tojiyaquishacari Moisés Rootasano. <sup>24</sup> Cunora, tariucuacaanu Pueyaso Rupaajinia naajiotasanoori seetanujuanaa naa sequeya:

“Pueyaso niishiyashijiaca taucuacaari Pueyasocuara rimiaaquequiaa sacuaraatia, Pueyaso tojiyashijiaca nia quiniuucua nojori niquiara”.

<sup>25</sup> Cuarta Judiocucanaa, Pueyasocuajaari pa supuetanaa rootaquiari pa cararaatiuuquia co cuaara miatesano quiri, na saquiriojosano pueya pa quiniuucua. Naacujitij, nia cararaatiuuquia co jaara miatesano quiri, cunoori maniacuaja, niaa jaara seetanujuanaa Moisés Rootasano tojijiaca quiri. Saniniuujia, niaa jaara Moisés Rootasano tojiyashijiaca quiri quia, niaari juhua miatesoo quiyajaa Pueyaso niquiara. Nia cararaatiuuquia coori najuhuana miatesano quia. <sup>26</sup> Saniniuujia, taucuaca jaara maninia miijia quiri taa Moisés rootasano sequeyacuajani, miatesoo nojori cararaatiuuquia co quishacari, naajaa. Pueyasora, nojoriiri juhua miatesano quia, na muerasu nojori quiniuria. <sup>27</sup> Naacujitij, na cararaatiuuquia co miatesoo tahue jaara maninia miijia quiri, taa Moisés Rootasano sequeyacuajani, nojuajaari jiyanooshaanutaniya, Pueyaso muerasu na quiniuria. Quiajaniya saniniuujia Judio pueyanonaa, quiaari Moisés Rootasano niishijiacuaja. Quiaacuajaari quia cararaatiuuquia co miatesanoraca. Naajaa, quiaa

cutaraari saniitiosaanutaniya quia tojiyaquiniucua Moisés Rootasano. Naacujitij, cuno tahueri quiocuara tonujuriquiano saniya, Judio pueyanonaa. <sup>28</sup> Pueyasocujaari Judiocuaca saquiriojoquiaari na muerasu nojori quiniuria juucua. ¿Cante seetanujuanaa Judio pueyano Pueyasorani? ¿Na cararaatiuuquia co miatesano pueyanotee, Judio pueyacuajinio supueno pueyanotejuhuaj? Maja. <sup>29</sup> Noo pojori cutaraari seetanujuanaa Judio pueyano Pueyasora, noojia jatanishano pueyanotej. Pueyaso Sohuanu jaara pueyano jiuujia jataniri Pueyaso tojijia na quiniuria, cunoori juhua na cararaatiuuquia co miatesano cutara, seetanujuanaa Pueyaso muerasu na quiniuria. Jiyano pueyatej, nojori cutaraari Pueyaso timitiasano, maja narta pueya timitiasano. Pueyanoori maja na naata pueyano jiyatenu Pueyaso pueyano na quiniuria. Saaja Pueyaso Sohuanu cutaraari na naata.

### 3

<sup>1</sup> Naa cua sequesacari nijaniyatej, niaa naasucuaari sequeya: “Taucuaca jaara naa maninia miishaanutaniya nojori quiyaquishacari Pueyaso saquiriojosano Judiocuaca, naatej, taa pajaniyacuaani, ¿casaara pa cararaatiuuquia co miatejosaaquiaaricuaarini? ¿Paateeri najuhuaana Pueyaso saquiriojosano Judiocuacani?” <sup>2</sup> Maja, Judiocuacanaa. Maniniacuajaari pa quishacari Judiocuaca. Pueyasocujaari Judiocuacaacua tiuuquiaari nojori jiitianura na rupaa. <sup>3</sup> Noojiaqueya Judiocuacajinijinio jaara Pueyaso Rupaacua tiuyashijia quiya, ¿Pueyasoteeri cunora na rupaa jatanutaniyajuhua? ¡Maja! <sup>4</sup> Puetunu pueyajanaa jaara sapojonuujuaca quiriquia, naajaa, Pueyaso cutaraari tojetaarucujanaa sapojiyashijia. Naaratej, nojuajiniijiri naa naajiotasano quiya tariucuaaanu na Rupaajinia:

“Puetunu pueyajanaari niishiniutianiya puetunu quia sequesanojuanaari seetanujuanaa cutara. Naajuhuaaj, pueya jaara quiocuara tonujure juucua, puetunu nojorijianaari sanaajasaanutaniya, saa maninijia quia miiniucua pueyaracaanu”.

<sup>5</sup> Pa supuetanaa tiuyaquiniucua seetanu Pueyaso rupaacuajanaa, naacujitij, mijiria quinia pueyari niishiya, Pueyasoori socua jiyano hua maninia pueyajiniji. Sesa pa miiniujiniji, paari niishiyani Pueyaso cutaraari jiyano hua maninia. Naacujitij, nojuaja jaara pa saniitiore sesa pa miiniucua, ¿taa nia sequeyani? ¿Nojuajate sesa, jaara pa saniitiore sesa pa miiniucua? ¡Juaj! Juhua niishiyashijia pocuareenijia. <sup>6</sup> ¡Seetanujuanaa, Pueyasoori sesa miyashijia! Nojuaja jaara sesa miijia quiriquiajuhuaj, ¿maatucua taa mijiria quinia nequesoreereni?

<sup>7</sup> Tamasaca naasucuaari sequequiaa: “Sapojojua cua quishacari, pueyari Pueyaso timitiaquiaa socua, nojori niishishacari saaja nojuaja cutaraari seetanu rupaajanaa jiitijia. Naaratej, ¿Pueyasotucua casaara cua saniitioreni?” <sup>8</sup> Teyano pueyanote naa sequejani, nojuaja naasucuaari naa sequejajuhuaaj: “Socua sesa pa miiri, Pueyaso jiyanooniuria pajaniya. Naacujitij, pocua Pueyaso shuquiritiare socuani, nojuaja jaara pa jiyanoori”. Tamasacaari canaacuara tonujuquiaa najuhuanaj, canaanaari naa niishitiojoquiaani. Canapuate naa sapojonuuquiaa canaacuarani, nojoriiri saniitiosaanutaniya, nojori sesacanuucua canaa.

#### *Pueyasora, puetunu pajaniyajanaari sesa miijiacani*

<sup>9</sup> Quiarijia, jaara naa quiritij cuarta Judiocuacanaa, ¿paateeri socua maninia miijia taucuaajiniji Pueyasorani? Maja. Janiyacuajaari shusha nia pohuatariquiaani, puetunu mijiria quinia pueyajanaari sesa miijia; Judiocuaca, taucuaanio. <sup>10</sup> Tariucuaaanu Pueyaso Rupaajiniacuajaari naa naajiotasano quiya:

“Majaari quenaaja niquiriyatu maninia miijia quiniu. Shaaqui tojetaarucujanaa.

<sup>11</sup> Majaari quenaaja maninia niishiriojojua pueyano quiniu. Majaari quenaaja Pueyasocua jiaatijia pueyano quiniujuhuaaj. <sup>12</sup> Puetunu pueyajanaari Pueyasocua tashuquioorucuaa. Puetunu nojorijianaari seserucuaa. ¿Cante maninia miijiani? Shaaqui. Shaaqui tojetaarucujanaa. <sup>13</sup> Nojoriiri miananajonu maniniu. Nojori rupaari saa monujua. Nojoriiri na niti taquiriucuateja saa



sapojonuraja. Cuno pojoriiri juhua soconu noonacu jiitiaa na rupaama, rimiaacatujuri nojori quiniuucua. <sup>14</sup> Nojori jaara pocuare, saaja tamasaca sesacaquiaari, puera juaajia nojori quishacari. <sup>15</sup> Nojoriiri puecojuaca. Puereeta nanaca shootejaca. <sup>16</sup> Puetunu mijiria nojori miishanojuanaari casaa sesojua, narta pueya taraajetejajuhuaaj. <sup>17</sup> Majaari nojori niishiniu jiyanooni. <sup>18</sup> Nojoriiri juhuajaniya miiquiaa sesa saaja. Majaari na pueretunu Pueyaso”.

<sup>19</sup> Paacuajaari niishiyani, puetunu Pueyaso Rupaajinia naajiotasanojuanaari Pueyaso saquiriojosano Judiocuacara quiquiaari, nojori niishiniuria, puetunu pueyajanaari sesa miijiaca. Naacuajitij, puetunu mijiria quiniaajanaari sanaajetanutaniya, nojori niishishacari puetunu nojorijianaari sesa miijiaca; Judiocuaca, taucuacanio. <sup>20</sup> Naacuajitij, pueya tojishacari Moisés Rootasano juucua, cuno rootasanoori maja na naata nojori na jiyatenu sesa miyashijara. Moisés Rootasanojiniji, paari saaja cunojiniji niishiyani, puetunu pajaniyajanaari sesa miijiacani.

*Paari Pueyaso jiyanooshano cutarani, Jesuucua pa tiuushacari*

<sup>21</sup> Pueyasoori quiari naataja pa niishitiquianu cutara, taate pa naata maninia miijia pa jatanishaanuni. Moisés Rootasanojinia, tariucuacaanu Pueyaso sequenu panishano caminiujiuniaa naajionuutasanojiniaari naa sequeyajuhuaaj. Tiiri maatia sequeya taa Pueyaso jiyanooniutaniya pueyani, naajaa, pueya jaara Moisés Rootasano tojiyashijiaa quiri. <sup>22</sup> Quiarijiani, Pueyasoori pa jiyanooquiaa cutara, saaja Neyanu Jesucristoocua pa tiuushacari. Judiocuaca, taucuacajuhuaaj, Pueyasoori puetunujuaanaa jiyanooquiaa Neyanuucua nojori tiuushacari. Majaari rimiajata na jiyanooni. <sup>23</sup> Puetunu pueyajanaari sesa miijiaca; Judiocuaca, taucuacanio. Naacuajitij, nojoriiri juhua tucuacaanu quiya Pueyasojiniji. Sesa miijiaca pueya quiniuucua, nojoriiri soosano pueyara jataquiaari. Naacuajitij, pueyari Pueyaso timitiasoo quiquiaari. <sup>24</sup> Naajaa, jyanohua panijia Pueyaso quiniuucua, nojuajaari pa jiyanooquiaari Jesucristo cusonuucua pocuara. Naacuajitij, Pueyasoori pa jiyatequiaari juhua sesa miyashijara. <sup>25</sup> Pueyasoori Neyanu Jesucristo jiyatequiaari pueyacuaji Tacuna na quiniuria, Neyanu nanaca shoonuucua niyacutesanojinia. Naacuajitij, pueya jaara niishiriquia Jesucristo nojori niti cusoquiaari, saaja naa nojori tiuushacari nocuatej, nojuajaari na Que Pueyaso jiyanootiquiaa pueya. Naajuhuaaj, Pueyaso saniitioyaquishacari tariucuacaanu nocua tiuujiaca pueya Jesu cusoyaquishacarijia, majaari najuhuana puera jiuujiaajia na quiniu quiquiaari. <sup>26</sup> Pueyasoori niishiquiaari Neyanu Jesucristoori nojoriicuara mosocoriquiano, sesa nojori miijosano tuujusaanura seetanujuanaa. Naaratej, nojuajaari pueyaracaanu sesa nojori miijosano rejeretaquiaari saaja. Jesucristo cusonuucua quiari naataja pocuara, paari niishiyani, Pueyasoori seetanujuanaa maninia miijia. Nojuajaari maja najuhuana na jiyanooni pajaniya. ¡Neyanu motequiaari pocuaraari!

<sup>27</sup> ¿Teyano niajanijiniote tojetaarucujanaa saaja maninia miijiani? Shaaqui. Naacuajitij, maninia miyashijia pa quishacari, puetunu pueyajanaari sanaajasanutaniya Pueyaso nequesoreesacari pueya. Saniniuujia, paa jaara puetunu Moisés Rootasanojuanaa tojitiajaca quiriquia maniniani, paa maara tama pa cuaqueyajaaja shuquiritiajaca quiriquia cutarani. Saniniuujia, Pueyasoori pa jiyanooquiaa saaja pa tiuushacari Jesucristoocua. Naacuajitij, majaari pa jitianu tama pa miishanojuajaaja pa shuquiritasocoriquiano. <sup>28</sup> Naacuajiti paari niishiyani, Pueyasoori pa jiyanoojia puetunu sesa pa miishanojinijianaa saaja Jesucristoocua pa tiuushacari. Majaari na jiyanooni pajaniya, Moisés Rootasano pa tojishacari.

<sup>29</sup> ¿Niaateeri jiyaniya, Pueyasoori saaja Judiocuaca Jiyano? ¡Maja! Pueyasocujaari puetunu mijiria quiniaa pueyapuejanaa Jiyano. <sup>30</sup> Pueyasoori maja caapiqui. Nojuajaari saaja niquiriyatu. Naacuajitij, majaari niquiriyatu Pueyaso quiniu Judiocuacara, socua tamonu Pueyaso taucuacara. Naaratej, puetunu pueyapuejanaari jiyanooshaaquiaa saaja Jesucristoocua nojori tiuushacari; tariucuacaanu na saquiriojosano Judiocuaca, taucuacanio. <sup>31</sup> Pueyaso muerasu pa quishacari saaja Jesuucua pa tiuushacari, ¿paateeri Moisés Rootasano shocoteyani? Maja. Paacuajaari Moisés Rootasanojiniji niishiyani,

paari sesa miijiacani. Naacuajitij, Moisés Rootasanoori panishiya, pa niishiniuria paa cuaara Jesucristoocua tiuuria, jiyanooshano pa quiniuria.

#### 4

##### *Pueyaso jiyatesacari Abraham juhua sesa miyashijiara*

<sup>1</sup> Naaratej cuarta Judiocuacanaa, ¿taa nia sequeya pa supuetana Abrahamjinijini?

<sup>2</sup> ¿Casaara Pueyaso jiyatequiaari nojuaja juhua sesa miyashijiarani? Abrahamri maja na jiyanooshaanu quiquiaari maninia na miiniuucua. Pueyaso jaara nojuaja jiyanooquiaari maninia na miiniuucua, nojuaja maara tama na cuaqueyajaaja timitiaja quiquiaari.

<sup>3</sup> Saniniuuja, tariucuacaanu Pueyaso Rupaajinia naa naajiotasano quiyari Abrahamjiniji: “Abrahamri Pueyasooocua tiuquiaari. Naaratej, Pueyasoori na jiyatequiaari juhua sesa miyashijiara”.

<sup>4</sup> Cua tojiri pueyanaa. Pueyano jaara poonijiore tamonura, na poonijiotenaari na poonijionujiniji na cumaneeca niqitiojua. Jaara niqitiosaare, cuno cumaneecaari maja nareja niqitiosano. Cunoori seetanujuanaa na poonijosanojiniji. <sup>5</sup> Saniniuuja, maninia miyashijia jaara Pueyasooocua tiuuri, Pueyasoori na jiyatenutaniya juhua sesa miyashijiara saaja nocua na tiuuniuucua. <sup>6</sup> Pa supuetanaa jiyaniijia Davidcuajaari naa pohuataquiaari taa shuquiriaatia pa quiyani, Pueyaso jaara pa jiyatere juhua sesa miyashijia pa quiniuria na niqiuara, maninia miyashijia pa quishacarijia. Naa naajiotasaaquiaariiri David sequesano:

<sup>7</sup> “Shuquiriaatia quijiaca cutaraari noo pueya, canapue Pueyaso jiyanooya sesa na miijosanojinijicuaajani, Pueyaso jaara tuujure sesa nojori miijosanojuhuaj.

<sup>8</sup> Shuquiriaatia quijiacaari noo pueyajuhuj, puetunu sesa nojori miishanojuanaa Pueyaso saneyaquishootej”.

<sup>9</sup> Janiyacuajaari tari sequereeni, Pueyasoori Abraham jiyatequiaari juhua sesa miyashijia na quiniuria, saaja nocua na tiuushacari. Pueyaso jaara naa jiyanooquiaaricuaa Abrahamtej, ¿Pueyasote saaja Judiocuaca jiyanooniu panijia, noo pojori canapue na cararaatiuuquia co miatesano jitiaani, taa nojori supuetana Abrahamcuaani? ¿Taa nia sequeyani? ¿Taucuacaarijiataj? ¿Nojoriti jiyanooshiyajuhuj? ¿Taaquiririni! <sup>10</sup> ¿Taa nia sequeyanijia? ¿Abrahamte tari na cararaatiuuquia co miatesano quiquiaari Pueyaso jiyanooshacari nojuaja? Maja. Pueyasocuaajaari na jiyanooquiaari miatesoojua na quishacari. <sup>11</sup> Na tiuuniu nuhuaji Pueyasooocua, Pueyasoori shusha jiyacari na niishitiquiaari na cararaatiuuquia co na miatenura. Cunoori quiquiaari na niyajetaaquishaanura, saaja Pueyasooocua na tiuushacari, Pueyasoori na jiyatequiaari juhua sesa miyashijiara, miatesoojua na quishacari. Naacuajitij, miatesoo taucuaca tiuushacari Jesucristoocua, taa Abraham tiuquiaaricuaani, Pueyasoori nojori jiyateya juhua sesa miyashijia nojori quiniurijuhuj, mariyata juhua Abraham niqiuohua nojori quiniuria. Naacuajitij, puetunu Pueyaso sequesano Abrahamjanaani, cunoori nojoririjuhuj. <sup>12</sup> Naajuhuj, pueya jaara na cararaatiuuquia co miatesano quiri Judiocuaca nojori quiniuria, naajaa. Nojori jaara Jesucristoocua tiuuri taa Abraham tiuquiaaricuaani miatesoo na quishacarijia, Pueyasoori nojori jiyateya juhua Abraham niqiuohua nojori quiniurijuhuj.

##### *Pueyaso sequesano Abrahamni, cunoori Jesucristoocua tiuujiacarajuhuj*

<sup>13</sup> Pueyasocuaajaari Abraham sequequiaari, nojuajaari nio jiya camaru quiniutianiya, puetunu necohuatajanaa. Pueyasoori naa sequequiaari Abrahamtej, saaja nocua na tiuushacari. Majaari naa Abraham sequesaanu quiquiaari Moisés Rootasano tojjia na quiniuucua. Jiyacarij, Moisés Rootasanoori maja na quiniu quiquiaari juhuanojuaja.

<sup>14</sup> Pueyaso sequesano Abraham jaara saaja Moisés Rootasano tojjiacara quiriquia, na sequesano maara najuhuana quiri Pueyasooocua tiuujia pueyara. Naajuhuj, pueya maara najuhuana Pueyasooocua tiuujia quiriquiajuhuaj. Seetanujuanaa Pueyaso sequesano Abrahamni, cunoori puetunu Pueyasooocua tiuujiacarajanaa. <sup>15</sup> Cunoori maja saaja Moisés Rootasano tojjiacara. Pueyasocuaajaari niishiquiaari, pueyari maja na

naata Moisés Rootasano tojiniu quiniutianiya puetunujuanaa. Moisés Rootasanojiniji, paari niishiyani, paari saniitiosaanutaniyani pa tojitiaaquiniuucua cuno rootasano. Saniniuujia, Moisés Rootasano jaara quiyaquiriquia, pueya maara sequeyaquishaare: “Niaari sesa miijiaca”.

<sup>16</sup> Pueyasoori tariucuacaanu na sequesano Abraham nareja niqutionu paniquiaari, puetunu necohuarajanaano. Naaratej, seetanujuanaa pa masenura na sequesano Abraham, Pueyasoori sequequiaari, nojuajaari nareja na niqutionutaniya nocua tiuujiaca. Naacuajitij, Pueyaso sequesanoori maja saaja Moisés Rootasano tojjiacara. Cuno sequesanoori puetunu pueyapuerajanaa, canapuate Pueyasooocua tiuujiaca quiyani, taa Abraham quiquiaari Pueyasooocua tiuujiacuaani. Naa Pueyasooocua tiuujiaca pa quishacari taa Abraham tiuuquiaari Pueyasooocuaani, paari Abraham niqiuohuani. Naaratej, Pueyasora, Abrahamri pa que. <sup>17</sup> Pueyasocuajaari naa sequequiaari Abrahamtej nojuajaari queraatia niqiuohuaraca quiriqiano. Naacuajitij, Pueyaso sequesanoori naa naajiotasano quiya:

“Abrahamnaa, janiyari quiarjia quia jiyateree queraatia tamaatia rupaaca pocuajaca que quia quiniuriani”.

Abrahamri Pueyaso sequesanoocua tiuuquiaari. Nojuajaari niishiquiaari Pueyasoori macunucua samiitianiija. Niishiquiaariijaariuhuj, Pueyasoori cumaacaraca na panishano na shipininiuria shaaquijiniji.

<sup>18</sup> Abrahamri niishiquiaari, nojuajaari maja na naata necocua na muetutenu, puera saaquiano na quishacari tari. Naajaa, Abrahamri saaja Pueyaso sequesanoocua tiuuquiaari. Naacuajitij, nojuajaari seetanujuanaa queraatia tamaatia rupaaca pocuajaca pueyapue que, taa Pueyaso sequequiaari nojuacuajani. Pueyasoori naa na sequequiaari: “Quia niqiuohuari tojetaarucuajanaa queraatia quiriqiano”.

<sup>19</sup> Naa Pueyaso sequesacari nojuajatej, nojuajaari tari cien marijia shocotejoquiaari. Naa saaquiano na quishacaritij, necocua Saarajuhuj, naajaa, majaari na tarinitianu quiquiaari Pueyaso sequesanoocua tiuuniu. <sup>20</sup> Saaja Pueyaso sequesanoocua na tiuushacari, nojuajaari maja noojia na niqijiotenu quiquiaari. Majaari Pueyaso sequesanojiniji na taacanuunu quiquiaarijuhuaj. Saaja Pueyasooocua na tiuushacari, nojuajaari noojia cumaquiquiaari socua. Naacuajitij, nojuajaari naa maniniuhuaqueetaquiaari Pueyaso: “Paacarasho cua Pueyasonaa. Niishiyaniija quiaari canaa muetutenutaniya taa quia sequesanojuanaa”. <sup>21</sup> Quiaacuajaari cumaacaraca quia miiniuria puetunu quia sequesanojuanaa”. <sup>22</sup> Naa Abraham tiuuniuucua Pueyasooocuatej, Pueyasoori na jiyatequiaari juhua sesa miyashijia pueyanora.

<sup>23</sup> Jaara naa naajiotasaaquiaari Abrahamjiniji: “Pueyasoori na jiyatequiaari juhua sesa miyashijiaara”, cunoori maja saaja Abrahamra sequesano. <sup>24</sup> Cunoori pajaniyara sequesanojuhuaj. Cunora, Pueyasoori pa jiyateya juhua sesa miyashijiarajuhuj, nocua pa tiuushacari, pa niishishacarijuhuaj nojuacuajaari pa Jiyaniija Jesucristo samiitianiquiaariuhua macujiniji. <sup>25</sup> Pueyasocuajaari mijiria na jiyaroquiaari sesa pa miishanoocuaara mosocoriqiano. Nojuajaari na samiitianiquiaariuhua, Jesu jaatianura nocua pajaniya, juhua tariucua sesa miyashijia.

## 5

### *Jesuucua tiuuniaa pueyari jiyanooshano*

<sup>1</sup> Naacuajitij, paa jaara tari jiyanooshano quiyani Jesucristoocua pa tiuushacari, paari juhuajaniya quiya Pueyaso niqiarani. Jesucristoori na Que pa jiyanootiquiaari, pocuara na cusosacari. <sup>2</sup> Jesucristoocua tiuujiaca pa quishacari, Pueyasoori pa timitiaquiaa. Pa cumaquiquiaajaariuhuj maninia necohua pa quiniuria. Paari shuquiriyajaacuhuj, pa niishishacari paari jatanishaanutaniyani, shacantuuca quijiaca pa quiniuria juhua nojuajuhuj. <sup>3</sup> Majaari saa cunojua. Paari shuquiriquiaajuhuj, paa jaara taraatia miishaareni. Paacuajaari niishiyani, paa jaara naquiya miishaareni, paari socua juhuajaniya rejeretajaca quiniutianiyani. <sup>4</sup> Naa rejeretajaca pa quishacaritij, paari cumueca Pueyaso

muerasu quiniutianiyani. Naa cumueeca Pueyaso muerasu pa quishacaritij, paari juhua-janiya sashijiaca quiniutianiyani, pa niishishacari Pueyasoori seetanujuanaa maninia miiniutianiya pajaniya, taa na sequequiaaricujani. <sup>5</sup> Naa pa niishishacaritij, majaari sajosano pa quiniu quiniutianiya. Pueyasocujaari tari jiyaroquiaari na Sohuanu, poojiajinia quiriquiano, seetanujuanaa Pueyaso paniniu pa jiiitianura poojiajinia.

<sup>6</sup> Pueyaso tojiyashijiaca pa quishacarijia, majaari pa naata quiquiaari Pueyaso jiyanootiniu tama pa cuaqueyajaaja. Jesucristoori jiyacari namitia pocuara cusoquiaari na Que na jiyanootiniuria pajaniya. <sup>7</sup> Sesa miyashijia pueyano jaara monu panishiya juucua, ¿tamonu maninia pueyanoteeri quiya na sequenura: “Janiya cuara mosaaria juhuari cuno pueyano niti”? Majaruhua. Monu panishano pueyano jaara seetanujuanaa maninia pueyano quiri, na rupuena pueyano jaara jiyanohua na panijia quiri, nojuaja maara sequere: “Janiya cuara na niti mosaaria juhuari”. <sup>8</sup> Saniniuujia, sesa miijiaca pa quishacarijia, Jesucristoori pa niti cusoquiaari cutara. Naacujitij, paari niishiyani, Pueyasoori jiyanohua pa panijia. <sup>9</sup> Quiarjia, paari sesa miyashijiaca quiya Pueyaso niqiarani, Jesucristo cusuucua pocuara. Naacujitij, paa cutaraari niishiyani, Pueyaso saniitiosacari na tojiyashijiaca pueya, Cristoori pocuaji tacunutaniya cutara, tariucua na jatanishano pueya pa quiniuucua. <sup>10</sup> Na paraa pa quishacarijia, Pueyasocujaari pa jiyanoquiaari, Neyanu cusuucua pocuara. Quiarjia, nata jeecatoono pa quishacari, Neyanuuri saminio quiya pueyaracaanu pocuaji na tacunura. <sup>11</sup> Majaari saaja cunora shuquiriaatia pa quiniu. Paari shuquiriyajuhua, pa Jiyaniijia Jesucristo rupuetootenuucua pajaniya na Que Pueyasota.

*Pa supuetana Adánri maja juhua pa Jiyano Cristo*

<sup>12</sup> ¿Casaara pa cusuucuaani? Juhucatecara pa supuetana Adán miiniuucua sesa, naaratej puetunu pueyajanaari sesa miijiacajuhua. Pueyasocujaari tari sequequiaari: “Cante sesa miijiani, cuara shaajeera”. Seetanujuanaa naari. Puetunu pajaniyajanaari shaajeriquianoni, sesa miijiacua pa quiniuucua. <sup>13</sup> Moisés Rootasano quiyaquishacarijia, pueyari tari sesa miiniu niishijiaca quiquiaari. Jiyacaritij, pueya miishacari sesa, majaari nojoriicuara saquiriojotasaanu quijia sesa nojori miishacari. <sup>14</sup> Cuno pojori, Moisés niyacari quiquiaarini, nojoriiri maja na tojiyaquiniu quiquiaari Pueyaso sequesano taa Adán tojiyaquiquiaari Pueyaso sequesano. Naajaa, puetunu nojorijianaari cusuucuaarijijuhua sesa miijiacua nojori quiniuucua, sesa miijia Adáncuajinio nojori supenuucua. Quiarjia saniniuujia, nia pohuatareera Adán miishanojiniji, Jesucristo miishanojinijinio.

<sup>15</sup> Adán miishanoori jiyanohua tamaatia Jesu miishanojiniji. Coteenu shipinishano pueyano miiniuucua sesa, puetunu pueyajanaari shaajenu niishiya. Saniniuujia, Jesucristo miiniuucua maninia, Pueyasoori queraatia pueya jiyatequiaa pueyaracaanu rishijiaca nojori quiniuria cutara. <sup>16</sup> Pueyaso miishano maninia pajaniyarani, cunoori sesa Adán miishano shocotaa jiyanohua cutara. Naa niquiriyatu sesa casaa Adán miiniuucuatej, puetunu pueyajanaari saniitiosocoriquiano. Saniniuujia, maninia Jesucristo miiniuucua pajaniyarani, Pueyasoori pa jiyanoquiaa puetunu sesa pa miishanojinijianaa. <sup>17</sup> Niquiriyatu pueyano miiniuucua sesa, puetunu pueyajanaari cusuucuaacara quiquiaari. Saniniuujia, niquiriyatu pueyano miiniuucua maninia pajaniyara, cunora, Pueyasoori pa jiyateya juhua sesa miyashijiaca pa quiniuria. Cunoori, Jesucristoocua pa tiuushacari. Majaari saaja cuno, naajuhua, paari shuquiriaatia quijia jiyaniijianucua quiniutianiya maniniushiquini, Jesucristo rupuesano pa quishacari.

<sup>18</sup> Naa Adán miiniuucua sesatej, nojuajaari puetunu nocuajinio supueno pueyajanaa jiyatequiaari sesa miijiacara, saniitiosano nojori quiniuria. Naajuhua, Jesucristo miiniuucua maninia, puetunu pueyajanaari na naata jiyanooshaanu, nojori saniitioy-aquishaanuucujia, pueyaracaanu quijiacua nojori quiniuria. <sup>19</sup> Adán tojiyaquiniuucua Pueyaso sequesano, puetunu pueyajanaari sesa miijiacara jiyatesaaquiarijuhua. Saniniuujia, Jesucristo tojiniuucua Pueyaso sequesano, puetunu nocua tiuujiacajanaari juhua sesa miyashijianucua jiyatesaaquiohua.

<sup>20</sup> Moisés Rootasano jaara niishishaaquiaari, pueyari socua sesa miijiacara jiyacatequiaari. Naa socua sesa miijiacara pa quishacaritij, naajuhuj, Pueyasoori socua jiyacatequiaari pocua taraajenujuhuaj. <sup>21</sup> Sesa miiniu tarinitianu niishiyashijia pa quiniuucua, puetunu pueyajanaari cusunuriquiano quiquiaari. Saniniuujia, Pueyaso taraajenuucua pocua, nojuajaari Neyanu Jesucristo motequiaari pa niti, pa jiyanooshaanura. Naacujitij, nojuajaari juhua pa samiitianijioquiaariuhua, pueyaracaanu rishijiaca pa quiniuria pa Jiyanijia Jesucristota.

## 6

### *Pablo niishitijosano moojinia tiuquinijionujiniji*

<sup>1</sup> Pueyaso jaara naa pa jyanooquiaa pocua na taraajesacari, ¿taa nia sequeyani pueyanaa? ¿Paate socua pueyaracaanu sesa miijia quiniutianiyani, pueyaracaanu Pueyaso jyanooniuria pajaniya, pueya niishiniuria, Pueyasocuajaqui jyanohua maninia na jyanooniuria pajaniya? <sup>2</sup> ¡Maja pueyanaa! ¡Maja naa nia niishiriojonu! Pueyaso jaara tari poojia sesoriquia seque jataniquiaari Neyanu Jesucristo na rupuetesacari pajaniya, ¿paatucua casaara socua sesa miijia quirini? Pueyasora, paacujaari tari cusonuuquiaari Jesutani. <sup>3</sup> ¿Niaateeri cuno niishiyaquiyajaa? Naajuhuj, paa jaara moojinia tiuquinishaare Jesucristoocua pa tiuushacarini, Pueyaso niquiara, paari Jesu rupuequiaari niyacutesanojiniani. Nojuacuajaari pa niti saniitiosaaquiaari. <sup>4</sup> Naacujitij, paa jaara moo cariquimia shishaareni, jiyacaritij, paari juhua Jesuta jamoshiyajuhuj. Naa juhua macu pa quishacaritij, paari samiitianijosanohuani, taa Jesucristo samiitianishaaquiaariuhua macujiniji jyanohua Pueyaso cumaacatacuaani. Naa samiitianijosanohua pa quishacaritij, maninia miijiaca pa quiri juhua quiarinio pueya.

<sup>5</sup> Paa jaara Jesucristo rupuetesaaquiaari sesa pa miishanoocuara na cusosacarini, naajuhuj, paa cutaraari tari samiitianijosanohua juhua nojuajani, maninia quijiaca pa quiniuria. <sup>6</sup> Tarijia, majaari pa naata tarinitianu quijia sesa pa miiniu, sesa jiuujiaraca pa quishacarijia. Sesoriquia poojia sequeeri Jesuta cojiritiasaaquiaari monu, nocua pa tiuushacari, maja socua cumaaca na jiitianura, sesa na miitiniuria pajaniya. <sup>7</sup> Naacujitij, sesoriquia poojia seque jaara tari jatanishano quiya, majaari tari sesa miijiaca pa quiniu. <sup>8</sup> Paa jaara tari naa cojiritiasaaquiaari monu Jesuta nocua pa tiuushacarini, paari quiarijia niishiya cutarani, paari pueyaracaanu nata quiriquiano saminioni. <sup>9</sup> Cristocujaari samiitiaquiaariuhua. Paari niishiyajuhuj, majaari socua na pacutenu quiniutianihua cusonu. Nojuacuajaari tari cusoquiaari puetunu sesa pa miishanoocuarajanaa. Naaratej, nojuajaari maja na naata socua cusojuasaanuhua. <sup>10</sup> Majaari socua Jesucristo pacutenu quiniutianihua cusonu, sesa pa miishanoocuara. Nojuacuajaari tari cusoquiaari, Pueyaso jyanooniuria puetunu mijiria quiniaa sesa miishanojuanaa. Nojuaja jaara samiitiaquiaariuhua, nojuajaari seetanujuanaa pueyaracaanu rishiriquiano Pueyasora cutara. <sup>11</sup> Naajuhuj pueyanaa, tama nia cuaqueyajaaja nia jiyatere juhua macura, maja socua nia miiniuria sesa. Nia niishirijuhuj, niaacuajaari Jesucristota samiitiaconohua, Pueyaso tojjijia nia quiniuria.

<sup>12</sup> Naaratej pueyanaa, majaari nia shanacunu sacuaraatia nioojia seque niishiriojosano nia miiniuria. Seetanujuanaa nia niyaretare tama nia cuaqueya panishanojuajaaja nia miyaquiniuria. <sup>13</sup> Majaari nia cuaqueya nia panitianu sesa nia miiniuria, taa na paniya nia miiniuria juucuacuajani. Saniniuujia, nia cuaqueya nia jiyatere cutara saaja Pueyaso panishano miijia na quiniuria. Niaacuajaari tari samiiticoquiaariuhua juhua macunucua nia quiniujiniji. Naacujitij, nia cuaqueya nia jiyatere saa maninia miijia na quiniurijaja. <sup>14</sup> Naa jaara nioojiajinia cuno sesa niishiriojosano ruuretajaca quiri, niaari na shocotanutaniya, Pueyaso cumaquishacari niajaniya. Nia niishiri, niaari quiarijia Pueyaso tojjitajaca cutara, maja tari Moisés Rootasano tojjijia.

### *Pueyaso tojiyashijiaca pueyani, nojoriiri Sesaaca pueya*

<sup>15</sup> Cua sequesacari niajaniya, pajaniya maja tari Moisés Rootasano tojjiacani, ¿niaateeri cunora sesa miiniutianiya, Pueyaso quishacari pa jyanoojia? ¡Maja naa nia miiniu

pueyanaa! <sup>16</sup> Niaacuaajaari niishiya, paa jaara tama pa cuaqueyajaaja jiyatere tamonu camarnu seru pa quiniuriani, naacuaajitij, paari pueyaracaanu na tojjia quiniutianiyani. Naajuhuaaj, niaa jaara sesa miijiaca quiriohua, niaari Sesaaca tojjia. Naa sesa miijiaca nia quishacaritij, niaari cusonutaniya. Saniniuujia, niaa jaara Pueyaso tojjiacara quiri, niaari sesa miyashijiaca quiniutianiya. <sup>17</sup> Tarija, niaari Sesaaca tojjia quijia, juhua na seya, sesa miijiaca nia quishacari. Quiaritia, janiyari Pueyaso timitiaani nia tojiniucua Jesucristo rootasano puetunu nioojiatajanaa, taa nia niishitiojosaaquiaar-icuajani. <sup>18</sup> Jesucristo rupaa nia tojjishacari, Pueyasoori nia jiyatequiaari na muerasu nia quiniuria, maja Sesaaca seya nia quiniuria socua. Naacuaajitij, niaari Pueyaso tojjiacara jatanishano, saaja maninia miijiaca nia quiniuria. <sup>19</sup> Janiyari naa pohuataa serujiniji nia-janiyani, maatia nia tojiniuria cua niishitiojosano. Majaari juhuanajuaja nia naata puera jiyajeneta niishitiojosano niishiniu, cumueeca Pueyaso muerasu nia quiyaquishacaritia. Tarija, niaari tama nia cuaqueyajaaja jiyatequiaari Sesaaca panishano nia miiniuria. Naacuaajitij, niaari jiyanohua sesa miijiacara jiyatequiaari. Naajuhuaaj, quiaritia saniniuujia, tama nia cuaqueyajaaja nia jiyatere Pueyaso panishano nia miiniuria. Naa jaara naa miiri, niaari tojetaarucujanaa maninia miijiaca quiniutianiya Pueyasora.

<sup>20</sup> Naa jaara sesa miijiaca quiquiaaritia Sesaaca tojjia nia quishacaritia, niaari juhuajaniya Pueyaso tojjiyashijiaca quiquiaari. <sup>21</sup> ¿Sesaacate maninia nia miiquiaari sesa nia miiniucua nera? ¡Maja! Naa cutaraari saaja caririquiquiaa sacuaratia casaa nia miiniucua tarija. Niaari quiaritia niishiyajuhuaaj, cante sesa miijiaca quiquiaani, nojoriiri shaajasaariquiano. <sup>22</sup> Naa sesa miyashijiaca nia quishacari quiaritia saniniuujia, niaari Pueyaso tojjiacara jiyatesaaquiaari, saaja na panishano nia miiniuria cutara. Naa Pueyaso tojjia nia quishacaritij, nojuajaari nia jiyatenutaniya seetanujuanaa maninia miijiaca nia quiniuria. Naacuaajitij, niaari pueyaracaanu shuquiriaatia rishijiaca quiniutianiyajuhuaaj. <sup>23</sup> Saniniuujia, sesoriquia pueya miiniucua sesa saaja, nojoriiri naa na miiniucua shaajasaanutaniya. Saniniuujia, saaja Jesucristoocua tiuujia pa quishacari, Pueyasoori saa cunoraja pa jiyatequiaa pueyaracaanu rishijiaca pa quiniuria, pa Jiyaniija Jesucristo rupuejaca pa quishacari.

## 7

### *Paari juhua camishanoni*

<sup>1</sup> Pueyanaa, niaacuaajaari Moisés Rootasano niishijiaca. Naaari niishiyajuhuaaj, paa jaara shaajequeeni, paari jiyacari Moisés Rootasano carteeque shushani. <sup>2</sup> Naajuhuaaj, paacuaajaari rootasaaquiaarini, maaji jaara camishano quiri, cuaara tamonu cayata quiyaquiria, neyaca jaara saminio quiyajaa. Neyaca jaara cusoyare, caminio pueyara Moisés rootasanoori maja tari na quiniu cuno mashiquio tojjishocoriquiano. <sup>3</sup> Saniniuujia, maaji jaara tamonu pueyanota quiri quia neyaca quishacaritia saminio, cuno maajiiri sequeshiya paanatuta, naa na quiniuucua tamonu pueyanota. Saniniuujia, neyaca jaara cusoyare, mashiquio camishacari tamonu pueyanota, naajaa, majaari Moisés Rootasano tojjiyashijia na quiniu cunora. Nojuajaari maja paanatu, naa na miishacari.

<sup>4</sup> Naaari naajuhuaaj pueyanaa. Jesucristo cusonuucua pa niti, niaari juhua cusonuucuaarijuhuaj, maja Moisés Rootasano tojjia nia quiniuria socua. Naacuaajitij, niaari tamonu tojjia quia cutara. Nojuajaari pa Jiyaniija Jesucristo, noj, macujiniji samiitiaquiaarihuatej. Naacuaajitij, quiaritia pa Jiyaniija Jesucristo tojjia pa quishacari, paari maninia miijiaca Pueyasorani. <sup>5</sup> Tarija, Pueyaso tojjiyashijiaca pa quishacaritia, Moisés Rootasano pa niishishacari maja quenaaja pa miiniuria sesa casaa, cuno rootasanoori saaja juhua socua pa shiniujuquiaari sesa pa miiniuria. Naacuaajitij, tama sesa pa miishacaritiaaja, paari tama pa cuaqueyajaaja jiyateriquiaa saniitiosano pa quiniuria maquesaashijia mani quiquiojiniani. <sup>6</sup> Tarija, paari juhua quioosano pueya Moisés Rootasano tojjitishaaquiaarini. Saniniuujia, Jesucristota pa cusonuucua, nojuaja jaara pocuara cusoquiaari, paari tari Moisés Rootasano tojiniu carteequiaarini. Moisés Rootasano pa tojiaquishacari quiaritia, naacuaajiti pa naata Pueyasojanaa

tojiniu shitimia cutara, na Sohuanu cumaquishacari pajaniya. Majaari juhua tarijia pueya miishano. Tarijia, paari Moisés Rootasano tojtiajaca quiquiaari maniniani, pa puerenuta paa mariqui saniitiosaareeri pa tojiyaquiniucua niquiriyatu queraatia na rootasanojiniji.

*Poojiaari saa sesa miiniu niishijiaja*

<sup>7</sup> Tamasaca naasucuaari jiyaniya janiyari Moisés Rootasano soojeani. Maja. Quiria, jiyanojia maniniacuajaari Moisés Rootasano. Moisés Rootasanojiniji, paacuajaari niishiyani paari sesa miijiacani. Moisés Rootasano jaara quiyaquiriquia, janiya maara niishiyaquiquiaarini, cua jiaatiasacari tamasaca jiiitasano casamiicua, cunoori sesa Pueyasora. <sup>8</sup> Saniniuuja, Moisés Rootasanojiniji cua niishishacari maja tamasaca casamiicua cua jiaatianura, janiyari saaja juhua shiniujiushaaquiaarini casamiicua jiaatiaja cua quiniuria socuani. Naacuajitij, Moisés Rootasano cua niishiyaquishacarijia, coojiaari juhuajaniya quiquiaari juhua maqueja. Saniniuuja, janiya jaara Moisés Rootasano niishiquiaarini, coojia sequeeri juhua niucuaquiaari, puetunu sesa casaajanaa na miiniu paniniuria. <sup>9</sup> Moisés Rootasano cua niishiyaquishacarijia, janiyari juhua-janiya quijia quiquiaarini. Saniniuuja, Moisés Rootasano cua niishishacari, janiyari jiyanojia taraajequiaarini, cua niishishacari janiyari jiyanojia sesa miijia Pueyaso niqiiarani. <sup>10</sup> Naa sesa miijia cua quishacaritij, janiyari niishiquiaarini, janiyari quera jatashiya saniitiosocoriquianoni. Janiya jaara Moisés Rootasano tojiquiaari shushajanaani, janiyari jiyaniquiaarini, janiya jaara cuno rootasano tojirini, janiya naasucuaari pueyaracaanu rishijia quiniutianiyani. Saniniuuja, Moisés Rootasanoori saaja cucuara tonujuquiaari puetunu sesa cua miishanojinijijianaa. <sup>11</sup> Naacuajitij, janiyari jiyanojia jiyajenequiaarini, cua jiyanihacari cua naatacuaja Moisés Rootasano tojiniu maninia, Pueyaso jiyanooniuria janiya. Jaara maja cua naata quiquiaari Moisés Rootasano cua tojiniuria maninia, janiyari niishiquiaarini Pueyasoori cua jiyanojiaquiniutianiya.

<sup>12</sup> Seetanujuanaa nia sequeyanijia pueyanaa, Moisés Rootasanoori jiyanojia maninia. Tojetaarucuajanaa maninia rootasano. Cunoori seetanujuanaa rupaa maniniu Pueyasojiniji. <sup>13</sup> Moisés Rootasano jaara naa maninia quiri, ¿janiyateeri nia sequeyani cuno na rootasanoori pa cusojuaja? Maja. Janiyari nia sequeyani, Moisés Rootasanojiniji, paari niishiyani sesa pa miishano cutaraari jiyanojia sesa Pueyasora. Naacuajitij, paari Moisés Rootasanojiniji niishijiani, paari puetunujuanaa jatasocoriquiano quijia juucuan, seetanujuanaa sesa miijia pa quiniucua.

<sup>14</sup> Paacuajaari niishiyani, Moisés Rootasano, cunoori maja nareja pueyano niishitiojosano. Pueyaso niishitiojosanocuajaari pa tojishocoriquiano puetunu poojiatajanaa. Saniniuuja, coojiaari Pueyaso tojiyashijia. Janiyari tamajaaja juhua coojia seruni, na panishano cua miiniuria. Naa sesa jiuujiaraca cua quishacaritij, majaari cua naata Moisés Rootasano tojiniu. <sup>15</sup> ¿Casaara naa sesa cua miiquiaani? Janiyari saaja cua niishishano sesa casaa miiquiaani. Majaari maninia cua miiniu quiquiaa, taa cua paniyacuajani. <sup>16</sup> Janiya jaara cua panishoo sesa casaa miirini, naacuajitij, janiyari sequequiaani, Moisés Rootasanoori seetanujuanaa maninia. <sup>17</sup> Naa cua panishoo sesa casaa cua miishacaritij, cunoori maja tama cua miishanojuaaja. Cuno sesa cua miishanoori coojiajiniji supueno tamajaaja. <sup>18</sup> Quiarjia niishiya cutaranijia, coojiaari tojetaarucuajanaa sesa miiniu niishijia. Naacuajitij, janiyari juucua maninia miiniucua jiaatiaquiaani. Naajaa, majaari cua naata quiquiaa maninia cua miiniuria tamajaaja. <sup>19</sup> Naacuajitij, cua miishanoori maja maninia, taa cua miiniu paniquiaa juucuacuajani. Cua miishanoori saaja cua miiniu paniaquishoo quiquiaa. <sup>20</sup> Naacuajitij, janiya jaara cua panishoo sesa casaa miirini, janiyari niishiyani, cunoori tama coojiajiniji supuenojuaja, majaari tama cua miiniu panishanojuaaja.

<sup>21</sup> Quiarjia niishiya cutaranijia, janiyari naa sesa miijiani: janiya jaara maninia casaa miiniu paniyani, janiyari saaja sesa miiquiaani. <sup>22</sup> Janiya cutaraari niishiyani Pueyaso rootasano Moisésri seetanujuanaa maninia cua tojishocoriquiano. Na tojiniucua jiaatiaquiaa juucuanijia. <sup>23</sup> Janiyari niishiyajaanihuaj, coojiaari juhua cua niishitiaja

paraca quiya. Naacuajitij, cua niishiriojosacari, “Maninia miiniutianiyanijia”, coojiaari saaja sesa cua miitiquiaa. Naacuajitij, tama janiyajaarijia juhua coojia seruni, cua miishacari puetunu sesa na panishanojuanaa.

<sup>24</sup> ¿Taa cua miiniutianiya socuaarini? ¡Tojetaarucuajanaa taraatia quijianijia! Pueyaracaanu sesa miijianijia. Majaari cua naata tamajaaja maninia miijia cua quiniu. Naa sesa miijia cua quishacaritij, cua cuaqueyari macu quiriquiano. ¿Cante na naata cua jataniniuni, naa sesa miijia cua quishacaritij? <sup>25</sup> ¡Pueyaso shuquiritiaanijia cua niishishacari, nojuacuajaari cua Jiyaniijia Jesucristota cua jataniniutianiya tojetaarucuajanaa maninia miijia cua quiniuria! Naacuajitij, mijiria cua quishacarijia, janiyari Pueyaso tojjia quiniu paniyani. Saniniuujia, naa coojia quiniuucua sesatej, saaja sesa cua miitiniu paniquiaari.

## 8

### *Pueyaso Sohuanu pa tojishacari, paari maninia miijia quiniutianiyani*

<sup>1</sup> Pa rupuesacari Jesucristo, nocua pa tiuushacari, Pueyasoori pa jiyanooquiaa. Naacuajitij, paari tojetaarucuajanaa jiyanooshano quiyani. <sup>2</sup> Puetunu pueyajanaari cusonuuriquiano quijia, sesa miijiaca nojori quishacari. Saniniuujia, Jesucristo pa rupuesacari, Pueyaso Sohuanuuri pa jiyatequiaa saaja maninia miijiaca pa quiniuria. Naacuajitij, majaari tari sesa miijiaca pa quiniu pa saniitiosaanura. <sup>3</sup> Moisés Rootasano pa tojishacari juucua, majaari pa naata quiniu jiyanooshano. Cunoori saaja sesa miijiaca pa quiniuucua. Naaratej, Pueyasoori Neyanujuanaa jiyaroquiaari mijiria, pueyano na quiniuria juhua pajaniya, pa niti na mosaanura. Naacuajitij, Jesucristo jiitiasacari juhua pa cuaqueyajuhaaj, Pueyasoori juhua sesa miijiara na jiyatequiaari, pa niti na saniitiosocoriquiano. <sup>4</sup> Naacuajitij, Pueyaso Sohuanu pa jiitiasacari quiarijia, pa naata maninia miijiaca quiniu, taa Moisés Rootasano sequeyacuajani. Pueyaso Sohuanu tojjia pa quishacari, majaari tari pa quiniu sesa miijiaca, taa pa quiquiaari tarijiacuajani.

<sup>5</sup> Canapuate tama na panishanojuaja miiquiaani, nojoriiri tama na cuaqueyajaaja shuqiritiniuria jiaatiaquiaa. Saniniuujia, canapuate Pueyaso Sohuanu tojjia cutarani, nojoriiri saaja Pueyaso shuqiritiniuria jiaatiaquiaa. <sup>6</sup> Tama na cuaqueyajaaja shuqiritiniuria jiaatijacaari saaja shaajecoriquiano cutara. Saniniuujia, Pueyaso shuqiritiniuria jiaatijacaari pueyaracaanu rishiriquiano cutara. Nojoriiri juhujaniya shuquiriaatia quijiacajuhuaaj. <sup>7</sup> Cante tama na cuaqueyajaaja shuqiritiniuria jiaatiaquiaani, nojuajaari Pueyaso paraca. Majaari Pueyaso tojjia na quiniu paniniu. Seetanujuanaa majaari na naata Pueyaso tojjia na quiniujiuhuaaj. <sup>8</sup> Naacuajitij, canapuate saaja tama na cuaqueyajaaja shuqiritiniuria jiaatiaquiaani, cuno pojoriiri maja na naata Pueyaso shuqiritiniu.

<sup>9</sup> Niajaniya cutaraari maja nia quiniu juhua cuno pojorijia, tama na cuaqueyajaaja shuqiritiniuria jiaatijacani. Niaa cutaraari Pueyaso shuqiritijia, Pueyaso Sohuanu cumaquishacari niajaniya, nojuaja jaara seetanujuanaa nioojiajinia quiya. Cante Pueyaso Sohuanu jiitiaquiiani, nojuajaari maja Pueyaso pueyano. <sup>10</sup> Cristo quishacari poojiajinia, pa sohuanuuri tari jatanishano quiya maninia miijiaca pa quiniuria, pueyaracaanu rishijia pa quiniurajuhuaaj. Pa cuaqueya cutaraari shaajasocoriquiano, sesa miijiaca pa quiniuucua. <sup>11</sup> Naajaa, Pueyaso Sohuanu jaara poojiajinia quiya, nojuajaari pa cuaqueya samiitianiunionutaniuhua, taa na samiitianiquiaariuhua macujiniji Jesucuaani.

<sup>12</sup> Naa Pueyaso miishacari maninia pajaniyatej, maninia miijiaca pa quiri Pueyaso Sohuanu cumaquishacari pajaniya. Maja cumaati tama pa cuaqueyajaaja pa shuqiritiniuria pa jiaatianu tari, taa pa miiquiaari tarijiacuajani. <sup>13</sup> Cante naa miijiaca quiyajaani, nojoriiri shaajasaariquiano. Saniniuujia, niaa jaara Pueyaso Sohuanu cumaacata rejeretariquia saaja tama sesa nia cuaqueya miiniu panishanojuaja, niaa cutaraari pueyaracaanu shuquiriaatia quijia quiniutianiya.

<sup>14</sup> Canapuate Pueyaso Sohuanu tojjiajicani, nojoriiri Pueyaso niquiohua cutara.

<sup>15</sup> Pueyaso Sohuanucuajaari pa jiyatequiaari Pueyaso muerasuniyojua pa quiniuria.



Naacuajitij, cuno pa jiidiasano Sohuanuuri Pueyaso pa sequetequiaa, “cua Quenaa”. Naa Pueyaso muerasuniyojua pa quishacaritij, majaari tari pa puerenu paari sani-itiosaanutaniyani, Moisés Rootasano pa tojiyaquiniuucua. <sup>16</sup> Pueyaso Sohuanuuri pa sohuanu rupuequiaa, na niishitiniuria pajaniya, paari Pueyaso muerasuni. <sup>17</sup> Naa Pueyaso muerasu pa quishacaritij, puetunu Pueyaso jiidiasanojuanaari pa jiidiasano quiniutianiyajuhuj. Pueyasoori Neyanu Jesucristota pa cojiritianutaniya naa maninia na miiniuria pajaniya, paa jaara naquiya miiniu rejeretajaca quirini, Jesucristoocua tiuujiaca pa quiniuucua. Paa jaara naquiya miishaare nocuara mijiriani, paari jiyanoehua maninia quijiacara jiyatesaanutaniyani juhua nojuajuhuj.

*Pueyasoori maninia miiniutianiya na muerasu*

<sup>18</sup> Quiarijia mijiria naquiya pa miiniuni, cunoori saaja rupaquijia. Janiyara, naa-jaa, cua niishishacari naa naquiya pa miiniu nuhuajitij, paari jiyanoehua maninia miishaanutaniyani, pueyaracaanu shuquiriaatia pa quiniuria. <sup>19</sup> Quiarijiani, puetunu Pueyaso shipinishano casaajanaari pa niquiniuucua jiaatiaa paa jaara quiariniora jatanishaareni. Na niishiniu paniyari taamueca quijiacara Pueyaso jataniniutianiya pajaniya na cumacatani, tojetaarucuajanaa maninia jeenucuasano na muerasu pa quiniuria. <sup>20</sup> Coteenujanaa pa supuetana pueyano jaara juhuacatecara sesequiaari, jiyacaritij, puetunu Pueyaso shipinijosano casaajanaari sesequiaarijuhuaj. Majaari na sesenu quiquiaari tama na panishacarijiaaja. Pueyasocuaajaari naa paniquiaari sesa na quiniuria, na shipinishano pueya sesenucuajuhuj. Naajaa, majaari pueyaracaanu sesa na quiniu quiniutianiya. <sup>21</sup> Pueyaso muerasu jaara jatanishaare shacantuuca quijiaca pa quiniuria, jiyacaritij, puetunu Pueyaso shipinijosano casaajanaari pata cojiritiasaanutaniya jeecanujuhuj. Naacuajitij, puetunu Pueyaso shipinijosano casaajanaari maniniara quiniutianihua, maja na sesenura socua. <sup>22</sup> Quiarijiani, puetunu Pueyaso shipinijosanojuanaari jiyanoehua noojia niojiya taraatia na quishacari. Quia-tojiyari juhua maaji noyano, cuara quiariniora jatanishaarejaatijia. <sup>23</sup> Majaari saaja puetunu Pueyaso shipinishano casaajanaa quiatojonu, poojiaari juhua quiatojiyajuhuj, na panishacari tojetaarucuajanaa jatanishano quijiaca pa quiniuria. Paacuajaari tari jiidiaa Pueyaso Sohuanu poojiajiniani, pa niishiniuria, paari seetanujuanaa Pueyaso muerasuni. Saaja pa cuaqueya cutaraari juhuanojua jatanishoojua. Paari cunora quiatojiyajaani. <sup>24</sup> Paacuajaari tari Pueyaso muerasu quiyani. Jesucristo cutaraari pa saquiriojoquiaari shacantuuca quijiacara pa jatanishaanura. Paari naa na jataniniuria pajaniya sashiyajaani. Pa cuaqueya jaara tari jatanishano quiriquia, paa maara na jataniniuucua jiaatiaaquirini. Paa jaara tari jiiditariquia pa panishanoni, ¿paatucua casaara nocua jiaatiare socuani? Pa cuaqueya cutaraari juhuanojua jatanishoojua. <sup>25</sup> Naajaa, paacuajaari niishiyani pa cuaqueyari jatanishaanutaniya, jiyocuacaanu pa rupuenura pa Jiyaniijia. Cunora, paari mijiria taraatia pa quishacari juhujaniya rejeretaquiaani pueyaracaanu pa sashishacari.

<sup>26</sup> Naa rejeretajaca pa quishacari mijiria pa sashishacari pueyaracaanutej, Pueyaso Sohuanuuri pa cumaquiquiaa, cumueeca pa quiyaquishacari. Naacuajitij, Pueyaso pa secojosacari, pa niishiyaquishacari casaacuara pa secojonutaniyani, Pueyaso Sohuanucuaajaari poojiajiniji Pueyaso secojoquiaa pocuara. Jiyanoehua na secojosacari pocuara, jiyasohua quiatojiya poojiajiniaari. <sup>27</sup> Poojia niishijia Pueyasoni, nojuajaari niishiyacuaja casaa na Sohuanu secojiya nojuaja pocuarani. Na Sohuanucuaajaari maninia secojojua cutara, taa Pueyaso miiniu paniya na muerasuracuajani.

*Jesucristo pa shocotanjia cutara*

<sup>28</sup> Paacuajaari niishiyani, paa jaara maninia miishaareni, paa jaara sesa miishaarejuhuaj, Pueyasoori puetunu cuno miishanojuanaa jiyatequiaa saaja maninia na quiniuria na panijiacara. Nojuacuajaari pa saquiriojoquiaari na muerasuniyojua pa quiniuria. <sup>29</sup> Naajuhuj, jiya shipiniyaquishacarijia, Pueyasoori tari niishiquiaari na panishano pueyarano. Pueyasoori jiyacari sequequiaari cuno pojoriiri juhua Neyanu Jesucristo quiriquianojuhuaj. Naa sequequiaariiri Jesucristo quiniuria pa puerana, queraatia

tapueyocuacaraca na quiniuria. <sup>30</sup> Naacuajitij, canapue Pueyaso saquiriojoquiaari na muerasu nojori quiniuriacuajani, juhua Jesucristo nojori quiniuriajuhuaj, Pueyasoori cuno pojori niishitiquiaa nojori tiuuniuria Neyanuucua. Jesucristoocua nojori tiu-ushacari, Pueyasoori nojori jiyatequiaa juhua sesa miyashijiacara. Jiyanooshano nojori quishacari, Pueyasoori nojori niqitioquiaa na Sohuanu, na Sohuanu jataniniuria nojori shacantuuca quijiaca nojori quiniuria juhua Neyanu.

<sup>31</sup> Naa Pueyaso miishacari maninia pajaniyaratej, ¿taa pa sequeyani? Pueyaso jaara pa jiyano quiya, ¿tamonte na naata sesonu pajaniya? ¡Maja! <sup>32</sup> Pueyasoori jiyanoohua pa panijia. Nojuajaari Neyanuniyojua jiyaroquiaari pocuara mosocoriquiano. Nojuaja jaara Neyanu jamueyaquiquiaaricuaa, ¿maatucua casaara quiarjia niqitioyaquiri puetunu pa panishanojuanaani? <sup>33</sup> ¿Cantucua Pueyaso saquiriojosano pueyacuara saquiriojotare sesa nojori miishanoni? Pueyasojuanaacuajaari pa jiyatequiaari juhua sesa miyashijia pa quiniuria. <sup>34</sup> Jesucristocuajaari tari cusoquiaari pa niti. ¿Cantucua saniniuujia quiarjia Pueyaso sequeriquia pocuarani: “Cuno pojori quia shaajare”? Pocuaji Tacunacuajaari samiitiaquiaariuhua. Quiarjia na Que Pueyaso miaquetajara cajiyari, pocuara na Que na secojonura pueyaracaanu. <sup>35</sup> Nojuajaari jiyanoohua pa panijia. ¿Tamonu casaate na naata Cristo tarinitiniu maja na paniniuria pajaniya? ¡Majaari quenaaja casaa quiniu na tarinitiniuria nojuaja! Naaratej, majaari nia jiyaniniu Cristo pa paniyaquiya, paa jaara taraatia miishiyani, paa jaara casaacua tacayani, tamasa jaara naquiya miya pajaniyani. Naajuhua, paa jaara quera titiacoya pa miaajenutani, majaari nia jiyaniniu Cristo pa paniyaquiyani, naajuhua, paa jaara toqueeju quiyani, paa jaara cocuaatia miyani, paa jaara miananajoshiya monurajaniuhua. Puetunu niojuanaari maja na tarinitiniu Jesucristo, na paniyaquiniuria pajaniya. <sup>36</sup> Paacuajaari taraatia miishocoriquianoni, naatej, taa tariucuacaanu Pueyaso Rupaajinia naajiotasano quiyacuajani. Naa sequeyari:

“Canaa Pueyasonaa, canaari puecooshiya pueyaracaanuni, quia tojitajaca canaa quini-uucua. Nojoriirijuhua miaquesocoriquiano borregohua canaa puecooquiaa juhuajaniya”.

<sup>37</sup> Paari naa miishaaquiaajaaniuhua. Naajaa, naa taraatia pa miishacaritij, Jesucristo panishacari pajaniya, nojuajaari shocotajacara pa jiyatequiaa. Naacuajitij, majaari saaja pa rejeretanu naquiya pa miishacari. Jesucristoori seetanujuanaa cuno naquiya pa miiniu jiyatequiaa maninia na jeeanura pajaniya, juhua nojuaja pa quiniuria socua. <sup>38</sup> Seetanujuanaa niishyanijia, Pueyaso panishacari jiyanoohua pajaniya, majaari quenaaja tamonu casaa na naata rupatanu pajaniya Nojuajiniji. Paa jaara quiri saminiojuani, macu soj, naajaa, pa panijia Pueyasocuajaari pata quiyajaa. Naajuhua, Pueyaso seya, samaruhanio, puetunu cunojuanaari maja na naata pa rupatanu Pueyasocuaji. Naajuhua, majaari quenaaja tamonu cumaacaraca quijiaca na naata pa rupatanu Pueyasocuaji. Pueyaso paniniu pajaniyani, cunoori maja na puequenu quiniutianiya quiarjia, tamacarinio. <sup>39</sup> Naajaariuhua, tee pa quiyani, jiyocuacaanu, jiya cariquimia soj, naajaa. Pa panijia Pueyasoori tii quiya patajuhuaj. Naacuajitij, pa Jiyaniijia Jesucristota rupetootesano pa quishacari, puetunu Pueyaso shipinijosano casaajanaari maja na naata pa rupatanu Pueyasojiniji.

## 9

### *Pueyasojuanaari pueya saquiriojojua na pueyara*

<sup>1-3</sup> Naa Pueyaso pueyano cua quishacaritij, janiyari jiyanoohua cuarta Israel pueyacuara tarajequiaani, nojori tiuyaquiniuucua pa Jiyaniijia Jesucristoocua. Janiyari pueyara-caanu nojoriicua tarajequiaa jiyanoohuani, maja cua naata quishacari cuarta Israel pueya tiutiniu Jesucristoocua. Seetanujuanaa nia sequeyanijia, Pueyaso jaara na naata quiri mani quiqiojinia na jatanura janiya nojori niti, janiya maara sequereni, maniacuajaari naa cua miishaanura. Nojori jaara na naata quiri Jesucristoocua rupetesaanu cua niti, janiya maara Pueyaso sequereni: “Cua rupatare cutara Jesucristojiniji, saniya cuarta Israel pueya jiyatesaanura Pueyaso muerasura cutara”.

Naa cua sequesacari niajaniatej, janiyari coojiajinia niishiyani, seetanujuanaari cua sequesano. Pueyaso Sohuanuuri cua niishitijajuhuj majaari cua sapojonu. <sup>4</sup> Cuarta Judiocuacaari pa supuetana Israel niquiohuacuajinio supueno pueyacuaja. Pueyasoori nojori jiyatequiaari na muerasu nojori quiniuria, nocua nojori tiuushacari. Pueyasoori nojori niquitiquiaari shacantuuca na cumaaca, tariucuacaanu nojoritia na quishacari. Pueyasoori nojori sequequiaari: “Janiyacuajaari Pueyasoni. Niaari cua pueya quiniutianiya niaa jaara cucua tiuuri”. Naajuhuj, Pueyasoori Moisés niquitioquiaari caapiqui saajianeecua na naajiosano, saniniuujia Moisés niishitiojonura tiji nojori. Pueyasoori nojori niishitiquiaarijihuuj taa nojori miiniutianiyani, tariucua jiyanooshano nojori rerejonura na niquiara. Pueyasoori nojori sequequiaarijihuuj, nojuajaari puetunujuaana na sequesano Abraham tohuateenutaniya nojoriria. <sup>5</sup> Israel pueya supuetanaari quiquiaari Abraham, Isaac, Jacobonio. Pa Jiyaniijia Cristoori cuno pojori niquiohuacuajinio supuequiaari. Nojuajaari tari jiyatesaaquiaari Jiyaniijijanaa na quiniuria, puetunu casamijianaa jiiitiana na quiniurijuhuj. Nojuajaari Pueyasojuhuanajaj, juhua na Quejuhuaj. ¡Nojuaja cuara pueyaracaanu maniniuhuaqueetasano quiiria! ¡Cuara naa quiiria pueyaracaanutej!

<sup>6</sup> Quiarijiani, queraatia parta Israel pueyajinijinio pueyari maja Pueyaso muerasu. Naa cua sequesacari niajaniatej, majaari nia jyaniniu tariucuacaanu Pueyaso sequesano pa supuetanaari tohuateyaquiniutianiya. Maja pueyanaa. Tohuateenutaniyanocuaja. Jaara naa quiriritij, ¿casaara puetunu Israel pueyajanaa maseyaquiniutianiya Pueyaso sequesano nojoririaarini? Cua tojitiare pueyanaa. Puetunu pa supuetana Israel niquiohuacuajinio supueno pueyajanaari maja seetanujuanaa Israel pueya Pueyasora. <sup>7</sup> Naajaariuhua Abraham niquiohua. Puetunu Abraham niquiohuajanaari maja seetanujuanaa Abraham niquiohua na quiniu quiquiaari Pueyasora. Pueyasocujaari naa sequequiaari Abraham:

“Cua sequesano quiajanियari saaja quia niyanu Isaaccuajinio supueno pueyarano quiniutianiya cutara”.

<sup>8</sup> Naa Pueyaso sequesacari Abrahamtej, naacuajiti paari niishiyani, majaari puetunu Pueyaso saquiriojosano pueyacuajinio supueno pueyajanaa seetanujuanaa Pueyaso muerasu. Saniniuujia, seetanujuanaa Pueyaso muerasu cutaraari noo pojori, Pueyaso sequesanoocua tiuujiacatej, taa pa supuetana Abraham tiuuquiaari Pueyaso sequesanoocuaacuaani. Pueyasora, nojori cutaraari Abrahamcuajinio supueno pueya. <sup>9</sup> Abrahamri Pueyaso sequesanoocua tiuuquiaari, Pueyaso jaara naa na sequequiaari:

“Abrahamnaa, janiyari quiocua tacatenutaniuhua tamacarini. Janiyari jiyacari quia niquio Saara riuritanutaniuhua tariucua mueyaracani”.

Naacuajitij, Isaac jaara rasaanquiaari, Pueyaso sequesanoori tohuateequiaari. Naacuajitij, puetunu Abraham niquiohuajinijiniojuanaani, saaja Isaacri Pueyaso saquiriojosano pueyano quiquiaari.

<sup>10</sup> Naa quiquiaarijiaariuhua Isaac niquiohua. Isaac jaara neco Rebeca manajoquiaari, Rebecaari caapueya manajequiaari. <sup>11-13</sup> Cuno caapueya royaquishacarijia, juhuanujuaja nojori niishiyaquishacari maninia miiniu, sesa soj, jiyacariti Pueyasoori na nucua sequequiaari:

“Janiyari quia jiyapueranu jiyatenutaniya na nuhuajishana tojijiarani”.

Naa Pueyaso sequesacaritij, cunoori juhua Pueyaso sequesano tariucuacaanu. Naa sequequiaari cuno royaquishoojua caapueyajinijiiri:

“Jacoboori cua panishano quiniutianiya. Esauuri saniniuujia cua soosano quiniutianiyacujua”.

Naa Pueyaso sequesacaritij, paari niishiyani, Pueyasoori saquiriojoquiaa cana na saquiriojonu paniyacuajani, tama na miiniu panishanojuaja na tohuateenura. Naacuajitij, Pueyaso jaara saquiriojore pueya, nojuajaari maja na niishiriojonu nojori miishanojiniji; maninia, sesa soj.

<sup>14</sup> Naa Pueyaso miishacari tama na panishanojuuajatej, ¿taa pa sequeyani? ¿Pueyasote sesa miya, naa rimiajata na saquiriojosacari pueyatej? Maja. <sup>15</sup> Pueyasocuaajaari naa Moisés sequequiaari:

“Janiyari pueya jiyanooniutianiyani teyano pueyano cua jiyanooni paniyacuajani. Naajuhuj, janiyari pueyanoocua taraajenutianiyani, teyano pueyanoocua cua taraajenu paniyacuajani”.

<sup>16</sup> Naacuajitij paari niishiyani, pueyano maja na naata tama na cuaqueyajaaja jiyatenu Pueyaso pueyano na quiniuria. Pueyasocuaajaari tama saquiriojoquiaajaaja cana na jiyanooni paniyani. <sup>17</sup> Naajuhuj, tariucuacaanu Pueyaso sequesano Egipto jiyani-ijjaraari naa naajiotasano quiyajuhuj:

“Faraónnaa, janiyari quia jiyatequiaari Egipto pueya jiyaniijia quia quiniuriani, cua cumaacata cua miijosano cua niqitiniuria quiajaniya. Naacuajitij, puetunu jiyacajinia quiniaa pueyapuejanaari niishiniutianiya, janiyari Pueyasojuaanaa cutarani”.

<sup>18</sup> Naacuajitij, paari niishiyani, Pueyasoori taraajeja teyanoocua na taraajenu paniyani. Naajaariuhuj, nojuajaari na tojiyashijia pueyano jiuujia jiyateja cumajiuujiaacara, teyano pueyano jiuujia na jiyatenu paniya naaracuajani.

<sup>19</sup> Naa cua sequesacari nijaniyatej, tamonu naasucuaari sequenutaniya: “Pueyaso jaara naa miiquiaa taa na miiniu paniquiaacuajani, ¿maatucua casaara sesa pa miiniucua pa saniitireni? ¿Canteeri na naata Pueyaso tarinitiniu na miiniu panishanojinijini?”

<sup>20</sup> Majaari naa sequenu pueyanonaa. ¿Canteeri quiajaniyani, naa quia juaaniuria Pueyasotej? Paacuajaari na shipinishano pueyani. ¿Taa nia sequeyani? Marau jaara pocuanu niishiriquia, ¿nojuajate na naata na paninia juaaniu: “Juaashiquiaracanaa, ¿casaara quia panirii conatura janiyani?”” <sup>21</sup> Paniyojojuacuajaari na naata paniniu maraujiniji na panishano casaa, shanohua pataconiyojua, mashaca quiquiora manijinia cajitiariquiiano conatunio.

<sup>22</sup> Naajuhuj, ¿taa pa sequenutaniyani, Pueyaso jaara niishitiniu paniya na juaaniu, na cumaacanio, na saniitiosacari sesa miijiaca? Naajaa, Pueyasoori jiyanoohua rejeretaquiaa sesa miijiaca, cante tari saniitiosocoriquiiano quiyacuajani. <sup>23</sup> Pueyasoori naa tarishiyajaara na saniitionura na tojitiaashijia pueya. Naa na tarishishacaritij, nojuajaari pueya niishitiquiaa na shacantuuca cumaaca, maninia na miishacari na jiyanooshano pueya, cante tari saquiriojosano quia na shuriucua quiriquianocuajani. <sup>24</sup> Paacuajaari cuno jiyanooshano pueyani, canapue tari Pueyaso saquiriojoquiaaricuajani Judiocuacajinijinio, taucacajinijinionio. <sup>25</sup> Naa naajiotasano quiyacuajaari Pueyaso sequesano supuetana Oseas naajioneejinia:

“Cante cua pueya quiaquiquiaarini, janiyari nojori sequenutaniyani: ‘Niaari cua quiquiohuanijojua’. Naajuhuj, cante cua shuquiritasoo pueya quiquiaarini, nojoriiri cua timitiasano pueyara quiniutianiya”.

<sup>26</sup> Naa naajiotasanoori quiyajuhuj:

“Tee cuniqui naa pueya sequesaaquiaaricuajani: ‘Niaari maja cua pueya’, nojoriiri cuniquijia jiyaniquishaanutaniya: ‘Niaari Pueyaso niquiohuajanaa cutara’ ”.

<sup>27</sup> Saniniuujia, supuetana Isaíasri naa sequequiaari Jacobo niquiohuacuajinio supueno pueyajiniji:

“Israel pueyari jiyanoohua canenutaniya, juhua shoniniacu caminia shuriuquioco paajia jaaquia, serojosoo. Saniniuujia, saaja secaja nojorijinijinioori Pueyaso pueyara jatanishaanutaniya. <sup>28</sup> Pueyasoori mijiriara na sequesano tohuateenutaniya. Majaari na tarishiniu quiniutianiya”.

<sup>29</sup> Supuetana Isaíascuajaari naa sequequiaari tarijiajuhuaj:

“Pa Jiyaniijia Pueyaso jaara Israel pueya niquiohua jiyanoaquiquiaari, Israel pueya maara quiarijia quiaquiri. Maara tari shaajasaacanu tojetaarucujanaa, naatej, taa Sodoma tiacajinia quiniaa pueya puecoosaaquiaaricuaani, Gomorra tiacajinia quiniaa pueyano”.

*Judiocuacari Pueyaso rupaacua tiuyashijia saaja*

<sup>30</sup> Naa cua pohuatasacari nijaniya tariucuacaanu Pueyaso Rupaajiniitij, paari quarijia nio niishiyani: taucuacaari maja quenaaja na tacaaniu quijia taate nojori naata Pueyaso jiyanooshano quiniuni. Nojoriiri juhuajaniya quijia saaja. Naajaa, quarijia, Pueyasoori nojori jiyatequiaa juhua sesa miyashijiacara, saaja Jesucristoocua nojori tiuushacari. <sup>31</sup> Israel pueyari saniniuujia jyanohua Moisés Rootasano tojjiaca juucua, nojori jyanishacari Pueyaso naasucuaari naa nojori miishacari nojori jiyanooniutianiya. Majaari Pueyaso jyanooniu quijia nojori. <sup>32</sup> ¿Niaate niishiya casaara Pueyaso jyanoy-aquiquiaari nojorini? Pueyasoori nojori jyanoyaquiquiaari nojori tiuyaquiniuucua nocua. Nojoriiri jyaniquiaari tama nojoriijaarijia na naata tama nojori cuaqueyajaaja jiyatenu juhua sesa miyashijiacara, Moisés Rootasano nojori tojishacari. Naaratej, majaari nojori tiuuniu quiquiaa Jesucristoocua. Nojoriiri saaja na sooquiaa. Naacujitij, Jesucristoori juhua saajia nojoriria, nocua nojori tiuriiniuria. <sup>33</sup> Jesucristojiniji miriqui Pueyaso sequesanoajaari naa naajiotasaaquiaari tariucuacaanu, Jesucristo niyacarijia: “Cua tojitiare. Janiyari Sión tuhuananuucua nianutaniya saajiani, pueya tiuriiniuria nocua. Saniniuujia, cante nocua tiuyani, nojoriiri puetunu Pueyaso sequesanojuanaa na muerasurano masenutaniya”.

## 10

<sup>1</sup> Cuarta Pueyaso muerasunaa, janiyari jyanohua Pueyaso secojoquiaani parta Israel pueyacuara, Jesucristoocua nojori tiuuniuria, Pueyaso pueya nojori quiniurijuhujaj. Janiyari jyanohua nojoriicua tacayani. <sup>2</sup> Janiyacuajaari seetanujuanaa niishiyani, Israel pueyari seetanujuanaa Pueyaso panishano miiniu panijiaca juucua, na muerasu nojori quiniuria. Nojoriiri naa miiquiaa najuhuanaj, nojori niishiyaquishacari maninia. <sup>3</sup> Nojoriiri saaja sequequiaa, majana Pueyaso naata pueya jyanooniu saaja nojori tiuushacari nocua. Naaratej, nojoriiri jyanohua saniniuujia maninia nojori quiniuria Pueyaso niqiuara tama nojori miishanotajaaja. Naacujitij, nojoriiri Jesucristoocua tiuyaquiquiaa Pueyaso jyanooniuria nojori. Pueyasojuanaari Cristo jiyatequiaari pa niti mosocoriquiano. <sup>4</sup> Naacujitij, Cristo jaara mosaaquiaari, nojuajaari Moisés Rootasano tojiniu tohuatequiaari cutara. Naacujitij, Pueyasoori puetunu nocua tiuuniaajanaa jiyatequiaa juhua sesa miyashijiacara. <sup>5</sup> Moisés cuajaari naajioquiaari taa na rootasano tojjiaca miiniutianiyani, juhua sesa miyashijiacara nojori quiniuria. Nojuajaari naa naajioquiaari:

“Cante puetunu cua rootasanojuanaa tojijiani, nojuajaari pueyaracaanu rishijia jiyatesaanutaniya”.

<sup>6</sup> Saniniuujia, saaja Jesucristoocua pa tiuushacari, paari juhua sesa miyashijiacara jiyatesaaquiaani, pueyaracaanu rishijia pa quiniuria. Naacujitij, majaari naa nia niishiriojonu nioojiajinia nia taacanuusacari: “¿Cante na naata jiyocuacaanu tacanu Jesucristo na roshiniuria Pueyaso pueyara na jataniniuria pajaniyani?” <sup>7</sup> Naajuhujaj, majaari naa nia niishiriojonu: “¿Cante na naata macunucua quiquiojinia quianu, Jesucristo na tacaniniuria pocuani?” ¡Pueyanaa, majaari quenaaja naa nia niishiriojonutej!

<sup>8</sup> Pueyaso Rupaacujaari tari naa naajiotasaaquiaari pajaniyara:

“Niaacujaari cua rupaa jiitiaa. Niaari na niishiyajuhujaj. Nioojiajinia quiyacuajaari”.

Cuno rupaa canaa na pohuataquiaa nijaniyani, cunocujaari Jesucristoocua nia tiuuniuria. <sup>9</sup> Naacujitij, Pueyasoori pueya jiyatequiaa na pueya nojori quiniuria, Jesucristoocua tiuujia jaara pueya niqiuara pohuatare: “Jesucristoori seetanujuanaa jyanijiajanaa cutara”, noojiajinia na niishishacarijuhuaj Pueyasoori Jesu samiitiani quiaariuhua macujiniji. <sup>10</sup> Seetanujuanaa naari: poojiata pa tiuushacari Neyanuucua, Pueyasoori pa jiyateya juhua sesa miyashijia pa quiniuria. Naajuhujaj, pa rupaata pa pohuatasacari: “Janiya Jesucristoocua tiuujiani”, jiyacaritij, Pueyasoori pa jataniquiaa na pueya pa quiniuria cutara.

<sup>11</sup> Tariucuacaanu Neyanujiniji Pueyaso sequesanoori naa naajiotasano quiyajuhujaj: “Puetunu nocua tiuuniaajanaari puetunu cua sequesanojuanaa cua muerasurano masenutaniya”.

<sup>12</sup> Naacuajitij Judiocuaca, mariyata taucucanio, nojori jiyanooshaanutaniya nojori jaara sequere: “Jiyaniijianaa, cua jiyanoori”. Pa Jiyaniijiaari maja rimiajata na jiyanooni nocua tiujujaca pueya. Nojuajaari jiyanoohua capora. Jiyaniijijanaa cutaraari.

<sup>13</sup> Tariucuacaanu Pueyaso Rupaajiniaari naa naajiotasano quiyajuhujaj:

“Puetunu pueyajanaari Pueyaso pueyara jatanishaanutaniya nojori jaara Jiyaniijia sequere: ‘Jiyaniijianaa, cua jiyanoori’”.

<sup>14</sup> Jaara naa quiritij, ¿pueyatucua taa Jiyaniijia secojonuureni, nojori jaara nocua tiuyaquiyajaa? Naajuhujaj, ¿pueyatucua taa nocua tiuurini, nojori jaara nojuajiniji pohuataaquishoo quiyajaa? ¿Nojoritucua taa nojuajiniji niishijia quirini, tamasa jaara quenaaja nojori pohuataaquiri? <sup>15</sup> ¿Pueyaso Rupaa pohuatanaatucua taa cuno pojoricua quiaareni, nojori jaara jiyaramiquiyaquishaare? ¿Pueyaso rupaa pohuatanaate jiyaramiquiyaquishaaquiaari? ¡Maja! Jiyaramiquishaaquiaaricua. Naaratej, naa naajiotasano quiyari tariucuacaanu Pueyaso Rupaajinia:

“Jiyanoohua timitiasano pueya cutaraari, noo nojori canapuate tamasaacua quiajani, nojori na pohuatanura Pueyaso rupaa”.

<sup>16</sup> Naajaa, majaari puetunu pueyajanaa tojiniu quiquiaa, Pueyaso Rupaa jaara nojori niqiuara pohuataasaare. Naacuajitij, supuetana Isaíasri naa sequequiaari na taraajenuta: “Jiyaniijianaa, majaari pueya tojiniu paniniu canaa pohuatasano quiajanijini”.

<sup>17</sup> Naacuajitij pueyanaa, paa jaara Jesucristo rupaa pohuataasaareni, paari pa numaata na tojiyani. Paa jaara pa tojishanoocua tiuurini, Pueyasoori pa jiyatenutaniya na pueya pa quiniuria.

<sup>18</sup> Pa jaara Pueyaso pueyara jiyatesaaquiaa saaja pa tiuushacari Pueyaso rupaacua, jaara naa quiritij, ¿casaara puetunu Israel pueyajanaa Pueyaso pueyara jiyateyaquishaaquiaariirini? ¿Cristo rupaateeri nojori niqiuara pohuataaquishaaquiaari? Maja. Nojori niquiaracuajaari pohuataasaquiaari. Naa naajiotasano quiyacuajaari tariucuacaanu Pueyaso Rupaajinia:

“Pueyaso Rupaacuajaari puetunu jiyacajiniajanaa pohuataasaquiaari. Na rupaari tojishaaquiaari puetunu tiqiyocujanaa, jiya puequeetujinia”.

<sup>19</sup> Jaara naa pohuataasaquiaaritij, ¿Israel pueyateeri Pueyaso rupaa niishiyaquiquiaari nojori tojishacari? Maja. Nojoricuajaari na niishijica quiquiaari. Nojoriiri saaja na ruuretajaca quiquiaari. Supuetana Moisés cuajaari naa naajiotaquiaari Pueyaso sequesano Israel pueyara, tariucua na tojiyashijica nojori quishacari:

“Maninia cua miishacari tiqiyocua quijiaca taucua nia niti, janiyari nia juaatiniutianiyani. Niaari jiyanoohua juaniutianiya cua jiyanooshacari mosanucua taucua”.

<sup>20</sup> Na nuhuaji, supuetana Isaíasri naa maatia sequequiaari Pueyaso niishitiosano nojuaja: “Cucua jiaatiaashijica taucua cutaraari cua riuriataquiaa, cua tojijica nojori quiniuria cutara. Naajuhujaj, janiyari cua pajeyashijica taucuaacua muetaquiaani”.

<sup>21</sup> Saniniuujia, Isaíasri naa Pueyaso sequesano Israel pueyajiniji naajiotaquiaari:

“Janiyari puetunu juucujanaa Israel pueyacuaji masequiaa juucuani, maninia cua miiniu panishacari nojori. Nojoriiri saaja cua shocotequiaa, cua tojiyashijica pueya nojori quishacari”.

## 11

### *Israel pueyajiniji curenoori Pueyaso saquiriojosano*

<sup>1</sup> Israel pueya jaara naa Pueyaso tojiyashijica quiya, ¿Pueyasote seetanujuanaa nojori tarinitiacanu, na tojiyashijica nojori quiniucua? ¡Maja pueyanaa! Janiyacuajaari Israel pueyanojaniuhujaj. Abrahamri cua supuetana. Janiyari na jinianu Jacobo niyanu Benjamíncuajinio supuenoni. <sup>2</sup> Naacuajitij, janiyari niishiyani, Pueyasoori maja na cartenu quiquianu puetunu tariucuacaanu na saquiriojosano Israel pueyajanaa. ¿Niaateeri supuetana Elíasjiniji naajiotasano niishiyaquiya? Tariucuacaanu Pueyaso Rupaajinia

naa naajiotasano quiyacuajaari Elías sequesano Pueyaso, na tacaashacari Israel pueya quiniuucua sesa:

<sup>3</sup> “¡Cua Jiyaniijianaa, cuarta Israel pueyari puetunu quia sequesano caminiujiuniaa pueyajanaa puecoorucuaa! ¡Saa janiyajaari cureyani! Naajuhuj, nojoriiri puetunu juhuacutucujanaa niyarequetarucuaa, tee quia tojitiajaca pueya catijiaquiaa na seya quiocuaracuajani. ¡Nojoriiri quiarjia cua pajenuyajuhuj, na motunura janiya!”

<sup>4</sup> Pueyasoori naa Elías riucuaquiaari saaja:

“Janiyari siete mil pueya jitiaajaani. Nojoriiri cua tojitiajaca. Nojoriiri maja na mojuquetaconu quiquiaa cuno sacuaraatia shipinishano Baalcuara cua niti, taa narta Israel pueya miiquiaacuaani”.

<sup>5</sup> Quiarjiaari naajuhuj, Pueyasoori secaja na saquiriojosano Israel pueyajinijinio jitiaa, jiyanootio na quiniuucua. <sup>6</sup> Naa Pueyaso muerasu nojori quishacari saaja Pueyaso jiyanooniuucua nojori, naacuajiti paari niishiyani, majaari Pueyaso saquiriojonu quiquiaari nojori, maninia nojori quiniuucua. Nojori jaara maninia miijiaca quiriquia, nojori maara paniyaquiri na jiyanooshaanura.

<sup>7</sup> Naacuajitij, paari niishiyani, Pueyasoori saaja na saquiriojosano pueya jiyatequiaa na muerasura. Israel pueya saniniuujia, nojoriiri saaja maninia quiniuria saniniuujia juucua. Naajaa, majaari nojori naata tama na cuaqueyajaaja jiyatenu quiquiaari Pueyaso muerasu nojori quiniuria. Cuno pojori jiuujiaari saaja cumajiuujiaacara quiquiaari, tojetaarucujanaa niishiyashijia nojori quiniuria. <sup>8</sup> Tariucuacaanu Pueyaso Rupaajiniacuajaari naa naajiotasano quiya:

“Pueyasoori nojori jiyatequiaari niishiyashijiaacara, maja nojori niishiniuria nojuaja. Naaratej, majaari nojori niishiniu quijia, nojori niquishacari Pueyaso miishano. Majaari nojori niishiniu quijiajuhuaj, nojori tojishacari na rupaa. Israel pueyari naa Pueyaso tojiyashijia quiyajaa quiarjiani”.

<sup>9</sup> Supuetana David sequesanoori nojorijiniji naa naajiotasano quiyajuhuj:

“Pueyasonaa, Israel pueyari puetunu nojori panishanojuanaa jitiaa, maninia quia miishacari nojori. Saniniuujia, nojori tojiyaquiniuucua quiajaniya, nojori shuquiritasano casaa cuara quiriia juhua norijia tama nojoririjaaja, nojori saniitiosaanura. <sup>10</sup> Nojori jiuujia cuara jataara juhua cariyojuarujuriria, maja nojori niishiniuria seetanu Pueyaso rupaajanaa. Nojori cuara porequetacoora socua, pueyaracaanu taraatia nojori miishacari”.

*Pueyaso jiyanooshacari taucuaca, Israel pueya niti*

<sup>11</sup> ¿Niaateeri jiyaniya Pueyasoori Israel pueya cartequiaarijianaa, tojiyashijia nojori quiniuucua? Maja. Pueyaso tojiyashijia nojori quiniuucua, taucuacaari saniniuujia Pueyaso muerasura quiquiaa, nojori tiuushacari Jesucristoocua. Cunoori Israel pueya jiaatianiquiaa taucuacaacua, Pueyaso muerasu nojori quiniurijuhuj. <sup>12</sup> Quiarjia, puetunu jiyacajinijanaa taucuacaari shuquiriaatia quiya, Pueyaso muerasu nojori quishacari Israel pueya tiyaquiniuucua Jesucristoocua. Saniniuujia, Israel pueya jaara Pueyaso muerasura quirihoa Jesucristoocua nojori tiuushacari, jiyacaritij, socua jiyanoohua maninia quiniutianiyari puetunu pueyapuerajanaa, puetunu jiyacajinijanaa.

<sup>13</sup> Taucuacajinijinio cuarta Pueyaso muerasunaa, cua tojiri. Nia sequenu panianijia. Janiyari seetanujuanaa jiyaramiquishaaquiaari Jesucristo rupaa cua pohuatanura taucuaca niquiarani. Naaratej, janiyari puetunu cua cumaacatajanaa pohuataquiaa Jesucristojiniji taucuaca niquiarani, nojori quiniuria Pueyaso muerasujuhuj. <sup>14</sup> Janiyari seetanujuanaa naa miiquiaani cuarta Israel pueya jiaatianura niaacua, nojori tiuniuria Jesucristoocujuhuj, noojiaqueya nojorijinijinio Pueyaso jiyatenura na pueyara.

<sup>15</sup> Pueyasoori juhua taanuquiaari Israel pueya nocuaji, nojori tiyaquishacari Neyanuucua. Naajaa, naacuajiti Pueyasoori puetunu mijiria quiniaa pueyapuejanaa jiyanooquiaa, na muerasu nojori quiniuria. Saniniuujia, Israel pueya jaara jiyanooshaarohua, jiyacaritij, jiyanoohua maninia quiniutianiyari puetunu pueyapuerajanaa. Israel

pueya tiuushacari Jesucristoocua, nojoriiri juhua macujiniji samiitiaconutaniuhua.  
<sup>16</sup> Seetanujuanaa maninia nia niishiniuria nio miriqui cua pohuatasanonni, maatia nia pohuatareeraj. Nia tojiri. Coteenujuanaa pa jiunioctasano neecaruu jaara maninia quiri Pueyasora pa niqutiosocoriquiano, tariquiaari puetunujuanaa maniniajuhua Pueyasora. Naajuhuj, naana nujuaca jaara maninia quiri puetunujuanaa, na cashacucuaari manini-uquiucujuhuj. Nio miriqui cua pohuatasanoori nia niishitiya cutara Israel pueyajiniji. Naacuajitij, Pueyaso jaara Abraham jiyanoocuaaricuaa nocua na tiuushacari, naacuajiti paari niishiyani, Pueyasoori puetunu Israel pueyajanaa jiyanooniutianiyajuhuj, nojori jaara tiuuriquia Jesucristoocua.

<sup>17</sup> Supuetana Abrahamri juhua Pueyaso panishano olivo naana nujuaca. Saniniuujia, na jinianuucujinino supueno Israel pueyari juhua na cashacucua. Cuno na cashacucujinijinio jaara Jesucristoocua tiuyaquiuaari, Pueyasoori na piyotaquiuaari. Niajaniya saniniuujia taucacanaa, niaari panishoo quiquiaari, juhua nacujiniaacoji olivo naana cama, maja natau. Naajaa, Jesucristoocua nia tiuushacari, Pueyasoori nia rupotaquiuaari na panishano naanaacua nia moritianura. Naa Pueyaso panishano naanaacua nia moritiasacritij, cuno naana nujuacaari nia nujuacajuhuj. Naacuajitij, niaacuajaari puetunu Pueyaso sequesanojuanaa supuetana Abrahamra masequiaa tari.

<sup>18</sup> Naa Pueyaso rupotanuucua niajaniya na panishano naanaacuatej, majaari tama nia cuaqueyajaaja nia shuquiritianu. Majaari nia jyaniniu niaa cutaraari socua maninia pueya, Pueyaso cartesano Israel pueyajiniji. Niaa jaara jiyaniya niaari socua maninia pueya nojorijiniji, nia niishiri, niaari maja nia nujuaca rishitijia. Nia nujuaca cutaraari nia rishitiya.

<sup>19</sup> Naa naasucuaari sequeya: “Taaquiririnij. Cuno olivo cashacucujajaari canaacujaji piyotasaquiuaari, saniniuujia canaa rupotasaanura nocua nojori niti”. <sup>20</sup> Taaquiririnij, seetanujuanaacuaaquiniateja nia sequesanojuaj. Saniniuujia nia niishiri, nojoriiri Pueyaso panishano naanajiniji piyotasaquiuaari, nojori tiuyaquiniucua Jesucristoocua. Niaari saniniuujia cuno naanaacua rupotasano quiya, saaja Jesucristoocua nia tiuuniucua. Naacuajitij, maja tama nia cuaqueyajaaja nia shuquiritianu nia jyanishacari niaari socua maninia pueya cuno Israel pueyajiniji. Saaja puerejaca nia quiri cutara, cua panishano taucacanaa, niaa mariqui piyotasaarohuari, niaa jaara Pueyaso tojiyashiji-acara quiriohua. <sup>21</sup> Pueyaso jaara jyanoyaquiuaari na saquiriojosano pueyacuaa, nojori tiuyaquiniucua nocua, ¿maatucua casaara jyanoori niajanianijia? Niacuajaari taucua. Niacuajaari maja na saquiriojosano Israel pueyacujinino. <sup>22</sup> Naacuajiti pueyanaa, nia niishiri. Pueyasoori jyanohua maninia. Naajuhuj, nojuajaari saniitionu niishijia cutara. Naaratej, nojuajaari na tojitiaashijia Israel pueya jyanoyaquiuaari. Saniniuujia, nojuajaari jyanohua maninia miiquiaa niajaniya na jyanoooshano pueya nia quishacari, niaa jaara pueyaracaanu nocua tiuujia quiriquia. Niajaniya taucacanaa, niaa jaara nocua tiuyashijiacara quiriohua, niaari nocuaji rupotasaanutaniuhua. <sup>23</sup> Saniniuujia, Israel pueya jaara Jesucristoocua tiuujiacara quiriohua, Pueyasoori nojori rupotanutaniuhua na panishano olivo naanaacua. Pueyasoori jyanohua cumaacaracujaja na rupotanuuhua na panishano naanaacua. <sup>24</sup> Niajaniya taucacanaa, niaari maja seetanujuanaa Pueyaso saquiriojosano Israel pueya. Niaari juhua nacujiniaacoji olivo naana cashacucua. Naajaa, nia tiuushacari Cristoocua, Pueyasoori nia rupotaquiuaari na panishano olivo naanaacujanaa. Naaratej, majaari jiyajeneta Pueyasora, na piyotasano olivo cashacucua na rupotanuuhua tama neyonaacuajaaja, nojori jaara Jesucristoocua tiuujiacara quiriohua.

*Pueyaso jatanishacari puetunu Israel pueyajanaa na pueyara*

<sup>25</sup> Taucacujinijinio cuarta Pueyaso pueyanaa, tariucuaaanu pueyari niishiyajiniji taa Pueyaso miiniutianiya Israel pueyani. Quiarijia cutara nia niishiri Pueyaso niishitishano janiya, maja nia jyaniniuria Pueyasoori nia paniya socua Israel pueyajiniji. Naarate cua tojitiare. Quera puetunu Israel pueyajanaari Pueyaso tojiyashijia quiya. Nojoriiri naa quiniutianiya, puetunu Pueyaso saquiriojosano taucacujinijinio pueyajanaa cuara



Jesucristoocua tiurijiaatijia. <sup>26</sup> Jiyacaritij, puetunu Israel pueyajanaari jiyatesaanutaniya Pueyaso pueyarajuhuj, taa tariucuacaanu Pueyaso Rupaajinia naajiotasaaquiaar-icujani. Naa sequeyari:

“Sión tiacajinia supuenutaniyari pueyacuaji Tacuriquiano. Nojuajaari puetunu sesa casaajanaa jaariutianutaniya Jacobo niquiohuacuajinio supueno pueya jiuujia-jiniji. <sup>27</sup> Naa cua jiyanooshacari puetunu sesa nojori miishanojuanaatej, janiyari jiyacari tohuateenutaniya tariucuacaanu cua sequesano nojori supuetanaani”.

<sup>28</sup> Quiarjia Israel pueya tiyaquishacari Jesucristo rupaacua saniniuujia, nojoriirijuhua Pueyaso paraa, Pueyaso jiyanooniuria nijaniya saniniuujia, taucuacanaa. Naajaa, Pueyasoori cuno Israel pueya paniyajaa, nojori supuetanaa quiniucua na saquiriojosano pueya. <sup>29</sup> Pueyasoori maja na jaariutianu quijia na niqutiosano. Na saquiriojosano pueya jiyanoojiaari. Majaari nojori na ruuretanu. Pueyasocujaari Israel pueya saquiriojo-quiaari na pueya nojori quiniuria, maninia na miiniuria nojori. <sup>30</sup> Maniniushiquiari, nijaniya taucuacanaa, niaari Pueyaso tojiyashijia quijia. Israel pueya tojiyaquini-uucua Pueyaso quiarjia saniniuujia, Pueyasoori niaacua taraajequiaa. <sup>31</sup> Nojoriirijia Pueyaso tojiyashijia quiya quiarjia, Pueyaso taraajenura nojoriicua taa na taraajeya niaacuacuaani. <sup>32</sup> Naacuajitij, Pueyasora, puetunu pueyajanaari na tojiyashijia quiya, Israel pueya, taucuacanio. Naacuajitij, Pueyasoori na naata jiyanooni nojoriijuhuj, nojori tiuushacari Jesucristoocua. Pueyasoori maja rimiajata na jiyanooni.

<sup>33</sup> ¡Pa Pueyasoori jiyanoohua niishijia, maninia na miiniuria! ¡Nojuajaari puetunu niishijiajanaa cutara! ¿Cante niishiquiaarini casaa Pueyaso miiniutianiyani? Na miishanoori jiyanoohua jiyajeneta. ¿Cante na naata na niishiniuni? Shaaqui. <sup>34</sup> Naaratej, seetanujuanaari nio tariucuacaanu sequesano:

“¿Cante na naata Pueyaso niishiriojosano niishiniuni? ¿Tamonuteeri na naata Pueyaso rootanu, maninia na miiniuria? ¡Maja! <sup>35</sup> ¿Pueyasoteeri na panishano jiitaaquiquiaari tamonu niqutionura nojuaja na panishano, na nuhuaji na niqutionuhua? ¡Maja!”.

<sup>36</sup> Seetanujuanaa puetunu casaajanaacuajaari Pueyaso shipinishano. Na camaruuri na rishitiquiaa na cumaacata. Puetunu cunojuanaari nerano. ¡Pueyaracaanu pa shuquiritiare pa Que Pueyaso! ¡Nojuajaari jiyanoohua maninia! ¡Cuaara naa quiiriatej!

## 12

### *Saaja Pueyasora pa quirij*

<sup>1</sup> Cuarta Pueyaso niquiohuanaa, jiyanoohua maninia Pueyaso jiyanooshacari pajaniya, tama nia cuaqueyajaaja nia jiyatere tojetaarucuajanaa saa neraja nia quiniuria. Naacuajitij, niaari Pueyaso shuquiritiniutaniya, pueyaracaanu na tojiijia nia quishacari.

<sup>2</sup> Majaari socua nia quiniu taa Pueyaso tojiyashijia quiquiaacuaani. Saniya Pueyaso Sohuanu tojiijia nia quiri cutara, seetanujuanaa quiariniora jatanishano pueya nia quiniuria. Naacuajitij, niaari niishiniutaniya casaa Pueyaso paniya nia miiniuriani. Nia niishitaja jaara jatanishano quiri, naacuajiti niaari niishiniutaniya casaate maninia nia miiniuriani, Pueyaso nia shuquiritiniuria. Naa nia miishacari Pueyaso panishanotej, niaari niishiniutaniya, cunoori tojetaarucuajanaa jiyanoohua maninia.

<sup>3</sup> Jiyanoojia Pueyaso quiniucua, nojuajaari cua jiyatequiaari Neyanujiniji pohuatana cua quiniuria. Naaratej, puetunu nijaniyajanaa cua tojitiare quiarjia. Naa jaara Pueyaso cumaaca masequiaari nocua nia tiuushacari, nojuajaari puetunu nijaniyajanaa jiyatequiaari tamaatia poonijiosano miijia nia quiniuria. Naaratej, majaari tama nia cuaqueyajaaja nia jiyatenu paniniu socua maninia quijia nia quiniuria tamacajiniji. Saaja jacaria niishiriojojuaca nia quiri, maninia nia miiniuria nia poonijiosano, teyano Pueyaso sequequiaari nia miiniuriacuajani. <sup>4</sup> Pa cuaqueyajiniacuma, paari queraatia tamaatia casaa jiitiaani. Puetunu cunojuanaari tamaatia miiniu niishijia, maninia pa quiniuria. <sup>5</sup> Paari naajuhuj, taa pa jiniacuma casaacuaani. Queraatia Pueyaso muerasu pa quishacari, naajaa, paari juhua niquiriyatu cuaqueyani, Cristota rupuetootesano pa quishacari, maninia pa miitioonura.

<sup>6</sup> Naatej, taa pa cuaqueyajiniacuma casaa tamaatia poonijiosano miiniu niishiyacuaani, naajuhuj, Pueyasoori puetunu na muerasujuanaa na cumaaca niqutioquiaa, tamaatia miiniu niishijiaca pa quiniuria. Naaratej, cante Pueyaso cumaaca jiitiaani, Pueyaso niishitishano nojuaja na pohuatanurani, nojuaja cuaara seetanujuanaa pueya niqiuara pohuataara na taacanuyaquiniutia. <sup>7</sup> Naajuhuj, cante Pueyaso cumaaca jiitiaa pueya na naacunurani, nojuaja cuaara maninia naacuura pueya. Naajuhuj, cante Pueyaso cumaaca jiitiaa Pueyaso rupaa niishitiojona na quiniuriani, nojuaja cuaara maninia niishitiojora Pueyaso rupaa pueya niqiuara. <sup>8</sup> Cante Pueyaso cumaaca jiitiaa pueya na shiniujiuniriani, nojuaja cuaara pueya shiniujiuuria, maja pueya cartenura Pueyaso rupaa. Cante na jiitiasanojiniji nareja niqutiojojua casamijiuniucua pueyani, nojuaja cuaara juhuajaniya niqutiojora nareja, nojori na paniniutia. Naajuhuj, cante Pueyaso pueya jiitianani, nojuaja cuaara jiitiaara Pueyaso pueya nojoriicua na tacaaniutia. Cante taraatia miishano pueya naacujuani, nojuaja cuaara shuquiriaatia na naacuranoj.

*Pueyaso tojijiaca nia quiri, taa Pablo rootacuajani*

<sup>9</sup> Seetanujuanaa panitiojuaca nia quiri. Puetunu sesa casaajanaa soojea nia quiri. Majaari maninia miiniu nia tarinitianu cutara. <sup>10</sup> Jiyanojua panitiojuaca nia quiri, taa nia paniquiaa nia tarajanucuaani. Niarta Pueyaso muerasu nia jiyatere juhua socua maninia pueya nijaniyajiniji. Majaari nojori nia rerequetenu.

<sup>11</sup> Tama nia cuaqueyajaaja nia cumaquiri maninia nia poonijionura pa Jiyaniijara. Majaari taajecori nia quiniu.

<sup>12</sup> Shuquiriaatia nia quiri pueyaracaanu, nia niishishacari taa Pueyaso miiniutianiya jiyanojua maninia na muerasuni. Saaja juhuajaniya nia rejeretare niaa jaara naquiya miishaare. Pueyaracaanu Pueyaso nia secojore. Majaari quenaaja nia tarinitianu na secojonu.

<sup>13</sup> Niarta Pueyaso pueya jaara na panishano jiitaaquiri, nareja nia niqutiojore nojori nia jiitiasanojiniji. Naacuajitij, nojori jaara rucoonaa quiri, nojori nia masuure nia tiacora.

<sup>14</sup> Naa jaara naquiya miishaariquia, majaari nia miitianaa nia sesacanu. Saaja nia secojore Pueyaso nojoriicua, Pueyaso taraajenura nojoriicua.

<sup>15</sup> Cante shuquiriaatia quiyacuaani, nojoritia nia shuquiririjuhuj. Saniniuujia, cante nujuqueyacuani, nojoritia nia nujuquerejuhuj.

<sup>16</sup> Jyanootiojuaca nia quiriquia, jatiqiu nia quiniuria maninia. Majaari tama nia cuaqueyajaaja nia jiyatenu juhua socua maninia quijiaca pueya tamasacajiniji. Majaari pueya rerequetaja nia quiniu. Saniniuujia, tama nia cuaqueyajaaja nia mueyashitiri cutara, maninia nia rupuenura paniyaquishoo pueyajuhuj. Majaari tama nia cuaqueyajaaja nia jiyatenu juhua socua niishijiaca pueya nia quiniuria tamasacajiniji.

<sup>17</sup> Naa jaara sesa miishaariquia, majaari nia paraa nia naminiu saniniuujia. Puetunu nia miishanojuanaa cuaara quiri maninia puetunu pueya niqiuarajanaa. <sup>18</sup> Maninia nia quiri puetunu pueyatajanaa, majaari nojori ruutaquenu niaacuara. <sup>19</sup> Socua cua tojitiare cua panishano cuarta Pueyaso pueyanaa. Naa jaara sesa miishaariquia, majaari nojori nia naminiu. Juhujaniya nia rejeretare saaja. Pueyasocuaajaari niaacua naminiutianiya nojori. Pueyaso sequesanojuajaari naa naajiotasano quiya na rupaajinia:

“Quiria nia tarinitiare puetunu sesa nojori miishanojuanaa nijaniya. Janiyacuajaari nojori naminiutianiya niaacuani”.

Cua tojiri. Pueyasocuaajaari naa sequequiaari. <sup>20</sup> Naaratej pueyanaa, majaari nia paraca nia naminiu. Saaja maninia nia miiri nojori taa tariucuacaanu Pueyaso Rupaajinia naajiotasaaquiaricuajani. Naa sequeyari:

“Quia paraca jaara miaajeya, quia miaqueterenoj. Jaara jiyamueyajuhuj, quia raatorenoj. Quiaa jaara naa na miiritij, tama nojuajaarijia jiyanojua caririqiniutianiya noojiajinia”.

<sup>21</sup> Naacuajitij, niaa jaara sesa miishaariquia, majaari nia juaaniu, niaa mariqui sesa mijiara quiriiaariuhuj. Saaja maninia nia miiriquia nia paraca. Naacuajitij, niaari Sesaaca shocotanutaniya.

## 13

*Pa jiya jiyaniijianucua tojjijaca pa quirij*

<sup>1</sup> Pueyanaa, mijiria nia jiyaniijianucua tojtiajaca nia quiri. Nojoricuajaari Pueyaso jiyatesano, nia jiya jiyaniijianucua nojori quiniuria. Majaari pueyano na naata jiyatesaanu jiyaniijia na quiniuria, Pueyaso jaara paniyaquiri. <sup>2</sup> Naacuajitij, cante mijiria jiyaniijianucua tojiyashijiani, nojuajaari jiyaniijiaara Pueyaso jiyatesano tojiyashijia. Cante naa mijiria jiyaniijianucua tojiyashijiani, nojuajaari saniitiosaanutaniya. <sup>3</sup> Paa jaara maninia miijiacua quirini, ¿paatucua casaara pa jiyaniijianucua puereriquiani? Jiyaniijianucuaari maja na pueretenu maninia miijiacua. Sesa miijiacua cuara na puereera cutara, sesa miijiacua nojori quiniuucua. Saaja maninia miijiacua nia quiri. Naacuajitij, nia jiyaniijianucuaari maninia poojotanutaniya nijaniyajiniji. <sup>4</sup> Nojoricuajaari Pueyasora poonijionaa, maninia nojori jiiitianura nijaniya. Saniniuujia, niaa jaara sesa miiri, nia puereera cutara. Jiyaniijianucua pueyari maja najuhuanaj. Nojoricuajaari jiyaniijianucua cumaacaraca, sesa miijiacua nojori saniitionura. <sup>5</sup> Naacuajitij, nia jiyaniijianucua tojjijaca nia quiri maja nia saniitiosaanura, naajuhuj, maja Pueyaso tojiyashijiacua nia quiniuria. <sup>6</sup> Naajuhuj, nia cumaneecajiniji nia niqutiore nia jiyaniijianucua, taa nojori sequequiaa nia niqutionuracuajani. Nojoricuajaari Pueyasora poonijioquiaa pueyaracaanu, maninia nojori jiiitianura nijaniya. Naaratej, nojoriiri cumaneeca masequiaa nijaniyajiniji.

<sup>7</sup> Naaratej, puetunu nojorijianaa nia niqutiore, taa nojori sequequiaa nia niqutionuracuajani. Naacuajitij, niaa jaara sequesaa nia cumaneecajiniji nia niqutionura nia jiya jiyaniijiaara, nareja nia niqutiore. Naajuhuj, cumaneeca jaara jiya jiyaniijiaara masenu cojiritiasaa, casami nia masesacari, majaari nia juaaniu. Naajuhuj, majaari nia jiyaniijia nia sesacanu, jiyaniijianucua nia jiyatesano pueyano. Majaari nojori nia rerequetenu. Naajuhuj, nia jiyaniijianucua tojjijaca nia quiri, nojori quiniuucua Pueyaso jiyatesano nia jiyaniijianucua.

<sup>8</sup> Pueyanaa, majaari najuhuaana casami nia poonu, niaa jaara cumaneecaaju quiri. Saniniuujia pueyanaa, maja cutaraari niarta pueya paniniu nia puecanu. Pueyaracaanu nojori panijiacua nia quiri cutara. Naacuajitij, cante narta pueya panijiani, nojuajaari Moisés Rootasano tojjijaca cutara. <sup>9</sup> Supuetana Moisés cuajaari nia naajiotaquiaari puera, Pueyaso sequesano nojuaja:

“Maja niyacaraca maaji numuetucunu. Maja pueyano monu. Maja nohuasejonu. Maja tamasa jiiitianura casamiicua jiaatijaca nia quiniu”.

Socua queraatia na rootasanoori quiya. Niocuajaari socua pa tojishocoriquiano na rootasano:

“Quiarta pueyano panijia quia quiri, taa quia paniya tama quia cuaqueyacuaani”.

Paa jaara saaja nio Moisés rootasano tojjijaca quirini, paari tari puetunu na rootasanojuanaa tojjijaca quiyani. <sup>10</sup> Cante seetanujuanaa pueyano panijiani, nojuajaari maja sesa na miiniu narta pueyano. Naaratej, paa jaara panijia quiri quiani, paari puetunu Moisés Rootasano tojjijaca cutarani.

<sup>11</sup> Pueyanaa, nio nia niishiri. Pa Jiyaniijia rijionu juuca pajaniyari tari quenaacoya. Cuno juucaari quiarijia socua cateca quiya paa jaara nocua tiuquiarini. Naaratej, cante juhua maqueyajaani, nojuaja cuara niucuaara, pa Jiyaniijiaara na poonijionura.

<sup>12</sup> Mijiria pa quishacari juhua ninishiqui. Paari juhua quera juhuaqueya tarini. Janiyari nia nia sequeyani, pa Jiyaniijiaari quera tiuquihua. Nojuaja cutaraari na cumaacata pa cuhuatanutaniya. Naaratej, puetunu sesa pa miiniujuanaa pa cartere. Majaari juhua ninishiqui quijiacua pa quiniu socua. Taa pueya cushiquiaa na toque tariquicuaji na poonijionuracuuaani, nia nia cushiri Pueyaso cumaacajuhuj. Naa nia miiritij, nera nia poonijionura, puetunu mijiria sesa casaajanaa rejeretajaca nia quiniurajuhuj.

<sup>13</sup> Seetanujuanaa juhua Pueyaso pueya nia quiri. Majaari juhua ninishiqui quijiacua pueya nia quiniu. Niaacuajaari cuhuashiqui quijiacua. Naaratej, majaari mashaasequenujuaca nia quiniu. Majaari nia queranacunuunu, cararaatia casaa nia miiniuria. Majaari nia camishoo maaji numuetucunuucua jiaatijaca nia quiniu. Majaari sacuraatia casaa miiniuucua nia jiiitiniu. Majaari juayonuujutajaca nia quiniujuhuaj. Naajuhuj, majaari tamonu pueyano jiiitianura casaacua nia jiaatianu. Naajuhuj, majaari nia juaaniu tamonu jaara nia shocotare. <sup>14</sup> Naacuajiti pueyanaa, majaari nia niishiriojonu nia

cuaqueya nia shuquiritiniuria taa nia paniya sacuaraatia nia miiniuriacuajani. Saniniuujia, maninia cutaraari Jiyaniijia Jesucristo niishitiaja nia jiitianura, na cumaacanio. Naa nia miishacaritij, niaari juhua soldadohua miaquetoojotaja toque cushiyojua, maja Sesaaca miitiniuria sesa niajaniya.

## 14

### *Maja quiarta Pueyaso pueyacuara nia rimiaaquenu sacuaraatia*

<sup>1</sup> Pueyaso pueyajiniinio pueyano jaara Pueyaso rootasanojiniji taacanuujua quiriquia pueyaracaanu, naajaa, na rupuejaca nia quiri. Majaari nata nia juayonuujutanu tamaatia na niishiriojosacari Pueyaso rootasanojiniji. <sup>2</sup> Naacuajitij, Pueyaso rootasano niishijia nia quishacari cutara, niaa naasucuaari niishiya nia naata puetunu miaquesanojuanaa miaquenu cutara. Saniniuujia, cante Pueyaso rootasanojiniji taacanuujuanu, nojuaja naasucuaari jiyaniya na naata saaja na natau miaquenu, na shuquiritiniuria Pueyaso. <sup>3</sup> Cante puetunu casaajanaa miaqueja cutarani, nojuaja cuaara soyaquiiria narta Pueyaso pueyano, cante na miaquesano miaqueyashijia saniniunijia. Naajuhuj, cante puetunu casaajanaa miaqueyashijiani, nojuaja cuaara sesacaaquiiria puetunu casa miaquejajanaa. Cuno pojori, shu miaquejaca cutarani, nojoricuajaari Pueyaso jiyatesano na muerasu nojori quiniurijuhuj. <sup>4</sup> ¿Canteeri pajaniyani, tamonu pueyanora poonijionaa pueya sesacaja pa quiniuriani? Tama nojori camarnucuajaari nojori sequenutaniya, nojori miishanote maninia, sesa soj. Naajuhuj, pa Jiyaniijia Jesucristocuajaari cumaacaraca, na muerasu na jiyatenura maninia quiijaca nojori quiniuria.

<sup>5</sup> Cua tojiri pueyanaa, noojiaqueya Pueyaso muerasujiniinioori niquiriyatu juuca semaanajiniiji jiyatequiaa nojori maniniuhuaqueetanura Pueyaso. Tamasacaari saniniuujia sequequiaa, puetunu juucajanaanaari maninia, Pueyaso pa maniniuhuaqueetanura. Puetunu niajanijajanaa cuaara taacanuuyaquiiria tama nia miishanojinijijiaaja, maja nia macuhujetenura nioojia. <sup>6</sup> Cante niquiriyatu juuca semaanajinia jiyatequiaa samaatenu juucara Pueyaso na maniniuhuaqueetanurani, maniniacuajaari. Nojuajaari naa miiquiaa Pueyaso na shuquiritiniuria. Naajuhuj, cante puetunu casa miaquejajanaani, maniniacuajaari. Pueyaso na shuquiritiniuria, nojuajaari na miaquequiaa nocuara na secojonu nuhuaji. Naajuhuj, cante shu miaqueyaquiijia Pueyaso na shuquiritiniuriani, cuaara naa miiria. Nojuajaari Pueyaso shuquiritijuhuj na secojosacari Pueyaso, na natau na miaquenura.

<sup>7</sup> Seetanujuanaa pueyanaa, majaari pa quiniu tama pajaniyarajaaja. Naajuhuj, majaari quenaaja pa shaajenu tama pajaniyarajaaja. <sup>8</sup> Paa jaara mijiria quiyani, paari pa Jiyaniijia rishiquiaani. Paa jaara cusoyareni, paari pa Jiyaniijia cusoqueeni. Naaratej, paa jaara saminio quiyajaani, naajuhuj, paa jaara tariucua macu quiyani, paari pa Jiyaniijia jiiiasanoni. <sup>9</sup> Jesucristocuajaari cunora cusoqueiaari, macunucua Jiyaniijia na quiniuria. Nojuajaari samiitiaquiariuhua saminiucua Jiyaniijia na quiniurijuhuj. Naacuajitij, nojuajaari pa Jiyaniijiajanaa cutara.

<sup>10</sup> Naaratej, saaja niquiriyatu Jiyaniijia pa jiiiasacari, ¿paatucua casaara parta Pueyaso muerasu soojeaca quirini, nojori miaqueyaquiniucua shuni? Naajuhuj, ¿paatucua casaara parta Pueyaso pueya sesacajaca quirini, nojori miaquenuucua puetunu casaajanaani? Nia niishiri pueyanaa. Puetunu pajaniyajanaari nujuatejosaanutaniya Pueyaso tacojini, Pueyaso nequesoreenura pajaniya. <sup>11</sup> Tariucuacaanu pa Jiyaniijia sequesanoori naa naajiotasano quiya na rupaajinia:

“Seetanujuanaa sequeyanijia, puetunu pueyajanaari cucuara mojoquetaconutaniya, nojori niishishacari janiyari seetanujuanaa Jiyaniijiajanaa cutarani. Puetunu nojorijianaari sequenutaniya: ‘Jiyaniijianaa, quiaari Pueyasojuanaa cutara! Puetunu quia miishanojuanaari maninia’ ”.

<sup>12</sup> Naacuajitij, paari niishiyani, puetunu pajaniyajanaari Pueyaso rihuanenutaniya tamajaajani, na nequesoreesacari pajaniya.

### *Maja sesa pa miitiniu parta Pueyaso pueya*

<sup>13</sup> Naacuajitij cuarta Pueyaso pueyanaa, maja cumaati pa sesacatoonu, paa jaara tamaatia miiniu niishijiaca quiri parta Pueyaso pueyajiniija saniniunijia. Tama nia cuaqueyajaaja nia cojuare maja niarta Pueyaso pueya niquiara nia miiniuria nojori jiyanihana sesa casaa. Nojori jaara saniri miiniu nia miishanocuaa, naacuajitij, niari tari sesa miitirii nojori Pueyaso niquiara. <sup>14</sup> Janiyacuajaari niishiyani, majaari quenaaja tamonu sumatuu quiniu pa miaquesacari sesa miijiacara na jiyatenura pajaniya Pueyaso niquiara. Janiyari naa niishiyani cua Jiyaniija Jesu rupaacua tiuujia cua quiniucua. Saniniuujia, cante jiyaniyanijia tamonu sumatuu na naata na jiyatenu sesa miijiara nojuaja jaara na miaquere, nojuaja cuara miaqueyaquiirianoj. Jaara na pueresano saniri miaquenu, nojuajaari tama noojiaaja macuhujanutaniya. <sup>15</sup> Naacuajitij, paa jaara parta Pueyaso pueyano macuhujetere pa miaquenuucua na miaqueyaquishoo casaani, majaari seetanjuanaa parta Pueyaso pueyano panijia pa quiniu. Jesucristocujaari tama na cuaqueyajaaja panitiaquiaari nocuaji na ritianura Sesaaca. ¿Paateeri na sesonutaniya saniniunijia, na miaquesoo casaa pa miaquesacari na niquiarani? <sup>16</sup> Naacuajitij, majaari nia shanacunu Pueyaso tojiyashijiaca pueya sesacanura Pueyaso rupaa, nia miaquesano casaacua nia juayonuujutanuucua niarta Pueyaso pueyata. <sup>17</sup> Seetanjuanaa nia sequeyanijia, majaari Pueyaso muerasu pa quiniu casaa pa miaqueyaquiniuucua, casaa pa ratuyaquiniuucuanio. Pueyaso muerasu pa quishacari, nojuaja cutaraari paniya maninia miijiaca pa quiniuria, jatiquri pa quiniuria juhuajaniya. Pa panitiaajaariuhua shuquiriaatia quijiaca pa quiniuria. Paacuajaari na Sohuanu jiitiaani, naa maninia pa quiniuria. <sup>18</sup> Paa jaara naa quijiaca quiriqiuani Cristora pa poonijosacari, Pueyasoori pa shuquiritiaa. Naacuajitij, Pueyaso tojiyashijiaca pueyari maja na rerequetenu quiniutianiya pajaniya.

<sup>19</sup> Naarate cuarta Pueyaso pueyanaa, jyanohua nia saniniujiuri taate nia naata maninia rupuetosano quiniu puetunu niarta Pueyaso pueyatajanaani. Naacuajiti nia naata tama cumaquitioonujuaaja maninia Pueyaso muerasu nia quiniuria. <sup>20</sup> Majaari nia sesonu Pueyaso miishano niarta Pueyaso pueya jiuujiajinia, saaja nia miaquenuucua nojori niquiara nojori pueresano casaa. Seetanjuanaa, Pueyasora, puetunu miaquesano casaajanaari maninia pa miaquesocoriquiano. Saniniuujia, tama nia cuaqueyajaaja nia cojuare cutara, maja niarta Pueyaso pueya niquiara nia miaquenura nojori miaquesoo casaa, niaa mariqui nojori cushitioreeri. Naacuajitij, majaari nia naata maninia rupuetosano quiniu niaa jaara nia miishanota taraajoriquia niarta Pueyaso pueya. <sup>21</sup> Naacuajitij, socua maninia juhuari maja pa miaquenura parta Pueyaso pueya pueresano casaa. Naajuhuj, majaari pa ratunu jereca mashaca nojori niquiara, cuno naa pa miishano jaara quiri nojori shiniujiuniuria sesa nojori miiniuria. Naajuhuj, pa cartere puetunu parta Pueyaso pueya jiyanihana sesa miiniu casaajanaa, maja nojori pa taraajonura nojori ruparetanura pocuaji. <sup>22</sup> Naacuajitij, Pueyaso Rupaacua nia tiuushacari seetanjuanaa, niaa jaara niishiya nia miishanoori maja sesa, tamajaaja nia miirinioj saaja Pueyaso niquiara. Shuquiriaatia quijia cutaraari noo pueyano, cante niishiyani na miishocoriquiano casaari maninia Pueyasora, maja noojia na macuhujetenura na miiniu nuhuaji. <sup>23</sup> Saniniuujia, cante niishiriojiyani na miaquenu panishano casaa naasucuaari sesa quiniutianiya Pueyasora, jaara naa niishiriojiya, seetanjuanaa naa sesa quiniutianiyari taa na niishiriojiyacujani. Paa jaara casaa miaquere seetanjuanaa pa tiuyaquiniutia Pueyasocuanii, pa miaquesacari, paari tari sesa miirii Pueyaso niquiarani. Seetanjuanaa, puetunu pa miishanojuanaari sesa, paa jaara pa taacanuunuta na miiriquiani. Naaratej poojiaari macuhujanutaniya.

## 15

### *Parta Pueyaso pueya pa shuqiritiri, maja tama pa cuaqueyajaaja*

<sup>1</sup> Noojiaqueya parta Pueyaso muerasuuri juhuanojuaja seetanjuanaa Pueyaso Rupaacua tiyashijiaca. Naacuajitij cuarta Pueyaso pueyanaa, pajaniya, cante tari seetanjuanaa Pueyaso Rupaa tojiyacacuaani, pajaniya cuara nojori rejeretaara juhuajaniya. Paa jaara socua Pueyaso Rupaa niishijiacuaani, nojori pa cumaquiri. Majaari pa

niishiriojonu tama pa cuaqueyajaaja pa shuquiritiniuria tamajaaja. <sup>2</sup> Puetunu pajaniyajanaa cuaara niishiriojora taate pa naata parta Pueyaso pueyano cumaquiniuni, shuquiriaatia na quiniuria, maninia Pueyaso tojjia na quiniuriajuhuaj. <sup>3</sup> Paacujaari niishiyani, majaari quenaaja pa Jiyaniijia Jesucristo niishiriojonu quijia tama na cuaqueyajaaja na shuquiritiniuria. Saniniuujia, nojuaja cutaraari taraatia miiniu rejeretaquiaari na rupuenura mijiria quiniaa pueya, nojori na jaariuutianura Sesaaca. Naacujitij, nojuajaari nio tariucuacaanu tama nojuajiniijiaaja naajiotasano tohuateequiaari:

“Cua Quena, cuno pojori, canapuate quia sesacajacani, nojoriiri cua sesacajuhuj, cua miiniuucua quia panishano”.

<sup>4</sup> Seetanujuanaari pueyanaa, puetunu tariucuacaanu Pueyaso Rupaajinia naajiotasanojuanaani, cunoori pajaniyara naajiotasaaquiaari. Cunoori pa niishitiojiya maninia pa rejeretanura puetunu sesa casaajanaa. Pa cumaniijaajaariuhuj. Naacujitij, paari juhuajaniya sashiya pa Jiyaniijiani. <sup>5</sup> Pueyasocujaari pa cumaquia, maninia rejere-tajaca pa quiniuria, cumaniijasano pa quiniuriajuhuaj. Nojuaja cuaara nia jiyateera jiyanoojiaca nia quiniuria taa Cristo quiquiaari jiyanoojiacuaani, rupuetoojuaca nia quiniuria niarta Pueyaso pueyata. <sup>6</sup> Naacujitij nia naata pa Que Pueyaso, mariyata pa Jiyaniijia Jesucristo maniniuhuaqueetanu, juhua niquiriyatu pueyano, maninia rupuetoojuaca nia quishacari.

#### *Pueyaso rupaari maja saaja Judiocuacara*

<sup>7</sup> Pueyanaa, jyanootoojuaca nia quiriqia, taa Jesucristo jyanooquiaa pajaniyacuaani, maninia rupuetosano nia quiniuria. Naacujitij, pueyari Pueyaso timitianutaniya nojori niquishacari Judiocuaca taucacata Pueyaso maniniuhuaqueetaano jatiqii.

<sup>8</sup> Janyari seetanujuanaa nia sequeyani, Cristoori mijiria niqiaari Judiocuacacua, na tohuateenura Pueyaso sequesano nojori supuetanaa. Tariucuacaanu Pueyaso sequesanoori seetanujuanaa. Nojuajaari maja na sequesano na jatanu. <sup>9</sup> Judiocuacara Cristo miishanoori taucacara quiquiaarijuhuaj, nojori maniniuhuaqueetanura Pueyaso, na jyanooniuucua nojorijuhuj. Tariucuacaanu Pueyaso Rupaajinia supuetana David naajiotasanoori naa quiyajuhuj:

“Maninia quia miiniuucua janiya Pueyasonaa, janyari quiajaniyajiniji poojotanutaniya maniniani taucaca jiyacajinia. Maninia quia miiniuucua janiya, janyari quia timitianutaniya cua jaaquequejosanotani”.

<sup>10</sup> Tamaqui Pueyaso Rupaajinia naa naajiotasanoori quiyajuhuj:

“Pueyaso niishiyashijiaca taucacanaa, Pueyaso saquiriojosano pueya nia cojiri, mariyata jatiqii nia shuquiritianura pa Pueyaso”.

<sup>11</sup> Pueyaso Rupaajinia, supuetana David naajiotasanoori naa sequeyajuhuj:

“Pa Jiyaniijia Pueyaso nia maniniuhuaqueetare, puetunu niajaniyajanaa, tamaatia rupaaca pocuajaca taucacanaa. Pueyasora nia jaaquequenuure puetunu jiyacajinia quiniaa pueyajanaanaa, maninia na miiniuucua pajaniya”.

<sup>12</sup> Supuetana Isaías naajiotasanojinijijuhuj, paari niishiyani Pueyasoori taucaca jitianu panijia pueyaracaanu, maja saaja Judiocuaca. Naaratej, Isaíasri naa naajiotaquiaari:

“Supuetana Isaí niyanujiniji supuenutaniyari pueya Jiitiana. Nojuajaari puetunu mijiria quiniaajanaa jiyaniijia quiriqiano. Puetunu jiyacajinijinio taucacajanaari nocua tiuujia quiniutianiya”.

<sup>13</sup> Pueyasocujaari poojiajia poonijiojua, juhuajaniya pa sashiniuria pueyaracaanu, nojuaja cuaara miirijiaatija puetunu na sequesanojuanaa pajaniyara. Pueyanaa, Pueyaso cuaara nia timitiiria jyanohua. Naajuhuj, nojuaja cuaara nia jiitiaara juhujaniya, canapuate nocua tiuujiacacuajani. Naacujitij, mijiria nia sashishacari, niaari shuquiriaatia rejeretajaca quiniutianiya Pueyaso Sohuanu cumaquishacari niajaniya, seetanujuanaa nia niishishacari pa Jiyaniijaari pa rijionuucua tacatenutaniuhua.

<sup>14</sup> Cua panishano Pueyaso niqiuohanaa, naa cua naajiojia cua nacasusacari jyanohua niajanyatej, majaari nia jyaniniu janyari niaacuaji taacanuyajaani. Maja.

Janiyacuaajaari niaacua tiuyani niaacuajaari seetanujuanaa maninia quijiaca. Niaacua-jaari Pueyaso rupaa niishijiacajuhuj. Naacuajitij, nia naata tama nacasutoojonujuaaja maninia, maninia rupetoojuaca nia quiniuria Pueyaso niquiara. <sup>15</sup> Naajaa, quiarijia janiyari niaacuara naajiyani cua niishitiniuhua niajaniya tarijia nia niishishano. Cua jiyanootiuri, nio cua naajiojina jiyanoohua cua nacasunuucua niajaniya. Naa nia rootaanijia Pueyaso jiyatenuucua janiya Neyanu Jesucristo jiyaramiquishano, taucuaca cua pohuatanura na rupaa. <sup>16</sup> Pueyaso jiyatenuucua janiya nera poonijionara, janiyari cunora Jesucristo rupaa pohuataquiaa taucuacani. Naacuajitij, Pueyaso Sohuanu poonijionuucua nojori jiuujiajina, nojoriiri Pueyaso shuquiritiasano muerasu quiniutianiya-juhuaj.

<sup>17</sup> Pueyasora cua poonijosacari, janiyari jiyanoohua timitiaa Jesucristoni, cua niquishacari taa taucuaca tiuquiaa na rupaacuan. <sup>18</sup> Majaari cua timitianu tama cua miishanojuaaja. Janiya cutaraari Jesucristo miishano timitiaani. Nojuacuajaari taucuaca tiuquiaa na rupaacua. Nojoriiri nocua tiuquiaa nojori niquiara cua pohuatasacari na rupaa, naajuhuj, Pueyaso Sohuanu cumaacata cua miiniuucua nojori niquiara. <sup>19</sup> Nojori niquishacari Pueyaso Sohuanu cumaacata cua miijosano, nojoriiri niishiquiaa cua pohuatasanoori seetanu rupaaanaa. Janiyari pocuaji Tacuna Jesucristojiniji tari pohuataquiaari puetunu tiqiyocujanaani, Jerusalén tiacajiniji, puetunu Iliria jiyajiniarajanaanio. <sup>20</sup> Naa cua pohuatasacari pa Jiyano Jesucristojiniji puetunu cuno jiyacajiniarajanaatej, janiyari pueyaracaanu pohuataquiaari cuniquini, tee Jesucristojiniji tojiyaquishaquiaari juhuanujuacuajani. Majaari cua pohuatanu paniniu quiquiaari tee tamasaca pohuataquiaari tari Jesucristojinijini. <sup>21</sup> Naa cua pohuatasacari Jesucristojiniji cuno pueya niquiaratej, janiyari nio tariucuaaanu Pueyaso Rupaaajina naajiotasano tohuateeriquiaani. Naa sequeya Jesucristojinijiiri:

“Nojuajiniji pohuatasoojua pueyari nojuajiniji pohuatasaanutaniya. Nojoriiri jiyacari niishiniutianiya cante nojuajani”.

#### *Pablo naquerejosacari Roma tiacajiniara*

<sup>22</sup> Pueyaracaanu nio jiyacajinia cua pohuatasacari Jesucristojiniji, majaari jeya cua quiniu quiriquiaa nia niquiniuucua cua quianura. <sup>23</sup> Quiarijia cutara, janiyari Jesucristojiniji pohuatanu tucuarucuaa tarini, tee Jesucristo rupaa tojiyaquishaquiaari juhuanujuacuajani. Janiyari Espania jiyajinia pohuatanu paniya Jesucristojinijijuhuj. Queraatia marijiaari tari cua shocojocanu pueyaracaanu cua naquerejosacari niaacua cua quianura. <sup>24</sup> Naacuajitij, Espania jiyajiniara cua quiasacari, janiyacua nia tiacajinia jateemani. Janiya jaara pasaja camueenujusee niaata shuquiriatiani, na nuhuaji, janiyari paniniutianiyani nia naacunura janiya, cua quianura Espania jiyajiniara. <sup>25</sup> Janiyari coteenu Jerusalén tiacajinia tacatenutaniuhua tii quiniaa parta Pueyaso muerasu cua niquitionuhua cumaneecani, niya quiniaa parta Pueyaso pueya niquitiojosano nojoriria. <sup>26</sup> Puetunu parta Pueyaso pueya maapuejanaa Macedonia jiyajinia, mariyata niya Acaya jiyajiniani, nojoriiri jiyanoohua maninia miya. Nojoriiri tama niishiriojonuucuanujuaaja nareja na cumaneeca niquitiojonura Jerusalén tiacajinia quiniaa casamijiuucua Pueyaso pueyara. Cunora, nojoriiri quiarijia na rerateya cuata na jiyarosocoriquiano. <sup>27</sup> Nojoriiri naa miya nojori niishiriojosacari, maniniacuajaari nojori naacunura narta Pueyaso pueya. Seetanujuanaa maniniacuajaari nojori miishano. Judiocuacari maja na jamuenu quiquiaari Pueyaso rupaa pohuatasaanura taucuaca niquiara. Naaratej, taucuaca cuara saniniuujia quiarijia naacuura casamijiuucua Judiocuaca, nojori jiitiasano cumaneecata. <sup>28</sup> Naacuajitij pueyanaa, janiyari nojori jiyarosocoriquiano cumaneeca niquitionutaniya Jerusalén tiacajinia parta Pueyaso pueya jiitianaani. Na nuhuaji, janiyari Espania jiyajiniara quianutaniya cutarani. Cua quiasacari, janiyari nia tiacajinia tacanutaniyani cua niquiniuria niajaniya. <sup>29</sup> Janiyari seetanujuanaa niishiyani, Cristoori cua naacunutaniya maninia pa shuquiriniuria jatiqui, niaacua cua tiuquishacari.

<sup>30</sup> Cuarta Pueyaso pueyanaa, cua Jiyaniijia Jesucristo nia jiitianuucujuhuaaj, mariyata Pueyaso Sohuanu panitiootesacari pajaniya, janiyari jiyanoehua paniani nia cojiniuria janiya, Pueyaso nia secojonuta cucuara. <sup>31</sup> Cucuara nia secojore Pueyaso, na cojuanura janiya Jesucristo rupaa paraa Judiocuacaacuaji, Jerusalén tiacajinia cua quiasacari. Naajuhuaaj, nia secojore Pueyaso, Jerusalén tiacajinia quiniaa Pueyaso pueyacuara. Nojoriicuara nia secojore, nojori masenura shuquiriaatia narta Pueyaso pueya taucuaca jiyarosocoriquiano cumaneeca nojoriria. <sup>32</sup> Naajuhuaaj, quiria nia secojore, niaacua Pueyaso tiuquitiniuria shuquiriaatia janiya, nojuaja jaara naa paniri. Tii cua quishacari niaata, janiyacua tii samaatesee nia shuriucyani. <sup>33</sup> Pa jiyanoojia Pueyaso cuaara maninia jiitiaara puetunu niajanijajanaa. Cuaara naa quiiriatej.

## 16

### *Nata quiniaata Pablo saruhuatascari nojori niishishano pueya*

<sup>1</sup> Cuarta Pueyaso pueyanaa, nio maaji niaacua tiuquiniutianiyani, nojuajaari maninia maaji, Pueyaso tojjia. Na sesaari Febe. Nojuajaari Cencrea tiacajinia Pueyaso pueya maanu naacujua maninia. <sup>2</sup> Pa Jiyaniijia panijia nia quishacari, nia paniniutia nia masuure nia tiacora nio parta Pueyaso muerasu naacuna maaji. Niocua nia tiaco jiitiarenoj, taa nia jiitiaquiaacuaa parta Pueyaso muerasuni, maninia na quiniuria na camueenujusacari nia tiacajinia. Nojuaja nia naacure maninia, puetunu na panishanotajanaa. Nojuajaari queraatia parta Pueyaso pueya naacujuacuaa. Cua naacujuajaariuhuaaj.

<sup>3</sup> Quiria nia saruhuatate Priscila, neyaca Aquilano. Nojoriiri cua cojiniaa pa Jiyaniijia Jesucristora poonijionura. <sup>4</sup> Nojoriiri tama nojori cuaqueyajaaja panitiaquiaari cucuara, nojori tacunura cucuaji cua moyaquishaanura. Janiyari cunora jiyanoehua nojori timitiaani, naa nojori jiyanootiuniuucua cucuatej. Majaari saa janiyaja nojori cua timitianu. Seetanujuanaa puetunu parta Pueyaso muerasu taucuacajiniujiojuanaari nojori timitiaajuhuaaj, naa nojori miiniuucua. <sup>5</sup> Quiria nia saruhuatatejuhua parta Pueyaso pueya, noo pojori Priscila, Aquila tiajinia rerejoquiaa Pueyaso secojonuunuratej. Quiria nia saruhuatatejuhua cua rupuena Epéneto. Nojuajaari coteenujuanaa Jesucristoocua tiuquiaari Asia jiyajinia. <sup>6</sup> María nia saruhuatate quiriajuhuaaj. Nojuajaari jiyanoehua poonijioquiaari niaara. <sup>7</sup> Quiria nia saruhuatatejuhua Andrónico, Juniasnio. Nojoriiri cuarta Judiocuaca. Nojoriiri cuata nujuatejosaaquiaari nujuatejojuajinia, canaa pohuatanuucua Jesucristojiniji. Puetunu cuarta Jesucristo jiyaramiquishano pueyajanaari nojori panijiacajuhuaaj. Andrónico, Junias, nojoriiri socua coteenu janiyajiniji tiuquiaari Jesucristoocua.

<sup>8</sup> Nia saruhuatatejuhua Ampliato. Nojuajaari cua panishano pueyano, Jesucristoocua na tiuuniuucua. <sup>9</sup> Naajuhuaaj, quiria nia saruhuatate Urbano. Nojuajaari pa Jiyaniijia Cristora poonijionajuhuaaj. Cua rupuena Estaquis nia saruhuatatejuhuaaj. <sup>10</sup> Apeles nia saruhuatate quiriajuhuaaj. Nojuajaari puetunu casaajanaa rejeretaja cutara, Jesucristoocua tiuujia na quiniuucua. Aristóbulo tiajinia quiniaa pueya nia saruhuatate quiriajuhuaaj. <sup>11</sup> Naajuhuaaj, quiria nia saruhuatate Herodión, parta Judio pueyano. Naajuhuaaj, Narciso tiajinia quiniaa pueya nia saruhuatate quiria, noo pojori pa Jiyaniijiaacua tiuujia pueyatej. <sup>12</sup> Trifena nia saruhuatate quiria, Trifosajuhuaaj. Cuno maajipohuari pa Jiyaniijiaara poonijionuujuaca. Naajuhuaaj, pa panishano maaji Pérsida nia saruhuatate quiria. Nojuajaari jiyanoehua poonijiojua pa Jiyaniijiaara. <sup>13</sup> Rufo nia saruhuatatejuhuaaj. Nojuajaari maninia tojjia pa Jiyaniijia. Na nucua nia saruhuatatejuhuaaj. Nojuajaari juhua cua nucua quiquiaari quiria. <sup>14</sup> Nio pojori quiria nia saruhuatatejuhuaaj, Asíncrito, Flegonte, Hermes, Patrobas, Hermasnio, mariyata nojoritia quiniaa parta Pueyaso pueyano. <sup>15</sup> Naajuhuaaj, nio pojori nia saruhuatate quiria, Filólogo, necocua Julianio, Nereo, na rimiatunio, Olimpasjuhuaaj, mariyata nojoritia quiniaa parta Pueyaso muerasunio.

<sup>16</sup> Narta Pueyaso pueya nia saruhuatate seetanujuanaa nia paniniutia nojori. Puetunu niiquijinio parta Pueyaso pueya maapuejanaari cua sequecanuni cua saruhuatatura niajanija.



<sup>17</sup> Cuarta Pueyaso pueyanaa, nia numooteyanijia, jiyanoehua nia cojuare tama nia cuaqueyajaaja najuhuana tamaatia niishitiojonuujuaca pueyacuaji. Nojoriiri Pueyaso pueya maapue cushitiojoquiaa, sesa nojori niishitiojosanota. Naacujitij, Pueyaso pueyari juaatioquiaa. Majaari nojori niishitiojonu pueya taa coteenujuanaa nia niishitiojosaaquiaari seetanu rupaajanaa cutarani. Naa sesa niishitiojonuujuacaacuaji nia rupatere. <sup>18</sup> Nojoriiri maja seetanjuanaa na poonijionu pa Jiyaniijia Jesucristora. Nojoriiri poonijioquiaa tama nojori panishanojuaja nojori masenura. Najuhuana shanohua nojori pohuatasanota, nojoriiri niishiyashijia pueya sapojoquiaa. <sup>19</sup> Puetunu tamonu jiyacajinijinio parta Pueyaso pueyajanaari niishiya, niaari seetanjuanaa Jesucristo rupaa tojtiajaca cutara. Naaratej, janiyari jiyanoehua nia timitiaani. Naajuhuj, janiyari paniyani niishijia nia quiniuria, saaja seetanu rupaajanaa tojijia nia quiniuria, maninia miijia nia quiniurajuhuj. Saniniuujia, sesa niishitiojosano niishiyashijia nia quitiriquiani, maja sesa miijia nia quiniuria. <sup>20</sup> Naacujitij, poojia cajitijia Pueyasoori nia cumaquiniutianiya, Satanás nia shocotanura na sapojosacari niajaniya juucua. Niaari juhua na tanacunutianiya jiyocuara, Pueyaso tojijia nia quiniucua. Pa Jiyaniijia Jesu cuaara nia cumaquiiria, shuquiiriaatia nia quiniuria.

<sup>21</sup> Timoteo, cuata poonijiona Jesucristorani, nojuajaari cua sequeya nera cua saruhuatanura niajaniya. Cuarta Judiocuaca Lucio, Jasón, Sosípater, nojoriiri nia saruhuataajuhuj.

<sup>22</sup> Cuarta Pueyaso pueyanaa, janiyari Tercioni. Janiyari Pablora nio naajiyani, niaacua jiyarosocoriquiano. Janiyari nia saruhuataajaniuhuj Cristoocua tiujia cua quishacarijuhuaj. Niojuanaa, pueyanaa.

<sup>23</sup> Parta Pueyaso pueyano Gayoori nia saruhuataajuhuj. Nojuajaari na tiajinia cua quiniuria cua masuucanu. Nojuajaari puetunu parta Pueyaso pueyajanaa masuujua, na tiajinia nojori maquenura, nojori tiuquijiosacari nio tiacajinia. Parta Pueyaso pueyano Erastoori nia saruhuataajuhuj. Nojuajaari jiyatesaacanu nio tiacajinia jiyaniijia cumaneeca cojuana na quiniuria. Parta Pueyaso pueyano Cuartoori nia saruhuataajuhuj.

<sup>24</sup> Pa Jiyaniijia Jesucristo cuaara cumaquiiria puetunu niajaniyajanaa.

*Pablo maniniuuhuaqueetasacari Pueyaso, quera na tucuatasaacari na naajio*

<sup>25</sup> ¡Pueyanaa, jiyanoehua pa maniniuuhuaqueetare pa Pueyaso! Nojuajaari na naata cumaquini niajaniya, seetanjuanaa na muerasu nia quiniuria na rupaacua nia tiuushacari. Janiyari naa rootaquiaa niajaniyacujani, cua pohuatasacari Jesucristojiniji. Pueyasojuanaacuajaari tarijia cua niishitiquiaari Neyanu Jesucristojiniji cua pohuatanura. Jiya shipiniyaquishaacarijiyoyua, Pueyasoori jiyasohua tamajaaja na niishishano jiitiaja Neyanu Jesucristojiniji. <sup>26</sup> Saniniuujia, quiari naataja, paari niishiquiaarini, Jesucristocuajaari mijiria niquiaari puetunu pueyajanaa na jaariuutianura Sesaaca. Tariucuacaanu Pueyaso sequesano caminiujiuniaa naajionuufasanoiniji paari quiarjia seetanjuanaa na niishiya cutarani. Pueyaracaanu Quijia Pueyasocuajaari na paniquiaari quiarjia pa niishiniuria Neyanujiniji. Quiarijiani, Pueyasoori Neyanujiniji pohuataniquiaa puetunu jiyacajinijinio pueya niquiarajanaa, Neyanuucua nojori tiuuniuria. Naa na pohuataniquiaariiri Neyanu Jesu tojijia nojori quiniuria, Judiocuaca, taucuacanio.

<sup>27</sup> Pa Pueyasoori jiyanoehua niishijia cutara. ¡Pueyaracaanu pa maniniuuhuaqueetare nojuaja, maninia na miiniucua pajaniya, Neyanu Jesucristoocua pa tiuushacari! Cuaara naa shuquiritiasaaria pueyaracaanutej.

## COTEENU PABLO NAAJIONEE CORINTO TIACAJINIA QUINIAA PUEYASO PUEYACUARA

### *Pablo saruhuatasacari Corinto pueya*

<sup>1-2</sup> Corinto tiacajinia quiniaa Pueyaso muerasunaa, ¿niaate quiyajaa? Janiya, pa tarajanu Sóstenesjuhuaj, canaari nia saruhuataani. Janiya Pabloni, Jesucristo jiyarosano na rupaa cua pohuatanura taa Pueyaso paniquiaaricuajani. Canaa niaacuara naajiyani, socua canaa niishitiojonura nijaniya, Pueyaso saquiriojosano pueya nia quiniuucua. Niaari maninia quiya Pueyaso niqiuara, Jesucristo nia rupuesacari. Niaari seetanujuanaa Pueyaso muerasu, puetunu jiyacajinia pueyatajanaa, canapuate Jesucristoocua tiuujiacacuajani. Jesucristocuajaari nojori Jiyaniijia, pa Jiyaniijiajuhuaj. <sup>3</sup> Pa Que Pueyaso, pa Jiyaniijia Jesucristo cuara cumaquiiira nijaniya, juhuajaniya nia quiniuria.

### *Paari maninia miishaaquiaani Cristo pa rupuesacari*

<sup>4</sup> Maninia nia quiniuucua, janiyari pueyaracaanu Pueyaso sequequiaani “Paacarasho”. Pueyasocuajaari jiyanojua maninia miiquiaari nijaniya, nia rupuesacari Jesucristo. <sup>5</sup> Nia rupuesacari Jesucristo, Pueyasoori puetunu cumaquiquiaarijianaa nijaniya na cumaacata, nia poojotanura puetunu na rupaajanaa, puetunu na rupaajanaa nia niishiniuriajuhuaj. <sup>6</sup> Maninia nia tojtiasacari Cristojiniji pohuatasano, niaari maninia miishaaquiaari taa canaa sequequiaari nijaniyacujani. <sup>7</sup> Naacuajitij, niaari tari masequiaari puetunu Pueyaso niqitioonu panishanojuanaa, maninia na muerasu nia quiniuria, nocua nia jiaatianuta nia sashishacari pa Jiyaniijia Jesucristo tiuquishacariuhua. <sup>8</sup> Pueyasoori nia cumaquiniutianiya pueyaracaanu, maja quenaaja niaacua casaa tiuutiasoo quiniuria, sesa nia miishanojiniji. Naacuajitij, pa Jiyaniijia Jesucristo jaara tiuquiriohua na ruuretajaca na saniitionura, niaa cutaraari juhuajaniya quiniutianiya. <sup>9</sup> Pueyasocuajaari maninia tohuateequiaa na sequesano. Nojuacuajaari pa sequequiaari pa cojiniuria Neyanu, maninia pa miishaanura Neyanutajuhua. Cuno Neyanuni, nojuacuajaari pa Jiyaniijia Jesucristo.

### *Pueyaso muerasu juhua tamasaca niqitioquiaari*

<sup>10</sup> Cuarta Jesuucua tiuuniaanaa, cua tojtitiare. Pa Jiyaniijia Jesucristoori cua sequeteyani. Maninia nia niishiriojore. Maja juhua tamasaca nia niqitioonu. Maja tamasaca nijaniya. Maninia nia niishiriojore, maja tamaatia. Nia jiuujiaatioorejuhuaj. <sup>11</sup> Naa nia sequeyanijia cuarta Jesuucua tiuuniaanaa, Cloe niqiuohua pohuatanuucua janiya nijaniyajiniji. Nojoriiri cua sequerucuaa niaana juayonuujutaquiaa. <sup>12</sup> Naa pohuatasaruucua nijaniyajinijinia: puetunu pueyajanaana tama sequequiaajaaja: “Canaari Pablo pueyani”. Tamasacanaari saniniuujia sequequiaacujua: “Canaari Apolo pueyani”. Tamasacanaari sequequiaajaacuhua: “Canaari Pedro pueyani”. Tamasacanaari sequequiaajuhua: “Canaari Cristo pueyani”. ¿Naatee pueyanaa? ¿Casaara tamajaaja naa nia raqitijiquianuni? <sup>13</sup> ¿Majateeri nia niishiniu? Paari Jesucristo cuaqueyani. ¿Pa Jiyaniijia cuaqueyateeri neequeresetanocuaa? ¿Janiyateeri niaacuara cusoquiaari niyacutesanojiniani, cua pueya nia quiniuria? ¿Niaateeri cua sesajinia tiuquinijosaaquiaari moojiniajuhuaj? ¡Maja, cuarta Pueyaso pueyanaa! <sup>14</sup> Janiyaquiiri namitia nia tiuquiniyiquiaari moojiniani. Naacuajitij, majaari nia naata sequenu niaa cua sesajinia tiuquinijosaaquiaari. Janiyari niishiya cutarani, janiyari saaja Crispo tiuquiniquiaarini, Gayonio. <sup>15</sup> Naacuajitij, majaari quenaaja tamonu na naata sequenu janiyari na tiuquiniquiaarini. <sup>16</sup> Quera niyajetaanijia. Janiyari Estéfanos tiuquinijioquiaarijuhua necohuatajani. Majaruhua socua pueya cua tiuquinijionu quiquiaari.

<sup>17</sup> Jesucristoori maja na jiyaronu quiquiaari janiya pueya cua tiuquinijionura. Cristo cutaraari cua jiyaroquiaari na rupaa cua pohuatanura. Majaari cua maniniushitiniu

na rupaa cua pohuatasacari, pueya mariqui shanohua cua pohuatasanoocua tiuuri najuhuaanari. Cuaara tiuutiuria cutara Jesucristoocua, na miiniucua maninia pocuara. Pueyasoori pa jiyanoocua saaja Jesucristo cusonuucua niyacutesanojinia pocuara.

*Cristoori Pueyaso cumaaca jiitaa, Pueyaso niishitiajajuhuj*

<sup>18</sup> Canaa pohuatasano Cristo cusonujiniji niyacutesanojinia pocuarani, cunoori juhua mosanucua pohuatasano shaajecoriquiano pueyara. Naajaa, Jesucristo rupaari Pueyaso cumaacaracacua na tojitianaara, Pueyaso muerasura na jataniniuria pajaniya.

<sup>19</sup> Pueyaso sequesanoocuaaari naa naajiotasaaquiaritij:

“Janiyari niishijia niishishano cushitionutaniyani. Mijiria pueya niishishano jiyatenu-taniya najuhuanaranijia”.

Naacuajitij, cante mijiria pueya niishishanoocua tiuyani, nojuajaari maja na jiyanooshaanu quiniutianiya.

<sup>20</sup> ¿Pueyanoteeri jyanohua niishitiajaraca Pueyaso muerasura na jataniniuria pajaniya? ¡Maja! Niishijiajanaa jaara jyanohua niishiriojore, ¿pa naatate na sequesanoocua tiuuniu, Pueyaso na jyanootiniuria pajaniya? Maja. ¿Niishitiojona rootasante na naata Pueyaso pueyara jiyatenu pajaniya nocua pa tiuushacari? Maja. Naacuajitij, puetunu mijiria niishishanojuanaari najuhua quiya Pueyasora. <sup>21</sup> Pueyari maja na naata Pueyaso niishini quiquiaari tama nojori niishitiajataaja. Pueyasoori tama sequequiaaritiaaja na niishitiajata cutara:

“Jaaja. Maninia naatej. Pueya jyanooriiri saaja nojori tiuushacari cua Niyanuucua”.

Pueyari saniniujia jiyaniya Jesucristo rupaari nareja sequesanojuhanajaj, tojishoo.

<sup>22-23</sup> Naaratej, cuarta Judiocuacaari maja Jesucristoocua tiuniaara na quiniu ritia. Nojoriiri Pueyaso cumaacata miishano niquniu paniquiaa coteenu saaja. Cunora, nojoriiri canaa tojitiaaquiuaa canaa pohuatasacari Jesucristo mosaanujiniji niyacutesanojinia teetesano. Nojoriiri saaja sequequiaa: “¿Pa Jiyaniijiaranotucua casaara naa cararaatia mosaareni?” Griego pueyari naajuhuj. Majaari ritia nojori quiniu paniniu Jesucristoocua tiuniaara. Nojoriiri saaja niishiniucua jiaatiajaca. Nojoriiri jiyaniya Jesucristoori najuhua cusoquiaari juhua moseeca. Naacuajitij, canaa pohuatasacari Jesucristo niyacutesanojinia mosaaquiaari, Judiocuacaari jiyaniya Jesucristoori cumaacaaju quiquiaari. Nojoriiri jiyaniyajuhuj Pueyaso Jiyarosocoriquianoori ritia Judiocuaca jiyaniijara quiniutianiya cutara. Majaari na niishitiuniu quijia Cristo cuaara coteenu miishaaria naquiya, jiyanooshano nojori quiniuria sesa nojori miiijosanojiniji. Griego pueyari canaa pohuatasano tojiyaquiuaajuhuj. Nojoriiri jiyaniya Pueyasoori niishiyashijia quiquiaari Neyanu na motenura. <sup>24</sup> Paa cutaraari niishiyani Cristoori pocuara cusoquiaari. Naacuajitij, Pueyasoori cumaacaraca cutara na saquiriojosano pueya na jaariutianura Sesaaca, na muerasura na jataniniuria pajaniya, Judiocuaca, Griegohuanio. ¡Pueyasoori jyanohua niishijia cutara! <sup>25</sup> Pueyari jiyaniya Pueyasoori niishiyashijia quiquiaari. Cunora Neyanu cusoquiaari niyacutesanojiniaari. Naajaa, naacuajiti Pueyasoori pa jyanooquiaari. Pueyasoori jyanohua socua niishijia cutara mijiria niishijiacajiniji. Pueyari jyanijuhuj, Pueyasoori cumuecaaju quiquiaari Cristo cusosacari niyacutesanojinia. Naajaa, naacuajitij, ¡Cristoori Sesaaca shocotaquiaaricuaaja! Pueyasoori jyanohua socua cumueca pajaniyajiniji.

<sup>26</sup> Cuarta Jesuucua tiuniaanaa, niaacuajaari niishiya taamueca pueya nia quiquiaari pueya niqiarani, Pueyaso sequesacari nijaniya na muerasu nia quiniuria. Saaja secaja nijaniyajinijinoori niishijiaa quiriuaa. Saaja secaja nijaniyajinijinoori tojishano pueya quiriuaajuhuj. Saaja secaja nijaniyajinijinoori jyanijianucua niqiuhuacujinio supueno quiriuaa. <sup>27</sup> Mijiria quiniaa pueyara, Pueyasoori socua niishiyashijia pueya saquiriojoquiaari, na muerasu nojori quiniuria. Naacuajitij, mijiria niishijiaaari tamajaaja caririqiniutianiya nojori jaara saquiriojiyaquishaare. Pueyasoori tojishoo pueya saquiriojoquiaarijuhuaj, na muerasu nojori quiniuria, mijiria tojishano pueya caririqiniuria nojori jaara saquiriojiyaquishaare. <sup>28</sup> Pueyasoori soosano pueya saquiriojoquiaarijuhuaj, tojishoo pueyano. Pueyasoori naa saquiriojoquiaari najuhua

quijiaca. Canapuate tama na cuaqueyajaaja jiyaniya cutara pueyanoni, cuno pojoriiri saniniuujia quejoosaanutaniya. <sup>29</sup> Naacuaajitij, majaari quenaaja jyanohua pocuajaca cureenu quiniutianiya Pueyaso niquiara. Tojetaarucujanaa shaaquiri pocuajaca quiniutianiya. <sup>30</sup> Pueyasojuanaacuaajaari nia rupuetequiaari Jesucristo. Naacuaajitij, niaari Pueyaso niishitiaja jiitiaa. Nia rupuesacari Jesucristo, niaari maninia miijia quiya Pueyasora. Pueyasoori nia jataniya saa na tojjiacaraja nia quiniuria, juhua Neyanu nia quiniurijuhuj. Niajaniyari puetunu jecasaanutaniyajanaa. Paari naa miishiyani Jesucristo pa rupuesacari. <sup>31</sup> Seetanujuanaari nio sequesano tariucuaaanu Pueyaso Rupaajiniji:

“Cante shuquiriaatia quiniu paniyani, nojuaja cuara shuquiritiaara pa Jiyaniijia”.

## 2

### *Jesucristo mosaanujiniji pohuatasano*

<sup>1</sup> Cuarta Jesuucua tiuunaa pueyanaa, janiya jaara niaacua tiuquiquiaarini, niaacuaajaari niishiya taa cua pohuataquiaari Pueyasojiniji Jesucristo rupaa niajaniyani. Majaari jiyajeneta cua pohuatanu quiquiaari niishijia niishishano rupaacata. Cua pohuatasanoori niishishaatia quiquiaaritia, maja juhua cutara pueyano pohuatasano. Janiyari jacaria pohuataquiaari Pueyaso rupaa niajaniyani. <sup>2</sup> Janiyari tari tama sequequiaaritia: “Janiyari saaja Jesucristojiniji pohuatanu paniya Corinto pueya niquiarani, naajuhuj, taa na cusoquiaari pocuara niyacutesanojiniani”. <sup>3</sup> Cua pohuatasacari Jesucristo rupaa nia niquiara, janiyari sasaca quiriqiaa cua puerenutani. Janiyari tetecariquiaani. <sup>4</sup> Majaari cua paniniu quiquiaari cua tiutiniuria niajaniya Jesucristoocua tama cua niishitajataaja. Naaratej, majaari cua pohuatasano quiniu quiquiaari juhua shanohua pohuataja sequesano. Naacuaajitij, cua pohuatasacari Jesucristo rupaa nia niquiara, Pueyaso Sohanu cutaraari nioojiacajinia poonijioquiaari Pueyaso cumaacata cutara. <sup>5</sup> Naacuaajitij, niaari Jesucristoocua tiuquiaari Pueyaso cumaaca miishacari maninia nioojiajinia. Maja cutaraari nia tiuuniu quiquiaari saaja pueya niishishanoocua.

### *Pueyaso Sohuanucuaajaari pa niishitiya Pueyaso*

<sup>6</sup> Naajaa, canapuate Pueyasooocua tiuujia seetanujuanaa cutarani, nojoriiri niishiya canaa pohuatasano Jesucristojiniji seetanu niishishanojuanaa cutara. Nio niishishanoori maja saa pueya niishishanojua. Maja mijiria jiyaniijianucua niishishano. Mijiria niishijiaaari shaajeconutaniya. Nojori niishishanoori najuhuana quiniutianiya. <sup>7</sup> Canaa pohuatasano cutaraari Pueyaso niishishano tarijia, jiya shipinishaacarijiyojua. Pueyasoori jiyacari niishiriojoquiaari jyanohua maninia na miiniuria pajaniya, shuquiriaatia pa quiniuria pueyaracaanu pa Jiyaniijia Jesucristo shuriucua. Nio rupaari maja pueya niishishano tari. Pueyasoori maja nio na niishitionu quiquiaari pueya tari. <sup>8</sup> Mijiria jiyaniijianucuaari nio niishiyaquiquiaari. Nojori jaara na niishiquiaari tarijia, nojori maara pa Jiyaniijia moyaquiquiaari niyacutesanojinia. ¡Na Shipinina motuquiaaritiaari, pueyaracaanu shacantuuca quijia! <sup>9</sup> Naa naajiotasano quiyacuaajaari tariucuaaanu Pueyaso Rupaajinia:

“Pueyasoori jiyasohujaa casaa jeenucuasano jiitiaa na panijia pueyara. Cunoori maja pueya niquishano quenaaja. Majaari cunojiniji nojori tojishano quenaajajuhuj. Majaari quenaaja pueya niishiriojonu quiquiaari jiyano casaate na naata quiniu nojoriria”.

Quiarijiani, canaari saniniuujia pueya niquiara na pohuataani. <sup>10</sup> Pueyasocuaajaari quiaritia canaa niishitiquiaari canaa jiuujiajinia na miiniu panishano pajaniyara. Canaa niishitiquiaariiri na Sohanuta. Na Sohanuuri puetunu Pueyaso niishiriojosanojuanaa noojiajinia niishiya. <sup>11</sup> ¿Cante pueyano niishiriojosano noojiajinia niishiyani? ¿Majate saa na camaru sohanujua niishiniu? Taaquiriirini. Naajuhuj, saaja Pueyaso Sohanuuri Pueyaso niishiriojosano noojiajinia niishiya. <sup>12</sup> Naaratej, Pueyasoori na Sohanu niquitioquiaari pajaniya, pa niishiniuria Pueyaso niishishano. Naacuaajitij,

majaari pa jiitanu saaja tama pa sohuanujuaaja Pueyaso niishishano pa niishiniuria. Paa cutaraari Pueyaso Sohuanuracajaniuhuj. Naacuajitij, Pueyaso Sohuanu cumaquishacari pajaniya, pa naata puetunu Pueyaso niqutiosano pajaniyarajanaa niishiniu. ¡Jiyanohua capora Pueyaso! <sup>13</sup> Naacuajitij, canaa pohuatasanoori maja saaja mijiria pueya niishishano. Pueyaso Sohuanujuanaari canaa niishitiojoquiaari Pueyaso rupaa canaa niishiniuria canaa jiuujiajinia. Naacuajitij, canaa naata Pueyaso Sohuanu jiitianaa niishitiojonu seetanu Pueyaso rupajanaa, mariyata taa Pueyaso Sohuanu niishitiojoquiaa canaacuaani.

<sup>14</sup> Mijiria quiniaa pueyari Pueyaso Sohuanu niishitiojosano niishiniu paniyaquiquiaa. Nojoriiri saaja juhua tama mijiria niishiriojosanojuaja na jiyatequiaa. Seetanujuanaa, nojoriiri maja na naata na niishiniu. Saa Pueyaso Sohuanutaja pa naata Pueyaso Sohuanu niishitiojosano niishiniu. <sup>15</sup> Cante Pueyaso Sohuanu jiitiaani, nojuajaari na naata puetunu niishishanojuanaa saniniuujuniu. Saniniuujia, tamasaca pueyari maja na naata Pueyaso Sohuanu jiitiana miishano niishiniu nocuara na rimiaaquenura. <sup>16</sup> Tariucuacaanu Pueyaso Rupajinia naa naajiotasaaquiaarijuhuaj:

“¿Cante pa Jiyanijia jiuujiajinia na niishiriojosano niishiyani, socua na niishitiojonura nojuajani? Shaaqui”.

Paa cutaraari Jesucristo niishishano niishiyani Pueyaso Sohuanuraca pa quishacari. Naacuajitij, majaari pa niishiniu saa mijiria pueya niishishanojua.

### 3

#### *Pueyasora poonijionaa pueya cuaara poonijionuuriquia nojori panitioonuta*

<sup>1</sup> Cuarta Jesucristo tiuuniaanaa, cua quishacari niaata, majaari cua naata jiyajeneta Pueyaso niishishano cua niishitiojonu quiquiaari niajaniya. Niaari quera juhua Pueyaso Sohuanuuju quiriquiaajaa. Niaari juhua Cristo conaaja quiriquiaajaa, maja Pueyaso tojjijaca seetanujuanaa. Nocuaji, janiyari nia niishitiojoriquiaa jacariani, juhua Pueyaso niishiyashijiacaa pueya nia quishacarijia. <sup>2</sup> Cua niishitiojosano niajaniyari niishishaatia quiquiaarijia, maja jiyajeneta. Majaari cua naata Pueyaso cutara niishishano cua pohuatanu quiquiaari niajaniya. Cuno niishishanoori cumueeca Pueyaso pueyara, naatej, taa shu quiya tariucua puereetuca pueyaracuaani. Juhua naatujoori nia quishacarijia, majaari nia naata na tojiniu quiquiaari. Juhuanujuajaari maja nia naata na tojiniu quiarijiani. <sup>3</sup> Niaari juhua Pueyaso Sohuanuuju quiyajaa, juhua Pueyaso niishiyashijiacaa pueya. ¿Naatejaaratej? Niaana niarta Pueyaso muerasu shocotanu paniquiaa juucua. Niaanaari juayonuujutaquiaa. Naa nia quishacaritij, niaari juhua Pueyaso Sohuanuuju quiyajaa pueyaracaanu, juhua Pueyaso niishiyashijiacaa pueya. <sup>4</sup> Niaana sequequiaa: “Canaari Pablo pueyani”. Tamasaanaari sequequiaajuhuj: “Canaari Apolo pueyani”. Naacuajitij, puetunu niajaniyajanaari saaja juhua Pueyaso niishiyashijiacaa pueya quiyajaa.

<sup>5</sup> Nia sequeretoj: ¿casaate Apoloni? ¿Casaate janiyani? Canaari nareja Pueyasora poonijionaajuhuanani. Canaari saa Pueyaso panishano miiquiaajaani, Jesucristo rupaa nia tojitianura. Canaari Jesucristo panishano miiquiaarini taa na sequequiaari canaa miiniuriacuajani. <sup>6</sup> Naacuajitij, janiyari Pueyaso rupaa nia pohuataquiaarini, naatej, taa casaa jajau pueyano natojoquiaacuaani. Apoloori saniniuujia socua Pueyaso rupaa nia niishitiojoquiaari na cumaquiniuria niajaniya, naatej, taa pueyano na natau shiijioya mohuacatacuaani, maninia na maashiniuria. Pueyaso cutaraari na rupaa maashitiquiaari nioojiacajinia, na muerasu nia quiniuria cutara. <sup>7</sup> Naaratej, ¿casaateeri canaani; Apolo, janiyano? Canaari Pueyasora poonijionaa narejani. Saa Pueyasojua cutaraari cumaacaraca. Saaja nojuaja cutara na naata pa tojitiniu na rupaa, seetanujuanaa na muerasu pa quiniuria. <sup>8</sup> Naacuajitij, paari niishiyani, cante natojojonani, cante mohuaca shiijiotanani, canaari mariyata saaja Pueyaso poonitijosanoni. Pueyasocuaajaari canaa niqutionutaniya na jiitiasano, nera canaa poonijionuucua. Cante socua poonijioreeni, Pueyasoori socua na jiitiasanojiniji na niqutionutaniya taajecori pueyajiniji. <sup>9</sup> Canaari

mariyata Pueyasora poonijionaani. Niaari juhua Pueyaso nataacuaca nera. Niaari na muerasu cutara, maja canaa muerasu. Naajuhuj, Pueyasoori juhua nia tiaa saitia, na quiquiorano. Saitia tiasacari, sairi coteenu cumaatia niojoshiya na morijiuria, maja tia matanura. <sup>10</sup> Pueyaso jaara jiyaroquiaari janiya, janiyari Jesucristo rupaa pohuatano coteequiaari maninia nijaniyani, Pueyaso muerasu nia quiniuria nia tiuushacari cua pohuatasanoocua. Naacuajitij, janiyari juhua Pueyaso tiara shipininiu coteequiaarini. Cua niishitiojosano nijaniyani, cunoori juhua morijiu nujuatejosano quiquiaari. Cua nuhuaji, tamasaari nia niishitiojoriquiaa socua Jesucristo rupaa, juhua Pueyaso tia tucuatasaanura. Nojori cuaara niishiiria maninia, maninia nojori niishitiojonura nijaniya, juhua maninia tiasano nia quiniuria.

<sup>11</sup> Majaari socua tamonu rupaa quiniu nocua pa tiuuniuria Pueyaso pueya pa quiniuria. Saaja Jesucristo rupaa cutaraari pa jataniija Pueyaso pueya pa quiniuria. Janiyacuajaari na rupaa pohuataquiaari nijaniyani. Saa na rupaacuaja nia tiuushacari, niocua maninia qiri, juhua maninia morijiucaacua tiasano tia, maja na matanura. <sup>12-13</sup> Cante socua Jesucristo rupaa niishitiojiya nijaniyani, cuno cuaara niishitiojora jiyano hua maninia. Cuaara nijajetaaquiiria cutara, nojuajaari na niishitiojosanojiniji nequesoreesaanutaniya Jesucristo muetasacariuhua pocua, pa miishano na saniniujiuniuria juhua manitia. Puetunu niishishaanutaniyajanaari taa canaa niishitiojoriquiaa Jesucristo rupaani, maninia, sesa soj. Pa naata sequenu, canaa niishitiojosanoori juhua pueyano tiasano. Pueya jaara tiare orota, platatano, shanohua saitiano, maniiri maja na naata na catijianu. Cante saniniuuja tiaree macacatani, tucurutajuhuj, turequenacotano, cunoori taraatia quiniutianiya na tia jaara sanishaare catijianu. Naaratej, pa niishiriojore, ¿pa rootasanote seetanujuanaa maninia? <sup>14</sup> Tamonu jaara maninia miijia quiquiaari Pueyaso cumaacata, na miishanoori maja najuhua quiniutianiya Pueyasora. Pueyasoori cuno pueyano niqutionutaniya na jiiatianojiniji. Cuno pueyanoori niishijia quiquiaari, juhua maninia tiana pueyano. Maninia casaata tiaquiaariiri, maja na tia catenura jaara sanishaare senu. <sup>15</sup> Cante saniniuuja tiaquiaari cateja casaatani, na tiasanoori catenutaniya. Puetunu na jiiatianojuanaari juurequenutaniya. Saaja nojuajaari Sesaaca jaariutiasaanutaniya juhua manijiniji jaashano. Naa miishaanutaniyari Jesuucua tiuuninaa, canapue te maninia miyashijia quiquiaari mijiriani. Nojuajaari jatarinitiaja Sesaaca jaariutiasaanutaniya, juhua manijiniji jaashano.

<sup>16</sup> ¿Majateeri nia niishiniu pueyanaa? Niaacuajaari Pueyaso quiquio, juhua na tia. Na Sohuanuuri niojiacajinia quijia. <sup>17</sup> Tamonu jaara Pueyaso quiquio sesore, Pueyasoori cuno pueyano saniitionutaniya saniniuuja. Puetunu Pueyaso muerasujuanaari juhua na tia quiya. Pueyaso quiquio cuaara quiiria tojetaarucujanaa maninia, saa neraja, maja raquiriojotasano. Niaacuajaari na quiquio.

<sup>18</sup> Tama nia cuaqueyajaaja nia cojuare tamonu mariquei nia sapojoreeri. Cante tama na cuaqueyajaaja jiyaniya niishijiani, nojuaja naasucuaari niishijia saaja Pueyaso niishiyashijia niquiara. Cuno pueyano cuaara jataara cuno na niishishano juhua niishiyashijia na quiniuria narta pueya niquiara. Na nuhuaji, cuaara maseera Pueyaso niishitaja, seetanu niishijia na quiniurijanaa. <sup>19</sup> Mijiria pueya niishishanoori juhua paateca sequesano Pueyasora. Tariucuaaanu Pueyaso Rupaajinia naa naajiotasanoori quiya:

“Pueyasoori mijiria quiniaa pueya cushiriquiitaniniutianiya, tama nojori niishi-tiushanoocuaajaaja nojori tiuushacari najuhuanaj”.

<sup>20</sup> Naa naajiotasanoori quiyajuhuj:

“Pueyasocuajaari mijiria niishijia niishiriojosano niishiya. Naa sequeyari: ‘Najuhua-naari cuno pojori niishiriojonuusanu’”.

<sup>21</sup> Naaratej, maja shuquiriaatia nia quiniu saaja niquiriyatu Pueyaso rupaa pohuatana nia tojishacari. Pueyasoori tamasa pueya jiyaramiquiquiaa nia cumaquiniurijuhuj, maja saa niquiriyatu niishitiojonaja. Puetunu casaajanaari niaara, maninia nia quiniuria. Naaratej, majaari saa niquiriyatu pueyanoo cuaja nia jiaatianu. <sup>22</sup> Pueyasoori canaa jiyaramiquiquiaari canaa cumaquiniuria nijaniya. Naacuajitij, janiya, Apolo, Pedro,

canaari niaara quiyani, maninia canaa miiniuria nijaniya Pueyaso rupaata. Nio jiyari niaara quiyajuhaaj. Pueyaso shipinishanocuaajaari niaara. Naajuhuaaj, mijiria nia quishacari, cunoori niaara quiya, socua maninia quijiara nia quiniuhuaa. Taa nia miishiya quiarijiacuajani, taa nia miishaanutaniyani, puetunu cunojuanaari niaara, cumueeca Pueyaso muerasu nia quiniuria. Nia shaajesacariiri maninia quiniutianiya niaarajuhaaj. Pueyasoori nia shaajeteya na shuriucua nia quianura. Naacujitij, puetunu casaajanaari niaara quiya.<sup>23</sup> Nijaniyari Cristora quiya saniniuujia. Cristoori saniniuujia Pueyasora quiyacujua.

## 4

*Jesucristo jiyaramiquishano poonijiosano*

<sup>1</sup> Naaratej pueyanaa, nijaniya cuaara niishiiria canaari saaja Jesucristo seyani. Canaari maja cutara pueyani. Pueyasoori canaa jiyatequiaari na rupaa canaa niishitiojonura nijaniya, Pueyaso niishitiojosano canaa. Cunoori tarijia pa niishishoo.  
<sup>2</sup> Cante Pueyaso niishitiaja jiitiaani, cuno cuaara quiiria seetanujuanaa Pueyaso miini panishano panijia, na rupaa na pohuatanura puetunu maninijanaa.  
<sup>3</sup> Nijaniya, tamasaca pueyajuhuaaj jaara sequenu paniya taamueca pohuatanate janiyani, quiria, naajaa. Mijiria nequesorenaa jaara cua nequesoreere cua niishitiojonujiniji, naajaa. ¿Janiyate sesa niishitiojoquiaani? Johuaaj. Maja cua niishiniu.  
<sup>4</sup> Janiya jaara sesa miiriquiaa cua Jiyaniijiaara cua poonijosacarini, majaari cua niishiniu. Majaari coojia macuhuaajenu quiijia. Naajaa, maja cua naata tama cua cuaqueyajaaja sequenu janiya cutara maniniani. Saa cua Jiyaniijiaja na naata sequenu taa cua quiquiaarini.  
<sup>5</sup> Naaratej, maja nia rimiaaquenu tamonuucuaara, Jesucristo tiuquiyaquishacariuhua pocua. Nia sashiri. Pa Jiyaniijia jaara tiuquiriohua, puetunu jiyasohua pa miishanojuanaari niishishaanutaniya. Niishishaanutaniyajaariuhuaaj casaara pa miiquiaari puetunu pa miishanojuanaani. Cuno quishacari, pa Jiyaniijiaari maninia pohuatanutaniya cante maninia miijia quiriquiaa mijiria na quishacarini.

<sup>6</sup> Cua tojitiare cuarta Jesuucua tiuuniaanaa. Janiyari nareja nia pohuatariquiaa Apolojinijini, janiyajinijijihuaaj, maninia nia niishiniuria casaa cua niishitiojiya nijaniyani. Naacujitij, nia niishitiojoriquiaanijia saa Pueyaso rupaa nia tojitianura suraatiaja. Majaari socua tamonu niishitiojosano nia tojinuu. Naajuhuaaj, maja nia sequenu tamonu niishitiojonajiniji: “Cuno niishitiojonaari sesa pohuataja. Tamonu niishitiojona cutaraari shanohua pohuataja. Na tojiriirij, na shuquiritiniucua janiya”. Maja naate pueyanaa. Mariyata nia tojitiare puetunu Pueyaso jiyaramiquishano pueyajanaa, seetanujuanaa nojori pohuatasacari Pueyaso rupaa.  
<sup>7</sup> ¿Nijaniyariuhuaaj? ¿Taa nia sequeya tama nia cuaqueyajinijiaajani? ¿Niaateeri socua maninia pueya tamasacajiniji, socua niishijiacajuhuaaj? Majaruhua. Naajaa, niaa jaara seetanujuanaa socua niishijiac quiri tamonujiniji, ¿taa jiyanohua niishijiacara nia quiqianuni? ¿Tamajaajate? ¡Maja tamajaaja! Niaacujaari Pueyaso niishitiaja jiitaa. Naaratej, maja nia jiyaniiniu niaa socua maninia pueya tamasaca pueyajiniji, tama nia niishishanotajaaja.

<sup>8</sup> Niaa jiyoteeri jiyaniya niaa tari cutara niishijiacara quirii. Niaa jiyoteeri jiyaniyajuhaaj, niaa tari jiitaa puetunu Pueyaso niqitionu panishanojuanaa nijaniya. Naajuhuaaj, niaa jiyoteeri jiyaniya Pueyasoori nia jiyateree jiyaniijianucua nia quiniuria. Niaa naasucuaari canaa shocotaree tari. ¿Naatejaaratej? Seetanujuanaa naara nia jiyateriquiani, canaa quiniuria niarta jiyaniijianucuaajuhuaaj, shuquiriaatia pa quiniuria mariyata.  
<sup>9</sup> Janiyari cuarta Jesucristo jiyaramiquishanoocua niishiriojoriquiaani, Pueyaso naasucuaari canaa jiyatequiaari juhua najuhuaana quijiacara, saa puecoosocoriquianojua. Canaa naasucuaari naa quiya mijiriani, puetunu pueyajanaa shootianura canaa, Pueyaso seya shootianura canaajuhuaaj.  
<sup>10</sup> Canaa tojitiasacari Cristo, canaa naasucuaari niishiyashijiac quiya tamasacarani. Nijaniyari saniniuujia niishijiac quiya tamasacara, Jesucristo nia rupesacari. Canaa naasucuaari Pueyaso muerasu sasaca quiya saajani. Niaari saniniuujia Pueyaso muerasu cumueeca quiya tama nia

niquiarajaaja. Pueya jiyoteeri nia shuquiritiaa. Canaari saniniuujia saaja rerequetesano quiyani, pueya soosanojuhuaj. <sup>11</sup> Canaari pueyaracaanu miaajequiaajaani. Canaari jiyamuequiaajaanihuaj. Canaa cushishano toqueniyojaari jiyareta sesaruqueniyojua. Pueyari canaa miiquiaa taraatiani. Shaaquiiri canaa tia, canaa rucojonusua pueyaracaanu. <sup>12</sup> Canaari samareequiaani pueyaracaanu canaa poonijosacari tama canaa juaashiquiatajaaja. Pueyari canaa sesacaquiaani. Canaari maninia na riucuaquiaa saajani. Canaa jaara naquiya miishaareni, canaari na rejeretaquiaa juhuajaniya saajani. Majaari canaa naminiu quiquiaa saniniuujia nojori. <sup>13</sup> Pueya jaara tamasaca niquiara rimiaaquequiaa canaajiniji, canaari nojoritia jecatoonu saniquiaa juucuan. Pueyari canaa jiyatequiaa juhua rucucuarani. Canaari naa quiyajaa nojoririani.

<sup>14</sup> Naa cua naajosacari niaacuaratej, majaari cua cararonu paniniu niajaniya. Janiyari saaja nia niishitiojonu paniya cutarani. Janiyari nia rootaa juhua cua muerasuniyojuani. <sup>15</sup> Naa naasucuaari queraatia Jesucristo rupaa niishitiojonaaraca. Naajaa, saa janiyajaari juhua nia queni. Naa tojitasacari Jesucristo rupaa cua pohuatasacari niajaniya, niaari Pueyaso muerasura quiquiaari. <sup>16</sup> Juhua nia que cua quishacari, nia nacasureenijia pueyanaa. Naate taa maninia muerasu na quecua jiaatiaacuaani, naa cucua nia jiaatiarejuhuaj, juhua janiya nia quiniurijahuaj.

<sup>17</sup> Naaratej, janiyari niaacua jiyaroya cua panishano Timoteoni. Nojuajaari juhua cua niyanura quiquiaari na tojishacari Jesucristo rupaa. Timoteori pa Jiyaniijia Jesucristo tojiquiaa maninia. Nojuajaari nia niishitiojonutaniuhua taa cua niishitiojoquiaacuaa puetunu Pueyaso maapuejanaa puetunu jiyacajiniajanaacuaani. Naa nia rootanutaniyari nia niishiniuhuara maninia cua niishitiojosano niajaniya tarijia. Nojuajaari nia pohuatanutaniyahuaj taa quijia cua quiyani cua tojishacari pa Jiyaniijia Jesucristo, naa maninia nia miiniurijahuaj.

<sup>18</sup> Noojiaqueya niajanijajinijinoori shuquiriaatia quiya, juhua jiyaniijianucua nojori jiyatesacari tama na cuaqueyajaaja. Nojoriiri naa miiriiqui nojori jiyaniishacari maja naasucuaari cua tacatenu quiniutianiuhua, cua niqiniuhuara niajaniya socua. <sup>19</sup> Janiyacuajaari niaacua naquerejiya tarini, cua Jiyaniijia Jesucristo jaara paniri niaacua cua quianura. Cua tiuquishacari niaacua, janiyari cuno niishijiaca pueya saniniujiunutiyaniani, cua niishiniuria casaate nojorini, maja naa sacuaaratia nojori quiniuriatej. ¿Cumaacaracate nojori, saaja pocuajaca soj? <sup>20</sup> ¿Canteeri seetanujuanaa Pueyaso pueyanoni? ¿Saaja pocuajatee? ¡Maja pocuaja! Cante Pueyaso Sohuanu jiitiaa na cumaquiriquiano Jesucristo na tojiniuriani, cunoori seetanujuanaa Pueyaso pueyano cutara. <sup>21</sup> Naa niishiriojore, cuarta Jesucristo tiuuniaanaa. ¿Taa nia paniya cua miiniuria niajaniya cua quiasacari niaacuani? ¿Niaateeri paniya cua saniitionura niajaniya, jacaria cua niishitiojonura niajaniya cua paniniutia soj? ¿Taa nia paniyani?

## 5

### *Na que niquiocuata quijajiniji pohuatasano*

<sup>1</sup> Nijaniyajiniji pohuatasaarucuaa taraatianijia. Tamonu niajanijajinijionaaari jiyanojua sesa miya. ¡Na que niquiocuata quiaquiniaari! ¡Pueyanaa, cuno miishanoori socua jiyanojua cararaatia Pueyaso niishiyashijiaca miishanojiniji! Pueyaso niishiyashijiaca pueyani, majaari quenaaja nojori naa sesa miiniu niishiniutij. <sup>2</sup> Naa cuno pueyano miishacari sesa nia tajiniatej, ¿niaateeri saaja juhuajaniya cuniqui na jiitiaaruhua? ¡Naa cuaara na tacaatiaara! Cuno sesa miijia cuaara taanuusaaria nia tajiniji, maja na cojiniuria socua niajaniya nia rerejosacari. <sup>3</sup> Cua tojiri taa pa miiniutianiani. Janiyari maja cua quiniu niaata. Naajaa, cojiaari niaata quiya cua niishiriojosacari niajaniya. Naacuajitij, janiyari juhua nia tajinia quiyani. Naacuajitij, janiyari tari cuno sesa miijia saniniujiurini. <sup>4-5</sup> Naaratej pueyanaa, cua tojitiare. Naa rerejore cuno sesa miijia nia tarinitianura Sesaacara. Cojiaari niaata quiniutianiani naa nia miishacari pa Jiyaniijia Jesucristo cumaquishacari niajaniya. Naacuajitij, Sesaacaari naquiya na miiniutianiani; na cusojuanura naasucua, maja soj. Naajaa, naa cuaqueyari naa naquiya miishaanutaniya noojia na tacatonuhuara, Pueyaso tojijiaara



na quiniuhua. Naacuajitij, pa Jiyaniijia Jesucristo muetasacariuhua pocua, nojuajaari samiitianishaanutaniuhua puetunu Pueyaso muerasutajanaa.

<sup>6</sup> Cuarta Jesuucua tiuuniaanaa, ¿taate nia naata shuquiriaatia quiniu tamajaajani, naa sesa miijia quishacari nia tajiniatej? ¿Majateeri nia niishiniu? ¡Niaa jaara cojiya sesa miijia saniniujiushoojua, socua pueyari mariyata naa sesa miiniutianiyaquij! Sesa miijia niishishanoori tamasaacua paaquenutaniya. Niaacuajaari niishiya, shiitianiyojua pan poreeteja jaara niasaare cashojuajinia, ritia poreeteja puetunu cashoju miniquiootasanajuanaari. Naajuhuj, sesa miijia jaara sequeyaquishaare na miishano, sesa na miishanoori socua paaquenutaniya.

<sup>7</sup> Tariija, Pueyasoori pa supuetanaa Judiocuaca rootaquiaari puetunu na pan poreetejajanaa nojori jatanura puetunu marijjarajanaa. Nojoriiri naa rootasaaquiaari saaja poreetesoo pan nojori miaquenura siete juuca, shuquiriaatia nojori quiniuria Pueyaso niquiara. Pueyasoori naa nojori niishitiojoquiaari miriquitij, nojori cartenura puetunu sesa nojori miitiushanojuanaa, nojori rupenura Pueyaso. Naajuhuj quiarijiani, nia taanuure cuno sesa miijia nia tajiniji, seetanujuanaa sesa miyashijiaca nia quiniuria Pueyaso niquiara. Pueyaso jiyanooniuria pajaniya, Cristoori tari mosaaquiaari pocuara, taa borregohua puecoosaaquiaari Pascua juucacuaani. Tariucuacaanuuri naa miishano quijia, Pueyaso jiyanooniuria pa supuetanaa Judiocuaca, sesa nojori miishanojiniji.

<sup>8</sup> Naa Pueyaso pa cojishacari quiarijiatej, tojetaarucujajanaa sesa miyashijiaca pa quirij, shuquiriaatia pa quiniuria pa Jiyanoonia niquiara. Pueyaso pueya maanu pa cojuare puetunu maninijajanaa, maja sesa miijiacata cojitishano. Seetanujuanaa maninia pa quirij puetunu pajaniyajanaa.

<sup>9</sup> Pueyanaa, janiyari tari niaacuara naajiocanuni cua sequenura nijaniya, maja nia cojiniuria sesoriquia pueya, cuno pojori canapuate na camishoo maaji numuetucuaani. <sup>10</sup> Naa cua sequesacari nijaniyatej, majaari cua sequenu nia rupueyaquiniuria puetunu sesoriquia pueya sequejanaa mijiria. Saa nia shaajesacarijia cutara nia naata puetunu sesoriquia pueyacujijianaa rupertenu. Nio jiyacua, pueyari naa sesa miijiaa quiya: nojoriiri sesa miijiaa tama na niishiriojosanotajaaja. Nojoriiri tama nerajaaja paniquiaa socua casami pueyaracaanu. Nojoriiri nohuasenuquiaa. Nojoriiri tama na panishanoocujaja jiaatiaquiaa puera, maja Pueyasooqua. <sup>11</sup> Cua tojitiare casaa cua sequecanu tari nijaniyani. Cante tama na cuaqueyajaaja sequejani: “Janiya Pueyaso muerasuni”, maja cunota nia cojitianu, cuno jaara na camishoo maaji numuetucujuquiaa. Naajuhuj, majaari nia cojiniu noj cante casamiriacara quiniucua jiaatiaquiaani. Majaari nia cojiniu noj cante tama na panishanoocujaja jiaatiaquiaaaniuhuj, maja Pueyasooqua. Majaari nia cojiniu narta pueya sesacaja. Majaari nia cojiniu mashaasequejojua. Majaari nia cojiniu noj, cante tamonu casami nohuasejoquiaa na sapojonutani. Janiyacuajaari tari naa nia sequecanuni maja jiyano pueyata nia cojitianura. Majaari jiyano pueyanota nia miaquenu quenaaja. <sup>12-13</sup> Naa cua sequesacari nijaniyatej, majaari cua sequenu quiriquiaa tamasa pueyajiniji, canapuetucuja maja Pueyaso muerasuni. ¿Paate nojori nequesoreenaani? Maja. Pueyasocujajaari nojori saniniujiuniutianiya. Pajaniya cumaati parta Pueyaso pueya saniniujiuquiaani, nojori jaara sesa miiriquia. Naaratej, nia jatare cuno sesa miijia nia tajiniji, noj cante sacuaatia na que niquiocuata quiyacuajani.

## 6

### *Sesa miijia cuaara nequesoreesaaria narta Pueyaso muerasu niquiara*

<sup>1</sup> ¿Seetanutejanaa naa nijaniyajiniji pueya pohuatasanojuhuaj? Niarta Jesuucua tiuunia jaara sesa miiri nijaniya, niaanaari Pueyaso niishiyashijiaca nequesoreena tonujuquiaa nocuara. ¿Casaara tamajaaja niarta Pueyaso muerasu niquiara nia jeecatoyaquiquiaani? <sup>2</sup> ¿Niaate niishiyaquia, Pueyaso muerasuuri Pueyaso niishiyashijiaca nequesoreeriquianocujaja, Pueyaso saniniujiushacari nojori? Pueyaso jaara naa nia nequesoreetenutaniya na ruuretajaca, ¿majate nia naata quiarijia niarta Pueyaso muerasu nequesoreenu tamajaaja, nojori jaara sesa miiri shiitianiyojua? <sup>3</sup> ¿Majate

nia niishiniujuhuaj, paari Pueyaso seya nequesoreeriquianojuhuaj? Pueyaso jaara pa nequesoreetenutaniya na seya na tojiyashijiaca, ¿majate quiarijia nia naata maninia nequesoreenu niarta Pueyaso muerasu mijiria? <sup>4</sup> Naa jaara nia tapueyocuaacuara tonujunu paniya sesa na miishacari, ¿niaateeri Pueyaso ruuretajaca tonujunutaniya nojoriicuara? ¡Maja maninia naatej! Cuno pojoriiri maja Pueyaso muerasu jitianaa. <sup>5</sup> Naa nia sequeyanijia cua cararonura quenaaja nijaniya, cua niishiriojotenura nijaniyajuhua. ¿Seetanujuanaa tojetaarucujanaa shaaquiti niishijia nijaniyajinijinio, cante na naata nia tonujutoosacari nequesoreenu nijaniya maniniani? ¡Quiya jiyotucuaajaari! <sup>6</sup> Nijaniyanaari tama niarta Jesucua tiuuniaacuarajaaja tonujutoojoquiaa Pueyaso niishiyashijiaca nequesoreenaa niqiara. Naa nia miishacaritij, ¡niaari sesa miiquiaa pueyanaa!

<sup>7</sup> Naaari jiyanojua jiyajeneya nia juayonuujuasacari. Naa jaara sesa miishaare, niaa cuara jiyanoootioora saniniuujia, nia casami jaara nohuasesaarejuhuaj. <sup>8</sup> Nijaniyarijiataj, ¡niaari saaja sesa miiquiaacujua! ¡Niaanaari niarta Pueyaso muerasu miiquiaa sesa! Naaari tama niarta Jesucua tiuuniaajaaja nohuasejoquiaa, sesa miijiaca nia quiniucua.

<sup>9-10</sup> Maja tama nia cuaqueyajaaja nia sapojonu, pueyanaa. ¿Niaateeri niishiyaquiya Pueyasoori maja na rijionu quiniutianiya sesa miijiaca na shuriucua nojori quiniuria? Jiyano pueyari puetunu quejoosaanutaniyajanaa. Quejoosaanutaniyari noo pojori canapete na camishoo maajipohua numuetucujuquiaani, naajuhua, noo pojori, canapete tama na panishanoocuaajaaja jiaatiaquiaani, maja Pueyasocua. Quejoosaanutaniyajaariuhua noo pojori, canapete narta pueyano niqiuocua numuetucujujua, naajuhua, canapete maajishuriutia quijia juhua maajitiani. Nohuasenujuacaari quejoosaanutaniyajuhua, noo pojoriuhua canapete pueyaracaanu socua casami paniquiaa tama nerajaajani. Mashaasequenujuacaari puetunu quejoosaanutaniyajuhua, tamasa sesacajacanio, tamasaacuara rimiaaquejajuhua. Naa quejoosaanutaniyajaariuhua noo pojori, canapete nohuasejoquiaa na sapojonutani. Puetunu jiyano pueyanaari maja Pueyaso muerasu na quiniu quiniutianiya, Pueyasota nojori quiniuria shuquiriaatia pueyaracaanu. <sup>11</sup> Noojiaqueya nijaniyajinijioori jiyano sesa miijiaca pueya quiquiaari tarijia. Na nuhuaji, sesa nia miishanoori jeequesaaquiaari Jesucristocua nia tiushacari. Pueyaso Sohuanuuri nioojiajinia tiuquiquiaari, Pueyaso na tojitiniuria nijaniya. Naacuajitij, nia rupesacari Jesucristo, Pueyasoori nia jiyanoocuaari. Naa sequereeri: “Naaari saa maninijia quiya cua niqiara”.

#### *Pa cuaqueya cuara quiiria saa Pueyasoraja*

<sup>12</sup> Queraatia pueyari sequequiaa: “Pueyaso jiyanooshacari pajaniya, paari tarinitiasaaree puetunu pa miiniu panishanojuanaa pa miiniuriani”. Seetanujuanaa naacuaj. Saniniuujia, majaari puetunu pa miiniu panishanojuanaa maninia na quiniu pajaniyara. Seetanujuanaa cua naata miiniu puetunu cua miiniu panishanojuanaa. Naajaa, maja cutaraari cua miiniu puetunu cua miiniu panishanojuanaa, janiya mariqui puera nocua jiyartuureeri. Naa pa jiyartuusacaritij, na nuhuaji majaari pa naata pa jiiishano casaa pa tarinitianu. <sup>13</sup> Pueyari sequequiaa: “Pueyasoori miaquesano shipiniquiaari pa seecora. Pa seeco shipiniquiaari sumatuucujia saniniuurijia, shuquiriaatia pa quiniuria”. Seetanujuanaari cuno sequesano. Naajaa, majaari nio pa niyjetanu, na nuhuaji, Pueyasoori na shaajanutaniya puetunujuanaa. ¿Pa cuaqueyariuhua? ¿Pueyasoteeri pa cuaqueya shipiniquiaari pa numuetucunura pa camishoo maajipohua? ¡Maja! Pa cuaqueya cutaraari shipinishaaquiaari pa Jiyaniijia, na panishano pa miiniuria. Naajuhua, pa Jiyaniijiaari pa cuaqueyara quiyacujua, na cumaquiniuria pajaniya, maninia pa quiniuria pueyaracaanu. <sup>14</sup> Naajuhua, taa Pueyaso samiitianiquiaaricuaa pa Jiyaniijia Jesu na cuaqueyatani, nojuajaari macujiniji naa pa samiitianiutianihua na cumacatajuhuaj.

<sup>15</sup> ¿Niaateeri niishiyaquiyajuhua, Pueyaso Sohuanu quiniucua poojiajinia, pa cuaqueyari seetanujuanaa pa Jiyaniijia cuaqueya quiya? Naaratej, Jesucristo cuaqueya

pa quishacari, maja cumaati pa curuushojonu pa cuaqueya, maaji paanatu pa numuetucunuta. ¡Cunoori jiyanoehua sesa! <sup>16</sup> Pueyasocuaajaari coteenujuanaa na shipinishano pueyano sequequiaari:

“Quia camishacari maaji, niaari niquiriyatu cuaqueyara quiniutianiya”.

¿Niaateeri nio niishiyacuiya, cante paanatu numuetucureeni, Pueyasora, nojoriiri niquiriyatu cuaqueyaracara quiquii? <sup>17</sup> Naajuhuj, paa jaara Jesucristo rupuereni, pa sohuanuuri rupuetoooree na Sohuanuta, niquiriyatu sohuanuraca pa quiniuria Jesucristota.

<sup>18</sup> Naaratej, nioojia nia tacatore maja nia numuetucunura tamasaca, cante quia camishoo maajini. Puetunu tamaatia sesa pa miishanojuanaani, cunoori maja pa cuaqueya sesojua. Saniniuujia, cante na camishoo maajipohua numuetucujuani, nojuaja cutaraari tama na cuaqueyajaaja sesoya. <sup>19-20</sup> ¿Majateeri nia niishiniu, nia cuaqueyari Pueyaso Sohuanu quiquio? Pueyasoori na Sohuanu jiyaroquiaari poojiajinia na quiniuria. Pueyasoori nia masequiaari tama nerajaaja nia quiniuria. ¡Jiyanoehua naquiya na miiniutia nia masereeri Neyanu na motesacari pocuara! Naacuajitij, Pueyasoori quiarijia pa camarnu quiya. Naaratej, quiarijia maja pa quiniu tama pa cuaqueya camarujuaaja. Naaratej, pa shuquiritiri pa Pueyaso pa cuaqueyata, pa sohuanutajuhuj. Nojuacuajaari pa cuaqueya camaru, pa sohuanu camarujuhuj.

## 7

### *Pablo rootasano pa caminiuria, camiyojua pa quiniuria soj*

<sup>1</sup> Quiarijiani pueyanaa, cucuara nia naajiosanojinia nia nequesotasano riucuaereeraj. Cante niquiriyatu quiniu paniya tamajaajani, cuno pueyanoori maninia miya, maaji na camiyaquishacari. <sup>2</sup> Saniniuujia, quiarijiani, pueyari puera sesa miiniu niishiquiaa. Nocuaji pueya cuaara camiiiria. Maajipohua cuaara camiiirajuhuj. <sup>3</sup> Pueyano jaara camiri, necocua cuaara na cuaqueya jamueyaquiiria neyaca numuetucunu panishacari. Naajuhuj, neyaca cuaara na cuaqueya jamueyaquiiria necocua panishacari na numuetucusaanura. <sup>4</sup> Necocuaari maja tari tama na cuaqueya camarujuaaja na quiniu. Neyacaari na cuaqueya camaru cutara. Naajuhuj, neyacaari maja tama na cuaqueya camarujuaaja na quiniujuhuaj. Necocuaari neyaca cuaqueya camaru cutara. <sup>5</sup> Naacuajiti maajipohuanaa, maja nia niyacaacuaji nia jamuenu nia cuaqueya, na panishacari numuetucunu nijaniya. Naajuhua nijaniya canuunaa, maja nia niquiocua nia tarijionu na panishacari na numuetucusaanura. Saniniuujia, jiyanoehua Pueyaso nia secojonu panishacari, jiyacari cutara nia naata tarinitianu numuetucunu rupaquijia, Pueyaso nia secojonura, niaa jaara mariyata naa miiniu paniri. Na nuhuaji cutara, nia numuetucurohua nia niquiocua, Sesaaca mariqui sesa nia miitiriiri tamonu maaji nia paniniuria, nia camueenujusacari puera. <sup>6</sup> Nioori quiarijia maja niaara Pueyaso rootasano janiya. Janiyari nareja naa sequeya nijaniyani socua panaatia nia quiniuria. <sup>7</sup> Naaratej, nia jiyateriquiani taa cua quiyacuaani, niquiocuaaju. Naajaa, Pueyasoori puetunu pa cumaquiquiaajanaa tamaatia pa quiniuria, taa Pueyaso paniyacuajani. Camishoo, camishano soj, naajaa. Taa pa quiyani, paari shuquiriaatia quiquiaa Pueyaso cumaquishacari pajaniyani.

<sup>8</sup> Camiyojua pueyanaa, mashiquiopuena, cua tojitiare: niaa jaara juhuajaniya quiya taa camiyojua cua quiyacuaani, niaari maninia quiniutianiya. <sup>9</sup> Cante saniniuujia maja na naata tama na cuaqueya panishanojuaja rejetenu maninia tamajaajani, cuno cuaara camiiiria. Socua maninia cutaraari nia caminiuria, maja maajiicua nia jiaatianura pueyaracaanu. <sup>10</sup> Camiyono pueyanaa, nio nia tojitiare cutara. Nioori pa Jiyaniijia Jesucristo sequesano cutara, maja saa cua sequesanojua. Maajipohuanaa, maja nia cartenu nia niyaca. <sup>11</sup> Cante neyaca carteyani, nojori cuaara jiyanoootioora, na rupuetoonuhua. Jaara maja na naata jiyanoootioonu, cuaara quiiria tamajaaja pueyaracaanu. Cuaara camiyaquiiria socua. Canuunaa, pa Jiyaniijia Jesucristo sequesanoori mariyata niaarajuhuj. Naa sequeyari: “Maja nia cartenu nia niquiocua”.

<sup>12</sup> Quiarijiani, socua nia niishitiojoreeraj. Nioori tama cua niishitiojosanojuajaaja, maja niaara Jesucristo rootasano. Pueyano jaara Pueyaso tojiyashijia niquiocuaraca quiri,

cuaara jiitiaara maninianoj. Quia niquiocua jaara quiata quiniu paniyajaa, majaari na cartenu. <sup>13</sup> Naajuhuj, maaji jaara Pueyaso tojiyashijia niyacaraca quiri, cuaara maninia jiitiaara neyaca. Majaari na cartenu, quia niyaca jaara quiata quiniu panirijia. <sup>14</sup> Cuarta Pueyaso muerasunaa, Pueyaso tojiyashijia pueya nia jiyanoori, nojori jaara Jesuucua tiuniaata caminio quiya. Nojori seetanujuanaa maja Pueyaso muerasu. Naajaa, necocuaari Pueyaso pueyano quiya cutara. Naaratej, nijaniya cuaara neyaca jiyanooria necocua quiniuucua niarta Pueyaso pueyano. Nareja nia niquirinioj, niaata na rerejonu panishacari. Naajuhuj, nia jiyanoori niarta Pueyaso pueyano niquiocua, naajaa, Jesuucua tiuyashijia na quishacarijia. Naa Pueyaso pueyano neyaca quishacaritij, necocua cuaara nareja niquishaariajuhuj, na rerejosacari niaata. Naajuhuj, maja rimiajata nia niqiniu necohua. Necohuari maniniacuaja Pueyasora, maja juhua tama maaji muetusanojuaaja. <sup>15-16</sup> Pueyaso muerasunaa, canuu, maajipohuanio, Pueyaso tojiyashijia jaara nia cartenu paniri, nia tarinitiare. Pueyaso tojiyashijia cartesacari nijaniya, niaari juhua camishoo quiriohua. Majaari socua nia tojiniu coteenu nia niyaca, coteenu nia niquiocuanio. ¡Maja cutaraari nia cartenunoj! Nia niishiriojore pueyanaa, nia niquiocua jaara Pueyaso tojiyashijia quiri, ¿nia naatate na tojitiniu Pueyaso rupaa, Pueyaso muerasu na quiniuria, jaara quiata quiyajaa? Maja pa niishiniu. Naajuhuj, maja niishishano quia naatate quia niyaca quia tojitiniu Pueyaso rupaa. Naaratej, maja nia cartenu Pueyaso tojiyashijia. Nareja carteshiya cutaraari tama na panishacarijiaaja na cartenura quijaniya. Naatej, Pueyasoori paniquiaa juhuajaniya pa quiniuria, camishano, cartesano soj.

<sup>17</sup> Cuarta Jesuucua tiuniaanaa, taa nia quiquiaari Pueyaso sequesacari nijaniya na muerasu nia quiniuriacuajani, naajaa, naa nia quiri Pueyasora. Janiyari naa nia sequeyani, taa cua rootaquiaacuaja puetunu Pueyaso pueya maapuerajanaani. Taa nia quiquiaarini, naajuhuj casaate quia poonijiosano quiquiaarini, cunocuajaari Pueyaso panishano quiquiaari niaara. <sup>18</sup> Naacuajitij, cante tarijia na cararaatiuuquia co miate-sano quiquiaari Judio pueyano na quiniuriani, naajaa, cuno pueyano cuaara naa quiiria pueyaracaanutej, Jesucristoocua na tiushacari quiarijia. Naajuhuj, cante mialesoo quiquiaari Pueyaso sequesacari na pueyano na quiniuriani, cuno cuaara quiiria naajuhuj. <sup>19</sup> Cante Judio pueyano na quiniuria mialesaaquiarini, naajaa. Cante mialesoo quiyani, naajaa. Saaja maninia cutaraari pa tojtianura Pueyaso niishitiojosano pajaniya. <sup>20</sup> Naarate nia sequeyanijia, nia quiri taa nia quiquiaaricuajani shushajanaa Pueyaso sequesacari na muerasu nia quiniuria. <sup>21</sup> Cante poonitijiotasusano pueyano quiquiaari Pueyaso sequesacari na muerasu nia quiniuriani, naajaa, maja nia niishiriojonu nocua. Juhujaniya nia poonijiore saaja. Saniniuujia, jaara nia naata quiri quia cartesano pueyano nia camarnujiniji, maniniacuajaari. <sup>22</sup> Cante poonitijiotasusano pueyano quiquiaari Pueyaso sequesacari nijaniya na muerasu nia quiniuriani, naajaa, niaari seetanujuanaa cartesano pueya quiya pa Jiyaniijia. Naajuhuj, cante camarnuju quijia quiquiaari Pueyaso sequeyaquishacarijia na muerasu nia quiniuriani, quiarijiani, niaari pa Jiyaniijia poonitijiosano pueya quiya cutara. <sup>23</sup> Pueyasoori jiyanoohua naquiya miiquiaari na cusojuasacari Neyanuniyojua, na masenura nijaniya, na muerasu nia quiniuria. Nia masequiaariiri tama nerajaaja nia quiniuria. Naaratej, majaari juhua tamonu camarnu poonitijiosano nia quiniu socua. Quiarijia saa Pueyasoraja nia quiri maninia. <sup>24</sup> Naaratej cuarta Pueyaso muerasunaa, taa nia quiquiaari tarijia Pueyaso muerasu nia quiyaquishacarijiani, naa nia quiri quiarijia Pueyaso cumaquishacari pueyaracaanu nijaniya.

<sup>25</sup> Quiarijia nia sequereera cua niishiriojosano, taa camishoo pueya miiniutianiyani. Niiori maja pa Jiyaniijia rootasano janiya. Majaari na sequenu quiquiaari cunofiniji. Naajaa, pa Jiyaniijiaari cucua tiuuquiaa na sequenu panishano cua caminiujiuniuria nijaniya, na Sohuanu cumaquishacari janiya. <sup>26</sup> Naacuajitij, naa nia sequeyanijia: niaacuajaari niishiya, quiarijiani, jiyanoohua puereeta quishacari. Nocuaji nijaniya cuaara quiiria taa nia quiyacuajani. <sup>27</sup> Cante niquiocuaracani, maja nia paniniu na cartenu. Cante niquiocuaaju quiyani, majaari nia niquiocuaaniu paniniu. <sup>28</sup> Naajaa, mashaja jaara camiri, cunoori maja sesa. Naajuhuj, niyacoo jaara camiri, majaari sesa

na miishano. Saniniuujia, camishano pueyari socua taraatia miishaanutaniya camishoo pueyajiniji, puereeta quishacari quiniuucua mijiria quiarijiani. Majaari cua paniniu taraatia nia miishaanura. Nocuaji janiyari naa nia niishitiojiyani puera sesa quishacari quiniuucua quiarijiani.

<sup>29</sup> Cuarta Pueyaso muerasunaa, nijaniya cuaara niishiiria nio jiyari puequenu-taniya. Majaari mijiria pa quiniu quiniutianiya pueyaracaanu. ¿Taariquitijia mijiria pa tarishiniutianiya socuatejaj? Maja pa niishiniu. Majaruhua puera pa tarishiniu quiniutianiya. Naaratej mijiria pa quishacarijia, jyanohua pa tojitiare pa Jiyaniijia. Naacuajitij, cante niquiocuaraca quiyani, majaari nocua nia niishiriojonu puera. <sup>30</sup> Cante na shaajasanoocua sapueyani, naajaa, majaari nia tarinitianu Pueyasora nia poonijionu. Cante queranacuyani, naajaa, Pueyasora pa poonijiorejuhuaj. Cante casami niquitiojojua quiquiaani, naajaa, maja casamiicua nia niishiriojonu puera. Socua nia niishiriojore cutara Pueyasooocua. <sup>31</sup> Canapuate niishijiacani, queraatia casami na masejonura mijiriani, nojori cuaara niishiiria maja casami panijiacca nojori quiniuria puera. Nio jiyari tari puequeya puetunu pa niquishano casaatajanaa. Naaratej, maja casamiicua nia niishiriojonu. Saaja Pueyaso nia tojiri cutara.

<sup>32</sup> Janiyari paniyani mijiria casaacua tacayashijiacca nia quiniuria. Pueyaso nia tojitiare juhuajaniya cutara. Camishoo pueyano na naata saaja pa Jiyaniijiaacua niishiriojonu na tojiniuria maninia, pa Jiyaniijia na shuquiritiniuria. <sup>33</sup> Cante niquiocuaraca saniniunijia, nojuajaari niishiriojoquiaa mijiria casaacua, necocua na shuquiritiniuria. <sup>34</sup> Naacuajitij, noojia niquijioteyari. Naajuhuj, camishoo maajiiri pa Jiyaniijiaacua niishiriojoquiaa maninia, tama na cuaqueya na cojuasacarijiaaja Jesucristora, nera na poonijionura puetunu noojiatajanaa. Saniniuujia, cante niyacaraca quiyani, nojuajaari mijiria casaacua niishiriojoquiaa neyaca na shuquiritiniuria. Naacuajitij, majaari puera jeya na quiniu Pueyaso panishano na miiniuria.

<sup>35</sup> Janiyari naa nia sequeyani socua shuquiriaatia nia quiniuria. Maja cua taajetenu paniniu nijaniya puera cua rootasanota. Janiyari nareja naa nia niishitiojiyani, maninia nia quiniuria, pa Jiyaniijia nia tojtianura maninia. Naa jaara cua niishitiojosano tojiri, nia naata pa Jiyaniijia tojiniu maninia. Naacuajitij, niaari nioojia niquijioteyaquiniutianiya.

<sup>36</sup> Pueyano jaara naa niishiriojore: “Majaari maninia cua miiniu cua jamuesacari cua niyatu pueyaracaanu na camiyaquiniuria”, cuno pueyano cuaara miiria taa na miiniu paniyacuajani. Camishocoriquiano maaraja, cuaara camitioora. Quia niyatu jaara camiri, majaari sesa. <sup>37</sup> Cante saniniuujia maja noojia niquijioteyaquiya na niishiriojosacari neyatuucuni, cunoori maninia miiniutianiya na camitiyaquishacari, jaara na naata neyatu cojuanu maninia. <sup>38</sup> Naacuajitij, cante neyatu camitiriini, maninia miyari. Cante neyatu camitiyaquiyaaniuhuj, nojuajaari socua maninia miya. Naacuajitij, cuno neyatuuri na naata Pueyaso panishano miiniu socua, camishoo na quishacari.

<sup>39</sup> Camishano maaji cuaara carteyaquiiria neyaca, saminio neyaca quishacarijia. Pueyasoori naa sequequiaaritij. Neyaca jaara cusoyare, na mashiquioori maja tari na quiniu juhua camishano. Na panishacari, cuaara camiiria cana na caminiu paniyacuajani. Jaara caminiu paniri, cuaara camiiria Pueyasooocua tiuujia pueyanota cutara. <sup>40</sup> Naajaa, mashiquio jaara camiyaquiriohua, socua shuquiriaatia quiniutianiyari, Pueyaso panishano na miiniuria. Janiyari naa niishiriojiyani pueyanaa. Pueyaso Sohuanu naasucuaari cua sequetere nio.

## 8

*¿Maninate cuno shu pa miaquenura, seya jaara puecoosano quiri nareja shipinishano casaacuara, juhua Pueyasooocarajanaa?*

<sup>1</sup> Cuarta Jesuucua tiuunaa pueyanaa, janiya quiarijia nia niishitiojonutaniyani teyano pa miaquesanojinijiti puereshiyani. Pueyaso niishiyashijiaccaari na miaquesocoriquiano seya puecoonu niishijia shipinishano casaacuara juhua Pueyasooocua. Pueyari nequesotaquiaa, ¿maninate cuno shu, Pueyaso muerasu miaquesocoriquianojuhuaj, cuno

seru jaara taucuaca jiyaniushano cumaacaraca quijiaacuara mosano quiri? ¡Janiya cutaraari maja cua miaquenunoj! Nia pohuatareera casaara cua miaqueyaquiquiaanoj. Cua tojitiare. Paacuajaari niishiyani cuno shipinishano casaari nareja pueyano shipinishano najuhuanaj, nojori jiyaniushano na pueyasoni. Naa pa niishishacari, paari maninia niishijiani. Naajaa, maja cutaraari maninia pa niishiriojonu paa jaara nocuara puecoosano miaqueriquiani. Naa niishijaari shuquiriaatia quiya tamajaaja. Saniniuujia, majaari na niishiriojonu narta Pueyaso pueyanocua. Cante narta pueya paniquiaani, cunoori narta pueyacua niishiriojoquiaa cutara, nojori jiuujia na cumaquiniuria maninia. Jiyano pueyanoori cumueeca Pueyaso pueyano quiniutianiya. <sup>2</sup> Naacuajitij, cante tama na cuaqueyajaaja jiyaniya niishijiani, cunoori juhuanajuaja maja niishijia seetanujuanaa. <sup>3</sup> Cante Pueyaso panijia saniniunijia, cunoori narta Pueyaso muerasuucua niishiriojoquiaa. Cunoori Pueyaso panishano pueyano cutara. Seetanujuanaa niishijia cutaraari cuno.

<sup>4</sup> Juhuanajuajaari maja cua riucuanu nia niishiniu panishano: “¿Maniniatenaari cuno shu pa miaquenu, seru jaara pueya jiyaniushano pueyasooacara mosano quiri?” ¿Casaatejaara cuno nojori jiyaniushano pueyasoni? Paacuajaari niishiyani cuno shipinishano casaari maja saminio. Pueyano shipinishano casaari maja cumaacaraca quijia. Naaratej, nojori jiyaniushano pueyasoni, cunoori maja seetanujuanaa Pueyaso. Niquiriyatu Pueyasoori quiya cutara. Jiyocuaaanu Quijia. Maja socua tamonu quiniu juhuanajuaja. <sup>5</sup> Tamasaca pueyari jiyaniya queraatia cumaacaraca quijiaaari quiya juhua Pueyaso, jiya cajiniocua, mijirianio. Nojoriiri na jiyatequiaa nojori cojuanara, nojori cumaquiriquianojuhuaj. <sup>6</sup> Naajaa, paari niishiyani saa niquiriyatu Pueyasojuajaari quiya. Nojuacuajaari pa Que Pueyaso, pa shipiniania. Puetunu casaajanaa shipiniquiaariiri. Pa shipiniquiaariiri tama nerajaaja pa quiniuria. Niquiriyatujua Jiyaniijaari quiyajuhua. Cunoori pa Jiyaniija Jesucristo. Na Queeri na shipinitiquiaari puetunu na shipinishanujanaa. Pajaniyajuhua, paari rishiyani saaja na cumaquishacari pajaniya.

<sup>7</sup> Noojiaqueya Pueyaso pueyari saniniuujia jiyaniyajaa taucuaca shipinijosano casaari seetanujuanaa cumaacaraca quijiaa juhua Pueyasojuhuaj. Nojoriiri najuhuaana sesa niishiriojonuujuaca. Jiyano pueya jaara Pueyaso muerasura quiri, juhuanajuaja maja na niishiniu maninia. Majaari tarijia na niishishano na tarinitianu juhuanajuaja. Naacuajitij, nojori jaara shu miaquere teyanote mosaaree nojori jiyaniushano cumaacaraca quijiaacuarani, nojori miaquenu nuhuaji, noojia niquijioteyari. Nojoriiri tama sequeyajaaja: “¡Janiya naasucuaari sesa miirii Pueyaso niquiarani!” Naacuajitij, nojoriiri noojia macuhuajetequiaa. <sup>8</sup> Pueyanaa, paacuajaari niishiyani, casaa pa miaquequiaani, naajaa. Pa miaquesanoori maja na naata Pueyaso jiyanoootiniu pajaniya. Cante cuno shu miaqueyaquiquiaani, naajaa, majaari socua maninia pueyanora na quiniu Pueyasora. Naajuhua, cante na miaquequiaani, majaari socua sesa pueyanora na quiniuujuhua. <sup>9-11</sup> Niaacuajaari jiyanoohua tiuquiaa Pueyasooacara. Naacuajitij, niaa naasucuaari na naata juhuanajaniya tiuquiniu cuno shu miaquenura nojori jiyaniushano pueyaso quiquiojinia. Niaacuajaari niishiya, cuno, nojori sequesano pueyasoni, majaari seetanujuanaa Pueyaso cuno. Naacuajitij, nia naata nocuara mosano seru miaquenu juhuanajaniya. Saniniuujia, nia cajishacari cuno miaquenujuajinia, niarta Pueyaso pueyanoori nia niquiniutianiya na pueresano shu miaquenuyano. Na niquishacari nijaniya, tamajaaja sequenutaniyari: “¡Jaj! ¡Nojori qui cuno shu miaquenuyacuaa! Saniriirijataj”. Naa sequejatej, nojuajaari jiyaniyajaa cuno miaquesanoori mosaaree seetanujuanaa tamonu cumaacaraca quijiaacuara. Naacuajitij, na sanishacarihua cuno shu miaquenu, tamajaaja noojia macuhuajanutaniyari. Naacuajitij, niaari niarta Pueyaso pueyano sesoya, na niquiara nia miaquesacari cuno shu. Na niquiniuucua nijaniya cuno shu miaquenuyano, nojuajaari cunora na miaquerejuhuaj. Saniniuujia, nojuajaari juhuanajuaja maja jiyanoohua Cristoocua tiuuniu na niishiniu. Cristo cutaraari nocuara cusoquiaari, sesa na miishanojiniji na jiyanooshaanura. Nijaniyari saniniuujia quiarijia na sesorohuacuhua nia niishishanota. Nocuaji janiyari nia sequeyani, maja socua nia miaquenu cuno shu, cuno shu miaqueyaquijia mariqui na pueresano shu

miaquerohuariuhua, na rupuesacari niajaniya. <sup>12</sup> Nia miaquesacari, niaari na pueresano shu na miaqueteya. Naacuajitij, noojiaari macuhujenutaniya. Naacuajitij, niaari sesa miya niarta Pueyaso pueyano. Niaari pa Jiyaniijia Cristo miya sesajuhuj, naa nia sesosacari tama na pueyanojuaaja. <sup>13</sup> ¿Taa nia sequeyani pueyanaa? ¿Maniniate shu pa miaquenu, seya jaara taucuaca jyanishano pueyasooacara puecoosano quiri? Janiya cutaraari maja socua cuno shu cua miaquenu quiniutianiya, cuarta Pueyaso pueyano mariqui sesereeri cua miishanojiniji. Saaja maninia miijiacara nia jiyateriquiani, taa cua miiquiaa saaja maniniacuaani.

## 9

### *Taa quijia Pablo quiquiaarini, Jesucristo jiyaramiquishano na quishacari*

<sup>1</sup> Janiya jaara cuno shu miaquenu paniyani, cua naata miaquenu cua panishano. Naajuhuj cua naata puetunu cua panishanojuanaa miiniu taa cua Jiyaniijia sequequiaari na jiyaramiquishano pueyacuajani. Janiyacuajaari Jesucristo jiyaramiquishanojaaniuhuj. Seetanujuanaa cua namijiata Jesucristo niqiquiaarinijia. Nojuajaari cua jiyatequiaari na jiyaramiquishano cua quiniuria. Naajuhuj, cua pohuatasacari Jesucristojiniji nia niqiara, niaari na muerasura quiquiaari cua pohuatasanoocua nia tiuushacari. Naacuajitij niishishiyari janiyari Jesucristo jiyaramiquishanojaaniuhuj. <sup>2</sup> Tamasaca jaara jiyaniya janiya maja Jesucristo jiyaramiquishanoni, naajaa. Niaacuajaari na niishiya. Niaacuajaari Jesuucua tiuquiaari nia tojishacari cua pohuatasano nojuajiniji. Naacuajitij, niaacuajaari niishiya janiyari Jesucristo jiyaramiquishanoni. Na jiyaramiquishano cua quiniucua, cua naata miiniujiuhuj taa cuarta Jesu jiyaramiquishano pueya miiquiaacuaani.

<sup>3</sup> Tamonu jaara cua nequesoreere taa cua miiquiaani, janiyari saaja naa na riucaquiaani: <sup>4</sup> “Pueyasoori sequequiaari, na jiyaramiquishano pueya cuaara niqitiosaaria na miaquesocoriquiano”. Naaratej, canaa jaara naa miiniu paniriquiani, canaa maara nia sequereni canaa nia niqitiojonura canaa panishano. Naajaa, majaari canaa masenu quiquiaa canaa panishano niajanijini, janiya, Bernabeenio. <sup>5</sup> Naajuhuj, canaa jaara niqiocuaraca quiriquiani, canaa maara canaa niqiocua rupojoriquia canaacuaani, taa cuarta Jesucristo jiyaramiquishano pueya miiquiaacuaani. Pa Jiyaniijia Jesu tapueyocuaari naa miiquiaajuhuj. Pedrojuanaari necocuata rucuanajoquiaajuhuj, Jesucristo rupaa na poojotasacari. Naajaa, majaari naa canaa miiniu quiquiaaqui. <sup>6</sup> Jesucristoori sequequiaarijuhuaj: “Cua jiyaramiquishano pueya cuaara niqitiosaaria cumaneeca, na panishano nojori masetajara”. ¿Niaateeri jiyaniya cuno sequesano maja quiria, maja Bernabeerajuhuj? ¿Cunocuaajaari naa sequesaaquiaari canaarajuhuj! Naaratej, canaa jaara naa paniriquiani, canaa maara canaa panishano masere niajanijini, canaa niishitiojonuucua niajanija. Naajaa, canaari tama canaa juaashiquiatajaaja poonijioquiaani, canaa panishano canaa masetajara.

<sup>7</sup> ¿Soldoteeri tamonu poonijosano jiitaja, na miaquesano na masetajara? ¡Maja! Soldadohua jiyaniijaari na niqitiojua puetunu na miaquesanojuanaa. ¿Pueyanoteeri na cuhuruquia nataja najuhuanaj? ¡Maja! Na nuhuaji na natau mianutaniyari na poonijosanojiniji. ¿Majateeri seru juunu camarú ratunu na seru quitiaaca, jaara na paniri? ¡Taaquiririnij! Na ratuyacuaaquiniatejaj. ¿Maatucua casaara najuhuaana seesaareerini? ¿Canaarijataj? Canaa jaara naa paniriquiani, canaa naata nia masenu canaa panishano niajanijini. Naajaa, majaari canaa mashiniquijionu quiquiaa quenaaja canaa panishano niajanijini. Canaari nareja poonijioquiaa tama canaa juaashiquiatajanijia, Jesucristo rupaa canaa pohuatasacari niajanija.

<sup>8</sup> Nio cua pohuatasano niajanijini, majaari tama canaa niishiriojosanojuaja. Nio niishitiojosanoori tariucuaaanu Pueyaso Rupaa naajiosanojinia quiyajuhuj, taa cua sequeriquiaacuajani. <sup>9</sup> Supuetana Moisés caminiujiushano Pueyasojinijiiri naa naajio-tasaaquiaaritij:

“Maja quia juunu rupaa quia seecutanu maja na miaquenura quia carojotasano, quiaa jaara na rapijioteya na coreetanura”.

¿Pueyasoteeri saa juyacaacua niishiriojoriquiaajaa naa na sequenuratej? ¡Maja!  
<sup>10</sup> Pueyasoori naa sequeriquiaaqui na niishitiojonura puetunu pajaniyajanaa. Naaratej, Pueyasora poonijionaani, na niishitiojosano pueya cuaara nojori niqutiojoora na panishano. ¿Taa nia sequeyani? ¿Pueyanote shuquiriaatia cuhuataja na cuhuariquiara? Taaquiririni. Na camaruuri niishiya na poonijosanojiniji mianutaniya na nuhuajiiri. ¿Majateeri pueyano carojotanu shuquiriaatia na nataujuhuj? Jaa. Niishiyacuajaari na mianutaniyari. <sup>11</sup> Naajaa, niaata cua quishacari, canaari naa poonijioriquiaa Pueyasorani, nioojiaca canaa cumaquiniuria maninia. Naacuajitij, canaa cuaara niqutiojosaaria saniniuujia canaa panishano. Naajaa, majaari canaa paniniu canaa panishano nia niqutionura canaa. <sup>12</sup> Tamasaca pueya niishitiojosacari nijaniya, niaa cutaraari nojori niqutiojoquiaa nojori panishano. Canaari saniya coteenujanaa pohuataquiaari Jesucristo rupaa nijaniyani. ¿Majateeri coteenu canaa niqutiojaanu canaa panishanojuhuaj? Naajaa, majaari canaa masenu quijia nia casami. Niaata canaa quishacari, canaari sanaa poonijiojua tamajaajani, canaa masetajara canaa panishano. Canaa jiitiaaquishacari canaa panishano, canaari sanaa rejeretaja saajani. Majaari canaa taajetenu paniniu quijia nijaniya, canaa jiitiaaquishacari canaa panishano. Canaari naa miiquiaaritij, niaa mariqui Jesucristo rupaa tojinu paniyaquiriiri canaa taajetesacari nijaniya, pueyaracaanu canaa mashiniquijosacari canaa panishano nijaniyajiniji.

<sup>13</sup> Niaacuajaari niishiyajuhuj, Jerusalén tiacajinia Pueyaso Secojojua tiajinia, cuarta Judiocuaca miaquesocoriquianoori puecoosaaquiaa Pueyasocuara, taa Pueyaso rootaquiaari canaa supuetanaacuajani. ¿Niaateeri niishiyaquiyajuhuj, shu camaruuri secojojuajinia poonijionaa niqutioquiaa nojori miaquesocoriquianojuhuaj? Naacuajitij, Pueyaso secojojua tiajinia poonijionaari miaquesanoraca quiquiaajuhuj. <sup>14</sup> Pa Jiyaniijia Jesucristoori na rupaa pohuatanaara naa sequequiaarijuhuaj: “Cua rupaa pohuatanaa cuaara niqutiojosaaria na panishano pueyaracaanu”. <sup>15</sup> Naacuajitij, cua naata puetunu cua panishanojuanaa sequenu nia niqutiojonura janiya, juhuajaniya cua quiniuria, taa cuarta Jesucristo jiyaramiquishano pueya miiquiaacuani. Naajaa, majaari cua masenu quijia nijaniya cua panishano cua masetajara. Niaa naasucuaari jiyaniya janiyari quiaritia niaacuara naajioree nioni, cua shiniujuniuria nijaniya nia niqutiojonura janiya cua panishano. ¡Maja! Majaari cua paniniu nia niqutionura janiya cua panishano. Janiya jaara titiaare cua miaajenutani, naajaa. Janiyari tama cua juaashiquiatajaaja poonijionu paniyani, Jesucristo rupaa nia tojitianura, cua panishano cua maseyaquiniutia nijaniyajiniji. Naacuajitij, janiyari tamajaaja shuquiriaatia quiya Pueyaso niquiarani.

<sup>16</sup> Cua tojitianaa jaara niqutiojore janiya cua panishano, maja cua naata shuquiriaatia quiniu tamajaaja, cua pohuatasacari Jesucristo rupaa. Janiya jaara pohuataaquiri Jesucristo rupaani, cua Jiyaniijia mariqui cua saniitioereeri cua tojiyaquiniuucua nojuaja. Cua pohuatasacari na rupaa, janiyari saaja na tojiyani. Nojuacuajaari cua jiyaroquiaari na rupaa cua pohuatanura. Cunoori maja tama cua niishiriojosano cua miiniuriajaaja. <sup>17</sup> Majaari cua sequenu quiquiaari cua Jiyaniijia: “Cua Jiyaniijianaa, quia rupaa pohuatareera quiajanijara”. Janiya jaara naa na sequequiaarini, cua Jiyaniijia maara cua niqutiojore cua poonijosanojiniji nera, na shuquiritasacari janiya. Saniniuujia, tama na panishacarijiaaja cua Jiyaniijiajanaacuajaari cua jiyaroquiaari na rupaa cua pohuatanura. Cunora, majaari cua naata na tarijionu. Janiyacuajaari na seruni. <sup>18</sup> Naacuajitij, ¿taa cua miya socuani, cua Jiyaniijia cua shuqiritiniuria socuani? Naa miiquiaacuajanijia, nareja poonijioquiaanijia tama cua juaashiquiatajaaja cua panishano cua jitianura, na rupaa cua pohuatasacari. Naaratej, majaari cua sequenu quiquiaa cua tojitianaa, nojori niqutiojonura janiya cua panishano. Jesucristocuajaari sequequiaari na rupaa pohuatanaa cuaara niqutiojaaria na panishano. Naajaa, majaari naa cua sequenu quiquiaa nijaniya. Naacuajiti cua naata pa Jiyaniijia shuqiritiniu socua, cua pohuatasacari na rupaa cua maseyaquishacari cua panishano cua tojitianaajiniji. Naacuajitij, janiyari shuquiriaatia pohuataquiaa Pueyaso rupaa pa Jiyaniijiarani.



<sup>19</sup> Majaari pueya niqutionu quiquiaa janiya na jiitiasanojiniji cua niishitiojonuucua nojori. Naacuajitij, janiyari maja juhua nojori seruni. Pueyanoori maja cua jiyarona. Naajaa, janiyari tama cua cuaqueyajaaja jiyatequiaari juhua puetunu pueya serujuanaa cua quiniuriani, socua pueya quiniuria pa Jiyaniijia Jesucristo tojtianaara. <sup>20</sup> Jesucristo rupaa cua pohuatasacari cuarta Judiocuaca niqiuara, janiyari juhua Judio pueyanora quiquiaani. Janiyari naa miiquiaani nojori mariqui cua tojiyaquiriiri, janiya jaara juhua tahue quiri nojori niquiarani. Naacuajitij, socua Judiocuacari Jesucristo rupaa tojtiaa. Jesucristoocua cua tiushacari, janiyari maja socua cua quiniu juhua cua supuetanaa Judiocuaca rootasano tojijia. Naajaa, na tojiquiaajaanijia cua quishacari cuarta Judiocuacata, noo pojoritatej cante cuno rootasano tojtiaajaani. Naacuajitij, cua quishacari juhua nojori, nojoriiri socua cua tojtiaa cua pohuatasacari Jesucristojiniji. <sup>21</sup> Naajuhuj, cua quishacari tamasa pueyata, janiyari juhua nojori quiquiaani, nojori tojiniuria maninia janiya. Nojoriiri maja Judiocuaca supuetanaa rootasano tojiniu niishiniu. Naaratej, janiyari na tojiyaquiuaajuhuj, nojoritia cua quishacari. Janiyari naa miiquiaani nojori mariqui cua sooreeri, janiya jaara juhua tamaatia quijia quiri nojori niquiarani. Naajaa, Pueyaso rootasano tojiquiaa pueyaracaanu cufaranijia. Naajuhuj, puetunu Jesucristo niishitiojosanojuanaa tojiquiaanijia. <sup>22</sup> Noojiaqueya Pueyaso muerasuuri maja na naata tarinitianu najuhuana na supuetanaa rootasano. Cuaara tarinitiaara najuhuana na supuetanaa rootasano. Naajaa, janiyari mariyata cuno najuhuana rootasano tojiquiaajuhuj nojoritia cua quishacari. Nojori jyanishacari tamonu casaa sesa quiya, janiyari mariyata maja cua miiniu nojori pueresano casaa. Naacuajitij, cua naata nojori cumaquiniu maninia Pueyaso rupaata, nojori tojtiasacari janiya, juhua nojori cua quishacari. <sup>23</sup> Janiyari puetunu naa miiquiaajaanani, socua pueya cua tojtiniuria Jesucristo rupaa. Naa maninia poonijioquiaa cua Jiyaniijiaranijia, cua masenura puetunu maninia na sequesanojuanaa na muerasura.

<sup>24</sup> Niaacuajaari niishiya taa pueya tacuarishiyajoquiaacuajani. Pueya netecuatusacari, puetunu pueyajanaari jyanohua netecuatumaja jaarajaaja. Cante narta netecuatumaja shocotajani, shanohua casaa niqitioshiyari. Ritiuuquia pueyanoori jyanohua shuquiriaatia quijia na shocotanojiniji na masesacari casaa. Naajuhuj pueyanaa, jyanohua nia poonijiore Pueyasora mijiria, shuquiriaatia nia masenura nia poonijosanojiniji na jiitiasanojiniji jiyocuacaanu. <sup>25</sup> Naajuhuj, pueya jaara tacuarishijionu paniri, cante shocotanu paniyani, cuno pueyanoori puetunu najuhuana na miiniu panishanojuanaa tarinitiaja, na cuaqueya quiniuria cumueeca. Naa miiquiaari narta pueya na shocotatura, shuquiriaatia na quiniuria. Saniniuujia, na masesano na shocotanuucuanu, cunoori saaja shanohua nacaque jaamasujiniji shitiasano. Majaari na rishiniu. Pajaniyari saniniuujia pueyaracaanu shuquiriaatia quiniutianiyani Pueyaso niqitiosanota pajaniya, paa jaara maninia miiri mijiria pa quishacarini. Naaratej, pa tarinitiare puetunu najuhuana tama pa miiniu panishanojuanaa, pa shuqiritiniuria pa Pueyaso.

<sup>26</sup> Pueya netecuatusacari, netecuatumaja cuaara niishiiria tee netenu puequeetu quiyani. Majaari najuhuana na camarucuneejonu. Naajuhuj, cua poonijosacari Pueyasora, majaari cua niqijiotenu coojia.

Mocoritia piyotoosacari, pueyanoori namitia piquiquiaa narta pueyano. Majaari najuhuana na piquiniu capa. Naajuhuj, pa cartere najuhuana pa miiijosano. Saaja pa niishiriojore Pueyasooocua, maninia pa tojiniuria nojuaja. <sup>27</sup> Janiyari jyanohua saniniuujia quiquiaa maja cua miiniuria tama cua cuaqueya miiniu panishanojuajaanani. Janiyari cua cuaqueya jiyartuutenu paniquiaani saa Pueyaso cua tojiniuriaja. Janiyari tari queraatia pueya niishitiojoquiaari Pueyaso rupaani. Janiya jaara tama cua niishitiojosanojuajaanani tojiyaquirini, Pueyaso mariqui cua cartereeri, maja na rupaa cua pohuatanura socua.

<sup>1</sup> Cuarta Pueyaso pueyanaa, nia niishiri taa pa supuetanaa Judiocuaca miishaaquiaar-icuaani nojori rucuanijosacari pueyaracaanu cariquia jiyajinia. Majaari nia niya-jetanu niaa mariqui Pueyaso tojiyashijiara quiriohuajuhuj. Nojori mashishacari Egipto jiyajiniji, Pueyasoori cohuaja najaca shipiniquiaari nojori na cojuanura, nojori puetariquianojuhuaj. Pueyasoori puereetuuca shoniniacu caminia raquitiaquiaari nojori nuura caminia cajiniocua. Naacuajitij, puetunu pueyajanaari niuutiaquiaari joo-juashiquio. <sup>2</sup> Naaratej, puetunu nojorijianaari juhua Moisés muerasura jiyatesaaquiaari, nojori nuhuajishacari Moisés puereetuuca caminia tajiniaaco, cohuaja najaca cariquia-conio. Majaari socua na quituniu quiquiaari Egipto pueya seya. <sup>3</sup> Puetunu nojorijianaari jiya cajiniocuaaji casaa miaquenuujua, Pueyaso tinishano nojori miaquesocoriquiano pueyaracaanu cuno cariquia jiyajinia nojori rucuanijosacari. <sup>4</sup> Naajuhuj, nojori jiya-muetusacari, Pueyasoori mohuaca pojuartaniquiaari saajijiniji. Puetunu pueyajanaari cuno mohuaca ratuquiaari. Pueyasoori cuno saajijiniji naa raatequiaari nojoritij, na niishitiojonura cuno pueya, nojuajaari nojori nuhuajiriquiaa jiyasohuaja, pueyaracaanu nojori na cojuanura. ¡Nojuacuajaari pa Jiyaniijia Cristo quiquiaari! <sup>5</sup> Puetunu cuno supuetanaa Israel pueyajanaari naa maninia cojuasano quiquiaari cariquia jiyajinia. Naajaa, quera puetunu nojorijianaari Pueyaso tojitiaashijia quiquiaari saaja. Pueyasoori cunora nojori shuquiritiaquiaari. Naaratej nojori cusojuanuuriquiaari cuno cariquia jiyajinia nojori camarucuneetasacari pueyaracaanu, cuara puequequiaariijaatijia puetunu cuno tojiyashijiacajanaa.

<sup>6</sup> Naa miishaaquiaariti cua supuetanaa Judiocuaca, sesa casaacua nojori jiaatianuucua. Nojorijinijiiri puetunu naajiotasaaquiaarijianaa pajaniyara, pa niishiniuria maja sesa casaacua pa jiaatianurajuhuj. <sup>7</sup> Shushajanaa nojori coteesacari rucuanenu cariquia jiyaco, noojiaqueya nojorijinijinioori caapiqui casaa shipiniquiaari orojiniji juhua juunu niquishano. Nojoriiri tama nojori shipinijosano casaajaaja sequequiaari: “Nioori pa Pueyasohua, pa mashiquiniaa Egipto jiyajinia pa camarucuaacuaji”. Naacuajitij, nojoriiri na shipinishano casaa shuquiritiaquiaari sacuaraatia. Jiyacari nojori miishanoori naa naajiotasaaquiaariti:

“Pueyari cajitiurii queranacunura. Na nuhuaji, nujuatuquiaariiri na shipinishano juyaca tacoji na jiareyocuatunura. Socua sacuaraatia casaa miitiquiaariiri”.

¡Maja naa pa miiniuti pueyanaa! Maja pa timitianu tamonu casaa Pueyaso niti. Saaja Pueyaso pa timitiare cutara.

<sup>8</sup> Na nuhuaji, tamacari, noojiaqueya nojorijinijinioori sesa miiquiaari taatujuritia, cararaatia taucuaca miishacari nojori shuquirishacari na shipinishano casaa tacoji. Pueyasoori nocuaji naa sequequiaari: “¡Cuara puecoosaaria cuno sesa miijiacal!” Cunora, veintitrés mil Judiocuacaari puecoosaaquiaari cuno juuca. Cunojiniji pa niishiri maja pa miiniuria sesajuhuj, taa nojori miiquiaaricuaa taatujuritiani.

<sup>9</sup> Na nuhuaji, noojiaqueya nojorijinijinioori Pueyasota juaaquioquiaari, tamonu mi-quesanoocua nojori jiaatiasacari, puera nojori jishacari nojori miaquesano. Nocuaji Pueyasoori sacocua satejoquiaari cuno pueya. Queraatia pueyari cusonuuquiaari. Naaratej pueyanaa, maja cumaati pa juaniu, Pueyaso jaara pa saniniujiuri. Maja naa pa miiniutij paa mariqui Pueyaso juaatiriiri.

<sup>10</sup> Tamacari, noojiaqueya cuno pueyajinijinioori Moisésa juayonuutaquiaari. Moisés-cuajaari nojori jiitianara Pueyaso jiyatesano quiquiaari. Nocuaji Pueyasoori na seru jiyaroquiaari cuno juaajiaca na cusojuanura. Queraatia pueyari cusonuuquiaari jiyacari. Naaratej pueyanaa, majaari pa juaatianu pa jiyaniijianucua.

<sup>11</sup> Puetunu pa supuetanaajiniji naajiotasanojuanaari tariucuacaanu naajio-tasaaquiaari, pa numootesaanura quiarijiani, quera pa Jiyaniijia muetasacariuhua.

<sup>12</sup> Naaratej pueyanaa, tama nia cuaqueyajaaja nia cojuare nia jyanishacari niaari Pueyaso tojijia setanu cutarajanaa, niaa mariqui sesa miiriiri, juhuajaniya nia quishacari tamajaaja. <sup>13</sup> Niaari mariyata saniniujiushaaquiaajuhuj, taa puetunu parta Pueyaso pueyajanaa saniniujiushaaquiaacuaani. Naajaa, nia naata Pueyasocua tiuuniu maja puera nia saniniujiushaanura. Pueyasocujaari niishiya taate nia naata rejeretanuni. Majaari puera pa saniniujiushaanu quiniutianiya. Pueyasocua nia

niishitiojore taate nia naata cartesano quiniuhuani taraatia nia miiniuucujaji. Naacuajiti pa naata rejeretanu, Pueyaso jaara Sesaaca saniniujiutiri pajaniya.

*Maja pa cojiniu tamasaca, na miaquenuusacari na jiyanitiushano na pueyasooacara na puecootusano*

<sup>14</sup> Cua panishano Pueyaso muerasunaa, maja nia tiuquitianu tamasaca pueya jiyanitiushano pueyaso quiquiojinia, na tojitianaa nia cojiniuria, nojori shuquiritiasacari juaashiquiata shipinishano casaa Pueyaso niti. Maja nojori cojiniu, niaa mariqui sanitiosaareeri. <sup>15</sup> Niaacuajaari niishijiaca. Naaratej, nia niishiriojore cua sequesanoocua.

<sup>16</sup> Paa jaara rerejore pa Jiyaniiija cusonu juuca pa niishiniuriani, pa ratunu panishacari, paari sequequiaani: “Paacarasho canaa Jiyaniiijanaa, quia nanacaari puetunu canaacuarajanaa shooquiaari”. Naa pa ratusacari cuarta Pueyaso muerasunaa, puetunu pajaniyajanaari pa Jiyaniiija rupuesano quiquiaani, na nanaca shoonuucua puetunu pocuarajanaa. Naajuhuj, pa miaquesacari, paari sequequiaani: “Canaa Jiyaniiijanaa, quiaari quia cuaqueya nootunequiaari puetunu canaacuarajanaa”. Naa pa miaquesacari, puetunu pajaniyajanaari jatiqui pa Jiyaniiija cojiquiaani, na cuaqueya cusonuucua pocuara. <sup>17</sup> Cuno pan pa miaquesacari, puetunu pajaniyajanaari niquiriyatu panjiniji neecasequiaani. Naacuajitij, paari niishiyani puetunu pajaniyajanaari rupuetoono quiya pa Jiyaniiijatani, juhua niquiriyatu cuaqueyaja.

<sup>18</sup> Nia niishiriojoriquia taa Israel pueya miiquiaacuaani. Nojori miaquesacari Pueyasooacara na mosano Pueyaso niquiara, na niti nojori mosano seruuri juhua tama nojorijiaaja, Pueyaso jiyanooniuria nojori. Naacuajitij, nojoriiri na naata Pueyaso rupuenu, nojori secojonura nojuaja. <sup>19</sup> Jaara naa quirijitij, ¿taateerini, pueya jaara shipinijosano casaacara mosano shu miaquere? ¿Casaate pueya jiyanishano pueyasooacara mosano shuni? Nareja shucuajaari. ¿Cumaacaraca quijiate cuno, pueya shipinishano casaa juhua Pueyasorani? ¡Maja! <sup>20</sup> Naajaa, nia tojitiare casaa cua sequenutaniyani. ¡Pueyaso niishiyashijiaca pueyari na miaquesocoriquiano na seya puecooquiaa samaruhuacuara! Naa nojori miishanoniquitij, cunoori maja Pueyasora. Naacuajitij, nojoriiri samaruhua rupuequiaa, maja Pueyaso. ¡Majaari cua paniniu nia rupuenura samaruhua! Nocujaji, maja Pueyaso niishiyashijiaca nia cojiniu cuno shu nia miaquenura. <sup>21</sup> Majaari pa naata pa Jiyaniiijata rupuetoonu, samaruhuata pa rupuetooacarijiuhuj. ¿Pueyasote samaruhuata cojitishiya? Pa Jiyaniiija cusonu juuca pa niishiniuria, ¿paateeri na sequesano miaquenutaniyani, samaruhuacuara mosano casaajuhuj? ¿Cojitishiyatee? ¡Maja pueyanaa! <sup>22</sup> ¿Paateeri pa Jiyaniiija paraca cojiniu paniyani, pa Jiyaniiija pa juaatiniuriani? ¿Pajaniyate socua cumueeca pa Jiyaniiijajinjini? ¿Majateeri nia puerenu pa Jiyaniiija saniitonu?

*Taa pa miiniutianiyani*

<sup>23</sup> Tari sequereecujaniija, pa naata miiniu puetunu pa miiniu panishanojuanaa. Naajaa, majaari puetunu pa miiniu panishanojuanaa maninia pajaniyara. Puetunu pa miiniu panishanojuanaari maja na cumaquiniu quiniutianiya parta Pueyaso pueya. <sup>24</sup> Naaratej, majaari pa niishiriojonu saaja maninia pa quiniuria tamajaaja. Pa niishiriojore parta pueyacu, maninia nojori quiniuriajuhuaj. <sup>25-26</sup> Seetanujuanaari nio naajosano: “Nio jiyari pa Jiyaniiija jiya, puetunu tii quijia casaajanaano”. Naaratej, niaa jaara shu masere shu niqitiojosaquiji cumanecata, majaari nia nequesotanu: “¿Nio shujiyo casaacuara mosano?” Maja naa nia nequesotanutej. Nia panishano nia masere nareja, nia miaquesocoriquiano juhujaniya. Pa Jiyaniiija shipinishanocujaji. Pa miaquesanoori maja na naata na sesonu pajaniya Pueyasora.

<sup>27</sup> Pueyaso niishiyashijiija jaara nia masuure nata nia miaquenura, nia quiaare, niaa jaara quianu paniri. Juhujaniya nia miaquere na rupojosano niaara. Majaari nia nequesotanunoj: “¿Nio shuti casaacuara mosaarucuaa?” Majaari naa nia nequesotanu niaa mariqui nioojia macuhujeterereeri niaa jaara niishiri nia miaquesanoori shipinishano casaacuara mosano juhua Pueyasooacara. Juhujaniya nia miaquere nareja. Puetunujuanaari pa Jiyaniiija shipinishanocujaja. <sup>28</sup> Saniniuuja, nia cojinia jaara numootere

nijaniya: “Nio shuuri mosaaree shipinishano casaacuaara juhua Pueyasoocuaara”, majaari nia miaquenunoj, niaa jaara naa sequesaa. Maja nia miaquenunoj, nia cojinia mariqui na miaquerejaariuhuj na cojishacari nijaniya. Nia tarajana jiyoteeri jiyaniyajaa cuno shipinishano casaari seetanujanaa cumaacaraca quijia. Naacujitij, na miaquesacari nocuara mosano shu, noojia macuhujanutaniyari. <sup>29</sup> Majaari nio cua sequenu niaara. Niaacuajaari tari niishiya nia naata cuno shu miaquenu. Nia sequeya nio cutaranijia nia cojiniaa pueyara, maja nia miaquenura cuno shu nojori niquiara, nia cojinia mariqui noojia macuhujareeri cuno shu na miaquesacari niaata.

Niaa naasucuaari cua nequesotanu paniya: “¿Paatucua pa panishano shu miaqueyaquirini saaja tamonu pueyano pueresacari pa miaquenu panishano shu? <sup>30</sup> Paa jaara Pueyaso sequereni ‘paacarasho’ cuno sumatuurani, ¿majateeri maninia pa miaquenura? ¿Tamasacatucua casaara pa sesacare cuno miaquesano pa miaquesacarini?” <sup>31</sup> Cua tojitiare quenaaja cuarta Pueyaso muerasunaa. Nia miaquesacari, nia ratusacari, casaa nia miishacarinio, pueyaracaanu puetunu maninia nia miirijanaa Pueyaso nia shuquiritiniuria. <sup>32</sup> Puetunu nia miishanojuanaa cuara quiiria maninia Judiocuaca niquiara, taucuaca niquiarajuhuj, parta Pueyaso pueya niquiaranio. Jiyanohua taraatia cutaraari, pueya jaara tojiyaquiya Pueyaso, juhuajaniya pa miishacari nojori jiyantiushano sacuaratia casaa. <sup>33</sup> Naaratej, janiyari pueyaracaanu maninia miiniu paniquiaa puetunu pueya niquiarajanaani, nojori cuara tojitiaara Pueyaso, Pueyaso pueyara nojori jiyatesaanura. Majaari cua niishiriojonu tama cua panishanojuaja cua miiniuria. Janiyari socua niishiriojquiaa tamasaacuani, maninia cua miiniuria nojori niquiara.

## 11

<sup>1</sup> Naaratej cucua nia jiaatiare, juhua janiya nia miiniuria maninia saaja, naatej, taa Cristoocua cua jiaatiaquiaacuani, juhua nojuaja cua quiniuria. Mijiria na quishacari, nojuacuajaari pueyaracaanu maninia miiquiaari pueyacuaa.

### *Maajipohuatucua taa quiriqiani Pueyaso pueya rerejosacari*

<sup>2</sup> Cuarta Jesuucua tiunianaana, janiyari nia shuquiritiaani, pueyaracaanu nia niishishacari janiya, naajuhuj, maninia nia tojitiasacari puetunu cua niishitiojosanojuanaa Pueyasojiniji. <sup>3</sup> Janiyari paniya cutarani socua nio nia niishiniuria: Cristocuaajaari caya camarnu. Cayari saniniuujia necocua camarnu, taa pa Que Pueyaso pa Jiyaniijia Cristo camarnu quiyacuaani. <sup>4-5</sup> Naaratej, nia secojosacari Pueyaso, nia caminiujiushacari Pueyaso sequenu panishano Pueyaso pueya maanu niquiarajuhuj, jiyacaritij, canuu cuara jocuaara na nacaque na pocuasacari. Saniniuujia, maajipohua pocuanura, nojori cuara mishiquioora na naca toquerauta. Cararaatia cutaraari caya jaara pocuare Pueyasora, Pueyasotajuhuj, na naca mishiquiosano. Cararaatiajaariuhuj, maaji pocuasacari Pueyasota, Pueyasoranio, na naca mishiquiosoo. Maaji jaara caririquiyashijia quiri, ¿casaara na naca na tuqueteyaquiya puetunujuanaacuaraarini? ¿Maajiti juhua cayara quiniu paniya? Maja naasucua. <sup>6</sup> Maaji jaara na naca mishiquionu paniyaquiri pueya niquiara na pocuanura Pueyasora, Pueyaso na secojonuranio, cuno tojiyashijia cuara tuqueteera na naca. ¿Cararaatiatee, maaji jaara na naca tuquesano quiri juhua caya? Taaquiririnij. Cararaatia quiyajaariuhuj, na secojosacari Pueyaso, na caminiujiushacari Pueyaso sequenu panishano pueya niquiarajuhuj, mishiquiosoo na naca quishacari. <sup>7</sup> Maajiiri neyaca shuquiritiya na tojjia na quishacari. Naacujitij, neyacaari narta pueya shuquiritiasano quiyajuhuj. Naaratej, maaji cuara mishiquioora na naca na secojosacari Pueyaso, pueya niquiara, maja neyaca na rerequetenura. Canuuri shipinishaaquiaari juhua Pueyaso na quiniuria, Pueyaso shipinishano casami camarnura na quiniuriajuhuaj. Cayari Pueyaso shuquiritiya Pueyaso tojjia na quishacari. Naaratej, nia rerejosacari, canuuri maja nacaque na cushiniu na caminiujiushacari Pueyaso rupaa, na secojosacari Pueyasojuhuj.

<sup>8</sup> Pueyaso jaara coteenujanaa caya shipiniquiaari, majaari maajijiniji na shipinini quiquiaari caya. Maaji cutaraari caya riuquiocujiniji shipinishaaquiaari. <sup>9</sup> Naacujitij, maajiiri cayara shipinishaaquiaari. Majaari caya shipinishaanu quiquiaari maajiria.

Naaratej, maaji cuaara caya tojiiria cutara. <sup>10</sup> Naacuajitij, maaji secojosacari Pueyaso, na caminiujiushacari Pueyaso sequenu panishano pueya niquiara, cuno maaji cuaara mishiquioora na naca. Naacuajitij, pueyari niishiniutianiya cuno maajiiri maja neyaca rerequeteja. Naa maninia quiya Pueyaso seya niquiarajaariuhuj. <sup>11</sup> Naajaa, puetunu pajaniyajanaari mariyata Pueyaso muerasuni, Jesucristoocua pa tiuushacari, canuu, maajipohuanio. Naaratej maja pa rerequetenu tamonu. Caya, maaji, nojoriiri mariyata panishano. Maajiiri maja na naata tamajaaja supueno cayaju. Naajuhuj, cayari maja na naata supueno tamajaaja maajijiu. <sup>12</sup> Seetanujuanaari, maajiiri coteenu shipinishaaquiaari caya cuaqueyajiniji. Na nuhuaji, puetunu canujuanaari saniniuujia supuequiaa maajijiniji. Naajaa, puetunu pajaniyajanaari Pueyasojiniji supuequiaani. Naacuajitij, caya, maajinio, nojoriiri mariyata panishano pa naacutoojonura.

<sup>13</sup> ¿Taa nia sequeyani pueyanaa? ¿Maninateeri, maaji jaara Pueyaso secjore na naca mishiquiosoo pueya niquiara? Maja maninia. <sup>14</sup> Naajuhuj, quera puetunu pueyajanaari sequeja, cararaatia niquishanoori caya jaara tucumuejaru quiya juhua maaji. <sup>15</sup> ¿Maajiirijiataj? Jaara tucumuejaru quiri, cunoori maninia niquishano cutara. Pueyasoori naa maninia shipiniquiaari maaji, tucumuejaru na quiniuria, na naca mishiquioriquiano na muecacata. <sup>16</sup> Tamonu jaara nacoonu panijajaa socua pa muesujiniji, niocua na sequere: “Pablocuajaari tari pa niishitiojoree puetunu na niishishanojuanaa. Naajuhuj, puetunu Pueyaso pueya maapuejanaari tamaquicua naa miiquiaa taa Pablo pohuateree pajaniyacujani. Majaari socua pa niishiniu tamaatia quiniu”. Niojuanaari cua rootasano cunojiniji, pueyanaa.

*Corinto pueyari sesa miiquiaari na miaquenuujuajinia, pa Jiyaniijia cusonu nojori niishishacari*

<sup>17</sup> Cuarta Jesuucua tiuuniaanaa, nio, janiya niaacuara na naajiyani, nioori maja cua shuquiritianura nijaniya. Nia rerejosacari pa Jiyaniijia cusosacari nia niishiniuria, niaanaari saaja sesa miiquiaa. Nia rerejonuni, cunoori nia cumaquitioonura juucua. Nia rerejosacari saniniuujia, niaari saaja socua seseyaree. <sup>18</sup> Janiyari naa pohuatasaarucuaa nijaniyajinijini: “Corinto pueyari sesa na niishiriojonuta nojori jiuujiajinia raquirijitiaquiaa nojori rerejosacari”. ¿Seetanutejanaa nio pohuatasano nijaniyajiniji? Naa naasucuj. ¿Casaate cua toyani? <sup>19-20</sup> Seetanu naasucujanaa niaari nioojiajinia naa niyaquejoquiaaqui. Paacuajaari tari niishiquiaarini noojiaqueya pueyari Pueyaso pueya maapueecuaji rupatenutaniya. Naa niishishanote canapuate maja Pueyaso muerasuni. Cante seetanujuanaa Pueyasoocua tiuujiani, majaari na rupatenu quiniutianiya narta Pueyaso muerasuucuj. Cuarta Pueyaso muerasunaa, niaacuajaari Pueyaso pueya maanu. Naaratej, niaa jaara rerejore nia miaquenura pa Jiyaniijia cusonu nia niishiniuria, maja sesa nia niishiriojonu juhua niyaquejono nia quiniuria. Naa jaara naa niyaquejoriquiatej, majaari pa Jiyaniijia cusonu nia niishiniu quiquiaa seetanujuanaa. <sup>21</sup> Nijaniyanaari tama nia patasanojuaja coteetaquiaa miaquenu. Naaanaari nia miaquesano serotaaquiquiaa. Naacuajitij, casamijiuniucuaanaari miaajecoquiaacujua. ¡Saniniuujia casamiriicanaari juhujaniya mashaasequenuquiaacujua! <sup>22</sup> ¡Jiyanhua cararaatiaari naa nia miishanotej! Naa jaara naa jamuejaca quiriquiatej, ¿majate nia naata tama nia tijiniijaaja nia miaquenuunu, ratununio? ¿Niaateeri niarta Pueyaso muerasu sooquiaa? Naa nia miishacari casamijiuniucuatej, niaacuajaari nojori cararouquiaa, casamijiuniucua nojori quiniucua. ¿Taa nia sequeyani pueyanaa? ¿Janiyate nia maniniuhuaqueetaani? ¡Maja! Jiyanhua tacayanijia. Majaari cunora cua shuquiritianu nijaniya.

*Pa Jiyaniijia rootasano na cusonu pa niishiniuria*

<sup>23</sup> Janiyacuajaari nia rootacanu tari pa Jiyaniijia Jesu pohuatasano janiyani, taa na miaquequiaari na saquiriojosano pueyatani. Cuno niucujaja, Judasri pa Jiyaniijia quiateriquiano quiriquiaa taucua mosocoriquiano. Cua tojitiarohuacuara pueyanaa. <sup>24</sup> Judas quiateyaquishacarijia nojuaja, pa Jiyaniijia Jesucristoori pan riquiaari. Na Que Pueyaso sequereeri: “Paacarasho cua Quenaa”. Na nuhuaji, na neecaserohuari

na serotanura na pueya. Nojori sequereeri: “Nioori cua cuaqueya, niaacuara cua panitiaca nia jiyanooshaanura. Nia miaquere. Niocua naa miiriquia pueyaracaanutej, nia niishiniuria cua miishano niaacuara”.

<sup>25</sup> Naajuhuj, nojori miaquenu nuhuaji, Jesuuri raatonuque pataquiaari na pueya na serotanura. Coteenu na Que secojoreeri. Na nuhuaji, na pueya sequerohuari: “Pueyaracaanu nia ratusacari nio, nia niishiriquia, cua Queeri cua nanaca seera nia jiyanooquiaa, na muerasu nia quiniuria. Seyari maja socua niaacuara na moonu quishaanutaniya, sesa nia miiniu jiyanooshaanura juucua. Janiya cutaraari nia niti mosaanutaniyani”. Pa Jiyaniijaari naa sequequiaari. <sup>26</sup> Naa nia miaquesacariitij, nia ratusacarijuhuaj, pueyari niishiniutaniya niaari Pueyaso jiyanooshano pueya, pa Jiyaniija Jesu cusonuucua pa niti. Naa nia miaqueriquia pueyaracaanu na sequesano pan, pa Jiyaniija cuaara tiuquiriohuajaatija.

*Nia niishiri taate pa naata miaquenu pa Jiyaniija cusonu pa niishiniuriani*

<sup>27</sup> Naaratej, niaa jaara sesa miiri, Pueyaso nia secojore ritia na jiyanooniuhuara nijaniya, nia miaquenuhuara pa Jiyaniija cusonu nia niishiniuria. Niaa jaara pa Jiyaniija pan miaquere jiyanooshoo nia quishacariija, niaa jaara na cusonu mashaca rature jiyanooshoo nia quishacarijuhuaj, jiaari na cusonu rerequeteya! Niaari juhua sequeyaruhua, pa Jiyaniija najuhuana cusoquiaari. Naa nia miishacariitij, niaa cutaraari saniitiosaanutaniya.

<sup>28</sup> Naaratej, tama nioojiajiniaaja nia niishiriojore taa nia quiquiaani, casaa nia miiquianu sesani. Naa nia miiri coteenu, niaa mariqui sesa nia miishano miaquetareeri Pueyaso jiyanoaquishacariija nijaniya. Naa nia miiniu nuhuajitij, niocua shuquiriaatia juhuajaniya miaquerohua pa Jiyaniija pan. Niocua juhuajaniya raturohua pa Jiyaniija raatonuquejiniji cutara. <sup>29</sup> Cante juhuajaniya miaquereeni, cante juhuajaniya raturee najuhanani, jiyanooshoo na quishacariija, cuno pueyanoori Pueyaso saniitiotenutaniya tama na cuaqueyajaaja. <sup>30</sup> Naacuajitij, jiyanooshoo nia quishacariija nia miaquesacari, queraatia nijaniyajinijinoori cunora cusosuhua quiya. Noojiaqueya nijaniyajinijinio cutaraari tari cusonuucanujuhuj, Pueyaso saniitiosacari nojori. <sup>31</sup> Nocuaji tama nia cuaqueyajaaja nia jecare suraatia, pa Jiyaniija mariqui saniniuujia nia saniitoreeri. <sup>32</sup> Pa Jiyaniija jaara pa saniniuujuri, canapute sesa quiyani, Pueyasoori na saniitioquiaa na muerasu nojori quiniucua, maninia nojori quiniuhuara juhua maninia na muerasu. Naacuajitij, juhuacariija na saniitiosacari na muerasu, majaari pa saniitiosaanu quiniutaniya na ruuretjacata jiya puequesacari, Pueyaso jaqueroosacari na tojiyashijiaca.

<sup>33</sup> Naaratej cuarta Jesuucua tiuuniaanaa, niaa jaara pa Jiyaniija pan sanu paniriquia na cusonu niishiniuria, nia sashiri niarta Pueyaso muerasu, jatiqui nia miaquenura maninia. <sup>34</sup> Miaajeyano maaraja, cuaara miaqueera coteenu tama na tiajiniaaja, Pueyaso mariqui nia saniitoreeri, sesa nia miiniuucua nia rerejosacari nia jamuenuta.

Socua nia nequesotasanojiniji janiya, janiyari nia sequenutaniyani cua tiuquishacari niaacua.

## 12

*Pueyaso Sohuanu cumaquishacari puetunu Pueyaso muerasujanaa*

<sup>1</sup> Cuarta Pueyaso muerasunaa, niaacuajaari tari niishiya Pueyasoori na Sohuanu niqitioquiaa puetunu pajaniyajanaa, na cumaaca pa jitianura. Quiarijiani, socua nia niishitiojonu paniya cunojinijinjia. <sup>2</sup> Niaacuajaari niishiya taa nia quiquiaari tarini, Pueyaso niishiyashijiaca nia quishacariija. Niaari puetunu sapojosaaquiaarijanaa, pueya shipinishanoocua nia tiuuniucua najuhanaj. Sesaacaari naa nia tojitiquiaari najuhuana pueya shipinishano, nia jyanishano pueyasohuani. <sup>3</sup> Naaratej cua pueyanaa, maja sapojosano nia quiniu socua. ¿Taate pa naata niishiniuni, cante seetanujanaa Pueyaso Sohuanu cumaacata pohuataa Pueyasojinijini? Naa nia saniniuujuritij: Pueyaso Sohuanu pohuatesacari pueyano, nojuajaari maja na naata Jesucristo sesacanu. Naajuhuj, saaja Pueyaso Sohuanu cumaquishacari pueyano na naata sequenu: “Jesucajaari Jiyaniijajanaa”. Naacuajitij, maja nia tojiniu na rupaa, cante Jesucristo sesacajani.

<sup>4</sup> Pueyaso Sohuanuuri niquiriyatujua. Naajaa, Pueyaso Sohuanuuri puetunu Pueyaso muerasujuanaa cumaquiquiaa tamaatia miishano pa miiniuria na cumaacata. <sup>5</sup> Queraatia tamaatia poonijiosanoori Pueyasora quiya. Naajaa, puetunu pajaniyajanaari niquiriyatujua Jiyaniijiara poonijioquiaani. <sup>6</sup> Puetunu pajaniyajanaari tamaatia miiquiaa pa poonijiosanoni. Saniniuujia, Pueyasojuaanaari na panishano miiquiaa puetunu pueya jiuujiajiniajanaa. <sup>7</sup> Pueyasoori puetunu na muerasujuanaa cumaquiquiaa na Sohuanuta, maninia pa miitioonura, Pueyaso muerasu maapue cumaquishaanura puetunujuanaa. <sup>8</sup> Pueyasoori pa cumaquiquiaa tamaatia miishano pa miiniuria. Naacujitij, Pueyaso Sohuanuuri tamonu pueyano pohuataniquiaa Pueyaso niishishano na muerasura. Pueyaso Sohuanuuri tamonu pueyano niishitiquiaajuhua Pueyaso sequenu panishano pajaniya. <sup>9</sup> Pueyaso Sohuanuuri tamonu cumaquiquiaa Pueyasooocua na tiuuniuria jiyanohua, na shiniuujiniuria Pueyaso miiniu panishano pa miiniuria. Pueyaso Sohuanuuri tamonu cumaquiquiaajuhua cusosuhua na naatanijionura Pueyaso cumaacata. <sup>10</sup> Pueyaso Sohuanuuri tamonu pueyano jiyajeneta miishano miitijuhua Pueyaso cumaacata. Tamonuuri niishitishaaquiaa Pueyaso sequenu panishano na pohuatanura pueya niqiuara. Pueyaso Sohuanuuri tamonu niishitiquiaa teyano sohuanute tamonu pueyano cumaquiyani, Pueyaso Sohuanu, sapojona samaru soj. Pueyaso Sohuanuuri tamonu pueyano pocuatequiaa tamaatia rupaaca, na niishishoo rupaa. Pueyaso Sohuanuuri tamonu pueyano niishitiojoquiaa tamaatia rupaajinia sequesano na pacunura pueya rupaajiniuhua, pueya tojiniuria maninia tama nojori rupaajiniajaaja. <sup>11</sup> Naacujitij, Pueyaso Sohuanujuanaari puetunu pa cumaquiquiaajanaa, tamaatia pa miiniuria. Naa pa poonitijioquiaari taa na panyacuajani, cana na panyajaaniuhua.

*Puetunu Pueyaso pueyajanaari juhua niquiriyatu cuaqueya quiya*

<sup>12</sup> Tamaatia poonijiosano puetunu pajaniyajanaa jiiiasacari, paari juhua niquiriyatu cuaqueya quiyani. Mijiria pa cuaqueyari jiyanohua maninia shipinishano jiyanohua Pueyaso niishitijata. Pa cuaqueyari maja saaja shu na quiniu. Pa cuaqueyari queraatia tamaatia casaaraca. Puetunu pa cuaqueya casaajanaari jatiqui poonijioquiaa pa cuaqueyajinia, maninia pa quiniuria. Puetunu pa cuaqueya casaajanaari saa niquiriyatu cuaqueyaja quiya. Jiyano pa cuaqueyatej, Pueyaso muerasuuri naa quiyajuhua. Naacujitij, Cristota rupuetootesano pa quishacari, puetunu pajaniyajanaari juhua niquiriyatu cuaqueyaja quiyani, pa Jiyaniijiara pa poonijionura jatiqui. <sup>13</sup> Pueyasoori pa rupuetootequiaa na Sohuanuta, puetunu jatiqui pa quiniurajanaa. Pueyasoori puetunu na muerasujuanaa samiitianiquiaari na Sohuanuta. Pueyaso Sohuanu pa jiiiasacari, puetunu pajaniyajanaari rupuetootesano quiya niquiriyatu Sohuanutani. Naacujitij, paari juhua niquiriyatu cuaqueya quiyani: Judiocuaca, taucucanio, poonitijiosano pueyajuhua, camarnuujju pueyano.

<sup>14</sup> Pa cuaqueyajiniji pohuatereeraj. Pa cuaqueyajinia, majaari saa niquiriyatu casaaja quiniu. Queraatia casaari quiya pa cuaqueyajinia. <sup>15</sup> ¿Taa nia sequeyani pueyanaa? Pa niohuaca jaara sequere: “Janiyari maja juaashiquiani. Naaratej, janiyari maja pueyano cuaqueyajinijini”. ¿Taa nia sequeyani cuarta Pueyaso muerasunaa? ¿Pa niohuacate maja pa cuaqueyajiniji, maja juaashiquia na quiniuucua? Maja. Naajuhua, majaari pa soonu tamaatia poonijiosano pa jiiiasacari Pueyasora. <sup>16</sup> Naajuhua, pa numaa jaara sequere: “Janiyari maja namijiani. Naaratej, janiyari maja pueyano cuaqueyajinijini”. ¿Taa nia sequeyani pueyanaa? ¿Pa numaa maja pa cuaqueyajiniji, maja namijia na quishacari? ¿Sooshiyatee? Maja. <sup>17</sup> Paa jaara saaja puereetuca namijia quirini, shaaqui pa cuaqueya, ¿paatucua tojirini? Maja pa naata. Paa jaara saaja numaa quirini, shaaqui pa najuhua, ¿paatucua nujuuriquiani? Maja pa naata.

<sup>18</sup> Pueyasoori namitia pa cuaqueya shipiniquiaari puetunu pa panishano casaatajanaa. Puetunu pa cuaqueya casaajanaari rupuetootesaaquiaari tee Pueyaso paniquiaari ni-anucujani. Naajuhua, Pueyasoori puetunu na muerasujuanaa cumaquiquiaa mariyata, tamaatia poonijiosano pa jiiitanura taa na panyacuajani. <sup>19</sup> Pa cuaqueya jaara quiriua

saa namijiaja puetunujuanaa, ¿pa cuaqueyatuma tee quiriquia socuani? <sup>20</sup> Puetunu pa cuaqueya casaajanaari namitia saaja niquiriyatu cuaqueya quiya.

<sup>21</sup> ¿Taa nia sequeyani pueyanaa? Pa namijia jaara pa juaashiquia sequere: “Juaashiquianaa, niaari najuhuana quijiaca. Maja nia naata niquiniu”, ¿majate pa juaashiquia pa panishanojuhuaj? Taaquiririnij. Naajuhuj, pa naca jaara pa niohuaca sequere: “Niohuacanaa, niaari najuhuana quijiaca. Maja cua paniniu niya nijaniya”, ¿majate pa niohuaca pa panishanojuhuaj pa rucuanejotajara? Taaquiririnij. Pueyanaa, naa pa quiri jatiqijiuhua puetunu parta Pueyaso muerasutajanaa, taa puetunu pa cuaqueyajinia pa jitiiasano casaajanaa quiya jatiqicuani. Naaratej, puetunu parta Pueyaso muerasujuanaari pa panishano quiya, pa cumaquitioonura maninia. <sup>22</sup> Teyano casaate pa cuaqueyajinia socua sasaca quiya pa niquiarani, cunoori socua pa panishano. Maja pa naata rishiniu cunooju. <sup>23</sup> Naajuhuj, teyanote maja puera maninia niquishano pa cuaqueyajiniani, paari toque cushiquiaani pa cararaatuuquia pa mishiquionura, maninia pa niquishaanura. Paari caririquijia cutarani, juhuasu pa quishacari. <sup>24</sup> Saniniuujia, maninia niquishano casaa pa cuaqueyajiniani, majaari cuno pa mishiquionu quiquiaa toqueta. Pueyasoori naa puetunu pa cuaqueya casaajanaa shipiniquiaari maninia pa cojuanurajuhua teyanote maja maninia niquishano pa cuaqueyajiniani. <sup>25</sup> Naacujitij, pa cuaqueya casaari maja rimiajata cojuasano na quiniu. Puetunu pa cuaqueya casaajanaari maninia miitiooquiaa, puetunu maninia pa cuaqueya quiniurijanaa. Naatej, taa pa tacaquiaa pa cuaqueyaracuaani, naa pa miiri parta Pueyaso muerasujuhuj. <sup>26</sup> Pa niohuaca jaara noore, puetunu pa cuaqueyajanaari na tacaatiaa. Pa niohuaca jaara shaaterohua, pa cuaqueyari jaarajaaja puetunujuanaa shuquiriaatia quiriohua. Naajuhuj, parta Pueyaso muerasu jaara taraatia miishaare, naa nojori pa taraajetarejuhuaj. Naajuhuj, parta Pueyaso muerasu jaara maninia miishaare, nojoritia pa timirijuhuj.

<sup>27</sup> Puetunu pajaniyajanaari juhua Cristo cuaqueya quiyani. Naaratej, Pueyasoori puetunu na muerasujuanaa rupueteya Cristo cuaqueyajinia, saa niquiriyatu cuaqueyaja pa quiniuria, pa camarnura pa poonijionura. <sup>28</sup> Cristo cuaqueya pa quishacari, Pueyasoori coteenujuanaa canaa jiyatequiaari Jesucristo jiyaramiquishano pueya canaa quiniuria. Na nuhuaji, Pueyasoori tamasaca jiyatequiaari na rupaa pohuatanaa nojori quiniuria, nojori caminiujiuniuria Pueyaso sequenu panishano pueya niquiarajuhuj. Naajuhuj, Pueyasoori tamasaca jiyatequiaari na rupaa niishitiojonaa nojori quiniuria. Pueyasoori tamasaca jiyatequiaari jiyajeneta casaa nojori miijionura na cumaacata. Tamasacaari jiyatesaaquiaari cusosuhua naatanijionaa nojori quiniurijuhuj, Pueyaso Sohuanu cumaquishacari nojori. Tamasacaari jiyatesaaquiaarijuhuaj Pueyaso muerasu naacunaara nojori quiniuria. Tamasacaari jiyatesaaquiaarijuhuaj Pueyaso muerasu jitianaa nojori quiniuria. Tamasacaari pohuatesaaquiaari tamaatia rupaacajuhuj. Naacujitij, queraatia tamaatia poonijosanoori quiya. <sup>29</sup> ¿Puetunu Pueyaso muerasujua-naateeri jiyaramiquishaaquiaari Jesucristojiniji nojori pohuatanura tamasaca niquiara? Maja. ¿Puetunu Pueyaso muerasujua-naateeri Pueyaso rupaa pohuatanaa? Maja. ¿Puetunu Pueyaso muerasujua-naateeri Pueyaso rupaa niishitiojonaa? Maja. ¿Puetunu Pueyaso muerasujua-naateeri jiyajeneta miishano miijiaca? Maja. <sup>30</sup> ¿Puetunu Pueyaso muerasujua-naateeri cusosuhua naatanijionaa? Maja. ¿Puetunu Pueyaso muerasujua-naateeri tamaatia rupaaca pocujaca? Maja. Tamaatia rupaajinia pohuatasano jaara quiriquia, ¿puetunu Pueyaso muerasujua-naateeri na naata na pacunu tama nojori rupaa-jinijajaaja? Maja. <sup>31</sup> Naaratej, nijaniya cuara jiaatiaara socua maninia poonijosano nia jitianura Pueyaso Sohuanujiniji, niarta Pueyaso muerasu nia cumaquiniuria maninia.

Cuarta Jesuucua tiunianaana, quiarjiani nia niishitiojoreera casaate socua panishanoni, Pueyaso shuquiritianura pajaniya.



<sup>1</sup> Pueyaso Sohuanu jaara cua pohuatere queraatia cua niishishoo rupaaca, Pueyaso seya rupaajuhuj, naajaa, janiya jaara pueya paniyashijia quirini, janiya maara saaja cojuatuneja quiri Pueyatorani. <sup>2</sup> Naajuhuj, janiya jaara Pueyaso cumaacaraca quirini Pueyaso sequenu panishano cua caminiujiuniuria, naajaa, cua paniyaquishacari pueya, janiya maara najuhuana quijia quirini. Naajuhuj, janiya jaara niishiri puetunu Pueyaso miiniu panishanojuanaani, puetunu Pueyaso niishishanojuanaanio, naajaa, janiya jaara pueya paniyashijia quirini, janiya maara najuhuana quijia quiri Pueyatorani. Naajuhuj, janiya jaara Pueyaso cumaacaraca quirini, tuhuananuhua cua jatanura tamocora Pueyasocua cua tiuuniucua jyanohuani, naajaa. Cua paniyaquishacari pueya, janiya maara najuhuana quijia quiri quia Pueyatorani. <sup>3</sup> Naajuhuj, janiya jaara puetunu cua casamijianaa nareja niqutiore casamijiuniucua cua paniyaquiniutiani, cua Jiyaniijia maara cua shuquiritiaaquiri. Naajuhuj, janiya jaara tama cua cuaqueyajaaja panitiare Pueyaso rupaa cua pohuatanurani, naajaa, cua Jiyaniijia maara cua shuquiritiaaquiri, janiya jaara pueya paniyashijia quirini. Naajuhuj, janiya jaara mosaare Pueyaso rupaa cua pohuatanuucua, naajaa, cua Jiyaniijia maara cua shuquiritiaaquiri, janiya jaara pueya paniyashijia quirini.

<sup>4</sup> Cante pueya panijiani, nojuajaari panaatia sashijia. Cante pueya panijiani, nojuajaari maninia miijia puetunu pueyarajanaa. Cante pueya panijiani, nojuajaari tamonu pueya jiitiasanoocua jiaatiaashijia. Cante pueya panijiani, majaari tama na cuaqueyajaaja na jiyatenu juhua cutara pueyanora. Naajuhuj, cante pueya panijiani, majaari pueya rerequeteja na quiniu. <sup>5</sup> Cante pueya panijiani, majaari pueya na cararajonu. Cante pueya panijiani, majaari saaja nera niishiriojua tamajaaja. Cante pueya panijiani, majaari ritia juaajia. Majaari na niishiniu naminiujiuhuj, tamonu jaara sesa na miiri. <sup>6</sup> Cante pueya panijiani, nojuajaari pueyacuara taraajeja, nojori miishacari sesa. Saniniuujia, nojuajaari shuquiriaatia quia pueya miishacari Pueyaso panishano. <sup>7</sup> Cante pueya panijiani, juhuajaniya pueyaracaanu rejeretaari, tamasaca miishacari sesa nojuaja. Majaari na taacanuunu Pueyaso sequesanojiniji, tamonu sequesanojinijinio. Naajuhuj, majaari na tarinitianu maninia miiniu pueyaracaanu. Pueya panijiaari naa puetunu rejeretajanaa, taraatia na miishacari.

<sup>8</sup> Panijia pa quiniuni, cunoori pueyaracaanu panishaanutaniya, maja saa mijiria pa quishacarijia. Naaratej, socua cutara panijiaara pa quirij. Mijiria pa quishacari, Pueyaso Sohuanuuri pa cumaquia Pueyaso sequenu panishano pa caminiujiuniuria, pa niishishoo rupaaca pa pocuanurajuhuj, Pueyaso niishitishano pajaniya pa pohuatanurano. Puetunu nio niishishanojuanaari puequenutaniya Jesucristo tiuquishacariuhua pocua. Paniniu cutaraari puequeyaquiniutianiya. <sup>9</sup> Mijiria pa quishacari, paari saaja shiitianiyojua Pueyaso niishishano jiitiaani. Pa niishishano Pueyasojiniji pa pohuatanononi, cunoori saaja shiitianiyojua Pueyaso niishishanojiniji. <sup>10</sup> Naacuaajitij, mijiria pa niishishanoori najuhuana quiniutianiya paa jaara Pueyaso shuriucua quirini. Pueyasoori jiyacari pa niishitiojonutaniya maninia cutara. Paari jiyacari puetunu maninia niishiniutianiyajanaani.

<sup>11</sup> Janiya jaara naatujua quiquiaarini, juhua naatujua pocuaquiaarinijia. Juhua naatujua niishiriojoquiaarinijia. Saaja naatujua niishitaja jiitiaquiaarinijia. Saniniuujia, janiya jaara cumantumaca quiquiaarini, janiyari cua naatujua quiniu niyajetaquiaarini. Naajuhuj mijiria pa quishacari, paari juhua naatujoori quiyajaa Pueyaso niquiarani. Pa Jiyaniijia tiuquishacariuhua, paa cutaraari cumueeca Pueyaso pueya quiniutianiyani. <sup>12</sup> Mijiria pa quishacarijia, paari shiitianiyojua niishiyani. Paari juhua ninitia niquiyajariyani, juhua sesarunee niqutiujinia. Pueyaso shuriucua pa quishacari, paari maatia niishiniutianiyani. Quiarijiani, saa shiitianiyojuajaari pa niishishano. Na nuhuaji, Pueyasota pa quishacari, paari puetunu maninijanaa niishiniutianiyani, naatej, ta Pueyaso niishiya puetunu pajaniyajanaacuaani. <sup>13</sup> Quiarijiani, paari Pueyaso rupaacua tiuuniu niishiyani. Naajuhuj, paari juhuajaniya sashiniu niishiyani, maatia pa niishishacari nojuajaari maninia miiniutianiya pajaniya. Nioori maniniacuaaja. Naajaa,

pa panishacari Pueyaso, pueyano, cunoori socua maninia cutara Pueyasora, puetunu tamonu casaajiniinijiuanaa.

## 14

### *Niishishoo rupaaca pocuanujiniji niishitiojosano*

<sup>1</sup> Naarate cua panishano Pueyaso muerasunaa, nia jiaatiare socua jiyanoehua pueya panijiaca nia quiniuria, Pueyaso panijiacajuhuj. Naajuhuj, nia jiaatiare Pueyaso Sohuanu cumaaca nia jiitianura maninia nia miiniuria. Panishano cutaraari Pueyaso Sohuanu niishitaja nia jiitianura, Pueyaso sequenu panishano nia caminiujiuniuria Pueyaso pueyara. <sup>2</sup> Cante niishishoo rupaa pocuaa pueya niquiara Pueyaso Sohuanu cumaacatani, cuno pueyanoori maja na cumaquiniu narta Pueyaso pueya. Na pohu-atasanoori saaja Pueyaso tojishano, maja pueya tojishano. Cuno pueyanoori jiyasohuaja Pueyaso Sohuanu niishitishano pohuataa pueya niquiara najuhuanaj. Majaari pueya niishiniu casaa na sequeyani. <sup>3</sup> Saniniuujia, cante Pueyaso sequenu panishano caminiujiujia pueya rupaajiniani, cunoori narta Pueyaso muerasu cumaquiya. Na numooteyari. Na cumanjiaajaariuhuj. <sup>4</sup> Na pohuatasanoori maja najuhuaana na quiniu pueyara. Pueyaso pueya maanu tojishacari na pohuatasano, nojoriiri socua cumaquishaanutaniya. Saniniuujia, cante niishishoo rupaajinia pocuaa Pueyaso pueya maanu tajiniani, najuhuaana pocuaari. Saa tama noojia cumaquiyajaarijia. <sup>5</sup> Puetunu nijaniyajanaa jaara niishishoo rupaaca pocuanu niishijiaca quiriquia, janiya maara shuquiriaatia quirini. Naajaa, janiya maara socua shuquiriaatia quirini puetunu nijaniyajanaa jaara Pueyaso sequenu panishano caminiujiuniana quiriquia Pueyaso cumaacata. Cante Pueyaso rupaa pohuatanani, cuno pueyanoori socua tojishano pueyano niishishoo rupaa pocuanajiniji. Naajaa, niishishoo rupaa pocuanaari mariyata panishano quiya, na sequesano jaara pueya rupaajinia pacusaare pueya tojishocoriquiano. Naacuajitij, Pueyaso maapueeri cumaquishaanutaniyajuhuj, maatia Pueyaso sequesano nojori tojishacari.

<sup>6</sup> Cuarta Pueyaso muerasunaa, ¿niaatucua taa sequereni, janiya jaara Pueyaso rupaa pohuatasee nijaniya nia niishishoo rupaajiniani? ¿Niaatucua cumaquishaare cua pocuasacari najuhuaana naa nia niquiaratej? Maja. Niaa cutaraari cumaquishano quiniutianiya, janiya jaara nia pohuatare nia rupaajinijanaa Pueyaso niishitiojosano janiyani. Maninijaariuhuj janiya jaara nia niishitiojore Pueyaso rupaa nia rupaajiniani. <sup>7</sup> Nia niishiriojore. Jiuujiaaju casamiiri rupaaracajuhuj. Naaratej, paari shuquiriaatia tojitiaa naajua jonesesarini, jaaquequejotaja taquinosacarijuhuaj. Saniniuujia, pueyano jaara naajua jonenejonu saniniujiya na niishiyaquishacarijia, saaja nareja cojuatuneyari. Naacuajitij, cante na tojiyani, majaari na niishiniu casaa na jonenenu paniya juucuan. <sup>8</sup> Naajuhuj, trompeta jaara sesa jonesesaare, ¿soldadohuate na naata niishiniu casaa na miiniutianiyani? Maja. <sup>9</sup> Mariyata naajaariuhuj, niaa jaara niishishoo rupaa pocuaa pueya niquiara, ¿pueyatucua taa niishirini casaa nia sequeyani? Niaari saaja nia niti taquiriocuateya najuhuaana nojori niquiara. <sup>10</sup> Niaacuajaari niishiya queraatia rupaacaari mijiria quiya. Puetunu maninijanaa cutaraari na niishiniaara. <sup>11</sup> Saniniuujia, janiya jaara niishiyaquiya tamonu rupaani, janiyari tahue quiya cuno rupaa pocuanarani. Cuno rupaa pocuanaari tahue quiya quiriujuhuj. <sup>12</sup> Cuarta Jesuucua tiunianaana, niaacuajaari Pueyaso Sohuanuucua jiaatiaquiaa, na cumaaca nia jiitianura. Maniniacuaja. Naajaa, nijaniya cuara jiaatiaara Pueyaso Sohuanu cumaquiniuria nijaniya, puetunu tamaatia poonijosanojuanaa nia miiniurijuhuj, maja saaja tamaatia rupaacajinia nia pocuanura. Naacuajitij, nia naata niarta Pueyaso pueya cumaquiniu maninia puetunu nia miishanotajanaa, Pueyaso Sohuanu cumaquishacari nijaniya.

<sup>13</sup> Naaratej, cante niishishoo rupaajinia pocuaquiaa pueya niquiara Pueyaso Sohuanu cumaacatani, cuno cuara secojora Pueyaso, Pueyaso Sohuanu cumaquiniuria nojuaja, na sequesano na pacutenura pueya rupaajinijuhuj. <sup>14</sup> Pa secojosacari Pueyaso pa niishishoo rupaajinia, Pueyaso Sohuanuuri pa sohuanu secojoteya Pueyaso. Majaari pa niishitaja niishiniu cutara casaa pa sequeyani. <sup>15</sup> Cunora, ¿casaa pa miiniutianiya

Pueyaso pueya maapue tajiniani? Naa pa miiritij: pa sohuanu cuaara secojoora Pueyaso pa niishishoo rupaajinia. Pueyaso pa secojorejuhua tama pa rupaajiniajaaja. Naajuhuj, pa sohuanu cuaara jaaquequejoora Pueyaso niquiara pa niishishoo rupaajinia. Pa jaaquequejorejuhua tama pa rupaajiniajaaja. <sup>16</sup> Pueyaso Sohuanu jaara nia sohuanu secojotere niishishoo rupaajinia, nia tojitianaari maja na naata sequenu: “Jaa, cuaara naa quiiriatej”. Majaari nojori niishiniu tamaatia rupaajinia nia secojosano. <sup>17</sup> Niaa naasucuaari jiyanoehua maninia secojiya Pueyaso. Naajaa, saaja najuhua quiyari tamasacara, nojori niishiyaquishacari cuno rupaa. Cuno niishishoo rupaajinia secojosanoori maja na naacunu tamasaca. <sup>18</sup> Pueyanaa, shuquiriaatia quiyanijia Pueyaso niquiara, Pueyaso Sohuanu pocuatesacari janiya cua niishishoo rupaacajinia, tamajaaja cua quishacari. Janiyari tamaatia rupaacajinia pocuaja socua niajanijajiniji cutarani. <sup>19</sup> Naajaa, janiya jaara pueyaracaanu pocuariquia niishishoo rupaajinia Pueyaso pueya maapue niquiarani, cuno maara najuhua quiriquiaj. Rupaquijia pohuatasano tama pueya rupaajiniajaajani, cunoori jiyanoehua socua maninia tucuyocua pohuatasanojiniji niishishoo rupaajinia. Saaja pueya niishishano rupaajinia cutara cua naata nojori cumaquiniu.

<sup>20</sup> Cuarta Pueyaso muerasunaa, niaari najuhua shuquiriya niishishoo rupaajinia nia pocuasacari pueya niquiara, naatej, taa naatujoori shuquiritiaquia quiarinio tacuarishijotajacuaani. Niaa jaara juhua naatujoori quiniu panijajaa, sesa niishiriojiyashijiacaca nia quiri, taa naatujoori quiyacuaani. Saniniuujia, majaari seetanujanaa naatujoori niajanijia. Naaratej, cumantumaca nia quishacari, nia niishiriojore maninia nia cumaquitioonura nia rerejosacari. <sup>21</sup> Tariucuaaanu, tama Pueyaso sequesanojaarijia naajiotasaaquiaari. Naa sequeyari:

“Janijari taucuaa jiyaramiquiniutianiya cua saquiriojosano Israel pueyacuaani, cua sequenu panishano nojori pohuatanura cua pueya. Cua pueya niishiyaquishoo rupaacajinia pohuatanutaniyari. Naajaa, niishiyaniija, tahua pohuatasacari cua rupaa, cua pueyari saa cua ruuretanutaniyajaa, taa nojori ruuretaquiaa cua rupaacuaani jaara tama nojori rupaajiniajaaja pohuatasariquiaa”.

<sup>22</sup> Naa Pueyaso sequesacaritij, paari niishiyani, Pueyasoori tamaatia rupaacata na tojiyashijiacaca tojitiniu saniniuujiaquiaa na rupaa juucua. Paari saniniuujia tari na rupaa tojitijacaca cutarani. Naaratej, majaari socua panishano Pueyaso sequenura pajaniya pa niishishoo rupaajinia, na tojitiniuria pajaniya nojuaja. Pueyaso sequenu panishano caminiuujishano cutaraari pajaniyara. Cunocuaajaari tama pa rupaajiniajaaja. Cunoori maja Pueyasocua tiuyashijiacaca. <sup>23</sup> Naaratej, Pueyaso pueya maapue rerejosacari, saaja secaja niajanijajinijinio cuaara pocuaara niishishoo rupaacajinia. Naa pocuanu nia tarinitiare quenaaja, tamasaca Jesucua tiuyashijiacaca quishacari nia rerejojuajinia, nojori mariqui jiyaniiri: “¡Nio pueyaqui puetunu paatecoorijihuanajaj!” <sup>24</sup> Saniniuujia, puetunu niajanijajanaa jaara Pueyaso sequenu panishano caminiuujia tama nia rupaajiniajaaja, tamonu pueyano jaara niaacua tiuquiri, nojuajaari maninia niishiniutianiya nia pohuatasano. Puetunu nia pohuatasanojuanaari noojia tacaatiniutianiya sesa miijia na quiniuucua. Tama nojuajaarijia niishiniutianiya: “¡Janijiaqui sesa miijia Pueyaso niquiarani!” <sup>25</sup> Nia pohuatasano Pueyasojinijiri puetunu sesa na miishanojuanaa na niishitiniutianiya noojiajinia. Nocuaji, nojuajaari Pueyaso tojijia quiniutianiya. Sequenutaniyari: “¡Pueyasoqui seetanujanaa nia tajinia niya quia!”

*Puetunu nia miirijiana maninia. Majaari nia riuticojonu tamonu pocuasacari*

<sup>26</sup> Naaratej, cua tojitiare taa nia miiniutianiyanii cuarta Pueyaso muerasunaa. Naa nia miiri nia rerejosacari. Puetunu nia miishanojuanaa cuaara quiiria nia cumaquitioonura, socua maninia Pueyaso tojitianaara nia quiniuria. Naacuajitij, Pueyaso Sohuanu cumaacata, tamonu naasucuaari jaaquequejonutaniya. Tamonu naasucuaari Pueyaso rupaa niishitiojonutaniya. Tamonu naasucuaari Pueyaso Sohuanu niishitiojosano noojiajinia caminiuujiniutianiya. Tamonu naasucuaari niishishoo rupaajinia pocuanutaniya. Na nuhuaji, tamonu cuaara na pacuura nia rupaajinia, maninia nia tojiniuria. Naa nia

miiri maninia. Niquiriyatujua cuaara pocuaara coteenu, na nuhuaji tamonu, na nuhuaji socua tamonu. Naate nia miiri. Majaari nia riutioconu tamonu pohuatasacari. <sup>27</sup> Niaa jaara niishishoo rupaajinia pocuanu paniri, cuaara pocuaara saa querajaa pueyaja, maja socua. Cuaara pocuaara niquiriyatujua, na nuhuaji tarajanu, na nuhuaji socua tarajanu. Naate maninia. Maja nia pocuanu tamonu pocuasacari. Na nuhuaji, tamonu cuaara pacuura pueya rupaajinia, niishishoo rupaajinia nia sequesano, pueya tojiniuria maninia. <sup>28</sup> Niishishoo rupaa pacuna quiyaquishacari, cuaara pocuaaquiiria cante tamaatia rupaajinia pocuanu paniriquiaa nia niquiarani. Na naata sanaa pocuanu noojiajinia tamajaaja, saa Pueyaso niquiaraja.

<sup>29</sup> Naajuhuj, niaa jaara Pueyaso Sohuanu niishitijosano nioojiajinia pohuatanu paniri, cuaara pocuaara saa querajaa pueyaja, maja socua. Na nuhuaji, Pueyaso Sohuanu cumaaca jiitianaa cuaara saniniujiuria nia pohuatasano, nia niishiniuria, cunote seetanujanaa Pueyaso Sohuanu niishitijosano, maja soj. <sup>30</sup> Nia pohuatasacari Pueyaso rupaa, tamonu jaara pohuatanu paniya shusha Pueyaso Sohuanu niishitijosano noojiajinia, cante pohuataaani cuaara sanaajeera, na tarajana pocuanura. <sup>31</sup> Naacuajitij, puetunu Pueyaso niishitijosano jiitianaajanaari na naata na pohuatanu. Naaratej, niquiriyatujua cuaara pohuataara, na nuhuaji tamonu, na nuhuaji socua tamonu. Naacuajitij, puetunu niajanijanaa na naata pohuatanu nia niishishano Pueyasojiniji. Naacuajitij, puetunu Pueyaso muerasujanaari maninia niishitijosano quiniutianiya, maninia cumaquishanojuhuaj, maninia nia miiniuria. <sup>32</sup> Maja timia pocuanu jaarajaaja tamonu pocuasacari. Majaari Pueyaso Sohuanu pocuatenu tari niajaniya, tari tamonu pocuasacaruua. Nia naata cutaraari sashiniu nia pocuanura. <sup>33</sup> Pa Pueyaso cutaraari maninia miijiajanaa. Maja cushitiojoja. Naarate pueyanaa, maja tamasa pocuasacari pa riuticojonu. Saaja maninia pa miiriquia pueyaracaanu.

Cua tojitiare socua. Puetunu Pueyaso pueya maapuejanaa cuaara naa miiria na rerejosacari. <sup>34</sup> Maajipohua cuaara sanaa tojitiaara Pueyaso rupaa pohuatasacari. Maajipohua cuaara niishitiojiyaquiiria pueya niquiara. Maajipohua cuaara tojijiaa quiiria, taa pa niishitiosaaquiiaari Moisés Rootasanojinijicujani. <sup>35</sup> Maajipohua jaara niishiniu paniya socua pohuataana niishitiosanojiniji, nojori cuaara nequesotohuara neyaca tama na tiajiniajaaja, na que maaraja. Cararaatia cutaraari maaji jaara nequesoretare caya pohuatasacari, Pueyaso muerasu rerejoajinia. <sup>36</sup> Nia tojiri nio cua rootasano pueyanaa. Niaacuajaari niishiya, Pueyaso rupaari supueyaquiiaari niajanijajiniji. Naajuhuj, majaari Pueyaso rupaa pohuataanaa jiyaramiquiniu quishaaquiiaari saa niaacuaja. Tamonu jiyacajinia, queraatia Pueyaso pueya maapueeri cua niishitijosano tojitiaquiaa maninia cutara. <sup>37</sup> Nijaniyajinijinio, noojiaqueya pueyari Pueyaso Sohuanu cumaaca jiitiaa, nia niishiniuria cana cumaacata tamonu pueyano niishitiojiyani. Naacuajitij, ¿taa nia sequeyani? ¿Majate Pueyaso Sohuanu niishitijosano cua sequesano niajaniya? <sup>38</sup> Cante nio niishiniu paniyaquiiani, cuno jiyoteeri maja Pueyaso Sohuanu cumaacaraca quijia. Cuno pueyano cuaara tojiyaquishaaria saniniujia.

<sup>39</sup> Naacuajitij cuarta Pueyaso muerasunaa, nia jiaatiare Pueyaso Sohuanu cumaaca nia jiitianura, pueya niquiara nia pohuatanura Pueyaso Sohuanu niishitishano niajaniya. Naajuhuj, majaari nia tenujunu noo pojori, canapute niishishoo rupaacajinia pocuanu paniyani, Pueyaso Sohuanu cumaquishacari nojori. <sup>40</sup> Nareja maninia nia miiriquia puetunujanaa. Naacuajitij, niquiriyatu cuaara pocuaara coteenu, na nuhuaji tamonu, na nuhuaji socua tamonu.

## 15

### *Cristo samiitiasacariuhua*

<sup>1</sup> Cuarta Jesuucua tiuuniaanaa, Jesucristo rupaa nia niishiriohua, tarijia cua pohuatasano niajaniya, nia jiyanooshaanurani. Niaari nocua tiuquiaari maninia. Niaari quiarijia maninia na tojitiaajaa. <sup>2</sup> Naacuajitij, Jesucristoori niaacuaji tacuquiaa quiarijia, maninia nia tojitiasacari na rupaa, taa cua pohuataquiiaari niajanijacujani. Niaacuajaari Pueyaso pueyara jatanishano quiya niaa jaara maja najuhuaana na rupaa

tojiaquiquiaari. <sup>3</sup> Janiyari niaara caminiujuquiaari Jesucristo rupaani, taa cua tojiquiaaricuaani. Nio cutara rupaa nia coteetaquiaari pohuatanunijia: Cristoori pocuara cusoquiaari niyacutesanojinia, sesa pa miiniucua. Tariucuacaanu Pueyaso sequenu panishano caminiujuuniaari naa naajiotasaaquiaari, taa Cristo miishaanutaniya naquiyani. Seetanujuanaa naa miishaaquiaariiri. <sup>4</sup> Jesucristo cusonu nuhuaji, raaco niasaaquiaariiri. Jiuujanaraca juuca jaara na shoconujuquiaari macu na quishacari, na raaco samiitiaquiaariuhuari. Naa tohuateequiaariiri puetunu tariucuacaanu Pueyaso Rupaa-janaa, taa nojuajiniji naajiotasaaquiaaricujani. <sup>5</sup> Na nuhuaji, Jesucristoori Pedroocua muetaquiaariuhua. Na nuhuaji, na jiyaramiquishocoriquiano pueyacua muetaquiaarijiaariuhua. <sup>6</sup> Na nuhuaji, muetaquiaarijuhuaj na tojitianaa rerejosaquiri. Socua quiniento pueyari na niqutiaquiaari jiyacari. Queraatia jiyacari na niquiniaajinijinio pueyari saminio quiyajaa. Noojiaqueyari tari shaajecocanu. <sup>7</sup> Na nuhuaji, pa Jiyaniijaari Santiagoocua muetaquiaarijuhuaj. Na nuhuaji, muetanu pacutequiaariuhua na doce jiyaramiquishocoriquiano pueyacuaari.

<sup>8</sup> Puetunu cuno pojori nuhuaji, Jesucristoori socua cucua muetaquiaarijuhuaj, nocua tiuujia cua quiyaquishacarijia. Naa na paraca cua quishacarijiatej, Jesucristoori cucua muetaquiaari na jiyanooniuria janiya. Ritia cua jiyatequiaariiri na jiyaramiquishano cua quiniuriajuhuaj. <sup>9</sup> ¿Casaaraquitijia na saquiriojoquiaari janiyatejaj, na jiyaramiquishano cua quiniuriajuhuaj? Janiyari puera sesa miijia quiquiaarini cua niishiyaquishacari Jesucristo. Cucua na muetaaquishacarijia, janiyari Pueyaso saquiriojosano pueya miitiaquiaarini. Cuarta Jesucristo jiyaramiquishano pueyari maja naa sesa miijiaca na quituniu quiquiaari. <sup>10</sup> ¡Pueyasoori jiyanoohua maninia! Cua jiyanooquiaariiri Jesucristo jiyaramiquishano cua quiniuriajuhuaj, taa cua quiya quiarjiacuajani. Naa quiyaniija Pueyaso jiyanooniucua janiya. Majaari najuhuana na jiyanooni quiquiaari janiya. Na jiyanooshacari janiya, janiyari socua jiyanoohua nera poonijiocanu cuarta Jesucristo jiyaramiquishano pueyajinijini. Naajaa, maninia cua poonijosanoori maja tama cua miishanojuaaja na quiniu. Pueyasocuaajaari cua cumaquiquiaa na Sohuanuta, maninia cua miiniuria na panishano.

<sup>11</sup> Naacuajitij, na sequeriquiaa nijaniyanijia: cante nia pohuataquiaari Jesucristo rupaani, naajaa. Janiyari Jesucristo rupaa pohuataquiaajaacuhua, mariyata taa cuarta Jesucristo jiyaramiquishano pueya pohuataquiaacuaani. Majaari rimiajata canaa pohuatasano. Niaari cuno rupaacua tiuquiquiaari maninia.

*Pueyaso muerasu macunucua samiitiasacariuhua*

<sup>12</sup> Cuarta Jesuucua tiuuniaanaa, canaa jaara pohuatariquiaa taa Cristo samiitiaquiaariuhua macujinijini, ¿casaara noojiaqueya nijaniyajinijinio sequequiaani: “Macunucua maja na samiitiaconu quiniutianiuhua”? <sup>13</sup> Macunucua jaara samiitianiyaquishaanutaniya taa nia sequequiaacuajani, Jesucristo jiyoteeri macu quiyajaacuhua. ¿Cristoteeri macu quiyajaa? ¡Maja! <sup>14</sup> Cristo jaara macu quiriqiaja, canaa maara najuhuana pohuataa na rupaani. Naajuhua, niaa maara najuhuana Jesucristoocua tiuya, na pueya nia quiniu paniniuria juucua. <sup>15</sup> Canaacuaajaari pohuatanuquiaani Pueyasoori Jesucristo samiitianiyaquishaanutaniya taa nia jiyaniquiaacuajani, canaa jiyoteeri sapojonuujuaca Pueyaso jiyaramiquishano pueyani. Naacuajitij, nia sequesano jaara seetanujuanaa quiri, maja jiyoteeri Pueyaso samiitianiini quiquiaariuhua Jesu. Saniniujia, ¡niaari jiyajeneya cutara! ¡Pueyasocuaajaari seetanujuanaa Jesu samiitianiyaquishaanutaniya taa nia sequequiaacuajani, Cristo maara samiitaaquiquiaariuhua. <sup>16</sup> Macunucua jaara samiitianiyaquishaanutaniya taa nia sequequiaacuajani, Cristo maara samiitaaquiquiaariuhua. <sup>17</sup> Cristo jaara samiitaaquiquiaari, niaa jiyoteeri Cristocua tiuya najuhuanaj, Pueyaso na jiyanootiniuria juucua nijaniya. ¿Macuteeri na naata pocuaji tacunu? Maja na naata. Niaa jiyoteeri jiyanooshoojua quiya. Sesa nia miishano jiyoteeri tuujusoojua quiyajuhua. ¿Naatejatej? <sup>18</sup> Cristo jaara macu quiriqiaja, tariucua shaajecono nocua tiunaa pueya maara taraatia quiriqiaj. Nojori maara taraatia shaajecanu puetunurajanaa, maja quenaaja nojori samiitiaconuhua. <sup>19</sup> Pajaniyajuhua, canapete

saminio quiyajaani, paa maara jiyanoehua taraatia quiyani, pueyaracaanu najuhuana naquiya pa miishacari mijiria. Jaara naa quiritij, pa Jiyaniijia Jesucristo jaara macu quiriqiaaja, paa maara najuhuana poonijioriquia pa shuquiritiniuria nojuaja juucuani.

<sup>20</sup> ¡Namitia naa quiyaquiyari! ¡Cristoori seetanujuanaa samiitianishaaquiaariuhua! ¡Canaari na niquitiaquiaarini! Naacuajitij canaari niishiyani Jesucristoori saminio quiyacuaja. Pueyaracaanu saminio quiniutianiyari. Naa pa Jiyaniijia Jesu samiitiasacariuhua coteenu pocuajicuaatej, naacuajitij paari niishiyani puetunu shaajecono nocua tiuuniaajanaari samiitianishaanutaniuhuaajaacuhuj. <sup>21-22</sup> Paacuajaari niishiyani, pa supuetana Adánri coteenujuanaa shaajequiaari, Pueyaso na tojiyaquiniuucua. Naacuajitij, puetunu nojuajiniji supuenaajanaari shaajecoquiaajuhuj. Adán nuhuaji, parta pueyano Jesucristoori saniniuujia Pueyaso tojijia quiquiaari cutara. Naacuajitij, nojuajaari samiitiaquiaariuhua. Naaratej, puetunu nocua tiuuniaajanaari samiitianishaanutaniuhua, pueyaracaanu saminio pa quiniuhuara pa Jiyaniijata. <sup>23</sup> Pa Jiyaniijia Jesucristoori coteenu samiitiaquiaariuhua. Cristo nuhuaji, puetunu nocua tiuuniaajanaari samiitiaconutaniuhua, pa naacuneetoonura nata, na nishacariuhua pocua. Paari naa samiitiaconutaniuhua Pueyaso panishacarini. <sup>24-26</sup> Na nuhuaji, nio jiya puequesacariiri quiniutianiya. Pa Jiyaniijia Jesucristoori mijiria tiuquiniutianiuhua, na tucuatenuhuara puetunu na Que panishanojuanaa. Na Queeri na jiyaronutaniya puetunu na paraajanaa na puecoonura. Jesucristoori Jiyaniijiajanaa quiniutianiya, na Que cuara puecoorejaatijia puetunu Neyanu paraajanaa. Jesuuri puetunu mijiria jiyaniijianucua quejoonutaniyajanaa, mariyata puetunu jiya cajiniocua cumaacaraca quijiacajanaanio. Sesaacaari jatasaanutaniyajuhuj, puetunu na seyatajanaa. Majaari tamonu Pueyaso ruuretaja cureenu quiniutianiya quenaaja. Pa Jiyaniijia jatanu nuhuaji puetunu na paraajanaa, jiyacari pueya cusojuana shaajanutaniyajaariuhuj. Majaari cusonu niishishaanu quiniutianiya socua, shaajenunio. Puetunu casaajanaa jaara maninia jiitiasano quiriouhua, Jesucristoori na Que na niquitionutaniuhua, na Que jiitianuhua puetunujuanaa.

<sup>27</sup> Na Que Pueyasoori Jesu jiyatequiaari Jiyaniijia na quiniuria jiyanoehua na cumaacata. Naacuajitij, nojuajaari na naata puetunu casaajanaa na tojtianiniu. Nojuajaari Jiyaniijiajanaa. Saa na Que Pueyasojuuari socua Jiyaniijiajanaa, maja tamonu. Pueyasojuanaari Neyanu jiyaroquiaari puetunu na shipinishanojuanaa na jeenucuanura na cumaacata. <sup>28</sup> Na tucuatascari, pa Jiyaniijia Jesucristoori na Que sequenutaniya: “Cua Quena, tari tucuatere quia panishanonijia. Puetunu quia paraajanaa quejoore tarinijia. Majaari socua sesa na miiniu quiniutianiya. Saa quijaniyajaari pueyaracaanu Jiyaniijiajanaa quiniutianiya cutara, maja socua tamonu”. Naacuajitij, pa Que Pueyasoori Jiyaniijiajanaa quiniutianiya pueyaracaanu, puetunu na shipinishanojuanaa na jiitianura maninia.

<sup>29</sup> Socua nia niishiriojore pueyanaa. Niaa jaara jiyaniyajaa macunucuaari maja na samiitianishaanu quiniutianiuhua, ¿casaara pueya tiuquinijosaaquiaa moojinia macu nitini, cuno macu jaara na shaajeyaquishacarijia Jesucristoocua tiuuri? Paa jaara tiuquinijosaaquiaa Jesucristoocua pa tiuushacarini, paari miriqui miyani taa pa Jiyaniijia Jesucristo miishaaquiaaricuaani. Nojuajaari raaco niasaaquiaari na cusosacari. Na nuhuaji samiitiaquiaariuhuari. Naajuhuj, paari mariyata samiitianishaanutaniuhuari. Niaari sequeya macunucuaari maja na samiitianishaanu quiniutianiuhua. ¿Naatejaaratej? Macunucua jaara samiitianijiyaquishaanutaniuhua taa nia jiyaniyacujani, ¿casaara pueya tiuquinijosaaquiaa shusha shaajeno macu niticuaraarini?

<sup>30</sup> Paa jaara samiitianiyaquishaanutaniyani taa nia sequequiaacuajani, canaquiiri najuhuana tama canaa cuaqueyajaaja panitiaquiaani, pueyaracaanu canaa poonijosacari pa Jiyaniijia. <sup>31</sup> Seetanujuanaa nia sequeyanijia, janiyari jiyanoehua shuquiriaatia quiyani, Jesucristoocua nia tiuushacari, cua pohuatanuucua na rupaa nijaniya. Seetanujuanaajaariuhuj, pueyari cua monu paniquiaa pueyaracaanuni, maja socua cua pohuatanura Jesujiniji. Naajaa, janiyari tama cua cuaqueyajaaja panitiaquiaa puetunu juucajanaani, cua niishishacari janiyari samiitianishaanutaniuhuari. <sup>32</sup> Pa Jiyaniijia jaara macu quiya taa nia sequequiaacuajani, janiyaqui najuhuana Jesucristo rupaacuaji

tacuriquiaani nio sesaaca pueya tajinia cua quishacari niya Éfeso tiacajiniani. Nojoriiri juhua puereeta sayoru quiriqiaa cucuaji. Janiyaqui najuhuana Jesucristo shuquiritiriqiaa juucuanu, nojuaja jaara samiitianiyaquishaaquiaariuhua. Paa jaara samiitianiyaquishaanutaniyani, pa miiriqui taa Pueyaso tojiyashijiaca sequequiaacuajani: “Pa shuquiriri saminio pa quishacarija. Pa queranacunuure. Pa mashaasequenuurejuhuaj. Naajaa, pa shaajesacari, pocua puetunu shaajequeejanaani”. Naa sesa miiquioquiaari noo pojori, canapuete jiyaniyani macunucuaari maja na samiitianishaanu quiniutianiya.

<sup>33</sup> Pueyanaa, tama nia cuaqueyajaaja nia cojuare, niaa mariqui sapojosaareeri naa sesa nia niishiriojonurajuhuj. Tamonu pueyanoori naa sequequiaari seetanujuanaatej: “Maninia miijaari sesa miijara jatanishaaree na cojiniucua sesa miijica”. Naaratej, majaari nia cojiniu sesoriquia pueya, niaa mariqui seserejaariuhuj. <sup>34</sup> Niishiriojojuara nia quiri. Sesa nia miiniu nia cartere. Noojiaqueya niajanijiniinooori Pueyaso niishiyashijiaca quiyajaa. Naa nia sequereenijia pueyanaa, quenaaja nia caririqiniuria.

*Taamueca pa quiniutianiuhuanu pa samiitiasacariuhua*

<sup>35</sup> Tamonu niajanijiniinio naasucuaari niishiriojiya: “¿Taa macunucua samiitiani-jiosaanutaniuhuaaarani? ¿Taamuecate na cuaqueya quiniutianiyani?” <sup>36</sup> Maninia nia niishiriojore pueyanaa. Maja niishiyashijia nia quiniu. ¿Majateeri nia jamosano naana jajau co moquenu, neyona moritianura? Naacuaaquinatejaj. Saa na co moquesacarija na naata moritianu. <sup>37</sup> Naajuhuj, niaa jaara saaco natate, tamaatia jajajuhuj, nia natasano jajauri maja juhua neyonarano niquishano. Nia natasanoori saaja shiitianiyojua jajau quiya. Na moritiasacari, jiyanoohua tamaatia niquishiyari. <sup>38</sup> Pueyasoori na maashitiya puetunu na jaamasucatajanaa, taa na paniyacuajani. Pueyasoori puetunu jajajanaa moritianiija tamaatia niquishano na quiniuria. Naa quiniutianiyaariuhua macunucua samiitiasacariuhua. Majaari pa cuaqueya quiniutianiya taa na quiya quiarijiacuajani. ¡Pa cuaqueyari jiyanoohua maninia quiniutianiuhua!

<sup>39</sup> Majaari puetunu cuaqueyaraca casaajanaa mariyata na quiniu. Naacujitij, pueyano cuaqueyari tamaatia quiya casa cuaqueyajiniji. Shuhua cuaqueyari tamaatia quiyajuhuj. Sapitiaaja cuaqueyari tamaatia quiyajuhuj, moojinia na quiniuria. <sup>40</sup> Jiyocuaaanu quijiacaari tamaatia cuaqueyaraca, maja juhua mijiria quiniaa cuaqueya. Pueyaso seya cuaqueyari shanohua niquishano. Nojori cuaqueyari tamaatia niquishano mijiria quiniaa cuaqueyajiniji. <sup>41</sup> Naajuhuj, pananuuri jiyanoohua shacantuuca quiija. Raca shacantuucaari tamaatia niquishano pananu shacantuucujiniji. Riya shacantuucaari socua tamaatia niquishano. Naajuhuj, puetunu riyajanaari tamaatia niquishano narta riyajiniji. Puetunu Pueyaso shipinishanojuanaari naa tamaatia quiya.

<sup>42</sup> Naajuhuj, Pueyaso muerasuuri samiitianishaanutaniya tamaatia cuaqueyata. Moquejacaari jamojosaanutaniya. Moqueyashijiacaari saniniuuja samiitianishaanutaniuhua, pueyaracaanu na quiniuria. <sup>43</sup> Jamosano pa quete sequeeri samiitianishaanutaniuhua, jiyanoohua shanohua niquishano na quiniuria. Cumaacaaju jamosanoori samiitianishaanutaniuhua jiyanoohua cumaacaraca na quiniuria. <sup>44</sup> Pa cuaqueya jamosanoori saaja jiyacua rucanejaca quiquiaari. Paari samiitianishaanutaniuhuanu tamaatia cuaqueyata, jiyocuaaanu quijiaca pa quiniuria. Naaratej, Pueyaso jaara maninia cuaqueya shipiniquiaari pajaniyara, mijiria pa rucanejonura, ¿majateeri Pueyaso niishiniu tamaatia cuaqueya shipininiu na muerasura, na shuriucua pa quiniuria? Taaquiririniji.

<sup>45</sup> Pueyasoori coteenu pa supuetana shipiniquiaari marajiniji. Na nuhuaji, na samiitianiyaariiri. Moisés Naajioneejiniaari naa naajiotasaaquiaaritij: “Adánri saminiora quiquiaari Pueyaso nooshacari na jiquioco”. Jesucristoori saniniuuja jiyatesaaquiaari juhua pa supuetanara na quiniuria pa supuetana Adán niti. ¡Jesucristoori jiyanoohua socua cutara Adánjiniji! Adánri samiitianishaquiaari saminio na quiniuria. Jesucristo cutaraari pa samiitianijajanaa na Sohuanuta. <sup>46</sup> Coteenujanaa pa supuetanani, majaari na shipinishaanu quiquiaari jiyocuaaanu quijarano. Cunora, coteenu pa cuaqueyari saaja mijiria quiijara. Na

nuhuaji, pa cuaqueyari jiyocuacaanu quijiara jatanishaanutaniya mariyata juhua Jesucristo cuaqueyara. <sup>47</sup> Adánri saaja mijiria quiriquiano quiquiaari. Marajiniji shipinishaaquiariiri. Jesucristoori saniniuujia jiyocuacaanujinio. <sup>48</sup> Puetunu Adán cuajinino supuenojuanaari saaja mijiria quijiaca. Naaratej, puetunu pajaniyajanaari saaja cusonuujucani, juhua pa supuetana Adánjuhuj. Jesucristo muerasuuri saniniuujia juhua pa Jiyaniijia Jesucristo quiniutianiya, jiyocuacaanu quijiaca pa quiniuria. <sup>49</sup> Mijiria pa quishacari, pa cuaqueyari juhua pa supuetana Adán cuaqueya quiya, marajiniji shipinishano. Majaari pa cuaqueya quiarijia socua maninia Adán cuaqueyajiniji. Pa samiitiasacarihua, pa cuaqueya cutaraari quiniutianiya mariyata juhua cuno jiyocuacaanu Quijia cuaqueya. Nojuacuajaari pa samiitianinia Jesucristo.

<sup>50</sup> Cuarta Pueyaso muerasunaa, maja pa naata Pueyaso rupueno nio pa cuaqueyataja. Pa rishiyashijia cuaqueyari maja na naata cuno pueyaracaanu Quijia rupueno. <sup>51</sup> Naajaa, cua tojitiare. Nia pohuatareera pueya niishishoo. Majaari puetunu pajaniyajanaa cusonuuriqianoni. Puetunu pa cuaqueyajanaa cutaraari jatanishaanutaniyani, maninia cuaqueya pa jiitianura, juhua Jesucristo cuaqueyajuhuj. <sup>52</sup> Jiyocuacaanuji trompeta jonesacari, pa cuaqueyari ritia jatanishaanutaniya, naatej, taa pa nimishiniuquiya ritiacuaani. Pa Jiyaniijia naacuneetoonu panishacari pajaniyata, Pueyaso trompetaari tojishaanutaniya joneseshiyano, na muerasu na jiiquioonura. Canapuate macu quiyani, quiarinio cuaqueyata ritia samiitianutaniuhuari. Pajaniyajuhuj, canapuate saminio quiyajaani, pa cuaqueyari ritia jatanishaanutaniyajuhuj, quiarinio cuaqueya pa jiitianurajuhuj, shaajeyashijiaca pa quiniuria. <sup>53</sup> Cusonuujua cuaqueya cuara jatanishaaria, rishijia cuaqueya pa jiitianura saniniuujia. Nio moqueja pa cuaqueyani, jataniniu panishiyari, maninia cuaqueya pa jiitianura, pueyaracaanu pa quiniuria Pueyasota.

<sup>54</sup> Moqueja pa cuaqueya jaara maninia cuaqueyara jatanishaarohua; pa rishiyashijia cuaqueya jaara rishijia cuaqueyara jatanishaarohua; jiyacaritij pocua niishirini tariucuacaanu sequesanoori tari tohuateeree. Naa naajiotasaaquiari tariucuacaanu Pueyaso Rupaajiniatej:

“¡Jejeel! ¡Pa Jiyaniijiaari na muerasu mashiquirii macunucua quiquiojiniji!

<sup>55</sup> Cusojuananaa, ¡quiaaqui tari shocotasaaree! ¡Quiaari shocotasaaree! Sesaacanaa, quia cusojutajaari juhua mohuacara quiquii cumaacaaju. ¡Shaajeconoori samiitiacoree!”

<sup>56</sup> Pueyanaa, puetunu pajaniyajanaari cusonuquiaa sesa miijiaca pa quiniucua mijiriani. Paari sesa quiquiaani pa tojiyaquishacari tariucuacaanu Moisés Rootasano Pueyasojiniji. Naaratej, puetunu pueyajanaari cusonu niishiya. <sup>57</sup> Naajaa, pa Jiyaniijia Jesucristo miishanota pocuara, Pueyasoori pa mashiquiquiaa pa cusoyaquiniucuaaji. Naaratej, paari Pueyaso sequequiaani: “¡Paacarasho canaa Pueyasonaa! Quiaacuajaari canaa shocotaniniutianiya cusonu, quia Niyanu cusonuucua canacuara, pueyaracaanu canaa quiniuria quia shuriucua. ¡Jiyanohua paacarasho!” Paari naa maniniuhuaqueetaa pa Que Pueyasoni.

<sup>58</sup> Naaratej cua panishano pueyanaa, nia numaama nia racatare cua niishitiojosano nijaniya. Saa Pueyaso rupaaja nia tojitiare, maja tamaatia niishitiojosano. Pa Jiyaniijia nia poonijiore socua jiyanohua, na panishano nia miiniuria saaja. Pa Jiyaniijia nia poonijosanoori maja najuhuaana na quiniu.

## 16

### *Casamijiuniucua Pueyaso pueyara cumaneeca reratesacari*

<sup>1</sup> Quiarijiani, nia riucuaareera taa nia miiniutianiyani, cumaneeca nia reratenura casamijiuniucuaara. Cuno cumaneecani, paari na jiyaronutaniya parta Pueyaso muerasura Jerusalén tiacajiniani. Naa cuara maninia miiria, mariyata taa cua rootacanucuaaji Pueyaso pueya maapue Galacia jiyajiniani. <sup>2</sup> Naa nia miiritij. Puetunu domingo juucajanaa, puetunu pueyajanaa cuara racataara tama na niqutiosocoriquiano cumaneeca, teyano nia niqutionutaniya niarta Pueyaso muerasuracujani. Naa nia racatare



juhuataja nia niqutiosocoriquiano cumaneeca puetunu semaanajanaa, maja na rerate-saanura shusha cua tiuquishacari niaacua. <sup>3</sup> Niocua maninia pueya saquiriojore, nia niqutiojosano cumaneeca nojori patanura Jerusalén tiacajinia. Naacuajitij, cua tiuquishacari niaacua, janiyari cua naajioneeca jiyarotanutaniya nojorini. Naajioreera parta Jesuucua tiuuniaa pueyacuara Jerusalén tiacajinia, nojori cuaara shuquiriaatia maseera cumaneecata nia jiyarotasano pueya. <sup>4</sup> Janiya jaara Jerusalén tiacajinia quianu panirini, cumaneeca jiyatanaari na naata cuata quianujuhuaj.

*Pablo naquerejosacari*

<sup>5</sup> Cua quiasacari niaacua, janiyari Macedonia jiya tajiniu paniyani. Na nuhuaji, janiyari niaacua tiuquiniutianiya. <sup>6-7</sup> Janiyari maja ritia cua tajiniu paniniu nijaniya. Niaata camueenujunu paniya pueyaracaanunijia, pa Jiyaniijia jaara naa paniyajuahuaj. Janiyari shuniya shocotenu paniya niaatani. Na nuhuaji, nia naata cua naacunu cua jiitianura cua panishano, cua pasocoriquiano tee Pueyaso jiyaronu paniya janiyacujani. <sup>8-9</sup> Janiyari niya Éfeso tiacajinia camueenujiyajaarani, Pentecostés juuca cua sashishacari. Queraatia pueyari Jesucristo rupaa tojitianu paniya niya. Naajuhuj, queraatia pueyari Jesucristo rupaa ruuretaa saniniuujia. Naaratej, janiyari jiyanojua socua Jesucristo rupaa pohuatenu paniyajaa Éfeso pueya niquliarani. Naajaa, janiyari niaacua quianutaniyani Pentecostés juucara queranacunuunu nuhuaji.

<sup>10</sup> Timoteo jaara niaacua tiuquishii, niocua na cumaquiri Pueyaso rupaa na pohuatenu na puereyaquiniutia. Timoteocujaaari pa Jiyaniijiaara poonijioquiaa mariyata taa cua poonijioquiaacuaani. <sup>11</sup> Naaratej, maja Timoteo nia rerequetenu. Niocua na naacure saniniuujia, cucua na tiuquiniuhuaa shuquiriaatia, maninia nia miiniucua nera. Janiyari niya na sashiya parta Pueyaso muerasutani. <sup>12</sup> Janiyari Apolota pocoojoriquiaani. Janiyacuajaari na nenecojoriquiaa juucuan, niaacua na quianura parta Pueyaso muerasuta quiarijiani. Nojuajaari saaja cua sequeree majana na quianu paniniu quiarijiani. Tamacari niaacua quianutaniyaquiniiaari, jaara na naata quiri.

*Pablo sequesano, naajionu na puecasacari*

<sup>13</sup> Cuarta Jesuucua tiuuniaanaa, niishiriojojuaca nia quiri. Jesucristo rupaa nia niishiri maninia, seetanujuanaa na tojitianaara nia quiniuria. Juhua cumueeca mashaja nia quiri Pueyaso Sohuanu cumaacata, pa Jiyaniijia panishano nia miiniuria. <sup>14</sup> Puetunu nia miishanojuanaa cuaara quiiria seetanujuanaa nia paniniutia.

<sup>15</sup> Pueyanaa, niaari niishiya Estéfanasri necohuata coteenu Jesucristo tojitianaara quiquiaari cuniqui Acaya jiyajiniani. Nojoriiri Pueyaso muerasu naacuquiaa pueyara-caanu nojori paniniutia. <sup>16</sup> Naarate nia sequenu paniyanijia, nijaniya cuaara quiiria juhua nojori seya, nia cumaquiniuria nojori, maninia nojori miishacari. Naa nia cumaquiriti puetunu jiyano pueyajanaa, noo pojori canapüete naa maninia miiquiaa Pueyaso muerasucujani.

<sup>17</sup> Jiyanojua shuquiririucuaanijia Estéfanas tiuquishacari nijaniyajiniji Fortunatota, Acaicotajuhuj. Nojoriiri cua shuquiriritiucuaa nia niti, cua jiaatiasacari cua niquniuria nijaniya juucua. <sup>18</sup> Nojoriiri coojia cajitiriucuaa puera cua niishiriojiyaquiniucujaji niaacua. Nojori naasucuaari nioojia cajitiquianujuhuaj, nojori pohuatasacari nijaniya janiyajiniji. Nijaniya cuaara shuquiritiaara nojori, naa nojori miishacari maninatej.

<sup>19</sup> Pueyaso muerasu maapue niya Asia jiyajiniaari cua sequerucuaa, cua saruhuatenua nijaniya. Aquila, Priscilano, nojoriiri jiyanojua nia saruhuataajuhuj, narta Jiyaniijia muerasu nia quiniucujahuaj. Pueyaso pueya maanuuri nia saruhuataajuhuj, nooj, teyanote Aquila tiajinia rerejoquiaacujani. <sup>20</sup> Puetunu parta Pueyaso muerasujuaari niya nia saruhuataajuhuj. Nia saruhuatatoosacari, nia saruhuatatoore seetanujuanaa Pueyaso paniniutia.

<sup>21</sup> Quiarijiani, tama cua juaashiquiatajaaja saaja nioniyojua naajioreeraj, cua saruhuatenua nijaniya. Naacuajitij, niocua niishiri nio naajioneeri seetanujuanaa janiyajiniji.

<sup>22</sup> Cante maja pa Jiyaniijia panijia quiyani, Pueyaso cuaara jataara cuno, saniitiosocoriquiano.

¡Jiyaniijanaa, quia nimiohua!

<sup>23</sup> Pa Jiyaniijia Jesu cuaara cumaquiiria nijaniya na Sohuanuta. <sup>24</sup> Janiyari puetunu nijaniyajanaa paniyani Jesucristo paniniutia. Tariucuaja, cua panishano pueyanaa.

## TANEE PABLO NAAJIONEE CORINTO TIACAJINIA QUINIAA PUEYASO PUEYACUARA

### *Pablo saruhuatasacari Pueyaso pueya maanu Corinto tiacajinia*

<sup>1</sup> Janiyari Pabloni. Pueyaso panishacari, janiyari Jesucristo jiyaramiquishanora jiyatesaaquiaari na rupaa cua poojotanurani. Janiyari Timoteota naajiya nio ni-aacuarani. Nojuajaari parta Pueyaso pueyano. Canaari Corinto tiacajinia quiniaa Pueyaso pueya maanuucuaara naajiyani, puetunu Acaya jiyajinia Pueyaso tojitiajaca pueyacuarajanaanio. <sup>2</sup> Pa Que Pueyaso, mariyata pa Jiyaniijia Jesucristo cuara cumaquiria niajaniya. Nojori cuara jiyateera niajaniya juhuajaniya quijiaca nia quiniuria.

### *Pablo miishacari naquiya*

<sup>3</sup> Pa Jiyaniijia Jesucristo Que pa shuquiritiare. Nojuajaari pa Quejuhuaj, pocua taraajeja cutara. Nojuajaari pa Pueyaso, pueyaracaanu pa cumanijiana. <sup>4</sup> Nojuajaari pueyara-caanu pa cumanijiaquiaa naquiya pa miishacari. Naacuajiti pa naata cumanijianu tamasaajuhuj, naquiya nojori miishacari, taa Pueyaso cumanijiaquiaa pajaniyacuaani. <sup>5</sup> Seetanujuanaa, Cristo rupuejaca pa quishacari, paari naquiya miishaaquiaajuhuj, taa naquiya na miishaaquiaaricuaani. Naajaa, nojuajaari pa cumanijiaquiaa shuquiriaatia pa quiniuria. <sup>6</sup> Naacuajitij, canaa jaara naquiya miishaaquiaa Cristojiniji canaa pohuatanu-ucuaani, Pueyasoori canaa cumaquiquiaa saaja canaa rejeretanura. Naacuajitij, majaari canaa tarinitianu Pueyaso Rupaa pohuatanu nia niqiuara, seetanujuanaa Pueyaso pueya nia quiniuria, nia cumanijiasaanurajuhuj. Naajuhuj, Pueyaso jaara canaa cumanijiare-cuaa, naacuajitij, canaa naata nia cumanijianujuhuj. Canaari nia cumanijiaani, maninia rejeretajaca nia quiniuria naquiya nia miishacari, taa canaa rejeretaquiaacuaani naquiya canaa miishacari. <sup>7</sup> Canaari seetanujuanaa niaacua tiuyani, niaari cumanijiasaanutaniya, maninia rejeretajaca nia quiniuria. Niaari naquiya miiquiaa Pueyaso muerasu nia quiniuucuaajuhuj, taa canaa miiquiaa naquiyacuaani. Naacuajitij, Pueyasoori nia cumanijanutaniyajuhuj, taa na cumanijiaquiaa canaacuaani.

<sup>8</sup> Canaa panishano Pueyaso pueyanaa, canaari paniyani nia niishiniuria taa canaa tacaquianuni, jyanohua naquiya canaa miishacari Asia jiyajinia. Canaari puera jyanohua taraatia miiquianuni. Jiyacari, majaari tari canaa jiitianu quiriquiaa cumaaca canaa rejeretanura socua. Canaari jyaniriquiaani maja naasucua tari canaa rishiniu quiniutianiya. <sup>9</sup> Seetanujuanaa, canaari jyanijiani Pueyaso naasucuaari nareja canaa shanacunutaniya canaa cusonuunura. Naajaa, naacuajitij, Pueyasoori jiyacari canaa niishitiriquiaa maja canaa tiuuniuria tama canacuajaaja, saaja nocua canaa tiuuniuria cutara. Nojuacuajaari macunucua samiitianijiojua. <sup>10</sup> Nojuajaari canaacua taraajecanu. Cocuaatia canaa miishacari, canaa cojuacanuuri maja canaa cusonuunura. Nojuacuajaari socua canaa cojuanutaniya nocua canaa tiuuniuucua, niaa jaara canacuara secorejuhuj. <sup>11</sup> Naacuajitij, Pueyaso miishacari maninia canaa, queraatia pueya secjonu-ucua canaacuarajuhuj, queraatia pueyari Pueyaso sequenutaniya, “paacarasho”.

### *Pablo pohuatasano casaara na quiaaquiquiaari Corinto pueyacuani*

<sup>12</sup> Canaari shuquiriaatia quiyani canaa niishishacari canaari maninia quijiaca quiquiaari canaa quishacari niaatani, Pueyaso niishiyashijiaca niqiuarianio. Majaari canaa sapojonu quijia niajaniya. Canaari seetanujuanaa niaacua taraajejani Pueyaso jiy-atenuucua canaa nia panijia canaa quiniuria. Canaari naa maninia quiquiaari niaatani, saaja Pueyaso cumaquishacari canaa, maja tama canaa niishitiajataaja. <sup>13</sup> Cunora, janiyari nia nequesotaani, ¿casaara nia cushitiiquianu canaa naajionee nia serojosacarini? Puetunu canaa naajioneecajiniajanaa majaari canaa naajionu quiquiaa jiyajeneta casaa, nia cushitiiniuria. Puetunujuaacuajaari maatia niishishaatia quiquiaa nia serojosocoriquiano. <sup>14</sup> Niacuajaari tari secaja niishiya taa canaa paniya jyanohua niajaniyani.

Pa Jiyaniijia Jesucristo tiuquishacariuhua, niari jiyacari seetanujuanaa canaa timitianutaniya, maatia nia niishishacari canaari seetanujuanaa nia panijiaca quiquiaarini. Naajuhuj, nijaniyari canaa timitiasano quiniutianiyajuhuj.

<sup>15-16</sup> Cua jiyaniishacari niaa naasucuaari seetanujuanaa cua panijiaca, taa cua paniquiaa nijaniyacuaani, janiyari cunora naquerejocanu niaacua juucuanu. Niiquiji cua quiasacari Macedonia jiyajiniara, janiyari nia niqiniu paniriquiaa juucua nia tiacajiniani. Janiyari Pueyaso rupaata nia cumaquiniu paniriquiaa juucua cunoco cua tajishacarini. Naacuajitij, janiyari niishiriojoriquiaani cua naata naasucua nia shuquiritiniu Pueyaso rupaata, cua quiasacari Macedonia jiyajiniara, naajuhuj, cua tacatesacariuhua cunocojiuhua. Janiyari niishiriojoriquiaani nia naata naasucua cua naacunu cua panishanotajuhuj, Judea jiyajinia cua quianuhua. <sup>17</sup> ¿Niaateeri jiyaniquianu janiyari nareya nia sequecanuni, naa cua sequesacari coteenujuanaa cua naajiojiniatej? ¿Niaateeri jiyaniya, naa cua naquerejosacaritij, janiyari tama cua panishanojuaaja miiniu paniquianuni, maja Pueyaso panishano? Seetanujuanaa, majaari coojia cua niqijiotenu quiquianu naa cua sequesacari nijaniyatej. <sup>18</sup> ¿Janiyateeri coojia niqijiotejani? Maja. Canaa pohuatasacari Pueyaso rupaa nia niquiara, ¿canaateeri na jataniquiaani? Pueyasocuaajaari niishiya, na rupaa canaa pohuatasacari, majaari canaa jataniniu quiquiaa. Pueyaso rupaacuajaari seetanujuanaa. <sup>19</sup> Naajuhuj, Neyanu Jesucristoori jataashijia. Silvano, Timoteo, janiyajuhuj, canaari nojuajiniji nia niquiara pohuatanaani. Paari nojuajiniji niishiyani puetunu Pueyaso sequesanojuanaari seetanu rupaajanaa cutara. <sup>20</sup> Jesucristocuaajaari tari tohuateequiaari puetunu tariucuaaanu Pueyaso sequesanojuanaa pajaniyara. Naacuajitij, pa tiuushacari Jesucristoocua, paari niishiyani, Pueyaso sequesanoori seetanujuanaa. Naaratej, pa shuquiritiasacari Pueyaso, paari na sequequiaani: “Seetanujuanaari canaa quia sequesano, Pueyasonaa”. <sup>21</sup> Jesucristo rupuejaca pa quishacari, Pueyasocuaajaari pa cumaquiquiaa, socua maninia na tojijiaca canaa quiniuria, nijaniyajuhuj. Pueyasoori pa niqitioquiaari na Sohuanu, seetanujuanaa na muerasu pa quiniuria. <sup>22</sup> Pueyaso Sohuanu pa jiitiasacari poojiajinia, naacuajitij, paari tari Pueyaso sesa jiitiaa juhua naajiotasano poojiajiniani, saa neraja pa quiniuria. Na Sohuanu pa jiitiasacari poojiajinia, paari niishiyani, paari puetunu na sequesanojuanaa maseriquianoni.

<sup>23</sup> Niaari cua jiyaniquianu janiyari najuhua coojia niqijiotejani, niaacua cua quiaaquiniucua taa cua sequecanu coteenu nijaniyacujani. Pueyasocuaajaari niishiya, majaari cua quianu quiquianu niaacua Corinto tiacajinia, maja cua tacaatiniuria nijaniya, janiya jaara nia nacasusee jiyanoahuani. <sup>24</sup> Canaari maja nia jiyaniijiani canaa shiniujiuniuria puera nijaniya, Jesuucua nia tiuuniuria. Niaacuajaari tari maninia Jesuucua tiuujiaa. Canaari saaja niarta Pueyaso pueyani, canaa cumaquiniuria nijaniya, socua pa Jiyaniijia tojijiaca nia quiniuria, seetanujuanaa shuquiriaatia quijiaca nia quiniuria.

## 2

<sup>1</sup> Janiyari tama sequecanujuaanijia, maja juhuari niaacua cua quianu quiniutianiya, maja cua taraajetenura nijaniya. <sup>2</sup> Janiya jaara nia taraajetere cua nacasusacari nijaniyani, ¿cantucua cua timitiri quenaajani? ¿Cua taraajetesano pueyateeri cua shuquiritiniutianiya? Maja. <sup>3</sup> Naaratej, janiyari niaacuara naajiocanuni, cua nacasunura juhuacarijia nijaniya, cua taraajeyaquiniuria niaacua cua tiuquishacari. Janiya jaara sashiri cua nacasunura nijaniya cua tiuquishacari niaacuani, janiya maara jiyanohua nia taraajetereni, jeecatoojua nia quishacari. Saniniuujia, niaa jaara juhuacarijia jeecare puetunu sesa nia miishanojuanaa, naacuajitij, cua tiuquishacari niaacua, niari cua cojiniutianiya maninia, shuquiriaatia pa quiniuria jatiqui. <sup>4</sup> Janiya jaara niaacuara naajiocanu coteenu cua naajioneeni, janiyari jiyacari jiyanohua tacaariquiaa niaacuani. Coojiaari jiyanohua taraajeriquiaa. Janiyari jiyacari nujuqueriquiaaaniuhuj. Majaari cua naajionu quiquianu cuno naajionee cua taraajonura nijaniya. Cunoori seetanujuanaa quiquianu cutara cua niishitiniuria nijaniya, taa cua paniya jiyanohua nijaniyani.

*Cuno sesa miijia cuaara jiyanooshaaria jaara tari pishirii sesa na miiniujiniji*

<sup>5</sup> Cuno sesa miijiaari maja na taraajetenu quiquianu saa janiyaja. Quera puetunu nijaniyajanaa naasucuaari taraajecanu cuno pueyano miiniuucua sesa. Seetanujuanaa, majaari puetunu nijaniyajanaa taraajenu quiquianu. Janiya jaara sequereni: “Puetunu nijaniyajanaari taraajecanu”, janiya maara puera na maateyani. <sup>6</sup> Puetunu nijaniyajanaa jiyatenuucua nojuaja saniitiosano na quiniuria, nojuajaari tari noojia tacatorohua sesa na miiniujiniji. Tariucujaja. Majaari socua na saniitionu. <sup>7</sup> Quiarijiani nojuaja nia jiyanoorohua. Nia cumanijarohua, nojuaja mariqui puera tacaariiri jiyanoohua na taraajesacari. <sup>8</sup> Nocujaji janiyari jiyanoohua nia rootaani, maninia nia miiriohua cuno pueyano, na niishiniuria niaaqui na paniyajaa. <sup>9</sup> Janiyacuajaari cunora niaacuara naajiocanu tarini, taa nia miiniutianiya cuno pueyanoni, cua niishiniuria niaate seetanujuanaa pa Jiyaniijajiniji cua rootasano tojitiyajaca. <sup>10</sup> Cua tojitiare, cana nia jiyanooriicuaani, janiyari na jiyanooyajuhuj. Naacuajitij, pueyano jaara sesa miiriquia, janiyari Cristo niqiuara na jiyanooquiaajuhuj, jatiqiu nia quiniuhua. <sup>11</sup> Naaratej, niarta Pueyaso pueya nia jiyanooriquia, Sesaaca mariqui pocua riutiocoreeri, juaajara na jiyatenura pajaniya, pa jiyanootiyoaquinuucua. Paacuajaari maninia niishiyani taa Sesaaca niishiriojoquiaa sesa miijiacara na jiyatenura pajaniyani, paa jaara jiyanooyashijia quiriqiuani.

*Pablo tacaashacari Troas tiacajinia na quishacari*

<sup>12</sup> Janiya jaara Troas tiacajinia tiuquiquianu Jesujiniji cua pohuatanurani, cuno pueyari jiyanoohua tojitanu paniriquiaa Jesujiniji cua pohuatanura juucua. Jiyacaritij, seetanujuanaa nojori niqiuara pohuatasatia quiriqiuari. Pa Jiyaniijia Jesuuri juhua tiotiu riatacanu cucujaji juucua, cua pohuatanura nojuajiniji tii. <sup>13</sup> Janiyari saaja nojori tujiacanuhuanu puera cua tacaashacari, cua riuriataaquinuucua pa tarajanu Tito. Janiyari juucua paniriquiaani cua pohuatasaanura nijaniyajiniji. Janiyari cunora tacaariquiaa jiyanohuanu. Naaratej, janiyari Macedonia jiyajinia quiaarohuanu, Tito cua pajenuhuara tii.

*Pa Jiyaniijia Cristoori pa paraa pa shocotanjia*

<sup>14</sup> Janiyari jiyanoohua shuquiritiaa Pueyasoni. Nojuajaari pueyaracaanu pa shocotaniquiaa pa paraca seque, pueyaracaanu pa sacuanuucua pa Jiyaniijia Cristoocua. Pueyasoori na rupaa pohuataniquiaa canaa. Naacuajitij, canaa niishishano Jesucristojinijiiri juhua shanohua jaanutaja jaanujuquiaa pueya tajinia puetunu tiqiyocuajanaa. <sup>15</sup> Pueyasora, canaari juhua shanohua jaanutajani, Cristo quishacari canaa jiuujiajinia. Nojuajiniji canaa pohuatanuusacari, canaari puetunu pueyarajanaa jaanuquiaani: Pueyaso muerasurano, saniitiosaariquiano pueyarano. <sup>16</sup> Saniitiosaariquiano pueyara, Jesucristo rupaari mocuaatia jaanujua saniniuujia. Naa nojori soonuucua Jesucristo rupaatej, nojoriiri shaajasaariquiano cutara. Pueyaso jiyanooshocoriquiano pueyara saniniuujia, Jesucristo rupaari shanohua jaanuquiaa. Naa nojori paniniuucua Jesucristo rupaatej, nojori cutaraari pueyaracaanu quiijiacara jiyatesaanutaniya. ¿Canapueeteri seetanujuanaa Pueyaso jiyaramiquishanoni, na rupaa nojori pohuatanura, pueya na tiuutiniuria Jesucristoocuanu? <sup>17</sup> ¿Noo pojoritii, najuhua Pueyaso rupaa pohuatanuquiaa, pueyajiniji na masejonura cumaneeca na sapojonuunutatej? Maja. Majaari canaa pohuatanu quiquiaa Pueyaso rupaani, pueyajiniji canaa masejonura cumaneeca. Canaa cutaraari seetanujuanaa Pueyaso jiyaramiquishano pueyani, na rupaa canaa pohuatanura. Canaari seetanujuanaa pa Jiyaniijia rupaa pohuataquiaa Pueyaso niqiarani, Cristo rupuesano canaa quishacari.

3

*Quiarinio rupaa Jesucristojiniji*

<sup>1</sup> Naa canaa naajiosacari niaacuaratej, niaa naasucuaari jiyaniya canaari tama canaa cuaqueyajinijiaaja nia pohuatohuanihuaj, canaacua nia tiuuniuria. ¿Niaateeri pa niishishano pueyanojiniji naajionee paniya, canaajiniji na pohuatanura coteenu nijaniya, canaacua nia tiuuniuria cutara? Tamasaca cutaraari naa miiquiaa. Niaacuajaari canaa

niishijiaca cutara. Puetunu tiqiyocuajanaa quijiaca pueyari canaajiniji niishiyacuaja, canaari seetanujuanaa Pueyaso jiyaramiquishano pueyani, na rupaa canaa pohuatanura. Naacuajitij, majaari quenaaja canaa paniniu, canaa nia niqutionura nia naajione, canaa patasocoriquiano, tamasa tiuuniuria canaacua. <sup>2</sup> ¿Naajioneetucua casaara panishaareni? Puetunu pueyajanaari na naata niishiniucuaaja canaari seetanujuanaa Pueyaso jiyaramiquishano pueyani, nojori niishishacari taa canaa paniya jiyanohua niajaniani. <sup>3</sup> Cristocuajaari nioojiajinia naajiotaquiaari na rupaa, nojuajiniji canaa pohuatanuucua nia niquiara. Majaari na rupaa na naajiotanu quiquiaari nioojiajinia minianata. Seetanujuanaa na Sohuanuta na naajiotaquiaariiri. Majaari na naajiotanu quiquiaari saajianeecua. Seetanujuanaa nioojiajiniajanaa naajiotaquiaari na rupaari. Naa jatanishano pueya nia quishacaritij, puetunu pueyajanaari niishiya niaari seetanujuanaa Pueyaso pueya, nojuajiniji canaa pohuatanuucua niajanिया.

<sup>4</sup> Naacuajitij, canaari seetanujuanaa niishiyani canaari Pueyaso jiyaramiquishanoni. Cristocuajaari naa canaa niishitiquiaa maninia. <sup>5</sup> Majaari canaa niishiriojonu canaa miijosanoori tama canaa cumaacata canaa miishanojuaaja. Maja. Canaari saaja Pueyaso cumaacata poonijioquiaani. <sup>6</sup> Na cumaacata, nojuajaari canaa jataniquiaari quiarinio na rupaa pohuataanaa canaa quiniuria. Quiarinio na rupaari seetanujuanaa Pueyaso Sohuanu cumaacaraca cutara, pueya na jataniniuria seetanujuanaa Pueyaso niquiohua nojori quiniuria. Tariucuacaanu, Pueyaso rupaari naajiotasano quiquiaari pueya tojishocoriquiano juucua. Cuno rootasanojiniji, pueyari niishiquiaari nojoriiri shaajeriquiano na numaa shama nojori tojiniuucua saaja. <sup>7</sup> Naajaa, cuno rootasano saajianeecaacua quejasanoni, cunoori jiyanohua maninia quiquiaari. Naacuajitij, Moisés jaara cuno rootasano niishitiojosaariquiaa Sinaí tuhuananuucua, Pueyaso shacantuucaari nocua pacuriquiaa. Naacuajitij, na rosesacariuhua Israel pueyacuaja, na jiquiocoori puera shacantuuca quiquiaariija. Naaratej, narta Israel pueyari maja na naata na jiquioco niquiniu quiquiaari. Na nuhuaji, cuno shacantuucaari jacaria maquesaquiaariuhua. <sup>8</sup> Quiarijiani, Pueyaso Sohuanuuri poonijioquiaa pueya jiuujiajinia saniniuujia, nojori tiuuniuucua canaa pohuatasanoocua. Cunoori socua shanohua shacantuuca cutara Moisés jiquiocojiniji. <sup>9</sup> Moisés pohuatasano Pueyaso rootasano nojuajani, cunoori seetanujuanaa jiyanohua maninia quiquiaari. Naaratej, Moisés jiquiocoori shacantuuca quiquiaari. Naajaa, na pohuatasanojiniji, Israel pueyari saaja niishiquiaari, Pueyasora, nojoriiri sesa miijiaca quiquiaari. Saniniuujia, quiarijaari socua jiyanohua maninia. Canaa pohuatanuucua quiarinio Pueyaso rupaa Jesucristojiniji, pueyari nocua tiuuquiaa seetanujuanaa sesa miyashijiacara nojori jiyatesaanura Pueyasora. <sup>10</sup> Pueyaso jiyatenuucua Moisés tariucuacaanu na rupaa pohuataana na quiniuria, Moisésri shacantuuca jataquiaari. Quiari naataja saniniuujia, Pueyasoori canaa niishitiquiaari socua jiyanohua maninia rupaa canaa pohuatanura Moisés pohuatasanojiniji. <sup>11</sup> Moisés shacantuuca maquesaquiaariuhuanani, cunoori maja na jataniniu quiquiaari Israel pueya. Quiarija saniniuujia, Pueyaso Sohuanu cutaraari pa jataniquiaa seetanujuanaa pueyaracaanu shacantuuca quijiaca pa quiniuria.

<sup>12</sup> Quiarijiani, canaari niishiyani paari pueyaracaanu shacantuuca quijiacarano cutarani. Canaari cunora canaa timiniutia pohuataquiaa Pueyaso rupaa canaa puereyaquiniutiani. <sup>13</sup> Majaari canaa miiniu taa Moisés miiquiaaricuaani. Nojuajaari quenaaruque toqueta na jiquioco mishiquioquiaari narta Israel pueya niquiyaquiniuria na shacantuuca maquesaano. <sup>14</sup> Israel pueya jiuujiaari juhua toqueta mishiquiosano quiquiaarijuhuaj. Cumajiuujiaaca nojori quiniuucua, majaari Israel pueya niishiniu quijia Moisés caminiujiushano nojoriria. Cuarta Israel pueyari naa quiyajaa. Majaari nojori niishiniu quiquiaa nojori serojosacari tariucuacaanu Pueyaso sequesano nojoriria. Cuno, juhua toque nojori jiuujia mishiquioyajaani, cunoori juhuanujuaja tii quiyajaa. Saaja Jesucristo cutaraari na naata pueya jiuujia riatanu, pueya niishiniuria maninia na rupaa cutara. <sup>15</sup> Quiarijaari naajuhuj. Moisés naajioneeca jaara serojosaariquia Israel pueya niquiara, nojori niishitiaari juhua toqueta mishiquiosano quiyajaa, maja nojori

niishiniuria nojori tojishano. <sup>16</sup> Quiarijiani, pueyano jaara pa Jiyaniijiaacua tiuuri, cuno toqueeri juhua na niishitajajiniji jaariutiasaaquiaa, maninia na niishiniuria Pueyaso Rupaa. <sup>17</sup> Pa Jiyaniijiaari Pueyaso Sohuanujuhuanajaj. Pa Jiyaniijia Sohuanu jaara poojiajinia quiya, paari Sesaacajiniji jaariutiasanoni, maja pa camarnu na quiniuria socua. Naajuhujaj, majaari tari poojia quiniu juhua toqueta mishiquiosano. <sup>18</sup> Naacujitij, puetunu pajaniyajanaari juhua niqituu nenecuaquiaani, pa Jiyaniijia shacantuuca pacusacari pocua. Cunoori pa sohuanu rupetoosacari nata. Naacujitij, nojuajaari pueyaracaanu pa jataniquiaa jacaria, socua shacantuuca quijiaca pa quiniuria juhua nojuaja, na Sohuanu poonijosacari poojiajinia.

## 4

<sup>1</sup> Naa pa Jiyaniijia poonijosacari canaa jiuujiajiniatej, majaari canaa pishiniu quiquiaa canaa poonijosacari nera. Pueyaso jiyanoonuucua canaa, nojuajaari canaa jiyatequiaari na rupaa pohuatanaa canaa quiniuria. <sup>2</sup> Majaari canaa miiniu quiquiaa cararaatia casaa, taa tamasa miiquiaacuaa jiyasohuani. Majaari canaa pohuatanu quiquiaa Pueyaso rupaa canaa cuaracashiniutia. Naajuhujaj, canaa pohuatasacari, majaari canaa jataniniu quiquiaa Pueyaso rupaa. Canaari seetanujuanaa maatia pohuataquiaa Pueyaso Rupaani, puetunu pueyajanaa niishiniuria nojoriiri na naata canaacua tiuuniu. <sup>3</sup> Teyano pueyate canaa pohuatasano Jesucristojiniji niishiyaquiyani, cuno pojoriiri shaajasaariquiano. Nojoriiri niishiyaquiya, juhua toqueta mishiquiosano nojori jiuujia quishacari. <sup>4</sup> Pueyaso rupaacua tiuyashijiaa nojori quishacari, nojori jiyaniijia Sesaacaari nojori jiuujia jiyatequiaa juhua cariyjuarura, Pueyaso Rupaa mariqui nojori jiuujia cuhuatereeri. Nojori jaara Pueyaso rupaacua tiuuriquia, nojori maara niishiri, Cristoori seetanujuaana shacantuuca quiija cutara, juhua na Que Pueyasojuhujaj. <sup>5</sup> Canaa pohuatasacari Pueyaso rupaa nijaniya, majaari tama canaajinijiaaja canaa pohuatanu quiquiaa nia timitianura canaa. Canaari saaja nia pohuataquiaa cutarani, Jesucristoori seetanujuanaa Jiyaniijiajanaa cutara. Canaari tama canaa cuaqueyajaaja jiyatequiaa juhua nia seya canaa quiniuriani, canaa panishacari pa Jiyaniijia Jesu. <sup>6</sup> Canaari naa maninia miijiacani, Pueyaso cuhuatanuucua canaa jiuujia. Jiya shipinishacari, nojuajaari sequequiaari: “Cuhuashiqui cuaara coretaara ninishiquiji”.

Quiarijiaari naajuhujaj, nojuajaari poojia cuhuataquiaajuhujaj, pa niishiniuria nojuajaari tojetaarucujanaa maninia quiija. Paari cuno niishiyani, Jesucristojiniji pa niishishacari. Nojuajaari seetanujuanaa shacantuuca quiija cutara, Pueyaso Niyanu na quiniuucua.

*Paari maninia quijiaca quiniutianiyani saaja Pueyaso rupaacua pa tiuushacari*

<sup>7</sup> Cuno cumaaca canaa na jitiiani, cunoori Pueyaso cumaaca cutara. Saniniuujia, canaa cuaqueyari cumaacaaju, saaja juhua maraujiniiji panishano pataco. Naacujiti niishishiyari, cuno cumaaca pueya jatanijiani, cunoori seetanujuanaa Pueyaso cumaaca, maja tama canaa cumaacaaja. <sup>8</sup> Naacujitij, canaa paraa cosejosacari canaa, majaari canaa tarinitianu quiquiaa Pueyaso rupaa pohuatanu, cuno cumaaca canaa jitiiasacari. Jiyanoohua canaa tacaashacari, naajaa, majaari canaa tarinitianu quiquiaa Pueyasora poonijionu. <sup>9</sup> Canaari naquiya miishaaquiaaaniuhujaj. Naajaa, majaari Pueyaso cartenu quiquiaa canaa. Naajuhujaj, canaari juhua quiaquesano jiyocura jaqueroosaaquiaajaaniuhujaj. Naajaa, majaari canaa cusojuasaanu quiquiaani. <sup>10</sup> Puetunu tiquiyocujanaa canaa quishacari, canaari pueyaracaanu tama canaa cuaqueyajaaja panitiaquiaani, taa pa Jiyaniijia Jesu panitiaquiaari tama na cuaqueyajaaja pocuaracuaani. Naacujitij, canaa na niqitiosano cumaaca poonijosacari canaa rishiyashijiaa cuaqueyajinia, pueyari niishiquiaa, Jesuuri seetanujuanaa saminio. <sup>11</sup> Mijiria canaa quishacariija, pueyari pueyaracaanu canaa puecoonu paniquiaani, Jesujiniji canaa pohuatanuucua. Naacujitij, saminio na jitiiasacari canaa, Jesu cumaacaari niqishaaquiaa rishiyashijia canaa cuaqueyajinia. <sup>12</sup> Canaari juhua piriuquiuniuquiaani, canaa pohuatanuucua Pueyaso rupaa nia niqiuara. Niaari pueyaracaanu rishijiacara quiriquiano saniniuujia, canaa pohuatasanoocua nia tiuuniuucua.

<sup>13</sup> Tariucuacaanu Pueyaso Rupaajinia, supuetana David naajiotasanoori naa sequeya: “Pueyasooqua cua tiuuniuucua, janiyari pocuareeni”.

Canaari naajuhuj. Pueyasooqua canaa tiuuniuucua, canaari na rupaa pohuataquiaani. <sup>14</sup> Canaa jaara puecoosaariquia na rupaa canaa pohuatanuucua, naajaa. Canaacuajaari niishiyani, pa Jiyaniijia Jesu Samiitianiacuajaari canaa samiitianijionutaniuhujuhuj, Neyanu Jesu rupuesano canaa quiniuucua. Pueyasoori canaa rijionutaniya puetunu nijaniyatajanaa, pueyaracaanu na shuriucua pa quiniuria. <sup>15</sup> Naacuajitij, canaa jaara rejeretaquiaa naquiya canaa miishaanu Pueyaso rupaa canaa pohuatanuucua, puetunu cunोजनाari niaacuara, maninia nia quiniuria Pueyasora. Naa Pueyaso jiyanooniucua nijaniyacuaatej, socua queraatia pueyari na timiniutia na sequenutaniya, “paacarasho”. Pueyasoori jiyanoohua shuquiritiasaanutaniya, queraatia pueya na jiyanooniucua.

<sup>16</sup> Naaratej, majaari canaa pishiniu na rupaa canaa pohuatanura. Canaa cuaqueyari saaquianoshiya. Naajaa, canaa jiuujiaari saniniuujia puetunu juucujanaa socua masha-jashiyacujua. <sup>17</sup> Janiyara, puetunu naquiya canaa miishacarijianaa mijiria, cunoori secaja, rupaquijiajuhuaj. Cuno naquiya miiniu canaa rejeretanuucua, ¡Pueyasoori cunora jiyanoohua maninia miiniutianiya canaa! Cunora, canaari shacantuuca quijiacara jatanishaanutaniyani, pueyaracaanu rishijiaca canaa quiniuria. <sup>18</sup> Naaratej, majaari canaa jiaatianu quiquiaa canaa jitianura mijiria canaa niquishano casaa. Canaa cutaraari Pueyaso jiiatasano niquishoo casaacua jiaatiaquiaani. Mijiria niquishano casaari saaja shaajeja casaa. Pueyaso jiiatasano pa niquishoo casaa saniniunijia, cuno cutaraari shaajeyashijia.

## 5

<sup>1</sup> Mijiria pa quishacarijia, nio pa cuaqueyari saaja juhua suhuorotu quiya pa sohuanura, nareja juhua ruconaa pa quishacari mijiria. Mijiria pa jiiatasano pa shoque jaara cusoquee, pacuajaari niishiyani, paari tari jiiitaa tamonu cuaqueya jiyocuacaanuni. Cuno cuaqueyari juhua shanohua tia, Pueyaso shipinishano pajaniyara. Cuno cuaqueyari pueyaracaanu rishiniutianiya pa sohuanu quiquiora. Cunoori maja pueyano shipinishano. <sup>2</sup> Mijiria canaa quishacarijia nio canaa sohuanu suhuorotujiniani, canaari taraatia miishaaquiaani. Cunora, canaari juhua quiatojoquiaani, canaa jiaatiasacari canaa sohuanu pacusaanura jiyocuacaanu. Tii quiyacuajaari canaa sohuanuucua jiiatasano quiquio. <sup>3</sup> Canaari cuno quiarinio cuaqueya cushiyonutaniya juhua toqueni, maja juhuaasu canaa sohuanu quiniuria. <sup>4</sup> Nio cuaqueyajiniaja canaa quishacari mijiria juhua suhuorotujinia, canaari quiatojoquiaani taraatia canaa miishacari mijiria. Maja cutaraari canaa quiniu paniniu cuaqueyaju, juhua juhua sunucua. Canaa cutaraari canaa quiarinio cuaqueya cushiniu paniyani, Pueyaso shipinishano canaarani. Naacuajitij, nio shaajeja canaa cuaqueyari puetunu maninia jatanishaanutaniyajanaa Pueyaso cumaacata, pueyaracaanu rishijia cuaqueyaraca canaa quiniuria. <sup>5</sup> Pueyasojuaacuajaari na muerasura pa saquiriojoquiaari, naa na jataniniuria pajaniyatej. Naaratej, nojuajaari na muerasu niqitioquiaa na Sohuanu, pa niishiniuria nojuajaari seetanujanaa naa pa miiniutianiya.

<sup>6</sup> Naa canaa niishishacarijia, majaari canaa tacaaniu quiquiaa. Canaacuajaari niishiyani nio cuaqueyajinia canaa quishacarijia, majaari juhuanujuaja pa quiniu pa Jiyaniijia shuriucua. Naacuajitij, paari tucuacaanu quiyajaani pueyaracaanu pa quijiarano quiquiojiniji. <sup>7</sup> Cunora, mijiria canaa quishacarijia, majaari canaa quiniu tama canaa niishitajatajaaja. Canaa cutaraari canaa Jiyaniijiaacua canaa tiuuniutia quiquiaani. <sup>8</sup> Naacuajitij, canaari shuquiriaatia quiya mijiriani, nocua canaa tiuushacari. Naajaa, canaari nio canaa cuaqueya tarinitianuucua jiaatiaani, canaa pacunura pa Jiyaniijia shuriucua, tii canaa quiniuria nata. <sup>9</sup> Naacuajitij, canaa jaara nio cuaqueyajinia quiyajaa mijiriani, naajuhuj canaa jaara na cartequeni, canaari saaja pa Jiyaniijia shuqiritiniucua jiaatiaani. <sup>10</sup> Puetunu pajaniyajanaacuajaari Jesucristo tacoji na



nequesoreesaqui nujuatejosaariquianoni. Cuniqui, puetunu mijiria pueya miishanojuanaari maatia niishishaanutaniya, maninia pa miishano, sesa pa miishanonio. Na nuhuaji, pa Jiyaniijaari maninia miiniutianiya maninia miijia. Saniniuujia, sesa miijiaaari taraatia miishaanutaniyacujua.

*Pueyasoori pueya jiyanooni panijia cutara*

<sup>11</sup> Naaratej, canaa niishishacari jiyanoohua puereeta quiniutianiyari pa Jiyaniija saniitiosacari na tojitiaashijia, canaari cunora saniniuujia pueya tojitiniuria Pueyaso Rupaani. Pueyasocujaari niishiya canaari seetanujuanaa nera poonijionaani. ;Seetanujuanaa naa nia niishitiriquiajaaniuhuj! <sup>12</sup> Majaari nia jyaniniu canaari tama canaajiniijiaaja nia pohuatanu coteerohuanuhua, canaacua nia tiuuniuria. Canaari saaja naa nia pohuataani nia niishiniuria casaarate nia naata timitianu canaani. Canaa nia timitiare cutara, seetanujuanaa Pueyasora poonijionaa canaa quiniuucua. Naacuajiti nia naata cuno pueya tacunu canaacuaji, cuno pojori canapueete sapuenu juhua maninia quijia niquishano pueya najuhuanacuajani. Majaari nojori niishiniu tacaani taamueca jiuujiaracateja nojorini. <sup>13</sup> Noojiaqueya nijaniyajinijinio naasucuaari jiyaniya canaari juhua paateca pocuaquiaani. Naajaa, canaa jaara seetanujuanaa paateca quirini, canaari paateca quiya Pueyasorani. Saniniuujia, canaa jaara maninia niishiriojuaca quiriqiani, canaari naa quiya niaarani, maninia canaa niishitiojonura nijaniya. <sup>14</sup> Cristo paniniuucua canaa, cuno na paniniuuri canaa shiniuujia nera canaa poonionura. Naaratej, canaari pueyaracaanu nojuajiniji pohuataquiaani. Canaacujaari niishiyani, nojuajaari puetunu pueyacuajanaa cusoquiaari. Naa na cusonuucua puetunu pueya nitijanaatej, Pueyasora, puetunu pueyajanaari tari cusonuucuaari Cristota. Naacuajitij, Pueyasoori na naata jiyanooni puetunu Neyanuucua tiuniaajanaa. <sup>15</sup> Cristocujaari puetunu pueyacuajanaa cusoquiaari, na samitianishano pueya quiniuria saa neraja. Pocuara cusoquiaari. Nojuajaari pocuara samiitiaquiaariuhuj. Naaratej, paa cuara miiria saa na panishanojua. Majaari socua pa miiniu tama pa panishanojuaaja. <sup>16</sup> Tarija, canaari saaja canaa panishano pueyacuara tajaajani. Quiaritia saniniuujia, Pueyaso jatanishano pueya canaa quishacari, majaari rimiajata canaa paniniu pueya. Tarija, canaari Cristo jyanijiani nojuaja naasucuaari nareja pueyano, juhua pajaniyajuhuj. Quiaritia cutara, majaari naa canaa niishiriojonu nojuajiniji. <sup>17</sup> Naajuhuj, cante Cristo rupesanoni, nojuajaari quiariniora jatanishano pueyano. Tariucuacaanu sesa na quiniuuri tari jatasanocuja. Saniniuujia, puetunujuanaari quiarinio quiya.

<sup>18</sup> Puetunu cunujuanaari Pueyaso miishano. Nojuajaari Neyanu Cristo cusojuaciaari pocuara, na jiyanooshano pueya pa quiniuria. Na nuhuaji, nojuajaari canaa jiyaramiquiaari puetunu pueyajanaa canaa pohuatanura, nojori jiyanooshanurajuhuj. <sup>19</sup> Naacuajitij, Pueyasoori mijiria quinia jyanooquia saaja Neyanu Cristoocua nojori tiushacari. Naa na jiyanooshacari pueyatej, majaari quenaaja sesa nojori miishano na saneenu quiniutianuhua socua. Nojuajaari canaa jiyatequiaari na rupaa pohuataanaa canaa quiniuria, pueya canaa tiutiniuria Neyanu Jesucristoocua, jiyanooshano nojori quiniurajuhuj. <sup>20</sup> Naacuajitij, canaari Jesucristo jiyaramiquishanoni, canaa caminiujiuniora niaara na sequesano canaa. Naa canaa caminiujiushacari Jesucristo rupaatej, Pueyasojanaari nia masuya na muerasu nia quiniuria, Neyanuucua nia tiushacari. Naacuajitij, canaari Cristo niti nia secojiyani, ;tama nia cuaqueyajaaja nia jyanootiri Pueyaso! <sup>21</sup> Pa Jiyaniijiarano Jesucristoni, nojuajaari tojetaarucujanaa sesa miyashijiajuhanajaj. Naajaa, na Que Pueyasoori nocua tiutiaquiaari puetunu sesa pa miishanojuanaa, pa niti na saniitiosocoriquiano. Naacuajitij, Neyanuucua pa tiushacari, Pueyasoori pa jiyatequiaa juhua sesa miyashijia pa quiniuria.

6

<sup>1</sup> Naa Pueyasora poonijionaa canaa quiniuucuatej, canaari jyanohua nia secojiyani cuarta Pueyaso muerasuna, saa Pueyasoraja nia quiri, nia jyanoojia na quiniuucua. Maninia na muerasu nia quiri. <sup>2</sup> Tariucuacaanu na sequesano cuajaari naa naajiotasano quiya na rupaajinia:

“Quiaari namitia cua secojocanu, pueya cua naacunu panishacari. Pueya cua jiyanooshacarcuaa, janiyari quia naacucanujuhuj”.

Cua panishano pueyanaa, quiarijaari Pueyaso jiyanooshacari pueya. Nojuajaari quiarija pueya jiyatequiaa na muerasu nojori quiniuria.

<sup>3</sup> Cunora, canaari tama canaa cuaqueyajaaja cojuaquiaani, maja canaa miiniuria sesa tamasaca niquiara. Canaari naa maninia miiquiaani, nojori mariqui Jesucristoocua tiyuaquiriiri, nojori mariqui Pueyasora canaa poonijosano sesacarejaariuhuj. <sup>4</sup> Canaa cutaraari saaja maninia miiquiaa pueya niquiarani, puetunu pueya niishiniurijanaa canaari seetanujuanaa Pueyasora poonijionaani. Naaratej, canaari juhuajaniya rejeretaquiaa naquiya canaa miiniuni, canaa panishano canaa jiitiaaquishacarijuhuaj. Naajuhuj, canaari rejeretaquiaani puera canaa tacaashacari, canaa niishiyaquishacari taa canaa miiniutianiya socuani. <sup>5</sup> Naajuhuj, canaari juhuajaniya rejeretaquiaa canaa jaara majacujusaaquiaani, canaa jaara nujuatejojuajinia nujuatejosaaquiaajaniuhuj. Nasojosano pueya jaara miitianu paniquiaa canaani, canaari na rejeretaquiaajuhuj, pueya tiuuniuria canaa pohuatasanoocua. Naa Pueyaso jiyaramiquishano pueya canaa quishacaritij, canaari jyanohua poonijioquiaa nerani. Canaari sequeyarucua sutequiaani. Canaari miaajequiaajuhuj. <sup>6</sup> Naajuhuj, pueyari na naata niishiniu canaari seetanujuanaa Pueyaso seyani, sesa miyashijiaca canaa quiniuucua, maninia canaa niishiniuucua Pueyaso rupaajuhuj. Niishishaatiacuajaari, canaari Pueyaso seyani, jacaria pocujaca canaa quishacari juaajiaca pueyata, naajuhuj, maninia canaa miishacari puetunu pueyajanaanio. Naa niishishaatiacuajaniuhua canaari Pueyaso seyani Pueyaso Sohuanu cumaquishacari canaa, seetanujuanaa canaa panishacari pueyajuhuj. <sup>7</sup> Niishishaatiacuajaniuhua canaari Pueyaso seyani seetanu rupaajanaa canaa pohuatanuucua pueya, naajuhuj, casaa canaa miiniuucua Pueyaso cumaacata. Canaari Sesaaca nujuataquiaa cumaatiani, Pueyaso jiyanooshano pueya canaa quiniuucua. Pueyaso rupaata, canaa cutaraari saaja Sesaaca jiyatequiaa canacuajini. <sup>8</sup> Naa Pueyasora canaa poonijosacaritij, noojiaqueya pueyari canaa shuquiritiaquiaani. Tamasacaari canaa rerequetequiaa saniniuujia. Naajuhuj, noojiaqueya pueyari maninia pohuatanuucua tamasaca niquiara canaajiniji. Tamasacaari canaa sesacaquiaa saniniuujia. Noojiaqueya pueyari canaa sequequiaa sapojonuucacatani. Tamasacaari saniniuujia maninia tojitiaquiaa canaa, seetanu rupaajanaa canaa pohuatasacari. <sup>9</sup> Noojiaqueya pueyari canaa niquiquiaa juhua najuhua quijiaca pueyani. Tamasacara saniniuujia, canaari tojishano pueya cutarani. Canaari sequeyarucua quera puecoosaaquiaani. Naajaa, canaari saminio quiyajaani. Canaari jyanohua miitiasaaquiaani. Naajaa, majaari canaa puecoosaanu quiquiaani. <sup>10</sup> Taraatia canaa quishacari, naajaa, canaari pueyaracaanu shuquiriaatia quiquiaani, Pueyaso pueya canaa quiniuucua. Canaari seetanujuanaa casamijiuniucujuhuj. Naajaa, canaari queraatia pueya jiyatequiaa queraatia casamiriaca nojori quiniuria Pueyaso casaatani. Canaari juhua casamijiuniucua niquishanoni. Naajaa, canaari puetunu canaa panishanojuanaa jiitiaacuajani.

<sup>11</sup> Corinto tiacajinia quiniaa cuarta Pueyaso pueyanaa, canaa nia tojitiare. Canaa jiaatiasacari niaacua, canaari seetanujuanaa puetunu canaa jiuujiajinia canaa niishiriojosanojuanaa nia sequereeni. <sup>12</sup> Majaari canaa tarinitianu canaa paniniu jyanohua nijaniya. Nijaniya sajaraj, majaari nia paniniu canaa, taa canaa paniya nijaniyacuaani. <sup>13</sup> Janiyari nia nenecojiyani, naatej, taa pueyano nenecojoquiaa necohuacuaani, jmajaari canacuaji nia taacanuunu! Seetanujuanaa canaa nia paniri, taa canaa paniquiaa nijaniyacuaani, seetanujuanaa panitiojuaca pa quiniuria.

#### *Paari Pueyaso quiquioni*

<sup>14</sup> Saniniuujia, maja Pueyaso tojiyashijiaca pueya nia paniniu, nojori nia cojiniuria. Naajuhuj, maja cutaraari nia caminiu Pueyaso tojiyashijiata, niaa mariqui rimiajata quijiaca quiriiri. ¿Maninia mijiitucua shuquiriaatia quijia quiriquia, sesa mijiata na quishacari? Maja. Cua riuquareto pueyanaa. ¿Cuhuashiqui quijiateeri na naata juhuajaniya jatiqui quiniu ninishiqui quijata? Maja na naata. <sup>15</sup> Seetanujuanaa pueyanaa, Cristoori maja Sesaaca rupena. Naajuhuj, Pueyasoocua tiuujia pueyanoori

maja na naata maninia rupueetoonu Pueyasooocua tiuyashijia pueyanota. <sup>16</sup> Paa jaara Pueyaso quiquio quirini, ¿paateeri Pueyaso quiquiojinia shanacunutaniya samaruhua tiuquitianura tiini? ¡Maja! Paacuaajaari pueyaracaanu Quijia Pueyaso quiquioni. Na pueyara na sequesanoocuaajaari naa naajiotasano quiya:

“Janiyari nojorijinia quiriquianoni. Janiyari nojori tajinia rucuanenonutaniyani. Janiyari nojori Jiyaniijajanaa quiniutianiyani. Nojoriira cua pueya quiniutianiyacujua”.

<sup>17</sup> Cunora, pa Jiyaniijiaari na pueya sequeya:

“¡Cua tojtiaashijia pueya tajiniji nia pacure! Nia shiriquiri tamocora nojoriicuaaji. Majaari sesa casaa nia saniniu paniniu. Naa jaara cua tojjiaca quiri, janiyari nia jiyatenutaniya quirianoni. <sup>18</sup> Janiyari nia Que quiniutianiyani. Naacuajitij, niaari cua niquiohua quiniutianiya. Naa sequeyanijia, puetunu cumaacaracajanaa cua quiniuucua”.

## 7

<sup>1</sup> Naacuajiti canaa panishano pueyanaa, paacuaajaari naa seetanujuanaa pa Jiyaniijia sequesano pajaniyarano jiitiaani. Naaratej, pueyaracaanu tama pa cuaqueyajaaja juhua jeequesano pa jiitariquia, poojiajuhuaj. Majaari pa shanacunu juhua curuushojosano pa quiniuria sesa pa miishanota. Pueyaso puerejaca pa quiriquia, tojetaarucujanaa sesa miyashijia pa quiniuria, saa neraja pa quiniuriajuhuaj.

*Corinto pueya tacatosacari nojori jiuujia, maninia nojori quiniuhua*

<sup>2</sup> Pueyanaa, ¿taa nia miiquianuni? ¡Canaa panijia nia quiriohua! Majaari canaa miiniu quiquianu sesa nijaniya. Majaari quenaaja niquiriyatu nijaniyajinijinio canaa sesonu quiquianu canaa niishitiojosanota. Majaari canaa sapojonu quijia nijaniya.

<sup>3</sup> Naa cua sequesacari nijaniyatej, majaari cua sequenu cua cararonura nijaniya. Janiyacuajaari tari nia sequereeni, canaari jiyanohua nia paniyani. Naacuajitij, canaari shuquiriaatia quiniutianiyani canaa jaara puecoosaare canaa cumaquiniuucua nijaniyani, seetanujuanaa Pueyaso muerasu nia quiniuria. Naacuajitij, niaa jaara shaa-jerejuhuaj, paari pueyaracaanu jatiqui quijia quiniutianiya Pueyasotani. <sup>4</sup> Janiyari seetanujuanaa naa nia sequeyani cua panishacari nijaniya. Quiarrijani, janiyari jiyanohua nia timitiaani, maninia cua tojiniuucua nijaniyajiniji. Canaari seetanujuanaa naquiya miiquiaani. Naajaa, maninia canaa tojiniuushacari nijaniyajiniji, cunoori cua cumanijiacan. Cunora, janiyari jiyanohua nia shuquiritiaani.

<sup>5</sup> Canaa jaara tiuquiquianu niya Macedonia jiyajiniani, majaari quenaaja rupaquijia canaa quiniu quiquianu juhuajaniya. Canaari puetunu taraatia miishaacanujuanaani. Pueyasooocua tiuyashijiaaari canaa juariquiaa. Canaa jiuujiaari niaacua tacaariquiaa saniniuujia. <sup>6</sup> Jiyacaritij, Pueyasoori canaa cumanijiacan Tito tiuquishacariuhua canaacua. ¡Pa Pueyasocuaajaari tacaajia cumanijana! <sup>7</sup> Canaa jiuujia canaa cajitishacarini, cunoori maja saaja canaa niquishacari Tito canaacua tiuquihuano. Canaa cutaraari canaa jiuujia cajitiquianuni, nojuaja jaara canaa pohuatacanu nijaniyajiniji jiyanohua na timiniutia. Nojuajaari canaa pohuatacanu, niaanaari canaa niquiniuucua jiaatiaa. Niaanaari cucua taraajeya, jiyanohua nia taraajetenuucua janiya. Niaanaari cucua tacaya jiyanohua, cua rootasano tojjiaca nia quiniuria quiarjia cutara. Naa cua tojishacari niaacuajitij, janiyari jiyanohua shuquiriquianuni.

<sup>8</sup> Niaacuara cua naajioneeri nia taraajetecanu. Janiyari taraajecanujuhuaj, naa cua taraajetenuucua nijaniyatej. Quiarjia cutaraari maja cua taraajenu. Cua naajioneecuaajaari saaja rupaquijia nia taraajocanu. <sup>9</sup> Quiarrijani, ¡shuquiriaatia quiyanijia! Majaari nia jiyaniyu janiyari shuquiriaatia quiyani naa cua taraajonuucua nijaniyatej. Shuquiriaatia quiya cutarajia, cua niishishacari, naa cua taraajonuucua nijaniyatej, niaari nioojia tacatorohuacuaa Pueyasooocua, Pueyaso tojtiaajaca nia quiniuhua. Naacuajitij, janiyari quiarjia niishiyani, majaquiiri cua sesonu quiquianu nijaniya, naa cua taraajonuucua nijaniyatej. Pueyasocuaajaquiiri maninia poonijioriquiaa nioojiacajinia, naa nia taraajesacaritij. <sup>10</sup> Pueyasojanaa jaara pa taraajetere, cunoori maninia, poojia pa tacatonuhua nocua, na jiyanooniuria pajaniya. Na nuhuaji, paari shuquiriaatia quiya

cutarani. Saniniuujia, tama pa taraajesacarijiaaja, cunoori tama poojia pa shaajanu-  
 rajaaja. <sup>11</sup> Nia taraajesacari cua nacasusacari nijaniya cua naajioneeginiani, cunoori  
 seetanujuanaa Pueyaso taraajetesano quiqianu nijaniya. Naa nia taraajenuucatej, nia  
 niqishuriirijaj, majaari nia tarishiniu quiqianu maninia nia miiniuria. Niaari ritia cua  
 niishitiniu paniriquiaa juucua, maja niaacua na tiuutiasaanura cuno pueyano miishano  
 sesa. Niaacuajaari maninia miiqianu nia juaashacari cuno sesa miiijia. Niaari na naaqui  
 puerecanujuhuaj, niaa mariqui nata cojiritiasaare saniitionuuri. Niaari cua jaqueroojo-  
 canu. Niaari ritia miiqianu cua naajiojinia cua sequesano nijaniya. Naacuajitij, niaari  
 ritia cuno sesa miiijia taanuucanu nia tajiniji, maja socua nia rupuesano na quiniuria.  
 Naa nia miiniucua puetunu maninijanaatej, janiyari quiarijia niishiyani, majaquiiri  
 nia maniniucuanu quiqianu naa sacuaraatia cuno pueyano miishanotej. <sup>12</sup> Pueyanaa,  
 niaari maninia canaa tojjijaca. Seetanujuanaa, cua naajiosacari niaacuara, majaari cua  
 naajionu quiqianu saaja cuno sesa miiijia pueyanonijini, sesa miishano pueyanonijinio.  
 Janiya cutaraari niaacuara naajiocanuni tamajaaja nio nia niishiniuria Pueyaso niqiaara:  
 niaacuajaari seetanujuanaa canaa panijaca quiyajaa, nia tojishacari canaa. <sup>13</sup> Naaratej,  
 canaari canaa jiuujia cajitiquianuni, canaa tojishacari Tito pohuatasano nijaniyajiniji.

Majaari saaja Tito pohuatasano cumanijianu quiqianu canaa. Canaari Tito timi-  
 ticanujuhuaj, canaa niqishacari nojuajaari shuquiriaatia tiuquiriohua canaacua.  
 Puetunu nijaniyajanaari na naacucanu, noojia na cajitiniuhua, najuhua na taca-  
 niucua niaacuajuhua. <sup>14</sup> Tito quiaaquishacarijia niaacua, janiyacuajaari juhuacar-  
 ija na pohuatacanu nijaniyajinijini, maja puera na taacanuunura niaacuaji. Naa  
 maninia nia quishacari Tito tiuquishacari niaacuatej, majaari cua caririquiniu quiqianu  
 nijaniyajiniji. Puetunu cua pohuatasanojuanaa Tito nijaniyajinijiiri seetanujuanaa  
 quiqianu Titora. Naajuhua, puetunu cua pohuatasano nijaniyajanaari pueyaracaanu  
 seetanu rupaajanaa quijia. <sup>15</sup> Quiarijia Tito niishiriojosacari nijaniya, nojuajaari socua  
 jiyanohua nia panijia quiya, nia tojiniucua maninia nojuaja. Niaacuajaari tetecatucanu  
 nia puerenuta na tiuquishacari niaacua. Majaari nia rerequetenu quiqianu nojuaja.  
<sup>16</sup> Janiyajuhua, jiyanohua shuquiriaatia quiyanijia, cua niishishacari quiarijia cutara cua  
 naata niaacua tiuuniu seetanujuanaa.

## 8

### *Capora pa quiriqiaj*

<sup>1</sup> Quiarijiani pueyanaa, canaari nia pohuatanu paniyani, taa Pueyaso cumaquiya  
 jiyanohua na muerasu maapue niya Macedonia jiyajiniani. <sup>2</sup> Nojoriiri jiyanohua taraatia  
 miiquioquia. Naajaa, nojoriiri saaja jiyanohua shuquiriaatia quiya. Naajuhua, casami-  
 ijiuniucua nojori quishacari, naajaa, nojoriiri caporatujuuri. Nojoriiri na cumaneecajiniji  
 nareja niqitiojoquiaa queraatia, Judea jiyajinia casamijiuniucua Pueyaso pueyara.  
 Nojori niqitiojosanoori juhua casamiriaca pueya niqitiojosano. <sup>3</sup> Seetanujuanaa narta  
 Pueyaso pueyacia nojori taraajenuta, nojoriiri naa na cumaneecajiniji niqitiojocanu  
 queraatia. Nojoriiri puetunu na jiitiasano cumaneecajanaa niqitiojonuucanu. Naacu-  
 ajitij, janiyari jiyaniqianuni, maja naasucuaari nojori naata niqitiojonu quiniutianiya  
 socua. Naajaa, na nuhuaji, ¡nojoriiri socua niqitiojocanu! Seetanujuanaari cua seque-  
 sano nijaniya. Janiyacuajaari nojori miishano niqiniani. <sup>4</sup> Niya Macedonia jiyajinia  
 quiniaa parta Pueyaso pueyani, nojoriiri nijaniyajiniji tojiquianu. Niaanaari cumaneeca  
 reratenu paniriquiaacuaa, nia jiyarosocoriquiano Judea jiyajinia quiniaa casamijiuni-  
 ucua parta Pueyaso pueyara. Naaratej, nojoriiri jiyanohua canaa nenecojocanu canaa  
 masenura nojori niqitionu panishano cumaneecajuhua, parta Pueyaso muerasura.  
<sup>5</sup> Seetanujuanaa Pueyaso tojjijaca nojori quiniucua, nojoriiri maja saaja na cumaneeca  
 na niqitiojonu quiqianu. Nojoriiri coteenu tama nojori cuaqueyajaaja jiyatecanu  
 seetanujuanaa nojori quiniuria saaja pa Jiyaniijara, taa Pueyaso paniya pa miiniuri-  
 acuajani. Naajuhua, nojoriiri tama na cuaqueyajaaja jiyatecanu canaa tojjijaca nojori  
 quiniurijuhua. Cunora, canaari nojoriicuaji jiuujiatecanuni. <sup>6</sup> Naa capora niqitiojona  
 nojori quiniucuatej, canaari Tito sequerucuaani, niaacua na quianuhua quiarijia.  
 Nojuacuajaari tarijia naacucanu nijaniya, nia reratenura nia niqitionu panishano

cumaneeca. Niaacuajaari maninia niqutiojocanu juhua capora pueya. Naaratej, nojuaja cuara nia naacuura, nia tucuatnura reratenu puetunu nia niqutionu panishano cumaneecajanaa. <sup>7</sup> Niajaniya, Corinto tiacajinia quiniaanaa, niaacuajaari jiyanoehua maninia Pueyaso muerasu. Niaari Pueyasooeua tiuujiaa jiyanoehua. Naajuhuaaj, niaari jiyanoehua maninia Pueyaso rupaa niishitiojonuujuaca. Niaari Pueyaso niishitiaja jiitiaajuhuaaj. Niaari mariyata shitimia poonijionuujuaca, tamasa nia naacunura. Naajuhuaaj, niaari canaa panijiaa jiyanoehua. Naatej, taa maninia miijiacatucuaa niajaniyani, capora nia quiriijuhuaaj, nia cumaneeca nia niqutiojonura nareja parta Pueyaso pueyara.

<sup>8</sup> Majaari juhua nia jiyaniija cua sequenu niajaniya, nia cumaneeca cua niqutiojotenura niajaniya. Janiyari nareja nia pohuatariquiaa capora Macedonia pueyajiniini, tama nia niishiniuriaaja, niaate seetanujuanaa canaa panijiacajuhuaaj, taa Macedonia jiyajiniinio pueya paniya canaacuaani. <sup>9</sup> Niaacuajaari pa Jiyaniija Jesucristojiniini niishiya; na Que Pueyaso shuriucua na quishacariija, nojuajaari puetunu maninia casaajanaa jiitiaja quiquiaari. Naajaa, nojuajaari juhua casamiijiuria quiquiaari, mijiria na rosesacari pocua. Nojuajaari naa taraatia quijia quiquiaari, saniniuuja jiyanoehua shuquiriaatia quijiaa na jiyatenura pajaniya, juhua jiyanoehua queraatia casamiriaca pueya pa quiniuria. Naa jaara seetanujuanaa panijiaa quiriqia, naa nia miirijuhuaaj, taa pa Jiyaniija miiquiaaricuaani.

<sup>10</sup> Janiyari niishiriojoriqiaani, taate socua maninia nia naata miiniu parta casamiijiuniucua Pueyaso pueyarani, shuquiriaatia nia quiniuriajuhuaaj. Cua tojiri. Niaacuajaari niishiya, noo marijara pa shococanutej, niaacuajaari juhuacatecara cumaneeca reratejonu coteecanu. Niaari naa maninia miiquianu tama nia tacaashacariijaaja niarta Pueyaso pueyacua. <sup>11</sup> Niaari shitimia juhuacatecara nia cumaneeca niqutiojonu coteecanucua. Naaratej, quiarijia nia sequeyanijia, niaa cuara naa shitimia niqutiojonu tucuatnura puetunu nia niqutionu panishano cumaneecajanaa. Nia jiitiasano cumaneecajiniini nia niqutiojore, taa cumaneeca nia niqutionu paniyacuajani. <sup>12</sup> Nia tojiri. Paa jaara seetanujuanaa nareja niqutionu paniriqia pa cumaneecajiniini, Pueyasoori pa niqutiosano shuqiritiaja, paa jaara juhua capora niqutiojore pa jiitiasanojiniini. Maja cutaraari Pueyaso paniniu pa niqutionura, pa jaara na jiitiaaquiyani.

<sup>13</sup> Majaari Pueyaso paniniu cutara puera nia niqutiojonura nia cumaneeca, tamasa quiniuria casamiriaca, saniniuuja nia jiitiaaquiniuria nia panishano. <sup>14</sup> Maninia cutaraari puetunu Pueyaso muerasujuanaa jiitianura na panishano. Naaratej, quiarijiani, niaa cuara niqutiojora nia jiitiasanojiniini, nojori jiitianura na panishanojuhuaaj. Tamacari saniniuuja, nojoriiri saniniuuja nia jiitiaaquishoo casaa nia niqutionutaniyacujua, niaa jaara na jiitiaaquiri. Naacuajitij, puetunu Pueyaso muerasujuanaari na panishano jiitianutaniya mariyata, maja rimiajata. <sup>15</sup> Naajuhuaaj, tariucuaaanu Pueyaso Rupaaajiniiani, jiyocuaaanu Pueyaso tinishano Israel pueya miaquesocoriquiano panijiniiri naa naajiotasano quiya:

“Cante queraatia reratequiarini, majaari quenaaja na cureenu quiquiaari. Naajuhuaaj, cante secaja reratequiarini, majaari nojoriria na pueetanu quiquiaari”. Naaratej, Pueyasooeua tiuujiaa nia quiri. Nia jiitiasanojiniini nia niqutiojore nareja, nia jamueyaquiniutia.

*Pablo pohuatasano Titojiniini, Tito cojiniaajiniinio*

<sup>16</sup> Titoori jiyanoehua niaacua jiaatiaja, taa cua jiaatiaa niaacuacuaani. Pueyasocuaajaari na jiyatequiarini nia panijia na quiniuria. Janiyari cunora Pueyaso sequequiarini: “¡Paacarasho Pueyasonaa!” <sup>17</sup> Naacuajitij, janiya jaara Tito sequerucuaani nia niqiniucua na quianura, nojuajaari cua timitiriucuaa. Tama nojuajaari nia niqiniucua jiaatiaa. Naacuajitij, nojuajaari quiarijia quianutaniya niaacua.

<sup>18</sup> Canaari tamonu parta Pueyaso pueyano jiyaroya Titotani, na tarajariquiano. Cuno pueyanoori puetunu Pueyaso muerasu maapuejanaa shuqiritiasano pueyano, maninia na pohuatanuucua pa Jiyaniija Jesucristojiniini. <sup>19</sup> Macedonia jiyajinia quiniaa Pueyaso muerasu maapueeri tari na saquiriojocanu na tarajanura canaa, pa niqutiojosano cumaneeca canaa jiyatanura nata, Judea jiyajiniara. Naa pa niqutiojonuucua pa

cumaneeca parta Pueyaso muerasuratej, queraatia pueyari pa Jiyaniijia timitianutaniya socua. Naajuhuj, parta Pueyaso pueya Judiocuacaari niishiniutianiya, narta Pueyaso pueya taucuacaquiiri nojoriicua taraajecajuhuj. <sup>20</sup> Maniniacuajaari parta Pueyaso pueya maapue saquiriojosano pueyano quianura canaata. Naacuajitij, majaari pueya jiyaniinu quiniutianiya canaari nio queraatia canaa reratesocoriquiano cumaneecajiniji nohuasanutaniyani. <sup>21</sup> Canaari pueyaracaanu maninia miiniu paniquiaani puetunu pueya niquiarajanaa, maja saaja Pueyaso niquiara.

<sup>22</sup> Quiarijiani, niaacua canaa jiyarosocoriquiano pueyata, canaari niquijinio tamonu parta Pueyaso pueyano jiyaronutaniyani. Pueyaracaanu na poonijosacari pa Jiyaniijia, janiyajanaari na niquiquianuni. Nojuajaari seetanujuanaa pueya panijia, Pueyaso panijia na quiniucucuaa. Quiarijia cutara, seetanujuanaa niaacua na tiuushacari, janiyari niishiyani, nojuajaari jiyanohua maninia Pueyaso pueyano. <sup>23</sup> Tamonu jaara nia nequesotare cante Titoni, niocua na riucua: “Nojuacuajaari Pablota poonijiona, na cumaquiniuria pajaniya”. Naajuhuj, Tito cojiniaari niquiji Pueyaso muerasu maapue jiyarosano niaacuajuhuj. Pa Jiyaniijia Jesucristoori socua maniniuhuaqueetasano, maninia na tojitiajaca nojori quiniucua. <sup>24</sup> Naaratej, nio pojori jaara niaacua tiuquijiosee, niocua puetunujuanaa maninia miiri nojoriria, nia paniniutia nojori. Naacuajitij, puetunu Pueyaso muerasu maapuejanaari niishiniutianiya niaaqui seetanujuanaa panijia. Naajuhuj, puetunu Pueyaso pueyajanaari niishiniutianiya, majaari cua sapojonu quiquianu, maninia cua pohuatasacari nojori nijaniyajiniji.

## 9

### *Pablo shiniujiushacari pueya, cumaneeca nojori reratenura narta Pueyaso pueyara*

<sup>1</sup> Janiyaruhua najuhuana niaacuara naajiyani, cua sequenura nijaniya, nia cumaneecata nia naacunura Judea jiyajinia quiniaa parta Pueyaso pueya. <sup>2</sup> Janiyacuajaari niishiyani, niaari tarijia na naacunu paniquianucua. Cua shuquiritiasacari cunora nijaniya, janiyari pueyaracaanu niya Macedonia jiyajinia quiniaa parta Pueyaso pueya niquiara pohuataquiaa nijaniyajinijini. Janiyacuajaari nojori pohuataquiaani, nijaniya Acaya jiyajinia quiniaa pueyani, niaari nia cumaneeca niqutionu paniquianu noo marijara pa shococanutej. Naaratej, queraatia niya Macedonia jiyajinia quiniaa Pueyaso pueyari cunora jaarajaaja na cumaneeca niqutionu panijajuhuj, naa nojori cua pohuatanuucua nijaniyajinijitij. <sup>3</sup> Janiyari niaacua tiuya seetanujuanaani, niaacuajaari canaacuaji tariucua reratesano jiitianutaniya nia cumaneeca, taa cua pohuataquiaa niya nijaniyajinijicuaajani. Naajaa, janiyari nio parta Pueyaso pueya jiyaronutaniya niaacuani, seetanujuanaa juhuacarijia nia reratenura nia niqutiojosocoriquiano cumaneeca. Majaari cua paniniu cutara cua pohuatasano nijaniyajiniji cuaracashitishaanura. <sup>4</sup> Macedonia jiyajinijinio parta Pueyaso pueya naasucuaari cuata tiuquiniutianiya niaacua. Nojori jaara cuata tiuquishii niaacua, canaa jaara nia riuriatasee nia cumaneeca rerateyojuani, canaari caririquiniutianiyan. Niaari caririquiniutianiyajuhuj. <sup>5</sup> Naaratej, janiyari Tito sequereeni, parta Pueyaso muerasuta na quianura coteenu niaacua cucuaji, nia niqutiojonu panishano cumaneeca cuara tari reratesano quiiria canaacuaji. Naacuajitij, nia niqutiojosano cumaneecaari seetanujuanaa nareja nia niqutionu panishano quiniutianiya, maja canaa niqutiojotesano nijaniya.

<sup>6</sup> Pueyanaa, nio sequesano nia niishiriquia. Naa sequeyari: “Cante secaja natajani, secaja senoonutaniyaajaariuhuj. Saniniuujia, cante queraatia natajani, queraatia senoonutaniyaajaariuhuj”. Naajuhuj, paa jaara capora quiriqiani, Pueyasoori saniniuujia socua queraatia pa niqutionutaniya pa niqutiosanojiniji. <sup>7</sup> Naaratej, puetunu nijaniyajanaa cuara niqutioora taa nioojiajia nia niishiriojoree nia niqutiojonuracuajani. Majaari nia cumaneeca nia niqutiojonu nia jamuenuta, nocua nia taraajenutano. Naajuhuj, majaari nia niqutionu nia cumaneeca saaja tamasaca shiniujiushacari nijaniya. Pueyaso cutaraari shuquiriaatia niqutiojuaca timitiaja. <sup>8</sup> Pueyasocuajaari cumaacaraca na niqutionura nijaniya puetunu nia panishanojuanaa nia jiitiasocoriquiano pueyaracaanu. Naacuajitij, niaari pueyaracaanu socua queraatia jiitiajaca quiniutianiya, tamasaca nia niqutiojonurajuhuj, nojori jaara jiitaaquiriquia

nojori panishano. <sup>9</sup> Naa jaara naa capora quiriquiatej, niaari nio tariucuacaanu Pueyaso Rupaa naajiotasano tohuateenutaniya. Naa sequeyari:

“Maninia pueyanoori juhua capora nareja niqutiojojua na casamijiniji casamiijiuniucua pueya. Na miishanoori pueyaracaanu maninia quiniutianiya Pueyasora. Majaari Pueyaso niyajetanu quiniutianiya”.

<sup>10</sup> Pueyano natasacari casaa jajau na cuhuariquiajinia, Pueyasoori na canijiaquiaa. Naacuajitij, na camaruuri socua jiitianutaniya tamacari na natasocoriquianohua, na miaquesocoriquianonio. Naajuhua, juhua capora nia niqutiojosacari nia jiitiasanojiniji, niaari juhua nia cuhuariquiajinia nataa. Naacuajitij, Pueyasoori nia jiyatenutaniya socua queraatia jiitiajaca nia quiniuria, pueyaracaanu maninia nia miiniuria tamasacarujuhua. <sup>11</sup> Naa capora nia quiniucua nia casaatatej, Pueyasoori juhua capora nia niqutiojonutaniya puetunu na jiitiasanojinijianaa, queraatia nia jiitianura, tamasaca nia niqutiojonura pueyaracaanu. Naacuajitij, canaa jaara nia niqutiojosano cumaneeca tiuquitiasee Judea jiyajiniani, parta Pueyaso pueyari Pueyaso timitianutaniya. Capora nia quiniucua, nojoriiri Pueyaso sequenutaniya, “paacarasho”. <sup>12</sup> Naacuajitij, nojori jaara masere nojoririano nia jiyarosano cumaneeca, majaari saaja nojori jiitianu quiniutianiya nojori panishano. Cunoori saniya nojori shiniujiuniutianiya nojori shuquiritiniuria Pueyaso, queraatia nojori sequesacari: “Paacarasho Pueyasonaa”. <sup>13</sup> Nojori jiitiasacari puetunu nojori panishanojuanaa, nojoriiri Pueyaso maniniuhuaqueetanutaniya jiyanoohua. Nojoriiri naa maniniuhuaqueetanutaniya Pueyaso, nojori niishishacari niaaqui seetanujuanaa Jesucristo Rupaa tojitiajacajuhua, naajaa, taucuaca nia quishacari nojoriria. Nojoriiri Pueyaso maniniuhuaqueetanutaniyajuhua jiyanoohua capora nia quiniucua nojoriria, tamasacaranio. <sup>14</sup> Nojoriiri Pueyaso secojonutaniya niaacuarajuhua, jiyanoohua nojori paniniutia nijaniya, Pueyaso jiyatenuucua nijaniya nojori panijaca nia quiniuria. <sup>15</sup> Naajuhua, janiyari jiyanoohua Pueyaso sequeyani, “paacarasho”, jiyanoohua maninia na miiniucua nijaniya, Neyanu Jesucristo jataniniucua nioojia.

## 10

### *Pablo cuaara tojishaaria, Jesucristo jiyatenuucua nojuaja na rupaa pohuatanara*

<sup>1</sup> Janiyacuajaari Pablóni. Quenaaja cua tojitiare. Cua Jiyaniijia Cristoori jiyanoojia quiquiaaricuaa, jacaria pocuajajuhua. Janiyari naa quiniu panijajuhua. Naaratej, janiyari quiarjia nia nenecojiyani, cua tojitiare quenaaja. Tamasacanaari cua pocuquiaa, janiyanaari jacaria pocuaja quiquiaa juhua puerejani, nia tajinia cua quishacari. Saniniuujia, tucuaaanu cua quishacari, janiyanaari jiyanoohua nia nacasuquiaa cua naajionejiniani, juhua nia pueresano jiyaniijia. <sup>2</sup> ¿Seetanutejanaa, janiyate naani? Janiya jaara naa quiya niaarani, naajaa. Quiarjia tucuaaanu cua quishacarijia, janiyari nio cua naajiojinia nia nenecojiyani, nia tojiniuria janiya. Saniniuujia, niaacua cua tiuquishacari, janiyari noo pojori nacasunutaniya jiyanohuani, sacuaratia cucuara rimiaaquenuquiaani. Janiyari naa miiniutianiya nojorini, nojori jaara tarinitiaaquiyajaa na sacuaratia na pocoojonutej. Cuno pojoriiri jiyaniya canaari saaja juhua mijiria quiniaa pueya miiquiaani, maninia canaa quiniuria nia niqiuara. <sup>3</sup> Seetanujuanaacuaaquinatejaj, canaari nareja pueyani. Naajaa, majaari canaa miaquejonu quiquiaa canaa paraa, taa pueya miaquetoojoquiaacuaani. <sup>4</sup> Mijiria quiniaa pueyari miaquetoojoquiaa cutara tama nojori shipinishano casaatajaaja. Canaa miaquetoojotaja saniniuujia, cunoori Pueyaso cumaacajanaa cutara. Naacuajitij, canaa naata Sesaaca niishishano shocotanu. <sup>5</sup> Pueyaso cumaacata, canaari mijiria niishijaca niishishano shocotaquiaani. Cuno niishishanoori Pueyasojiniji niishishano jataniquiaa juucua, maja pueya niishiniuria Pueyaso. Naajaa, Pueyaso cumaacata, canaari puetunujuanaa najuhua pueya niishiriojosano jataniquiaani, Cristo tojijaca nojori quiniurajuhua. <sup>6</sup> Canaacuajaari Pueyaso jeenucuasano pueyani, canaa nacasunura puetunu tojiyashijiacajanaa. Naacuajitij, niaa jaara puetunu Pueyasojiniji canaa niishitiojosanojuanaa tojitiajacara quiriohua, na nuhuaji cutara canaa naata puetunu cureeno tojiyashijiacajanaa saniitionu.

<sup>7</sup> Niaari tama cushitiiquiaajaacujua nia tiuushacari cuno sapojonuujuaa pohu-  
 atasanooqua. Nojoriiri sapuenu juhua Jesucristo jiyaramiquishano niquishiya najuhua-  
 naj. Maninia nia niishiriojore pueyanaa, nijaniya cante sapojosaacanucujani. Naa  
 jaara niishiri niaari seetanujuanaa Cristo saquiriojosano pueya, naacuajitij, nijaniya  
 cuaara niishiiria canaari Cristo saquiriojosano pueyajaniuhuj. <sup>8</sup> Naa jaara jiyaniya  
 janiyari juhua pueya shocotaja nia sequeyani: “Canaari nia jiitianaani”, naajaa, majaari  
 cua caririqiniu naa cua sequesacari nijaniyatej. Pa Jiyaniijia Cristojuanaacuajaari  
 canaa jiyatequiaari nia jiitianaa canaa quiniuria. Canaari naa jiyatesaaquiaarini,  
 canaa cumaquiniuria nijaniya na rupaata, seetanujuanaa Cristo pueya nia quiniuria.  
 Majaari canaa jiitianu najuhuana na cumaaca, canaa sesonura nijaniya. <sup>9</sup> Naa cua  
 naajiosacari niaacuaratej, majaari nia jiyaniyu janiyari nia piriyojijani nia puerenura  
 janiya. <sup>10</sup> Tamasaca nijaniyajinijinio pueyanaari cua sequequiaajuhuj: “Pabloori  
 puera jiyanohua pa nacasuquiaa na naajioneejinia. Naajaa, pa tajinia na quishacari,  
 nojuajaari juhua tojishoo pueyano niquishano quiquiaa. Naajuhuj, na pohuatasacari  
 pa niqiuara, na pohuatasanoori maja shanohua tojishano”. <sup>11</sup> ¿Seetanutejanaa?  
 Cante naa pocuaquiaani, nojuaja cuaara niishiiria quiarijia, taa canaa naajiocanu  
 niaacuaracuaja tucuacaanu canaa quishacarijiani, canaari naa miiniutianiyani niaacua  
 canaa tiuquishacari.

<sup>12</sup> Cuniqiu niaata quiyajaariuhua tamasa pueya, canapuate nia sequequiaacua-  
 jani, nojoriniaari socua maninia Pueyaso rupaa pohuatanaa tamasaajiniji, canaa-  
 jinijijuhuj. ¿Nojoritiiri seetanujuanaa socua maninia Pueyaso rupaa pohuatanaa  
 canaajiniji? Johuaj. Naajaa. Majaari canaa tacaaniu quiquiaa juhua nojori canaa  
 quiniuria. Cuno pojoriiri tama na cuaqueya timitiacoquiaajaacujua, nojori soosacari  
 narta Pueyaso rupaa pohuatanaa. Nojoriiri naa quijiacatej, nojori jiyanihacari nojori  
 cutaraari socua tojishano pueya tamasaajiniji. Naa nojori miishacarijij, nojori cutaraari  
 seetanujuanaa mosanucua. <sup>13</sup> Canaa cutara, majaari tamasa poonijiosano canaa  
 jiyatenu quiquiaa juhua canaa poonijiosano Pueyasora. Canaa cutaraari saaja canaa  
 miishano shuquiritiaquiaani, tee Pueyaso jiyaroquiaari canaacujani. Nojuacuajaari  
 canaa jiyaramiquiquiaari niaacua Corinto tiacajinia, nia niqiuara canaa pohuatanura  
 na rupaa. Naacuajitij, niaari na muerasura quiquiaari. <sup>14</sup> Majaari najuhuana canaa  
 timitianu nijaniya, Pueyaso muerasu nia quiniuucua. Niacuajaari Pueyaso muerasura  
 quiquiaari canaa pohuatanuucua nia niqiuara seetanu rupaaajanaa Jesucristojiniji. Canaa  
 cutaraari seetanujuanaa Pueyaso rupaa pohuatanu coteetanaa nia niqiuarani. <sup>15</sup> Majaari  
 canaa shuqiritianu najuhuana nijaniya. Canaa cutaraari nia tiuutiquiaari Jesu-  
 cristoocuaani, niaacua Pueyaso jiyaronuucua canaa. Naajaa, canaari socua nia pohuatanu  
 paniya Pueyaso rupaani, seetanujuanaa Jesucristo rupaacua tiuujica nia quiniuria.  
 Naacuajitij, niaa jaara seetanujuanaa Pueyaso rupaa tojijica quiri, niaari saniniuujia  
 na naata canaa cumaquiniu. <sup>16</sup> Niocua canaa cumaquiri canaa quianura tamaqui, tee  
 Jesucristojiniji pohuatasoojua quiyacuajani, tii canaa pohuatanura nojuajinijijuhuj.  
 Majaari canaa quiniu paniniu pootia tamasa poonijiosaqi, taa cuno rimiaacoori  
 quiquioya shuquiriatia canaa poonijiosaquicuaani. ¿Nojori shuqiritiasanoteeri tama  
 nojori poonijiosanojuaaja? Maja. Niacuajaari Pueyaso muerasura quiquiaari canaa nia  
 tojitianuucua.

<sup>17</sup> Pueyanaa, nio tariucuaaanu naajiotasanoori niaara, nia niishishocoriquiano. Naa  
 sequeyari: “Cante shuquiriatia quijia quiniu paniyani, nojuaja cuaara pa Jiyaniijia  
 shuquiritiaara cutara”. <sup>18</sup> ¿Taa nia sequeyani pueyanaa? ¿Cana Pueyaso sequenutaniya  
 socuaarini: “Quiaa cutara maninia cua pueyanonijojua”? ¿Cunotee, tama na cuaque-  
 yajaaja sequejani: “Janiya cutaraari maninia Pueyaso pueyanoni”? Maja. Pueyaso  
 shuqiritiasano cutaraari noo pueyano, cana pa Jiyaniijiajanaa sequenutaniyacujani:  
 “Quiaa cutaraari maninia cua pueyanonijojua”.



<sup>1</sup> Pueyanaa, cua tojitiuri nareja. Juhua paateca tama cua cuaqueyajiniijiaaja nia pohuatanu paniyanijia. Naajaa, quenaaja nia rejeretare janiya. <sup>2</sup> Janiyari jiyanohua nia tacaatiaquiaani, saaja Jesucristora nia quiniuria. Niaacuajaari niishiya, naatej, taa pueyano cojuaacuaa neyatuniyojua canuucujini, saaja na camiriquiano pueyanora na quiniuria, naajuhuaaj, janiyari nia cojuanu paniyani sesosoo nia quiniuria nia Jiyaniijiaara. Cristocujaari juhua nia niyacarano. Nia jiitiana cua quishacari, janiyari juhua nia queni. <sup>3</sup> Tariija, niaacuajaari saaja Cristo tojitiajaca quiquiaari, na panijia nia quishacari. Quiarijia saniniuujia, janiyari Sesaaca nia pueretaani, nojuaja mariqui nia sapojoreeri Cristoocujaji nia rupatenura, taa cuno Susanacu sapojoquiaari Eva tariucuaaanucuaani. <sup>4</sup> Cuno sapojonuujuaa tiuquijiosacari niaacua, tamaatia nojori pohuatanura Jesujiniji niajaniya, niaari jaarajaaja ritia na tojiquiaa. Nojori niishitiojosanoori tojetaarucujanaa tamaatia canaa niishitiojosanojiniji niajaniya. Nojori nia tojishacari, niaari juhujaniya samaruhua niishishano tojitiaquiaajuhuaaj. Niaacuajaari tari tiuquiaari Jesucristoocua, Pueyaso jiyanooniuria niajaniya. Saniniuujia, cuno pojori pohuatasacari tamaatia, taa nia miiniutianiya Pueyaso pueya nia quiniuriani, niaari jaarajaaja ritia nojori tojiquiaajuhuaaj. <sup>5</sup> ¿Cuno sapojonuujuaateeri socua tojishocoriquiano janiyajiniji, niaa na jiyatecanu juhua seetanujuanaa Pueyaso jiyaramiquishano pueyarani? ¡Janiyara maja! <sup>6</sup> Seetanujuanaa, majaari cua niishiniu maniniuhuaqueenu cua pohuatasacari Pueyaso rupaa, taa cuno pojoricuaani. Naajaa, Pueyasojiniji cua niishishano cutaraari seetanu rupaaajanaa, tojishocoriquiano cutara. Maja najuhuanaj. Niaacuajaari cuno niishiya, pueyaracaanu saaja maninia cua miishacari nia niquiara, cua pohuatasanojinijinio. <sup>7</sup> ¿Casaara nia tojitiaa cuno pojori quiarijianijia, majaari saniniuujia nia tojitianu janiya? ¿Janiyateeri sesa miiquianu niajaniyani, cua masejoyaquiniuucua nia cumaneeca cua pohuatanuucua Pueyaso rupaa, Pueyaso pueyara nia jatanishaanura? Janiyacuajaari tama cua cuaqueyajaaja mueyashitiquiaarini cua cumaquiniuria niajaniya. Naa cua miiniuucuatej, ¿cunoteeri sesa niaara? <sup>8</sup> Janiyari tamonu jiyacajinia Pueyaso pueya maapuejiniji masejoquiaari cumaneecani, cuno cumaneecata cua quianura niaacua, nia niquiara cua pohuatanura Pueyaso Rupaa. <sup>9</sup> Saniniuujia, nia tajinia cua quishacari, cua jiitaaquishacari cua panishano, naajaa, maja cutaraari cua mashiniquijionu quijia nia cumaneeca. Naa cua jiitaaquishacari cua panishanotej, Macedonia jiyajinijinio parta Pueyaso pueyari namitia tiuquijioquiaari. Nojori cutaraari cumaneeca cua niqitioquiaari, cua panishano cua masetajara. Janiyari naa pueyaracaanu tama cua cuaqueyajaaja cojuaquiaani, maja cua taajetenura niajaniya cua panishano cua jiitaaquishacari. Janiyari naa miiniutianiya pueyaracaanuni. <sup>10</sup> Cua Jiyaniijia Cristocujaari niishiya, majaari quenaaja cumaneeca cua masejonu quiquiaari Acaya jiyajinia quiniaa parta Pueyaso pueyajiniji. Naacuajitij, majaari quenaaja niquiriyatu pueyano Acaya jiyajinijinio naata sequenu janiya: “Pablocuajaari cumaneeca mashiniquijiojua canaajiniji”. <sup>11</sup> Pueyanaa, ¿niaate niishiya casaara pueyaracaanu cua sequequiaani, maja cumaneeca cua masejonu quiquiaa Acaya jiyajinia quiniaa Pueyaso pueyajiniji? Naa cua sequesacaritij, ¿janiyateeri nia paniyaquiyani? ¡Maja! Pueyasocujaari niishiya, janiyari jiyanohua nia panijiani.

<sup>12</sup> Nia sequeereera casaara cua mashiniquijiaquiquiaa nia cumaneecani, cua pohuatasacari Pueyaso rupaa nia niquiara. Cuno pojori, nia jiyanishano Pueyaso jiyaramiquishano pueyani, nojoriiri nia jiyajenetenu paniquiaa. Nojoriniaari seetanujuanaa Cristo jiyaramiquishanojuhuaaj, taa canaacuaani. Saniniuujia, nojori mashiniquijiosacari nia cumaneeca, nojori nia niqitiojonura nareja, naacuajiti maatia niishishiyari, ¡nojoriiri jiyanohua tamaatia canaajiniji! Naaratej, majaari quenaaja canaa mashiniquiniu quiniutianiya nia cumaneeca, canaa pohuatanuucua Pueyaso rupaa niajaniya. <sup>13</sup> Seetanujuanaari, ¡nojoriiri maja Cristo jiyaramiquishano pueya! Nojoriiri tama nojori cuaqueyajaaja jiyatecanu sapuenu juhua Cristo jiyaramiquishano pueya nojori quiniuria. Naacuajitij, nojoriiri nia sapojiya. Nojoriiri sapuenu juhua Cristo jiyaramiquishano pueya niqishano najuhuanaj. <sup>14</sup> Cunoori maja jiyajeneta naa nojori miiniuriatej. Satanáscujaari tama na cuaqueyajaaja jatanijia shacantuucara, juhua

Pueyaso seru na niquishaanura, pueya na sapojonura. <sup>15</sup> Naaratej, majaari cua jiuuji-atenu cuno pojori jaara tama na cuaqueyajaaja jiyatecanu juhua seetanujuanaa maninia miijiaca pueya nojori quiniuria. Nojoriiri naa miiquiaa, Satanás seya nojori quiniuucua. Naajaa, jnojoriiri saniitiosaanutaniya sesa nojori miiniuucua!

*Pablo pohuatasacari naquiya na miiniujiniji, Cristo jiyaramiquishano na quiniuucua*

<sup>16</sup> Socua nia sequenu pacuteyanijia, majaari nia jiyaniniu janiyari paatecani cua pohuatasacari tama janiyajinijiaaja. Niaa jaara jiyaniya janiyari seetanujuanaa paatecani, naajaa, rupaquijia cua tojitiare quenaaja. Janiyari juhua paateca tama janiyajinijiaaja niaara pohuatanu panijajanihuaj, taa nia tojishano pueya miiquiaacuaani. <sup>17</sup> Naa cua pohuatasacari tama janiyajinijiaajatej, cunoori maja cua Jiyaniijia Cristo pohuatesano janiya. Cunoori tama cua pohuatasanojuaja, juhua paateca cua quishacari. <sup>18</sup> Naatej, taa queraatia Pueyaso rupaa pohuataanaa tama nojorijinijiaaja pohuatanuuquiaacuaani, janiyari quiarijia naa tama janiyajinijiaaja pohuatanu panijajuhua. <sup>19</sup> Jiyanohua niishijia nia quishacari, niaari cuno paatecoori tojtiaquiaa juhuajaniya. Naatej, taa nia tojtiaquiaa cuno pojoricuaani, quiarijia cua tojitiarejuhuaj. <sup>20</sup> Naajuhua, niaanaari juhuajaniya rejeretaquiaa cuno pojori, nojori jaara nia poonijotequiaa juhua nojori seya. Niaanaari nojori rejeretaquiaa nojori jaara nia jiiitasano casami riutiocojoquiaa niaacuaji. Juhua nia jiyaniijia nojori quishacari, niaanaari nojoriicua shiiniuquiuaa saaja, naajaa, nojori soosacari nijaniya. Niaanaari juhuajaniya nojori rejeretaquiaa-juhuaj, nojori jaara nia jiquioco maseteriquia. <sup>21</sup> ¡Nojoriqiri jiyaniijianucujanaa cutara! Saniniuujia, janiyari nojori naaqui caririquiyani juhua nojori cua quiaquiniuucua, maja naa canaa miiniuucua nijaniya, taa nojori miiquiaa sesa nijaniyacuaani.

Naajaa, quiarijia cutara, janiyari tama janiyajinijiaaja pohuatanutaniyani, taa nojori pohuataquiaa juhua paateca tama nojorijinijiaajacuaani. <sup>22</sup> ¿Taa nojori sequequiaani? ¿Nojoritiniaari Hebreo pueya, Hebreo rupaa pocuajacajuhua? Janiyajuhua. Janiyari Hebreo pueyanohua, Hebreo rupaa pocuajanio. ¿Nojoritiniaari Pueyaso saquiriojosano Israel pueyajinijinio? Janiyacuajaari Israel pueyacujinio supuenohua. ¿Abrahamtenaari nojori supuetana? Abrahamcuajaari cua supuetanajuhua. <sup>23</sup> ¿Nojoritiniaari Cristo jiyaramiquishano pueya? Janiya cutaraari seetanujuanaa Cristo seruni. Janiyari jiyanohua soyani, juhua paateca naa cua pohuatasacari tama janiyajinijiaajatej. Naajaa, janiyari seetanujuanaa nia sequeyani. Janiya cutaraari socua jiyanohua nojorijiniji poonijioquiaari Cristorani. Janiya cutaraari pueyaracaanu caminiujiushaaquiaari nujuatejojuajinia nujuatejonuni, Jesucristojiniji cua pohuatanuucua. Naajuhua, janiyari pueyaracaanu caminiujiushaaquiaari majacununi. Naajuhua, janiyari pueyaracaanu cocuaatia miiquiaarini, pueya monu panishacari janiya. <sup>24</sup> Cuarta Judiocuacaari cua caminiujiuquiaari majacunu puetunu niquiriyatu pa juaashiquiajanaa. Cuarta Judiocuaca majacusacari, nojoriiri na majanu serojua. Nojori majasano jaara treinta y nueve quiri, nojoriiri jiyacari carteja na majacusano pueyano. <sup>25</sup> Naajuhua, janiyari jiuujianaraca caminiujiushaaquiaari macata piquiniuni. Tamacari, janiyari saitia jacusaaquiaarini. Shoniacu caminijinia cua jaaretasacari buquejia, jiuujianaraca buqueeri tiuquitiaquiaari. Naa tamacari buque tiuquitiasacarijuhuaj, janiyari na raucua cuataquiaarini puetunu niucujanaa, niquiriyatu juucanio. Cunoori quiquiaari puereeta shoniacu caminia jiuujiajia. <sup>26</sup> Janiyari pueyaracaanu tiqiyocua rucuanajoja quiquiaarini. Naacuajitij, moocua cua niuuniujiushacari, janiyari cocuaatia miiquiaarini. Naa cua rucuanajosacari, janiyari pueyaracaanu puereeta nohuasenuujuaca quishaqui shocoquiaarini. Naajuhua, tama cuarta Judiocuacajari pueyaracaanu cua miitiano panijia, taucucanio. Puereetaari quiquiaarijuhua cua rucuanajosacari tiacajinia, tiqiyocua pueya quiaquishaqui, shoniacu caminijianio. Naajuhua, puereetaari quiquiaari janiyara, cua jyanishacari janiyari cuarta Pueyaso muerasu tajinia quiyani, saaja cua paraa nojori quishacari. <sup>27</sup> Jiyanohua cua poonijosacari cua Jiyaniijiaa cua samareenuta, janiyari pueyaracaanu sutequiaarini. Janiyari miaajequiaarini. Janiyari jiyamuequiaarijuhuaj. Janiyari noojiaqueya miaqueyaquiquiaarijuhuaj, jeya cua

quiyaquishacari. Janiyari naquiya miiquiaari cua rucuanijosacari shiniquiajiniajuhuaj, toqueju cua quishacarijuhuaj.

<sup>28</sup> Janiyari naa naquiya miishaaquiaarini, mariyata tamaatia naquiya miiniujuhuaj. Naajuhuj, janiyari puetunu juucajanaa niishiriojoquiaani, taariquitijia Pueyaso muerasu maapue quiya puetunu jiyacajiniajanaatej. Janiyari jiyanohua nojoriicua tacaquiaani. <sup>29</sup> Naacuajitij, tamonu cuarta Pueyaso pueyano jaara rejeretaaquiriquia Sesaaca saniniujiushacari nojuaja, janiyari jiyanohua taraajeja nocuani. Tamonu jaara sesa miitishaare, janiyari na naaqui caririquiyajuhuj. <sup>30</sup> Niaa jaara paniya socua cua pohuatanura nijaniya tama janiyajinijiaaja, nia pohuatareeraqui pueyaracaanu taraatia cua miishaanujiniji. Tama janiyajaaja, janiyari maja cumueecani. <sup>31</sup> Pa Jiyaniijia Que Pueyasocujaari niishiya janiyari seetanujuanaa sequeyani. Nojuajanaa cuara pueyaracaanu maniniuhuaqueetasaaria cutara, maja nojuajiniji pohuataanaa. <sup>32</sup> Tarijia, Damasco tiacajinia cua quishacari, tamonu pueyanoori Damasco tiaca jiyaniijia quiriquiaa. Nojuajaari cuno jiya jiyaniijia Aretas jiyatesano quiquiaari, Damasco tiaca jiyaniijia na quiniuria. Cuno jiyaniijiaari na soldadohua nujuatejoquiaari tiaca shocua sohuaca tohuateyaji, nojori quianura juucua janiya. Nojoriiri cua quiatunu paniriquiaa Jesucristojiniji cua pohuatanuucua. <sup>33</sup> Naajaa, cuarta Pueyaso pueyari namitia cua roshinitiaquiaari shuquiriaatia, puereetuca canaasatujinia, cuno tiaca sohuaca tacuhua shuucuaji. Janiyari naa mashiquishaaquiaari cua paraacuajini.

## 12

### *Pablo pohuatasano Pueyaso niquitishanojiniji nojuaja*

<sup>1</sup> Paa jaara tama pajaniyajiniji pohuatariquia juhua paatecani, cunoori najuhanaj. Naajaa, socua nia pohuatareeraj. Nia pohuatareera taa cua niquitishaaquiaari pa Jiyaniijia casaa jiyocuacaanuni. <sup>2</sup> Tariucua Jesucristoocua tiuujia cua quishacari, janiyari jiya cajiniocua cacojiria tacanishaaquiaari Pueyaso quiquiojiniarani. Naa cua tacanishaanujinijitij, tari shocojorucuaari catorce marijia. Majaari cua niishiniu taariquitijia cua tacanishaaquiaaritij, puetunu cua cuaqueyatajanaa, saaja cua sohuaju soj. Johuj. Saaja Pueyasocujaari na niishiya. <sup>3</sup> Cua tojitiare, seetanujuanaa majaari cua niishiniu taariquitijia cua tacanishaaquiaaritij, puetunu cua cuaqueyatajanaa, saaja cua sohuaju soj. Pueyasocujaari na niishiya. <sup>4</sup> Janiyari saaja niishiya cutarani, janiyari shuquiriaatia quishaqui Pueyaso shuriucua tiuquinishaaquiaarini. Janiyari tii casaa tojiquiaarini. Cunoori maja quenaaja na naata pohuatasaanu mijiria quinia rupaajinia. Pueyasoori cua tenujuquiaari maja cua caminiujiuniuria jiyocuacaanu cua tojishano mijiria quinia pueyara. <sup>5</sup> Naa Pueyaso niquitiniuucua janiyatej, janiya maara tama janiyajinijiaaja poojotariquia cua timiniutiani, juhua tamasaca shocotaja cua quishacari. Naajaa, majaari cua timitianu tama cua cuaqueyajaaja. Saaja shuquiriaatia quiya cutaranijia, cua niishishacari majaari cua naata tama cua cumaacatajaaja rejeretanu taraatia cua miiniu. <sup>6</sup> Naajuhuj, janiya jaara tama janiyajinijiaaja pohuatanu paniriquiani, cuno maara seetanujuanaa pohuatasano quiriquia, maja juhua paateca pohuatasano. Seetanujuanaa majaari naa cua pohuatanu paniniu, pueya mariqui cua pohuatasanojiniji cua jiyaniiriiri janiya jiyanohua maninia pueyanoni. Pueya cuara niishiiria cutara taamueca pueyanote janiyani, saaja nojori namijata nojori niquishacari cua miishano, tama nojori numaatajaaja nojori tojishacari cua niishitijosanojuhuaj. <sup>7</sup> Pueyaso niquitishano janiyani, na niishitishano janiyajuhuj, cunoori puera jiyanohua maninia quiquiaari. ¡Cunoori jiyanohua cua timitiquiaari! Naaratej, janiyari cua cuaqueyajinia nootusaaquiaari juhua jiohuacatani, janiya mariqui pueya shocotajara quiriiri. Cuno taajeta noonuuri Satanás miishano quiquiaari, na tacaatiniuria janiya. <sup>8</sup> Janiyari jiyanohua secojoquiaari pa Jiyaniijiani, nojuaja cuara shaataara cua nootunenu. Janiyari jiuujianaraca pacutejoquiaari secojonuni. <sup>9</sup> Cua Jiyaniijiaari saaja cua sequequiaari: “Janiyacuajaari quia cumaquiniutianiyani, cua panishano pueyano quia quiniuucua. Saaja cunocujaari quiara. Cua naatacuajaari socua jiyanohua poonijiotenu cua cumaca sasaca cua

pueyajinia, tamasaca niishiniuria cunoori seetanujuanaa cua cumaaca, maja pueyano cumaaca". Naa cua Jiyaniijia riucuasacari janiyatej, janiyari shuquiriaatia quiyani cumaacaaju pueyano cua quiniuucua pueyaracaanu. Naacujitij, Cristo cumaacaari socua janiyajinia niquishaaquiaa poonijiyano. <sup>10</sup> Naacujitij, janiyari shuquiriquiaani cumaacaaju pueyano cua quiniuucua, Pueyaso cumaquiniuria janiya. Naacujitij, tamasaca jaara sacuaraatia casaa sequeriquia janiya na juaashacari, janiyari Pueyaso cumaacata juhuajaniya na rejeretaquiaani. Naajuhuj, janiya jaara cua panishano jiitiaquiriquiani, naajaa. Pueyaso cumaquishacari janiya, janiyari juhuajaniya rejere-taquiaani. Naajuhuj, janiya jaara naquiya miitiasaaquiaani, taraatia cua miishacarijihuua Cristora cua poonijionuucua, naajaa. Pueyaso cumaacata, janiyari juhuajaniya rejeretaquiaa saajani. Naacujitij, janiya jaara tojetaarucujanaa cumaacaaju quiquiaani, janiyari jiyacari socua jiyanohua cumaacaraca quiquiaani, Pueyaso cumaquiniuucua janiya.

*Pablo tacaashacari Corinto tiacajinia quiniaa Pueyaso muerasu maanuucua*

<sup>11</sup> Janiyari seetanujuanaa juhua paateca tama janiyajiniijiaaja pohuatareeni, juhua pueya shocotaja. Niaacuajaari naa cua pohuateree, niaacuaja naara cucuaji tacuyaquiquianu cua sesacaja pueyatej. Janiyanaari najuhuana quijia pueyanoni. Naajaa, niaacuajaari niishiya, janiyari maja socua najuhuana quijia cuno pojorijiniijini. Cuno pojori nia tojishano pueyani, nojoriiri tama na cuaqueyajaaja jiyatecanu juhua seetanujuanaa Jesucristo jiyaramiquishano pueyara cutara. <sup>12</sup> Juhujaniya cua rejeretasacari naquiya cua miiniu nia tajinia cua quishacari, naajaa, janiyari pueyaracaanu jiyajeneta casaa miijioquiaari Pueyaso cumaacata nia niquiarani. Niaari nocuaji jiuujiatecoquiaari. Naacujitij, niaa cutaraari niishiquiaari janiyari seetanujuanaa Cristo jiyaramiquishano pueyano cutarani. <sup>13</sup> ¿Janiyateeri sesa nia jiitiaquiaarini, Pueyaso rupaa cua niishitiojosacari niajaniya? ¡Maja! Janiyari nia miiquiaari maniniani, naajuhuj, taa cua miiquiaari tamasaca jiyacajinia quiniaa Pueyaso pueya maapuecuani. Majaari rimiajata cua miiniu quiquiaari niajaniya, niaata cua quishacari. Maja cutaraari cua mashiniquijionu quiquiaari cumaneeca niajaniyajini. ¡Cua jiyanoori cunora, jaara sesa quiquiaari niajaniyara!

<sup>14</sup> Quiarijiani, janiyacujaari quera quiaa niaacuani. Janiya jaara niaacua quiaareni, cunota quiniutianiyari jiuujianaraca cua pacutenu niaacua cua quianu. Majaari nia jiyaniniu janiyari nia cumaneeca mashiniquijionuucua quianutaniyani. Janiya cutaraari maja cua jiaatianu nia jiitiasano casamiicua. ¡Janiyari saaja niaacua jiaatiaa cutarani! Niaacuajaari juhua cua muerasuniyojua. Niaacuajaari maninia niishiya, muerasuuri maja na reratenu cumaneeca na quera. Na que cutaraari saniya cumaneeca rerateja necohuara. Naacujitij, cua mashiniquijiyaquishacari cumaneeca niajaniyajini, janiyari seetanujuanaa juhua nia queni. <sup>15</sup> Janiyari shuquiriaatia tama cua cumaneecajaaja puecanutaniyani cua quishacari niaata, socua cua niishitiojonura niajaniya. Naacujitij, janiyari tama cua cumaacajaaja puecanutaniyajuhuj, nioojia cua cumaquiniuria. Janiyara, nioori taraatia: janiya jaara socua nia paniquiaani, niaari socua jiyacatequiaa secaja nia paniniuria janiya.

<sup>16</sup> Niaacuajaari niishiya, majaari quenaaja nia niqutionu quijia nia cumaneeca janiya. Naajaa, tamasaca niajaniyajiniinonaari soquecoya, janiya naasucuaari jiyasohuaja nia cumaneeca nohuasejoquiaani, cua sapojonuta niajaniya. <sup>17</sup> ¿Seetanutejanaa pueyanaa? ¿Janiyateeri nia sapojoquiaari niaacua cua jiyaramiquishano pueyatani? ¿Nojoritiiri nia cumaneeca masequiaari? ¡Maja! <sup>18</sup> Janiyacuajaari Tito jiyaroquiaari niaacua na quianurani, na cumaquiniuria niajaniya. Janiyari nata jiyaroquiaari tamonu Pueyaso pueyanohuj. ¿Titoteeri jiyacari nia cumaneeca mashiniquiquiaari? ¡Majaruhua! Niaacuajaari niishiya, Titocuajaari cumaneecaacua jiaatiaashijia, juhua janiyajuhuj. Janiya Titota, canaacujaari jiyanohua nia paniquiaani.

<sup>19</sup> Sacuaraatia canaacuara nia rimiaaquenuucua pueyanaa, naajaa, majaari nia jiyaniniu canaa tama canaacujijiaaja tacuyani, juhua canaa nequesoreenaa nia quishacari. Saniniuujia, canaari nia Pueyaso niqiara nio naajiya niaacuarani, Cristo

pueya canaa quiniuucua. Naajuhuj, puetunu cua sequesanojuanaa nijaniya nio cua naajiojiniani, cunoori cua cumaquiniuria nijaniya cua panishano pueyanaa. Janiyari naa nia nacasuyani, seetanujuanaa Jesucristo tojjiaca nia quiniuria. <sup>20</sup> Janiyari puereyani, niaacua cua tiuquishacari, janiyari niaacua taraajenutaniyani cua riuritasacari nijaniya sesa quiyanojua, maja maninia taa cua paniriquiaacuajani. Janiya jaara nia riuriatasee naa sesa quiyanojuani, jeecatoojua, niaari saniniuujia taraajenutaniya nia niishishacari taa cua miiniutianiya nijaniyani. Janiyari puereyani niaa naasucuaari juayonuujutaajaa. Naa naasucuaari niarta pueyano jiitiasanoocua jiaati-ajaca quiyajaa. Naa naasucuaari juaaniu porocua quiyajaa. Naa naasucuaari tama nia panishanojuaja miijiaca quiyajaa. Naa naasucuaari niarta pueyacuara coriaacojuaca quiyajuujaj. Naajuhuj, naa naasucuaari niarta pueyacuara rimiaaquenujuaca quiyajaa. Naajuhuj, naa naasucuaari tama nia cuaqueyajaaja jiyaniya niaa socua maninia pueya tamasa pueyajiniji. Naa naasucuaari jatiqumi quiyashijiacajuhuj, pueyacaanu nia juayonuujutacuua. <sup>21</sup> Naacuajitij, janiyari puereyani janiya naasucuaari Pueyaso niqiuara caririquiniutianiya nia naaquinii, niaa jaara naa sesa miijiaca quiyajaa. Janiyari puereyajaaniuhuj, janiya naasucuaari nujuquenutaniya cua taraajenuta noo sesa miijiaca pueyacuani, cuno pojori jaara sesa na miishano tarinitiaquiianujua. Noojiaqueya nijaniyajinijinoori sacuaraatia miijiaca quiquianujua: cararaatia miijiaca sacuaraatia, na camishoo maaji numuetucunu porocujuhuj, naajuhuj, majaari tama nojori cuaqueya panishanojuaja nojori rejetenu quiquiaa.

## 13

### *Socua Pablo nacasacari Pueyaso pueya*

<sup>1</sup> Niioori quiniutianiya jiuujianaraca cua pacutesacari quianu niaacua. Tariucuaaanu Pueyaso rupaajinia, paari nio niishitiojosaaquiaarini: querajaa pueya jaara mariyata pohuatare nojori niquishanojiniji, pa naata seetanujuanaa na pohuatasanoocua tiuuniu cutara. Naajuhuj, niaacua cua tiuquishacari, janiyari naa miiniutianiyani cua nequesoreesacari cuno sesa miijiaca. <sup>2</sup> Pueyanaa, janiya jaara pacutequiaariuhua niaacua quianutej, janiyacuaajaari puetunu nijaniyajinijinio cuno sesa miijiacajanaa piriyojoquiaarini. Quiarijiani, tucuaaanu cua quishacarijia, janiyari puetunu cuno sesa miijiacajanaa socua piriyojijiani. Naacuajitij, janiya jaara niaacua tiuquishiini, cuno pojori jaara noojia tacatoyaquiayjaa, majaari nojori cua jiuujiaaniu quiniutianiya, narta sesa miijiacanio. <sup>3</sup> Cua nequesoreesacari cuno sesa miijiaca, niaari jiyacari niishiniutianiya janiyari seetanujuanaa Cristo sequesano caminiujiuniani, taa nia niishiniu paniriquiaacuajani. Niacuaajaari tari niishiya, pa Jiyaniijia Cristoori maja na jiitianu nijaniya juhua cumaacaaju pueyano. Niacuaajaari na cumaaca niqiuquiaa tama nijaniyajinijaaja na saniitiosacari nijaniya. <sup>4</sup> Seetanujuanaa, Cristoori juhua cumaacaaju quiquiaari jaara niyacutesanojinia teetesaaquiaari. Saniniuujia, Pueyaso samiitianishacari nojuaja, nojuajaari quiarijia puetunu Pueyaso cumaacajanaa jiitiaa. Naajuhuj, canaa, na rupaa pohuatanaani, canaari naquiya miishaaquiaajaaniuhua saaja mijiria quiniaa canaa quiniuucua, taa nojuaja quiquiaaricuaani. Saniniuujia, Cristo rupuesano canaa quishacari quiarijiani, canaa cutaraari Pueyaso cumaacaracani, maninia canaa jiitianura nijaniya.

<sup>5</sup> Naarate pueyanaa, jacaria nia niishiriojore, ¿niaate seetanujuanaa Jesucristoocua tiuujia, maja soj? ¿Niaate maninia miijiaca taa Pueyaso muerasu miiquiaacuani? ¿Majateeri nia niishiniu, niaa jaara seetanujuanaa Jesucristoocua tiuujia quiri, nojuajaari nioojiajinia quiya? <sup>6</sup> Naajuhuj, jacaria nia niishiriojore canaajiniji. Naa niishitiriquiani, canaari seetanujuanaa Jesucristo jiyaramiquishano pueyani, maja sapojonu-juaca. <sup>7</sup> Canaari Pueyaso secojoquiaa niaacuarani, tojetaarucujanaa sesa miyashijia nia quiniuria, maninia Pueyaso muerasu nia quiniuria. Majaari naa canaa secojonu quiquiaa saaja pueya niishiniuria canaa seetanujuanaa Jesucristo jiyaramiquishano pueyani. Canaari saaja nia panitiaa cutarani, maninia miijiaca nia quiniuria Pueyasora. Naa jaara naa maninia miijiacara quiriohua, majaari canaa saniitionu quiniutianiya nijaniya Pueyaso cumaacata. Naacuajitij, majaari pueya niqiniu quiniutianiya Pueyaso

cumaaca canaa jiitiasano. Naajaa, pueya jaara jiyaniya canaa najuhuana quijiaca pueyani, naajaa. <sup>8</sup> Canaa jiitiasano cumaacaari maja canaa saniitiotajara seetanujuanaa Pueyaso rupaa tojitiajaca. Canaa cumaaca cutaraari canaa cumaquiniuria nijaniya, socua maninia Pueyaso Rupaa tojitiajaca nia quiniuria. <sup>9</sup> Naacuajitij, canaari shuquiriquiaani niaacua canaa paaretaaquishacari canaa cumaaca, canaa saniitionura nijaniya niaa jaara Pueyaso tojitiaashijiaca quiriqia. Naacuajitij, canaari juhua cumaacaju pueya niqushano quiniutianiyani, cumueeca Pueyaso muerasu nia quishacari saniniuujia. Canaari cunora Pueyaso secojoquiaani, tojetaarucujanaa maninia mijiaca Pueyaso muerasu nia quiniuria seetanujuanaa. <sup>10</sup> Janiyari nio cua naajioneejinia jiyanohua nia nacasuyani tucuaaanu cua quishacarija, maja jiyanohua cua nacasunura nijaniya, niaacua cua tiuquishacari. Pa Jiyaniijiacuajaari cua jiyatequiaari juhua nia jiyaniija cua quiniuria, na cumaacata cua canashitijionura nijaniya, seetanujuanaa cumueeca na muerasu nia quiniuria. Pueyaso niqitiosano na cumaaca janiyari maja cua sesonura nijaniya.

<sup>11</sup> Cua tucuatnura nio cua naajioni cua panishano pueyanaa, janiyari nia panitiaani shuquiriaatia nia quiniuria pueyaracaanu. Saaja maninia quiniuucua jiaatiajaca nia quiri. Nioojia nia cumaquiri, maninia cua rootasanota. Naajuhuj, nia jyanootiooriquia maninia rupuetootesano nia quiniuria. Naa nia quishacaritij, Pueyasoori nia rupueja quiniutianiya. Nojuajaari pa panijia, pa jyanoojiajuhuaj. <sup>12</sup> Pueyanaa, Pueyaso tojijiaca nia quiniuucua, nia saruhujotooriquia nujuunuta, seetanujuanaa nia paniniutia niarta Pueyaso pueya. <sup>13</sup> Puetunu niqijinio parta Pueyaso muerasujuaanaari cua sequeya cua saruhuanura nijaniya.

<sup>14</sup> Pa Jiyaniija Jesucristo cuara cumaquiiria nijaniya pueyaracaanu. Nijaniya cuara quiiria pa Que Pueyaso panishano pueyaracaanujuhuj. Naajuhuj, niaa cuara quiiria Pueyaso Sohuanu rupuesano pueyaracaanu. Puetunu nijaniyajanaa cuara naa quiiria.

## PABLO NAAJIONEE GÁLATA JIYAJINIA QUINIAA PUEYASO PUEYACUARA

### *Gálata pueyacuara naajionee*

<sup>1</sup> ¿Niaate quiyajaa pueyanaa? Janiyari Pablóni, pa Que Pueyaso jiyaramiquishano. Janiyari maja nareja pueyano jiyaramiquishanoni. Mijiria quiníaa pueyari maja na jiyatenu quiquiaari janiya Pueyaso jiyaramiquishano cua quiniuria. Jesucristojuanaacuaajaari cua jiyatequiaari na jiyaramiquishano cua quiniuria. Nojuacuajaari na Que samiitianishanohua macujiniji. <sup>2</sup> Níya cuata quiníaa parta Pueyaso pueyatani, janiyari nio naajiyani. Nio cua naajioneeri puetunu Galacia jiyajinia quiníaa Pueyaso pueya maapuerajanaa. <sup>3</sup> Pa Que Pueyaso, mariyata pa Jiyaniijia Jesucristoni, nojori cuaara cumaquiiria nijaniya, nioojia cajitishano nia quiniuriajuhuaj. <sup>4</sup> Jesucristoori tama na cuaqueyajaaja panitiaquiaari pocuara na mosaanura. Naacujitij, nojuajaari pa jeequequiaari puetunu sesa pa miishanojinijijianaa. Nojuajaari naa miiquiaari sesa miiniucua jiaatianu pa cartenura. Nojuajaari naa cusoquiaari pocuaratej, taa pa Que Pueyaso paniquiaaricujani, na muerasu pa quiniuria. <sup>5</sup> Naaratej, pa Que Pueyaso cuaara maniniuhuaqueetasano quiiria. Cuaara naa quiiria pueyaracaanutej.

### *Maja tamonu maninia rupaa quiniu socua Jesucristo rupaajiniji*

<sup>6</sup> ¿Taa nia miiquianuni pueyanaa? Quiarijiani, janiyari jiyanojua tacaya niaacuani. ¿Niaateeri ritia cartecanu Jesucristo rupaa, tamaatia niishitiojosano tojitiajaca nia quiniuria? Pueyasocuaajaari Neyanutaja nia cojiritiaquiaari paniniu, Jesucristo miiniucua maninia niaara, na panishano pueya nia quiniuria. <sup>7</sup> Seetanujuanaa, majaari socua tamonu rupaa quiniu Pueyaso pueyara pa jatanishaanura. Noo juhuari nia cushitiojoquiaa saajatejaj, najuhuana tamaatia nia niishitiojonuuquiaatej. Nojoriiri Jesucristo rupaa cushitiojoquiaa niaara, nojori tacarojosacari najuhanaj, mariyateyacato nojori quiniucua. <sup>8</sup> Cua tojiri pueyanaa, tamonu pueyano jaara pocuaji Tacuna rupaa niishitiojoriquia nijaniya tamaatia canaa niishitiojosanojiniji nijaniya, Pueyasoori na saniitionutaniya. Naajuhuj, janiya jaara tamaatia pohuatatare Jesucristojiniji nijaniyani, jiyocuaaanuji roseno Pueyaso serujuhuj, Pueyasojuaanaari canaa saniitionutaniya. <sup>9</sup> Janiyacuajaari naa sequeja nijaniyani. Quiarijia socua pacuterohuacuara sequenu nia niishishocoriquiano. Cua tojiri pueyanaa. Níaa jaara tamaatia pohuataaariquia Jesucristojiniji, maja naate taa tari cua pohuataquiaari nijaniyacujani, Pueyaso cuaara saniitiooranó.

<sup>10</sup> ¿Niaateeri jiyaniya janiya pueya timitiasano quiniu paniyani? Maja. Janiya cutaraari Pueyaso timitiasano quiniu paniyani. Janiya jaara saaja pueya timitiasano quiniu paniriquiani, janiya maara pa Jiyaniijia Jesucristo seru quiyaquirini.

### *Taa Pablo jatanishaaquiaari Jesucristo jiyaramiquishano na quiniuriani*

<sup>11</sup> Cuarta Pueyaso pueyanaa, nia pohuatateera cante cua niishitiojoquiaari Jesucristo rupaani, cua pohuatasano nijaniyani. Pueyanaa, nio rupaa janiya na pohuataa nijaniyani, nioori maja mijiria quiníaa pueya niishitiojosano janiya. <sup>12</sup> Taa cua sequeya nijaniyacujani, majaari nio rupaa cua niishiniu quiquiaari tamasa pueyajiniji. Jesucristojuanaacuaajaari na rupaa cua niishitiquiaari.

<sup>13</sup> Níaa naasucuaari janiyajiniji tojinuujiacuaja tarijia. Seetanujuanaa cuarta Judiocuaca miishano miijia cua quishacaríjia, janiyari Pueyaso saquiriojosano pueya puecoonu panijia puetunujuanaani. Janiyari jiyanojua paracaajia nojorini. <sup>14</sup> Janiyari seetanujuanaa canaa supuetanaa niishitiojosano tojijia quijia cutarani, socua cuarta Judiocuaca mashiquioriniji. <sup>15</sup> Naajaa, jiyanojua panijia Pueyaso quiniucua, cua supueyaquishacaríjia, nojuajaquiiri tari cua saquiriojoquiaari na pueyano cua quiniuria! <sup>16</sup> Naacujitij, tama na panishacaríjiaaja, nojuajanaari Neyanu cua niishitiquiaari, Neyanujiniji cua pohuatanura taucuaca. Neyanu na niishitiniu nuhuaji janiya, majaari

quenaaja tamasaca nequesotanuucua cua quianu quiquiaari, cua niishiniuria seetanutejanaa na niishitishano janiya. Pueyasocuaajaari maninia cua niishitiquiaari puetunujuanaa Neyanujiniji. <sup>17</sup> Naajuhuj, majaari cua quianu quiquiaari Jerusalén tiacajinia, tii cua niquniuria cuarta Jesu jiyaramiquishano pueya. Nojoriiri coteenujuanaa Jesu jiyaramiquishano pueya quijia. Jiyacaritij, majaari quenaaja cua tarishiniu quiquiaari Damasco tiacajinia. Janiyari ritia quiaquiaari pueya quiyaquishaqui Arabia jiyajiniani. Na nuhuaji, janiyari tacatequiaariuhua Damasco tiacajiniohuani.

<sup>18</sup> Jiuujianaraca marijia cua shocotejonu nuhuaji Damasco tiacajinia, janiyari shusha jiyacari quiaquiaari Jerusalén tiacajiniani, Pedro cua niishiniuria shushajanaa. Nata cua quishacari, quince juucaari cua shocojoquiaari tiini. <sup>19</sup> Jiyacaritij, majaari socua Jesu saquiriojosano pueya cua niquniu quiquiaari. Janiyari saaja Santiago niqiquiaari cutarani. Nojuacuajaari pa Jiyaniijia Jesu tarajanu. <sup>20</sup> Pueyanaa, Pueyasocuaajaari niishiya, janiyari nio cua naajiojinia seetanujuanaa nia pohuataani.

<sup>21</sup> Na nuhuaji, janiyari quiaquiaari Siria jiyajiniani, Cilicia jiyajinianio. <sup>22</sup> Saniniuujia, Judea jiyajinia Jesu tojitiajaca maapueeri juhuanajuaja maja na niishitiuniu quijia janiya. <sup>23</sup> Nojoriiri saaja naa poojotasaquiaari janiyajinijitij: “Noo pueyano tarijia pa miitiaja naquiya Jesujiniji pa pohuatasacaritij, nojuajanaari quiarjia pa Jiyaniijajiniji pohuataa pueya niqiarajuhuj”. <sup>24</sup> Naa nojori tojiniuushacari janiyajinijitij, nojoriiri Pueyaso maniniuuaqueetaquiaari nojori paraca na jataniniuucua Jesu rupaa pohuatana na quiniuria.

## 2

*Jesu jiyaramiquishano pueya niishishacari, Pablo seetanujuanaa Jesu jiyaramiquishano pueyanujuhuaj*

<sup>1</sup> Catorce marijia jaara shocojoquiaari, janiyari Bernabeeta Jerusalén tiacajinia pacutequiaariuhua quianuni. Janiyari jiyacari Tito rupoquiaari cucuajuhuj. <sup>2</sup> Pueyasocuaajaari cua toquiaari cua quianura Jerusalén tiacajinia. Janiyari cunora quiaquiaarini. Tii cua quishacari, janiyari Jesu tojitiajaca jiitianaa pueyata rerejoquiaarini. Maja seetanu puetunu nojoritijanaa, saaja nio pojoritia: Santiago, Pedro, Juannio. Janiyari saaja cuno pojori niqiuara pohuataquiaarini taa cua pohuataquiaa Jesujiniji puetunu taucacajanaacuajani. Na nuhuaji, janiyari nojori nequesotareeni: “¿Taa nia sequeyani pueyanaa? ¿Janiyate najuhuaana sesa niishitiojiya taucuacani?” Cua sequetteeri: “Maja. Quiaacuaja seetanu rupaajanaa niishitiojiya taucuaca, naa Jesucristojiniji quia pohuatasacari nojori”. <sup>3</sup> Naajuhuj, parta Pueyaso pueyano Titoni, cuata quiquiaari tiini, nojuajaari Grecia jiyajinijinio tahue. Naajaa, majaari na sequesaaanu quiquiaari na cararaatiuuquia co miatesaanura, seetanujuanaa Pueyaso pueyano na quiniuria. Nojuajaari maja naa na sequesaaanu quiquiaari. Canaa rerejosacari Pueyaso pueya jiitianaata, nojoriiri Tito niqiquiaari nareja, nojori na rupenurajuhuj. Nojoriiri niishiquiaari nojuajaari seetanujuanaa Pueyaso pueyanujuhuaj, saaja Jesucristoocua na tiuuniucua. <sup>4</sup> Saniniuujia, noojiaqueya canaa Judiocuajinijinioori tama nojori cuaqueyajaaja jiyatequiaari juhua Jesu tojijica pueyara, nojori cojiniuria canaa. Nojoriiri naa canaa rupuequiaari na sapojonuta. Canaata nojori quishacari, nojoriiri canaa shanacutaja nojori niishiniuria canaate seetanujuanaa Pueyaso muerasuni, saaja Jesuucua canaa tiuushacari. Nojoriiri juucua canaa jiyatenu paniquiaari tariucuacaanu Moisés Rootasano tojijica canaa quiniuhua. <sup>5</sup> Canaari nojori niishitiojosano pataquiaari saajani. Majaari quenaaja shiitianiyojua nojori rootasano canaa tojiniu quiquiaari. Canaari naa miiquiaarini seetanu Jesucristo rupaajanaa canaa cojuanura niaara, seetanujuanaa Pueyaso muerasu nia quiniuria saaja Jesucristoocua nia tiuuniucua. Majaari canaa cojitiniu paniniu quiquiaari Jesucristo rupaa, tariucuacaanu niishitiojosanota.

<sup>6</sup> Cuno pojori Pueyaso pueya maapue jiitianaa Jerusalén tiacajiniani, nojoriiri jiyanohua tojishano pueya quijia. Janiyara naajaa. Pueyasocuaajaari najuhuaana quijica jiyanooquiaajuhuj, taa na jiyanooquiaa tojishano pueyacuaani. Naajaa, cuno tojishano pueya jaara tojiquiaari taa cua pohuataquiaa Jesucristo rupaani, majaari



quenaaja niquiriyatu rupaa nojori sequenu quiquiaari, nojori niishitiojonura janiya socua. <sup>7</sup> Nojori cutaraari niishiquiaari Pueyasocuaajaari seetanujuanaa cua jiyatequiaari na rupaa pohuatana cua quiniuria taucuacara, taa Pedro na jiyatequiaari Judiocuaca niquiara pohuatana na quiniuriacuaani. <sup>8</sup> Pedro Jiyatena Judiocuaca niquiara Jesucristojiniji pohuatariquianoni, cuno Pueyasojuanaacuajaari cua jiyatequiaarijuhua taucuaca niquiara pohuatana cua quiniuria. Naacujitij, canaari mariyata Pueyaso jiyaramiquishano pueyani.

<sup>9</sup> Santiago, Pedro, Juannio, nojoriiri socua tojishano quijia puetunu Jesuucua tiunnaa cuarta Judiocuacajiniujanaa. Nojoriiri seetanujuanaa puetunu Pueyaso muerasu jiyaniijianucujanaa quijia. Naajaa, nojoriiri seetanujuanaa niishiquiaari Pueyasoori maninia cua jiyanoquiaari, na jiyatenura janiya Neyanujiniji pohuatana cua quiniuria taucuaca niquiara. Naaratej, nojoriiri na juaashiquia niquitiojoquiaari canaani, janiya, Bernabeenio. Nojoriiri cunota juhua canaa sequeturiquiaa canaari seetanujuanaa nojori cojiniaani. Naa canaa sequetuquiaarijuhua: “Maniniacuaja. Nia quiojyare taucuacaacua tii nia pohuatana Jesujiniji nojoriujuhuaj. Canaari saniniuujia parta Judiocuaca tajinia poonijionutaniyanijia, nojori niquiara canaa pohuatana Jesujiniji-juhuaj”. <sup>10</sup> Nojoriiri canaa sequequiaarijuhuaj: “Canaa panishano pueyanaa, majaari nia niyjetanu casamiiuniucua pueya naacunu”. Naaratej cuarta Pueyaso pueyanaa, puetunu tiqiyocujanaa cua rucuanesacari, janiyari naa miiquiaa seetanujuanaani.

*Antioquiya tiacajinia Pedro nacasusaanujiniji pohuatasano*

<sup>11</sup> Tamacari, canaa quishacari Antioquiya tiacajinia, Pedroori canaacua niquiaarijuhuaj, canaata na quiniuria tii. Tii na quishacari canaata, Pedroori sesa miiquiaari cua niquiara. Cunora, janiyari jiyanojua na nacasuquiaarini. Cuno na miishanoni, cunoori seetanujuanaa sesa quiquiaari Pueyasora. Naa na miishacaritij, tamajaaja miiriquiaa cocuaatiaari. <sup>12</sup> Pedroori naa miiquiaaritij. Coteenu canaa cojiquiaari maniniaari tariucua Jesuucua tiuujiaca taucuacata, canaata na miaquejonura jatiqui. Jiyacaritij, canaacua tiuquijioquiaariiri socua cuarta Judiocuaca Jerusalén tiacajiniji. Nojoriiri Santiago jiyarosano pueya quiquiaari. Cuno Judiocuaca quishacari tii canaata, Pedroori canaacuaji rupatequiaari. Majaari tari na miaquenu paniniu quijia canaata, tariucua Jesuucua tiuujiaca taucuacata. Narta Judiocuaca puerequiaariiri maja na sequesaaanura: “Cunoqui sacuaratia miaquejojuua taucuacata”. <sup>13</sup> Tii quiniaa Jesuucua tiuujiaca Judiocuaca jaara niquiquiaari naa Pedro miishanocuaatej, nojoriiri jaarajaaja canaacuaji rupatequiaarijuhuaj, Pedro na cojitiuniuria. Naajuhuj, ¡Bernabeeri jaarajaaja canaacuaji rupatequiaarijuhuaj cuno mosanucua na cojiniuria! <sup>14</sup> Naaratej, janiya jaara naa nojori niquiquiaari tariucua Jesuucua tiuunio taucuaca tamacatiuyanoni, janiyari niishiquiini, cuno pojoriiri maja maninia na miitiuniu quiriqiaa. Cunoori maja na quiniu quiriqiaa taa nojori rootasaaquiaari Pueyaso rupaacuajani. Cunora, janiyari puetunu Pueyaso pueya maanu niquiarajanaa naa sequequiaari Pedroni: “Quiaari Judio pueyano. Naajaa, majaari seetanujuanaa juhua Judio pueyano quia quiniu quiqiaa. Quiaritia saniniuujia, quiaari Jesuucua tiuunio taucuaca shiniuujia nojori quiniuria seetanujuanaa juhua Judiocuaca, nojori rupuenura pajaniya. ¿Casaara naa quia shiniuujia nojoriirini? <sup>15</sup> Paacuajaari Moisés Rootasano tojijiaca cutarani, Judiocuaca pa quiniuucua. Paari maja tahuani, Pueyaso tojiyashijia. <sup>16</sup> Naajaa, paacuajaari niishiyani, majaari Pueyaso jiyanooni pajaniya Moisés Rootasano tojijiaca pa quiniuucua. Maja. Pueyaso cutaraari pa jiyanoojia, Neyanu Jesucristoocua pa tiuushacari. Paari cunora Jesucristoocua tiuquiaani, nojuaja jiyanooniuria pajaniya puetunu sesa pa miishanojinijianaa. Sesa pa miishanoori maja na jiyanooshaanu quiqiaa Moisés Rootasano pa tojishacari. Maja. Naajuhuj, majaari quenaaja niquiriyatu pueyano jiyanooshaanu quiniutianiya Moisés Rootasano tojijia na quiniuucua. Maja.

<sup>17</sup> Paacuajaari Jesucristoocua tiuquiaarini, jiyanooshano pa quiniuria, maja socua Moisés Rootasano tojijiaca pa quiniuria. Na nuhuaji, paa jaara jiyaniyani paa sesa miijiaca quiriohuani Moisés Rootasano pa tojiyaquishacari tarini, saaja Jesucristoocua

pa tiuushacari, paari jiyanoohua jiyajeneyani. Naa pa jiyaniishacaritij, paari juhua sequeyani Cristoori pa jiyaterohua sesa miijiaca pa quiniuhuara nocua pa tiuuniucua. ¿Quiaateeri naa sequenu paniya Pedronaa? ¡Maja! <sup>18</sup> Paacuaajaari maninia miiquiaarini pa tarinitiasacari tojiniu Moisés Rootasano, jiyanooshano pa quiniuria saaja Jesucristo rupaacua pa tiuushacari. ¿Paateeri socua maninia miijiaca quiniutianiya Pueyaso niquliarani, paa jaara Moisés Rootasano tojijiaca quiriohuani? ¡Maja! Paa jaara naa niishiriojiyani, paari jiyanoohua jiyajeneyani. Paacuaajaari seetanujuanaa pohuatenuquiaa puetunu pueya niquliarajanaani, nojoriiri jiyanooshaanutaniya saaja Jesuucua nojori tiuushacari. Naa pa pohuatenuusano jaara sapojosano quiriquia, paa maara jiyanoohua sesa miijiaca quiriquiani. Saniniuujia, Pueyaso cutaraari seetanujuanaa pa jiyanooquiaa saaja Neyanuucua pa tiuushacari”.

Janiyari naa nacasuquiaari Pedroni puetunu tii quiniaa Pueyaso pueya niquliarajanaa. <sup>19</sup> Pueyanaa, cua niishishacari maja cua naata Moisés Rootasano tojiniu maninia puetenujuanaa, janiyari niishiquiaarini Pueyasoori cua shaajanutaniya na shuriucua. Naaratej, janiyari tama cua cuaqueyajaaja jiyatequiaari juhua tariucua macuni, maja Moisés Rootasano tojijia cua quiniuria socua. Naacuajitij, janiyari quiarijia saaja Pueyasora quiya cutarani. Janiyara, janiyari tari cojiritiasaaquiaari monu Cristota niyacutesanojiniani. <sup>20</sup> Naacuajitij, quiarijiani, majaari nio janiya quiyani. Jesucristocua-jaari nio, coojiajinia quiyani. Majaari tamajaaja saminio cua quiniu. Jesucristo cua rupesacari, naacuajiti janiyari saminio quiyani. Naa saminio cua quishacari puetunu cua cuaqueyatajanaatej, janiyari rishiyani Pueyaso Niyanuucua tiuujia cua quishacari. Nojuajaari cua paniquiaari. Naaratej, tama na cuaqueyajaaja tarinitiaquiaariiri cucuara na mosaanura. <sup>21</sup> Majaari cua ruuretanu Pueyaso jiyanooniu panishacari janiya. Jaara pa naata quiriquia tama pa cuaqueyajaaja jiyanooniu Pueyaso, Moisés Rootasano tojijiaca pa quiniucua, Jesucristo maara najuhuaana cusoquiaari pocuara.

### 3

*¿Teyano tojijia pa quishacari pa jiyanooshaaquiaani, Moisés Rootasano, Jesucristoocua tiuuniu soj?*

<sup>1</sup> Mosanucua Gálata pueyanaa, ¿cante nia shimiojocanuni, naa pa Jiyaniijia Jesuucua tiuuniu nia tarinitianuratej? Canaa jaara shushajanaa nia niqiuara pohuataquiaari Jesucristojinijitij, canaacuaajaari maatia nia niishitiquiaarini, nojuajaari pocuara mosaaquiaari pa jiyanooshaanura. ¿Quiarijiaariuhuj, cante tari nia sapojocanuni, Jesucristoocua tiuuniujiniji nia pishiniuriani? Naa nia miishacaritij, ¿niaateeri jiyaniya niaa tama nia cuaqueyajaaja jiyanooniuutianiya Pueyaso? Maja nia naata pueyanaa. <sup>2</sup> Quiarijiani pueyanaa, janiya saaja nio nia nequesotanu paniyani. Cua riucature. ¿Niaateeri Pueyaso Sohuanu tiuquiniquiaari nioojiajinia Moisés Rootasano nia tojiniuucua, Jesucristo rupaacua nia tiuuniucua soj? ¿Taa nia sequeyani? Niaacuaajaari niishiya, niaari Pueyaso Sohuanu tiuquiniquiaari nioojiajinia Jesucristoocua nia tiuushacari, niaa jaara na rupaa tojiquiaari. <sup>3</sup> ¡Niaaquiiri tojetaarucujanaa mosanucujuhuanajaj! Nia niqishuriirijaj, niaacuajaari Pueyaso muerasura quiquiaari Pueyaso Sohuanu nia shanacunuucua nioojiajinia na tiuquiniuria, Jesucristoocua nia tiuushacari. Quiarijia saniniuujia, ¿niaateeri jiyaniya nia naata Pueyaso jiyanooniu tama nia cuaqueyajaaja Moisés Rootasano nia tojishacariuhua juucua, tama nia cumaacatajaaja? ¡Maja! <sup>4</sup> Pueyasocuaajaari jiyanoohua maninia miiriquiaa nijaniya, saaja Neyanuucua nia tiuushacari. Naa Pueyaso miishano niaarani, ¿cunoteeri najuhuaana quiquiaarijuhuaj? <sup>5</sup> Pueyanaa, Pueyaso jaara na Sohuanu niqutioquiaa nijaniya, na nuhuaji na cumaacata miiquiaa nia niishishoo casaari, nia sequeretoj, ¿casaara naa na miiquiaarini? ¿Pueyasoteeri naa maninia miiquiaa nijaniyatej, Moisés Rootasano tojijiaca nia quiniucua? Maja. Nojuajaari naa maninia miiquiaa nijaniyatej, saaja na rupaacua tiuujia nia quiniucua, canaa pohuatasano nijaniyani.

<sup>6</sup> ¿Niaate niishiya, casaara Pueyaso jiyanooquiaari canaa supuetana Abrahamni? Abrahamcuaajaari Pueyaso sequesanoocua tiuquiaari. Naaratej, Pueyasoori na jiyatequiaari juhua tojetaarucujanaa sesa miyashijia pueyanora. Naa na jiyatequiaari saaja nocua na tiuuniuucua. <sup>7</sup> Naacuajitij pueyanaa, quiarijia nia niishiri cutara, cante Pueyasooocua tiuujiani taa supuetana Abraham tiuquiaaricuaani, nojoriiri seetanujuanaa canaa supuetana Abraham niquiohuajanaa cutara. <sup>8</sup> Pueyaso jaara na sequenu panishano naajiotaniquiaari tariucuacaanu, nojuajaari tari niishiquiaari taa taucuaca na jiyanooniutianiyajaaniuhuj, nojori jaara nocua tiuuri. Naaratej, nojuajaari naa sequequiaari supuetana Abrahamtej: “Quiaacuajaari cua sequesanoocua tiuuri, Abrahamnaa. Naaratej, quia jinianuucujinío supueno pueyanoori jiyanoohua maninia miiniutianiya puetunu pueyapuerajanaa. Noo pojori shuquiritiniutianiyari, puetunu jiyacajinijinojuanaa nocua tiuuriquiano pueyatej”. <sup>9</sup> Naaratej, cante Jesucristooocua tiuujiani, Pueyasoori na jiyanooniutianiyajuhuj, taa supuetana Abraham na jiyanooquiaaricuaani, na sequesanoocua Abraham tiuushacari. Cunora, Pueyasoori maninia miiquiaa Jesucristooocua tiuujiaa, taa na miiquiaari Abrahamcuaani.

<sup>10</sup> Saniniuujia, cante jiyaniyani Pueyasoori na jiyanooniutianiya Moisés Rootasano tojjia na quiniuucua, nojuajaari pueyaracaanu saniitiosaanutaniya. Naa naajiotasano quiyacuajaari tariucuacaanu Pueyaso Rupaajinia:

“Moisés Rootasano tojjia cuara tojjiria puetunu Pueyaso naajiotanishanojuanaa. Cante niquiriyatu na sequesano tojiaquijiani, nojuajaari pueyaracaanu saniitiosocoriquiano”.

<sup>11</sup> Naacuajitij, niaari niishiyacuaja, majaari quenaaja niquiriyatu pueyano jiyanooshaanu quiniutianiya, Moisés Rootasano na tojjiniuucua. Saniniuujia, naa naajiotasano quiyacuajaari Pueyaso Rupaajinia:

“Pueyaso jiyanooshano pueyanoori pueyaracaanu rishiriquiano cutara, Pueyasooocua na tiuuniuucua”.

<sup>12</sup> Saniniuujia, Moisés Rootasanoni, cunoori maja na niishitiojonu Pueyasooocua pa tiuuniuria, jiyanooshano pa quiniuria. Maja. Saaja naa sequeyari:

“Cante puetunu nio naajioneejinia rootasanojuanaa tojjiani, nojuajaari cuno na tojjiniuucua rishiniutianiya”.

<sup>13</sup> Maja maninia pa tojiaquiniuucua Moisés Rootasano, paari Pueyaso puecoosocoriquiano quiquiaarini. Naajaa, Pueyasoori pa Jiyaniijia Jesucristo jiyatequiaari na sesacasano pueyanora pa niti, pocuara na cusonura. Naa sequeyajaariuhua tariucuacaanu Pueyaso Rupaajinia:

“Pueyaso sesacasanoori cuno, niyacutesanojinia teetasanoni”.

<sup>14</sup> Naa Jesucristo cusonuucua pocuaratej, saaja nocua nia tiuushacari, Pueyasoori na naata shuquiritiniu nijaniya taucuacajuhuj, puetunu na sequesanojajanaa canaa supuetana Abraham. Naajuhuj, saaja pa tiuuniuucua Jesuucua, puetunu pajaniyajanaari Pueyaso Sohuanu masequiaani, taa seetanujuanaa Pueyaso sequequiaari tariucuacaanucujani.

*Moisés Rootasanoori maja na naata Pueyaso sequesano Abraham jataniniu*

<sup>15</sup> Cuarta Pueyaso pueyanaa, maatia nia pohuatareera maninia nia niishiniuria cua pohuatasano. Cua tojiri. Pueyano jaara maninia miiniu paniri narta pueyanora, naa miiijaari: na sesa naajiotajaari naajioneejinia, tee cuniqui na miishocoriquiano naajiotasano quiyacuajani. Jaara naa miiritij, majaari quenaaja tamonu na naata cuno naajioneejinia naajiotasano jataniniu, socua na maatenunio. <sup>16</sup> Tariucuacaanu, Pueyasoori naa sequequiaari Abrahamtej:

“Janiyari seetanujuanaa maninia quia miiniutianiyani, quia jinianuucujinío supueriquiano pueyanonio”.

Nia niishiri pueyanaa, tariucuacaanu Pueyaso Rupaajinia naajiotasanoori maja na sequenu: “Abraham jinianuucujinío supueno pueyara”. Maatia sequeyacuajaari: “Abraham jinianuucujinío supueno pueyanora”. Niquiriyatu pueyano sequeyari, maja queraatia. Nojuajaari pa Jiyaniijia Cristocujaja. <sup>17</sup> Cunora pueyanaa, janiyari

seetanujuanaa nia sequeyacuajani, Pueyasoori seetanujuanaa sequequiaari Abraham taa nera na miiniutianiyani. Seetanujuanaa Pueyaso sequesanoori maja na naata jatanishaanu. Naacuajitij, Moisés Rootasanoori maja na naata Pueyaso sequesano Abraham jataniniujuhuaj. Seetanujuanaa Pueyaso sequenu nuhuaji Abraham, taa nera na miiniutianiyani, cuno nuhuaji, shocojoquiaarijiaaraari cuatrociento treinta marijia. Cuatrociento treinta marijia shocojonu nuhuaji, Pueyasoori jiyacari shusha Moisés niquitioquiaari na rootasano, saajianeecaacua na quejasano. Moisésri saniniuujia pueya na niishitiojoquiaari. Naacuajitij, Moisés Rootasanoori maja na naata Pueyaso sequesano Abraham jataniniu, najuhuana na quiniuria pajaniyara. <sup>18</sup>Pueyaso niquitionu panishano pajaniya jaara pa niquitiosaariquia saaja pa tojiniuucua Moisés Rootasano, na niquitiosocoriquiano pajaniya maara nareja niquitiosoo quiri. Saniniuujia, Pueyasocuaajaari seetanujuanaa naa Abraham sequequiaari:

“Janiyari nareja quia niquitionutaniya cua sequesano”.

<sup>19</sup> Naa naasucuaari sequeya: “Jaara naa quirritij, ¿casaarano socuateeri Moisés Rootasano?” Naa sequeereera pueyanaa. Jiyanoahua Abraham nuhuaji, Pueyasoori Moisés caminiujiutiquiaari na rootasano, pueya niishiniuria nojoriiri seetanujuanaa Pueyaso tojiyashijiaca. Cunora quiquiaariiri Moisés Rootasano. Cuno Rootasanoori quiquiaari Abraham jinianuucujinío supueno pueyano cuaara tiuquiquiaarijiaatijia, taa Pueyaso sequequiaari Abrahamcuajani. Nojuajaari pa Jiyaniijia Jesucristocuaaja. Naacuajitij, Jesucristocuaajaari Pueyaso jiyaniquishano quiquiaari, na sequesacari Abraham, “quia jinianuucujinío supueriquiano pueyano”. Cristocuaajaari puetunu Pueyaso sequesano Abrahamjanaa masequiaari pajaniyarajuhuaj, taa Pueyasोजना sequequiaari Abrahamcuajani. Saniniuujia, Moisésri saaja pueya niishitiojoquiaari Pueyaso seya caminiujiushano nojuaja. <sup>20</sup> Abrahamra saniniuujia, majaari quenaaja tamonu pueyano quiniu quiquiaari nera na caminiujiuriquiano. Pueyasोजनाacuajaari nocua muetaquiaari, na sequenura seetanujuanaa taa Neyanuucua tiuujia na miiniutianiya maniniani. Cunora, Pueyaso rupaa Jesucristojiniji pa tojishanoni, cuno cutaraari socua pa tojishocoriquiano Moisés Rootasanojiniji.

#### *Casaaranote Moisés Rootasano*

<sup>21</sup> Naa cua sequesacariitij, ¿niaateeri jiyaniya, Moisés Rootasano naasucuaari pajaniyarano Pueyaso sequesano paraca? Majaari naa cua sequenutej. Janiyari saaja sequeyani, Moisés Rootasano jaara na naata quiriquia Pueyaso jiyanooniniu pajaniya, paa maara Moisés Rootasano tojitiajaca quiriquiani, Pueyaso jiyanooninuria pajaniya. <sup>22</sup> Saniniuujia, tariucuacaanu Pueyaso Rupaajinijini, paari niishiyani puetunu pueyapuejanaari Sesaaca pueya. Naaratej, majaari pa naata tarinitianu quiquiaari sesa miiniu. Naacuajitij, paari maatia niishiyani, puetunu pueyajanaa cuaara tiuuria Jesucristoocua, Pueyaso sequesano Abraham nojori masenura.

<sup>23</sup> Pa niishiyaquishacarijia Jesucristoocua pa tiuuniuria, paari juhua Moisés Rootasano jiitiasano pueya quijiani. Paari naa quijia taraatia pueyacuaani, paa jaara tojiquiaari Jesucristojinijiaatijia, nocua pa tiuuniuria. <sup>24</sup> Naacuajitij, Moisés Rootasanoori juhua pa jiitiana quiquiaari. Juhua naatujooriniyojua pa pueratejojua Jesuucuaari. Naa na miishacari pajaniyatej, juhuacarijia Jesujiniji pa niishitiojojuaari. Naacuajitij, paa jaara Jesuucua tiuquiquiaarini, paari puetunu sesa pa miishanojinijijianaa jiyanooshaaquiari. <sup>25</sup> Naa Jesuucua tiuujia pueya pa quishacari quiarijiatej, majaari socua pa tojiniu tariucuacaanu pa canashitijiona. Moisés Rootasanoori juhua pataaco seru quiquiaari, Pueyasora na canashitijionura pajaniya, juhua naatujoori pa quishacarijia. <sup>26</sup> Quiarijia cutara, puetunu niajanijajanaari Pueyaso pueya, Jesuucua nia tiuuniuucua. <sup>27</sup> Naacuajiti pueyanaa, niaa jaara moojinia tiuquinishaacanu, seetanujuanaa nioojata nia tiushacari Jesuucua, niaari na coquetesaaquiaa. Naa nia quishacari natatej, na Que niquiara, niaari juhua nojuaja niquishano, na panishano muerasuniyojua nia quiniuucujuhuaj. <sup>28</sup> Naa Pueyaso muerasu pa quiniuucuatej, majaari Pueyaso niquiniu rimiajata pajaniya. Tamonu jaara Judio pueyano quiri, naajaa. Tamonu jaara tahue quirijihuaj, naajaa. Poonijotesano pueyano maaraja, camarnuujua pueyanonio, cunoori maja rimiajata Pueyasora.

Naajuhuj, caya, maaji, cunoori maja rimiajata Pueyasora. Jesucristoocua tiuuji-aca pa quishacari, Pueyasora, puetunu pajaniyajanaari juhua niquiriyatu pueyanoni.<sup>29</sup> Naajuhuj, niaa jaara seetanujuanaa Jesucristo pueya quiri, niaari seetanujuanaa canaa supuetana Abraham jiuhuacuajinio supueno pueya cutara. Naacuajitij, niaari Pueyaso sequesano Abrahamrano maseriquianojuhuaj.

## 4

<sup>1</sup> Nia sequenu paniya socuanijia pueyanaa. Cua tojiri. Mijiria, pueyano jaara jiyaniijia quiri, na shaajesacari, neyanuuri camarnura jiyatesano na que niti. Shaajeno pueyano niyanu jaara naatujua quirijia, neyanuuri juhuanajuaja maja na naata na que casami jitianu. Nojuajaari saaja juhua pataaco seru, naatujua na quishacarijia.<sup>2</sup> Naacuajitij, tamasaacari cuno mueya canashitijia, cuara mashajara quirijiaatijia, jiyaniijara jiyatesocoriquiano, taa na shipininio sequequiaaricuajani. Juhucarijia niishitiojoshiyajaariuhuj, maninia na jitianura nerano na que riuriotaca.<sup>3</sup> Paari naajuhuj. Pueyaso pueya pa quiyaquishacarijia, paari juhua naatujoori quiquiaarini. Paari mijiria niishishano tojitishaaquiariini, pa supuetanaa niishishanonio. Paari naa taraatia jitiiasaquiariini.<sup>4</sup> Na nuhuaji, Pueyaso jaara tari na sequesano tohuateenu paniquiaari, nojuajaari Neyanu jiyaroquiaari pocua, mijiria na rasaanura maninia maajijiniijianaa, pueyano na quiniuria. Mijiria na quishacari, nojuajaari puetunu Moisés Rootasanojuanaa tojiquiaari pa niti.<sup>5</sup> Naacuajitij, nojuajaari na naata Moisés Rootasano tojijiaca jiyanooni, maja socua pa tojitishaanura Moisés Rootasano. Naaratej, Pueyasoori na naata pa jiyatenu na muerasu pa quiniuria cutara.<sup>6</sup> Seetanujuanaa na niishitiniuria pajaniya paari necohuani, nojuajaari Neyanu Sohanu jiyaroquiaari pocua, poojiajinia na quiniuria. Naa poojiajinia na quishacaritij, nojuajaari Pueyaso pa sequetequiaa, “cua Quenaa”.<sup>7</sup> Naacuajitij pueyanaa, majaari tari nia quiniu Moisés Rootasano tojijiaca, juhua pataaco seru. Niaacuajaari seetanujuanaa Pueyaso niquihua cutara. Naa na muerasu nia quishacaritij, niaari tariucuaaanu Pueyaso sequesano Abrahamrano maseriquianojuhuaj, taa na muerasurano niqutionu na sequequiaaricuajani.

*Pablo tacaashacari Galacia jiyajinia quiniaa Pueyaso pueyacua*

<sup>8</sup> Pueyaso nia niishiyaquishacarijia pueyanaa, niaari juaashiquiata shipinijosano nia pueyasohua tojijiaca quiquiaari taraatia. Cuno casaari maja seetanujuanaa Pueyaso.<sup>9</sup> Quiarijia saniniuujia, niaari Pueyasojuanaa niishiya. Pueyasojuanaa cutaraari saniya nia niishiya. Naa Pueyaso panishano muerasu nia quishacaritij, ¿casaara najuhua supuetanaa pueya niishishano miiniuria nia paniuhua socuani? Cuno, canaa supuetanaa Judiocuaca rootasanoni, cunoori maja na naata cumaquiniu nijaniya. Niaari najuhua na tojijiaca quiniutianiya.<sup>10</sup> Niaanaari puetunu juucajanaa niishijiaca quiya, juhua canaa supuetanaa Judiocuaca. Niaanaari sequetuquiaa: “Cuno juuca, majaari pa miaquenu quiniutianiya. Cunoori pueresano juuca, Pueyaso jiyanooniuria pajaniya”. Niaanaari naa miiquiaa puetunu shuniyarajanaa, puetunu marijijarajanaanio. ¿Casaara naa miijiacara nia quiriohuacuuarini cuarta Pueyaso pueyanaa?<sup>11</sup> Naa nia miiniuucuatej, janiyari jiyanoohua tacaya quiarijia niaacuani. Janiyari tama sequequiaajaacujua: “Cuno pueya tajinia Pueyaso rupaa cua pohuatasanoquiiri najuhua quiquiaari”.

<sup>12</sup> Cuarta Pueyaso pueyanaa, janiyari seetanujuanaa nia sequenu paniyani. Nia miiriohuarohua taa cua miiquiaaricuani, shusha cua tiuquishacari niaacua. Moisés Rootasano niishiyashijiaca nia quishacari, janiyari na tarinitiaquiari tojiniuni, juhua nijaniya cua quiniurijuhuj. Saaja Jesucristo rupaa nia tojiriohua cutara taa cua miiquiaaricuani. Cua panishano pueyanaa, niaari maninia cua jitiaquiari niaata cua quishacari.<sup>13</sup> Niaacuajaari niishiya, cusosu cua quiniuucua, janiyari shushajanaa Jesucristojiniji pohuataquiari nia niquiarani.<sup>14</sup> Naa cusosu cua quishacari niaatatej, naajaa, majaari nia ruuretenu quiquiaari janiya, naa sacuaraatia cusosu cua quishacaritij. Majaari quenaaja nia soonu quiquiaari janiya. Saniniuujia, niaari cua tojitiaquiari

juhua Pueyaso serujuanaa, nia niquiara cua pohuatasacari Jesucristojiniji. Niaa cutaraari seetanujuanaa cua tojiquiaari juhua Jesucristojuanaa. Niaari naa timitiaquiaari janiyatej, Jesujiniji cua pohuatanuucua nijaniya. <sup>15</sup> Quiarijiaariuhua pueyanaa, ¿casaa nia tojetacanuni? ¿Casaara nia tarinitiarohuacuaa shuquiriaatia nia quiniuurini, taa nia quiquiaari coteenucujani? Janiyacuajaari niishiquiaarini, jiyanoehua nia paniniucua janiya, jaara nia naata quiquiaari, niaa maara nia namijia samiriootaquiaari nia niquitiosocoriquiano janiya, cucua nia taraajesacari. <sup>16</sup> Quiarijia naa cua sequesacari seetanujuanaa nijaniyatej, ¿niaateeri cunora cua niquiniutianiya juhua nia paraca? <sup>17</sup> Cuno pueya, najuhuana tamaatia nia niishitiojoquiaa Pueyaso rupaani, quiarijia nojoriiri maninia miiquiaa nijaniya na sapojonuta. Nojoriiri nia shuquiritiya, nojoriicua nia tiuuniuria. Nojoriiri naa miya, canaa nia cartenura, saniniuuja nojori tojjijaca nia quiniuria. Naacuajitij, majaari tari cua rootasano tojtijajaca nia quiniu quiniutianiya. Niaari cua cartenutaniyajuhuj. <sup>18</sup> Quiarijiani, cuno pojoriiri nia shuquiritiyacua. Majaari nia jyaniniu janiya nia sequeyani, maja maninia parta pueya pa shuquiritiniuria. Taaquiriirinij, maniniacuajaari parta pueya pa shuquiritiniuria, seetanujuanaa pa naacunura nojori. Niaacuajaari niishiya pueyanaa, janiyari jyanohua nia tojishano pueyano quiquiaarini, Jesucristojiniji cua pohuatanuucua nia niquiara. ¡Naa seetanujuanaa pueyaracaanu cua panijiacara nia jiyateriquiani, maja saaja nia shuriucua cua quishacari! <sup>19</sup> Quiquiohuaniyojuanaa, jyanohua cua tacaashacari niaacua, coojaari jyanohua noonu pacuterohuacuhuj, naatej, taa maaji nooquiaacuaa na manajani, quera na ranu panishacari. Naajuhuj, janiyari naa pueyaracaanu miiionutianiya naquiya niaacuani, niaa cuara jatanishaarejaatijia, quiarinio pueya nia quiniuria. Niaari naa quiniutianiyaquij, seetanujuanaa Jesucristo quishacari nioojiacajinia, juhua nojuaja nia quiniuria. <sup>20</sup> ¡Seetanujuanaa nia shuriucua cua jatariquiani, maninia cua niishitiojonura nijaniya! Naa cua quishacari tucuaaanu nijaniyajinijitij, majaari cua niishiniu taa nia quiya seetanujuanaani. Niaanaari Moisés Rootasano tojjijacara quiriohuacuaa. ¿Niaateeri seetanujuanaa Jesucristo rupaa cartecanu, maja soj?

#### *Miriqui pohuatasano Agarjiniji, Saarajinijinio*

<sup>21</sup> Moisés Rootasano tojtijajacanaa, cua tojiri. ¿Majateeri tariucuaaanu Pueyaso Rupaajinia nia serojonu quiquiaacuaja, taa Abrahamjiniji na pohuataani? <sup>22</sup> Moisés Rootasanocuajaari Abrahamjiniji sequeya, nojuajaari caapiqui niyanuraca quiquiaari, caapiqui nucuaacuajiniojuhuaj. Abrahamri neco seru muetutequiaari. Na sesojoquiaariiri Ismael. Na nuhuaji, saniya necojuanaari nera muetuquiaarijuhuaj. Na sesojoquiaariiri Isaac. <sup>23</sup> Pueyanaa, Agar jaara Abrahamra muetuquiaari, cunoori tama Abraham miishanojuaja quiquiaari, mueya na panishacari. Maja cutaraari Pueyaso panishano. Saniniuuja, saniya necocuajanaa jaara nera muetuquiaari na nuhuaji, cunoori Pueyaso panishano quiquiaari cutara, na camishano maajijianaa muetusacari nera. Naacuajitij, Pueyasoori tarijia na sequesano Abraham tohuateequiaari. Naa na sequequiaariiri: “Abrahamnaa, quiaari niyanuraca quiniutianiya”. Naa Pueyaso sequenucuatej, necocua Saaraari muetuquiaari, motaja na quishacari. Cunoori maja tama nojori cumaacatajaaja. Cunora, Isaacri Pueyaso sequesanojuanaa mueya cutara, maja juhua Ismael, seru mueya. <sup>24</sup> Nio caapiqui maajipohuani, Agar, Saaranio, nojoriiri juhua caapiqui seetanujuanaa Pueyaso sequesano na pueyara. Naacuajitij, Agarrri miriqui juhua Moisés Rootasano, Sinaí tuhuananujinia Pueyaso niishitiojosano Moisés. Naaratej, Moisés Rootasano tojtijajacaari juhua seya quiquiaa, taa Agar quiquiaari serucuaani. <sup>25</sup> Seetanujuanaari, Agarrri miriqui juhua Sinaí tuhuananu Arabia jiyajinia. Saniniuuja, nio pa quishacarini, Jerusalén tiacaari juhua Sinaí tuhuananu, cuno tiacajinia quiniaa pueya quiniucua Moisés Rootasano tojjijaca. Cunora, Moisés Rootasanoori juhua nojori jiitiana quiya, juhua poonijotesano seya nojori quiniuria. <sup>26</sup> Saniniuuja, quiarinio Jerusalén tiacani, jiyocuacaanu Pueyaso racatasano pa quiquioranoni, cunoori seetanujuanaa Pueyaso muerasurano cutara. Cunoori maja Moisés Rootasano tojjijacara. Cuno tiacaari miriqui juhua Saara. Paacuajaari juhua Saara niquiohua cutarani. Majaari tari

pa quiniu seru niquiohua. <sup>27</sup> Tariucuacaanu Pueyaso sequesano cuajaari naa naajiotasano quiyajuhuj:

“Niyajaru maajiniaa, shuquiriaatia quia quiri. Quiaacuajaari mueya noonu saniyashijia. Naajaa, majaari quia taraajenu. Quia shuquiriniutia quia jaaquequejore cutara. Quiaacuajaari cartesaaquiaari niyajaru quia quiniuucua. Naajaa, quiaacuajaari socua queraatia niquiohwaraca quiri quiano cuno niyacaraca maajijiniji”.

<sup>28</sup> Cuarta Pueyaso pueyanaa, paacuajaari juhua Isaacni. Na nucuarano Saara tiuuniuucua Pueyaso sequesanoocua, taa na muetunutaniani, naacuajiti nojuajaari neyanu Isaac raquiaari. Quiarijiani, paari naajuhuj. Jesucristo rupaacua pa tiuushacari, Pueyasoori na cumaacata pa jataniquiaari seetanjuanaa na muerasu pa quiniuria. <sup>29</sup> Maninia nia niishiri nio pohuatasano, pueyanaa. Abraham jaara mueya paniquiaari, nojuajaari neco seru manajoquiaari tamajaaja. Saniniuujia, saniya necocujanaa jaara nera muetuquiaari, cunoori Pueyaso Sohuanu cumaacata rasaaquiaari cutara. Na nuhuaji, seru niyanuuri Pueyaso Sohuanu cumaacata rasano miitiaja quiquiaari. Quiarijiaari naajuhuj, Pueyaso ruuretajaca pueyari Pueyaso Sohuanu jatanishano pueya miitiaquiaa. <sup>30</sup> Quiarijia nia niishiri cutara, naa naajiotasaaquiaaricuajaari tariucuacaanu Pueyaso sequesano Abraham:

“Quia niquiocua seru quia taanuure neyanuta puetunujuanaa. Cuno, janiya seetanjuanaa quia sequequiaari niqutionuni, cunoori maja Agar niyanurano. Cunoori seetanjuanaa quia niquiocua muetusanorano, cua Sohuanu cumaacata rasano mueyaranotuhuj”.

<sup>31</sup> Paari naajuhuj, cuarta Pueyaso pueyanaa. Paari maja seru niquiohuani. Paari Jiyaniijia niquiohuajanaa cutarani.

## 5

### *Saaja Jesucristoocua tiuujiaa pa quiri*

<sup>1</sup> Jesucristo cusonuucua pocuara, nojuajaari Pueyaso niquiohuara pa jiyatequiaari, maja socua Moisés Rootasano tojjiaa pa quiniuria. Naarate pueyanaa, jiyanohua nia cojuare tama nia cuaqueyajaaja saaja Jesucristoocua nia tiuuniuria, Pueyaso jiyanooshano pueya nia quishacari tari. Majaari supuetanaa rootasano tojjiacara nia quiniuhua. ¿Moisés Rootasano tojjiacateeri jiyanooshaanutaniya? ¡Maja! Maja pa naata tama pa cuaqueyajaaja jiyanootiniu Pueyaso, Moisés Rootasano pa tojjiniuucua. <sup>2</sup> Cua tojitiare pueyanaa. Janiyari Pabloni. Janiyajanaari seetanjuanaa nia sequeyani, niaacuajaari Jesucristoocua tiuujiaa, Gálata jiyajinia quiniaa pueyanaa. Cunora, Pueyasoori nia jiyatequiaari na muerasu nia quiniuria. ¿Niaateeri jiyaniya niaa seetanjuanaa Pueyaso pueyara quiniutianiya cutara, nia cararaatiuuquia co miatejosaanuucua? ¡Maja! Niaa jaara naa niishiriojiya, niaari Jesucristo cusonu jiyatenutaniya najuhua na quiniuria nijaniyara. ¡Pueyanaa, majaari nia tojjiniu cuno Judiocuaca, canapuate nia shiniujuquiaa nia cararaatiuuquia co miatejosaanuracuajani, seetanjuanaa Pueyaso pueya nia quiniuria! <sup>3</sup> Janiyari socua sequenu paniya noo pojoririani, cararaatiuuquia co miatejonuujuacatej, nojori jiyaniuuucua naa nojori miishacaritij, nojori cutaraari seetanjuanaa Pueyaso muerasu. Cante naa miijiani, nojuaja cuara tojjiria puetunu Moisés Rootasanojuanaa. ¿Niaateeri jiyaniya nia naata puetunu Moisés Rootasanojuanaa tojjiniu, Pueyaso jiyanooniuria nijaniya? ¡Maja! <sup>4</sup> Naa tama nia cuaqueyajaaja nia jiyanootiniu panishacari Pueyasotej, Moisés Rootasano nia tojjiniuucua, niaari Jesucristojiniji carejerucuaa. Majaari Pueyaso naata maninia miiniu nijaniya socua, taa maninia na miiquiaacuaa na panishano muerasuni. <sup>5</sup> Pajaniya saniniuujia, paari Pueyaso Sohuanuraca cutarani, Jesucristoocua pa tiuuniuucua. Naacuajitij, paari niishiyani paari tojetaarucujanaa sesa miyashijiacara jiyatesaanutaniyani. <sup>6</sup> Quiarijiani, Jesucristo rupuesano pa quishacari nocua pa tiuuniuucua, paa jaara pa cararaatiuuquia co miatesano quirini, maja soj, naajaa. Cunoori najuhuanaj. Socua maninia cutaraari Jesuucua tiuuniu, Pueyaso panijiaa pa quiniuria, parta pueya pa paniniurajuhuj.

<sup>7</sup> Cuarta Pueyaso pueyanaa, niaacuaruhua Jesuucua tiuujica quijia seetanujuaanaa. ¿Quiarijiaariuhuj, cante nia tarinitiriohuacuaa seetanu rupaacuajanaa nia tiuyaquiniuriani? <sup>8</sup> Cuno pojori niishitijosano Jesuucua tiuuniu nia tarinitianurani, cunoori maja Pueyaso niishitishano nojori. <sup>9</sup> Cunora, seetanujuaanaari nio sequesano: “Shiitianiyojua jereeca mashaca jaara shoqueeca mashacajinia shuushaare, cuno shiitianiyojuaari puetunu cuno mashacajanaa jereteja”. Naajaariuhuj, shiitianiyojua sesa niishitijosanoori puetunujuaanaa pa sesojuajuhuj. <sup>10</sup> Naajaa, janiyacuaajaari pa Jiyaniijiaacua tiuya seetanujuaanaani, majaari nia tojiniu quiniutianiya tamaatia cuno pojori niishitijosano. Saniniuujia, Pueyasoori noo pojori saniitioriquiano, tamaatia na niishitiojonuusanota nia cushitiojoquiaani. Cante nia niishitiojiya sesani, jaara quiri cuarta Jesucristo jiyaramiquishano pueyano, tama janiyajaaja soj, naajaa, nojoriiri saniitiosariquiano.

<sup>11</sup> Cuarta Pueyaso pueyanaa, majaari cua niishitiojonu quiquiaa taucacajinijinio Jesucristoocua tiuujica, nojori miatejonura na cararaatiuuquia co, seetanujuaanaa Pueyaso muerasu nojori quiniuria. Janiya jaara naa seetanujuaanaa niishitiojoriquiaani, cuarta Judiocuaca maara naquiya cua miitiaquiriquiani. Saniniuujia, Jesucristo cusonuucua niyacutesanojinia pocuara, paari saaja naacua jiyanooshaaquiaani. Naa cua niishitiojonuucuatej, Judiocuacaari jyanohua cua juaaquiaani. <sup>12</sup> Majaari nojori nia tojiniu, nojori niishitijosacari nia cararaatiuuquia co miatejosaanura. Maninia juhuari cuno miatejonuunu porocua jayosaanura nia tajiniji, maja socua nojori cushitiojonura nijaniya.

<sup>13</sup> Cuarta Pueyaso pueyanaa, Pueyasocuaajaari nia sequequiaari na muerasuniyojua nia quiniuria, Neyanu Jesucristoocua nia tiuuniuucua. Naacuajitij, majaari tari nia quiniu juhua poonijotesano pueya, taa nia quiquiaaricuaani Moisés Rootasano nia tojishacari pueyaracaanu. Naa Moisés Rootasano tojijica nia quiyaquishacari taritij, naajaa, majaari nia jyaniniu nia naata miiniu puetunu nia cuaqueya miiniu panishanojuanaa. Maja. Maninia cutaraari niarta Pueyaso pueyata nia cumaquitiojonura, seetanujuaanaa nia panitioonuta. <sup>14</sup> Niaa jaara naa miijica quiriquiatej, niaari puetunu Moisés Rootasanojuanaa tojiyacuaaja, taa na rootasanojinia naajiotasano quiyacuajani. Naa sequeyari:

“Panijia quia quiriquia, taa quia paniyacuaa tama quia cuaqueyajaajani”.

<sup>15</sup> Naarate pueyanaa, tama nia cuaqueyajaaja nia cojuare. Majaari pueyaracaanu nia juayonuujutatu, naatej, taa sareya sayonuujutaquiaacuaani. Niaa jaara naa quiriquiatej, niaari socua puecootonutaniyaquij.

*Taa quijiate tama na panishanojuaaja miijia pueyanoni, Pueyaso Sohuanu tojijia pueyanonio*

<sup>16</sup> Janiya nia sequeya cutarani pueyanaa. Cua tojiri. Pueyaso Sohuanu tojijica nia quiri pueyaracaanu. Naacuajitij, majaari sacuaraatia tama nia panishanojuaaja nia miiniu quiniutianiya. <sup>17</sup> Nio nia niishiri cutara. Cuno, poojiajinia sesa casaa pa panishanoni, cunoori Pueyaso Sohuanu paraca. Naajuhuj, Pueyaso Sohuanuuri poojiajinia sesa casaa pa panishano paracajuhuj. Naacuajitij, cuno pojori miaquetoosacari poojiajinia, cunora, majaari pa naata miiniu taa pa miiniu paniyacuajani. <sup>18</sup> Saniniuujia, Pueyaso Sohuanu jaara nia cumaquiquiaacuaaja saaja Pueyaso nia tojiniuria maninia, cunora, Moisés Rootasanoori tojiniu paniyaquishaanutaniya tari. Naacuajitij, niaacuajaari maninia miiniutianiya saa Pueyaso Sohuanutaja.

<sup>19</sup> Maatia niquishanocuaajaari taa pueya miiquiaani, noo pojori, canapuate tama na panishanojuaaja miijiacani. Nojoriiri juhuajaniya na camishoo maajipohua numuetucunuujuaa, sacuaraatia miitiojua narta canuutajaariuhuj. Maajipohuari naa sacuaraatia miitiojua narta maajipohuatajuhuaj. Pueyari saaja naa miiniucua jiaatiajaca sacuaraatiatej. <sup>20</sup> Naajuhuj, nojoriiri tama nojori pueyasorajaaja nojori shipinishano casaa secojonuujuaa. Nojoriiri shimiacurijiuhuj, narta pueyano shimiojonuujuaa. Narta pueyano niqiniu paniyashijiacajaariuhuj. Nojoriiri juaatioojuacajuhuj. Nojoriiri narta pueyano jiitiasanoocua jiaatiajacajuhuj. Cunora, nojori niquiniu paniaquijiaari. Nojoriiri maja na niishiniu rejetenu na juaaquiaca. Ritia juaajiaari.



Pueya nasojoua narta pueyanoocuarajaariuhuj. Naacuajitij, nojoriiri narta pueya raquiriojotaquiaa narta pueyajiniji. Nojoriiri saaja tama nojori panishano pueyajaaja panijiaca, canapuate maninia miiquiaa nojoricuajani. <sup>21</sup> Cuno pojori, naa sacuaraatia miijiaca pueyaracaanu Pueyaso niquirani, nojoriiri maja na niqiniu paniniu quijia narta pueyano, cante taquiya maninia miishaaree nocuajicuaani. Nojoriiri sacuaraatia mashaasequenujuacajuhuj. Nojori mashaasequenuusacari, puetunu sacuaraatia casaa miiijioquiaajanaari. Jiyanhua miaquenu porocua. Nojori queranacusacari, nojoriiri socua tamaatia sesa casaa miiniu niishijiacajuhuj. Niajaniya saniniuujia cuarta Pueyaso pueyanaa, cua tojiri. Cante naa sacuaraatia casaa miiijiojuani, nojuajaari maja Pueyaso jiiitiasano na quiniu quiniutianiya, pueyaracaanu rishijia na quiniuria shuquiriaatia.

<sup>22</sup> Saniniuujia, paa jaara Pueyaso Sohuanu shanacure poojiajinia na poonijionurani, nojuajaari parta pueya panijara pa jiyateja. Poojia jiyateya shuquiriaatia quijaraari. Poojia cajitijiaariuhuj. Jacaria pocuajara pa jiyateyajaariuhuj, juhuajaniya sashijiano. Pueyaso Sohuanuuri maninia pueyanora pa jiyatequiaa, jiyanoojiano. Pa sequesano miijiara pa jiyatejajaariuhuj, pueya tiuuniuria pocua. <sup>23</sup> Pueyaso Sohuanuuri pa jiyateja pueya shocoteyashijiarajuhuj. Pa niishitiquiaajaariuhua tama sesa casaa pa cuaqueya panishanojuaaja pa rejetenura. Paa jaara naa miijiaca quiriquia Pueyaso Sohuanu cumaacatani, majaari quenaaja niquiriyatu Moisés Rootasanojinijinio sesacanu quiniutianiya pajaniya. <sup>24</sup> Seetanujuanaari, paa jaara Jesucristo pueyanora quiquiaarini, pa rupuesacari nojuaja, paari tari poojia sesoriquia seque cusojuaquiaari Cristotani, puetunu sesa pa jiaatianujuanaanio. <sup>25</sup> Pueyaso Sohuanu jaara nia samiitianijioquiaari Pueyaso muerasu nia quiniuria, quiarijia seetanujuanaa pueyaracaanu na tojjijia nia quiri cutara. <sup>26</sup> Majaari tama pa cuaqueyajaaja pa jiyaniniu, paa socua maninia pueyano parta pueyajinijini. Paa jaara pueya shocotejaca quiriquiani, paari parta Pueyaso pueya juaatiniutianiyani. Maja maninia, paa jaara juaatishaareni tamonu jaara socua tojishano pueyano quiri pajaniyajiniji, naajuhuj, tamonu jaara socua maninia miishaare pajaniyajiniji. Majaari naa miijiaca nia quiniu Pueyaso pueyanaa. Saaja maninia quijiaaca pa quiri cutara.

## 6

### *Niarta Pueyaso pueyata nia cumaquitioojoriquia*

<sup>1</sup> Cuarta Pueyaso pueyanaa, niaa jaara parta Pueyaso pueyano niquiriquia sesa miyano, jacaria nia nacasure. Cuno niajanijianijinio canapuate Pueyaso Sohuanu niishitijaraca cutarani, nojori cuaara jacaria na nacasuuranon, sesa miiniu na tarinitianuhua. Cante cuno sesa miijiaca nacasyani, nojuaja cuaara na nacasuura seetanujuanaa na paniniutia narta pueyano. Naajuhuj, jiyanhua nia cojuare tama nia cuaqueyajaaja Sesaaca mariqui nia saniniujiurijiaariuhuj, sesa nia miiniurajuhuj. <sup>2</sup> Maninia cutaraari nia cumaquitiojonura niarta Pueyaso pueyata, niaa jaara taraatia miishaare. Naa pa cumaquishacari parta Pueyaso pueyatej, paari naa pa Jiyaniijia Cristo rootasano pajaniyarano tohuateenutaniyani.

<sup>3</sup> Najuhua quijia jaara jiyaniya nojuaja cutara niishijia pueyano, pueya tojishano pueyanotuhuj, naa niishiriojuaari tama na cuaqueya sapojijajaacujua. <sup>4</sup> Puetunu niajanijajanaa cumaati tama niishiriojoquiaajaacujua, taamueca pueyanote niajanijani, maninia miijiaca, sesa miijiaca soj. Niaa jaara seetanujuanaa maninia miijiaca quiriquia, tama maninia nia miishanojuaaja nia timitiare. Niarta Pueyaso pueyano jaara socua maninia miijiaca quiri niajanijajiniji, socua sesa miijiaca soj, niaara, naajaa. Maja cunora taraajenu, maja cunora shuquiriaatia quiniujiuhuj. Saaja shuquiriaatia nia quiri, niaa jaara maninia miiquiaa taate nia naata miiniucujani. <sup>5</sup> Puetunu pajaniyajanaari tamaatia poonijosano jiiitiaani. Tama niajanijajaaja cumaati na miiquiaa maninia, Pueyaso shuqiritianura niajanijaniya, seetanujuanaa shuquiriaatia nia quiniuria.

<sup>6</sup> Canapuate Pueyaso rupaa niishitiojosaquiaani, cuno pojori cuaara na niishitiojonaa niqitiojora nojori casamijiniji saniniuujia, nojori niishitiojonaa jiiitianura nojori panishanojuhuj.

<sup>7</sup> Pueyanaa, maja tama nia cuaqueyajaaja nia sapojonu nia jyanishacari niaari saniitioyaquishaanutaniya sesa nia miiniuucua. Majaari quenaaja tamonu pueyano na naata Pueyaso rerequetenu. Pueyasoori saniitiojua cutara. Naaratej, nio miriqui sequesano nia niishiri: “Casaa jajau pa natareeni, paari juhua cuno jajau senoonutaniyajaaniuhaj”. Nio miriqui sequesanoori nio niishitiojiya: cante maninia miijiani, nojuajaari maninia miishaanutaniyajaacuhaj. Naajuhaj, cante sesa miijiani, nojuajaari sesa miishaanutaniyajaacuhaj sesa na miiniuucua. Cunoori maja rimiajata. <sup>8</sup> Naacuajitij, canapuate tama na cuaqueyajaaja shuquiritijaca sacuaraatia casaa na miishacari mijiriani, Pueyasoori cuno pojori quejoonutaniya cutara, pueyaracaanu na saniitiosocoriquiano. Saniniuujia, cante Pueyaso Sohuanu tojijiani, Pueyaso panishano na miiniuria puetunujuanaa, nojuajaari pueyaracaanu rishijara jiyatesaanutaniya cutara. Nojuajaari shuquiriaatia quiniutianiya pueyaracaanu. <sup>9</sup> Cunora pueyanaa, niaa jaara maninia miijica quiri, majaari maninia miiniuria nia taajenu. Pueyaracaanu maninia miijica nia quiri. Niaacuajaari niishiya, pueyano jaara na cuhuariquia natare, nojuajaari na sashijia. Majaari ritia na senoonu. Nio miriqui sequesanoori pa niishitiya, paa jaara Pueyaso Sohuanu tojiniu tarinitiaaquirini, paa cuaara sashiirajuhaj. Na nuhuaji cutara paari jyanohua shuquiriaatia quijacara jiyatesaanutaniyani, maninia pa miiniuucua. <sup>10</sup> Naacuajitij, jaara pa naata quiriqia, maninia pa miiriqia puetunu pueyajanaa. Saniya maninia cutaraari puetunu parta Pueyaso pueyajanaa pa miiniuria maninia.

*Pablo nacasusacari pueya, quera na tucuatascari na naajio*

<sup>11</sup> Nia niqiri cua naajio pueyanaa. Naa quera namijiaaca cua naajiosacari ni-aacuaratej, nia niishiri janiyajanaari nio naajia tama cua juaashiquiatajaajani. <sup>12</sup> Socua cua tojiri pueyanaa. Cuno pojori, nia shiniuuiuquiaa nia cararaatiuuquia co nia miatejonurani, nojoriiri naa nia miitiniu paniya saaja narta Judiocuaca timitianura nojori. Nojoriiri narta Judiocuaca puerequiaa. Nojoriiri niishiya narta Judiocuacaari nojori miiniutianiya naquiya, miatesoo nia cararaatiuuquia co quiniuucua. Majaari nojori tiunuu quiquiaa saaja Jesucristoocua, Pueyaso pueya nojori quiniuria. Cunora, nojoriiri jyanohua paniya nia cararaatiuuquia co miatesano pueya nia quiniurajuhaj, taa puetunu Judiocuacajanaacuaani. <sup>13</sup> Cuno pojori, canapuate na cararaatiuuquia co miatesanocuaani, nojorijianaari maja nojori tojiniu quiquiaa puetunu Moisés Rootasanojuanaa. Naajaa, nojoriiri nia panitiaa nia cararaatiuuquia co miatesano nia quiniurajuhaj. Niaa jaara miatejosaare, nojoriiri tama timiquionutaniyajaaja, nojori tojitiajaca nia quiniuucua. <sup>14</sup> Janiya saniniuujia, Pueyaso cuaara cojuara janiya maja cua shuquiritianura tama cua miishanojuaja. Janiyari saaja pa Jiyaniijia Jesucristo shuquiritianu paniquiaani, pocuara na cusuucua niyacutesanojinia. Naacuajitij, janiyari mijiria niishishanoocua jiaatiaashijara jatanishaaquiarini. Mijiria casaari maja na naata shiniuuiunuu janiya, nocua cua jiaatianura socua. <sup>15</sup> Pueyanaa, pa cararaatiuuquia co jaara miatesano quiri, naajaa. Naajuhaj, pa cararaatiuuquia co jaara miatesoo quiri, naajaa. Majaari rimiajata pa quiniu Pueyaso niqiuara cunora. Saaja panishano cutaraari, quiarinio pueyanora pa jatanishaanura Pueyaso Sohuanu cumaacata. <sup>16</sup> Puetunu nio sequesanoocua tiuujiacajanaani, Pueyasoori nojori jiuujia cajitiquiaa, na jiyanooshacari nojori. Cuno pojoriiri seetanujuanaa Pueyaso saquiriojosano pueya.

<sup>17</sup> Tariucuaajaari cua rootasano nio naajioneejinia. Quiarijiani, tamonu cuaara socua cua taajeteyaquiiria sesa na niishitiojosanota nijaniya. Janiya cutaraari pa Jiyaniijia Jesucristojiniji niishitiojonani. Cua cuaqueyajinia nio majacuyashiquiajinijini, cunojiniji maatia niishishiyari, janiya seetanujuanaa Jesu seruni.

<sup>18</sup> Cua panishano cuarta Pueyaso pueyanaa, nioojia cuaara jiitiaara pa Jiyaniijia Jesucristo cumaaca, na niishitijanio. Cuaara naa quiiriatej.

## PABLO NAAJIONEE ÉFESO TIACAJINIA QUINIAA PUEYASO PUEYACUARA

### *Pablo saruhuatasacari Jesucristo tojitiyajaca*

<sup>1</sup> ¿Niaate quiyajaa cuarta Pueyaso pueyanaa? Janyari Pabloni, Jesucristo jiyaramiquishano na rupaa cua pohuatanura, taa na Que Pueyaso paniquiaaricuajani. Niaacuara naajiyaniija, canapue Pueyaso saquiriojoquiaari tama neracuajani, canapue te Jesucristo tojitianaacuajani. <sup>2</sup> Pa Que Pueyaso, mariyata pa Jiyaniija Jesucristo cuaara taraajeera niaacua, maninia na miiniuria nijaniya. Nojori cuaara cajitiiria nioojia pueyaracaanujuhuj.

### *Taa Pueyaso miiquiaa pajaniyani Cristo rupuesano pa quishacari*

<sup>3</sup> Pa Jiyaniija Jesucristo Queeri Pueyaso. Nojuaja pa shuqiritiare. Neyanu Jesucristo pa rupuenuucua, Pueyasoori capora pajaniyara. Nojuajaari jyanohua maninia miiquiaa pajaniya, puetunu jiyocuacaanu na jiitiasano cumacatajanaa. <sup>4</sup> Pueyaso niishishacari taa Neyanu miiniutianiya pocuarani, jiya shipiniyaquishacariija, nojuajaari tari pa saquiriojoquiaari na shuriucua quijiaca pa quiniuria. Pa saquiriojoquiaariijaariuhua na tojijiaca pa quiniuria, tojetaarucujanaa sesa miyashijia pa quiniurajuhuj. <sup>5</sup> Panijia na quiniucua, nojuajaari pa saquiriojoquiaari na muerasura na jiyatenura pajaniya, Jesucristo jaara maninia miiri pajaniyara. Pueyasoori naa miiquiaa pajaniyatej, taa tariucuaaanu na niishiriojoquiaari na miiniuria pajaniyacuajani. <sup>6</sup> Jiyanoohua maninia na panishano Niyanuniyujua miiniucua pocuara, nojuajaari pueyaracaanu jyanooquiaa pajaniya. Nojuajaari jyanohua capora. Naa maninia na miiniucua pajaniyatej, paari cunora pueyaracaanu na maniniuhuaqueetaquiaani. <sup>7</sup> Niyacutesanojinia Neyanu shootenuucua na nanaca pocuara, Pueyasoori pa jyanooquiaari na muerasu pa quiniuria. Naaratej, majaari Pueyaso saniitionu quiniutianiya pajaniya. Puetunu sesa pa miishanojinijijianaa pa jyanooquiaariiri. <sup>8</sup> Pueyasoori na paniniu niishitiquiaari pajaniya, na niquitiosacari na niishitija pajaniya, puetunu casaa niishijijianaa pa quiniuria. <sup>9</sup> Nojuajaari jyanohua tariucuaaanu niishiriojoquiaari taa na miiniutianiya puetunu na shipinishanoocuarajanaani. Quiari naataja saniniuujia, nojuajaari jiyasohua na miiniu panishano niishitiquiaari pajaniya. <sup>10</sup> Pueyanaa, nia niishiri casaa Pueyaso miiniutianiyani. Nojuajaari Cristo jiyatenutaniya Jiyaniijijianaa na quiniuria. Naacua-jitij, puetunu jiyocuacaanu quijiacajanaa, mariyata puetunu mijiria quijiacajanaari na tojijiacara quiniutianiya. Nojuajaari naa tohuateenutaniya tamacari, taa tamajaaja na niishiriojoquiaaricuajani.

<sup>11</sup> Pueyasoori tariucuaaanu pa saquiriojoquiaari Neyanutaja na cojiritianura pajaniya, maninia na miiniuria pajaniya. Pueyasojuaari tariucuaaanu naa niishiriojoquiaari maninia na miiniuria pajaniya. Nojuajaari pueyaracaanu tohuateequiaa taa na miiniu paniquiaaricuajani, niishijia na quiniucua. <sup>12</sup> Nojuajaari pa saquiriojoquiaari maninia quijiacara na jataniniuria pajaniya. Cuarta Judiocuacajinijinio pueyani, canaari coteenujuanaa Jesucristoocua tiuquiarini. Naa jyanohua maninia Pueyaso miiniucua canaa, nojuaja cuaara maniniuhuaqueetasaaria jyanohua. <sup>13</sup> Quiari naataja nia tojishacari Jesucristo rupaa, niaari cuno seetanu rupaacuajanaa tiuquiarijuhuj, Pueyaso muerasura jatanishano nia quiniuria. Naa nocua nia tiuuniucuatej, Pueyasoori Neyanu nia rpuetequiaari. Na Sohanu niquitioquiaari nijaniyajaariuhuj taa na sequequiaaricuajani. Naacuaaji niishishaaquiaari, niaari seetanujuanaa Pueyaso muerasu. <sup>14</sup> Pueyaso Sohanuraca pa quishacari, paacuajaari niishiyani, paari puetunu Pueyaso sequesano Neyanuranujuanaa masenutaniya Neyanutajuhuj. Pueyaso Sohanu pa jiitiasacari, paari niishiyani, Pueyasoori pa rijionutaniya puetunu na saquiriojosano pueyatajanaa, na muerasu pa quiniuria na shuriucua. Jiyacaritij, paari tojetaarucujanaa jatanishaanutaniya juhua Neyanu pa niquishaanurajuhuj. Cunora, Pueyasoori

jiyanohua maniniuhuaqueetasano quiniutianiya, jiyanoehua maninia na miiniuucua pajaniya.

*Taa Pablo secojoquiaari Pueyaso pueyacuarani*

<sup>15</sup> Janiyari niajanijajini tojiriucuaani, taa pa Jiyaniijia Jesuucua tiuujiaca nia quiyani, taa parta Pueyaso pueya panijia nia quiyajaanuhua. <sup>16</sup> Cunora, pueyaracaanua cuo secojosacari niaacuara, majaari cua tarinitianu quiquiaa Pueyaso cua sequenura “paacarasho”, maninia na muerasu nia quiniuucua. <sup>17</sup> Pa Jiyaniijia Jesucristo Queeri shacantushiqui quijia na cumaacajinia. Janiyari niaacuara na secojoquiaani, nojuaja niq-uitionura niajanijia jiyocuacaanuji niishitija. Naacuaji nia naata niishiniu na niishitini panishano niajanijia, maninia nia niishiniuria nojuajuhua. <sup>18</sup> Janiyari niaacuara secojo-quiaajaanuhua, Pueyaso cuaara cuhuataara nioojia, maninia nia niishiniuria casaara Pueyaso saquiriojoquiaari niajanijiani, casaa na miiniutianiya niaarajanuhua. Janiyari niaacuara secojoquiaajuhua, maninia nia niishiniuria taa Pueyaso muerasu jiyatesaanu-taniya shacantuuca quijia nojori quiniuriani. <sup>19</sup> Janiyari secojoquiaajuhua, Pueyaso cuaara niishitiria na cumaaca niajanijia, cuno, nioojajinia poonijiani. Na cumaacaari jiyanoehua, puequeyashijia. <sup>20</sup> Pueyasocuaari cuno na cumaaca poonitijioquiaari Cristo quetajinia, nojuaja jaara na samiitiani quiaariuhua macujinijia. Jaara na samiitiani quiaari, cuno na cumaacata na cajitiquiaariiri Jiyaniijiajanaa cajitijinia na miaquetajara jiyocua- caanu. <sup>21</sup> Tii na cajitiquiaariiri puetunu tamasa cumaacaraca quijia Jiyaniijiajanaa na quiniuria. Majaari tamonu socua cumaacaraca quijia quiniu pa Jiyaniijiajinijia. Nojuajaari puetunu tamasa jiyaniijianucuajanaa Jiyaniijia. Puetunu mijiria quijiaa jiiatasanojuanaari na casaa. Nojuajaari puetunu casaajanaa camaru. Pueyaso jaara quiarinio jia shipinirioehua, Jesucristoori jiyacari Jiyaniijiajanaa quiniutianijuhua, taa quiarijia na quiyacuajani. <sup>22</sup> Naacuajitij, Pueyasoori puetunu na shipinishano- juanaa jiyatequiaari Jesucristo jiiatasocoriquiano. Naajuhua, Pueyasoori Jesucristo jiyatequiaari na saquiriojosano pueya jiiatariquiano, canapueté nocua tiuujiacacuajani. <sup>23</sup> Pueyaso saquiriojosano pueyari juhua Jesucristo cuaqueya. Nojuajaari juhua poojia saniniuuja, pa jiiatiana na quishacari. Puetunu Pueyaso saquiriojosano pueyajanaa jaara Cristo cuaqueyajinia ruquetesaare, Cristo cuaqueyari tucuateenutaniya seetanujanaa maninia jeecanamitishano na quiniuria. Na cuaqueya pa quishacari, nojuajaari puetunu poojiajinijanaa quiya. Naajuhua, nojuajaari puetunu tiqiyocuajanaa quijiajuhuanajaj.

## 2

*Panijia Pueyaso quiniuucua, nojuajaari pa jiyanooquiaari*

<sup>1</sup> Sesa miijia nia quiniuucua tarijia, Pueyaso tojiyashijiacajuhua, niaari macunucua quijia Pueyasora. <sup>2</sup> Naa jaara naa sesa miijia quiquiaaritij, niaari juhua puetunu mijiria quiniaa Pueyaso tojiyashijiacajanaa quiquiaari. Naaari samaruhua jiyaniijia tojiijia quiquiaari, cuno, paratu piyarojosaqui quijiani. Nojuajaari Pueyaso tojiyashijia shiniujijia, nojori miiniuria sesa, taa Sesaaca seque paniyacuajani. <sup>3</sup> Tarijia, puetunu pa- janiyajanaari Pueyaso tojiyashijia quiquiaarini. Paari tama pa miiniu panishanojuaja miijia quiquiaarini. Naacuajitij, paari puetunu pa cuaqueya miiniu panishanojuanaa miijia quiquiaarini, puetunu sacuraatia pa niishiriojosanojuhua. Naa sesa miiji-aca pa quiniuucuatej, paari tojetaarucuajanaa jiyanoehua Pueyaso saniitiosocoriquiano quiquiaari juucuaani, juhua tamasaajuhua. <sup>4</sup> Saniniuuja, Pueyasoori pocua taraajea cutara. Jiyanoehua pa paniquiaariiri. <sup>5</sup> Cunora, macunucua pa quishacarijia nera, sesa miijia pa quiniuucua, nojuajaari Jesucristota pa cojiritiaquiaari samiitianiionu. Jyanootio Pueyaso quiniuucua, nojuajaari nia jiyanooquiaari. <sup>6</sup> Naa na samiitianiionu-ucua pajaniya Cristoocua pa tiuuniuucuatej, Pueyasoori tari pa tacanijioquiaari Cristota jiyocuacaanu, tii Cristo cajitianura pajaniya. <sup>7</sup> Naa Cristota na cojiritianuucua maninia miiniu pajaniyatej, cunoori jiyanoehua maninia! Nojuajaari naa pa miiquiaaritij, puetunu quijiacajanaa nio pa quishacari nuhuaji niishiniuria maatia, Pueyasoori jiyanoehua pa panijia. Maatia niishishaanutaniyari Pueyasoori tojetaarucuajanaa jyanootio cutara, na jyanooniuucua pajaniya, Neyanuucua pa tiuuniuucua. <sup>8</sup> Naa Pueyaso quiniuucua

jiyanoototej, nojuajaari nia jiyanooquiaari saaja Jesuucua nia tiuushacari. Majaari tama nia miishanotajaaja Pueyaso nia jiyanootiniu quiquiaari tama nijaniyajaaja. Pueyasojuaacuajaari nia jiyanooquiaari niaacua na taraajenuucua. Naajuhuj, nojuacuajaari nia tiuutiquiaari Neyanuucua. <sup>9</sup> Majaari Pueyaso jiyanooni quiquiaari pajaniya, maninia miijiaca pa quiniuucua. Paa jaara maninia pa miiniuucua Pueyaso jiyanootiquiaari tama pa cuaqueyajaajani, paa maara tama pa cuaqueyajaaja timitiarenini juhua najuhuaana pocuaja. <sup>10</sup> Shushajanaa Jesucristoocua pa tiuushacari, Pueyasoori jiyacari pa jataniquiaari quiarinio pueyano pa quiniuria, maninia miijiaca pa quiniuria. Nojuacuajaari tari naa niishiriojoquiaari, maninia miijiacara na jataniniuria pajaniya.

*Jesucristoori pa jiyateja jiyanootiojuacara*

<sup>11</sup> Éfeso tiacajinia quiniaa pueyanaa, quiarijia nia niishiriohua taa nia quiquiaari tariucuaaanuni, Pueyaso muerasu nia quiyaquishacarijia. Niaari cuarta Judiocuaca soosano taucuaca quiquiaari, nia cararaatiuuquia co miatesoo quiyaquiniuucua. Canaa cutaraari canaa cararaatiuuquia co miatesanoni. <sup>12</sup> Nia niishirijuhuj, naa nia quishacarij, niaari Cristooju quiquiaari. Majaari nia naata rupueni quijia Pueyaso saquiriojosano Israel pueya. Puetunu Pueyaso sequesanojuanaa Israel pueyanoni, cunoori maja niaarano quiquiaari. Majaari nia niishiniu quiquiaari Pueyasoori pueyacuaji Tacuriquiano jiyaronutaniya mijiria. Majaari quenaaja tamonu quiniu quiquiaari nocua nia tiuniuria, Pueyaso na jiyanootiniuria nijaniya. Niaari saaja taraatia shaajeriquiano quiquiaari. ¿Cantucua niaacua taraajereni? Niaari seetanujuanaa tojetaarucujanaa Pueyasooju quiquiaari mijiria. <sup>13</sup> Tarijia, niaari seetanujuanaa tucuacaanu quijiaca quiquiaari Pueyasojiniji. Quiarijia saniniuujia, Jesucristo shootenuucua na nanaca niyacutesanojinia, niaari nata rupuetootesaaquiaari, nocua nia tiuushacari. Naacuajitij, niaari canaa rupuejacajuhuj. <sup>14</sup> Cristocuajaari pa jiyanootiootequiaari. Moisés Rootasanoni, cunoori juhua jiyaconaja sohuaca quiquiaari pa tajinia, maja nia cojiniuria canaa, maja nia rupuenura canaajuhuj, taucuaca nia quiniuucua. Jesucristocuajaari cunora tama na cuaqueyajaaja tarinitiaquiaari na mosaanura pa niti, cuno jiyaconaja sohuaca niyartasaanura, pa juaaquiaca tajiyatenura. Naacuajitij, nojuajaari pa jiyatequiaari juhua niquiriyatu queecuajinio supueno pueya, Judiocuaca, nijaniya taucuacano. <sup>15</sup> Naa pa niti Jesucristo cusonuucuatej, nojuajaari puetunu Moisés Rootasanojuanaa sanaajaquiaari, maja socua na sesacanura pajaniya. Tarijia, paari juhua caapiqui tiaca quiquiaarini. Paari pueyaracaanu paracaatiojua quijiani. Quiarijia saniniuujia, Jesucristo cusonuucua, nojuajaari pa jiyanootiootequiaari jatiqui pa quiniuria juhua niquiriyatu tiaca, mariyata na rupuejaca pa quishacari. <sup>16</sup> Naaratej, janiyari socua camiya nia sequenuni. Cristo cusonuucua niyacutesanojinia, nojuajaari Pueyaso jiyanootiquiaari pajaniya, na panishano muerasu pa quiniuria puetunujuanaa, nijaniya taucuaca, canaajuhuj. Naacuajitij, Jesucristoocua pa tiuushacari, paari juhua niquiriyatu tiaca nerani.

<sup>17</sup> Nijaniya taucuacanaa, niaari juhua tucuacaanu quijiaca quiquiaari Pueyasojiniji. Canaa cutaraari juhua cateca quijia nojuajinijini. Jesucristoori mijiria niquiaari, na niishitiniuria puetunu pajaniyajanaa taa Pueyaso jiyanooni paniya pajaniyani. <sup>18</sup> Cristo jiyanootiniuucua na Que Pueyaso pajaniya, naacuajitij, pa naata pa Que Pueyaso rupueni pa secojosacari nojuaja, mariyata na Sohuanuraca pa quishacari, nijaniya, canaajuhuj. <sup>19</sup> Jesuucua tiuujiaca nia quishacari quiarijia cua panishano pueyanaa, majaari tari nia quiniu tahue canaara. Majaari nia quiniu juhua tamonu tiacajinijinio ruconaa. Quiarijiani, niaari seetanujuanaa Pueyaso pueya cutara. Pueyasoori maninia nia jiitiaajuhuj, taa na jiitiaquiaa puetunu na saquiriojosano pueyacuaani. <sup>20</sup> Pueyaso pueya nia quiniuucua, niaari rupuetesano puetunu Pueyaso muerasutajanaa, juhua shanohua tia pa quiniuria Pueyaso quiqiora. Jesucristo jiyaramiquishano pueya na rupaa pohuatariquianoni, mariyata na sequenu panishano caminiujiunaa pueyani, nojoriiri juhua cuno tia pacaariana. Saniniuujia, Jesucristoori juhua cuno tia morijujiana cutara, cuno tia nujuatana. <sup>21</sup> Pueyasoori naa saquiriojoquiaa Neyanuucua tiuuriquiano pueya, na quiqiorano na tucuatana. Cuno tia tucuateesacari, tojetaarucujanaa maninia jeenucuasano quiniutianiya pa Jiyaniijaraari. <sup>22</sup> Niaari naajuhuj, Cristo nia

rupuesacari, niarta Pueyaso pueya nia rupuesacarijuhuaj, Pueyasora, niaari juhua rianaa, tucurunio. Nojuajaari nia morojotaquiaa na tia na tucuatana, na Sohuanu quiquiorano.

### 3

#### *Pabloori Pueyaso jiyaramiquishano taucuacaacua*

<sup>1</sup> Jesucristojiniji cua pohuatanuucua niarta taucuaca, janiyari cunora nujuate-sano quiya nujuatejojuajiniani. <sup>2</sup> Niaa naasucuaari niishiyacuaja Pueyasoori cua jiyaramiquiquiaari Jesucristojiniji cua pohuatanura taucuaca, jiyanooshano nojori quini-urijuhua. <sup>3</sup> Tariucuacaanu, majaari pueya niishiniu quijia, Pueyasoori taucuaca jiyanooniutianiyajuhua, taa na jiyanooquiaacuaa Judiocuacani. Pueyasojuaanaacuajaari naa jiyasohuaja na miiniu panishano cua niishitiquiaariti, taa shusha nio cua naajio coteejajinia cua pohuataa nijaniyacujani. <sup>4</sup> Niaa jaara cua naajionee serojore, niari jiyacari seetanujuanaa niishiniutianiya, janiya cutaraari Jesucristo rupaa niishijiani. Naacuajitij, janiyari niishiyani taa jiyanoohua maninia nia miishaanutaniyani nocua nia tiuushacari. <sup>5</sup> Tariucuacaanu, majaari quenaaja tamonu pueyano niishiniu quijia nio jiyasohuaja Pueyaso miiniu panishano. Quiari naataja saniniuujia, Pueyasoori na jiyaramiquishano pueya niishitiquiaari cuno, jiyasohuaja na miiniu panishano taucua-cani. Na sequenu panishano caminiujiunia pueya na niishitiquiaarijiaariuhua. Pueyaso Sohuanucuaajaari cuno canaa niishitiquiaari. <sup>6</sup> Nijaniya taucuacanaa, niocuajaari Pueyaso miiniu panishano jiyasohuaja nijaniya: Jesucristoocua nia tiuuniuucua, Pueya-soori puetunu Judiocuacarano na sequesanojuanaa jiyatenutaniya niaarajuhua. Canaari Judiocuacani. Naajaa, Jesucristoocua nia tiuuniuucua, Pueyasoori canaa rupuetequiaa nijaniya, juhua niquiriyatu pueyano pa quiniuria nera. Naajuhua, cunora, Pueyasoori nia niquitioquiaa na Sohuanujuhuaj, taa na sequequiaari Neyanu Jesucristoocua tiuuji-acacuajani.

<sup>7</sup> Janiyari Jesucristo ruuretaja quiquiaarini. Naajaa, jiyanoohua cumaacaraca Pueyaso quiniuucua, nojuajaari cua jataniquiaari Neyanu Jesucristojiniji pohuatana cua quini-uria. <sup>8</sup> Jesucristo paraca cua quiniuucua tarijia, janiyara, janiya cuaara socua rerequete-sano pueyano quiiria puetunu cuarta Pueyaso pueyajinijijianaa. Saniniuujia, jiyanoohua jiyanooti Pueyaso quiniuucua, nojuajaari cua jiyanooquiaari. Cua jiyatequiaariiri see-tanu rupaajanaa Neyanu Jesucristojiniji pohuatana cua quiniuria taucuacana. Janiyari cunora Pueyaso shuquiritiaa jiyanohuani. Cristo jiiitasano pajaniyaranoni, puetunu cuno casaajanaari pa niishishoojua. <sup>9</sup> Tariucuacaanu, Pueyasoori puetunu casaajanaa shipiniquiaari. Na shipiniquiaari, Pueyasoori tari niishiriojoquiaari casaa na miiniutianiya puetunu pajaniyarajanaani. Naajaa, tariucuacaanu, majaari na niishi-tiniu quiquiaari pueya. Nio pa quishacari saniniuujia, nojuajaari cua seerataquiaari puetunu pueyajanaa cua niishitiniuria jiyasohuaja na miiniu panishano. <sup>10</sup> Pueyasoori tariucuacaanu pajaniyara na niishiriojosano racataquiaari pueyaracaanu tama na niishi-tiajajiniaaja. Saniniuujia, nio pa quishacarini, nojuajaari na niishitiquiaari. Quiar-ijiani, jiyanoohua maninia Pueyaso miishacari puetunu na saquiriojosano pueyajanaa, puetunu jiyocuacaanu cumaacaraca quijiacajanaari niishiya, Pueyasoori seetanujuanaa jiyanoohua niishijia cutara. Naacuajitij, Pueyaso seya, Satanás, samaruhanio, nojoriiri tacuriitia shootiaquiaa pajaniya, Pueyaso miiniuucua maninia pajaniya, niishijia na quiniuucua. <sup>11</sup> Quiari naataja, Pueyasoori tariucuacaanu na miishocoriquiano na niishiriojosano tohuateequiaari pa Jiyaniijia Jesucristo cusosacari niyacutesanojinia. <sup>12</sup> Naacuajitij, Jesucristoocua pa tiuuniuucua, pa naata juhuajaniya rupueni na Que Pueyaso pa puereyaquiniutia. <sup>13</sup> Naa Pueyaso miiniuucua pajaniyaretej, majaari nioojia nia niqijiotenu Pueyasooquaji nia puerenuta naquiya cua miishacari. Naa naquiya cua miishacari Jesucristojiniji cua pohuatanuucua nijaniyatej, shuquiriaatia nia quiri juhuari. Naa naquiya cua miishacariti, cuno cuaara shiniujuuria nijaniya, socua pa Jiyaniijia tojijia nia quiniuria.

*Pablo secojosano Éfeso tiacajinia quiniaa Pueyaso pueyacuara*

<sup>14</sup> Naa Pueyaso muerasu nia quiniuucujuhuj, janiyari mojuquetaquiaani pa Que Pueyaso cua secojonura niaacuara. <sup>15</sup> Nojuacuajaari Que cutara. Puetunu queyajaari na sesaatiaacuaja. Nojuajaari puetunu parta Pueyaso muerasujanaa Que, mijiria quiniaa, tariucua jiyocuacaanu quiniaa Pueyaso muerasunio. <sup>16</sup> Naa nia Que na quiniuucujuhuj, janiyari niaacuara secojoquiaani, nojuaja cuara cumaquiiria jiyanojua niajaniya na Sohuanuta nioojiajinia. Na Sohuanuuri puetunu pa panishanojanaa jiitiana. <sup>17</sup> Naajuhuj, niaacuara secojoquiaanjia, seetanujanaa nia niishiniuria Jesucristojuanaacuajaari nioojiajinia quijia. Nojuajaari nioojiajinia quiya quiarinio pueyara na jataniniuria niajaniya, nocua tiuujiaca nia quishacari. Naacuajitij, niocua niishiri taa Jesucristo paniya jiyanojua niajaniyani. Naacuajitij, majaari nioojia nia niquijiotenu quiniutianiya socua. <sup>18</sup> Naa Jesucristo paniniu nia niishishacari taritij, niaari puetunu Pueyaso pueyatajanaa niishiniutianiya taamuecate Cristo paniniuni. Naajuhuj, niaari seetanujanaa niishiniutianiya tee na paniniu pueetaani. Jesucristo paniniu jaara shanacujusaatia quiri shanacujutajata, paa maara nocua puequeetejore najuhuanani. Seetanujanaa, majaari pa naata shanacujununoj. Paa jaara na jamatu, na tucuanee, na queroni, na jiyaconaja shanacujunu paniriquiani, majaari na puequeeja pa riuriatanu quiniutianiya. <sup>19</sup> Seetanujanaa, majaari pa naata niishiniu taa jiyanojua na paniya pajaniyani. Naajaa, janiyari niaacuara secojoquiaa Pueyasoni, seetanujanaa nioojia nia niishiniuria cuno, na paniniuni. Naa jaara na paniniu niishiri, Pueyasojuanaari nioojiajinia quiniutianiya. Naacuajitij, niaari tojetaarucujanaa panijia quiniutianiya taa Pueyasocuaani.

<sup>20</sup> Naa Pueyaso miiniuucua maninatej, nojuaja cuara shuquiritiasaaria. Naa jiyanojua na cumaacata na poonijosacari poojiajinatej, nojuajaari na naata miiniu socua jiyanojua queraatia pa masanojiniji nojuaja, pa niishiriojosanojinijinio. <sup>21</sup> Puetunu quijiacajanaa cuara niishiiria Pueyasoori jiyanojua maninia. Nojori cuara naa niishiiria nojori niquishacari Pueyaso jatanishano na saquiriojosano pueya, Jesucristo miishanonio. ¡Cuara naa shuquiritiasaaria pueyaracaanutej!

4

*Pueyaso Sohuanu pa jiiitasacari, paari rupuetootesano quijiani*

<sup>1</sup> Janiyari niya nujuatesano quiyani pa Jiyaniijajiniji cua poojotanuucua. Cunora, cua tojitiare. Janiyari nia sequeyani, saaja pa Jiyaniijia tojijia nia quiri, seetanujanaa maninia na muerasu nia quiniuria. Pueyasocujaari nia saquiriojoquiaari naa maninia na muerasu nia quiniuria. <sup>2</sup> Majaari niarta Pueyaso pueya rerequetejaca nia quiniu. Maninia miitioojuaca nia quiri quia. Puetunu casaajanaa rejeretajaca nia quirijuhuj. Naa jiuujiaatoojuaca nia quiri nia panitioosacari. <sup>3</sup> Naa Pueyaso jyanootootesacari niajaniyatej, pueyaracaanu nia jyanootioore, juhuajaniya nioojia quiniuria juhua rupuetootesano. Pueyaracaanu naa nia miiri Pueyaso Sohuanu cumaquishacari niajaniya. <sup>4</sup> Naa quijia nia quiri pueyanaa, niquiriyatu cuaqueyaraca pa quishacari pa Jiyaniijia, mariyata niquiriyatu Sohuanuraca pa quishacarijuhuaj. Naa Jesucristoocua tiuujiaca pa quishacaritij, Pueyasoori puetunu pajaniyajanaa rijionutianiya, pueyaracaanu na shuriucua pa quiniuria. <sup>5</sup> Puetunu pajaniyajanaari niquiriyatu Jiyaniijiaracani. Nojuajaari Jesucristo. Naajuhuj, puetunu pajaniyajanaari saaja Jesucristo rupaacua tiuujiacani, maja tamonu rupaacua. Naajuhuj, puetunu pajaniyajanaari moojinia tiuquinijosaaquiarini, Jesucristo pa jiyatesacari pa Jiyaniijia. <sup>6</sup> Naajuhuj, saa niquiriyatujua Pueyasoori quiya. Nojuajaari puetunu Neyanuucua tiuujiacajanaa Que. Nojuajaari puetunu na tojijiacajanaa Jiyaniijia. Nojuajaari puetunu na pueyajanaa poonijioteya na panishano nojori miiniuria. Puetunu na muerasu jiuujiaajanaari na quiquio.

<sup>7</sup> Saniniuujia pueyanaa, puetunu pajaniyacujaari tari jiitiaa tamaatia poonijosano pa miiniuriani, teyano Cristo niquitionu paniquiaari pajaniyacujani. Naacuajitij, puetunu pajaniyajanaari maja pa niishiniu miiniu saa niquiriyatu casaaja. <sup>8</sup> Tariucuaanu

Pueyaso Rupaa naajiotasanojiniji, paari niishiyani Pueyasoori na Sohuanu niqutionu paniquiaari na pueya. Cunora naa sequeya Jesucristojiniiri:

“Na quioosano pueya tacataquiaariuhua jiyocuacaanuuri. Nareja na niqutionu panishano casaa serotaquiaari na pueyari”.

<sup>9</sup> Jaara sequeya “tacaquiaariuhua”, cunojiniji paari niishiyani nojuaja jiyocuacaanuji rosequiaari coteenu, taraatia mijiria na mosaanura pocuara. <sup>10</sup> Nojuajani, jiyocuacaanuji rosequiaarini, nojuajaari tojetaarucujanaa jiyocuacaanu tacaquiaariuhua, Jiyaniijia-janaa na quiniuria na Que shuriucua. Tacaquiaariiri puetunu jiya cajiniocuajanaa na mishininiuria na cumaacata, puetunu jiyajanaanio. Naacuajitij, nojuajaari puetunu tiqiyocuajanaa quijia. <sup>11</sup> Nojuacuajaari noojiaqueya na saquiriojosano pueyajinijinio jiyatequiaari na jiyaramiquishano pueya nojori quiniuria. Saniniuujia, tamasaca jiyatequiaariiri Pueyaso sequenu panishano caminiujiuniaa nojori quiniuria. Saniniuujia, tamasaca jiyatequiaariiri Jesucristo niishiyashijiaca niquiara poojotanaa nojori quiniuria, Pueyaso jiyanooniuria nojoriujiuhaj, Jesucristo nojori tiuushacari. Tamasaca jiyatequiaariiri na tojitiajaca pueya jiiitanaa nojori quiniuria. Tamasaca jiyatequiaariiri na rupaa niishitiojanaa nojori quiniuria narta Pueyaso pueyara. <sup>12</sup> Naacuajitij, Jesucristoori na Sohuanuta cumaquiquiaa cana na paniyani, puetunu tamaatia na miiniu panishanojuanaa nojori miiniuria. Naa na pueya cumaquiquiaa na Sohuanutaari na saquiriojosano pueya tiuuniuria nocua, nojori cumaquishaanurajuhaj. Naa Jesucristoocua tiuujia pueya canesacari socuatej, Jesucristo cuaqueyari canequiaa. <sup>13</sup> Jesucristora poonijionaa pueyari naa poonijioquiaatej, paa cuara tojetaarucujanaa pa Jiyaniijia tojijia quiri-jiaatijia, juhua rupuetootesano pa quiniuria. Cristo pueyari naa poonijioquiaa Pueyaso Sohuanu cumaacata, paa cuara seetanujuanaa Pueyaso Niyanu niishijiaca quirijiaatijia. Naacuajitij, paari tojetaarucujanaa jeenucuasano quiniutianiyani, seetanujuanaa juhua Jesucristo pa quiniuria. <sup>14</sup> Naacuajitij, majaari tari pa quiniu quiniutianiya juhua naatujua. Niaacuajaari niishiya naatujooriiri na niishiriojosano jatanijia ritia. Noojia niqijiotejajaariuhaj. Naa juhua tariucua cumueeca mashaja pa quishacaritij, majaari quenaaja tamasaca naata sapojonu quiniutianiya pajaniya, tamaatia nojori niishitiojosanota. Cuno pojori naa tamaatia niishitiojonuujuaca tariucua pa niishishanojinijini, nojoriiri jiyanoohua sapojonu niishijiaca, nojori tojitiajaca na tashuquootenura Pueyasojiniji. <sup>15</sup> Nocuaji pueyanaa, Pueyaso Rupaata pa cumaquitioojore seetanujuanaa pa panitioonuta, Cristo rupuejaca pa quiniuria socua. Nojuacuajaari juhua poojia. <sup>16</sup> Pueyanaa, niaacuajaari niishiya, puetunu pa cuaqueyajiniacuma casaa pa jiiitiasanojuanaari maninia rupuetootesano. Puetunu cunoujanaa jaara maninia poonijioquiaa jatiqii, paari maninia quiyani. Pueyaso muerasuuri juhua pa cuaqueya jiiitiasano casaa. Naacuajitij, puetunu Pueyaso muerasujanaa jaara tama na poonijosanojuaja miiquiaa maninia taa pa Jiyaniijia paniyacuajani, pa Jiyaniijia cuaqueyari maninia canenutaniya, jatiqii rupuetesano pa quishacari, seetanujuanaa panitiojuaca pa quiniuria.

#### *Cristoocua tiuujiaaari quiarinio pueya*

<sup>17</sup> Jesucristo jiyaramiquishano pueyano cua quiniuucua, cua tojiri pueyanaa. Pueyaso saquiriojosano pueya nia quishacari, maja socua nia quiniu taa Pueyaso niishiyashijiaca pueya quiyacuani. Nojoriiri najuhuana quijiaa, najuhuana nojori niishiriojonuucua. Naajuhaj, nojoriiri tama na panishanojuaja miijiaca, najuhuana casaacua nojori jiaatianuucua. <sup>18</sup> Nojoriiri naa quijiacatej, juhua ninishiqui nojori niishitiaja quiniuucua. Nojoriiri seetanujuanaa niishiyashijiaca, nojori tojiyaquiniuucua Pueyaso, juhua cumueeca jiuujiaraca nojori quishacari. Majaari nojori jiyatesaanu quiniutianiya Pueyaso muerasura, pueyaracaanu shuquiriaatia quijiaa nojori quiniuria. <sup>19</sup> Naa pueyaracaanu sesa nojori miijonuucuatej, nojoriiri maja tari na niishiniu caririquiniu, sesa nojori miishacari. Nojoriiri puetunu tama na miiniu panishanojuaja miijiaca. Nojoriiri puetunu sacuaraatia casaajanaa miiniuucua jiyartuucono. <sup>20</sup> Niajaniya saniniuujia, majaari naa nia niishitiojosaanu quiquiaari Cristojiniji, naa sacuaraatia miijiaca nia quiniuria. <sup>21</sup> Naa jaara Jesujiniji tojiqiaari, niaacuajaari niishiquiaari na rupaari seetanu rupaaajanaa cutara. Niaacuajaari na rupaaajiniji niishitiojosaquiaari maninia



miijiaca nia quiniuria, sesa nia miiniu nia tarinitianurajuhuj. <sup>22</sup> Pueyanaa, pa toque mocua jaara mocuaatia jaanure, paari ritia na jocuajani. Naa nia jatarejuhua sacuaraatia miiniu nia niishishano. Sesa nia miiniu panishanoori tama nia sapojoquiaarijiaaja nia sesa miijiaca nia quiniuriatej. <sup>23</sup> Quiarijia saniniuujia, sesa nia niishitiaja nia jatare, maninia niishitiajaraca nia quiniuria, maninia jiuujiaracanio. <sup>24</sup> Seetanujuanaa juhua quiarinio pueyano nia quiri, quiarinio jiuujiaraca, Pueyaso niquitiosano nijaniya. Naa quiarinio jiuujiaraca nia quishacaritij, seetanujuanaa juhua Pueyaso pueya nia quiriqia, maninia miijiaca, tojetaarucuajanaa sesa miyashijiaca. Naa maninia nia quiniuni, cunoori seetanujuanaa Pueyaso Rupaa nia tojiniuucua.

<sup>25</sup> Naacuajitij pueyanaa, majaari socua cuaracashijionuujuaca nia quiniu. Pueyaso pueya pa quishacari, puetunu pajaniyajanaari juhua pa Jiyaniijia cuaqueyani. Cunora, puetunu nia sequesanojuanaa niarta Pueyaso pueyano cuaara quiri seetanujuanaa.

<sup>26</sup> Naa jaara juaatishaare, tama nia cuaqueyajaaja nia cojuare maja nia juaaniutia sesa nia miiniuria niarta pueyano. Naajuhuj, nia jaara juaari, majaari nia juaaquiaca nia ninitianu. <sup>27</sup> Ritia nia jeecatoore, Sesaaca mariqui sesa nia miitiriiri nia jiyanoyaquishacari.

<sup>28</sup> Nio nia tojirijuhuj. Cante nohuasejua quiyajaani, cuaara tarinitiaara nohuasejonu. Saniniuujia cuaara poonijioora tama na numatucuatajaaja cutara. Naacuajitij, nojuaja na naata na jittiasanojiniji nareja niqutionu tamasa, cante na panishano jittiaaquiayani.

<sup>29</sup> Naajuhuj pueyanaa, majaari sacuaraatia casaa nia pocuanu quenaaja. Majaari cararaatia nia puenujutoonujuhuj. Saaja maninia pocuajaca nia quiri cutara. Naacuajitij, nia naata niarta Pueyaso pueya niishitiojonu. Nia naata nojori cumaquiniu. Nia naata nojori nacasunujuhuj. Naacuajitij, nia naata nojori shiniujiuniu saaja Pueyaso tojijiaca nojori quiniuria. <sup>30</sup> Majaari sesa miijiaca nia quiniu, niaa mariqui nioojiajinia quijia Pueyaso Sohuanu taraajoreeri. Pueyasocuaajaari juhua na sesa naajiotaquiaari poojiajinia na Sohuanuta. Naacuajitij, na rijionu juuca pajaniya, nojuajaari niishiniutianiya paari na saquiriojosano pueyani.

<sup>31</sup> Pueyanaa, majaari jiyanoashijia nia quiniu. Seetanujuanaa jiyanoojiaca nia quiri cutara. Majaari tamasa shanacunu niaacua, na nasojonura nijaniya. Majaari nia juayonuujuatanu. Majaari nia juaaniutia nia nacajonu. Majaari niarta pueyano paracaajia nia quiniu, nia juaaniutia nia sesacanura nojuaja. Naacuajitij, puetunu juaaniujianaa nia tarinitiare, puetunu sesa nia miiniujianaanio. <sup>32</sup> Saniniuujia, maninia miitiojuaca nia quiri. Taraajetoojuaca nia quiriuhuj. Naajuhuj, jyanootiojuaca nia quiriuhuj, taa Pueyaso jyanooquiaari pajaniyacuaani, Neyanuucua pa tiuushacari.

## 5

### *Seetanujuanaa juhua Pueyaso pueya nia quiri*

<sup>1</sup> Pueyanaa, niaacuajaari Pueyaso panishano muerasuniyojua. Cunora, pueyaracaanu juhua nojuaja nia quiniuria nia saniniujiri. <sup>2</sup> Puetunu nia miishanojuanaa nia miiri nia paniniutia, taa Jesucristo paniquiaari pajaniyacuaani. Jyanohua na paniniuucua pajaniya, nojuajaari tama na cuaqueyajaaja tarinitiaquiaari pa niti na mosaanura. Naa na miiniuucuatej, nojuajaari Pueyaso shuqiritiquiaari jyanohua. Na miishanoori juhua shanohua jaanutaja quiquiaari Pueyasora.

<sup>3</sup> Pueyaso pueya maanujinijinio nia quiniuucua, majaari nia camishoo maaji nia nu-muetucunu, maajishuriu, casaanio. Cunoori jyanohua sacuaraatia Pueyasora. Majaari quenaaja jiyano sacuaraatia casaajiniji nia pocoojonu. Naajuhuj, majaari tamasa jittiasanoocua jiaatiajaca nia quiniu. <sup>4</sup> Majaari najuhuaana sacuaraatia pocuajaca nia quiniujiuhuj. Majaari najuhuaana nia niti nia taquiriocratenu juhua maninia pocuaja. Naajuhuj, majaari sacuaraatia puenujunuujuaca nia quiniu. Puetunu cuno sesa pocuanujuanaari sesa Pueyaso pueyara. Saniya nia pocoojore cutara Pueyaso miishanojiniji, socua pueya maniniuhuaqueetanura Pueyaso. <sup>5</sup> Niacuaajaari tari niishiya, cante juhujaniya na camishoo maajipohua numuetucujuani, maajishuriuhanio, nojoriiri jyanohua taraatia quiniutianiya. Pueyaso jittiasano na tojijiaca pueyanoni, majaari

na quiniu quiniutianiya naa miijiaca pueyara. Naa taraatia miishaanutaniyajaariuhua puetunu tamasaca jitiiasanoocua jiaatijacajanaa. Pueyasora, jiyano pueyari jiyano hua sesa, juhua juaashiquiata shipinijosano pueyasohua secojonuujuaca. <sup>6</sup> Naacuajitij pueyanaa, majaari nia shanacunu tamasaca sapojonura nijaniya na sequesacari naa sacuaraatia miishanoori maja sesa, sacuaraatia pocuanunio. Naa pueya miiniuucua sesatej, Pueyasocujaari juaatishaare. Tari saniitioya na tojiyashijiaca pueyari. <sup>7</sup> Cunora pueyanaa, majaari quenaaja naa sacuaraatia miijiaca nia cojiniu.

<sup>8</sup> Pueyaso niishiyashijiaca nia quishacaritia tarijia pueyanaa, niaari ninishiqui quijiaca quiquiaari. Quiaritia saniniuujia, pa Jiyaniijia rupuejaca nia quishacari, Pueyasoori nia jiyatequiaari cuhuashiqui quijiaca nia quiniuria. Cunora, seetanujuanaa maninia miijiaca nia quiri, juhua cuhuashiqui quijiaca. <sup>9</sup> Paa jaara seetanujuanaa cuhuashiqui quijiaca quirini, paari maninia miijiaca quiniutianiya. Naajuhuj, paari tojetaarucujanaa sesa miyashijiaca quiniutianiya. Paari seetanujuanaa Pueyaso Rupaa tojiijaca quiniutianiyajuhuj. <sup>10</sup> Naajuhuj pueyanaa, niaa cumaati niishiya, ¿puetunu nia miishanojuanaate pa Jiyaniijia maniniucuasano, maja soj? <sup>11</sup> Majaari ninishiqui quijiaca nia cojiniu, nojori jaara sesa miya. Saniya nojori nia nacasure juhuari. Maninia nia miishanojiniji, nojoriiri niishiniutianiya nojori miishanoori tojetaarucujanaa sesa. <sup>12</sup> Jiyasohua nojori mijiosano sacuaraatiaari tojetaarucujanaa jiyano hua cararaatia. Puhuataaquishoo. <sup>13</sup> Saniniuujia, pa nacasusacari nojori Pueyaso Rupaata, paari nojori jiuujia cuhuataquiaani, nojori niishiniuria nojori miishanoori seetanujuanaa sesa. <sup>14</sup> Pueyaso Rupaacujaari nojori jiuujia cuhuataquiaa na cumaacata, cuhuashiqui quijiacara nojori na jataniniuria. Cunora, naa naajiotasano quiyari tariucuaaanu Pueyaso Rupaajinia:

“¡Maqueyanonaa, quia niucuaire! ¡Macunucua tajiniji quia sanere, Pueyaso Jiyarosano cuhuatanura quiajaniya!”

<sup>15</sup> Naacuajitij cua panishano pueyanaa, tama nia cuaqueyajaaja nia cojuare jiyano hua, seetanujuanaa maninia miijiaca nia quiniuria. Majaari juhua niishiyashijiaca nia quiniu juhujaniya. Seetanujuanaa niishijiaca nia quiri, maninia miijiaca nia quiniuria. <sup>16</sup> Nio pa quishacarini, sesa miiniuuri socua caneya puetunu juucajanaa. Majaari pa niishiniu taate tariqui quiniutianiya. Naaratej, jaara pa naata quiri quia maninia pa miiniuria, maninia pa miiri puetunu juucajanaa. <sup>17</sup> Majaari moseeca nia quiniu. Maninia nia niishiri casaa pa Jiyaniijia paniya nia miiniuriani. <sup>18</sup> Naajuhuj, majaari nia mashaasequejonuunu. Niaa jaara mashaaseca quiri quia, majaari nia rejetenu quiniutianiya sesa nia miiniu panishacari. Saniya Pueyaso Sohuanu nia shanacure niaacua cutara, nioojia na mishiniuria na cumaacata, seetanujuanaa cumaacaraca nia quiniuria, shuquiriaatia quijiaca nia quiniurijuhuj. <sup>19</sup> Naa Pueyaso Sohuanuraca nia quishacaritij, tariucuaaanu Pueyaso Rupaajinia naajiotasanojiniji jaaquequejonu nia naminiujitioore. Naajuhuj, quiari naataja Pueyaso Sohuanu niishitijosano nia jaaquequejotoore. Nia jaaquequejosacari, pa Jiyaniijia nia shuquiritiare puetunu nioojiatajanaa. <sup>20</sup> Pueyaracaanu puetunu casaarajanaa pa Que Pueyaso nia sequere “paacarasho” pa Jiyaniijia Jesucristoocua tiuujiaca nia quiniuucua.

*Taa quijia pa quiyani Pueyaso tojiijia pa quishacari*

<sup>21</sup> Pueyanaa, maninia tojitiojuaca nia quiri, taa pa Jiyaniijia Cristo paniyacuajani. Nojuajaari pa Jiyaniijia cutara.

<sup>22</sup> Maajipohuanaa, nia niyaca tojiijaca nia quiri, taa pa tojiquiaa pa Jiyaniijiacuaani.

<sup>23</sup> Nia niyacaari juhua nioojia quiya niaara, taa Jesucristo quiya na saquiriojosano pueya jiuujiacuaani. Nojuajaari pocuaji Tacuna, juhua na cuaqueya pa quiniuucua nera.

<sup>24</sup> Naacuajitij, taa Jesucristo saquiriojosano pueya na tojitiajaca quiyacuani, maajipohua cuara naa pueyaracaanu neyaca tojitiajaca quiirijuhuj.

<sup>25</sup> Canuunaa, nia niquioco hua nia paniri taa Jesucristo na saquiriojosano pueyarano paniquiaaricuaa jiyano huani. Nojuajaari cunora tama na cuaqueyajaaja tarinitiaquiaari na mosaanura. <sup>26</sup> Nojuajaari naa miiquiaariti seetanujuanaa nerano pa quiniuria.

Tojetaarucuajanaa maninia pa quiniuria, nojuajaari poojia jeequequiaa na rupaata, naatej, taa pa jeequequiaacuaa pa cuaqueyani. <sup>27</sup> Paa jaara tojetaarucuajanaa tari jeequejosano quirini, pa Jiyaniijiajanaari pa tiuquinitianutaniya tama nocuajaaja, tariucua jatanishano shacantuucara. Jiyacaritij, paari tojetaarucuajanaa sesa miyashijia quiniutianiyani. Paari seetanujuanaa shanohua niqushano quiniutianiyani, juhua camishocoriquiano maniniushitishano niyacoo, tojetaarucuajanaa jiyanoehua cohua-jaque toqueraca. <sup>28</sup> Pueyanaa, taa nia paniyacuaa tama nia cuaqueyajaajani, naa nia paniri nia niqiuocuajuhuj. Cante necocua panijiani, nojuajaari juhua tama na cuaqueyajaaja paniya. <sup>29</sup> Majaari quenaaja tamonu pueyano quiniu tama na cuaqueya soojeajaaja. Paacuajaari maninia cojuaja pa cuaqueyani. Paari maninia na mianuufequiaani, naatej, taa Jesucristo cojuaquiaa na saquiriojosano pueyacuaani. <sup>30</sup> Puetunu na saquiriojosano pueyajanaari juhua na cuaqueya nera. Paacuajaari na cuaqueyajiniini. Naaratej, nojuajaari maninia pa cojuaquiaa. <sup>31</sup> Cunora naa naajiotasano quiyari tariucuaaanu Pueyaso Rupaajinia. Naa sequeyari:

“Pueyano jaara camiri, nojuaja cuara shiriquiri na que, na nucua shuriucuj, necocuata na quiniuria. Jaara camiri, nojori juhua niquiriyatu cuaqueyaraca quiniutianiya”.

<sup>32</sup> Pueyasajuanaacuajaari pa niishitiojoquiaari, pueyanoori juhua niquiriyatu cuaqueyaraca quijia jaara camiri necocuara. Cunoori miriqui pa niishitiojiya, puetunu Pueyaso saquiriojosano pueya maanujuanaari juhua pa Jiyaniijia niqiorano quiya, juhua niquiriyatu cuaqueyaraca pa quiniuria nata. <sup>33</sup> Pueyanaa, cunujuanaari cua pohuatasano pa Jiyaniijia cuaqueyajini. Saniniuujia, puetunu cuarta Pueyaso pueyanaa, nia niqiuocua panijia nia quiri juhua tama nia cuaqueyajaaja. Naajuhuj, puetunu maajipohuajanaa cuara neyaca tojjia quiiria.

## 6

<sup>1</sup> Muerasunaa, pa Jiyaniijia tojjia nia quishacari, nia queya tojjia nia quiriuhuj. Naa jaara naa miiritij, cunoori jyanohua maninia Pueyasora. <sup>2</sup> Tariucuaaanu Pueyaso Rootasanojinij Moisésni, naa sequeyajaariuhua tamonu rootasano:

“Nia que tojjia nia quiri, nia nucuanio. <sup>3</sup> Naa nia miiritij, pueyaracaanu shuquiriaatia nia quiniuria, pueyaracaanu nia rishiniuria mijiria, nia cuara saaquianoshirijiaatija”.

Nio rootasanoori coteenujuanaa rootasano tee Pueyaso sequeyacujani taa na tojtiajaca na miiniutianiya maniniani.

<sup>4</sup> Niajaniya saniniuujia pueyanaa, majaari nia niqiuohua nia juaatijionu najuhuanaj. Nojori nia canashitijiore maninia. Nia niishitiojore maniajuhuj. Nojori nia nacasurejuhuj. Jaara nia tojtiaaquiri, na pishiniuria, nia majacuriquianoj nojori nia paniniutia, maja nia juaaniutia. Naa nia miiritij taa pa Jiyaniijia paniyacuajani.

<sup>5</sup> Niajaniya poonitijosano pueyanaa, mijiria nia camaruhua tojtiajaca nia quiri. Majaari nojori nia rerequetenu. Puetunu nojori sequesanojuanaa niajaniya nia miiri nia puerenuta, niaa mariqui saniitiosaareeri nojori sequesano nia miyaquiniucua maninia. Nojori sequesano nia miiriquia maninia, juhua pa Jiyaniijia Jesucristora. <sup>6</sup> Majaari maninia nia poonijionu saaja nojori niqushacari niajaniya, nojori shuqiritianura niajaniya. Maninia nia poonijiore pueyaracaanu puetunu nioojatajanaa, seetanujuanaa juhua Cristora. Naa jaara naa maninia poonijionuujuaca quiriqiatej, niaari Pueyaso panishano miyajuhuj. <sup>7</sup> Puetunu nia poonijosanojuanaa nia poonijiore shitimia, juhua Pueyasora. Majaari nia miishano nia poonijionu nia taajenuta, juhua niarta pueyanora. <sup>8</sup> Niaacuajaari tari niishiya, pa Jiyaniijia Jesucristoori puetunu pajaniyajanaa niqutionutaniya maninia pa miiniucua mijiria, poonijotesano pueya, camarnuuj pueyano.

<sup>9</sup> Niajanijuhuj seya jitiacanaa, nio sequesano nia tojiri. Maninia nia jitiare nia poonitijosano pueya. Majaari na miananajonu. Nia niishirijuhuj, niaari mariyata niquiriyatu Jiyaniijiaraca, niajaniya, nojoriuhuj. Nojuajaari jiyocuacaanu quijia. Naaratej, tamonu pueyanoori maja rimiajata nera, narta pueyanojini.

*Taate pa naata Sesaaca nujuatanuni*

<sup>10</sup> Quiarjia cua panishano cuarta Pueyaso pueyanaa, seetanujuanaa pa Jiyaniijia rupuejaca nia quiri, jiyanohua cumueeca nioojia quiniuria jiyanohua na cumaacata. <sup>11</sup> Puetunu Pueyaso niquitiosano casaajanaa nia cushiyore juhua toqueya, Sesaaca sapojiaquiniuucujia nijaniya. <sup>12</sup> Pueyaso pueya pa quishacari mijiria, majaari pa quiaquetoojonu quiquiaa pueyanota. Pa coopueeri maja pueya. Nojoriiri cumaacaraca quijiaca jiya cajiniocua. Sesaacaari cuno na samaruhua jiyatequiaari jiyaniijianucua nojori quiniuria mijiria. Naacuajitij, nojoriiri cumaacaraca, ninishiqui quijiaca pueya nojori jitianura. Nojoriiri Pueyaso paraajuhuj. <sup>13</sup> Naaratej Pueyaso pueyanaa, puetunu Pueyaso niquitiojosanojuanaa nia paracata nia miaquetoojotaqueya nia cushiyore. Naacuajitij, sesashiquiari niocua na nujuatare, Sesaaca saniniujiushacari nijaniya. Niaa jaara naa nioojia jeenucuare juhuacarijia puetunu Pueyaso casaatajanaatej, niaari nia paraa nujuatajaca quiniutianiya.

<sup>14</sup> Pueyanaa, niaacuajaari niishiya taa miaquetoojojuate pueyani. Na miaquetoonu panishacari, nojoriiri shoquejiniji casaa na cajiniocua morotaja. Na turtuconee cushiyonuujaari, puetunu na jiriquiajanaa na mishiquiojonura cashiicujia. Naajuhuj, na sapatuhua cushiyonuujaariuhuj. Na nareenee pootujuaari, nocuaji na nujutajara cashi. Naajuhuj, na naca na cojuatajara, cumoco casaa cushiyonuujaari. Na nijiniaquetucujaja mueruu pootujuaariuhuj.

Pueyaso pueya pa quishacari saniniuujia, tama nia cuaqueyajaaja nia jeenucuare Pueyaso casaata. Naacuajitij, seetanujuanaa Pueyaso Rupaa niishijiaca nia quiri maja nia sapojosaanura. Cunoori juhua pa cajiniocua camarucujua casaa saniniuujia. Pueyaraaanu maninia mijiaca nia quiri, nioojia nia cojuanura Sesaacaacuaji, nojuaja mariqui nia cararoreeri niaa jaara sesa miiri. Cunoori juhua nia turtuconee nia cushishano. <sup>15</sup> Pueyaracaanu jeenucuasano nia quiriquia juhua tariucua sapatu cushinio. Naa tariucua pueca nia quiriquia nia quianura, pueya nia pohuatanura Jesujiniji. Naa nia pohuataretej nojori niishiniuria Pueyasoori nojori jiyanoonu panijuhuj. <sup>16</sup> Naajuhuj, pueyaracaanu nia tiuuri Jesucristoocua. Naa Jesucristoocua nia tiuuniuni, cunoori juhua nia nareenee Sesaaca cashi nishitiumiacaca nia nujutajara niaacuaji. <sup>17</sup> Nia niishishacari niaacuajaari Pueyaso jiyanooshano pueya, cunoori seetanujuanaa juhua cumoco nia cushishano nacaque, maja nioojia nia niquijiotenura Pueyasooacuaji. Naajuhuj, Pueyaso Rupaa nia niishiri maninia. Cunocujajaari Pueyaso Sohuanu nijiniaquetucujaja mueruu, pueya jiuujiajinia na poonijionura. <sup>18</sup> Naajuhuj Pueyaso pueyanaa, majaari nia tarinitianu Pueyaso secojonuunu. Na Sohuanu cumaacata Pueyaso nia secojonuuriquia pueyaracaanu, naajuhuj, na Sohuanu niishitishacari nijaniya casaacuara nia secojonutaniyani. Majaari secojonu nia tarinitianu nia taajenuta. Juhua sutejaca pueyaracaanu nia secojonuuriquia puetunu niarta Pueyaso pueyacuarajanaa. <sup>19</sup> Naajuhuj, cucuara nia secojonuure, Pueyaso niquitionura janiya na niishitiaja, maninia cua pohuatanura Jesujiniji cua puereyaquiniutia. Cucuara nia secjorejuhuj, maatia cua niishitiniuria pueya, Pueyasoori puetunu pueyajanaa jiyanoonu panija saaja Jesucristoocua nojori tiushacari. <sup>20</sup> Pueyasojuaanaari cua jiyatequiaari na jiyaramiquishano cua quiniuria, na niti cua pohuatanura na rupaa pueya niquiara. Janiyari cunora niya nujuatejojuajinia morotasano quiyani. Naaratej, cucuara nia secjore seetanujuanaa, Jesucristojiniji cua pohuatanura cua puereyaquiniutia.

*Pablo pohuatasano Tíquicojiniji*

<sup>21</sup> Pa panishano Tíquicoacuajaari niaacua quianutaniya, puetunujuanaa na pohuatanura janiyajiniji, naajuhuj, casaa cua miyani. Nojuacuajaari shamaatia poonijiojua pa Jiyaniijia. <sup>22</sup> Janiyacuajaari cunora niaacua na jiyaroyani, nioojia nia cumanijianura canaajiniji nia tojishacari, taa canaa quiya niyani.

<sup>23</sup> Pa Que Pueyaso, mariyata pa Jiyaniijia Jesucristota, nojori cuara cuniqui quiniaa parta Pueyaso pueya jiuujia cajitiiria, juhuajaniya nia quiniuria. Nojori cuara nia

jiyateera panitioojuacarajuhuj, seetanjuanaa Jesucristoocua tiuujica nia quiniuria-juhuaj. <sup>24</sup> Naajuhuj, Pueyaso cuara puetunu pa Jiyaniija panijiacajanaa cumaquiiria na Sohuanuta, shuquiriaatia nojori quiniuria, cuno pojori, canapete seetanjuanaa Jesucristo panijiacacuajani.

## PABLO NAAJIONEE FILIPO TIACAJINIA QUINIAA PUEYASO PUEYACUARA

### *Pablo saruhuatasacari Pueyaso pueya*

<sup>1</sup> Janiyari Pabloni. Janiyari Timoteota nia saruhuataani, Filipino tiacajinia quiniaa Pueyaso pueyanaa. Canaari Jesucristo poonitijosano pueyajuhuj. Canaari nio naajiyani puetunu Pueyaso jatanishano pueyacularajanaa, nojori tiuuniuucua Neyanu Jesuucua. Canaari cuniqui nia jiitianaa pueyacuara naajiyajuhuj, nia cumaquiniaa pueyacularanio. ¿Niaate maninia quiyajaa pueyanaa? <sup>2</sup> Pa Que Pueyaso, pa Jiyaniijia Jesucristonio, nojori cuara cumaquiiria niajaniya na Sohuanuta. Nojori cuara cajitiiria nioojiajuhuaj.

### *Pablo secojosano, Filipino tiacajinia quiniaa Pueyaso pueyacuara*

<sup>3</sup> Pueyaraaanu cua niishiriojosacari niajaniya, janiyari pa Pueyaso sequequiaani “paacarasho”, maninia na muerasu nia quiniuucua. <sup>4</sup> Cua secojosacari, janiyari pueyaraaanu puetunu niaacuarajanaa cua shuquiriniutia masequiaa Pueyasoni. <sup>5</sup> Niaa jaara shushajanaa Jesucristoocua tiuquiaari, niaari jiyacari coteequiaari cua naacunura, Jesucristojiniji cua poojotanura tamaquiicua. Quiarijiani, niaari naa cua naacuyajaaquij. Janiyari cunora nia timitiaani. <sup>6</sup> Majaari cua taacanuunu niaacuaji. Naatej, taa Pueyaso coteequiaari maninia na miiniuria nioojiajiniaacuaani, nojuajaari naa nia jeenucuanu tuccatanutaniya, Jesucristota pa naacuneetoosacariuhua. <sup>7</sup> Majaari cua jiyajenenu naa cua taacanuyaquishacari niaacuaji. Janiyacuajaari tari naa niishiyani, jiyanoohua cua paniniuucua niajaniya. Naajuhuj, niaari cua cojiritiasaaquiaa cumaaca niquitiosaanujuhuj. Naacuajiti cua naata Jesucristojiniji pohuatanu niya nio nujuatejojuajinia, naajuhuj, janiya jaara jiyaniijianucua tacoji nequesoreesaareni. Naa Pueyaso cumaquishacari janiyatej, cua naata Pueyaso Rupaacuaji tacunu na cuaracashitijiaca. Pueyaso Rupaacuajiiri naa tacusano maatia, nojori niishiniuria, Jesucristoocua nojori tiuushacari, Pueyasoori na naata nojori jiyanooniujuhuj. Naa nioojia rupuesacari cojiatej, cunoori jiyanoohua cua shiniujuquiaa Jesucristojiniji cua pohuatanura. <sup>8</sup> Pueyasocujaari niishiya taa cua paniya jiyanoohua niajaniyani, Jesucristo paniniu cua jiitiasacari coojiajinia. <sup>9</sup> Janiyari niaacuara secojoquiaa Pueyasoni, socua niishijiaca nia quiniuria, socua Pueyaso niishitaja nia jiitianurajuhuj, seetanujuanaa maninia panitiojuaca nia quiniuria. <sup>10</sup> Naacuajitij, niaari niishiniutianiya teyano casaate seetanujuanaa maninia niaarani, saniniuujia, teyano casaate sesani. Naacuajitij, pa Jiyaniijia Cristo jaara tiuquiriohuan, niaari seetanujuanaa maninia miijiaca quiniutianiya, tojetaarucujanaa sesa miyashijiaca. <sup>11</sup> Naacuajitij, puetunu maninia nia miishanojuanaa Jesucristo cumaquishacari niajaniyani, cunoori juhua queraatia nia senoosano quiniutianiya, Pueyaso shuquiritiasaanura. Naacuajitij, maninia nia miiniuucua, pueyari Pueyaso timitianutaniya.

### *Pabloori saaja Jesucristora quiniu panijia*

<sup>12</sup> Cuarta Pueyaso pueyanaa, majaari cucua nia taraajenu nujuatejojuajinia taraatia cua miishacari. Nio nia niishiri cutara: nujuatejojuajinia nujuatesocoriquiano cua quiasaanuucua, naquiya cua miishacarijuhuaj, cunoori seetanujuanaa pueya naacuya Jesucristojiniji tojishaanura socua. <sup>13</sup> Naacuajitij, puetunu jiyaniijia César tiajinia quiniaa soldadohuajanaari niishiya, janiyari cumayocua casaata morotasano quiya niyani, Jesucristojiniji cua pohuatanuucua. Majaari saaja soldadohuan niishiniu cuno, mariyata puetunu pueyajanaari na niishiyajuhuj. <sup>14</sup> Parta Pueyaso pueyari namitia niishiyajuhuj, janiyari cumayocua casaata morotasaarucuaani. Naacuajitij, cunoori quera puetunu nojorijianaa shiniujiuriucuaa Jesucristojiniji nojori pohuatanura na puereyaquiniutia, pa Jiyaniijiaacua nojori tiuushacari socua.

<sup>15</sup> Seetanujuanaa, noojiaqueya nojorijininioori Cristojiniji pohuatanuquiaa socua tojishano pueya nojori quiniuria janiyajiniji, nojori shocotanura janiya. Janiyara,

naajaa. Tamasaca saniniuujia, nojori cutaraari seetanujuanaa Cristojiniji pohuatanuquiaa nojori shuquiritiniuria Pueyaso. <sup>16</sup>Nojoriiri naa pohuatanuquiaaquij, Jesucristo panijiaca nojori quiniuucua. Nojoricuajaari niishiya, Pueyasojuanaacujaari niya cua niacanu, cua tacunura Jesucristo rupaacuaji. <sup>17</sup>Tamasacaari saniniuujia Jesucristojiniji pohuatanuquiaacujua nojori shocotanu paniniutia janiya. Naa nojori miishacaritij, nojoriiri socua cua tacaatiniu paniya juucua. Majaari nojori pohuatanuunu quiquiaa seetanujuanaa nojori paniniutia pa Jiyaniijia Jesucristo. <sup>18</sup>Naa nojori pohuatanuusacari seetanujuanaa nojori paniyaquiniutia pa Jiyaniijiatej, naajaa. Nojoricuajaari Jesucristojiniji pohuatanuquiaa. Janiyari cunora shuquiriaatia quiyani.

<sup>19</sup>Socua shuquiriniutianianijia cua niishishacari Pueyasoori puetunu cuno pojori miishanojuanaa jataniniutianiya quiria saa maniniaraja. Naa miiniutianiyari nia secojonuunuucua cucuara, naajuhuj, Jesucristo Sohuanu cumaquiniuucua janiya. <sup>20</sup>Naacuajitij, janiyacujaari Pueyasocua tiuyani, nojuajaari cua cojuanutaniya maja cua cararoyaquishaanura janiya jaara nequesoreesaareni. Janiyari Pueyasocua tiuyajaaniuhua na cumaquiniuria janiya, cua puereyaquiniutia cua pohuatanura Jesucristojiniji puetunu pueya niquirarajanaa, taa cua miiquiaacuajani. Janiya jaara rishiriquiani, janiya jaara mosaariquiajuhuaj, naajaa, janiyari jiyanohua panianiya cua Jiyaniijia Jesucristo timitiasaanura. <sup>21</sup>Mijiria cua quishacarijia, janiyari saaja Jesucristora quiyani. Saniniuujia, janiya jaara mosaareni, cunoori socua maninia janiyara, na shuriucua cua quianura, nata cua quiniuria shuquiriaatia. <sup>22</sup>Naajaa, janiya jaara mijiria rishiriquajani, cua naata socua poonijionu cua Jiyaniijia. Naacuajitij, quiarijia, majaari cua naata saquirojonu; rishiniu, shaajenu soj. <sup>23</sup>Naaratej, janiyari coojia niquijioteyajaani. Majaari cua niishiniu teyano cua saquirojonutaniyani. Janiyara maara socua maninia quiri janiya jaara cusoqueeni, Cristo shuriucua cua quianura nata cua quiniuria. <sup>24</sup>Saniniuujia, socua maniniaruhua mijiria cua rishiniuraja, pa Jiyaniijiaacua cua shiniujiuniuria socua nijaniya. <sup>25</sup>Naa cua niishiriojosacaritij, janiyacujaari tari seetanujuanaa niishiyani, janiyari juhuanajuaja mijiria niaata rishiniutianiyani. Naacuajitij, cua naata socua nia naacunu, socua pa Jiyaniijiaacua nia tiuuniuria. Cua naata nia naacunujuhuaj, socua shuquiriaatia quiijaca nia quiniuria nocua nia tiuushacari. <sup>26</sup>Naa cua rishishacari mijiriatej, janiyari niaacua quianutaniyani cua niquiniuria nijaniya. Naa cua quishacariuhua niaatatej, niaari Jesucristo timitianutaniya maninia na miiniuucua janiya.

<sup>27</sup>Pueyaso pueyanaa, nio nia sequenu panianijia, seetanujuanaa maninia miijia nia quiri taa Jesucristo rootaacuajani. Janiya jaara niaacua quiaareni, janiya jaara quiaaquiyarejuhuaj, naajaa. Saaja nijaniyajiniji pohuataaariquiani, taa jiyanohua Jesucristo tojijia nia quiyajaani, jiyanohua panitiojuacajuhuj. Naajuhuj, jatiqui Jesucristora nia poonijioteriquiani, na rupaa nia pohuatanuucua. <sup>28</sup>Naajuhuj, Jesucristo Rupaa paraa puereyashijiacara nia jiyateriquiani. Nojori piriyojosacari nijaniya, majaari nojori puerenu quenaaja. Naa jaara naa nojori puereyashijiaacua quiritij, nojoriiri cunojiniji niishiniutianiya, nojoriiri seetanujuanaa saniitiosocoriquiano taa nia pohuatanuquiaa nojori niquiracuajani. Saniniuujia, Pueyaso cajitishacari nioojia, nojori miananajosacari puecoonu nijaniya, niaari cunojiniji niishiniutianiya, niaaqui Pueyaso rijiosocoriquiano cutara. Pueyasocujaari naa cumaquijia na pueyatej, puereyashijianucua nojori quiniuria. <sup>29</sup>Pueyasocujaari nia tiuutiquiaari Neyanuucua, na muerasu nia quiniuria. Naajuhuj, Neyanu rupuejaca nia quishacari quiarijia, Pueyasoori nia jiyatequiaari Neyanuucua nia miitishaanurajuhuj, taa Neyanu miiquiaari naquiya pocuaracuaani. <sup>30</sup>Naa niishiri, janiya, nijaniyajuhuj, paari mariyata naquiya miiniu rejeretaquiaani, pa Jiyaniijia pa poonijosacari. Niacujaari tari niquiquiaari naquiya cua miiniu. Majaari cua tarinitianu quiquiaari Jesucristojiniji pohuatanu. Quiarijiani, niaari janiyajiniji tojiniutianiyajuhuj, taa cua tarinitiaaquiya Jesucristojiniji pohuatanuni, naajaa naquiya cua miishacari.

## 2

*Juhua Cristo pa quirij, taa na quiquiaaricuaani*

<sup>1</sup> Naacuajitij pueyanaa, naquiya nia miishacari, nia niishiri taa Cristo shiniujuquiaa pueyaracaanu niajaninyani, maja nia tacaaniuria. Nia niishirijuhuaaj taa na paniniu cumanijiaquiaa niajaninyani, naajuhuaaj, taa Pueyaso Sohuanu jiuujiaatiootequiaa niajaninyani. Nia niishirijuhuaaj taa Cristo taraajequiaa jiyanoehua niaacuani. Naa panitioojuaca nia quirijuhuaaj. <sup>2</sup> Jiuujiaatioojuaca nia quirijuhuaaj, seetanujuanaa panitioojuaca nia quishacari. Naajuhuaaj, nareja nia shanacure Pueyaso Sohuanu niaacua, nojuaja cuaara puetunu niajanijajanaa ruputeera, jatiqui nia poonijionura pa Jiyaniijiaara. Naa jaara naa puetunu nio cua sequesanojuanaa miijia quirijitij, niaari tojetaarucujanaa shuquiriaatia quijiaara cua jiyatenutaniya. <sup>3</sup> Maninia nia miishacari, majaari na miiniu juhua tamasaca nia shocotanura, nia jyanishacari niaa naasucuaari socua maninia miijiaa tamasacajiniji. Puetunu maninia nia miishanojuanaa nia miiri tamasaca nia rerequeteyaquinutia. Puetunu niarta Pueyaso pueyajanaa nia jiyatere juhua socua maninia miijiaa niajanijajiniji. <sup>4</sup> Naa jaara maninia miijiaa quiriquiacuaa, majaari tama maninia miijiacajaaja nia quiniu. Niarta Pueyaso pueyacua nia taraajerejuhuaaj, maninia quijiaa nojori quiniurijuhuaaj.

<sup>5</sup> Tama nia cuaqueyajaaja nia tarinitiare niarta pueyacua nia taraajesacari, taa Jesucristo tarinitiaquiaari tama na cuaqueyajaaja pocuaracuaani. <sup>6</sup> Nojuajaari naa miiquiaaritij: tariucuaaanu, nojuacuajaari Pueyaso quijiajuhuanajaj, juhua na Que. Naajaa, nojuajaari maja na cuaqueya na jiyatenu quiquiaari seetanujuanaa juhua na Que Pueyaso na quiniuria. <sup>7</sup> Nojuajaari jyanohua cumaacaraca Jiyaniijia na quiniu tarinitiaquiaari, juhua nareja poonijiotesano pueyano na quiniuria. Naaratej, mijiria rasaaquiaariiri seetanujuanaa pueyano na quiniuria. <sup>8</sup> Naa pueyano na quishacari mijiriatej, nojuajaari juhua nareja pueyanora tama na cuaqueyajaaja jiyatequiaari. Pueyaracaanu na Que tojijia na quishacari, nojuajaari tama na cuaqueyajaaja tarinitiaquiaari na mosaanura. Seetanujuanaa cararaatia cusoquiaariiri niyacutesanojinia teetesano, juhua sesa miijia pueyano. <sup>9</sup> Naaratej, Pueyasoori seetanujuanaa Jiyaniijiarajanaa na jiyatequiaari puetunu jiyaniijanucujinijijianaa. Na sesojoquiaarijiaariuhuaaj "Jesu". Nioori sequeya "pocujaji Tacuna". Majaari socua tamonu pocujaji tacuna quiniu mijiria, jiyocuaaanunio. <sup>10</sup> Puetunu pueyajanaari niishiniutianiya Jesuuri Jiyaniijiajanaa. Maja tamonu. Cunora, nocuara mojoquetaconutaniyari puetunu jiyocuaaanu quijiacajanaa, puetunu mijiria quijiacajanaajuhuaaj, puetunu jiya cariquimia quijiacajanaanio. <sup>11</sup> Puetunu tamaatia rupaaca pocujacajanaari niishiniutianiya Jesucristoori Jiyaniijiajanaa cutara. Naa Pueyaso miiniuucua Neyanutej, puetunu nojorijianaari niishiniutianiya, Pueyasoori tojetaarucujanaa maninia miijia.

#### *Pueyaso pueyari juhua ninishiqui cuhuataja mijiria*

<sup>12</sup> Quiarijiani cua panishano cuarta Pueyaso pueyanaa, cua rootasano tojitiajaca nia quiri. Naatej, taa pueyaracaanu cua tojitiajaca nia quiquiaaricujani niaata cua quishacari, quiarijia socua cua tojitiajaca nia quiri, tucuaaanu cua quishacari niajanijajiniji. Naacuajitij, seetanujuanaa pa Jiyaniijia tojitiajaca nia quiri nia niishiniuria niaari seetanujuanaa Pueyaso pueya. Majaari na rupaa ruuretanu. Jyanohua puereeta quiniutianiyari na tojiyashijianucuaara. <sup>13</sup> Pueyasojuaanaacujaari nioojiajinia poonijioquiaa maninia nia miiniu paniniuria. Na cumaaca nia niquitioquiaajaariuhuaaj maninia nia miiniuria nera nia panishano, taa na paniyacuajani.

<sup>14</sup> Cunora, puetunu nera nia miishanojuanaa nia miiri shitimia, maja nia ririjiotanuta. Majaari nocua juayonuujutanujuhuaaj. <sup>15</sup> Naa jaara naa maninia miijiaa quirijitij, majaari Pueyaso niishiyashijiaa pueya naata quiniutianiya sesa na saquiriojotanura niaacuara. Naaratej, tojetaarucujanaa sesa miyashijiaa Pueyaso niquiohua nia quiri, mijiria sesa miijiaa pueya niquiara. Nojoriiri seetanujuanaa sacuaratia, Pueyaso tojiyashijiaa. Cuno juhua ninishiqui quijiaa pueya tajinia nia quishacari, niaari juhua riya nojoriria, naatej, taa riya cuhuataquiaa ninishiquicuaani. <sup>16</sup> Pa samiitianiija rupaa Jesucristojiniji nia jiiitiasanoni, niaari cunota cuhuataquiaa mijiria quiniaa. Naa maninia Pueyaso pueya nia quiniuucuatej, Cristo jaara tiuquiriohua na rijionuhuara pajaniya, janiyari jyanohua



nia timitianutaniyani. Janiyari naa nia timitianutaniya cua niishishacari puetunu cua poonijiosanojuanaari maja najuhuana na quiniu quiquiaari. Naajuhuj, majaari najuhuana naquiya cua miiniu quiquiaarijuhuaj. <sup>17</sup> Niaacuajaari maninia miijiaca Pueyasocua tiuuijaca nia quiniuucua, Jesucristojiniji cua pohuatanuucua nijaniya. Cuno maninia nia miishanoni, cunoori juhua shanohua jaanutaja Pueyasora. Janiya jaara nacatasaare Jesucristojiniji cua pohuatanuucua nijaniyani, cua nanacaari shoonutaniya juhua Pueyasora niqutiosocoriquiano. Janiya jaara naa miishaareni, janiyari cua nanacata tucuatanutaniya puetunu cua miishanojuanaa Pueyasorani. Janiya jaara naa miishaareni, janiyari seetanujuanaa shuquiriaatia quiniutianiyani. Janiyari puetunu nijaniyatajanaa jyanohua timiniutianiyani. <sup>18</sup> Shuquiriaatia nia quirijuhuj, janiya jaara mosaareni, cua Jiyaniijia tojjia cua quiniuucua. Cua cojitiuri shuquiriniujuhuaj.

*Pablo pohuatasano Timoteojiniji, Epafroditojinijio*

<sup>19</sup> Janiyari niaacuaji tojinu paniyani taa nia quiyani, shuquiriaatia cua quiniurijuhuj janiya jaara niaacuaji tojirini. Janiyari cunora Timoteo jiyaronutaniya niaacuani. Naacuajitij, cuniquiji na tacatesacariuhua, nojuajacua cua pohuatasuhua nijaniyajiniji saniniuujia. Janiyari cua Jiyaniijia Jesuucua tiuyani na rishitiniuria janiya, nijaniyajiniji cua tojiniuria. <sup>20</sup> Janiyari Timoteo jiyaronutaniya niaacuani. Saa nojuaja cutaraari seetanujuanaa niaacua tacaajia juhua janiyajuhuj, na naacunura nijaniya, maninia nia quiniuria. <sup>21</sup> Tamasacaari saniniuujia saaja tama nojori panishano casaacuajaaja tacaajia, maja Jesucristo casaacua. <sup>22</sup> Niaacuajaari tari na niishiya, taamuecate Timoteoni. Nojuajaari pueyaracaanu cuata poonijioquiaa juhua quiyanu, Jesucristojiniji mariyata canaa pohuatanura. <sup>23</sup> Janiya jaara niishirini taa cua miishaanutaniyani, janiyari Timoteo jiyaronutaniya ritia niaacuani. <sup>24</sup> Naajaa, janiyacujaari cua Jiyaniijiaacua tiuyani cua cartesaanura niiquiji, niaacua cua quianura ritiajuhuaj.

<sup>25</sup> Cua sashishacari Timoteo cua jiyaronura niaacua, maniacuajaruhua ritia cua jiyaronura niaacua Epafrodito, parta Pueyaso pueyano. Niaacuajaari nojuaja jiyarotaquiaari cumaneeca quiriano, nojuaja cumaquiniuria janiyajuhuj. Nojuajaari maninia cua naacuquiaa. Cuata miiquiaa naquiya jaarajaarijia Jesucristojiniji cua pohuatanura. <sup>26</sup> Nojuajaari puetunu nijaniyajanaa niquiniuucua jiaatiaa. Na niishishacari niaari jyanohua nocua tacaquioya nia niishiniuucua nojuaja cusosu quiquianu, cunora, nojuajaari ritia nia niquiniuria tacaya. <sup>27</sup> Seetanujuanaa nojuajaari cusosu quiquianu. Quera cusocanujuanaari. Pueyaso cutaraari nocua taraajecanu. Cucua taraajecanujaariuhuj, maja cua taraajenu jiyacatenura socua. <sup>28</sup> Janiyari cunora ritia niaacua na jiyaroyani, nia shuquiriniuria nia niquishacari nojuaja niaacua tiuquiuhuanu. Naa shuquiriaatia nia quishacariuhuatej, janiyari coojia cajitiniutianiyajaacuhuj. <sup>29</sup> Niarta Pueyaso pueyano na quiniuucua, seetanujuanaa juhua nia tarajanu nia timitiarenoj, niaacua na tiuquishacariuhua. Puetunu jiyano pueyajanaa panijia nia quiri, noo pojori pa Jiyaniijia poonijionuujuacatej taa Epafroditocuaani. <sup>30</sup> Nojuacuajaari quera shaajeyarucuaa Cristora na poonijosacari. Cocuaatia miijocanujaariuhuj. Nojuajaari tama na cuaqueyajaaja tarinitiacanu, na naacunura janiya nia niti. Tucuaaanu nia quiniuucua nijaniyajiniji, majaari nia naata naacunu janiya.

3

*Nio rootasano tojjia pa quiri cutara*

<sup>1</sup> Quiarijia saniniuujia, cuarta Pueyaso pueyanaa, pa Jiyaniijia nia shuquiritiare, pocuaji Tacuna na quiniuucua. Janiyara, maja taajeta cua pacutenuhuara socua cua sequenura nijaniya tari cua sequesano nijaniya. Cunoori seetanujuanaa maninia niaara. <sup>2</sup> Tama nia cuaqueyajaaja nia cojuare cuno sacuaraatia niishitiojonuujuaca pueyacuaji, cuno pojoriicuaji, sesa miijiacani. Nojoriiri pueya cararaatiuuquia co miatejonuujuaca najuhanaj, nojori jyanishacari nojori mialesano pueyari seetanujuanaa Pueyaso pueya. <sup>3</sup> Paa cutaraari seetanujuanaa Pueyaso pueyani, Pueyaso Sohuanu jiyatenuucua pajaniya Pueyaso tojjia pa quiniuria. Paari timiquiaajaaniuhuj Jesucristo

rupuesano pa quishacari. Taa pa cararaatiuuquia casaa quiyani, naajaa. Jesucristoocua pa tiuushacari, paari seetanujuanaa Pueyaso pueyani. <sup>4</sup> Tamasaca jaara tama na cuaqueyajaaja jiyaniya nojuaja seetanujuanaa Pueyaso pueyano, maninia Judio pueyano na quiniuucua, janiya cutaraari nojori shocotaani. Janiyari tari naa jiyaniquiaarijiuhuj. <sup>5</sup> Naatej, janiya jaara rasaaquiaarini, ocho juuca jaara cua shocoquiaarini, cua cararaatiuuquia coori miatesaaquiaari. Janiyari naa miishaaquiaarini taa canaa rootasaaquiaari Moisés Rootasanojinijicujani, seetanujuanaa Judio pueyano cua quiniuria. Naajuhuj, janiyari Israel pueyanoni, cua supuetana Benjamín jinianuucujajinio supueno pueyano. Na queeri quiquiaari Jacobo, Pueyaso saquiriojosano pueyano. Naa cua supuetanaa quiniuucua Pueyaso saquiriojosano pueyatej, janiyari naajuhuj, nojoriicujajinio cua supuenoocua. Naajuhuj, janiyari Hebreo rupaa pocujani taa cua supuetanaacuaani. Cua que, cua nucuaari mariyata Hebreo rupaa pocujaca quiquiaarijiuhuj. Mashaja cua quishacari, janiyari Fariseo pueyanora quiquiaarini. Cuarta Fariseocuacaari socua jiyanoocua supuetana Moisés Rootasano tojijiacua puetunu cuarta Judiocuacajinijinijuanaa. <sup>6</sup> Jiyacaritij, janiyari cua niishitiojona tojijia quiquiaari jiyanoocua. Majaari cua taajenu quiquiaari nojori sequesano cua miiniuria. Naaratej, janiyari Jesucristo tojitiajaca miijia naquiyani, cua jyanishacari nojori naasucuaari Pueyaso paraa. Naajuhuj, maninia cua tojiniuucua Moisés Rootasano, janiyari sesacasoo quiquiaarini Moisés Rootasano niishitiojanaara. <sup>7</sup> Puetunu nio cua sequesanojuanaani, janiyari jyanohua na timitiaquiaarini cua jyanishacari janiya naasucuaari naa seetanujuanaa Pueyaso pueyanoni. Quiarijia saniniuujia, Jesucristoocua cua tiuushacari, tarijia cua jyanishano maninia casaani, puetunu cuno casaajanaari quiarijia najuhua janiyara. <sup>8</sup> Quiarijiani, janiyari socua cua Jiyaniijia Jesucristo niishiniuria jiaatiaa jyanohuani. Naaratej, puetunu tariucuacaanu cua timitiasano casaajanaari najuhua janiyara quiarijia. Cristo pueyano cua quiniuucua, janiyari juhua taanusaaquiaari puetunu cuarta Judiocuacajinijijianaani. Naa Cristo tojijiaa cua quiniuucuatej, cua shipinijinijia cua casaarano maseyaquiquiaarinijia. Naajaa, puetunu cuno casaajanaari juhua rucucua quiya janiyara. Janiyari seetanujuanaa saaja cua Jiyaniijia Jesucristo niishiniu pania socuani, nata rupuetootesano cua quiniuria seetanujuanaa. <sup>9</sup> Majaari cua jyaniniu janiya sesa miyashijiani, Moisés Rootasano cua tojiniuucua. Saniniuujia, Jesucristoocua cua tiuushacari, Pueyasoori puetunu sesa cua miishanojuanaa tuujuquiaa. Cua niishishacari Jesucristoori mosaaquiaari cua niti, Pueyasoori cua jyanooquiaari, maja na sesacanura janiya, Neyanuucua cua tiuuniuucua. <sup>10</sup> Janiyari Jesucristo niishiniu pania jyanohua socuani, seetanujuanaa nata rupuetootesano cua quiniuria. Janiyari na samiitianitajaja cumaaca panijajaaniuhuj, coojiajania na poonijionura, seetanujuanaa quiarinio pueyanora cua jatanishaanura juhua Cristora. Nojuajaari jyanohua taraatia miishaaquiaari mijiria na quishacari, na Que tojijia na quiniuucua. Janiya cuaara naa miishariajuhuaj cua tojiniuucua nojuaja, juhua nojuaja cua quiniuria. Tama nojuajaarijia na cuaqueya tarinitiaquiaari na mosaanura. Naajuhuj, tama janiyajaarijia cua cuaqueya tarinitiaja quiniu paniyani, cua miiniuria puetunu cua Jiyaniijia sequesanojuanaa janiya. <sup>11</sup> Janiyari tojetaarucujanaa maninia miijia quiniuucua jiaatiaquiaani, juhua quiarinio pueyano cua quiniuria, juhua tariucua macujinijinio samiitianishano pueyano.

*Maninia pueya pa quirij, Pueyaso muerasu pa quishacari*

<sup>12</sup> Juhuanujuaja majaari cua quiniu tojetaarucujanaa maninia miijia. Sesa miiniu niishiyajaanijia. Jeecasoojuaanijia. Naajaa, majaari cua tacaani. Jesucristocuajaari cua jiyatequiaari na pueyano cua quiniuria. Naaratej, janiyari jyanohua saniniujuquiaani maninia na pueyano cua quiniuria. <sup>13</sup> Cua panishano cuarta Pueyaso muerasunaa, janiyari niishiyacujani, juhuanujuaja maja maninia cua quiniu taa cua Jiyaniijia quiyacuani. Naajaa, majaari cua tariniu. Janiyari juhua ritia netena miiquiaani na shocotanura narta netecuataunaa pueya. Maninia netenaari na nijinijia niquiyashijia. Naajuhuj, majaari cua niishiriojonu maninia cua miishano tariucuacua. Janiyari saaja cua tacoji niquiquiaani, socua maninia miijia cua quiniuria tari cua quiniujinijia. <sup>14</sup> Pueya

tacuarishijosacari, netena jaara narta netecuatunaa shocotare, nojuajaari shanohua casaa niquitiosaaquiaa. Majaari najuhuaana na netenu jiyanoehua. Janiyaraari naajuhuaaj. Majaari najuhuaana jiyanoehua cua saniniujiuniu quiquiaa, maninia cua quiniuria juhua Cristojuhuaaj. Mijiria cua quiniu cua tucuatascari, Pueyasoori cua jataniniutianiya juhua Cristo cua quiniuria, Cristoocua tiuujia cua quiniuucua.

<sup>15</sup> Pueyanaa, najaniya, cante seetanujuanaa Pueyaso tojjiaca quiyani, mariyata naa nia niishiriojore taa cua niishiriojiyacuaani. Naatej, jiyanoehua nia saniniujiuri juhua Cristo nia quiniuriajuhuaaj. Cante tama na cuaqueyajaaja jiyaniya nojuaja tariucua tojetaarucujanaa sesa miyashijiani, Pueyaso cuara na niishitiria maninia. <sup>16</sup> Paa jaara maninia miiniu niishijiaca quirini, majaari pa jiyacateni saaja sesa miiniuucua. Saniya maninia miijiacara pa quiri socua.

<sup>17</sup> Cuarta Pueyaso pueyanaa, maninia miijiaca nia quiri taa canaa nia niqiquiaari maninia miyanocuaani. Naajuhuaaj, maninia miijiaca nia niquiri, cante maninia miqiquiaani taa canaa niishitiquiaari najaniyacujani, maninia canaa miishacari. Nojorijiniji nia niishiriquia, maninia nia miiniuriajuhuaaj. <sup>18</sup> Jesucristocujaari pocuara cusoquiaari niyacutesanojinia teetesano, maninia miijiacara pa jatanishaanura. Saniniuujia, queraatia pueyari juhujaniya miiquiaa sesa. Janiyacujaari nojorijiniji pohuatanu pacutejoquiaari najaniyani, maja juhua nojori nia quiniuria. Quiarijia cua nujuquenuta, janiyari nia pohuatarohuanuhua jiyano sesa miijiacajiniji. Nojoriiri pa Jiyaniijia cusonu soojeaca. Nojoriiri maja na paniniu naquiya na miishaanura Cristo tojjiaca nojori quiniuucua. <sup>19</sup> Nojoriiri puetunu quejoosaanutaniyajanaa mani quiqiojinia. Nojoriiri tama nojori panishanojuaaja jiyatecanu juhua nojori pueyasora. Naa sesa miijiaca nojori quishacaritij, majaari nojori niishiniu caririquiniu. Saaja sesa na miitiushano timitatiuyari. Nojoriiri saaja mijiria casaacua jiaatiajaca. <sup>20</sup> Pajaniya saniniuujia, paa cutaraari tari jiyatesaaquiaari jiyocuacaanu quijiacaranoni. Paari cuniquiji pocuaji Tacuna niniuria sashiyani. Nojuacujaari pa Jiyaniijia Jesucristo. <sup>21</sup> Jiyanoehua na cumaacata, nojuajaari pa cuaqueya seque jataniniutianiya, shacantuuca quijia pa quiniuria juhua na cuaqueyajuhuaaj. Nojuajaari cumaacaraca puetunu casaajanaa na tojitiniuria nojuaja. Naacuajitij, nojuajaari na naata moqueja pa cuaqueya jataniniu, pueyaracaanu rishijiaca pa quiniuria.

## 4

### *Pueyaracaanu pa Jiyaniijia pa shuquiritiare*

<sup>1</sup> Cunora, cua panishano cuarta Pueyaso pueyanaa, pueyaracaanu pa Jiyaniijia tojjiaca nia quiri. Janiyari jiyanoehua nia niqiniuucua jiaatiaani. Nia niqiuara cua pohuatanuucua Pueyaso rupaa, niaaquiiri seetanujuanaa na tojjiaca quiquiaari. Naa jiyanoehua maninia Pueyaso muerasu nia quiniuucuatej, cunoori jiyanoehua cua timitiquiaa.

<sup>2</sup> Janiyari Evodia sequeya cutarani, narta maaji Sintiquenio, nojori cuara jiyanoetioora juhua seetanujuanaa Pueyasocua tiuujia maajipohua. <sup>3</sup> Quiajaniya saniniuujia Sicigona, quiaacujaari cuata poonijiojua jaarajaaja. Cunora, janiyari quia sequenu paniyani, cuno maajipohua quia jiyanoetiooterohua, nojori rupuetoonuhua. Cuno maajipohuacujaari jaarajaaja cuata poonijionuuquiaari, Clementejuhuaaj, pa Jiyaniijiajiniji cua pohuatasacari. Naa cuata poonijionuuquiaarijuhua tamasa, canapete cuata quiqiaaricujani. Nojori sesacacujaari tari naajiotasano quia Pueyaso nequesoretuneejinia, tee cuniqui pueyaracaanu rishijiacarano sesaca naajiotasano quiyacujani.

<sup>4</sup> Cua panishano pueyanaa, pueyaracaanu pa Jiyaniijia nia timitiare. Nia sequerohuacuaraj, pueyaracaanu nia timiri. <sup>5</sup> Puetunu pueyajanaa cuara niishiiria niaari seetanujuanaa maninia pueya, maja juaajiaca. Pa Jiyaniijiacujaari quera tiuquihua.

<sup>6</sup> Majaari quenaaja nia tacaaniu. Saniniuujia, nia tacaashacari, Pueyaso nia pohuatare puetunujuanaa, nia secojosacari nojuaja. Nia secojosacari, nojuaja nia masere nia panishano. Jiyacaritij, nojuaja nia sequerejuhuaaj "paacarasho". <sup>7</sup> Naa nia miishacaritij, Pueyasoori nioojia cajitiniutianiya. Naa Pueyaso cajitiniucua nioojiatej, majaari socua

nioojiaca tacaaniu quiniutianiya, nia niishitiajanio. Naacuajitij, niocua juhuajaniya panaatia quiri Jesucristo cojishano nia quiniuucua. Naa Pueyaso miishano pajaniyani, cunoori jiyanoehua jiyajeneta. Nocuaji jiuujiatesano.

*Saaja maninia casaacua niishiriojuaca nia quiriquia*

<sup>8</sup> Naajuhua cuarta Pueyaso pueyanaa, nio tojjiaca nia quirijiuhuaj. Pueyara-caanu saaja seetanujuanaa rupaacua niishiriojuaca nia quiriquia. Naajuhuj, saaja rerequeteyaquishoo casaacua nia niishiriojore. Saaja maninia casaacua niishiriojonu-juaca nia quiri, maja cararaatia casaacua. Naajuhuj, saaja Pueyaso shuquiritasano casaacua nia niishiriojore, maja Pueyaso sesacasano casaacua. Naacuajitij, puetunu maninia casaacujanaa nia niishiriojore, casaajinijiti pueya naata Pueyaso shuquiritia-nuni.

<sup>9</sup> Maninia nia miiriquia pueyaracaanu, taa cua niishitiojoquiaari niajanियacuajani. Niaacuajaari cua rootasano tojiquiaari. Naajuhuj, niaacuajaari cua niqijia taa miijia cua quiquiaarini. Niaa jaara naa miijia quirijiuhuaj, poojia cajitinia Pueyasoori niaata quiniutianiyajuhuj.

*Pablo pahuatasano, Filipino tiacajinia quiniaa Pueyaso pueya jiyaronuucua cumaneeca nera*

<sup>10</sup> Janiyari jiyanoehua cua Jiyaniijia timitiaani juhua shusha nia niishiniuuquihua janiya, cucua nia jiyaronuucua nia reratesano cumaneeca. Naa cua sequesacari nia-janiyatej, majaari nia jyaniniu janiya nia sequeyani niaari cua niyajetacanu. Maja. Janiyacuajaari niishiyani, majaari tarijia nia naata cua naacunu quijia nia cumaneecata, nia juuretasacari niaatucua canta cucua na jiyaroriquiani. <sup>11</sup> Majaari naa cua sequenu niajanियatej cua panishano cua jiiitaaquiniuucua. Maja. Janiyacuajaari tari jiyartuunoni, juhuajaniya cua quiniuria cua jiiitiasanoniyajuata. <sup>12</sup> Naajuhuj, janiyari niishiyani juhuajaniya cua quiniuria cua panishano cua jiiitaaquishacari. Naajuhuj, janiyari niishiyani taa quishanote puetunu cua panishanojuanaa cua jiiitiasacari. Janiyari tariucua saniniujiushanoni puetunu casaajanaa cua rejeretanura. Juhujaniya quiniu niishiyani-jia miaajaaraca cua quishacari, miaajeeju cua quishacarijuhuaj. Cua naata juhuajaniya quiniu casamijiu cua quishacarijuhuaj, maja saaja casamiriaca cua quishacari. <sup>13</sup> Cua naata rejeretanu puetunujuanaa, Cristo cumaquishacari janiya. <sup>14</sup> Naajaa, niaari maninia miiriuucua nia cumaneeca nia jiyarosacari cucua, naquiya cua miishacari niya. Niaari niarta pueyanoocua taraajeja cutara.

<sup>15</sup> Naajuhuj, Macedonia jiyajiniji cua quiasacari nia shuriucuaji Filipino tiacajiniji, tamonu jiyacajinia cua pahuatanura Pueyaso rupaa, saaja niajanिया cutaraari cucua jiyanooquiaari. Cunoori quiquiaari shushajanaa Jesucristoocua tiuujia nia quishacari. Jiyacaritij, niaari nia reratesano cumaneeca jiyaroquiaari cucua, shuquiriaatia nia quishacari cua pahuatanuucua nia niqiuara Jesucristojiniji. <sup>16</sup> Juhuanujuaja nia Macedonia jiyajinia cua quishacarijia, Tesalónica tiacajinia, niaari cucua pacutejoquiaari jiyaronu nia cumaneeca, cua panishano cua masetajara. <sup>17</sup> Majaari saaja cua paniniu pueyaracaanu nia niqitiojonura nia cumaneecajiniji janiya. Janiya cutaraari nia panitiaani capora pueya nia quiniuria. Naacuajitij, Pueyasoori saniniuuja socua queraatia nia niqitionutaniyacujua. <sup>18</sup> Epafroditocuajaari puetunu nia jiyarosano cumaneecajanaa cucua tiuquitiaseecuaa. Janiyari cunota puetunu cua panishanojuanaa maserucuaa tarini. Cureyajaari nia jiyarosano cumaneecajiniji. Cuno cumaneeca cucua nia jiyarosononi, cunoori juhua Pueyasora niqitiosano casaa. Nera, cunoori juhua shanohua jaanutaja catijasano nocuara. Na shuqiritiriiri. <sup>19</sup> Naaratej, cua Jiyaniijia Pueyasoori puetunu nia jiiitaaquishoo casaajanaa nia niqitionutaniya. ¿Pueyasoteeri casamijiu? ¡Maja! Nia rupuesacari Neyanu Jesucristo, puetunu na jiiitiasanojuanaari niaaranojuhuaj. <sup>20</sup> ¡Pa Que Pueyasoori jiyanoehua maninia! Saaja nojuaja pa shuqiritiare pueyaracaanu. Cuaara naa quiiriatej.

*Nata quiniaata Pablo saruhuatascari narta Pueyaso pueya*

<sup>21</sup> Quiria nia saruhuatate puetunu Jesucristo jiyanooshano pueyajanaa. Niya cuata quiniaa Pueyaso pueyari nia saruhuataajuhuj. <sup>22</sup> Naajuhuj, Jesucristoocua tiuujia

jiyaniijia Césarra poonijionaa pueyari nia saruhuataajaacuhuj, puetunu niya Jesucristoocua tiuujiacajanaanio.

<sup>23</sup> Pa Jiyaniijia Jesucristo cuara cumaquiiria puetunu nioojijanaa. Tariucuaja pueyanaa.

## PABLO NAAJIONE COLOSA TIACAJINIA QUINIAA PUEYASO PUEYACUARA

### *Pablo Colosa tiacajinia Pueyaso pueya maanuucuaa naajioquiaari*

<sup>1</sup> ¿Niaate quiyajaa, Colosa tiacajinia quiniaa cuarta Pueyaso pueyanaa? Janiyari Pabloni, Jesucristo jiyaramiquishano na rupaa pohuatariquiano taa na Que Pueyaso paniquiaaricuajani. Pa tarajanu Timoteota naajiya nionijia. <sup>2</sup> Niaacuara naajiyaniija, canapue Pueyaso saquiriojoquiaaricuajani tama nerajaaja nia quiniuria. Níajaniyacuaaari maninia tiuquiaa Pueyasooocua, Cristo rupesano nia quishacari. Pa Que Pueyaso cuara cumaquiiria nijaniya, shuquiriaatia nia quiniuria, juhuajaniya nioojia quiniuriajuhuaj.

### *Pablo secojosano Jesuucua tiuuniaa pueyacuara*

<sup>3-4</sup> Canaari pohuatasacanuni taa nia tiuquiaa Jesucristoocuaani, naajuhuj, taa nia paniya puetunu niarta Pueyaso muerasujuanaani. Naaratej, pueyaracaanu canaa secojosacari Pueyaso niaacuara, canaari na sequequiaani: “Paacarasho canaa Quenea”. <sup>5</sup> Niaari naa maninia quiyatej, nia niishishacari Pueyasoori jiyanoehua maninia pa miiniutianiya na niqutiosacari pajaniya jiyocuacaanu na jiitiasanojiniji. Niaacuajaari naa pohuatasaaquiaari tarijiatej, shushajanaa nia tojishacari seetanu Pueyaso rupajaanaa. <sup>6</sup> Cuno maninia rupaari puetunu jiyacajinijanaa paaqueyaree, mariyata taa na paaquecanucuaa na pohuatasacari nia tiacajiniacuaani. Pueyaso Rupaari maninia caneyaree queraatia pueya jiuujiajinia, mariyata taa na caneya nioojiacajiniacuaani. Naa caneyari nia niishishacari Pueyasoori seetanujuanaa pa paniya, taa nia pohuatasaaquiaaricuajani. <sup>7</sup> Pa panishano Epafrasri naa pohuataquiaari nijaniyatej. Nojuajaari Pueyasora poonijiona, juhua canaa. Nojuajaari canaa niti poonijioriquiaa niaara. <sup>8</sup> Nojuajaari canaa pohuatarucuaa nijaniyajiniji, naajuhuj taa Pueyaso Sohuanu panitiooteya nijaniyani. <sup>9</sup> Naaratej, canaa jaara tojiquianu nijaniyajinijini, majaari canaa tarinitianu quiriqiaa Pueyaso secojonu niaacuara. Canaari Pueyaso secojoquiaani, nojuaja cuara nia jataniiria niishijara nia quiniuria na Sohuanu cumaacata. Canaari naa secojoquiaani, maninia nia niishiniuria taa Pueyaso paniya maninia nia quiniuriani, maninia nia miiniuriajuhuaj. <sup>10</sup> Naa jaara Pueyaso panishano niishijiaa quiri, naacuajitij, niaari maninia quiniutianiya taa pa Jiyaniija paniya na pueya quiniuriacuajani, nojuaja shuquiritianura nijaniya, pueyaracaanu maninia nia quishacari. Niaari puetunu maninia casaajanaa miiniutianiya. Naajuhuj, niaari socua maninia niishiniutianiya Pueyaso. <sup>11</sup> Canaari Pueyaso secojoquiaa niaacuarajuhuj, Pueyaso cumaquiniuria nijaniya puetunu na cumaacatajanaa. Jiyanoehua maniniaari na cumaaca, shuquiriaatia nia rejeretanura juhuajaniya puetunu casaajanaa. <sup>12</sup> Canaari Pueyaso secojoquiaajuhuj niaa cuara pueyaracaanu sequeera nia shuquiriniutia “paacarasho”, pa Que Pueyaso miishanojiniji. Nojuacuajaari pa jataniquiaari maninia na muerasu pa quiniuria, puetunu na muerasutajanaa pa masenura na jiitiasanojiniji pajaniyara, cuhuashiqui quiquiojinia pa quishacari. <sup>13</sup> Pueyasoori ninishiquiji pa jayoquiaari, maja Sesaaca jiitianura socua pajaniya. Pa jiyatereeri cuhuashiqui quijiaca pa quiniuria, Neyanuniyojua jiitiasano pa quiniuria maninia cutara. <sup>14</sup> Tama Neyanu cusonutajaaja pa jiyanooriiri sesa pa miishanojiniji. Naacuajitij, paari na pueyara jatanishaareeni.

### *Paari maninia quiya Pueyasotani, Cristo cusonuucua pa niti*

<sup>15</sup> Pueyasoori maja niquishano quijia. Cristo cutaraari niquishano. Nojuajaari mariyata juhua na Que Pueyaso. Nojuaja cutaraari coteenujuanaa quiquiaari Pueyaso shipiniyaquishacariija puetunu casaajanaa. <sup>16</sup> Na Que Pueyasoori na shipinitiquiaari puetunu casaajanaa jiya cajiniocua, mijirianio; niquishano casaa, niquiyaquishoo casaanio. Naacuajitij, Cristoori puetunu tamonu cumaacaraca quijiacajanaa shipiniquiaari tama

nerajaaja. Nojori shipiniquiaariiri nojori jiitianura nera jiyocuacaanu casaa, jiyocuaacaanu quijiacanio, mariyata mijiria casaa, mijiria quijiacanio. Nojuajaari puetunujuanaa shipiniquiaari. Tama nerajaaja na shipiniquiaariiri.<sup>17</sup> Puetunu shipinishano casaajanaa jaara shipinishoojua quiquiaari, Cristo cutaraari tari quiquiaari. Nojuajaari puetunu na shipinishanojuanaa cojuaa, maninia na quiniuria.<sup>18</sup> Cristoori Pueyaso muerasu Jiyaniijiajuhuaj, taa poojia quiya pa cuaqueya jiyaniijiacuaani. Puetunu Pueyaso muerasujuanaari juhua Cristo cuaqueya quiya, pa miiniuria na panishano mijiria. Nojuajaari juhua poojia. Nojuajaari pa samiitianijia, juhua na cuaqueya pa quishacari. Nojuajaari coteenu samiitiaquiaariuhua macujiniji, juhua Pueyaso jiyapueranu na quiniuria. Naacujitij, Cristoori coteenu quijia. Nojuajaari Jiyaniijiajuhanajaj.<sup>19</sup> Pueyasoori paniquiaari Neyanu Cristo jiitianura puetunu tama na cumaacajanaa, juhua nojuaja na quiniuriajuhuaj. Naacujitij, Cristoori maja rimiajata quenaaja na quiniu na Quejiniji.<sup>20</sup> Naajuhuj, Pueyasoori paniquiaari Cristo rupuetenuhuara nocua puetunu casaajanaa, maja socua tari juhua na paraa na quiniuria. Naaratej, Cristoori na Que Pueyaso jiyanootiquiaari puetunu casaajanaa tama na cusonutajaaja niyacutesanojinia. Na Que rupetequiaariuhua puetunu casaajanaari, jiyocuacaanu casaa, mijiria casaanio.

<sup>21</sup> Tarijia, niaari Pueyaso paraa quiquiaari, juhua taanuusano pueya Pueyasojiniji, sesa mijiaca nia quiniuucua. <sup>22</sup> Saniniuujia quiarijiani, Pueyasoori nia rupetequiaariuhua nocua, Cristo cusonuucua pocuara, cuaqueyaraca na quishacari mijiria. Naacujitij, Pueyasoori na naata nia tiuquininiu nocua, tojetaarucujanaa jeequesano nia quishacari sesa nia miishanojiniji. Majaari niaacuara tonujusaanu quiniutianiya quenaaja sesa nia miishanojiniji. Majaari quenaaja shiitianiyojua sesa nia quiniu quiniutianiya na niquiara. <sup>23</sup> Niaari naa quiniutianiya maninia, niaa jaara cumaatia rupaaquiaa Cristoocua, nocua nia tiuushacari, nioojia nia niquijioteyaquiniutia. Majaari nia niishiriojonu Pueyaso naasucuaari maja na miiniu quiniutianiya puetunu na sequesanojuanaa niaara, taa nia tojiquiaaricujani. Nia tojishano Pueyaso rupaacuajaari tari pohuatasaacanu puetunu jiyacajiniajanaa. Janiya, Pabloni, janiyari na pohuatanu naacutaajaniuhuj.

*Pablo Pueyaso pueya maanu cumaquiniara jiyatesaaquiaari*

<sup>24</sup> Cristoori naquiya miishaaquiaari pocuaji na tacunura. Juhua na cuaqueya pa quishacari, naquiya pa miiniu pa rejeretarejuhua na rupaa pa pohuatasacari, puetunu na saquiriojosano pueyajanaa tiuuniuria nocujuhuj. Naaratej, janiyari shuquiriaatia quiya niyani, naquiya cua miishacari niaacuara. Naa naquiya cua miishacari Cristojiniji cua pohuatanuucua tiqiyocuatej, janiyari Cristo naquiya miiniu tucataa tama cua cuaqueyajiniaajani. <sup>25</sup> Pueyasocujaari cua jiyatequiaari na saquiriojosano pueya cua jiitianura, cua cumaquiniuria nijaniya puetunu na rupaatajanaa. <sup>26</sup> Cuno rupaari saaja Pueyaso jiyasohua niishishano quiquiaari tarijia. Majaari na pohuatanu quiquiaari supuetana pueya, tariucuacaanu quijiaca. Quiari naataja cutara, Pueyasoori jiyasohua na rupaa niishitiquiaari tama na saquiriojosano pueyarajaaja. <sup>27</sup> Pueyasoori pa niishitiniu paniquiaari taa jyanohua shacantuuca na cumaaca quiya nijaniyarani, canapete maja na saquiriojosano Judiocuaca quiquiaaricujani. Niocuajaari jiyasohua Pueyaso miiniu panishano tarijia: ¡Cristoori nioojiajinia quiya! Nia jiitiasacari Cristo, niaari niishiya niaari shacantuuca quijiara jatanishaanutaniyajuhuj.

<sup>28</sup> Naaratej, Cristocuajaari canaa pohuatasano. Canaari puetunu pueyajanaa nacasuquiaani. Canaari nojori niishitiojoquiaani puetunu canaa niishishanotajanaa, maninia Pueyaso muerasu nojori quiniuria, juhua tojetaarucujanaa maninia canashitishano pueya, Cristo rupuesano nojori quishacari. <sup>29</sup> Naaratej, puetunu Cristo niquitiosano cumaacatajanaa jyanohua poonijioquiaanijia, na cumaquishacari janiya.

2

<sup>1</sup> Pueyanaa, janiyari paniyani nia niishiniuria taa jyanohua cua poonijioquiaa Pueyaso cua secojonuta niaacuarani, Pueyaso muerasuucua Laodicea tiacajiniajuhuaj,

puetunu juhuanajuaja cua niquiyaquiniaa pueyacuarajanaanio. <sup>2</sup> Jiyanohua secojoquiaa niaacuaranijia, nioojiaca cumaquishaanura, nioojiaca rupuetoonura jatiqiujuhuaj, jiyanohua nia panitioosacari. Naajuhuaaj, secojoquiaanijia maninia niishijiacara nia quiniuria, maninia nia niishiniuria tariucuacaanu Pueyaso niishishano tamajaaja, taa Neyanu seera maninia na miiniutianiya pajaniyani. <sup>3</sup> Neyanu Cristocuaajaari puetunu niishijiajanaa. Majaari tamonu niishijia quiniu juhua nojuaja. Jiyanohua maninia miijia puetunu na niishishanotajanaari. <sup>4</sup> Janiyari nio sequeya nijaniyani, tamonu mariqui nia sajojoreeri najuhuaana tamaatia na pohuatasanota. <sup>5</sup> Majaari cua quiniu quiquiaa niaata. Naajaa, cua sohuanuuri niaata quiquiaa. Nia shuquiritiaanijia, maninia jatiqui nia quishacari, mariyata seetanujuanaa maninia nia tiuushacari Cristoocua, maja jatasano nia quiniuria.

<sup>6</sup> Niaacuaajaari pa Jiyaniijia Jesucristo masequiaari, nia jiyaniijia na quiniuria. Naaratej, pueyaracaanu maninia nia rupuerenaj, maninia nia quiniuria mijiria na cumaacata. <sup>7</sup> Maninia nia rupuetooore Cristota, naatej, taa naana cumaatia nujuaacuaani, jaara tucumaaca nujucaraca quiri. Naacujitij, majaari nia naata jatasano quiniu, maninia nia tiuushacari nocua, taa nia niishitiojosaaquiaaricujani. Cunora, pueyaracaanu nia sequeriquia Pueyaso: "Paacarasho canaa Quena".

#### *Niaari quiarinio pueya, Cristo quishacari nioojiainia*

<sup>8</sup> Tama nia cuaqueyajaaja nia cojuare, tamasa mariqui nia sajojoreeri tamaatia nojori niishishanota najuhuanaj. Naa jaara nojori niishitiojosano tojitiariquia, niaari juhua nojori quioosano pueya quiniutianiya. Nojori niishishanoori maja Cristojiniji. Nojori niishishanoori saaja mijiria niishishano, supuetanaa pohuatasano najuhuanajuhuaaj.

<sup>9</sup> Nocujaji saaja Cristo nia tojiri. Tama Cristo cutarajaari nia puetunu Pueyaso cumaa-cajanaa jiiitaja, puetunu na niishitijajanaanio. <sup>10</sup> Naajuhuaaj, niaari Pueyaso cumaaca jiiitaa, na niishitijanio, nia rupuesacari Cristo. Naacujitij, niaari puetunu nia panishanojuanaa jiiitaa tari, maninia quijiaca nia quiniuria. Cristojanaari Jiyaniijiajanaa. Cristo jaara na jiyarore, puetunu tamonu cumaacaraca quijiacajanaari na tojitiaa; jiyocuacaanu camarnu, mijiria camarnunio. <sup>11</sup> Cristo nia rupuesacari, niaari seetanujuanaa jatanishaaree maja sesa nia quiniuria socua. Majaari nareja nia cararaatiuuquia co miatesaanu quiquiaari, taa Judiocuaca miiquiaacuaani. Nojori miatesaaquiaa nojori niishiniuria nojori cuara quiri saa Pueyasoraja, maja sesa miijia nojori quiniuria socua. Cuno, miatenuni, majaari pueyano na jataniniu sesa na miiniujiniji. Cristo cutaraari sesa nioojia jataquiaari, seetanujuanaa sesa nia quiniu jatasaanura puetunujuanaa. <sup>12</sup> Puetunu sesa nia quiniujianaari juhua jamosaaquiaari Cristota, niaa jaara moojinia tiuquinijiosaare. Nia tohuatasacariuhua, niaari juhua samiitianishaarohua Cristota, Pueyaso cumaaca nia tiuushacari. Niaari samiitianishaarohua taa Pueyaso samiitianiquiaariuhua Cristocuaani. <sup>13</sup> Niaari juhua macu quiquiaari tarijia, sesa miijiacara nia quishacarijia, sesa jiuujaraca nia quishacarijiano. Jiyacaritij, Pueyaso nia samiitianiquiaari Cristota, na jiyanooshacari nijaniya puetunu sesa nia miishanojinijianaa. <sup>14</sup> Pa tojiyaquishacari tariucuacaanu Pueyaso rootasano, paari puecosocoriquiano quiquiaari juucuani. Sesa pa miishanoori juhua naajiotasano quiquiaari Pueyasora. Pueyaso cutaraari sesa pa miishano naajiotasano tuujuquiaari puetunujuanaa. Pueyaso puetunu sesa pa miishanojuanaa tiutiaquiaari Cristoocua. Cristo teetesacari niyacutesanojinia, puetunu sesa pa miishanojuanaari cuniqui puequequiaari. Naa Cristo miishacari pocuaratej, majaari sesa pa miishano tiutiasaanu pocua. <sup>15</sup> Na cusosacari niyacutesanojinia, Cristoori puetunu tamasa sesa cumaacaraca quijiacajanaa shocotaquiaari. Nojori cumaaca jaariutiareeri. Nojori rerequetereeri, naatej, taa quioosano pueya jaatucunuusaaquiaacuaani, pueya niqiara macaatisocoriquiano.

#### *Saaja Pueyaso casaacua nia jiaatiariquia*

<sup>16</sup> Naaratej, majaari nia tojiniu noo pojori, canapue nia tojitiniu saniniujia supuetana niishitiojosanocujani. Nojori najuhua niishitioquiaa casaa sumatuute



puereshiyani, rusanonio. Nojoriiri niishitiojoquiaajuhuj teyano juucate pooni-jiyaquishiyani, naajuhuj, Pueyaso niquiara pa queranacunuunura raca macura. Nojoriiri naa niishitiojonuuquiaa nojori jyanishacari paa jaara naa miyaquirini, Pueyaso mariqui pa saniitioreeri. <sup>17</sup> Puetunu cuno supuetanaa niishitiojosanojuanaari tariucua-caanu quiquiaari, miriqui na niishitiojonura pueya taate seetanujuanaa quiniutianiyani Niriquiano jaara tiuquiri. Cuno Niriquianocuaajaari Cristo. Tari tiuquiquiaariiri. Nojuajaari pocuaji Tacuna. Naaratej, majaari socua pa tojiniu cuno miriqui niishitiojosano. Quiarjia saaja Cristo pa tojiri cutara. <sup>18</sup> Tama nia cuaqueyajaaja nia cojuare, tamonu niishitiojonaa mariqui nia sapojoreeri, niaa mariqui Pueyaso niqutionu panishano nijaniya maseyaquiriiri. Nojoriiri tama na cuaqueyajaaja shuquiritiaquiaa na jyanishacari nojori maja Pueyaso shocotaja na quiniu nojori secojosacari Pueyaso seya, maja Pueyasojuanaa. Nojoriiri tama na maquenujinia na niquishanoocuaajaaja tiuujiaa, maja Pueyaso rupaacua. Naacuajitij, nojori tiuushacari tama na niishiriojosanoocuaajaaja, nojoriiri seetanujuanaa pueya shocotajaca quiya. <sup>19</sup> Nojoriiri maja na rupuenu Cristo, juhua poojia Cristo quishacari, na cuaqueya pa quishacarijuhuaj. Paa jaara maninia rupuetesano quiri poojatani, poojiaari maninia maashitiya puetunu pa cuaqueyajanaa, paa jaara maninia rupuetoonu quiya puetunu pa nucuhuatajanaani, pa cusorohuatano. Pueyasoori naa pa maashitiniu panijuhuj Cristota rupuetootesano pa quishacari.

<sup>20</sup> Niaari juhua tari cusoquiaari Cristota, maja socua juhua mijiria quijiaca nia quiniuria. ¿Macutucua taa supuetana rootasano tojirini? Maja na naata. ¿Niajanियariuhuj? ¿Casaara nia tojtiaajaa cuno tariucuaaanu rootasanoni? Niaari juhua nareja mijiria quiniaa quiyajaa, nia tojishacarija cuno rootasano. <sup>21</sup> Supuetanaari naa piriyojoquiaritij: “Maja pa quianu cuno. Maja pa miaquenu cunojuhuaj. Maja cuno pa cooniu”. Pa supuetanaari naa sequejatej. <sup>22</sup> Naajaa, puetunu cuno pueresano casaajanaari saaja shaajeja pa seecojinia. Majaari poojia na miiniu sesa. Cuno tariucuaaanu rootasanoori saaja tama pueya niishishanojuaja quiquiaari. <sup>23</sup> Paa naasucuaari jyanianiyani cuno rootasanoori maninia quiya Pueyaso shuqiritianura pajaniya socua. ¿Paatucua socua maninia pueya quirini paa jaara casaa sumatuu puererene, naajuhuj, paa jaara naquiya miiri tama pa cuaqueyajaajani casaa pa puerenutani? Maja. Pa pueresacari casaa, cunoori najuhua Pueyasora. Cunoori maja na naacunu pajaniya sesa casaacua pa jiaatuaquiniuria.

### 3

<sup>1</sup> Niaa jaara samiitianishaaquiaari Cristota, jiyocuacaanu Pueyaso jiiitianooocua nia jiaatiare, tee Cristo cajiya na Que Pueyaso miaquetajaracuajani. <sup>2</sup> Pueyaso casaacua nia niishiriojore saaja, maja mijiria casaacua. <sup>3</sup> Puetunu tarijia sesa nia quiniujianaari tari juhua jamosaaquiaari, niaa jaara Cristo cusonu jiyatere tama nia nitijiaaja. Quiarjiani, niaari saminio quiya nia rupuesacari Pueyaso, Neyanu Cristota. Nojuacuajaari pa samiitianijia. Saniniuujia, juhuanajuaja maja niishishano taamueca quijiaca pa cuaqueya quiniutianiyani. <sup>4</sup> Cristo jaara muetarohua pocua mijiria, shacantuuca cumaacaraca quijia na quishacari, jiyacaritij, paari jatanishaanutaniyani shacantuuca cumaacaraca quijiaca pa quiniuria nata, juhua nojuajuhuj.

#### *Maninia rootasano Pueyaso muerasura*

<sup>5</sup> Naaratej, nia cuaqueya cuara quiiria juhua macu tama nia niquiarajaaja, nia cuaqueya nia ruuretanura na jiaatiasacari sesa miiniuucua. Naaratej, maja nia numuetucunu nia camishoo maaji. Maja sesa nia miiniu niarta canuuta, niarta maajitiano. Nia cartere puetunu sesa miiniuucua nia jiaatiasanojuanaa. Maja sesa casaacua nia jiaatianu. Maja puera casamiicua nia jiaatianu. Casaacua jiaatijaari juhua Pueyaso ruuretaja quiya, tama na jiiitianoo casaacuajaaja na tiuushacari juhua Pueyasooocua. <sup>6</sup> Pueyasoori jyanohua saniitionutaniya na tojiyashijiaca, canapute naa sesa quiji-acacuajani. <sup>7</sup> Pueyaso tojiyashijiaca nia quishacari tarijia, niaari naa sesa miijiaca quiquiaari. <sup>8</sup> Quiarjiani, nia tarinitiare puetunu naa sesa nia quiniujianaa. Maja juaajia nia quiniu. Maja naseca pueyano nia quiniu. Maja jyanoyashijia nia quiniu. Maja sesa

mijia nia quiniu. Maja pueya sesacaja nia quiniu. Maja sacuaraatia najuhuana nia niti taquiriocateja nia quiniu. <sup>9</sup> Maja nia cuaracashijotoonu. Niaari tari jatanishaaquiaari tarija sesa nia quiniujiniji, sesa jiuujiaraca nia quishacarija, sesa miiniuucua jiitinio nia quishacarijuhuaj. <sup>10</sup> Niaari quiarinio jiuujiaraca quijiaca tari. Quiarijiani, tama nia cuaqueyajaarija tari jataa juhua nia Shipinina Pueyaso nia quiniuria, seetanujuanaa Pueyaso niishijia nia quiniuria. <sup>11</sup> Pueyaso jatanishano pueya pa quishacari quiarijiani, majaari tari rimiajata pa quiniu, paa jaara Judiocuaca quiyani, tamasa pueyano; na cararaatiuuquia co mialesano pueya, mialesoo pueyano. Paa jaara tahue quiyani, juhua mococori, poonijotesano pueya, camarnuuju pueyano, naajaa. Cristo pa rupuesacari, puetunu pajaniyajanaari mariyata na muerasu quiyani. Nojuajaari puetunu poojiajinia quiyajuhuj.

<sup>12</sup> Pueyasoori nia saquiriojoquiaari saa maninija nia quiniuria nera. Niajanijari na panishano muerasu. Naaratej, pueyacuara tarajeja nia quiri. Maninia mijia nia quiri. Majaari nia jiyaniinu tama nia cuaqueyajaarija socua maninia tamonujiniji. Maja juaajia nia quiniu. Jacaria pocuaja nia quiri. <sup>13</sup> Jacaria nacasutoojua nia quiri. Maninia nia jiyanoori cante sesa miirii niajanijari. Taa pa Jiyaniija jiyanooquiaari pajaniyacuaani, naa nia jyanootioorejuhuj. <sup>14</sup> Seetanujuanaa pueya panijia nia quiri juhuaj. Cunoori socua jyanohua panishano. Panitiojuaca nia quishacari, puetunu nia miishanojuanaari jyanohua maninia quiniutianiya, jatiqiu nia quiniuriajuhuaj. <sup>15</sup> Naajuhuj, Pueyaso nia shanacure nioojia na cajitiniuria pueyaracaanu. Nojuacuajaari nia saquiriojoquiaari juhuajaniya quijiaca nia quiniuria, maninia rupuetootesano. Pueyaso muerasu cuara jatiqiu poonijionuujuaca quiira, naatej, taa pa cuaqueyajiniacuma casaa puetunujuanaa jatiqiu quiyacuani. Majaari nia juaatiojonu. Naajuhuj, Pueyaso nia shuquiritiare pueyaracaanu, puetunu maninia na miishanojinijijianaa niaara.

<sup>16</sup> Nioojia cuara quiira mishaja Cristo rupaata, jyanohua na tojiaca nia quiniuria. Pueyaso Rupaa nia niishitiojotoore nia jaaquequejosanota. Naa nia cumaquitiojore puetunu Cristo niishishanotajanaa. Nia jaaquequejonuure Pueyaso Rupaa naajiosanojiniji, pueya naajiosanojinijijuhuj, Pueyaso Sohanu niishitiojosano niajanijari. Naa nia jaaquequejore Pueyasora, nia shuquiritianuta nojuaja. <sup>17</sup> Jesucristocuaajaari nia Jiyaniija quiya. Naacuajitij, niaari na sesaanucua. Naaratej, nia sequesano, nia miishanojuhuj, puetunu cunojuanaa cuara quiira maninia nera. Naa nia miiriquia pa Que Pueyaso nia sequenuta “paacarasho”, Neyanu cumaquiniuucua niajanijari.

*Maninia mijia pa quiri Pueyaso muerasu pa quishacari*

<sup>18</sup> Maajipohuanaa, nia niyaca tojitajaca nia quiri. Pa Jiyaniijaacua tiujuaca cumaati naa miiquiaquij. <sup>19</sup> Pueyanaa, nia niquiocua nia paniri. Majaari na juaani. <sup>20</sup> Mueraasapuenaa, nia queya tojiaca nia quiri, nia shuquiritiniuria pa Jiyaniija. <sup>21</sup> Pueyanaa, maja nia juaatini nia niquiohua, nojori mariqui maninia miiniuucuaaji pishiriiri, puera nia juaashacari nojori. <sup>22</sup> Poonitijosano pueyanaa, puetunu nia camarnu sequesanojuanaa nia tojiri. Maja na tojijia nia quiniu saaja na shootiasacari niajanijari, na shuquiritianura niajanijari. Majaari saaja na niquishacari nia poonijionu nia sapojonura nojuaja. Seetanujuanaa maninia nia poonijiore pueyaracaanu nia puerenuta saniya nia camarnujuanaa Pueyaso. <sup>23</sup> Puetunu nia miishanojuanaa nia miiri shitimia, juhua pa Jiyaniija Cristora. Naa nia miiritij, maja juhua nareja pueyara. <sup>24</sup> Maja nia niyajetanu, pa Jiyaniijaari nia niquitionutaniya jiyocuacaanu niaara na jiitiasanojiniji. Mijiria camarnura nia poonijosacari, niaa cutaraari Cristora poonijia. Nojuacuajaari nia camarnujuanaa. <sup>25</sup> Pueyasoori sesa mijia saniitionutaniya cutara, sesa nojori miishanojiniji. Pueyasoori maja rimiajata saniniujuja. Mijiria camarucua, poonitijosano pueyano, naajaa, nojoriiri maja rimiajata Pueyasora.

4

<sup>1</sup> Camarucuaanaa, pueyaracaanu maninia nia miiriquia nia poonitijosano pueya. Majaari nojori nia miiniu sesa. Maja nia niyajetanu, niaari jiyocuacaanu Camarnuracajuhuj.

<sup>2</sup> Pueyanaa, Pueyaso secojojua nia quiri pueyaracaanu. Nia secojoriquia maninia nia niishiniutia. Pueyaracaanu Pueyaso nia secojosacari, nia sequerenoj, “paacarasho”.  
<sup>3</sup> Naajuhuj, canaacuara nia secojore Pueyaso, nojuaja cuara canaa pohuataniiria pueya niquiara na rupaa Cristojiniji. Majaari pueya niishiniu quiquiaari tarijia Pueyaso miiniu panishano pajaniyara Cristo seera. Cua pohuatanuucua Cristojiniji, cunora nujuatesano niya quiyanijia nio nujuatejojuajinia. <sup>4</sup> Pueyaso nia secojore cucuara, maninia cua pohuatanura Cristojiniji, pueya niishiniuria maninia cua pohuatasano, taa Pueyaso paniya cua pohuatanuracuajani.

<sup>5</sup> Maninia nia niishiriojore taa nia miiniutianiya noo pojorini, canapuetucuaja maja Pueyaso muerasuni. Maninia nia miiri nojori, mijiria nia quishacarijia. <sup>6</sup> Nia pocoojosacari nojoritia, maja najuhuaana nia pocuanu. Pueya nia cumaquiri nia sequesanta. Nia niishiriojore taa nia riucuanutaniya tamasaca pueyani, nojori jaara nequesotariquia niajaniya Pueyasocua nia tiuuniujiniji.

*Nata quiniaata Pablo saruhuatasacari pueya, naajionu na puecanura*

<sup>7</sup> Pa panishano pa tarajanu Tíquicoori nia pohuatanutaniya janiyajiniji. Nojuacuajaari cua cumaquinia maninia. Nojuacuajaari cuarta Pueyaso seru, pa Jiyaniijara canaa poonijionura. <sup>8</sup> Niaacua na jiyaroyanijia na pohuatanura niajaniya taa canaa quiyani, naajuhuj, na cumanijianura niajaniya. <sup>9</sup> Pa panishano Onésimoori nata quianutaniyajujuaj. Nojuacuajaari niajanijinijinio pueyano. Maninia poonijiojua Pueyasora. Nojoricuajaari nia pohuatanutaniya puetunu niiquijijianaa.

<sup>10</sup> Aristarco, cuata nujuatesano pueyanoni, nojuajaari cua sequeya cua saruhuatanura niajaniya nera. Marcoori nia saruhuataajuhuj. Nojuajaari Bernabé cuna. Niaacuajaari tari rootasaacanu Marcojiniji. Nojuaja jaara niaacua quiaare, niocua maninia na tiuquiniri nia tijinia. <sup>11</sup> Jesu sesaanucua pueyanoori nia saruhuataajuhuj. Na sesaari Justojuhuj. Saa nio pojorijia Judiocuacajinijinoori cuata poonijioquiaa Pueyasora, canaa niishitiojonura Cristojiniji pueya niquiara. Nojoriiri cua cumanijianaa quiquiaa. <sup>12</sup> Epafraasi nia saruhuataajuhuj. Nojuajaari Cristo seru niajanijinijiojuhuaj. Nojuajaari pueyaracaanu niaacuara secojoquiaa queraatia, jiyanohua cumaatia Pueyasocua tiuujia nia quiniuria. Secojoquiaaariuhua ritia Pueyaso tojijia nia quiniuria, puetunu Pueyaso panishanojuanaa nia miiniuria maninia. <sup>13</sup> Seetanujuanaa, Epafraasi jiyanohua tacaquiaa niaacua, Laodicea tiacajinia quiniaa Pueyaso muerasuucujuhuj, Hierápolis tiacajinia Pueyaso muerasuucuanio. <sup>14</sup> Pa panishano naarajona Lucasri nia saruhuataa. Demas nia saruhuataajuhuj.

<sup>15</sup> Canaara nia saruhatare Laodicea tiacajinia quiniaa parta Pueyaso muerasu. Ninfas nia saruhatarejuhuaj, na tijinia rerejonaa Pueyaso pueya maanujuhuj. <sup>16</sup> Naa jaara nio naajionee serojorecuaa nia rerejosacari, Laodicea tiacajinia nia jiyarotarejuhuaj, cuara serojosaaria Pueyaso pueya maanu niquiara tiijuhuj. Naajuhuj, cua naajionee Laodicea pueyacuara nia serojore, niaacua nojori jiyarotasacari Laodicea tiacajiniji. <sup>17</sup> Naa Arquipo nia sequere quiria: “Tama quia cuaqueyajaaja quia cojuare quia tucuatana quia poonijiosano pa Jiyaniijara. Nojuajaari quia jiyatequiaari nera poonijioriquiano”.

<sup>18</sup> Janiyari Pabloni. Quiarijiani, tama cua juaashiquiatajaaja naajianijia saaja cua saruhuatanura niajaniya. Nia niishiriquia, janiyari moronucua nujuatesano quiyani. Pueyaso cuara cumaquiiria niajaniya na cumaacata jiyanohua. Tariucuaja.

## COTEENU PABLO NAAJIONEE TESALÓNICA TIACAJINIA QUINIAA PUEYASO PUEYACUARA

### *Pablo saruhuatasacari Pueyaso pueya*

<sup>1</sup> Janiyari Pabloni. Janiyari nio naajiya Tesalónica tiacajinia quiniaa Pueyaso pueya maanuucuarani. Niaacuajaari pa Que Pueyaso rupuejaca, pa Jiyaniijia Jesucristo rupuejancano. Canaari mariyata nia saruhuataani, Silvano, Timoteonio. Pueyaso cuaara maninia jiitiaara na cumaacata niajaniya, maninia nia quiniuria. Cuaara nioojia cajitiirijuhuj, juhuajaniya nia quiniuria.

### *Tesalónica pueyanaari Jesuucua tiuujiaqui quiquiaari seetanujuanaa*

<sup>2</sup> Maninia nia quiniuucua, canaari pueyaracaanu Pueyaso sequequiaani, “paacarasho”. Canaa secojonuusacari, canaari pueyaracaanu niaacuara secojonuuquiaani. <sup>3</sup> Pa Que Pueyaso canaa secojosacari, canaari pueyaracaanu niishiquiaa niajaninyani, taa pueyaracaanu nia poonijioquiaa Pueyasorani, Neyanuucua nia tiuuniuucua. Canaari niishiquiaajuhuj taa nia paniniutia nia naacuquiaa niarta pueyani. Naajuhuj, niaari maninia rejeretaquiaa taraatia nia miiniu, nia niishiniuucua pa Jiyaniijia Jesucristoori pocua niniutianiuhua. <sup>4</sup> Pueyaso panishano pueyanaa, canacuajaari niishiyani, nojuajaari nia saquiriojoquiaari na panishano muerasu nia quiniuria. <sup>5</sup> Canaa jaara nia niquiara pohuataquiaari Pueyaso rupaa Jesucristojinijini, cunoori maja najuhua pohuatasano quiquiaari. Canaa pohuatasanoori jiyanoehua Pueyaso cumaacaraca quiquiaari. Pueyaso Sohanuuri jiyanoehua poonijioriquiaa nioojiacajinia. Naacuajitij, niaari niishiquiaari canaa pohuatasanoori seetanu rupaajanaa. Niaacuajaari niishiya taa quijiaca canaa quiquiaari canaa quishacari niaatani, maninia Pueyaso muerasu nia quiniuria.

<sup>6</sup> Niaari canaacua jiaatiaquiaari, juhua canaa nia quiniuriajuhuaj, juhua pa Jiyaniijia Jesu nia quiniuriajuhuaj. Niaari seetanujuanaa naa miijiacara quiquiaari, Pueyaso tojjijaca nia quiniuriajuhuaj taa canaacuaani. Pueyaso rupaa nia tojishacari, niaari jiyanoehua na timitiaquiaari. Cunora, niaari jiyanoehua naquiya miishaaquiaari. Naajaa, Pueyaso Sohanuuri nia cumaquiquiaari saaja, shuquiriaatia nia quiniuria. <sup>7</sup> Naa shuquiriaatia Pueyaso tojjijaca nia quiniuucuatej, niaari niarta Pueyaso pueya shiniujuquiaari, seetanujuanaa Pueyaso tojjijaca nojori quiniuriajuhuaj. Niaari naa shiniujuquiaari puetunu niarta Pueyaso pueyajanaa Macedonia jiyajinia quiniaatej, Acaya jiyajinia quiniaanio. <sup>8</sup> Pa Jiyaniijia rupaari niajanijajiniji tucuaaanu paaquequiaari, maja saaja Macedonia jiyajinia, Acaya jiyajinianio. Cuno rupaari puetunu tiqiyocujanaa poojotasaaquiaari. Naacuajitij, puetunu tiqiyocua quijiaca pueyajanaari tari niishiya taa Pueyasocua tiuujia nia quiya seetanujuanaani. Naacuajitij, ¿canaatucua casaara niishitiojore Jesujiniji socuani, tee cuniqui pueya niishiya tari nojuajinijicujani? <sup>9</sup> Tee cuniqui canaa tiuquiquiaani, pueyari canaajiniji poojotanuya tari, taa Jesujiniji canaa pohuataquiaaricujaja niajaninyani. Nojoriiri niishiyajuhuj taa canaa nia tiuquinitiaquiaari maninia nia tiacajiniaqueyani, canaa pohuatasano nia tojiniuria. Naajuhuj, niaanaari pueya shipinijosano nia jiyatesano nia pueyasora cartequiaari, pueyaracaanu rishijia seetanu Pueyasojanaa tojitiajaca nia quiniuria. <sup>10</sup> Naajuhuj, niaanaari Neyanu sashiya, jiyocuaaanuji na tiuquiniuhua, teyano Pueyaso samiitiani quiaariuhua macujinijicujani. Pueyari niajanijajiniji niishiyajaacuhuj, Jesuuri pocuaji Tacuna, maja mani quiquiojinia pa quejoosaanura, Pueyaso saniitiosacari na tojitiaashijaca.

## 2

### *Pablo niishitiosacariuhua pueya, taa na quiquiaari nojoritiani*

<sup>1</sup> Cuarta Pueyaso pueyanaa, niaacuajaari niishiya, majaari najuhua canaa quiniu quiquiaari, niaata canaa quishacari. <sup>2</sup> Niaacuajaari niishiya, Filipo tiacajinia

canaa quishacari, niaacua canaa tiuquiyaquishacarijia, canaari cuno tiacajinia sesacasaaquiaarini. Canaari jiyanoehua taraatia miishaaquiaarijiuhuj. Naajuhuj, nia tiacajinia canaa tiuquijiosacari, pueyari canaa pohuatasano ruuretaquiaari saaja. Naajaa, Pueyasoori canaa cumaquiuaari juhua jiuujiaaju canaa pohuatanura Jesucristojiniji nia niquiarajuhuj. <sup>3</sup> Canaacuajaari niishiquiaarini canaa pohuatasanoori seetanu rupaaajanaa. Majaari canaa pohuatanu quiquiaari canaa miiniuria sesa nijaniya, canaa sapojonura nijaniyajuhuj. <sup>4</sup> Pueyasojuaanaari canaacia tiuquiaari. Cunora, canaa jiyatequiaariiri Neyanujiniji pohuataanaa canaa quiniuria. Naacuajaari taa canaa poojotaquiaa pueya tiuuniuria nocuacujani, Pueyaso jiyanooniuria nojori. Canaari seetanujuanaa Pueyaso timitiniu paniyani, maja saaja pueya. Pueyasocujaari canaa jiuujia niishijia. <sup>5</sup> Niaacuajaari niishiyajuhuj, majaari canaa sapojonu quiquiaari nijaniya shanohua canaa sequesano, canaa nia maniniucuanura. Naajuhuj, majaari canaa cuaracashijionu quiquiaari nijaniya, canaa nia niqitijonura nia cumaneecajiniji. Pueyasoori na niishiyacujaja. <sup>6</sup> Majaari quenaaja canaa niishirijonun quijia pueya timitiasano canaa quiniuria, nia timitiasano pueya canaa quiniurijuhuj. Maja. <sup>7</sup> Canaacuajaari seetanujuanaa nia jiyaniijianucuanu, Jesucristo jiyaramiquishano pueya canaa quiniucua. Naajaa, niaata canaa quishacari, majaari naa canaa miiniu quiquiaari nijaniya, juhua canaa seya nia quiniuria. Saniniujia, canaari tojetaarucujanaa juhua naatujoori quiquiaarini, niaata canaa quishacari. Naatej, taa maaji jiiitaa maninia necohuacuaani, canaari naa nia jiiitiaquiaarijiuhuj. <sup>8</sup> Jiyanoehua canaa paniniucua nijaniya, majaari saaja Pueyaso rupaa canaa pohuatanu quiquiaari nijaniya. Canaa cutaraari tama canaa cuaqueyajaaja panitiaquiaari niaacuarani, naajaa, canaa cuara puecoosaariaqui. Canaari naa jiiitiaquiaari nijaniyani, jiyanoehua canaa paniniucua nijaniya. <sup>9</sup> Cuarta Pueyaso pueyanaa, niaacuajaari niishiya taa canaa poonijioquiaari jiyanoehuanu, tama canaa panishanojuaaja canaa masetajara. Canaari naa poonijionuquiaarini juuca, niucuanio, canaa pohuatanura Pueyaso rupaa nijaniya. Canaari naa miiquiaarini maja canaa taajetenura nijaniya canaa mashiniqijionuta nia cumaneeca.

<sup>10</sup> Naacuajitij cuarta Pueyaso pueyanaa, nijaniya, Pueyasojuhuj, niaacuajaari niishiya canaari saaja maninia miiquiaarini, niaata canaa quishacari. Majaari quenaaja canaa miiniu quiquiaari sesa. Naacuajitij, tamasaari maja na naata canaacuara saquiriojotanu, canaa jaara tojetaarucujanaa sesa miyaquiuaarini. <sup>11</sup> Niaari niishiyajuhuj taa canaa shiniujiaquiaari nijaniyani Pueyaso nia tojiniuria. Niaari niishiyajuhuj taa canaa cumanjiaquiaari puetunu nijaniyajanaani taraatia nia quishacari, naatej, taa pueyano miiquiaa na panishano niqiuhuacuaani. <sup>12</sup> Naajuhuj, canaacujaari jiyanoehua nia nacasuquiaarini maninia miijiaca nia quiniuria juhua seetanujuanaa Pueyaso pueya. Pueyasocujaari nia saquiriojioquiaari pueyaracaanu nata nia quiniuria, jiyaniijianucua nia quiniurijuhuj, juhua nojuajuhuj. Nojuacuajaari na shacantuuca cumacajinia quijia.

<sup>13</sup> Canaa jaara Pueyaso rupaa pohuataquiaari nia niquiarani, majaari nia jiyaniniu quiquiaari cunoori saaja pueyajiniji canaa tojiniushano. Maja. Niaari seetanujuanaa na tojitiajacara quiquiaari, nia niishishacari cunoori seetanujuanaa Pueyaso rupaa cutara. Canaari cunora canaa timiniutia sequequiaa Pueyasoni, "paacarasho". Canaa pohuatasanoori seetanujuanaa Pueyaso rupaa. Naacuajitij, na rupaari nioojiajinia poonijioquiaa, maninia miijiacara na jataniniuria nijaniya, Jesuucua tiuujia nia quiniucua. <sup>14</sup> Naa Jesucristoocua tiuujia nia quiniucuatej, niarta pueyari nia miiquiaari naquiya, taa Judea jiyajinia parta Pueyaso pueya maapue miishaaquiaaricuaani. Tama narta Judiocuacajarijia nojori miiquiaari naquiya, Jesucristo tojijia nojori quiniucua. <sup>15</sup> Nio cuarta Judiocuacani, nojori supuetanaajuhuj, nojoricujaari pa Jiyaniijia Jesucristo motuquiaari. Nojori supuetanaari naa tariucuaaanu puecooquiaarijiuhua Pueyaso sequesano caminiujunaa pueyatej. Naajuhuj, Jesuucua tiuyashijia cuarta Judiocuacari canaa taanuquiaari canaa Judea jiyajiniji. ¿Cuno pojoritiiri Pueyaso timitiasano? ¡Maja! Cuno pojoricujaari juhua puetunu mijiria quinia paraajanaa.

<sup>16</sup> Naacuajitij, canaa jaara taucuaca pohuatanu paniriquia Jesucristojinijini, Pueyaso pueyara nojori jiyatesaanurajuhua, Judiocuacaari canaa tenujuquiaa juucuani. Naacuajitij, Pueyasora, sesa Judiocuaca miijosanoori tari tojetaarucujanaa puera. Cunora, Pueyasoori nojori saniitioquiaa jiyanoehua.

*Pablo naquerejosacari juucua Tesalónica tiacajinia quiniaa Pueyaso pueyacua*

<sup>17</sup> Cua panishano pueyanaa, canacuajaari rupaquijiara nia shuriucuaji quiaquiaariuhua. Jiyacari canaa niqiuiaquishacari nijaniya, naajaa, canacuajaari juhua niaata quiquiaajaani, pueyaracaanu canaa niishiriojosacari nijaniya, niaacuara canaa secojosacari. Canaari juucua jiyanoehua nia niqiniu paniriquiaani. <sup>18</sup> Cunora, canaari niaacua naquerejoquiaari juucuani. Janiyari niaacua naquerejonu pacutejoquiaarini. Satanásri canaa cushitioquiaari saajani. <sup>19</sup> ¿Janiyatucua casaara nia niqiniu paniyaquiririni? Niaacuajaari jiyanoehua cua timitiasano pueya. Pa Jiyaniijia Jesucristo tiuquishacariuhua, janiyari niishiyani, nojuajaari canaa shuqiritianutaniya maninia na tojijia nia quishacari canaa niishitiojonuucua na rupaa nijaniya. Pa Jiyaniijata pa quishacari, jiyacaritij, canaari jiyanoehua nia timitianutaniyani, maninia na tojitiajaca nia quiniuucua mijiria. <sup>20</sup> Taaquiririni, canacuajaari tari shuquiriaatia quiyani, maninia na tojitiajaca nia quiniuucua. Niaacuajaari seetanujuanaa canaa timitiasano pueya.

### 3

<sup>1</sup> Naa jiyanoehua canaa niishiniu panishacari juucua nijaniyajinijitij, majaari socua canaa sashiniu paniniu quiriquiaa. Cunora, canaari niishiriojoquiaarini, maniniacuajaari canaa jateenura tamajaaja Atenas tiacajinia. <sup>2</sup> Naacuajitij, canaari saaja parta Pueyaso pueyano Timoteo jiyaroquiaari niaacuani. Nojuacuajaari jaarajaaja cuata poonijiona Pueyasora, Jesucristojiniji canaa pohuatanura. Janiyari niaacua na jiyaroquiaarini na cumaquiniuria nijaniya, mariyata socua na shiniujiuniuria nijaniya Jesuucua nia tiuuniuria saaja. <sup>3</sup> Na jiyaroquiaarinijia na cumaquiniuria nijaniya maja quenaaja niquiriyatu nijaniyajinijinio pishiniuria Pueyasooquaji, naquiya nia miishacari. Niaacuajaari tari niishiquiaari, paari naquiya miishiyani Jesucristoocua pa tiuuniuucua. <sup>4</sup> Canaa quishacari niaataja, canacuajaari tari nia numootequiaarini, puetunu pajaniyajanaari naquiya miishaanutaniyani Jesucristo tojitiajaca pa quiniuucua. Niaacuajaari niishiya, seetanujuanaa naa tohuatecanuuri cua sequesano. <sup>5</sup> Cua niishishacari nijaniyajiniji, niaanaari naquiya miishaaquiaa, janiyari puereriquiaani Sesaaca naasucua nia miitiriucuaa sesa. Jaara naa quiritij, puetunu canaa miishanojuanaa niaara maara najuhua quiquianu. Naa cua tacaashacaritij, majaari socua cua tarishiniu paniniu quiquianu, nijaniyajiniji cua niishiniuria. Cunora, janiyari ritia jiyarocanu niaacua Timoteoni, saniniuujia nojuaja pohuatanuhua janiya, niaate Jesuucua tiuyajaa.

<sup>6</sup> Timoteocuajaari tari nijaniyajiniji tiuquiriohuacuaa. Nojuajaari canaa pohuatasuhuacuaa, niaanaari Jesuucua tiuyajaa. Niaanaari panitiojuaca quiyajaa. Canaa pohuatasuhuacuaajaariuhua, niaanaari canaa niishiriojoquiaa jiyanoehua nia paniniutia canaa. Niaanaari canaa niqiniuucua jiaatiaa, naatej, taa canaa jiaatiaa canaa niqiniuria nijaniyacuaani. <sup>7</sup> Cuarta Pueyaso pueyanaa, seetanujuanaa canaari taraatia miishiya niyani. Canaari tacayajuhua. Naajaa, canaa niishishacari niaanaari seetanujuanaa Jesuucua tiuyajaa, canaari canaa jiuujia cajitiriucuaani. <sup>8</sup> Naa canaa tojishacari niaacuajitij, canaari juhua samiitiacorohuani, pa Jiyaniijia tojitiajaca nia quiniuucua. <sup>9</sup> Cunora, canaari jiyanoehua nia shuqiritiaa Pueyaso niquiarani. Naacuajitij, majaari canaa niishiniu taate canaa naata sequenu nojuajani “paacarasho”. Naa maninia nia quiniuucuatej, canaari jiyanoehua shuquiriaatia quiyani. <sup>10</sup> Naajuhua, canaari juuca, niucua secojoquiaa Pueyasoni, nojuaja cuara canaa tiuquitihuara niaacua. Canaari maninia nia niishitiojonu tucatanu paniyani, seetanujuanaa maninia jeenucuasano Pueyaso pueya nia quiniuria.

<sup>11</sup> Canaari paniyani pa Que Pueyasojuaanaa, pa Jiyaniijia Jesucristonio, nojori cuaara canaa naacuura niaacua canaa tiuquiniuria. <sup>12</sup> Pa Jiyaniijia cuaara nia jiyateera socua jiyanohua panitiojuaca nia quiniuria, tamasaca panijiaca nia quiniuriajuhuaj, taa canaa paniya nijaniyacuaani. <sup>13</sup> Naa panijiaca na jiyatesacari nijaniyatej, niaari nioojia niqijioteyashijiaca quiniutianiya cutara. Naajuhuj, niaari tojetaarucujanaa sesa miyashijiaca quiniutianiya, pa Jiyaniijia Jesucristo tiuquishacariuhua puetunu na jiyanooshano pueyatajanaa.

## 4

*Taate pa naata Pueyaso shuquiritiniuni*

<sup>1</sup> Quiarijiani cuarta Pueyaso pueyanaa, pa Jiyaniijia Jesu jiyaramiquishano pueya canaa quiniuucua, canaa sequesano nia tojiri. Quiarijiani, canaari nia shiniujiyani socua maninia miijiaca nia quiniuria. Canaari nia niishitiojoquiaari maninia miijiaca nia quiniuriani, Pueyaso nia shuquiritiniuria. Niaacuajaari naa maninia miya.

<sup>2</sup> Niaacuajaari canaa rootasano pa Jiyaniijia Jesujiniji niishiya tari. <sup>3</sup> Canaacuajaari nia rootaquiaarini, Pueyasoori nia panitiaa saaja nera nia quiniuria, tojetaarucujanaa maninia jeequesano nia quiniuria sesa nia miishanojiniji. Majaari nia numuetucunu nia camishoo maaji. <sup>4</sup> Puetunu mashiiorijianaa cuaara niishiiria maninia na cojuanura necocuarano, maja ritia na numuetucunura, nata na camiyaquishacarijia. Cuaara na cuaqueya panishano rejetenu niishiiria. <sup>5</sup> Majaari sacuaraatia nia miiniu taa Pueyaso niishiyashijiaca pueya miiquiaacuaani, jiyanohua nojori jiaatiasacari maajicua. <sup>6</sup> Naajuhuj, majaari quenaaja jiyasohuaja niarta pueyano niqiuocua nia numuetucunu, neyaca nia sapojonuta. Cuno maajicuajaari saa neyacaraja, maja tamonura socua. Pueyasocuajaari naa miijiaca saniitionutaniya jiyanohua, taa canaa numootequiaari tari nijaniyacujani. <sup>7</sup> Pueyasoori maja na saquiriojonu quiquiaari pajaniya sacuaraatia miijiaca pa quiniuria. Pa saquiriojoquiaariiri tojetaarucujanaa sesa miyashijiaca pa quiniuria, saa neraja. <sup>8</sup> Naacuajitij, cante nio rootasano ruuretajani, nojuajaari maja saaja na rerequetenu nio rootasanojiniji pohuatana. Nojuajaari Pueyasojuaanaa rerequeteya cutara, cante na Sohuanu niqutioquiaari nijaniyacujani.

<sup>9</sup> Quiarijiani cuarta Pueyaso pueyanaa, janiyara, najuhuanaruhua niaacuara cua naajonura cua niishitiniuria nijaniya, panitiojuaca nia quiniuria. Pueyasocuajaari tari nioojiajinia nia niishitiquiaari panitiojuaca nia quiniuria. <sup>10</sup> Niaacuajaari see-tanujuaanaa puetunu Macedonia jiyajinia niarta Pueyaso pueya panijiaca quiyacuaja. Naajaa, cuarta Pueyaso pueyanaa, canaa nia tojiri. ¡Socua panijiaca nia quiri! <sup>11</sup> Tama nia cuaqueyajaaja nia cumaquiriquia juhuajaniya quijiaca nia quiniuria. Tama nia poonijosanojiniajaaja nia cojeriquia, tama nia juaashiquiatajaaja nia poonijosacari, taa canaa rootaquiaari nijaniyacujani. <sup>12</sup> Naacuajitij, Pueyaso niishiyashijiaca pueyari nia rerequeteyaquiniutianiya. Naajuhuj, niaari puetunu nia panishanojuanaa jiitianutaniya.

*Taa pa Jiyaniijia tiuquishacariuhua quiniutianiya*

<sup>13</sup> Cuarta Pueyaso pueyanaa, canaari juhuacarijia nia tonu paniyani taa Jesuucua tiuujica shaajecono pueya miishaanutaniyani. Canaari nia niishitiniu paniyani maja nia taraajenura juhua Jesuucua tiyashijiaca pueya. Nojoriiri maja na jiitanu nojori Jiyano, nojori na samiitianijionuhua. <sup>14</sup> Paacuajaari niishiyani Jesuuri cusoquiaari. Na nuhuaji samiitiaquiaariuhuari. Naajuhuj, paari niishiyani, Pueyasoori Jesuucua tiuujica shaajecono pueya samiitianijionutaniuhua, nojori na rijionura Jesuta, Jesu tiuquishacariuhua.

<sup>15</sup> Canaajanaacuajaari nia sequeyani, niocuajaari pa Jiyaniijia niishitishano canaa: pajaniya, canapueete pa Jiyaniijia tiuquishacariuhua saminiucua quiniutianiyajaani, majaari macunucua pa puetanu quiniutianiya pa Jiyaniijiaata pa naacuneetonura jiya cajiniocua. <sup>16</sup> Naa quiniutianiyari. Pa Jiyaniijia nacanuuri tojishaanutaniya, Pueyaso seya jiyaniijia nacanujuhuj, Pueyaso trompeta jonenenunio. Jiyacaritij, pa Jiyaniijiajanaari

jiyocuaaanuji rosenutaniya cohuaja najacajiniara. Jiyacarijiuhuj, puetunujuanaa Jesuucua tiuujiaca shaajecono pueyari samiitiaconutaniuhua coteenu. <sup>17</sup> Na nuhuaji pajaniya, canapueete saminiucua quiyajaani, paari nojoritia ritia rijiosaanutaniya cohuaja najacajiniarani. Paari tii coquetoanutaniya pa Jiyaniijiata paratujiniani. Jiyacaritij, paari tari pueyaracaanu nata quijiacarano quiniutianiyani. <sup>18</sup> Cua panishano pueyanaa, nio cua pohuatasanota nia cumanijiatooriquia.

## 5

<sup>1</sup> Majaruhua maninia cua naajionura niaacuara cua niishitiniuria nijaniya socua, taacari pa Jiyaniijia tiuquiniutianihuani. Niaacuajaari tari na niishiya, naajuhuj, taate mijiria quiniutianiyani na tiuquiyacuishacarijia. <sup>2</sup> Niaacuajaari maninia niishiya, pueya jyanishacari juhuanajuaja maja pa Jiyaniijia tiuquiniu quiniutianihuua, nojuajaari jiyacari tiuquiniutianiya. Nojuajaari canashiyaquiji tiuquiniutianiya, taa nohuasejojua tiuquiquiaa niucua tiajiniaacocuaani, juhuajaniya tia camaru maquesacari. <sup>3</sup> Naajuhuj, quera pa Jiyaniijia tiuquishacariuhua, mijiria quiniaa pueyari naa sequejaca quiniutianiya: “Paacuaja maninia quiyani. Shaaquicuaaja miaquetoojonu”. Canashiyaquiji jiyacari, Pueyaso saniitiosacari na tojiyashijiacaari quiniutianiya. Naa quiniutianiyari taa maaji nooquiaa juhuacatecara canashiyaquiji na manajacuaani. Majaari quenaaja niquiriyatu curosaanu quiniutianiya saniitiosoo. <sup>4</sup> Nijaniya saniniuuja cuarta Pueyaso pueyanaa, niaari maja juhua ninishiqui quijiacaa, pa Jiyaniijia cariyatunura nijaniya. <sup>5</sup> Puetunu nijaniyajanacuajaari cuhuashiqui quijiacaa. Pueyasojuanaacuajaari nioojiaca cuhuataquiaari. Majaari tari juhua ninishiqui quijiacaa pueya pa quiniu. <sup>6</sup> Cunora, pa Jiyaniijia sashijiaca pa quirij. Maja juhua tamasaaja, juhuajaniya quiqioyari. Nojoriiri juhua maquetiuya. Pajaniya saniniuuja cuarta Pueyaso pueyanaa, juhua sutejaca pa quirij, maninia niishiriojuacajuhuj. <sup>7</sup> Maquetujuacaari niucua maquetuquiaa. Naajuhuj, mashaasequenujuacaari niucua mashaasequenuquiaa. Naa miijiacari Pueyaso tojiyashijiaca. Majaari na maniniucuanu cuhuashiqui. <sup>8</sup> Pajaniya saniniuuja, paari cuhuashiqui quijiacaa cutarani. Naaratej, pueyaracaanu maninia niishiriojuaca pa quirij. Romano pueya miaquetoosacari, nojoriiri turtuco cushiyonuujua, nocuaji na nujutajara cashi. Cumueeca casaa cushiyonuujuaariuhuj, na naca na cojuatajara. Naajuhuj, naa poojia pa cojuare, saaja Jesuucua pa tiuuniutia, seetanujuanaa panijiacaa pa quishacarijiuhuj. Seetanujuanaa pa niishiri, Pueyasoori pa saquiriojuquiaari na muerasu pa quiniuria pueyaracaanura. Naacuajitij, pocua pa niishitiaja cojuareni, maja poojia pa niqijiotenura najuhuanaj. Naacuajitij, Sesaacaari maja na naata shocotanu quiniutianiya pajaniya. <sup>9</sup> Pueyasoori maja na saquiriojonu quiquiaari pajaniya na saniitiosocoriquiano. Pa saquiriojuquiaari cutaraari na jyanooniuria pajaniya, na muerasu pa quiniuria, Neyanu Jesucristoocua tiuujiaca pa quishacari. <sup>10</sup> Neyanucuaari pocuara cusoquiaari, nata rishijiaca pa quiniuria pueyaracaanu. Naacuajitij, naajaa, paa jaara cusoyareni, paa jaara saminio quiyajuhuj, pa Jiyaniijia tiuquishacariuhua, puetunu nocua tiuujiacajanaari pueyaracaanu saminio quiniutianiya nata. <sup>11</sup> Naaratej, pueyaracaanu nia cumaquitiooriquia Pueyaso rupaata. Nia shiniujiutiooriquiajuhuaj, seetanujuanaa pa Jiyaniijia tojiijiacaa nia quiniuria, taa nia miiquiaacuaja tarini.

*Socua Pablo rootasacari Pueyaso pueya*

<sup>12</sup> Cuarta Pueyaso pueyanaa, canaa nia tojiri. Cuniqii nia jiitianaa tojiijiacaa nia quiri. Majaari nojori rerequetenu. Nojoriiri jyanohua poonijioquiaa pa Jiyaniijia nojori niishitiojonura nijaniya, na nacasunura nijaniyajuhuj. <sup>13</sup> Cunora, jyanohua nojori nia paniri. Majaari na rerequetenu. Nojoriiri pa Jiyaniijia poonijioquiaa na cumaquiniuria nijaniya. Maninia nia quiri pueyanaa. Majaari juayonuujutanu.

<sup>14</sup> Nio nia tojirijiuhuj cuarta Pueyaso pueyanaa. Taajecori nia nacasure. Noojia niqijiotejaca nia shiniujiuri, seetanujuanaa cumueeca Pueyaso pueya nojori quiniuria. Noo pojori nia cumaquiriqiajuhuaj, Satanás saniniujiushacari na cuaqueya miiniu panishano rejeretaashijiacatej. Majaari cuno pojori cartenu. Nia juaniu nia rejeteriquia, maja quenaaja nia juaniuria tamasaata.



<sup>15</sup> Naajuhuj, tama nia cuaqueyajaaja nia cojuariquia maja nia naminiuria niarta pueyano, nojuaja jaara sesa miiriquia niajaniya. Saniniuujia, pueyaracaanu maninia nia miitiooriquia niarta Pueyaso pueyata. Naa nia miiriquia puetunu pueyajuhuj.

<sup>16</sup> Pueyaracaanu nia shuquiririquia, Pueyaso pueya nia quiniucua. <sup>17</sup> Naajuhuj, pueyaracaanu nia secojoriquia Pueyaso. <sup>18</sup> Naa jaara maninia miishaare, niaa jaara sesa miishaarejuhuj, naajaa, puetunu naa nia miishaanuucujanaa Pueyaso nia sequeriquia, “paacarasho”. Pueyasojuanaacuajaari naa paniya pa miiniuria, Jesucristo Sohuanu pa jitianuucua poojiajinia. <sup>19</sup> Majaari Pueyaso Sohuanu nia ruuretanu, nojuaja jaara nioojiajinia nia shiniujiya maninia nia miiniuria. <sup>20</sup> Naajuhuj, majaari nia soonu Pueyaso sequesano caminiujiunaa pohuatasano. <sup>21</sup> Coteenu nia saniniujiuri cutara, nia niishiniuria seetanutejanaa nojori pohuatasano. Teyano nojori pohuatasanojininiote maniniani, cuno tojjijaca nia quiri. <sup>22</sup> Puetunu sesa niishishano casaajanaa soojeaca nia quiri.

<sup>23</sup> Poojia cajitinia Pueyasojuanaa cuaara nia jeenucuaara juhuacarijia, tojetaarucujanaa sesa miyashijaca nia quiniuria pa Jiyaniijaacuaji. Nojuaja cuaara naa cojuara nia sohuanu, nioojia, nia cuaqueyano, tojetaarucujanaa soosoo nia quiniuria pa Jiyaniija Jesucristo cuaara tiuquiriohuajaatijia. <sup>24</sup> Cante nia saquiriojoquiaaricuaa na pueya nia quiniuriani, nojuajaari puetunu shusha cua sequesanojuanaa niajaniya miiniutianiya niaara. Nojuajaari maja na niishiniu na rupaa jatanu. Nojuaja cutaraari na sequesano miijia pueyaracaanu.

*Pablo sequesano na naajionee na tucuatascari*

<sup>25</sup> Cuarta Pueyaso pueyanaa, Pueyaso nia secojonuuriquia canaacuarajuhuj.

<sup>26</sup> Canaara nia saruhuatare cuniqui quiniaa parta Pueyaso pueyajuhua nojori nia nujuunuta, seetanujuanaa Pueyaso paniniutia.

<sup>27</sup> Pa Jiyaniija jiyaramiquishano cua quiniucua, cua tojitiare pueyanaa. Nio cua naajionee nia serojore puetunu Pueyaso pueyarajanaa.

<sup>28</sup> Pa Jiyaniija Jesucristo cuaara cumaquiiria nioojia. Cuaara naa quiiriatej.

## TANEE PABLO NAAJIONEE TESALÓNICA TIACAJINIA QUINIAA PUEYASO PUEYACUARA

### *Pablo saruhuatasacari Jesucristoocua tiuujia*

<sup>1</sup> Janiyari Pabloni. Silvano, Timoteonio, canaari nio naajiya niaacuarani, puetunu Tesalónica tiacajinia quiniaa parta Pueyaso pueyarajanaa. Nio naajioneeri niaara, canapuate pa Que Pueyaso rupuejacacuajani, pa Jiyaniijia Jesucristo rupuejacio. <sup>2</sup> Pa Que Pueyaso, pa Jiyaniijia Jesucristojuhuj, nojori cuaara nioojia cumaquiiria. Cuaara nia jiyateera juhuajaniya quijiacarajuhuj.

### *Pueyasoori na tojtianu paniyashijia saniitioriquiano Jesucristo tiuquishacariuhua*

<sup>3</sup> Cuarta Pueyaso pueyanaa, canaari jiyanojua nia timitiaani jiyanojua Pueyasooocua tiuujia nia quiniuucua socua, panitioojua nia quiniuucua socuajuhuj. Cunora, canaa secojosacari Pueyaso, canaari pueyaracaanu na sequequiaani, “paacarasho”. <sup>4</sup> Naa maninia nia quiniuucuatej, canaari shuquiriaatia poojotaquiaa nijaniyajiniji Pueyaso pueya maapue niqiuara tamaquiicua canaa rucanejosacarini. Canaari nojori poojotaquiaani taa nia rejeretaquiaa juhuajaniya naquiya nia miiniuni, taraatia nia miiniujuhuj, Pueyasooocua tiuujia nia quiniuucua. <sup>5</sup> Pueyaso saquiriojonuucua nijaniya pueyaracaanu shuquiriaatia quijia nia quiniuria na shuriucua, cunoori maja najuhuaa quiquiaari. Niaacuajaari seetanujuanaa na pueya. Cunoori maatia niishishiyacuaja juhuajaniya nia rejeretasacari naquiya nia miiniu, Pueyasooocua nia tiuuniuucua. Pueyaso niishiyashijia pueyari naa naquiya miiquiaa nijaniyatej, Jesucristoocua tiuujia nia quiniuucua.

<sup>6</sup> Naajaa, Pueyasocujaari tojetaarucujanaa sesa miyashijia. Nojuajaari niaacua naminiutianiya noo pojori, naquiya miitiajaca nijaniyatej. <sup>7</sup> Nijaniya saniniujia, naquiya mijiosaaquiarini, niaari canaata samaraatasaanutaniyajuhuj, Jesucristo tiuquishacariuhua pocua. Jiyacaritij, nojuajaari niquishaanutaniya mani rimianuqueyano tiuquitiohuano, jiyanojua cumaacaraca na seyata jiyocuaanu. <sup>8</sup> Tiuquiniutianihuari na saniitionura noo pojori, canapuate Pueyaso niishiniu paniyaquiquiaani, noo pojorijuhuj, pa Jiyaniijia Jesu rupaa ruuretajatej. <sup>9</sup> Puetunu cunoo pojorijianaari pueyaracaanu saniitiosocoriquiano jiyatesaanutaniya. Nojoriiri tucuaaanura quejoosaaanutaniya pa Jiyaniijia shuriucujia. Naacuajitij, majaari nojori niquiniu quiniutianiya na jiquioco, shacantuuca na cumaacanio, nojuaja jaara mijiria tiuquiritiohuua pa shuquiritianura nojuaja. <sup>10</sup> Jiyacaritij, puetunu na jeenucuasano pueyajanaari jiyanojua na timitianutaniya. Puetunu nocua tiuujia pueyajanaari jiyanojua jiuujiateconutaniya, pa Jiyaniijia na shootiatuacari. Niaari na niquiniutaniyajuhuj, nojuajiniji canaa pohuatasanoocua nia tiuuniuucua.

<sup>11</sup> Canaari cunora pueyaracaanu niaacuara secojoquiaa Pueyasoni, maninia na pueya nia quiniuria, maja nojuaja caririquiniuria na saquiriojonuucua nijaniya. Canaari niaacuara secojoquiaaaniuhuj, Pueyaso cuaara nia tucuataniiria na cumaacata puetunu maninia casaa nia miiniu panishanojuanaa. Cuaara nia tucuataniirijuhua puetunu nia miishanojuanaa, cunoo, Pueyasooocua nia tiuuniutia nia poonijosanoni. <sup>12</sup> Naacuajitij, pa Jiyaniijia Jesuuri socua timitiasaanutaniya naa nia miiniuucua maniatej. Naajuhuj, nojuajaari nia timitianutaniyajuhuj. Naa maninia quiniutianiyari pa Pueyaso pa Jiyaniijia Jesucristota na cumaquishacari nijaniya.

## 2

### *Maatia pohuatasano, taate mijiria quiniutianiyani, pa Jiyaniijia tiuquishacariuhua*

<sup>1</sup> Quiarijiani cuarta Pueyaso pueyanaa, socua nia pohuatarohuacuara pa Jiyaniijia tiuquiniujiniji, taa pa coquetonutaniya natajanuhuj. <sup>2</sup> Canaa sequesano nijaniya nia tojiri, pueyanaa. Majaari nia niyajetanu tariucuaanu canaa niishitiosano

niajaniya, nia jiyajeneyaquiniuucuaaji tamasaca sapojosacari niajaniya. Majaari nia shiriiquiniu tamasaca jaara sequere niajaniya: “Pueyaso Sohuanuuri cua niishitirii, pa Jiyaniijia tiuquishacariiri quiarijia”. Tamasa jaara naa nia pohuatate, majaari na sequesano tojiniu. Naajuhuj, tamasaca jaara naajionuure tamajaaja, niaara na jiyatesocoriquiano juhua canaa naajionee, majaari nojori tojiniu. Nojoricuajaari nia sapojiya. <sup>3</sup> Pueyanaa, majaari niaacua nojori nia shanacunu nojori sapojonura niajaniya. Nia niishiri, pa Jiyaniijia tiuquiyaquishacariuhuaaja, queraatia pueyari Pueyasoo cuaji pishiniutianiya. Jiyacarijuhuaj, Pueyaso rootasano Ruuretajajanaari supuenutaniya. Nojuacuajaari tariucua Pueyaso saniitiosocoriquiano na riuriotaca. <sup>4</sup> Nojuacuajaari Pueyaso paraca. Nojuajaari puetunu pueyajanaa tenujunutaniya maja nojori tojiniuria Pueyaso, pueya shipinijosano nojori pueyasohuara nojori tarinitianurajuhuj. Nojuaja cutaraari tama na cuaqueyajaaja jiyatenutaniya juhua Pueyasora. Pueyaso Secojoua tiajinia cajiniutianiyari, Jiyaniijajanaa cajitijinia. Jiyacari sequenutaniyari: “Janiyacuajaari Pueyasoni”.

<sup>5</sup> Pueyanaa, ¿majateeri nio nia niishiniucuaaja? Janiyacuajaari nojuajiniji nia pootajani niaata cua quishacari. <sup>6</sup> Niaa naasucuaari niishiyacuaja canteeri juhua na quiaajaani, maja juhuanouaja mijiria na miiniuria tama na panishanojuajaaja, Pueyaso paniyaquishacarijia. <sup>7</sup> Seetanujuanaa, Sesaaca cumaacaari tari mijiria poonijia jiyasohuaja. Naajaa, Pueyaso paracaari juhuanouaja maja na naata muetanu, pueya niishiniuria nojuaja, na tenujuna cuara niiquiji rishaarejaatijiaj. <sup>8</sup> Na tenujuna jaara rishaare niiquiji, jiyacarijij cuno sesaaca sequeeri muetanutaniya, jiyanohua sesa na miiniuria. Naajaa, pa Jiyaniijia tiuquishacariuhua na shacantuuca cumaacajinia, nojuajaari cuno sesaaca seque monutaniya saaja na rupaata na nooniutia, na shaajanura puetunujuanaa. <sup>9</sup> Cuno sesa miiijia sequeeri muetanutaniya Satanás cumaquishacari nojuaja. Naacuaajitij, nojuajaari jiyanohua cumaaca jiiitianutaniya jiyajeneta casaa na miiniuria, pueya jiuujiatenura nocuaji. Queraatia niishishoo casaa miiniutianiyajaariuhuj, pueya na sapojonura. <sup>10</sup> Nojuajaari puetunu tamaatia sesa miiniu niishishanojuanaa miiniutianiya na sapojonura noo pojori, canapuate saniitiosocoriquiano pueyacuajani. Nojoriiri sapojosaanutaniya, Pueyaso Rupaa ruuretajaca nojori quiniuucua. Nojoriiri maja na tojiniu paniniu quiquiaari seetanu rupaajanaa, Pueyaso jiyanooniuria nojori. <sup>11</sup> Naaratej, Pueyasoori nojori tarinitianutaniya nojori sapojosaanura, nojori tiuuniuria seetanujuanaa sapojonuunuucua. <sup>12</sup> Naacuaajitij, puetunu noo pojorijianaari saniitiosaanutaniya, canapuate seetanu rupaacuajanaa tiuuniu paniyaquijiani, sesa miiniu maniniucujaca nojori quiniuucua.

#### *Pueyaso muerasuranoori tariucuaaanujiniji saquiriojosano*

<sup>13</sup> Niajaniya saniniuujia, niaari pa Jiyaniijia panishano pueyacuaja. Jiya shipiniyaquishacarijia, niaacuajaari tariucua Pueyaso saquiriojosano pueya quiquiaari. Niaari Pueyaso pueyara quiquiaaricuaja, na Sohuanu jataniniuucua niajaniya quiarinio pueya nia quiniuria, seetanu rupaacuajanaa nia tiuuniuucua. Cunora, canaari pueyara caanu Pueyaso sequequiaa niaacuarani, “paacarasho”. <sup>14</sup> Canaa pohuatasacari Pueyaso rupaa nia niquiara, niaari Jesucristoocua tiuquiquiaari. Naacuaajitij, Pueyasoori nia jiyatequiaari na pueya nia quiniuria, shacantuuca quijiacara nia jatanishaanura, taa pa Jiyaniijia Jesucristo quiyacuani.

<sup>15</sup> Naaratej cuarta Pueyaso pueyanaa, majaari nioojia nia niquijiotenu Pueyasoo cuaji. Naajuhuj, nia numaama nia racatare canaa niishitiojosano niajaniya niaata canaa quishacari, canaa naajioneecajinia canaa rootasano niajanijajuhuj. <sup>16</sup> Jiyanoojia pa Jiyaniijia Jesucristo quiniuucua, pa Que Pueyasojuhuj, nojoriiri pa paniquiaa. Naajuhuj, poojia cajitiquiaa pueyaracaanuraari. Na rupaacua pa tiuutiquiaariiri, pa niishiniuria paari jiyanohua maninia miishaanutaniya pueyaracaanuni. <sup>17</sup> Naajuhuj, nojori cuara nioojia shiniujiiria, maninia nojori tojitiajaca nia quiniuria pueyaracaanu. Nojori cuara cumaquiiria niajaniya, tojetaarucujanaa maninia nia sequesano quiniuria, nia miishanonio.

## 3

*Pueyaso rupaa pohuatanaacuara pa secojore*

<sup>1</sup> Pueyanaa, socua nia sequerohuacuaraj. Canaacuara nia secojore, pa Jiyaniijia rupaa paaquetesaanura puetunu tiqiyocuajanaa. Nia secojorejuhuaj, cuno rupaa pueya tojishacari, nojori jatanishaanura, naatej, taa na jataniquiaari nijaniyacuaani. <sup>2</sup> Canaacuara nia secojorejuhuaj, Pueyaso cojuanura canaa na tojiyashijiaca pueyacuaji, maja nojori miiniuria sesa canaa. Niaacuajaari niishiya, puetunu pueyajanaari maja na tiuuniu Pueyasooqua. Cuno pojoricuajaari canaa paracaajiaca. <sup>3</sup> Naajaa, paacuajaari niishiyani pa Jiyaniijiacuajaari na sequesano miiquiaa. Nojuacuajaari nia cumaquiniutianiya, maja nioojia nia niqijiotenura nocuaji. Sesaacaacuaji nia cojuanutaniyajaari-uhuj. <sup>4</sup> Pa Jiyaniijiaacua canaa tiuushacari, majaari canaa taacanunu niaa naasucuaari canaa rootasano tojitiaquiniutianiya. Maja. Niaa naasucuaari na tojitiaacuaja. <sup>5</sup> Pa Jiyaniijia cuara niishitiiria nioojiajania, panijiaca nia quiniuria taa Pueyaso paniyacuaani. Naajuhuj, cuara nia niishitiiria naquiya miiniu rejeretajaca nia quiniuria, Jesucristo cumaquishacari nijaniya.

*Poonijiojuaca pa quiri*

<sup>6</sup> Cuarta Pueyaso pueyanaa, pa Jiyaniijia Jesucristo jiyaramiquishano pueya canaa quiniucua, canaa nia tojitiare. Majaari noo pojori nia rupuenu: taajecoritij, noo pojorijuhuj, canaa rootasano tojiyashijiacatej. <sup>7</sup> Niaacuajaari niishiya taa quijiaca canaa quiquiaari niaata canaa quishacarini. Naa quijiaca nia quirijuhuj. Majaari canaa taajeyaca canaa matanu quijiani. <sup>8</sup> Majaari najuhuana canaa miaquenu quijia nia miaquesano. Canaa cutaraari pueyaracaanu canaa samareenuta poonijionuujuaca juucani, niucuanio. Canaari naa poonijionuuquiaarini canaa panishano canaa jiitianura, maja quenaaja canaa taajetenura nijaniya, maja nia tacaatianura canaajuhuj. <sup>9</sup> Pueyaso jiyaramiquishano pueya canaa quiniucua, canaa naata quiquiaaricuajaari canaa panishano canaa mashiniquiniuria nijaniyajiniji. Naajaa, majaari naa canaa miiniu quiquiaari. Canaari tama canaa juaashiquiacatajaaja poonijioquiaarini, canaa niishitiojonura nijaniya, poonijionuujuaca nia quiniuria juhua canaajuhuj. <sup>10</sup> Canaa quishacari niaata jiyacarijuhuaj, canaari nio nia niishitiojoquiaarini: “Cante poonijionu paniyaquiyani, cuara miaqueshiyaquiriuhuj”. <sup>11</sup> Canaari pohuatasaarucuaajaani-uhuj, noojiaqueya nijaniyajinijionaaari juhuajaniya quiquiaa. Majanaari na poonijionuunu quiquiaa. Nojoriniaari noo pojori cushitiojoquiaa, poonijionuujuaca cutaratej. <sup>12</sup> Pa Jiyaniijia Jesucristo jiyaramiquishano pueya canaa quiniucua, canaari cuno taajecori sequeyani, nojori cuara poonijionuura, nojori panishano nojori jiitianura.

<sup>13</sup> Cuarta Pueyaso pueyanaa, teyano nijaniyajinijiniote maninia miijiacacuaani, majaari maninia miiniu nia tarinitianu. <sup>14</sup> Saniniuujia, cante nio naajioneejinia canaa sequesano tojiniu paniyaquiyani, nojuaja nia niishiri cantenajoni. Majaari na rupuenunoj, na caririquiniuria quenaaja. <sup>15</sup> Maja cutaraari nojuaja nia jiyatenu juhua nia paracara. Saaja nia nacasure cutara nojuaja, niarta Pueyaso pueyano na quiniucua.

*Pablo sequesano na naajio na tucuatasacari*

<sup>16</sup> Poojia cajitijia pa Jiyaniijiani, nojuajanaa cuara nioojia cajitiiria pueyaracaanu, naajaa, niaa jaara taa miishaariquia. Pa Jiyaniijia cuara pueyaracaanu jiitiaara puetunu nijaniyajanaa.

<sup>17</sup> Janiyari Pabloni. Cua saruhuatanura nijaniya, janiyari tama cua juaashiquiatajaaja nio naajiyani. Nia niqiri cua naajiosano, taamuecatenajoni. Janiyari naa puetunu cua naajioneecajanaa tucuataquiaani, cua sesa cua naajionuta. <sup>18</sup> Pa Jiyaniijia Jesucristo cuara cumaquiiria puetunu nijaniyajanaa. Cuaara naa quiiriatej.

## COTEENU PABLO NAAJIONEE TIMOTEOCUARA

### *Pablo saruhuatasacari Timoteo*

<sup>1</sup> Janiyari Pabloni, Jesucristo jiyaramiquishano. Pa Jiyanoojia Pueyaso, pa Jiyaniijia Jesucristonio, nojoriiri nera poonijionara cua jiyatequiaari. Paari Jesucristoocua tiuujiacani, nojuaja jataniniuria pajaniya juhua nojuaja pa quiniurajuhuj. <sup>2</sup> Timoteonaa, janiyari nio naajiya quiarani. Quiaari juhua quiyanura quiquiaari, Pueyaso pueyanora quia jatanuucua, quia niqiara cua pohuatasacari Pueyaso rupaa. Pa Que Pueyaso, pa Jiyaniijia Jesucristojuhuj, nojori cuaara cumaquiiria quiajaniya. Nojori cuaara quiocua taraajeerajuhuj. Nojori cuaara pueyaracaanu quioojia cajitiirajuhuj.

### *Pablo sequesacari sesa niishitiojonuujuaca cuaara sanaajasaaria*

<sup>3</sup> Janiya jaara Macedonia jiyajiniara quiaquiaarini, janiyacuaajaari quia sequequiaarini Éfeso tiacajiniaja quia jiyojenura. Janiyari naa quia sequequiaarini, quia tenujunura cuno pojori, najuhuana tamaatia niishitiojonuya pueyani. <sup>4</sup> Janiyari quia sequequiaarijihuhuj, nojori quia sequenura, maja nojori niishiriojonura najuhuana nojori supuetanaa pohuatanuusanojinia. Janiyari quia sequequiaarijihuhuj, maja nojori niishiriojonura nojori supuetanaa sesacajinia, cuno, najuhuana tucuayocuara naajionuutasanoni. Pueya niishiriojonuusacari pueyaracaanu cuno najuhuana casaajinia, nojoriiri cunoocua juayonuujuataquiaa saaja. Saniniuujia, nojori cuaara Pueyaso rupaacua niishiriojoora cutara. Nocua pa tiuushacari, paari cumaquishaanutaniyani Pueyasora pa poonijionura maninia.

<sup>5</sup> Naa cua sequesacari Éfeso tiacajiniaja quia jiyojenuratej, janiyari quia sequenu paniriquiaani, pueya quia niishitiojonura panitioojuaca nojori quiniuria. Nojori cuaara shitimia panitioojuaca quiiria, juhua jeequesano nojori jiuujia quishacari. Seetanujuaana Pueyasoocua nojori tiuushacari, nojori cuaara panitioora maja noojia macuhua-jenuta sesa nojori miishanojiniji. <sup>6</sup> Noojiaqueya cuno pojorijinijinioori tari tarinitiacanu tojiniu nio maninia niishitiojosano. Nojoriiri cushitiiquianu na pocojonuucua, na nacojonuucua najuhuana tama nojori niishishanojinijiaaja. <sup>7</sup> Nojoriiri Moisés Rootasanojiniji niishitiojonaara quiniu paniya juucua. Majaari quenaaja nojori niishiniu tama nojori sequesanojuaja, nojori shiniujiushacari pueya, pueya tojiniuria najuhuana capa nojori niishitiojosano.

<sup>8</sup> Paacuajaari niishiyani, Pueyaso rootasano Moisésni, cunoori maniniacuaja, paa jaara niishirini casaara naa Pueyaso rootaquiaari pa supuetanaani. <sup>9</sup> Paacuajaari niishiyani, Moisés Rootasanoori maja na pueretenu maninia miijiacara pueya cutara. Pueyasoori maja na rootasano na niishitiniu quiquiaari maninia miijiacara. Na niishitiquiaari cutaraari na tojitiaashijiacara, tama na panishanojuaja miijiacara, Pueyaso soojeacarajuhuj, sesa miijiacarani. Moisés Rootasanoori Pueyaso rerequetecacara, Pueyaso casaa rerequetecacarajuhuj, noo pojorirajuhuj, tama na que tacartaja monutej, na nucuanio, pueya puecojuacarajuhuj. <sup>10</sup> Moisés Rootasanoori na camishoo maajipohua numuetucunuujacacara, maajishuriuhuara, na numuetucunuujacarani. Moisés Rootasanoori pueya nohuasenuujacacara juhua casami na niquitiojosocoriquiano tamasaca seyara; sapojonuujacacarajuhuj; na sapojonuta na sequesano maatejacarani, nocua na tiuushaanura; puetunu noo pojorirajanaanio, maninia niishitiojosano tojiyashijiacatej. <sup>11</sup> Cuno maninia niishitiojosanoni, cunocuaajaari cua pohuatasano Jesucristo rupaajiniji, pueya jatanura Pueyaso pueyara. Pueyasoori jiyanohua maninia, cuno rupaa pohuatanara na jiyatenuucua janiya.

### *Pablo shuquiritiasacari Pueyaso, na rupaa pohuatanara na jiyatenuucua nojuaja*

<sup>12</sup> Pa Jiyaniijia Jesucristoori cucua tiuuquiaari nera cua poonijionura maninia. Cunora, na rupaa pohuatanara cua jiyatequiaariiri. Nojuajaari cua cumaquiquiaa. Cunora, janiyari na sequequiaani, “paacarasho”. <sup>13</sup> Tariucuacaanu, janiyari nocuara rimiaaqueja

quiquiaari sacuaraatiani. Janiyari naquiya na miiquiaarijuhuaaj, nocua tiuujiaa cua miitiasacari. Janiyari jiyanoohua na paracaajia quiquiaarijuhuaaj. Naajaa, Jesucristoori saaja cucua taraajequiaarini cua niishiyaquiniuucua casaa cua miiriquiaani, nocua tiuyashijia cua quishacarijia. <sup>14</sup> Naa cucua na taraajenuucuatej, nojuajaari seetanujuanaa cua jiyanooquiaari. Na jiyanooshacari janiya, nojuajaari cua jataniquiaari nocua tiuujia cua quiniuria, panijia cua quiniuriajuhuaaj.

<sup>15</sup> Timoteonaa, niiori seetanujuanaa. Puetunu pueyajanaa cuaara niishiiria nio. Cua tojiri. Jesucristoori mijiria niquiaari na Que Pueyaso na jiyanootiniuria sesa miijiaca. Janiyacuajaari tojetaarucuajanaa cuno sesa miijiaca pueyajinijinio na jiyanooshanoni.

<sup>16</sup> Janiyari naa jiyanooshaaquiaarini puetunu pueyajanaa niishiniuria taa jiyanoohua jiyanootiote Jesucristoni, pueyaracaanu na rejeretanuucua cua juaaniu. Naa Jesucristo jiyanooniucuaa janiya, sesa miijia cua quishacarijiatej, Jesucristoocua tiuujiacarano cuaara niishiiria, nojoriiri na naata jiyanooshaanujuhuaaj Jesucristoocua nojori tiuushacari. Naacuajitij, nojoricua pueyaracaanu quijiacara jiyatesaarejuhuaaj. <sup>17</sup> Naa jiyanootio pa Jiyaniijia quiniuucuatej, nojuaja pa timitiare pueyaracaanu. Nojuajaari Jiyaniijiajuhuanaj. Nojuajaari Pueyasocuaaja, shaajeyashijia, namijiata niqiyaquishoo. ¡Jiyanoohua maniniaari pa Jiyaniijia! ¡Naa seetanujuanaari!

<sup>18</sup> Timoteonaa, quiaacuajaari niishiya taa Pueyaso cumaquiquiaari quiajanuyacuajani, nera quia poonijionura. Cunoori quiquiaari Pueyaso pueya jiitianaa jaara caminiujiuquiaari Pueyaso sequenu panishano quiara, nera poonijiona quia quiniuria. Naacuajitij quiyanunaa, cua tojiri. Pueyaso cumaaca quia jiitiasacari, quioojia quia cumaquiri maninia quia poonijionura Pueyasora. Seetanujuanaa juhua quiaquejojua pueyano quia quiri, senota samareyashijia. <sup>19</sup> Naa quia quiri Pueyaso rupaa quia pohuatasacari, seetanujuanaa na rupaacua tiuujia quia quishacari, seetanujuanaa na rupaa tojjia quia quishacarijuhuaaj. Naa quijia quia quiriritij, quioojia mariqui quia macuhujareeri quiaa jaara sesa miiriquia. Noojiaqueya pueyari tari Pueyasooocua tiuuni tarinitiacanu nojori ruuretanuucua Pueyaso Sohuanu numootesacari nojori jiuujiajinia, sesa nojori miishacari. <sup>20</sup> Naa miitiquianuuri Himeneo, Alejandronio. Janiyari cunora Pueyaso secojorucuaani, Pueyaso cuaara nojori tarinitiaara Satanásra, Satanás miiniuria naquiya nojori. Naacuajitij, nojori cuaara niishiiria maja socua sacuaraatia nojori rimiaaquenura Pueyasooocua.

## 2

### *Secojonuunura niishitiosano*

<sup>1</sup> Cua tojiri Timoteonaa, niaa jaara Pueyaso secojonuuriquia, nia secojonuure puetunu pueyacuaraajanaa. Nia panishano casaacua nia secojoriquiajuhuaaj. Naajuhuaaj, Pueyaso nia sequeriquia “paacarasho”, pueyaracaanu maninia na miiniuucua. <sup>2</sup> Jiya jiyani-ijianucuaacua nia secojonuuriquiajuhuaaj, puetunu pueya camarucuaacuarajuhuaaj. Nojoriicua nia secojonuuriquia, juhujaniya pa quiniuria panaatia, juhujaniya pa tojiniuria Pueyaso, maninia pa quiniuria parta pueyatajuhuaaj. <sup>3</sup> Pa Jiyanoojia Pueyasoori naa paniquiaa pa secojonuratej. Naa pa secojosano maniniucuaquiaari. <sup>4</sup> Nojuajaari paniya puetunu pueyajanaa tiuuniuria Neyanuucua, na pueyara nojori jatanishaanura, puetunu seetanu rupaajanaa niishijiaa nojori quiniuriajuhuaaj. <sup>5</sup> Pa Que Pueyasoori niquiriyatujua. Majaari tamonu Pueyaso quiniu socua. Naajuhuaaj, niquiriyatujua pueyanoori quia Pueyaso Jiyanootijia pueya. Nojuajaari Jesucristocuaaja. <sup>6</sup> Puetunu pueyajanaa quishacari saniitiosocoriquiano, Jesucristoori tama na cuaqueyajaaja tarinitiaquiaari na mosaanura narta pueya niti. Naacuajitij, na Que Pueyasoori na naata jiyanooni pajaniya saniniujia. Quiarijiacuaajaari Pueyaso panishacari Neyanujiniji pohuataaanura pueya niqiuara, nojori jiyanooshaanura. <sup>7</sup> Nio rupaa cua pohuatanurajuhuaaj, Pueyasojuanaari cua jiyatequiaari Jesucristojiniji pohuatana cua quiniuria. Cua jiyaramiquiquiaari taucuaca cua niishitiniuria Jesuucua nojori tiuuniuria, seetanu rupaajanaa nojori niishiniuriajuhuaaj. Nio cua sequesanoori seetanujuanaa. Majaari cua sapojonu.

<sup>8</sup> Cunora, cua tojiri. Janiyari paniyani puetunu tiqiyocuajanaa pueya secojunuunura Pueyaso. Jiyocuacaanu nojori shiitiosacari nojori juaashiquia nojori secojonura, nojori jiuujia cuaara quiiria jeequesano sesa nojori miishanojiniji. Naajuhuj, cuaara quiyaquiiria najiqaishano, maja sesa niishiriojonutajuhuj. <sup>9</sup> Naajuhuj, janiyasi paniyani maajipohua cuaara cushiyaquiiria puera maniniuquiya toqueya, narta maajipohua na shocotanura. Cuaara cushiyaquiiria cararaatia niquishano toqueyajuhuj. Maniniacuaaari nojori maniniushiniuria. Sesa cutaraari nojori maniniushiniuria puera, pueya shootianura nojori. Nojori cuaara jiyaniyaquiiria nojori seetanjuanaa shanohua niquishano, nojori muezaca jeeacasano quishacari puera, nojori cushishacari orojiniji shipinishano casaano. ¿Maajitiiri seetanjuanaa shanohua niquishano maaji, na cushitanuucua queraatia cumaneecata masesano noturu shipinijosano sai tiujiau, queraatia cumaneecata masesano maniniuquiya toqueyano? Maja. <sup>10</sup> Nojori cuaara maniniucusaariquia cutara, maninia miijiaca maajipohua nojori quiniucua. Nojori cuaara quiiria juhua noo maajipohua, canapuetucuaja tama nojori cuaqueyajaaja jiyatecanu Pueyasora na quiniuria seetanjuanaani. <sup>11</sup> Pueyaso rupaa niishitiojosacari, maajipohua cuaara tojitiariquia sanaa, maja Pueyaso rupaa pohuatanaa na rejetenuta. <sup>12</sup> Maja cutaraari cua shanacunu maajipohua niishitiojonura Pueyaso rupaa pueya niqiara. Naajuhuj, majaari cua shanacunu maajipohua jiyatesaanura narta Pueyaso pueya jiiitiana na quiniuria. Nojori cuaara sanaa tojitiariquia cutara, narta Pueyaso pueya rerejosacari. <sup>13</sup> Quia niishiri Timoteonaa, casaara naa cua sequeyani. Pueyasocuaaari coteenu Adán shipiniquiaari. Na nuhuaji Adán niquiorano Eva shipiniquiaari. <sup>14</sup> Quia niishirijuhuj, Soconurano jaara sapojoquiaari Evatej, majaari na sapojonu quiquiaari neyaca Adán. Eva cutaraari sapojosaquiaari. Naacuajitij, na sapojosaanuucua, Evaari Pueyaso tojiyashijara quiquiaari. <sup>15</sup> Naaratej, maajipohua cuaara maninia canashitijooora necohua. Cuaara panijaca quiirajuhuj. Cuaara maninia miijiaca quiirajuhuj, maninia niishiriojojuaca nojori quishacari. Naa maajipohua miishacariitij, Pueyasoori nojori jiiitianutaniya maninia, Jesucristoocua tiuujia nojori quishacari.

### 3

#### *Pueyaso pueya jiiitianatucua taamueca pueyano quiiriquiani*

<sup>1</sup> Nio sequesanoori seetanjuanaa: cante Pueyaso pueya jiiitanara quiniu paniyani, nojuajaari maninia poonijosano miiniucua jiaatiaa. <sup>2</sup> Naaratej, cante Pueyaso pueya jiiitanani, nojuaja cuaara quiiria sesacasoo pueyano. Nojuaja cuaara quiiria saaja niqiriyatu maaji niyaca. Cuaara quiiria noojia niqijioteyashijia, maninia niishiriojuajuhuj, pueya rerequeteyaquishoonio. Cuaara quiiria maninia pueyano, rucojuaca pueya tiuquinitiaja na tiajina. Cuaara quiiria Pueyaso rupaa niishitiojuua maninia. <sup>3</sup> Naajuhuj, nojuaja cuaara quiyaquiiria mashaasequejoru. Cuaara quiyaquiiria ritia juaaja, pueya na piniuria. Cuaara quiiria pueya riuhaneyashijia, pueya juaashacari nojuaja. Cuaara quiiria shiniquiajuhuaj. Cuaara cumaneecaacua jiaatiaashijia quiirajuhuj. <sup>4</sup> Naajuhuj, nojuaja cuaara na tiajina quiniaa jiiitaja quiiria maninia. Cuaara necohua niishitiojuua quiiria maninajuhuj, tojitajaca nojori quiniuria, pueya rerequeteyashijiacano. <sup>5</sup> Naacuajitij, pueyano jaara maninia casaa necohua niishitiojiyashijia quiiriquia, ¿maatucua taa maninia jiiitariquia Pueyaso pueya maanuni? <sup>6</sup> Naajuhuj, Pueyaso pueya maanu jiiitariquiano cuaara quiiria seetanjuanaa Pueyaso tojijia pueyano cutara. Cuaara quiyaquiiria shusha Pueyasocua tiuunio pueyano, nojuaja mariqui jianiriiri nojuaja tojishano pueyano cutara. Nojuaja jaara jianiri nojuaja socua maninia pueyano narta Pueyaso pueyajiniji, nojuajaari cocuaatia miya taa Satanás miiquiaaricuaani. Pueyaso panishano seru Satanás quishacarijia, nojuacuajaari taanuusaquiaari Pueyaso shuriucuaaji, na jianishacari nojuaja na naata na Jiyaniijia Pueyaso shocotanu. <sup>7</sup> Naajuhuj, Pueyaso pueya maanu jiiitariquiano cuaara quiiria maninia miijia pueyano, Jesuucua tiuyashijia pueya mariqui na sesacareeri maninia

miyashijia na quishacari. Nojuaja jaara naa rerequetesano quiriritij, nojuajaari juhua Sesaaca norijosano quiniutianiya. Naacuajitij, pueya tojiyaquishano quiniutianiya.

*Narta Pueyaso pueya naacunaatucua taamueca pueya quiriquiani*

<sup>8</sup>Naajuhuj, parta Pueyaso pueya naacuna cuara quiiria tojishano pueya, rerequete-soo. Cuara quiiria na sequesano miijiaca. Cuara quiyaquiiria puera mashaca jereeca ratunuucua jiiitino. Cuara quiiria cumaneecaacua jiaatiaashijia, jiyasohuaja na nohuasejonura, na sapojonuta na masenuranio. <sup>9</sup>Naajuhuj, nojori cuara seetanujuanaa Pueyaso rupaa tojiijaca quiiria, teyanoocua tiuujiaca pa quiyacuajani. Naacuajitij, nojori jaara naa miijiaca quiriritij, ¿nojoritiucua casaacua cararosaariquiani? <sup>10</sup>Cunora, pueya cuara senota jiyateyaquishaaria Pueyaso pueya naacuna nojori quiniuria. Cuara coteenu maninia niishishiiria nojoriiri seetanujuanaa Pueyaso tojitiajaca. Nojori jaara maninia miijiaca pueya quiri, na nuhuaji cutara, nojori cuara jiyatesaaria narta Pueyaso pueya naacuna nojori quiniuria. <sup>11</sup>Naajuhuj, Pueyaso pueya naacuna niquiocohua cuara quiiria tojishano maajipohua, maja rimiaacatuji. Cuara quiiria niishiriojuaca, na sequesano miijiaca pueyaracaanunio. <sup>12</sup>Cante Pueyaso pueya naacunaani, nojori cuara jiiitaara saa niquiriyatu niquiocuaja. Cuara quiiria necohua niishitiojuua maninia casaa, na tojitiajaca necohua quiniuria. Naajuhuj, cuara quiiria maninia jiiitaja na tiajina quiniaa pueya. <sup>13</sup>Naacuajitij, Pueyaso pueya naacuna jaara maninia poonijioquia na naacusacari narta Pueyaso pueya, nojoriiri seetanujuanaa pueya tojishano pueya quiniutianiya. Naajuhuj, nojoriiri socua jiyanohua Jesucristoocua tiuujiacara jatanutianiya, na puereyaquiniutia nojori poonijionura pa Jiyaniijiaara.

*Jesucristojiniji Pueyaso niishitishano pueyani, paari nocua tiuujiacani*

<sup>14-15</sup>Timoteonaa, janiyari quiocua naquerejiyani. Naajaa, janiyari quiara naajia nioni. Naacuajitij, janiya jaara tarishirini, janiyari paniani juhuacarijia quia niishiniuria taa quijia quia quiniutianiya, Pueyaso pueya maanujinia quia quishacari. Pueyaso pueya maanucuaaari pueyaracaanu rishijia Pueyaso quiquio. Na saquirijosano pueya nojori quiniucua, nojoriiri na rupaa jiiitianaacua, nocuaji tacunaajaarihuaj. <sup>16</sup>Seetanujuanaa nocuaji jiuujiatesanoori Pueyaso niishitishano Jesucristojiniji pajaniya. Paari nio sequesanoocua tiuujiacani:

Pueyaso Nyanuuri pueyanora jataquiaari, na rupuenura pajaniya. Pueyaso Sohuanuuri pa niishitiquiaari, nojuajaari tojetaarucujanaa sesa miyashijia. Naajuhuj, Pueyaso seyacuajaari Jesu niquiquiaari na samiitiasacarihua. Nojuajiniijiri pohuatasaaquiaari Judiocuaca niquiara, taucuaca niquiarajuhuj. Pueyapueeri nocua tiuuquiaari. Na Queeri na tacaniquiaarihua Jiyaniijiajanaa na quiniuria.

4

*Pueyaso Rupaa carteriquiano pueyajiniji pohuatasano*

<sup>1</sup>Pueyaso Sohuanuuri maatia pa niishitiquiaa, nio pa quishacari nuhuaji noojiaqueya pueyari Pueyaso rupaa tarinitianutaniya tojiniu, tamaatia niishitijosano nojori tojiniucua. Nojoriiri seetanujuanaa sapojosaanutaniya naa nojori tojiniucua samaruhua niishishano. <sup>2</sup>Nojoriiri sapojonuujua pueya tojitiajacara quiniutianiya, noo pojori, sapuenu juhua maninia niquishano pueyatej. Cuno sapojonuujuaari tariucua sesa miiniucua jiiitiquiono. Majaari tari na niishitiuniu caririquiniu. <sup>3</sup>Cuno pojoriiri pueya niishitiojuua maja na caminiuria. Niishitiojonuuquiaaarihuaj maja pueya miaquenura noojiaqueya miaquesanojuhuaj, teyano Pueyaso shipiniquiaari Jesuucua tiuujiacaracuajani, cante seetanu rupaajanaa niishijiacacuajani. Cuno miaquesanocuaaari pa timitiasocoriquiano, Pueyaso pa sequenura, “paacarasho”. <sup>4</sup>Puetunu Pueyaso shipinishano casaajanaari maninia. Puetunu miaquesano casaajanaa cuara puereyaquishaaria miaquenu, paa jaara coteenu nocuara Pueyaso sequereni, “paacarasho”. <sup>5</sup>Pueyaso rupaacua tiuujiaca pa quishacari, naacuajitij, nocuara pa secojosacari, Pueyasoori na jiyatequiaa maninia na quiniuria pajaniyara.

*Jesucristora poonijiona pueyanotucua taamueca pueyano quiriquiani*



<sup>6</sup> Pueyaracaanu parta Pueyaso pueya quia niishitiojoriquia nio cua rootasano quiajaniya. Naajuhuj, pueyaracaanu tama quia cuaqueyajaaja quia cumaquiriquia Jesucristojini pa niishishano rupaata, tama Jesucristojaaja rootasanotanio, taa quia tojiquiaacuajanoj. Quiaa jaara naa miijia quiriritij, quiaari maninia poonijiona quiniutianiya Jesucristora.

<sup>7</sup> Majaari najuhuana tariucuacaanu supuetanaa pohuatanuusano tojjia quia quiniu, najuhuana tama pueya niishishanojuaajanio. Majaari cuno tojiniuucua quia cojenu najuhanaj. Jiyanhua quia jiaatiare cutara, saaja Pueyaso tojjia quia quiniuria. Naa miiniu quia saniniujiuri jiyanhua, seetanujuanaa Pueyaso panijia quia quiniuria. <sup>8</sup> Pueyari queraatia casaa miiniu niishiya, cumueeca pueya nojori quiniuria. Supuetanaari pueyaracaanu nanoojoquiaari na cuaqueya na jiyartuutenura, cumueeca na quiniuria. Cunoori maniniacuaja pa cuaqueyara, mijiria pa quishacari. Saniniuuja, socua jiyanhua maninia cutaraari Pueyaso panijia pa quiniuria seetanujuanaa. Cunoori jiyanhua maninia, mijiria pa quishacariria, Pueyaso shuriucua pa quishacaririjuhuj. <sup>9</sup> Nio cua sequesanoori seetanujuanaa. Puetunu pueyajanaa cuaara na tojiiria. <sup>10</sup> Cunora, pueya jaara pa miitariquia, naajaa, paari jiyanhua poonijioquiaa pueya pa tojitiniuria Pueyaso rupaani. Majaari naa miiniu pa tarinitianu. Paacuajaari niishiyani, paari pueyaracaanu rishijia Pueyasocua tiuyani. Nojuacuajaari puetunu pueyacuaji Tacunajanaa, canapue cutarate nocua tiuujiacacuajani.

<sup>11</sup> Nio cua sequesano quiajaniya quia niishitiojore pueya. Nojori quia nacasuriquia jiyanhua, na tojtianura quiajaniya. <sup>12</sup> Majaari pueya shanacunu quiocua, nojori rerequetenura quiajaniya, mashaja quia quiniuucua. Saniya maninia quijia quia quiri quia cutara, pueya jiaatianura quiocua, juhua quiajaniya nojori quiniu paniniurijuhuj. Naaratej, tama quia cuaqueyajaaja quia cojuare, taa quia pocuaani, taa quia quiyani. Naajuhuj, seetanujuanaa panijia quia quiri, Pueyaso rupaacua tiuujiajuhuj. Majaari rucujeejojua quia quiniu. Naa maninia miijia quia quiri, pueya jiaatianura quiocua. <sup>13</sup> Naacuajitij, cua tiuquiyaquishacariria quiocua, pueya niqiara maatia quia serojoriquia Pueyaso Rupaa. Parta Pueyaso pueya quia nacasuriquia jiyanhua, Pueyaso tojtiajaca nojori quiniuhua seetanujuanaa. Seetanujuanaa nojori quia niishitiojoriquia maninia. <sup>14</sup> Pueyasocujaari na cumaaca niqutioquiaari quiajaniya. Pueyaso Sohanucujaari naa pohuatequiaari Pueyaso pueya maanu jitianaa pueyatej, nojori jaara niojoquiaari na juaashiquia quiocua, quia jiyatesaanura Pueyasora poonijiona quia quiniuria. Cuno cumaaca quiaa na jitianu, quia poonijiotere pueyaracaanu. Majaari najuhuana na jitianu.

<sup>15</sup> Puetunu niya cua rootasanojuanaa quiajaniani, cuno tojjia quia quiri quia. Naa quia quiriritij, puetunu pueyajanaa niqiniuria taa seetanujuanaa socua maninia Pueyaso tojjia quia quiyareeni. <sup>16</sup> Naacuajitij, tama quioojiaaja quia cojuare. Naajuhuj, tama quia cuaqueyajaaja quia cojuare seetanu rupajanaa quia niishitiojonura pueya. Majaari quia tarinitianu miiniu cua sequesano quiajaniya. Naacuajitij, quiaa jaara naa maninia miijia quiri, quiaari tama quia cuaqueyajaaja jiyateya maninia Pueyaso pueyanora. Quia tojtiajaca pueyari Pueyaso pueyara quiniutianiyajuhuj.

## 5

### *Paatucua taa jitiariquia parta Pueyaso pueyani*

<sup>1</sup> Majaari quia saaqiapue quia nacasunu quia juaaniutia, Pueyaso rupaa nojori tojiyaquiniuucua. Nojori quia nacasure jacaria, juhua quia que. Mashiquiori quia nacasure jacariajuhuj, juhua quia tapueyocuaca. <sup>2</sup> Naajuhuj, motajoori quia nacasure juhua quia nucua. Niyacoori quia nacasure juhua quia rimiatuhujuhuj, maja nojoriicua quia jiaatianuta.

<sup>3</sup> Mashiquiopue jaara tojetaarucujanaa niqiohuaju quiri, jinianuhujunio, Pueyaso pueya cuaara nojori naacuura. <sup>4</sup> Saniniuuja, mashiquio jaara niqiohuaraca quiri quia, jinianuhuaraca soj, cuno pojori cuaara coteenu tama na nucujajaaja cojuatunu niishiiria, na jiiuhuj. Naacuajitij, necohua cuaara na queya cojuara, taa na queya cojuajiaari nojoricuaani, naatujoori nojori quishacari. Pueyasoori naa na queyacuara taraajajaca

timitiaja. <sup>5</sup> Noo mashiquio, cante seetanujuanaa jiyopueejuni, nojuajaari saaja Pueyasooocua tiuuquiaa. Majaari na tarinitianu secojonu juuca, niucuanio. <sup>6</sup> Noo mashiquio saniniuujia, tama na cuaqueyajaaja shuquiritijiatej, nojuajaari tariucua juhua macu Pueyasora, saminio na quishacarjia. <sup>7</sup> Parta Pueyaso pueya quia niishitiojore nio cua rootasanojuhuaj, sesacasoo nojori quiniuria. <sup>8</sup> Canapuate na queecua, na nucuaacua taraajeyaquijiani, tama na tiajinia quiijaca pueyacuajuhuj, naa miijiacatej, nojoriiri Pueyaso Rupaa tojiyashijiacara jiyaterohua tari tama nojori cuaqueyajaaja. Naacuajitij, nojoriiri socua tojetaarucuajanaa sesa, Pueyasooocua tiuyaquijia pueyajiniji.

<sup>9</sup> Mashiquio jaara Pueyaso pueya jiitianaa naacunara jiyatenu panishaare, cuno mashiquiopue cuaara quiiria tariucua sesenta marijia shocotejono. Cuaara quiiria noo mashiquio, cante saaja na camishano pueyanota quiquiaari maninia pueyaracaanuni. <sup>10</sup> Cuno mashiquio cuaara niishishano maaji quiiria, maninia miijia na quiniucua. Cuaara quiirijuhuj, cante maninia canashitijioquiaari necohuani. Cuaara rucoojuacaacua taraajeja quiirijuhuj, na tiajinia na maquiojojua. Cuaara maninia miijia quiirijuhuj, narta Pueyaso pueya niohuaca jeequejojua. Cuaara taraatia miishano pueyacuara taraajeja quiirijuhuj, nojori cumanijianajuhuj. Cuaara puetunu maninia na miiniujianaa tarinitiaaquijia quiirijuhuj.

<sup>11</sup> Saniniuujia, noo mashiquio, teyanote juhuanujuaja maja na shocotejonu sesenta marijiani, nojori cuaara jiyateyaquishaaria Pueyaso pueya jiitianaa naacunaara. Nojori na naata Cristo samiritianu, niyacaaniucua nojori jiaatiasacari. <sup>12</sup> Naacuajitij, nojori camishacariuhua, nojoriiri tari sesa miirii, nojori jatanuucua nojori sequesano saaja Jesucristora na poonijionura. <sup>13</sup> Naajuhuj, niyacoo naata mashiquio nojori quishacarjia, nojoriiri saaja rucuanenon maniniucuaaja, na tiuquijionura puetunu tiacojuanaa. Naa tama na poonijosanojuajaaja na jiitiaaquishacaritij, nojoriiri taajecatujuriria quijia. Majaari saaja taajecara na quiniu, juura tojiyajaa pueya sequesanoori, tariucua na caminiujiuniu tamasaraj. Naajuhuj, sacuaratia neteyocojiyari juhua paateca, na taajetenura pueya, na caminiujiushacari jiyasohuaja niishishano casaa. <sup>14</sup> Naaratej, janiyari cunora paniyani niyacoojori naata mashiquiopue cuaara camiyora neyacaara. Cuaara mueturajuhuj. Cuaara na tia camarucua quiquioora. Nojori jaara naa maninia miiritij, nojori miishanoori maja quenaaja na quiniu quiniutianiya pa paraa rimiaaquenura Pueyaso pueyacuara. <sup>15</sup> Noojiaqueya niyacoojori naata mashiquiopueeri Pueyaso tojiniu tarinitiacanu tari, Satanás tojiijaca nojori quiniuria saniniuujia.

<sup>16</sup> Pa Jiyaniijiaacua tiuujiaca maajipohuajinijinio jaara tama na pueyajinijiniojuajaaja jiitiare mashiquiopue, nojori cuaara na naacuura tamajaaja. Naacuajitij, majaari Pueyaso pueya cojetanu quiniutianiya nojori, jiyopueraca nojori quishacari. Naacuajitij, Pueyaso pueyari na naata naacunu cutara noo mashiquiopue, canapuate tojetaarucuajanaa jiyopueejuni.

<sup>17</sup> Pueyaso pueya jiitianaa, noo pojori canapuate maninia jiitianaa narta Pueyaso pueyani, nojori cuaara narta Pueyaso pueya tojishano quiiria. Naajuhuj, nojori cuaara nareja niqitiosaaria, na panishano nojori jiitianura. Pueyaso pueya maanu jiitianaajinijinio, canapuate Pueyaso rupaa pohuatanaacuajani, Pueyaso rupaa niishitiojonaanio, nojori cutara cuaara socua queraatia niqitiosaaria, maninia poonijosano nojori miiniucua. <sup>18</sup> Tariucuacaanu Pueyaso Rupaajinia naajiotasanoori naa niishitiojiyajuhuj, naa na sequesacari miriqui:

“Majaari quia juunu rupaa mishiquionu na miaqueyaquiniuria quia casaa, quia rapijotesacari quia natau, na jocuanura na sucuajiniji”.

Naa sequeyajaariuhuj:

“Poonijotesano pueyano cuaara niqitiosaaria na poonijionu sami”.

<sup>19</sup> Pueyano jaara saquiriojotariquia Pueyaso pueya maanu jiitianaacuara, majaari na tojiniu, jaara nocuara cojitiaaquiri saquiriojotanu. Querajaa pueya jaara nocuara cojitiare saquiriojotanu, cuno pojori sequesano cutaraari seetanujuanaa. <sup>20</sup> Naacuajitij, Pueyaso pueya maanu jiitianaajinijinio jaara sesa miiriquia, Pueyaso pueya maanu niqiuara quia nacasurenoj, puetunu narta Pueyaso pueyajanaa puerenura, maja sesa nojori miiniurijuhuj. <sup>21</sup> Timoteonaa, janiyari nio quia sequeya Pueyaso niqiuarani,

Jesucristo niquiarajuhuj, na saquirojosano seya niquiaranio. Nio cua rootasano quia tojiri. Majaari maninia, paa jaara ritia nacasure parta Pueyaso pueyani, seetanujuanaa maninia pa niishiyaquishacari na miishano. Naajuhuj, majaari pa naata jiuujiaani pa panishano pueyano, nojuaja jaara sesa miiri. Naacuajitij, majaari rimiajata miijonu sacuraatia. <sup>22</sup> Naajuhuj, majaari senota quia juaashiquia quia nianu quia niishishoo pueyanooocua, nojuaja quia jiyatenura Pueyaso pueya jiitianara. Maninia cutaraari coteenu quia niishiniuria taamueca pueyanotenojoni, maja sesa miihia pueyano quia jiyatenura Pueyaso pueya jiitianara. Quiaa jaara naa Pueyaso pueya jiitianara jiyatere quia niishiyaquishoo pueyanotej, Pueyasoori quiocua tiutianutaniya cuno pueyano miishano sesa. Cunora quia sequeyanijia, tama quia cuaqueyajaaja quia cojuare, tojetaarucujanaa sesa miyaquijia quia quiniuria.

<sup>23</sup> Timoteonaa, naa quia seeco nojonuucuatej, majaari saaja mohuaca ratunu. Sequeyarucua cusosu quia quiniuucua, secaja vino quia raturiquiajuhuaj quia jiniacuma na jeecanura.

<sup>24</sup> Noojiaqueya pueya, sesa nojori miishanoori maatia niishishanocuaaja, Pueyaso saniitionu juuca quiaquishacarijia. Tamasacara saniniuujia, sesa nojori miishanoori maja na niishishaanu quiniutianiya juhuanajuaja, Pueyaso cuaara nojori nujuatejore na tacojijiatijia, na nequesoreesocoriquiano. <sup>25</sup> Naajaariuhuj, maninia pa miishanoori maatia niishishano mijiria. Jiyasohuaja maninia pa miishanojuhuaj, cunoori na nuhuaji niishishaanutaniya maatiajuhuaj.

## 6

<sup>1</sup> Parta Pueyaso pueyajinijinio, canapuate poonijotesano pueyani, nojori cuaara na camarucua tojitiajaca quiiria. Nojori cuaara rerequeteyaquiiria na camarucua, na camarucua mariqui Pueyaso sesacareeri, pa niishitiojosanonio, na tojiyashijia na seru quiniuucua. <sup>2</sup> Poonijotesano pueyano camarnu jaara Pueyaso pueyano quiriquia, juhua na serujuhuj, na seru cuaara na tojijia quiiria. Cuaara na rerequeteja quiaquiiria, narta Pueyaso pueyano na camarnu quiniuucua. Nojuaja cuaara seetanujuanaa maninia poonijioora nera, na niishishacari na camarnucuaajaari narta panishano Pueyaso pueyano.

### *Cante seetanujuanaa shuquiriaatia quijiacani*

Timoteonaa, nio cua sequesano quia niishitiojore pueya. Nojori quia shiniujiuri na tojtianurajuhuj. <sup>3</sup> Tamonu jaara tamaatia niishitiojoriquia cua niishitiojosano-jiniji, nojuajaari tojetaarucujanaa moseeca. Pa Jiyaniijia Jesucristo rupaari jyanohua maninia. Na niishitiojosano pa tojishacari, cunoori pa naacuquiaa juhua Pueyaso pa quiniuria socua. <sup>4</sup> Cante cuno niishitiojosano ruuretaja tama na niishishanojuaaja na niishitiojonurani, nojuajaari tama na cuaqueyajaaja jiyaniya nojuaja niishijia cutara. Nojuajaari juaationu porocujuhuj, Pueyaso rootasanojiniji na taacanuusacari. Naa quijiaca pueya quishacaritij, nojoriiri juaajiacara jataquiaa, nojoritia juayonuujutajaca shocotanuucua nojori. Nojoriiri juhuacatecara ruutaquetoquiaa na juayonuutanura. Sesacatoquiaajaariuhuj. Naajuhuj, nojoriiri najuhuaana soquequiaa, narta Pueyaso pueya naasucua sesa miiquiaa. <sup>5</sup> Nojoriiri juayonuujutanu tarinitiaquijiaca. Nojoriiri maja na naata maninia niishiriojonu socua. Nojoriiri maja na niishiniu seetanu rupajaanaa Pueyasojiniji. Nojoriiri Pueyaso pueya jiitajacara quiniu paniya, nojori jyanishacari nojoriiri naacuaji jyanohua casamiriacara quiniutianiya. <sup>6</sup> Taaquiriirinij, Pueyasooocua tiuujia pa quishacari, paacuaquiniatej seetanujuanaa juhua queraatia casamiriaca quijiacani. Paacuaajaari shuquiriaatia quijiaca Pueyaso rupaacua tiuujia pa quishacarini, juhujaniya quijiaca pa quishacarijuhuaj pa jiitiasano casaaniyojuata. <sup>7</sup> Paacuaajaari juhuanucua roosaaquiaari mijiriani. Naajuhuj, paari juhuanucua tacateriquianohuani. <sup>8</sup> Naaratej, paa jaara pa miaquesocoriquiano jiitariquiani, paa jaara pa cushishocoriquiano jiitariquiajuhuaj, saa cunotaja shuquiriaatia pa quiri. <sup>9</sup> Saniniuujia, noo pojori, jyanohua casamiriaca quiniuucua jiaatijacatej, nojoriiri maja na niishiniu rejetenu, na panishano na miyaquiniuria. Naacuajitij, nojoriiri cocuaatia

miiquiaa. Nojoriiri juhua norijiosaaquiaa, najuhuana casamiicua nojori jiaatiasacari, sesa casaacuanio. Puetunu cuno sesa casaajanaari pueya sesoquiaa, nojori saniitiosaanura taraatia. <sup>10</sup> Cumaneecaacua jiaatianu jiyanoahuani, cuniquiji supuejaari puetunu sesa casaa pa miiniurijanaa. Naacuajitij, noojiaqueya parta Pueyaso pueyajiniinooori Pueyaso rupaa tojiniu tarinitiacanu tari. Nojoriiri tama nojori cuaqueyajaaja miitiquiaa naquiya, naa cumaneecaacua jiaatiajaca nojori quishacaritij. Naaratej Timoteonaa, majaari cumaneecaacua jiaatiaja quia quiniu.

*Pablo shiniujiushacari Timoteo, Pueyaso tojjia na quiniuria pueyaracaanu*

<sup>11</sup> Quiajaniya Timoteonaa, quiaacuajaari Pueyaso saquirojosano pueyano. Naaratej, puetunu sesa casaajanaa miyashijia quia quiri. Tojetaarucujanaa saaja maninia miijia quia quiri, juhua pa Jiyaniijaja. Pueyasocua tiuujia quia quiri socua. Socua panijia quia quirijihuaj. Puetunu casaajanaa rejeretaja quia quirijihuaj. Jacaria pocuaja quia quirijihuaj, maja pueya rerequeteja. <sup>12</sup> Pa paraca nujuataja quia quiri quia, jiyanohua quia tiuuniutia Pueyaso rupaacua. Pueyasocuaajaari quia saquirojoquiaari na pueyano quia quiniuria. Cunora, quiaari queraatia pueya niquiara pohuataquiaari Jesucristoocua quia tiuuniujiniji. Naa pueyaracaanu rishijiarano quia quishacaritij, cunora, majaari Pueyaso niquitiojonu panishano quiajaniya jaaretenu. <sup>13</sup> Quiaacuajaari niishiya taa Jesucristo seetanujanaa pohuataquiaari Poncio Pilato niquiaracuajani, nojuajaari seetanujanaa Pueyaso Niyanu. Naajaa, nojuajaari niishiquiaari nojuajaari cunora mosaanutaniya. Na Que Pueyasocuaajaari na samiitiani quiaariuhua. Pueyasocuaajaari saminiora jiyateja puetunu saminio casaajanaa. Naa quia niishishacaritij Timoteonaa, janiyari nio quia sequeya Pueyaso niquiarani, pa Jiyaniijia niquiarajuhuaj. Cua tojiri. <sup>14</sup> Puetunu cua rootasano quiajaniyajanaa quia tojiri. Majaari na jataniniu quenaaja, pa Jiyaniijia mariqui quia niishitiojosano tamacareeri. Taa cua rootaa quiajaniyacujani, na tojjia quia quiri pueyaracaanu, pa Jiyaniijia Jesucristo cuara tiuquiriohuajaatijia, Jiyaniijijanaa na quiniuria. <sup>15</sup> Na Que Pueyasoori na tiuquitiniutianiya na panishacari, taa na sequequiaaricujani. Pueyasocuaajaari jiyanohua pa timitiasano, saaja maninia na quiniucua. Nojuajanaari Jiyaniijia. Nojuajaari puetunu tamasaca jiyaniijianucujanaa Jiyaniijia. Nojuajaari camarucujiniji Camarnujanaa cutara. <sup>16</sup> Saaja nojuajaari pueyaracaanu quijiajuhanajaj. Majaari na supueni quiquiaari. Majaari na shaajenu quiniutianiyajuhuaj. Nojuajaari jiyanohua na shacantuuca cumaacajinia quijiajuhanajaj. Cunora, majaari quenaaja tamonu pueyano na naata nocua catecanonu. ¿Canteeri na niquiquiaari quenaajani? Shaaqui. Pueyanoori maja na naata na niquiniu. ¡Nojuaja cuara pueyaracaanu timitiasaria! ¡Nojuajaari namitia na cumaaca jiiitianajuhanajaj! Cuaara naa quiiira pueyaracaanutej.

<sup>17</sup> Timoteonaa, parta Pueyaso pueya quia tojitiri nio, noo pojori, queraatia casamiriacatej. Nojori cuara niishiiria maja pueya shocotejaca nojori quiniuria, casamiriaca nojori quiniucua. Nojori cuara niishiirajuhuaj, maja na casamiicua nojori tiuuniuria, nojori jyanishacari nojoriiri pueyaracaanu shuquiriaatia quijia quiniutianiya casamiriaca nojori quiniucua. Pa jiiitiasano casamiiri shaajeriquiano. Nojori cuara Pueyasocua tiuuri cutara. Nojuajaari capora cutara, na niquitionura puetunu pa panishano casaajanaa, shuquiriaatia pa quiniuria. <sup>18</sup> Cunora, nojori quia niishitiojore, pueyaracaanu maninia miijia nojori quiniuria. Naatej, taa queraatia casamiriacatucaa nojorini, maninia nojori miishano cuara naa queraatia quiiirajuhuaj. Nojori cuara ritia niquitiojojuaca quiiira nojori jiiitiasanojiniji, narta Pueyaso pueyano jiiitaaquishacari na panishano. <sup>19</sup> Naa capora nojori quishacaritij, nojoriiri juhua tari jiyocuaaanu racataa nojori casaa. Naacuajitij, nojoriiri seetanujanaa shuquiriaatia quijia quiniutianiya pueyaracaanu, mijiria, jiyocuaaanunio.

*Pablo rootasano Timoteo, naajionu na tucuatasaari*

<sup>20</sup> Timoteonaa, Pueyasocuaajaari quia jiyatequiaari na rupaajiniji pohuatana quia quiniuria. Maninia quia cojuare seetanu Pueyaso rupaajanaa. Majaari najuhuana tama pueya niishitiojosanojuaja tojjia quia quiniu. Noo niishishanojuhuaj, pueya sequesano:

“Seetanu niishijajanaa niishishano cutaratej”, majaari cuno tojiniu. Cuno niishishanoori seetanu niishishanojuanaa paraca, najuhuanaari. <sup>21</sup> Noojiaqueya parta Pueyaso pueyari Pueyaso rupaa tojiniu tarinitiacanu tari, cuno najuhuana niishishanoocua nojori tiuuniucua. Niojuanaa Timoteonaa.

Pa Jiyaniijia cuaara quia cumaquiiria.

## TANEE PABLO NAAJIONEE TIMOTEOCUARA

### *Pablo saruhatasacari Timoteo*

<sup>1</sup> Janiyari Pabloni, Jesucristo jiyaramiquishano, taa Pueyaso paniquiaaricuajani. Naacuajitij, janiyari Jesucristojiniji pohuatanara jiyatesaaquiaarini, pueya niishiniuria seetanujuanaa, nojoriiri pueyaracaanu rishijiacara jiyatesaanutaniya Jesucristoocua nojori tiuushacari. <sup>2</sup> Naaratej quiyanu Timoteonaa, janiyari nio naajiya quiarani. Janiyari quia panitiaani pa Que Pueyaso, pa Jiyaniijia Jesucristojuhuj, nojori cuaara cumaquiiria quiajaniya. Naajuhuj, nojori cuaara taraajeera quiocua, nojori cuaara pueyaracaanu quioojia cajitiirijuhuj shuquiriaatia quia quiniuria.

### *Jesucristojiniji quia pohuatariquia tamasaca*

<sup>3</sup> Pueyaso cua secojosacari pueyaracaanu, juuca, niucuanio, janiyari quiocuara sec-ojoquiaani. Cua niishiriojosacari quiajaniya, maninia Pueyaso tojjia quia quiniuucua, janiyari Pueyaso sequequiaani, “paacarasho”. Janiyari nera shitimia poonijioquiaa coojia najiquitishooni, taa pa supuetanaa tojtiaquiaari Pueyasocuaani. <sup>4</sup> Majaari cua niyjetanu quiquiaa quia nujuquenu cucua, janiya jaara quia shuriucujia quiaquiaarini. Janiyari cunora jiyanoohua jiaatiaa cua niquiniuria quiajaniyani, shuquiriaatia cua quini-uria quia shuriucua. <sup>5</sup> Janiyacuajaari niishiyani quiaari seetanujuanaa pa Jiyaniijiaacua tiuujiaacuja. Quia ji Loida, quia nucua Eunicenio, nojoriiri coteenujuanaa quiocuaji Pueyasocua tiuujiaa quiquiaari. Majaari cua taacanuunu quiaari seetanujuanaa Jesucristoocua tiuujia quiquiaajuhuj, taa nojori quiquiaaricuaani.

<sup>6</sup> Pueyasocujaari na cumaaca niqitioquiaari quiajaniya, cua secojosacari quiocuara, cua juaashiquia cua niasacari quiocua. Naacuajitij, quiaacuajaari Pueyaso Sohuanu cumaacaraca quioojiajinia. Naaratej, Pueyaso Sohuanu quia shanacure quiocua, na cumaaca na poonijiotenura socua quioojiajinia. <sup>7</sup> Pueyasoori maja na niqitioqui-uria quiajaniya, puereja pa quiniuria. Na Sohuanu niqitioquiaari pajaniya cutaraari, cumaacaraca pa quiniuria, panijiaa pa quiniurijuhuj, maninia niishiri-ojuucarano. <sup>8</sup> Naacuajitij, majaari quia caririquiniu pa Jiyaniijia Jesucristojiniji quia poojotanura. Naajuhuj, majaari cua naaqui quia caririquiniu, nujuatejojuajinia cua nujuatesaanuucua Jesucristojiniji cua pohuatanuucua. Pueyaso cumaquishacari quiajaniya, juhujaniya quia rejeretare, quiaa jaara naquiya miishaariquijuhuj, Jesu-cristojiniji quia pohuatasacari. <sup>9</sup> Pueyasocujaari pa jiyatequiaari na pueyara. Nojuajaari pa saquiriojoquiaari saa neraja pa quiniuria. Na jiyanooni pajaniyani, majaari na quiniu quiquiaari maninia miijiaa pa quiniuucua juucua. Maja. Nojuacuajaari naa pa jiyanooquiaari saaja naa na miiniu paniniuucua, jiyanoojia na quiniuucujuhuj. Jiya shipiniyaquishacarijia, Pueyasoori jiyacari niishiriojoquiaari taa na jiyanooniutianiya pajaniyani, Jesucristo cusosacari pa niti. <sup>10</sup> Quiari naataja pocuaji Tacuna Jesucristo nini-uucua, Pueyasoori pa niishitiquiaari taate na naata jiyanooni pajaniyani. Cunora, Jesu-cristoori pa niti cusoquiaari. Na samiitiasacarihua, nojuajaari cusonu shocotaquiaari. Naacuajitij, nocua pa tiuushacari, paari pueyaracaanu rishijia jiyatesaanutaniyani.

<sup>11</sup> Pueya niishiniuria nio rupaa, Pueyasoori cunora na jiyaramiquishano pueyanora cua jiyatequiaari, pueya cua niishitiojonura Jesucristojiniji. <sup>12</sup> Naacuajitij, janiyari niya naquiya miya nujuatejojuajiniani. Naajaa, majaari cua caririquiniu. Janiyacuajaari niishiyani canacua cua tiuquiaarini. Nojuacuajaari pocuaji Tacuna Jesucristo. Cunora, janiyari seetanujuanaa niishiyani, nojuajaari cumaacaraca na cojuanura janiya, nojuaja cuaara tiuquiriohuajaatijia. Naajuhuj, nojuacuajaari cumaacaraca na jataniniuria pajaniya, tojetaarucujanaa quiarinio pueya pa quiniuria na tiuquishacarihua pocua.

<sup>13</sup> Timoteonaa, maninia niishitiojosano tojjia quia quiriquia taa cua niishitiojoquiaari quiajaniyacujani. Naa quia miiriquia Pueyaso rupaacua tiuujia quia quishacari, pueya panijia quia quiniuucujuhuj, Jesucristo rupesano pa quiniuucua. <sup>14</sup> Pueyasocujaari

quia niishitiquiaari seetanu rupaaajanaa. Pueyaso Sohuanu quiniuucua poojiajinia na cumaquiniuria pajaniya, cuno niishitiojosano quia jiitiare maninia, maja tamaatiara na jatanishaanura.

<sup>15</sup> Quiaacuajaari tari niishiya, puetunu Asia jiyajinijinio parta Pueyaso pueyari cua tiujiatuquiaari tamajaaja. Majaari na naacutunu paniniu quiquianu janiya. Nojorijini-jiniori quiquianujuhua Figelo, Hermógenesnio. <sup>16-17</sup> Saniniuujia, Onesiforo cutaraari cucua tiuquitasucanu. Cunora, pa Jiyaniijia cuaara nocua taraajeera, puetunu na tiajinia quijiacaacuajuhuj. Nojuaja jaara Roma tiacajinia tiuquiquianu, nojuajaari ritia coteecanu na pajenura janiya, cuaara cua riuriatarejaatijia. Jaara cua riuriatacanu, nojuajaari coojia cajitiquianu. Nojuajaari pueyaracaanu cucua tiuquijiocanu niya nujuatejojuajinia, na naacunura janiya. Majaari cucuaji na caririquiniu quiquianu nujuatesano cua quishacari. <sup>18</sup> Quiaacuajaari niishiyajuhuj taa nojuaja naacuquiaari pajaniyacujani, Éfeso tiacajinia pa quishacari. Naa maninia na miiniuucua pajaniyacuaatej, pa Jiyaniijia tiuquishacariuhua pocua, nojuaja cuaara maninia miiria Onesiforo saniniuujia.

## 2

### *Jesucristora poonijiojua quia quiri quia puereyaquiniutia*

<sup>1</sup> Quiajaniya saniniuujia quiyanunaa, quiiojia quia cumaquiriquia Jesucristo niq-uitiosano cumaacata. <sup>2</sup> Nocua tiuushano pueya quiarta Pueyaso pueyajinijinio quia niishitiojore Pueyaso rupaa, nojori niishitiojonura tamasaca saniniuujia. Cuno maninia pueya quia niishitiojore puetunu Pueyaso rupaaajanaa, taa quia tojiquiaari queraatia pueya niquiara cua pohuatasacaricujani.

<sup>3</sup> Juhujaniya naquiya miiniu rejeretaja quia quiri quia juhua pa Jiyaniijia Jesucristo soldado, puereyashijia. <sup>4</sup> Pueyano jaara soldadora saquiriojosaare, cuno pueyanoori maja na naata tama na panishanojuaja miiniu socua. Nojuajaari pueyaracaanu na camarnu tojjia, na camarnu timitianura nojuaja. Naa pa Jiyaniijia tojjia quia quiri quiajuhuj Timoteonaa. <sup>5</sup> Naajuhuj, pueya tacuarishijosacari, nojori cuaara quiiria tacuarishijionu camarnu tojjia. Tamonu jaara shocotare na tojiyaquiniutia camarnu, cuno na shocotanuuri najuhanaj. Naacuajitij, majaari na niqutiosaanu casaa, sesa na miiniuutia na shocotasacari. <sup>6</sup> Nio quia niishirijuhuj: cante cuhuariquia cuhuatajani, nojuaja cuaara coteenu na senoosanojiniji racataara na panishano. Na nuhuaji cutara, nojuaja na naata tamasaca niqutiojonu na senoosanojiniji. <sup>7</sup> Nio miriqui cua sequesanoocua quia niishiriojore. Pa Jiyaniijiacuajaari quia niishitiniutianiya puetunujuanaa.

<sup>8</sup> Majaari nio niyjetanu: Jesucristoori macujiniji samiitianishaaquiaariuhua, Pueyaso Niyanu na quiniuucua. Pueyano quiquiaarijaariuhuj. Nojuacuajaari pa supuetanaa jiyaniijia David niqiuohuacuajinio supueno pueyano quiquiaari. Naacuajitij, nojuajaari Pueyaso Jiyarosano quiquiaari mijiria quinia pueya niti na mosaanura. Cunocujiaari cua pohuatasano Pueyaso Rupaa. <sup>9</sup> Naa cua poojotanuuacuatej, janiyari naquiya miyani. Janiyari cumayocuata moronucua quiyajaaniuhuj, juhua sesa miijia. Naajaa, Pueyaso rupaa cutaraari maja na naata sanaajasaanu. <sup>10</sup> Cunora, janiyari puetunu naquiya miinujianaa rejeretaquiaani, Pueyaso saquiriojosano pueya tojiniuria Jesucristojiniji. Naacuajitij, nojoriiri na naata nocua tiuuniu, Pueyaso pueyara nojori jiyatesaanurajuhuj, taa na jatanishano pueya pa quiyacuani. Naacuajitij, paari mariyata shacantuuca quijiacara jatanishaanutaniyani, Jesucristota pa quiniuria pueyaracaanu.

<sup>11</sup> Nio sequesanoori seetanujuanaa:

Jesucristoocua pa tiuushacari, Pueyasoori Neyanu mosaanu jiyateya pa niti na quiniuria sesa pa miishanojiniji. Naacuajitij, Jesucristo mosaanu jaara pocuara quiquiaari, na samiitianuhuari pajaniyara quiyajuhuj, pueyaracaanu rishiriquiano pa quiniuria. <sup>12</sup> Naajuhuj, paa jaara naquiya miitiasaariquia nocua pa tiuuniuucuanu, nojuajaari camarucuara pa jiyatenutaniya narta jiyaniijianucua pa quiniuria. Saniniuujia, pa jaara pa Jiyaniijia tamacariquia Pueyaso niishiyashijia pueya niquiarani, nojuajaari pa tamacanutaniyajuhuj. <sup>13</sup> Paa jaara na sequesano

tojiyashijiaca quiriquiani, naajaa, nojuajaari pueyaracaanu na sequesano miijia. Pueyasoori na sequesano jataniyashijia cutara.

*Taamueca quiijate Pueyaso shuquiritiasano nera poonijionani*

<sup>14</sup> Parta Pueyaso pueya quia niishitiojorohuarohua maja najuhuaana nojori juay-onuujutanura tamaatia niishitiojosanoocua. Jiyanoehua quia nacasure nojori Pueyaso niqiuara, maja naa nojori nacojonura najuhuaana supuetanaa niishitiojosanoocua. Naa tamaatia niishitiojosanoocua juayonuujutanuni, cunoori maja na cumaquiniu na tojiniaa. Socua nojori sesoya cutaraari. <sup>15</sup> Tama quia cuaqueyajaaja quia cojuare, saa maniniaja quia niishitiojonura Pueyasojiniji cuno seetanu rupaajanaa. Naacujitij, Pueyasoori quia timitianutaniya nera poonijiona maniniu quia quiniuucua. Majaari capa quia niishitiojonu, quiaa mariqui tamajaaja caririquiriiri. <sup>16</sup> Naaratej, majaari najuhuaana tama mijiria pueya niishishanojuaja quia tojinu. Pueya tojishacari cuno, nojoriiri socua jiyacatenutaniya Pueyaso tojiyashijiaca nojori quiniuria. <sup>17</sup> Cuno najuhuaana niishitiojosanoori jiyanoehua puereeta. Cunoori Pueyaso pueya tajinia paaqueja, na sesonura puetunu Pueyaso pueya maanujanaa. Naa nojori tajinia paaqueyari taa pueyano cusojuaja sapueja pueyano cuaqueya moquijiaquiaacuaani, na camaru na cusojuanura. Himeneo, Filetonio, nojoriiri naa miiquioya quiarijia. <sup>18</sup> Nojoriiri seetanu rupaajanaa jataniquianu tamaatiara. Nojoriiri pueya niishitiojiya, paanaari tari toje-taarucuaajanaa samiitianishanocuajani. Naacujitij, majanaari pa cuaqueya jatanishaanu quiniutianiya, shacantuuca cuaqueyaraca pa quiniuria taa pa Jiyaniijiacuaani. Naa nojori niishitiojosacari najuhuanatej, nojoriiri noojiaqueya Pueyaso pueya cushitiojiya, nojori tiuyaquiniuria pa Jiyaniijia sequesanoocua. <sup>19</sup> Naajaa, Pueyasojuaanaacuajaari pa niishitiquiaari na rupaari seetanujanaa. Majaari na naata jatanishaanu. Naa naajiotasano quiyacuajaari:

“Pa Jiyaniijiaari na saquiriojosano pueya niishiyacuaja”.

Naa naajiotasanoori quiyajuhuaaj:

“Canapuate pa Jiyaniijia Jesucristoocua tiuujiacani, nojori cuara sesa na miijionu tarinitiaara”.

<sup>20</sup> Sanajanaa, cua tojiri. Jiyanoehua queraatia casamiriaca pueyano tiajinia, cuno tiajiniaari maja saaja orojiniji shipinijosano coshiquia quiniu, miacojuaanio, platajiniji casaanio. Puetunu tamaatia casaajiniji shipinijosano casamijianaari quijia. Quijiajaariuhua mati, suruhuatu numajiniji quejasano. Quijiajaariuhua maraujiniji panishano patacocua, conaanio. Puetunu cuno casamijinijinojuanaani, noojiaqueyari racatasano saaja masu miaquetejarano quiya, na raatojotajaranonio. Quiyajaariuhua rucucuaacuaji casaa, rucucua cajitiaja. <sup>21</sup> Paari naajuhuaaj. Paa jaara tama pa cuaqueyajaaja cojuariquia tojetaarucuaajanaa sesa pa miiniuucujini, saaja pa Jiyaniijiaari pa quiniuriajuhuaj, naacujitij, pa naata juhua pa Jiyaniijia timitiasano tohuatashiniyojua quiniu. Naacujitij, pa Jiyaniijia na naata poonijiotenu pajaniya puetunu maninia casaajanaa pa miiniuria.

<sup>22</sup> Sanajanaa, quiaacuajaari niishiya, casaa miiniuucua jiaatijacate mashiquiorini. Puetunu cuno sesa niishiriojosanojuanaa quia tarinitiariquia. Saniniuujia, saaja maninia miijia quia quiriquia. Saaja Pueyaso rupaacua tiuujia quia quiriquia, pueya panijiajuhuaj. Jiyanoojia quia quiriquiajuhuaj. Naa quia quiriquia, taa puetunu Pueyaso jiyatesano sesa miyashijiaca pueyajanaa miiquiaacuaani, pa Jiyaniijiaacua nojori tiuuniuucua. <sup>23</sup> Pueya jaara nacojoriquia nojori niishiyaquishoo casaajiniji najuhuanaj, nojori quia ruuretare saaja, nojori jaara quia nequesoretare cuno casaajiniji. Quiaacuajaari niishiya, pueyari jiyano casaacua paracaatiojua. <sup>24</sup> Pueyasora pooniojua pueyano cuara quiyaquiriia pueya paracaajia. Saniya cuara quiiria cutara puetunu pueya panijiajanaa. Cuara quiiriajuhua maninia niishitiojua. Cuara juhuajaniya rejeretaja quiiria, tamasa jaara na taajetere. <sup>25</sup> Cuara Pueyaso rupaa tojiyashijiaca nacasuura jacaria, nojori na paniniutia, maja nojori na juaaniutia. Naa quia miishacari, Pueyaso naasucuaari nojori jiuujia tacatonutaniya seetanu rupaajanaa niishijiaca nojori quiniuria. <sup>26</sup> Naacujitij, nojoriiri maninia niishiriojua quiniutianiya, nojori jaareteenura Sesaacuaji, maja Sesaaca miitiniuria nojori taa na panijiaacujani.



## 3

*Taa quijiaca mijiria quiniaa quiniutianiya quera jiya puequesacarini*

<sup>1</sup> Quia niishirijuhua Timoteonaa, jiya puequenu panishacari, pueyari socua jiya-catenutaniya sesa miijiacara. <sup>2</sup> Pueyari saa tama nerajaaja niishiriojojuaca quiniutianiya. Majaari tamonura na niishiriojonu quiniutianiya. Pueyari queraatia cumaneeca jitianuucua jiaatijaca quiniutianiyajuhua. Naajuhua, pueyari najuhuana narta pueya niquiara pocuajaca quiniutianiya, na jyanishacari nojori cutara socua niishijiaca narta pueyajiniji, socua shanohua niquishano tamasacajinijinio. Pueyari Pueyaso sesacajaca quiniutianiya, narta pueya sesacajacajuhua. Pueyari na queya tojiyashijiaca quiniutianiya. Majaari quenaaja pueya timitianu quiniutianiya maninia na miijiacara. Pueyari maninia miyashijiaca quiniutianiya, Pueyasojiniji maninia casaa rerequetejaca nojori quiniuucua. <sup>3</sup> Naajuhua, majaari quenaaja na queya panijiaca pueya quiniu quiniutianiya, tapueyocuaca, tama necohuaajaanio. Pueyari tojetaarucujanaa jyanoyashijiaca quiniutianiya. Sacuaraatia rimiaacaturu quiniutianiyajaariuhua. Naajuhua, majaari quenaaja tama nojori cuaqueya panishanojaaaja rejetejaca pueya quiniu quiniutianiya. Pueyari naquiya narta pueya miijiacara quiniutianiya, nojoriicua na taraajeyaquiniutia. Pueyari puetunu maninia miijiacajanaa soojeaca quiniutianiyajuhua. <sup>4</sup> Pueyari tama na cojiniaajaaja tacartajaca quiniutianiya. Pueyari cocuaatia casaa miijiacara quiniutianiya, mosanucua nojori quiniuucua. Pueyari juhuajaniya quijiaca quiniutianiya, tama nojori cuaqueyajaaja shuquiritiajaca nojori quishacari. Shuquiriaatia pueya miishacari tama na panishanojaaaja pueyaracaanu, majaari jeya nojori quiniu quiniutianiya nojori shuquiritianura Pueyaso. <sup>5</sup> Pueyari sapuenu juhua Pueyaso pueya niquishaanutaniya. Naajaa, nojori miishanojiniji, maatia niishishaanutaniyari, nojoriiri Pueyaso cumaaca maseyaquiquiaari seetanujuanaa jatanishano pueya nojori quiniuria. Cunora cua tojiri Timoteonaa. Majaari jiyano pueya quia rupenutej.

<sup>6</sup> Tamasaca cuno pueyajinijinioni, nojoriiri tiaco tiuquitiajaca, noo maajipohua na sapojonura, najuhuana pueya pohuatasanoocua ritia tiuujiacatej. Cuno maajipohuari tama na cuaqueya miiniu panishanojaaaja rejetejashijiaca. Naa sesa miijiacara nojori quiniuucuatej, nojoriiri najuhuana tacaquiquiaa. Cunora, nojoriiri cuno sapojonujuaca tojtiaquiaa. <sup>7</sup> Cuno maajipohuari najuhuana pueyaracaanu tojtiaquiaa cuno sapojonujuaca niishitiojosano. Saniniuujia, majaari Jesucristojiniji seetanu rupaajanaa niishijiacara nojori quiniu quiquiaa, Pueyaso jyanooniuria nojori. <sup>8</sup> Cuno sapuenu juhua Pueyaso rupaa niishitiojonaari seetanu rupaajanaa ruuretaquiaa, taa nio shimiacuri, Janes, Jambres ruuretaquiaari supuetana Moiséscaani. Naacujitij, nojori niishitiajaari juhua ninishiqui, sesa nojori miishano timitiajaca nojori quiniuucua. Seetanu rupaajanaa nojori tojiyaquiniuucua, pueya cuaara tojiyaquiiira nojori saniniuujia. Nojoricuaaari Jesucristoocua tiuyashijiaca. <sup>9</sup> Naajaa, majaari queraatia pueya tiuuniu quiniutianiya nojoriicua. Ritia niishishaanutaniyacuaajaari, nojoriiri seetanujuanaa niishiyashijiaca, taa pa supuetanaa niishiquiaaricaani cuno shimiacuriiri sapojonujuaca.

*Pablo tucuatascari naajionu, socua rootaa Timoteori*

<sup>10</sup> Timoteonaa, quiaacuajaari pueyaracaanu cua cojiquiaari maninia quia niishiniuria puetunu cua niishitiojosanojuanaa. Quiaacuajaari niishiya taa miijia cua quiquiaarini, pa Jiyaniijia cua shuquiritiniuria. Quiaari niishiyajuhua taa seetanujuanaa pa Jiyaniijiaacua tiuujia cua quiquiaarini, jacaria pocuajajuhua, pueya panijiano. Quiaari niishiyajuhua, majaari coojia cua najiquitiniu quijiani, pueya miishacari naquiya janiya. <sup>11</sup> Quiaari niishiyajuhua taa cua miitiasaaquiaari Antioquia tiacajiniani, Iconio tiacajinijuhua, Listra tiacajiniano. Seetanujuanaa, janiyari naquiya miishaaquiaarini. Naajaa, pa Jiyaniijiaari cucua taraajequiaari maninia na rishitiniuria janiya. <sup>12</sup> Seetanujuanaa naquiya miishaanutaniyari puetunu noo pueyajanaa, tama na cuaqueyajaaja jiyatejaca

saaja Jesucristo tojijiaca nojori quiniuriatej. <sup>13</sup> Saniniuujia, sesa miijiaca pueya, sapojonuujacanio, nojoriiri socua sesa miiniuria jiyacatenutaniya. Nojori sapojonuusacari tamasaca, nojoriiri naa tama na cuaqueyajaaja sapojonutaniyajaacujua.

<sup>14</sup> Quiajaniya saniniuujia Timoteonaa, majaari quia cartenu puetunu maninia niishitiojosanojuanaa, taa quia niishitiojosaaquiaaricujani. Quiaacuajaari niishiya, cuno niishitiojosanoori seetanu rupaajanaa. Quiaari niishiyajaacuhuj canapuate quia niishitiojoquiaarini. <sup>15</sup> Quiaacuajaari quia naatujajiniiji tariucuacaanu Pueyaso Rupaa niishijia. Cunoori quia niishitiquiaari Jesucristoocua quia tiuuniuria, Pueyaso jiyanooshano pueyano quia quiniuria. <sup>16</sup> Puetunu Pueyaso Rupaajanaacuajaari Pueyaso naajiotanishano na pueya. Cunora, puetunu cuno rupaajanaari maninia pajaniyara. Cuno rupaari cumaacaraca na niishitiojonura pajaniya, na niishitiniuria pajaniyajuhaaj pa miishanoori sesa, na nacasunura pajaniya maninia miijiaca pa quiniuhuara. Pa rootaajaariuhuj tojetaarucujanaa maninia miijiaca pa quiniuria. <sup>17</sup> Naacuajitij, Pueyaso Rupaari Pueyasora poonijionaa pueya jeenucujaja tojetaarucujanaa, puetunu maninia casaa miijiacajanaa nojori quiniuria.

#### 4

<sup>1</sup> Quiaacuajaari niishiya, Jesucristo tiuquishacariuhua mijiria, Jiyaniijajanaa na quiniuria, nojuajaari puetunu na tojitiajacajanaa nequesoreenutaniya mijiria pa miishanojiniji, saminiucua, macunucuanio. Cunora, janiyari na niquiara, pa Que Pueyaso niquiara quia sequeya seetanujuanaani. Cua tojiri. <sup>2</sup> Majaari pueya niquiara Pueyaso rupaa pohuatanu quia tarinitianu. Pueyaracaanu quia pohuatariquia, naajaa, quia jyanishacari jiyacari naasucuaari maja maninia quia pohuatanura. Pueyaso rupaata quia niishitiri sesa miijiaca nojori miishanoori sesa Pueyasora. Pueyaso rupaa tojiyashijiaca quia nacasuriquia. Pueya quia shiniujiuriquia Pueyaso rupaacua nojori tiuuniuria seetanujuanaa. Puetunu cunojuanaa quia miiriquia jacaria quia pocuanuta, maja juaaniutia. <sup>3</sup> Naa quia poojotariquia pueya niquiara, nojori tojiniu panishacarijia Pueyaso rupaa. Na nuhuaji, pueyari seetanu rupaajiniiji niishitiojosano tojiniu paniyaquiniutianiya. Saaja na ruuretanutaniyajaariuhuj. Naa Pueyaso rupaa nojori tojiniu paniyaquishacaritij, nojoriiri queraatia tamaatia niishitiojonujuaca rerejotenutaniya, cuno pojori shuquiritiniuria nojori najuhuana pohuatasana. <sup>4</sup> Nojoriiri seetanu Pueyaso rupaajanaa tarinitianutaniya, najuhuana sapojonuusano tojitiajaca nojori quiniuria saniniuujia. <sup>5</sup> Quiajaniya saniniuujia, maninia niishiriojojua quia quiriquia, maja quia sapojosaanurajuhaaj. Naquiya miiniu rejeretaja quia quiriquia. Pueyaso rupaa Jesucristojiniiji pohuatanuucua cojeja quia quiriquia, pueya tiuuniuria Jesucristoocua. Puetunu quia poonijosanojuanaa Pueyasora quia tucuatate maninia, taa pa Jiyaniijia sequequiaari quiajaniyacuajani.

<sup>6</sup> Janiya saniniuujia, janiyari quera quianutaniya jiyocuacaanu cua quiniuria pa Jiyaniijiatani. Cua nanaca jaara shootesaare, janiyara, cunoori juhua Pueyasora cua niquitiosano quiniutianiya. <sup>7</sup> Majaari cua taajenu quijia, pueyaracaanu cua poonijosacari cua Jiyaniijia. Janiyari tari tucuatatanu miiniu puetunu na sequesanojuanaani. Pueyaracaanu cua poojotasacari Pueyaso rupaa, majaari cua jataniniu quiquiaari quenaaja. <sup>8</sup> Naacuajitij, shanohua tuhuajaari quiriano jiyocuacaanu racatasano quiya tari, maninia miiija cua quiniucua. Cua Jiyaniijiaari cuno tuhuaja cua niquitiojutaniya na samiitianishacariuhua janiya. Pa Jiyaniijiaari jyanohua maninia. Na jiyanooshano pueya pa quiniucua, majaari socua na saneenu quiniutianiya sesa pa miishano. Majaari saaja janiya na niquitiojutaniya cuno tuhuaja. Puetunu noo pojorijanaa niquitiojutaniyajaariuhuj, canapuate nojuaja na paniniutia sashiyajaani, cuara tiuquihuara shacantuuca na cumaacatajatijia.

#### *Pablo sequesano Timoteo miishocoriquiano*

<sup>9</sup> Majaari puera tarishiniu. Quia secoore, cucua quia tiuquiniuria ritia. <sup>10</sup> Demasri cua tiujiaarucuaani. Tesalónica tiacajinia quiaarucuaari. Nojuacuajaari tama na panishanojuaja miiniu panijia jatarohuacuaa. Crecenteeri saniniuujia Galacia jiyajinia quiaarucuaa. Titoori Dalmacia jiyajinia quiaarucuaajaacuhuj. <sup>11</sup> Saaja Lucasri niya

cuata quia. Quiaa jaara cumaji niyare, quiocua Marco rupoyare quiocua. Nojuajaari na naata cua naacunu niya, pa Jiyaniijiaara cua poonijosacari. <sup>12</sup> Janiyari saniniuujia Tíquico jiyarorucuaa Éfeso tiacajiniani. <sup>13</sup> Taa cua sequeya quiajanayacuajani, quiaa jaara cumaji niyare, quiocua cua tucuaque toque paare quiria, Carpo tiajinia cua tiujiasano, Troas tiacajinia. Quiocua quiria patootaare cua nequesoreetuneecajuhuj. Janiyari socua noo paniya quia patootanurani, shoqueecua naajionuutasano Pueyaso Rupaatej.

<sup>14</sup> Noo Alejandro, cumueeca casaajiniji shipinijiojua casamitij, nojuajaari jiyanoohua cua paracaajiaara quiqianu. Naajaa, pa Jiyaniijiacuajaari saniniuujia cucua na naminiu-tianiyacujua, naa na miiniuucua janiyatej. <sup>15</sup> Tama quia cuaqueyajaaja quia cojuare maja na miiniuria sesa quiajanayajuhuj. Nojuajaari pa pohuatasano cuaracashitiya saaja, Pueyaso rupaa ruuretaja na quiniuucua.

<sup>16</sup> Janiya jaara shushajanaa nujuatesaacanu jiyaniijianucua tacobitij, nojori nequesoreenura janiya, majaari quenaaja tamonu Pueyaso pueyajinijinio quiniu quiriquiaa tii, cucuaji na tacunura quenaaja. Puetunu cua cojiniaajanaari cua cartecanu tamajaaja. Naa nojori tarinitianuucua tamajaaja janiyatej, Pueyaso cuara jiyanooria nojori. <sup>17</sup> Naajaa, pa Jiyaniijiaari cua cojiqianuni. Cua cumaquiquianujaariuhuj, nojuajiniji cua pohu-atanura puetunu cuniqui quiniaa Pueyaso niishiyashijica pueyajanaa. Pa Jiyaniijiaari cocuaatia cua miiniuujiniji juhua nojori juaashiquiajiniji cua jaaquianu, maja nojori monura janiya. <sup>18</sup> Janiyari nocua tiuyani, nojuajaari cua mashiquiniutianiya puetunu sesa casaacuajijianaa. Cua cojuanutaniyajaariuhuj, pueyaracaanu rishijia cua quiniuria na shuriucua jiyocuacaanu, Jiyaniijiajanaa na quishacari. ¡Jiyanoohua maniniaari pa Jiyaniijia! ¡Nojuaja cuara shuquiritiasaaria pueyaracaanu! Cuaara naa quiiriatej.

*Pablo sequesano na naajione na tucuatasaari*

<sup>19</sup> Quiria quia saruhatate Prisca, neyaca Aquilano, puetunu Onesíforo pueyajanaa-juhuj, na tiajinia quiniaani. <sup>20</sup> Erastoori Corinto tiacajinia jateecanu. Janiyari saniniuujia Trófimo tiujiacanu Mileto tiacajiniani, cusosu na quiniuucua. <sup>21</sup> Cucua quia niniuria quia secoore, shuniya coteyaquishacaribia quia tiuquiniuria cucua. Niya cuata quiniaa parta Pueyaso pueyari cua sequereeni, nojoriria cua saruhatanura quiajaniya. Nojoriiri Eubulo, Pudente, Lino, Claudiano, puetunu parta Pueyaso pueya maanujuanaano.

<sup>22</sup> Pa Jiyaniijia cuara quioojiajinia quijia quiiria pueyaracaanu. Pueyaso cuara cumaquiiria puetunu niajanijianaa.

## PABLO NAAJIONEE TITOOCUARA

### *Pablo naajiosacari TitooCuara*

<sup>1</sup> Janiyari Pabloni, Pueyaso seru. Jesucristoori cua jiyaroquiaari na Que Pueyaso saquiriojosano pueya cua tiuutiniuria Jesuucua, Pueyaso pueya nojori quiniuria. Cua jiyaroquiaarijiaariuhua Jesuucua tiuuniaa cua niishitiniuria seetanu rupaaanaa Pueyaso-jiniji, nojori jatanishaanura maninia quijiacara. <sup>2</sup> Nojori tojishacari cuno rupaa, nojoriiri niishiquiaa nojori cutaraari samiitianishaanutaniuhua Pueyaso muerasu nojori quiniucua, pueyaracaanu quijiacara nojori quiniuria Pueyasota. Cunocuaajaari tariucuaaanu Pueyaso sequesano, jyanohua tarijiatej, jiya shipinishaacarijiyojua. Nojuajaari maja na naata sapojonu. <sup>3</sup> Quiari naataja, Pueyasoori na rupaa niishitiniu paniquiaari pueya, taa na paniquiaari jiyasohuaja tariucuaaanucujani. Naaratej, pa Jiyanoojia Pueyasoori cua jiyatequiaari na rupaa pohuatanarani, pueya cua tiuutiniuria nocua. <sup>4</sup> Quiarijiani, quiocuara naajiyanjia Titonaa, juhua cua niyanuniyojua quia quishacari. Quiaari Pueyaso pueyanora quiquiaari quia tiuushacari Cristojiniji cua pohuatasanoocua, taa cua tiuquuaaricuaani. Naacuajitij, paari mariyata nocua tiuujiacani. Pa Que Pueyaso, pocuaji Tacuna Jesucristonio, nojori cuaara cumaquiiria quiajaniya. Nojori cuaara jiitiaara quioojia maninia, shuquiriaatia quia quiniuria pueyaracaanu.

### *Titara Pablo sequesano, Creta jiya tucuaatiajajinia na miishocoriquiano*

<sup>5</sup> Janiyari quia tiujiaquiaari Creta jiya tucuaatiajajiniani, quia tucuatanaa cua poonijosano cureeno. Naaratej, quia sequecanunjia quia jiyatenura jiyaniijanucua, Pueyaso muerasu maapue jiitianaa quiniuria puetunu cuno jiya tiacajiniajanaa, taa cua sequequiaari quiajanuyacuajani. <sup>6</sup> Pueyaso pueya jiitariquiano cuaara quiiria maninia pueyano, sesa miyashijia, maja pueya pocuanura sesa nojuajiniji. Cuaara jiitiaara niquiriyatujua niquiocua. Necohua cuaara quiiria Pueyaso muerasujuhua, maja sesa miijiacara, maja tojiyashijiacajuhua. <sup>7</sup> Cante Pueyaso muerasu jiitianani, nojuajaari Pueyasora poonijiojua. Naaratej, nojuaja cuaara quiiria maninia quijia, sesacasoo, maja tojiyashijia. Cuaara quiaquiiria ritia juaajia, mashaasequejojua, piyojotaja. Cuaara quiaquiiria cumaneeca panijia sesa na miishanota na masenura. <sup>8</sup> Naajuhua, Pueyaso pueya jiitiana cuaara quiiria rucoonaacua taraajeja. Cuaara quiiria maninia miijia, maninia niishiriojojua. Cuaara quiirijuhua seetanujanaa Pueyaso rootasano tojijia, maja rimiajata maninia miijia. Cuaara quiirijuhua Pueyaso panijia cutara, tama na cuaqueyajaaja jiitiaja maninia, maja sacuaaraatia casaa porocua. <sup>9</sup> Cuaara quiiria Pueyaso rupaa tojijia cutara, taa na niishitiojosaaquuaaricujani. Naacuajitij, nojuaja na naata pueya cumaquiniu, maninia na niishitiojosanota Pueyaso Rupaaajiniji. Naacuajijuhua, nojuaja na naata pueya tacatonuhua Pueyasooocua sesa nojori niishishanojiniji, noo nojori canapuate Pueyaso Rupaa ruuretajaca quiyacuajani.

<sup>10</sup> Naa quia sequereenijia, queraatia tojiyashijia pueya quiniucua, canapuate juhua niishiyashijia niishitiojoquiaa najuhuaana niishitiojosanocujani. Nojoriiri Pueyaso muerasu sapojiya. Queraatia cuno nojoriiri cuarta Judiocuaca. Nojoriiri pueya niishitiojiya pueya cararaatiuquia co miatesaanura, taa Moisés niishitiojoquiaari tarijiacuajani, seetanujanaa Pueyaso muerasu nojori quiniuria juucua. <sup>11</sup> Nojoriiri queraatia niquiohuaraca pueya jiyajeneteya sesa na niishitiojosanota, puetunu tapueyocucatajanaa nojori juayonuujutanura. Cuno niishitiojonaa cuaara sanaajasaaria. Nojoriiri niishitiojoquiaa saaja cumaneeca nojori masenura sesa na niishitiojonuunujiniji.

<sup>12</sup> Creta jiya tucuaatiaja pueyajinijinio tamonu shimiacuuri tama na pueyajinijiaaja naa sequequiaaritij: “Creta pueyari pueyaracaanu saaja sapojonuujua. Nojoriiri jyanohua juaajiacara juhua sayoru. Nojoriiri puera miaquenuujua. Nojoriiri taa-jecorijuhua”. <sup>13</sup> Seetanujanaari cuno shimiacu sequesano. Nocuaji, jyanohua quia nacasure nojori, nojori cuaara Pueyaso tojijiacara quiiria, maninia quijiacara nojori quiniuria. <sup>14</sup> Quia rootare nojori maja na tojitianura Judiocuaca nareja najuhuaana

pohuatasano, naajuhuj, maja nojori tojiniuria pueya rootasano, canapuate Pueyaso seetanu rupaajanaa tojiyashijiaca quiyacuajani.

<sup>15</sup> Pueyano jaara maninia jiuujiaraca quiri, puetunu casaajanaari maninia quiya nera. Saniniuujia, pueyano jaara sesa jiuujiaraca quiri Pueyaso rupaacua tiuyashijia na quiniuucua, majaari quenaaja niquiriyatu casaa maninia quiniu nera. Na niishitijaari juhua curuutuuca, noojiano. <sup>16</sup> Nojoriiri tama na cuaqueyajaaja sequeya: “Pueyaso niishiyaniija”. Naa nojori sequesacaritij, najuhuaana sequeyari. Nojori miishanojiniji, paari niishiyani nojori maja seetanujuanaa Pueyaso muerasu. Nojoriiri jiyanohua soosano pueya, puera sesa na quiniuucua. Nojoriiri jiyanohua sesa, tojiyashijiaca juhuaj. Majaari na naata quenaaja maninia miiniu.

## 2

### *Maninia niishitijosano cutara*

<sup>1</sup> Nocuaji, pueya quia niishitiojore maninia nojori quiniuria taa pa niishitiojosaaquiaaricuajani. <sup>2</sup> Naaratej, socua saaquiapue quia niishitiojore nojori cuaara quiyaquiiiria miaquejoru, mashaasequejorunio. Nojori cuaara quiiria tojishano pueya cutara, maja rerequetesano. Nojori cuaara quiiria maninia niishiriojojuaca. Cuaara quiiria maninia quijiacajuhuj, na tojishacari puetunu Pueyaso niishitijosanojuanaa, na panishacari pueyano. Nojori cuaara quiirijuhua maninia rejeretajaca taraatia na miishacari, juhuajaniya nojori sashishacari pa Jiyaniija. <sup>3</sup> Naajuhuj, socua motaja maajipohua quia niishitiojore nojori quiniuria maninia Pueyaso niqiiara pueyacaanu, maja rimiaacatujuri, maja mashaasequenuujuaca. Nojori cuaara pueyaracaanu miiria maninia tamasaca niqiiara, tamasaca miiniuria juhua nojori miishanojuhuaj. <sup>4</sup> Nojori cuaara niishitiojoora niyacaraca maajipohua, maninia na paniniuria neyaca, necohuanio. <sup>5</sup> Cuno jiyaniyacuaca cuaara niishitiojoora narta maajipohua, maninia niishiriojojuaca nojori quiniuria, saaja neyaca panijia nojori quiniuria, maja tamonu caya panijiacara. Nojori cuaara niishitiojosaarijuhuaj, maninia poonijiojuaca na tijania nojori quiniuria, caporatujuri nojori quiniuria, neyaca tojitiajacadano. Nojori cuaara naa miiria, Pueyaso Rupaa mariqui rerequetesaareeri.

<sup>6</sup> Naajuhuj, mashiquori quia niishitiojore maninia niishiriojojuaca nojori quiniuria. <sup>7</sup> Puetunu quia miishanojuanaa cuaara quiiria maninia nojori niqiiara, nojori jiaatianura quiocua, juhua quiajaniya nojori quiniurijuhuj. Quia niishitijosacari nojori, tama quia cuaqueyajaaja quia cojuare, tama quia niishitijosanojuaja tojijia quia quiniuria. Majaari puenujua quia quiniu quia niishitijosacari. <sup>8</sup> Maninia quia niishitiojore Pueyaso Rupaa, taa quia niishitijosaaquiaricuajani. Naacujitij, tamasaari maja na naata ruuretanu quiniutianiya quia niishitijosano pueya niqiiara. Naa maninia quia niishitijosacaritij, quia niishitijosano rerequetejacaari caririquiniutianiya. Naacujitij, nojoriiri maja tari na naata pocuanu quiniutianiya sesa pajaniyajiniji. Nojoriiri sanaajetanianiya.

<sup>9</sup> Poonitijosano pueya quia rootare, puetunu na camarucua sequesanojuanaa nojori tojiniuria, na camarucua shuquiritianura nojori. Cuaara quiiria na camarucua panijia, maja rihuanejaca. <sup>10</sup> Cuaara nohuaseyaquiiiria na camarucua casami. Cuaara quiiria seetanujuanaa maninia miijia, pueya niishiniuria pa Jiyanoojia Pueyaso rootasanoori jiyanohua maninia cutara. Poonitijosano pueya jaara maninia quiriqia, Pueyaso Rupaari juhua maniniushitishano quiya tamasaca niqiiara.

<sup>11</sup> Paacuajaari niishiyani Pueyasoori jiyanohua jiyanoojia seetanujuanaa, Jesu cusonuucua puetunu pueyacuaraajanaa, sesa pa miishanojiniji pa jiyanooshaanura. <sup>12</sup> Pueyaso jiyanooshacari pajaniya, cunoori pa niishitiojia pa cartenura puetunu sesa pa miishanojuanaa, maja mijiria casaacua pa jiaatianura sacuaraatiajuhuaj. Naajuhuj, Pueyaso jiyanooniucua pajaniya, cunoori pa shiniujiya maninia niishiriojojuaca pa quiniuria mijiria pa quishacariija, maninia miijiacajuhuj, Pueyaso tojijiano pa paniniutia nojuaja. <sup>13</sup> Naa Pueyaso jiyanooshacari pajaniya na muerasu pa quiniuriatej, cunora paari na sequesanoocua tiuquiaajuhuj. Nojuacuajaari pa sequequiaari pa Pueyaso Cristoori

pocua muetanutaniuhua, shacantuuca na cumaacajinia. Naacujitij, paari shuquiriaatia sashiya pa Jiyaroni. <sup>14</sup> Nojuajaari tama na cuaqueyajaaja panitiaquiaari pocuara, sesa pa jiidishano casaacua na tarinitiniuria pajaniya. Pocuara cusoquiaariiri poojia seque jeequesano quiniuria puetunu sesa pa quiniujinijijianaa. Naa miiquiaariiri saaja tama na pueyarajaaja pa quiniuria, jiyanoehua maninia miiniucua jiaatiajaca pa quiniuriajuhuaj.

<sup>15</sup> Naa quia niishitiojore pueya Titonaa. Pueyaso pueya quia niishitiojore, quia shiniujiuri, quia nacasure. Naa quia cumaquiniuria nojoritij, quia cumaaca quia paaretare juhua cutara jiyaniijia, tojishano pueyano quia quiniuria. Saaja maninia quia miiriquia pueyaracaanu, tamonu mariqui quia rerequetereeri.

### 3

#### *Maninia rootasano Pueyaso pueyara*

<sup>1</sup> Quia pueya quia niishitiojorohua jiya jiyaniijia tojijiacaa nojori quiniuria, jiyaniijianucua na jiyatesano pueya nojori tojiniuriajuhuaj. Nojori cuaara cuno pojori naacutaara jaara sequesaaare maninia casaa nojori miiniuria. <sup>2</sup> Pueya quia niishitiojore nojori cuaara pueya sesacaashijiacaa quiiriajuhuaj. Nojori cuaara quiiria juhuajaniya quiijiacaa, maja juaajiacaa. Cuaara quiiria jiyanoojiacaa. Cuaara maninia niqiiiria puetunu pueyajanaa, juhua socua maninia pueya nojorijiniji, maja rimiajata na miiniuria tamasa.

<sup>3</sup> Tariija, paari mariyata mosanucua quiquiaarini, Pueyaso tojiyashijiacanio. Paari juhua tashucuaano quiquiaarini, sapojosano pa quishacari. Paari sesa miiniucua jiidiquiaarini. Majaari pa naata sesa pa miiniu tarinitianu quiquiaari. Paari pueyaracaanu shuquiriaatia quiniucua jiaatiajaca quiquiaarini sesa pa niishishanota. Paari sesa miijiacaa quiquiaarini. Paari tamasa jiidiasanoocua jiaatiajaca quiquiaarini, juhua nojori pa quiniuriajuhuaj. Paari pueya soosano quiijiacaa quiquiaarini. Paari niqitiojuuca quiyaquiquiaarini. <sup>4</sup> Naajaa, pa Jiyanoojia Pueyaso cutaraari maninia miiquiaari pajaniya. Naacujitij, paari niishitishaaquiaarini taa Pueyaso paniya puetunu pueyajanaani, na jiyaronuucua Neyanuniyojua pocuara na cusonura. <sup>5</sup> Na muerasura pa jiyatequiaariiri saaja pocua na taraajesacari, maninia miyashijia pa quishacariija. Sesa miyashijiacara na Sohuanuta pa jataniquiaariiri, na Sohuanu jeequesacari poojia, maninia jiuujiaraca pa quiniuria. Pueyaso Sohuanuuri pa jataniquiaa juhua quiarinio pueya pa quiniuria. <sup>6</sup> Pocuaji Tacuna Jesucristo miiniucua maninia, Pueyasoori jiyanoehua queraatia na Sohuanu niqitioquiaari pajaniya. Juhua pocua totasaareeri na Sohuanu. Maja shiitaniyojua quenaaja. <sup>7</sup> Naacujitij, pa jiyatereeri maninia quiijiacaa pa quiniuria na jiyanooshacari pajaniya. Naa pa jiyatequiaariiri na muerasu pa quiniuria, pa masenura puetunu na jiidiasanojuanaa puera, jiyocuacaanu na racatasano. Naaratej, paari juhuajaniya sashiquiaani, pa niishishacari paari pueyaracaanu quiijiacaa quiniutianiya natani.

<sup>8</sup> Nio cua sequesanoori seetanu rupaajanaa. Nio rupaata quia nacasure Pueyaso tojitiajaca puetunu quioojiatajanaa, nojori cuaara niishiriojora, maninia nojori miiniuria pueyaracaanu. Nio rootasanoori jiyanoehua maninia. Maninia cutaraari puetunu pueya cumaquitiajarajanaa. <sup>9</sup> Maja cutaraari quia rupuenu cuno pueya, noo pojori canapuate najuhuaana nacojoquiaani, naajuhuaaj, noo pojori canapuate pueyaracaanu na supuetanaa sesaca serojoquiaa najuhuanani, juhua pueya shocotajaca nojori quiniuria. Naajuhuaaj, maja quia rupuenu noo pojori canapuate juaatioquiaani, canapuate tariucuacaanu Moisés Rootasanoocua juayonuutaquiaacuajani. Puetunu cuno nojori niishishanojuanaari najuhuanaj. Majaari na naacunu nojori.

<sup>10</sup> Quia piriyojore cuno, cante Pueyaso muerasu maanu raquirijitiaani, capa na niishitiojosanota najuhuanaj. Nojuaja jaara quia tojiyaquiri coteenu quia sequesacari nojuaja, quiocua socua na camiriohua piriyojonu. Jaara tojiyaquiri quiajaniya jiyacaritij, nojuaja cuaara quiiriaqui juhua taanusano. <sup>11</sup> Naa na tojiyaquishacari quiajaniyatej, quiocua niishiri cuno pueyano tari seseree. Tama sesa na miishanojuaarijia juhua nocuara saquiriojataa.

#### *Pablo sequesano Titora*

<sup>12</sup> Janiya jaara Artemas jiyarore quiocuani, jiyano hua quia saniniujiuri cucua quia niniuria Nicópolis tiacajinia. Janiyari quiniqui shuniya tajitiniu paniyani. Janiya jaara Artemas jiyaroyaquiri quiocuani, janiyari Tíquico jiyaronutaniya quiocuani. <sup>13</sup> Zenas, Apoloori quiocua tiuquiniutianiya. Nojori quia naacutare quia jiitiasanota, nojori jiitianura puetunu na panishanojuanaa nojori quianu panishacari quia quijiajiniji. Zenasri pueyacuaji tacuna pueya nequesoreenaa.

<sup>14</sup> Parta Pueyaso muerasu cuaara niishiiria maninia mijiaca nojori quiniuriajuhuaj, maja najuhuana quijia na quiniuria. Maninia cutaraari nojori naacutanura na panishano jiitiaashijiaca.

*Naajionee puequesacari saruhuatasano*

<sup>15</sup> Puetunu cuata quiniaajanaari cua sequeya cua saruhuatanura quiajaniya. Canaara quia saruhatate parta Pueyaso muerasujuhuaj, canapute canaa panijiacacuajani. Pueyaso cuaara cumaquiiria puetunu nijaniyajanaa. Cuaara naa quiiriatej. Tariucuaja Titonaa.

## PABLO NAAJIONEE FILEMÓN CUARA

### *Pablo saruhatasacari Filemón*

<sup>1</sup> ¿Quiaate quiyajaa canaa panishano Filemónnaa? Janiyari Pablóni. Quiasano pueyanonijia, Jesucristojiniji cua pohuatanuucua. Janiyari parta Pueyaso pueyano Timoteota nio naajiya quiarani, jaarajaaja pa Jiyaniijiaara poonijiona quia quiniuucua. <sup>2</sup> Canaara quia saruhatatare pa rimiatucua Apia, Arquiponio, jaarajaaja pa Jiyaniijajiniji pohuatanani. Canaara quia saruhatatarejuhua parta Pueyaso pueya maanu, noo pojori, quia tiajinia rerejoquiaa Pueyaso secojonuunuratej. <sup>3</sup> Pa Que Pueyaso, pa Jiyaniijia Jesucristonio, nojori cuara cumaquíria nijaniya, jiyanoojiaca nojori quiniuucua. Nojori cuara cajitiiria nioojiajuhuj, juhuajaniya nia quiniuria.

### *Filemón paniniujiniji pohuatasano, Pueyasocua na tiuuniujinijinio*

<sup>4</sup> Pueyaso cua secojosacari, janiyari quia seera pueyaracaanu Pueyaso sequequiaani, “paacarasho”. <sup>5</sup> Janiyari naa sequequiaa Pueyasoni, quiajanijajiniji cua tojinuucua taa quia paniquiaa pa Jiyaniijia Jesuni, puetunu na pueyajanaanio. Quiaanaari seetanujuaanaa pa Jiyaniijiaacua tiuujia. Janiyari cunora quia timitiaani. <sup>6</sup> Janiyari quiocuara secojoquiaani, seetanujuaanaa quiarta Pueyaso pueya jiyanoojia quia quiniuria, nojoriicua quia taraajenura. Naacuajitij, nojori quia cumaquishacari, quiaari maatia niishiniutianiya puetunu quioojiajinia quia jiiitasanojuanaa Jesucristojiniji, Jesucristoocua tiuujia quia quiniuucua. <sup>7</sup> Parta Pueyaso pueya panijia quia quiniuucua, quiaanaari nojori cumanijiacanu, nojoriicua quia taraajesacari. Naa cua niishishacari quia miishanojinijitij, janiyari coojia cumanijiacanujuhuj. Cunora, shuquiriaatia quiyanijia.

### *Pablo sequesacari Filemón, nojuaja jiyanooniuhuara tama na seru Onésimojuaja*

<sup>8</sup> Jesucristo jiyaramiquishano pueyano cua quiniuucua, cua naata sequenu quiajanijia quia miiniuria cua sequesano. <sup>9</sup> Naajaa, majaari cua sequenu paniniu quiajanijia juhua quia jiyaniijia. Saniniuujia, panijia quia quiniuucua, janiyari quia sequenu paniani quia miiniuria nio cua sequesano quiarijia. Jesucristojiniji cua pohuatanuucua, janiyari quiarijia moronucua quiyani tariucua saaquiano. Naajaa, quia rupena Pablo cua quiniuucua, cua tojiri Filemónnaa. <sup>10</sup> Cucua quia taraajere quenaaja. Quia nenecojiyanijia cua niyanuniyojua Onésimoocuara. Nojuajaari seetanujuaanaa juhua quiyanura quiuucua Jesucristoocua na tiuuniuucua, na tojishacari cua pohuatasano Jesucristojiniji, moronucua cua quishacari.

<sup>11</sup> Tarijia, Onésimoori sesa seru quiquiaari quiara. Quiarijia saniniuujia, nojuajaari na naata maninia quiniu quiara, taa quiria na quiyacuaani. <sup>12</sup> Janiyari quiarijia quiocua jiyaroya quiyanuni. Quiocua na maserohua quia timiniutia, taa quia masequiaa janiyacuaani. <sup>13</sup> Moronucua cua quishacari Jesucristo rupaa cua pohuatanuucua, janiyari niyaja na jiyojetenu paniriquiaa juucuani, na naacunura janiya quia niti. <sup>14</sup> Naajaa, majaari naa cua miiniu paniniu quiriquiaa jiyasohuaja, coteenu cua nequesotaaquishacari quiajanijia. Janiya jaara quia sequereni janiya niya na jiiitianutianiya na naacunura janiyani, quiaa maara cua ruuretaaquiri. Naajaa, janiyari seetanujuaanaa saaja quia panishano miiniu paniani. Cunora, janiyari na jiyaroya quiocuani. <sup>15</sup> Onésimo jiyoteeri quiocuaji rupatecanu rupaquiriaja, quiarijia quiara na quiniuhuara pueyaracaanu cutara. <sup>16</sup> Quiarijiani, nojuaja naasucuaari socua quia panishano pueyano quiniutianiya serujiniji, seetanujuaanaa quia tarajanu na quiniuucua quiarijiani, Jesuucua tiuujia na quishacarijuhuj. Nojuajaari jiyanoohua cua panishano parta Pueyaso pueyano. Naajaa, quiaa cuara jiyanoohua na panijia quiiria socua janiyajiniji, maja juhua nareja quia panishano seru. Seetanujuaanaa nojuaja quia paniri cutara, quiarta Pueyaso pueyano na quiniuucua.

<sup>17</sup> Naacuajitij, janiya jaara seetanujuaanaa quiarta Pueyaso pueyano quiri quiarani, Onésimo tiuquishacari quiocua, nojuaja quia miiri maninia, taa quia miiquiaacuaa



janiyani. <sup>18</sup> Onésimo jaara sesa miiquiaari quiajaniya, jaara quia casaa nohuasequiaar-  
 ijuhuaj, nojuaja quia jiyanoori. Saniniuujia cucua quia tiuutiare puetunu sesa na  
 miishanojuanaa quiajaniya. <sup>19</sup> Janiyacua saniniuujia cua cumaneecajiniji quia niqui-  
 tioreni puetunu sesa na miishanojinijijianaa quiajaniya. Janiyari Pabloni. Janiyari  
 tama cua juaashiquiatajaaja nio naajiyani, cua sequesanoocua quia tiuuniuria. Janiyari  
 quia niishitiniu panijahuaj, Jesucristojiniji cua pohuatasanoocua quia tiuushacari,  
 quiaacuajaari pueyaracaanu quiijara jatanishaaquiaari. Naacuajitij, cua naata sequenu  
 quiajaniya, cua serura quia quiniurijahuaj. Naajaa, janiyani saaja quia sequeyani  
 Onésimoocua quia taraajenura. <sup>20</sup> Naa quiria quia miiri quenaaja, mariyata Jesuucua  
 tiuujica pa quiniucua, cua panishano Filemónnaa. Quiaa jaara Onésimo jiyanoori,  
 Cristo panijia quia quiniucua, quiaari seetanujuanaa coojia cumanijianutaniya.

<sup>21</sup> Janiyari naa quiocura naajiyani, cua niishishacari quiaacuajaari cua sequesano  
 miiniutianiya. Janiyari niishiyajanihuaj, quiaari socua maninia na miiniutianiya cua  
 sequesanojiniji. <sup>22</sup> Naajuhaj, janiyani juhuacarijia quia sequeyani, cua maquejara quia  
 jeenucuare cucuaji quia tiajinia. Naa pueyaracaanu cucuara nia secojosacari Pueyaso  
 niiquiji cua cartesaanuratej, nojuajaruhua niaacua cua tiuquitiniutianiya, niaata cua  
 quiniuria.

*Pablo sequesano na naajio na tucuatasaari*

<sup>23</sup> Epafasri cua sequerecua saruhuatanura niajaniya. Nojuajaari cuarta moronu-  
 cuajuhaj, Jesucristojiniji canaa pohuatanuucua. <sup>24</sup> Jaarajaaja cuata Jesucristojiniji  
 pohuataanaa pueyari nia saruhuataajuhaj. Nojoriiri Marco, Aristarco, Demas, Lucasnio.

<sup>25</sup> Pa Jiyaniijia Jesucristo cuaara cumaquiiria niajaniya.

## HEBREO PUEYACUARA NAAJIONEE

### *Pueyasoori pajaniyara na rupaa pohuataniquiaari Neyanujiniji*

<sup>1</sup> Tariucuacaanu, Pueyasoori pueyaracaanu na sequenu panishano caminiujiuniaa pueya poojotaniquiaari pa supuetanaara. Nojuajaari nojuajiniji caminiujiuniaa miijotequiaari queraatia tamaatia casaa, nojori na niishitiniuria casaa nojuaja sequenu paniriquiaa nojorini. <sup>2</sup> Quiari naataja saniniuujia, Pueyasoori tama Neyanujuaaja pohuataniquiaari na sequenu panishano pajaniyara. Nio Neyanu shipinitiquiaari puetunu casaajanaacuaajaari; nio jiya, jiya cajiniocuajuhuaaj, puetunu pa niquiyaquishoo casaajanaanio. Naajuhuaaj, Pueyasoori Neyanu jiyatequiaari puetunu tama na shipinishanojuanaa jiitiana quiriquiano. <sup>3</sup> Neyanuuri tojetaarucuaajanaa maninia, juhua na Quejuhuaaj, juhua na Que niquishanojuhuaaj. Naacuajitij, nojuajaari jiyanojuaa shacantuuca cumaacaracajuhuaaj. Naacuajitij, nojuajaari puetunu na shipinijosano casaajanaa rucuanetequiaa maninia, saa na rupaa cumacataja. Nojuaja jaara cusoquiaari puetunu sesa pa miishanojuanaa na tuujunura, na nuhuaaji, jiyocuacaanu tacaquiaariuhuari, na Que Pueyaso miaquetajara na cajiniuria Jiyaniijajanaa quiquiojinia.

### *Pueyaso Niyanuuri Jiyaniijajanaa cutara Pueyaso seyajiniji*

<sup>4</sup> Naacuajitij, Pueyaso Niyanuuri Jiyaniijarajanaa quiquiaari Pueyaso seyajiniji. Nojuajaari na Que sesaanucua. <sup>5</sup> ¿Pueyasoteeri quenaaja tamonu na seyajinijinio sequequiaari: “Nioori cua Niyanu”? ¡Maja! Neyanu sequequiaari cutaraari:

“Quiaari quiyanu. Janiyari pueyanora quia muerateree jiyacuani, cua saquiriojosano pueya Jiyaniijia quia quiniuria”.

Neyanujiniji sequequiaarijiaariuhuaaj:

“Nera, janiyari na Queni. Quiria saniniuujia, nojuajaari quiyanu”.

Pueyasoori maja quenaaja niquiriyatu na seyajinijinio naa na sequenu quiquiaari.

<sup>6</sup> Tariucuacaanu Pueyaso Rupaajinia, naa naajiotasaaquiaariiri casaa Pueyaso sequenutaniyani, Neyanu na tiuquitishacariuhua mijiria, Jiyaniijajanaa na quiniuria:

“Puetunu cua seyajanaa cuaara Quiyanu tojtiaara, Jiyaniijajanaa na quiniucua”.

<sup>7</sup> Pueyaso seyajiniji saniniuujia, naa naajiotasano quiyari tariucuacaanu Pueyaso Rupaajinia:

“Pueyasoori na seya jataniquiaa juhua paratura, juhua manirianio, na panishano nojori miiniuria”.

<sup>8</sup> Neyanu sequeyaa saniniuurijia:

“Quiyanunaa, quiaacuajaari Pueyasojuhuanajaj. Quiaari Jiyaniijia. Quiaari naa quiniutianiya pueyaracaanutej. Quiaari cumaacaracajuhuaaj, maninia quia jiitianura puetunu pueyajanaa. <sup>9</sup> Quiaari maninia miiniu porocua. Quiaari sesa miiniu soojea saniniuujia. Cunora, Pueyasonaa, janiyari quia jiyatequiaari Jiyaniijajanaa quia quiniuriani, quia Jiyaniijia cua quiniucua. Janiyari quia jiyatequiaarijuhua socua shuquiriaatia quijia quia quiniuria puetunu quia cojiniaajinijianaa”.

<sup>10</sup> Pueyasoori naa sequequiaari Neyanujuhuaaj:

“Jiyaniijianaa, quiaacuajaari coteenujanaa casaa shipinijia. Quiaari jiya shipiniquiaari, puetunu jiya cajiniocua niquishano casaajanaanio. <sup>11</sup> Puetunu quia shipinishanojuanaari shaajeriquianohua. Quiajaniya saniniuujia, quiaari pueyaracaanu quiriquiano cutara. Puetunu quia shipinishano casaajanaari tariucushiriquiano juhua toqueja. <sup>12</sup> Naa na tariucushishacaritij, quiaari juhua toque mocua na juniocoriquiano, quia jatasocoriquiano. Quiaari naa miiniutianiyaquij taa pueyano jocuaquiaacuaa na toque mocuacuaani, quiariqui toque na cushiniuria saniniuujia. Quiajaniya saniniuujia, majaari quia jatanu quiniutianiya tamaatiara. Quia quiniuuri maja puequeriquiano”.

<sup>13</sup> Pueyasoori Neyanu sequequiaarijuhuaaj:

“Miji, cua miaquetajara quia cajishii, janiya jaara quia paraa shocojotare puetunujuanaajaatijia, maja quenaaja niquiriyatu cureenura na miananajonura quiajaniya”.

Majaari naa Pueyaso sequenu quiquiaari quenaaja niquiriyatu na seyajiniinio.  
<sup>14</sup> Puetunu nojorijianaacuajaari Pueyasora poonijionaa. Pueyasoori nojori jiyaramiquiquiaa Jesuucua tiuuriquiano pueya nojori cojuanura.

## 2

### *Maja cumaati Jesucristo tojiyashijiacara pa quiniu*

<sup>1</sup> Naaratej, Jesucristojiniji pa tojishano tojijiaca pa quiriquia socua, paa mariqui Pueya-soocuaiji rupatereeri. <sup>2</sup> Tariucuacaanu, Pueyaso seya caminiujiushano Pueyaso rootasano pueyarani, cuno rootasanoori seetanujuanaa pueya tojishocoriquiano cutara. Cuno rootasano ruuretajaca, na miyashijiacajuhuj, nojoriiri saniitiosaaquiaari. <sup>3</sup> Pueyaso seya caminiujiushano tojiyashijiaca jaara saniitiosaaquiaaricuaa, ¿paateeri jiyaniyani Pueyaso pa jiyanooniutianiya juhuajaniya Neyanu rupaa tojiyashijiaca pa quishacari? ¡Maja! Cuno rupaa nocua pa tiuushano pa jiyanooshaanurani, cunoori pa Jiyaniijajanaa pohuatasano. Pa Jiyaniijia nuhuaji, cuno pojori, canapute pa Jiyaniijajanaa tojiqiaari pueyaracaanuni, nojoriiri saniniuujia cuno rupaa caminiujiuquiaari pajaniyara. Canaa sequetuquiaariiri nojori tojishanoori seetanu rupajanaa. <sup>4</sup> Naajuhuj, nojori pohu-atasacari Jesucristojiniji, Pueyasoori nojori miitiquiaari jiyajeneta casaa jyanohua na cumaacata, maatia pueya niishiniuria nojori pohuatasanoori seetanujuanaa. Pueyari cunora jyanohua shiriiquitiquiaari queraatia Pueyaso cumaacata miishano nojori niquishacari. Naajuhuj, Pueyasoori Jesuucua tiuujia niquitioquiaa na Sohanu, tamaatia pa miiniuria na cumaacata, taa na paniyacuajani. Cunora, paa cumaati seetanujuanaa Pueyaso rupaa Jesucristojiniji tojitajaca quiyani.

### *Jesucristo mijiria rasaaquiaari pa puerana na quiniuria*

<sup>5</sup> Cuno quiarinio jiyaranojiniji teyano pa sequeriquiaacuajani, Pueyasoori maja na seya na jiyatenu quiquiaari cuno quiarinio jiya jiyaniijanucuarano nojori quiniuria. <sup>6</sup> Naajaa, tariucuacaanu Pueyaso Rupaajinia naa naajiotasaaquiaariiri pueyano nequesotasano Pueyaso:

“Pueyasonaa, ¿casaateeri pueyanoni, nocua quia niishiriojonurani? ¿Casaara quia taraajeya pueyacuani? <sup>7</sup> Quiaacuajaari na shipiniquiaari rupaquijiara socua cumaacaju na quiniuria quia seyajiniji. Naajaa, quiaari na jiyatequiaari jiyaniijia na quiniuria, cumaacaraca quijia na quiniurijuhuj. <sup>8</sup> Quiaari na sequequiaari puetunu quia shipinishano casaajanaa jiyaniijia na quiniuria”.

Naa Pueyaso sequesacari pueyanotej, puetunu na shipinishano casaajanaa jiyaniijia na quiniuriatej, naacuajitij, majaari quenaaja niquiriyatu casaa cureenu quiniutianiya na jiiitasoo. Saniniuujia, paacuajaari niishiyani, pueyanoori juhuanojuaja maja seetanujuanaa cumaacaraca na quiniu puetunu casaajanaa na tojitiniuria tama nojuajaaja. <sup>9</sup> ¿Jesuurijataj? Pueyano na quiniuria, na Que Pueyasoori rupaquijiara na miiquiaari socua cumaacaju na quiniuria na seyajiniji. Naacuajitij, pueyano na quishacari, Pueyaso taraajenuucua puetunu pueyacuajanaa, Neyanuuri mosaaquiaari pocuara. Naa na cusonuucua pocuaratej, Pueyasoori na jiyatequiaari Jiyaniijajanaa na quiniuria, jyanohua cumaacaraca na quiniurijuhuj.

<sup>10</sup> Jamueyashijia Pueyaso quiniuucua, nojuajaari puetunu na muerasuranojuanaa panitiaquiaari na cojiniaa nojori quiniuria. Paniquiaariiri jatiqui nata shuquiriaatia pa quiniuria, puetunu tama nerajaaja na shipinishano casaatajanaajuhuj. Jeenucuasano pa quiniuria pa cojiniuria Pueyaso, nojuajaari jyanohua maninia miiquiaari pocuara, Neyanu na miitishacari naquiya pa niti. Naacuajitij, Neyanuuri tojetaarucujanaa maninia quiquiaari Pueyaso muerasuranoocuaiji Tacuna na quiniuria. <sup>11</sup> Jesucristo jeequenuucua pajaniya sesa pa miishanojiniji, jatanishano pueya pa quiniuria, paari cunora seetanujuanaa Pueyaso muerasuni. Naacuajitij, Pueyasoori pa Que, taa pocuaiji Tacuna Que na quiyacuani. Cunora, Jesucristoori maja na caririquiniu na Que na sequenura pajaniyajiniji, “cua tapueyocucata”. <sup>12</sup> Tariucuacaanu Pueyaso Rupaajinia naa naajiotasano quiyacuajaari na sequesano na Que:

“Cua Quenaa, janiyari cua tapueyocuaca pohuatanutaniyani taamuecate quiajaniyani. Janiyari quia saquiriojosano pueya niquiara quia jaaquequejotanutaniyani cua shuquiritasacari quiajaniya”.

<sup>13</sup> Tamaqui, Jesu sequesanoori naa naajiotasano quiyajuhujaj:

“Janiyari cua Queecua tiuujia quiniutianiyani”.

Naacuajitij, mijiria na quishacari, Jesuuri na Que Pueyasooocua tiuquaaaricuaa taa pa tiuquuaa nocuanijia. Socua naa naajiotasano quiyari tamaqui taa Jesu sequenutaniyani, jiyocuacaanu na tiuquitasacari pajaniya na shuquiriniutia:

“Nio pojoriiri cua Que jiyatesano cua tapueyocuacara, nojori tojitianuucua janiya”.

<sup>14</sup> Cuaqueyaraca pa quiniuucua, Sesaacaari cumaacaraca quiquiaari na shaajanura pajaniya, Pueyaso tojitiaashijiaca pa quiniuucua. Naaratej, Jesuuri cuaqueyaraca na quiniuria jataquiaarijuhuaj, taa pajaniyacuaani. Naacuajitij, nojuajaari na naata mosaanu quiquiaari pa niti. Naacuajitij, nojuajaari Sesaaca jaariuutiaquiaari pajaniya.

<sup>15</sup> Naacuajitij, nojuajaari juhuajaniya quijiacara jiyatequiaari pajaniya, nocua pa tiuuniuucua. Paari niishiyacuajani, pa cusosacari, paari pa Jiyaniijjata quiniuria quianutaniyani. Cunora, majaari tari pa puerenu pa cusonura. Nocua tiuyashijiaca pueyari seetanujuanaa csonu puerejaca cutara.

<sup>16</sup> Seetanujuanaa, majaari Jesucristo niniu quiquiaari Pueyaso seya na naacunura. Niquiaari cutaraari pueyacuaji na tacunura, noo pojoricua, nocua tiuujiacate taa supuetana Abraham quiquiaari Pueyasooocua tiuujiacuaani.

<sup>17</sup> Maninia pa naacuna na quiniuria, Jesucristoori puetunu naquiya miiniujanaa rejere-taquiaari mariyata taa narta pueya miishaaquiaacuaani. Naacuajitij, nojuajaari pocua taraajeja, pocuaji na tacunura Pueyaso. Taraatia pa miiniu niishijia na quiniuucua, pa naata nocua tiuuniu pueyaracaanu na Que Pueyaso na jyanootiniuria pajaniya, sesa pa miishanojiniji. Na csonuucua, naacuajiti Pueyasoori na naata pa jyanooniu puetunu sesa pa miishanojinijianaa. <sup>18</sup> Mijiria na quishacari, nojuajaari pueyaracaanu taraatia miishaaquiaari. Nojuajaari jyanohua saniniuujushaaquiaari sesa na miiniuria juucujuhujaj. Naacuajitij, nojuacuajaari jyanohua niishijia na cumaquiniuria pajaniya, paa jaara sesa miiniuria saniniuujushaariquiani, paa jaara taraatia miishaariquijuhujaj.

### 3

#### *Jesucristo cutaraari Jiyaniijajanaa Moisésjiniji*

<sup>1</sup> Cuarta Pueyaso pueyanaa, niaacuajaari Pueyaso saquiriojosano tama na pueyajaaja nia quiniuria. Nojuajaari Neyanu Jesu jiyaroquiaari na rupaa na niishitiniuria pajaniya, Pueyaso pueyara pa jatanishaanura. Neyanuuri na jyanootijia pajaniya, nocua pa tiuushacari. Cunora, jalaria pa niishirojore socua Jesucristojiniji. <sup>2</sup> Mijiria na quishacari, Jesuuri na Jiyarona tojijia quiquiaari pueyaracaanu, taa Moisés quiquiaari Pueyaso tojijiacuaani, Israel pueya jiitiana na quishacari. <sup>3</sup> Naajaa, Jesucristo cutaraari Jiyaniijajanaa Moisésjiniji. Moisésri saaja narta Pueyaso pueyajinijinio pueyano quiquiaari. Saniniuujia, Jesucristoori puetunu Pueyaso pueyajanaa shipinina cutara. Naaratej, Jesucristo cuaara tojishaaria socua cutara. <sup>4</sup> Puetunu pueyapuejanaari supuetanaaraca. Naajaa, Pueyasooocuaari nojori shipinina seetanujuanaa. <sup>5</sup> Naacuajitij, Moisésri pueyaracaanu Pueyaso sequesano caminiuujiquiaari Pueyaso saquiriojosano narta Pueyaso pueyara, maninia Pueyaso seru na quiniuucua. <sup>6</sup> Saniniuujia, Jesucristoori Pueyaso Niyanujuanaa cutara. Nojuajaari Pueyaso saquiriojosano pueya Jiyaniijajanaa. Nojuajaari nojori jiitiaa saa maninijaa, taa na Que paniyacuajani. Naaratej, majaari pa cartenu Jesucristo rupaa. Paa jaara Jesucristooocua tiuquuaani, naajuhujaj, paa jaara shuquiriaatia na sashiquiaa na rijionura pajaniyani, naacuajitij, paari niishiyani paari seetanujuanaa Pueyaso muerasuni.

#### *Pueyasoori na pueya samaraataja*

<sup>7</sup> Pueyaso pueya pa quishacari, Pueyaso Sohuanu sequesano pa tojiri, maja pa rupatenura Pueyaso Rupaacuaji. Na sequesanoori naa naajiotasano quiya tariucuacaanu Pueyaso Rupaajinia pajaniyarajuhujaj:

“Pueyanaa, niaa jaara quiarjia tojiriquia Pueyaso sequesano niajaniya, majaari na sequesano ruuretajaca nia quiniu. <sup>8</sup> Majaari naa nia quiniu taa nia supuetanaa

quiquiaaricuaani, cariiquia jiyajinia nojori camarucuneejotasacari pueyaracaanu. Nojoriiri Pueyaso juaatijiojuaca quiquiaari, pueyaracaanu na tojiyashijica nojori quishacari. <sup>9</sup> Nojoricuajaari pueyaracaanu cua cumaacata cua miijosano niqutiuquiaari. Cuarenta marijaari shocojoquiaari, pueyaracaanu jiyajeneta casaa cua miijosacari cua cumaacata, maninia cua jiiitiasacari nojori. Naajaa, nia supuetanaari cua juaatijioquiaari, pueyaracaanu nojori taacanuusacari cucuaji. <sup>10</sup> Janiyari cunora seetanujuanaa juaaquiaari puetunu cuno pojoritiajanaani. Naaratej, janiyari sequequiaarini: ‘Nojoriiri juhua cucuaji tashuquioono rucoojiya tamajaaja. Nojoriiri cua niishitiojosano ruuretaquiaa saaja’. <sup>11</sup> Janiyari cunora jiyanoehua cua juaaniutia naa sequequiaarini: ‘Majaari nojori rupueni quiniutianiya janiya, shuquiriaatia cua quishaqui, cua samaraatanura nojori, pueyaracaanu shuquiriaatia quijiaca nojori quiniuria cuata’ ”.

<sup>12</sup> Naarate cuarta Pueyaso pueyanaa, tama nia cuaqueyajaaja nia cojuare jiyanoehua, niaa mariqui Pueyaso Rupaacua tiuyashijiacara quiriohuari, Pueyasooquaji nia rupatenura puetunujuanaa. Pa Pueyasocuajaari quijiajuhuanajaj. Nojuajaari na tojiyashijica saniitiojua. <sup>13</sup> Cunora, seetanujuanaa Pueyaso Rupaa tojitiajaca nia quiniuria, puetunu juucajanaa nia shiniujiutiooriquia pueyaracaanu. Naa nia miiriquia nio pa quishacari Pueyaso jiyanooni puequeyaquishacarijia taa na Rupaa sequeyacujani. Naa nia shiniujiutiooriquiatej nia jiiityaquiniucujaji sesa miiniuria. Saniniuuja, niaa jaara sesa miijiaa quiriquia, tama sesa nia miiniujiaarijia nia sapojonutaniya Pueyaso tojiyashijiacara nia jatanuhuara. <sup>14</sup> Jesucristoocua pa tiuuniucua, paari na cojiniaara jiyatesanoni. Naacuajitij, puetunu na jiiitiasanojuanaari puera quiriqianojuhuj, paa jaara nocua tiuquiaa pueyaracaanuni, taa shushajanaa seetanujuanaa nocua tiuujiaa pa quiriqiaacuajani.

<sup>15</sup> Cunora, naa naajiotasano quiyari tariucuaaanu Pueyaso Rupaajinia:

“Pueyanaa, niaa jaara quiarjia tojiriquia Pueyaso sequesano niajaniya, majaari na sequesano rejetejaca nia quiniu, taa nia supuetanaa quiquiaaricuaani. Nojoriiri Pueyaso juaatijiojuaca quiquiaari, pueyaracaanu na tojitiaashijica nojori quishacari”.

<sup>16</sup> ¿Canapueeteri cuno pojorini, Pueyaso tojitiaashijiacani? ¿Secaja pueyatee? Maja. Puetunu noo pojoricuajaari Egipto jiyajiniji Moisés mashiquishano pueyatej. Nojorijianaacuajaari Pueyaso tojiquiaari pocuaano. Naajaa, nojoriiri saaja na ruuretajaca quiquiaari. <sup>17</sup> Nia niishiritioj, ¿canapueete cuno pojorini, Pueyaso juaatijioquiaarini, pueyaracaanu nojori camarucuneejotasacari cariiquia jiyajiniani? Noo pojoricujani sesa miijiacatej. Nojoriiri cunora cusonuquiaari nojori quiojosacari nucuaco cariiquia jiyaco. Na cusonusaquijia jamojosaaquiaariiri. <sup>18</sup> Nia niishirijuhuj, ¿canapue naa Pueyaso sequequiaari seetanujuanaa na juaaniutiani: “Majaari nia tiuquitianu quiniutianiya niaarano cua niqutionu panishano jiyajinia, tii juhujaniya shuquiriaatia nia quiniuria cuata”? Puetunu Pueyaso tojitiaashijiacajanaacuajaari na sequesaaquiaritij. <sup>19</sup> Naacuajitij, paacuajaari quiarjia maatia niishiyani, Pueyasooqua tiuyashijica nojori quiniucua, majaari nojori tiuquitianu quiquiaari Pueyaso niqutionu panishano jiyajinia.

#### 4

<sup>1</sup> Pueyasocuajaari pa masuyajaa panaatia pa quiniuria nata. Cunora, jiyanoehua pa cojuare tama pa cuaqueyajaaja Pueyaso sequesanoocua pa tiuuniuria, tamonu pajaniyajinijinio mariqui jiyanoquishaareeri. Na sequesanoocua tiuyashijiacari maja na rupueni quiniutianiya Pueyaso, shuquiriaatia na quiniuria Pueyasota. <sup>2</sup> Pueyaso rupaacuajaari tari pa niqiuara pohuatasaaquiarijuhuj, nocua pa tiuuniuria, taa pa supuetanaa niqiuara na pohuatasaaquiaricuaani. Nojoriiri Pueyaso rupaa tojiquiaari najuhuanaj. Majaari nocua na tiutuiniu quiquiaari. <sup>3</sup> Cunora, Pueyasoori pa supuetanaajiniji naa sequequiaari:

“Cua sequesanoocua nojori tiuyaquiniuucua, janiyari cunora seetanujuanaa naa sequesquiaari cua juaaniutiani: ‘Majaari nojori tiuquitianu quiniutianiya cua niqitionu panishano jiyajinia, cuata nojori quiniuria shuquiriaatia’ ”.

Pajaniya saniniuuja, Jesuucua tiuujiaca pa quiniuucua, paa cutaraari panaatia quijiacara jatanishanoni, pueyaracaanu Pueyaso rupuejaca pa quiniuria. Pueyasoori naajuhuj: jiya shipininiu na tucuatenu nuhuaji, nojuajaari panaatia quiya. <sup>4</sup> Cunora, tamaqui tariucuacaanu Pueyaso Rupaajinia, naa naajiotasaaquiaariiri:

“Seis juucajinia Pueyaso tucuatasaari puetunu na poonijosanojuanaa, na nuhuaji nojuajaari séptimo juucajinia samaatequiaari”.

<sup>5</sup> Pueyaso sequesanoori tariucuacaanu na Rupaajinia naa pacutejosaaquiaari naajiotanu: “Majaari cua tojtiaashijiaca rupueni quiniutianiya janiya, panaatia nojori quiniuria cuata”.

<sup>6</sup> Naa sequesanojinijitij, maatia niishishiyari Pueyasoori pueya masuyajaa, nojori rupuenura nojuaja, panaatia nojori quiniuria nata. Noo pojori, coteenujuanaa Pueyaso Rupaa pohuatasaaquiaaritij, nojoriiri maja panaatia quijiacara na jatanishaanu quiquiaari, Pueyaso tojtiaashijiaca nojori quiniuucua. <sup>7</sup> Naa Pueyaso panitianuucua pueya, shuquiriaatia nojori quiniuria natajuhuj, nojuajaari quiarjia masuyajaa pueya. Cunora, jyanohua Moisés nuhuaji, Pueyasoori supuetana David naajiotaniquiaari pajaniyara saniniuuja. Naa sequeyari:

“Niaa jaara quiarjia tojiri Pueyaso rupaa, Pueyaso sequesano niaarano, majaari na ruuretanu”.

<sup>8</sup> Supuetana Moisés shaajenu nuhuaji, supuetana Josué cutaraari Israel pueya tiuquitianiquiaari nojoririano Pueyaso niqitionu panishano jiyajinia. Naajaa, nojori tiuquitiasacari cuno jiyajinia, majaari seetanujuanaa panaatia quijiacara nojori jatanishaanu quiquiaari. Cunoori quiquiaari Pueyasooocua tiuyashijiaca nojori quiniuucujuhuj, taa nojori supuetanaa quiquiaaricuaani. Naacuajitij, cuno jiyajinia Josué tiuquitiasacari nojori, majaari panaatia quijiacara nojori jatanishaanu quiquiaari. Nojori jaara panaatia quijiacara tari jatanishano quiriquia, ¿Pueyasotucua casaara quiarjia pa masuuriquiaja Jesuucua pa tiuuniuriani, seetanujuanaa panaatia quijiaca pa quiniuria natani? <sup>9</sup> Naacuajitij, paacuajaari niishiyani, Pueyaso pueyaranoori panaatia quijiacara jatanishaanutaniya, shuquiriaatia pa quiniuria Pueyasota pueyaracaanu. <sup>10</sup> Naacuajitij, cante Jesucristoocua tiuujiiani, nojuajaari panaatia quijiara jatanishaanutaniya. Majaari socua na tacaaniu quiniutianiya taa tama na cuaqueyajaaja na jyanootiniutianiya Pueyasoni. Naacuajitij, nojuajaari juhuajaniya quijia quiniutianiya, tarijia najuhuaana na poonijosanojiniji, naatej, taa Pueyasojanaa samaatequiaari na poonijionu nuhuajicuaani.

<sup>11</sup> Naaratej, panaatia pa quiniuria Pueyasota, seetanujuanaa na Rupaa tojjiacara pa quiriquia quiarjia. Naa na rupaa tojjiaca pa quiri paa mariqui saniitiosaareeri taa pa supuetanaa Israel pueya saniitiosaaquiaaricuaani, Pueyaso sequesano tojiyashijiaca nojori quiniuucua.

<sup>12</sup> Pueyaso Rupaari samiitianijia, cumaacaracajaariuhua pueya jiuujiajinia na poonijionura. Pueyaso Rupaari jyanohua socua shamatucuaaja nijiniaquetucuaaja mueruujiniji. Nijiniaquetucuaaja mueruuri saaja na naata pa cuaqueya jiyatanu. Pueyaso Rupaa cutaraari pa sohanu tohuariquijia, pa niishitijia tohuariquijianio. Na naata cuhuatanu poojiajinia jiyasohuaja pa niishiriojosano casaa, poojiajinia pa niishishoo casaanio. Naacuajitij, Pueyaso Rupaari poojiajinia sesa casaa pa niishiriojosano nequesoreeja, jiyasohuaja pa miiniu panishano poojiajinia pa niishiriojosanonio. <sup>13</sup> Puetunu Pueyaso shipinishano casaajanaani, majaari na cureenu quiniutianiya na nequesoreyaquishoo. Majaari quenaaja niquiriyatu jamaaniu quiniutianiya nocuaji, nequesoreesoo na cureenura. Nojuacuajaari maatia niishiya puetunu pa miishanojuanaa, puetunu pa niishiriojosanojuanaanio.

#### *Jesujuanaari Pueyaso jyanootijia pueya*

<sup>14</sup> Pueyaso Niyanu Jesuni, nojuajaari na Que jyanootijia pajaniya. Nojuajaari jiya cajiniocua tohuariquiiquiaari na Queecua na tiuquiniuria. Nojuajaari quiarjia tii pocuara secojiya na Que. Naacuajitij, Jesucristoocua tiuujiaca pa quiniuucua, maja

cumaati pa pishiniu nocuaji. Paacuajaari na muerasuniyojuani. <sup>15</sup> Jesu, Pueyaso pa jiyanootijiani, nojuacuajaari pocua taraajenu niishijia paa jaara saniniujiushaariquia sesa pa miiniuriani. Nojuacuajaari naa saniniujiushaaquiaarijiuhua sesa na miiniuria juucua, naate taa pa saniniujiushaaquiaacuaani. Maja cutaraari sesa na miiniu quiquiaari quenaaja. <sup>16</sup> Cunora, pa jiyanoojia Pueyaso pa rupueriquia pa puereyaquiniutia. Nojuacuajaari pa tojiquiaa pa secojosacari nojuaja, na jiyanooniuria pajaniya sesa pa miishanojiniji. Ritia pa cumaquiuaajaariuhua, pa rejeretanura paa jaara sesa miiniuria saniniujiushaariquiani.

## 5

<sup>1</sup> Puetunu pueyacuara secojonaa jiyaniijajanaari pueyaracaanu narta pueyajinijinio saquiriojosano pueyano quiquiaa, taa Pueyaso niishitiquiaari supuetana Moisés cuajani. Nojuajaari jiyatesaaquiaa pueyacuaji na tacunura Pueyaso. Naacuajitij, nojuajaari nareja pueya niqutiojosano Pueyasorano masejovia. Naajuhua, pueya jaara sesa miiri, pueyacuara secojonaari pueya seya nanaca shootequiaa, Pueyaso jiyanooniuria nojori, sesa nojori miishanojiniji. <sup>2</sup> Pueyacuara secojona quiniuucua pueyanohua, nojuajaari sesa miiijajuhua. Naacuajitij, nojuajaari na naata narta pueyacuara taraajenu, sesa nojori miishacari, nojori niishiyaquishacari maninia miiniujiuhua. <sup>3</sup> Naacuajitij, nojuajaari tama nocuarajaaja seya nanaca shootequiaa sesa na miiniuucua, taa na miiquiaacuaa narta pueyacuara, sesa nojori miishacari. <sup>4</sup> Niaacuajaari niishiya, majaari quenaaja tamonu pueyano na naata tama na cuaqueyajaaja jiyatenu pueyacuara secojona na quiniuria. Pueyasojuaacuajaari tamajaaja saquiriojovia na panishano pueyano, cuno pueyano quiniuria pueyacuara secojona. Pueyasocuajaari naa saquiriojoquiaaricuaa Moisés tarajanu Aarón, pueyacuara secojonaa jiyaniijia na quiniuria. <sup>5</sup> Naajuhua, Jesucristoori maja tama na cuaqueyajaaja na jiyatenu quiquiaari pueyacuara secojona na quiniuria, Pueyaso na jiyanootiniuria pajaniya. Tama Pueyasojuaarijia na jiyatequiaari pueyacuara secojona na quiniuria. Nojuajanaacuajaari naa sequequiaari Jesu:

“Quiaari quiyanu. Janiyari pueyanora quia muerateree jiyacuani cua saquiriojosano pueya Jiyaniijia quia quiniuria”.

<sup>6</sup> Pueyaso sequesanoori tamaqui tariucuacaanu na Rupaajinia naa naajiotasano quiyajuhua:

“Pueyaracaanu rishijia quia quiniuucua, quiaari pueyaracaanu pueyacuara secoriquiano cutara, taa Melquisedecuaani”.

<sup>7</sup> Naa pueyano na quishacari mijriatej, Jesucristoori jiyanoohua saniniujiushaaquiaari. Naquiya na miyaquishaanuucuaaji juucua, nojuajaari na Que Pueyaso secojoquiaari jiyanoohua na nujuquenuta. Jiyanoohua martequiaariiri na Que na secojosacari, maja na mosaanura. Nojuajaari niishiquiaari na Que na naata nocua taraajenu, maja na mosaanura. Naajaa, na Que tojijia na quiniuucua, na Que sequequiaariiri: “Naajaa, quia miiri quia panishano cua Quena, taa quia panitiaquiaari miiniu janiyacujani”. Na Queeri na tojiquiaari. <sup>8</sup> Jesucristoori seetanujuaana Pueyaso Niyanu quiquiaari mijiria na quishacarijiuhua. Naajaa, na niishishacari nojuajaari jiyanoohua naquiya miishaanutaniya nojuaja jaara na Que tojiri, naajaa, nojuajaari saaja na tojiquiaari. <sup>9</sup> Naacuajitij, tojetaarucujanaa maninia miiijia na quiniuucua, nojuajaari pueyacuaji Tacunara quiquiaari, puetunu na tojitiajacajanaa na jiyatenura pueyaracaanu rishijiacara. <sup>10</sup> Cunora, na Que Pueyasoori na jiyatequiaari pueyacuara secojona na quiniuria pueyaracaanu, juhua Melquisedec.

### *Jiyanoohua puereetaari Jesu tojiniu tarinitianu*

<sup>11</sup> Janiyari queraatia socua nia niishitiojonu paniya Jesucristojinijini, nia niishiniuria nojuajaari seetanujuaana juhua Melquisedec. Cunoori puera jiyajeneta, maatia cua niishitiojonura nijaniya, juhua niishiyashijiacara nia quiniuuquiohua. Niaacuajaari tari nijajetarucuaa tariucuacaanu nia tojishano. <sup>12</sup> Tariucuacaanujiniji Pueyaso rupaa tojijia nia quiniuucua, ¿taateni? Naa mariqui na niishitiojonujuaca quiriquia tari. Saniniuuja, niaari quiarijia paniya socua nia niishitiojosaanuhuara maatia niishishaatia

casaa Pueyasojiniji. Niaari juhua naatujooriria quiriohuacuaa, juhua shipiyataaquishoojua. Naacuajitij, majaari nia naata jiyajeneta niishitiojosano casaa niishiniu. <sup>13</sup> Naa maatia niishitiojosano niishijiaca nia quishacari saajatej, niaari juhua conaaja quiyajaa, saaja quitiaacaacua naataja. Majaari Jesucristo niishitiojosano tojitiajaca nia quiniu, maninia miijiaca nia quiniuria. <sup>14</sup> Juhua tariucua mashiquioriria nia jiyateriquiani. Mashiquiori cutaraari puetunu casaajanaa miaquenuujuaca. Naajuhuj, puetunu Jesucristo niishitiojosanojuanaa niishijiaca nia quiriquia. Naa jaara na niishitiojosano tojijiaca quiriquia, saaja maninia miijiaca nia quiniuria, niaari maninia niishiniutianiya teyano casaate maniniani, teyano casaate sesa saniniunijia.

## 6

<sup>1</sup> Naacuajitij, majaari juhua naatujoori nia quiniu pueyaracaanu. Seetanujuanaa socua Pueyaso rupaa tojitiajaca nia quiriquia, juhua tariucua cumantumaca mashaja nia quiniuria, cumueeca. Niaacuajaari tari coteenujuanaa Jesucristojiniji niishitiojosano niishijiaca. ¿Niaatucua casaara socua niishitiojosaarohua nioojia nia tacatonurani, maja nia tiuuniuria maninia nia miishanoocua najuhuananij? Niaacuajaari tari niishiya, majaari nia naata maninia nia miishanota tama nia cuaqueyajaaja jiyanootiniu Pueyaso. Cunora, niaari Jesucristoocua tiuujicacara quiquiaari tari, Pueyaso jiyanooniuria niajaniya. <sup>2</sup> Naajuhuj, niaacuajaari tari niishitiojosaaquiaari moojinia nia tiuquinishaanura Pueyaso pueya nia quiniucua. Niaari niishitiojosaaquiaarijuhua Pueyaso pueyacua nia nianura nia juaashiquia nojoriicua nia secojosacari, Pueyaso cumaquiniuria nojori. Niaari niishiyajuhuj, macunucuaari samiitiaconutaniuhua. Nojorijinijinio saniniujia, Pueyaso tojiyashijiacaari pueyaracaanu saniitiosocoriquiano jiyatesaanutaniya. <sup>3</sup> Quiarijiani, majaari socua cua niishitiojonu quiniutianiya niajaniya nio shusha cua sequesanojiniji niajaniyani. Pueyaso cumaquishacari janiya, janiyari socua jiyajeneta casaa Jesucristojiniji niishitiojonutaniya niajaniyani.

<sup>4-5</sup> Pueyano jaara Pueyaso Rupaa tojiyashijiara quiriohua, najuhuaanaari na niishitiojonu pacutenuhua, nojuaja jaara tari Pueyaso Sohuanu cuhuatasano jiuujaraca quiquiaari. Najuhuaanaari nojuaja jaara tari jiyanooshano quiquiaari, nojuaja jaara tari Pueyaso Sohuanu cumaaca niishijia quiquiaari. Najuhuanajaariuhua nojuaja jaara tari Pueyaso Rupaa shuquiritiaja quiquiaari, nojuaja jaara tari Pueyaso cumaacaraca quijia quiquiaarijuhuj. <sup>6</sup> Jiyano pueyanotej, majaari tari na naata sesa miijia na quiniucua taraajetesaanuhua, Jesucristoocua na tiuuniuhua seetanujuanaa. Nojuajaari juhua Pueyaso Niyanu teetenu pacuteya niyacutesanojinia, naa na ruuretajaca na quiniucua. Naa Jesucristo tacartaja na quiniucuatej, tamasaari Jesu rerequetequiaajuhuj. <sup>7-8</sup> Naacuajitij, cuno pueyanoori juhua noo cuhuariquia tee cuniqui sesa jiyasocua maniniucuaa moritianucujani, riyocuacanio. Pueyasoori najuhuaana maru niyojotequiaa. Majaari cuno cuhuariquiajinia nataacuaca muetunu. Jiyano cuhuariquiatej, na camaru cuara catijiaaranooj. Pueyasoori naa saniitionutaniya nocuaji ruparequeno pueyajuhuj. Saniniujia, Jesucristo rupaa tojijiacani, nojori-iri juhua maninia cuhuariquia. Pueyasoori maru niyojotequiaa nocua, maninia na muetutenura tii natoosano casaa. Naacuajitij, na camaruuri queraatia miajajauraca quiniutianiya. Naajuhuj, Pueyasoori na tojitianu tarinitiaashijiaca shuquiritiniutianiya pueyaracaanura.

*Pa niishishacari Pueyasoori maninia pa miiniutianiya, paari cunora na tojinu tarinitiaaquiiaani*

<sup>9</sup> Miriqui cua pahuatasano sesa cuhuariquiajinijini, cunoori maja niajaniya cua panishano pueyanaa. Majaari cua taacanuunu niajanijajiniji. Niaacuajaari pa Jiyaniijia tojitiajaca quiquiaa. <sup>10</sup> Pueyasocujaari jiyanoohua maninia. Nojuajaari maja na niyasetanu quiniutianiya maninia nia miishano niarta Pueyaso pueya, Pueyaso panijia nia quiniucua, taa quiarijia nia miyajaacujani. <sup>11</sup> Naatej, taa shitimia niarta Pueyaso pueya naacujuacatucua niajaniyani, naajuhuj, janiyari nia panitiaani pa Jiyaniijia nia sashiniuria nia timiniutiajuhuj, nojuaja jaara pa rijionuucua tiuquiriohuajaatijia.



Nia niishitiriquiajaaniuhuj, Pueyasoori jiyanoehua maninia miiniutianiya pajaniya. <sup>12</sup> Majaari nia macuhuajeconu juhua taajecori nia quiniuria pa Jiyaniijara. Saniya nia quiriqia cutara juhua tariucuacaanu parta Pueyaso pueya. Nojoriiri shamaatia Pueyasooeua tiuujiaa quiqiaari pueyaracaanu. Naquiya miiniu rejeretajacaari quiqiaari-jiuhuj. Naaratej, Pueyasocuaajaari tari maninia miiquiaa nojori, taa seetanujuanaa na sequequiaari na pueyarano na miiniuriacuajani.

<sup>13</sup> Pueyasoori seetanujuanaa saaquiano Abraham sequequiaari taa na miiniutianiya maninia nojuajani. Majaari na naata sequenu, tamonu cuara na saniitiooranon, nojuaja jaara miyaquiri na sequesano saaquiano Abraham. ¿Cantucuaa cumaacaraca Pueyaso na saniitionurani? Shaaqui. Nojuajanaacuajaari Jiyaniijajanaa. <sup>14</sup> Naaratej, Pueyasoori naa sequequiaari saaquiano Abraham:

“Janiyari seetanujuanaa maninia miiniutianiya quiajaniyani. Janiyari quia jiuha muetutenutaniya jiyanoehua queraatiani”.

<sup>15</sup> Naa Pueyaso sequenu nuhujaa saaquiano Abrahamtej, Abrahamri juhuajaniya sashiquiaari Pueyaso cuara na sequesano miiquiaarijiaatijia. <sup>16</sup> Pueyanaa, niaacuajaari niishiya taa pa miiquiaani, parta pueyano niishiniuria paari nojuaja pa sequesano miiniutianiya seetanujuanaani. Paari naa sequequiaani: “Seetanujuanaa quia sequeyanijia. Majaari cua sapojonu. Pueyaso cuara saniitioora janiya, janiya jaara cua sequesano miyaquirini”. Naa pa sequesacarij, parta pueyanoori juhuajaniya pocua tiuujia. Majaari tari na taacanuunu pocuaji. <sup>17</sup> Naajuhuj, Pueyaso sequesacari taa seetanujuanaa na miiniutianiya na pueyarano, nojuajaari jiyanoehua panitiaquiaari pajaniya, na sequesanoocua pa tiuuniuria seetanujuanaa. Majaari na paniniu quiqiaari pa taacanuunura quenaaja na sequesanojiniji. Cunora, nojuajaari naa sequequiaari: “Janiyacuajaari Pueyasoni. Majaari cua niishiniu sapojonu. Cua sequesanoori seetanujuanaa”. <sup>18</sup> Naacuajitij, Pueyasoori maatia sequequiaari taa na miiniutianiya nocua tiuujiaacaranon pueyarani. Majaari saaja cuno na sequenu quiqiaari. Nojuajaari sequequiaarijiuhuj: “Cua sequesanoori seetanujuanaa”. Pueyaso sequesanoori maja na naata jatanishaanu. Naacuajitij, pajaniya, nocua tiuujiaa pueyani, paari poojia cajitiquiaani maatia pa niishishacari, pocuaji Tacunaari puetunu na sequesanojuanaa miiniutianiya pajaniyara. Naacuajitij, majaari pa taacanuunu quenaaja. <sup>19</sup> Naa Pueyaso sequesanoocua tiuujiaa pa quishacarij, paari juhuajaniya naquiya miiniu rejeretajaca quiqiaani. Sesaacaari maja na naata Pueyaso jaariutianu pajaniya. Naacuajitij, paari juhua buqueni, pootioyaquishoo, niiquia casaacuaji na jaasutanuucua. Cuno niiquia casaari niquishoo, moo cariquimia pojiyari. Naajuhuj, nocua pa tiuushanoni, nojuajaari jiyocuacaanu quiya, niquishoojaariuhua na Que Pueyaso shuriucua na quiniucua. <sup>20</sup> Nojuajaari na Queecua quianu pa puetaquiaari. Nojuajaari tii pueyaracaanu secojoquiaa na Que pocuara, na Que jiyanooniuria pajaniya. Naacuajitij, Pueyasoori na jiyatequiaari pueyaracaanu secojona na quiniuria pueyacuara, taa Melquisedec quiqiaaricuaani.

## 7

### *Jesuuri pueyacuara secojona, taa Melquisedec quiqiaaricuaani*

<sup>1</sup> Cuno Melquisedecni, nojuajaari Salem tiaca jiyaniijia quijia. Nojuajaari Pueyasojuaanaa secojona pueyacuara. Pa supuetana Abraham tacatesacariuhua na naminiu nuhujaa na paraa, tamasa tiacajinijinio jiyaniijanucuaani, Melquisedecri nocua tohuataquiaari Salem tiacajiniji. Naa na sequequiaariiri: “Abrahamnaa, quiaari Pueyaso timitiasano. Pueyasoori quia miiniutianiya jiyanoehua maninia”. <sup>2</sup> Jiyacarij, Abrahamri na paraa casami nitariquihua na quiquojiniohuara. Naacuajitij, nojuajaari puetunu cuno casamijinijiojuanaa Pueyasora na riuriosano niquitioquiaari Melquisedec. Abrahamri naa miiquiaari na niishishacari Melquisedecri Pueyaso secojona pueyacuara quiqiaari. Pueyanaa, nio Melquisedecjiniji nia niishiri. Pueyano rupaajinia, na sesaari sequeya, “Saaja maninia miiijia jiyaniijia”. Naajuhuj, na tiaca sesa Salemni, cunoori pueyano rupaajinia sequeya, “Juhujaniya quijia pueya tiaca”. Na sesaari naa quiqiaari na pueya jiuujia cajitijia na quiniucua. <sup>3</sup> Majaari tojetaarucujanaa na niishishaanu, ¿queraca

quiquiaaritii, nucuaracajuhua, supuetanaaracanio? Majaari quenaaja na pohuataasaanu-juhua na rasaanujiniji, na shaajenujinijinio. Naacuajitij, pajaniyara, Melquisedecri juhua pueyaracaanu quijiajuhuanajaj. Majaari na niishishaanujuhua, tamonute na niti jiyatesaaquiaari pueyacuara secojona na quiniuria. Maja. Naacuajitij, nojuajaari juhua Pueyaso Niyanu, pueyacuara secojona na quiniuria pueyaracaanura.

<sup>4</sup> Pueyanaa nia niishiri, Melquisedecquiiri seetanujuanaa tojishano pueyano quiquiaari socua pa supuetana Abrahamjiniji. Naaratej, pa supuetana Abrahamri nareja na niquitioquiaari na paraa na shocotasano casamijinijinio. Secaja niquitioquiaari taa Pueyaso rootaquiaari pa supuetanaacuajani, nojori niquitiojonura nera. Tariucuacaanu, Pueyasoori pa supuetanaa niishitiojoquiaari nojori niquitiojonura secaja, puetunu nojori jiitiasano casaajinijianaa. Naacuajitij, pueyano jaara diez casaa jiitiare, cuaara Pueyasora niquitioora niquiriyatujua. <sup>5</sup> Pueyasocuaajaari supuetana Leví niquiohuacuajinio supueno pueya jiyatequiaari narta Israel pueyacuara secojona nojori quiniuria. Nojoriiri jiyatesaaquiaari Pueyasorano pueya niquitiojosano masejojua nojori quiniuriahuhua. Naa Pueyaso sequesano cuajaari Moisés Rootasanojinia naajiotasaaquiaari. Abrahamcuajaari puetunu Israel niquiohuajanaa supuetana quiquiaari, maja saaja Leví supuetana. Naajaa, Leví niquiohuacuajinio supueno pueyari Pueyasora narta Israel pueya niquitiojosano masejojua. <sup>6</sup> Melquisedecri pueyacuara secojona quiquiaarijuhua. Maja cutaraari Leví niquiohuacuajinio na supueno quiquiaari. Naajaa, seetanujuanaa pueyacuara secojona na quiniuucua, Abrahamri Pueyasorano na riuriotaca na niquitioquiaari. Abrahamri seetanujuanaa Pueyaso timitiasano pueyano quiquiaari. Naaratej, Pueyasojuaacuajaari tari Abraham sequequiaari, nojuajaari maninia na miiniutianiya. Naajuhua, Melquisedecri pa supuetana Abraham sequequiaari Pueyasoori jiyano hua maninia miiniutianiya nojuaja. <sup>7</sup> Paacuajaari niishiyani, Pueyaso jaara maninia miiniutianiya tamonu pueyano, na sequesano caminiujiunia pueyanoori socua tojishano pueyano maninia na miishocoriquiano pueyanojiniji. Naacuajitij, paari niishiyani Melquisedecri socua tojishano pueyano quiquiaari Abrahamjiniji. <sup>8</sup> Quiarijiani, Pueyasorano pueya niquitiojosano masejojacani, puetunu nojorijianaari shaajecaca pueya. Saniniuujia, tariucuacaanu Pueyaso Rupaajinia pa serojosacari Melquisedecjiniji, juhua saminiujiniji pohuatashiyari. <sup>9-10</sup> Nia niishirijuhua, Leví niquiohuacuajinio pueyacuajaari Pueyasorano pueya niquitiojosano masejojuaca, pueyacuara secojona nojori quiniuucua. Cua tojiri pueyanaa, Melquisedec naacuneetosacari Abrahamta, Abrahamri jiyacari tari na cuaqueyajinia jiitariquiaa puetunu nocuajinio supueriquiano pueyajanaa. Naacuajitij, Abraham niquitiosacari Pueyasorano na riuriotaca Melquisedec, pa naata sequenu Leví quiriqianojuanaari jiyacari Melquisedec niquitioquiaari, Abraham quiniuucua na jiyasorano tari.

<sup>11</sup> Leviicuajinio supueno pueyari pueyacuara secojona quiquiaari, nojori miiniuria taa Moisés Rootasanojinia sequequiaaricuajani. Naacuajitij, narta Israel pueya jaara sesa miiquiaari, nojoriiri sesa miijiaca seya puecooquiaari pueyaracaanu tama na camaruhacuaraaja, nojori na jiyano tiniuria Pueyaso. Naa nojori miishano jaara pueya jiyateriquia tojetaarucuajanaa sesa miyashijiacara, paa maara tamonu pocuara secojoriquiano paniyaquiriquiani. ¡Tamonu pocuara secojoriquiano cutaraari panishaaquiaari! Juhua pueyaracaanu rishijia Melquisedec panishaaquiaari cutaraari, maja juhua Aarón saniniuujia, nocuajinio supueno pueyano. Nojoriiri shaajecaca cutara.

<sup>12</sup> Aarón cuajaari narta pueyacuara secojona jiyaniijia jiyatesano quiquiaari, taa Moisés Rootasanojinia sequeyacuajani. Naacuajitij, tamonu pueyano jaara jiyatesaarecuaa pueyacuara secojona na quiniuria, tamonu rootasanoori panishiyajuhua, Moisés Rootasano niti na quiniuria. <sup>13</sup> Tariucuacaanu Pueyaso Rupaajinia, maatia sequeyacuajaari, Pueyasoori tamonu pueyano jiyatenutianiya pocuara secojoriquiano. Nojuacuajaari pa Jiyaniijia Jesu. Nojuajaari maja Leví niquiohuacuajinio supueno. Nojuajaari supuetana Israel niyanuucuajiniocuaja, saniniuujia tamonu neyanuucuajiniojaarohua, teyanuucuajinio quenaaja niquiriyatu pueyacuara secojona supueyaquiquiaaricuajani.

<sup>14</sup> Maatia niishishiyacuajaari, pa Jiyaniijiaari Judá niquiohuacuajinio supueno quiquiaari.

Judaari Leví tarajanucuaaja. Moisés pohuatasacari pueyacuara secojonaajiniini, majaari quenaaja Judá na jiyaniquiniu quiquiaari.

<sup>15</sup> Quiarrijiani, quiarinio pocuara Secojona quishacari juhua Melquisedec, paari maatia niishiyani Leví niquiohuacuajinio supueno pueyacuara secojonaari sanitishaaquiaari. <sup>16</sup> Nojoriiri pueyacuara secojonaa quiquiaari saaja Leví niquiohuacuajinio supueno pueya nojori quiniuucua. Jesucristo cutaraari pocuara secojonara jiyatesaaquiaari pueyaracaanu rishijia na quiniuucua. <sup>17</sup> Cunora, Pueyasoori naa sequequiaari nojuajiniini: “Quiaari pueyacuara secojona quiniutianiya pueyaracaanura, juhua Melquisedec”.

<sup>18</sup> Naacuajitij, puetunu Moisés rootasanojuanaa pueyacuara secojonaa pueya miishocoriquianoori tari jatasaaquiaari, najuhuana na quiniuucua. Cuno miishanoori cumaacaaju quiquiaari pueya na jataniniuria. <sup>19</sup> Seetanujuanaari, Moisés Rootasanoori maja na naata quiquiaari saaja maninia miijiacara na jataniniuria na tojitiajaca. Quiarrijia saniniuuujia, paari Pueyaso rupaa Jesucristojiniini jitiiaani. Nocua pa tiuushacari, Jesucristoori pueyaracaanu pa jiyanootiquiaa na Que, juhuajaniya pa rupuenura nojuaja.

<sup>20</sup> Na Que sequesacari Neyanu quiniuria pocuara secojona pueyaracaanura, nojuajaari naa sequequiaari seetanujuanaa. Naacuajitij, paari panaatia quiquiaani pa niishishacari Jesucristoori na Que shuriucua quiya, pueyaracaanu pocuara na secojonura na Que. Saniniuuujia, majaari naa Pueyaso sequenu quiquiaari Leví niquiohuacuajinio supueno pueya, seetanujuanaa pueyaracaanu pueyacuara secojonaa nojori quiniuria.

<sup>21</sup> Saniniuuujia, Neyanujiniini na sequesani, cunoori seetanujuanaa. Majaari na sequesano jatanishaanu quiniutianiya. Naacuajitij, naa naajiotasano quiyari tariucuacaanu Pueyaso Rupaajinia:

“Jiyaniijia Pueyasoori seetanujuanaa sequeree na miishocoriquiano. Majaari na sequesano na jataniniu quiniutianiya. Neyanu sequereecuajaari: ‘Quiaari pueyacuara secojoriquiano pueyaracaanu’”.

<sup>22</sup> Naacuajitij, pueyaracaanu na Que shuriucua Jesu quiniuucua pocuara na secojonura, paari seetanujuanaa niishiyani paari Pueyaso pueyani, Neyanuucua pa tiuuniuucua. Naacuajitij, Pueyaso rupaa Jesujiniiri socua jyanohua maninia Moisés Rootasanojiniini. Cunoori pueyaracaanu rishijia Jesu quiniuucua. <sup>23</sup> Saniniuuujia, Leví niquiohuacuajinio supuenoni, queraatia pueyacuara secojonaari quiquiaari pueyaracaanu rishiyashijia nojori quiniuucua. <sup>24</sup> Jesu cutaraari shaajeyashijia. Naa pocuara secojona na quishacari itij, majaari quenaaja tamonu sanitiniu quiniutianiya nojuaja. <sup>25</sup> Naacuajitij, nocua pa tiuushacari, nojuajaari pueyaracaanu pocuara secojoquiaa, tojetaarucujanaa maninia miijiacara pa jatanishaanura, Pueyaso pa rupuenura. Majaari pocuara na Que na secojonu na tarinitianu quiniutianiya, shaajeyashijia na quiniuucua.

<sup>26</sup> Jesuuri namitia pocuara secojona na Que. Majaari tamonu quiniu juhua nojuaja. Nojuajaari tojetaarucujanaa maninia miijiajuhuanajaj, juhua na Que Pueyaso. Majaari quenaaja sesa miiniu na niishiniu. Sesa miijiaa tajinia na quishacari mijiria, naajaa, majaari sesa na miiniu quiquiaari quenaaja. Saaja maninia miijia na quiniuucua, nojuajaari tojetaarucujanaa tamaatia quijia mijiria quiniaa pueyajiniini. Naaratej, Pueyasoori jiyocuacaanu quijara na jiyatequiaari, Jiyaniijajanaa na quiniuria na shuriucua, tii na secojonura na Que pocuara. <sup>27</sup> Leví niquiohuacuajinio supueno pueyacuara secojonaa jiyaniijianucuaari pueyaracaanu tama sesa nojori miishanoocuarajaaja seya puecootujua coteenu, Pueyaso jiyanooniuria nojori. Naa nojori miiniu nuhuajitij, nojoriiri jiyacari narta Israel pueya seya puecooquiaari sesa cuno pojori miishanoocuarara saniniuuujia. Maja cutaraari naa Jesu miiniu quiquiaari. Nojuaja jaara tama na cuaqueyajaaja tarinitiaquiaari pocuara na mosaanura juhua borregoniyojua sesa pa miishanoocuarara, cunajuanaari na cusonu quiquiaari. Majaari socua na caminiu quiniutianihua cusonu. Naa na cusonuucua pocuaratej, puetunu sesa miijiacajanaari na naata jiyanooshaanu puetunu sesa na miishanojiniijianaa. <sup>28</sup> Moisés Rootasanojiniini, Pueyasoori tii sequesacuaja canapuate pueyacuara secojonaa jiyaniijiaara jiyateshiyani. Puetunu cuno pueyacuara secojonaa jiyaniijianucujanaari sesa miijiaa quiquiaari, juhua puetunu pueyajuhuj. Jyanohua Moisés nuhuaji, Pueyasoori saniniuuujia tama Neyanujuaaja jiyatequiaari pocuara secojonajanaa na quiniuria pueyaracaanu. Na Que tojijia na

quiniuucua pueyaracaanu, naquiya miiniu rejeretaja na quiniuucujuhuaaj, naacujitij, nojuajaari tojetaarucujanaa maninia, pocuara secojonara na jiyatesaanura.

## 8

### *Quiarinio Pueyaso Rupaacua pa tiushacari, Jesuuri pa jiyanootiquiaa na Que*

<sup>1</sup> Nio, janiya na pacutenutaniuhua sequenuni, cunoori socua panishano nia niishiniuria. Cua tojiri. Pueyaso Niyanu quiniuucua pocuara secojona, nojuajaari na Que miaquetajara cajiquiaari jiyocuacaanu. <sup>2</sup> Nojuajaari tii na Que secojoquiaa pocuara Pueyaso Quishaquijianaa. Cunoori Pueyasojuanaa shipinishano quiquio, maja pueyano tiasano.

<sup>3</sup> Puetunu pueyacuara secojonaajanaari jiyatesaaquiaari nojori masejonura narta pueya poosano casaa, Pueyasora nojori niqutiojosano. Naajuhuaaj, nojoriiri seya puecoojuaca, Pueyaso nojori jiyanootiniuria. Naacujitij, Jesucristo quiniuucua pueyacuara secojonajuhuaaj, nojuaja cuara casaa jiitiaara, Pueyaso na niqutiosocoriquianojuhuaaj. Cuno casaacujaari tama na cuaqueyajaaja quiquiaari, pocuara na mosaanura, Pueyaso jiyanooniuria pajaniya. <sup>4</sup> Leví niqiuohuacuajinio supueno pueyacuara secojonaacujaari pueya nitiasano nojoriicua masejoquiajaa, Pueyasora nojori niqutiojosocoriquiano taa Moisés Rootasanojinia sequeyacuajani. Naacujitij, Jesucristo jaara mijiria quiriquiaja, nojuaja maara pueyacuara secojona quiyaquiriquiaj. Pueyacuara secojonaacujaari queraatia quiya. <sup>5</sup> Pueyacuara secojonaa jeecajosano casaa Pueyaso Secojojuua tiajinia nojori jiiitiasanoni, nojori miishanonio, puetunu cunojuanaari saaja juhua jiyocuacaanu casaa naaqui. Cunora, Moisés jaara tari shipiniriquiaa Pueyaso Secojojuara suhuorotu, puetunu na casamitiajanaano, jiyacaritij, Pueyasoori naa Moisés sequenu pacutequiaari:

“Moisésnaa, cua tojiri. Maninia quia miiri jacaria puetunujuanaa, naatej, taa cua niqutiquianucuja quiajaniani, Sinaí tuhuananuucua quia quishacari”.

<sup>6</sup> Pocuara Secojonajanaa miishanoori jiyanohua maninia socua pueyacuara secojona Leví niqiuohuacuajinio supueno miiijosanojiniji. Pocuara Secojona cutaraari tama na cusonutajaaja pa jiyanootiquiaari Pueyaso. Naacujitij, Pueyaso rupaa Jesucristojiniji jiyanohua socua maninia Moisés Rootasanojiniji.

<sup>7</sup> Pueya jiuujia jaara na naata quiriquia seetanujuanaa sesa miyashijiacara jatanishano Moisés Rootasano tojjiaca nojori quiniuucua, Pueyaso maara quiarinio rupaa niishitiyaquiquiaari pajaniya. <sup>8</sup> Saniniuujia, Pueyasoori niishiquiaari Israel pueyari maja na naata quiquiaari puetunu Moisés Rootasanojuanaa tojinii. Cunora, tariucuaaanu pueyara Pueyaso sequesano caminiujuunia sequesanoori naa naajiotasano quiya:

“Jiyaniijia Pueyasoori sequeya: ‘Tamacari, janiyari quiarinio rupaa niishitiniutianiya Israel jiyajinijinio pueyani, Judá jiyajinijinio pueyano. Teyano pojoriti nocua tiuyani, nojoriiri seetanujuanaa cua pueya quiniutianiya. <sup>9</sup> Quiarinio cua rupaari tamaatia quiniutianiya Moisés cua niishitiojosano rupaajiniji puetunu Israel pueyarajanaa. Jiyacaritij, janiyari nojori mashiquiquiaari Egipto jiyajinijini. Juhua nojori que, janiyari nojori jaatucunuuriquiaa juucuanu nojori cua niqutiosocoriquiano jiyajiniara. Saniniuujia, nojoriiri Moisés cua rootasano nojoriria tojinii paniaquiquiaari saaja. Janiyari cunora nojori cartequiaarini’. Jiyaniijia Pueyasoori naa sequeree. <sup>10</sup> Socua sequeyari: ‘Nio pa quishacari nuhuaaji, janiyari naa miiniutianiya cua saquirojosano pueyarani: janiyari coojia nianutianiya nojori jiuujiajiniani. Naacujitij, cua rootasanoori juhua naajiotasano quiniutianiya nojori niishitiajajinia, seetanujuanaa cua tojitiajaca nojori quiniuria. Naacujitij, janiyari nojori Jiyaniijiajanaa quiniutianiani. Nojoriiri saniniuujia cua pueya quiniutianiyacujua. <sup>11</sup> Jiyacaritij, pueyano jaara janiyajiniji pohuatanu paniri narta pueyano, na cojiniajuhuaaj, tapueyocuaicano, cunoori najuhuaana quiniutianiya. Puetunu pueyapuejanaacujaari tariucua cua niishijaca quiniutianiya; jiyaniijianucua, poonijotesano pueyano. <sup>12</sup> Janiyari nojoriicua taraajeja quiniutianiani. Majaari cua saniitionu quiniutianiya nojori, sesa nojori miishanojiniji.

Naa cua jiyanooshacari nojoritij, majaari socua cua sanejonu quiniutianiya sesa nojori miishano. Janiyari puetunujuanaa na niyjetanutaniyani' ”.

<sup>13</sup> Naa Pueyaso sequesacaritij, taa nojuaja quiarinio na rupaa niishitiniutianiya pa-janiyani, nojuajaari tariucuacaanu Moisés na rootasano jiyatequiaari tariucaneera. Naacuajitij, Moisés Rootasanoori quera shaajasaanutaniya puetunujuanaa.

## 9

### *Tariucuacaanu Moisés suhuorotesano Pueyaso quiquioranoni, cunoori juhua jiyocuacaanu Pueyaso quiquiojuhuaj*

<sup>1</sup> Tariucuacaanu, Pueyasoori Moisés sequequiaari mijiria na quiquiorano na suhuorotenura. Na niishitiojoquiaariijaariuhua taa pueyacuara secojonaa poonijionutaniya cuno na quiquiojiniani. <sup>2</sup> Pueyaso Secojoua suhuorotuuri caapiqui sohuacaraca quiquiaari. Samari nujuatacojuaari coteenu sohuacajinia quiquiaari, miaquejania, tee Pueyaso tacoji pan niojosaquiaari pueyaracaanucujani. Cuno sohuaca sesa quiquiaari “Pueyaso Shuriucua Quiquo”. <sup>3</sup> Cuno coteenu sohuaca puequeetujiniani, tii tunusano quiquiaariiri shiquiaruque toque. Cuno toque tamajiria quiquiaariiri Pueyaso quiquiojuanaa cutara. Naaratej, na sesa quiquiaari “Pueyaso Quishaquijianaa”. <sup>4</sup> Pueyaso Quishaqui tacoji nujuatajaari juhuacutu, orojiniji shipinishano. Cuniqi catejaari shanohua jaanutaja Pueyasora. Pueyaso Quishaquijianaa cutarani, tii nujuatajaari puereetuuca casaa, juhua caaja niquishano. Naananeecajiniji shipinishaaquiaariiri. Puetunu na cuaqueyajaari orota mishiquiosano quiquiaari. Na jiniacuma, casamiiri mii racatasano quiquiaari. Pataconiyoua orojiniji shipinishanoori tii cajitiaquiaari “maná”. Manaari quiquiaari Pueyaso tinishano casaa, Israel pueya miaquesocoriquiano cariquia jiyajinia nojori camarucuneejotasacari. Mii matariquiaajaariuhua Aarón nataca catuutianohua, puetunu na jajautajanaa. Mii maturiquiaajaariuhua sai neeca quejasano, nocua Pueyaso naajiotasano na rootasano, Moisés na niqutiojosano. <sup>5</sup> Cuno caaja tiotiu caco nujuatejosano quiquiaariiri caapiqui shipinishano casaa, nesuharaca, juhua Pueyaso seya niquishano. Nojori nesuhuari coqueetesano quiquiaari. Teecojuuari, teje Pueyaso shacantuuca mueranacujuquiaari Moisésacuajani. Cuno caaja tiotiuuri seya nanaca majiriutiasaquiuhuj, Pueyaso jiyanooniuria puetunu Israel pueyajanaa. Tariucujaja puetunu cuno casaajinijianaa cua pohuatasano nijaniya.

<sup>6</sup> Pueyaso Secojoua tia jaara tari naa maninia tiasano quiquiaari puetunu na casamitajanaa, na nuhuaji, pueyacuara secojonaari pueyaracaanu tiuquijioquiaari Pueyaso Shuriucua quiquiojinia. Nojoriiri tii tiuquijioquiaari nojori miiniuria taa Moisés Rootasanojinia sequeyacuajani. Maja cutaraari nojori tiuquitianu quiquiaari Pueyaso Quishaquijianaa sohuacamara. <sup>7</sup> Saaja nojori jiyaniija cutaraari tii tiuquiquiaari saaja rupaquijia puetunu marijarajanaa. Na tiuquishacari Pueyaso Quishaqui, seya nanaca pataquiaariiri Pueyaso jiyanooniuria nojuaja, narta Israel pueyano, sesa nojori miishanojiniji. <sup>8</sup> Naa Pueyaso Quishaqui quiniucua mishiquionucua pueyacuajitij, Pueyaso Sohanuuri pa niishitiya, pueyari juhuanouaja maja na naata rpuenu quiquiaari Pueyaso. <sup>9</sup> Naacuajitij, puetunu cunojuanaari quiquiaari juhua miriqui miishano, saniniuujia nio pa quishacari pa niishiniuria pocuara Secojonajanaa miishano pocuara. Puetunu pueyacuara secojonaa catijasano casaajanaari miriqui miishano quiquiaari saaja. Naajuhuj, pa supuetanaa niqutiojosano casaa Pueyaso jiyanooniuria nojorini, puetunu naa miishanojuanaari miriqui miishano quiquiaari. Naacuajitij, cunoori maja na naata cuno pueya jiuujia jeezanu seetanjuanaa, juhuajaniya nojori rpuenu Pueyaso. <sup>10</sup> Naaratej, cuno tariucuacaanu rootasanoori saaja panishaaquiaari Pueyaso cuaara na sanitiquiaariijaatijia quiarinio rupaata. Cuno tariucuacaanu rootasanoori pueya niishitiquiaari teyano sumatuuteja miaqueshiyani, teyano mashacateja ratushiyani. Naajuhuj, nojoriiri niishitishaaquiaari taacari pueya jeequeya na cuaqueyani, nojori casaanio, juhua maninia jeequejosano nojori quiniuria Pueyaso niquiara.

Puetunu naa pueya miishanojuanaari maja na naata pueya jiuujia jeezanu sesa nojori miishanojiniji.

<sup>11</sup> Quiari naataja saniniuujia, Jesucristoori pocuara Secojonajanaara jiyatesaaquiaari, Pueyasojiniji na masenura Pueyaso jittiasano pajaniyarano. Cuno quiquio, tee na secojoquiaa na Que pocuaracuajani, cunoori seetanujuanaa Pueyaso quiquio jiyocuacaanu, maja pueyano tiasano. <sup>12</sup> Naa Cristo tiuquishacari na Que quiquiojinia Pueyaso na jiyanootiniuria pajaniyatej, nojuajaari maja na tiuquitianu quiquiaari cabra nanaca, juunu niqiuohua nanacanio. Nojuaja cutaraari tama na nanacatajaaja Pueyaso jiyanootiquiaari pajaniya. Nojuajaari maja pueyaracaanu na tiuquijionu na Queecua, taa mijiria pueyacuara secojona jiyaniijianucua miiquiaaricuaani. Maja. Nojuajaari na Queecua tiuquiquiaari puetunujuanaa. Naa pocuara na cusunucuatej, na Queeri Neyanuucua tiuujiaa jiyanooquiaa puetunujuanaa. Naacuajitij, majaari Pueyaso shuriucujaji pa taanuusaanu quiniutianiya. <sup>13</sup> Pueyasoori Moisés niishitiquiaari, pueyano jaara macu masaqui tiuquimia, jaara na quiarejuhuaj, jiyacaritij, nojuajaari juhua curuutuuca Pueyasora. Naacuajitij, cuno pueyanoori maja na naata narta pueya rupuenu. Majaari na naata Pueyaso Secojoua tiajinia tiuquiniujuhuaj. Naajaa, nojuajaari na naata jeequesano quiniuhua, seru nanaca jaara nocua majiriutiasaaquiaari. Cabra nanaca, juunu nanaca, niyacoo juunu catijasano juacani, puetunu cunajuanaari maninia quiquiaari pueyara, juhua jeequesano nojori quiniuhua Pueyasora. <sup>14</sup> Naa pueya cuaqueya quiniucua juhua jeequesano saaja seya nanacatacuaatej, Cristo nanaca cutaraari seetanujuanaa cumaacaraca pueya jiuujia na jeequenura seetanujuanaa, puetunu sesa casaajiniijianaa. Naatej, taa pueyacuara secojona jiyaniijianucua tiuquitiaquiaari seru nanaca Pueyaso Quishaquicuaani, pueya jiyanooshaanura, Jesucristoori naa miiquiaarjiuhuj. Pueyaracaanu quijia na quiniucua, Jesucristojuanaari tama na nanacajaaja tiuquitiaquiaari Pueyasocua, pa jiyanooshaanura puetunu sesa pa miishanojinijianaa. Nojuajaari tojetaarucujanaa sesa miyashijia quiquiaari. Naacuajitij, na nanacaari poojia cajitiquiaa, nocua pa tiuushacari. Majaari socua pa jiyaniniu pa naata tama pa cuaqueyajaaja jiyanootiniu Pueyaso tama pa miishanotajaaja. Naacuajitij, quiarijia cutaraari pa naata pa Pueyasora poonijionu shitimia, seetanujuanaa jiyanooshano pa quishacari.

<sup>15</sup> Jesucristo cusunucua pocuara, nocua pa tiuushacari, nojuajaari pa jiyanootiniara quiquiaari taa quiarinio Pueyaso rupaa sequeyacuajani. Naajuhuj, noo pojori, Pueyasocua tiuujiaa mijiria Jesu niyacarijiani, sesa nojori miishanoori jiyanooshaaquiaari Jesu cusunuta quiari naatajajuhuj. Naacuajitij, puetunu Pueyaso saquiriojosano pueyapuejanaari na naata puetunu Pueyaso niqutiojonu panishanojuanaa masenu, taa na sequequiaari niqutionu seetanujuanaacuajani, pueyaracaanu shuquiriaatia jatiqii pa quiniuria nata. <sup>16</sup> Pueyanaa, pa shaajeyaquishacarijia, paari pa miiniu panishano naajiotanu niishijiani. Paari naa miijiani pa casami serotasaaanura maninia, teyano pueya pa panitiaa nojori jitianura pa casamicuajani pa shaajenu nuhuaji. Naacuajitij, paa jaara tari jamosaareni, pueyari maninia miiquiaa taa pa naajiotaquiaaricujani, saminiio pa quishacarijia. <sup>17</sup> Naacuajitij, saminiio pa quishacarijia, najuhuaanaari pa naajiotasano. Pa shaajesacari, jiyacari cutara pa casamiiri niqutiojosano. <sup>18</sup> Tariucuaaanu naajuhuj, seya nanacaari shootesaaquiaari, Israel pueya niishiniuria Moisés Rootasanoori seetanujuanaa, nojori tojishocoriquiano. <sup>19</sup> Naa quiquiaariiri: Moisésri puetunu Pueyaso rootasanojuanaa nojuaja caminiujuquiaari puetunu Israel pueya niquiarajanaa. Na nuhuaji, Moisésri juunu niqiuohua nanaca, cabra nanaca cojitiquiaari mohuacata. Cunojinia shitiaquiaari borrego cajaca naatusu hisopo cashacucuaataari. Cunota, mohuacanacu majiriutiaquiaari Pueyaso Rupaa na naajiotasanoocuaari, puetunu Israel pueyacuajanaanio. <sup>20</sup> Jiyacaritij, nojori sequequiaariiri: “Nio nanacaari pa niishitiya Pueyasoori seetanujuanaa pajaniyara miiniutianiya puetunu na sequesanojuanaa, paa jaara na rootasano tojijiaa quirini”. <sup>21</sup> Moisésri Pueyaso Secojoua tiaacua majiriutiaquiaari nanacajuhuj, puetunu Pueyasora poonijiotajara shipinijosano casamiicujanaanio. <sup>22</sup> Moisés Rootasanojiniji niishishiyacuajaari, quera puetunu casaajanaari saaja

nanacata juhua jeequesano quiya Pueyasora. Pueya miishano sesani, cuno cutaraari maja na naata jiyanooshaanu nanaca jaara shooteyaquishaare.

*Sesa pa miiniuuri jiyanooshaaquiaa Cristo cusunuucua pocuara*

<sup>23</sup> Mijiria Pueyaso Secojoua tia, puetunu na casaatajanaa quiniuucua juhua jiyocuacaanu casaa naaqui, seya nanacaari maninia quiquiaaricujaja cuno mijiria casami quiniuria jeequesano. Saniniuujia, jiyocuacaanu casaa quiniuria jeequesano, socua maninia nanacaari panishaaquiaari seya nanacajiniji. <sup>24</sup> Majaari Cristo tiuquitianu quiquiaari seya nanaca mijiria pueyano tiasano Pueyaso Quishaquijianaa. Cuno quiquioori saaja juhua jiyocuacaanu Pueyaso quiquio naaqui. Cristo cutaraari seetanujuanaa Pueyaso Quishaquijianaa tiuquiquiaari. Nojuajaari tii na Que Pueyaso secojoquiaa pocuara. <sup>25</sup> Mijiria pueyacuara secojonaa jiyaniijianucuaari puetunu marijjarajanaa pueyaracaanu tiuquiiioquiaari Pueyaso Quishaqui saaja seya nanacata, pueya na jiyanootiniuria Pueyaso. Jesucristo cutaraari maja naa na miiniu quiquiaari. <sup>26</sup> Jesu jaara Pueyaso pa jiyanootiriquia puetunu marijjarajanaa taa pueyacuara secojonaa jiyaniijianucua miiquiaaricuaani, nojuaja maara jiya shipinishaanujiniji mosaariquia puetunu marijjarajanaa. Quiari naafaja saniniuujia, Jesucristoori mijiria rasaquiaari tama na cuaqueyajaaja na tarinitianura pocuara na mosaanura, pueya jiyanooshaanura puetunu sesa nojori miishanojinijianaa. Majaari socua na pacutesaanu quiniutianiuhua monu. Naa na mosaanuucuatej, cunoori tariucuaja puetunu nocua tiuujiaa pueyajanaa jiyanooshaanura. <sup>27</sup> Naatej, taatucuaa pueyani, nojoriiri shaajecoriquiano. Majaari nojori samiitiaconuhua mijiria nojori quiniuhua, socua na cusunuhua juhua coteenu na cusonu. Nojori shaajenu nuhuaji, nojoriiri saaja sashiya Pueyaso nequesoreenura nojori. <sup>28</sup> Naajuhuj, naa Jesucristo mosaanuucua jiyacaritij, saaja cunojuanaari na mosaanu quiquiaari, queraatia pueya jiyanooshaanura sesa nojori miishanojiniji. Naacuajitij, pocua na muetasacariuhua, majaari jiyacari socua na mosaanu quiniutianiuhua pueya jiyanooshaanura sesa nojori miishanojiniji. Jiyacaritij, nojuajaari saaja nocua tiuujiaa rijionuucua tiuquiniutianiuhua, noo pojoriria canapuete na sashiyacuajani.

## 10

<sup>1</sup> Moisés Rootasano pueya miishocoriquianoni, pueyacuara secojonaa miishocoriquianojuhuj, puetunu cunojuanaari juhua seetanujuanaa Pueyaso jiyocuacaanu casaa naaqui, Pueyaso racatasano Jesucristoocua tiuujiaa pueyarano. Moisés Rootasano tojitiajaca pueya cutaraari puetunu marijjarajanaa na seya puecootequiaari, Pueyaso jiyanooniuria nojori juucua. Naajaa, majaari na naata seetanujuanaa maninia miijiaa pueyara na jatanishaanu seya nanacata. <sup>2</sup> Naajuhuj, pueya miishacari puetunu Moisés Rootasanojuanaa, naajaa, nojoriiri maja seetanujuanaa tama nojori jiuujiaaja na cajitiniu quiquiaari. Cunora, majaari nojori tarinitianu quiquiaari nojori seya puecootenu tama sesa nojori miishanoocuarajaaja. Seya nanacaari maja na naata tuujunu quiquiaari sesa nojori miishano, seetanujuanaa juhuajaniya nojori quiniuria. <sup>3</sup> Naa seya puecoosacari puetunu marijjarajanaa Pueyaso jiyanooniuria pueyatej, cunoori saaja nojori niishitiquiaariuhua tarijia nojori miishano sesa. <sup>4</sup> Paari seetanujuanaa niishiyacuajani, juunu nanaca, cabra nanacanio, cunoori maja sesa pa miishano tuujujua seetanujuanaa.

<sup>5</sup> Cunora, tariucuacaanu Pueyaso Rupaajinia, mijiria Jesucristo nishacari na sequesocoriquianoori juhuacarijia naajiotasano quiquiaari. Naa sequeyari:

“Cua Pueyasonaa, janiyacuajaari niishiyani, majaari quioojia quia cajitiniu quiquiaa seya puecoosacari quiocuara, puetunu nataacuacajiniji pueya niqutiojosacari quiarajuhuj. Saniniuujia, quiaari cuaqueyaraca cua quiniuria cua jiyateree, quiocuara cua mosaanura. <sup>6</sup> Majaari quia timiniu quiquiaa seya catijasacari quiocuara, naajuhuj pueya shootesacari na seya nanaca, quia jiyanooniuria nojori sesa nojori miishanojiniji. <sup>7</sup> Naaratej, janiyari quia sequeyani: ‘Niya quiyacuajani quia miiniuria quia panishano cua Que Pueyasonaa, taa janiyajiniji tariucuacaanu naajiotasaaquiaricujani’ ”.

<sup>8</sup> Moisés Rootasanojiniji pueyari maatia niishitiojosaaquiaari nojori puecootenura tama na seyajaaja Pueyasooacara, na nataacuacajininio nojori niquitiojonura nerajuhuaaj. Nojoriiri niishitiojosaaquiaarijuhuaaj nojori catijianura na seya Pueyasooacara, tama nojori seya nanacajaaja shootesaanurajuhuaaj, sesa nojori miiniuucua. Naajaa, Jesucristo sequesanojiniji, paari quiarjia niishiyani, puetunu naa pueya miishanojuanaari maja na timitiniu quiquiaari Pueyaso. <sup>9</sup> Nocuaji, Jesucristoori naa sequequiaari na Que: “Niya quiyacuajanijia, cua miiniuria quia panishano”. Naacuajitij, Jesucristojuanaari mijiria niquiaari pocuara na mosaanura, seetanujuanaa jiyanooshano pa quiniuria cutara, maja najuhuaana seya puecoosaanura socua. <sup>10</sup> Pueyaso tojjia na quiniuucua, Jesucristoori tama na cuaqueyajaaja tarinitiaquiaari pocuara na mosaanura, tojetaarucujanaa jiyanooshano pa quiniuria pueyaracaanu. Naacuajitij, na Que Pueyasoori juhua tojetaarucujanaa sesa miyashijacara pa jiyatequiaari, seetanujuanaa na pueya pa quiniuria tama nerajaaja.

<sup>11</sup> Israel pueyacuara secojona pueya poonijosacari Pueyaso Secojojua tiajinia, nojoriiri pueyaracaanu seya puecooquiaa narta pueya miishanoocua sesa. Naajaa, na nojori miishanoori maja seetanujuanaa na tuujunu pueya miishano sesa. <sup>12</sup> Saniniujia, Jesucristoori tama na cuaqueyajaaja tarinitiaquiaari pocuara na mosaanura niyacutesanojinia. Cunojuanaari na mosaanu quiquiaari. Majaari socua na pacutesaanu quiniutianihua monu. Na cusonuucua pa niti, puetunu nocua tiuujia pueya sesa miishanojuanaari tojetaarucujanaa jiyanooshaaquiaa. Naa na tucatanu nuhuaji Pueyaso miiniu panishano pueratej, nojuajaari na Que miaquetajara cajiquiaari. <sup>13</sup> Quiarjia tii sashiyari, Pueyaso cuaara na paraa shocotare puetunujuanaajaatijiaj. <sup>14</sup> Naa niquiriyatu pueyano mosaanuucuatej, puetunu nocua tiuujia pueyajanaari maninia miijiacara jatanishaaquiaa, tojetaarucujanaa maninia pa quiniuria, Pueyaso rupuejaca pa quiniuria pueyaracaanu. <sup>15</sup> Pueyaso Sohuanucujajaari naa pa niishitijuhuaaj naa Pueyaso sequesacari tariucuacaanu na rupaajinia:

<sup>16</sup> “Pa Jiyaniijia Pueyasoori naa sequeya: ‘Nio pa quishacari nuhuaji, janiyari tamaatia miiniutianiya cua saquiriojosano pueyani, quiarinio cua rupaacua nojori tiushacari. Janiyari quiarinio cua rupaa nianutaniya nojori jiuujiajiniani, na tojjia nojori quiniuria. Naajuhuaaj, janiyari juhua na naajiotanutaniya nojori niishitijajiniani. <sup>17</sup> Janiyari puetunu sesa nojori miishanojuanaa niyjetanutaniya seetanujuanaani’ ”.

<sup>18</sup> Naacuajitij, sesa pa miishano jaara tari seetanujuanaa jiyanooshano quiya, cunora, maajari tari na panishaanu seya puecoosaanura, sesa pa miishanojiniji pa jiyanooshaanura.

#### *Pueyaso pa rupuere jeequesano poojiata*

<sup>19</sup> Naacuajiti cua panishano cuarta Pueyaso pueyanaa, quiarjia cutara pa naata pa puereyaquiniutia tiuquijionu Pueyaso Quishaquijianaa, Jesucristo shootenuucua na nanaca pocuara. <sup>20</sup> Nojuajaari quiarinio nucuaco pa jaatiaquiaa na Queecua. Nojuajaari juhua pocuaji nuunuquiaari Pueyasooacara. Mijiria Pueyaso Secojojua tiajiniani, Pueyaso Quishaquiiri shiquiaruque toqueta mishiquionucua quiquiaari, pueya tiuquitiaquiniuria Pueyasooacara. Cuno shiquiaruque toque cutaraari sutequiaari Jesu cusosacari. Cunocujajaari pa niishitiya, pocuajiiri juhua nuunusano quiya Pueyasooacara. Neyanu Jesucristocujajaari cuno quiarinio nuu. Nocua pa tiushacari, paari pueyaracaanu rishijiacara jatanishaaquiaani juhua nojuajuhuaaj. <sup>21</sup> Nojuacuajaari pocuara Secojonajanaa cutara. Na Que Pueyaso secojoquiaari puetunu Pueyaso muerasuucarajanaa. <sup>22</sup> Cunora, Pueyasooacara pa catecanoriquia seetanujuanaa pa paniniutia nojuaja. Nojuaja pa secojoriquia, seetanujuanaa nocua pa tiuuniutia, maja quenaaja nocuaji pa taacanunuta. Naa pa rupuerequia nojuaja, jatanishano jiuujiata, juhua poojiacua Jesu nanaca majiriutiasano quishacari. Naajuhuaaj, puetunu sesa pa miishanojuanaa cuaara jiyanooshano quiiria, naatej, taa pa cuaqueyacuanaa, pa nanasacari maniniuniacu mohuacata. <sup>23</sup> Naa jaara moojinia tiuquinijosaaquiaari, niaari maninia pohuataquiaari pueya niqiara Jesuucua nia tiuuniujiniji. Nocua nia tiushacari, niaacuajaari niishiya puetunu Pueyaso sequesanojuanaari pajaniyara tohuateenutaniya, pueyaracaanu



shuquiriaatia pa quiniuria nata. Majaari nia taacanuunu nocuaji. <sup>24</sup> Parta Pueyaso pueyacua tacaajiaca pa quiriquia. Panijiaca pa quiniuria pa shiniujiutiooiquia, maninia miijiaca pa quiniuriajuhuaj. <sup>25</sup> Noojiaqueya parta Pueyaso pueyari tari jiitiquiocanu maja na rerejonura narta Pueyaso pueyata. Majaari naa nia miiniujiuhuj. Maninia cutaraari pueyaracaanu pa rerejonura parta Pueyaso pueyata, pa shiniujiutionura. Naa pa miiriquia pueyaracaanu cutara, pa niishishacari pa Jiyaniijia tiuquiniuuri tari catecanoya.

<sup>26</sup> Nia niishiri pueyanaa, maatia pa niishiniu nuhuaji seetanu Pueyaso rupaajanaa, paa jaara saaja sesa miijioquiaa tama pa panishacarijiaajani, ¿cantucua socua pocuara cusonu pacuterohua saajaniuhuj? Shaaqui. <sup>27</sup> Naa sacuaraatia miijiacani, nojori cuara niishiiria, nojoriiri cocuaatia miya. Nojori jaara nojori jiuujia tacatoyaquiri sesa nojori miiniujiniji, nojoriiri jyanohua saniitiosaanutaniya. Narta Pueyaso paraata cojiritiasaanutaniya quejooonu mani quiquiojiniaari pueyaracaanura. <sup>28</sup> Pueyano jaara Moisés Rootasano tojiyaquiuaari, querajaa pueya jaara nocuara saquiriojotaquiuaari, nojori sequesanoori seetanujuanaa quiquiaari. Naacujitij, majaari nocua na taraajenu quishaaquiuaari na mosaanura. <sup>29</sup> Moisés Rootasano tojiyashijiaca jaara naa miishaaquiuaricuaa, ¿paateeri jiyaniyanijia Pueyaso Nyanu soojeaca jiyanooshaanutaniya, na nanaca shootesaanu jiyatejaca juhua najuhuanaratej? ¿Noo pojoritiiri jiyanooshaanutaniyajuhuj, Pueyaso Sohuanuucua rimiaaquejaca sacuaraatiatej? ¡Maja! Pueyaso Sohuanuuri nojori cumaquiniu paniriquiaa juucua. Jesu nanacacuaajaari Pueyaso jyanootiquiaari nojori, Pueyaso pueya nojori quiniuria juucua. Naacujitij, Pueyaso Nyanu soojeaca pueyari socua jyanohua saniitiosaanutaniya Moisés Rootasano tojiyashijiaca pueyajiniji. <sup>30</sup> Paacujaari tari tojiquiaari naa Pueyaso sequesanonni: “Janiyacuajaari naminiani. Janiyari sesa miijiaca saniitionutaniyani”. Naa naajiotasaaquiariariuhuj: “Pa Jiyaniijia Pueyasoori na pueya nequesoreenutaniya”. <sup>31</sup> ¡Jyanohua puereeta quiniutianiya cutaraari Pueyaso jyanooniu ruuretajaca pueyara, Pueyaso nequesoreesacari nojori!

<sup>32</sup> Pueyanaa, tariucuaaanu naquiya nia miishaanu nia niishiriquia, niaa jaara shushajanaa Jesuucua tiuquiaari. Naa pueya miitiasacari naquiya nijaniyatej, niaari juhuajaniya rejeretaquiuaari saaja. <sup>33</sup> Noojiaqueya nijaniyajinijinioori cararaatia macaatisaaquiuaari. Niaari pueya niquiara naquiya miishaaquiarijuhuaj. Niarta Pueyaso pueya niquishacari naa nia miishaanutej, nojoriiri na puereyaquiniutia nia cojiquiaari saaja, niaacua nojori taraajesacari. <sup>34</sup> Naajuhuj, niarta Pueyaso pueyajinijinio jaara nujuatejosano quiquiaari nujuatejojuajinia, Jesu tojitiajaca nojori quiniuucua, niaari nojoriicua tiuquiiioquiuaari, nojori nia cumanijianura nocua nia taraajenuucua. Naajuhuj, nia paraa jaara nia jittiasano casami riutiocojoquiuaari tama nojoririjaaja, nojori soosano Jesu pueya nia quiniuucua, niaari juhuajaniya nojoriria tarinitiaquiuaari saaja. Niaari saaja shuquiriaatia quiquiaari nia niishishacari niaari jiyocuaaanu jittiaa socua maninia casaa cuno casamijiniji, pueya jaariuutiasano nijaniyajinijini. Cuno, Pueyaso jittiasano niaaranoni, cunoori shaajeyashijia casami cutara. <sup>35</sup> Naatej, taa juhuajaniya naquiya miiniu rejeretajaca nia quiquiaaricujani, Pueyaso sequesanoocua tiuujia nia quiniuucua, naa Pueyaso sequesanoocua tiuujia nia quiriquia pueyaracaanu. Pueyasocujaari jyanohua maninia miiniutianiya nocua tiuuniu tarinitiaashijia. <sup>36</sup> Naquiya nia miishacari pueyaracaanu, juhuajaniya nia rejeretariquia saaja, maninia nia tucuanura puetunu Pueyaso panishano nia miiniurijanaa. Naacujitij, niaari puetunu Pueyaso sequesanojuanaa masenutaniya, pueyaracaanu shuquiriaatia nia quiniuria. <sup>37</sup> Tariucuaaanu Pueyaso sequesanoocujaari naa naajiotasano quiya:

“¡Niaaj! ¡Quera tiuquiya pueyacua Niriquiano! Maja na tarishiniu. <sup>38</sup> Cua jiyanooshano pueyari pueyaracaanu rishijiacara jatanishaanutaniya saaja Quiyanuucua nojori tiushacari. Saniniuujia, tamonu pueyano jaara nocua tiuuniu tarinitiare, nojuajaari cua soosano pueyano quiniutianiya”.

<sup>39</sup> Cuno pojoriiri saniitiosocoriquiano seetanujuanaa. Pajaniya saniniuujia, paa cutaraari maja jiyano pueyajinijinioni. Paacujaari pa Jiyaniijiaacua tiuujiacani, pueyaracaanu

nata pa quiniuria shuquiriaatia.

## 11

### *Pueyasooocua tiuuniujiniji pohuatasano*

<sup>1</sup> Pueyaso sequesanoocua pa tiuushacari, paari niishiyani paari puetunu Pueyaso sequesanojuanaa masenutaniyani. Nocua pa tiuushacari, paari maatia niishiyani puetunu na sequesanojuanaa pajaniyarano pa niquishoo casaani, cunoori seetanujuanaa quiya.

<sup>2</sup> Noojiaqueya pa supuetanaajininioori seetanujuanaa Pueyaso sequesanoocua tiuujiaa quiquiaari. Naaratej, Pueyasoori nojorijiniji naa sequequiaari: “Cuno pojorini, nojoriiri maninia cua pueya, cua sequesanoocua nojori tiuuniuucua seetanujuanaa”.

<sup>3</sup> Pajaniyara naajuhuj. Tariucuacaanu Pueyaso Rupaacua pa tiuushacari, paari niishiyani Pueyasoori jiya shipiniquiaari saaja na pocuanuta. Naacuajitij, puetunu pa niquishano casaajanaari shipinishaaquiaari niquishoo casaajiniji.

<sup>4</sup> Supuetana Abel tiuuniuucua Pueyasooocua, Pueyasooocua na catijiasanoori socua maninia quiquiaari Pueyasora tarajanu Caín catijiasanojiniji. Naa Abel tiuuniuucua Pueyasooocuatej, Pueyasoori na jiyatequiaari maninia na pueyano na quiniuria. Pueyasoori Abel catijiasano timitiaquiaari, nocua Abel tiuuniuucua. Cunora, tarajanu Caínri Abel moquiaari. Naajaa, naa macu na quishacaritij, nojuajaari pa niishitiojiyajaa Pueyasooocua pa tiuuniuria taa nojuaja tiuquiaricuaani.

<sup>5</sup> Supuetana Enoc quiniuucua Pueyasooocua tiuujia, Pueyasoori puetunujuanaa na riquiaari jiyocuacaanu, mijiria na shaajeyaquiniuucujaji. Narta pueya pajesacari nojuaja, majaari tari na quiniu quiquiaari. Pueyasoori tari na riquiaari. Tariucuaaanu Pueyaso Rupaajinia, nojuajinijiiri pohuatashiyacuaja, Enocnaari Pueyaso timitijia pueyano quiquiaari mijiria na quishacarijia. <sup>6</sup> Seetanujuanaari, paa jaara Pueyasooocua tiuyashijia quirini, majaari pa naata timitiniu Pueyaso. Naacuajitij, cante Pueyaso niishiniuucua jiaatiaani, nojuaja cuaara tiuria Pueyasoori seetanujuanaa quijia. Nojuaja cuaara tiurijuhuj, Pueyasoori na secojonuujuaca tojiquiaa. Nojori panishano miiquiaa nojoririjaariuhuj.

<sup>7</sup> Pueyasoori supuetana Noé numootequiaari nojuajaari nio jiya pajaashitianiniutianiya, puetunu mijiria sesa miijiacajanaa na shaajanura. Pueyasoori na sequequiaarijiuhuj puereetuca buque na shipininiuria tii na tacatajara pajaacuaji. Jiyacaritij, Noeeri maja na niishiniu quijia pajaa. Naajaa, Pueyaso sequesanoocua na tiuuniuucua, nojuajaari Pueyaso tojiquiaari. Naacuajitij, nojuajaari necocuata, puetunu necohuatajanaa cureequiaari, necohua niquiocohuatajuhuaj. Puetunu narta mijiria quiijia pueyajanaari casonuuquiaari pajaajinia, nojori tiuyaquiniuucua Noé pohuatasanoocua Pueyasojiniji. Noé cutaraari juhua sesa miyashijia jiyatesaaquiaari pueyaracaanu Pueyasota rishijia na quiniuria, Pueyasooocua tiuujia na quiniuucua.

<sup>8</sup> Abrahamri Pueyasooocua tiuquiarijiuhuj. Pueyaso sequesacari nojuaja tamonu jiyajiniara na pacunura, Abrahamri na tojiquiaari. Tama na jiyajinijiaaja na quiasacari, majaari na niishiniu quiquiaari tee cuniquiria na quiaani. Nojuajaari saaja niishiquiaari Pueyasoori na quijia na niquitionutaniya tama na jiyaranojuaja. <sup>9</sup> Pueyaso niquitiosocoriquiano jiyajinia na tiuquishacari, Abrahamri cuno jiyajinia quiquiaari juhua rucanejojua pueyano. Abrahamri juhuanujuaja maja cuno jiya camaru na quiniu quiquiaari. Naajaa, Pueyaso sequesanoocua tiuujia quiquiaari pueyaracaanuuri. Nojuajaari saaja seya cajacajiniji shitiasano suhuorotujinia quijia quiquiaari pueyaracaanu. Abraham niyanu Isaacri naa quijia quiquiaarijiuhuj, Isaac niyanu Jacobonio. Pueyasoori cuno pojori sequenu pacutequiaarijiuhua coteenujuanaa na sequesano Abraham. Naacuajitij, nojoriiri Pueyaso sequesanoocua tiuujiaa quiquiaari pueyaracaanujuhuaj.

<sup>10</sup> Pueyaso jaara Abraham sequequiaari, nojuajaari pueyaracaanu na quijiarano quiqiuo na niquitionutaniya, Abrahamri niishiquiaari Pueyasoori miriqui sequeriquiaa tama na shipinishano tiacajinijiaaja. Cuno pueyaracaanu rishijia tiacaari Pueyaso niishiriojosano tiaca na saquiriojosano pueyarano. Abrahamri cuno tiacara sashijia quiquiaari pueyaracaanu, Pueyaso sequesanoocua na tiuuniuucua.

<sup>11</sup> Naajuhuj, seetanjuanaa Pueyaso sequesacari Abraham, nojuaja na muetutenu-taniya, Abrahamri jiyacari tariucua saaquiano quiquiaari. Neco Saaraari puera motaja quiquiaarijuhua na manajenura. Naajaa, Abrahamri niishiquiaari Pueyasoori cumaacaraca quijia na sequesano na tohuateenura. Naa Pueyasooocua na tiuuniu-ucuatej, Pueyasoori na cumaquiquiaari neco na manajonura. <sup>12</sup> Naacuajitij, mueya shipiniyashijia saaquianoori mueya mueratequiaari. Cuno neyanuucujinío supueno pueyari queraatiara canequiaari, queraatiare juhua riya, serojiyaquishoo, juhua shon-iniacu caminia shuriuquioco paajia jaaquia.

<sup>13</sup> Puetunu cuno pa supuetanaajanaari Pueyasooocua tiuujiaaja shaajecoquiaari. Nojoriiri juhuanujuaja maja na jiitianu quiquiaari seetanjuanaa Pueyaso sequesano nojori na niqutiosocoriquiano. Naajaa, seetanjuanaa nojori tiuushacari Pueyasooocua, nojoriria, Pueyaso sequesanoori juhua tariucua tucuaaanuji nojori niquishano quiquiaari. Nojoriiri na timitiaquiaari juhua tariucua nojori jiitiasano. Naacuajitij, nojoriiri juhujaniya quiquiaari juhua rucojuaca nojori quishacari mijiria. Nojoriiri niishiquiaari, mijiria nio jiyani, majaari seetanjuanaa nojori quiquiorano. <sup>14</sup> Naacuajitij, paari niishiyani nojoriiri tamonu jiya jiitianuucua jiaatariquiaa, pueyaracaanu nojori quiquiorano cutara. <sup>15</sup> Nojori jaara saaja mijiria jiya camaruhua quiniuria panijaca quiquiaari, nojori maara na supuetujua jiyajiniara riujuuquiaariuhua. <sup>16</sup> Saniniuujia, nojori cutaraari socua maninia jiya jiitianuucua jiaatiaquiaari, pueyaracaanu nojori quiquiorano cutara. Cunoori jiyocuacaanu quiquo, Pueyaso jeenucuasano nojoriria. Naaratej, majaari Pueyaso caririqiniu quiquiaari nojori sequesacari: “Pueyasoori canaa Jiyaniijia”. Nojuacuajaari tari jeenucuasano tiaca jiitiaa nojoririano jiyocuacaanu.

<sup>17-18</sup> Pueyaso sequesano Abraham na mueratesano mueya jaara tari mashajaniyujua quiquiaari, Pueyasoori Abraham saniquiaari, na niishiniuria nojuajate seetanjuanaa na tojijia. Naacuajitij, na sequequiaariiri cuaara na panishano niyanu moora, nocuara na catijiasocoriquiano. Cuno neyanu Isaacuajaari Pueyaso sequesano quiquiaari, nojuajiniji canenutaniyari queraatia pueya. Naajaa, Pueyaso sequesacari Abraham, neyanu na monura, nojuajaari maja na ruoretanu quiquiaari Pueyaso. Nojuajaari tari Pueyaso sequesanoocua tiuuriquiaa saaja. <sup>19</sup> Seetanjuanaa Abraham tiuuniuucua Pueyasooocua, nojuajaari niishiquiaari Pueyaso na naata neyanu Isaac samiitianiniuhua, nojuaja jaara na more. Naacuajitij, quera Abraham mosacari neyanu Isaac, Pueyasoori nocuaji na tenujuquiaari, tari maatia na niishishacari Abrahamri seetanjuanaa na tojijia. Naacuajitij, Abrahamri neyanuniyujua jaatucuquiaariuhua shuquiriaatia na quiquiojiniohuara, juhua macu samiitianishanohua. Naa Abraham miishanoni, cunoori miriqui quiya pajaniyara taa Pueyaso miiquiaari Neyanu quiari naatajacaani.

<sup>20</sup> Isaac tiuuniuucua Pueyasooocujuhuj, nojuaja jaara saaquiano quiquiaarijuhua, nojuajaari necohua sequequiaari, Jacobo, Esaúnio: “Pueyasoori jiyanoohua maninia miiniutianiya niaara, niaacuajinío supueno pueyano, taa na sequequiaari janiyacujani”.

<sup>21</sup> Jacoboori Pueyaso sequesanoocua tiuujia quiquiaarijuhua. Naacuajitij, quera na cusonu panishacari, nojuajaari neyanu José niquiohua sequequiaari: “Pueyasoori jiyanoohua maninia miiniutianiya niaara, niaacuajinío supueno pueyano”. Naa na sequenu nuhuaji na juhuatej, nojuajaari na natacaacua tanishiquiaari. Pueyaso secojoquiaari na timiniutiari, na niishishacari Pueyasoori pueyaracaanu miiquiaa puetunu na sequesanojuanaa.

<sup>22</sup> Jacobo niyanu Joseeri Pueyaso sequesanoocua tiuujia quiquiaarijuhua. Naacuajitij, quera na cusosacari, nojuajaari niishiquiaari Pueyasoori tamacari Israel pueya mashiquiniutianiuhua Egipto jiyajiniji. Naacuajitij, nojuajaari narta Israel pueya sequequiaari nocua nojori taraajenura. Nojuajaari nojori sequequiaari maja nojori tiujianura na nucuhua Egipto jiyajinia, nojori jaara quiojorohua Pueyaso niqutiosocoriquiano jiyajiniara.

<sup>23</sup> Moisés queya quiniuucua Pueyasooocua tiuujiaaja, nojoriiri Moisés jamoquiaari jaara shusha rasaaquiaari, mueya maniniuniyujua na quiniuucua. Naa na shocojoquiaariiri jiuujianaraca raca, pueyaracaanu jamosano na quishacari. Egipto jiyaniijia Faraónri

tarijia sequequiaari, puetunu Israel pueya niquiocohua shusha roosano canuujuanaa cuaara moojinia quejoosaaria. Naajaa, nojoriiri cuno sequesano tojiyaquiquiaari nojori puereyaquiniutia saaja, Pueyasooqua tiuujiaca nojori quiniuucua.

<sup>24</sup> Naajuhuj, Moisés quishacari tariucua cumantumaca, Pueyasooqua tiuujiaca na quiniuucua, nojuajaari na canashitinia Faraón niyatu tamacaquiaari. Nojuajaari tama sequequiaarijiaaja: “Majaari Faraón jinianu cua quiniu paniniu. Janiyacuajaari Israel pueyanoni”. <sup>25</sup> Egipto jiyaniijia jinianu na quiniuucua, Moisésri na naata juhuajaniya miiniu quiquiaari puetunu na miiniu panishanojuanaa, shuquiriaatia na quiniuria. Naajaa, nojuajaari niishiquiaari cuno shuquiriaatia quiniuuri saaja rupaquijia mijiria. Nocuaji, majaari na tamacanu quiquiaari narta Israel pueya, shuquiriaatia na quiniuria tamajaaja. Nojuaja cutaraari narta Israel pueyacuata taaajequiaari, Egipto jiya jiyaniijia poonijiotenuucua nojori puera. Cunora, nojuajaari niishiriojoquiaari nojuaja cuaara cojiritiasaaria naquiya miishaanu narta Israel pueyatajuhuj. <sup>26</sup> Pueyaso sequesanoocua tiuujiaca na quiniuucua, nojuajaari niishiquiaari Pueyasoori na tojitiajaca miiniutianiya maninia pueyaracaanu cutara. Nocuaji nojuajaari saquiriojoquiaari narta Israel pueyata soosano na quiniuria mijiria, maja puetunu Egipto casami jitiaja na quiniuria mijiria, Faraón jinianu na quiniuucua.

<sup>27</sup> Pueyaso sequesanoocua tiuujiaca Moisés quiniuucua, na nuhuaji, nojuajaari Israel pueya jaatiaquiaari Egipto jiyajiniji. Majaari na puerenu quiquiaari Egipto jiya jiyaniijia juaashacari jiyanohua. Seetanujuanaa Moisés tiuushacari na niquiyaquishoo Pueyasooqua, nojuajaari Pueyaso niquiquiaari noojiata, juhua na shuriucua quiyano pueyaracaanu. Naacuajitij, Moisésri tama na cuaqueyajaaja cumaquiquiaari maja na tarinitianura miiniu Pueyaso sequesano nojuaja. <sup>28</sup> Quera Israel pueya mashishacari Egipto jiyajiniji, Pueyasoori Moisés sequequiaari: “Janiyari niucua cua seru jiyaronutaniyani, cua tojiyashijia jiyapueranuhua na pucoonura puetunujuanaa. Nocuaji Israel pueya quia numootere, borrego nanaca nojori shuquiujitianura na tia tohuateyaji, maja nia jiyapueranuhua cusojuaaanurajuhuj”. Moisésri Pueyaso sequesanoocua tiuuquiaari. Naacuajitij, puetunu Israel pueya jiyapueranuhujinijiojuanaani, majaari quenaaja niquiriyatu niyanu mosaanu quiquiaari cutara.

<sup>29</sup> Israel pueya mashishacari Egipto pueyacuaji juucua, Naatunacu jiyaniishano camini-aari nojori ritiaquiaari saaja. Nocuaji, Pueyasoori caminia raquitiaquiaari nojori nuura. Na nuhuaji, Pueyasoori Moisés sequequiaari puetunu nojorijianaa cuaara niuutiaara caminia taquijiria. Israel pueya tiuuniuucua Pueyaso sequesanoocua, nojoriiri joojuashiquio niuutiaquiaari juhua puereetunu nucuaco. Egipto jiya jiyaniijia soldadohua jaara juhua nojori niuutianu paniquiaarijuhuj, nojoriiri saaja shushiniuuquiaari.

<sup>30</sup> Israel pueya tiuquishacari Pueyaso niquitiosocoriquiano jiyajinia, nojoriiri na paraa Jericó tiaca shocua camarucuneetaquiaari siete juuca, naatej, taa Pueyaso rootaquiaari nojori miiniuriacuajani. Naa nojori tiuuniuucua Pueyaso sequesanoocuatej, Jericó tiaca shocua sohuacaari puetunu pojotaquiaarijianaa. <sup>31</sup> Puetunu Pueyaso tojitiaashijiacajanaari pucoosaaquiaari. Rahab cutaraari jiyanooshaaquiaari. Rahabri naa jiyanooshaaquiaari Israel pueyajinijinio namuenujuanaa na jamojuonuucua tarijia narta pueyacuaji. Rahabri naa maninia miiquiaari Pueyasooqua tiuujiaca na quiniuucua. Naaratej, Israel pueyari cuno paanatu jiyanoocua.

<sup>32</sup> ¿Teyano pa supuetanaajiniji cua pohuatanutaniya niajaniya socuani? Socua queraatia pa supuetanaari Pueyasooqua tiuujiaca quiquiaari. Tariucuaaja cua pohuatasano, maninia nia niishiniuria Pueyasooqua tiuujiaca pueyari Pueyaso jiyanooshano. Naajuhuj, majaari jeya cua quiniu cua pohuatanura maninia nio pojorijiniji: Gedeón, Barac, Sansón, Jefté, David, Samueljinijinio, socua narta Pueyaso sequesano caminiujunaa pueyajinijinio. <sup>33</sup> Pueyasooqua tiuujiaca nojori quiniuucua, nojoriiri tamasa jiyaniijianucua miaquejoquiaari na jiyajiniji. Pueyasooqua tiuujiaca nojori quiniuucua, nojoriiri maninia jiyaniijianucua quiquiaari, maninia na jitianura narta Israel pueya. Pueyaso sequesanoocua tiuujiaca nojori quiniuucua, nojoriiri Pueyaso sequesano nojori na niquitiosocoriquiano masequiaari. Pueyasooqua tiuujiaca nojori

quiniuucua, juurunu sareya rupaari juhua seecujutasaaquiaari saaja, maja na soonura nojori. <sup>34</sup> Pueyasocua nojori tiuuniucua, nojori jaara manijinia quejoosaaquiaari, nojoriiri maja na catenu quiquiaari. Pueyasocua tiuuijaca nojori quiniuucua, nojoriiri na paraacuaji mashiquiaari saaja, maja na puecoosaanura nijiniaquetucua mueru-uta. Pueyasocua tiuuijaca nojori quiniuucua, sasaca pueyari jiyanoehua cumaacaraca quijiacara quiquiaari. Pueyasocua tiuuijaca nojori quiniuucua, nojoriiri jiyanoehua cumaquishaaquiaari na paraa nojori miaquejonura, na paraa nojori mashiquiniuria nojori jiyajiniijiuhuaj. <sup>35</sup> Naajuhuj, Pueyasocua tiuuijaca maajipohua quiniuucua, nojori macuuri samiiticoquiaariuhua nojoriria.

Tamasacaari jiyanoehua taraatia miishaaquiaari Pueyasocua tiuuijaca nojori quiniuucua. Cunora, nojori paraa jaara nojori quiooquiaari, nojoriiri puecoonura mianana-josaaquiaari nojori jaara Pueyaso tojiniu tarinitiaaquiri. Nojori jaara na paraa sequesano tojiquiaari, nojori maara cartesaaquiaariuhua. Pueyasocua tiuuijaca nojori quiniuucua, nojoriiri saaja paniquiaari nojori cuara puecoosaariaqui, naajaa, jiyanoehua naquiya na miiniutia. Nojoricuajaari niishiquiaari, Pueyasoori nojori samiitianijionutaniuhua, jiyanoehua shuquiriaatia nojori quiniuria pueyaracaanura cutara. <sup>36</sup> Tamasaca quiniuucua Pueyasocua tiuuijacajuhuj, nojoriiri cararaatia macaatishaaquiaari, jiyanoehua majacusaaquiaarijiaariuhuj. Naajuhuj, tamasaari cumayocua shipinishano casaata morojosaaquiaari. Nujuatejojuajinia nujuatejosaaquiaariiri. <sup>37</sup> Tamasacaari saitia jacusaaquiaari na puecoosaanura. Tamasacaari na cajiniocua rashiquiojosaaquiaari jacaria jiyaratajata juhua juhuana, socua jiyanoehua naquiya na miishaanura. Naajuhuj, tamasaari nijiniaquetucua mueruuta puetujusaaquiaarijianaa piyonu. Naajuhuj, tamasa quiniuucua Pueyasocua tiuuijacajuhuj, nojoriiri juhua taanuusano rucoo-joquiaari puetunu tiqiyocuajanaa. Casamiijiuniucua nojori quiniuucua, nojoriiri saaja borrego shoque, cabra shoque cusupuequiaari nojori cushishocoriquiano. Nojoriiri taraatia miitiasano quiquiaari, naquiya miishanojuhuaj. <sup>38</sup> Juhua taanuusano nojori quiniuucua, nojoriiri juhua tashuquioono rucoojoquiaari cariiquia jiyajinia, tuhuananuhujiniano. Tiaajunucua nojori quiniuucua, nojoriiri saaja raaco maquiyonuujua quiquiaari. Mijiria quijiaca pueyari nojori jiyatequiaari juhua najuhua quijiaca pueyara. Naajaa, nojori cutaraari seetanujanaa Pueyaso timitiasano pueya quiquiaari, nocua tiuuijaca nojori quiniuucua.

<sup>39</sup> Pueyasocuaari nojori jiyanoocuaari, seetanujanaa nojori tiuuniucua nocua. Naajaa, nojoriiri juhuanojuaja maja nojori masenu quiquiaari seetanujanaa Pueyaso sequesano nojori na niqitiosocoriquiano. <sup>40</sup> Pueyasoori nio pa quishacari nojori sashitiyajaara, jiyanoehua maninia na miishacari pajaniya na Sohuanuta, Neyanu Jesucristocua pa tiuuniucua. Na nuhuaji, Pueyasoori puetunu nojoritijanaa pa cojiritianutaniya jataniniu tojetaarucuajanaa maninia miijiaca pa quiniuria, na shuriucua na rijiosacari puetunu pajaniyajanaa.

## 12

### *Jesu miishano pa niishiriojoriquia, naquiya rejeretajaca pa quiniurijuhuj*

<sup>1</sup> Naa pa niishishacari taa queraatia pueya maninia miiquiaari Pueyasocua tiuuijaca nojori quiniuucuaacuaani, cunora, tama pa cojetasano najuhua casa pa tarinitiariquia. Tarinitiahiyari puetunu najuhua casaajanaa, teyanocua pa cojequiaa Pueyaso panishano pa miyaquiniuriacuajani. Naajuhuj, puetunu sesa miiniujianaa pa tarinitiare, puetunu pa cumaacajanaa pa jitianura, juhuajaniya rejeretajaca pa quiniuria. Naacuajiti pa naata maninia tucuatenu puetunu Pueyaso panishanojuanaa pa miiniuria. <sup>2</sup> Jesu miishano pa niishiriojoriquia pueyaracaanu. Nojuajaari tojetaarucuajanaa na Que Pueyasocua tiuujia quiquiaari. Nojuajaari niishiquiaari, naquiya na miiniu nuhuaji, na Queeri jiyanoehua shuquiriaatia quijiara na jiyatenutaniya. Naaratej, nojuajaari juhuajaniya rejeretaquiaari naquiya na miiniu niyacutesanojinia, cararaatia na miishaanujuhuj. Cunora, nojuajaari na Que miaquetajara cajiya, Jiyaniijajanaa na quishacari.

<sup>3</sup> Majaari nia niyajetanu taa Jesu rejeretaquiaari juhuajaniyacuaani, pueyaracaanu sesa miijiaca paracaashacari nojuaja. Nocua nia niishiriojoriquia, niaa mariqui Pueyaso tojiniu tarinitianu paniriiri nia taraajenuta naquiya nia miishacari. <sup>4</sup> Niaacuajaari naquiya miishaaquiaa, Jesucristoocua tiuujia nia quiniuucua. Naajaa, majaari pa Jiyaniijia nia tacartanu, naquiya nia miyaquishaanuucua. Nia rejeretariquia saaja. Majaari juhuanojuaja nia puecoosaanu quiqianu na tojitiajaca nia quiniuucua. <sup>5</sup> ¿Niaateeri Pueyaso rootasano niyajetarucuaa tari, na rootasano pajaniya juhua necohuaja? Naa sequeyari:

“Quiyanunaa, majaari cua rootasano quia soonu, janiya jaara quia niishitiojiya naquiya cua miitishacari quiajaniyani. Janiya jaara quia nacasure socua maninia miijia quia quiniuriani, majaari cucuaji pishiniu. <sup>6</sup> Quia Jiyaniijia cua quiniuucua, janiyacuaajaari cua panishano pueyano jiuujiayashijiani sesa na miishacari. Naajuhuaaj, janiyari cua niyanura cua jiyatesano pueyano saniitiojuani jaara sesa miiriquia”.

<sup>7</sup> Naaratej, juhuajaniya na rejeretajaca nia quiriquia. Pueyasoori juhua necohua nia niishitiojiya, maninia na canashitiniuria niajaniya, seetanujuanaa necohua nia quiniuucua. ¿Pueyanoteeri nareja niqijia neyanu, neyanu jaara na tojiyashijia quiriquia? ¡Maja! <sup>8</sup> Naajuhuaaj, Pueyasoori puetunu necohuarajanaa na jiyatesano pueya saniitioquiaa sesa nojori miishacari. Naacuajitij, Pueyaso jaara nareja niquiriquia niajaniya sesa nia miishacari, cuno maara quiri maja seetanujuanaa necohua nia quiniuucua, juhua tamonu queecuajinio nia quishacari. <sup>9</sup> Naajuhuaaj, naatujoori pa quishacari, pa queyari pa majacujua, nojori pa tojiyaquishacari. Majaari cunora nojori rerequetejaca pa quiniu quiquiaari. Naacuajitij, pa Que Pueyaso jaara pa saniitioriquia, ¿paateeri na rerequetenutaniyani? ¡Maja! Nojuacuajaari seetanujuanaa pa sohanu Que, pueyaracaanu rishijia pa quiniuria. <sup>10</sup> Pa queyari pa canashitioquiaari taa nojori paniquiaaricuajani. Nojori rootasacari pajaniya, nojori saniitiosacari pajaniya, cunoori quiquiaari saaja mijiria pa quiniuria maninia. Pa Que Pueyaso saniniujia, nojuajaari pa saniitioquiaa seetanujuanaa maninia miijiaca pa quiniuria, juhua nojuaja pa quiniurijuhuaaj. <sup>11</sup> Seetanujuanaa, puetunu saniitionujuanaari taraatia pajaniyara. Majaari pa timiniu paa jaara majacusaareni. Naajaa, na nuhuaji, paa jaara na ruuretaquirini, paari socua maninia miijiara jatanishaaquiaani, socua Pueyaso tojiijara pa quiniuria juhuajaniyajuhuaaj.

#### *Jiyanhua cocuaatiaari Pueyaso pa tojiyaquishacari*

<sup>12</sup> Naacuajitij, majaari nia pishiniu pueyanaa, Pueyaso saniitiosacari niajaniya. Nocua nia tiuuri saaja. Nioojiaca nia cumaquiriohua. <sup>13</sup> Saaja Jesucristo rupaa tojijia nia quiri, jatarinitiaja Pueyasooocua tiuujia mariqui noojia niqijiotereeri. Nojori cuara saniya cumaquishano quiiria cutara.

<sup>14</sup> Tama nia cuaqueyajaaja nia cumaquiriquia, juhuajaniya quiijia nia quiniuria puetunu pueyatajanaa. Majaari juayonuujutanu. Nia saniriquia seetanujuanaa sesa miyashijia nia quiniuria. Saaja noo pojori cutaraari pa Jiyaniijia niqiniutianiya, seetanujuanaa maninia miijiacara jatanishano pueyatej. <sup>15</sup> Pueyasocuaajaari pa jiyanoojia. Tama nia cuaqueyajaaja nia cojuare niaa mariqui Pueyaso ruuretareeri na naacunu panishacari niajaniya. Nojuajaari cumaacaracacuaaja na cumaquiniuria niajaniya nia panishacari. Naacuajitij, niarta Pueyaso pueyano jaara juaatishaare tamonu miiniuucua sesa nojuaja, nojuaja nia naacure na jiyanooniuria sesa na miinia. Jaara naa miyaquiritij, cuno pueyano juaaquiacaari narta pueyacia paaquenutaniya na sesonura queraatia pueya. <sup>16</sup> Naajuhuaaj, tama nia cojuatooriqiaajaaja. Naa nia miitiooriquia tamonu niajaniyajinijinio mariqui Pueyaso sequesano na niqitiosocoriquiano pajaniya soojeera quiriiri, saniya tama na cuaqueyajaaja na shuquiritiniuria mijiria. Supuetana Jacobo puerana Esauucuaajaari naa miiquiaaritij. Tamacari na miaajesacari, nojuajaari Jacobo sequequiaari: “Cua tarajanunaa, pa que niqitiosocoriquiano janiya, na jiyapueranu cua quiniuucuaani, cuno cuara quiiria quiara, quiaa jaara quia sumatuujiniji rupore quiria. Jiyanhua miaajeyanijia”. <sup>17</sup> Niaacuajaari niishiya, na nuhuaji, Esauuri paniquiaari na que secojonura nocuara, jiyanhua maninia Pueyaso miiniuria nojuaja, na que

jiyapueranu na quiniuucua. Na queeri na ruuretaquiaari saaja. Esauuri jiyanoehua na que nenecojoquiaari na nujuquenuta. Naajaa, na queeri maja na naata jataniniu quiquiaari tariucua neyanu Jacobo na sequesano Pueyaso niqiara.

<sup>18</sup> Nio pa quishacari, pajaniyara, Pueyasoori maja juhua tariucuacaanu na quishacari pa supuetanaa Israel pueyata. Jiyacaritij, Pueyaso jaara Moisés tacaniquiaari Sinaí tuhuananuucua, Moisés na niishitiojonura na rootasano na pueyara, tuhuananuuri jiyanoehua puereeta niquishano quiquiaari. Tuhuananuuri puereeta noshiriquiaa. Na najacaari tacariquiaa mueruucatej. Jiyanoehua ninishiqiiri quiriquiaajuhuj. Paratuuri jiyanoehua piyarojoriquiaa puereetajuhuj. <sup>19</sup> Trompeta jonenenuunuuri jiyanoehua tojishaariquiaa. Pueyaso pocuanuuri jiyanoehua tojishaariquiaajuhuj. Israel pueya tojishacari Pueyaso pocuaano, nojoriiri jiyanoehua pueretuquiaari. Naaratej, nojoriiri Moisés sequetuquiaari maja socua Pueyasojuanaa pocuanura nojoriicuara. <sup>20</sup> Nojoriiri maja socua na rejeretanu quiquiaari puera puereeta Pueyaso sequesacari nojori. Pueyasoori jiyacari naa sequeriquiaa nojoritij, cuno tuhuananuucua nojuajanaa quiniuucua: “Cante nio tuhuananu rupueyani, cuno pueyano cuaara mosaaria saitia jacusano, cashanata soj. Naa miijia seru cuaara naa puecoosaariajuhuj”.

<sup>21</sup> Puetunu Israel pueya niquishanojuanaari jiyanoehua puereeta quiquiaari seetanujanaa. Moisésjanaari na puerequiaarijuhuj. Nojuajaari na puerenuta sequequiaari: “Cua puerenuta tetecanijia”.

<sup>22</sup> Nio pa quishacari saniniuujia, majaari pa catecanonu quiquiaa cuno tariucuacaanu pueya pueresano tuhuananuucua. Jesucristo cusonuucua pocuara, paari Pueyaso quiquiojinijanaa tiuquitiaquiaani. Cuno na quiquio sesaari miriqui sequeshiya “Sión tuhuananu”. Na pueya pa quiniuucua, nojuajaari jiyocuacaanu pueyaracaanu pa quijiarano tiaca jiitiaa. Cunoori seetanujanaa jiyocuacaanujinio Jerusalén tiaca. Naacuajitij, paari jiyanoehua queraatia Pueyaso seya rupuequiaani, Pueyaso pa maniniuhuaqueetanura nojoritajuhuj. <sup>23</sup> Paari tii rerejonutaniya puetunu parta Pueyaso pueyatajanaani. Pueyaso saquiriojosano pueya pa quiniuucua, pa sesacaari jiyocuacaanu Pueyaso nequesoreetuneejinia naajiotasano quiya. Paari Pueyasooocua catecanoquiaani. Nojuajaari puetunu pueya nequesoreenajanaa. Jesucristo niyacarijia Pueyasooocua tiuujiaa sohuanuhuari tii quiyajuhuj, canapue Pueyaso jiyatequiaari tojetaarucujanaa sesa miyashijiacaracujani. <sup>24</sup> Jesucristoori tii quiyajuhuj. Nojuajaari tama na cusonutajaaja Pueyaso jiyanoetiquiaari nocua tiuujiaa. Tama na nanacajaaja na shootenuucua pocuarajuhuj, paari cunota jeequejosaaquiaari tojetaarucujanaani. Naacuajitij, Jesu nanacaari jiyanoehua socua maninia Abel nanacajiniji. Caín monuucua tarajanu Abel, Abel nanacaari Pueyaso shiniujiya na mona cuaara mosaariajuhuj. Jesucristo nanaca saniniuujia, cunoori Pueyaso pa jiyanoetiquiaacujia.

<sup>25</sup> Cunora pueyanaa, tama nia cuaqueyajaaja nia cojuare maja nia ruuretanura Jesucristo Rupaa. Tariucuacaanu, pueyari jiyanoyaquishaaquiaari nojori ruuretasacari Pueyaso sequesano, nojuaja jaara nojori piriyojoquiaari Sinaí tuhuananujiniji. Nojoriiri jiyanoyaquishaaquiaari nojori tojiyaquiniuucua mijiria Pueyaso quishacari na sequesano. Nojori jaara naa jiyanoyaquishaaquiaaricuaa, nio pa quishacari saniniuujia, ¿paatucua taa jiyanooshaariquia pa ruuretasacari Pueyaso quiarijiani, jiyocuacaanuji na piriyojosacari pajaniyani? <sup>26</sup> Pueyaso pocuasacari Sinaí tuhuananujiniji, jiyari na pocuasacari tetecaquiaari. Quiarjia saniniuujia, Pueyasoori seetanujanaa sequeya: “Janiyari socua caminiutianihua jiya jiuuquiutianuni. Maja saa jiyaja. Jiya cajiniocuanio. Jiyacunojuanaari quiniutianiya naa cua miiniu”. <sup>27</sup> Naa na sequesacari taa socua na caminiutianihua jiya jiuuquiutianuni, naacuajiti paari niishiyani, puetunu na shipinishano casaajanaari shaajeyaquishaquiji shaajenutaniya. Saaja noo casaari cureenutaniya, maja na naata pootiosano casaatej. <sup>28</sup> Quiarinio quiquio, Pueyaso shipinishano na niqutiosocoriquiano pajaniyani, cunoori maja na naata shaajasaanu quiniutianiya cutara. Paari jiyaniijianucua quiniutianiya tii pueyaracaanuni. Pa Pueyasoori jiyanoehua maninia miiniutianiya pajaniya. Cunora pa shuquiritiare nojuaja. Paari na shuquiritiyani pa timitiasacari nojuaja. Naacuajitij, nojuaja pa timitiare jiyanoehua pa

paniniutia nojuaja, pa puerenutanio. <sup>29</sup> Nojuajaari puereeta mani, Neyanu ruuretajaca shaajaja, sesa pa miishano catijajajuhuj.

## 13

### *Taa pa miyani Pueyaso pa timitiniuria*

<sup>1</sup> Majaari panitioonu nia tarinitianu. Naa Pueyaso pueya nia quiniuucuatej, pueyaraaanu panitioojuaca nia quiriqia. <sup>2</sup> Naajuhuj, majaari rucojuaca ruuretanu, niaacua nojori tiuquishacari. Nojori panijia nia quiriqia. Noojiaqueya pa supuetanaajinjiniocuajaari Pueyaso seya masuuquiaari na tiacora, nojori jiyaniushacari nareja pueyano naasucua.

<sup>3</sup> Nujuatejosano pueyacua taraajejaca nia quiriqia. Tama nia cuaqueyajaaja nia jiyatere juhua nojoritia nujuatejosanojuhuaj, nojoriicua nia taraajenura seetanujuanaa. Naquiya miitiasano pueyacua taraajeja nia quiriqiajuhuaj. Nia niishiriquia, niaari na naata naa miitiasaanujuhuj.

<sup>4</sup> Pueyasोजनाacuajaari pa niishitioquiaari pa camitioonura. Cunora, camitioonu pueya cuara saaja neyacata, necocuata quijia quiriqia. Cante camiyojuani, nojuaja cuara tama na cuaqueyajaaja cojuara maja narta pueyano niqiuocua na numuetucunura, na camishoo maajinio. Nia niishiri, Pueyasocuajaari naa sacuaratia miijaca saniitionutaniya.

<sup>5</sup> Majaari cumaneeca porocua nia quiniu tama niaarajaaja nia jiitianura. Juhujaniya quijia nia quiriqia nia jiitiasanota. Nia niishiri, Pueyasocuajaari sequequiaari: “Majaari cua cartenu quiniutianiya nijaniya juhua japueyojua nia quiniuria. Majaari quenaaja cua tiujianu quiniutianiya nijaniya”. Cunora pueyanaa, maja nia tacaani. <sup>6</sup> Naa seetanujuanaa na sequesanoocua pa tiuushacaritij, pa naata sequenu taa supuetana David naajiotaquiaari na sequesanoocujani. Naa sequesquiaariiri: “Jiyaniijia Pueyasocuajaari cua naacuna. Naacuajitij, majaari cua puerenu quiniutianiya. Majaari pueyano na naata taa miiniu janiya”.

<sup>7</sup> Coteenujuanaa nia jiitianaa pueya nia niishiriojoriqia, noo pojori canapueete shushajanaa nia tojitioquiaari Pueyaso rupaacuajani. Nojoriiri seetanujuanaa Pueyaso tojijia quiquiaari, Jesucristoocua tiuujia nojori quiniuucua. Juhua nojori quiniuucua jiaatijaca nia quiriqiajuhuaj, taa nojori quiquiaaricuaani.

<sup>8</sup> Taa quijia Jesucristo quiquiaari tariucuacaanuni, nojuajaari naa quiyajaa. Naa quiniutianiya pueyaracaanuuri. Majaari na jatanu. <sup>9</sup> Naaratej, majaari tamaatia niishitiojosano nia tojinuu. Miaquenu pueresanojiniji niishitiojosano cutaraari najuhuanaj. Cunoori maja quenaaja na cumaquiniu quiquiaari na tojitijaca. Naajuhuj, majaari pueyacuara secojonaa jiuujia cumaquishaanu quiquiaari nojori miaquesacari Pueyasorano puecoosano seya shujiniji. Pueyaso Sohanu cutaraari poojia cumaquiquiaa, panijia pa quiniuria. <sup>10-11</sup> Saniniuujia, pueyacuara secojonaa jiyaniijiaari maja noo shu na miaquenu quiquiaari cutara, Israel pueya jiyanooshaanura puecoosaaquiaritij. Pueyacuara secojonaa jiyaniijiaari cuno seya nanaca tiuquitiaquiaari Pueyaso Quishaquijianaa puetunu marijarajanaa, cuno nanaca na majiriutianura tii. Na nanaca shootesano seruuri saniniuujia tiacajiniji jiyatasaaquiaari mij, tii na catijiasaanura puetunujuanaa. Pueyacuara secojonaa jiyaniijiaari tojetaarucujanaa tenujusaaquiaari maja na miaquenura cuno shu. Nio pa quishacari saniniuujia, paari jiyanohua cumaquishaaquiaani Jesucristo cusonuucua pocuara. Cunojiniji, paari seetanujuanaa Pueyaso rupesano quiyacuajani. <sup>12</sup> Naajuhuj, Jesucristo mosaanura pocuara, nojuajaari Jerusalén tiacajiniji jiyatasaaquiaarijuhuaj, naatej, taa na nanaca shootesano seya jiyatasaaquiaari tamaquiriacaani. Nojuajaari naa tama na cuaqueyajaaja tarinitiaquiaari na mosaanura, tojetaarucujanaa jeequesano pa quiniuria puetunu sesa pa miishanojinijianaa. <sup>13</sup> Nojuajaari jiyanohua cararaatia teetesaaquiaari niyacutesanojinia pa niti. Naa Jesu miiniuucua pocuaracuatej, Pueyaso niishiyashijia jaara cararaatia miiriquia pajaniya Jesuucua pa tiuuniuucuanu, juhujaniya na rejeretajaca pa quiriqiajuhuaj. <sup>14</sup> Pajaniyara, Jesuucua tiuujiacani, nio jiyari maja pa quiquio. Mijiria, shaaquiri



pueyaracaanu rishijia quiquio pajaniyarano. Cunora, paari jiyocuacaanu pajaniyarano Pueyaso shipinishano tiacaacua jiaatiaani. <sup>15</sup> Naa Pueyaso jiitianuucua pueyaracaanu rishijia quiquio pajaniyarantej, nojuaja pa timitiariquia pueyaracaanu. Neyanu Jesucristo quiniuucua pocuara Secojona, nojuajaari pa tiuquitiaquia na Queecua. Nio pa quishacari quiarijiani, majaari Pueyaso paniniu pa seya nanaca. Nojuacuajaari paniquiaa pa shuquiritianura nojuaja cutara. Naacuajitij, pa rupaa pa jiyatere Pueyasora na quiniuria saaja, pueyaracaanu nata pa maniuhuaqueetanura nojuaja. Cunocuajaari na panishano. <sup>16</sup> Naajuhuj, majaari nia niyajetanu maninia nia miiniuria niarta Pueyaso pueya. Nojori jiitiaquishacari nojori panishano, nia jiitiasano casaajiniji nia niqutiojoriquia nareja nojori. Paa jaara naa miijiaca quirini, paari juhua Pueyasora pa casa niqutioyani. Cuno cutaraari na timitiquiaa.

<sup>17</sup> Cuarta Pueyaso pueyanaa, nia jiitianaa tojtiajaca nia quiriquia. Majaari nojori niishitiojosano nia ruuretanu. Nojoricuajaari nioojiaca cojuaquiaa pueyaracaanu, nojori niishishacari Pueyasoori nojori nequesoreenutaniya nia jiitiajaca nojori quiniuucua. Naaratej, shamaatia nojori tojtiajaca nia quiriquia maninia, Pueyaso nojori pohuata-nura shitimia niajanijajiniji. Naa jaara nojori tojtiaashijiaca quiri, nojoriiri Pueyaso pohuatanutaniya na taraajenuta niajanijajiniji. Jaara naa quiritij, niaa cutaraari taraatia quiniutianijajuhuj.

<sup>18</sup> Canaacuara nia secojonuuriquia. Canacuajaari saaja maninia miiniuria saniniujuquia pueyaracaanuni. Naacuajitij, canaa jiuujiaari panaatia quiya Pueyaso niqiuara. <sup>19</sup> Janiyari jiyanohua paniyani cucuara nia secojonura, Pueyaso tiuquitinihuara ritia janiya niaacua.

*Nio naajiona panishacari maninia Pueyaso miiniuria pueya, na saruhuatascari pueyajuhuj*

<sup>20</sup> Jesucristo shootenuucua na nanaca pocuara, paari niishiyani puetunu Pueyaso sequesanojuanaari seetanujuanaa pajaniyarano quiniutianiya pueyaracaanu. Naa Jesucristo miishanoocua pa tiuushacaritij, na Que Pueyasoori pa jiyanoocua, juhujajaniya pa rupuenura nojuaja. Pueyasojunaacuajaari pa Jiyaniijia Jesucristo samiitianiquiaarihua macujiniji. Nojuacuajaari pa cojuana, na panishano pueya pa quiniuucua. ¡Jiyanohua maninia pa Pueyaso! <sup>21</sup> Neyanu Jesucristoocua nia tiuuniuucua, nojuaja cuara jataniiria niajanija tojetaarucujanaa jeenucuasano nia quiniuria, taa na paniacuajani. Nojuaja cuara naa miiria niajanijatej, maninia nia tucuatatura puetunu na panishanojuanaa. ¡Pa Jiyaniijia Pueyaso cuara pueyaracaanu shuquiritiasaaria jiyanohua maninia na quiniuucua! Cuaara naa quiiriatej.

<sup>22</sup> Cuarta Pueyaso pueyanaa, jiyanohua nia secojijianija maja nia ruuretanura secaja rupaata cua shiniujiushacari niajanija nio cua naajiojinia. <sup>23</sup> Nia niishiri pueyanaa, parta Pueyaso pueyano Timoteori nujuatejojuajiniji tari tohuatesaarohuacuaa. Nojuaja jaara tarishiyaquiri cucua na tiuquiniuria, janiyari cucua na ruponutaniyani nia niquiniuucua cua quiasacari.

<sup>24</sup> Naajuhuj, quiria nia saruhuatate puetunu nia jiitianaa pueyajanaa, puetunu cuniqui quiniaa parta Pueyaso pueyajanaanio. Italia jiyajinijinio parta Pueyaso pueyari nia saruhuataajuhuj.

<sup>25</sup> Pueyaso cuara na Sohanuta cumaquiiria puetunu niajanijajanaa.

## SANTIAGO NAAJIONEE

### *Santiago naajiosano niyaquejeno pueyacuaara*

<sup>1</sup> Janiyari Santiagoni, Pueyaso seru, Neyanu Jesucristo serujuhuaj. Nia saruhuataanijia puetunu tiqiyocua jiyacajiniajanaa niyaquejeno Israel doce niquiohuacuajinio caneno pueyanaa.

### *Niishitiaja Pueyasojiniji masesano*

<sup>2</sup> Cuarta Pueyaso pueyanaa, shuquiriaatia nia quiriqia nia jaara taraatia miishaare, niaa jaara naquiya miishaarejuhuaj. <sup>3</sup> Niaacuajaari niishiya, niaa jaara Pueyasocua nia tiuuniucua saniniujiushaare, niaari socua juhuajaniya sashijacara quiniutianiya. Niaaraari naa miishaanutaniyaqui nia sashishacari Pueyaso cuaara puetunu maninijanaa miiria niaarajaatijia. <sup>4</sup> Nia rejeretare seetanujuanaa maninia sashijaca nia quiniuria, majaari quenaaja nia taacanuunu. Niaa jaara naa miijia quiriritij, niaari maninia jeenucuasano quiniutianiya, pueyaracaanu maninia miijia nia quiniuria.

<sup>5</sup> Tamonu niajanijajinijinio jaara niishiyaquiri taa na miiniutianiyani, nojuaja cuaara Pueyaso maseera, Pueyaso na secojosacari. Pueyasoori na niishitiaja niqutionutaniya. Nojuajaari puetunu pueyajanaa niqutioquiaa, capora na quiniuucua. Majaari na juaaniu niaa jaara na masere. <sup>6</sup> Nia masesacari, seetanujuanaa nia tiuuri Pueyasocua, majaari quenaaja nia taacanuunu. Cante na masesacari taacanuujuaani, nojuajaari juhua paratu piyarojosano mohuaca, naatej, taa paratu tacarojiya mohuaca na piyarojosacaricuaani. <sup>7</sup> Jiyano pueyanotej, Pueyasoori maja na masesano na niqutionu quiniutianiya, noojia niqijiteja na quiniuucua. <sup>8</sup> Noojia niqijiteja pueyanoori quiarijia maseya na panishano. Tariqui na secojosacari saniniuujia, tamonu casaa maseyari, na paniyaquishacari coteenu na masesanocuaa. Jiyano pueyanoori noojia niqijiteja pueyaracaanu. Majaari quenaaja na miiniu panishano na tucuatunu quiniutianiya.

<sup>9</sup> Cua panishano Pueyaso muerasunaa, niaa jaara casamijiu quiri, naajaa, shuquiriaatia nia quiriqia. Pueyasocuaajaari nia jiyatequiaari na muerasura, na jiitiasanojiniji nia jiitianurajuhuj. <sup>10</sup> Saniniuujia, niaa jaara casamiriaca pueyano quiri, shuquiriaatia nia quiriqia Pueyaso jiyanooshano nia quishacari. Niaacuajaari niishiya niaari tojetaarucuaajanaa saniitiosocoriquiano quiquiaari juucua sesa miijia nia quiniuucua tarijia. Casamiriaca pueyanoori seetanujuanaa juhua naana shuu, majaari na rishiniu. Saaja rupaquijia niqishiya shanohuari. <sup>11</sup> Pananu jaara nasaatia jama, neyonaari sorequee. Na shuuri tiqii. Shanohua niqishanoori shaajeequejuhuaj. Casamiriaca pueyanoori naajuhuj. Na casami na niqutiojosacarijia na canijianura juucua, canashiyaquiji shaajenutaniyaajaariuhuj.

### *Naquiya pa miishacari*

<sup>12</sup> Shuquiriaatia quijia cutaraari Pueyasocua tiuujia, cante taraatia na miishacari rejeretaja saajani. Naa taraatia na saniniujiushaanuucuatej, nojuajaari juhua cutara jiyaniijia tuhuaja niqutiosaanutaniya, pueyaracaanu rishijia na quiniuria. Cunoori Pueyaso niqutionu panishano na panijia, taa na sequequiaaricuaajani. <sup>13</sup> Niaa jaara sesa miiniuucua jiaatiaa, majaari sequenu: "Pueyasoqui sesa cua miitiniu paniya". Pueyasoori maja sesa miijia. ¿Pa Jiyaniijiatucua casaara sesa miitiri pajaniyani? <sup>14</sup> Saniniuujia, tama poojia sequejaarijia pa shiniujuquiaa sesa pa miiniuria. Naajuhuj, tama pa niishitajajaarijia pa sapojoquiaa sesa pa panishano pa miiniuria. <sup>15</sup> Naa sesa miiniuucua pa jiaatiasacaritij, cunora paari sesa miiquiaani. Naa sesa miijia pa quishacaritij, paari cunora shaajasaanutaniyani.

<sup>16</sup> Cuarta Pueyaso pueyanaa, maja tama nia cuaqueyajaaja nia sapojonu. <sup>17</sup> Puetunu maninia casaajanaa pa masesanoni, cunoori Pueyaso niqutiosano jiyocuacaanuji. Nojuajaari puetunu jiyocuacaanu pa niqishano casaajanaa shipinijioquiaari, mijiria pa cuhuatariquiano. Pueyasoori pueyaracaanu maninia quijia. Majaari na jatanu tamaatia

na quiniuria, na cojuaaquiniuria pajaniya. <sup>18</sup> Pueyasocuaajaari pa sohuanu samiitian-ijioquiaariuhua na rupaacua pa tiuushacari. Nojuajaari pa jiyatequiaari quiarinio na muerasu pa quiniuria. Naacuajitij, taa pueyano tutaacuaa na shuquiriniutia na saaco rishishacaricaaani, Pueyasoori naa juhua pa tutaquiaari na shuquiriniutiajuhuj, coteenujuanaa na jiyapueranuhua pa quiniuucua. Nojuajaari tariucuaaanujiniji naa pa riurioquiaaritij.

#### *Seetanujuanaa Pueyaso tojitiajaca*

<sup>19</sup> Naacuajiti cua panishano cuarta Pueyaso pueyanaa, cua tojitiare. Puetunu nianianijanaa cuaara quiiria ritia tojijia, jacaria pocuaja. Cuaara quiiria shiniquiajuhuj, maja ritia juaajia. <sup>20</sup> Pueyanoori maja na naata Pueyaso panishano miiniu na juaaniutia. <sup>21</sup> Naaratej, nia cartere puetunu sacuaraatia nia miiniujuanaa, puetunu sesa nia niishiriojosanojuanaano. Nio pa quishacarini, puera sesa miiniuuri quiquiaa. Naajuhuj pueyanaa, juhua maninia naatujua nia tojiri Pueyaso rupaa, taa nia niishitiojosaaquiaricuaajani. Majaari na ruuretano. Pueyaso rupaacuaajaari cumaacaraca tojetaarucujanaa sesa miyashijiacara na jiyatenura pajaniya.

<sup>22</sup> Pueyaso rupaa tojijia nia quiri seetanujuanaa. Majaari nia numaa shama nia tojitianunoj. Naa jaara Pueyaso rupaa tojiyaquiri, niaari tama nia cuaqueyajaaja sapojiya. <sup>23</sup> Pueyano jaara Pueyaso rupaa tojiquiaa saaja na numaa shama, nojuajaari juhua noo pueyanojua, na jiquioco niquirii niqutiujinia narejaari. <sup>24</sup> Jaara tacateyaru-hua, na jiquioco niyasetaseequiohuari taamuecate na jiquioco quiriqiaaani. <sup>25</sup> Pueyaso rootasanoori jiyanojua maninia, maja quenaaja sesa. Sesa miiniuucua jiiitinio pueyano jaara na tojijia quiri, nojuajaari na naata sesa na miiniu tarinitianu. Cante na numama na racatajani, nojuajaari shuquiriaatia quijia quiniutianiya cutara. Puetunu na miishanojuanaari maninia quiniutianiya pueyaracaanujuhuj.

<sup>26</sup> Cante na niti rejeteyashijiani, nojuaja jaara tama na cuaqueyajaaja jiyaniya: “Janiya cutaraari Pueyaso tojijiani”, cunoori tama na cuaqueya sapojiyajaacujua. Saaja sacuaraatia pocuaja quia pueyaracaanuuri. Nojuajaari najuhua Pueyaso rupaa tojijia. <sup>27</sup> Cante seetanujuanaa pa Que Pueyaso rupaa tojijiani, nojuaja cuaara japueyojuaca niqiniuucua rucaneera, nojori na naacunura. Cuaara naa miiria mashiquiopuerajuhuj, nojori taraajenucujusacari nojori na cumanijianura. Naajuhuj, cuaara tama na cuaqueyajaaja cojuara, narta pueya na miyaquiniuucujaji sesa. Naa miijia pueyanotej, nojuajaari Pueyaso pueyano cutara.

## 2

#### *Maja cumaati rimiajata pa paniniu pueya*

<sup>1</sup> Cuarta Pueyaso pueyanaa, pa Jiyaniijia Jesucristoori shacantuuca cumaacajinia quijia. Nojuacuajaari tojetaarucujanaa maninia quijia. Nocua tiuujia nia quishacari, majaari rimiajata nia niqiniu tamasa. ¿Pa Jiyaniijiateeri pa sooquiaaricuaa, ninishiqui quijia pa quishacarijiani? Maja. <sup>2</sup> Cunora cua sequesanojinia nia niishiriojore: casamiriaca pueyano jaara nia secojonuujua tiajinia tiuquimia, maniniuqui toqueraca, jaaniishoracajuhuj, ¿taa nia miiniutianiyani? <sup>3</sup> Naaari naa sequeja: “Niya quia cajishii pueyanonaa, cajitiu maniniuujiniani”. Saniniuujia, toqueeju pueyano jaara jiyacari tiuquimiajuhuj, jiyareta curuutuquenaniyojua, niaari na sequereecujua: “Cuniquijia quia nujuare”. Casaa maaraja: “Cuniquijia quia cajiri quiaa tii nujuanaa”. <sup>4</sup> Naa jaara naa miiritij, niaari tama nia cuaqueyajaaja jiyateree juhua niarta pueya nequesoreenara. Naaari casamiriaca pueyano jiyaniya nojuaja naasucua socua maninia pueyano casamiijiu pueyanojiniji. Naaratej, niaari casamiriaca pueyano shuquiritiniu panijia.

<sup>5</sup> Cua tojitiare cuarta Pueyaso pueyanaa, ¿majateeri nia niishiniu, Pueyasocuaajaari casamiijiuucua pueya saquirioquiaari nocua tiuujia nojori quiniuria? Nocua tiuujia nojori quishacari, nojori juhua jiyanojua casamiriaca Pueyasora. Naajuhuj, Pueyasoori nojori jiyatenutaniya jiyaniijianucua nojori quiniuria, puetunu Pueyaso jiiitiasanojuanaa nojori jiiitianura. Naa miiniutianiya na panijiaaari taa na sequequiaari seetanujuanaacujani. <sup>6</sup> Naaari nojori cararojoquiaacujua. ¿Majateeri nia niishiniujuhuj, cunoo casamiriaca pueyacuajaari nia nohuasejoquiaa na sapojonuta?

Nojoriiri nia jaamitiquiaa nequesoreenaacua, niaacuara na saquiriojotanura. Nojoriiri nia miitiquiaaqui nia jiitiasano casaaniyojua na jaariuutianura puetunujuanaa.  
<sup>7</sup> ¿Majateeri nia niishiniu, nojoricuajaari pa shuquiritiasano Jiyaniijia sesacaquiaa-juhuaj? Pa Jiyaniijia sesa jiyaniquitiquiaa na soonutaari.

<sup>8</sup> Puetunu Pueyaso rootasanojinijianaani, niiori socua tojishocoriquiano. Naa naajiotasano quiyari:

“Pueya nia paniri taa nia paniya tama nia cuaqueyacuani”.

Pueyanaa, niaa jaara cuno rootasano miijia quiriquia, niaacuajaari maninia miijia.

<sup>9</sup> Saniniuujia, niaa jaara rimiajata paniri pueya, niaari sesa miya. Niaari saniitiosocoriquiano, Pueyaso niishitiojosano tojiyashijiaca nia quiniuucua. <sup>10</sup> Pueyano jaara puetunu Pueyaso rootasanojuanaa tojiquiaa maninia, saniniuujia, jaara niquiriyatu cuno rootasanojiniji tojiyashijia quiri, cuno pueyanocuajaari Pueyaso tojiyashijia.

<sup>11</sup> Pueyasojuanaacuajaari sequequiaari: “Maja nia camishoo maaji nia numuetucunu”.

Sequequiaarijiaarihuaj: “Maja monu”. Naacuajitij, pueyano jaara na camishoo maaji numuetuqueyaujia quiri, saniniuujia narta pueyano moyari, cuno pueyanoori

Pueyaso rootasano tojiyashijiajuhuaj. <sup>12</sup> Niaa cumaati niishiya, Pueyasoori na muerasu nequesoreenutaniya taa nojori tojtiaquiaari na rootasanocuajani. Nocuaji tama pa

cuaqueyajaaja pa cojuare taa pa miiquiaani, taa pa pocuaquiaani. Nia niishiri, paari nequesoreesaanutaniya pa miishanojinijini, taa pa miiquiaari parta pueyani.

Cante pueya panijia quiyani taa Pueyaso rootaquiaaricuajani, nojoriiri jiyanooshaanutaniya taa nojori jiyanooquiaaricuaa tamasacani. <sup>13</sup> Saniniuujia, canapute narta

pueyano jiyanooyashijiaca quiquiaarini, Pueyaso nequesoreenu juuca puetunu pueyanaa, nojoriiri jiyanoyaquishaanutaniyajuhuaj. Canapute jiyanoojia cutarani, no-

joriiri jiyanooshaanutaniya cutara, taa tamasaca nojori jiyanooquiaacuani. Nojoriiri shuquiriaatia quiriquiano cuno juuca, Pueyaso nequesoreesacari nojori.

#### *Pueyasocua tiuujiaaari maninia miijia*

<sup>14</sup> Cuarta Pueyaso pueyanaa, ¿maninate pueyano jaara sequere: “Janiyacuajaari Pueyasocua tiuujiani”, nojuaja jaara maninia miyashijia quiyajaa? Nojuaja jaara maninia miijia jatanishoo quiyajaa, najuhuaa sequeyari: “Pueyasocua tiuujianijia”.

<sup>15</sup> Naacuajitij, tamonu parta Pueyaso pueyano jaara pa sequesee: “Maja cua jiitianu toque. Maja quenaaja cua miaquesocoriquiano cua jiitianujuhuaj”, ¿taa pa miyani?

<sup>16</sup> ¿Maninateeri paa jaara na sequereni: “Juhujaniya quia quiaarohua. Quia miaquesuhua. Toque quia cushishuhujahuaj”? Maja. Paa jaara quenaaja na niquitioyquiri na panishanoni, pa sequesanoori najuhuanaj. <sup>17</sup> Naajuhuj, pueyano jaara sequere: “Jesucristocua tiuujianijia”, jaara seetanujuanaa Pueyaso rootasano tojiyaquiri, na sequesanoori najuhuanajahuaj. Jiyano pueyanoori maja seetanujuanaa Jesuucua tiuujia.

Paa jaara seetanujuanaa Jesuucua tiuujia quirini, pocua maninia miijia quirijihuaj. Maninia miyashijiaari maja seetanujuanaa Pueyasocua tiuujia.

<sup>18</sup> Pueyano jaara tamonu sequeriquia: “Quiaari sequeya quiaa Jesuucua tiuujia cutara. Janiyari saniniuujia maninia miijiani. ¿Taa cua niishiniutianiyani quiaari seetanujuanaa Jesuucua tiuujia, quiaa jaara maninia miyaquiri? Maja cua naata na niishiniu. Janiya cutaraari quia niishitiniutianiyani janiyari seetanujuanaa Jesuucua tiuujia cutarani, maninia cua miishacari”.

<sup>19</sup> Pueyaso Rupaacua quia tiuuniuucua, quiaari niishiyacuaja Pueyasoori Jiyaniijiajanaa. Cuno quia tiuuniuuri maniacuaja. Naajaa, nia niishiri, samaruhuari cuno niishiyajujuaj. Na puerenuta nocuaji tetecatiuyari.

<sup>20</sup> Mosanucuaanaa, ¿majateeri nia niishiniu? Jesuucua tiuujia nia quishacari, niaa jaara maninia miyashijiaca quiyajaa, Jesuucua nia tiuuniuuri najuhuanaj, nia tojiyaquishacari Pueyaso. <sup>21</sup> Niaacuajaari niishiya taa Pueyaso saniquiaari pa supuetana Abrahamni, na niishiniuria seetanujuanaa nocua tiuujiatee. Pueyasoori naa na saniquiaari: na sequequiaariiri: “Abrahamnaa, quia niyanuniyojua quia more cucuara quia catijiasocoriquiano”. Majaari Abraham ruuretanu quiquiaari Pueyaso sequesano nojuaja. Naaratej, Pueyasoori naa sequequiaari: “Jiyanohua maninia Abraham, cua tojijia cutara”. <sup>22</sup> Naacuajiti cuarta Pueyaso pueyanaa, naa Abraham tojiniuucua Pueyasotej, paari

maatia niishiyani nojuajaari seetanujuanaa Pueyasooocua tiuujia quiquiaari. Naajuhuaaj, Pueyaso sequesano na miishacari, nojuajaari Pueyasooocua tiuujia quiquiaari tojetaarucujanaa. <sup>23</sup> Naa Abraham miiniuucuatej, nojuajaari tariucuacaanu Pueyaso rupaajinia nojuajiniji naajiotasano tohuateequiaari. Naa sequeyari:

“Abrahamri Pueyasooocua tiuquiaari. Naa na tiuuniuucua Pueyasooocuatej, Pueyasoori na jiyatequiaari juhua tojetaarucujanaa sesa miyashijia na quiniuria”.

Naa Abraham quiniuucua Pueyaso tojjiatej, nojuajaari sequesaaquiaari Pueyaso rupenata.

<sup>24</sup> Naacuajiti pueyanaa, Pueyasocujaari na sequesano miijia jiyanooquiaa. Maja cutaraari na jiyanooni noo pojori, nocua tiuuniu sequeja najuhuanatej. <sup>25</sup> ¿Niaate niishiyajuhuaaj taa Pueyaso jiyanooquiaari Jericó tiacajinijinio paanatucuaani, nooj, Rahab jiyanishanotej? Pueyasoori na jiyanooquiaari neyatu na quiniurijuhuaaj. Na jiyanooquiaariiri maninia na miiniuucua caapiqui pueyano Israel pueyajinijinio. Rahabri cuno pueya jamojoquiaari na tiaco. Na nuhuaji, nojori mashiquiquiaariuhua tamocoori, narta Jericó tiacajinijinio pueya puecyaquiniuucujaji cuno pojori. Rahabri naa maninia miiquiaariti Pueyasojiniji na tojishanoocua na tiuushacari. Niishiquiaariiri Pueyasoori Israel pueya cumaquinia quiquiaari. <sup>26</sup> Nio pohuatasanoori pa niishitiojiya, naatej, taa pa cuaqueya macu quiya sohuanuujucuaani, naajuhuaaj, paa jaara Pueyaso sequesano miyashijia quirini, paari najuhuaana sequeyani: “Jesuucua tiuujianijia”.

### 3

#### *Pa niti juhua mani*

<sup>1</sup> Cuarta Pueyaso pueyanaa, maja cumaati puera niajanijinijinio jiaatianu Pueyaso rupaa niishitiojona nia quiniuria. Niaacuajaari niishiya, Pueyaso rupaa niishitiojonaari socua jiyanohua saniitiosaanutaniya tamacajiniji, nojori tojitiaaquiniuucua tama nojori niishitiojosanojuaaja. <sup>2</sup> Puetunu pajaniyajanaari sequeyarucua miiquiaa sesani. ¿Teyano pueyanote tojetaarucujanaa narta pueyano najiquitiyaquijia na pocuasacarini? Shaaqui. Pueyano sequesano jaara puetunu maninijanaa quiri pueyaracaanu, cuno pueyano maara seetanujuanaa maninia pueyano quiri cutara. Cuno pueyano maara na naata puetunu tama na cuaqueyajaaja jitianu niishiriquiaajuhua sesa na miyaquiniuucujaji. <sup>3</sup> Niaacuajaari nishiya, caballo rupaama jaara niasaare na niqitijiotaja, na camaru na tojiniuria, na netesacari, na camaruuri puetunu na caballo cuaqueyanaa niqitijiotaa na panishaco. <sup>4</sup> Puereetuca buqueeri naajuhuaaj. Shiitaniyojua na niqitijiotaja jitiiajaariuhuaaj. Jiyanohua paratu piyarojosacari, naajaa, na camaruuri saa cunotaja na niqitijiotaa na panishaco. <sup>5</sup> Pa nitiiri naajuhuaaj, shiitaniyojua casaaniyojuaari pa cuaqueyajinia shipinishano. Naajaa, jiyanohua pocuanu niishijiaari. Sesa pa miitiyari. Nojuajaari juhua maniyashi. Maniyashi jaara jaare puereetuca cuhuariquijinia, cuno maniyashiiri puereetuca maniria pacusee. Cuhuariquiaari puetunu catemaajanaa. Pa nitiiri naajuhuaaj. <sup>6</sup> Pa nitiiri seetanujuanaa juhua mani quiya pa cuaqueyajinia. Paa jaara sesa pocuareni, paari puetunu pa cuaqueyanaa sesoyani. Pa nitiiri puetunu sesa niishijiajanaa. Paa jaara sesa pocuare pueya niquiarani, puetunu pueyajanaari pa sequesano caminiujuquiaa tamasaca niquiarani. Pa nitiiri Sesaaca poonijotesano. Naacuajitij, sesa pa pocuasacari, paari puetunu mijiria pa quiniujianaa sesoquiaani. <sup>7</sup> Pueyanoori na naata jiyartuutenu puetunu casaajanaa: jaacuatujuaa, roshiyocuatujuaajuhuaaj, moojinijinio casaanio. Seetanujuanaari, pueyari tari naa na jiyartuutejoquiaa. <sup>8</sup> Maja cutaraari pa naata jiyartuutenu pa niti seque, saa maninia pa pocuanuraja. Pueyaracaanu sesa taquiriocuaa saajaari. Nocua quiyari juhua soconu noonacu, puetunu pueyajanaa na sesonura. <sup>9</sup> Paari jiyano pa nititija pa Que Pueyaso maniniuhuaqueetaquiaani. Naajuhuaaj, paari Pueyaso shipinishano parta pueya sesacaquiaa natajuhuaaj. <sup>10</sup> Naacuajitij, pa rupaamaji tohuataari maninia sequesano, sacuaratia sequesanojuhuaaj. Cuarta Pueyaso pueyanaa, ¡maja cumaati naa pa quiniutij! Maja maninia naatej. <sup>11</sup> Samo nacajiniji pueyaracaanu pacaretajaari shocuanacu mohuaca. ¿Jataquiaate soj? ¿Pianacute saniniuuja pacaretaquiaacujua?

Maja. Samo nacaari pueyaracaanu maniniuniacu quiija. <sup>12</sup> Cuarta Pueyaso pueyanaa, ¿mariyajate na naata muetunu shucuenajara? ¿Nateecate sacamanajara muetujua-juhuaj? Maja. Naajuhuj, maja pa naata pianacu mohuaca taquitianu cuari maniniujiniji. ¿Mohuacatucua casaara jatara tamaatiuniacurani? Naajuhuj, paa cuaara pueyaracaanu maninia pocuara saaja. Maja cumaati pa pocuasano pa cojitiniu sesa pocuasanota.

### *Niishijia pueyano*

<sup>13</sup> Tamonu niajanijajinijinio jaara niishijia quiri, nojuaja cuaara juhuajaniya maninia miiija quiiria nareja, maja pueya shocoteja. Jaara naa maninia quiija quiri, pueyari niishiniutianiya nojuaja seetanujanaa niishijia. <sup>14</sup> Saniniuujia, nioojia jaara najiquitishano quiri, niishijia nia quiyaquiniuucua juhua niarta Pueyaso pueyano, niaari seetanujanaa mosanucua. Naajuhuj, nia miishano jaara quiri nia shocotanura niarta Pueyaso pueya saaja shuquiriaatia nia quiniuria tamajaaja, majaari nia jiyaniniu niaari niishijia. Naa miiijaca nia quishacaritij, niaa jaara tama nia niishitajajaaja shuquiritiare, niaari mosanucua saaja. Nia sequesacari: “Niishijia cutaranijia”, niaari sapojiya. <sup>15</sup> Cuno nia niishitajaari maja jiyocuaanuji Pueyaso niishitaja. Cuno niishitajaari tama nia niishishanojuaaja, mijiria niishishanojuhuaj, Sesaacajanaa niishishanonio. <sup>16</sup> Pueyanaa, tee Pueyaso pueya juaatishano quiya tamasaca jaara na shocotare, naajuhuj, pueya miishacari saaja tama na panishanojuaaja, tii quiyari juayonuujutunu, puetunu sesa miiniujianaanio. <sup>17</sup> Saniniuujia, cante Pueyaso niishitaja jiiitaa cutarani, nojuajaari maninia miiija pueyano cutara. Jiyano pueyanoori maninia quiija puetunu pueya niqiarajanaa, jiyanoorio, jacaria pocuaja. Majaari na niishiniu ritia juaaniu. Pueyacuara taraajejaari. Majaari na niishiniu cuaracashijionu pueyacuara. Pueyaracaanu seetanujanaa sequeyari. <sup>18</sup> Naajuhuj, cante juaatioyano jiyanooriootejani, nojuajaari jiyanooria shuquiriaatia quiniutianiya Pueyaso shuquiritishacari nojuaja maninia na miiniuucua.

## 4

### *Mijiria casaacua jiaatijacajiniji pohuatasano*

<sup>1</sup> ¿Niaate niishiya casaara nia juayonuujutaquiaa tamajaaja pueyaracaanuni? Niaari naa quiyaquij sesa miiniuucua nia jiaatiasacari. Nioojiaari najiquitishano quiquiaa nia panishanoocua nia jiaatiasacari sacuaraatia. <sup>2</sup> Naaratej, nia panishano nia maseyaquishacari, niaari na casamiicuaaji pueyano moquiaa. Niaari naa miiquiaa puera nia jiaatiasacari nia panishanoocuatej. Nia panishanoocua nia jiaatiasacari jiyanooria, niaari cunora miriyojotaquiaa. ¿Niaari socua piyotaariquiaaqui! Niaari naa quiyaqui Pueyaso nia secojiyaquiniuucua nojuaja niqutionura niajaninya nia panishano. <sup>3</sup> Naajuhuj, niaa jaara na secojore, majaari nia masenu quiquiaa nia masesano. ¿Casaara nia maseyaquiquiaanoj? Nia sequereeraj. Niaari sesa nia jiaatianuta na masequiaa-juhanajaj. Niaari nia jiaatiasanoocua masequiaa juucua, tama nia cuaqueyajaaja nia shuquiritiniuria. <sup>4</sup> ¿Pueyanaa, niaaqui Pueyaso rootasano ruuretajacajuhuanajaj! ¿Majateeri nia niishiniu? Cante mijiria sesa miiijaca miishano timitajacani, nojuajaari Pueyaso paracara quirii. Niaa jaara naa miiijaca quiniu panijuhuj, niaari tari Pueyaso paracara quirii. <sup>5</sup> Tariucuaanu Pueyaso Rupaajinia nia naajiotasanoori quiyaquij:

“Pueyasoori na Sohanu niaquiaari poojajinia, nera na cojuanura pajaniya. Jiyanooria na paniniutia pajaniya, Pueyaso Sohanuuri pa jamuequiaa juucua saaja Pueyasora pa quiniuria”.

<sup>6</sup> Naajuhuj, Pueyasojuaanari jiyanooria maninia naacuquiaa pajaniya, jiyanoorio na quiniuucua. Na Rupaajiniaari naa naajiotasano quiyajuhuj:

“Pueyasoori noo pueya paracaaja, narta pueyajiniji juhua socua cutara pueyano quiniu panijatej. Saniniuujia noo pojori maniniucuarijia, naa sequejatej: ‘Maja cua naata miiniu maninia tamajaaja. Pueyaso cuaara cua naacuura’”.

<sup>7</sup> Naarate pueyanaa, seetanujanaa Pueyaso tojitajacara nia quiriquia. Cumaatia nia nujuatara Sesaaca, maja na shocotanura niajaninya. Niaa jaara naa miiritij, niaacuaji

mashiniutianiyari. <sup>8</sup> Naa jaara Pueyaso rupuere, Pueyasoori nia rupuenutaniyajuhua. Sesa miijiacanaa, cua tojitiare. Taa curuutucojuanucua shuquirioyacuaani, naa tama nia cuaqueyajaaja nia jeequejorejuhua sesa nia miishanojiniji. Noojiaqueya Pueyaso panijiacari mijiria sesa miishano paniquiaajuhua. Cuno pueya cuaara noojia jeequejooora maja socua noojia na niqijiotenura najuhuanaj. Cuaara saaja Pueyaso panijiacara quiiria cutara. <sup>9</sup> Sesa nia miiniuucua nia nujuquature, nia taraajerejuhua. Nia sapiyonuure. Sesa miishano nia saroojotanu nia jataniri namijiaacatenuucua. Sesa miiniuujiniji nia shuquiriniu nia jataniri taraajenuucujuhua. <sup>10</sup> Naa jaara nioojiajinia sequeriquia Pueyaso niqiuara: “Maja cua naata tamajaaja maninia miiniu”, Pueyasoori nia naacutaa maninia nia quiniuria mijiria. Nojuajaari nia jiyatenutaniya jiyaniijianucua nia quiniuria.

*Parta Pueyaso pueyacuara rimiaaqueyashijiaca pa quiriquiaj*

<sup>11</sup> Pueyanaa, maja sacuaraatia nia rimiaaquenu niarta Pueyaso pueyacuara. Maja maninia naatej. Cante narta Pueyaso pueya sesacaani, Pueyaso Rupaajinia naajiotasano tojiyashijiaari jiyanotej. Naa jaara naa miiritij, niaari Pueyaso Rupaajinia naajiotasano sesacaa. Naajuhua, niaari tama nia cuaqueyajaaja jiyateya juhua jiyaniijiaara, niarta pueya nequesoreena nia quiniuria. Naa nia miishacaritij, niaari Pueyaso rupaa tojiyashijiacara quiiqui. <sup>12</sup> Pueyasajuanaari tamajaaja Jiyaniijiajanaa. Nojuacuajaari na rootasano niishitijia pajaniya. Nojuajaari niqiriyatujua pa nequesoreena, pa saniniujiuriquianojuhua. Nojuajaari cumaacaraca pocuaji na tacunura, na shaajanura pajaniyajuhua. ¿Canteeri quiajanianijia, quia saniniujiuniuria tamasaca, juhua nojori jiyaniijiani?

*Majaari pa niishiniu tariquiria*

<sup>13</sup> Pueyari naa sequejaca: “Canaari tariqui quianutaniya tamonu tiacajiniani. Canaari cuniqui shocotenutaniya niqiriyatu marijiani canaa niqutiojosacari tii canaa casami. Canaari queraatia cumaneeca masenutaniya canaa casami samini”. Cua tojitiare naa sequejacanaa. <sup>14</sup> Majaari nia niishiniu taa nia juhuaquenutaniyani. ¿Niaatucua taa sequereni naa jaara macu juhuaquema saaja? Nocuaji majaari naa sequenute pueyanaa. Pa quiniuuri juhua shushiquiani. Naatej, taa shushiquiacuaani rupaquijia niqishiyari, na nuhuaji tajimiohuari, paari naajuhua. <sup>15</sup> Naaratej, naa nia sequere cutara: “Pueyaso jaara paniri, canaari tariqui quianutaniya poonijionuucua”. Naa cutarate maninia sequenu. <sup>16</sup> Naaari saniniuujia sequequiaacujua: “Janiyari tariqui quianutaniyani cua miiniu panishano cua miiniuria”. Naa nia sequesacaritij, niaari jiyaniya nia naata tamajaaja miiniu puetunu nia panishanojuanaa. Naa nia sequesacari juhua nia miishocoriquianotej, niaari najuhua nia rupaa riutioconeetequiaa puera, juhua niishijia pueyano. Naa jaara tama nia cuaqueyajaaja nia jiyateya juhua tariqui miishocoriquiano niishijiatej, cunoori jiyanohua sesa. <sup>17</sup> Naajuhua pueyanaa, niaa jaara maninia miyaquiri, maninia miiniu niishijia nia quishacari, niaari tari sesa miijiaa.

5

*Casamiriaca pueya nacasusaanu*

<sup>1</sup> Nia tojitiare, casamiriaca pueyanaa. ¡Juhucarijia nia sapuere! ¡Nia sariyocature! ¡Niaari naquiya miiniutianiya taraatia! <sup>2</sup> Naaari jiyanohua casamiriaca. Cuno nia jiitiasano casamini, najuhua moqueyari. Surequeyari nia maniniuquiya toqueya miaqueyajuhua. Naacuajitij, puetunu nia jiitiasanojuanaari moquenutaniya. <sup>3</sup> Nia paatijosano oroni, nia cumaneecanio, najuhua tiyarashiyari. Naacuajitij, pa Nequesoreenaari maatia niishiniutianiya niaari sacuaraatia jamuejaca quiquiaari. Naa miijia nia quiniuucuatej, niaari saniitiosaanutaniya. Naaari socua shaajasaanutaniyaquij. Naaari najuhua queraatia casami paatijia shuquiriaatia nia quiniuria tamajaaja mijiria. Saniniuujia, nio pa quishacariiri quera pa Jiyaniijia tiuquishacariuhua na saniniujiuniuria pajaniya. <sup>4</sup> ¡Jiyaniijiajanaari nia poonijiotasano pueya tojiquiaa! Nojoriiri sariyocatiya nia cumaneecajiniji nia niqutioyaquiniuucua nojori poonijionuujiniji, niaara

na senoonuucua nataacuaca nia cuhuariquiajiniji. <sup>5</sup> Mijiria nia quishacarijia, niaari shuquiriaatia quiquiaa puetunu nia panishanojuanaa nia jiitiasacari. Naa shuquiriaatia nia quishacaritij, niaari juhuajaniya shiyoshiya juhua puecoosocoriquiano cushiya. Niaari naa miishaanutaniyajuhaaj. <sup>6</sup> Niaari maninia miijiaa puecooquiaa. Majaari nojori nujuatanu quiquiaa niajaniya, nocuara nia tonujusacari nia cuaracashiniutia najuhuanaj. Naacuajiti casamiriaca pueyanaa, niaa cumaati puetunu nio niaara sequesanojuanaa tojitiaa.

*Juhuajaniya pa sashiri pa Jiyaniijia*

<sup>7</sup> Naacuajiti cuarta Pueyaso pueyanaa, juhuajaniya nia sashiri pa Jiyaniijia cuaara tiuquihuara. Cuhuariquia camaruuri na natanu nuhuaji naa sashiquiaa marujuhuaj, maninia na natau moritianura. Maru sashiyajaariuhua cuaara niiria, na natau jajau na querajaacaatiniuria. <sup>8</sup> Naa nia sashirijuhuaj. Majaari pa Jiyaniijiaacuaji nia pishiniu. Nojuacuajaari quera tiuquiniutianihua. <sup>9</sup> Cuarta Pueyaso pueyanaa, majaari niarta pueyacuara nia rimiaaquenu nojori nia soonuta, niaa mariqui saniitiosaareeri. Nia niishiri, pa saniniuujunia Pueyasoori pocua catecanoya. Tari juhua pa tohuateyaji nujuuari. Nojuajaari seetanujuanaa pa saniniuujunia cutara. Nocuaji maninia pa quirij. <sup>10</sup> Pueyanaa, juhuajaniya pa rejeretarejuhuaj, paa jaara naquiya miishaareni. Naatej, taa tariucuacaanu Pueyaso sequesano caminiuujuniaa rejeretacoquiaari taraatia nojori miishacaricuaani, naa nia rejeretarejuhuaj. <sup>11</sup> Paari niishiyacuajani, Pueyasoori naquiya miiniu rejeretajaca pueya shuquiritiaja. Maninia na miiniutianiyari. Niaacuajaari tari pohuatasaaquiaarijuhuaj taa supuetana Job rejeretaquiaari naquiya na miishacaricuaani. Na nuhuaji cutara, Pueyasoori jiyanojia maninia na miiquiaariuhua, jiyanojia pueyacua taraajeja na quiniuucua, jiyanojiaariuhua.

<sup>12</sup> Cuarta Pueyaso pueyanaa, nia tojitiare. Nia pocoojosacari, tamonu jaara quia sequesanoocua tiuyaquiri, naajaa, majaari najuhuaa sesa pocuanu. Maja cutaraari sequenu: “Cua sequesanoori seetanujuanaa juhua jiya cajiniocuaja. Majaari na shaajenu quiniutianiya”. Majaari sequenujuhuaj: “Cua sequesanoori juhua nio jiya. Majaari na shaajenu quiniutianiya”. Majaari naa pocuanu sacuaraatiatej. Nia sequesano jaara seetanujuanaa quiri, nareja nia sequere: “Taaquiririniij”. Naajuhuaj, nia sequesano jaara quiri “maja”, cuaara naa quiiria seetanujuanaa. Majaari nia sequesano nia maatenu socua, Pueyaso mariqui nia saniitioreeri.

<sup>13</sup> Tamonu niajanijajinijinio jaara naquiya miishiya, nojuaja cuaara Pueyaso secojoora. Shuquiriaatia nia quishacari saniniuujia, Pueyasora nia jaaquequejore. <sup>14</sup> Cusosu nia quishacari, Pueyaso pueya jiitianaa nia sequere nojori cuaara secojoora niaacuara. Nojori cuaara shiyocua cojuata cusosu quiaara, pa Jiyaniijia sesajinia nojori secojosacari. <sup>15</sup> Nia secojosacari Pueyaso seetanujuanaa nocua nia tiuniutia, cusosuuri naatanutianuhua. Nojuaja jaara sesa miiquianu, Pueyasoori na jiyanooniutianiya sesa na miishanojiniji. <sup>16</sup> Cunora, sesa nia miiniu nia sequetoore nia jiyanooshaanura. Majaari sesa nia miishano nia seetanu. Na nuhuaji Pueyaso nia secojore tama niaacuarajaaja. Pueyasocua nia naatanijiorohua. Maninia pueyano secojosacari jiyanojia, cunoori jiyanojia cumaacaraca. Pueyasoori na secojosano tojijia. <sup>17</sup> Tariucuacaanu pueyara Pueyaso sequesano caminiuujunia Elíasni, nojuajaari nareja pueyano quiquiaarijuhuaj taa pajaniyacuaani. Naajaa, nojuaja jaara Pueyaso secojoquiaari maja maru niniuria, majaari maru niniu quiquiaari jiuujianaraca marijia cuaara shocojoquiaarijiaatijia, socua seis racanio. Majaari maru niniu quiquiaari tojetaarucujanaa. <sup>18</sup> Elías jaara pacutequiaariuhua secojonu maru na panishacari, maruuri shusha niqiaariuhua. Pueya nataacuacaari jiyacari shusha moritiaquiaariuhua.

<sup>19</sup> Cuarta Pueyaso pueyanaa, tamonu niajanijajinijinio jaara Pueyaso rootasano tojiyashijiara quiriohua, tamasa jaara na niquiri, cuaara na rootaaranaj, maninia miijia na quiniuhua. <sup>20</sup> Nia niishiri, cante sesa miijia tacatorohua Pueyasocua sesa na miiniujinijini, nojuajaari cuno sesa miijiaacuaji tacuya maja senota na shaajasaanura. Pueyaso na jiyanootiyaariuhua puetunu sesa na miishanojinijianaa. Tariucuaja cua panishano pueyanaa.



## COTEENU PEDRO NAAJIONEE

*Pedro saruhuatasacari narta Pueyaso pueya*

<sup>1</sup> ¿Niaate quiyajaa cuarta Pueyaso pueyanaa? Janiyari Pedroni, Jesucristo jiyaramiquishano na rupaa pohuatana cua quiniuria. Janiyari nio naajiya niaacuarani, noo pojoriicuara canapuate tiquiyocua niaquecojoquiaaricujani: Ponto jiyajinia, Galacia jiyajinia, Capadocia jiyajinia, Asia jiyajinia, Bitinia jiyajinianio. <sup>2</sup> Tariucuacaanu, pa Que Pueyasocuaaari nia saquiriojoquiaari na pueyarano nia quiniuria. Naaratej, nojuajaari na Sohuanu jiyaroquiaari nioojiajinia na poonijionura, Jesucristoocua nia tiuuniuria. Naacuajitij, Jesucristo shootenuucua na nanaca, Pueyasoori nia jiyanoocua, juhua tojetaarucujanaa jeequesano nioojia quiniuria. Na Sohuanuuri nia jataniquiaa tojetaarucujanaa maninia miijaca nia quiniuria, seetanujanaa Jesucristo tojijaca nia quiniurijuhua. Naa Pueyaso panishano pueya nia quiniuucua, nojuaja cuara cumaquiiria jiyanoohua niajaniya. Cuaara nioojia cajitiiria pueyaracaanujuhua.

*Pa niishiri, paari jiyanoohua maninia miishaariquianoni*

<sup>3</sup> Pa Jiyaniijia Jesucristo Que Pueyaso pa maniniuuaqueetare, jiyanoohua maninia na miiniuucua pajaniya. Jiyanoohua na taraajenuucua pocua, na pueya pa quiniuucujuhua, nojuajaari pa niishitiquiaari paari juhua quiariniora samiitianijiosaanutaniuhuanani. Paari naa samiitianijiosaanutaniuhuanani, naatej, taa Jesucristo samiitiaquiaariuhucuaani. Naa pa niishishacari taa pa miishaanutaniyani, paari shitimia sashiquiaani pa miishaanura taa Pueyaso miiniu paniya pajaniyacujani. <sup>4</sup> Naacuajitij, niaari niishiya niaari seetanujanaa masenutaniya puetunujanaa niaarano Pueyaso jiiitasano jiyocuaaanu. Cuno, Pueyaso racatasano niaaranoni, cunoori maja na naata shaajasaanu. Majaari na naata sesasaanu. Maja na naata tariucushiniujuhua. <sup>5</sup> Pueyasoocua nia tiuuniuucua, nojuajaari na cumaacata nia cojuaquiaa. Pueyaracaanu nia cojuanutaniyani nojuaja cuara nia rijiorejaatijia mijiria taraatia nia quiniujiniji, tojetaarucujanaa jatanishano quijaca nia quiniuria. Jiyanoohua maninia Pueyaso miiniu panishano na pueyaranoni, shusha jiyacari niquishaanutaniyani.

<sup>6</sup> Cunora niaari shuquiriaatia quiya. Saniniuujia, niaa naasucuaari taraajeya rupaquijia nia miijosacari naquiya mijiria. Naajaa, niaa jaara naquiya miishaare, cunoori maja najuhuanaj. <sup>7</sup> Naquiya pa miiniuni, cunoori pa saniniuujushaanura paate seetanujanaa Pueyasoocua tiuujacani. Niaacuajaari niishiya, pueyari jiyanoohua oro panijaca. Saniniuujia, Pueyasoocua pa tiuuniuni, cunoori jiyanoohua socua panishano orojiniji. Niaacuajaari niishiya, pueyari oro catijaja, na sanishaanura maninia oro seetanutejanaa. Naajaa, seetanujanaa maninia oroori shaajejajuhua. Saniniuujia, paa jaara mijiria naquiya pa miiniu rejeretajaca quirini, Pueyasoocua tiuujaca pa quiniuucua, cunoori socua jiyanoohua maninia cuno shaajeja orojiniji. Pueyasoocua nia tiuuniu jaara saniniuujushaare juhua orojuhua, jaara seetanujanaa maninia quiri, Pueyasoori nia timitianutaniya. Naacuajitij, Jesucristo muetasacari pocua, Pueyasoori jiyanoohua maninia miiniutaniya niajaniya. Jiyaniijianucua nia jiyatenutaniyani.

<sup>8</sup> Majaari juhuanajuaja Jesucristo nia niquiniu. Naajaa, niaacuajaari na panijaca. Nia niquishoo na quishacarijia, naajaa, niaari nocua tiuquiaa. Niaari na timitiaquiaa jiyanoohua. Tojetaarucujanaa jiyanoohua nia timiniu quiniuucua nioojiajinia, majaari nia naata na pohuatanu nia rupaata. <sup>9</sup> Niaari naa timiquiaa, tariucua jatanishano nioojia quiniuucua, Jesucristoocua nia tiuushacari.

<sup>10</sup> Tariucuacaanu, pueyara Pueyaso sequesano caminiuujunaa pueyari poojotaquiaari taa Pueyaso jiyanooniutianiya nio pa quishacari pueyani, na pueya nojori quiniuria. Nojoriiri tama nojori naajiotasanojuaja suraatia serojojuaca quiquiaari, Pueyaso Sohuanu niishitishano nojori naajiotasanoni. Nojoriiri jiyanoohua niishiniu paniquiaari taa Pueyaso jiyanooniutianiya pueyani. <sup>11</sup> Jesucristo Sohuanucuaaari juhucarijia nojori niishitiquiaari taa Pueyaso jiyarosocoriquiano Pueyano miishaanutaniya naquiya

coteenuni. Nojori niishitiquiaarijiaariuhuj, naquiya na miiniu nuhuaji saniniuujia, nojuajaari Jiyaniijarajanaa jiyatesaanutaniya, shacantuuca quijia na quiniuria. Naaratej, nojoriiri maninia na niishiniuria saniniuujiquiaari juucua, cantejaara cuno quiniutianiya, Pueyaso Jiyarosocoriquianoni, naajuhuj, taacari na muetanutaniyani. <sup>12</sup> Pueyasoori saaja nojori niishitiquiaari, na Sohuanu poojotanishano nojorini, cunoori maja tama nojoririjaaja na quiniu quiquiaari. Cuarta Pueyaso pueyanaa, jcunoori niaarano quiquiaari seetanujuanaa! ¡Tariucuacaanu poojotasano Pueyaso Jiyarosocoriquianojinijiiri tari tohuateequiaari! Jiyocuacaanu jiyarosano Pueyaso Sohuanuuri Pueyaso rupaa pohuatanaa cumaquiquiaa, taa na cumaquiquiaari Pueyaso Jiyarosocoriquianojiniji pohuatanaacuaani. Naacuajitij, quiari naataja nia tojishano Jesucristojinijini, cunoori supuetanaa pohuatasano quiquiaaricuaaja. Pueyaso seyajanaacuajaari pueyarano Pueyaso miishocoriquianoocua maatia niishiniucua jiaatiaajuhuj.

*Pueyasoori paniya saaja maninia mijjiaca pa quiniuria*

<sup>13</sup> Cunora, cuarta Pueyaso pueyanaa, jeenucuasano nia quiriquia. Jesucristo mue-tasacari pocua, Pueyasoori jyanohua maninia miiniutianiya pajaniya. Cunora, saaja naa nia miiniu panishaanuucua jiaatiajaca nia quiri. Majaari nioojia niquijotejaca nia quiniu. Maninia niishiriojuaca nia quiriquia. <sup>14</sup> Tarijia, niaari tama nia cuaqueya panishanojuaja mijjiaca quiquiaari, Pueyaso niishiyashijiac nia quishacarijia. Quiarijia saniniuujia, niaari na tojijiac cutara. Naaratej, na muerasu nia quiniuucua, majaari naa quijiac nia quiniu socua. <sup>15</sup> Saniniuujia, saa maninia mijjiacaja nia quiriquia. Pueyasocuajaari nia saquiriojuquiaari naa tojetaarucujanaa maninia mijjiaca nia quini-uria, juhua nojuajuhuj. <sup>16</sup> Tariucuacaanu Pueyaso sequesanoori naa naajiotasano quiyajuhuj:

“Tojetaarucujanaa sesa miyashijiac nia quiri, taa janiyacuaani”.

<sup>17</sup> Nia secojosacari, niaari Pueyaso sequequiaa, “cua Quena”. Cunoori maniacuaja. Naajaa, majaari nia niyjetanu cutara, nojuajaari puetunu pueyajanaa nequesoreenu-taniya sesa pa miishanojiniji, maninia pa miishanojinijinio. Majaari rimiajata na saniitonu quiniutianiya. Cunora, mijiria nia quishacarijia, nia puerenuta tama nia cuaqueyajaaja nia cojuare, niaa mariqui na tojiyashijiacara quiriohuari. <sup>18</sup> Pa supuetanaa quiniuucua sesa mijjiaca, paari naa mijjiacara quiquiaarijuhuaj. Pueyaso cutaraari naa sesa pa quiniujiniji pa jataniquiaari maninia na muerasu pa quiniuria. Niaacuajaari niishiya, majaari Pueyaso masenu quiquiaari pajaniya orota, platatanio, shaajeja casaata. <sup>19</sup> Nojuajaari pa masequiaari tama Neyanuniyojua nanacatajaaja. Jesucristoori tama na cuaqueyajaaja tarinitiaquiaari pocuara na mosaanura, na nanaca shoonuucua pa jiyanooshaanura. Tariucuacaanu, borrego jaara Pueyaso niquiara mosaaquiaari na camaru niti, cuno borregoori tojetaarucujanaa borrego maniniu quiquiaari. Naajuhuj, Jesucristoori tojetaarucujanaa maninia mijji quiquiaari. Naacuajitij, nojuajaari tojetaarucujanaa maninia pueyano quiquiaari pa niti na mosaanura. <sup>20</sup> Jiya ship-iniyaquishacarijia, Jesucristoori tariucua pueya niti mosocoriquiano sequesaaquiaari, sesa mijjiaca jiyanooshaanura. Saniniuujia quiari naataja, nojuajaari shusha mijiria muetaquiaari pocuara na mosaanura, taa Pueyaso miiniu paniquiaari pajaniyaracuajani. <sup>21</sup> Naa Jesucristo miiniuucua pocuaratej, niaari Pueyasocua tiuuquiaa. Pueyasocuajaari Neyanu samiitianiquiaariuhua. Na jiyatequiaariiri Jiyaniijajanaa na quiniuria, shacantuuca cumaacaraca quijia na quiniuria. Naacuajitij, niaari quiarijia Pueyasocua tiuya, na samiitianiniuria nijaniyajuhuj. Naaratej, niaari juhujaniya sashiya, shacantuuca quijiacara nia jatanishaanurajuhuj.

<sup>22</sup> Seetanu rupajanaa tojitajaca nia quiniuucua, nioojiaari tari jeequejosaaquiaari, niarta Pueyaso pueya panijiac nia quiniuria seetanujuanaa. Naaratej, seetanujuanaa panitiojuaca nia quiriquia puetunu nioojitajanaa, maja sesa nia niishiriojonuta que-naaja. <sup>23</sup> Naa panijiac nia quiri, jatanishano pueya nia quiniuucua. Pueyaso rupaacua nia tiuushacari, niaari juhua roosaaquiaariuhua, pueyaracaanu quijiac nia quiniuria seetanujuanaa. Pueyaso Rupaacuajaari pueyano samiitianijia, saminio na quiniuucua. Naacuajitij, niaari shaajeyashijiacara jatanishaaquiaari pueyaracaanu Quijia

rupaacua nia tiuuniuucua. <sup>24</sup> Tariucuacaanu Pueyaso Rupaajinia naajiotasanocuajaari naa sequeya:

“Puetunu pueyajanaari rishiyashijiaca juhua jiyasocua. Na cumaaca, puetunu na jiitiasanojuanaajuhuj, cunoori soreja, juhua naana shuu. Jiyasocuaari soreja. Naana shuuri tijia. <sup>25</sup> Saniniuujia, Pueyaso Rupaa cutaraari pueyaracaanu quiijia”. Cuno rupaacuajaari nia niqiuara pohuatasaaquiaari pueyaracaanu quijiacara na jataninuria niajaniya.

## 2

<sup>1</sup> Naaratej, nia tarinitiare puetunu sesa nia miiniuujanaa. Seetanujuanaa nia tarinitiare cuaracashijionu. Naajuhuj, majaari sapuenu juhua maninia pueyano niquishano nia quiniu najuhuanaj. Majaari tamasaca jiitiasanoocua jiaatijaca nia quiniuujuhuj. Majaari coriaacojuaca nia quiniu socua. <sup>2-3</sup> Naa jaara tari niishiyacuaja pa Jiyaniijaari seetanujuanaa maninia, na rupaacua jiaatijaca nia quiricuarajaj. Naatej, taa shusha rasano conaaja jiaatiaa supuenucuacuaani, naa Pueyaso Rupaacua jiaatijaca nia quiriqiajuhuaj, cumueeca Pueyaso muerasu nia quiniuria seetanujuanaa. Naacuajitij, niocua tojetaarucujanaa jatanishano pueya quiri.

### *Cristoori juhua saminio saajia, Pueyaso quiquiorano tiataja*

<sup>4</sup> Saijiniji shipinishano tiaari pueyaracaanu rishijia. Naaratej, pa Jiyaniijaari miriqui sequeshiya juhua saminio saajiata Pueyaso quiquiora. Mijiria Pueyasora tiajonaari jiyaniquiaari cuno saajiaari sesarujau. Naaratej, nojori jiyajenetasacari cuno saajia, nojoriiri na jataquiaari na ruuretasacari. Nojuaja cutaraari Pueyaso saajia maniniu, tama na saquiriojosanojuaja. Naaratej, nocua pa tiuuri. <sup>5</sup> Naajuhuj, puetunu Jesuucua tiuujica pueyaranojuanaari pueyaracaanu rishijia quiquiorano Pueyasora. Naacuajitij, Jesuucua pa tiuushacari, paari juhua maniniuujiaaca sai Pueyasorani, na quiquiora na tiatajara. Naajuhuj, Pueyaso quiquio pa quishacari Neyanuucua pa tiuuniuucua, Pueyasoori pa jiyateya pueyacuara secojonaa pa quiniuria na tacoji. Majaari seya pa niqutiojonu quiquiaa Pueyasoni, taa tariucuacaanu pueyacuara secojonaa pueya miiquiaaricuaani. Paa cutaraari tama pa cuaqueyajaaja jiyatequiaa Pueyasora pa quiniuriani, puetunu pa miishanojuanaano. Puetunu naa pa miishanojuanaa Jesucristoocua pa tiuuniuucuaani, cunoori Pueyaso timitiquiaa. <sup>6</sup> Cunora, tariucuacaanu Pueyaso Rupaajinia, miriqui Pueyaso sequesano Jesucristojiniiri naa naajiotasano quiya:

“Janiyari Sión tuhuananuucua jyanohua cua panishano saajia nianutaniyani. Cuno saajiaari tama cua saquiriojosanojuaja. Maniniuujiajau saajia seetanujuanaari. Cante nocua tiuyani, nojuajaari maja na cararosaanu quiniutianiya”.

<sup>7</sup> Cua panishano pueyanaa, cuno saajiaacua tiuujica nia quiniuucua, cuno saajiaari jyanohua nia timitiasano. Nocua tiuyashijiaca cutaraari cararosaanutaniya. Nio tariucuacaanu Pueyaso Rupaajinia naajiotasanoori tari tohuatecanu nojoriria. Naa miriqui sequeyari:

“Tiajonaa jatasano saajia, nojori jyanishacari cuno saajia naasucua sesarujau, cuno saajiacuajaari socua jyanohua panishano saajia jiyatesaaquiaariuhua”.

<sup>8</sup> Tamaqui, nojuajiniiri naa miriqui naajiotasano quiyajuhuj:

“Pueyari cuno saajiaacua tiuriiniutianiya. Nocua jiriatanutaniyajaariuhua na tiuriinuria”.

Nojoriiri nocua tiuriiquiaa, nojori tojiyaquiniuucua Pueyaso rupaa Jesucristojiniji. Pueyasocuajaari tariucuacaanu sequequiaari Neyanuucua tiuyashijiacaari tiuriiniutianiya puetunurajanaa.

<sup>9</sup> Niajaniya saniniuujia, niaari tama Pueyaso saquiriojosano pueyajaaja. Nojuajaari puetunu niajaniyajanaa jiyatequiaari nojuaja secojonaa nia quiniuria pueyacuara, pueyaracaanu na panishano miiijica nia quiniurijuhuj. Puetunu niajaniyajanaari tamasaca pueyapuejinijinio saquiriojosaaquiaari saaja Pueyaso pueya nia quiniuria. Neyanu cusonuta, Pueyasoori naa pa masequiaari tama nerajaaja, maninia Pueyaso miishano pa pohuatanura tamasaca niqiuara. Tarijia, niaacuajaari juhua ninishiqui quiijica quiquiaari. Pueyaso cutaraari nioojia cuhuataquiaari, seetanujuanaa shacantuuca cumacajinia quiijica nia quiniuria nata. <sup>10</sup> Tariucuacaanu, Jesucristoocua tiuyashijiaca

nia quishacarijia, niaari juhua soosano taucuaca quiquiaari Pueyasora. Quiarijia saniniuujia, niaari Pueyaso panishano pueya. Tariucuacaanu, majaari Pueyaso taraajenu quiija niaacua. Quiarijia cutara, niaacua taraajeyari. Cunora, nia jiyanooquiaari.

*Pueyaso panishano miijiaca pa quiriqiaj*

<sup>11</sup> Cua panishano cuarta Pueyaso pueyanaa, nia tojiri cua sequesano. Niaari juhua rucoonaa mijiria. Nio jiyari maja pueyaracaanu pa quiijara. Naaratej, majaari tama nia cuaqueya miiniu panishanojuaaja miijiaca nia quiniu, saaja shuquiriaatia nia quiniuria mijiria. Sesa casaacua pa cuaqueya jiaatianuni, cunoori poojia sesojua. <sup>12</sup> Saaja maninia miijiaca nia quiriqia Pueyaso niishiyashijia niquiara. Naacuajitij, nojori jaara niaacuara rimiaaqueriquia juhua sesa miijiacara nojori jiyatesacari nijaniya, naajaa. Jiya puequesacari, Pueyasoori puetunu pueyajanaa nequesoreenutaniya. Jiyacari, niaacuara rimiaaquejacaari niishiniutaniya, Pueyasoori tojetaarucujanaa maninia miijia na saniitiosacari nojori, maninia na miishacari nijaniya saniniuujia.

<sup>13</sup> Pa Jiyaniijia tojiijaca nia quiniuucua, puetunu mijiria pa jiitianaa jiyaniijianucua tojitiajaca nia quiriqiajuhuaj. Naacuajitij, nia jiya jiyaniijajanaa tojiijaca nia quiri. Nojuacuajaari jiyaniijajanaa cutara. <sup>14</sup> Cunora, na jiyatesano jiyaniijianucua tojiijaca nia quiriqiajuhuaj. Nojoricuajaari na jiyaramiquishano, sesa miijiaca saniitiosaanura, maninia miijiaca maniniuhuaqueetasaanura saniniuujia. <sup>15</sup> Naacuajitij, saaja maninia miijiaca nia quishacari, niaari niishiyashijia sesa miijiaca sanaajanutaniya, najuhuana nojori sesacasacari nijaniya. Cunora, Pueyasoori paniya maninia miijiaca nia quiniuria.

<sup>16</sup> Tariucuacaanu, Moisés Rootasanoori juhua nia jiyaniijia quiija puetunu niaarajanaa nia tojishocoriquiano. Quiarijia saniniuujia, Jesu cusonuucua nia niti, nojuajaari Moisés Rootasano tohuateequiaari. Naacuajitij, nojuajaari Moisés Rootasano sanaajaquiaari niaara. Naacuajitij, Moisés Rootasano tonujiyaquishacari niaacuara tari, naajaa, majaari nia jyaniniu naacuajiti nia naata tama nia panishanojuaaja miiniu. Pueyasojuaanaacua-jaari nia Jiyaniijajanaa cutara. Naaratej, seetanujuanaa na tojitiajaca seya nia quiriqia cutara. <sup>17</sup> Majaari quenaaja niquiriyatu pueyano rerequeteja nia quiniu. Niarta Pueyaso pueya panijia nia quiriqia cutara. Seetanujuanaa Pueyaso tojiijaca nia quiriqia. Majaari jiya jiyaniijajanaa rerequetejaca nia quiniu.

*Naquiya pa miishacari, sanaa pa rejeretariquia juhua Cristo*

<sup>18</sup> Poonijotesano pueyanaa, seetanujuanaa maninia nia camarnu tojiijaca nia quiriqia. Nia camarnu jaara juaajaca quiriqia, naajaa, saaja na tojiijaca nia quiriqia. Majaari saaja maninia nia jitiijaca tojiijaca nia quiniu, nia jiyanoojiacanio.

<sup>19</sup> Niaa jaara juhuajaniya rejeretariquia najuhuana nia camarnu saniitiosacari nijaniya, cunoori jyanohua maninia Pueyasora. <sup>20</sup> Pueyaso cutaraari maja na timiniu niaa jaara juhuajaniya rejeretare nia camarnu saniitiosacari nijaniya seetanujuanaa sesa nia miiniuucua. Saniniuujia, nia camarnu jaara saniitiore nijaniya maninia nia miiniuucua, niaa jaara na rejeretare juhuajaniya, Pueyasoori cuno timitiaja cutara.

<sup>21</sup> Pueyasocuajaari nia saquiriojoquiaari naquiya rejeretajaca nia quiniuria maninia nia miiniuucua. Cristojuanaacuajaari naquiya miishaaquiaari maninia na miiniuria pajaniya. Nojuajaari naa miiquiaaritij, pa niishiniuria juhua nojuaja pa miiniuriajuhuaj.

<sup>22</sup> Cristoori maja quenaaja sesa na miiniu quiquiaari mijiria na quishacari. Majaari na cuaracashijionu quiquiaari quenaajajuhuj. <sup>23</sup> Jaara sesacasaquiaari, nojuajaari maja quenaaja nojori na riucuanu quiija na juaaniutia. Jaara miitiasaaquiaari, majaari quenaaja nojori na miananajonu quiquiaari. Nojuajaari saaja na Que Pueyasocua tiuquiaari, na niishishacari nojuajaari seetanujuanaa maninia nequesoreena cutara.

<sup>24</sup> Cristo jaara niyacutesanojinia cusujuasaaquiaari, nojuajaari tari puetunu sesa pa miiniujianaa cusotaquiaari. Naa pa niti Cristo cusonuucuatej, cunoori quiquiaari maninia miijiaca pa quiniuria saniniuujia, maja socua sesa miijia pa quiniuria. Naajuhuj, nojuajaari pa niti nootusaaquiaari, pa naatanijiosaanura saniniuujia. <sup>25</sup> Tarijia, niaari juhua tashuquioono borregohua rucojuaca quiquiaari. Quiarijia saniniuujia, niaari nia cojuana Cristoocua tiuquiijoquiaari. Nojuacuajaari nioojia jiitiana maniniu.

## 3

*Camiyono pueyara rootasano*

<sup>1</sup> Camishano maajipohuanaa, nia niyaca tojitiajaca nia quiriquia maninia. Naacuajitij, nia niyaca jaara Pueyaso rupaacua tiyashijia quiriquia, naajaa, nojori tojitiajaca nia quiniucua nojoriiri niishiniutianiya Pueyaso Rupaari seetanujuanaa. Nojoriiri naa niishiniutianiya saa maninia miijiacaja nia quishacari, nojori nia pohuataaquishacarijia Pueyaso Rupaa. <sup>2</sup> Nojori niquishacari tojetaarucujanaa maninia miijiacaja nia quishacari, nojori tojijiacajuhuaaj, saa cunotaja nojoriiri maatia niishiniutianiya Pueyaso Rupaari seetanujuanaa. <sup>3</sup> Maajipohuanaa, majaari nia tacaaniu saaja nia maniniushiniuria, maninia nia niquishaanura. ¿Maajitiiri maniniucuasano, saaja na muecaca na canu-usacari maninia, na cushitiasacari orojiniji shipinishano tuhuajashiquia, na cushishacari shanohua toquejuhuaj? ¿Jiyano maajitiiri maniniucuasano jaara juaaniu maniniu quiriquiajuhuaj? Maja. <sup>4</sup> Naaratej, maninia cutaraari nia tacaaniuria nioojia nia maniniushitiniuria. Cunora, saaja maninia maaji quiniucua jiaatiajaca nia quiriquia cutara, jacaria pocuajajuhuaaj, maja juaajia. Jiyano maajitij, cunoori seetanujuanaa maninia niquishano Pueyasora cutara. Niaa jaara nioojia maniniushitiri cutara, cunoori seetanujuanaa shaajeyaquiriquiano. <sup>5</sup> Naajuhuaaj, Pueyasocua tiuujica tariucuaaanu maajipohuari neyaca tojijiacaja quiquiaari. Naa nojori miiniucuatej, nojori jiuujiaari seetanujuanaa shanohua maniniushitishano quiquiaari Pueyasora cutara. <sup>6</sup> Supuetana Abraham niquiocua Saaraari naa neyaca tojijia quiquiaari. Seetanujuanaa neyaca tojijia na quishacari, nojuajaari na jiyaniquijia na jiyaniijiaata. Naacuajitij, niaa jaara maninia miijiacaja quiriquia, niaa jaara nia puereyaquiniutia nia niyaca tojijia quiriquiajuhuaj, Pueyasora, niaari Saara niquiojori.

<sup>7</sup> Niajanियarijiaata canuunaa, nia niquiocua nia jiitariquia maninia, nia niishishacari maajiiri maja cumueeca juhua cayaja. Majaari na rerequetenu. Maajipohuacuaajari Pueyaso jiyanooshanojuhuaj, taa na jyanooquiaari nijaniyacuaani. Pueyasoori niaata nojori cojiritianutianiya samiitianijionu, pueyaracaanu rishijiacaja nojori quiniurajuhuaaj. Naacuajitij, maninia nia jiitariquia nia niquiocua, Pueyaso mariqui nojuaja nia secosano tojiyaquiriiri.

*Paatucua taa miiriquia parta pueyani*

<sup>8</sup> Pueyanaa, cua sequesano quiarijiani, nioori puetunu Pueyaso pueyarajanaa. Pueyaracaanu jiuujiaatiojuaca nia quiri. Majaari juayonuujutanu. Niarta Pueyaso pueya nia cojiriquia taraatia nojori quishacari, shuquiriaatia nojori quishacarijuhuaj. Seetanujuanaa panitioojuaca nia quiri juhua nia tapueyocucata. Taraajetoojuaca nia quiri juhuaj. Naajuhuaaj, majaari tama nia cuaqueyajaaja nia jiyatenu juhua socua tojishano pueyano nia quiniuria tamonu pueyanojiniji. <sup>9</sup> Niaa jaara sesa miishaariquia, majaari na naminiu. Naajuhuaaj, niaa jaara sesacasaariquia, majaari nojori nia riucuanu nojori nia sesacanurajuhuaaj. Saaja maninia nia rihuanere nojori. Tariucuaaanu, Pueyaso paraca nia quishacarijia, nojuacuajaari nia saquiriojoquiaari maninia na miiniuria nijaniya. Naaratej, saaja maninia nia miiriquia nia paracajuhuaaj. <sup>10</sup> Tariucuaaanu Pueyaso Rupaajiniacuajaari naa naajiotasano quiyajuhuaaj:

“Cante pueyaracaanu mijiria rishiniucua jiaatiaani, shuquiriaatia na quiniurajuhuaaj, nojuaja cuaara na niti cojuara maja sesa na pocuanura. Cuaara na rupaa cojuarajuhuaaja maja na cuaracashijionura. <sup>11</sup> Naajuhuaaj, cuaara sesa na miijionu tarinitiaara saaja maninia na miiniuria. Nojuaja cuaara pueya jyanootiooteja quiiria. Cuaara naa maninia na miiniu tarinitiaaquiiria. <sup>12</sup> Cante naa maninia miijiani, Pueyasoori na cojuaja, na secosano tojijiaarijuhuaj. Saniniuujia, Pueyasoori sesa miijiacaja samiritiaaja saaja”.

<sup>13</sup> ¿Cantucua sesa nia miiriquiani niaa jaara saaja maninia miijiacaja quiriquia?  
<sup>14</sup> Naajaa, niaa jaara saaja maninia nia miiniucua miitiasaare, nia timiquiore. Pueyasocuaajari jiyanoohua maninia miiniutianiya nijaniya saniniuujia. Mijiria quiniiaa miananajosacari nijaniya, majaari puerenu, majaari nioojia nia niquijiotenu.  
<sup>15</sup> Saniniuujia, nioojiajinia Cristo nia jiyatere nia Jiyaniijiajanaara, seetanujuanaa na

tojjiaca nia quiniuria. Juhuacarijia nia niishiriojoriquia, jeenucuasano nia quiniuria, maninia nia pohuatanura Jesucristojiniji. Naacuajitij, niaari jeenucuasano quiniutianiya, maninia nia riucuanura tamasaca jaara nequesotare nijaniya, casaara juhuanianiya naquiya miiniu rejeretajacate nijaniyani. <sup>16</sup> Jacaria nia pohuatatare nia paniniutia nojori, maja nia rerequetenuta nojori. Pueyaracaanu maninia miijiaca nia quiriqia, sesa nia miiniu mariqui nioojia macuhujareeri. Naacuajitij, pueyaracaanu shitimia maninia miijiaca nia quishacari Jesucristoocua tiuujia nia quiniucua, niaacuara rimiaaquejacaari tama sesa na pocuanuucujaja caririquiniutianiya.

<sup>17</sup> Nio nia niishiri pueyanaa. Pueyaso jaara paniri naquiya nia miishaanura, socua maninia cutaraari naquiya nia miishaanura maninia nia miiniuucua, maja sesa nia miiniuucua. <sup>18</sup> Cristojuanaacuajaari mosaaquiaari sesa miijiaca pa quiniucua. Majaari socua na pacutenu quiniutianiya cusonu. Nojuajaari tojetaarucujanaa maninia miijia quiquiaari. Naacuajitij, nojuajaari sesa miijiacacuara cusoquiaari, Pueyasocua na jiyatanura nijaniya. Pueyano cuaqueyaraca na quishacari, mosaaquiaariiri. Pueyaracaanu rishijia sohuanuraca na quiniucua, nojuajaari samiitiaquiaariuhua. <sup>19</sup> Naa sohuanu na quiniucuatej, nojuajaari macunucua quiquiojinia rosequiaari tii tama nojuajiniijiaaja na pohuatanura macunucua sohuanu. Cuno pojoriiri nujuatejojuajinia mishiquionucua quiya. <sup>20</sup> Cuno pojoriiri, noo pojoricuaja tariucuaaanu supuetana Noé tojiyashijia quiquiaaritij, pueyaracaanu Noé poojotasacari Pueyaso rupaa nojori niqiuara juucua. Pueyaracaanu Noé tarishishacari na puereetuuca buque na shipinishacari, pajaacuaji na tacajara, Pueyasoori jiyacari cuno sesa miijiaca sashiquiaari juucua. Pueyaracaanu sashiquiaariiri nojori tacatonuhua noojiaca nocua juucua. Puetunu mijiria quijiacua pueyajiniujianaani, saaja ocho pueyari cureequiaari, buquejiniacuma nojori tiuquitianuucua. Puetunu pueya shushiniuushacari pajaajinia, cuno pajaari saniniuujia Pueyasocua tiuujia cuataniquiaari na buquejia. <sup>21</sup> Quiarijia pajaniyara saniniuujia, cuno pajaari miriqui pa niishitiojiya taa Pueyaso miiquiaa pajaniyani, paa jaara moojinia tiuquinishaareni Jesuucua pa tiuushacari. Naatej, taa Noé juhuajaniya cuataquiaari pajaajiniacuaani, Pueyasocua tiuujia na quiniucua, pueraari naajuhuj. Naacuajitij, paa jaara moojinia tiuquinishaareni, paari pa timiniutia moojiniji tohuataquihuani, poojia cajitishano seetanujanaa pa niishishacari paari tari jiyanooshanoni, pocuaji Tacuna Jesucristo samiitianuucua macujiniji. Majaari pa tiuquinishaanu quiquiaa pa seca pa jatanura. <sup>22</sup> Jesucristo samiitiasacariuhua, nojuajaari jiyocuaaanu tacaquiaariuhua. Quiarijia cajiya Pueyaso miaquetajaraari. Jiyaniijajanaa na quiniucua, nojuajaari cumaacaraca, tama nojuajaaja na tojitiniuria Pueyaso seya, puetunu cumaacaraca quijiacajanaa, samaruhuanio.

#### 4

##### *Maninia miijiaca pa quiriqia, Pueyaso cumaaca pa jiitianuucua*

<sup>1</sup> Naacuajiti pueyanaa, naatej, taa Cristo rejeretaquiaari naquiya miiniu mijiria na quishacaricaani, naa rejeretajaca nia quiriqiajuhuj, niaa jaara naquiya miishaariquia. Naquiya pa miishacari, cunoori sesa pa miiniu pa tarinitijia. <sup>2</sup> Naacuajitij, paa jaara naa naquiya miishaariquiani, na nuhuaji paari saaja Pueyasora quiniu paniyani. Paari saaja na panishano miiniu paniyani, maja tama pa cuaqueya panishanojuaaja pa miiniuria socua. <sup>3</sup> Tarijia, Pueyaso tojiyashijia nia quishacarijia pueyanaa, niaari jiyanohua sesa miijiaca quiquiaari, taa Pueyaso niishiyashijia miiquiaacuaani. Niaari saaja nia cuaqueya miiniu panishanoocua shiiniuquijia quiquiaari. Niaari queraatia tamaatia sesa miiniuucua jiaatiajaca quiquiaari. Niaari saaja mashaasequenujuaca quiquiaari. Nia queranacunuusaqui, niaari tojetaarucujanaa sacuaratia miijiaca quiquiaari. Niaari rerejojuajuhua puera nia ratunura, jiyanohua nia mashaasequenuunurajuhuj. Naajuhuj, niaari juaashiquiata shipinishano nia pueyasora nia jiyatesano shuquiritiajaca quiquiaari. Niaari na tacoji sacuaratia pueresano casaa miiquiaarijuhuaj. <sup>4</sup> Quiarijia saniniuujia, Pueyaso niishiyashijia nia cojiyaquishacari naa sacuaratia nia miijionuratej, nojoriiri jiuujiatequiaa nojori shaacasacari nijaniya. Nojoriiri cunora nia

sesacaquiaa. <sup>5</sup> Cuno pojori cuaara niishiiria nio, Pueyasoori nojori nequesoreenutaniya na nequesoreesacari puetunu pueyajanaa, saminiucua, macunucuanio. Jiyacaritij, nojori cuaara tama nojoriicuai riucuaarajaaja. <sup>6</sup> Cunora, pa Jiyaniijia Jesucristoori macunucua niqiuara pohuataquiaari Pueyaso rupaa tama nojuajiniijiaaja, nocua tiuujiacara na jiyatesocoriquiano. Nocua tiuujiaaari pueyaracaanu rishijiacara quiriquiano, taa Pueyasocuaani. Sesa miijiaa mijiria nojori quiniucua, nojoriiri pajaajinia cusonuuquiaari taa puetunu pueyajanaa shaajecoquiaacuaani. Naajaa, Jesuucua tiuujiaa cutaraari samiitianijiosaanutaniuhua.

<sup>7</sup> Nio pa quishacarini, paari socua quenaacoya jiya puequesacariicuarani. Naaratej, niishiriojuaca nia quiriquia. Maninia nia jiitariquia tama nia cuaqueyajaaja, saaja Pueyaso secojuaca nia quiniuria pueyaracaanu. <sup>8</sup> Jiyanoehua panitiojuaca nia quiriquiajuhuaj. Cunoori socua panishano cutara. Paa jaara panijiaa quiriquiani, paari queraatia sesa miishano jiyanoojia quiniutianiyani. Naaratej, seetanujuanaa panijiaa nia quiriquia. <sup>9</sup> Niarta Pueyaso pueya jiitiaaquishacari na maquejara, na miaquesocoriquianojuhuaj, nojoriicua taraajeja nia quiriquia. Nojori nia tiuquiniitariquia nia tiajinia nia timiniutia. Majaari nojori nia ririjiotanu nia taajenuta. <sup>10</sup> Pueyasocuaaari na Sohuanu niqitioquiaa puetunu na pueyajanaa, tamaatia maninia casaa miiniu niishijiaa pa quiniuria. Naaratej, puetunu nijaniyajanaa cuaara maninia miiria niarta Pueyaso pueya pueyaracaanu, taa Pueyaso cumaquiquiaa nijaniya maninia nia miiniuriacuajani. Maninia nia poonijioteriquia Pueyaso cumaaca, nojuaja niqitiojosano nijaniyani. <sup>11</sup> Naacuajitij, nia pocuasacari, Pueyasocua nia tiuuri nojuaja cumaquiniuria nijaniya na panishano nia sequenura. Naajuhuaaj, niaa jaara casaa miiriquia niarta Pueyaso pueya nia naacunura, nojori nia miiriquia maninia Pueyaso niqitiosano cumaacata. Naa nia miiriquiatej, Pueyaso timitiasaanura socua, Jesucristoocua tiuujiaa nia quiniucua. Nojuaja cuaara maniniuhuaqueetasaaria pueyaracaanu, tojetaarucujanaa maninia miijia na quiniucua, puetunu cumaacaracajanaa na quiniucuaajuahuaj. Cuaara naa quiiriatej.

*Juhujaniya pa rejeretare naquiya miiniu, Pueyaso pueya pa quiniucua*

<sup>12</sup> Cua panishano cuarta Pueyaso pueyanaa, majaari nia shiriiquiniu niaa jaara jiyanoehua naquiya miishaariquia. Majaari nia jyaniniujuhuaj saa nijaniyaja naa miishiya. <sup>13</sup> Niaa jaara naa naquiya miishaariquiatej, nia timiri. Jesucristoocua tiuujiaa nia quiniucua, niaacuajaari naa miishiya taa Jesucristo miishaaquiaari naquiyacuaani. Naa naquiya miiniu nia rejeretasacariitij, niaari jyanohua timitianutaniya Jesucristo, shacantuuca na cumaacata na tiuquishacariuhua, na jataniniuria nijaniya juhua nojuaja nia quiniuriajuhuaj. <sup>14</sup> Naajuhuaaj, niaa jaara sesacasaariquia Jesucristo tojijiaa nia quiniucua, shuquiriaatia nia quiriquia. Pueyari naa nia sesacaquiaa, shitimia maninia miijiaa nia quishacari, Pueyaso Sohuanuraca nia quiniucua. <sup>15</sup> Niaa jaara naquiya miishaariquia pueyanaa, cuno cuaara quiiria maninia miijiaa nia quiniucua, maja sesa miijiaa nia quiniucua. Niaa cuaara caririquiiria cutara niaa jaara mojuja quiri, nohuasejojua, sesa miijia, timia niishiniu panijia tamasaca casaa. <sup>16</sup> Saniniuuja, maja cutaraari nia caririquiniu niaa jaara naquiya miishaariquia Jesuucua tiuujiaa nia quiniucua. Saaja Pueyaso nia shuquiritariquia cunora.

<sup>17</sup> Quiarijiani, Pueyasoori tama na pueyajaaja saniitioquiaa na tojitiaaquishacari na rupaa. Paa jaara naa saniitiosaaquiaacuaani, ¿taariquitijia noo pojori miishaanutaniya socuatejaj, Jesucristojiniji pohuatasano ruuretajacatej? <sup>18</sup> Naacuajitij, Pueyaso jiyanooshano pueya jaara queraatia naquiya miiquiaacuaa, ¿taariquitijia Pueyaso tojiyashijiaa miishaanutaniyatej? ¡Juhuej! Puereeta miishaanutaniyari Pueyaso ruuretajaca, sesa miijiacanio. Nojoriiri jyanohua socua naquiya miishaanutaniya, Pueyaso saniitiosacari nojori. <sup>19</sup> Naacuajitij, Pueyaso jaara naa naquiya nia miishaanura paniya, juhujaniya nia rejeretariquia naquiya nia miiniu. Majaari nia tarinitianu maninia nia miiniu, naquiya nia miishacari. Saaja Pueyasocua nia tiuuriquia nioojia na cojuanura maninia. Nojuacuajaari na Shipinina. Nojuacuajaari saa maninija. Naquiya pa miitiquiaacuajaari socua na jeenucuanura pajaniya.

## 5

*Socua rootasano Pueyaso pueyara*

<sup>1</sup> Quiarijia saniniuujia cuarta Pueyaso pueyanaa, janiyari nia jiitianaa nacasuyani. Nia-janiya, Pueyaso pueya maapue jiitianaanaa, cua tojitiare. Janiyacuajaari Pueyaso pueya maanu jiitianajuhuaaj, juhua nijaniyajuhuaaj. Janiyacuajaari pa Jiyaniijijanaa niqini-ani, nojuaja jaara naquiya miijioquiaari mijiria na quishacarijia canaata. Naajuhuaaj, nojuajiniji cua pohuatanuucua, janiyari naquiya miishaaquiaaaniuhuaaj. Naacuajitij, pa Jiyaniijia muetasacariuhua na shacantuuca cumaacajinia, janiyari jaarajaaja niaata cojiritiasaanutaniya jatanishaanuni, juhua nojuaja pa quiniuria mariyata. <sup>2</sup> Cunora Pueyaso pueya jiitianaanaa, shamaatia nia cojuare Pueyaso pueyaniyojua, teyano jiitianaara Pueyaso jiyatequiaari nijaniyacujani. Maninia nia cojuariquia nojori, seetanujuanaa nojori nia paniniutia, taa Pueyaso paniya nojori nia cojuanuracuajani. Majaari nojori nia jiitianu nia taajenuta saaja nojori jiitianaa nia quiniuucua. Naajuhuaaj, majaari nojori jiitianaa nia quiniu saaja cumaneecaacua nia jiaatianuta. Saniniuujia, seetanujuanaa nojori nia paniniutia nia jiitariquia niarta Pueyaso pueya. <sup>3</sup> Majaari niarta Pueyaso pueya nia jiitianu juhua tama nia seyajaaja. Nijaniya saniya cuaara maninia miijiaci quiiria nojori niqiuara, nojori niishiniuria naa quijiacate Pueyaso pueya, naa nojori miiniuriajuhuaaj. <sup>4</sup> Naacuajitij, pa Jiitianajanaa tiuquishacariuhua jiy-ocuaaanuji, niari shacantuuca quijiacara jatanishaanutaniya, pueyaracaanu rishijiaci nia quiniuriajuhuaaj.

<sup>5</sup> Nijaniya mashiquireniaa, Pueyaso pueya jiitianaa tojijiaci nia quiriquirejuhuaaj. Puetunu nijaniyajanaa Pueyaso pueyanaa, tama nia cuaqueyajaaja nia jiyatere niarta Pueyaso pueyano cumaquiniaa nia quiniuria jaarajaaja. Tariucuaaanu Pueyaso Rupaajiniacuajaari naa naajiotasano quiya:

“Pueyasoori na juaniutia niqijia narta pueya shocoteja. Saniniuujia, narta pueyano shocoteyashijia naacujua cutaraari”.

<sup>6</sup> Naarate pueyanaa, puetunu niarta Pueyaso pueyajanaa nia jiyateriquia tojishano pueya nojori quiniuria niaara. Majaari quenaaja nojori nia rerequetenu. Naa juhuajaniya niarta Pueyaso pueya tojijiaci nia quishacarijia, pa Jiyaniijia Jesucristo jaara tiuquiriohua, Pueyasoori na cumaacata nia jiyatenutaniya jiyaniijianucua nia quiniuriajuhuaaj.

<sup>7</sup> Pueyanaa, puetunu nia tacaaniujianaa nia niqitioire Pueyaso. Nojuacuajaari niaacua taraajequiaa.

<sup>8</sup> Pueyanaa, nia Paraca sequeeri nia shanacujuquiaa, juhua sare, taa sare shanacujija na sanura casaacuaani. Cunora, soquejaca nia quiriquire pueyaracaanu. Juhua sutejaca nia quiriquire, pueyaracaanu nia secojonura, Sesaaca mariqui juhua sare nia sareeri. <sup>9</sup> Cumaatia nia nujuatariquia nojuaja, seetanujuanaa Pueyasoojia tiuujiaci nia quishacari. Majaari Pueyaso Rupaacuaji nia taacanuunu. Naa nia miiriquiatej, nia niishishacari niarta Pueyaso pueyari puetunu tiqiyocuajanaa naa naquiya miiquioyajuhaaj. <sup>10</sup> Naa jaara rupaquijia naquiya miishaariquia mijiria, Pueyasoori na nuhuaji nia jataniniutianiya tojetaarucuajanaa maninia pueya nia quiniuria. Tojetaarucuajanaa pa jiyanoojia na quiniuucua, nojuacuajaari nia saquiriojoquiaari nata nia quiniuria shacantuuca na cumaacajinia, Neyanu Jesucua nia tiuuniuucua. Naaratej, nojuacuajaari nia jiyatenutaniya seetanujuanaa nioojia niqijioteyashijiaci nia quiniuria, socua jiyanojua na cumaaca jiitijiaci nia quiniuria, maja quenaaja Sesaaca pootionura nijaniya.

<sup>11</sup> ¡Jiyanojua maniniaari pa Que Pueyaso! Nojuacuajaari puetunu cumaacaracajanaa pueyaracaanura. ¡Cuaara naa quiiriatej!

*Pedro sequesano quera na naajio na tucuatascari*

<sup>12</sup> Cuarta Pueyaso pueyanaa, janiyari parta Pueyaso pueyano Silvano naajiotereeni nio posunee naajiotereeni. Nojuajaari shamaatia poonijiojua pa Jiyaniijia. Janiyari niaacuara naajiotereeni, cua nacasunura nijaniya, cua shiniujiuniuria nijaniyajuhuaaj maja nia pishiniuria Pueyasoojia. Seetanujuanaa jiyanoojia na quiniuucua, naarate nojuajaari nia jiitiaa maninia, naquiya na miitishacari nijaniyajuhuaaj. Cunora, nocua nia tiuuriquia, pueyaracaanu na cumaquiniuria nijaniya.



<sup>13</sup> Babilonia tiacajinia quiniaa parta Pueyaso pueyari nia saruhuataa. Nojoriiri Pueyaso saquiriojosano na pueyaranojuhuaj, taa na saquiriojosanotucuaa nijaniyani. Marcoori nia saruhuataajuahuaj. Nojuajaari juhua quiyanu. <sup>14</sup> Nia sarhuatasacari niarta Pueyaso pueya, seetanujuanaa nia paniniutia nia nujuutoore.

Pueyaso cuara nioojia cajitiiria, canapüete Jesucristoocua tiuujiacacuajani.

## TANEE PEDRO NAAJIONEE

### *Pedro saruhuatasacari narta Pueyaso pueya*

<sup>1</sup> Janiyari Simón Pedroni, Jesucristo seru, na jiyaramiquishanojuhuaj. Janiyari cunora niaacuara naajiyani. Pa Que Pueyasoori nia tiuutiquiaari pocuaji Tacuna Jesucristoocua, taa nocua canaa tiuuquiaaricuaani. Nocua nia tiuuniuni, cunoori jiyanojua panishano. Naacuajitij, Pueyasoori nia jiyanojuaa juhua sesa miyashijiaca nia quiniuria na niquiara, taa canaa quiyacuaani. <sup>2</sup> Seetanujuanaa maatia nia niishitiriquia Pueyasoni, pa Jiyaniijia Jesunio. Naacuajitij, niaari socua jiyanojua cumaquishaanutaniya. Nioojiaari cajitishaanutaniyajujuaj, juhuajaniya quijiaca nia quiniuria.

### *Pueyaso pueya cuaara nio niishitiojosano miijiaca quiiria*

<sup>3</sup> Jesucristojuanaacuajaari pa sequequiaari na pueya pa quiniuria. Paari na ma-suunu tojiquiaarini, pa niishishacari nojuajaari seetanujuanaa Pueyaso Niyanu, tojetaarucujanaa maninia miijia. Seetanujuanaa maatia pa niishiniuucua nojuaja, paari Pueyaso cumaacaraca sesa miyashijiaca pa quiniuriani, seetanujuanaa na tojijiaca pa quiniurijahuaj. <sup>4</sup> Naa jiyanojua maninia miijia Jesucristo quiniuucuatej, nojuajaari pa niishitiquiaari casaa na miiniu paniya pajaniyarani. Pajaniyarano na sequesanoori seetanujuanaa maninia, tojishocoriquiano. Paa jaara na sequesano tojitijaca quiri seetanujuanaani, paari jatanishaanutaniyani juhua nojuaja pa quiniurijahuaj. Naacuajitij, paari quiariniora jatanishaaquiaari na cumaacatani maja pa sesenura. Paa jaara Pueyaso tojiyashijiaca quiriqiani, paa maara tojetaarucujanaa seseriquiani, taa mijiria quiniaa pueya sesequiaacuaani tama nojori panishano miijiacajaaja nojori quiniuucua. <sup>5</sup> Cunora, tamajaaja nia saniniujiuriquia tojetaarucujanaa maninia quijiaca nia quiniuria, juhua Pueyaso. Niaacuajaari tari nocua tiuujiaca. Naa nocua tiuujiaca nia quiniuucuatej, jiyanojua nia saniniujiuri maninia miijia nia quiniuria pueyaracaanu. Naa maninia miijia nia quishacaritij, jiyanojua nia saniniujiuri socua niishijiaca nia quiniuria, sesa miiniu nia ruuretatura. <sup>6</sup> Naa niishijiaca nia quishacaritij, jiyanojua nia saniniujiuriquia tama nia cuaqueya miiniu panishanojuaaja rejetejaca nia quiniuria, maja nia miiniuria sacuraatia casaa nia panishano. Naa tama nia cuaqueyajaaja rejetejaca nia quishacaritij, jiyanojua nia saniniujiuriquia juhuajaniya sashijiaca nia quiniurijahuaj. Naa juhuajaniya sashijiaca nia quishacaritij, jiyanojua nia saniniujiuriquia seetanujuanaa Pueyaso panijiaca nia quiniuria. <sup>7</sup> Naa Pueyaso panijiaca nia quishacaritij, jiyanojua nia saniniujiuriquia niarta Pueyaso pueya panijiaca nia quiniuria socua. Naa niarta Pueyaso pueya panijiaca nia quishacaritij, jiyanojua nia saniniujiuriquia tojetaarucujanaa panijiaca nia quiniuria.

<sup>8</sup> Naa jaara puetunu nio niishitiojosanojuanaa tojijiaca quiriqia seetanujuanaa, maajaari najuhuaana pa Jiyaniijia Jesucristo niishijiaca nia quiniu quiniutianiya. Naajuhuaaj, majaari najuhuaana quijiaca nia quiniu quiniutianiya. <sup>9</sup> Nio rootasano tojiyashijiaca saniniujia, nojoriiri juhua cariyajuaru, niishiyashijiaca. Naa nojori quiniuucuatej, nojoriiri niyajetaquiaa nojoricuajaari juhua jeequejosaaquiaari sesa nojori miishanojiniji. <sup>10</sup> Cuarta Pueyaso pueyanaa, Pueyasocuajaari nia sequequiaari na pueya nia quiniuria. Nojuajaari nia saquiriojoquiaari. Cunora, puetunu nio cua rootasanojuanaa tojijiaca nia quiriqia seetanujuanaa. Naacuajitij, niocua niishiri niaari seetanujuanaa Pueyaso pueya. Majaari quenaaja nocuaji nia rupertenu quiniutianiya. <sup>11</sup> Naa maninia quijiaca nia quiniuucuatej, niaari shuquiriaatia tiuquinitiasaanutaniya jiyocuaaanu pocuaji Tacuna Jesucristoocua, pueyaracaanu nata nia quiniuria, pueyaracaanu Jiyaniijiajanaa na quiniuucua.

<sup>12</sup> Niaacuajaari maatia niishitiojosaaquiaari Pueyaso rupaa Jesucristojiniji. Naaari cuno seetanujuanaa rupaacua tiuujiaca. Naajaa, janiyari pueyaracaanu nia niishitiniutianiyan, maninia nia racatanura nia numaama. <sup>13</sup> Mijiria cua rishishacarijia,

Jesucristo jiyaramiquishano cua quiniuucua, maniniacuajaari pueyaracaanu cua shiniujiuniuria niajaniya, maja tariucua nia niishishano Jesucristo rupaajiniji nia niyajetanura.

<sup>14</sup> Pa Jiyaniijia Jesucristoori tari cua niishitiriucuaa janiyari quera mosaanutaniyani.

<sup>15</sup> Cunora, janiyari nio naajiya niaarani. Naacujitij, janiya jaara mosaareni, niaari nio cua naajionee jiiitanutaniya cua nuhuaji nia serojosocoriquiano. Maniniacuajaari nia jiiitanura cua naajionee maja nia niyajetanura puetunujuanaa cua niishitiojosano niajaniya.

#### *Shacantuuca Jesucristo cumaaca niquniaajiniji pohuatasano*

<sup>16</sup> Canaa niishitiojosano niajaniya pa Jiyaniijiajinijini, cunoori maja canaa tojishano tamonujiniji. Naajuhuj, cunoori maja tama niishijiacajaaja pohuatasano na sapojonura pueya. Jesucristo cumaacajiniji canaa pohuatasani, naajuhuj, taa na tiuquiniutianihuani, puetunu cunajuanaari maja tama canaa niishishanojuaaja. Canaajanaacuajaari canaa namijiatajanaa na niqiquiaarini nojuaja jaara shacantuucara jataquiaari canaa niqiuara. <sup>17</sup> Jiyacaritij, na Que Pueyasoori jiyanojuaa na timitiariquiaa canaa niqiuara. Canaari na tojiquiaarini naa na sequesacari Neyanujinijitij: “Nojuajaari Quiyanuniyojua. Jiyanojuaa cua timitiasano”. <sup>18</sup> Canaa quishacari pa Jiyaniijiaata shacantuucara na jatasqui tuhuananuucua, canaajanaari naa Pueyaso tojiquiaari jiyocuacaanuji pocuaanoni.

<sup>19</sup> Canaa tojiniuucua Pueyaso sequesanojuanaa Neyanujiniji, canaari cunora seetanujuanaa niishiyani, tariucuacaanu nojuajiniji pueyara Pueyaso sequesano caminiujiuniaa sequesanoori seetanujuanaajuhuj. Naaratej, maniniacuajaari nia tojiniuria nojori naajiotasano Pueyaso Jiyarosocoriquiano Pueyanojiniji. Nojori naajiotasanoni, cunoori poojiajinia cuhuataquiaa, naatej, taa samaritiu cuhuataa ninishiquicuaani, cuaara juhuaquemajaatijia. Pananuuri saniniuujia muetanutaniyacujua, seetanujuanaa na cuhuatanura pajaniya. Naa quiniutianiyajaariuhua pa Jiyaniijia muetasacariuhua pocua. <sup>20</sup> Maninia nia niishiri nio, pueyanaa. Puetunu tariucuacaanu Pueyaso sequesano caminiujiuniaa naajiotasanojuanaari maja na naata niishishaanu maatia tama pa niishitiajataaja. <sup>21</sup> Tariucuacaanu Pueyaso sequesano caminiujiuniaa naajionuutasani, cunoori maja tama nojori niishishanojuaaja. Pueyaso Sohuanujuanaacuajaari nojori niishitiquiaari nojori pohuatanura Pueyaso sequenu panishano pueyara.

## 2

#### *Sacuaraatia miijiaca niishitiojonaajiniji pohuatasano*

<sup>1</sup> Tariucuacaanu, noojiaqueya Israel pueyajinijinioori tama na cuaqueyajaaja jiyatequiaari juhua Pueyaso sequenu panishano caminiujiuniaa nojori quiniuria. Naacujitij, nojoriiri narta Israel pueya sapojonuuquiaari. Naajuhua cua panishano pueyanaa, sapojonuujuacaari nia tajinia supenuutaniyajuhuj. Nojori niishitiojosacari sacuaraatia tama nojori niishishanojuaaja, nojoriiri nia sapojonutaniya. Nojori niishitiojosanoori Pueyaso pueya sesojua cutara. Naacujitij, nojoriiri tama nojori Camarnujuaaja tamacanutaniya, cante nojoriicuaa mosaaquiaaricujani, na pueya nojori quiniuria juucua. Cunora, nojoriiri canashiyajiqi niqijij puetunu shaajasaanutaniyajanaa saniitiosocoriquiano.

<sup>2</sup> Queraatia pueyari sacuaraatia miijiaca quiniutianiyajuhuj, sacuaraatia cuno nojori niishitiojosano tojijia nojori quiniuucua. Naa nojori miiniuucuatej, Pueyaso niishiyashijiaaari seetanu rupaajanaa sesacanutaniya. <sup>3</sup> Cuno sacuaraatia niishitiojonuujuacaari jiyanojuaa casamiriaca quiniuucua jiaatijaca quiniutianiya. Naaratej, nojoriiri najuhua shanohua nojori niishitiojosanota nia sapojonutaniya, nareja nia niqitiojonura nojori nia cumaneeca, nia casaminio. Naajaa, naa sacuaraatia miijiaca nojori quiniuucuatej, nojoriiri tariucuacaanujiniji Pueyaso riuriosanocujua na saniitiosocoriquiano. Majaari Pueyaso jiyanooniu quiniutianiya nojori.

<sup>4</sup> Naajuhuj, Pueyaso seya jaara sesa miiquiaari, majaari Pueyaso jiyanooniu quiquiaari nojori. Pueyasoori puereeta nojori quejooquiaari ninishiqui. Tii nujuatejosano quiyari, nojori saniitiosaanu juuca cuaara quirijiaatijia. <sup>5</sup> Naajuhuj, Pueyasoori Noé quishacari

sesa miijiaca pueya jiyano ya quiquiaarijuhuaj. Cuno sesa miijiaca pajaashitiani quiaari-iri nojori cusonuunura puetunujuanaa. Saaja Noé curoquiaariiri Pueyaso tojjia na quiniuucua, socua siete pueyano. Noeri pueyaracaanu cuno sesa miijiaca pueya numootequiaari juucua, nojori tacatonura noojia Pueyasoocua, sesa nojori miiniujiniji. <sup>6</sup> Naajuhuj, Sodoma tiacajinia quinia pueya quiniuucua jiyano hua sesa miijiaca, Pueyasoori cuno tiaca catijiatquiaari tojetaarucujanaa juacara. Naa catijiatquiaari Gomorra tiacajaariuhuj. Cuno caapiqui tiaca naa catijiatasaaquiaarini, cunoori quiquiaari cuno nuhuaji quiriquiano pueya na numootenura maja naa sesa miijiaca nojori quiniurijuhuj, nojori mariqui saniitiosaarejaariuhuj. <sup>7</sup> Sodoma tiaca Pueyaso catijiatasacari, saaja Lot curoquiaariiri maninia pueyano na quiniuucua. Sodoma tiacajinia quijia Lot quiniuucua, nojuajaari jiyano hua taajequiaari tari, cuno pueya miijionuucua sacuaratia casaa, tariucua nojori jiidishano casaacua.

<sup>8</sup> Puetunu juucujanaa, Lotri narta Sodoma tiacajinia quinia niquiquiaari cararaatia miitioojiano. Sacuaratia nojori pocoojonu tojiquiaarijaariuhuj. Maninia pueyano Lot quiniuucua, nojuajaari jiyano hua naquiya miiquiaari noojiajinia. Cunora, quera Pueyaso saniitiosacari cuno pojori, Pueyasoori Lot mashiquiquiaari cuno pueya tajiniji. <sup>9</sup> Naacuajiti pueyanaa, paari niishiyani, Pueyasoori na tojitiajaca pueya cojuaja, maja nojori miitishaanura sesa. Saniniuujia, Pueyasoori sesa miijiaca racatajajaara nujuatejosano, nojori saniitiojosaanu juucara. <sup>10</sup> Pueyasoori socua jiyano hua nio pojori saniitioriquiano: na camishoo maajipohua numuetucunuucua jiaatiajacani, maajishuriu numuetucunuujucajuhuj, noo pojori juhuaj, pa Jiyaniijia rootasano ruuretajaca saajatej. Naa sacuaratia miijiacani, nojoriiri tojetaarucujanaa tojiyashijiaca. Majaari na pueretunu quiquiaa sacuaratia tama nojori panishanojuaja nojori miiniuria. Naajuhuj, nojoriiri maja na pueretunu quiquiaa jiyocuaaanu cumaacaraca quijia na sesacanura. <sup>11</sup> Saniniuujia, Pueyaso seya cutaraari jiyano hua socua cumaacaraca cuno sesa miijiaca pueyajiniji. Naajaa, majaari nojori riutioconu quiquiaa Pueyaso, cuno jiyocuaaanu cumaacaraca quijia nojori sesacanura.

<sup>12</sup> Cuno pojori, saaja sacuaratia miiniuria niishitiojonaani, nojoriiri niishiyashijiaca. Nojoriiri juhua nacujiniaaco quijia casami, teyanote saaja puecoosocoriquiano roosaaquiaacuajani. Tojetaarucujanaa niishiyashijiaca nojori quiniuucua, nojoriiri maninia quijia pa quiniuria pa Jiyaniijia rootasano sesacaquiaa. Cunora, nojoriiri juhua puecoosocoriquiano nacujiniaacoji casaa. <sup>13</sup> Naacuajitij, nojoriiri naquiya miishocoriquianojuhuaj, naquiya nojori miitiano ucua narta pueya. Nojoriiri jiyano hua timiquiaa nojori jaara naata quiriquia sesa miiniu juucajuhuj taa nojori miiquiaa niucuaacuaani. Cuno pojoriiri sacuaratia miijiaca. Majaari na niishiniu caririquiniu. Nojori sapojonuucua niajaniya, nojoriiri jaarajaaja nia cojiquiaa nia queranacunuusaqui. Naa nojori quishacari nia tajinatej, nojoriiri jiyano hua timiquiaa tariucua nojori jiidishano sesa casaacua nojori niishiriojosacari. <sup>14</sup> Naacuajitij, nojoriiri maja nareja na niqiniu quiquiaa maajipohua. Puetunu maajipohujanaa niqitiquiaa nocua na jiaatianutaari. Nojoriiri maja na taajenu sesa na miiniuria pueyaracaanu. Canapuet jatarinitiaja pa Jiyaniijia tojjiani, cuno pojoriiri nojori shiniujuquiaa na sapojonuta, sesa nojori miiniurijuhuj. Naajuhuj, cuno pojoriiri tariucua jiidinio puetunu nojori panishanojuanaa nojori jiidianura, jaara na naata quiriquia. Nojoriiri tariucua Pueyaso jiyatesano na saniitiosocoriquiano. <sup>15</sup> Pueyaso rootasano tojiyashijiaca nojori quiniuucua, nojoriiri juhua tashuquiono Pueyasoocua neteja nuujiniji. Nojoriiri casamiriaca quiniuucua jiaatiajaca juhua supuetana Beor niyanu Balaam. Jiyacaritij, Moab jiya jiyaniijaari Israel pueya paraca quiquiaari. Naaratej, nojuajaari Balaam sequequiaari, nojuajaari jiyano hua queraatia casami na niqitionutaniya, nojuaja jaara nocua quiaare, Israel pueya na shimiojonura nera. <sup>16</sup> Casamiicua jiaatiaja na quiniuucua, Balaamri na seru nijinia cajiquiaari. Quiaareeri. Nucuaco na quiasacari, Pueyasoori Balaam seru pocuatequiaari pueyano rupaa, Balaam na nacasunura. Naacuajitij, pocuaashijia seruuri Balaam tarinitiquiaariuhua, juhua moseeca sesa na miiniu panishacari juucua.

<sup>17</sup> Cuno pojori, pueya sapojoua na niishitiojosanotani, nojoriiri juhua cuari joojeque-

tano. Naajuhuj, nojoriiri juhua niqutioocua paratu piyarojosano, tamoco quiamaa saajaari. Nojori niishitiojosanoori naajuhuj. Majaari na tojitiajaca na naacunu. Pueyasoori jiyanoehua ninishiqui quiquio tari jitiaa nojoriicujaji, pueyaracaanu nojori quiquiorano. <sup>18</sup> Nojori pohuatasanoori najuhua shanohua tojishano. Saaja sapojonuuri. Naacuajitij, nojoriiri shusha Jesuucua tiuujiaca shiniujuquiaa nojori miiniuhuara tama nojori cuaqueya panishanojuaaja. Cuno Jesuucua tiuujiacacuaajaari shusha naataja sesa miijiaca pueyajinijinio jatanishaariquiaa juucua, Pueyaso tojjiaca nojori quiniuria juucua. <sup>19</sup> Sapojonuujuaa cuno niishitiojonuujuaa quiniucua, nojoriiri pueya niishitiojoquiaa sacuaraatia. Pueya niishitiojoquiaari, nojoriniaari seetanujuanaa juhuajaniya quijiaca quiniutianiya shuquiriaatia, nojori jaara nojori niishitiojosano tojjiaca quiriquia. ¿Nojori niishitiojosano pueyatucua taa juhuajaniya quijiaca quiriqiani, tama nojorijiaaja jaara sesa miiniucua jitinio quiyajaa? Seetanujuanaari, pueyano jaara maja na naata quiriquia sesa casaa na miijionu tarinitianu, cuno pueyanoori seetanujuanaa juhua tama sesa na miijosano serujuaaja. Majaari na naata na tarinitianu. <sup>20</sup> Pueyanaa, niaacuajaari niishiya, pueyano jaara pocuaji Tacunaacua tiuujiara quiri, pa Jiyaniijia Jesucristoori na cumaquijia na tarinitianura sesa miiniuria na jiidishano. Saniniuuja, cuno pueyano jaara sesa miijia quiriouhua, nojuaja jaara sesa miijionura jiidiriohua socua, neraari socua puereeta quiniutianiya Pueyaso niishiyashijia pueyajiniji. <sup>21</sup> Naacuajiti pueyanaa, pueyano jaara seetanu rupaajanaa niishijia quiriquia, nojuajaari cocuaatia miya jaara na samiritiarohua sesa miijia na quiniuhua. Cuno pueyanora maara socua maninia quiquiaari maja na niishiniuria Jesucristo rupaa, teyanote na niqiuara pohuatasaaquiaricujani, jatanishano pueyano na quiniuria. <sup>22</sup> Naa pa Jiyaniijia samiritiajaca pueya quiniucuatej, sesa miijiaca nojori quiniuhua, nojoriiri nio tariucuaaanu Pueyaso Rupaajinia naajiotasano tohuateequiaa. Naa miriqui sequeyari: “Sareeri coteenu macayoree. Na miaquerohuari”. Naajuhuj: “Cushiiri nanatosaaree juucua. Saaja na cooquojinia neeneecuasuhuariuhuj”.

### 3

#### *Pa Jiyaniijia tiuquiniuhua cuaracashitishacari*

<sup>1</sup> Cua panishano cuarta Pueyaso pueyanaa, nioori tanee cua naajionea niaacuara. Coteenu cua naajiojina, janiyari nia nacasuquiaarini socua cua shiniujiuniuria niajaniya maja nioojia niqijiotejaca nia quiniuria Pueyaso rootasanojiniji. Janiyari naa miya quiarijia nio cua naajiojiniajuhuaj. <sup>2</sup> Maninia nia numaama nia racatariquia tariucuaaanu pueyara Pueyaso sequesano caminiujunaa pohuatasano, pa Jiyaniijia jiyaramiquishano pueya pohuatasanonio. Cunocuaajaari pocuaji Tacuna rootasano pajaniyara.

<sup>3</sup> Nio nia niishiriquia cutara pueyanaa. Quera nio jiya puequesacari, pa Jiyaniijia soojeacaari supuenutaniya. Nojoriiri tama na cuaqueya miiniu panishano miijiacajaaja. Na macaatinuria niajaniya, nojoriiri nia nequesotanutaniya: <sup>4</sup> “¿Taa nia Jiyaniijia miiquiaarini? Nojuacuajaari nia sequequiaari: ‘Tacatenutaniuhanijia’. Majaari na tiuquiniu. Tariucuaaanu na niquiniaa pa supuetanaacuajaari tari puequecanu. Nio jiyajinia, puetunu casaajanaari quiyajaa, juhua shusha na shipinishaanujiniji. Majaari quenaaja tamonu casaa jatanu quiquiaa tamaatiara”. <sup>5</sup> Majaari naate pueyanaa. Cuno pojoriiri tariucuaaanu Pueyaso miishanojiniji niishiniu paniyashijia. Jiyanoehua tariucuaaanu, Pueyasoori jiya cajiniocua shipiniquiaari saaja na pocuanuta. Na sequesacarijuhuaj, jiyari mohuacajiniji muetaquiaari, mohuaca jiuujiajina na quiniuria. <sup>6</sup> Na nuhuaji, Pueyasoori cuno mohuacaja pajaashitiquiaari puetunu mijiria quijiaca-janaa na cusojuanura. <sup>7</sup> Quiarijia saniniuuja, jiya cajiniocua, nio jiyanio, Pueyasoori na cumaacata nojori jitiaajaara. Na nuhuaji cutara, puetunujuanaari catenutaniya, Pueyaso saniitiosacari puetunu na ruuretajaca pueyajanaa.

<sup>8</sup> Naajuhuj cua panishano cuarta Pueyaso pueyanaa, pueyaracaanu nio nia niishiriquia. Pa Jiyaniijia, niqiriyatu juucaari juhua mil marijia. Naajuhuj, mil marijiaari juhua niqiriyatu juuca nera. <sup>9</sup> Majaari nia jyaniniu maja pa Jiyaniijia

tacatenu quiniutianiuhua. Majaari na tarishiniu najuhuanaj, taa tamasaca jiyaniyacuaajani. Maja. Maja cutaraari na paniniu pueya quejoosaanura mani quiquiojinia. Naacuajitij, nojuacuajaari pueya sashiyajaara nojori tacatonura nojori jiuujia sesa nojori miiniujiniji, Pueyaso pueya nojori quiniuria.

<sup>10</sup> Naajaa, nojuacuajaari tiuquiniutianiuhua. Pueya jiyaniyacari Jesucristo maja na tiuquiniu quiniutianiuhua, jiyacaritij, canashiyaquiji tiuquiniutianiuhuari. Juhua nohuasejojua tiuquiniutianiuhuari, sesa miijiaca na saniitionura. Na nuhuaji, jiya cajiniocuaari shaajenutaniya. Jiyanohua cojuatunenutaniyari na shaajesacari. Casaajiniji jiya shipinishaaquiaarini, cunoori puetunu catenutaniyajanaa. Naacuajitij, jiyari puetunu mijiria na jiiitasano casaatajanaa shaajasaanutaniya jiyanohua naseeca manijinia.

<sup>11</sup> Quiarjia pa niishishacari taa pa jiya shaajasaanutaniyani, cunora, seetanujuanaa Pueyaso panijia nia quiriquia saa maninia miijiaca nia quiniuria. <sup>12</sup> Naa maninia miijiaca nia quiriquia, Pueyaso cuara pa Jiyaniijia mueraterohua pocuajaatijia. Pa Jiyaniijia sequesano tojjia nia quiriquia, na tiuquiniu juuca nia secootenura. Jiyacaritij, Pueyasoori jiya cajiniocua setanutaniya. Naacuajitij, casaata na shipiniquiaari puetunu casaajanaani, cunoori manijinia mohuaquenutaniya. <sup>13</sup> Naajaa, Pueyaso cutaraari seetanujuanaa sequequiaari pajaniya, nojuajaari quiarinio jiya cajiniocua shipininiutaniya pajaniyara, quiarinio jiyanio. Cunora, paari shuquiriaatia na sashiyani. Jiyacaritij, majaari quenaaja sesa miiniu niishishaanu quiniutianiya socua. Puetunu casaajanaari tojetaarucuajanaa maninia quiniutianiya.

<sup>14</sup> Naa nia niishishacari casaa pa sashiya nio pa quishacarini, cunora, jiyanohua nia saniniujiuriquia saaja maninia miijiaca nia quiniuria. Tojetaarucuajanaa jiyanooshano nia quiriquiajuhuaj, juhuajaniya nia quiniuria pa Jiyaniijia tacoji, na nequesoreesacari pajaniya. <sup>15</sup> Naacuajiti pueyanaa, nio nia niishiriquia: pa Jiyaniijiaari tarishiyajaara pueyacu na taraajenuucua, nocua nojori tiuuniuria, Pueyaso jiyanooniuria nojori. Tarishiyajaarihuaj tojetaarucuajanaa jeenucuasano pa quiniuria nera. Pa panishano parta Pueyaso pueyano Pabloori naa naajioquiaari niaacuarajuhua, Pueyaso niishitiaja na jiiitanuucua. <sup>16</sup> Nojuacuajaari puetunu na naajioneecajiniajanaa mariyata nio cua pohuatasano pohuataa. Noojiaqueya na pohuatasanoori seetanujuanaa jiyajeneta pueyara. Naacuajitij, mosanucua, noojia niquijiotecacanio, nojoriiri Pablo niishitiosano jataniquiaa tamaatiara, nojori niishiyaquishacari cuno rootasano. Nojoriiri naa jataniquiaa puetunu Pueyaso Rupaajanaa. Naacuajitij, nojoriiri tama na cuaqueyajaaja jiyatequiaa Pueyaso saniitiosocoriquiano nojori quiniuria.

<sup>17</sup> Cunora cua panishano Pueyaso pueyanaa, niaacuajaari tari niishiya cuno Pueyaso rootasano tojiyashijiacajiniji. Nocuaji jiyanohua nia cojuariquia tama nia cuaqueyajaaja maja nia sajojosaanura sesa miijiaca nia quiniuhua. Saaja Pueyaso rupaacua tiuujia nia quiriquia cutara, taa nocua tiuujia nia quiyacuaajani, cuno nojori mariqui nioojia niquijiotereeri. <sup>18</sup> Naajuhua, socua pocuaji Tacuna niishiniuucua jiaatiajaca nia quiriquia. Naa maninia nia niishiri pa Jiyaniijia Jesucristo, socua na panijia nia quiniuria, socua na cumaaca nia jiiitanurajuhua. ¡Pa Jiyaniijiaari jiyanohua maninia! ¡Nojuaja cuara shuquiritiasaaria quiarjia, pueyaracaanujuhua! Cuaara na quiiriatej.

## COTEENUJUANAAN JUAN NAAJIONEE

### *Pueya samiitianijia rupaa*

<sup>1</sup> Jiya shipinishaacarijiyojua, Jesucristoori quijiajuhuanajaj. Canaari niaara naajiyani, canaa niishitiniuria nijaniya nojuajiniji canaa tojishano, canaa niquishanojuhuaj. Pueyanaa, canaari seetanujuanaa na niquiquiaari canaa namijiatani, pueyaracaanu nata canaa quishacari mijiria. Canaari na cooquiaarijuhuaj canaa rupuesacari nojuaja. Nojuajaari pueyaracaanu quijia cutara, pa Samiitianijiaarijuhuaj, pueyaracaanu quijia pa quiniurijahuaj, na sequesanoocua pa tiuushacari. <sup>2</sup> Cuno pueyaracaanu Quijiani, nojuajaari pueyanora jataquiaari. Canaari na niquiquiaarini. Naaratej, canaari pueya pohuataquiaarini, nojuajaari seetanujuanaa pa Samiitianijia. Canaari quiarjia cuno pueyaracaanu Rishijajiniji nia pohuataaaniuhuj. Coteenu na Queta quijia jiyocua-caanuuri. Na nuhuaji, canacua muetaquiaariiri. <sup>3</sup> Canaari seetanujuanaa nia pohuataa canaa niquishanoni, canaa tojishanojuhuaj. Canaa pohuatasanoocua nia tiuushacari, pocua rupuetooteni, taa canaa quiya pa Que Pueyaso rupuesanocuaani, Neyanu Jesucristo rupuesanonio. <sup>4</sup> Niaa jaara nio naajiojinia canaa sequesano tojiri, niaari seetanujuanaa shuquiriaatia quijiaca quiniutianiya. Canaa jaara niaacuaji tojiriquiani, canaari shuquiriniutianiyaacuahuaj.

### *Pueyaso pa cuhuatana*

<sup>5</sup> Jesucristocuaajaari nio rupaa canaa niishitioquiaari, canaa nia pohuataani. Nojuajaari naa canaa sequequiaari: “Pueyasoori Cuhuatana cutara. Nojuajaari maja ninishiqui quijia quenaaja”. <sup>6</sup> Naacuajitij, paa jaara sequereni: “Pueyaso rupueja cutaranijia”, na rupaa pa tojiyaquishacari, paari saaja najuhuaana sapojiyani. Paari juhua ninishiqui quijia quiyajaani. <sup>7</sup> Paa jaara seetanujuanaa cuhuashiqui quiyani, taa Pueyaso quiya cuhuashiquicuaani, paari juhua rupuetootesano quiya parta Pueyaso muerasuta cutarani. Naa juhua rupuetootesano pa quishacaritij, Neyanu Jesucristo nanacaari puetunu sesa pa miishanojuanaa tuujuquiaa poojajiniji.

<sup>8</sup> Paa jaara sequereni: “Janiya sesa miyashijiani”, paari tama pa cuaqueyajaaja sapojiyani naa pa sequesacaritij. Majaari Pueyaso rupaa tojjia pa quiniu. <sup>9</sup> Paa jaara sesa pa miishano pohuatare saniniunijia, Pueyasoori jiyanootio cutara, na jiyanoonuria pajaniya, taa na sequequiaaricuaajani. Poojajiniji jeequenutianiya puetunu sesa casaajanaari. <sup>10</sup> Paa jaara saniniuujia sequereni: “Maja sesa cua miiniu”, paari Pueyaso jiyateya juhua sapojuarani. Paa jaara naa quirini, majaari seetanujuanaa na rupaa quiniu poojajinia.

## 2

### *Jesucristo pocuaji tacuna*

<sup>1</sup> Quiquiohuaniyojuanaa cua tojitiare. Nio naajiya niaaranijia, maja juhujaniya nia miiniuria sesa. Paa jaara sesa miirini, paacuajaari pa Que Pueyaso shuriucua jitiiaa pocuaji Tacunani, na Que Pueyaso na jiyanootiniuria pajaniya. Nojuajaari Jesucristo, pueyaracaanu maninia mijia cutarani. <sup>2</sup> Sesa pa miishanoori jiyanooshaaquiaa Jesucristo cusonuucua pocuara. Majaari saaja jiyareta pa sesa miishano jiyanooshaanu quiquiaa, mariyata puetunu mijiria quiniaa sesa miishanojuanaari jiyanooshaaquiaajuhuj.

<sup>3</sup> Paa jaara pa Jiyaniijia rootasano tojirini, paari niishiyani paa tari Pueyaso niishirii cutarani. <sup>4</sup> Jesu rootasano tojiyashijia jaara sequeriquia: “Pueyaso niishiyaniijia”, jiyano pueyanoori sapojouja. Majaari na jitianu Pueyaso rupaa noojajinia. <sup>5</sup> Cante saniniuujia pa Jiyaniijia sequesano tojjia cutarani, nojuajaari seetanujuanaa pa Que Pueyaso panijia cutara. Naacuajitij, paari niishiyani paari jatiqiu quiya natani. <sup>6</sup> Cante sequejani: “Janiyari Pueyaso rupuejani”, nojuaja cuara quiiria juhua Jesucristo, taa na quiquiaari maniacuaani, mijiria na quishacari.

*Quiarinio Pueyaso rootasano pajaniyara*

<sup>7</sup> Cuarta Pueyaso muerasunaa, majaari quiarinio nio rootasano, janiya niaara naaajiyan. Niocuajaari tariucuacaanu nia tojishano, majaari quiarinio. Niaacuajaari tari na tojiquiaari, Pueyaso rupaa jaara shushajanaa nia niquiara pohuatasaaquiaari.

<sup>8</sup> Naajaa, nio rootasano quiarjia cua naajiosanoni, nioori seetanjuanaa juhua quiarinio niaara. Niaari tari na tojiquiaa, pueya panijia nia quishacari, taa Jesucristo quiquiaari pueya panijiacuaani mijiria na quishacari. Na rootasano nia tojishacari, niniquiaari tari quiamacuaa nioojiajiniji. Pueyasoori nioojiajinia cuhuataa nia panitioosacari quiarjia.

<sup>9</sup> Naa jaara sequeriquia: “Pueyasoori cojia cuhuatarucuaani na rupaa cua niishishacari”, na nuhuaji majaari nia niquiniu paniniu niarta Pueyaso pueyano, niaari ninishiqui quiyajaa. <sup>10</sup> Cante narta Pueyaso pueya panijia cutarani, nojuajaari cuhuashiqui quijia cutara. Tamasacaari maja na naata sesa na miitiniu, naajuhua, tama nojuajaari maja sesa na miiniu quiniutianiya, pueya panijia na quishacari. <sup>11</sup> Cante narta Pueyaso pueya niquiniu paniyashijiani, cuno pueyanoori ninishiqui quiyajaa, juhua ninishiqui canujuucuaajaariuhua. Majaari na niishiniu tee na quiaani. Naa na quiniuucua juhua ninishiquitij, nojuajaari juhua cariojuaru quiya. Majaari na niishiniu Pueyaso casaa.

<sup>12</sup> Quiquihuaniyojuanaa, niaara naajiya nionijia, Pueyaso jiyanooshano muerasu nia quiniuucua, Neyanu Jesucristo mosaanuucua pocuara. <sup>13</sup> Queyanaa, niaara naajiyanijia nia niishiniuucua pueyaracaanu Quijia, cante tari pocuaji quiquiaari jiya coteyaquishacarijia. Mashiquiorinia, janiya niaara naajiyaaniuhua cua timishacari nia shocotanuucua Sesaaca.

Janiyari niaara naajiocanuni quiquihuanaa, nia niishiniuucua pa Que Pueyaso, Neyanu Jesucristoocua nia tiuushacari. <sup>14</sup> Janiyari niaara naajiocanujuhua queyanaa, nia tiuuniuucua tariucua pocuaji Quijiaacua, nio jiya coteyaquishacarijia. Janiyari niaara naajiocanujuhua mashiquiorinia, seetanjuanaa maninia nia tojiniuucua Pueyaso rupaa, nia jaara na masequiaari nioojiajinia, Sesaaca nia shocotanuucua juhua.

<sup>15</sup> Majaari mijiria sesa miiniuucua nia jiaatianu, mijiria casamiicuanio. Cante mijiria casaaca jiaatiajani, cunoori maja pa Que Pueyaso panijia. <sup>16</sup> Mijiria niishijia coretanijiosano tama nojori niishishanojinijiaajani, puetunu cunojuanaari maja pa Que Pueyaso niishitishano. Cunoori sacuaraatia tama mijiria pueya niishishanojuaaja. Naacuajitij, pueyano pa quishacari, paari sesa pa jiaatianuta pueyaracaanu casaa paniquiaani tama pa cuaqueya pa shuquiritiniurijaaja. Paari pa niquishano pa maniniucasano casaa paniquiaa pueyaracaanuni. Naajuhua, paari pueyaracaanu timiquiaani tamasaca timitiasacari pajaniya. Puetunu naa sacuaraatia pa niishishanojuanaani, cunoori mijiria niishishano. Majaari Pueyaso niishitiojonu naa pajaniyatej. <sup>17</sup> Nio jiyari tari tariucushiyaree. Socua shaajasaanutaniya puetunujuanaari. Puetunu sesa pa jiaatianujuanaari cojiritiasaanutaniya shaajanu puetunu nio jiyatajanaa. Cante Pueyaso panishano miiquiaa saniniunijia, nojuaja cutaraari pueyaracaanu rishiniutianiya Pueyasota.

*Jesucristo paraa*

<sup>18</sup> Quiquihuanaa, quiarjiaari quera jiya puequesacari tari. Niaacuajaari tari pohuatasaaquiaari Cristo Paracaari niniutianiya. Quiarjiani, queraatia na paraari tari supueree. Naacuajitij, paari niishiyani nio pa quishacariiri jiya puequesacari quera.

<sup>19</sup> Cuno Cristo paraani, nojoriiri pajaniyajinijinio pueya quiquianucuaaja. Pocuaji rupate-tucanuuri maja seetanjuanaa Pueyaso muerasu nojori quishacari. Jaara seetanjuanaa Pueyaso muerasu quiquianu, mariqui pata quiyacuaateni. Naa nojori miiniuucuatej, paari niishiyani majaari puetunu pata rerejonaajanaa seetanjuanaa parta Pueyaso muerasu.

<sup>20</sup> Saniniuuja niajaniya Pueyaso muerasunaa, Jesucristoori nia niquitioquiaari na So-huanu. Naaratej puetunu niajanijajanaari Pueyaso niishitijaraca. <sup>21</sup> Majaari niaacuara cua naajionuni nia niishiyaquishacari Pueyaso rupaa. Niaacuajaari na niishiya cutara. Niaari niishiyajuhua, sapojoua sequesanoori maja Pueyasojiniji.



<sup>22</sup> Pueyano jaara sequere: “Jesuuri maja Pueyaso Jiyarosano”, cunoori sapojoja. Cante sequejani: “Pueyasoori maja Jesu Que”, cunocujaari Cristo paraca. Jaara sequerejuhuaj: “Jesuuri maja Pueyaso Niyanu”, cunoori Cristo paracajuhuj. <sup>23</sup> Cante Pueyaso Niyanu Cristo tamacajani, majaari Pueyaso na jiitianu na Querajuhuj. Cante Pueyaso Niyanu Cristo jiitiaa cutarani, pa Que Pueyaso jiitiaa na Querajaariuhuj.

<sup>24</sup> Naaratej, Pueyaso rupaa nia racatare nia numaama taa nia tojiquiaari tariu-cuacaanucujani jaara shushajanaa pohuatasaaquiaari nia niquiara. Niaa jaara naa racatariquia na rupaa nioojiajiniate, seetanujuanaa nocua nia tiuushacari, niaari jatiqiquiya pa Que Pueyasota, Neyanu Jesucristotanio. <sup>25</sup> Jesucristocujaari na Sohuanu niq-uitioquiaari pajaniya, pueyaracaanu pa rishiniuria. Nojuajanaari naa pa sequequiaari.

<sup>26</sup> Nio naajioree niaaranijia cua niishitiniuria niajaniya, nia niishiniuria taa Jesu paraa niishitiojonuuquiaa sesa najuhuaana na cuaracashiniuniutiani. <sup>27</sup> ¿Casaara nojori nia tojiquiaani? Niaacuajaruhua tari Pueyaso Sohuanu jiitiaa, Jesucristo niquitiosano nia-janiyani. Naacuajitij, majaari tari panishaanu tamasaca niishitiojonura socua niajaniya. Pueyaso Sohuanucujaari nia niishitiojoquiaa puetunu casaajanaa. Puetunu na niishitiojosanojuanaari seetanujuanaa cutara, maja sapojonu. Naaratej, pueyaracaanu jatiqiquiya nia quiriqquia Jesucristota, taa Pueyaso Sohuanu niishitiojoquiaa nia quiniuriacuajani.

<sup>28</sup> Quiarrijani quiquiohuaniyojuanaa, jatiqiquiya nia quiri Cristota, seetanujuanaa juhujaniya nia quiniuria pa Jiyaniijia jaara tiuquiriohua pocua. Naa nia quiritij maja nia caririquiniuria nojuaja jaara pa jiitiasuhua. Na rupaa tojiyashijiacaari caririquiniutianiya cutara. <sup>29</sup> Niaacuajaari seetanujuanaa niishiya, Jesucristoori tojetaarucujanaa sesa miyashijia cutara. Niaa cumaati niishiyajuhuj, puetunu maninia miijiacajanaari Pueyaso muerasu.

### 3

#### *Pueyaso muerasu*

<sup>1</sup> Pueyanaa, pa Que Pueyasoori jiyanojua pa panijia. Pa sequeyari, “cua niquiohua”. Seetanujuanaa, paari necohuani. Naaratej, majaari mijiria quiniaa pueya niishiniu pajaniya. Pa niishitiuyaquiyari nojori niishiyaquiniuucua pa Que Pueyaso. <sup>2</sup> Cua panishano Pueyaso muerasunaa, paari tari Pueyaso muerasucujani. Maja cutaraari pa niishiniu taamuecaquitijia pa quiniutianiya na nuhuajitijiaj. Paari saaja niishiya cutarani, Jesucristo jaara nimiohua, paari juhua nojuaja quiniutianiyan. Na tiuquishacariuhua, paari na niquiniutianiyan taa na quiyacuajani. <sup>3</sup> Puetunu na sashijiacajanaari tama na cuaqueyajaaja jeequequiaa sesa nojori miishanojinijia saaja maninia nojori quiniuria, taa Jesucristocuaani sesa miyashijia tojetaarucujanaa.

<sup>4</sup> Cante sesa miijiani, cunoori Pueyaso rootasano na rupaajinia tojiyaquijia. Puetunu sesa miiniujianaari Pueyaso rootasano tojiyaquiniu. <sup>5</sup> Niaari niishiyajuhuj, Jesuuri mijiria pocua niquiaari poojia seque na jataniniuria. Nojuajaari tojetaarucujanaa sesa miyashijia cutara. <sup>6</sup> Naacuajitij, cante jatiqiquiya pa Jiyaniijiatani, nojuajaari maja sesa na miiniu quiquiaa cutara. Cante saniniuujia sesa miijiani, majaari na niishiniu Jesu. Majaari nojuaja na niquiniu quiquiaarijuhuaj. <sup>7</sup> Quiquiohuaniyojuanaa, tama nia cuaqueyajaaja nia cojuare niaa mariqui sapojosaareeri. Cante maninia miijiani, nojuajaari maninia pueyano cutara, taa pa Jiyaniijia Jesucuaani, pueyaracaanu maninia quijia cutara. <sup>8</sup> Saniniuujia, cante sesa miijiani, nojuajaari Sesaaca pueyano. Shusha jiya coteenujinijia, Sesaacacujaari tari sesa miijia quiquiaari. Pueyaso Niyanuuri cunora niquiaari puetunu sesa na miijosanojuanaa na shaajanura.

<sup>9</sup> Puetunu Pueyaso pueyajanaari maja sesa miiniuucua na shiiniuquiuniu, quiarinio pueyara Pueyaso rootasano nojori quiniuucua. Nojoriiri quiarinio pueyara jatanishano quiya Pueyaso Sohuanu nojori jiitiasacari. Naacuajitij, seetanujuanaa Pueyaso muerasu nojori quishacari, majaari na naata sesa miijia nojori quiniu pueyaracaanu. <sup>10</sup> Naacuajitij, maatia niishishanocujaari cante Pueyaso muerasuni. Saniniuujia, cante maninia miyashijiani, nojuajaari maja Pueyaso pueyano. Naajuhuj, cante narta pueya

paniyaquijiani, nojoriiri Sesaaca pueya. Naa niishishanoori cante Pueyaso muerasuni, cante Sesaaca muerasujaniuhuj.

*Panitioojuaca pa quirij*

<sup>11</sup> Pueyanaa, shushajanaa Pueyaso rupaa nia tojishacari, niaacuajaari naa niishitiojosaaquiaariti: “Panitioojuaca nia quiri”. <sup>12</sup> ¡Maja cutaraari pa quiniu juhua Caín! Nojuajaari tama tarajanujuaaja moquiaari, Sesaaca tojijia na quiniuucua. Nia niishiritio casaara Caín moquiaari tarajanuni. Nojuajaari tama tarajanujuaaja tacartaquiaari monu, tarajanu miishano quiniuucua maninia. Saniniuujia, tama na miishanojuaarjia sesa quiquiaari. Cunora tarajanu moquiaariiri.

<sup>13</sup> Cuarta Pueyaso muerasunaa, majaari nia jiyajenenu Pueyaso ruuretajaca jaara niquiniu paniyaquiriquia niajaniya. <sup>14</sup> Paacuajaari juhua macu samiitianijiosaaquiar-iuhuaani, seetanujuanaa saminiucua pa quiniuria. Paari seetanujuanaa na niishiyani panitioojuaca pa quishacari parta Pueyaso pueyata. Cante tapueyocuaca paniyaquijiani, nojuajaari juhua macu quiyajaa. <sup>15</sup> Naajuhuj, narta pueyano niquiniu paniyashijiacani, nojuajaari juhua pueya mojua Pueyasora. Niaacuajaari niishiya, pueyano mojuuari Pueyaso samiitianiyaquishoojua pueyaracaanu na rishiniuria. <sup>16</sup> Paacuajaari niishiyani, Cristoori jiyanojua pa panijia na cusonuucua pocuara. Naacujiti paari niishiyani taamuecate seetanujuanaa paniniuni. Paa cuaara naa panijia quiirijuhuj, tama pa cuaqueyajaaja pa tarinitianura parta Pueyaso pueyacuara, jiyanojua pa paniniutia nojori. <sup>17</sup> Naa jaara nareja niquiya niarta Pueyaso pueya casamijuniucua, puetunu nia panishanojuanaa nia jiiiasacaricuua, niaari najuhuana sequeya: “Pueyaso panijianijia”. ¿Pueyaso panijia pueyanoteeri jiyano pueyano, narta Pueyaso muerasu niquitioyaquijia na jiiiasanojiniji? ¡Maja! <sup>18</sup> Quiquiohuaniyojuanaa, majaari najuhuana pa sequenu: “Cuarta Pueyaso pueya panijianijia”. Paa jaara seetanujuanaa nojori panirini, nojoriicua pa taraajere, taraatia nojori miishacari. Pueyaracaanu maninia pa miiri, seetanujuanaa pa paniniutia pueya. Majaari najuhuana pa sequenu: “Nojori paniyanijia”.

*Pueyaso tojijiaari juhuajaniya quijia Pueyaso niquiara*

<sup>19</sup> Naacujitij, paa jaara pueya panijia quirini, paari niishiyani paa seetanujuanaa Pueyaso tojijiani. Paari niishiyani paa pueyaracaanu rishiriquiano Pueyasotani. Majaari pa shaajenu quiniutianiya. <sup>20</sup> Pueyaso muerasu pa quishacari, poojia jaara pa taacanu-utere saaja nocuaji, naajaa, Pueyaso cutaraari jiyanojua maninia niishijia socua poojia niishishanojiniji. Nojuacuajaari pa niishiya cutara. <sup>21</sup> Cua panishano Pueyaso muera-sunaa, poojia jaara pa macuhuaajaquiri, paari shuquiriaatia quiya Pueyaso niquiarani. <sup>22</sup> Nojuajaari puetunu pa masesano niquitionutianiya pajaniya, na rupaa pa tojishacari, puetunu na panishanojuanaa pa miishacarijuhuaj. <sup>23</sup> Pueyaso sequesano pueraari nio: Neyanu Jesucristoocua pa tiuuniuria, pa panitioonurajuhuj taa na sequequiaaricujani. <sup>24</sup> Canapuate Pueyaso rootasano tojijiacani, nojoriiri Pueyasota rupuetootesano quijiaa. Naajuhuj, Pueyasoori nojorijinia quiyacujua. Nojuacuajaari na Sohuanu niquitioquiaari pajaniya. Naa na Sohuanu pa jiiiasacaritij, paari maatia niishiyani Pueyasoori poojia-jinia quiya.

4

*Pueyaso Sohuanujiniji pohuatasano, Cristo Paraca sohuanujinjinio*

<sup>1</sup> Cuarta Pueyaso pueyanaa, quiarijiani, queraatia Pueyaso sequenu panishano camini-ujunaa pueyari supueya. Majaari ritia nia tiuuniu puetunu nojoriicujanaa. Coteenu nojori nia saniniujiuri, nia niishiniuria nojori caminiujiushanote seetanujuanaa Pueyaso Sohuanujiniji, tamonujiniji soj. Mijiria, queraatia sapojonuujuacaari caneya. Nojoriiri najuhuana cuaracashiniuya na sequesacari: “Janiyacujaari Pueyaso sequenu panishano caminiujuniani: Pueyaso Sohuanu niishitishano janiya”. <sup>2</sup> Naaari naa niishiniutianiya cante seetanujuanaa Pueyaso Sohuanu niishitishano caminiujuniani: Pueyaso Sohuanu jiiitajaari naa sequeja: “Pueyaso jiyarosano Jesucristoori pueyanora quiquiaari, mijiria pocuara cusoriquiano”. <sup>3</sup> Cante saniniuujia jiyaniyani Jesu maja pueyanora na quiniu

quiquiaari, cunoori maja Pueyaso Sohuanu na jiitianu. Saaja Sesaaca sohuanu jiitiaa noojiajinia cutaraari. Nojuacuajaari Jesucristo Paraca. Niaacuajaari tari pohuatasaaquiaari, Cristo Paraca sohuanuuri niniutianiya. Nojuacuajaari tari mijiria quiya.

<sup>4</sup> Quiquihuaniojuanaa, niaacuajaari Pueyaso muerasu. Naacuajitij, niaari cuno sapojonuujuaca shocotacanu Pueyaso cumaacata. Nioojiajinia Quijiaari socua cumaacaraca nojori jiitiasano Sesaaca cumaacajiniji. <sup>5</sup> Cuno sapojonuujuacaari saaja Pueyaso niishiyashijiaca, maja Pueyaso muerasu. Naacuajitij, nojoriiri saaja mijiria casaajiniji pohuatanuuquiaa. Naarate narta Pueyaso ruuretajacaari nojori tojitiaquiaa. <sup>6</sup> Paa cutaraari Pueyaso pueyani. Naacuajitij, cante Pueyaso tojitiajacani, nojoriiri pa tojitiaquiaa. Canapuate saniniuujia maja Pueyaso pueyani, nojoriiri maja na tojitianu quiquiaa pajaniya. Naacuajitij, pa naata niishiniu cante seetanujuanaa Pueyaso Sohuanu jiitiaa cutarani, cante saniniuujia sapojoua sohuanu jiitiaanijia.

### *Pueyaso pa panijia cutara*

<sup>7</sup> Cua panishano Pueyaso pueyanaa, jyanohua panitioojuaca pa quirij. Pueyasocuaajaari pa panijia. Nojuajaari pa panitijia na Sohuanuta, jyanohua panijia pa quiniurijuhuj. Canapuate puetunu pueya panijiacajanaani, nojoriiri Pueyaso muerasu cutara, seetanujuanaa Pueyaso niishijiacajaariuhuj. <sup>8</sup> Canapuate pueya paniyashijiacani, nojoriiri maja na niishiniu Pueyaso. Pueyasocuaajaari panijia cutara. <sup>9</sup> Nojuajaari pa niishitiquiaari taa na paniquiaa jyanohua pajaniyani, Neyanuniyosua na jiyarosacari mijiria pa samiitianijioriquiano, pocuara na cusosacari. <sup>10</sup> Naa cutarate seetanujuanaa paniniu sequesano: Pueyasoori pa panijia. Paari maja pa coteetanu quiquiaari Pueyaso paniniuni. Nojuajaari saniya coteetaquiaari na paniniuria pajaniya. Neyanu jiyaroquiaariiri pocuara mosocoriquiano, sesa pa miishano jiyanooshaanura. Naa cutarate seetanujuanaa paniniu.

<sup>11</sup> Cua panishano Pueyaso muerasunaa, Pueyaso jaara naa pa paniquiaaricuaa, ¿casaara pa panitioyaquiyarinijia? Naa panitioojuacara pa quirijuhuj. <sup>12</sup> Majaari quenaaja pa niqiniu quiquiaari Pueyaso, taamuecatejanojoni. Naajaa, paa jaara tamacata panitioojuaca quirini, Pueyasoori poojiajinia quiyacuaja. Naacuajitij, paari tojetaarucujanaa panijiacara quiniutianiyani, na paniniu quishacari poojiajinia. <sup>13</sup> Nojuajaari na Sohuanu pa niqitioquiaari poojiajinia na quiniuria. Naacuajitij, paari niishiyani paacuajaari nata rupuetoojuu quiyani. <sup>14</sup> Canaajanaari seetanujuanaa canaa niqishano pohuataani: Pueyasoori Neyanu jiyaroquiaari mijiria, mijiria quiniaa niti mosocoriquiano, nocua tiuujiaa jiyatesaanura Pueyaso pueyara. <sup>15</sup> Cante pueya niqiyara sequejani: “Jesuuri seetanujuanaa Pueyaso Niyanu”, Pueyasoori noojiajinia quiya. Nojuajaari Pueyasota rupuetoojuu quiyajuhuj.

<sup>16</sup> Naacuajitij, paari niishiyani Pueyasoori jyanohua pa panijia. Paari na niishiyajaniuhua na rupaacua pa tiuushacari. Pueyaso cutaraari panijia. Paa jaara pueyaracaanu panijia quirini, paari seetanujuanaa Pueyaso rupuejani. Naajuhuj, Pueyasoori poojiajinia quiya. <sup>17</sup> Naa Pueyaso quishacari poojiajinatej, paari pueya panijia jiyacatequiaa socuani. Naa seetanujuanaa panijia pa quishacariitij, paari juhujaniya quiniutianiya Pueyaso nequesoresacari puetunu pueyapuejajanaani. Majaari pa puerenu quiniutianiya panijia pa quishacari taa panijia nojuaja quiyacuani. <sup>18</sup> Cante seetanujuanaa Pueyaso panijiani, majaari na niishiniu puerenu. Naa pa paniniuuri puetunu pa puerenu jataajanaa. Cante puereja quiya saniniunijia, majaari juhujaniya na paniniu Pueyaso puetunu noojitajanaa. Puerejaari niishiriojia: “Saniitiosaanutaniyanijia”.

<sup>19</sup> Niaacuajaari niishiya, Pueyasoori coteenujuanaa pa paniquiaari, naarate paari saniniuujia na paniani. <sup>20</sup> Saniniuujia, cante sequejani: “Janiyari Pueyaso panijiani”, narta pueya niqiniu paniaquiya saajaraariuhuj, jiyano pueyanoori sapojoua. Naa na paniaquishacari tarajanu na niqishano na namijata cutaratej, ¿maatucua taa Pueyaso panirini, na niqishoo socuani? <sup>21</sup> Pueyasocuaajaari naa pa rootaquiaari: “Cante cua panijiani, cuara paniiria narta pueyajuhuj”.

## 5

*Taa pa shocotanutaniya mijiria niishishanoni*

<sup>1</sup> Niaa jaara Jesuucua tiuuri nojuaja seetanujuanaa Pueyaso Jiyarosano quiquiaari, niaari Pueyaso muerasu. Mijiria, cante muerasu que panijiani, necohua panijajaari- iuhuj. <sup>2</sup> Naacuajitij, pa panishacari Pueyaso, pa tojishacari na rootasanojuhuaj, jiyacariti paari niishiyani paari parta Pueyaso muerasu panijajaacuhuj. <sup>3</sup> Paa jaara Pueyaso panijia quiri seetanujuanaani, paari na sequesano tojijiaca quiyajaaniuhuj. Na rootasano pajaniyani, majaari jiyajeneta na quiniu pajaniyara. <sup>4</sup> Cante seetanujuanaa Pueyaso muerasuni, nojuajaari mijiria sesa niishishano shocotaa. Paari na shocotajani Pueyasooocua pa tiuushacari. <sup>5</sup> Cante Jesu jiyateya seetanujuanaa Pueyaso Niyanurani, saaja jiyano pueyano na naata mijiria niishishano shocotanu cutara.

*Pueyaso Niyanujiniji pohuatasano*

<sup>6</sup> Pueyasoori canaa niishitiquiaari Jesuuri seetanujuanaa Neyanujuhuanajaj, Jesu jaara moojinia tiuquinishaaquiaari. Canaa niishitiquiaarijiaariuhuj Neyanu jaara niyacutesanojinia naatequiaari. Jesuuri maja saaja moojinia na tiuquinishaanu quiquiaari canaa niishiniuria nojuaja. Maja. Naajuhuj, janiyajanaari na niqiquiaari na nanaca shooteyano na shuucujini. Naajuhuj, poojiajinia quijia Pueyaso Sohuanuuri pa niishitiquiaa cunoori seetanujuanaa Pueyaso Niyanu quijiajuhanajaj. Pueyaso Sohuanu cutaraari maja na niishiniu sapojonu. <sup>7</sup> Jiuujianaraca jiyocuacaanu quijiaacari pa niishitiya Jesucristoori mijiria niqiaari pueyano na quiniuria seetanujuanaa. Cuno pojoriiri nio: Pueyasojuaanaa, na Rupaa, na Sohuanunio. Nio jiuujianaraca quijiacani, nojoriiri Pueyasojuhuanajaj. <sup>8</sup> Paari mijiria jiiitaa Jesujiniji pa niishitijiacajuhuj. Cunoori jiuujianaraca quiyajuhuj. Cuno pojoriiri nio: poojiajinia quijia Pueyaso Sohuanu, jiyocuacaanuji tojishano rupaa Jesu tiuquinishacari moojinia, naajuhuj, na nanaca, pueya niqishano na shuucujaji shoyano. Puetunu cunोजनाari mariyata pa niishitiya Jesuuri seetanujuanaa Pueyaso Niyanu. <sup>9</sup> Paa jaara tojiriquia pueya pohuatanuusanoni, ¿casaara saniya Pueyaso sequesano pa tojiyaquiyarini? Pueyaso sequesano Neyanujinijiiri socua seetanu rupaajanaa cutara pueya pohuatanuusanonijini. <sup>10</sup> Cante Pueyaso Niyanuucua tiuujiani, Pueyaso Sohuanuuri noojiajinia na niishitiya Jesuuri seetanujuanaa Pueyaso Niyanu. Saniniuujia, cante Pueyaso sequesano Neyanujiniji ruuretaja saniniunijia, nojuajaari Pueyaso jiyateya sapojuara, na tiuyaquishacari tama Pueyaso sequesanoocuaaja Neyanujiniji. <sup>11</sup> Pueyasocuaajaari sequequiaari, Neyanuucua tiuujiaacari pueyaracaanu rishijiaa quiniutianiya. <sup>12</sup> Cante Pueyaso Niyanu jiiitaa noojiajiniani, nojuajaari tari samiitianishaarohua pueyaracaanu rishijia na quiniuria. Pueyaso Niyanu jiiitiaashijiaari saniniuujia maja na rishiniu quiniutianiya.

*Nio naajio puequenu panishacari rootasano*

<sup>13</sup> Nio naajiya niaaranijia nia niishiniuria, Pueyaso Niyanuucua nia tiuushacari niaari tari samiitianijiosaarohua pueyaracaanu nia rishiniuria.

<sup>14</sup> Paari Pueyasooocua tiuquiaani, pa niishishacari nojuajaari pa tojiquiaa pa secosacari nojuaja, pa masesano jaara quiri taa na panijacuajani. <sup>15</sup> Naatej, taa pa niishiyacuaani Pueyasoori pa secosano tojiquiaa, paari naa niishiyajuhuj paari nojuaja pa masesano maseree tarini.

<sup>16</sup> Cante narta Pueyaso pueyano niqiyia sesa miyanoni, cuara Pueyaso secojoora nocuara, sesa na miishano jaara na cusojuashijia quiri. Naacuajitij, Pueyasoori cuno sesa miijia naataniniutianihua, sesa na miishano jaara cusojuashijia quiri. Quiyajaariuhua tamonu sesa casaa miiniu. Paa jaara cuno sesa casaa miirini, paari cusoqueeni. Naa cua sequesacari niajanijatej, majaari cua sequenu niajanijia nia secojonura jiyano sesa miishanoocuaratej. <sup>17</sup> Seetanujuanaa, puetunu sesa miishanojuanaari sesa Pueyasora. Naajaa, majaari puetunu sesa miishanojuanaa cusojuanu quiniutianiya pajaniya.

<sup>18</sup> Paacuajaari niishiyani pueyanaa, cante Pueyaso jiiitaa juhua na Que cutarani, nojuajaari sesa miyaquiquiaa, Pueyaso Niyanu cojuasacari nojuaja. Naacuajitij, Sesaacari maja na naata sesa na miitiniu. Majaari na naata sesa na miiniuujuhuj.

<sup>19</sup> Paari niishiyani paa cutaraari Pueyaso muerasuni. Sesaacaari saniniuujia puetunu mijiria quiniaa Pueyaso niishiyashijiacajanaa jiitiaacujua. Nojuajaari nio jiya camarnu.

<sup>20</sup> Paari niishiyajuhuj Pueyaso Niyanuuri mijiria pocua niquiaari. Nojuajaari na niishitiaja niquitioquiaari pajaniya, maninia pa niishiniuria na Que, na Que quiniuria pa Quejhuaj. Nojuajaari Pueyasojuanaa cutara. Paari nata quiya jatiqini, Neyanu Jesucristota pa rupetoosacari. Nojuajaari Pueyasojuhuanajaj, pa Samiitianijiajaari-uhuj, pueyaracaanu rishijaca pa quiniuria. <sup>21</sup> Quiquihuaniyojuanaa, saaja Pueyaso pa paniri. Tama pa cuaqueyajaaja pa cojuare, maja tamonu casaacua pa jiaatianura socua Pueyasojiniji. Paa jaara tamonu casaacua jiaatiareni, paari Pueyaso shocoteya nocuarani. Niojuanaa pueyanaa. Tariucujaja.

## TANEE JUAN NAAJIONEE

### *Pueyaso Rupaa seetanujuanaa panijiara pa jiyateja*

<sup>1</sup> ¿Quiaate quiyajaa cua panishano cua rimiatucuaanaa? Quiaacuajaari Pueyaso saquiriojosano, neyatu quia quiniuria. Quiocuara naajiyaniija, quia panishano muerasucuaranio.

Janiyari saaquiano Juanni, Pueyaso muerasu jiitiana. Seetanujuanaa nia paniyanijia, taa puetunu Pueyaso rupaa tojiniaa pueya paniya niajanuyacuani. <sup>2</sup> Pueyasojiniji seetanu rupaajanaari poojiajinia quiya. Naaratej, canaari nia paniyani. Cuno rupaari poojiajinia quiniutianiya pueyaracaanu. <sup>3</sup> Nia tojishacari seetanu Pueyaso rupaa-janaa, nia panitioosacarijihuaj, naacuajitij, pa Que Pueyasoori Neyanu Jesucristota nia cumaquiniutianiya. Niaacua taraajenutaniyajaarihuaj. Nioojia jiyatenutaniya juhuajaniya quijacarajaarihuaj.

<sup>4</sup> Noojiaqueya quia niquiohuajinijinio niquiquianunijia. Nojori timitiacanunijia nojori tojitianuucua maninia seetanu rupaajanaa, taa pa rootasaaquiaari pa Que Pueyasojinijicuajani. <sup>5</sup> Quiocuara naajiya quiarjianijia cua panishano cua rimiatucuaanaa, cua sequenura quiajaniya: “Jianohua pa panitioore”. Majaari quiarinio rootasano nio, cua naajosano quiociarani. Nio rootasanocuajaari pa jiitiasano pueyaracaanu Jesucristojiniji. <sup>6</sup> ¿Taate pa naata paniniuni? Paari pueya panijiaa quiyani Pueyaso rootasano pa tojishacari. Niocuajaari na rootasano: puetunu pa miishanojuanaa cuara quiiria Pueyaso pa paniniutia poojiajinia.

### *Cristo paraari sapojonuujuaa*

<sup>7</sup> Quiarjiani, queraatia sapuenu juhua Pueyaso sequenu panishano caminiujiuniaari mijiria quiya. Nojoriiri pueya niishitiojoquiaa: “Majaari Jesucristo rosenu quiquiaari jiyocuacaanuji, cuaqueyaraca na quiniuria, seetanujuanaa pueyano na quiniuria”. Canapuate naa sequejacani, nojoriiri sapojonuujuaa. Nojoricuajaari Cristo paraa. <sup>8</sup> Tama nia cuaqueyajaaja nia cojuare cuno pueyacuaji, maja nia tojiniuria nojori, niaa mariqui Pueyaso niqutionu panishano pajaniya maseyaquiriiri, pa Jiyaniijia nia poonijionujiniji na niqutionu panishano. Suraatiaja nia tojiriohuarohua seetanu rupaajanaa, nia masenura puetunu Pueyaso jiitiasanojuanaa niaara. <sup>9</sup> Cante tama na cuaqueyajaaja jiyateja Pueyaso casaa niishijiara socua Jesucristo jiyaramiquishano pueya niishitiojosanojinijini, cuno shocotajaari Pueyasoojura quiqui, na shocotanuucua Cristo rupaa. Cante saniniujia seetanu rupaajanaa tojitiaquiaa maniniani, taa pa rootasaaquiaari Cristo rupaacuajani, Pueyasocuajaari na Que, Neyanuuri nocuaji Tacunajuhuj. <sup>10</sup> Seetanu rupaajanaa jiitiaashijia jaara niaacua tiuquiniu paniya tamaatia na niishitiojonura niajaniya, majaari niaacua na shanacununoj. Majaari quenaaja na saruhuatanujuhuj nia cumaquiniuria nojuaja. <sup>11</sup> Cante na sequeyani: “Pueyaso cuara cumaquiiria quiajaniya”, naa sequejaari cuno sapojoua cojiritiasaaree tari sesa na miishanotaja.

### *Juan puecasacari naajionu*

<sup>12</sup> Socua queraatia sequenu paniya niajanianijia. Naajaa, majaari cua naajionu paniniu. Janiyacuajaari niaacua naquerejiyani, maninia pa pocoojonura, shuquiriaatia pa quiniuria seetanujuanaa. <sup>13</sup> Quia tarajanu niquiohuari cua sequeree nojoriria cua saruhuatanura quiajaniya. Nojuacuajaari Pueyaso saquiriojosano maajijihuaj. Tariucua.

## SOCUA TANEE JUAN NAAJIONEE

### *Juan maninia pahuatasaaquiaari Gayojiniji*

<sup>1</sup> ¿Quiaate quiyajaa cua panishano Gayonaa? Janiyari saaquiano Juanni, Pueyaso muerasu jiitiana. Seetanujuanaa quia paniyanijia, Pueyaso rupaa quiniuucua coojiajinia.

<sup>2</sup> Quiocuara secojoquiaanijia, puetunu quia miishanojuanaa cuaara quiiria maninia. Janiyari quiocuara secojoquiaaaniuhuj, maninia quia cuaqueya quiniuria, maja cusosu, taa quioojia quiya maniniacuaani, Pueyaso tojijia quia quishacari maninia.

<sup>3</sup> Parta Pueyaso muerasujinijinio pueyari cucua tiuquiquianu quia quijia tiacajiniji. Janiyari jiyanohua shuquiriaatia quiquianuni nojori pahuatasacari quiajanijiniji. Quiaanaari seetanujuanaa maninia miiijia quiquiaa taa pa rootasaaquiaari Jesucristo rupaacuajani. Quiaacuajaari maninia tojiquiaa seetanu rupaajanaa, sanajanaa. <sup>4</sup> Jiyanohua timiquiaanijia cua tojishacari cua muerasuuri maninia miya, taa cua rootaquiaari Jesucristo rupaa nojoricuajani. Naa cua tojishacaritij, cunoori jiyanohua cua timitiquiaa socua tamonu casaajiniji.

<sup>5</sup> Sanajanaa, quiaacuajaari maninia miiijia, maninia quia miishacari parta Pueyaso muerasu. Quiaa cutaraari maninia miiquiaa, quia tiuquitishacari quia tiajinia quia niishishoo tamaquiicujinio Pueyaso muerasu. <sup>6</sup> Pueyaso muerasu rerejosacari niya, Pueyaso rupaa pahuatanura rucoojuacaari canaa niquiara pahuatanu maninia quia miishanojiniji nojoriria, quia paniniutia nojori. Quiarijiani, nojori quia niquitiore nareja nojori panishano na jiyatajara, socua nojori quianu panishacari cuniquiji. Naa quia miiri quenaaja, Pueyaso quia shuquiritiniuria. <sup>7</sup> Nojoriiri Jesucristojiniji pahuatanura rucoojiya. Majaari nojori panishano na masetunu paniniu quiquianu Pueyaso niishiyashijiacajiniji. <sup>8</sup> Naaratej, pajaniya cuaara naacuura jiyano pueya, noo pojori canapuate pa Jiyaniiija rupaa pahuatanura rucoojiyacujani. Naa pa miiriti Pueyaso rupaa pahuatanu naacuna pa quiniuriajuhuaj.

### *Sesa Diótfes miishanojiniji pahuatasano*

<sup>9</sup> Janiyari quia quijia tiacajinia Pueyaso pueya maanuucua naa naajioquiaarijuhuaj. Janiyari nojori sequequiaarini nojori cuaara Pueyaso Rupaa pahuatanura rucoojuaca naacuura, cunoojori jiitianura na panishano. Diótfesri saaja tama na cuaqueyajaaja shuquiritiaja, Pueyaso pueya maanu jiitiana na quishacari. Nocuaji cua sequesano ruoretacanuuri. Cua rerequetequiaaariuhuj. <sup>10</sup> Naajaa, janiya jaara niaacua quiaareni, janiyari naa sacuaatia na miiniuucua na nacasunutaniyani. Nojuajaari tamasa niquiara canaa sesacaquiaa na sajonuta. Naa socua sesa miiquiaaariuhuj: majaari na tiuquinitianu quiquiaa Pueyaso Rupaa pahuatanaa na tiajinia. Canapuate saniniuujia nojori tiuquitiniu paniquiaa nojori tiajiniani, Diótfesri nojori tenujuquiaa saaja. Canapuate Pueyaso rupaa pahuatanura rucoojuaca tiuquinitianu paniquiaaja na tiajiniani, Diótfesri puetunu nojori tenujuquiaajanaa, maja socua nojori rerejonura narta Pueyaso muerasuta.

<sup>11</sup> Sanajanaa, majaari quia jiaatianu cunoojori sesa miiijiaacua, quiaa mariqui juhua nojuaja quiriiaariuhuj. Saaja quia jiaatiare cutara maninia miiijiaacua, juhua nojuaja quia quiniuria. Cante maninia miiquiaani, cunocujaari Pueyaso pueyano. Sesa miiijia saniniuujia, nojuajaari Pueyaso niishiyashijia.

### *Maninia Demetrio miishanojiniji pahuatasano*

<sup>12</sup> Puetunu pueyajanaari saniniuujia maninia pahuatanuquiaa Demetrijiniji. Tama Demetrio miiijosanojinijiaaja, pueyari niishiya Demetrioori maninia pueyano. Seetanujuanaa, nojuajaari maninia pueyano, taa tamasa sequequiaacuajani. Niacuajaari niishiya canaari seetanujuanaa sequequiaani, naa canaa sequesacari Demetrijiniji.

### *Naajio puequesacari*

<sup>13</sup> Janiyari queraatia sequenu panijajaa quiajanijani. Naajaa, majaari cua sequenu paniniu saaja cua naajiojinia. <sup>14</sup> Janiyacuaja quiocua naquerejiyani. Jiyacaritij, pocua maninia pocoojore cutarani.

<sup>15</sup> Pueyaso cuara quioojia jiitiaara maninia, juhuajaniya quia quiniuria. Niya pa rupunaari cua sequeturee cua saruhuatanura quiajanija. Puetunu cuniqui pa rupunaajanaa quia saruhuatate canaarajuhaj. Tariucuaja.



## JUDAS NAAJIONEE

### *Judas naajiosano Pueyaso saquiriojosano pueyacuara*

<sup>1</sup> Janiyari Judasni, Jesucristo seru, Jacobo tarajanu. Niaacuara naajiyaniija canapueete pa Que Pueyaso panishano muerasucujani. Nojuajanaari nia saquiriojoquiaari nera nia quiniuria. Niajaniyari Neyanu Jesucristo cojuasano, nia rupuesacari nojuaja. <sup>2</sup> Pueyaso cuaara nia jiuujiaaria. Cuaara nioojia cajitiirijahuaj. Cuaara paniiria niajanijahuaj. Pueyaso cuaara naa miiria jiyanojua niajanijatej.

### *Sapojonuujucajiniji pohuatasano*

<sup>3</sup> Cua panishano pueyanaa, janiyari niaacuara naajionu paniriquiaa jiyanojua, cua pohuatanura niajaniya taa maninia pa miishaanutaniyani, Pueyaso saquiriojosano pueya pa quiniucua: niajaniya, canaajuhuj. Saniniujia, quiarijiani, socua maninia cutaraari cua naajionura niaacuara, cua nacasunura niajaniya seetanujuanaa Pueyaso tojijia nia quiniuria. Jiyanojua nia tiuuri pueyaracaanu Pueyaso rupaacua, cumueca Pueyaso pueya nia quiniuria. Pueyasocujaaari na rupaa pohuataniquiaari maninia pa niqiuara. Maja cumaati na jatanishaanu. Cuaara pueyaracaanu maninia pohuatasaaaria, taa pa pohuatasaaquiaaricuaani. <sup>4</sup> Naa nia sequeyanijia Pueyaso rerequetajaca supuesacari jiyasohua nia tajinia. Tariucuaanu Pueyaso Rupaaajiniacuajaari cuno sesoriquia pueyajiniji naajiotasaaquiaaricujaja. Nojoriniiaari quejoosaanutaniya pueyaracaanu saniitiosocoriquiano. Nojoriiri sequequiaa: “Shuquiriaatia juhuajaniya pa miiri tama pa cuaqueya miiniu panishanojuaaja, pa jiyanojua Pueyaso quishacari. Paa jaara sesa miirini, naajaa, majaari Pueyaso saniitionu quiniutaniya pajaniya”. Nojoriiri naa sequetuquiaa sesatej. Nojoriiri pa Jiitianajanaa jiyatequiaa juhua saniitioyashijia, pa Jiyaniijajanaa Jesucristoni.

<sup>5</sup> Niaari niishiyacujaja, Pueyasoori Israel pueya supuetanaa mashiquiaari Egipto jiyajiniji, Egipto pueya seya nojori quishacari. Socua nia niishitiorohuaraj. Na nuhuaji, Pueyasoori na pueyajinijinio nocua tiuyashijia puecooquiaari. <sup>6</sup> Naajuhuj, Pueyasoori tama na seyajaaja nujuatejoquiaari na nujuatejojuajinia, noo pojori canapueete na shuriucua quijia quiquiaari jiyocuaaanucujani. Nojoriiri Pueyasora na poonijosano tiujiaquiaari. Nojori poonijosaaqui tiujiatuquiaarijuhuaj. Cunora, cumayocuata morojosaaquiaariiri, pueyaracaanu ninishiqui nojori quiniuria, cuaara quiriijaatijia Pueyaso saniitionu juuca cutara. Cuno juuca, Pueyasoori puetunu na tojiyashijiacajanaa saniitionutaniya. <sup>7</sup> Nia niishirijuhua Sodoma tiacajinia quijia pueya, Gomorra tiacajinia quijia pueyano, nojori tiaca shocua quiniaa pueyajuhuj. Puetunu nojorijianaari maninia miiniu ruuretaquiaari tama nojori cuaqueya panishanojuaaja nojori miiniuria, jiyanojua sacuaraatia. Nojoriiri maajishuriu numuetucujuaca quiquiaari. Cayashuriuuri narta maaji numuetucujuaca quiquiaarijuhuaj. Pueyasoori maja na shipininiu quiquiaari naa pueya quiniuriatej. Naa Pueyaso tojiyashijia nojori quishacari, mariyata taa tama Pueyaso seyajaaja na tojiyashijia quiquiaaricuaani, Pueyasoori nojori quejooquiaari mani quiquiojia, tii naquiya nojori miishaanura pueyaracaanu. Naa nojori saniitiosaanuucuaatej, cunoori quiquiaari puetunu pueyajanaa niishiniuria maja Pueyaso tojiyashijia pa quiniuria taa nojori quiquiaaricuaani.

<sup>8</sup> Cuno pojori, sacuaraatia niishitiona nia tajinia quiyani, nojoricujaaari Pueyaso saniitionujiniji niishiya. Naajaa, nojoriiri juhuajaniya miiquiaa puetunu sesajanaa taa noojiajinia nojori niishiyacujani. Nojoriiri tama nojori jiuujiaaja curuushojoquiaa nojori miishacari tama nojori niquishanojuaaja na maquenujia. Pa Jiyaniijia sootiujiaarijuhuaj. Nojoriiri jiyanojua cumaacaraca quijia sesacaquiaajuhuj, jiyocuaanu quijiacani. <sup>9</sup> Supuetana Moisés shaajesacari, Pueyasoori na seya jiyaniijia Miguel jiyaroquiaari Moisés quete na jamonura. Sesacaari Moisés quete paniquiaari juucua. Nocua Miguela juayonuutaquiaariiri. Miguel cutaraari seetanujuanaa cumaacaraca

quijia. Naajaa, majaari na saarijionu quiquiaari Sesaaca. Na sequeree saajaari: “Pueya-sojuanaa cuaara juaaria cutara quiajaniya”. <sup>10</sup> Saniniuujia cuno sesa niishitiojonaa nia tajinia quiyani, nojoriiri na niishishoo cumaacaraca casaa sesacaquiaa. Naajuhuj, nojoriiri tama nojori cuaqueyajaaja sesoquiaa sesa na miishanota, taa nacujiniaacoji casaa miiquiaa sesa juhuajaniyacuaani, maja na niishiniutia. Naaratej, nojoriiri sanitosocoriquiano puetunurajanaa.

<sup>11</sup> Nojoriiri jiyanoehua cocuaatia miiquioquiaa. Nojoriiri narta pueya niqiniu paniyaquiquiaa, taa supuetana Cañ niqiniu paniyaquiquiaari tarajanucuaani. Nojoriiri sesa pueya timitiquiaa casamiriaca nojori quiniurajuhuj, naatej, taa supuetana Balaam miiniu paniquiaari juucuacuaani. Nojoriiri mariyata puetunu quejoosaanutaniyajanaa nojori ruuretanuucua Pueyaso, taa supuetana Coré cusoquiaaricuaani na ruuretasacari Moisés. <sup>12</sup> Nia queranacusacari Pueyaso niqiara nia panitioonuta, cuno sacuaraatia niishitiojonuujuacaari jiyanoehua cararaatia nojori miaquesacari niaata. Majaari nojori paniniu tamasaca. Nojoriiri saaja tama na cuaqueyajaaja shuquiritiniu niishijia. Puera miaquenujuaca nojori quishacari, cunoori cararaatia. Jiyano pueyari maja na cumaquiniu niajaniya. Nojoriiri najuhuana quijiaa, juhua niqitioocuaari tajimiquiaa paratu piyarojosacari. Majaari maru ninu. Nojoriiri najuhuana quiya, juhua muetuhuo naana. Nojoriiri tariucua macu Pueyasora, naatej taa naana sorenocuaani, juhua puetunu na nujuacatajanaa majaratasano. <sup>13</sup> Nojori nuhuaji, pueyari saaja taraatia quiquiaa, cararaatia nojori miishanojiniji. Sesa nojori miishanoori juhua jiyanoehua shoniniacu caminia queyocuasacari cushau, curuutuuca. Nojoriiri shanohua niqishiya rupaquijia, juhua rijia tiyano. Na nuhuaji, nojoriiri ninishiqui quiniutianiya pueyaracaanu Pueyasooju. <sup>14</sup> Pa supuetana Adánri coteenujanaa shipinishano pueyano quiquiaari mijiria. Enocri séptimo jiyaniijia quiquiaari Adán nuhuaji. Enocri Pueyaso niqitishano nojuaja pahuataquiaari taa nio sesa miijiaca pueya miishaanutaniyani. Nojuajaari naa sequequiaaritij: “Janiyari Jiyaniijia niqirii cunocoji niyano jiyanoehua queraatia na pueyatani. <sup>15</sup> Nijioriquiaari sesa miijiaca na saniitionura. Rerequetejacaacua tiutianutaniya puetunu sesa nojori miishanojuanaari. Puetunu na sojeacajanaari saniitiosaanutaniya puetunu nojori sesacanuucujanaa pa Jiyaniijia”. <sup>16</sup> Cuno sesa niishitiojonuujuacaari naa miiquioquiaa nia tajinia. Nojoriiri saa juayonuutaquiaajaa. Majaari shuquiriaatia nojori quiniu quiquiaa na jiitiasanota. Nojoriiri tama na cuaqueya panishanojuaja miiquiaa. Puera pocujaca quiyajaariuhuj. Nojoriiri na sapojonuta maniniuhuaqueetaquiaa narta pueya, maninia nojori miishaanura. Majaari naa nia quiniu pueyanaa.

#### *Pueyaso pueyara rootasano*

<sup>17</sup> Cua panishano pueyanaa, nia niishiriohua pa Jiyaniijia Jesucristo jiyaramiquishano pueya sequesano niajaniya. <sup>18</sup> Nojoricuajaari nia pahuataquiaari taate quera jiya puequesacari quiniutianiya. Nojoriiri naa sequetuquiaaritij: “Quera jiya puequesacari, Pueyaso sesacajaca pueyari Pueyaso casaa soojeaca quiniutianiya, na rupaa soojeacajuhuj. Nojoriiri sesa miiniutianiya tama nojori cuaqueyajaaja nojori shuquiritiniuria”. <sup>19</sup> Naa cuno pueya miiniuucuatej, nojoriiri Pueyaso muerasu jiuujia niyaquejotequiaa maja rupuetosano nojori quiniuria. Nojoriiri saaja tama sesa nojori niishishano miiquiaajaacujua, Pueyaso Sohuanuuju nojori quishacari.

<sup>20</sup> Cua panishano Pueyaso muerasunaa, Jesucristo rupaacua nia tiuuri jiyanoehua socua, seetanujanaa na pueya nia quiniuria maninia. Pueyaso nia secojore Pueyaso Sohuanu cumaacata. <sup>21</sup> Naacuajitij, niocua Pueyaso panishano pueya quiri pueyaracaanu. Juhujaniya nia sashiri pa Jiyaniijia Jesucristo, nojuaja cuaara pueyaracaanu quijiacara pa jiyaterejaatijia, shuquiriaatia pa quiniuria na shuriucua pueyaracaanu. Naa pa miiniutianiya maninia jiyanoojia na quiniucua.

<sup>22</sup> Canapute pa Jiyaniijiaacuaji taacanuyajaani, nojori nia niishitiojore jacaria, seetanujanaa nojori tiuniuria maninia pa Jiyaniijiaacua. <sup>23</sup> Tamasaca nia piriyojorejuhuaj Pueyaso pueya nojori quiniuria, nojori mariqui manijinia puetunu quejoosaarejanaari. Tamasacaari jiyanoehua sesa miijiaca. Naajaa, nojori nia naacure, Jesucristo nojori

niishiniuriajuhuaj. Saniniuuujia, tama nia cuaqueyajaaja jiyanohua nia cojuare niaa mariqui sesa miitishaarejaariuhuj nia cojishacari nojori. Jiyano pueyacua nia taraajere. Saniniuuujia, puetunu sesa nojori miishanojuanaa nia soore cutara.

*Naajio puequesacari Pueyaso maniniuhuaqueetasaanu*

<sup>24</sup> Pa Que Pueyasoori pa cojuaquiaa maja pa catenura nocuaji. Nojuacuajaari cumaacaraca na tiuquinitianura pajaniya nocua, puetunu tari maniniushitishanojuanaa pa quishacari, shanohua na cumaaca pa shootianura pueyaracaanu. Pa niquishacari nojuaja, paari jiyanohua na timitianutaniyani.

<sup>25</sup> ¡Jiyanohua maniniaari pa Que Pueyaso! Nojuajaari niishijajanaa. Pa jiyatequiaari na muerasuraari pa Jiyaniijia Jesucristo cusuucua pocuara. ¡Jiyanohua shanohua na cumaaca! ¡Nojuajaari Jiyaniijajanaa! ¡Jiyanohua maninia pa Jiitiana! ¡Nojuajaari puetunu cumaacaracajanaa cutara! ¡Nojuacuajaari pa Que Pueyaso! Jiya shipinishaacari-jiyojua, nojuajaari quiijajuhanajaj. Naa quiyajaari. Naa quiniutianiya pueyaracaanuuri. Taaquiriirinij, naacuaaquinatejaj.

## JESUCRISTO NIQUITISHANO JUAN

### *Jesucristo niquitishano pajaniyara*

<sup>1</sup> Janiyari Pueyaso seru Juanni. Niya naajiotaa Pueyaso niquitishano Jesucristonijia, saniniuujia nojuaja niishitiniuria na tojitiajaca, taa quiari naataja Pueyaso miiniutianiya mijiria quijiacani. Jesucristoori jiyocuacaanuji na seru jiyaroquiaari cucua, na niishitiojonura janiya taa mijiria quijiaca miishaanutaniyani. <sup>2</sup> Janiyari puetunu na niquitishanojuanaa caminiujiya niajaniya seetanujuanaani. Niocuajaari seetanujuanaa Pueyaso rupaa, Jesucristojiniji cua caminiujiushano niaara.

<sup>3</sup> Shuquiriaatia quijiaca cutaraari noo pojori, canapueete nio cua caminiujiushano Pueyasojinijini serojonutaniya Pueyaso pueya maapue niquiarani. Na tojitiajacaari shuquiriaatia quijiaca quiniutianiyajuhuaaj, nojori tiuuniucua nio naajiojinia cua pohu- atasanooqua. Nio pohuatasano tohuateenuraari tari catecanoya.

### *Juan naajiosano siete Pueyaso pueya maapueecuara*

<sup>4</sup> Janiyari Juanni. Asia jiyajinia quiniaa siete Pueyaso pueya maapueecuara naa- jiyaniija. Pueyaso cuaara cumaquiiria niajaniya, cuaara nioojia cajitiiriajuhuaaj. Pocua niriquiano pa Que Pueyasoori jiyanojia maninia. Nojuajaari pueyaracaanu quijiacuaja. Quiarijia quiyajaariuhuaaj. Na Sohuanuuri juhua siete saminio casaa niquishano, puetunu tiquiyocuajanaa quijia na quiniucua. Nojoriiri Pueyaso cajishaqui tacoji quituuya. <sup>5</sup> Pueyaso Niyanu Jesucristoori seetanujuanaa puera caminiujiunia puetunu na Que Pueyaso Rupaajanaa. Nojuajaari quiarinio na cuaqueyata pa coteetaquiaari samiitianuhua macujiniji. Nojuacuajaari puetunu mijiria jiyaniijianucuaajanaa Jiyaniijia. Nojuacuajaari pa panijia. Tama na nanacajaaja shootequiaariiri sesa pa miiniujiniji na jayonura pajaniya, tojetaarucuaajanaa sesa miyashijiacara na jataniniuria pajaniya. <sup>6</sup> Nojuajaari pa jiyatequiaari jiyaniijianucua pa quiniuria, na Que Pueyaso secojonaa pa quiniuria pueyacuara, nojuaja pa shuquiritianurajuhuaaj. ¡Pa Jiyaniijiaari jiyanojia maninia! ¡Pa Jiyaniijia cuaara shuquiritiasaaria pueyaracaanu! ¡Nojuacuajaari puetunu cumaacaracajanaa pueyaracaanura! Cuaara naa quiiriatej.

<sup>7</sup> ¡Nia maure! ¡Pa Jiyaniijia Cristoori cohuajajinia tari cunocojiuhua! Puetunu pueyajanaari na niqiniutianiya, noo pojorijuhuaaj, na motenaatej. Puetunu mijiria quijiaca pueyapuejanaari nocuaji nujuquenutaniya nojori martenuta. Taaquiriiriniji. Naa quiniutianiyacuaaquinateja na tiuquishacariuhua.

<sup>8</sup> Pa Jiyaniijia Pueyasoori tama nojuajinijiaaja sequeya:

“Janiyacujaari puetunu casaajanaa coteetanani, na shaajariquianojuhuaaj. Puetunu cumaacaracajanaanijia. Janiyacuajaari pueyaracaanu quijiani. Majaari cua supueni quiquiaari. Janiyari niaacua tiuquiriquianohuani”.

### *Juan niquishacari Cristo puereeta na shacantuuca cumaacajinia quiyano*

<sup>9</sup> Janiyari niarta Pueyaso pueyano Juanni. Pa Jiyaniijia Jesuucua tiuujia cua quiniu- ucuajuhuaaj, janiyari jaarajaaja niaata cojiritiashiya naquiya miiniuni. Naaratej, paari mariyata jiyaniijianucua jiyatesocoriquianoni. Cunora, paari juhujaniya naquiya miiniu rejeretaquiaani Jesucristo cumaquishacari pajaniya. Pueyaso rupaa Jesucristo- jiniji cua poojotanuuca, janiyari shoniniacu caminia jiuujajinia jatasano quiyani jiya tucuaatiajaacua. Nio jiya tucuaatiaja sesaari Patmos. <sup>10</sup> Tamonu juuca, pa Jiyaniijia samiitianuhua pa niishiniu juucani, Pueyaso Sohuanuuri cucua niqianu jiyanojia na cumaacata. Janiyari jiyacari rupaa tojirii nacaano cua nijiniarani, juhua trompeta jonenenu. <sup>11</sup> Cua sequeriquiaari:

—Casaa cua niqitiniutianiya quiajaniyani, cuno quia naajiotare nequesoreetuneer- ano. Quiocua na nuhuaji na jiyarore Asia jiyajinia nio siete cua saquiriojosano pueya maapueecua. Nojoriiri Éfeso tiacajinia quiniaa, Esmirna tiacajinia, Pérgamo tiacajinia, Tiyatira tiacajinia, Sardis tiacajinia, Filadelfia tiacajinia, Laodicea tiacajinianio.

<sup>12</sup> Janiyari cua nijiniara tacatequeeni cua niquiniuria cante cucua pocuariquiaani. Cua tacatesacari, janiyari siete samari nujuatacojua niquiriini, orojiniji shipinijosano. <sup>13</sup> Cuno samari nujuatacojua tajiniani, janiyari pueyano niquiriini, juhua Pueyaso Niyanu niquishano. Tucuaque toque cushiriquiaari. Na niohuacaacuma puecariquiaari. Na jiriquiajinia camarucuteriquiaa orojiniji shipinishano casaari. <sup>14</sup> Pueyaracaanu quijia na quiniuucua, na muecacaari tojetaarucujanaa jiyanoehua cohuaja quiriquiaa juhua sohuanatuu. Maatia pueya jiuujia niquijia na quiniuucua, na namijiaari juhua mani rimianacuriquiaa. <sup>15</sup> Na niohuacaari nenecuariquiaa juhua jiyanoehua naseeca casaajinia mohuquishano bronce. Naa shacantuuca niquishano quiriquiaari puetunu sesa casaajanaa paracaajia na quiniuucua. Cumaacaraca Jiyaniijia na quiniuucua, na pocuasacari, jiyanoehua tojishaariquiaari juhua sararojua, jiyocuacaanuji mohuaca tijia. <sup>16</sup> Na miaquetajata siete riya muetujuriquiaari. Naajuhuj, nijiniaquetucujaja mueruuri na rupaamaji mueranacuriquiaa, na rupaa ruuretajaca na puecoonura. Na jiquiocoori jiyanoehua shacantuuca quiriquiaa juhua jiyanoehua pananu jasacari panacari.

<sup>17</sup> Cua niquishacari nojuaja, janiyari cua puerenuta na pajama pojiyaree juhua macuni. Nojuajaari saaja na miaquetaja niaree cucua. Cua sequereeri:

—Maja puerenu. Janiyacuaja Jesuni. Janiyari puetunu casaajanaa coteetejani, na shaajariquianojuhuaj. <sup>18</sup> Janiyari pueyaracaanu quijiani. Macu quiquiaarinijia. Naajaa, janiyari samiitiaquiaariuhuani pueyaracaanu saminio cua quiniuria. Janiyari macunucua quiquio riatataja camaruni. Naacuajitij, janiyari cumaacaracani cua tojiyashijiaca cua quejoonura macunucua quiquiojinia. <sup>19</sup> Pueya niishishocoriquiano, quia niquishano quia naajiotare Juannaa, taa na quiyacuajani, naajuhuj taa mijiria quijiaca miishaanutaniya na nuhuajini. <sup>20</sup> Quiarijia quia pohuatareera maatia quia niishiniuria cua niquitishano quiajaniya. Cuno siete riya quia niquishano cua miaquetajata cua muetujusanoni, cunoori siete cua seya. Nojoriiri siete cua saquiriojosano pueya maapue jitianaa. Cuno siete samari nujuatacojua orojiniji shipinijosano quia niquishanojanihuahuj, cunoori siete cua saquiriojosano pueya maapue.

## 2

### *Éfeso tiacajinia quinia Pueyaso pueya maanuucuaru naajione*

<sup>1</sup> Juhucatecara naa cua sequereeri:

—Éfeso tiacajinia quijia cua seruucuaru quia naajiore, Pueyaso pueya maanu jitianani. Naa quia sequere nojuaja: “Nojuaja, cante siete riya cacaa na miaquetajatacuajani, cante siete samaritiu nujuatacojua tajinia rucuanajojuacuajani, nojuajaari naa quia sequeya: <sup>2</sup> ‘Janiyari puetunu quia miishanojuanaa niishiyani. Quiaari jiyanoehua poonijioquiaa quiria. Naajuhuj, quiaari puetunu casaajanaa rejeretaquiaa juhuajaniya. Janiyari niishiyajuhuj, majaari quia shanacunu quiquiaa sesa mijijaca nia tajinia. Naajuhuj, quiaari cuno sapojonuujua nequesoreecanu, noo pojori canapuate tama sequeriquiaa-jaajani: “Canaari Jesu jiyaramiquishanoni”. Naa quia nequesoresacari nojoritij, quiaari niishiquianu nojoriiri sapojonuujua seetanujuanaa. <sup>3</sup> Quiaari puetunujuanaa taraatia quia miiniu rejeretaquiaa, cucua tiuujia quia quiniuucua. Quiaari pueyaracaanu quiria poonijiojua maninia. Quia samaresacari, naajaa, majaari quia tarinitianu quiquiaa. <sup>4</sup> Puetunu naa quia miishanojuanaani, cunoori maninia. Saniniuujia, cua sequesano quia tojiri. Majaari panijia quia quiniu tari, juhua coteenujua. Majaari cuno cua maniniucuanu cutara. <sup>5</sup> Cunora, quia niishiri taa jiyanoehua cua panijia quia quiquiaarini. Quioojia quia tacatorohua cucua, maninia mijia quia quiniuhuara, taa quia quiquiaari coteenucuajani. Quiaa jaara quioojia tacatoyaquiri, janiyari quiocua niniutianiyani, Éfeso tiacajiniji cua patanura quia samaritiu nujuataja. <sup>6</sup> Quiaari maninijuhuj, sacuraatia casaa Nicolás niishitiojosano tojijia miishano soojea quia quiniuucua. Janiyari cuno pojori miishano soyajuhuj. Nio cua sequesano quiajaniyani, cunoori puetunu cua pueyarajanaa. <sup>7</sup> Cante numaacarani, nojori cuara tojiiria Pueyaso Sohuanu sequesano Pueyaso pueya maapuera. Pueyaso quishaqui, samiitianijia naanaari nujuataa. Cante puetunu sesa casaajanaa nujuataja cumaatiani, janiyari nojori jiyatenutaniya cuno naanajiniji miojuarani, pueyaracaanu rishijia nojori quiniuria’ ”.

*Esmirna tiacajinia quiniaa Pueyaso pueya maanuucuaa naajionee*

<sup>8</sup>Jiyaniijia Jesucristoori naa cua sequereejuhuj:

—Esmirna tiacajinia quijia cua seruucuaa quia naajiore, Pueyaso pueya maanu jiitianani. Naa quia sequere nojuaja: “Naa sequeyari cante puetunu casaajanaa co-teenacuajani, na tucatajani. Nojuacuajaari cusoquiaari, na nuhuaji samiitiaquiaar-iuhuari. Janiyacuajaari nojuajani. <sup>9</sup> ‘Janiyacujaari niishiyani, quiaari naquiya mi-ishaquiaa. Quiaari casamiijujuhuaj. Naajaa, quiaari jyanohua casamiriacuaja niya cua shuriucuan. Janiyari niishiyajuhuj, cuno Judiocuacaari quia sesacaquiaa. Nojoriiri tama sequequiaaajacujua nojoriniaari Pueyaso pueya cutara, Judiocuaca nojori quiniucua. Maja naatej. Nojori cutaraari Satanás pueya maanu. Satanáscuajaari samaruhua jiyaniijia. <sup>10</sup> Quiaari naquiya miishaanutaniya. Naajaa, majaari puerenu. Satanásri noojiaqueya niajanijiniinio nujuatejotenutaniya nujuatejojuajinia nia sanishaanura, niaate cucua tiuujiaa seetanujanaa. Naajaa, niaari saaja rupaquijia miishaanutaniya naquiya. Quia rejeretariquia saaja. Cua tojjijia quia quiriquia pueyaracaanu, quiaa cuara shaajeyarejaatijia. Quiaa jaara naa miiritij, janiyari quia jiyatenutaniya jyanohua shuquiriaatia quijia quia quiniuria pueyaracaanuni. Nio cua sequesano quiajanijiani, cunoori puetunu cua pueyarajanaa. <sup>11</sup> Cante numaacani, nojori cuara tojiria Pueyaso Sohuanu sequesano Pueyaso pueya maapuera. Cante cucua na tiuuniucua naquiya na miishaanu rejeretaja pueyaracaanuni, nojuaja cutaraari maja quenaaja naquiya na miishaanu quiniutianiya Pueyaso saniitiosacari na ruuretajaca. Na ruuretajaca cutaraari quejoosaanutaniya mani noshijia caminiajini’ ”.

*Pérgamo tiacajinia quiniaa Pueyaso pueya maanuucuaa naajionee*

<sup>12</sup>Jiyaniijia Jesucristoori socua cua sequeree:

—Pérgamo tiacajinia quijia cua seruucuaa quia naajiorejuhuaj, Pueyaso pueya maanu jiitianani. Naa quia sequere nojuaja: “Nijiniaquetucuaa mueruu jiitianaari naa sequeya: <sup>13</sup> ‘Janiyari niishiyani, cuno tiaca quiaa tii quiyani, cunoori Satanás quiquiojuhuaj. Naajaa, quiaari cua tojjijia quiquiaa. Majaari cucua quia tiuuniujiniji quia seetanu quiquiaa. Cua seru Antipas cutaraari mosaaquiaari janiyajiniji pohuatanu na tarinitiaaquiniucua, cuniqui nia tajinia Satanás quishaquini. Naajaa, majaari quenaaja jiyacari quia seetanu quiquiaari cucuaji. Puetunu naa quia miishanojuanaari jyanohua maninia. <sup>14</sup> Saniniuuja, maja cutaraari nio cua maniniucuanu: tamasaca niajanijiniinioori maja na tarinitianu paniniu sesa na miijionu. Nojoriiri supuetana Balaam niishitiojosano tojjijiaa quiyajaa. Balaamcuajaari Israel pueya paraca Balac niishitiojoquiaari na pueya cuara shiniujuuria Israel pueya, jaarajaaja Israel pueya miiniuria sesa nojoritia. Naaratej, Balac pueyari Israel pueya mianuutequiaari noo shu, teyanote juaashiquiata shipinijosano casaacuara puecoosano quiquiaaricujani juhua Pueyasoocuaa. Naa sacuaatia nojori queranacujusacari nojori paraatatej, Israel pueyari cuniquijia cuno taatujuri numuetucujuquiaarijuhuaj. <sup>15</sup> Naajuhuj, majaari nio cua maniniucuanu: noojiaqueya niajanijiniinioori maja na tarinitianu paniniu jyanohua sacuaatia casa Nicolás niishitiojosano. <sup>16</sup> Quiaari nareja niquiquiaa sacuaatia nojori mi-ijionu. Cunora, quioojia quia tacatorohua cucua, janiya mariqui quiocua quiaareeri cuno sacuaatia miijiaa cua miaquejonura cua rupaamaji mueranacujua mueruuta. <sup>17</sup> Cante numaacani, nojori cuara tojiria Pueyaso Sohuanu sequesano Pueyaso pueya maapuera. Cante tama na cuaqueya miiniu panishanojuaja rejetejani, janiyari na mianuutenutaniya jiyocuaanu cua racatasano cua pueyarano cua riuriotacajinijini. Janiyari na niqutionutaniya cohuajajau saajiajuhuaj, teyanooqua quiarinio sesa naajio-tasano quiniutianiyacujani. Majaari tamonu niishiniu quiniutianiya cuno sesa. Saaja na camaruuri na niishiniutianiya, cana cua niqutionutaniya cuno saajiacujani’ ”.

*Tiyatira tiacajinia quiniaa Pueyaso pueya maanuucuaa naajionee*

<sup>18</sup>Jiyaniijia Jesucristoori socua cua pacuterohua sequenuhuaj:

—Tiyatira tiacajinia quijia cua seruucuaru quia naajiore, Pueyaso pueya maanu jiitianani. Naa quia sequere nojuaja: “Pueyaso Niyanu, juhua mani rimianacuyano nami-jiaaracani, juhua bronze mohuaquishano shacantuuca niohuacaracajuhuj, nojuajaari naa quia sequeya: <sup>19</sup> ‘Janiyari puetunu quia miishanojuanaa niishiyani. Janiyacuajaari niishiyani, quiaari Pueyaso panijia, pueya panijiano. Quiaacuajaari Pueyasocua tiuujia. Quiaari maninia poonijiona Pueyasora, pueya quia naacunura. Naajuhuj, quiaari juhuajaniya rejeretaquiaa quiaa jaara taraatia miishaariquia. Janiyari niishiyajuhuj, puetunujuanaa quia miishano quiria quiarjiani, cunoori socua queraatia coteenu quia miishanojiniji. <sup>20</sup> Saniniuujia, nio cutaraari cua maniniucuaaquishano: cuno Jesabel niaata quiyani, tama na cuaqueyajaaja sequequiaani, nojuajanaari Pueyaso sequesano caminiujunia pueyara. Quiaari juhuajaniya na shanacuquiaa saaja, sacuaraatia na niishitiojosanota na sapojonura cua pueya. Naa sacuaraatia na niishitiojosanotatej, cuno maajiiri cua pueya shiniujuquiaa juhuajaniya nojori numuetucujunura na camishoo maajipohua. Cua pueya shiniujuquiaaariuhuj nojori miaquenuunura noo shu, teyanote juaashiquiacata shipinijosano taucuaca pueyasohuacuara puecoosano quiquiaacuajani. <sup>21</sup> Janiyacuajaari tari cuno maaji sashiquianu juucuanu, noojia na tacatonura cucua. Majaari na tarinitianu paniniu paanatu na quiniu. <sup>22</sup> Cunora, cua tojiri. Cua saniitionura nojuaja, janiyari na cusotenutaniyani na maquetujinia na matanura. Naajuhuj, na numuetucunujuuca jaara noojia tacatoyaquiri sesa nojori miiniujiniji, janiyari jiyanoehua naquiya miiniutianiya nojorini. <sup>23</sup> Noo maajipohujuhuj, paanatuririria quinioni, cuno paanatujuanaa niishitiojonuucua nojori juhua necojorini, janiyari puetunu nojorijianaa pueconutaniyani. Naacuajitij, puetunu Pueyaso pueya maapuejanaari niishiniutianiya, janiyari puetunu nojori jiuujiajiniajanaa nojori niishiriojosano niishijiani, nojori panishanoocua nojori jiaatianunio. Naacuajitij, janiyari maninia miijiaca nijaniyajinijinio maninia miiniutianiyani. Nijaniyajinijinio sesa miijiaca saniniuujia, nojoriiri saniitiosaanutaniyacujua. <sup>24</sup> Tiyatira tiacajinia quiniaa noojiaqueya nijaniyajinijinio saniniuujia, niaari sacuaraatia cuno maaji niishitiojosano ruuretaquiaa saaja. Naajuhuj, majaari nia niishiniu paniniu quijia cuno sacuaraatia casaa jiyasohuaja niishishano, sacuaraatia miijiaca jiyaniquishanoni “jiyajeneta casaa, Satanásjiniji niishishano”. Naa nia ruuretenuucua puetunu cuno sesa niishitiojosanojuanaani, cunoori maniniacuaja. Cunora, majaari socua cua nacasunu quiarjia nijaniya. <sup>25</sup> Saaja tama nia cuaqueyajaaja nia cojuare jiyanoehua, maja nia tarinitianura maninia nia miiniu taa nia miiquiaacuajani. Naa nia miiriquia pueyaracaanu, janiya jaara niaacua tiuquiriohuajaatijia. <sup>26</sup> Cante cua panishano miiquiaa pueyaracaanuni cuara shaajeyarejaatijia, janiyari cuno pueyano jiyatenutaniya tamasaca pueyapue jiyaniijia na quiniuriani, taa cua Que jiyatequiaari janiya jiyaniijia cua quiniuriacuani. <sup>27</sup> Jiyaniijianucuaru cua jiyatesano pueyani, nojoriiri cumaacaraca quiniutianiya na jiitiasano pueya na tojitiniuria nojuaja. Na tojitiaashijiaca na saniitiosacari saniniuujia, nojori pyonutaniya jacanuraari, juhua cumamacata pishano conatu. <sup>28</sup> Naajuhuj, janiyari joojea na niqutionutaniyani, juhuaquetaja rijiani, shacantuuca quijia na quiniuria juhua janiyajuhuj. <sup>29</sup> Cante numaaracani, nojuaja cuara tojiiria Pueyaso Sohuanu sequesano puetunu Pueyaso pueya maapuerajanaa’ ”.

### 3

#### *Sardis tiacajinia quinia Pueyaso pueya maanuucuaru naajione*

<sup>1</sup> Jiyaniijia Jesucristoori socua cua sequeree:

—Sardis tiacajinia quijia cua seruucuaru quia naajiorejuhuj, Pueyaso pueya maanu jiitianani. Naa quia sequere nojuaja: “Naa sequeyari cante Pueyaso Sohuanu jiyaramiquiquiaa cuno siete Pueyaso pueya maapueecuacuajani, nojori jiuujiajinia na poonijionura. Nojuacuajaari cuno siete Pueyaso pueya maapue jiitianaa Jiitianajanaa. Janiyacuajaari cunoni. ‘Janiyari puetunu quia miishanojuanaa niishiyani. Pueyari quia jiyaniya quiaari saminio. Janiya cutaraari niishiyani quiaari juhua macu. <sup>2</sup> ;Quia

maquenu quia jatare! ¡Suteja quia quiri! Quia cumaquiri noo pojori canapuate jatarinitiaja rishiyajaani. Quera cusonuyari. Janiyari Pueyasora quia miishano niquiquiaani. Majaari maninia na quiniu cua Pueyasora. <sup>3</sup> Quiaacuajaari maninia niishitiojosaaquiaari Pueyaso rupaa. Taa quia niishitiojosaaquiaaricujani, cuno quia niishiriohua. Quioojia quia tacatorohua Pueyasooocua, seetanujuanaa na rupaa tojjia quia quiniuria. Quiaa jaara suteja quiniu paniyaquiri, janiyari canashiyaquiji quiocua niniutianiya juhua nohuasejojuani, quia jiyanihacari maja naasucua juhuanajuaja cua tiuquiniu quiniutianihua. <sup>4</sup> Quia jiiitasano pueyajinijinio cuniqui Sardis tiacajiniani, secaja nojorijinijinioori sesa miiniu ruuretajaca saaja. Naa sesa miiniuria nojori na cojiyaquiniuucuatej, nojoriiri juhua curuushojiaquishano janiyara. Naaratej, janiyari nojori cushiyotenutaniya cohuaqueya toqueni, cuata nojori rucuanenonura, cua rupuenaa nojori quiniuucua. Cunoori seetanujuanaa sesa miiniu ruuretajaca nojori quiniuucua, cucua tiuujia nojori quishacari. <sup>5</sup> Canapuate naa sesa miiniu ruuretajacani cua tojjitajaca nojori quiniuucua, nojoriiri naa cohuaqueya toqueya cushiyotesocoriquianojuhuaj. Cunoori quiniutianiya tojetaarucujanaa sesa miyashijiacara cua jiyatesacari nojori. Naajuhuj, majaari cua tuujunu quiniutianiya nojori sesaca cua naajioneejiniji, tee cuniqui pueyaracaanu rishijiacarano cua saquiriojosano pueya sesaca naajiotasano quiyacuajani. Naajuhuj, janiyari nojori jaatianutaniya cua Queecuani, na seya tacojiriano, cua sequenura nojoriiri cua timitiasano pueyaniyojua. <sup>6</sup> Cunora, cante numaacani, nojuaja cuara tojiiria Pueyaso Sohuanu sequesano Pueyaso pueya maapuera’ ”.

*Filadelfia tiacajinia quiniaa Pueyaso pueya maanuucuaru naajione*

<sup>7</sup> Jiyaniijia Jesucristoori socua cua sequere:

—Filadelfia tiacajinia quijia cua seruucuaru quia naajiorejuhuaj, Pueyaso pueya maanu jiiitanani. Naa quia sequere nojuaja: “Cua tojiri. Janiyacuajaari tojetaarucujanaa maninia miiijani, cua Que tojjia cua quiniuucua. Puetunu cua sequesanojuanaari seetanujuanaa. Jiyaniijiajanaa cua quiniuucua cua supuetana David niti, janiyari cua Que tiootiu riatataja jiiitanani, cua saquiriojosano pueya cua tiuquinitianura cua Queecua. Janiya jaara cuno tiootiu riatareni, tamonuuri maja na naata na tionuhua. Janiya jaara na tioreni, majaari quenaaja tamonu na naata na riatanuhua. <sup>8</sup> Janiyari puetunu quia miishanojuanaa niishiyani. Naajuhuj, janiyacuajaari juhua tiootiu riatarucuaa quiocujani, cua rupaa quia poojotanura. Naacuajitij, tamasaari maja na naata tenujunu quiajaniya. Quiaacuajaari saaja secaja cumaacaraca. Naajaa, quiaari cua rootasano tojjiacuaja. Naajuhuj, majaari cua soojeaca pueya niquiara quia tamacanu quiquianu janiya. <sup>9</sup> Naa maninia quia miiniuucua janiyacuacuatej, janiyari naa maninia miiniutianiya quiarajuhuj. Janiyari noojiaqueya Satanás pueya maanujinijinio mojoquetanijionutaniya quiocuarani. Cuno pojoriiri tama na cuaqueyajaaja sequeja, nojoriniaari seetanujuanaa Pueyaso pueya, Judiocuaca nojori quiniuucua. Naa nojori sequesacariitij, nojoriiri sapojonuya. Nojoriiri maja Pueyaso pueya. Nojori cutaraari niishiniutianiya janiyari quia panijia cutarani. Quiaacuajaari Pueyaso pueyano, cucua tiuujia quia quiniuucua. <sup>10</sup> Janiyari quia sequequiaarini maja quia tarinitianura quiria poonijionu, quiaa jaara naquiya miishaariquia. Quiaari seetanujuanaa naa miiquianu. Naaratej, Pueyaso saniniujiushacari puetunu mijiria quiniaajanaa puereeta naquiya na miiniutia nojori, janiyacuajaari jiyacari nia cojuanutaniyani. <sup>11</sup> Quia niishiri: janiyari quera tiuquihuani. Majaari quia tarinitianu cua rupaa tojiniu, quiaa mariqui sapojosaareeri cucuaji quia rupatenura. Naacuajitij, quiaa jaara cucuaji catere, majaari Pueyaso niquitionu quiniutianiya quiarano na racatasano. <sup>12</sup> Cante sesa miiniu samiritiaja saajani, cua rupaa tojjia na quiniuucua, janiyari jiyocuacaanu Pueyaso Secojoua tiajinia na nujuatenutaniya juhua morijiuni Pueyaso quishaquijianaa, tii cua Que Pueyaso na shuquiritianura pueyaracaanu. Majaari socua cuniquiji na pootiosaanu quiniutianiya. Naajuhuj, janiyari cuno pueyanoocua naajiotanutaniya cua Que Pueyaso sesani, quiarinio cua sesajuhuj, cua Que Pueyaso tiaca sesanio. Cuno tiacacuajaari quiarinio Jerusalén tiaca, jiyocuacaanuji roshinitiasaariquiano. <sup>13</sup> Cante numaacani, nojuaja cuara tojiiria Pueyaso Sohuanu sequesano Pueyaso pueya maapuera’ ”.



*Laodicea tiacajinia quiniaa Pueyaso pueya maanuucuaru naajione*

<sup>14</sup> Jiyaniijia Jesucristoori socua naa cua sequere:

—Laodicea tiacajinia quijia cua seruucuaru quia naajiorejuhuaj, Pueyaso pueya maanu jiitianani. Naa quia sequere nojuaja: “Cua tojiri. Naa sequeryari noo pueyano cana sequesante seetanu rupajanaacuajani. Puetunu na caminiujiushanojuanaa Pueyasojiniji quiarani, cunoori seetanujuanaa. Pueyasoori na shipinitiquiaari puetunu na shipinishano casaajanaa. Cunocujaari janiya. Cunora, cua tojiri. <sup>15</sup> ‘Janiyari puetunu quia miishanojuanaa niishiyani. Quiaari najuhuana quijia, quia miyaquiniuucua cua sequesano. Seetanujuanaa cua tojiyaquiniu panijia quia quishacari, maara socua maninia quiquiaari cutara maja quia niishiniuria janiya. <sup>16</sup> Quiaa jaara cua niishiyashijia quiriqia, janiya maara quiocua taraajereni. Saniniuuja, quiaa jaara seetanujuanaa cua tojjia quiriqia, janiya maara quia timitiaren. Saniniuuja, najuhuana cua pueyano quia quiniuucua, janiyari quia soyani. Naa quia quiniuucuatej, janiyari quera quia sanitioyani. <sup>17</sup> Quiaari tama sequequiaajaacujua: ‘Janiyari casamiriacani. Janiyari puetunu cua panishanojuanaa jiitiaani maninia mijia cua quiniuucua’. Maja cutaraari quia niishiniu quioojiaari cusosu. Janiyara, quiaari tojetaarucujanaa casamijiu, cariyujuaru, juhuasunio. Quiaa jaara na niishiriqia, quiaa maara tama quia cuaqueyajaaja taraajetaja quiriqia. <sup>18</sup> Cunora, janiyari quia numooteyani moseeca pueyanonaa, cua rupaa tojjia quia quiri, seetanujuanaa casamiriaca quia quiniuria. Naajuhuj, maninia mijia quia quiriqia cua cushitiniuria quiajaniya cohuajaque toque, maja cararaatia quia quiniuria juhuasu. Naajuhuj, cua niishitaja quia masere cutara, quioojia namijia riatenura, seetanujuanaa maninia niquijia quia quiniuria. <sup>19</sup> Janiyari puetunu cua panishano pueyajanaa nacasujuani, nojori saniitiojuajuhuj. Cunora, quioojia quia tacatore cucua. Tama quioojiaaja quia shiniujiurijuhuj shamaatia cua tojjia quia quiniuria. <sup>20</sup> Cua tojiri. Janiyari quioojia tiotitujiniji jiiquionuujiyani. Cante cua tojiyani, nojuaja cuara na tiotiu riataara cucuaji. Janiyacu nocua tiuquiumiani, nata cua miaquenura, shuquiriaatia cua pocojonura nata. <sup>21</sup> Janiyari cua Paraca shocotaquiaarini cua Que tojjia cua quiniuucua. Naaratej, cua Queeri cua cajitiquiaari na shuriucua, Jiyaniijajanaa cajitujinia. Naajuhuj, janiyari Sesaaca shocotajaca cajitijionutaniya cua shuriucuan, jiyaniijanucua nojori quiniurijuhuj. <sup>22</sup> Cante numaacani, nojuaja cuara tojiira Pueyaso Sohuanu sequesano Pueyaso pueya maapuera’ ”.

## 4

*Juan niquishacari Jiyocuaaanu Quijiaari maninuhuaqueetasaariquiaa*

<sup>1</sup> Na nuhuaji, janiyari mauquiaarini. Janiyari saaja jiya cajiniocua tiotiu niquiquiaari riatasanoni. Shushajanaa cua tojishano rupaa juhua trompeta jonenenuni, cunorupajaaari cua pacutequiaariuhua sequenu. Naa cua sequereeri:

—Miji quia tacama. Janiyari quia niquitiniutianiyani taa nio pa quishacari nuhuaji mijiria quiniaa miishaanutaniyani.

<sup>2</sup> Jiyacaritij, Pueyaso Sohuanuuri cucua niquiaari. Cua sohuanu tacaniquiaari jiyocuaaanuuri. Janiyari jiyacari Jiyaniijajanaa cajitiu niquiriini. Pueyanoori tii cajiriqiaa.

<sup>3</sup> Nojuajaari shanohua niquishano quiriqiaa, jiyanojua shacantuuca juhua jaspe saajia, jiyanojua naatuucajuhuj, juhua cornalina saajia. Naashiiri na cajitiu caco nujuariqiaa. Jiyanojua shacantuuca quiriqiaari neeruucua, pocojuanaque juhua esmeralda saajia.

<sup>4</sup> Janiyari socua veinticuatro cajitiucua niquirii Jiyaniijajanaa cajitiu shocuan. Tii cajituriqiaari veinticuatro niishijiaa jiyaniijanucua. Cohuajaque toqueya cushiyonuuriqiaari, orojiniji shipinijosano nacaqueyano. <sup>5</sup> Jiyaniijajanaa cajitujiniji, miacanaari nunujuriqiaa. Jiyanojua majacuriqiaajaariuhuj. Jiyaniijajanaa cajitiu tajoji, tii noshiquioriqiaari siete samari. Cunocujaari siete Pueyaso Sohuanu, puetunu tiqiyocujanaa quijia na quiniuucua. <sup>6</sup> Jiyaniijajanaa cajitiu tajoji, juhua jiyanojua puereetuca caminiaari quiriqiaajuhuj, juhua cohuaja motiiquio maatia niquishiyari na tamajiria.

Jiyaniijijajanaa cajishaqui, cuatro saminio casaari quiriquiaajuhua, puetunu na shocujajanaa. Nojoriiri jiyanoehua queraatia namijiaaraca quiriquiaa, na jiriqiaacumaji, na nijiniaacumajinio. <sup>7</sup> Cuno cuatro saminiucua casaari tamaatia niquishano quiriquiaa tamonujiniji. Niquiriyatuuri juhua juurunu sare niquishano quiriquiaa. Tamonuuri juhua seru juunu caya niquishano quiriquiaa. Tamonu casaa jiquiocoori juhua pueyano jiquioco niquishano quiriquiaa. Tamonuuri juhua surohua miooru jaano niquishaariquiaacujua. <sup>8</sup> Puetunu cuno cuatro saminio casaajanaari seis nesuhuaraca quiriquiaa. Puetunu nojori cuaqueyacumajanaa quiriquiaari na namijiaa, nocuaji na niquitiaja, na nijiniara na niquitiajano. Nojoriiri pueyaracaanu Pueyaso maniniuhuaqueetariquiaa, juuca, niucuanio. Majaari nojori tarinitianu quiriquiaa naa na sequetunu:

—¡Jiyaniijijajanaanaa, quiaari saa maniniaja, jiyanoehua maninia, tojetaarucujajanaa maninia miiijia! Quiaacuajaari Pueyaso, puetunu cumaacaracajanaa. Quiaari quijiajuhuanajaj. Majaari quia supueno quiquiaari. Quiaari quia pueyacua tacateriquianohua.

<sup>9</sup> Cuno cuatro saminio casaari naa pueyaracaanu maniniuhuaqueetariquiaa Jiyaniijijajanaa, na cajitujinia cajiyano, pueyaracaanu Jiyaniijijajanaa quiriquiano na quiniucua.

<sup>10</sup> Naa pueyaracaanu cuno cuatro saminio casaa timitiasacari Jiyaniijijajanaacuaatej, cuno veinticuatro niishijiaca jiyaniijianucuaari jaarajaaja mojuquetacooquequiaa Jiyaniijijajanaacuaara. Nojoriiri na tuhuajaa jartaqueequiaa Jiyaniijijajanaa cajituu pajama, naa na sequenuta:

<sup>11</sup> —Niiori quiara, Jiyaniijianaa. Quiaa cutaraari Jiyaniijijajanaa, maja canaa. Quiaacuajaari canaa Pueyaso. Quiaa cuara timitiasaaria pueyaracaanu, jiyanoehua maninia shacantuuca quijia quia quiniucua, puetunu cumaacaracajanaa quia quiniucujuhua. Quiaacuajaari puetunu casaajanaa shipiniquiaari. Tama quia paniniucujajaaja, quiaari na shipiniquiaari.

## 5

### *Rupanacujusano naajioneejiniji pohuatasano, Borrego Niquiojuajinijinio*

<sup>1</sup> Na nuhuaji, janiyari Jiyaniijijajanaa cajitujinia cajinia juaashiquiajinia niquirii naajioneeni. Na miaquetajara na cacariquiaari. Cuno tucuanee naajioneeri jiuicocoso quiriquiaa. Naajioori nocua quiriquiaa, na nijinia, na jiniacumano. Cuno naajioneejinia, siete naajioori tii naajiotasano quiriquiaa. Cuno siete naajio coteejajiniani, juhua roshitia rupanacujutasanoori quiriquiaa. <sup>2</sup> Jiyacaritij, janiyari jiyanoehua cumaacaraca Pueyaso seru niquiriini. Naa nequesoreeriquiaari jiyanoehua na nacanuta:

—¿Cante seetanujanaa maninia miiijia cutarani? Cuno cuara rupartaara rupanacutanasano, na riatanura cuno naajione.

<sup>3</sup> Jiyacaritij, majaari quenaaja maninia miiijia quiniu quiquiaari jiyocuacaanu, jiyajinia, jiya cariquimianio na riatanura cuno jiuicocoso naajione. Tojetaarucujajanaa shaaqui quiquiaariirri cuno naajione serojoriquiano. <sup>4</sup> Naaratej, janiyari jiyanoehua nujuqueriquiaani, tojetaarucujajanaa shaaqui maninia miiijia quiaquiniucua cuno naajio na riatanura, na serojonurano. <sup>5</sup> Cua nujuquesacari, tamonu cuno veinticuatro niishijiaca jiyaniijianucujinijioori cua sequeree:

—Maja nujuquenu. Quia cumantare. Quia niquiri. Pa Jiyaniijijajanaacuaajaari jiyanoehua cumaacaraca. Tariucuaacaanu Pueyaso Rupaajinia, nojuacuajaari miriqui sequeshiya Juurunu sareta, Judá niquiohuacuajinio supueriquiano, Jiyaniijijajanaa na quiniuria na supuetana David niti. Nojuacuajaari pa paraca Satanás shocotana, tojetaarucujajanaa Jiyaniijia Pueyaso tojjia na quiniucua. Naaratej, nojuaja na naata cuno siete naajio coteeja rupanacujutasano rupareetanu na serojosocoriquiano.

<sup>6</sup> Jiyacaritij, janiyari Borrego Niquiojua niquiriini Jiyaniijijajanaa cajituu tacoji nujuano, cuno cuatro saminio casaa tajinianio. Cuno veinticuatro niishijiaca jiyaniijianucuaari na shocua quiriquiaajuhua. Borrego Niquiojuaari seetanujanaa juhua mosano samiitianohua niquishaariquiaa. Nojuajaari siete jiyaniijia tuhuajaaraca quiriquiaa, puetunu cumaacaracajanaa na quiniucua. Naajuhua, siete namijiaaraca quiriquiaari. Cuno na siete namijiaani, cunocuaajaari Pueyaso Sohuanu, Pueyaso jiyaramiquishano

puetunu mijirijanaa. <sup>7</sup> Cua niquishacari, Borrego Niquiojuaari Jiyaniijajanaa cajitijinia cajiyano juaashiquiajiniji jiuniosano naajione masetaree. <sup>8</sup> Nojuaja jaara cuno naajione cacariquiaa tari, cuno cuatro saminió casaari nocuara mojuquetacoquiaari, cuno veinticuatro niishijiaa jiyaniijianucuanio. Puetunu nojorijianaari taquiniojosano casaa jiitariquiaa. Naajuhuj, orojiniji shipinijosano suhuococua mueetacoriquiaari, mishaja shanohua jaanutajata. Nojori mueetacosano shanohua jaanutajani, cunoori nio jiyajiniji Pueyaso muerasu secojonuusano Pueyaso. <sup>9</sup> Nojoriiri Borrego Niquiojua jaaquequetariquiaa nio quiarinio jaaquequejosano:

—Saaja quiajanijari seetanujanaa maninia mijia. Naaratej, quia naata cuno naajione patanu quia rupareetanura na rupanacujusano. Quiaari jyanohua maninia. Naaratej, quiaari jiyajinia quiniaacuara mosaaquiaari. Quiaari quia nanacata pueya masequiaari Pueyasora puetunu tamaatiuucua pueyapuejinijiniojuanaa, puetunu tamaatia rupaa pocuajacajinijiniojuanaa, puetunu tiacajinijiniojuanaa-juhuj, puetunu jiyacajinijiniojuanaano. <sup>10</sup> Quiaari nojori jiyatequiaari tama quia pueyarajaaja, puetunu nojorijianaa quiniuria jiyaniijianucua, pueyacuara secojona, pueyaracaanu nojori maniniuhuaqueetanura pa Pueyaso. Nojoriiri jiyacua jiyaniijianucua quiriquianojuhuaj.

<sup>11</sup> Na nuhuaji janiyari tojetaarucujanaa jyanohua jyanohua queraatia Pueyaso seya niquiriini. Jiyaniijajanaa cajitii shocua mariquiaari, cuno cuatro saminió casaa shocujuhuj, niishijiaa jiyaniijianucua shocuanio. Nojoriiri jyanohua queraatia quiquiaari, juhua jaaquia, serojiaquishoo. Janiyari nojori tojirii pa Jiyaniijia Jesu maniniuhuaqueetaanoni. <sup>12</sup> Nojoriiri naa na sequeturiquiaa na nacanuta:

—¡Pa Jiyaniijiaari jyanohua maninia! Pueyacuara mosaaquiaariiri juhua borrego niquiojua. Naaratej, saaja nojuaja cuaara quiiria Jiyaniijajanaa pueyaracaanura. Saaja nojuaja cuaara jiitiaara puetunu casamijianaa. Saaja nojuajaari tojetaarucujanaa niishijia. Nojuajaari puetunu cumaacaracajanaa. Cuaara naa quiiria pueyaracaanutej. Puetunu quiijiaa casaajanaa cuaara tojitiaara pa Jiyaniijia. Saaja nojuaja cuaara quiiria jyanohua timitiasano. Puetunu quiijiacajanaa cuaara na maniniuhuaqueetaara.

<sup>13</sup> Naajuhuj, janiyari puetunu Pueyaso shipinishano saminió casaajanaa tojiriini, jiyocuacaanu quiijiaa, jiyajinia quiijiaa, jiya cariquimia quiijacajuhuj, shoniniacu camini-ajinia quiijacano. Puetunu nojorijianaari jyanohua na timiniutia sequeturiquiaa:

—¡Cuno, na shacantuuca cumaacajinia cajiyani, Borrego Niquiojuano, nojori cuaara maniniuhuaqueetasaaria pueyaracaanu! ¡Puetunu casaajanaa cuaara tojitiaara nojori pueyaracaanu! ¡Nojori cuaara timitiasariajuhuaj! ¡Saa nojorijia cuaara na cumaaca jiitiaara pueyaracaanura!

<sup>14</sup> Jiyacaritij, cuno cuatro saminió casaari nojori rihuaneriquiaa saniniuujia:

—¡Taaquiririni! ¡Cuaara naa quiiriatej!

Cuno veinticuatro niishijiaa jiyaniijianucuaari saniniuujia mojuquetacoqueecujua cuno pueyaracaanu Quiijacaacuara, nojori na shuquiritianura.

## 6

### *Jiuniosano naajioneecua seis rupanacujutasano rupareetasacari*

<sup>1</sup> Na nuhuaji, cua shootiasacari, Borrego Niquiojuaari coteenujanaa cuno naajione-jinia rupanacutasano rupartaree. Naa miiriiri cua niquitishaanura taa mijiria quiniaa miishaanutaniya jyanohua naquiyani, quera nio jiya puequesacari. Jiyacaritij, janiyari tamonu cuno cuatro saminió casaajinijinio tojirii sequeyanoni: “¡Miji!”. Na pocuanuuri juhua miacana majanu tojishano quiriquiaa. <sup>2</sup> Naa na sequesacaritij, janiyari cohua-johuana caballo niquirii nocua canujyanoni. Na nijinia cajiniaari balista cacariquiaa. Jiyacaritij, jiyaniijiaara shipinishano nacaque cushitishaareeri. Na nuhuaji, na caballoori na netetaaree jiyocua na quianura, tii na miaquejonura Pueyaso paraa. Majaari quenaaja na nujuatasaanu quiniutianiya.

<sup>3</sup> Na nuhuaji, Borrego Niquiojuaari segundo rupanacutasano rupartaree. Janiyari jiyacari segundo saminió casaajinijinio tojirii sequeyanoni: “¡Miji!” <sup>4</sup> Naa na sequesacaritij,

naatuhuana caballoori nocua canujumaa. Na nijinia cajiniaari cumaaca niqutiosaare. Naacuajitij, nojuajaari mijiria quijiaca tojetenutaniya tama nojori miaquetoojonurajaaja. Cunora, nojuajaari puereetunee nijiniaquetucujaja mueruu niqutiosaaree.

<sup>5</sup> Na nuhuaji, Borrego Niquiojuaari tercero rupanacutasano rupartaree. Janiyari jiyacari tercero cuno saminio casaajininio tojirii sequeyanoni: “¡Miji!” Jiyacaritij, janiyari mueruhuana caballo niquirii nocua canujiyanoni. Na nijinia cajiniaari niiquia shanacujutaja jaasutetariquiaa, mijiria quiniaara miajajau shanacujusaanura nojori serotasaanura. <sup>6</sup> Jiyacaritij, janiyari cuno cuatro saminio casaa tajiniji rupaa tojirii naa sequeyanoni:

—Niquiriyatu juuca poonijionu sami, cuaara niqutiosaaria saaja niquiriyatu kilo trigo jajau. Jaara trigo jajau paniyaquiri, cuaara niqutiosaaria tres kilo cebada jajau. Saniniuujia, majaari shiyocua shanacujunu cutara, vinonio. Cunocujajaari queraatia quiniutianiya cutara.

<sup>7</sup> Na nuhuaji, Borrego Niquiojuaari cuarto rupanacutasano rupartaree. Jiyacaritij, janiyari cuarto saminio casaa tojirii naa sequeyanoni: “¡Miji!” <sup>8</sup> Janiyari jiyacari tiirihuana caballo niquirii nocua canujiyanoni. Na nijinia cajinia sesaari quiriquiaa “Cusojuana”. Macunucua Quiquioori na neteyotariquiaa, Cusojuana puecoosano na rijionura na mitiasocoriquiano. Nojoriiri cumaaca niqutiosaaree jiyanohua queraatia pueya na cusojuanura. Naacuajitij, jiyanohua queraatia pueyari puecoosaanutaniya miaquetoojosacari. Tamasacaari cusuunutananiya jiyanohua miaajesacari. Tamasacaari paaqueja cusuunutananiya. Naajuhuj, tamasaari sareya sootesaanutananiya. Sacocua satejosaanutaniyajaariuhuj. Naacuajitij, jiyanohua jiyanohua queraatia pueyari cusojuasaanutananiya. Na nuhuaji, puetunu macunucujanaa jaara serojosaare, puetunu nojorijianaari na cajiniocua quiniutianiya puetunu mijiria quijiaca pueya cajiniocujininiojuanaa.

<sup>9</sup> Na nuhuaji, Borrego Niquiojuaari quinto rupanacutasano rupartaree. Jiyacaritij, janiyari Pueyasoocua catijiasaqui juhuacutu cariquiaco niquirii Pueyaso pueya sohuanuhuni, noo pojori canapuate puecoosaaquiaaricujani Pueyaso Rupaa tojijiaca nojori quiniucua, Jesucristojiniji nojori pohuatanuucujuhuj. <sup>10</sup> Jiyacaritij, nojoriiri naa jiyanohua nacaree:

—¡Jiyaniijianaa! ¡Quiaari saa maninijaja! Quiaari quia sequesano miijia seetanujuanaa. ¿Taa quia tarishiniutianiyaajara canaa puecoosaa quia nequesoreenurani, nojori quia naminiuria canaacua saniniuujia?

<sup>11</sup> Jiyacaritij, puetunu nojorijianaari cohuajaque toqueya niqutiojosaaree. Nojoriiri naa sequesaaaree:

—Socua rupaquijia nia samaaterejaara, Pueyaso saquiriojosano niarta Pueyaso pueyajiininio cuaara puecoosaa nia shiriajaatijia, taa nia puecoosaaquiaaricuaani.

<sup>12</sup> Na nuhuaji, Borrego Niquiojuaari sexto rupanacutasano rupartaree. Jiyacaritij, rijaari jiya jiuuquiujiutiaaree jiyanohua. Janiyari na niquiriquiaani. Pananuuri mueruucara quiquii juhua mueruque toque. Racaari naatuucara quiquii juhua nanaca. <sup>13</sup> Riyari jiya cajiniocujaji totere jiyocua, taa satuna totequiaa jiyanohua paratucaricuaani. <sup>14</sup> Jiya cajiniocuaari shaajequeejuhuj, juhua tucuanee naajioneeri jiuniosaaaree. Shoniacu caminiajinia, puetunu jiya tucuaatijajanaa, puetunu tuhuananuhujuhuj, puetunu cunojuanaari jiyajeetaquee na nujuatusaqui. <sup>15</sup> Nojori puerenuta, mijiria jiyaniijianucuaari raacajinia jamaatiushii, sai tajinia tuhuananuhujiniujuhuj. Naa jamaatiushiijaariuhua noo pojori: pueyacia paaretajaca na cumacatej, soldaduhua jiyaniijianucua, jiyanohua casamiriaca pueya, pueya tojishano pueya, poonitijosano pueyajuhuj, puetunu narta pueyajanaano. Puetunu pueyajanaari naa mashiriquiaa juucua. <sup>16</sup> Nojoriiri tuhuananuhua sequeriquiaa, sainio:

—¡Canaacua nia tiyare canaa nia jamonura cunocujaji, na cajitiujinia cajiya na shacantuuca cumacajiniani! ¡Canaa nia jamojore maja na niqiara canaa quiniuria, naajuhuj, maja Borrego Niquiojua saniitionura canaa, jiyanohua na juaashacari!

<sup>17</sup> Quiarijiacuajaari Pueyaso saniitionu juuca. Jiyanoehua puereeta. ¿Cante na naata na nujuatanuni? Shaaqui.

## 7

*Pueyaso saquiriojosano pueyajiniji pohuatasano, Israel niquiohuacuajinio supueno pueyajinijinio*

<sup>1</sup> Naa cua niquiniu nuhuajitij, janiyari socua cuatro Pueyaso seya niquirii nio jiya shocua nujuatiuyano tuhuaquini, pananu muetasamaji, na tiuquishocora, na muetasamaji na muenecara, na miaquetajariano. Nojoriiri na nujuatusaquiiji paratu tenujuriquiaa maja na piyarononura jiya, shoniniacu caminia, nacuhuanio. <sup>2</sup> Jiyacarijiuhuj, janiyari socua tamonu Pueyaso seru niquirii jiya pajamaji niyanoni. Pueyaso naajio jiriataja casaa cacariquiaari. Nojuajaari narta cuatro Pueyaso seyacua nacaree jiyanoehua, noo pojoriicua canapuate cumaacaraca quiriquiaacuajani nojori sesonura jiya, shoniniacu caminiano. Naa nojori sequereeri:

<sup>3</sup> —¡Cuaara! ¡Maja juhuanojuaja jiya nia sesonu, shoniniacu caminia, nacuhuanio, canaa niojiyaquishacarijia Pueyaso sesa, na pueya jiniji, na niishishaanura nojoriiri Pueyaso pueya!

<sup>4</sup> Janiyari jiyacari tojiriini taa pueyate na jiniji jirioosaareeni. Puetunu supuetana Israel doce niquiohuacuajinio supueno pueyapuejinijinioori ciento cuarenta y cuatro mil pueya jirioosaaree. <sup>5</sup> Naacuajitij, supuetana Judá niquiohuacuajinio supueno pueyajinijinioni, doce mil pueyari jirioosaaree. Supuetana Rubén niquiohuacuajinio supueno pueyajinijinio, doce miljuhuaj. Supuetana Gad niquiohuacuajinio supueno pueyajinijinio, doce miljuhuaj. <sup>6</sup> Supuetana Aser niquiohuacuajinio supueno pueyajinijinio, doce miljuhuaj. Supuetana Neftalí niquiohuacuajinio supueno pueyajinijinio, doce miljuhuaj. Supuetana Manasés niquiohuacuajinio supueno pueyajinijinio, doce miljuhuaj. <sup>7</sup> Supuetana Simeón niquiohuacuajinio supueno pueyajinijinio, doce miljuhuaj. Supuetana Leví niquiohuacuajinio supueno pueyajinijinio, doce miljuhuaj. Supuetana Isacar niquiohuacuajinio supueno pueyajinijinio, doce miljuhuaj. <sup>8</sup> Supuetana Zabulón niquiohuacuajinio supueno pueyajinijinio, doce miljuhuaj. Supuetana José niquiohuacuajinio supueno pueyajinijinio, doce miljuhuaj. Supuetana Benjamín niquiohuacuajinio supueno pueyajinijinio, doce miljuhuaj. Puetunu nio pojorijianaari na jiniji jirioosaaree.

*Cohuajaque toqueya cushitishano pueya maanu*

<sup>9</sup> Naa cua niquitishaanu nuhuajitij, janiyari jiyanoehua queraatia pueya niquirii maanoni juhua tereya. Nojoriiri puetunu nio tiquiyocua jiyacajinijiniojuanaa pueya quiriquiaa, puetunu tamaatiuucua pueyapuejinijiniojuanaano. Quiriquiaaariuhua puetunu tamaatia rupaaca pocuajacajinijiniojuanaa, puetunu tiquiyocua tiacajinijiniojuanaano. Naa tojetaarucujanaa jiyanoehua queraatia nojori quiniuucuatej, majaari na naata serojosaanu quiriquiaa. Nojoriiri Pueyaso shacantuuca cajituu tacoji nujuaturiquiaa, Borrego Niquiojua tacojinio. Puetunu nojorijianaari tucuaqueya cohuajaque toqueyaraca quiriquiaa. Shuquiriaatia nojori quiniuucua, nojoriiri juhua teruhuanajaque niquishano mueetacoriquiaa. <sup>10</sup> Puetunu nojorijianaari naa mariyata sequeriquiaa na nacanuta:

—¡Jiyanoehua maniniaari pa Que Pueyaso, na shacantuuca cajituu jinia cajiyani, Borrego Niquiojuajuhuj. Nojoricuajaari pa jiyanoocuaari, tojetaarucujanaa quiariniora jatanishano pa quiniuria!

<sup>11</sup> Naajuhuj, puetunu Pueyaso seyajanaa, canapuate shacantuuca cajituu shocua nujuaturiquiaacuajani, niishijiaca jiyaniijianucua shocujuhuj, cuno cuatro saminio casaa shocuanio, nojoriiri Pueyasoocuaara jacamaturee nojori timitianura nojuaja. <sup>12</sup> Pueyaso na timitiatusacari, naa sequetureeri:

—¡Taaquiririnij, seetanujuanaacuaj! ¡Canaari pueyaracaanu quia maniniuhuaqueetanu-taniyani! ¡Quiaacuajaari canaa timitiasano! ¡Saaja quiajaniyari seetanujuanaa niishijia cutara! ¡Paacarasho, canaa Pueyasonaa! ¡Quiaa cuaara tojishaaria

pueyaracaanu! ¡Quiaari canaa Jiyaniijajanaa pueyaracaanura! ¡Quiaari puetunu cumaacaracajanaa maninia quia jiitianura quia shipinishano! ¡Cuaara naa quiiria pueyaracaanu, pueyaracaanutej!

<sup>13</sup> Jiyacaritij, tamonu cuno veinticuatro niishijiaca jiyaniijianucujinijiniori cua nequesotaree:

—¿Canapuate cuno pojorini, cohuajaque toqueyaracani? ¿Tejenote nojorini?

<sup>14</sup> Janiyari na riucuaaree saajani:

—Quiaa cutara na niishiya, jiyaniijianaa.

Cua sequereeri:

—Nojoricuaajari jiyajinijinio pueya. Jiyajinia nojori quishacarijia, nojoriiri cuno jiyanohua naquiya miishacari rejeretajaca quiquiaari. Nojori tiuuniuucua Borrego Niquiojuaacua, nojoriiri puetunu sesa nojori miishanojiniji juhua nojori toqueya jeequejoquiaari Borrego Niquiojua nanacajinia. Naacuajitij, nojoriiri cohuajaqueya toqueya cushiyonuya. <sup>15</sup> Naa Pueyaso jiyanooshano pueya nojori quiniuucuatej, nojoriiri Pueyaso cajishaqui tacoji quijiaca. Nojoriiri pueyaracaanu tii Pueyaso Secojoua tiajinia miiquiaa Pueyaso panishano, juuca, niucuanio, nojori timitiasacari nojuaja. Na shacantuuca cumaacajinia cajijiani, nojuajaari na cumaaca teutenutaniya nojori caco, jatiqui na quiniuria nojoritia pueyaracaanu. <sup>16</sup> Naacuajitij, majaari socua nojori miaajenu quiniutianiya, jiyamuenunio. Pananuuri maja socua nojori na catijianu quiniutianiya. Naajuhuaaj, majaari socua nasaatia pananu jartanu nojori niishiniu quiniutianiya. <sup>17</sup> Borrego Niquiojuacuajani, Jiyaniijajanaa cajituujiujajinia cajijiani, nojuajanaari nojori jiitianutaniya juhua tama na borregohuaaja. Nojuajaari nojori rucanejotanutaniya, nojori na raatenura pueya samiitianijia mohuaca pacartajajiniji, pueyaracaanu shuquiriaatia quijiaca nojori quiniuria. Pueyasojuanaacuajaari nojori namijiaaca tujuunutaniya nojori namijiajiniji.

## 8

### *Séptimo rupanacutasanojiniji pohuatasano, shanohua jaanutaja patajajinijinio*

<sup>1</sup> Borrego Niquiojua jaara séptimo rupanacutasano rupartaree, cuno naajionee saacatanura puetunujuanaa, tojetaarucujanaa sanaacara quiquiiri jiyocuacaanu pueyaracaanura. Maja cua niishiniu, media horaruhua. <sup>2</sup> Na nuhuaji, Pueyaso tacoji, janiyari siete Pueyaso seya niquirii nujuatiuyanoni. Nojoriiri jiyacari siete trompeta niquitiojosaaree. <sup>3</sup> Na nuhuaji, socua tamonu Pueyaso seruuri shanohua jaanutaja pataja pamaa, orojiniji shipinishano. Orojiniiji shipinishano Pueyasoocuara catijiaja casaa tacoji nujuaseeri, Jiyaniijajanaa cajituu tacoji. Queraatia shanohua jaanutaja niquitiosaareeri Pueyasoocuara na catijianura. Jaanutajaari catijiasaariquiano puetunu Pueyaso pueya secojonuusanotajanaa, Pueyasoocuara na jaanujunura cuno catijiaja casaajiniji. <sup>4</sup> Naacuajitij, Pueyaso seruuri Pueyaso pueya secojosano tacanirii Pueyasoocuara, shanohua jaanujua najacata. <sup>5</sup> Na nuhuaji, cuno Pueyaso seruuri catijiaja casaajiniji na shanohua jaanutaja pataja mishinirii nishiyata. Jiyanohua na majariataree nio jiyacuaari. Miacanaari ritia nunujuquee. Jiyanohua majacureeri. Jiyanohua cojuatunereeri. Rijiaari jiuquiuiutiareejuhuaaj.

### *Trompetaa jonenejosacari*

<sup>6</sup> Cuno siete Pueyaso seya, trompetaa cacariquiaani, nojoriiri jeecanecoree na trompetaa na jonenenura. <sup>7</sup> Jiyacaritij, niquiriyatu cuno Pueyaso serujinijiniori na trompeta jonenenu coteeree. Jiyacaritij, miacanajaa shiniitijuaacaari, mariyata mani cojitishano nanacata jiyocua jartasaaree. Jiyari quera na cajiniocua cateree, puetunu na nacuhuatajanaa, na jiyasocuatania.

<sup>8</sup> Segundo Pueyaso seruuri na trompeta joneneree. Jiyacaritij, casaa juhua puereetuuca tuhuananu noshiyanoori shoniniacu caminiajinia jataasaaree. Quera shoniniacu caminia cajiniocuaari nanacara quiquii. <sup>9</sup> Puetunu shoniniacu caminiajinia quijiaca casaajanaari, quera na cajiniocua cusuuree. Naajuhuaaj, shoniniacu caminiajinia ruhanetasano puereetuuca buqueyajinijiniori, quera puetunu na cajiniocujanaa sesosaaree.

<sup>10</sup> Tercero Pueyaso seruuri na trompeta jonenerree. Jiyacaritij, puereetuca rijiaari jiyocuacaanuji tiqiii, jiyanoehua nishitiuucua juhua shucuenaja jaamasu noshitishano. Tiyareeri quera na cajiniocua nio jiyacua moocujinia, mijiria cuariyajiniajuhuaj. <sup>11</sup> Cuno rijia sesaari quiriquiaa “Piiquia”. Cunora, tee cuno rijia tiyareeni, puetunu cuno mohuacajanaari piiquiara quiquii. Pueya ratusacari cuno mohuaca, queraatia pueyari saaja cusonuuree.

<sup>12</sup> Cuarto Pueyaso seruuri na trompeta jonenerree. Jiyacaritij, casaari pananuucua pitiaree, racaacua, quera na cajiniocua riyacuanio. Cunora, puetunu mijiria cuhuatajaca casaajanaari quera na cajiniocua sesosano quiquii. Quera na cajiniocuaari ninishiqui quiriquiaa. Cunora, pananuuri maja na cuhuatanu quiriquiaa quera juuca cajiniocua. Naajuhuj, riya, racanio, majaari na cuhuatanu quiriquiaa quera niucua cajiniocua-juhuaj.

<sup>13</sup> Na nuhuaji, janiyari juhua puereetuca surohua miooru niquirii jiya cajiniocuani. Na jaasacari naa nacariquiaa jiyanohuari:

—¡Puereeta, puereeta, puereeta! Seetanujuanaa jiyanoehua puereeta quiniutianiyari jiyacua quijiaca pueyara, jiuujianaraca cureecono Pueyaso seya jaara jonenerree, canapueete joneneyaquiyajaa juhuanujuajacuajani.

## 9

### *Quinto trompeta jonesacari*

<sup>1</sup> Na nuhuaji, quinto Pueyaso seruuri na trompeta jonenerree. Jiyacaritij, janiyari jiyocuacaanuji jiyocua tinio rijia niquiriini. Cuno rijiaari tiotiu riatataja niqitiosaree, puequeetuaju raa na riatanura. <sup>2</sup> Na riatasacari, najacaari nojomaa juhua puereetu- uca cuhuariquia sesacari. Pananu namijia tiomaari. Jiya cajiniocuaari mueruucara quiquiijuhuj. <sup>3</sup> Sequeruuri cuno najacajiniji mueratuuma. Puetunu nio jiyacuajanaa paaquemaari. Sequeruuri cumaaca niqitiosaree nojuaraca na quiniuria juhua turucuaniiinu. <sup>4</sup> Sequeruuri rootasaree maja nojori miaquenura jiyasocua, nacuhua jaamasujuhuaj, puetunu moritajaca jaamasunio. Sequeru cutaraari jiyaramiquishaare puetunu pueyapuejanaa na sojonura, canapueete na jiniji jirioyaquishoo quiriquiaa Pueyaso sesatacuajani. <sup>5</sup> Sequeruuri rootasareejuhuaj, maja nojori cusojuanura pueya. Cinco raca cuaara nojori shocojora cutara, pueyaracaanu sequeru saashi noosacari. Cuno sequeru saashiiri juhua turucuaniiinu saashi noonutaniya.

<sup>6</sup> Naa pueya miishacari naquiya na noonutatej, pueyari cusonu paniniutianiya juucua. Saaja cusoyaquiniutianiyari. Jiyanoehua na shaajenu panishacari juucua, nojoriiri saaja rishiniutianiya, jiyanoehua naquiya nojori miishacari.

<sup>7</sup> Sequeruuri puereeta niquishano quiriquiaa juhua miaquetojonura jeenucuasano caballohua. Sequeruuri casaa jitiariquiaa na nacajinia juhua jiyaniijianucua oro- jiniji shipinijosano nacaqueya. Nojori jiquiocoori juhua pueyano jiquioco niquishano quiriquiaa. <sup>8</sup> Nojoriiri juhua maaji muecacaraca quiriquiaa, tucamuejarujuri. Juhua ju- urunu sare quiacaraca quiriquiaajaariuhuj. <sup>9</sup> Nojori jiriquireeeri cumueeca quiriquiaa juhua turtuco. Nojori jaacuatusacari, na nesuhuari jiyanoehua cojuatuneriquiaa juhua caballohua jayotasacari queraatia rucuanejotaruhua, miaquetojonuucua na netecua- tusacari. <sup>10</sup> Cuno sequeruuri juhua turucuaniiinu nojuacaraca quiriquiaa. Jiyanoehua noonacuracajuhuj. Jaara nojori saare, cunoori quiquiaari nojori na noonura cinco raca. <sup>11</sup> Cuno sequeruuri jiyaniijiaraca quiriquiaa. Nojuajaari Sesaaca seru. Cuno puereeta puequeetuaju raa camarujaariuhuj. Hebreo rupajinia, na sesaari “Abadón”. Griego rupajinia saniniujia “Apolión”. Pueyano rupajinia saniniujia, niiori sequeya “Pueya Puecoona”.

<sup>12</sup> Janiyari naa niqitishaareeni taa coteenujuanaa naquiya miishaanu quiniu- tianiyani, cuno jiuujianaraca naquiya miishocoriquianojiniji. Socua caapiquiiri cureya- jaa na nuhuajiria.

### *Sexto trompeta jonesacari*

<sup>13</sup> Sexto Pueyaso seruuri na trompeta joneneree. Janiyari jiyacari rupaa tojirii pocuaanoni, shanohua jaanutaja catijiaja juhuacutu cuatro tuhuajaa tajiniji, Pueyaso tacoji nujuatajani, orojiniji shipinishanoni. <sup>14</sup> Cua tojishano rupaani, noo sexto Pueyaso seru sequereeri, na trompeta cacariquiaani:

—Cuno cuatro Sesaaca seya quia saacarojore, puereetuuca Eufrates moo shuriucua morojosano quiyani.

<sup>15</sup> Jiyacaritij, cuno cuatro Sesaaca seyari samaacarojosaaree jiyanoehua queraatia pueya nojori puecoonura, quera na cajiniocua puetunu mijiria quiijaca pueyajinijiniojuanaa. Cuno Sesaaca seyari tariucuaaanu naa morojosano quiquiaari, jeenucuasano nojori quiniuria namitia jiyacari nojori cartesaanura, cuno hora, cuno juuca, cuno racara, cuno marijara. <sup>16</sup> Janiyari tojiriini cuno cuatro Sesaaca seya soldadohuari, doscientos millones pueya quiquiaa saa caballohuaracaja.

<sup>17</sup> Janiyari cuno caballohua niquitishaaree juhua cua maquenujiniani, na nijinia cajitunianio. Jiyanoehua tamaatia niquishano quiquiaari. Puetunu nojori jiriqia-cajanaari turtucujiniji shipinijosano casaata mishiquijosano quiquiaa. Cuno, nojori naatiyaquishaanuucuaaji nojori cushiyosano turtuconi, cunoori puereeta niquishano quiquiaa; naatuuca juhua mani, nentuuca juhua jacinto saajia, pocojuanaque juhua azufrejuhuaj. Puetunu cuno caballohua nacacajanaari juhua juurunu sare nacaca niquishaariquiaa. Maniiri nojori rupaamaji rimianacuriquiaa. Najacaari nojonuucuariquiaajuhuj, azufrenio. <sup>18</sup> Cuno jiuujianaraca puereeta casaata quera na cajiniocua puetunu pueyajinijiniojuanaari cusojuasaaree. <sup>19</sup> Naacuajitij, caballohuari cumaaca jiitariquiaa na rupaama, na pitijinijiajuhuaj, nojori puecoonura pueya. Na pitucuaari juhua sacocua niquishano quiquiaa. Juhua sacocua nacacaraca quiquiaajaariuhuj pueya na sajitiajara.

<sup>20</sup> Cureeno pueya, canapuate maja na puecoosaanu quirii cuno jiuujianaraca puereeta casaatani, nojoriiri sesa miiniu tarinitiaaquiriquiaa saaja. Nojoriiri samaruhua seconu tarinitiaaquiriquiaa. Naajuhuj, nojoriiri orojiniji shipinijosano casa shuquiri-tariquiaa Pueyaso niti, platajiniji shipinishano, broncejiniji, saajiajinijijuhuj, macajinijinio. Puetunu cunojuanaa, nojori jiyatesano tama na pueyasohuarajaajani, cunoori maja na niquiniu. Majaari na tojiniu. Majaari na rucuanenujuhuaj. <sup>21</sup> Naajuhuj, majaari pueya tarinitianu quiquiaa narta pueya monu, shimiojonuhuj. Naajuhuj, majaari nojori tarinitianu quiquiaa na camishoo maajipohua numuetucujunu, maajishuriu numuetucujunuhuj. Nohuasejonu tarinitiatuayaquiriquiaajaariuhuj.

## 10

### *Pueyaso seru mueetasano tucanee naajioneeniyajuajiniji pohuatasano*

<sup>1</sup> Na nuhuaji, janiyari socua tamonu jiyanoehua cumaacaraca Pueyaso seru niquirii jiyocuaaanuji roseyanoni. Cohuaja najacajinia cuhuajaatariquiaari. Na nacaacua camarucuteriquiaa naashiiri. Na jiquicoori jiyanoehua shacantuuca quiquiaa juhua pananu. Na cashacucuaari juhua mani niquishano quiquiaa, naatej, taa mani nujuaa na noshishacaritij. <sup>2</sup> Na miaquetajara mueetariquiaa shiitianiyojua naajioneeri, tariucua riatasano. Nio jiyacua nujuaseeri. Na miaquetajara na niohuaca niaree shoniacu caminiaacuaari. Tacujua niaree nio jiyacua saniniuurijia. <sup>3</sup> Nocua na nujuasacari, jiyanoehua nacareeri juhua juurunu sare sariyocuanu. Na nacasacari, siete miacanaari jiyacari majacuree, juhua pueyano pocuanu. <sup>4</sup> Cuno siete miacana pocuanu nuhuaji, janiyari na sequesano naajiotanu paniriquiaa tari juucuanu. Jiyacaritij, janiyari tamonu rupaa tojirii jiyocuaaanuji naa cua sequeyano saajani:

—¡Maja pueya niishitiniu cuno siete miacana sequesano! ¡Maja na naajiotanu! Tama quioojajiniajaaja quia racatare.

<sup>5</sup> Jiyacaritij, Pueyaso seru cua niquishano shoniacu caminiaacua nujuaanoni, nio jiyacuajuhuj, nojuajaari na miaquetajara na juaashiquia shiitioree jiyocuaaanu, see-tanujanaa na sequenura. <sup>6</sup> Naa sequereeri:



—Cuno, pueyaracaanu Quijjani, nojuajaari jiya cajiniocua shipinia, jiya shipinia, shoniniacu caminia shipiniajuhuaj, puetunu tii quijiaca casaajanaa shipiniano. Nojuajaari seetanujanaa naa cua pohuataniya: “Majaari tari na tarishiniu quiniutianiya. <sup>7</sup> Séptimo Pueyaso seru coteesacari jonenenu na trompeta, cuno juucaja, puetunu jiyasohuaja Pueyaso miiniu panishanojuanaari tari tohuatesano quiniutianiya. Naa quiniutianiyari taa na pohuataquiaari na sequenu panishano caminiujiuniaa pueyacua-jani”.

<sup>8</sup> Cua tojishano rupaa jiyocuacaanuji pocuaanoni, socua cua pacuterohua naa sequenuuri:

—Pueyaso seruucua quia quiaare, cuno, shoniniacu caminiaacua nujuaani, jiyacuanio. Nojuaja quia masetasee cuno riatasano naajioneeniyojua, na mueetaani.

<sup>9</sup> Janiyari Pueyaso seruucua quiaareeni. Janiyari na sequeeseeni na naajioneeniyojua na niqutionura janiya. Cua riucuaareeri:

—Jajaa, quia patare. Quia miaquerenoj. Shoqueeca quiniutianiya quia rupaamaari juhua samiyatu. Quia seecojinia jatanutaniya piiquiara saniniuurijia. Cunoori, pueya na saniitiotaja rupaa na quiniuucua.

<sup>10</sup> Janiyari jiyacari cuno naajioneeniyojua pataree Pueyaso seru juaashiquiajinijini. Janiyari na miaquereeni. Seetanujanaa shoqueeca quiriquiaari juhua samiyatu. Cua miasacari, cua seecojinia jatasee piiquiaraari. <sup>11</sup> Jiyacaritij, janiyari naa sequesaaareeni:

—Quiocua Pueyaso sequesano caminiujiurihohua pohuatanu queraatia pueyapue niqiuara, queraatia tamaatia jiyacajinia quiniaa niqiuara, queraatia tamaatia rupaaca pocuajaca niqiuarajuhuj, queraatia jiyaniijianucua niqiuarano.

## 11

### *Caapiqui Pueyaso sequesano caminiujiuniaa miishanojiniji pohuatasano*

<sup>1</sup> Na nuhuaji, janiyari tia shanacujutaja naajua niquitiosaareeni, juhua nataca niqishano. Janiyari naa sequesaaareeni:

—Quiarjia cutara quia quiaare Jerusalén tiacajinia. Tii nujuataja Pueyaso Secojojua tia quia shanacujusee quia shanacujutajata, orojiniji shipinishano shanohua jaanutaja catijianio. Quia serojorejuhuaj puetunu Pueyaso secojonuujuacajanaa tii. <sup>2</sup> Maja cutaraari quia shanacujunu Secojojua tia carijiniacuma. Cunocujaari taucua niquitiosaarucuaa tari. Pueyaso soojeaca taucuaari Pueyaso saquirojosano na tiacarano jiitianutaniya pueyaracaanu, cuarenta y dos raza cuaara na shocojorejaatijia. <sup>3</sup> Janiyari caapiqui cua saquirojosano pueya jiyaronutaniyani, janiyajiniji nojori pohuatanura pueya niqiuara. Nojoriiri janiyajiniji pohuatanutaniya cuaara shocojorejaatijia mil dosciento sesenta juuca. Nojoriiri cocuaque toqueya cushiniutianiya taa pueya cushiyoquiaacuajani nojori taraajesacari.

<sup>4</sup> Cuno caapiqui janiyajiniji pohuatanaani, nojoriiri cuno caapiqui olivo naana, tariucuaaanu Pueyaso Rupaajinia pohuatashiyacuajani. Naajuhuj, nojoriiri cuno caapiqui samari nujuatacojua, Jiyaniijiajanaa tacoji nujuatacojuani. Cuno, nojori Jiyaniijiani, nojuajaari jiya Jiyaniijiajuhuaj. <sup>5</sup> Tamonu jaara sesa miiniu paniri cuno caapiqui pueya, nojoriiri na paraa catijianutaniya nojori rupaamaji mueranacujua manitia, nojori na puecoonura. Nojoriiri saaja naa cusojuanutaniya noo pojori, canapuate nojori miiniu paniya sesa juucuacuajani. <sup>6</sup> Nojori, janiyajiniji pohuatanaani, nojoriiri cumaaca jiitianutaniya maja na nitiniuria maru pueyaracaanu mijiria nojori pohuatasacari Pueyaso rupaa. Naajuhuj, nojoriiri cumaaca jiitianutaniya mohuaca na jataniniuria nanacara. Nojoriiri cumaaca jiitianutaniyajuhuj nojori sesonura jiya puetunu puereeta tamaatia casaatajanaa. Nojoriiri pueyaracaanu naa miijionutaniya nojori panishacari. <sup>7</sup> Nojori jaara janiyajiniji pohuatanu tucuatere, jiyacaritij, puequeetuuj raamaji tohuatariquiano pueresano sacuaraatia Casaani, cunoori nojori paracaaniutianiya. Nojori shocotanutaniyari. Naacuajitij, nojori puecoonutaniya socuaari. <sup>8</sup> Nojori queteeri cuno puereetuuca niishishano tiaca nuucuajinia pojoconutaniya, tee nojori Jiyaniijia mosaaquiaari niyacutesanojinia teetesanoacuajani. Cuno tiacaari miriqui jiyaniquishiya Sodomata, Egiptotanio. <sup>9</sup> Naacuajitij, jiuujianaraca juuca, socua niquriyatuu juuca

cajiniocuano, queraatia tamaatiuucua pueyari nojori quete shootianutaniya. Naa nojori queteya shootianutaniyari queraatia tiquiyocua tiacajinijinio pueya, tamaatiuucua rupaaca pocujaca pueyajuhuj, queraatia tamonu jiyacajinijinio pueyano. Nojori paraari maja na shanacunu quiniutianiya nojori jamojosaanura. <sup>10</sup> Puetunu mijiria quiniaajanaari shuquiritiuniutianiya, macunucua cuno caapiqui Pueyaso sequesano caminiujiunaa quishacari. Pueyari jiyanoehua timiquionutaniya, naquiya nojori miitajaca puecoosaanuucua. Naaratej, mijiria quiijaacari tama na casamijinijiaaja nareja niquitiojotoonutaniya nojori shuquiriniutia.

<sup>11</sup> Naajaa, jiuujianaraca juuca, socua tamonu juuca cajiniocua nuhuaji, Pueyasoori nojori samiitianijiorohua. ¡Nojoriiri na matusaqui saneecuaturohua! Puetunu nojori niquiniaajanaari jiyanoehua shiriiquitiurii. <sup>12</sup> Jiyacaritij, cuno caapiqui Jesucristojiniji pohuatanaari puereetuca rupaa tojitiurii jiyocuacaanuji pocuaano. Naa nojori sequeriquiaari:

—¡Miji nia tacatama!

¡Jiyacaritij, nojoriiri na paraa niquiara tacataquee cohuajajinia jiyocuacaanura! <sup>13</sup> Na paraa shootiasacari nojori, jiyacaritij, rijaari jiyanoehua jiuuquiutiaree. Naa rijia jiuuquiutiasacari, Jerusalén tiacajinia queraatia tiacaari niyarequetaquee. Siete mil pueyari tii cusonuuree. Cureeno pueyari jiyanoehua jiuujiateree Pueyasooeaji. Nojoriiri jiyacari niishirii Jiyocuacaanu Quijaari seetanujuanaa Pueyaso cutara.

<sup>14</sup> Janiyari naa segundo naquiya miiniu niquitishaareejaaniuhuj, taa na nuhuaji na miishaanutaniyacujani. Tercero naquiya miishacariiri quera ritia cuno nuhuajijia quiniutianiya.

#### *Séptimo trompeta joneesacari*

<sup>15</sup> Séptimo Pueyaso seruuri na trompeta joneere. Jiyacaritij, puereetuca rupaa caari jiyocuacaanu tojishaaree. Naa sequeturiquiaari:

—¡Quiarijiani, pa Jiyaniijia Pueyasoori tari jitianutaniya puetunu jiyacua jiyaniijianucua jiiitiasanojuanaa! ¡Nojuajaari pa Jiyaniijia Cristota Jiyaniijianucujanaa quiniutianiya! ¡Nojoricuajaari pueyaracaanu Jiyaniijiajanaa quiriquiano!

<sup>16</sup> Jiyacaritij, cuno veinticuatro niishijaca jiyaniijianucua, shanohua cajitiujinia cajitiuriquiaa Pueyaso tacojini, nojoriiri Pueyasooeacara jacamaturee jiyanoehua na shuquiritianuta nojuaja. <sup>17</sup> Naa sequeturee Pueyasoori:

—¡Paacarasho canaa Jiyaniijianaa! ¡Quiaari puetunu cumaacaracajanaa! ¡Quiaari quijiajuhuanajaj! ¡Quiaari pueyaracaanu quijia! ¡Quiaari tari juhuacatecara quia cumaaca poonijioteree, Jiyaniijiajanaa quia quiniuria pueyaracaanu! <sup>18</sup> Cunora, puetunu jiyacua jiyaniijianucujanaari juaaquiyoa. Naajaa, quiarijaari quia juaashacari cutara. Quiarijaari macunucua quia nequesoreenu juucajuhuj. Saniniuujia, quiaari pueyara quia sequesano caminiujiunaa pueya niquitiojonutaniya nojoririano quia riuriotaca, puetunu quia saquiriojosano pueyajanaajuhuj, puetunu quia timitiajaca pueyajanaano, jiyaniijianucua, narejaca pueyano. Naajuhuj, quiaari jiya sesojuaca pueya shaajanutaniya.

<sup>19</sup> Jiyacarijihuuj, jiyocuacaanu Pueyaso Secojua tiaari riatasaaree. Janiyari Pueyaso Quishaquijianaa niquiriini. Tii matariquiaari Pueyaso caaja, seetanujuanaa na Rupaa-janaa na racataja. Cuno na Rupaari na pueya na jyanootiaja, na tojiyashijia na sanitiotajajuhuj. Jiyacaritij, miacanaari nunujuree. ¡Jiyanoehua majacureeri! ¡Puereetatej, jiyanoehua cojuata! ¡Rijaari jiyacari jiuuquiutiaree! ¡Jiyanoehua queraatia miacanajaa shiniitijiaacari juhua maru totereehuj! ¡Jiyanoehua puereetaari quiriquiaa!

## 12

#### *Miriqui pohuatasano maajijiniji, puereetuca Naaquerujinijihuuj, juhua cohuaniquia niquishano*

<sup>1</sup> Na nuhuaji, pueya jiuujiatenura, casaari jiya cajiniocua niquishaaree. Maajiiri quiriquiaa cuno, cua niquishanoni. Juhua toqueta pananujinia cuhuajaatiariquiaari.

Racaacua nujuariquiaari. Doce riyari na nacaque quiriquiaa. <sup>2</sup> Cuno maajiiri manajaraca quiriquiaa. Nooriquiaari. Cunora na sariyojotariquiaari quera na ranu panishacari. <sup>3</sup> Jiyacaritij, janiyari socua tamonu casaa niqutishaaree jiya cajiniocuani. ¡Pueretuuca Naaqueruuri quiriquiaa, naatuhuana! Juhua cohuaniquia niquishano quiriquiaari. Siete nacacaracaari quiriquiaa, diez tuhuajaaracanio. Jiyaniijianucuaara shipinijosano nacaqueya niqutiacoriquiaari na siete nacacaacua. <sup>4</sup> Cuno naatuhuana Naaqueruuri quera na cajiniocua riyajinijinio nocuara rerecoree jiyocuacaanuji na pitiutia. Nio jiyocua na jacutareeri. Naaqueruuri rariquiano maaji tacoji shanacuriquiaa. ¡Na sashiriquiaari cuara raara, mueya na mianura jaara rasaare! <sup>5</sup> Maajiiri cayaniyoyua raree. Nojuajaari puetunu mijiria quijiaca pueyapuejanaa Jiyaniijijajanaa quiriquiano. Nojuajaari pueyaracaanu na maca mueturiquiano, na tojiyashijiaca na piyotajara. Mueyari na nucua jaariutiasaaree Naaqueruucuaaji. Pueyasoori na shuriucuaara na ririi, tii na cajitiniuria, Jiyaniijia quiriquianoni. <sup>6</sup> Maajiiri saniniuujia cariiquia jiyajinia mashirii, tee Pueyaso jeenucuaquiaari tari nocuaji na quijaracuajani, tii na mianuutesaanurajuhujaj, cuara shocojorejaatijia mil dosciento sesenta juuca.

<sup>7</sup> Na nuhuaji, janiyari Pueyaso seya jiyaniijia Miguel niquirii narta Pueyaso seyatani, cuno naatuhuana Naaquerujuhujaj puetunu na seyatajanaa. Puetunu nojorijianaari puereeta quiaquetooriquiaa jiyocuacaanu. Cuno Naaqueruuri na seyata jyanohua quiaqueriquiaa Pueyaso seya juucua. <sup>8</sup> Naajaa, majaari nojori naata quiriquiaa Pueyaso seya shocotanu. Pueyaso seya paracaaniuucua jyanohua nojori, majaari quiquio quiniu quiriquiaa socua nojoriria jiyocuacaanu. <sup>9</sup> Naacuajitij, cuno Naaqueruuri jiyocuacaanuji taanuusaaree. Nojuacuajaari cuno tariucuaaanu Soconu, Eva sapojoquiaarini. Cuno Sesaaca seque sesaari “Satanás”. Nojuajaari puetunu mijiria quiniaajanaa sapojoquiaa. Pueyaso seya shocotanuucua nojuaja, nojuajaari puetunu na seyatajanaa nio jiyacua quejoosaaree.

<sup>10</sup> Jiyacaritij, janiyari jiyocuacaanu quijiaca queraatia pueya rupaa tojiriini. Juhua niquiriyatu rupaari tojishaariquiaa jatiqui nojori paaretasacari na rupaa. Naa seque-turiquiaari:

—¡Pueyasoori parta Pueyaso pueyacuara Saquiriojotana jataree tari! Nojuajaari pueyaracaanu Pueyaso saquiriojotaja Pueyaso pueyacuara, juuca, niucuanio. Naa pa Paraca jataसानुucuatej, Pueyasoori quiarjia tohuateenutaniya puetunu na sequesanojuanaa na jiyanooshano pueyara. ¡Nojuajaari maninia jiitianutaniya pajaniya, jyanohua na cumaacata! ¡Pa Jiyaniijia Cristoori tari jiyatesaaree Jiyaniijijajanaa na quiniuria! Naa na miishaanuni, cunoori na Que saquiriojosano na quiniuucua. <sup>11</sup> ¡Pueyaso Borrego na quiniuucua, nojuajaari na nanaca shoote-quiaari, tojetaarucuajanaa jiyanooshano pa quiniuria sesa pa miishanojiniji! Naacuajitij, Satanás saquiriojotasacari parta Pueyaso pueyacuara, nojoriiri na sanaajaquiaari nojori tiuuniuucua Jesucristoocua. Nojoriiri na shocotaquiaari-jianaa, nojori pohuatanuucua Jesucristoocua nojori tiuuniujiniji. Nojoriiri maja na puerenu quiija na mosaanura. Nojoriiri seetanujuanaa juhuajaniya tama na cuaqueyajaaja panitiaquiaari nojori mosaanura. <sup>12</sup> ¡Naaratej, jiyocuacaanunaa, shuquiriaatia quia quiri! ¡Naa Sesaaca jataसानुucuatej, nia timiquiore jiy-ocuacaanu quijiacanaa! ¡Niajaniya saniniuujia, jiyacua quijiacanaa, shoniniacu caminiajina quijiacanio, jyanohua nia taraajere! ¡Sesaaca niishishacari maja puera Pueyaso tarishiniu quiniutianiya na saniitionura nojuaja, nojuajaari ni-aacua roseyarucuaa jyanohua na juaanitua!

<sup>13</sup> Cuno puereeta niquishano Naaqueru niishishacari nojuaja tari jataसानुucuatej jiyocua, nojuajaari cuno mueya nucua neteyojotanu coteeree na mianura juucua. <sup>14</sup> Cuno maajiiri querajaa puereetuuca nesu niqutiosaaree saaja, juhua jyanohua puereetuuca surohua miooru nesu. Cuno nesuta, maajiiri na quiquiojiniara jaaree cariiquia jiyajinia, tucuacaanu cuno Naaqueruucuaaji. Tii mianuutesaanutaniya pueyaracaanuuri cuara na shocojorejaatijia jiuujianaraca marijia, socua seis racanio. <sup>15</sup> Jiyacaritij, Naaqueruuri

mohuaca quecaree juhua moo, maaji nuhuaji na saquitiniuria, maaji na jaatinitia-nura juucua. <sup>16</sup> Jiyari maaji naacutaree. Jiyari juhua na rupaa riataree. Naaqueru rupaamaji pojuaretaano moo raturee saajaari. <sup>17</sup> Naaqueruuri jiyamitia maajiicua macaarii jiyanohua. Quiaareeri maajiicujinio supueno pueyata miaquetojonura. Cuno pojoricuajaari Pueyaso rootasano tojitiajaca, canapueye Jesucristoocua nojori tiuuniu seetaashijiacuajani.

<sup>18</sup> Naaqueruuri shoniniacu caminia casaqueyaji nujuasee.

## 13

### *Caapiqui puereeta niquishano Casaajiniji pohuatasano*

<sup>1</sup> Na nuhuaji, janiyari puereeta niquishano Casaa niquirii shoniniacu caminia-jiniji tacaanoni. Siete nacacaraca quiriquiaari, diez nacajaaracano. Puetunu na diez nacajaacua jiitariquiaa jiyaniijianucuara shipinijosano nacaqueyari. Puetunu na nacacaacuajanaa, sesacaari nocua naajiotasano quiriquiaa. Na nacacaacua naajiotasano sesacani, cunoori Pueyaso rerequeteriquiaa, juhua Pueyaso shocotaja na quiniuucua. <sup>2</sup> Janiyara, cuno cua niquishano puereeta niquishano Casaani, cunoori juhua marucatuque sare niquishano quiriquiaa. Na niohuacaari juhua oso niohuaca niquishano quiriquiaa, tucucocua juashococaraca. Na rupaari juhua juurunu sare rupaa quiriquiaajuhuj. Cuno tari cua pohuatasano naatuhuana juhua cohuaniquia niquishano Naaqueruuri na cumaaca na niquitioree. Tama na cajitujiniajaaja na cajitiriiri jiyaniijajanaa na quiniuria jiyacua. <sup>3</sup> Cuno puereeta niquishano Casaa siete nacacaracani, niquiriyatu na nacacajinijinoori pishano quiriquiaa na mosaanura juucua. ¡Cuno puereetuca piyashi na nacaacua quiriquiaani, saaja cushiriquiri! Puetunu mijiria quiniaa pueyajanaari jiuujiateree na cushiriishacariuhua. Cunora, puetunu nojorijianaari cuno puereeta Casaa tojijiacara quirii. <sup>4</sup> Jiyacaritij, mijiria quiniaa pueyari cuno naatuhuana Naaqueruucua jacamaturee juhua Pueyasoocua, cuno puereeta niquishano Casaa na jiyatenuucua nojori jiyaniijajanaa na quiniuria. Pueyari cuno siete nacacaraca puereeta niquishano Casaacua jacamatureejuhuj. Nojoriiri naa sequetooree tamajaaja:

—Maja socua tamonu jiyaniijia quiniu juhua nio pa jiyaniijia. ¿Tamonu jiyaniijiateeri cumaacaraca, nata na miaquetojonura? Shaaqui.

<sup>5</sup> Jiyacaritij, cuno naatuhuana Naaqueruuri cuno siete nacacaraca puereeta niquishano Casaa niishitiojoree sacuaraatia na rimiaaquenura Pueyasoocua, Pueyaso na rerequetenurajuhuj. Naa miiriiri na jyanishacari nojuajaari socua maninia quijia Pueyasojiniji. Naajaa, nojuajaari jiyaniijia jiyatesaaree saaja cuarenta y dos racara. <sup>6</sup> Naacuajitij, cuno puereeta niquishano Casaari Pueyaso rerequetenu coteeree. Pueyasoocua rimiaaquereeri. Jesuucua tiuujica pueya sesacareejaariuhuj, jiyocuacaanu Pueyaso quiquionio. <sup>7</sup> Mijiria quijica Pueyaso saquiriojosano pueya paracaatishaareejaariuhuj. Cumaquishaareejaariuhuj Pueyaso pueya na shocotanura. Cumaaca niquitiosaareejaariuhuj jiyaniijajanaa na quiniuria, puetunu tamaatiuucua pueyapuejanaa na jitianura, puetunu tiquiyocua tiacajinijinio pueyajanaa, puetunu tamaatia rupaaca pocuajaca pueyajuhuj, puetunu tamonu jiyacajiniajanaa quijiacano. <sup>8</sup> Naacuajitij, puetunu mijiria quijica pueyajanaari cuno puereeta niquishano Casaacua jacamaturee na shuquiritianura nojuaja, nojori pueyaso na quiniuucua. Cuno pojoriiri maja Pueyaso saquiriojosano pueya. Naaratej, jiya shipinishaanujiniji, nojori sesacaari maja na naajiotasaanu quiquiaari Borrego Niquiojua jitianasano naajioneejinia, cante pocuara mosaaquiaaricuajani. Pueyaso muerasu sesaca cutaraari cuno naajioneejinia naajiotasaaquiaari jiya shipinishaacarijiyoyua, pueyaracaanu rishijiaca pa quiniuria.

<sup>9</sup> Cante numaacani, nojuaja cuara tojiiria nio: <sup>10</sup> “Cante Pueyaso jiyatesano quiaso-coriqianoni, nojuajaari seetanujanaa quiasano pueyano quiniutianiya. Naajuhuj, cante nijiniaquetucujaja mueruuta mosocoriqianoni, seetanujanaa naa mosaanutaniyari”. Naaratej, Pueyaso pueya cuara puetunu casaajanaa rejeretajaca quiiria, seetanujanaa nojori tiuushacari Pueyasoocua.

<sup>11</sup> Na nuhuaji, janiyari tamonu puereeta niquishano Casaa niquirii jiyajiniji mue-taanoni. Caapiqui nacajaraca quiriquiaari, juhua borrego niquiojua nacajaa niquishano. Juhua cumaacaraca jiyaniijia na rupaa paaretariquiaari. <sup>12</sup> Jiyanohua cumaacaraca quiriquiaari, juhua narta puereeta niquishano Casaa, teyano naca pishanotucujaja cushiriiriohuani. Nojuajaari na naca cushiriiniohua narta puereeta niquishano Casaa naacuriquiaa. Naacuajitij, nojuajaari puetunu mijiria quiniaa pueyajanaa mojoquetani-jioree juhua Pueyasooacara, nojori timitianura na naca pishano cushiriiniohua puereeta niquishano Casaa. <sup>13</sup> Naajuhuj, nojuajaari na cumaacata miiri jiyajeneta casaa pueya jiuujiatenura nocuaji. Jiyanohua cumaacaraca na quiniuucua, pueya niquiara, nojuajaari mani tinirii jiyocuaanuji jiyocua. <sup>14</sup> Naa na cumaacata na miiniuucua cuno na naca cushiriiniohua puereeta niquishano Casaa tacojitij, puetunu mijiria quiniaa pueyajanaa sapojoreeri. Naacuajitij, nojuajaari pueya shipinitirii casaa. Juhua cuno siete nacacaraca puereeta niquishano Casaari quiriquiaa, teyanote na nacajinia mueruuta pishano na quishacari samiitiarohua saajacuajani. <sup>15</sup> Jiyacaritij, nojuajaari cumaaca niquitiosaaree pueya shipinishano Casaa na jiyatenura saminiora, pocujara na quiniuria, nocuara jacamatiuyashijiaca na puecootenurajuhuj. <sup>16</sup> Naajuhuj, cuno caapiqui nacajaraca puereeta niquishano Casaari na pueya sequeree nojori naajiotanura puetunu puey-acuajanaa narta puereeta niquishano Casaa sesa. Naajiotasaareeri nojori miaquetaja juaashiquiaacua. Jaara nojori juaashiquiaacua naajiotaaquishaare, nojori jiniji naajio-tasaareeri. Naacuajitij, puetunu mijiria quiniaa pueyacuajanaa naa naajiotasaareeri, tojyaquishoo pueyacu, tojishano pueyacu, casamiriaca pueyacu, casamiijiuniucua pueyacu, tama nojoriria poonijionuujuacajaaja pueyacuajuhuj, poonijioteseano puey-acuano. <sup>17</sup> Jiyacaritij, canaputee cuno puereeta niquishano Casaa sesa naajiotasano jiitiaaquiriquiaa na cuaqueyacuani, nojoriiri maja na naata na panishano masenu quiriquiaa na cumaneecata. Naajuhuj, majaari nojori naata na casami niquitiojonu quiriquiaa na cumaneecara. Pueya jaara cuno puereeta niquishano Casaa sesa jiitiaaquiri naajiotasano na cuaqueyacu, na naata na sesa número jiitianu nocua naajiotasano.

<sup>18</sup> Nio niishishaanura maninia, jiyanohua niishitiajaari panishiya cutara. Niishijiaca pueya cuaara serojoora puereeta niquishano Casaa sesa número. Na númeroori pueyano sesa número. Cuno númeroori seisciento sesenta y seis. ¡Cunora pueyanaa, tama nia cuaqueyajaaja nia cojuare maja cuno puereeta niquishano Casaa sesa naajiotasaanura niaacuajuhuj!

## 14

### *Borrego Niquiojua cojiniiaajiniji pohuatasano*

<sup>1</sup> Na nuhuaji, janiyari Borrego Niquiojua niquiriini, Sión tuhuananuucua nujuaano. Ciento cuarenta y cuatro mil pueyari na cojiriquiaa. Borrego Niquiojua sesaari naajiotasano quiriquiaa puetunu nojori jinijijianaa, na Que Pueyaso sesajuhuj. <sup>2</sup> Na nuhuaji, janiyari casaa tojirii juhua sararajua cojuatuneyano jiyocuaanujini, juhua miacana majacuyano, juhua queraatia pueya arpa taquinionuyanojuhuaj. <sup>3</sup> Cua to-jishanoori quiarinio jaaquequejosano quiriquiaa. Jaaquequenuunaari Pueyaso cajitiu tacoji jaaquequenuuriquiaa, cuno cuatro saminio casaa tacojijuhuj, cuno veinticu-atro niishijiaca jiyaniijianucua tacojinio. Majaari quenaaja tamonu naata quiriquiaa cuno jaaquequejosano niishiniu nojori jaaquequejonurajuhuj. Saaja cuno ciento cuarenta y cuatro mil pueya cutaraari cuno jaaquequejosano niishiriquiaa. Cuno pojoricuajaari mijiria quiniaajinijinio saquiriojosaaquiaari Pueyaso pueya nojori quini-uria. <sup>4</sup> Nojoriiri tojetaarucujanaa maaji numuetuqueyashijiaca quiquiaari, saaja pocuaji Tacunaacua jiaatiajaca nojori quiniuucua. Naaratej, tiquiyocua Borrego Niquiojua rucuanajosacari, nojoriiri pueyaracaanu na cojiquiaa. Nojoriiri saquiriojosaaquiaari mijiria quiniaa pueyajinijinio, saaja Pueyasora nojori quiniuria, Borrego Niquiojuara nojori quiniurajuhuj. Nojoriiri socua Pueyaso timitiasano pueya puetunu Pueyaso saquiriojosano pueyajinijiojuanaa, taa pa shuqiritiaa shushajanaa pa carojosano pa

nataujinijicuaani. <sup>5</sup> Nojoriiri tojetaarucujanaa sapojonu niishiyashijiaca quiquiaari, tojetaarucujanaa sesa miyashijiaca nojori quiniuucua.

*Jiuujianaraca Pueyaso seya pohuatasano*

<sup>6</sup> Na nuhuaji, janiyari tamonu Pueyaso seru niquirii jiya cajiniocua jaanoni. Jaariquiaari mijiria quijiaca pueya niquiara na pohuatanura Pueyaso Rupaa, puetunu jiyacajinia quiniaa pueyarajanaa, puetunu tamaatiuucua pueyapuerajanaa, puetunu tamaatia rupaaca pocuajaca pueyarajanaajuhuj, puetunu tiquiyocua tiacajinia quijiaca pueyarajanaanio. Na pohuatasanoori seetanu rupaajanaa pueyaracaanura. <sup>7</sup> Pueyaso seruuri mijiria quiniaa pueyacua nacariquiaa naatej:

—¡Pueyaso puerejaca nia quiriquia! ¡Nojuaja nia maniniuhuaqueetare! ¡Quiarijiaari na nequesoreesacari pueya! ¡Nocuara nia mojuquetacore nia shuquiritianura nojuaja! ¡Nojuacuajaari jiyocuacaanu shipinina, nio jiya, puereetuca shoniniacu caminiajuhuaj, puetunu samocua nacaca pacartacojuacajanaanio!

<sup>8</sup> Jiyacaritij, tamonu Pueyaso seruuri narta Pueyaso seru nuhuajimiaajuhuj. Naa miriqui sequeriquiaa Roma tiacajinijiri:

—¡Babilonia tiaca tari saniitioshiya! ¡Cuno puereetuca tiaca tari saniitioshiya! Babilonia tiacaari puetunu jiyacajinia pueyajanaa niishitiojua, sacuaraatia nojori miiniuria juhua nojuajuhuj. Babilonia tiacani, nojuajaari puetunu sesa casaa na miijosanotajanaa juhua mashaasequetejoquiaari puetunu mijiria quijiacajanaa. Naacuajitij, puetunu pueyajanaari tama na cuaqueya miiniu panishanojuaaja miijiacara quiquiaari, jyanohua nojori jiaatianuta sacuaraatia casaa na miiniuria, taa Babilonia tiacajinia quiniaa miijioquiaacuaani.

<sup>9</sup> Na nuhuaji, socua tamonu Pueyaso seruuri narta caapiqui na puetanaa Pueyaso seya nuhuajimiaajuhuj. Mijiria quiniaa pueyacua nacaree naari:

—¡Jyanohua puereeta quiniutianiyari noo pojoriria, canapuate cuno puereeta niquishano na naca pishano cushiriinohua Casaacuara mojuquetacojua juhua Pueya-soocuarani! ¡Jyanohua puereeta quiniutianiyari noo pojoririajuhuaj, canapuate juhua na naca cushiriinohua niquishano shipinishano Casaacuara jacamatujuacani! ¡Naajuhuj, puereeta quiniutianiyari noo pojoriria, canapuate na cuaqueya tarinitiajacani, cuno puereeta niquishano Casaa sesa naajiotasaanura nojori jinijini, nojori juaashiquiaacua soj! <sup>10</sup> ¡Pueyasoori puetunu cuno pueyajanaa saniitionutaniya jyanohua na juaaniutia! ¡Majaari quenaaja Pueyaso jiuujiaaniu quiniutianiya nojori! ¡Pueyaso seya niquiara, Borrego Niquiojua niquiarajuhuj, nojoriiri pueyaracaanu naquiya miishaanutaniya manitia, azufretanio! <sup>11</sup> ¡Naa Pueyaso miitiasacari nojoritij, najacaari pueyaracaanu nojonutaniya! ¡Majaari quenaaja nojori samaraatasaanu quiniutianiya juuca, niucuanio! ¡Naquiya miiniuuri naa nojori miitianutaniya pueyaracaanu! ¡Naa miishaanutaniyari cuno pojori, canapuate na naca pishano cushiriinohua puereeta niquishano Casaacuara jacamatujuaca juhua Pueyasooocuarani, juhua nojuaja niquishano shipinishano Casaacuarajuhuj! ¡Naa miishaanutaniyaariuhuj noo pojori, canapuate cuno puereeta niquishano Casaa sesa naajiotaniniutianiya tama nocuajaajani!

<sup>12</sup> Cunora, Pueyaso saquiriojosano pueyani, canapuate na rootasano tojitiajacani, Jesuucua tiuuniu tarinitiaashijiacajuhuj, nojori cuara juhuajaniya rejeretaara naquiya nojori miishacari.

<sup>13</sup> Jiyacaritij, janiyari rupaa tojirii jiyocuacaanuji naa cua sequeyanoni:

—Nio quia naajiotare: “¡Quiarijiani, jyanohua shuquiriaatia quijiaca cutaraari cuno macunucua, canapuate tariucua Jiyaniijia Jesucristoocua tiuujiaa cusonuunutaniyani!” Pueyaso Sohuanuuri naa sequeyajuhuj: “¡Taaquiriirini! Nojoriiri samaateya, pueyaracaanu na Jiyaniijia na poonijionuunu nuhuaji. Maninia nojori miishanocujaari niyetaaquishaanutaniya. Cunora, nojoriiri maninia miishaanutaniya”.

*Pueyaso seya senoosacari pueya juhua nataacuaca nio jiyajiniji*

<sup>14</sup> Na nuhuaji, janiyari cohuaja najaca niquiriini. Cuno cohuaja najaca caco cajiniaari juhua Pueyaso Niyanu niquishano quiriquiaa. Jiyaniijara shipinishano nacaque cushitiriqiaari, orojiniji shipinishano. Nataacuaca na senootajara shamaticuaja jacatunee mueruu mueturiquiaari. <sup>15</sup> Jiyacaritij, tamonu Pueyaso seruuri Pueyaso Quishaquiji tohuatamaa. Cohuaja najaca caco cajianoocua nacaree jiyanohuari. Naa na sequereeri:

—¡Quia mueruuta quia canuujure, nataacuaca quia senoonura! ¡Jiyajinia nataacuacajuajaari tari noshuriujua! ¡Cuaara quiarijia senoosaria!

<sup>16</sup> Jiyacaritij, cohuaja najaca caco cajianoori na jacatunee mueruuta canuujuree jiya caco. Nataacuaca senooreeri. Cuno nataacuacaari Pueyaso pueyacuaja. Nojoriiri naa rijiosaanutaniya jiyocuacaanu.

<sup>17</sup> Jiyacaritij, socua tamonu Pueyaso seruuri tohuatamaa jiyocuacaanu Pueyaso Quishaquiji. Nojuajaari shamaticuaja jacatunee mueruu mueturiquiaajuhuj. <sup>18</sup> Na nuhuaji, socua tamonu Pueyaso seruuri tohuatamaa Pueyasooacara catijiaja casaajiniji. Nojuajaari mani camaru. Nojuajaari narta Pueyaso seruucua nacaree, shamaticuaja mueruu muetuyanoocua. Na sequereeri:

—¡Quia shamaticuaja mueruuta uva quia carojotare, jiyajinia moritiaconuni! ¡Tari noshuriujuacuaja!

<sup>19</sup> Jiyacaritij, Pueyaso seruuri uva carojotaree na mueruuta, puetunu nio jiyajinia cuhuariquiacajinijianaa. Uva jaapuejoree saajiajinia quejasano puereetuca surocohuamaari. Pueyasoori tii na rapijiotenutaniya jiyanohua na juaaniutia. Cuno uvani, nojoriiri Pueyaso ruuretajaca pueyacuaja. <sup>20</sup> Cuno uvaari rapijiosaaree tucuacaanu naata tiacajiniji. Uva rapijiosaquiji, nanacaari tojetaarucujanaa jaateriquiaa juhua mohuaca. Jiyanohua nanaca quiniucua, cabollohua rupaacuma puecariqiaari. Pueyaso tojiyashijia pueya nanacaari jiyanohua tucuacaanu jaateree juhua moo. Tresciento kilómetro jaatereeri.

## 15

### *Siete Pueyaso seya, siete naquiya miitiaja na mueetacosacari*

<sup>1</sup> Na nuhuaji, janiyari jiya cajiniocua socua niqutishaareeni, cua niishiniuria taa mijiria quiniaa saniitiosaanu tucuatasaanutaniyani. Cua niquishanoori jiyanohua puereeta quiriquiaa. Janiyari nocuaji jiuujiatereeni. Janiyari siete Pueyaso seya niquiriini. Siete Pueyaso naquiya miitiaja mueetacoriqiaari. Pueyaso jaara cuno siete casaata naquiya miitiri pueya, nojuajaari cunota na juaaniu tucuatanutaniya puetunujuanaa.

<sup>2</sup> Janiyari casaa niquiriijiaaniuhuj juhua puereetuca caminia motiiquiojiniji shipinishano. Manitia cojitishanoori quiriquiaa. Pueyari cuno caminia shocua nujuaturiquiaa. Nojoriiri noo pojori quiriquiaacuaja, canapuate na naca pishano cushiriinohua Casaa shocotaquiaaricujani, juhua nojuaja niquishano shipinishano Casaajuhuj. Naajuhuj, nojoriiri maja na shanacunu quiquiaari cuno Casaa sesa naajiotasaanura nojoriicua. Puetunu nojorijianaari Pueyaso niqutiojosano arpaa taquinionuuriqiaa. <sup>3</sup> Nojoriiri Pueyaso seru Moisés jaaquequejosano jaaquequenuuriqiaa, Borrego Niquiojua jaaquequejosanonio. Nojoriiri naa jaaquequenuuriqiaa:

—Jiyaniijianaa, puetunu quia miishanojuanaari jiyanohua maninia, nocuaji jiuujiatasano. ¡Quiaari seetanujuanaa puetunu cumaacaracajanaa! Casaa quia miishacari, quiaari maninia na miiquiaa. Majaari quenaaja quia jiyajenenu. Quiaacuajaari puetunu jiyacajinia quijia pueya Jiyaniijajanaa. <sup>4</sup> ¡Quiaari pueresano, Jiyaniijianaa! ¡Quiaari tojetaarucujanaa maninihuaqueetasano seetanujuanaa! ¡Saaja quiajaniya cutaraari tojetaarucujanaa maninia miiija pueyaracaanu! Naaratej, puetunu jiyacajinijinio pueyajanaari quiocua nijionutaniya nojori shuquiritianura quiajaniya, maninia quia saniitiojonuucua quia paraajuhuj.

<sup>5</sup> Naa cua tojinu nuhuajitij, janiyari jiyocuacaanu Pueyaso Quishaquijianaa niquiriiriateyanoni, tee cuniqui seetanu Pueyaso rupaajanaa racatasano quiyacuajani. <sup>6</sup> Cua niquishacari, cuno siete Pueyaso seyari Pueyaso Quishaquijijianaa tohuareetariqiaa,

canapuate cuno siete naquiya miitiaja patootariquiaacuajani. Nojoriiri tojetaarucua-janaa cohuaja linojiniji toqueyaraca quiriquiaa, shacantuqueya. Nojoriiri orojiniji shipinijosano casaa na jiriquiacajinia camarucuteriquiaa. <sup>7</sup>Jiyacaritij, niquiriyatu cuno cuatro saminio casaajinijinoori miacojua niquitiojoree puetunu cuno siete Pueyaso seyajanaa. Cuno miacojuaari orojiniji shipinijosano quiriquiaa. Pueyaracaanu rishijia Pueyaso juaaquiatacata mishinijosano quiriquiaari. <sup>8</sup>Jiyacaritij, Pueyaso Quishaquijianaari maatia najacata mishiquimaa. Cunora, majaari tamonu na naata Pueyaso Quishaqui tiuquiniu quiriquiaa, cuno siete Pueyaso seya cuaara puecaarajaatijia naquiya nojori miitajaca pueya. Cuno najacaari Pueyaso shacantuuca cumaacajiniji quiriquiaa, naa na saniitiojosacari na paraa.

## 16

### *Saniitionujiniji pohuatasano*

<sup>1</sup> Jiyacaritij, janiyari tamonu rupaa tojirii Pueyaso Quishaquiji nacaanoni. Naa cuno siete Pueyaso seya sequereeri:

—¡Nia siete miacojuajiniji Pueyaso juaaquiaca nia taroosee jiyocua!

<sup>2</sup> Niquiriyatu Pueyaso seruuri juhuacatecara coteeree. Quiaareeri. Na miacojuajiniji jaapuesee jiyocuaari. Jiyacaritij, jyanohua nootuuca sapueyari pueyacua supueree. Noo pueyacua supuereeri, canapuate nocua naajiotasano jiitariquiaa na naca pishano cushiriinohua puereeta niquishano Casaa sesacuajani. Sapueyaraca pueyari cuno puereeta niquishano shipinishano Casaacuara jacamatujuaca quiriquiaajuhua. Jyanohua nootujuaaca sapueyari quiriquiaa.

<sup>3</sup> Segundo Pueyaso seruuri na miacojuajiniji Pueyaso juaaquiaca jaapuesee puereetucua shoniacu caminiajinia. Mohuacaari puetunu nanacara quiqiiijianaa, juhua shusha mosano pueyano nanaca. Cunora, puetunu shoniacu caminiajinia quijia casaajanaari cusonuuree.

<sup>4</sup> Tercero Pueyaso seruuri miacojuajiniji Pueyaso juaaquiaca jaapuesee puetunu moocujinijianaa, puetunu samocua nacaca pacartacojuacajinijianaano. Jiyacaritij, nanacara jataquee puetunujuaanari. <sup>5</sup> Cuno nuhuaji, janiyari mohuaca camaru Pueyaso seru tojirii naa Pueyaso sequeyanoni:

—Pueyasonaa, quiaari quijiajuhuanajaj. Majaari quia supuenu quiqiiiaari. Quiaari tojetaarucujanaa maninia. Naa quia miitiasacari quia tojitiaashijiacatej, quiaari seetanujuaanaa maninia namirii nojori. <sup>6</sup> Nojoricuajaari quia saquiriojosano pueyajinijinio nanaca shootejoquiiaari pueyaracaanu, quia sequesano caminiujinianaa nanacanio. Quiarjia saniniuujia, naa miijiaca nojori quiniuucuatej, quiaari nojori raatejoree nanaca. ¡Maniniacuaja Jiyaniijianaa!

<sup>7</sup> Jiyacaritij, janiyari Pueyasoocuaa catijiaja casaa tojirii juhua pueyano pocuaanoni. Naa sequeriquiaa Pueyasoori:

—Taaquiririni Jiyaniijianaa, puetunu cumaacaracajanaa Pueyasonaa. Quiaacuajaari maninia saniitioeree quia tojiyashijia, taa quia sequequiaari tariucuaanu nojoricuajani, quiaari quia tojiyashijia saniitionutaniya. Quiaari seetanujuaanaa sequequiaari quia miishocoriquiano. Quiaari puetunu sesa nojori miishanojuanaa niishijia.

<sup>8</sup> Na nuhuaji, cuarto Pueyaso seruuri miacojuajiniji Pueyaso juaaquiaca jaapuesee pananuucua. Naacuajitij, pananuuri socua jyanohua naseecara quiqii, pueya na catijianura juhua mani. <sup>9</sup> Naa pananu januuca jyanohua nasaatiatej, pueyari jyanohua cateree. Nojoriiri Pueyaso sesacaree saaja, cumaacaraca na quiniuucua, naa nojori na saniitionuucuatej. Majaari quenaaja nojori pishiniu quirii sesa nojori miiniujiniji, nojori tacatonuhuaa noojia Pueyasoocua, nojori jiyaniijiaara nojori jiyatenura Pueyaso. Pueyaso rerequeteturee saajaari.

<sup>10</sup> Na nuhuaji, quinto Pueyaso seruuri miacojuajiniji Pueyaso juaaquiaca jaapuesee. Na naca pishano cushiriinohua puereeta niquishano Casaa cajishaqui na jaapueseeri, tee cuniqui juhua jiyaniijianaa na cajiriquiaacuajani. ¡Jiyacaritij, puetunu na jiitiasano jiyacajanaari ninishiquiria quiqii! Cunora, na pueyari na niti saaquioriquiaa jyanohua nooeta naquiya na miiquiosacari. <sup>11</sup> Naa Pueyaso saniitiosacari nojoritij, naajaa,



majaari nojori pishiniu quiriquiaa sesa nojori miiniujiniji. Nojori nootunenuucua, nojoriiri jiyocuacaanu quijia Pueyaso sesacaree saaja, nootujuaaca sapueyaraca nojori quiniuucujuhuj.

<sup>12</sup> Cuno nuhuaji, sexto Pueyaso seruuri miacojuajiniji Pueyaso juaaquiaca jaapuesee cuno puereetuca Eufrates moojinia. Moori joojequetaquee jiya pajamaji niriquiano jiyaniijianucua niuutiajara.

<sup>13</sup> Jiyacarijuhuaj, janiyari jiuujianaraca samaruhua niquiriini, juhua sacarohua niquishano. Cuno samaruhuari tohuareetariquiaa juhua cohuaniquia niquishano naatuhuaana Naaqueru rupaamaji. Tohuareetariquiaaajaariuhua na naca pishano cushiri-iniohua puereeta niquishano Casaa rupaamaji, narta puereeta niquishano Casaa rupaa-majinio. Cuno puereeta niquishano Casaari mijiria quiniaa pueya sapojoriquiaacuaja, nojori tojiniuria na naca pishano cushiriinohua puereeta niquishano Casaa. <sup>14</sup> Cuno jiuujianaraca samaruhuari cumaacaraca quiriquiaa, na cumaacata nojori miiniuria nocuaji jiuujiatesano casaa, pueya tiuuniuria nojori sequesanoocua. Nojoriiri naa miiriquiaatej, puetunu mijiria jiyaniijianucujanaa nojori rerejotenura. Jiyaniijianucuaari naa rerejotesaaree nojori miaquetoojonura puetunu cumaacaracajanaa quijia Pueyasota. Pueyasocuajaari tariucuaaanu niishiriojoquiaari naa cuno juuca na miaquetoojonura nojoritia. Naa paniquiaaricujajaari na paraa na puecoonura.

<sup>15</sup> Jiyacaritij, janiyari pa Jiyaniijiajanaa tojirii naa sequeyanoni:

—Cua tojitiare cua pueyanaa. Janiyari canashiyaquiji tiuquiniutianiuhuaani nia niishiyaquishacari. Janiyari naa niaacua tiuquiniutianiuhuaani taa nohuasejojua tiuquiquiaa casami nohuasenuucuaacuaani, juhuajaniya casami camaru quishacari. Shuquiriaatia quijia cutaraari noo pueyano, cante juhua suteja quiquiaani, pueyara-caanu na secojosacari, na sashishacari janiya. Tojetaarucujanaa sesa miyaquijia nia quiri, niaa mariqui cua tiuquishacariuhua cararaatia juhua juhuasunucua quiri cua niqiaraari.

<sup>16</sup> Cua Jiyaniijia sequesano cua tojiniu nuhuaji, janiyari cuno samaruhua niquirii mijiria jiyaniijianucua rerejoteyanoni. Hebreo rupaajinia, nojori rerejosaqui sesaari, “Armagedón”.

<sup>17</sup> Séptimo Pueyaso seruuri miacojuajiniji Pueyaso juaaquiaca jaapuesee paratujinia. Jiyacaritij, jiyocuacaanu Pueyaso Quishaquijianaa Jiyaniijia cajitiujiniji, janiyari rupaa tojirii naa nacaanoni:

—¡Tari miishaaree puetunujuanaacuaja!

<sup>18</sup> Jiyacaritij, miacanaari nunujuree. ¡Jiyanohua majacureeri! Cojuataari quiriquiaa puereeta. Rijiaari tojetaarucujanaa jiyanohua jiuuquiujutiaree. Pueyano shipin-ishaanujiniji, majaari naa rijia jiuuquiujutiianu quijia juhua nio rijia. <sup>19</sup> ¡Naa rijia jiuuquiujutiianucua jiyanohuatej, cuno puereetuca tiacaari neequeresetaquee! Jiuujianaracara raqitiiijiquiri. Puetunu jiyacajinia tiacajanaari niyarequetaree. Jiyacaritij, Pueyasoori cuno puereetuca Babilonia tiaca saniitioree, taa tariucuaaanu na niishiriojoquiaari cuno juuca na saniitionuracuajani. ¡Jiyanohua na juaaniutia na saniitioreeri! Niya sequeshiya Babilonia tiacatani, cunoori Roma tiacacuaja. <sup>20</sup> Jiyacarijuhuaj, puetunu shoniniacu caminijinia jiya tucuaatijacajanaari shaajequee, puetunu tuhuananuhujanaanio. <sup>21</sup> Naajuhuj, jiyocuacaanuji jiyanohua puereetujuaaca miacanajaa shiniitijiaacaari totere pueyacu. ¡Noojiaqueyari jiyanohua niiquia quiriquiaa; cuarenta kilo! Mijiria quiniaa pueyari Pueyaso sesacaree, naa nojoriicua na totinijianucua shiniitijiaaca miacanajaatej.

## 17

### *Miriqui pohuatasano Roma tiacajiniji, juhua paanatu*

<sup>1</sup> Na nuhuaji, cucua nimiaari niquiriyatu cuno siete Pueyaso seyajinijinio, canapuate siete miacojua patootariquiaacuajani. Cua sequeseeri:

—Miji quia nimia. Janiya quia niqitiniutianiyaani taa Pueyaso saniitionutaniya cuno Paanatuni, puetunu jiyajinia mohuacaacuajanaa cajiyani. <sup>2</sup> Mijiria jiyaniijianucuaari

cuno Maaji numuetucujujuaca. Sacuaraatia cuno Paanatu niishitiojosanota, nojuajaari juhua mashaasequetejojua puetunu jiyacua quiniaa pueyajanaa. Naacujatij, nojoriiri sacuaraatia miijiacara quiquiaari, juhua nojuajuhuj.

<sup>3</sup> Pueyaso seru niqitiniuria janiya na niqitiniu panishano, nojuajaari cua sohanu jiyataare cariquia jiyajinia. Janiyari tii niquishii Maajini, naatuhuana puereeta niqishano Casaa nijinia cajiyano. Queraatia sesacaari cuno naatuhuana Casaa cuaqueyacua quiriquiaa, Pueyaso rerequeteja sesaca, juhua Pueyasora na jiyatesacari tama na cuaqueyajaaja. Siete nacacaracaari quiriquiaa, diez tuhuajaaracanio. <sup>4</sup> Cuno Maajiiri shanohua toqueya cushiriquiaa, naatuque, shaaruquejuhuaj, juhua jiyaniijianucua cushishano. Queraatia shanohua maniniushitiaja casaa cushitariquiaari: orojiniji shipinijosano casaa, shanohua saijiniji shipinijosano tiujiaujuhuj, noturu shipinijosano saijiniji tiujiaunio. Orojiniji shipinishano miacojua mueetariquiaari. Mishaja quiriquiaari puetunu sacuaraatia na miijosano casaatajanaa, numuetucujusaanu porocua na quiniuucua. <sup>5</sup> Na sesaari miriqui naajiotasano quiriquiaa na jiniji. Naa naajiotasano quiriquiaari: “Janiyari puereetuca Babilonia tiacani. Janiyari paanatuji nucuani, puetunu mijiria sacuaraatia miishanojuanaa coretanijiojua nucuanio”. <sup>6</sup> Maninia cua niquishacari, cuno Paanatuuri juhua mashaaseca quiriquiaa na puecootesano Pueyaso pueya nanacata. Nojuajaari jiyanojuaa timijia, Jesujiniji pohuatanaa puecoonu porocua na quiniuucua.

Naa cua niquishacari nojuajatej, janiyari jiyanojuaa jiuujiatereeni. <sup>7</sup> Pueyaso seruuri jiyacari cua sequeree:

—¿Casaara quia jiuujiateya nocujini? Quiaritia quia pohuatareera quia niquishanojiniji. Cuno puereeta niquishano Casaa, siete nacacaracani, diez nacajaaracanio, Maaji cajitiya na nijiniani, puetunu cunojuanaari miriqui. <sup>8</sup> Cuno puereeta Casaa quia niquishanoni, cunoori tariucuacaanujiniji quijia quiquiaari. Quiaritia saniniuujia, majaari tari na quiniu. Naajaa, quera tacanutaniuhua cuno puequeetuaju raamajiiri, seetanujanaa puetunujanaa na shaajasaanuhua cutara. Pueyaso ruuretajaca pueyari jiyanojuaa shiriqititianiya nojori jaara cuno puereeta niquishano Casaa niquiri tacatehuano, teyanote tariucuacaanu quijia quiquiaaricujani, quiaritia saniniuujia majaari na quiniu. Jiyari shipiniyaquishacarija, cuno pueya sesacacujajari Pueyaso saquiriojosano pueya sesaca naajiotasaqui naajiotasoo quiquiaari.

<sup>9</sup> Cante niishijiani, nojuaja cuara niishiiria cua pohuatasano. Cuno puereeta niquishano Casaa, na siete nacacani, cunoori siete jiyaca jiyaniijianucua, mariyata siete tuhuananuhua, teyanocua cuno Paanatu cajiyacujani. <sup>10</sup> Cuno siete jiyaniijianucua-jinijini, cinco nojorijinijinioori tari shaajasaaquiaari. Cuno caapiqui cureenoinijini, niquiriyatuuri jiyaniijia quia quiaritia. Tamonuuri supueyojua. Nojuaja jaara supere, saaja rupaquijia rishiniutianiyaari jiyaniijia na quishacari. <sup>11</sup> Cuno puereeta niquishano Casaa, teyanote tariucuacaanu quijia quiquiaaricujani, nojuajaari cuno cinco shaajasano jiyaniijianucujinijinio quiquiaaricujaja. Majaari quiaritia na quiniu. Na nuhuaji supenutaniuhuari octavo jiyaniijia na quiniuria rupaquijia. Na nuhuaji shaajasaanutaniya cutaraari.

<sup>12</sup> Cuno diez nacajaa quia niquishanojanuhuj, cunoori diez jiyaniijianucuaranocujaja. Nojoriiri cumaaca niqitiosaanutaniya saaja niquiriyatu hora jiyaniijianucua nojori quiniuria cuno puereeta niquishano Casaata. <sup>13</sup> Cuno diez jiyaniijianucuaari mariyata niishiriojonutaniya nojori cumaquiniuria cuno puereeta niquishano Casaa puetunu nojori cumaacatajanaa, jiyaniijiajanaa cuno puereeta niquishano Casaa quiniuria. <sup>14</sup> Nojoriiri Borrego Niquiojuata miaquetoojonutaniya. Borrego Niquiojuuari nojori shocotanutaniya saaja, seetanujanaa Jiyaniijiajanaa na quiniuucua. ¡Nojuajaari puetunu jiyaniijianucujanaa Jiyaniijia! Nata quiniaa pueyari Pueyaso saquiriojosano pueya, Neyanu tojitiajacatuhuj.

<sup>15</sup> Pueyaso seruuri socua cua sequeree:

—Quiaacuajajari cuno Paanatu niquirii puetunu mohuacaacujanaa cajiyano. Cuno mohuacaacujajari queraatia tiaca, tamaatiuucua pueyapue, tamaatia rupaaca pocujajuhuj, tamaatia jiyacajinia quijia pueyano. <sup>16</sup> Cuno puereeta niquishano Casaa

quia niquishanoni, na diez nacajaanio, nojoriiri cuno Paanatu niquiniu paniyaquiniutianiya tojetaarucuajanaa. Na cartetunutaniyari. Tojetaarucuajanaa juhuasu na tiujiatunutaniyari. Nojoriiri cuno Paanatu miaquenutaniya. Na nuhuaji, na nucuhua catijiatunutaniyari. <sup>17</sup> Pueyasojuaanaacuaajaari cuno Paanatu paraa niishitiniutianiya naa nojori miiniuria cuno Paanatutej, taa Pueyaso paniya na miishaanuracuajani. Naa-juhuaj, Pueyasoori cuno diez jiyaniijianucua niishiriojotenutaniya jatiqui. Naacuajitij, cuno jiyaniijianucuaari rojotoonutaniya nojori cuaara cumaquiiria cuno puereeta niquishano Casaa puetunu nojori cumaacatajanaa. Naacuajitij, Pueyaso panishanoori tohuateesaanutaniya taa na sequequiaaricuajani. <sup>18</sup> Naajuhuj, cuno Paanatu quia niquishanoni, nojuajaari cuno puereetuca Roma tiacacuja, miriqui sequeshiya Babiloniatani. Nojuajaari puetunu mijiria jiyaniijianucuaajanaa tojitiqiaa nojuaja.

## 18

### *Babilonia tiaca catetanujiniji pohuatasano*

<sup>1</sup> Naa Pueyaso seru niquitiniu nuhuaji janiyatej, janiyari socua tamonu Pueyaso seru niquirii jiyocuacaanuji roseyanoni. Jiyanhua cumaacaracaari quiriquiaa. Na shacantuuca cumaacaari jiya cuhuatariquiaa. <sup>2</sup> Jiyocuacaanuji na rupaa paaretaree jiyanhuari. Seetanujanaa miishocoriquiano na sequesano quiniucua, nojuajaari juhua tariucua miishano na nacatariquiaa:

—¡Tari saniitiosaaree Babilonia tiaca! ¡Juhua niyarequetasaareeri cuno puereetuca tiaca! Samaruhua quiquiora jatanishaaree quiarjia saniniuurijia. Naaquiya quiquiora quiniutianiyajaariuhuj, puetunu pueya soosano pueresano jaacuatujuaca casaajanaa quiquioranio. <sup>3</sup> Puetunu jiyacajinijiniojuanaa pueyari sapojonuusaquiaari Babilonia tiacajinijinio niishitiojosanota, juhuajaniya sacuaraatia miijica nojori quiniuriajuhuaj, juhua mashaaseca. Naajuhuj, jiyaca jiyaniijianucuaari Babilonia tiacajinia sacuaraatia miijiosano miijioquiaajuhuj, cuno paanatu shiniujiuniucua nojori. Babilonia tiacajinia quiniaa pueyari puetunu na panishano casamijianaa masejoquiaa puetunu jiyacajinijijianaa, saaja tama nojori cuaqueyajaaja nojori shuquiritiniuria. Naacuajitij, cumaneecara na casami niquitiojonuujuaa pueyari jiyanhua cumaneecaraca pueya.

<sup>4</sup> Na nuhuaji, janiyari tamonu rupaa tojirii jiyocuacaanujini. Babilonia tiacajinia quiniaa Pueyaso pueya sequereeri:

—¡Cua muerasunaa, cuno tiacajiniji nia quiojore, niaa mariqui sesa miijiacara quiriohuari, cuno sesa miijica nia cojiniucua! Nojorijiniji nia carajere, niaa mariqui puetunu nojoritiajanaa cojiritiasaare naquiya miiniuuri. Nojoricuajaari quera saniitioshiya. <sup>5</sup> Cuno tiacajinia sacuaraatia miishanoori puera jiyanhua caneyaree. Juhua tuhuanuuri maashiyaree jiyocuacaanura. Pueyasocuaajaari sacuaraatia nojori miijiosano niishiya. Majaari socua tari na naata rejeretanu. <sup>6</sup> Babilonia cuaara namishaaria taa naquiya na miijioquiaa tamasacuaani. ¡Nojuaja cuaara saniitionu caminiujishaarica saniniuuja, sesa na miiniucua tamasaca! Babiloniaari juhua pueya raatejoquiaari sacuaraatia na niishishano, sesa miijica nojori quiniuria juhua nojuajuhuj. Cunora, nojuaja cuaara puetunu Pueyaso juaaquiacajanaa raatesaaria, tama na suhuocojiniaaja mishinishanoni. <sup>7</sup> Naatej, taa tama na cuaqueyajaaja na shuquiritiquiaa sacuaraatia na miishacaricaani, saniniuuja cuaara naa jiyanhua miitiasaariajuhuaj. ¡Jiyanhua tama na cuaqueyajaaja timitiaja na quiniucuaajuhuj, cuaara saniitiosaaria! Nojuajaari tama sequequiaajaacujua: “Janiyari niya cajiya shuquiriaatiani, cumaacaraca maaji, pueya tojishano jiyaniijia. Janiyari maja mashiquioni. Majaari quenaaja cua taraajenu quiniutianiya”. <sup>8</sup> Cunora, niquiriyatu juucajiniaja, cuno Paanatuuri jiyanhua taraatia miitiasaanutaniya. Jiyacaritij, cusonuunuuuri quiniutianiya, naquiya miiniu, miaajenujuhuaj. Jiyacari catijiatasaanutaniyajaariuhuj. Jiyanhua cumaacaraca Jiyaniijia Pueyaso quiniucua, nojuajaari naa saniitionutaniya cuno Paanatu.

<sup>9</sup> Mijiria jiyaniijianucuaari sacuaraatia miiniuria cojiquiaa cuno Paanatucaaja, tama nojori cuaqueyajaaja nojori shuquiritiniuria. Cunora, nojoriiri jiyanhua nujuquetunutaniya cuno Paanatu jaara saniitiosaare. Nojori niquishacari najaca tacaano jiya

cajiniocua, Babilonia tiaca catesacari, nojoriiri nocua sapiyonuunutaniya. <sup>10</sup> Nojoriiri na puerenuta na shootianutaniya tucuacaanuji, nojori mariqui saniitiosaarejaariuhuj. Nojoriiri jiyacari naa sequenutaniya Babilonia tiaca:

—¡Juhuej! ¡Quiaa taraatia miishiya tiaca maniniuniaa! ¡Quiaari jiyanhua cumaacaraca quijia juucua Babilonianaa! ¡Quiaari canashiyaquiji saniitiosaaree!

<sup>11</sup> Puetunu jiyacajinijanaa, cumaneecara na casami niqutiojonaa pueyari Babilonia tiacaacua nujuquetunutaniya. Nojoriiri jiyanhua taraatia quiniutianiya nojori ni- ishishacari, nojoritiucua tee na casami niqutiojore na cumaneecarani. <sup>12</sup> Tucuacaanuji Babilonia tiacajiniara nojori nitiasano casami quijiaari nio: oro, plata, jiyanhua panishano sajiuhuj, noturu shipinijosano sainio. Nitiasaaquiaaariuhua manini- uqui toqueya linojiniji, sedajiniji toqueya, shaaruque toqueyajuhaaj, juhua jiyaniijia cushishano, naatuque toqueyano. Nitiasaaquiaaariuhua puetunu tamaatia shanhua jaanujua juhuana raquiquia, elefante quiaajiniji shipinijosano casamijuhuj, shanhua naanajiniji shipinijosano casaminio. Nitiasaaquiaaariuhua broncejiniji shipinijosano casami, cumueeca casaajiniji shipinijosano casamijuhuj, shanhua mármol saajajiniji shipinijosano casaminio. <sup>13</sup> Naajuhuj, nio shanhua jaanujua casami: canela, miesu nunacuhua, catijiasocoriquiano shanhua jaanujua casaa, mirrajuhuaj, cuaqueyacua shuquiujiutiasano shanhua jaanutajano. Nitiasaaquiaaariuhua jereca uva caaca, shiyocua, maninia cashojuajuhuj, trigo jajaunio. Nitiasaaquiaaariuhua casami niy- otesano seya, borregohua, caballohua, caballohua jayotasocoriquiano shipinijosano casaanio, cumaneecara niqutiojosocoriquiano pueyajuhaaj seya nojori quiniuria. <sup>14</sup> Jiyacaritij, Babilonia tiacaari naa sequesaanutaniya:

—¡Majaari socua quia mioonu quiniutianiya jiyanhua quia maniniucasano naana jajau, jiyanhua quioojia jiaatiasano nocuani! ¡Puetunu quia timitiasano casaajanaari maja tari na quiniu quiniutianiya quiara, shanhua niquishano casami, jiyanhua cumaneecata quia masesano casaminio!

<sup>15</sup> Puetunu cuno casami niqutiojonaa pueyajanaari jiyanhua casamiriaca quia Babilonia tiacajinia quiniaa masejonuucua nojori casami. Maja nojori saniitiosaanura- juhuaj, cuno pojoriiri tucuacaanuji na puerenuta nocua nujuquetunutaniya. Nojoriiri na sapuenuta naa na sohuarejotanutaniya:

<sup>16</sup> —¡Juhuej! ¡Babiloniaari tiaca maniniu quijia juucua! Jiyanhua shanhua niquis- hano quijiaari, taa casamiriaca maajicuaani, na cushishacari na maniniushitiaja casaa. Naa shanhua niquishiyari juhua maaji linojiniji cohuajaque toqueya cushitishano, shaaruque toqueya, naatuque toqueyano juhua jiyaniijia cushishano, orojiniji shipinis- hano casaata na maniniushishacarijuhuaj, noturu shipinijosano saitiajuhuaj, shanhua niquishano saitanio. <sup>17</sup> ¡Jiyanhua queraatia puetunu na jiitiasano casamijianaari canashiyaquiji catijiasaaree juhua sohanatuu!

Puetunu pueyajanaa, canapuate shoniniacu caminiajina poonijionaa na cuma- neecaracujani, nojoriiri tucuacaanuji shootiariquiaa Babilonia tiaca catetasacari. Naa shootiaturiquiaaariuhua casami jaqueroojuaca tamaquicua tiaca tacatajajinaqueya, rucoonaa pueya, buquejina poonijionaa pueyajuhaaj, nojori camarucuanio. Puetunu cuno pojorijianaari tucuacaanuji shootiariquiaa Babilonia tiaca catetasacari. <sup>18</sup> Nojori niquishacari najaca nujuaano jiya cajiniocuara, nojoriiri naa sariyocaturee:

—¿Socua tamonu tiacateeri quia juhua cuno Babilonia tiacajuhuj? ¡Shaaqui!

<sup>19</sup> Jiyanhua nojori taraajenuta, nojoriiri jiyojua nanooree na nacaacua. Nojori nujuquenuta, nojoriiri naa sariyocaturee:

—¡Juhuej! ¡Babiloniaari tiaca maniniu quijia juucua! ¡Puetunu shoniniacu caminia- jina buque jiitianaajanaari jiyanhua casamiriaca quia, jiyanhua casamiriaca Babilo- nia quiniucua! ¡Quiarjia saniniuujia, canashiyaquiji puetunujuanaari shaajasaaree!

<sup>20</sup> Jiyacaritij, Pueyaso seruuri naa nacaree:

—¡Nia shuquiriri, jiyocuacaanu quijiacanaa! ¡Babilonia saniitiosaanuucua nia tim-  
iquiore, Pueyaso saquiriojosano pueyanaa, Jiyaniijia Jesu jiyaramiquishano pueyajuhuj,  
Pueyaso sequesano caminiujiuniaano! ¡Pueyasocuajaari niaacua namirii Babilonia!

<sup>21</sup> Jiyacaritij, cumueeca Pueyaso seruuri jiyanhua puereetuuca saajia paree, juhua  
trigo jajau jacanojotaja saajia. Shoniniacu caminiajinia na jatasacari, naa sequereeri:

—¡Taa cua jatasano saajia shaajemaa shoniniacu caminia queronijiniacuaani, quiaari  
naa shaajasaanutaniya canashiyaquijijuhuj, Babilonia tiacanaa! ¡Majaari socua quia  
niquishaanu quiniutianiya! <sup>22</sup> ¡Quia nuucuaari tojetaarucujanaa sanaaca quiniutianiya!  
¡Majaari arpa taquiniojonu tojishaanu quiniutianiya socua, turequenaco jonenenu-  
unujuhuj, trompeta jonenenuunonio! ¡Puetunu tamaatia poonijosano niishijiaca  
juaashiquiaraca pueyajanaari shaajasaanutaniyajuhuj! ¡Majaari quenaaja niquiriyatu  
cureenu quiniutianiya quia quishaqui! ¡Naajuhuj, majaari socua riiquiniunio to-  
jishaanu quiniutianiya! <sup>23</sup> ¡Majaari quenaaja niquiriyatu samaritiu niquishaanu quiniu-  
tianiya noshiyano quia quishaqui! ¡Naajuhuj, majaari camishacari queranacunuunu  
cojuatunenu tojishaanu quiniutianiya socua! ¡Quiaari naa saniitiosareequij, jiyanhua  
cumaacaraca quia casami niquitiojonaa pueya quiniuucua puetunu jiyacajinijanaa!  
¡Naajuhuj, quiaari puetunu jiyacajinia quijiaca pueyajanaa shimiojona, sapojosano  
nojori quiniuria puetunu sacuaraatia casaa quia miijosanotajanaa! <sup>24</sup> ¡Quiarijia sanini-  
uujia, quiocua tiutiashiyari pueyara Pueyaso sequesano caminiujiuniaa puecoosaanu,  
Pueyaso saquiriojosano pueya puecoosaanujuhuj, puetunu jiyacajinijanaa pueya  
puecoosaanunio!

## 19

<sup>1</sup> Naa cua tojiniu nuhuajitij, janiyari jiyocuacaanu tojirii queraatia rupaacani. Naa  
sequeturiquiaa jiyanhuari:

—¡Jiyanhua maninia pa Pueyaso! ¡Nojuaja pa shuquiritiare! ¡Nojuacuajaari pa  
Jiyanoojia! ¡Nojuajaari jiyanhua shacantuuca, tojetaarucujanaa maninia miijia  
na quiniuucua! ¡Puetunu cumaacaracajaariuhuj! <sup>2</sup> ¡Maninia na niishiniuu-  
cua puetunu cuno Paanatu miishano sacuaraatijanaa, nojuajaari maninia na  
saniitioree! ¡Cuno Paanatuuri jiyacua quijiaca pueya sesoquiaari tojetaaru-  
cujanaa, sacuaraatia na miijosano na niishitiojosanota! ¡Pueyasoori cunora  
na saniitioree! ¡Naajuhuj, Babilonia puecoonuucua Pueyaso tojitiajaca pueya,  
Pueyasoori na namirijiuhuj!

<sup>3</sup> Jiyocuacaanuji rupaaca cua tojishanoni, nojoriiri naa sequerohuacuuhuj:  
—¡Jiyanhua maninia pa Pueyaso! ¡Nojuaja pa timitiariquia pueyaracaanu! ¡Pueyara-  
caanu cuno Paanatu saniitiosacari, majaari na najaca turetano quiniutianiya  
quenaaja!

<sup>4</sup> Cuno veinticuatro niishijiaca jiyaniijianucua, cuno cuatro saminio casaajuhuj, no-  
joriiri jiyacari jiyocuara jacamaturee Pueyasooacara. Nojoriiri naa timitiaree Pueyaso,  
cante na shacantuuca cumaacajinia cajiriquiaacuajani. Nojoriiri naa na sequeturiquiaa:  
—¡Cuaara na quiiriatej! ¡Pa Jiyaniijia cuaara timitiasaaria pueyaracaanu!

<sup>5</sup> Jiyacaritij, tamonu rupaari tojishaaree Pueyaso cajishaquijijianaa. Naa se-  
queriquiaari:

—¡Pa Pueyaso nia timitiariquia, puetunu na tojitiajaca pueyanaa! ¡Nojuaja nia shuquiri-  
tiare, tojishano pueyanaa, nijaniyajuhuj, tojishoo pueyanaa!

### *Borrego Niquiojua camishocoriquiano maaji maniniushishacari*

<sup>6</sup> Jiyacaritij, janiyari queraatia pueya tojirii jiyanhua nacaanoni, juhua puereetuuca  
sararajua, juhua miacana majacunujuhuj. Puetunu nojorijianaari naa sequeriquiaa:

—¡Jiyanhua maninia pa Jiyaniijia Pueyaso! ¡Nojuaja pa timitiariquia pueyara-  
caanu! ¡Nojuacuajaari Jiyaniijijanaa! ¡Puetunu cumaacaracajanaajuhuj! <sup>7</sup> ¡Pa  
shuquiriri! ¡Pa timiri! ¡Quiarijiacuajaari Borrego Niquiojua caminiu juuca,  
pueyaracaanu na saquiriojosano pueya rupuenura nojuaja! ¡Cunora, nojuaja pa

timitiare jiyanoehua! Necoranoori tari maniniushirii na caminiuria. <sup>8</sup> Maniniuqui lino toque cushitishaareeri, cohuajaque shacantuque. Necoranoni, nojoricua-jaari puetunu nocua tiuujiaa pueyajanaa. Naajuhuj, cuno cohuajaque na toqueni, cunocuaajaari puetunu maninia nojori mijiosanojuanaa.

<sup>9</sup> Pueyaso seruuri jiyacari cua sequeree:

—Quia naajiotare nio: “Shuquiriaatia quijiaca cutaraari noo pojori, canapuate Borrego Niquiojua camishacari queranacujuajiniara masuusanoni”.

Naa cua sequeree socuaari:

—Cua sequesani, cunoori seetanu Pueyaso rupaajanaa.

<sup>10</sup> Jiyacaritij, janiyari Pueyaso seruucara mojoquetareeni, juhua Pueyasoocua, nojuaja cua timitianura juucua. Cua sequequee saajaari:

—¡Maja pueyanonaa! ¡Maja naa quia miiniu! Janiyari nareja Pueyaso seruni taa quiajanuacuaani, juhua quia tapueyocacajuhuj, noo pojori canapuate pa Jiyaniijia Jesujiniji pohuatana tarinitiaashijiacani. ¡Pueyasoocua quia mojoquetare cutara, quia timitianura nojuaja! Puetunu Jesujiniji pohuatasanojuanaani, cunoori Pueyaso Sohanu niishitishano na pohuatanaa, janiya, niajanijuhuj.

### *Cohuajohuana caballo nijinia cajiniainiji pohuatasano*

<sup>11</sup> Na nuhuaji, janiyari jiyocuaaanu Pueyaso quiquio niquirii tariucua riatasanoni. Janiyari tii niquirii cohuajohuana caballoni. Na nijinia cajiniaari caapiqui sesacaraca quiriquiaa. Nioori na sesaca: “Na sequesano mijia”, “Seetanu sequejajanaa”. Naari na sesaca. Tojetaarucujanaa maninia mijia na quiniucua, puetunu niishijajanaa-juhuj, nojuajaari seetanujanaa maninia saniitiojua sesa mijia. Naajuhuj, majaari najuhua na miaquetoojonu na paraata. <sup>12</sup> Puetunu casaajanaa niquijia na quiniucua, na namijiaari juhua mani rimianacuyano niquishaariquiaa. Jiyaniijianucuarano shipinijosano nacaqueya pasacoriquiaa na nacaacuaari. Cunoori seetanujanaa Jiyaniijajanaa na quiniucua. Tamonu na sesaari naajiotasano quiriquiaajuhuj. Cuno sesaari tama na niishishanojuaja cutara. <sup>13</sup> Na toqueeri nanacatuque quiriquiaa. Nojuajaari tariucuaaanu nio sesaraca quijiacuaja, “Pueyaso Rupaa”. <sup>14</sup> Jiyocuaaanu nata quiniaa na soldadohuari na nuhuaji sacuariquiaa. Puetunu nojorijianaari cohuajohuana caballohua nijinia cajituriquiaa. Naajuhuj, nojoriiri linojiniji cohuajacuijiasano toqueyaraca quiriquiaa, jiyanoehua cohuajaqueya tojetaarucujanaa. <sup>15</sup> Nojori Jiyaniijajanaa rupaamaji, nijiniaquetucujaja mueruuri puereeta mueranacuriquiaa. Cunoori puetunu mijiria jiyacajinijanaa na tojitiaashijiaa na puetujutajara. Nojuajaari jiyacari nojori Jiyaniijajanaa quiniutianiya, nojori na jitianura jiyanoehua na cumaacata. Puetunu cumaacaracajanaa Pueyaso juaaquiacata nojori saniitionutaniyari, naatej, taa uva rapijoshiya na caaca shoonuracuaani. <sup>16</sup> Na tucuaque toqueecua, na ruhuajacuucujuhuj, naa naajiotasanoori quiriquiaa: “Jiyaniijianucua Jiyaniijajanaa”, “Camarucua Camarnujanaa”.

<sup>17</sup> Na nuhuaji, janiyari tamonu Pueyaso seru niquirii pananuucua nujuaanoni. Nojuajaari puetunu jiya cajiniocua jaacatujuaca casaajanaa jiiquioonuuriquiaa jiyanoehua, teyano jaacatujuacate shu miojonuujuacacujani. Naa cuno jaacatujuaca casa sequeriquiaari:

—¡Miji, niya nia rerejosee! ¡Pueyasoori nia queranacutenutaniya! <sup>18</sup> ¡Nojuajaari queraatia shu nia mianuutenutaniya! ¡Cuno shuuri jiyaca jiyaniijianucua shu, soldadohua camarucua shu, jiyanoehua cumueca puereyaquijiaa shu, caballohua shu, na nijinia cajitunuaa pueya shujiuhuj! ¡Camarucuaaju pueya shuuri quiniutianijuhuj, poonijotesano pueya shu, tojishoo pueya shujiuhuj, tojishano pueya shunio!

<sup>19</sup> Jiyacaritij, janiyari cuno puereeta niquishano Casaa niquiriini, mijiria jiyaca jiyaniijianucuanio, puetunu nojori soldadohuatajanaa. Puetunu nojorijianaari tariucua rerejonu quiriquiaa na miaquetoojonura cohuajohuana caballo nijinia cajianota, nata quiniaa na soldadohuatanio. <sup>20</sup> Cuno na naca pishano cushiriiniohua puereeta niquishano Casaaari jiyacari quiasaaree, narta puereeta niquishano Casaanio. Nojuajaari cumaacaraca quiriquiaacuaja mijiria quijiaa pueya na sapojonura na cumaacata na

miishanota, nojori na tiutuniuria na naca pishano cushiriiniohua Casaacua. Naa na sapojonuucua mijiria quijiaca pueyatej, nojoriiri nojori cuaqueya tarinitiaquiaari na naca pishano cushiriiniohua Casaa sesa naajiotasaanura nojoriicua. Naajuhuj, nojoriiri juhua cuno puereeta niquishano shipinishano Casaacuara mojuquetacojua quiquiaari juhua Pueyasooacara. Jiyacaritij, cuno caapiqui puereeta niquishano Casaari azufreta noshiyano mani quiquiojinia quejoosaaree saminiucujaja. Nojoriiri tii pueyaracaanu naquiya miishaanutaniya. <sup>21</sup> Puetunu nojoritia quiniaajanaari saniniuuja puecoosaaree nijiniaquetucujaja mueruuta, teyanote cohuajohuana caballo nijinia cajiyano rupaamaji mueranacuriquiaacuajani. Puetunu jiya cajiniocua jaacuatujua casaajanaari nojori shu tooquioree jiyanohua.

## 20

### *Mil marijara Satanás morosaanujiniji pohuatasano*

<sup>1</sup> Na nuhuaji, janiyari tamonu Pueyaso seru niquirii jiyocuacaanuji roseyanoni. Puequeetuujuu raa riatataja patariquiaari, puereetiuyocua cumayocua shipinishano casaanio, Pueyaso Paraca na morotajara. <sup>2</sup> Pueyaso seruuri cuno naatuhuana Naaqueru juhua cohuaniquia niquishano quiasee. Na morojoreeri mil marijara. Nojuacuajaari cuno tariucuaaanu Soconu, samaruhua jiyaniijajanaatuhuj. Na sesaari “Satanás”. <sup>3</sup> Maninia na morojonu nuhuaji, Pueyaso seruuri puequeetuujuu raama na jartaree. Raa tiotiu mishiquiorohuari. Tiotiu rupanacureeri, maja na riatasaanura. Sesacaari naa mishiquiosaareequij mijiria quijiaca pueya na sapojiyaquiniuucaaji cuaara na shocojorejaatijia mil marijia. Cuno mil marijia jaara na shocojore, rupaquiijara cartesaanutaniuhuari na saniitiosaanuhuarajanaa cutara.

<sup>4</sup> Janiyari jiyacari queraatia pueya niquirii jiyaniijia cajitiucujania cajitiuyanoni. Nojoriiri nequesoreenaara Pueyaso jiyatesano pueya quiriquiaa, mijiria quijiaca nojori jitianura. Janiyari noo pojori sohuanuhua niquiriijaaniuhuj, canapute naca-reesaquiaaricujani nojori poojotanuucua pa Jiyaniijia Jesujiniji, Pueyaso rupaa to-jitijaca nojori quiniuucajuhuj. Nojori cutaraari cuno na naca pishano cushiriiniohua Casaacuara jacamatiuyaquiquiaari tojetaarucujanaa, juhua nojuaja niquishano shipinishano Casaacuarajuhuj. Naajuhuj, majaari nojori shanacunu quiquiaari cuno puereeta niquishano Casaa sesa naajiotasaanura nojoriicua. ¡Cua niquishacari, nojoriiri cua niquiara samiiticoquee, jiyaniijianucua nojori jiyatesaanura! Mil marijiaari nojori shocojoree, jiyaniijianucua nojori quishacari pa Jiyaniijia. <sup>5</sup> Saniniuuja, narta macunucuaari maja na samiitianijosaanu quiriquiaa cuno mil marijia cuaara shocojorejaatijia. Nio macunucua samiitianijosacari cua niquishanoni, cunoori coteenujanaa Pueyaso samiitianijosacari pueya. <sup>6</sup> Shuquiriaatia quijiaca cutaraari noo pojori, canapue Pueyaso samiitianijionutaniya coteenujanaacuajani. Nojoriiri jiyacari tojetaarucujanaa maninia quijiacara jatanishaanutaniya pueyaracaanu rishijica nojori quiniuria. Naacuajitij, Pueyaso ruuretajaca pueya jaara puetunu shaajasaarejanaa, jiyacari majaari Pueyaso pueya pacutenu quiniutianihua cusonu. Saniniuuja, nojoriiri pueyaracaanu shamaatia timitianutaniya Pueyaso, Cristonio. Naajuhuj, nojoriiri jiyaniijianucua quiniutianiya Cristota, mijiria quijiaca nojori jitianacari cuno mil marijara.

### *Sesaaca saniitiosacarijianaa cutara*

<sup>7</sup> Cuno mil marijia shocojonu nuhuaji, Satanásri tohuatesaanutaniuhua na nuju-atesaquiji. <sup>8</sup> Nojuaja jaara tohuatesaare, quianutaniyari puetunu jiyacajinia quijiaca pueyajanaa na sapojonura, Gog pueya, Magog pueyano. Nojori na sapojonuta, nojuajaari puetunu jiyaca jiyaniijianucujanaa rerejotenutaniya, puetunu nojori soldadohuatajanaa, nojori miaquetojonura pa Jiyaniijia, puetunu na pueyatajanaanio. Nojori soldadohuari jiyanohua queraatia pueya quiniutianiya, juhua shoniniacu caminia shuriuquioco paajia jaaquia. Majaari na naata serojosaanu.

<sup>9</sup> Cua niquishacari, tojetaarucujanaa jiyanohua queraatia pueyari nijioriquiaa. Jiya pueturiquiaa puetunujuanaari, juhua tereya nojori quiniuuca. Nojoriiri Pueyaso

panishano tiaca cosejoree, cuno tiaca shocua quijiaca Pueyaso pueyano. Jiyacaritij, maniiri jiyocuacaanuji tinishaare nojoriicua. Puetunu cuno pueyajanaari catijiasaaree tojetaarucujanaa. <sup>10</sup> Satanás, cante puetunu cuno pueyajanaa sapojoreecuajani, nojuajaari caminiajina jataaaree tee cuniqui mani noshiya azufretacuajani. Tariucuacaanu tii jaqueroosaaquiaaricuajaari na naca pishano cushiriinohua Casaa, narta puereeta niquishano Casaanio. Cunocuaajaari mijiria quijiaca pueya sapojoquiaaricuaja, na naca cushiriinohua Casaacuara jacamatujuaca nojori quiniuria. Nojoriiri tii miitiasaanu-taniya tojetaarucujanaa pueyaracaanura, juuca, niucuanio.

*Macunucua nequesoreesacari cohuaja cajituu tacoji*

<sup>11</sup> Na nuhuaji, janiyari Jiyaniijiajanaa cohuaja puereetuuca cajituu niquiriini, tii cajini-anio. Na niquiara, jiyari puetunu shaajequeejanaa, jiya cajiniocuanio. Majaari socua na niquishaanu quiriohua. <sup>12</sup> Jiyacaritij, janiyari puetunu macunucujanaa niquirii nujuatiuyano cuno cohuaja cajituu tacojini; jiyaniijianucua, tojishoo quijiaca pueyano. Jiyacaritij, na cohuaja cajitujinia cajiniaari na nequesoreetuneeca riataqueree, socua tamonu nequesoreetuneenio. Cuno nequesoreetuneejinia naajiotasano quiyacuajaari Pueyaso saquiriojosano pueya sesaca, pueyaracaanu rishijiaca nojori quiniuria. Puetunu cuno tariucuacaanu macunucujanaari nequesoreesaaree puetunu nojori miishano-jinijijianaa, taa cuno nequesoreetuneecejinia na naajiotasaaquiaaricuajani. <sup>13</sup> Cua niquiara, macunucua quiquiojinia racatasano puetunu cusonuuno sohuanuhujanaari na cuaqueya rupuetesaarohua, shoniniacu caminiajina moquecono, jiyacua moquecononio. Puetunu nojorijianaari nequesoreesaaree taa miijiaca nojori quiquiaaricuajani. <sup>14</sup> Na nuhuaji, Cusojuana, macunucua Quiquiojuhuaj, nojoriiri mani noshiyano caminiajina jaqueroosaaree. Canapuete cuno mani noshiyano caminiajina quejoosocoriquiano pueyacuajani, nojoriiri cusonuunu pacuteriquianocua. <sup>15</sup> Naacujitij, canapuete Pueyaso samiitianijosocoriquianohua nequesoreetuneejinia naajiotasoo quiquiriaani, nojoriiri mani noshiyano caminiajina quejoosaaree pueyaracaanura.

## 21

*Quiarinio jiya cajiniocujiniji pohuatasano, quiarinio jiyajinijinio*

<sup>1</sup> Na nuhuaji, janiyari quiarinio jiya cajiniocua niquiriini, quiarinio jiyanio. Co-teenujuanaa jiya cajiniocuaari tari shaajasano quiquiriaa, jiyanio. Naajuhuj, majaari shoniniacu caminia quiniu quiquiriaa tari. <sup>2</sup> Janiyari jiyacari quiarinio Jerusalén tiaca niquirii Pueyaso Quishaquiji roseyanoni. Tojetaarucujanaa shanohua maniniushitishano quiquiriaari, juhua neyacarano camishocoriquiano niyacoo. <sup>3</sup> Naajuhuj, janiyari Jiyaniijiajanaa cajitujiniji tojirii jiyanoehua nacanuni. Naa sequeriquiaari:

—¡Pueyaso Quiquioori pueya tajinia quiya tari! ¡Nojuajanaari nojoritia quiniutianiya!  
 ¡Nojoriiri na pueya quiniutianiyajuhuj! ¡Nojuajaari nojori cojiniutianiya, nojori Jiyaniijiajanaa na quiniuria, maninia na jiitianura nojori! <sup>4</sup> ¡Nojuajaari puetunu nojori namijiaacajanaa tuujunutaniya! ¡Jiyacaritij, majaari pueya niishiniu quiniutianiya shaajenu, sapuenu, taraajenu, nootunenunio! ¡Puetunu cuno taraatia miiniucuaajaari tari shaajasano quiquiriaa!

<sup>5</sup> Na nuhuaji, Jiyaniijiajanaa cajitujinia cajiniaari naa sequeree:

—¡Cua tojiri! ¡Janiyari quiariniora miiija puetunu casaajanaani!

Cua sequerejaariuhuj:

—Cua sequesano quia naajiotare. Seetanujuanaari cua sequesano. Janiyacuajaari cua sequesano tohuateequiaa pueyaracaanuni.

<sup>6</sup> Cua sequerohuariuhuj:

—Cua sequesano cua miishocoriquianoni, janiyari tari na tucuataree miiniuni. Janiyari quiijajuhuanani. Janiyari pueyaracaanu quiquirianojuhuaj. Janiyari puetunu casaajanaa coretanijiani, na shaajajajuhuj. Cante jiyamueyani, janiyari pueyaracaanu pacartaja samo nacajiniji na raatenutaniyani, na naatanuhua. Cuno samiitianijia mohuacani, cunoori cua Sohuanucuaaja. Janiyari nareja na niqutioquiaani. Majaari



na sami cua masenu quiquiaa na ratuna. <sup>7</sup> Cante puetunu casaajanaa rejeretaja quijiani, cua tojijia na quiniuucua, nojuajaari puetunu cua jiiitiasanojuanaa jiiitiana quiniutianiya. Nera, janiyari na Pueyaso quiniutianiyani. Nojuajaari quiyanu quiniutianiyacujua. <sup>8</sup> Sesa pueya saniniuujia, nojoriiri puetunu quejoosaariquianojuanaa azufreta noshiyano mani caminiajinia. Naa quejoosaanutaniyari nio pojori: Pueyaso tojitiaashijiaca pueya, puerejaca nojori quiniuucua, Pueyaso Rupaacua tiuyashijiaca, soosano pueya tama sesa nojori miiniuucuaajaaja seseno, pueya moojuaca, na camishoo maajipohua numuetucunuujuaaca, shimiacuri, shipinijosano casaacuara jacamatujuaca juhua Pueyasocuara, puetunu cuaracashijionuujuaaca pueyajanaanio. Puetunu cuno pojorijianaa jaara nequesoreesaare, nojoriiri puetunu taanuusaanutaniyajanaa Pueyaso shuriucuaji. Nojoriiri mani noshiyano caminiajinia quejoosaanutaniya, pueyaracaanu naquiya nojori miishaanura tii. Cunocujaari sequeshiya, “pueya pacutesacariuhua cusonu”.

*Quiarinio Jerusalén tiacajiniji pohuatasano*

<sup>9</sup> Janiyacuajaari tari nia pohuataree cuno siete Pueyaso seyajinijini, canapuate siete miacojua patootanaa quiquiaaricujani, mishaja Pueyaso saniitotajata. Niquiriyatu nojorijinijinioori cucua nimiaa. Nojuajaari cua sequesee:

—Miji. Quia niquitiriiria Borrego Niquiojua niquiorano. Nojuacuajaari pa Jiyaniijia pueya, na quiquiojaariuhuj.

<sup>10</sup> Jiyacaritij, nojuajaari cua sohuanu jiyataree jiyanoehua puereetuuca jiyaconaja tuhuananuucua. Tiji cua niquitirii cuno puereetuuca quiarinio Jerusalén tiacaari, Pueyaso shuriucuaji roseyano. Tojetaarucujanaa shanohua maniniushitishano quiriqiaari. <sup>11</sup> Nenecuariqiaari Pueyaso shacantuuca cumaacata. Na nenecuanuuri juhua jiyanoehua panishano saajia nenecuanu quiriqiaa, juhua jaspe saajia. Maatia niquishiyari na tamajiria, juhua cohuaja motiiquio. <sup>12</sup> Cuno tiaca shocua matacaari jiyanoehua puereetuuca quiriqiaa, jiyaconajajuhuj. Tiaca shocua matacaari doce tiotiuhuaraca quiriqiaa. Niquiriyatu Pueyaso seruuri puetunu cuno tiotiuujinijianaa nujuaturiquiaa. Naajuhuj, supuetana Israel doce niquiohuacuajinio supueno doce pueyapue sesacaari puetunu cuno tiotiuhuacuajanaa naajiotasano quiriqiaa. <sup>13</sup> Jiuujianaraca tiotiuhuari pananu muetasamajiria quiriqiaa, cuno tiaca matacaacua. Socua jiuujianaraca tiotiuhuari quiriqiaa pananu muetasamaji miaquetajara. Naa-juhuj, socua jiuujianaraca tiotiuhuari pananu muetasamaji muenecara quiriqiaa. Socua jiuujianaraca tiotiuhuari quiriqiaa pananu tiuquishocora. <sup>14</sup> Cuno tiaca matacaari doce puereetujuaaca saicua nujuatariquiaa. Borrego Niquiojua doce jiyaramiquishano pueya sesacaari cuno doce saicua naajiotasano quiriqiaa.

<sup>15</sup> Cuno Pueyaso seru cuata pocojoriqiaani, nojuajaari orojiniji shipinishano shanacujutaja maca mueturiquiaa. Na mueturiquiaari nata na shanacujunura cuno tiaca, na tiotiuhua, tiaca shocua matacanio. <sup>16</sup> Cuno tiacaari jiyanoehua tucuhuana quiriqiaa. Na cajiniocuaari mariyata juhua na tucuhuana quiriqiaajuhuj. Maninia tiasano quiriqiaari, maja rimiajata. Pueyaso seru shanacujunu nuhuaji puetunu cuno tiacajanaa, mariyata dos mil dosciento kilómetro quiriqiaari na tucuhuana, na jiyaconaja, na cajiniocuanio. <sup>17</sup> Na nuhuaji, tiaca mataca shanacujureejaariuhuj. Setenta y cinco metro jiiitariqiaari. Pueyaso seru shanacujutaja tucuaneeeri mariyata juhua mijiria pueyano shanacujutaja quiriqiaa. <sup>18</sup> Cuno tiaca matacaari puetunu jaspe saijinijijianaa shipinishano quiriqiaa. Tiacaari saniniuujia saaja orojiniji shipinishano quiriqiaa, maja quenaaja tamonu casaata cojitishano. Naacuajitij, cuno oroori juhua cohuaja motiiquio quiriqiaa. Maatia niquishiyari na tamajiria. <sup>19</sup> Cuno mataca nujuataja doce sairi queraatia tamaatiujiaaca shanohua niquishano saitia maniniushitishano quiriqiaa. Cuno mataca nujuataja doce saijinijnioni, coteenu saajiaari jaspe saitia maniniushitishano quiriqiaa. Jaspe sairi neeruuca cojitishano pocojuanaqueta. Segundo saajiaari zafiro saitia maniniushitishano quiriqiaa. Zafiro sairi nentujuaaca naata. Tercero saajiaari ágata saitia maniniushitishano quiriqiaa. Ágata sairi tejatujuaaca neeruuca.

Cuarto saajiaari neeruuca esmeralda saitia maniniushitishano quiriquiaa. <sup>20</sup> Quinto saajiaari ónice saitia maniniushitishano quiriquiaa. Ónice sairi pocojuanaque naatuuca cojitishano. Sexto saajiaari naatuuca cornalina saitia maniniushitishano quiriquiaa. Séptimo saajiaari crisólito saitia maniniushitishano quiriquiaa. Crisólito sairi tiijiaaca. Octavo saajiaari berilo saitia maniniushitishano quiriquiaa. Berilo sairi neerujuaaca juhua naashi. Noveno saajiaari topacio saitia maniniushitishano quiriquiaa. Topacio sairi jiyanoehua pocojuanaque. Décimo saajiaari crisoprasa saitia maniniushitishano quiriquiaa. Crisoprasa sairi jiyanoehua neerujuaaca. Undécimo saajiaari jacinto saitia maniniushitishano quiriquiaa. Jacinto sairi jariya naata naatuuca. Duodécimo saajiaari jiyanoehua nentuuca amatista saitia maniniushitishano quiriquiaa. Puetunu cuno saijianaari jiyanoehua shanohua sai, shacantujuaaca. <sup>21</sup> Tiaca shocua mataca doce tiotihuuari noturu shipinijosano saijiniji shipinijosano quiriquiaa. Niquiriyatu tiotiuuri niquiriyatu noturu saajajiniji shipinishano quiriquiaa. Naa shipinijosano quiriquiaari puetunu cuno doce tiotihuajanaa. Tiaca nuucuacaari tojetaarucujanaa orojiniji shipinishano quiriquiaa. Jiyanoehua maninia cuno oro quiniuucua, Pueyaso shacantuucaari na tohuariquiriquiaa, juhua motiiquio cohuajaco na quiniuucua.

<sup>22</sup> Cuno tiacajinia, majaari cua niquiniu quirii Pueyaso Quishaqui, tii pa rupuenura nojuaja. Cuniqui, majaari socua Pueyaso Secojojuatia panishaanu. Puetunu cumaacacajanaa Pueyasojuanaari tii quiyacuaja, Borrego Niquiojuajuhuj. Puetunu cuno tiacajanaari nojori quishaquicuaja, pueyaracaanu nojori rupesano pa quiniuria. <sup>23</sup> Cuno tiacaari maja na paniniu pananu na cuhuatariquiano, racajuhuj. Pueyaso shacantuuca cumaacacuajaari na cuhuataa. Borrego Niquiojuacuajaari na cuhuatana. <sup>24</sup> Puetunu jiyacajinia quiijaca pueyajanaari cuno tiaca caaniuji quiijaca quiniutianiya. Puetunu jiyaca jiyaniijianucujanaari socua nojori panishano casami patootanutaniya nojori cuhuatana tiacajiniara, Jiyaniijiajanaa nojori niquitiosocoriquiano. <sup>25</sup> Cuno tiaca tiotihuuari pueyaracaanu riataquesano quiniutianiya, juuca na quiniuucua pueyaracaanu. Cuniqui, majaari quenaaja niucua niishishaanu quiniutianiya. <sup>26</sup> Jiyajinia quiijaca pueyari socua na panishano casami patootanutaniya cuno tiacajiniara. Cuno tiacaari jiyanoehua nojori timitiasano quiniutianiya. <sup>27</sup> Saniniuujia, maja cutaraari sesa casaa tiuquinishaanu quiniutianiya cuno tiacajinia. Naajuhuj, majaari sesa miijiacaa tiuquiniu quiniutianiya tii, sapojonuujucanio. Saaja noo nojori cutaraari tii tiuquitianutaniya canapue sesacate pueyaracaanu rishijiacarano Borrego Niquiojuatia naajioneejinia naajiotasano quiyacuajani.

## 22

<sup>1</sup> Na nuhuaji, Pueyaso seruuri cua niquitirii pueya samiitianijiotaja moo, cohuajanacu tojetaarucujanaa. Nenecuariquiaari. Cuno mohuacaari Jiyaniijia Pueyaso cajitiujiniji pacartariquiaa, tee Borrego Niquiojuatia cajiyajaaniuhuj. <sup>2</sup> Samiitianijia naanaari tiaca nuu jiuujiaaco nujuaturiquiaa, cuno moo shuriuquiocojuhuaj, niijiqiria, na taquijiriano. Cuno naanaari puetunu racarajanaa muetujuaca. Naacuajitij, puetunu marijiajanaa, doce caminiujiya muetunuuri. Na mucacaari maninia, puetunu jiyacajinia quiijaca pueyajanaa naarajotajara. <sup>3</sup> Cuniqui, majaari socua Pueyaso sesacasano casaa quini quiniutianiya. Naacuajitij, Pueyasojuanaa, Borrego Niquiojuajuhuj, nojoricuajaari cuno tiacajinia quiijaca quiniutianiya, Jiyaniijiajanaa cajitiu quiniuucua tii. Nojori tojitajacaari nojori timitianutaniya pueyaracaanu tii. <sup>4</sup> Nojoriiri Pueyaso jiquioco shootiajaca quiniutianiya. Na sesaari nojori jiniji naajiotasano quiniutianiya. <sup>5</sup> Cuniqui, majaari niucua niishishaanu quiniutianiya. Tii quiijaca pueyari maja na paniniu quiniutianiya samaritiu, pananunio. Jiyaniijia Pueyasojuanaacuajaari nojori cuhuatanutaniya. Nojoriiri jiyaniijianucua quiniutianiyajuhuj, puetunu Pueyaso shipinishanojuanaa nojori jiitianura pueyaracaanura.

*Jesucristo quera tiuquihua*

<sup>6</sup> Na nuhuaji, Pueyaso seruuri cua sequeree:

—Cua niqutishano quiajaniyani, cua sequesanojuhuaj, puetunu cunujuanaari see-tanujuanaa. Puetunujuanaari tohuateeriquiano. Pueyasoori na Sohuanuta niishitiquiaa na sequesano caminiujiuniaa pueya, nojori pohuatanura pueya niquiara na niishitiniu panishano. Naajuhuj, nojuacuajaari quiaritia na seru jiyaroree, na tojitiajaca na niishitiniuria taa quiari naataja nojuaja tucuatanutaniya puetunu na sequesanojuanaani.<sup>7</sup> Pa Jiyaniijiacuajaari naa sequeya: “Janiya quera tiuquihua niaacuani”. Shuquiriaatia quijiaca cutaraari noo pojori, canapuate nio naajioneejinia Pueyasojiniji niishitishano tojjiacani.

<sup>8</sup>Janiyajanaacuajaari nio cua naajiotasano niquiniani, na tojiniajuhuaj. Janiya Juanni. Naa cua niqiniu nuhuajitij, cua tojiniu nuhuajijuhuj, janiyari Pueyaso seru pajama mojuquetareeni. Janiyari naa mojuquetaree nojuaja cua timitianura juucuan, juhua Pueyaso.<sup>9</sup> Nojuajaari cua sequequee saaja:

—¡Maja naa miiniu pueyanonaa! Janiyari Pueyaso serujuhuj, juhua quiajaniyajuhuj, juhua puetunu quiarta Pueyaso sequesano caminiujiuniaa pueyajuhuj. Naajuhuj, nio naajioneejinia naajiotasano tojjiaca pueyani, nojoriiri cuarta Pueyaso seyajuhuj. ¡Pueyasojanaa quia timitiare cutara!

<sup>10</sup> Cua sequerejaariuhuj:

—Pueyaso niishitishano nio naajioneejinia quia naajiotasanoni, cunoori maja saa quiaraja. Puetunu pueyajanaa cuara na niishiirianoj. Puetunu niya naajiotasanocuajaari quera tohuateya.<sup>11</sup> Naacuajitij, canapuate sesa na miiniu tarinitianu paniyaquiyani, sacuaraatia miiijiojuacajuhuj, cuara na tarinitiaaquiiriaqui. Saniniuujia, canapuate maninia miiijiojuaca cutarani, saaja Pueyasora poonijionuujuacajuhuj, nojori cuara tarinitiaaquiiria maninia nojori miiniujuhuaj.

<sup>12</sup> Pa Jiyaniijiacuajaari naa pa sequeya:

—¡Taaquiririnij! ¡Quera tiuquihuanijia! Janiyari cua tojitiajaca cua niqutiojoso-coriquiano casaa tiuquitianutaniuhuan. Janiyari puetunu nojorijianaa nareja niqutiojonutaniyani, maninia nojori miiniuucua quiria, nojori miishano jaara maninia quiri.<sup>13</sup> Pueyaso Rupaa cua quiniuucua, janiyari puetunu Pueyaso sequenu panishanojuanaa caminiujiuniani. Janiyari quiijajuhuanani. Majaari cua supueno quiquiaari. Janiyari puetunu casaajanaa coretanijiani, na shaajariquianojuhuaj.

<sup>14</sup> 'Shuquiriaatia quijiaca cutaraari noo pojori, canapuate juhuacaritia nojori jiuujia jeequecanu Borrego Niquiojua nanacatani. Nojoriiri juhua cohuajaque toqueyaraca quiniutianiya cua niquiara. Naacuajitij, nojoriiri tiuquitianishaanutaniya Pueyaso quiija tiacajinia, nojori mioonura pueyaracaanu pueya rishitijia naanajiniji.<sup>15</sup> Saniniuujia, nio pojoriiri Pueyaso tiaca mataca tamajiria jateenutaniya: sacuaraatia casaa miijiaca, shimiacuri, na camishoo maajipohua numuetucunujuaca, narta pueya puecojuaca, shipinijosano casaacuara jacamatujuaca juhua Pueyasooacara, cuaracashijionu porocua pueyano.

<sup>16</sup> 'Janiyacujaari cua seru jiyarorucuaa quiocuani, na niishitiniuria quiajaniya puetunu niya quia naajiotasanojuanaa, saniniuujia Pueyaso pueya maapue niquiara na caminiujiushaanura. Janiyacuajaari Jesuni, supuetana David niquiohuacuajinio caneno pueyajinijinio supueno, Jiyaniijajanaa cua quiniuria David niti. Naajuhuj, Pueyaso Niyanu cua quiniuucua, janiyari noo rijiani, joojeatej, taa janiyajiniji naajiotasano quia tariucuaanu Pueyaso Rupaajiniacuajani.

<sup>17</sup> Pueyaso Sohuanuuri Borrego Niquiojua niqioranota naa sequetiuya: “¡Miji Jiyaniijianaal!” Canapuate naa nio naajioneejinia naajiotasano tojiyani, nojori cuara naa sequeerajuhuj: “¡Miji!” Cante jiyamueyani, nojori cuara niiria, Pueyaso samiitianijotaja mohuacajiniji nojori ratunura. Na ratunaa pueyari, maja na ratunu sami na cumaneeca mashiniquishaanu.

<sup>18</sup> Cante nio naajioneejinia juhuacaritia Pueyaso niishitishano tojiriini, taa Pueyaso miiniutianiyan, janiyajanaari nia numooteyani, majaari quenaaja na pohuatasano nia jataniniu. Cante niya pohuatasano maateya socuani, Pueyasoori na saniitionutaniya nio naajioneejinia na pohuatasano naquiya na miitiaja casaata.<sup>19</sup> Naajuhuj, cante

nio naajioneejinia pohuatasano cuaracashitijiani, Pueyasoori cuno pueyano taanu-unutaniya, maja na quijia tiacajinia na tiuquiniuria. Naacujitij, majaari nojori mioonu quiniutianiya cuno tiacajinia naana jajau, pueyaracaanu rishijiaca nojori quiniuria, taa nio naajioneejinia na pohuatahiyacujani.

<sup>20</sup> Cante nio sequeyacujani, nojuajaari naa sequeya: “Taaquiririnij, quera tiuquihuanijia”.

Jaa, Jiyaniijia Jesunaa. ¡Naacuaaquiniatejaj! ¡Ritia quia nimiohua canaacua!

<sup>21</sup> Pa Jiyaniijia Jesu cuara puetunu nijaniyajanaa cumaquiiria na Sohuanuta.